


Tupanaarü Ore i Tóru Cori ya Ngechuchu ya

Cristuchiga



New Testament in Ticuna (PE:tca:Ticuna)

Tupanaarü Ore i Tóru Cori ya Ngechuchu ya Cristuchiga New Testament in Ticuna (PE:tca:Ticuna)

copyright © 2008 Wycliffe Bible Translators, Inc.

Language: Ticuna

Translation by: Wycliffe Bible Translators, Inc.

Ticuna

tca

Peru

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Ticuna

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 22 Feb 2024 from source files dated 29 Jan 2022

9d5dc22a-30be-5d26-85a9-76047f4c89e6

Contents

MATEU	1
MARCU	70
LUCA	110
CUÁŮ	181
PURACŮGŮ	232
DUMACŮĀX	294
1 CORĪTIUCŮĀX	326
2 CORĪTIUCŮĀX	354
GÁRATAANECŮĀX	372
EPÉCHIUCŮĀX	383
PIRIPUCŮĀX	394
COROCHACŮĀX	401
1 TECHARÓNICACŮĀX	408
2 TECHARÓNICACŮĀX	414
1 TIMUTÉU	418
2 TIMUTÉU	426
TITU	432
FILEMŮŮ	436
EBRÉUGŮ	438
CHAŮTIÁGU	463
1 PEDRU	470
2 PEDRU	478
1 CUÁŮ	484
2 CUÁŮ	491
3 CUÁŮ	492
YUDA	494
APOCARÍCHIU	497

ORE I MEXÛ GA MATEU ÜMATÛXÛ

*Ngechuchu ya Cristu natanüwa ngóxü ga duïxügüchiga
(Lc 3.23-38)*

- ¹ Ñaã nixĩ ga yema nuxcümáxügüxü ga duïxügü ga Ngechuchu ya Cristu natanüwa ngóxü. Rü yematanüwa rü Dabí nixĩ ga wüxi, rü Abraü nixĩ ga to.
- ² Rü Abraü rü Ichaánatü nixĩ.
Rü nüma ga Ichaá rü Acóbunatü nixĩ.
Rü nüma ga Acóbo rü Yudánatü rü naëneëgünatü nixĩ.
- ³ Rü Yudá rü Fárenatü rü Záranatü nixĩ. Rü Támara iyixĩ ga norü mamá.
Rü nüma ga Fáre rü Eróñnatü nixĩ.
Rü nüma ga Eróñ rü Aráñnatü nixĩ.
- ⁴ Rü Aráñ rü Aminadánatü nixĩ.
Rü nüma ga Aminadá rü Nachóñnatü nixĩ.
Rü nüma ga Nachóñ rü Charmóñnatü nixĩ.
- ⁵ Rü Charmóñ rü Boónatü nixĩ, rü Raá iyixĩ ga naë.
Rü nüma ga Boó rü Obénatü nixĩ, rü nae rü Rux iyixĩ.
Rü nüma ga Obé rü Ichaxínatü nixĩ.
- ⁶ Rü nüma ga Ichaxí rü ãëxgacü ga Dabínatü nixĩ.
Rü nüma ga ãëxgacü ga Dabí rü Charomóñnatü nixĩ. Rü ngima ga Bechabé ga Uría namëxchirëx ixícü iyixĩ ga naë ga Charomóñ.
- ⁷ Rü Charomóñ rü Roboáñnatü nixĩ.
Rü nüma ga Roboáñ rü Abíanatü nixĩ.
Rü nüma ga Abía rü Achánatü nixĩ.
- ⁸ Rü Achá rü Yochapánatü nixĩ.
Rü Yochapá rü Yoráñnatü nixĩ.
Rü nüma ga Yoráñ rü Uchíanatü nixĩ.
- ⁹ Rü Uchía rü Yotáñnatü nixĩ.
Rü Yotáñ rü Acánatü nixĩ.
Rü nüma ga Acá rü Echequíanatü nixĩ.
- ¹⁰ Rü Echequía rü Manachénatü nixĩ.
Rü Manaché rü Amóñnatü nixĩ.
Rü nüma ga Amóñ rü Yochíanatü nixĩ.
- ¹¹ Rü Yochía rü Yeconíanatü rü naëneëgünatü nixĩ. Rü yexguma nixĩ ga Babiróniãcũãx ga churaragü Yudíugüxü íyauñxü rü Babiróniãñewa nagagüãxü.
- ¹² Rü yexguma Babiróniãwa Yudíugüxü nagagüguwena, rü Yeconía nane ga Charatíe nabu. Rü nüma ga Charatíe rü Chorobabénatü nixĩ
- ¹³ Rü Chorobabé rü Abiúnatü nixĩ.
Rü Abiú rü Eriaquíñnatü nixĩ.
Rü nüma ga Eriaquíñ rü Achónatü nixĩ.
- ¹⁴ Rü Achó rü Chadóxnatü nixĩ.
Rü Chadóx rü Aquíñnatü nixĩ.
Rü nüma ga Aquíñ rü Eriúnatü nixĩ.
- ¹⁵ Rü Eriú rü Ereachánatü nixĩ.
Rü Ereachá rü Matáñnatü nixĩ.
Rü nüma ga Matáñ rü Acóbunatü nixĩ.
- ¹⁶ Rü Acóbu rü Yúchenatü nixĩ. Rü nüma ga Yúche rü María ngíte nixĩ. Rü ngima ga María rü Ngechuchu ya Cristu naë iyixĩ. Rü guma Ngechuchuxü nixĩ ga naxunetaxü ga Tupana.

17 Rū yemaãcū Abráũwa inaxügü ga yema duũxügü rü 14 nixĩ ñuxmata Dabíwa nangu. Rū yemawena to ga 14 inaxügü ga Dabíwa rü ñuxmata Babiróniãcũãx ga churaragü Yudíugüxũ íyauũxguwa nangu. Rū yemawena to ga 14 inaxügü ga yexguma Yudíugüxũ ínayauũxguwena rü ñuxmata Cristu buxguwa nangu.

Ngechuchu ya Cristuarü buxchiga
(Lc 2.1-7)

18 Rū ñããcū nixĩ ga yexguma nabuxgu ga Ngechuchu. Rū naẽ ga María rü marü Yúchemaã ixãtechaũ. Natürü naxũpa ga nügüna na nangugüxũ rü marü Tupanaãẽ i Üünexũãrũ ñnũãxũ ixããcũ.

19 Rū Yúche ga María ngĩtechaũ ixĩcũ rü wüxi ga mecü nixĩ. Rū yemacèx tama nanangoxẽẽchaũ ga yema na naxããcũxũ ga María. Rū nagu narüxĩnũ ga bexmamare ngĩxũ na ínatãxũ. 20 Rū yexguma yemagu ínaxĩnüyane, rü wüxi ga daxũcũãx ga Tupanaãrũ orearü ngeruũ, rü nanegüwa naxcèx nangox rü namaã nidexa. Rū ñanagürü nüxũ: —Pa Yúche Pa Dabítanũxũx, ¡tãxũ i ngĩxũ cuxoxũ i María na ngĩmaã cuxãmaxũ! Erü Tupanaãẽ i Üünexũ ngĩxna ñnũxũgagu nixĩ i naxããcũxũ. 21 —Rü ngĩma tá ngĩxũ nangẽxma ya wüxi ya ngine, rü cuma rü tá Ngechuchugu cunaxüéga. Rū ngẽma naega rü ‘maxẽeruxũ’ ñaxũchiga nixĩ, erü nüma tá norü pecadugüwa ínananguxũxẽẽ i norü duũxügü —ñanagürü. 22 Rū guxũma ga yema orearü ngeruũ nüxũ ixuxũ rü nangupetü na yanguxũcèx ga Cori ga Tupanaãrũ ore ga nuxcũmaũxũ ga norü orearü uruũwa nüxũ yaxuxũ ga ñaxũ:

23 “Rü tá tauemacü ngĩxũ inayarütaxu i ngẽma nge i taguma yatüxũ cuèxcü. Rü tá nayatü. Rü Emanue tá nixĩ i naega. Rü ngẽma naega rü ‘Tupana tatanüwa nangu’, ñaxũchiga nixĩ”, ñanagürü. 24 Rū yexguma pewa nabèiãchigu ga Yúche, rü nanaxü ga yema Tupanaãrũ orearü ngeruũ ga daxũcũãx namaã nüxũ ixuxũ. Rü Mariamaã naxãmèx. 25 Natürü taguma ngĩxũnèxü nacuèx ñuxmata nabu ga guma ngĩne. Rū Ngechuchugu nanaxüéga.

2

Ngechuchuxũ ínayadaugü ga yatügü ga nüxũ cuèxũchigüxũ

1 Rū Ngechuchu rü Yudéaanewa yexmane ga ñãne ga Beréũgu nabu ga yexguma Erode ãẽxgacü ixĩxgu ga yema nachiũãnewa. Rū yexguma nixĩ ga ñãne ga Yerucharéũwa nangugüxũ ga ñuxre ga yatügü ga nüxũ cuèxũchigüxũ ga woramacuriwa ngüexũ ga yaxũwa ne íxũ ga uèxcü ne ũxũwa. 2 Rū duũxügüna nacagüe, rü ñanagürügü: —¿Ngextá nixĩ i nangẽxmaxũ ya yima Yudíugüarü ãẽxgacü ya ngexwacèx bucü? Toma rü yéama tochiũãnewa nüxũ tadau ya norü woramacuri rü ngẽmacèx núma taxĩ na nüxũ tayarücuèxũũgüxũcèx —ñanagürügü. 3 Rū yexguma yemachigaxũ nacuèxgu ga ãẽxgacü ga Erode rü poraãcũ naxoegaãẽ. Rū guxũma ga duũxügü ga Yerucharéũcũãxgü rü ta naxoegaãẽgü. 4 Rū yexguma ga ãẽxgacü ga Erode rü naxcèx nangema ga guxũma ga paigüarü ãẽxgacügü rü ngüexẽeruũgü ga ore ga mugüwa nguxẽẽtaegüxũ. Rū nüxna naca, rü ñanagürü: —¿Ngexta nixĩ i nabuégaxũ ya Cristu? —ñanagürü. 5 Rū nümagü nanangãxũgü, rü ñanagürügü: —Nuã Yudéaanewa ngẽxmane ya ñãne ya Beréũgu tá nixĩ i nabuxũ. Yerü nuxcũmaũcü ga Tupanaãrũ orearü uruũ rü nachiga nanaxümatü, rü ñanagürü ga yema ore:

6 “Rü Beréũ ya ñãne ya Yudéaanewa ngẽxmane, rü yima rü tama wüxi ya ngexnerüünemare ya ñãne nixĩ, erü nagu tá nabu i ngẽma ãẽxgacü i taxũ

i Cristu. Rū nūma tá nūxna nadau i guxūma i Tupanaārū duūxūgū i Yudiūgū”,
 ñanagürü. ⁷ Rū yexguma ga ãëxgacū ga Erode rü bexma naxcèx naca ga yema yatūgū ga nūxū cuèxūchigūxū ga yaxūwa ne īxū. Rū nūxna naca ga tēxacū rü ngunexū na nangóxū ga noxri ga guma woramacuri. ⁸ Rū ñuxūchi ga Erode rü Beréūwa nanamugū ga yema yatūgū. Rū ñanagürü nūxū: — ¡Rū ngēma pexī rü meã naxcèx peyadēux i ngēma buxū. Rū ngēxguma nūxū ipeyangauxgu rü chomaã nūxū pixu na choma rü ta ngēma chaxūxūcèx, na nūxū chayarūcuèxūxūcèx i ngēma buxū! —ñanagürü. ⁹ Rū yexguma yema orexū naxīnūēguwena, rü inaxīāchi ga yema yatūgū. Rū guma woramacuri ga noxri nūxū nadaugūcū rü napēxegu nixūchigū rü ñuxmata guma bucū ga Ngechuchu íyexmaxūetūwa nangu. Rū yéma nayachaxāchi. ¹⁰ Rū yexguma guma woramacurixū nadaugūga ga yema yatūgū, rü poraācū nataēgū. ¹¹ Rū nagu nichocu ga guma ī ga nawa nayexmane, rü yexma nūxū nayangau ga guma bucū ngīmaã ga naē ga María. Rū guma bucūpegu nacaxāpūxūgū, rü nūxū nicuèxūūgū. Rū ñuxūchi nayawāxna ga norū baúxacūgū, rü õxchanana nanaxāmaregū ga uiru rü pumaragū ga yixichixū. ¹² Rū yemawena, ga yexguma napeeyane ga yema yatūgū, rü nanegūwa Tupana nayaxucuxēgū na tama Erodecèx nawoeguxūcèx. Rū yemacèx to ga namagu nachiuñānecèx nawoegu.

Equituanewa nabuxmū

¹³ Rū yexguma marū íyaxīxguwena ga yema yatūgū rü wūxi ga daxūcūāx ga Tupanaārū orearū ngeruū, rü nanegūwa Yúchecèx nangox, rü ñanagürü nūxū: —¡Nabèixāchi rü írūda! ¡Rū ínaxūxū namaã ya yima bucū rü naē rü Equituanewa naxū! ¡Rū ngēma pengēxmagū ñuxmatáta choma cumaã nūxū chixu na ñuxgu tá cutaeguxū! Erū ãëxgacū i Erode rü yima bucūcèx tá nadau na yamáāxūcèx —ñanagürü nūxū. ¹⁴ Rū yexguma ga Yúche rü nabèixāchi rü ínarūda. Rū yexgumatama chūtacū namaã inaxūāchi ga guma bucū ga Ngechuchu rü naē. Rū Equituanewa naxī. ¹⁵ Rū Equituanewa nayexmagū ñuxmata nayux ga ãëxgacū ga Erode. Rū yemaācū nangupetū na yanguxūcèx ga Tupanaārū ore ga nuxcūmaūcū ga norū orearū uruū nūxū ixuxū ga ñaxū: “Naxcèx changema ya Chaune rü Equituanena chanataeguxē”, ñaxū ga yema ore.

Erode nanamu na tūxū nadèixūcèx ga buxegū

¹⁶ Rū yexguma ãëxgacū ga Erode nūxū cuèxgu ga to ga namagu na nawoeguxū ga yema yatūgū ga nūxū cuèxūchigūxū ga yaxūwa ne īxū, rü poraācū nanu. Rū Beréūwa nanamugū ga norū churaragū na guxū ga yema naānewa tūxū nadèixūcèx ga guxāma ga guxema buxegū ga iyatūxe ga yexwacèx buexe rü ñuxmata taxre ga taunecū tūxū yexmagūxewa nangu. Yerū yema yatūgū ga yaxūwa ne īxū rü marū nūxū nixugūgū rü taxre ga taunecū nixī ga noxri na nangóxū ga guma woramacuri. ¹⁷ Rū yemaācū ningu ga ore ga nuxcūmaūxū ga Tupanaārū orearū uruū ga Yeremíā ūmatūxū ga ñaxū:

¹⁸ “Rū Ramáwa nūxū taxīnūē i wūxi i naga i poraācū ngechaūgaācūma auxexū. Rū Raquera iyixī i ngīxācūgūcèx poraācū auxcū. Rū taxuacūma ngīxū tataāxēēega, erū nayue i ngīxācūgū”,

ñanagürü ga yema ore. ¹⁹ Natürü yexguma marū nayuxguwena ga ãëxgacū ga Erode, rü Equituanewa rü wūxi ga daxūcūāx ga Tupanaārū orearū ngeruū rü nanegūwa Yúchecèx nangox. Rū ñanagürü nūxū: ²⁰ —Pa Yúchex, ¡írūda, rü pechiñānecèx namaã pewoegu ya yima bucū ya Ngechuchu! Erū marū

nayue i ngema duñxügü ya yima bucüxü imèxgüchaxüxü —ñanagürü. ²¹ Rü yexguma ga Yúche rü ínarüda rü nachitüñecèx namañ nataegu ga guma bucü rü naë. ²² Natürü yexguma Yúche nüxü cuáchigagu na Aqueránu ãëxgacüxü ingucuchixü nanatü ga Erodechicüü ga Yudéaanewa, rü namuñ ga Yúche ga yéma na naxüxü. Yerü wüxi ga daxüçüãx ga Tupanaärü orearü ngeruñ nanegüwa nanaxucüxë na tama yéma Yudéaanewa na naxüxüçèx. Rü yemacèx Gariréaanewa naxü. ²³ Rü yexguma Gariréaanewa nangugügu, rü ñane ga Nacharétuwa naxí, rü yexma naxächitügü. Rü yemañcü nangupetü na yangüçèx ga yema ore ga nuxcümañgüxü ga Tupanaärü orearü uruñgü nüxü ixugüxü ga ñaxü:

“Ngechuchu ya Cristu rü Nacharétuçüãxmañ tá nanaxugü”,
ñaxü.

3

Cuáñ ga baiñxëeruñ nüxü nixu ga Tupanaärü ore ga dauxchitawa ga ngextá taxúema íxãpataxüwa

(Mr 1.1-8; Lc 3.1-9, 15-17; Cu 1.19-28)

¹⁻² Rü yexguma Nacharétuwa nayexmagu ga Ngechuchu, rü Cuáñ ga baiñxëeruñ inanaxügü ga Tupanaärü orexü na yaxuxü ga Yudéaanewa ga dauxchitawa ngextá taxúema íxãpataxüwa. Rü duñxügümañ nüxü nixu rü ñanagürü: —¡Nüxü perüxoe i pecüma i chixexü! Erü marü ningaica na perü ãëxgacü na yïñü ya Tupana —ñanagürü. ³ Rü guma Cuáñ ga baiñxëeruñchiga nixí ga naxümatüñxü ga nuxcümañcü ga Tupanaärü orearü uruñ ga Ichaxía ga yexguma ñaxgu:

“Rü dauxchitawa i ngextá taxúema íxãpataxüwa tá nangëxma i wüxi i duñxü i ngema tagañcü ñaxü: ‘¡Pegü pemexëëx naxcèx ya Cori! ¡Rü naxcèx ipeyanawëxächixëëx i perü maxü!’ ”

ñaxü. ⁴ Rü naxchiru ga Cuáñ rü cameyutëxanaxcèx nixí, rü norü goyexü rü naxchëxmünaxcèx nixí. Rü beruremañ rü munümañ naxãwemü. ⁵ Rü yéma Cuáñxütawa inayarüxñüëgüxü ga duñxügü ga Yerucharéçüãx, rü duñxügü ga guxü ga Yudéaanewa ne íxü, rü duñxügü ga natü ga Yudáñärü ngaicamagu áchitügüxü. ⁶ Rü guxema duñxëgü ga nüxü ixugüexe ga tümaärü pecadugü, rü Cuáñ rü tüxü ínabaiñxëë ga natü ga Yudáñwa. ⁷ Natürü yexguma Cuáñ nüxü dëuxgu ga naxütawa na nangugüxü ga muxüma ga ãëxgacügü ga Parichéugü rü Chaduchéugü na ínabaiñxëëãxüçèx, rü Cuáñ ñanagürü nüxü: —Pa Áxtapearü Duñxügüx, çrü texé pemañ nüxü tixu na naxchaxwa pibuxmüxüçèx i ngëma Tupanaärü poxcu i ãñcümáñ i marü ingaicaxü? ⁸ —¡Rü penaxwëxe na Tupana naxwëxexüñcüma pemaxëxü na ngëmañcü guxüma i duñxügü nüxü nadaugüxüçèx na aixcüma marü nüxü perüxoexü i ngëma pecüma i chixexü! ⁹ —Erü Tupanapëxewa rü taxuwama name na pegü pixuxü na Abráñtanüxü i Yudíugü pixíngüxü erü tama ngëmacèx nixí ya Tupana i duñxügüxü nayaxuxü. Rü pemañ nüxü chixu rü ngëxguma Tupana naxwëxegu, rü tama nüxü naguxcha na daa nutawa Abráñtanüxü nanguxüxëxü. ¹⁰ —Rü Tupanaärü yuema rü marü ímemare na nadaxüxüçèx i ngëma nanetügü i tama mexü. Rü guxüma i nanetügü i chixearü õõxü rü tá nadaxü, rü ñuxüchi tá ínagu —ñanagürü. ¹¹ Rü ñanagürü ta ga Cuáñ: —Choma rü aixcüma dexáwamare pexü íchabaiñxëë na togü i duñxügü nüxü cuáñcèx na aixcüma marü nüxü perüxoexü i pecüma i chixexü. Natürü choweama tá ínangu i to i Tupanaärü orearü uruñ. Rü nüma tá pexütawa nanamu i Tupanañe i üñnexü na naporaexëëãxü i ngëma Tupanawe rüñxü, rü nüma tá nanapoxcue i ngëma Tupanaxü oexü. Erü nüma rü porañcü choxü narüyexera

na ãêxgacü yïxũ. Rũ choma rũ napêxewa rũ taxuwama chame rũ bai i norũ chapatuarũ ngewaxũra chame. ¹² –Rũ nũma rũ marũ ínamemare na ñoma i naãnewa yadexechiãxũcèx i norũ duũxũgũ ñoma wũxi i yatũ trigu naãtũna idexechixũrũ. Rũ ngẽmaãcü tá nayadexechi i ngẽma noxrũ ixĩgũxũ na naxũtawa nangẽxmagũxũcèx, natũrũ ngẽma tama noxrũ ixĩgũxũ rũ tá ínanagu nawa ya yima üxũ ya taguma ixoxũne –ñanagũrũ ga Cuáũ.

Ngechucharũ baiechiga
(Mr 1.9-11; Lc 3.21-22)

¹³ Rũ yexguma nixĩ ga Gariréaanewa ne naxũxũ ga Ngechuchu. Rũ Cuáũxũtawa nanguxũ ga Yudáũ ga natũwa, na Cuáũ ínabaixẽẽxũcèx. ¹⁴ Rũ noxri rũ tama Ngechuchuxũ ínabaixẽẽchaũ ga Cuáũ. Rũ ñanagũrũ nũxũ: –Choxũ waxi nixĩ i namexũ na ícubaixẽẽxũ. ¿Rũ ñuxãcü i cuma i chauxũtawa cuxũxũ na choma cuxũ íchabaixẽẽxũcèx? –ñanagũrũ. ¹⁵ Natũrũ ga Ngechuchu rũ ñanagũrũ nũxũ: –Name nixĩ i choxũ ícubaixẽẽ i ñuxmax. Erũ name nixĩ i tanaxũ i guxũma i ngẽma Tupana tũxũ muxũ –ñanagũrũ. Rũ yexguma ga Cuáũ rũ: –Ngũ –ñanagũrũ. ¹⁶ Rũ yexguma marũ Cuáũ Ngechuchuxũ íbaixẽẽguwena, rũ dexáwa ínaxũãchigu ga Ngechuchu. Rũ yexgumatama niwãxna ga daxũguxũ ga naãne, rũ Ngechuchu nũxũ nadau ga Tupanaãe i Üünexũ ga wũxi ga muxtucurũ na inagoxũ rũ nũxna na nanguxũ. ¹⁷ Rũ dauxũwa inanaxũ ga wũxi ga naga ga ñaxũ: –Daa nixĩ ya Chaune ya nũxũ changechaũxũchicũ, rũ poraãcü namaã chataãẽxũchicũ –ñaxũ.

4

Ngechuchuxũ naxũ ga Chataná
(Mr 1.12-13; Lc 4.1-13)

¹ Rũ yemawena rũ Tupanaãe i Üünexũ rũ wũxi ga nachica ga ngextá taxũema íxãpataxũwa Ngechuchuxũ naga na yéma Chataná nũxũ üxũcèx. ² Rũ taguma nachibũ ga 40 ga ngunexũ rũ 40 ga chũtaxũ. Rũ yemawena rũ nataiya. ³ Rũ yexguma ga ngoxo ga Chataná rũ Ngechuchuxũtawa nangu, na nũxũ naxũxũcèx. Rũ ñanagũrũ nũxũ: –Ega aixcũma Tupana Nane quixĩgu, jrũ daa nutagũxũ namu na pãũxũ nanguxũxũcèx! –ñanagũrũ ga Chataná. ⁴ Natũrũ Ngechuchu nanangãxũ, rũ ñanagũrũ: –Tupanaãrũ ore i ümatũxũ rũ ñanagũrũ:

“Tãũtãma pãũxĩca nanamaxẽẽ i duũxũgũ, natũrũ guxũma i ore i Tupana nũxũ ixuxũ nixĩ i duũxũgũxũ maxẽẽxũ”,

ñanagũrũ. ⁵ Rũ yexguma ga ngoxo ga Chataná rũ guma ñãne ga üünene ga Yerucharéũwa nanaga. Rũ tupauca ga taxũnetapêxegu nanamunagũ. ⁶ Rũ ñanagũrũ nũxũ: –Ega aixcũma Tupana Nane quixĩgu, jrũ nuã cugũ rütáe! Erũ Tupanaãrũ ore i ümatũxũwa rũ ñanagũrũ:

“Tupana tá nanamu i norũ orearũ ngeruũgũ i daxũcũãx na cuxna nadaugũxũcèx. Rũ naxmẽxmaã tá cuxũ niyauxgũ na tama tacũ rũ nutagu cunguxũcèx”,

ñanagũrũ. ⁷ Rũ Ngechuchu nanangãxũ rũ ñanagũrũ: –Rũ Tupanaãrũ ore i ümatũxũ rũ ñanagũrũ ta:

“¡Tama name i nũxũ na cuxũxũ ya Cori ya curũ Tupana!”

ñanagũrũ. ⁸ Rũ yexguma wenaxãrũ ga ngoxo ga Chataná rũ wũxi ga mèxpũne ga máxpũxũchinetapêxewa nanaga. Rũ yéma Ngechuchuxũ nanawẽx ga guxũma ga nachiũãnegũ na ñuxãcü yamexẽchixũ. ⁹ Rũ Chataná rũ ñanagũrũ nũxũ: –Choma chi cuxna chanaxã i guxũma i ñãã cuxũ chawéxũ i ngẽxguma chi chopêxegu cucaxãpũxũgu rũ choxũ quicuèxũũgu –ñanagũrũ. ¹⁰ Rũ

yexguma ga Ngechuchu rü ñanagürü nüxü: —¡Choxna ixügachi, Pa Chatanáx! Erü Tupanaârü ore i ümatüxü rü ñanagürü:

“¡Nüxü icuèxüü ya Cori ya curü Tupana, rü yimaãxüxĩcatama napuracü!” ñanagürü. ¹¹ Rü yexguma ga ngoxo ga Chataná rü Ngechuchuna nixügachi. Rü Ngechuchuxütawa nangugü ga daxüçüãx ga Tupanaârü orearü ngeruügü. Rü Ngechuchuxü narüngüxëëgü rü nüxna nadaugü.

*Ngechuchu rü inanaxügü ga norü puracü ga Gariréanewa
(Mr 1.14-15; Lc 4.14-15)*

¹² Rü yexguma Ngechuchu nüxü ñnugu ga na napoxcuxü ga Cuáü ga baiüxëëruü, rü Gariréanewa naxü. ¹³ Natürü tama ñãne ga Nacharétugu narüxãüx, rü ñãne ga Capernáüwa naxü na yexma yaxãchiüxüçèx. Rü guma ñãne rü naxtaxa ga Gariréacutüwa nayexma ga Chaburãütanüxü rü Netarítanüxü ga duüxügü ixãchiügüxüwa. ¹⁴ Rü yema nangupetü na yangüçèx ga ore ga nuxcümaüçü ga Tupanaârü orearü uruü ga Ichaxía ümatüxü ga ñaxü:

¹⁵⁻¹⁶ “Rü duüxügüçèx tá nangox i wüxi i ngóonexëëruü i Chaburãüârü naãnewa, rü Netaríarü naãnewa, rü Yudáüârü tocutüwa rü ngëma nama i taxtücutüwa nadaxüwa, rü Gariréanewa i ngextá duüxügü i tama Yudíugü ixígüxü ixãchiügüxüwa. Rü ngëmaãçü i ngëma duüxügü ga noxri eãnexüwa yexmagüxü, rü tá nüxü nadaugü i wüxi i taxü i ngóonexëëruü. Rü ngëma duüxügü ga noxri yutüüwa yexmagüxü rü tá nüxü nabaxi i ngëma ngóonexëëruü”,

ñanagürü ga yema Ichaxíaarü ore. ¹⁷ Rü yexgumaüçüü nixĩ ga inaxügüãxü ga Ngechuchu ga nüxü na yaxuchigaxü ga norü ore ga ñaxü: —¡Nüxü perüxoe i pecüma i chixexü! Erü marü ningaica na perü ãëxgacü na yíxü ya Tupana —ñaxü.

*Ngechuchu rü naxcèx naca ga ãgümüçü ga püchaetanüxü
(Mr 1.16-20; Lc 5.1-11)*

¹⁸ Rü yexguma naxtaxa ga Gariréaanacügu yaxüxgu ga Ngechuchu, rü yéma nüxü nadau ga taxre ga yatü ga nügüeneëgü ixígüxü. Rü wüxi rü Chimáü ga Pedrugu ãegaxü nixĩ. Rü to rü Aüdrégu ãegaxü nixĩ. Rü nümagü rü ñnapüchaegü, yerü woetama püchaetanüxü nixígü. ¹⁹ Rü yexguma ga Ngechuchu rü ñanagürü nüxü: —¡Chowe perüxĩ! Rü chorü puracüwa tá pexü chamugü na chauxütawa penagagüçèx i duüxügü —ñanagürü. ²⁰ Rü yexgumatama ga yema taxre, rü yéma nanatëxgü ga norü püchagü. Rü Ngechuchuwe narüxĩ. ²¹ Rü yéamaxüra naxü ga Ngechuchu, rü yéma nüxü nadau ga to ga taxre ga nügüeneëgü. Rü Acobu nixĩ ga wüxi, rü Cuáü nixĩ ga to. Rü Zebedéu nanegü nixĩ ga nümagü. Rü nanatümaã wüxi ga nguewa nayexmagü. Rü yéma ñanangáitagü ga norü püchagü. Rü Ngechuchu naxcèx naca. ²² Rü yexgumatama yéma nguewa tüxü natëxgü ga nanatü. Rü Ngechuchuwe narüxĩ.

*Ngechuchu nanangüexëë ga muxüma ga duüxügü
(Lc 6.17-19)*

²³ Rü guxü ga Gariréaanegu nixügüchigü ga Ngechuchu. Rü wüxichigü ga ñãnewa, rü duüxügüarü ngutaquëxepataüwa ningüxëëtaechigü. Rü duüxügümaã nüxü nixuchiga ga ore ga mexü na ñnuxãçü ãëxgacü yíxü ya Tupana. Rü guxüma ga duüxügü ga yema idaaweexü rü nanameëxëë ga woo nañuxraüxü ga norü ñaawe nüxü yexmaxü, rü naxcèx nitaanegü. ²⁴ Rü Ngechuchuxü nacuáchigagü ga guxüma ga duüxügü ga Chíríaanecüãx. Rü naxütawa nanagagü ga nagüxüraüxü ga ñaxweanemaã idaaweexü. Rü

yematanüwa nayexma ga duüxügü ga ngúanemaã idaaweexü, rü duüxügü ga poraãcü naxünewa nangúxü, rü duüxügü ga ngoxo nawa yexmaxü, rü duüxügü ga óxwaãxgüxü, rü duüxügü ga nawãixãchigüxü. Rü Ngechuchu nanameëxëë ga guxüma ga yema. ²⁵ Rü Ngechuchu narüxí ga muxüma ga duüxügü ga Gariréaanecüãx, rü Decaporíchiuanecüãx rü Yerucharéüçüãx, rü Yudéaanecüãx, rü natü ga Yudáüârü tocutüçüãx.

5

Ngechuchu rü mëxpünewa nüxü nixu ga Tupanaârü ore

¹ Rü yexguma Ngechuchu nüxü dëuxgu ga yema muxüma ga duüxügü, rü wüxi ga mëxpünewa ínaxüãchi namaã ga norü ngúexügü. Rü yéma narüto, rü norü ngúexügü nüxü ínachomaëguãchi.

Yíxema taãëgüxechiga (Lc 6.20-23)

² Rü inanaxügü ga Ngechuchu ga na nangúexëëãxü, rü ñanagürü: ³ –Tataãëgü ya yíxema nüxü icuèxãchitanüxë i tümaârü pecadu rü nüxü rüxoexe. Erü tümacèx nixí i ngema daxügüxü i naane i Tupana ãëxgacü íxíxüwa. ⁴ –Tataãëgü ya yíxema ngechaügüxe, erü Tupana tá tüxü nataãëxëë. ⁵ –Tataãëgü ya yíxema tama tügü icuèxüxügüxe, erü tá tanayauxgü i ñoma i naãne i Tupana tümamaã ixunetaxü. ⁶ –Tataãëgü ya yíxema poraãcü tüxü nangúchaüxë na Tupanapëxewa meã tamaxëxü, erü Tupana tá tüxna nanaxã i ngëma maxü i mexü i naxcèx tadaugüxü. ⁷ –Tataãëgü ya yíxema togü i duüxügü tüxü ngechaütümüügüxe, erü tümagü rü tá ta Tupanaãxü tangechaütümüügü. ⁸ –Tataãëgü ya yíxema tama chixexügu rüxnüëxë i tümaãëwa, erü yíxemagü tá tixígü ya Tupanaxü daugüxe. ⁹ –Tataãëgü ya yíxema togüarü chogürüü ixígüxe, erü Tupana rü nanegümaã tá tüxü naxu. ¹⁰ –Tataãëgü ya yíxema togü i duüxügü tümachi aiexe naxcèx na Tupana naxwèxexüãcüma meã tamaxëxü. Erü tümacèx nixí i ngema daxügüxü i naane i Tupana ãëxgacü íxíxüwa. ¹¹ –Petaãëgü i pema ega duüxügü tacü pemaã ixugüegu, rü chixri pemaã namaxëgu, rü chaugagu doramaã poraãcü chixri pechiga yad exagügu. ¹² –Rü petaãëgüama rü tama pexoegaãëgü! Erü daxügüxü i naãnewa tá penayauxgü i wüxi i perü ãmare i mexëchixü. Rü ngëma ñuxma pexü ngupetüxürüü nixí ga nüxü nangupetüxü ga nuxcümaügüxü ga Tupanaârü orearü uruügü, yerü ga duüxügü rü naxchi rü ta naxaie.

Yucürarüü rü omürüü pixígü i ñoma i naãnewa (Mr 9.50; Lc 14.34-35)

¹³ –Pema rü ñoma yucürarüü pixígü i ñoma i naãnewa. Erü yima yücüra rü õna na namexëëxürüü, rü ngëxgumarüü ta i pema rü ñoma i naãnecüãx i duüxügüarü mexëëruü pixígü. Natürü ngëxguma chi nangeacagu ya yücüra, çrü tacüwa chi i namexü i ngëxgumax? Rü dücax, rü taxuwama name, rü ítanatèxmare, rü ngema duüxügü nawa nangagü. ¹⁴ –Pema rü ñoma i naãnecüãxârü ngóonexëëruü pixígü. Rü wüxi ya ñane ya wüxi ya mëxpünewa ngëxmane, rü taxuacüma inicux. ¹⁵ –Rü taxúema wüxi i omüwa tanangixichi na wüxi i caichãütüügu na tayaxücuchixüçèx. Natürü wüxi i omüwa tanangixichi na norü üchicaügu tanaxünagüxüçèx, na ngema tüxü nabaxixüçèx ya guxãma ya yíxema yima ñwa ngëxmagüxe. ¹⁶ –Rü name nixí i duüxügüpëxewa na meã pemaxëxü. Erü ngëmaãcü i pema rü omügürüü tá pinaígü. Rü ngëmaãcü duüxügü tá nüxü nadaugü i ngëma mexü i pexüxü, rü tá nüxü nicuèxüügü ya Penatü ya daxüwa ngëxmacü.

Ngechuchu nanangúexëë ga mugüchiga

17 —Tama name i nagu perüxĩnũẽ na núma chaxũxũ na ichayanaxoxẽxũcèx i Tupanaãrũ mugũ ga Moĩché ùmatũxũ, rü yema ore ga nuxcũmaũgũxũ ga Tupanaãrũ orearũ uruũgũ namaã nguxẽẽtaegũxũ. Natürũ núma chaxũ na meã chayanguxẽẽxũcèx i ngẽma mugũ, rü tama na ichayanaxoxẽxũcèx. 18 —Rü aixcũma pemaã nüxũ chixu, rü ñuxma na tama nangupetũxũ i daxũguxũ i naane rü ñoma i naãne rü taxucürũwa naxũchicũxũ i ngẽma mugũ, rü bai i Írarũwa ñuxmatáta yangu i guxũma i ngema mugũ nüxũ nixuxũ. 19 —Rü ngẽmacèx ya yíxema tama naga ñnũxẽ i ngẽma mugũ, rü woo i tacũ i Íraxũ i ngẽma nüxũ yaxuxũ rü duũxũgũxũ tangúexẽẽxgu na nũmagũ rü ta tama naga naxĩnũxũcèx, rü yíxema rü tá guxũãrũ yexera wixweama tatèx i Tupana ãẽxgacũ íxĩxũwa. Natürũ yíxema naga ñnũxẽ i Tupanaãrũ mugũ rü duũxũgũxũ ngúexẽẽxè na tũmagũ rü ta naga taxĩnũxũcèx, rü guxũpèxewa tá taxũ i Tupana ãẽxgacũ íxĩxũwa. 20 —Rü pemaã nüxũ chixu, rü ngẽxguma tama Parichéugũ rü ngúexẽẽruũgũ i ore i mugũwa nguxẽẽtaegũxũãrũ yexera meã pemaxẽgu, rü tagutáma Tupana íngexmaxũwa pichocu.

*Ngechuchu nanangúexẽẽ na tama namexũ na texé tũmaẽneẽmaã na nuxũ
(Lc 12.57-59)*

21 —Pema rü marũ nüxũ pexĩnũẽ ga Moĩchéarũ ore ga nuxcũmaũgũxũ ga duũxũgũmaã nüxũ yaxuxũ ga ñaxũ:
“¡Tãxũ i pemáẽtagũxũ! Erũ texé yamáẽtaxe rü tá tapoxcu”,
ñaxũ. 22 —Natürũ choma rü pemaã nüxũ chixu rü texé ya tũmaẽneẽmaã nuxẽ,
rü tá tapoxcu. Rü texé ya tacũ tũmaẽneẽmaã ixugũxe, rü ãẽxgacũgũpèxewa tá
tũxũ nagagũ na tũxũ napoxcuxũcèx. Rü texé ya tũmaẽneẽxũ ngoxo wogũxe,
rü ãũcũmaxũwa tangẽxma, erũ ngürũãchi tá tapoxcu nagu ya yima üxũ ya
ngoxo nagu poxcuene. 23-24 —Rü ngẽxguma tupaucawa Tupanana cunaxãxgu
i curũ dñeru, rü ngẽma nüxna cucuèxãchigu na tacũcèx cumaã nanuxũ i
cueneẽ, ¡rü ngẽxma tupaucagutama naxũ i ngẽma curũ ãmare i Tupanana
cuxãxchaũxũ! ¡Rü cueneẽxũtawa naxũ, rü namaã yamexẽẽxĩra i ngẽma
cuxchi na naxaixũ! Rü ngẽmawena rü marũ name i tupaucacèx cutaegu na
Tupanana cuyaxãmarexũcèx i curũ dñeru. 25 —Rü ngẽxguma chi wũxie wũxi i
ngetanücèx cuxũ íxuaxũgu, rü ãẽxgacũxũtawa cuxũ tagaxgu, rü name nixĩ i
namawatama tũxũ curũngũxmũxẽẽ na tama ãẽxgacũpèxewa cuxũ tagaxũcèx.
Erũ wũxicana na ãẽxgacũxũtawa cunguxũ, rü ãẽxgacũ tá purichíagũna cuxũ
namu na cuxũ napoxcuxũcèx. 26 —Rü aixcũma cumaã nüxũ chixu rü tãũtáma
ngema poxcupataũwa ícunguxuchi ñuxmatáta ngĩxũ cuxũtanũ i guxcũ i ngẽma
dñeru i nüxũ ngĩxũ cungetanücũ. Rü name nixĩ i paxa Tupanana peca na pexũ
nüxũ nangechaũxũcèx i perũ pecadugũ na tama pexũ napoxcuexũcèx.

*Ngechuchu namaã nangúexẽẽtae na tama namexũ na wũxi i ngemaã chix-
exũgu rüxĩnũxũ*

27 —Pema marũ nüxũ pexĩnũẽ ga Tupanaãrũ mu ga Moĩché nuxcũma nüxũ
ixuxũ ga ñaxũ:
“¡Tama name i naĩ i ngemaã na icupexũ!”
ñaxũ. 28 —Natürũ choma rü pemaã nüxũ chixu, rü yíxema texé ya wũxi i
ngexũ dawenũxẽ rü tũxũ nangúchaũxẽ na ngĩmaã itapexũ, rü Tupanapèxewa
rü marũ chixexũ ngĩmaã taxũ i tũmaãẽwa. 29 —Rü ngẽxguma chi yima curũ
tũgũnèxètũ pecadu cuxũ üxẽẽgu rü ¡noxtacũma nayaxu rü yaxũgu naña! Erũ
narũmemaẽ nixĩ na yima cuxetũxicatama iyarũtaxuxũ na tama guxũ i cuxune
iyarũtaxuxũcèx nagu ya yima üxũ ya ngoxogũ nagu poxcuene. 30 —Rü
ngẽxguma chi yima curũ tũgũnemèxè pecadu cuxũ üxẽẽgu, rü name nixĩ
i noxtacũma ícunadae rü yaxũgu cuyaña. Erũ narũmemaẽ nixĩ na yima
cuxmèxĩcatama iyarũtaxuxũ na tama guxũ i cuxune iyarũtaxuxũcèx nagu ya

yima üxü ya ngoxogü nagu poxcuene. Rü ngēmaācü ega woo pexü naguxchagu rü name nixi i nüxna pixigachi i guxüma i chixexü i nagu piyixchaüxü –ñanagürü.

Ngechuchu namaā nangúexēētae na tama namexü na texé tümamèxü ítáxü (Mt 19.9; Mr 10.11-12; Lc 16.18)

³¹ Rü ñanagürü ta ga Ngechuchu: –Moiché rü üpa nüxü nixu rü yixema tümamèxü ítáxe, rü tanaxwèxe i ngixna tanaxā i wüxi i popera i nawa nüxü tixuxü na marü ngixü ítatáxü. ³² –Natürü choma rü pemaā nüxü chixu, rü ngëxguma wüxi ya yatü naxmèxü ítèxgu, rü chi tama nañ ya yatümaā nangēāxügagu yixigu, rü āücümaxüwa ngixü tangëxmaxēē erü ngēmaācü ngürüāchi pecadu ixü. Rü yixema ngīmaā āmaxē i wüxi i nge i marü ngīte ngixü ítèxcü, rü tüma rü ta pecadu taxü.

Ngechuchu namaā nangúexēētae ga unetachiga

³³ Rü ñanagürü ta ga Ngechuchu: –Pema rü marü nüxü pexinüē ga Moichéarü ore ga nuxcümaügüxü ga duüxügümaā nüxü yaxuxü ga ñaxü: “Ngëxguma Tupanaegagu texémaā tacüçèx icuxunetagu, rü name nixi i cuyan-guxēē i ngēma curü uneta”,

ñaxü. ³⁴ –Natürü choma rü pemaā nüxü chixu rü tama name i texéégagu rü éxna tacüégagu wüxi i duüxümaā ipexuneta. Rü tama name i daxügüxü i naāneegagu ipexuneta, erü ngēma narüto ya Tupana. ³⁵ –Rü tama name i ñoma i naāneegagu ipexuneta, erü Tupanaärü cuaixcutüchica nixi. Rü tama name i Yerucharéüegagu ipexuneta, erü Tupana ya guxüärü āëxgacüarü iāne nixi. ³⁶ –Rü tama name i cügüégagu icuxuneta, erü woo wüxitama i cuyae rü taxucürüwa cunaxüchicüü na nachóxüçèx rü éxna nawaxüçèx. ³⁷ –Rü ngēmacèx rü ngëxguma icuxunetagu rü narümemaē nixi i: –Ngü, tá chanaxü –ñaperügü, rü éxna: –Tāütáma chanaxü –ñaperügü. Erü guxüma i to i ore i namaā icuxunetaxü, rü ngoxo i Chatanáwa ne üxü nixi.

Ngechuchu namaā nangúexēētae na ñuxācü namexü na namaā ichopetüxü i ngēma duüxügü i chixri tamaā maxèxü

³⁸ Rü ñanagürü ta ga Ngechuchu: –Pema rü marü nüxü pexinüē ga Tupanaärü mu ga Moiché nuxcüma nüxü ixuxü ga ñaxü:

“Ngëxguma texé wüxi i duüxüxü icháixetüxēēgu, rü tümaxëtümaātama tayangutanüxēē. Rü texé wüxi i duüxüxü ibüepütagu, rü tümapütamaātama tayangutanüxēē”,

ñaxü. ³⁹ –Natürü choma rü pemaā nüxü chixu rü tama name i pegütama ípèpoxü nüxna i duüxü i chixecümaxü. Rü ngëxguma texé cuxü pechiwegu, rü marü name i curü tochiwe rü ta icunaxā na ngēma rü ta cuxü tapechiwèxüçèx rü tama name na cuxütanüxü. ⁴⁰ –Rü ngëxguma texé cuxü íyaxuaxügu rü cuxna tayapuchaxügu i curü daxü, rü name nixi i curü gáuxüchiru rü ta noxtacüma tüxna cunaxā. ⁴¹ –Rü ngëxguma texé cuxü müxgu na wüxi i kilómetrugu tacü tüxü quingexüçèx, rü name nixi i taxre i kilómetrugu tüxü cuyange. ⁴² –Rü ngëxguma texé curü ngēmaxüçèx cuxna caxgu, rü name nixi i tüxna cunaxā. Rü tama name na namaā cuxaüxü i curü ngēmaxügü ega texé paxaāchi cuxna naxçèx caxgu.

Name nixi i nüxü tangechaü i ngēma tamaā rüüwanügüxü

⁴³ Rü ñanagürü ta ga Ngechuchu: –Pema rü marü nüxü pexinüē ga Tupanaärü mu ga Moiché nuxcüma nüxü ixuxü ga ñaxü:

“¡Nüxü nangechaü i cumücü, rü naxchi naxai i curü uwanü!”

ñaxü. ⁴⁴ –Natürü i choma rü pemaā nüxü chixu rü: –¡Nüxü pengechaü i perü uwanügü! ¡Rü naxçèx peyumüxē i ngēma duüxügü i chixexümaa

pewe ingexütanüxü! ⁴⁵ –Rü ngëxguma ngëmaäcü pemaxëgu rü aixcüma Penatü ya daxügücü nanegü tá pixīgü. Erü nüma rü inanabáixëë ya üèxcü naxcèx i mexü i duüxügü rü chixexü i duüxügü. Rü nanapuxëë naxcèx i duüxügü i meã maxëxü rü duüxügü i chixri maxëxü. ⁴⁶ –Rü ngëxguma chi ngëma duüxügü i pexü ngechaügüxüxüxicatama pengechaügügu, ¿rü tacü rü ãmare tá Tupanaxütawa peyauxgü naxcèx i ngëma? Erü ngëma yatügü i Dumaärü äëxgacücèx dïëru ngïxü ideetanüxüwa puracüexü rü ngëxgumarüü nanaxügü. ⁴⁷ –Rü ngëxguma chi peeneëgüxüxicatama perümoxëgu, rü guxü i duüxügürütama pixīgü. Erü woo ngëma duüxügü i tama Tupanaxü cuëxgüxü, rü ngëxgumarüütama nanaxügü. ⁴⁸ –Rü ngëmacèx penaxwae na aixcüma namexü i perü maxü naxrüxü ya Penatü ya Tupana ya aixcüma mearü maxüäcü.

6

Ngechuchu rü norü ngúetanüxüxü nangúexëë na ñuxäcü mexü naxügüxü

¹ Rü ngëxguma tacü rü mexü pexüxchaügu, rü name nixi i pexuãë na tama duüxügüpëxewa penaxüxü i ngëma na duüxügü pexü dauxücèx rü pexü yacuëxüügüxücèx. Erü ngëxguma duüxügü pexü icuëxüügüxücèx mexü pexüxgu, rü Penatü ya daxügücü rü täütáma ãmare pexna naxã. ² –Rü ngëmacèx ngëxguma texéxü curüngüxëëchaügu, rü name nixi i tama poraäcü nüxü quixuchiga i ngëma. Rü tama name i ngëma duüxügü i togüpëxewa meã maxënetaxürüü na quiixü. Erü nümagü rü norü me nixi i ngutaquëxepataügüwa rü ítamügüwa nüxü nixuchiga ega tacü rü mexü naxügügu. Rü ngëmaäcü nanaxügü na togü meã nachiga idexagüxücèx. Natürü choma rü aixcüma pemaã nüxü chixu rü ngëma na duüxügü nüxü icuëxüügüxü nixi i norü ãmare, rü täütáma nanayauxgü i to i ãmare i Tupanaxütawa. ³⁻⁴ –Natürü i cuma rü ngëxguma tacü tuxna cuxãxgu ya yíxema ngearü ngëmaxüãxgüxe, rü name nixi i taxúema cuxü dauäcüma na cunaxüxü i ngëma. Rü woo cumücüxüchi rü tama name i nüxü na nacuáxü i ngëma. Rü Cunatü ya daxügücü ya nüxü daucü i ngëma cuxicatama cuxüxü, rü tá cuxna nanaxã i curü ãmare.

Ngechuchu nanangúexëë ga yumüxëchiga

(Lc 11.2-4)

⁵ –Rü ngëxguma peyumüxëgügu, rü tama name i ngëma duüxügü i togüpëxewa meã maxënetaxürüü pixīgü. Erü nümagü rü ngëxguma nayumüxëgügu, rü norü me nixi na chiäcü nayumüxëgüxü i ngutaquëxepataügüwa rü ítamügüwa na duüxügü nüxü na daugüxücèx. Rü aixcüma pemaã nüxü chixu rü ngëma na duüxügü nüxü daugüxüxicatama nixi i norü ãmare. ⁶ –Natürü ngëxguma cuyumüxëgu, rü name nixi i curü ucapugu cuxücu, rü cunawãxta i curü iãx, rü ngëma cuyumüxë namaã ya Cunatü ya bexma cumaãxicatama ngëma ngëxmacü. Rü ngëxguma ya yima Cunatü ya Tupana ya nüxü daucü i ngëma cúäcü cuxüxü, rü nüma tá cuxna nanaxã i curü ãmare. ⁷ –Rü tama name i natüçèxma cunamëxëë i curü yumüxë naxrüü i ngëma duüxügü i tama Tupanaxü cuëxgüxü. Erü nümagü rü nagu narüxïnüë rü ngëma na namëxëëgüãxücèx i norü yumüxë rü Tupana tá nüxü naxïnü. ⁸ –Rü tama name i ngëma duüxügürüü pixīgü, erü woo tauta naxcèx ípecaxgu rü Penatü ya Tupana rü marü nüxü nacuëx na tacü pexü taxüxü. ⁹ –Rü ngëmacèx rü ñaäcü tá peyumüxëgü i pemax:

“Pa Tonatü ya Daxügücüx, rü aixcüma üüneçü quixi i cumax. ¹⁰ ;Rü núma naxü na torü äëxgacü quiixücèx! Rü tanaxwëxe i curü ngúchaü na naxügüxü i duüxügü i ñoma i naãnewa ngëxgumarüü i daxügüxü i

nañnewa na curü ngúchaũ ínaxügüxürüũ. ¹¹ ;Rü toxna naxã i torü õna i ñoma i ngunexücèx ixĩxũ! ¹² ;Rü toxũ nüxũ nangechaũ i torü chixexũ i taxüxũ ngëxgumarüũ i toma rü tüxũ nüxũ na tangechaũxürüũ ya yíxema chixexũ tomaã ügüxe! ¹³ ;Tãxũ i tacü rü chixexüpëxewa toxũ cuwogüxũ na tama nagu tayixücèx! Natürü tanaxwèxe i toxna cudau na tama ngëma chixexũ taxügüxücèx. Erü cuma rü guxüguma guxüãrũ ãëxgacü quixĩ rü cuporaxüchi rü cumexëchi. Rü ngëmaãcü yĩ”.

¹⁴ –Rü ngëxguma pema nüxũ nüxũ pengechaũgu i ngëma duüxügü i chixexũ pemaã ügüxũ, rü Penatü ya daxügücü rü tá ta pexũ nüxũ nangechaũ i perü pepadugü. ¹⁵ –Natürü ngëxguma tama nüxũ nüxũ pengechaũgu i ngëma duüxügü i chixexũ pemaã ügüxũ, rü Penatü ya daxügücü rü tá ta tãütáma pexũ nüxũ nangechaũ i perü pepadugü.

Ngéchuchu nanangúexëë ga aurechiga

¹⁶ –Rü ngëxguma tama pechibüëäcüma peyumüxëgügu rü tama name i pegü pengechaũchíwexëë naxrüü i ngëma duüxügü i togüpëxewa meã maxënetaxũ. Erü nümagü rü ngëmaãcü nanaxügü na togü nüxũ na daugüxücèx i ngëma na Tupanacèx naxaureexũ. Rü aixcüma pemaã nüxũ chixu rü ngëma na duüxügü nüxũ daugüxüxĩcatama nixĩ i norü ãmare. ¹⁷ –Natürü ngëxguma cuma rü tama cuchibüäcüma cuyumüxëgu rü name nixĩ i meã cügü cuyaux-chiwe rü meã cügü curüxixëëru. ¹⁸ –Rü ngëmaãcü i togü i duüxügü rü tãxütáma nüxũ nacüxügü na tama cuchibüäcüma cuyumüxëxũ. Rü Cunatü ya bexma cumaã ngëma ngëxmacüxicatátama cuxũ nadau, rü tá cuxna nanaxã i curü ãmare naxcèx i ngëma cuxüxũ.

Ñuxãcü tüxũ nangëxma i tórü meruügu i daxügüxũ i nañnewa (Lc 12.33-34)

¹⁹ –Rü tama name i pegücèx penanutaquëxe i muxüma i perü meruügu i ñoma i nañnewa. Erü ñoma i nañnewa rü paxama nagux i perü ngëmaxügü, rü naweane rü paxama nanachixexëë, rü ngítèèxgüxũ rü naxcèx nangĩxgü. ²⁰ –Rü narümemaë nixĩ i penamuxëë i perü meruü i daxügüxũ i nañnewa. Erü ngëma rü tãxütáma nagux, rü naweane rü tãxütáma nanachixexëë, rü ngítèèxgüxũ rü tãxütáma ngexma nachocu na naxcèx nangĩxgüxücèx. ²¹ –Erü ngextá ínangëxmaxüwa i perü ngëmaxügü, rü ngëxma nixĩ i perüxĩnüëxũ.

Taxüneãrũ omüchiga (Lc 11.34-36)

²² –Cuxetügü rü ñoma wüxi i omürüũ nixĩ i cuxunecèx. Rü ngëxguma ngëma Tupana cuxũ naxwèxexücèx cudèuxgu, rü guxüma i curü maxũ rü name. ²³ –Natürü ngëxguma ñoma i nañneãrũ ngúchaũcèx cudèuxgu, rü guxüma i curü maxũ rü chixexüwa nangëxma. Rü aixcüma nataxuma i ëãnexũ i ngëmaãrũ yexera ixĩxũ i Tupanapëxewa.

¿Texécèx tá cumaxũ, Tupanacèx rü ëxna dīērucèx? (Lc 16.13)

²⁴ –Taxucürüwa wüxi i duüxũ rü nataxrearü coriãx. Erü wüxi i norü corichi rü tá naxai, rü ngëma to rü tá nüxũ nangechaũ. Rü ëxna wüxicèx rü tá meã napuracü, rü ngëma to rü tá nüxũ naxo. Rü taxucürüwa Tupanacèx pemaxë, ega perü dīērugama perüxĩnüëgu.

Tupana rü naxãcügüna nadau (Lc 12.22-31)

²⁵ –Rü ngëmacèx pemaã nüxũ chixu rü: ;Tãxũ i pexoegaãëgüxũ naxcèx na tacü tá pengõxgüxũ rü tacü tá pixaxgüxũ, rü tacümaã tá na pexãxchirugüxũ!

Erü perü maxü rü ònaärü yexera nixĩ, rü pexene rü naxchiruarü yexera nixĩ.
²⁶ —¡Dücèx penangugü i werigü i tama toegüchiréxü, rü tama nanetüarü o
 ibuxgüxü, rü ngepatagüxü na ngexta namaã nanguxügüxüçèx i norü òna!
 Natürü Penatü ya daxügücü rü nanaxüwemü. Rü pema rü Tupanacèx rü
 guxüma i werigüarü yexera pixigü. ²⁷ —Rü taxuwama name na tacüçèx
 pexoegaãégüxü. Erü taxucürüwa ya wüxie i pema rü wüxi i oragu rü
 ipenamèxächixèẽ i perü maxü ega woo poraãcü naxcèx pexoegaãégügu. ²⁸ —
 ¿Rü tüxcüü pexoegaãégü naxcèx i pexchiru? ¡Dücèx penangugü i ngẽma
 putüragü i ngextámare yaexü i tama puracüexü, rü tama nügü üxchirugüxü!
²⁹ —Natürü pemaã nüxü chixu rü woo guma aëxgacü ga Charumóu ga na
 namexèchixü ga naxchiru, rü taguma wüxi ga putürachacurüü namexèchi.
³⁰ —Rü ngëxguma Tupana ngẽmaãcü nangèxãégu i ngẽma putüragü i ñuxma
 ngëxmagüxü natürü moxü rü marü taxuxü, rü yexera tá pexna nadau i
 pemax, Pa Yatügü i Tama Aixcüma Meã Yaxögüxüx. ³¹ —Rü ngëmacèx tama
 name i pexoegaãégü rü ñaperügügü: —¿Tacü tá tangõxgü? rü éxna —
 ¿tacü tá tixaxgü? rü éxna —¿tacümaã tá taxãxchirugü? —ñaperügügü. ³² —
 Erü ñoma i naãnecüãx i duüxügü rü naxcèx nadaugü i guxüma i ngẽma
 pemaã nüxü chixuxü. Natürü pema rü pexü nangëxma ya Penatü ya
 daxügücü ya nüèchama nüxü cuácü i pexü na nataxuxü i guxüma i ngẽma.
³³ —Natürü narümemaẽ nixĩ i Tupanacèxira pedaugü na ngẽma nüma pexü
 nanaxwèxexüxira pexügüxüçèx. Rü naetü tá pexna nanaxã i guxüma i tacü
 i pexü taxuxü. ³⁴ —¡Tãxü i naxcèx pexoegaãégüxü i ngẽma moxü tá üpetüxü!
 Erü ngẽma moxüärü ngunexü rü tá nüxü nangëxma i guxchaxügü i namaã
 ínanguxü. Erü wüxichigü i ngunexü rü nüxü nangëxma i noxrütama gux-
 chaxügü, rü ngëmacèx tama name i moxüärü guxchaxügüçèx pexoegaãégü
 i ñuxmax —ñanagürü.

7

Tama name i toguexü tixu

(Lc 6.37-38, 41-42)

¹ Rü Ngechuchu rü ñanagürü ta: —¡Rü taxü i togüxü pixuxü! Rü ngëxguma
 ya Tupana rü tãxütáma pexü nixu na pechixexü. ² —Erü ngëxgumarüü na
 togüxü pixuxü rü Tupana rü tá pexü nixu na pechixexü. Rü ngema na togüxü
 pepoxcuexü, rü ngemaãcü tátama nixĩ ya Tupana i pexü napoxcuexü. ³ —¿Rü
 tüxcüü i nüxü cudawenüxü i ngẽma cueneëärü üxaxetüxü i íraxü, ega chi tama
 naxcèx cuxoegaãégu i ngẽma cuxetüwatama ngëxmaxü i naĩpüta i taxü? ⁴ —
 Rü ngëxguma cuxetüwatama nangëxmagu i wüxi i naĩpüta i taxü ¿rü ñuxãcü i
 cueneëxü cuchixewexü, rü ñácuxü nüxü:

“¡Pa Chaueneëx, cuxü chanayauxchaü i ngẽma curü üxaxetüxü!” —ñácuxü?
⁵ —Pa Duüxü i Meã Maxnetaxüx, rü name nixĩ i cunayauxira i ngẽma naĩpüta i
 cuxetüwatama ngëxmaxü, rü ngẽmaãcü tá mea nüxü cudau na cunayaxuxüçèx
 i ngẽma cueneëärü üxaxetüxü. [Rü ngëmacèx name nixĩ i cuxira nüxü curüxo
 i ngẽma chixexü i taxü i cumatama cuxüxü, rü ngëxguma tá cume na nüxü
 curüngüxèèxüçèx i cueneë na nüxü naxoxüçèx i ngẽma chixexü i íraxü i
 naxüxü.] ⁶ —Rü tama name i Tupanaärü ore i üünexümaã penachixewe
 i ngẽma duüxügü i chixecümagüxü i tama yaxögüchaüxü, erü ngürüächi
 ngëmacèx tá pexü nimèxgü. Rü ngëxgumarüü tama name i Tupanaärü oremaã
 penachixewe i ngẽma duüxügü i tama nüxü cuèxgüchaüxü, erü tá ínanatèxgü.

*Name nixĩ i tórü yumüxëwa Tupanana naxcèx taca rü naxcèx tadaugü rü
 ñãxwa: Tu tu tu, ñatarügügü*
(Lc 6.31, 11.9-13)

⁷ –¡Tupanana naxcèx peca! rü nüma tá pexna nanaxã. ¡Rü Tupanaxütagu naxcèx pedau! rü tá nüxü ipeyangau. ¡Rü norü ãxwa: Tu tu tu, ñapegü! rü tá pexcèx nayawãxna. ⁸ –Erü guxãma ya yíxema naxcèx ícaxe, rü tanayaxu. Rü guxãma ya naxcèx dauxe, rü nüxü itayangau. Rü guxãma ya yixema ãxwa: Tu tu tu, ñagüxe, rü tá tümacèx niwãxna. ⁹ –Rü dücax i pemax, rü ngëxguma chi wüxi i pexacü pãücèx ícaxgu, rü ¿ñuxãcü chi wüxi ya nuta nüxna pexãxü? ¹⁰ –Rü ngëxguma chi choxnicèx pexna nacaxgu rü ¿ñuxãcü chi i äxtape nüxna pexãxü? ¹¹ –Rü pema na pichixecümachiréxü rü nüxü pecuèx na mexü i ãmare pexacügüna pexãxü. Natürü Penatü ya daxügücü rü ngëma pema pexacügüna pexãxüärü yexera tá tüxna naxã ya yíxema naxütawa naxcèx ícaxe. ¹² –Rü pemaã nüxü chixu, rü ngëma pema penaxwèxexü i togü pemaã na naxüxü, rü name nixi i pema rü ta ngëmaãcütama namaã penaxü. Erü ngëmaãcü tüxü namu i Tupanaärü ore ga Moíché ümatüxü rü yema ore ga nuxcümaügüxü ga Tupanaärü orearü uruügü ümatüxü.

Ïax i íraxüchiga
(Lc 13.24)

¹³ –Name nixi i ngëma ãx i íraxüwaama pichocu. Erü ngëma ãx i yuwa tüxü gaxü rü ngëma nama i yuwa daxü rü nata. Rü muxüchixüma i duüxügü nagu naxi. ¹⁴ –Natürü ngëma nama i maxüwa nadaxü rü ngëma ãx i maxücèx nawa ixücuxü rü naxíra. Rü noxretama nixi i duüxügü i nüxü iyangaugüxü.

Wüxi i nanetü rü norü owa nixi i nüxü icuáxü
(Lc 6.43-44)

¹⁵ –Rü naxcèx pexuãégü i ngëma doratèèxgüxü i nügü ixugünetaxü na Tupanaärü orearü uruügü yixügüxü. Erü nümagü rü petanüwa nangugü, rü nügü mexü i duüxügüneta nixügüxë. Natürü naãëwa rü poraãcü chixexügu narüxñü. ¹⁶ –Rü pema rü nacümawa tá nüxü pecuèx i ngëma duüxügü, ngëxgumarüü i wüxichigü i nanetügü rü norü owa na nüxü icuáxürüü ngoxi name rü éxna tama. Rü wüxi i torawa rü taxucürüwama ubagü tayaxu. Rü wüxi i chuchuxüwa rü taxucürüwama orix i igu tayaxu. ¹⁷ –Erü guxüma i nanetü i mexü rü name i norü o. Rü guxüma i nanetü i chixexü rü nachixe i norü o. ¹⁸ –Rü wüxi i nanetü i mexü rü taxucürüwama nachixe i norü o. Rü wüxi i nanetü i chixexü rü taxucürüwama name i norü o. ¹⁹ –Rü guxüma i nanetü i tama mexü i norü o rü tayadaxüchi, rü ñuxüchi tayagu. ²⁰ –Rü ngëxgumarüü nacümawa tá nüxü pecuèx i ngëma duüxügü i Tupanaärü orearü uruügüneta ixügüxü.

Tãütáma guxüma i duüxügü nichocu i ngextá Tupana ãëxgacü íxixüwa
(Lc 13.25-27)

²¹ –Rü tama guxüma i duüxügü i nügü ixugüxü na chorü duüxügü yixügüxü rü tá nichocu i ngextá Tupana ãëxgacü íxixüwa. Natürü yíxema aixcüma Chaunatü ya daxügücüga ñnüèxëxícatátama tixi ya ngëma íchocuxe. ²² –Rü ngëxguma ngëma ngunexü i naãneärü guxwa nanguxgu, rü muxüma i duüxügü rü choxü tá ñanagürügü: –Pa Corix, toma rü togü i duüxügümaã nüxü tixu i curü ore, rü cuégagu ítanawoxü i ngoxogü, rü cuégagu tanaxü i muxüma i mexü i taxü i Tupanaärü poramaã taxüxü –ñanagürügü tá choxü. ²³ –Natürü ngëxguma rü tá ñacharügü nüxü: –Taguma chorü duüxügü pixügü. ¡Rü choxna pixígachi i pema i chixexü ügüe! –ñacharügü tá.

Yatü i Cristuga ñnüxü rü yatü i tama Cristuga ñnüxüchiga
(Mr 1.22, Lc 6.47-49)

²⁴ –Rü ngëmacèx ya yíxema choxü ñnüxë rü naxüxe i ngëma choma tüxü chamuxü, rü wüxi ga yatü ga meã naãëxü cuácü ga nuta ga tacüétügu

üpatacürüü tixĩ. ²⁵—Rü pucü ga tacü ínangu, rü narümèx ga taxtü, rü nixüüchi ga wüxi ga tacü ga buanecü rü guma ñgu nanguema. Natürü guma ñ rü tama niwèxtaü yerü wüxi ga nutaétügu naxü. ²⁶—Natürü yíxema choxü ñnuxê rü tama naxúxe i ngêma choma tüxü chamuxü, rü wüxi ga yatü ga tama naâêxü cuácü ga naxnücügumare üpatacürüü tixĩ. ²⁷—Rü pucü ga tacü ínangu, rü narümèx ga taxtü, rü wüxi ga tacü ga buanecü nixüüchi rü nagu nanguema ga guma ñ. Rü niwèxtaü, rü yexma nayarüxo ga guxüma —ñanagürü ga Ngechuchu. ²⁸ Rü yexguma yagúegagu ga Ngechuchu ga na yadexaxü, rü ga duüxügü rü nabèixächiaêgü namaã ga norü nguxêetae. ²⁹ Yerü nüma rü Tupanaärü poramaã nanangúexêê, rü tama yema ngúexêeruügü ga ore ga mugüwa nguxêetaegüxürüü nixĩ.

8

Ngechuchu rü wüxi ga rüchaxünexüçèx nayataanexêê (Mr 1.40-45; Lc 5.12-16)

¹ Rü yexguma guma mèxpünewa yanaxüegu ga Ngechuchu, rü muxüma ga duüxügü nawe narüxĩ. ² Rü Ngechuchucèx nixü ga wüxi ga yatü ga chaxünemaã idaaawecü. Rü Ngechuchupéxegu nayacaxápüxü, rü ñanagürü nüxü: —Pa Corix, ngêxguma chi cuma cunaxwèxegu, rü chi cuxü natauxcha na choxü curümexêêxü —ñanagürü. ³ Rü yexguma ga Ngechuchu rü nüxü ningögü, rü ñanagürü nüxü: —Ngü, chanaxwèxe. ¡Rüme! —ñanagürü. Rü yexguma yema ñaxgu ga Ngechuchu, rü naxcèx nitaane ga guma yatü ga na nachaxüneãxü. ⁴ Rü Ngechuchu rü ñanagürü nüxü: —¡Dücèx, taxuemaã tá nüxü quixu! ¡Natürü ngema paixütawa naxü, rü cugü iyawèx! ¡Rü nüxna naxã i ngêma ãmare ga Moïché tüxü muxü na duüxügü nüxü cuáxüçèx na curümexü! —ñanagürü.

Ngechuchu rü Dumacüãx ga churaragüarü ãêxgacüarü duüxüxü narümexêê (Lc 7.1-10)

⁵⁻⁶ Rü Capernáüwa naxü ga Ngechuchu. Rü yexguma yéma nanguxgu, rü wüxi ga churaragüarü ãêxgacü ga capitáü ga Dumacüãx rü Ngechuchucèx nixü. Rü Ngechuchuxü nacèxü, rü ñanagürü: —Pa Corix, chorü duüxü rü nanawãixächi. Rü ngürücarewa nangèxma i chopatawa, rü poraãcüxüchima ngúxü ninge —ñanagürü. ⁷ Rü Ngechuchu rü ñanagürü nüxü: —Marü tá ngema chaxü na naxcèx chayataanexêêxüçèx —ñanagürü. ⁸ Natürü nüma ga capitáü nanangãxü, rü ñanagürü: —Pa Corix, choma rü taxuwama chame na chopatagu na cuxücuxüçèx. Rü chanaxwèxe i curü orewaxicatama nüxü quixu, rü tá naxcèx nitaane i chorü duüxü. ⁹ —Erü choma rü ta rü chorü ãêxgacümèxèwa changèxma. Rü choxmèxwa nangèxmagü ta i ñuxre i churaragü. Rü ngêxguma chanamuxgu i wüxi na ngextá naxüxüçèx, rü ngema naxü. Rü ngêxguma chaugüxütawa naxcèx changemagu i to, rü chauxütawa nangu. Rü ngêxguma wüxi i chorü duüxüxü chamuxgu na tacü na naxüxüçèx, rü choxü nanaxü —ñanagürü. ¹⁰ Rü yexguma yemaxü naxĩnügu ga Ngechuchu rü nabèixächiaê. Rü ñanagürü nüxü ga yema duüxügü ga nawe rüxixü: —Aixcüma pemaã nüxü chixu rü taxuüma i Yudíugütanüwa nüxü ichayangau i wüxi i duüxü i ñaã yatürüü aixcüma yaxõxü. ¹¹ —Rü choma rü pemaã nüxü chixu rü muxüchixü i duüxügü rü guxüwama tá ne naxĩ, rü Tupana ãêxgacü íixixüwa tá nachibüe namaã ya tórü oxigü ya Abráü rü Ichaá, rü Acobu. ¹² —Natürü muxüma i Abráütanüxügü i Yudíugü rü tãütáma nichocu i ngextá Tupana ãêxgacü íixixüwa. Rü ãñexüwa tá nawogü. Rü ngema tá naxauxe, rü tá nixüxchapütägü —ñanagürü. ¹³ Rü yexguma ga Ngechuchu rü ñanagürü yema capitáüxü: —¡Cupatacèx nataegu! Rü tá naxcèx nitaane i curü duüxü,

erü cuyaxõ na naxcèx tá yataanexũ —ñanagürü. Rü yexgumatama naxcèx nitaane ga yema capitáũãrũ duũxũ.

Ngechuchu rü Pedru nèxècèx nayataanexẽ
(Mr 1.29-31; Lc 4.38-39)

¹⁴ Rü Pedrupatawa naxũ ga Ngechuchu. Rü yéma ngĩxũ nadau ga Pedru nèxè ga ngürücaregu irüxãũxcü yerü iyaxaxüne. ¹⁵ Rü Ngechuchu ngĩxmẽxgu ningõgü, rü yexgumatama igèuxãchi ga yema na yaxaxünexũ. Rü írũda ga ngĩmax. Rü ñuxũchi naxcèx inamexẽẽ ga õna.

Ngechuchu rü muxũma ga idaaweexücèx nayataanexẽ
(Mr 1.32-34; Lc 4.40-41)

¹⁶ Rü yexguma marü yanaxücuchaũgu ga üèxcü, rü Ngechuchuxõtawa nanagagü ga muxũma ga duũxũgü ga ngoxoãxgüxũ. Rü wüxitama ga oremaã Ngechuchu ínanawoxũ ga yema ngoxogü. Rü nanameẽxẽẽ ta ga guxũma ga yema togü ga idaaweexũ. ¹⁷ Rü yemaãcü Ngechuchu nayanguxẽẽ ga yema ore ga nuxcũmaũxũ ga Tupanaãrũ orearü uruũ ga Ichaxía nüxũ ixuxũ ga ñaxũ:

“Rü nüma rü tüxũ naporaexẽẽ i ngẽxguma ituraegu, rü tüxũ narümeexẽẽ i ngẽxguma idaaweegu”,
ñaxũ.

Duũxũgü ga Ngechuchuwe rüxãxãxũchiga
(Lc 9.57-62)

¹⁸ Rü yexguma Ngechuchu nüxũ dèuxgu ga muxũma ga duũxũgü na nüxũ íchomaẽguãchixũ, rü norü ngüexũgümaã nüxũ nixu, rü ñanagürü: —¡Rü ngĩxã, rü naxtaxaarü tocutüwa taxĩ! —ñanagürü. ¹⁹ Rü wüxi ga ngüexẽẽruũ ga ore ga mugüwa nguxẽẽtaexũ, rü Ngechuchucèx nixũ, rü ñanagürü nüxũ: —Pa Ngüexẽẽruũ Pa Ngechuchux, cuwe charüxũxchaũ i ngextá cuma ícuxũxüwa —ñanagürü. ²⁰ Rü Ngechuchu nanangãxũ rü ñanagürü: —Ngowagü rü nüxũ nangẽxma i naxmaũgü, rü werigü rü nüxũ nangẽxma i naxchiãũgü. Natürü choma i Tupana Nane na duũxũxũ chiĩxũ, rü nataxuma i chauchica i ngextá nagu chicuxeruxũ —ñanagürü. ²¹ Rü wüxi ga to ga norü ngüexũ, rü ñanagürü nüxũ: —Pa Corix, cuwe charüxũxchaũ, natürü chanaxwèxe i chaunatü tüxũ ichayatèxira —ñanagürü. ²² Rü Ngechuchu nanangãxũ, rü ñanagürü nüxũ: —¡Noxtacüma chowe rüxũ! Rü nüe i ngẽma cutanüxũ i tama yaxõgüxũ iyatèxgü i ngẽma yuexũ —ñanagürü.

Ngechuchu rü buanecüxũ rü yuapexũ ínayachaxãchixẽẽ
(Mr 4.35-44; Lc 8.22-25)

²³ Rü yexguma ga Ngechuchu rü wüxi ga ngegu nixüe. Rü norü ngüexũgü rü ta ínayaxümücügü, rü inaxĩachi. ²⁴ Rü ngürüãchi naxtaxaarü ngãxütügu nüxũ naxü ga wüxi ga buanecü ga taxüchicü. Rü guma nguewa rü niyau-cuchichigü ga dexá. Natürü ga Ngechuchu rü nape. ²⁵ Rü yexguma ga norü ngüexũgü rü ínanabèixgügü, rü ñanagürügü nüxũ: —Pa Corix, ¡toxũ rüngüxẽẽ, erü ngẽmama itabaxũgü! —ñanagürügü. ²⁶ Rü Ngechuchu nanangãxũ, rü ñanagürü nüxũ: —Pa Duũxũgü i Tama Aixcüma Yaxõgüxũx, ¿tüxcüũ pemuũẽ? —ñanagürü. Rü yexguma ga Ngechuchu rü ínarüda. Rü buanecü rü yuapena nachogü. Rü ínayachaxãchi ga buanecü, rü inayarüxo ga yuape, rü ínachaxanemare. ²⁷ Rü nümagü ga norü ngüexũgü rü nabèixãchiãgü, rü nügümaã ñanagürügü: —¡Tacü èxna nixĩ i ñaã yatü rü ngẽmacèx woo ya buanecü rü yuape rü naga naxĩnüèxũ? —ñanagürügü.

Yatügü ga Gadarácũãx ga ngoxogü nawa yexmagüxũ
(Mr 5.1-20; Lc 8.26-39)

28 Rū Ngechuchu rü norü ngúexügü rü naxtaxaarü tocutüwa nangugü ga Gadáaraarü nañewa. Rū yexguma yéma nangugügu, rü Ngechuchucèx yéma nibuxmü ga taxre ga yatügü ga duïxèchíquëxetanügu yarüxauchigütanüneüxü. Rū yema taxre rü ningoxoãx, rü nidüraexüchi. Rū yemacèx taxucürüwama texé yéma namawa taxüpetü. 29 Rū yema taxre rü aita naxüe, rü ñanagürügü: —¿Tüxcüü toxü nuã cuyachixewe, Pa Ngechuchu ya Tupana Nane? ¿Éxna nuã cuxü na toxü ícuyawoxüxücèx tauta nawa nanguyane na Tupana toxü poxcuexü? —ñanagürügü. 30 Rū yema nachicaarü ngaicamana nachibüe ga muxüma ga cuchigü. 31 Rū yema ngoxogü rü Ngechuchuxü nacèèxügü, rü ñanagürügü: —Rü ngëxguma toxü ícuwoxügu, ¡rü ngëma cuchigügu toxü nachocuxëë! —ñanagürügü. 32 Rū yexguma ga Ngechuchu, rü ñanagürü nüxü: —Ëcü, ¡ngema pexí! —ñanagürü. Rū yexguma ga yema ngoxogü rü ínachoxü nawa ga yema taxre ga yatügü, rü yema cuchigügu nayachocu. Rū ñuxüchi guxüma ga yema cuchigü rü inaxüãchi, rü naxtaxacutüarü mèxpüxüwa nayarüyuxgü, rü yexma nayí. 33 —Rü yema cuchigüarü dauruügü rü nabèixãchiãëgü, rü ñanecèx nibuxmü. Rū yexguma ñanewa nangugügu, rü nüxü nixugügü ga guxüma ga yema ngupetüxü ga ñuxãcü naxcèx na yataanegüxü ga yema taxre ga yatügü ga ngoxoãxgüxü. 34 —Rü yexguma ga guxüma ga yema ñanecüãx ga duïxügü, rü Ngechuchuxütawa naxí. Rū yexguma Ngechuchuxü nadaugügu, rü nüxü nacèèxügü na ínaxüxüxcèx ga yema norü nañewa.

9

Ngechuchu rü wüxi ga yatü ga nawãixãchicücèx nayataanexëë (Mr 2.1-12; Lc 5.17-26)

1 Rū yexguma ga Ngechuchu rü wüxi ga ngeugu nixüe. Rū naxtaxaarü tocutüwa naxü, rü noxrütama ñanewa nangu. 2 Rū yéma guma ñanewa rü duïxügü rü Ngechuchuxütawa nanangetaügü ga wüxi ga yatü ga nawãixãchicü. Rū yexguma Ngechuchu nüxü dèuxgu ga ñuxãcü aixcüma na yaxögüãxü ga yema duïxügü rü ñanagürü nüxü ga guma idaawecü: —¡Nataãë, Pa Chaunex! Erü curü pecadugü rü marü cuxü nüxü changechaü —ñanagürü. 3 Rū yéma nayexma ga ñuxre ga ngúexëëruügü ga ore ga mugüwa nguxëëtaegüxü. Rū nümagü rü naãxëgüwa ñanagürügü: —¿Ñãã yatü rü tacü Tupanamaã nixugü? —ñanagürügü. 4 Natürü ga Ngechuchu rü nüxü nacüexama ga yema naãëwa nagu naxínüëxü. Rū yemacèx ñanagürü nüxü: —¿Tüxcüü chixexügu perüxínüë? 5 —¿Tacü nixí i ngëma rütauxchamaëxü na namaã nüxü ixuxü ya daa nawãixãchicü:

“Rü curü pecadugü rü marü cuxü nüxü changechaü”, rü éxna:

“¡Inachi rü íxü!” ñagüxü nüxü? 6 —Natürü i ñuxma rü tá pexü nüxü chadauxëë na Chaunatü ya Tupana núma choxü muxü na duïxügüaxü nüxü changechaüxcèx i norü pecadugü —ñanagürü. Rū yexguma rü ñanagürü nüxü ga guma nawãixãchicü: —¡Inachi, rü nayaxu i curü carüü, rü cupatawa naxü! —ñanagürü. 7 —Rü yexgumatama ga guma nawãixãchicü rü inachi, rü napatawa naxü. 8 Rū yexguma yemaxü nadaugügu ga duïxügü, rü poraãcü namuë. Rū Tupanaxü nicuèxüügü, rü ñanagürügü: —Moxë, Pa Tupanax, erü cunaporaxëë i ñãã yatü na ngëmaãcü mexü toxcèx naxüxcèx —ñanagürügü.

Mateucèx naca ga Ngechuchu (Mr 2.13-17; Lc 5.27-32)

9 Rū yexguma yéma inaxüãchigu ga Ngechuchu, rü yéma nüxü nadau ga wüxi ga yatü ga Mateugu ãegaxü ga yéma rütoxü ga ngextá Dumaãrü

ãëxgacücèx dīēru ngīxū īnayauxgūxūwa yerū woetama yemawa napuracū. Rū Ngechuchu rū ñanagürü nūxū: —¡Chowe ruxū! —ñanagürü. Rū yexguma ga Mateu rū inachi, rū nawe narūxū. ¹⁰ Rū Mateupatawa naxū ga Ngechuchu, rū yéma nachibū. Rū īnangugū ta ga muxūma ga togū ga duūxūgū ga Dumāārū ãëxgacücèx dīēru ngīxū yauxgūxūwa puracūexū, rū togū ga duūxūgū ga taxúema nacūmamaã taãëgūxū. Rū yema duūxūgū rū yéma mechawa narūtogū namaã ga Ngechuchu rū norū ngúexūgū. ¹¹ Natürü yexguma yemaxū nadaugūgu ga Parichéugū, rū Ngechuchuarū ngúexūgūna nacagū, rū ñanagürügū: —¿Ñuxācū i perū ngúexēēruū rū namaã nachibū i ãëxgacūarū duūxūgū i dīēruarū yauxwa puracūexū, rū duūxūgū i pecaduãxgūxū? —ñanagürügū. ¹² Rū yexguma yemaxū naxīnūgu ga Ngechuchu, rū ñanagürü nūxū ga Parichéugū: —Ngēma poraexū rū tama nanaxwèxegū ya duturu, natürü ngēma idaaweexū nixī i naxwèxegūxū. ¹³ —¡Rū ípixī, rū nawa pengúe i Tupanaārū ore i ūmatūxū i ñaxū:

“Choma rū tama chanaxwèxe i chauxcèx peyamèx i carnerugū, natürü chanaxwèxe i togū pexū nangechaütümūgū”,
ñaxū! Rū ñanagürü ta ga Ngechuchu: —Choma rū tama mexūgūna na chaxuxūcèx nixī i nūma chaxūxū, natürü nūma chaxū na nūxna chaxuxūcèx i ngēma pecaduãxgūxū na ngēmaācū nūxū naxoexūcèx i nacūmagū i chixexūgū —ñanagürü.

*Ngechuchuna nacagüe ga aurechiga
(Mr 2.18-22; Lc 5.33-39)*

¹⁴ Rū yexguma ga Cuáū ga baiūxēēruūārū ngúexūgū, rū Ngechuchucèx naxī, rū nūxna nacagüe, rū ñanagürügū: —Toma i Cuáūārū ngúexūgū na tixīgūxū rū nūmagū i Parichéugū rū muēxpūxcūna tama tachibūeācūma tayumūxēgū. ¿Rū tūxcūū i curū ngúexūgū rū tama toxrūū tama nachibūācūma nayumūxēgū? —ñanagürügū. ¹⁵ Rū Ngechuchu nanangāxū rū ñanagürü: —¿Éxna wūxi i ngīgūarū petawa rū pexcèx namexū na nangechaūēxū rū naxaureexū i ngēma nūxna naxugūxū ega natanūwa nangēxmagu i ngēma yatū i ngexwacèx āmaxū? Maneca tama nixī. Natürü wūxi i ngunexūgu rū ngēma yatū i ngexwacèx āmaxū rū tá namūcūgūna nixūgachi. Rū ngēma ngunexūgu tá nixī i aixcūma naxaureexū i namūcūgū. ¹⁶ —Rū taxúema tanapaita i wūxi i naxchiru i ngauxū namaã i wūxi i natūchi i ngexwacaxūxū i tauta nañaāchimūxū. Erū ngēxguma nayauxgu i ngēma naxchiru rū tá nūgū īnanaxíraxāchi i ngēma natūchi i ngexwacaxūxū, rū tá nanagauxēē i ngēma wexachiru. Rū noxriarū yexera tá nixī i na nagauxū. ¹⁷ —Rū ngēxgumarūū ta rū taxúema ngexwacaxūcū ya binu rū nagu tayabacuchi i wūxi i naxchixū i marū ngauxū i naxchèxmūnaxcèx. Erū ngēxguma ngēmaācū naxūxgu rū yima binu ya ngexwacaxūcū rū narūngu, rū tá nayawāixēē i ngēma naxchixū i ngauxū i naxchèxmūnaxcèx. Rū ngēxma tá nayarūtaxu ya binu rū ngēma naxchixū rū ta. Rū ngēmacèx tanaxwèxe ya ngexwacaxūcū ya binu rū ngexwacaxūxū i naxchixūgu tayabacuchi. Rū ngēmaācū tāūtāma inayarūtaxu. [Rū chorū nguxēētae i ngexwacaxūxū rū ngēxgumarūū ta nixī na taxucürūwama namaã nawūxiguxū i ngēma nuxcūmaūxū i pecūmagū —ñanagürü ga Ngechuchu.]

*Yáiruxacūchiga rū yema nge ga Ngechuchuchirugu ingōgücūchiga
(Mr 5.21-43; Lc 8.40-56)*

¹⁸ Rū yexguma yemaācū īnangúexēētaeyane ga Ngechuchu, rū naxūtawa nangu ga wūxi ga ãëxgacū ga Yudígūarū. Rū Ngechuchupèxegu naya-caxápūxū, rū ñanagürü nūxū: —Pa Corix, chauxacū rū ngexwacèx iyu. Natürü

ngëxguma chi ngema cuxûxgu rü ngîxû quingögügu, rü wena chixarü imaxû — ñanagürü. ¹⁹ Rü inachi ga Ngechuchu, rü norü ngúexügümaã yema âëxgacüwe narûxû. ²⁰ Rü yexguma yéma naxûyane ga Ngechuchu rü wüxi ga ngecü ga 12 ga taunecü ägüechacü rü naweama ne ixû. Rü naxpechinüchirugu iyangögü. ²¹ Yerü ngîma rü nagu irûxînü rü yexguma chi naxchiruxûxîcatama yangögümaregu, rü chi ngîxcèx nitaane. ²² Natürü nüma ga Ngechuchu rü nügü inidau, rü ngîxû nadau ga yema nge. Rü ñanagürü ngîxû: —¡Nataãë, Pa Chauxacûx! Marü cuxcèx nitaane, erü cuyaxõ —ñanagürü. Rü yexgumatama ngîxcèx nitaane. ²³ Rü yexguma yema âëxgacüpatawa nanguxgu ga Ngechuchu, rü nüxû nadau ga paxetatanûxû ga marü na ínamemaregüxû na ngîxû iyatèxgüxû ga yema bucü. Rü ga duûxügü rü nixáicha rü naxauxe. ²⁴ Rü Ngechuchu ñanagürü nüxû ga yema duûxügü: —¡Ípechoxû i nuã! Erü ngëma bucü rü tama iyu. Rü ipemare —ñanagürü. Natürü nümagü ga duûxügü rü Ngechuchuxû nacugüeama. ²⁵ Rü yexguma Ngechuchu ínachoxûëëxgu ga duûxügü, rü yema bucüarü ucapugu naxücu. Rü ngîxmèxgu nayayauxâchi, rü yexgumatama írüda ga ngîmax. ²⁶ Rü guxûwama ga yema naãnewa, rü duûxügü nüxû nixuchigagü ga yema Ngechuchu üxû.

Ngechuchu naxcèx nayataanexëë ga taxre ga yatü ga ingexetüxû

²⁷ Rü yexguma yéma ínaxûxgu ga Ngechuchu, rü taxre ga ngexetüxû rü nawe nangëgü. Rü tagaãcü ñanagürügü: —Pa Ngechuchux, Pa Dabítanüxûx, ¡cuxû tangechaütümüügü! —ñanagürügü. ²⁸ Rü yexguma Ngechuchu guma í ga nagu napexünegu naxücuxgu, rü yema taxre ga ngexetüxû rü naxcèx naxî. Rü Ngechuchu nüxna naca, rü ñanagürü: —¿Peyaxögüxû yîxû na chaporaxû na pexû charümeëxëxüçèx? —ñanagürü. Rü nümagü nanangãxügü, rü ñanagürügü: —Ngü, Pa Corix, tayaxögü —ñanagürügü. ²⁹ Rü yexguma ga Ngechuchu rü naxëtügügu ningögü, rü ñanagürü nüxû: —¡Cü pexcèx yataane, erü peyaxögü! —ñanagürü. ³⁰ Rü naxcèx nitaanegü. Rü Ngechuchu rü poraãcü nayaxucuxëgü na taxúemaãma nüxû na yaxugüxüçèx ga yema nüxû ngupetüxû. ³¹ Natürü yema taxre rü yexguma yéma ínachoxügü rü guxûwama ga yema naãnewa rü nüxû nixugüeama ga yema Ngechuchu üxû.

Ngechuchu rü naxcèx nayataanexëë ga wüxi ga yatü ga tama idexacü

³² Rü yexguma yema taxre ga yatü íchoûxguwena, rü ñuxre ga duûxügü rü Ngechuchuxütawa nanagagü ga wüxi ga yatü ga tama idexacü yerü ngoxo nawa nayexma. ³³ Rü Ngechuchu ínanatèxüchi ga yema ngoxo. Rü yexgumatama inanaxügü ga na yadexaxû ga guma yatü. Rü nümagü ga duûxügü rü nabèixâchiãëgü. Rü ñanagürügü: —Taguma nüxû tadau i nuã tachiüãnewa i tacü i ñaãrüü ixîxû —ñanagürügü. ³⁴ Natürü ga Parichéugü rü ñanagürügü: —Ñã yatü rü ngoxogüarü äëxgacü i Chatanáãrü poramaã nixî i ínawoxûãxû i ngoxogü —ñanagürügü.

Ngechuchuaxû nangechaütümüügü ga duûxügü

³⁵ Rü yema naãnewa rü guxünema ga íãnegügu rü íãnexãcügügu nixügüchigü ga Ngechuchu. Rü wüxichigü ga íãnewa, rü duûxügüarü ngutaquëxepataüwa ningüxëëtaechigü. Rü duûxügümaã nüxû nixuchigü ga ore ga mexû na ñuxãcü äëxgacü na yîixû ya Tupana. Rü nanameëxëë ga duûxügü ga idaaweexû. Rü woo nañuxraûxû ga norü daawe nüxû yexmaxû, rü nanameëxëë. ³⁶ Rü yexguma Ngechuchu nüxû deüxgu ga yema muxüma ga duûxügü ga naxütawa ngugüxû, rü nüxû nangechaütümüügü. Yerü carnerugü ga ngearü dauruüãxürüü nanaxixâchiãëgü, rü tama nataãëgü. ³⁷ Rü yexguma ga Ngechuchu rü ñanagürü nüxû ga norü ngúexügü: —Aixcüma pemaã nüxû

chixu rü nangëxma i muxüchixü i duüxügü i ímemaregüxü na yaxögüãxü i Tupanaãrü ore. Natürü nanoxreëxpüx i Tupanaãrü puracütanüxü na namaã nüxü yaxugüxücèx i ngëma ore. ³⁸ Rü ngëmacèx name nixi i duüxügüarü yora ya Tupanana naxcèx peca i perü yumüxëwa na yamugüãxücèx i norü puracütanüxü i orearü uruügü na ngëma duüxügümaã nüxü yaxugüxücèx i norü ore i mexü —ñanagürü ga Ngechuchu.

10

Ngechuchu nanade ga 12 ga norü ngüexügü na toxnamana namugüãxücèx (Mr 3.13-19; Lc 6.12-16)

¹ Rü yexguma ga Ngechuchu, rü yema 12 ga norü ngüexügücèx naca. Rü nüxna naxãga rü nanaporaexëë na ínawoxüãxücèx ga ngoxogü rü nameëxëãxücèx ga duüxügü ga idaaweexü ga woo nañuxraüxü ga ðaawe nüxü yexmaxü. ² Rü ñaã nixi ga naegagü ga yema 12 ga Ngechucharü ngüexügü ga imugüxü. Rü natanüwa rü Chimáü ga Pedrugu ãegacü nixi ga naëru ixixü. Rü to nixi ga Pedrueneë ga Aüdré. Rü to nixi ga Chaütiágu rü to nixi ga Chaütiágueneë ga Cuáü. Rü yema taxre rü Zebedéu nanegü nixigü. ³ Rü togü nixi ga Piripi, rü Baturumé, rü Tumachi, rü Mateu ga Dumaãrü ãëxgacücèx díëruarü yauxwa puracüchirécü. Rü togü nixi ga Chaütiágu ga Arupéu nane, rü Tadéu. ⁴ Rü to nixi ga Chimáü ga iporaãëcüücü. Rü to nixi ga Yuda ga Icariúte ga yixcama bexma cúãcü Ngechuchuxü íxuaxüxü.

Ngechuchu rü norü ngüexügüxü nimugü na nüxü yanaxugüexücèx ga norü ore (Mr 6.7-13; Lc 9.1-6)

⁵ Rü Ngechuchu nayamugü ga yema 12 ga norü ngüexügü. Rü nüxna naxãga, rü ñanagürü: —¡Tãütáma natanüwa pexi i ngëma duüxügü i tama Yudíugü ixigüxü! ¡Rü tãütáma Chamáriacüãx i duüxügüarü ñanegüwa pexi! ⁶ —Natürü chanaxwëxe i ngëma Yudíugü i carnerugürüü iyarütauxexütanüwa pexi. ⁷ —¡Rü ngëma natanüwa nüxü peyarüxu na marü yangaicaxü ya Tupana na norü ãëxgacü yíixü! ⁸ —¡Rü penameëxëëx i ngëma duüxügü i idaaweexü! ¡Rü wena penamaxëëëx i ngëma duüxügü i marü yuexü! ¡Rü penameëxëëx i ngëma duüxügü i chaxünemaã idaaweexü! Rü ngëma duüxügü i ngoxogü nawa ngëxmagüxü ¡rü nüxü ípenawoxüx! Rü tama name i penaxãtanü ega texëxü perümexëëxgu, erü pema rü pexü nangetanümare i ngëma pora. ⁹⁻¹⁰ —¡Rü tãütáma ípingearü díëruãxgü na perü tacücèx petaxegüxücèx rü bai i perü choca i perü namawaü! ¡Rü wüxitama i pexchiru ípinge, rü bai i perü chapatu, rü bai ya perü caxüchigüxü ya naixmenëã ípinge! Rü pemaã nüxü chixu rü wüxi i puracütanüxü rü name nixi i ngëma duüxü i nüxü napuracüüxütawa nachibü. ¹¹ —Rü ngëxguma wüxi ya ñanewa rü ëxna wüxi ya ñanexãcüwa pengugügu i pemax, ¡rü naxcèx pedèux i wüxi i duüxü i mecümaxü! ¡Rü ngëmaxütagu perücho ñuxmatáta ípexiãchi i ngëma ñanewa! ¹² —Rü ngëxguma yima ípatagu pechocugu, rü meã tá nüxü perümoxëgü i ngëma duüxügü i ngëma ngëxmagüxü rü: “¡Tupana pexü rüngüxëëx!” ñaperügügü tá nüxü. ¹³ —Rü ngëxguma ngëma duüxügü rü meã pexü nayauxgu rü Tupana tá nüxü narüngüxëë. Natürü ngëxguma tama meã pexü nayauxgu i napatawa rü ñaperügügü tá nüxü:

“Marü name i toxnamana taxí”, ñaperügügü tá. ¹⁴ —Rü ngëxguma wüxi ya ñawa rü ëxna wüxi ya ñanewa duüxügü tama meã pexü yauxgügu rü tama nüxü naxñüëchaügu i perü ore, ¡rü ípechoxü! Rü ngëxguma ípechoüxgu, ¡rü meã pegü ipepagücutü i perü üxaxücutü, na ngëmawa nüxü nacüëxgüxücèx na chixexü na naxügüxü i ngëma duüxügü! ¹⁵ —Rü aixcüma pemaã nüxü chixu

rü ngēma ngunexũ i nagu nagũxũ i naãne, rü Chodomacũãx rü Gomoracũãx i duũxũgũarũ yexera Tupana tá nanapoxcue i ngēma duũxũgũ i tama meã pexũ yauxgũxũ.

Guxchaxũgũmaã tá pewé ningexũtanũ i duũxũgũ

¹⁶ —Dücèx, ãücũmaxũwa pexũ chamugũ, ngẽxgumarũũ i carnerugũxũ aigũtanũwa imugũxũrũũ. ¡Rũ ngẽmacèx penaxwèxe i ãxtapegũrũũ pexuãẽgũ, natũrũ muxtucugũrũũ taxuũma i chixexũ pexũgũ! ¹⁷ —¡Rũ pegũna pedaũgũ! Erũ duũxũgũ rü tá pexũ ínayauxũ, rü ãẽxgacũgũxũtawã tá pexũ nagagũ na pexũ napoxcuexũcèx. Rũ ngutaquẽxepataũgũgu tá pexũ niçuaixgũ. ¹⁸ —Rũ chaugagu tá ãẽxgacũgũ ya tacũgũpẽxewa pexũ nagagũ. Rũ ngēmaãcũ tá chauchigagu pidexagũ napẽxewa i ngēma ãẽxgacũgũ rü napẽxewa i ngēma duũxũgũ i tama Yudũgũ ixĩgũxũ. ¹⁹ —Natũrũ ngẽxguma ãẽxgacũgũpẽxewa pexũ nagagũgu na pexũ napoxcuexũcèx, ¡rũ taxucèxtãma pexoegaãẽgũ na ãacũmaã tá penangãxũxũ rü ãxna ãacũxũ tá namaã na pixuxũ! Erũ ngẽxguma nawa nanguxgu na pidexagũxũ, rü Tupanaãẽ tá pexũ nanguxẽẽ na ãacũxũ tá namaã pixuxũ. ²⁰ —Rũ tãũtãma pema nixĩ i pidexagũxũ, natũrũ Tupanaãẽ i Üünexũ tá nixĩ i pewa idexaxũ. ²¹ —Rũ nügũeneẽgũwa rü tá nügũ ínaxuaxũgũ na ãẽxgacũgũ yamèxgũxũcèx. Rũ ngẽxgumarũũ tá ta nanatũgũ rü naxãcũgũxũ ínaxuaxũgũ, rü naxãcũgũ rü nanatũgũxũ tá ínaxuaxũgũ na ãẽxgacũgũ tũxũ imèxgũxũcèx. ²² —Rũ chaugagu tá guxũ i duũxũgũ pexchi naxaie. Natũrũ yĩxema aixcũma yaxõõmãxẽ i chorũ ore rü tama choxũ ítãxe, rü yĩxema tá tixĩ ya nayaxúxe i ngēma maxũ i taguma gũxũ. ²³ —Rũ ngẽxguma wũxi ya ããnewã rü duũxũgũ pexũ daixchaũgu, rü name nixĩ i pibuxmũ ya yima ããnewã, rü ná i ya ããnewã pexĩ. Rũ aixcũma pemaã nüxũ chixu rü tãũtãma guxũne ya Yudũgũarũ ããnewã pengugũ naxũpa na chataeguxũ i chomax. ²⁴ —Rũ taxuũma i wũxi i ngũexũ rü norũ ngũexẽẽruũxũ narũyexera. Rũ taxuũma i wũxi i coriarũ duũxũ rü norũ corixũ narũyexera. ²⁵ —Rũ ngēma norũ ngũexẽẽruũxũ ùpetũxũrũũ tãtama nüxũ naxũpetũ i ngēma norũ ngũexũ. Rũ ngēma norũ corixũ ùpetũxũrũũ tãtama nüxũ naxũpetũ i ngēma norũ duũxũ. Rũ ngẽxguma duũxũgũ rü ngoxo i Bechebũ choxũ nawogũegu, ¿rũ ñuxãcũ tá pexũ naxu i pemax?

Name nixĩ na Tupanaxũ pemuũẽxũ

(Lc 12.2-7)

²⁶ —Rũ ngẽmacèx ¡tãxũ i nüxũ pemuũẽxũ i ngēma duũxũgũ! Erũ guxũma i ngēma cúãcũ üxũ rü tá nangoxoma. Rũ guxũma i ngēma ñuxma duũxũgũcèx ãxũguxũ, rü yixcũra rü tá nüxũ nacuèxgũama. ²⁷ —Rũ guxũma i ngēma pemaãĩcatama nüxũ chixuxũ, ¡rũ meã duũxũgũcèx penangoxẽẽx! Rũ guxũma i ngēma bexma pemaã nüxũ chixuxũ, ¡rũ tagaãcũ guxũ i duũxũgũmaã nüxũ pixu! ²⁸ —¡Rũ tãxũ i nüxũ pemuũẽxũ i ngēma duũxũgũ i pexũ daixchaũxũ! Erũ taxũnèxũĩcatama nimèxgũ. ¡Natũrũ name nixĩ i nüxũ pemuũẽ ya yima Tupana! Erũ nüma nüxũ nangẽxma i porã na napoxcuãxũcèx i pexene rü peãẽ rü ta i ngēma ngoxogũxũ ínãpoxcuexũgu. ²⁹ —¿Tama ãxna wũxitachinũ i dẽrugu namaã petaxe i taxre i werixacũgũ? Natũrũ bai i wũxi i ngēma werixacũ rü ñaxtũanegu nangu, ega tama nanaxwèxegu ya Penatũ ya Tupana. ³⁰ —Rũ woo i peyãe rü Tupana rü wũxichigũ rü nayaxugũ, rü nüxũ nacuèx na ñuxre ngẽxmaxũ. ³¹ —Rũ ngẽmacèx ¡tãxũ i pemuũẽxũ! Erũ pema rü muxũma i werixacũgũarũ yexeraxũchi pexũ nangechaũ ya Tupana.

Yĩxema duũxũgũpẽxewa tũgũ ixuxe na Ngechuchu ya Cristuarũ duũxũgũ tũxũ

(Lc 12.8-9)

32 –Rü guxāma ya texé i ñoma i nañewa i duñxügüpëxewa tügü ixuxe na chorü duñxü tiñxü, rü choma rü tá ta Chaunatü ya daxügücüpëxewa tuxü chixu na chorü duñxü tiñxü i tümax. 33 –Natürü texé ya ñoma i nañewa i duñxügüpëxewa tügü ixuxe na tama chorü duñxü tiñxü, rü choma rü tá ta Chaunatü ya daxügücüpëxewa tuxü chixu na tama chorü duñxü tiñxü i tümax.

Ngechuchugagu nixi i yatoyexü i duñxügü
(Lc 12.51-53; 14.26-27)

34 –Rü tama name i nagu perüxnüë na núma chaxüxü na guxü i duñxügü rü wüxigu naxñüëxücèx. Natürü pemaã nüxü chixu rü núma chaxü na chaugagu yatoyexücèx i duñxügü. 35 –Rü nuã chaxü na wüxi ya yatü rü tama nanatümaã wüxigu naxñüëxücèx, rü wüxi i paxü rü tama naëmaã wüxigu naxñüëxücèx, rü wüxi i naneãx rü tama ngixëmaã na wüxigu naxñüëxücèx. 36 –Rü ngëmaãcü wüxi ya ñwa, rü nügütanüxümaã tátama naxuwänüãxgü. 37 –Rü yixema texé ya choxü na tangechañxüärü yexera tümanatüxü rü ëxna tümaëxü ngechañxë, rü taxucürüwama chorü duñxü tixi. Rü yixema texé ya choxü na tangechañxüärü yexera tümanexü rü ëxna tümaxãcüxü ngechañxë, rü taxucürüwama chorü duñxü tixi. 38 –Rü yixema tama yaxna namaã ñnüxë i ngëma guxchaxügü i chaugagu tümacèx ínguxü rü ngëmaãcü chowe rüxñxë, rü taxucürüwama chorü duñxü tixi. 39 –Rü texé ya tügü maxëëchañxë rü tá itayarütaxu. Natürü texé ya chauxcèx yuxe rü tá tanayaxu i maxü i taguma gúxü.

Åmarechiga
(Mr 9.41)

40 –Rü texé ya pexü yaxúxe rü choxü nixi i tayaxuxü. Rü texé ya choxü yaxúxe rü yima núma choxü mucü ya Chaunatüxü nixi i tayaxuxü. 41 –Rü texé ya wüxi i orearü uruü i Tupana ngëma muxüxü yaxúxe, rü ngëmatama ãmare i wüxi i orearü uruü yaxuxürañxü tátama tayaxu. Rü texé ya wüxi i yatü i mecümaxüxü yaxúxe erü namecüma, rü ngëmatama ãmare i wüxi i yatü i mecümaxü yaxuxürañxü tátama tayaxu. 42 –Rü texé ya wüxi i pochiyuãcu i dexá i gëuxchiñxü nüxna ãxë i ngëxürüñxü i chorü buxügü i chowe rüxñxü, rü aixcümaxüchi tá tanayaxu i tümaärü ãmare –ñnanagürü ga Ngechuchu.

11

Cuáü ga baiñxëëruü nanamu ga ñuxre ga norü duñxügü na Ngechuchuxütawa íyadaugüxücèx
(Lc 7.18-35)

1 Rü yexguma nüxü nachauxgu ga Ngechuchu ga na yaxucuxëgüãxü ga yema 12 ga norü ngüexügü, rü inaxüãchi ga yéma na duñxügüxü nangüexëëxücèx rü nüxü yaxúxücèx ga ore ga mexü ga guxüne ga ñanegü ga yema nañewa yexmagünewa. 2-3 Rü Cuáü ga baiñxëëruü rü yexguma poxcupataxüwa nayexmayane, rü nüxü nacuáxchiga ga yema Ngechuchu üxü. Rü yemacèx ga Cuáü rü Ngechuchuxütawa nanamugü ga ñuxre ga norü duñxügü na nüxna yacagüxücèx rü aixcüma Cristu ga ínanguxëëgücü yíi, rü ëxna to tá yíi ya Cristu. 4 Rü Ngechuchu nanangãxü rü ñnanagürü nüxü ga yema duñxügü: –¡Pewoegu rü Cuáümaã nüxü peyarüxu i ngëma pematama nüxü pedaugüxü rü nüxü pexñüëxü! 5 –¡Rü namaã nüxü pixu rü ngëma ngexetügüxü rü marü nidauchigü, rü ngëma ichixeparaxü rü marü inachigü, rü ngëma chaxüneãxgüxü rü marü naxcèx nitaanegü, rü ngëma ngauchixëgüxü rü marü ningoxnamachixëgü, rü ngëma yuexü rü wenaxãrü namaxë, rü ngëma ngearü ngëmaxüãxgüxü rü marü namaã nüxü tixu i

Tupanaärü ore i mexü! ⁶ Rü tataãe ya yíxema texé ya tama nüxü rüxoxe na choxü tayaxõxü –ñanagürü ga Ngechuchu. ⁷ Rü yexguma nawoeguxgu ga yema Cuáü ga baiüxëeruüârü duüxügü, rü Ngechuchu inanaxügü ga guma Cuáüchiga na yadexaxü. Rü ñanagürü nüxü ga duüxügü: –¿Tacü nixí ga pema ípeyadaugüxü ga dauxchitawa ga ngextá taxúema íxâpataxüwa? –¿Éxna wüxi ga ngëxürüüxümare ga yatü ga ñoma dexne ga buanecü yaxiãxtanücüüxëecürüü ixixü nixí ga ípeyadaugüxü? ⁸ –Rü éxna ega tama guma ípeyadaugügu, ¿rü tacü nixí ga ípeyadaugüxü? ¿Éxna wüxi ga yatü ga poraãcü nügü ngëxãëxü yïixü ga ípeyadaugüxü? Pema nüxü pecuëx i ngëma poraãcü nügü ngëxãëgüxü rü äëxgacügü ya tacügüpatawa nangëxmagü. ⁹ –¿Tacü éxna nixí ga ípeyadaugüxü? ¿Éxna wüxi ga Tupanaärü orearü uruüxü? Ngëmáãcü aixcüma yema nixí ga ípeyadaugüxü. Rü pemaã nüxü chixu rü Cuáü ya baiüxëeruü rü tama wüxi i ngëxürüüxümare i Tupanaärü orearü uruü nixí. ¹⁰ –Rü Cuáüchiga nixí ga naxümatüxü ga yema Tupanaärü ore ga ñaxü: “Cupëxegu chayamu i chorü orearü ngeruü na cuxcëx namexëëãxücëx i duüxügüarü maxü”,

ñaxü. ¹¹ –Rü aixcüma pemaã nüxü chixu rü guxü i duüxügütanüwa rü nataxuma i Tupanaärü orearü uruü i Cuáü ya baiüxëeruüârü yexera ixixü. Natürü yíxema Tupana äëxgacü íxixüwa wixwexüchi üxe, rü Cuáüârü yexera tixí. ¹² –Rü yexguma noxri Cuáü ya baiüxëeruü inaxügügu na nüxü yaxúxü i ñuxãcü Tupana äëgacü ixixüwa nangugüxü i duüxügü, rü nüma ga duüxügü rü norütama ngúchaxümaã nawa nangugüchaxü i ngema nachica. Rü ñuxma rü ta ngemagutama narüxñü. ¹³ –Rü guxüma ga Tupanaärü orearü uruügüarü orewa, rü ore ga mugü ga Moíché ümatüxüwa rü nüxü nixuchigagü na ínanguégaxü ya Cristu na äëxgacü na yïixücëx. Rü yemaãcü nixí ñuxmata ínangu ga Cuáü. ¹⁴ –Rü ngëxguma chi peyaxögüchaügu i ñaã chorü ore, rü pemaã nüxü chixu rü Cuáü ya baiüxëeruü nixí ya yima yanguxëecü ga yema ore ga guma nuxcümaücü ga orearü uruü ga Ería ga ípenanguxëëcüchiga ümatüxü. ¹⁵ –Rü yíxema ächixëgüxe, ¿rü naga taxñü i ngëma ore! –ñanagürü. ¹⁶ Rü ñanagürü ta ga Ngechuchu: –¿Tacügu tá chanangu i ñaã duüxügü i ñuxma maxëxü? Maneca ñaã duüxügü rü taxumaãma nataãëgü ngëxgumarüü i ñuxre i buxügü i nügümaã iãxtüwa rütogüxü, rü íxñücwëxegüxü, rü tagaãcü namücügüxü ñagüxü:

¹⁷ “Marü wowerumaã pexcëx tapaxetagu, natürü tama ípixüãchitanüxü. Rü marü ngechaü i wiyaegu pexcëx tawiyaegü, natürü tama pexauxe”, ñagüxü. Rü ngëma buxügürüü nixí i ñaã duüxügü. ¹⁸ –Yerü núma naxü ga Cuáü ga baiüxëeruü rü tama pâü nangõx rü tama binu nayaxaxü. Rü yexguma ga nümagü rü: “Nangoxoãx” ñanagürügü nüxü. ¹⁹ –Rü ñuxüchi núma chaxü i choma ya Tupana Nane na duüxüxü chiixü. Rü choma rü õna changõx rü binu chayaxaxü. Rü ngëxguma i nümagü rü taanüxüchixü rü ngãxwëxexü choxü nawogüe. Rü nüxü nixugüe rü pecaduãxgüxümaã chaxãmücü, rü namaã chaxãmücü i ngëma duüxügü i Dumaärü äëxgacücëx dïëru ngixü ideetanüxü. Natürü Tupanaärü cuëx rü meãma nangox tümawa ya yíxema aixcüma nawe rüxixë –ñanagürü ga Ngechuchu.

Ñanagü ga tama Tupana ga ññüene
(Lc 10.13-15)

²⁰ Rü yexguma ga Ngechuchu rü inanaxügü ga na yangagüãxü ga yema duüxügü ga guma ñanagücüãx ga ngextá yexeraãcü ínaxüaxüwa ga taxü ga mexügü ga Tupanaärü poramaã naxüxü. Rü poraãcü nayangagü, yerü yema duüxügü rü tama nüxü narüxoe ga norü chixexü. ²¹ Rü ñanagürü

ga Ngechuchu: —Rü wüxi i ngechañ nixĩ i pexcèx, Pa Corachíüçüãxgü rü Pa Bechaídacüãxgüx, yerü yexguma chi Tiruarü ãñewa rü Chidãñãrü ãñewa chanaxüxgu ga yema mexüğü ga cuèxruüğü ga Tupanaãrü poramaã petanüwa chaxüxü, rü woo ga na poraãcü yachixexü ga yema duüxüğü rü nuxcümama chitama nüxü narüxoe ga yema nacüma ga chixexü, rü poraãcüxüchi chima nügümaã nangechaüğü rü naxauxe, yerü chi nügü nicuèxãchitanü ga na yapecaduãxgüxü. ²² —Natürü pemaã nüxü chixu rü ngëma ngunexü i Tupana nagu napoxcuexü i pecaduãxgüxü, rü ngëma ngunexügu rü Tirucüãxgü rü Chidãñcüãxgüarü yexera tá pexü napoxcue i pemax, Pa Corachíüçüãxgü rü Bechaídacüãxgüx. ²³ —Rü pemax, Pa Capernáüçüãxgü i Duüxüğüx, ¿rü pema nagu perüxñüëgu rü daxüguxü i naãñewa tá ipexixü? Pemaã nüxü chixu rü naãñetüüwa i ngextá Tupana Chatanáxü ípoxcuxüwa tá nixĩ i pewogüxü. Rü yexguma chi Chodomaãrü ãñewa chanaxüxgu ga yema mexüğü ga cuèxruüğü ga Tupanaãrü poramaã petanüwa chaxüxü, rü guma ãñe ga nuxcüma norü pepadugagu iyarüxoxüñe rü ñuxma rü chi nangëxma. ²⁴ —Natürü pemaã nüxü chixu rü ngëma ngunexü i Tupana nagu napoxcuexü i pecaduãxgüxü, rü ngëma ngunexügu rü Chodomacüãxgüarü yexera tá pexü napoxcue i pemax, Pa Capernáüçüãxgüx —ñanagürü.

*Chauxcèx pexĩ na chauxütagu perüngüëxüçèx
(Lc 10.21-22)*

²⁵ Rü yexguma rü ñaãcü nayumüxë ga Ngechuchu, rü ñanagürü: —Pa Chaunatü ya Daxüguxü i Naãne rü Ñoma i Naãneãrü Yorax, cuxü chicuèxüü, erü ñaã chorü ngüexüğüxü nüxü cucuèxëë i ñaã ore i naxchaxwa iquicüxü i duüxüğü i ñoma i naãñewa nüxü cuèxüchigüxü. ²⁶ —Rü moxë cuxna chaxã, Pa Chaunatüx, erü cuma cunaxwëxe na ngëmaãcü cunaxüxü —ñanagürü. ²⁷ Rü ñanagürü ta ga Ngechuchu: —Chaunatü choxna nanaxã i guxüma i tacü i ngëxmaxü. Rü Chaunatüxicatama choxü nacuèx na texé chiixü i choma i Nane. Rü tama guxüma i duüxüğü aixcüma nüxü nacuèx na texé yiixü ya Chaunatü. Rü choma ya Nane, rü ngëma duüxüğü i Chaunatüxü nüxü chadauxëëchaüxüxĩcatama nixĩ i aixcüma nüxü cuèxgüxü na texé yiixü ya Chaunatü. ²⁸ —¿Rü nuã chauxütawa pexĩ i guxãma i pema ya ipaexe nagagu i perü chixexüğü rü perü ãxãchiãëgü! Rü choma rü tá pexna chanayaxu i pexweta na iperüngüëxüçèx. ²⁹ —¿Rü ñuxüchi penayaxu i chorü ucuxëgü rü naxcèx pedauxütaegü i chaucüma! Erü choma rü yaxna pemaã chaxñü rü taguma chaugü chicuèxüxü. Rü ngemaãcü tá nüxü ipeyangau i ngema taãë i aixcüma ixixü. ³⁰ —Erü ngëma pexü chamuxü rü natauxcha na naga pexñüëxü. Rü ngëma pexü chanaxwaxexü rü tama naguxcha na penaxüxü —ñanagürü ga Ngechuchu.

12

*Ngechuchuarü ngüexüğü rü trigu nicãñëtanü ga ngüchigaarü ngunexügu
(Mr 2.23-28; Lc 6.1-5)*

¹ Rü wüxi ga ngüxchigaarü ngunexügu rü Ngechuchu rü norü ngüexüğümaã trigunecügu nixü. Rü nataiyae ga norü ngüexüğü, rü yemacèx inaxĩãcüma yoxocüñe triguta nicãñëtanü, rü inayangöëtanü. ² Rü yexguma yemaxü nadaugügu ga Parichéugü rü ñanagürüğü Ngechuchuxü: —Dücèx i curü ngüexüğü rü chixexü naxüe. Erü ngüxchigaarü ngunexügu napuracüe, rü nachuxu nixĩ i ngëma —ñanagürüğü. ³ Rü Ngechuchu nanangãxü, rü ñanagürü: —¿Taguma ëxna poperawa nüxü pedau ga tacü na naxüxü ga nuxcümañcü ga ãëxgacü ga Dabí ga yexguma nataiyèxgu ga nüma rü

natanüxügü? ⁴ –Rü Tupanapatagu naxücu rü nanangõx ga yema pãu ga üünexü ga Dabícex rü natanüxügücex chuxuxü ga na nangõxgüãxü. Yerü paigücèxicatama nixĩ ga yema pãu. ⁵ –Rü pemax, Pa Parichéugüx ¿taguma éxna nawa pengúe ga yema ore ga mugüpanegu Moïché ümatüxü ga ñaxü rü marü name i paigü rü ngüxchigaarü ngunexügu napuracüe i tupauca ya taxünewa? Rü ngëma rü tama wüxi i pecadu nixĩ naxcèx i ngëma paigü. ⁶ –Natürü pemaã nüxü chixu rü nuã petanüwa nangëxma i wüxi i duüxü i tupauca ya taxüneärü yexera ixĩxü i Tupanapëxewa. ⁷ –Natürü pema rü tama nüxü pecuèx i ñuxü ñaxüchiga nixĩ i ngëma Tupanaärü ore i ümatüxü i ñaxü:

“Choma rü tama chanaxwèxe i chauxcèx peyamèx i carnerugü, natürü chanaxwèxe i togü pexü nangechaütümüügü”, ñaxü. Rü ngëxguma chi meã nüxü pecuèxgügu i ngëma ore, rü tãu chima chixri nachiga pidexagü i ñaã chorü ngüexügü i taxuüma i chixexü ügüxü i Tupanapëxewa. ⁸ –Rü choma i Tupana Nane na duüxüxü chiĩxü, rü aixcüma ngüxchigaarü yora chixĩ –ñanagürü ga Ngechuchu.

*Wüxi ga yatü ga yumécüchiga
(Mr 3.1-6; Lc 6.6-11)*

⁹ Rü yexguma yema nachicawa ínaxüüxgu ga Ngechuchu, rü guma ñãneärü ngutaquëxepataügu naxücu. ¹⁰ Rü yéma nayexma ga wüxi ga yatü ga norü wüxichacüüwa yumécü. Rü nümagü ga Parichéugü rü naxcèx nadaugü ga ñuxácü norü ãëxgacügüxütawa Ngechuchuxü na ínaxuaxügüxü. Rü yemacèx Ngechuchuna nacagüe, rü ñanagürügü: –¿Namexü yĩxü na texé naxcèx yataanexëëxü i wüxi i ðaawexü i ngüxchigaarü ngunexügu? –ñanagürügü. ¹¹ Rü Ngechuchu nanangãxü, rü ñanagürü: –¿Texé i petanüwa rü ngëxguma chi ngüxchigaarü ngunexügu wüxi i perü carneru puchugu nguxgu, rü taux éxna i ngëxgumatama ípeyadaugüxü rü ípenatüãchixü woo ngüxchigaarü ngunexü yixĩgu? ¹² –Natürü Tupanapëxewa rü wüxi i duüxü rü poraãcüxüchima wüxi i carneruarü yexera nixĩ. Rü ngëmacèx name nixĩ i mexü taxü i woo ngüxchigaarü ngunexü yixĩgu –ñanagürü. ¹³ Rü ñuxüchi ga Ngechuchu rü ñanagürü nüxü ga guma yatü ga yumécü: –¡Iyarüwëxãchimëxë! –ñanagürü. Rü guma yatü rü inayarüwëxãchimëxë, rü yexgumatama narümemëx, rü naĩ ga naxmëx ga mexünerüü nixĩ. ¹⁴ Rü yexguma yemaxü nadaugügu ga Parichéugü, rü ínachoxü ga yéma. Rü inanaxügüe na naxcèx nadaugüxü ga ñuxácü tá na Ngechuchuxü yamèxgüxü.

Nuxcümaüxü ga ore ga Ngechuchuchiga

¹⁵ Rü yexguma Ngechuchu nüxü cuáchigagu na Parichéugü na yamèxgüchaüxü, rü ínaxüxü ga guma ñãnewa. Rü muxüma ga duüxügü rü nawe narüxĩ. Rü nüma ga Ngechuchu rü nanameëxëë ga guxüma ga yema duüxügü ga idaaweexü. ¹⁶ Rü duüxügüna naxãga na tama nüxü yaxugüexücèx na texe na yĩxü ga nümax. ¹⁷ Rü yemaãcü nanaxü ga Ngechuchu na yanguxëëãxücèx ga yema ore ga nuxcümaücü ga Tupanaärü orearü uruü ga Ichaxía nüxü ixuxü ga ñaxü:

¹⁸ “Daa nixĩ ya chorü duü ya chomatama nüxü chaxunetacü rü nüxü changechaücü rü namaã chataãëxüchicü. Rü Chauãe i Üünexü rü nüxna tá chanamu. Rü nüma tá guxü i duüxügü i tama Yudiügu ixĩgüxümaã nüxü nixu i ore i mexü i aixcüma ixĩxü. ¹⁹ Rü tagutáma ngextá texémaã niporagacüü rü taxüemaãtáma ngextá nipura. Rü tagutáma texé ñãneärü ítamüguwa nüxü taxĩnü na natagaxü. ²⁰ Rü nüma rü tãütáma nanadai i ngëma duüxügü i norü õwa turaexü, rü tãütáma

inayanaxoxëë i ngëma duüxügü i írarüwatama yaxögüxü. Rü ngëmaäcü tá nixí ñuxmatáta guxü i nañewa nangu i ngëma norü ore i aixcüma ixüxü. ²¹ Rü guxü i duüxügü i tama Yudíugü ixígüxü rü tá naxcèx naxí na ngëmaäcü naxütawa nayauxgüãxücèx i norü maxü i taguma gúxü”, ñanagürü ga Ichaxía.

*Parichéugü rü Ngechuchuxü nixugüe na ngoxoarü poramaã napuracüxü
(Mr 3.20-30; Lc 11.14-23, 12.10)*

²² Rü Ngechuchuxütawa nanagagü ga wüxi ga yatü ga ngoxoäcü ga ngexetücü rü tama idexacü. Rü Ngechuchu nanamexëë. Rü guma yatü rü yexgumatama nidauchi rü nidexa. ²³ Rü guxüma ga duüxügü rü nabèixächiaëgü ga yexguma yemaxü nadaugügu. Rü ñanagürügü: —¿Taux éxna daa yíxü ya Dabí nane ya Cristu? —ñanagürügü. ²⁴ Natürü yexguma yemaxü naxínüëgu ga Parichéugü, rü ñanagürügü: —Ñaa yatü i Ngechuchu, rü ngoxogünatü i Bechebúarü poramaã nixí i ínawoxüãxü i ngoxogü —ñanagürügü. ²⁵ Natürü nüma ga Ngechuchu rü nüxü nacüexama ga tacügu na naxínüëxü. Rü yemacèx ñanagürü nüxü: —Ngëxguma chi wüxi i nachíüãnecüãx i duüxügü nügü itoyegu rü nügütanüwa chitama nügü nadaixgu, rü nügü chitama naguxëë. Rü ngëxguma chi wüxi ya íãnecüãx rü éxna wüxi ya ícüãx nügümaã nuëëchagu rü nügü nadaixgu, rü nügü chitama naguxëë. ²⁶ —Rü ngëxguma chi Bechebü nügütama ítëxüchigu rü nügütama yamëxgu, ¿rü ñuxäcü chi äëxgacüecha yíxü? ²⁷ —Rü pemax, Pa Parichéugüx, rü choxü pixuxgu rü Bechebúarü poramaã íchanawoxü i ngoxogü. Natürü ngëxguma chi Bechebúarü poramaã íchanawoxüxgu i ngoxogü, ¿rü texéarü poramaã nixí i perü ngüexügü rü ínawoxüãxü i ngoxogü? Rü dücax, rü ngëma perü ngüexügütama nixí i pexcèx nangoxëëxü na ípetüexü. ²⁸ —Natürü pemaã nüxü chixu rü aixcüma Tupanaãë i Üünexüãrü poramaã nixí i íchanawoxüxü i ngoxogü. Rü ngëmawa pexü nüxü chacüexëë na marü núma petanüwa nanguxü ya Tupana, na perü äëxgacü yíxücèx. ²⁹ —¿Rü ñuxäcü texé wüxi ya yatü ya poracüpatagu taxücu na tanapuxüxücèx i norü ngëmaxügü, ega tama tayanëixiragu i noxrix? Rü ngëxguma tayanëixiraguxicatama nixí i nüxna tanapuxüxü i norü ngëmaxügü ya yima yatü ya poracü. ³⁰ —Rü yíxema tama choxü ngechaüxë rü chauxchi taxai. Rü yíxema tama choxü rüngüxëxë na Tupanacèx tananutaquëxexü i duüxügü rü chauxchawa tanangianexëë. ³¹ —Rü ngëmacèx pemaã nüxü chixu rü Tupana tá nüxü nüxü nangechaü i guxüma i pecadugü i duüxügü ügüxü rü guxüma i norü dexagü i chixexü. Natürü yíxema Tupanaãë i Üünexümaã tacü ixugüxe, rü Tupana rü tagutáma tüxü nüxü nangechaü i ngëma chixexü. ³² —Rü guxáma ya texé ya tacü chomaã ixugüxe rü Tupana tá tüxü nüxü nangechaü i ngëma. Natürü texé ya Tupanaãë i Üünexümaã tacü ixugüxe, rü Tupana rü tagutáma tüxü nüxü nangechaü i ngëma, rü bai i ñoma i nañewa, rü bai i daxügüxü i nañewa.

*Wüxi i nanetü rü norü owa nixí i nüxü icuáxü na tacü rü nanetü yíxü
(Lc 6.43-45)*

³³ —Rü ngëxguma wüxi i nanetü rü namexgu, rü norü o rü ta name. Natürü ngëxguma wüxi i nanetü rü nachixëxgu, rü norü o rü ta nachixe. Rü wüxi i nanetü rü norü owa nixí i nüxü icuáxü ngoxi name rü éxna tama. ³⁴ —Pa Äxtapearü Duüxügüx, ¿ñuxäcü i mexü i orexü pixuxü ega pematama rü pichixecümagu? Erü ngëma ore i peëxmaã nüxü pixuxü rü peãëwa nixí i ne naxüxü. ³⁵ —Wüxi ya mecü ya yatü rü mexü i orexü nixu, erü naãëwa rü aixcüma mexügu narüxínü. Natürü wüxi i yatü i chixecümaxü rü chixexü i orexü nixu, erü naãëwa rü chixexügu narüxínü. ³⁶ —Rü choma pemaã nüxü

chixu rü ngēma ngunexü i nagu nagúxü i nañe, rü Tupana rü tá nüxna naca i guxü i duüxügü naxcèx i guxüma i ore i chixexü i nüxü yaxuxü i ñoma i nañewa. ³⁷ —Erü ngēma curü dexagüwa rü Tupana tá cuxü nangugü, rü tá cumaã nüxü nixu ngoxita cume i napëxewa rü ëxna tama —ñanagürü ga Ngechuchu.

Duüxügü ga tama yaxögüchaüxü rü naxcèx ínacaü ga to ga cuèxruü ga Tupanaärü poramaã üxü
(Mr 8.12; Lc 11.29-32)

³⁸ Rü yexguma rü ñuxre ga Parichéugü rü Yudíugüarü ngúexëëruüügü ga ore ga mugüwa nguxëëtaegüxü rü ñanagürügü Ngechuchuxü: —Pa Ngúexëëruüx, cuxü tadauxchaü na cunaxüxü i wüxi i cuèxruü i mexü i Tupanaärü poramaã cuxüxü —ñanagürügü. ³⁹ Rü Ngechuchu nanangäxü, rü ñanagürü: —Ñã duüxügü i chixecümagüxü rü tama yaxögüxü rü naxcèx ínacaü i wüxi i cuèxruü i mexü i Tupanaärü poramaã üxü. Natürü yema cuèxruü ga nuxcümaücü ga Tupanaärü orearü uruü ga Yonáxü ngupetüxüxüxüca tátama nadaugü. Rü taxuütáma i to i cuèxruü nüxü tadauxëë i ñã duüxügü. ⁴⁰ —Rü yexgumarüü ga Yoná ga tomaëxpüx ga ngunexü rü tomaëxpüx ga chütaxü choxni ga taxü ga bayenaänüwa na nayexmaxü rü wenaxärü na nangóxü, rü ngëxgumarüü tá ta nixü i choma i tomaëxpüx i ngunexü rü tomaëxpüx i chütaxü i chatáxüwa changëxmaxü. Natürü wena táxarü changox. ⁴¹ —Rü ngëxguma nañeärü guxgu rü Tupana rü ñã duüxügüna nacaxgu i norü pecaduchiga, rü nuxcümaüügüxü ga Nínibecüãx ga duüxügü rü tá inachigü. Rü Tupanapëxewa tá ínanaxuaxügü i ñã duüxügü i ñuxma maxëxü. Yerü nümagü ga Nínibecüãx rü nüxü narüxoe ga nacümagü ga chixexü ga yexguma Yoná namaã nüxü ixuxgu ga Tupanaärü ore. Natürü ñuxma nuã petanüwa nangëxma i wüxi i Yonáärü yexera ixüxü. ⁴² —Rü ngëxguma nañeärü guxgu rü Tupana rü ñã duüxügüna nacaxgu i norü pecaduchiga, rü ngüma ga nuxcümaücü ga Chabaaneärü äëxgacü rü tá iichi. Rü tá ínaxuaxü i ñã duüxügü i ñuxma maxëxü. Yerü ngüma rü yaxüwaxüchi ne ixü na äëxgacü ga Charumóüxü naxínüxüçèx ga ñuxácü poraäcü nüxü na nacuèxüchixü. Natürü ñuxma nuã petanüwa nangëxma i wüxi i Charumóüärü yexera ixüxü.

ngoxo i taeguxüchiga
(Lc 11.24-26)

⁴³⁻⁴⁴ —Rü ngëxguma wüxi i ngoxo rü wüxi ya yatüwa ínaxüüxgu, rü dauxchitawa i ngextá taxúema íxãpataxüwa rü nu ne nanaxümare. Rü naxcèx nadau na ngexta na nangüxüçèx. Rü ngëxguma taxuxguma nüxü iyangauxgu na ngexta nangüegaxü, rü nagu narüxüna na wena nataeguxü naxcèx ya yima yatü ga noxri nawa ínaxüxüchirécü. Rü ngëxguma nataegugu, rü nüxü inayangau ya yima yatü na wüxi ya í ya ngëácüne rü mexëene rü meã nabixichinerüü na yüxü. ⁴⁵ —Rü ngēma ngoxo rü ínixü rü naxcèx nayadau i to i 7 i ngoxogü i norü yexera i chixexü. Rü guxüma i ngēma rü yima yatügu nayachocu, rü ngëxma naxächüügü. Rü ngëxguma ya yima yatü rü noxriarü yexera nachixe. Rü ngëxgumarüü tá ta nüxü naxüpetü i ñã duüxügü i chixecümagüxü —ñanagürü ga Ngechuchu.

Ngechuchuarü mamá rü nañeëgüchiga
(Mr 3.31-35; Lc 8.19-21)

⁴⁶ Rü yexguma duüxügümaã íyadexayane ga Ngechuchu, rü yéma tangu ga naë rü nañeëgü. Rü ípataarü düxétügu tarücho, rü Ngechuchumaã tidexagüchaü. ⁴⁷ Rü wüxi ga duüxü Ngechuchumaã nüxü nixu, rü ñanagürü: —Yéa düxétüwa tangëxma ya cue rü cueneëgü, rü cumaã tidexagüchaü —ñanagürü

nüxü. ⁴⁸ Natürü Ngechuchu nanangãxü ga yema duüxü ga namaã nüxü ixuxü ga yema ore, rü ñanagürü nüxü: —¿Texé tixi ya chaue? ¿Rü texégü tixi ya chaueneëgü? —ñanagürü. ⁴⁹ Rü yexguma ga Ngechuchu rü norü ngúexügü naxuneta, rü ñanagürü: —Dücèx, daxe tixi ya chaue, rü daagü nixi ya chaueneëgü. ⁵⁰ —Erü guxãma ya texé ya naxúxe i Chaunatü ya daxügücüarü ngúchaü, rü yixema tixi ya chaueneë rü chaueyèx rü chaue —ñanagürü ga Ngechuchu.

13

Ore ga toecügu ixuxü (Mr 4.1-9; Lc 8.4-8)

¹ Rü yematama ngunexügu ga Ngechuchu rü ínaxüxü nawa ga guma i ga nagu napexüne. Rü naxtaxaãnacüwa nayarüto. ² Rü muxüma ga duüxügü rü yema naxcèx nangutaquéxegü. Rü yemacèx düxwa wüxi ga ngegu nixü ga Ngechuchu, rü guma nguwa narüto. Rü guxüma ga duüxügü rü yexma naxnecütéxegu nachigü. ³ Rü yexguma ga Ngechuchu rü muxüma ga ore ga cuèxruüwa nanangúexëe ga duüxügü. Rü norü ngüxëetaewa rü ñanagürü: —Rü wüxi ga yatü ga toecü rü trigumaã nanagüane. ⁴ —Rü yexguma trigumaã nagüaneãgu, rü ñuxre ga guma trigu rü namacüwagu nayi. Rü íngügü ga werigü, rü nanawecu. ⁵ —Rü náigü ga trigu rü nutatanügu nayi ga ngextá ínachixcaxüwa ga waixümü. Rü paxa narüxügü ga guma trigu, yerü ga waixümü rü tama nayaxcü. ⁶ —Rü yexguma nangunagügu ga üèxcü, rü narüngëxgü ga guma trigu. Rü nayue yerü tama poraãcü nixãmèxã. ⁷ —Rü náigü ga trigu rü tuxunecügu nayi. Rü yexguma nayaegu ga tuxügü, rü guma triguxü inawocu, rü nanadai. ⁸ —Natürü náigü ga trigu rü mexü ga waixümügu nayi. Rü yexguma nayaegu rü muxüma ga trigu nawa ínguxuchi. Rü nümaxü rü wüxireewa rü 100 püxü ínguxuchi ga norü o, rü náireegüwa rü 60, rü náireegüwa rü 30. ⁹ —Rü yixema áchixëgüxe, ¡rü nagu tarüxínüë i ngëma ore! —ñanagürü.

Tacüçèx nixi ga yema ore ga cuèxruügügu ixuxü (Mr 4.10-12; Lc 8.9-10)

¹⁰ Rü yexguma ga norü ngúexügü rü Ngechuchucèx naxi, rü nüxna nacagüe, rü ñanagürügü: —Pa Corix, ¿Tüxcüü i cuèxruügügu cuyaxuãcüma cunangúexëexü i ñaã duüxügü? —ñanagürügü. ¹¹ Rü Ngechuchu nanangãxü, rü ñanagürü nüxü: —Tupana rü pexüxícatama nüxü nacüèxëe i ngëma èxügüxü na ñuxãcü ãëxgacü yixü i nümax. Natürü nüma i togü i duüxügü rü tama nüxü nüxü nacüèxëe i ngëma. ¹² —Rü texé ya aixcüma naga ínúxë i chorü ore, rü Tupana rü yexeraãcü tá tüxü nüxü nacüèxëe. Rü ngëmaãcü tá tüxü nangëxma i taxü i cuèx. Natürü texé ya tama naga ínúxë i ñaã ore rü Tupana tá tüxna nanayaxu i ngëma íraxü i cuèx i tüxü ngëxmachiréxü. ¹³ —Rü ngëmacèx nixi i ore i cuèxruümaã chanangúexëexü i ngëma duüxügü. Erü nümagü rü woo nüxü nadaugügu, rü ñoma tama nüxü nadaugüxürüü nixigü. Rü woo nüxü naxínüëgu, rü ñoma tama nüxü naxínüëxürüü nixigü. Rü tama nüxü nacüèxgüéga. ¹⁴ —Rü aixcüma ngëma duüxügüchiga nixi ga yema Tupanaãrü ore ga nuxcümañcü ga norü orearü urüü ga Ichaxía nüxü ixuxü ga ñaxü: “Rü ngëma duüxügü rü tá aixcüma nüxü naxínüë, natürü tãütáma nüxü nacüèxgüéga i tacüchiga na yixü i ngëma nüxü naxínüëxü. Rü aixcüma tá nüxü nadaugü, natürü tãütáma nüxü nacüèxgü na tacüchiga yixü i ngëma nüxü nadaugüxü. ¹⁵ Erü ngëma duüxügü rü tãütáma nüxü nacüèxgüchaü i chorü ore, rü naxchaxwa tá nügü narütütamachixëgü rü tá naxchaxwa napexetügü. Rü ngëmaãcü tá nanaxügü na tama

nüxü nadaugüxüçèx i ngëma mexü i naxcèx chaxüxü, rü tama nüxü naxĩnüèxüçèx i chorü ore, rü tama nüxü nacuèxgüxüçèx na ñuxäcü choma chanaxwèxexüñäcüma na namaxèxü, rü tama chauxcèx nadaugüxüçèx na chanamaxèxèxüçèx”,

ñanagürü. ¹⁶ Rü ñanagürü ta ga Ngechuchu: —Natürü pemax, Pa Chorü Ngüexügüx, rü petaäëgü erü pexetügümaâtama nüxü pedaugü i ngëma chaxüxü rü pexmachixëmaâtama nüxü pexĩnüë i chorü ore. ¹⁷ —Rü aixcüma pemaã nüxü chixu rü muxüchixü ga nuxcümaügüxü ga Tupanaärü orearü uruügü rü muxüchixü ga duüxügü ga imecümaxü, rü nüxü nadaugüchañ i ngëma ñuxma chauxütawa nüxü pedaugüxü. Natürü tama nüxü nadaugü. Rü nüxü naxĩnüèchañ i ngëma ore i ñuxma chauxütawa nüxü pexĩnüèxü. Natürü tama nüxü naxĩnüë —ñanagürü.

*Ngechuchu rü meã nanangoxëë ga yema ore ga toecüchigagu yaxuxü
(Mr 4.13-20; Lc 8.11-15)*

¹⁸ Rü ñanagürü ta ga Ngechuchu: —Düçèx, iperüxĩnüë na ñuxü ñaxüchiga yĩxü i ngëma ore i cuèxruñ i toecüchiga! ¹⁹ —Rü guma trigu ga namagu yixünerüñ tixĩgü ya yixema nüxü ñnüèxë i ore i mexü na ñuxäcü äëxgacü yĩxü ya Tupana natürü tama nüxü cuèxgüxe i ñuxü ñaxüchiga na yĩxü i ngëma ore. Rü tümáxëta nangu i Chataná, rü tüxü nüxü inayarüngümaëxëë i ngëma ore i tümáëwa ngëxmachiréxü. ²⁰ —Rü guma trigu ga nutatanügu yixünerüñ nixĩ i ngëma duüxügü i nüxü ñnüèxü i Tupanaärü ore rü taäëäcüma nayauxgüxü. ²¹ —Natürü ngëma na tama aixcüma nagu naxĩnüèxü i ngëma ore, rü paxaächitama nayaxögü, rü yixcüra ngëxguma ngëma oregagu guxchaxügü nüxü üpetügu rü èxna duüxügü naxchi aiegu, rü ínanatèxgü i ngëma ore. ²² —Rü guma trigu ga tuxunecügu yixünerüñ nixĩ i ngëma duüxügü i Tupanaärü orexü ñnüèxü rü yaxögüxü. Natürü ñoma i naãneärü ngëmaxügüçèx oegaäëgüxü, rü ngëmaguama rüxĩnüèxü, rü düxwa nüxü inayarüngümaë i ngëma ore. Rü guxüma i ngëma rü Tupanaärü orexü nüxü narüxoxëë na tama aixcüma meã Tupanawe naxĩxüçèx i ngëma duüxügü. ²³ —Natürü guma trigu ga mexü ga waixümügu yixünerüñ nixĩ i ngëma duüxügü i nüxü ñnüèxü i Tupanaärü ore, rü nüxü cuèxgüxü i tacüchiga na yĩxü, rü naga ñnüèxü rü meã naxcèx maxèxü. Rü tümáxë rü guma trigu ga 100 püxü nawa ínguxuchinerüñ tixĩ. Rü tümáxë rü guma 60 püxü nawa ínguxuchinerüñ tixĩ. Rü tümáxë rü guma 30 püxü nawa ínguxuchinerüñ tixĩ —ñanagürü ga Ngechuchu.

Ore ga chixexü ga natüane ga trigutanügu toxüchigagu ixuxü

²⁴ Rü Ngechuchu rü to ga ore ga cuèxruñxü duüxügümaã nixu, rü ñanagürü: —Rü nüma ya Tupana rü ñoma wüxi ga yatü ga mexüne ga triguchire naãnegu tocürüñ tá nanaxü. ²⁵ —Rü guma yatü rü yexguma ínapeyane rü wüxi ga norü uwanü ga naxchi aixü rü yéma naxü. Rü naëchita yexma trigunecügu nayatogü ga chixexü ga natüane. Rü ñuxüchi ínixü. ²⁶ —Rü yexguma naxügügu ga trigu rü nayaegu rü yexwacèx yaxoxgu, rü yema natüane rü ta nangox. ²⁷ —Rü yexguma ga yema yatüarü duüxügü, rü namaã nüxü nayarüxugü, rü ñanagürügü:

“Pa Corix, cuma rü cuanegu rü triguxicachirëx ngëxma cuto. ¿Natürü ñuxäcü i ñuxma rü chixexü i natüane rü ta ngëma naxügüxü?” ñanagürügü. ²⁸ —Rü yexguma ga yema naãneärü yora, rü ñanagürü nüxü:

“Maneca wüxi i chorü uwanü i chauxchi aixü nixĩ i ngëma ngexü wagüxü” ñanagürü. Rü yexguma ga norü duüxügü rü nüxna nacagü, rü ñanagürügü:

“Pa Corix, ¿cunaxwèxexü na tanabéxü i ngëma chixexü i natüane?” ñanagürügü. ²⁹ —Natürü nüma ga norü cori rü ñanagürü nüxü ga yema norü duüxügü:

“¡Nüetama ngema nangëxmagü! Erü ngëxguma chi penabëxgu, rü ngürüãchi trigumaã chi ta penangauxëë na penabëxü. ³⁰—Rü narümemaë nixĩ i nüetama ngema nayae ñuxmatáta triguarü buxgüwa nangu. Rü ngëxguma rü ngema tá chanamugü i chorü puracütanüxü, rü tá nanabëxira i ngëma chixexü i natüane. Rü tá ínanagoxüçüta, rü ñuxüchi tá ínanagu. Rü ngëmawena tá nayabuxgü i trigu, rü naxchiügu tá choxü namaã nanguxügu” ñanagürü.

Ore ga motachachiregu ixuxü
(Mr 4.30-32; Lc 13.18-19)

³¹ Rü Ngechuchu rü to ga ore ga cuèxruüxü duüxügümaã nixu, rü ñanagürü: —Rü ngëma Tupanaarü ore rü yexera nixüchigü. Rü ñoma wüxi ya motachachire ya wüxi ya yatü naãnegu toxünerüü nixĩ. ³²—Rü woo naxíraxüchichirëx ya yima naxchire, natürü ngëxguma naxüxgu rü nayëxgu, rü wüxi i nanetü i taetaxü nixĩ. Rü ngëmacèx i werigü rü natanüwa naxĩ, rü ngëxma nayarüxüchiãügu —ñanagürü.

Ore ga pãüärü puxëëruügu ixuxü
(Lc 13.20-21)

³³ Rü Ngechuchu rü to ga ore ga cuèxruüxü duüxügümaã nixu, rü ñanagürü: —Rü Tupanaarü ore rü duüxügütanüwa nangu. Rü nixüchigü rü nanaxüchicüxü i norü maxü. Rü ñoma írxaxü i pãüärü puxëëruü i wüxi i nge taxü i ngürü pãüchara namaã ipuxëëxürüxü nixĩ —ñanagürü ga Ngechuchu.

Cuèxruügu ixuxü ga oremaã nidexa ga Ngechuchu na yanguxëëãxüçèx ga Tupanaarü ore
(Mr 4.33-34)

³⁴ Rü guxüma ga yema ore ga Ngechuchu duüxügümaã nüxü ixuxü, rü cuèxruügu yaxuãcüma namaã nüxü nixu. Rü yemaãcüxicatama nixĩ ga namaã nüxü yaxuxü. ³⁵ Rü yemaãcü nanaxü ga Ngechuchu na yanguxëëãxüçèx ga yema Tupanaarü ore ga nuxcümaüçü ga norü orearü uruü ga Ichaxía ümatüxü ga ñaxü:

“Choma rü cuèxruügu ixuxü i oremaã tá duüxügümaã chidexa. Rü tá namaã chanangoxëë i ngëma cuèx i ëxüguxü ga yexguma noxri naãne ixügügumama iicüxü”, ñaxü.

Ngechuchu nanangoxëë na tacüchiga yüxü ga yema ore ga chixexü ga natüane ga trigutanügu toxüchigagu ixuxü

³⁶ Rü Ngechuchu ínyamugü ga duüxügü, rü guma í ga nagu napexünegu naxücu. Rü norü ngüexügü rü yéma naxcèx naxĩ, rü ñanagürügü nüxü: —Pa Corix, ¡tomaã nangoxëë na tacüchiga yüxü i ngëma chixexü i natüanegu ixuxü i ore! —ñanagürügü. ³⁷ Rü yexguma ga Ngechuchu rü ñanagürü nüxü: —Rü yima mexü i trigumaã toecü, rü nüma nixĩ ya Tupana Nane ya duüxüxü ixĩcü. ³⁸—Rü ngëma naãne i nagu natoexü, rü ñoma i naãne nixĩ. Rü ngëma mexü i trigu rü ngëma nixĩ i duüxügü i Tupanaarü duüxügü ixügüxü. Rü ngëma chixexü i natüane, rü ngëma nixĩ i duüxügü i Chatanáarü ixügüxü. ³⁹—Rü ngëma norü uwanü i chixexü i natüanemaã naëchita naãnegu yatoexü, rü ngëma nixĩ i Chataná. Rü ngëma ngunexü i nagu nabuxuxü i trigu rü naãneärü gúxchiga nixĩ. Rü ngëma puracütanüxü i triguarü buxwa puracüexü, rü Tupanaarü orearü ngeruügu i daxüçüãx nixügü. ⁴⁰—Rü ngëxgumarüü i ngëma chixexü i natüane rü na nabëxü rü ñuxüchi na ínaguxü, rü ngëxgumarüü tá ta nixĩ i naãneärü guxgu. ⁴¹—Rü choma i Tupana Nane na duüxüxü chiüxü, rü tá chanamu i chorü orearü ngeruügu i daxüçüãx na nadeãxüçèx i ngëma duüxügü i chixexü ügüxü rü ngëma duüxügü i toguãxü chixexü ügüxëëxü.

Rü tá ínanawoxŭ. ⁴² —Rü tá üxüxetüwa nayawocu. Rü ngema tá naxauxe rü tá nixüxchapütagü. ⁴³ —Natürü guxüma i ngēma duüxügü i Tupanaga íñüëxŭ, rü tá üëxcürüü inabaixgü i ngextá Tanatü ya Tupana äëxgacü ííxüŭwa. Rü yíxema ächixëgüxe, ¡rü nüxŭ taxínüë i ngēma ore! —ñanagürü.

Ore ga taxü ga dïeru ga icüxügu ixuxü

⁴⁴ Rü Ngechuchu rü to ga ore ga cuëxruüxŭ duüxügümaã nixu, rü ñanagürü: —Rü ngēma na äëxgacü yíxü ya Tupana rü duüxügücèx rü namexechi ñoma wüxi i uiru i wüxi i naãnegu icüxürüxŭ. Rü wüxi ya yatü rü ngëxguma nüxŭ iyangauxgu i ngēma uiru, rü paxa wena ngēma naãnegu nayacux. Rü taãëcüma namaã nataxe i guxüma i norü ngēmaxügü na naxcèx nataxexüçèx i ngēma naãne na noxrü yíxüçèx i ngēma uiru —ñanagürü.

Ore ga nuta ga ngëxãëruü ga tatanüçügu ixuxü

⁴⁵ Rü ñanagürü ta ga Ngechuchu: —Rü duüxügü rü ñoma wüxi i taxetanüxŭ i nutagü ya ngëxãëruüçèx dauxürüü nixígü na poraãcü Tupanaxcèx nadaugüxŭ na nüma norü äëxgacü yixíxüçèx. ⁴⁶ —Rü ngēma taxetanüxŭ rü ngëxguma düxwa nüxŭ iyangauxgu ya wüxi ya nuta ya ngëxãëruü ya guxüärü yexera mexëchicü, rü namaã nataxe i guxüma i norü ngēmaxügü na naxcèx nataxexüçèx ya yima nuta ya mexëchicü, na noxrü yíxüçèx.

Ore ga püchagu ixuxü

⁴⁷ —Rü ngēma Tupana na äëxgacü yixíxŭ rü wüxi i pücha i nagüxüraüxŭ i choxni namaã iyaxuxüxürüü nixí. ⁴⁸ —Rü ngëxguma naxãacuxgu i ngēma pücha, rü ngēma püchaetanüxŭ rü naxnecüpechinügu ínanatüächigü. Rü ngema narütogü rü nayadexechi i ngēma mexü i choxni, rü pexchigu nananucu. Rü ngēma tama ingöxŭ i choxni rü ínanawogü. ⁴⁹⁻⁵⁰ —Rü ngëxgumarüü tá nixí i ngëxguma naguxgu i naãne. Erü Tupanaärü orearü ngeruügü i daxüçüãx, rü nüma tá naxí. Rü tá nayadexechi i ngēma mexü i duüxügü nüxna i ngēma ichixexŭ, rü tá üxüxetüwa nayawocu i ngēma duüxügü i chixexŭ. Rü ngema tá naxauxe, rü tá nixüxchapütagü —ñanagürü ga Ngechuchu.

Ngexwacaxügüxŭ rü nuxcümaügüxŭ i ngēmaxügüchiga

⁵¹ Rü yexguma ga Ngechuchu rü norü ngüexügüna naca, rü ñanagürü: —¿Nüxŭ pecuáxŭ yíxü na tacüchiga yíxü i ngēma pemaã nüxŭ chixuxŭ? —ñanagürü. Rü nümagü nanangãxügü rü ñanagürügü: —Ngemáãcü, Pa Corix, nüxŭ tacuèx —ñanagürügü. ⁵² Rü yexguma ga Ngechuchu rü ñanagürü nüxŭ: —Rü ngëxguma wüxi i ngüexëëruü i ore i mugüwa nguxëëtaexŭ aixcüma nüxŭ cuëxgu na ñuxãcü äëxgacü yíxü ya Tupana, rü nanaxwëxe na meã nüxŭ nacuáxŭ i ngēma nuxcümaüxŭ i Tupanaärü ore rü ñaã ngexwacaxüxŭ i chorü ore rü ta, ngëxgumarüü i wüxi i cori i norü taxepatawa duüxügücèx inawéxŭ i norü ngēmaxügü i ngexwacaxügüxŭ rü norü ngēmaxügü i nuxcümaügüxŭ ta —ñanagürü ga Ngechuchu.

*Ngechuchu rü Nacharétuwa nayexma
(Mr 6.1-6; Lc 4.16-30)*

⁵³ Rü yexguma Ngechuchu nüxŭ rüchaxgu ga yema ore ga cuëxruügüxŭ na yaxuxŭ, rü inaxüächi ga yéma. ⁵⁴ Rü guma íãne ga nawa nayaxüne ga Nacharétuwa naxü. Rü guma íãneärü ngutaquëxepataügu naxücu rü yéma nanangüexëë ga duüxügü. Rü yema duüxügü rü nabëixächiãëgü namaã ga norü ore. Rü ñanagürügü: —¿Ngextá nüxŭ nacuèx i ngēma nguxëëtae? ¿Rü ñuxãcü nüxŭ nacuèx na naxüãxŭ i ngēma mexügü i taxügü i Tupanaärü poramaã naxüxŭ? ⁵⁵ —¿Taux ëxna i daa yíxü ya carpinteru ya Yúche nane

ya María ngĩne, ya Chaũtiágu rü Yúche rü Chimáũ rü Yuda naēneē ixĩcũ? ⁵⁶ — ¿Rü taux ěxna i naēyèxgũ rü nuxma tatanũgu naxãchiũgũxũ? ¿Rü ngẽxguma i ngextá yĩxũ i nayauxãxũ i ngẽma nüxũ nacuáxũ? —ñanagürũgũ. ⁵⁷ Rü yemacèx ga duũxũgũ rü tama nüxũ inarũxĩnũēchaũ. Natürü Ngechuchu rü ñanagürü nüxũ: —Guxũma i togũ i duũxũgũ rü namaã nataãēgũ i wüxi i Tupanaãrũ orearũ uruũ. Natürü ngẽma orearũ uruũchiũñewatama rü duũxũgũ rü tama namaã nataãēgũ —ñanagürü. ⁵⁸ Rü yema duũxũgũtanũwa rü tama poraãcũ nanaxũ ga mexũgũ ga taxũgũ ga Tupanaãrũ poramaã naxũxũ, yerü tama nüxũ nayaxõgũchaũ ga yema duũxũgũ.

14

Nayu ga Cuáũ ga baiũxẽēruũ (Mr 6.14-29; Lc 9.7-9)

¹ Rü yema ngunexũgũgu nixĩ ga Gariréaaneãrũ ãēxgacũ, ga Erode rü Ngechuchuxũ nacuáchigaxũ. ² Rü Erode rü norü duũxũgũmaã ñanagürü: —Yima nixĩ ya Cuáũ ga baiũxẽēruũ rü marü wena namaxũ. Rü ngẽmacèx nüxũ nangẽxma i pora na naxũãxũ i ngẽma mexũgũ i taxũgũ i Tupanaãrũ poramaã naxũxũ —ñanagürü. ³ Rü yema ñanagürü, yerü nümatama ga Erode rü ũpaacũ norü churaragũxũ namu na Cuáũxũ yayauxgũxũcèx rü cadena-maã yanẽixgũãcũma poxcupataũwa nagagũãxũcèx. Rü yemaãcũ nanaxũ ga Erode, yerü yemaãcũ naxcèx íca ga naxmèx ga Erodía ga naēneē ga Piripi naxmèxchirẽx ixĩcũ. ⁴ Rü Erode rü Cuáũmaã nanu yerü ga Cuáũ rü ñanagürü nüxũ: —Tama name na cuxumèxmaã cuxãmaxũ —ñanagürü. ⁵ Rü Erode rü Cuáũxũ nimáxchaũ, natürü duũxũgũxũ namu yerü guxũma ga duũxũgũ rü nagu narũxĩnũē rü aixcũma Tupanaãrũ orearũ uruũ nixĩ ga Cuáũ. ⁶ Natürü yexguma norü taunecũarũ ngunexũwa nanguxgu ga Erode rü wüxi ga peta naxũ. Rü yema petawa rü Erodíaxacũ rü íyayũxparachigũxũ napèxewa ga yema petatanũxũ. Rü nüma ga ãēxgacũ ga Erode rü poraãcũ norü me nixĩ ga yema naxũxũ ga naxãcürücũ. ⁷ Rü yemacèx ngĩmaã inaxuneta rü ñanagürü ngĩxũ: —¡Choxna naxcèx naca i tacũ i cunaxwèxexũ, rü aixcũma tá cuxna chanaxã! —ñanagürü. ⁸ Rü yexguma ga ngĩma rü ngĩxũtawaxũ, rü ngĩēna iyaca, rü ngĩgürũgũ: —Pa Ma, ¿tacũ i cunaxwèxexũ na naxcèx íchacaxũ? —ngĩgürũgũ. Rü ngĩē ngĩxũ ingãxũ, rü ngĩgürũgũ: —¡Naxcèx ínaca i Cuáũ ya baiũxẽēruũēru! —ngĩgürũgũ ga ngĩē. Rü yexguma ga yema pacũ rü ngĩgürũgũ nüxũ ga Erode: —Chanaxwèxe i wüxi ya poratugu choxna cunaxã i Cuáũ ya baiũxẽēruũēru —ngĩgürũgũ. ⁹ Rü yexguma ga ãēxgacũ ga Erode rü inayarũmaãchi namaã ga yema ore, natürü norü unetacèx rü norü petatanũxũcèx rü tama ngĩxũ nawomũxẽēchaũ. Rü nanamu ga ñuxre ga norü churaragũ na ngĩxna naxãgũãxũcèx ga yema naxcèx ínacaxũ. ¹⁰ Rü yemaãcũ poxcupataũwa nanamu na yema Cuáũxũ yanadaenaãxũcèx. ¹¹ Rü yemawena wüxi ga poratugu ngĩxũtawaxũ nanange ga Cuáũēru, rü yema pacũna nayaxã. Rü ngĩma rü ñuxũchi ngĩēna iyaxã. ¹² Rü yexguma ga Cuáũãrũ ngũexũgũ rü yema naxĩ, rü nayangegũ ga naxũne, rü inayatèxgũ. Rü yemawena rü Ngechuchumaã nüxũ nayarũxugũe.

Ngechuchu rü nanachibũexẽē ga 5000 ga yatũgũ (Mr 6.30-44; Lc 9.10-17; Cu 6.1-14)

¹³ Rü yexguma yemaxũ nacuáchigagu ga Ngechuchu, rü nüxĩcatama wüxi ga nguegu nixũe, rü ínaxũxũ ga yema. Rü wüxi ga nachica ga taxúema íxãpataxũwa naxũ. Natürü ga duũxũgũ rü nüxũ nacuèxgũama ga ngextá na naxũxũ. Rü ínachoxũ ga norü ñānegũwa, rü dauxchitagu nawe narũxĩ. ¹⁴ Rü yexguma nguewa ínaxũegu ga Ngechuchu rü nüxũ nadau ga yema

muxūma ga duūxūgū. Rū nūxū nangechaūtūmūgū. Rū nanameēxēē ga yema duūxūgū ga idaaweexū ga naxcèx yéma nagagūxū. ¹⁵ Rū yexguma marū nachūtachaūgu rü Ngechuchucèx naxī ga norū ngúexūgū, rü ñanagürügū nūxū: —Marū nachūtachaū, rü ñuxūchi taxúema nuxma taxāpata i nuā. Rū name nixī ícuyamugū i ñaā duūxūgū na ñanexācūgū ya ngaicamana ngēxmagūnewa naxīxūcèx, rü ngema norū ònatèèx yataxegūxūcèx —ñanagürügū. ¹⁶ Natürü ga Ngechuchu rü ñanagürü nūxū: —Taxuacūma nawoegu. ¡Rū pematama penachibūexēēx! —ñanagürü. ¹⁷ Rū nūmagū nanangāxūgū, rü ñanagürügū: —Natürü nuā rü wūximēēxpūx i pāū rü taxre i choxnixīcatama toxū nangēxma —ñanagürügū. ¹⁸ Rū Ngechuchu nanangāxū rü ñanagürü: —¡Nuā chauxūtawa penana! —ñanagürü. ¹⁹ Rū yexguma ga Ngechuchu rü duūxūgūxū namu na maxētēxewa natogūxūcèx. Rū ñuxūchi nanade ga yema wūximēēxpūx ga pāū rü yema taxre ga choxnigū. Rū daxūgu nadawenūācūma Tupanana moxē naxā, rü ñuxūchi inanabūcu ga yema pāūgū. Rū norū ngúexūgūna nanana, rü yema duūxūgūxū nayanu. ²⁰ Rū guxūma ga yema duūxūgū rü meāma nachibūe. Rū yemawena rü 12 ga pexchigū nanapagūamatama namaā ga yema pāū rü choxnichipēxegū ga íyaxūgūxū. ²¹ Rū yema yéma chibūexū rü 5000 ga yatūgū nixī, natürü ga ngexūgū rü buxūgū rü tama nayaxugū.

*Dexáétūgu nixū ga Ngechuchu
(Mr 6.45-52; Cu 6.16-21)*

²² Rū yemawena ga Ngechuchu rü duūxūgūxū íyamugūyane rü wūxi ga nguegu nayachoūxēē ga norū ngúexūgū na yoxni naxtaxaarū tocutūwa naxīxūcèx. ²³ Rū yexguma duūxūgūxū íyamugūguwena rü guma mēxpūnewa ínaxūāchi ga Ngechuchu na nūxīca yéma yayumūxēxūcèx. Rū yexma nūxīcatama nachūtaū. ²⁴ Natürü ga norū ngúexūgū rü naxtaxaarū ngāxūtūchiūgu nixāgū ga yexguma. Rū tacū ga buanecū yexma nūxū naxū, rü poraācū nayuape. ²⁵ Rū yexguma marū yangunechaūgu rü norū ngúexūgūwe ínaxūāchi ga Ngechuchu. Rū dexáchiüétūgu nixū naxcèx ga norū ngúexūgū. ²⁶ Rū yexguma norū ngúexūgū nūxū daugūga ga dexáchiüétūgu na yaxūxū, rü poraācū nabèixāchiāēgū. Rū norū muūmaā aita naxūe, rü ñanagürügū: —Wūxi i naxchiximare nixī —ñanagürügū. ²⁷ Natürü ga Ngechuchu rü namaā nidexa rü ñanagürü nūxū: —¡Peporae! rü choma chixī. ¡Rū tāxū ipemuūēxū! —ñanagürü. ²⁸ Rū yexguma ga Pedru rü Ngechuchumaā nidexa rü ñanagürü: —Pa Corix, ega chi cuma quixīgu, ¡rū choxū namu na choma rü ta dexáétūgu chixūxūcèx rü cuxūtawa na chaxūxūcèx! —ñanagürü. ²⁹ Rū Ngechuchu ñanagürü nūxū: —Ēcū ¡nuā naxū! —ñanagürü. Rū yexguma ga Pedru rü ínaxūe ga nguewa. Rū inanaxūgū ga dexáétūgu na yaxūxū na Ngechuchuxūtawa naxūxūcèx. ³⁰ Natürü yexguma nūxū yacuèxāchigu ga na naporaxū ga buanecū rü namuū, rü inanaxūgū ga na dexáchiūgu nanguxū. Rū aita naxū rü ñanagürü: —Pa Corix, ¡choxū rüngūxēē! —ñanagürü. ³¹ Rū yexgumatama ga Ngechuchu rü Pedrumēxēgu nayayauxāchi, rü ñanagürü nūxū: —Cuma rü írarūwatama cuyaxō. ¿Rū tūxcūū tama aixcūma cuyaxōxōchi? —ñanagürü. ³² Rū yexguma nguegu yachoūgu ga Ngechuchu rü Pedru, rü nangupetū ga guma buanecū. ³³ Rū guxūma ga norū ngúexūgū ga nguewa yexmagūxū rü Ngechuchupēxegu nacaxāpūxūgū rü nūxū nicuèxūūgū, rü ñanagürügū nūxū: —Aixcūmaxūchi cuma nixī i Tupana Nane quiūxū —ñanagürügū.

*Yenecharétuanewa Ngechuchu nanameēxēē ga idaaweexū
(Mr 6.53-56)*

³⁴ Rū yexguma marū yanguūgu ga naxtaawa, rü Yenecharétuanewa nangugü rü yéma ínachoŭ. ³⁵ Rū yexguma yema duŭxŭgŭ ga yémacŭāx nŭxŭ icuèxāchitanŭgu ga Ngechuchu na yīxŭ ga guma, rü guxŭma ga yema naānewa nanguchiga ga yéma na nayexmaxŭ ga Ngechuchu. Rū yemacèx naxŭtawa nanagagŭ ga yema duŭxŭgŭ ga idaaweexŭ. ³⁶ Rū Ngechuchuxŭ nacèxŭgŭ na naxchirupechinŭgumare yangōgŭgŭxŭcèx. Rū guxŭma ga yema naxchirupechinŭgu ingōgŭexŭ rü narŭmeē.

15

Tacü nixĩ i Tupanapëxewa duŭxŭgŭxŭ chixexēēxŭ (Mr 7.1-23)

¹ Rū Ngechuchucèx naxĩ ga ñuxre ga Parichéugŭ rü ngúexēēruŭgŭ ga ore ga mugŭwa nguxēētaegŭxŭ ga Yerucharéŭwa ne ĩxŭ. Rū Ngechuchuna nacagŭ, rü ñanagŭrŭgŭ: ² —¿Tŭxcŭŭ i curŭ ngúexŭgŭ rü tama nagu naxĩ i nuxcŭmaŭgŭxŭ i tórŭ oxigŭcŭma? ¿Rŭ tŭxcŭŭ tama nayanguxēēgŭ i ngēma nacŭma na Tupanacèx nayauxmēxgŭxŭ naxŭpa na nachibŭexŭ? — ñanagŭrŭgŭ. ³ Natŭrŭ ga Ngechuchu rü nŭxna naca ga yema Parichéugŭ rü ngúexēēruŭgŭ, rü ñanagŭrŭ nŭxŭ: —¿Rŭ tŭxcŭŭ i pema rü nŭxŭ pexo i Tupanaārŭ mu na nagu pexĩxŭcèx i pecŭmagŭtama? ⁴ Erŭ Tupana rü norŭ orewa rü ñanagŭrŭ:

“¡Tŭxŭ nangechaŭ ya cunatŭ rü cue!”

ñanagŭrŭ. Rŭ ngēma orewa rü ñanagŭrŭ ta:

“Rŭ texé ya tŭmanatŭmaā rü ēxna tŭmaēmaā guxchigaxe rü name nixĩ i noxtacŭma ngēmacèx tŭxŭ tayuxēē”,

ñanagŭrŭ. ⁵ Natŭrŭ pema rü ñaperŭgŭgŭ:

“Marŭ name ega wŭxi ya yatŭ nanatŭxŭ rü naēxŭ ñaxgu: ‘Taxucŭrŭwa chorŭ ngēmaxŭmaā cuxŭ charŭngŭxŭēē erŭ guxŭma i chorŭ ngēmaxŭ rü marŭ Tupanana chanaxā’,” ñaxgu. ⁶ Rŭ ngēxguma texé ngēma ñagŭgu rü pexcèx rü marŭ namexŭ na tama tŭmanatŭxŭ rü tŭmaēxŭ tarŭngŭxŭēēxŭ. Rŭ ngēmaācŭ ipeyanaxoxēē i Tupanaārŭ mu na nagu pexĩxŭcèx i pecŭmagŭtama. ⁷ Pema nixĩ i duŭxŭgŭ i togŭpëxewa rü meā pemaxēnetaxŭ, natŭrŭ peāēwa rü chixexŭgu perŭxĩnŭē. Rŭ aixcŭma nixĩ ga yema ore ga nuxcŭmaŭcŭ ga Tupanaārŭ orearŭ uruŭ ga Ichaxía pechiga ŭmatŭxŭ ga ñaxŭ:

⁸ “Ñāā duŭxŭgŭ rü naāxmaāmare choxŭ nicuèxŭŭgŭ. Natŭrŭ naāēwa rü tama aixcŭma chaugu narŭxĩnŭē. ⁹ Rŭ taxuwama name na ngēmaācŭ natŭcèxma choxŭ yacuèxŭŭgŭxŭ. Rŭ guxŭma i norŭ nguxēētae rü yatŭgŭarŭ mugŭmare nixĩ rü tama aixcŭma chorŭ mu nixĩ”,

ñaxŭ. ¹⁰ Rŭ ñuxŭchi ga Ngechuchu rü duŭxŭgŭcèx naca, rü ñanagŭrŭ nŭxŭ: —¡Meā iperŭxĩnŭē i ñāā chorŭ ore, rü nagu perŭxĩnŭē! ¹¹ Ngēma ōna i duŭxŭgŭ ngōxŭ rü tama ngēma nixĩ i napecaduāxēēgŭxŭ. Natŭrŭ ngēma ore i chixexŭ i nŭxŭ yaxuxŭ, rü ngēma waxi nixĩ i napecaduāxēēgŭxŭ — ñanagŭrŭ. ¹² Rŭ ñuxŭchi ga norŭ ngúexŭgŭ rü naxcèx naxĩ, rü ñanagŭrŭgŭ nŭxŭ: —¿Pa Corix, tama ēxna nŭxŭ cucuèx na Parichéugŭāēwa nangŭxŭ i ngēma ore i namaā nŭxŭ quixuxŭ? —ñanagŭrŭgŭ. ¹³ Natŭrŭ nŭma ga Ngechuchu rü nanangaxŭ rü ñanagŭrŭ nŭxŭ: —Guxŭma i ngēma nanetŭ i tama Chaunatŭ itoxŭ rü tá nanabēx. ¹⁴ Rŭ nŭetama i ngēma Parichéugŭ, erŭ namaārŭ cuèxruŭgŭ i ngexetŭxŭrŭŭ nixĩgŭ. Rŭ ngēxguma wŭxi i ngexetŭxŭ rü naxrŭŭ ngexetŭxŭmaā inacuèxgu rü ngŭrŭāchi ngēma taxre rü wŭxi i āxmaxŭgu tá nŭgŭmaā nayayicu —ñanagŭrŭ. ¹⁵ Rŭ ñuxŭchi ga Pedru rü Ngechuchuna naca, rü ñanagŭrŭ: —¡Tomaā meā nangoxēē na ñuxŭ ñaxŭchiga yīxŭ i ngēma ore i tomaā nŭxŭ quixuxŭ! —ñanagŭrŭ. ¹⁶ Rŭ Ngechuchu

nanangãxũ rü ñanagürü: —¿Éxna pema rü ta tama nüxũ pecuèxgüéga i ngêma ore? ¹⁷ ¿Tama éxna nüxũ pecuèx rü guxũma i ngêma òna i duũxũgü ngõxũ rü naãnuwa naxũ, rü yixcama rü ñuxũchi ínaxũxũ? ¹⁸ Natürü guxũma i ngêma ore i duũxũgü nüxũ ixuxũ rü naãewa nixĩ i ne naxũxũ. Rü ngêma ore i chixexũ waxi nixĩ i napecaduãxëégüxũ i ngêma duũxũgü. ¹⁹ Erü naãewa nixĩ i chixexũgu naxĩnüëxũ i duũxũgü. Rü ngêma ne naxũ na namáëtaxũ, rü to i ngexũ i ätexũmaã na inapexũ, rü na nangëãëmarexũ, rü na nangĩxũ, rü na yadoratëxáxũ, rü na naguxchigawëxexũ. ²⁰ Rü guxũma i ngêma chixexũ waxi nixĩ i duũxũgüxũ pecaduãxëëxũ. Natürü ngêma na tama nayauxmëxgüxũ naxũpa na nachibüëxũ, rü ngêma rü tama nanapecaduãxëë i duũxũgü — ñanagürü.

*Wüxi ga ngecü ga to ga nachiiãnecüãx ga Ngechuchuaxũ yaxõxcüchiga
(Mr 7.24-30)*

²¹ Rü yexguma yéma inaxũächigu ga Ngechuchu, rü Tiruane rü Chidãũãneãrü iãnegüwa naxũ. ²² Rü Ngechuchuxũtawa ingu ga wüxi ga ngecü ga Canácüãx ga Tiruanegu ächiücü. Rü tagaãcü ngĩgürügü nüxũ: — Pa Cori Pa Dabítanüxũx, ¡cuxũ changechaütümü! Erü chauxacü rü wüxi i ngoxo ngĩwa nangëxma i poraãcü ngĩxũ chixewexũ —ngĩgürügü. ²³ Natürü ga Ngechuchu rü tama ngĩxũ nangãxũ. Rü düxwa ga norü ngúexũgü rü naxcèx naxĩ, rü Ngechuchuxũ nacèëxũgü, rü ñanagürügü: —Pa Corix ¡Ngĩmaã nüxũ ixu i ngêma nge rü iyaxũ, erü tawe iyacaechigü! —ñanagürügü. ²⁴ Rü yexguma ga Ngechuchu rü ñanagürü: —Tupana núma choxũ namu na Yudíugü i pecaduãxgüxũcèxicatama na chadauxüçèx —ñanagürü. ²⁵ Natürü ngĩma ga yema nge ga tama Yudíu ixícü rü Ngechuchucèx iyaxũ. Rü napëxegu iyacaxãpüxũ, rü ngĩgürügü nüxũ: —Pa Corix ¡choxũ rüngüxëë! —ngĩgürügü. ²⁶ Natürü Ngechuchu rü ñanagürü: —Tama name i taxacügüna tanapu i norü òna na airugüna naxãxüçèx —ñanagürü. [Rü yema ñanagürü yerü nümagü ga Yudíugü rü nügü nixugüë na Tupanaxãcügüxüchi yĩgüxũ rü yema togü rü ñoma airugürüü na yixĩgüxũ.] ²⁷ Natürü ngĩma ga yema nge rü ngĩgürügü: —Rü aixcüma nixĩ i curü ore, Pa Corix, natürü airugü rü ta norü yoraarü ònatüchi i mechawa rüyixũ nangõx —ngĩgürügü. ²⁸ Rü yexguma ga Ngechuchu rü ñanagürü ngĩxũ: —Pa Ngecüx, aixcümaxũchi cuyaxõ. Marü tá chanaxü i ngêma cuma cunaxwëxexũ —ñanagürü. Rü yexgumatama ngĩxcèx nitaane ga ngĩãcü.

Ngechuchu rü nanameëxëë ga muxũma ga idaaweexü

²⁹ Rü yemawena ga Ngechuchu rü inaxũächi ga yema naãnewa, rü nax-taxa ga Gariréacutüwa naxũ. Rü ñuxũchi wüxi ga mëxpúnewa ínaxũächi, rü yéma nayarüto. ³⁰ Rü muxũma ga duũxũgü naxũtawa nangugü. Rü yéma naxũtawa nanagagü ga duũxũgü ga ichixeparagüxũ, rü ngexetügüxũ, rü tama idexagüxũ, rü chixechacüügüxũ, rü muxũma ga togü ga idaaweexü. Rü Ngechuchupëxegu nayamugü, rü nüma ga Ngechuchu rü nanameëxëë. ³¹ Rü ga duũxũgü rü poraãcü nabëixãchiãëgü ga yexguma nüxũ nadaugügu ga ñuxãcü yema noxri tama idexagüxũ rü marü na yadexagüxũ, rü yema noxri chixechacüügüxũ rü marü naxcèx na yataanegüxũ, rü yema noxri chixeparagüxũ rü marü na nameparagüxũ, rü yema noxri ngexetügüxũ rü marü na yadauchigüxũ. Rü yemacèx ga duũxũgü rü Tupanaxũ nicüëxüügü.

*Ngechuchu nanachibüëxëë ga 4000 ga yatügü
(Mr 8.1-10)*

³² Rü ñuxũchi ga Ngechuchu rü norü ngúexũgüçèx naca, rü ñanagürü nüxũ: —Choxũ nangechaütümüügü i ñaã duũxũgü, erü marü tomaëxpüx

i ngunexü nuã chauxütawa nangëxmagü, rü nüxü nataxuma i norü òna. Rü taxuacüma ngëmaäcümare nachiuüwa chanamugü, erü ngürüächi namagu tá nayaturae —ñanagürü. ³³ Rü norü ngúexügü rü ñanagürügü nüxü: —¿Natürü ngextá tá tanayaxu i òna naxcèx i guxüma i ñaã duüxügü? Erü taxüema nuxma taxāpata i nuã —ñanagürügü. ³⁴ Rü Ngechuchu nüxna naca, rü ñanagürü: —¿Ñuxre i pãü pexü nangëxma i pemax? —ñanagürü. Rü nanangāxügü, rü ñanagürügü: —Toxü nangëxma i 7 i pãü rü noxretama i choxnixācügüxicatama —ñanagürügü. ³⁵ Rü ñuxüchi ga Ngechuchu rü duüxügüxü namu na ñaxtüanewa natogüxücèx. ³⁶ Rü nanade ga yema 7 ga pãü rü yema choxnigü. Rü Tupanana moxë naxã. Rü ñuxüchi inanabücu. Rü norü ngúexügüna nanana na duüxügüxü yanuãxücèx. ³⁷ Rü guxüma ga duüxügü rü meãma nachibüe. Rü yemawena rü 7 ga pexchigü nanapagüamatama namaã ga yema pãü rü choxnichipëxegü ga íyaxügüxü. ³⁸ Rü yema yéma chibüexü rü 4,000 ga yatügü nixí, natürü ga ngexügü rü buxügü rü tama nayaxugü. ³⁹ Rü yemawena ga Ngechuchu rü duüxügüxü ínimugü. Rü ñuxüchi wüxi ga nguegu nixüe, rü Magadárü naãnewa naxü.

16

Parichéugü rü Chaduchéugü naxcèx ínacagü na nüxü nüxü nadauxëëgüxücèx ga wüxi ga cuèxruü ga Tupanaärü poramaã naxüxü

(Mr 8.11-13; Lc 12.54-56)

¹ Rü ga Parichéugü rü Chaduchéugü rü Ngechuchuxü ínayadaugü. Rü Ngechuchuna nacagüe na nüxü nüxü nadauxëëgüxücèx ga wüxi ga cuèxruü ga Tupanaärü poramaã naxüxü, yerü nüxü naxügüchaümare. ² Natürü nüma ga Ngechuchu rü nanangāxü, rü ñanagürü nüxü: —Pema rü yáuanecü rü ñaperügügü:

“Name tá nixí i moxüärü ngunexü, erü nadautüweane”, ñaperügügü. ³ Rü ngëxguma pëxmama nadautüweanegu rü poraäcü nacaixanegu, rü:

“Nachixe tá nixí i ngunexü” ñaperügügü. Pema nixí i duüxügü i togüpëxewa meã pemaxënetaxü, natürü chixexügu perüxínüë. Rü pema nüxü pecuèx na penangugüxü i ñuxgu tá nameänexü rü ñuxgu tá nachixeanexü. Natürü ñuxma na yanguxü i ngëma cuèxruüga ga nuxcüma Tupana pemaã ixunetaxü rü tama nüxü pecuèxgüéga na tacüchiga yíxü —ñanagürü. ⁴ Rü ñanagürü ta ga Ngechuchu: —Ñaã duüxügü i chixecümagüxü rü tama yaxögüxü rü naxcèx ínacagü i wüxi i cuèxruü i Tupanaärü poramaã üxü. Natürü yema cuèxruü ga nuxcümaücü ga Tupanaärü orearü uruü ga Yonáxü ngupetüxürüüxicatátama nadaugü. Rü yexgumarü na bayenaänüwa na ínaxüxüxü, rü choma rü ichatáxüwa tá íchaxüxü. Rü taxuxütáma i to i cuèxruüxü nüxü chadauxëë i ñaã duüxügü —ñanagürü. Rü ñuxüchi nüxna yéma nixü ga Ngechuchu, rü inaxüächi.

Parichéugüarü pãüärü puxëëruüchiga

(Mr 8.14-21)

⁵ Rü yexguma naxtaxaarü tocutüwa naxíxgu ga norü ngúexügü, rü nüxü inayarüngümaë na nawemü ta íyangegüxü. ⁶ Rü yexguma ga Ngechuchu rü ñanagürü nüxü: —¿Dücèx, pexuãëgü naxcèx i Parichéugü rü Chaduchéugüarü pãüärü puxëëruü! —ñanagürü. ⁷ Rü yema norü ngúexügü rü inanaxügüga ga nügü na ñagüxü: —Ngëma ñanagürü tüxü, erü tama tawemüta ítingegü —ñanagürügü. ⁸ Natürü ga Ngechuchu rü nüxü nacuèxama ga ñuxäcü na yadexagüxü ga norü ngúexügü. Rü yemacèx ñanagürü nüxü: —¿Tüxcüü,

“Tüxü nataxu i tawemü” ñaperügügü? Pema rü tama aixcüma peyaxögü. ⁹ —¿Tama ëxna nüxü pecuèxgüéga rü nüxna pecuèxächie ga yema wüximëëxpüx

ga pãũ ga yema 5,000 ga yatügücèx ichabücuxũ? ¿Rü ñuxre ga pexchi penaxüâcuxũ namaã ga yema naxchipêxegü ga íyaxügüxũ? ¹⁰ —¿Rü tama êxna nüxna pecuèxãchie ga yema 7 ga pãũ ga yema 4,000 ga yatügücèx ichabücuxũ? ¿Rü ñuxre ga pexchi penaxüâcuxũ namaã ga yema naxchipêxegü ga íyaxügüxũ? ¹¹ —¿Rü ñuxâcü nixĩ i tama nüxũ pecuáxũ i tama pãũchiga na chidexaxũ i ngêxguma ñachagu:

“¡Pexuãêgü naxcèx i Parichéugü rü Chaduchéugüarü pãũârü puxêêruũ!” ñachagu? —ñanagürü ga Ngechuchu. ¹² Rü yexguma ga norü ngúexüügü rü nüxũ nacuèxgü ga tama pãũârü puxêêruũchiga na yadexaxũ ga Ngechuchu, natürü Parichéugü rü Chaduchéugüarü nguxêêtaechiga na yĩxũ ga na yadexaxũ.

Pedru nanangoxêê na Cristu na yĩxũ ga Ngechuchu

(Mr 8.27-30; Lc 9.18-21)

¹³ Rü yexguma Checharéa ga Piripuaneârü ngaicamana nanguxgu ga Ngechuchu, rü norü ngúexüügüna naca, rü ñanagürü: —¿Ñuxũ ñaxũ i duũxüügü i chauchiga na texé chiĩxũ i chomax? —ñanagürü. ¹⁴ Rü nüma ga norü ngúexüügü rü nanangãxũ rü ñanagürügü: —Nangêxma i duũxüügü rü:

“Cuáũ ya baiũxêêruũ quixĩ” ñagüxũ. Rü togü i:

“Ería quixĩ” ñagüxũ. Rü togü i:

“Yeremíã quixĩ” ñagüxũ. Rü togü rü:

“Wüxi ga nuxcümaïcü ga Tupanaârü orearü uruũ quixĩ” ñagüxũ —ñanagürügü. ¹⁵ Rü yexguma ga Ngechuchu rü nüxna naca rü ñanagürü: —¿Rü pema i ñuxũ ñapegüxũ choxũ na texé chiĩxũ? —ñanagürü. ¹⁶ Rü Chimáũ ga Pedru nanangãxũ, rü ñanagürü nüxũ: —Cuma nixĩ i Cristu ya Tupana ya maxücü Nane quiĩxũ —ñanagürü. ¹⁷ Rü Ngechuchu nanangãxũ rü ñanagürü nüxũ: —Cuma rü aixcüma cutaãê, Pa Chimáũx, Pa Yoná Nanex, erü taxuũma i duũxũ nixĩ i cuxũ nüxũ cuèxêêxũ i ngêma, natürü Chaunatü ya daxügücü nixĩ ya cuxũ nüxũ cuèxêêcü na Nane chiĩxũ. ¹⁸ —Rü choma cumaã nüxũ chixu rü cuma rü Pedru quixĩ. Rü ngêma cuéga rü “nuta” ñaxũchiga nixĩ. Rü cuma tá nixĩ i chorü duũxüügüarü dauruũ quiĩxũ. Rü Chataná rü tãütáma nüxũ narüyexera i ngêma chorü duũxüügü. ¹⁹ —Rü choma rü tá cuxna chanaxã i chorü ore na duũxüügümaã nüxũ quixuxücèx na nüxũ nacuèxgüxücèx na ñuxâcü daxügüxũ i naãnewa nangugüxũ i ngextá Tupana ãêxgacü íixĩxüwa. Rü yíxema tama cuxũ irüxĩnüêxê i ngêma ore rü tãütáma ngema tichocu. Natürü yíxema meã cuxũ irüxĩnüêxê i ngêma ore rü aixcüma ngema Tupana ãêxgacü íixĩxüwa tá tangugü —ñanagürü. ²⁰ Rü yexguma ga Ngechuchu rü norü ngúexüügümaã nüxũ nixu, rü ñanagürü: —¡Taxúemaãtáma nüxũ pixu na choma rü Cristu chiĩxũ! —ñanagürü.

Ngechuchu nanaxunagü ga norü yuxchiga

(Mr 8.31-9.1; Lc 9.22-27)

²¹ Rü yemawena inanaxügü ga norü ngúexüügümaã nüxũ na yaxuxũ ga tacü tá nüxũ na üpetüxũ. Rü ñanagürü: —Choma rü Yerucharéüwa tá chaxũ, rü ngema poraãcü ngúxũ tá choxũ ningexêêgü. Rü choxũ tá nimèxgü i Yudiügüarü ãêgacügüerugü rü paigüarü ãêxgacügü rü ngúexêêruũgü i ore i mugüwa nguxêêtaegüxũ. Natürü tomaêxpüx i ngunexũ ngupetügu rü wena táxarü chamaxũ —ñanagürü. ²² Rü yexguma ga Pedru rü nüxĩca noxrüwama Ngechuchuxũ naga, rü inanaxügü ga na naxucuxêãxũ, rü ñanagürü: —Pa Corix, Tupana rü tama nanaxwêxe na ngêmaãcü quidexaxũ. Rü tãütáma ngêmaãcü cuxũ nangupetü i cumax —ñanagürü. ²³ Natürü ga Ngechuchu rü Pedrucèx nadaueguãchi, rü ñanagürü nüxũ: —¡Choxna ixügachi, Pa Chatanáx, erü chixexügu choxũ cunguxêêchaũ! Rü tama Tupana nagu

rüxĩnũxũgu curũxĩnũ, rü yatũgũ nagu rüxĩnũxũgumare curũxĩnũ i cumax — ñanagũrũ. ²⁴ Rũ yexguma ga Ngechuchu rü norũ ngũexũgũxũ ñanagũrũ: — Rũ ngẽxguma texé chowe rüxũxchaũgu, jẽcũ nüxũ tarũxo i tũmaãrũ ngũchaũ, rü namaã tapora i ngẽma guxchaxũgũ i tũmacèx ínguxũ i ñoma curuchawa tipotaxũrũ tũxũ ixĩxẽxũ, rü ngẽmaetũwa chowe tarũxũãma! ²⁵ Erũ yixema tũgũ maxẽchaxẽchaũxẽ rü tá tayu. Natürũ yixema chauxcèx yũxe rü aixcũma tá tũxũ nangẽxma i maxũ i taguma gũxũ. ²⁶ Rũ ¿Tacũwa i nüxũ namexũ ya wũxi ya yatũ ega nayauãxgu i guxũma i ñoma i naãneãrũ ngẽmaxũgũ, natürũ iyanatauxẽãgu i norũ maxũ? Erũ taxucürũwama wũxi ya yatũ rü norũ dĩerumaã naxcèx nataxe i norũ maxũ. ²⁷ Erũ choma i Tupana Nane na duũxũxũ chiĩxũ rü wena táxarũ núma chaxũ. Rũ ngẽxguma rü Chaunatũ ya Tupanarũ tá ãẽxgacũ chixĩ, rü daxũcũãx i orearũ ngeruũgũmaã tá íchangu. Rũ ngẽxguma tá nixĩ i nüxũ chanaxũtanũxũ i wũxichigũ i duũxũgũ i ngẽma ñuxãcũ chauxcèx na namaxẽxũrũũãcũma maxẽxũ. ²⁸ Rũ aixcũma pemaã nüxũ chixu rü nangẽxma i ñuxre i duũxũgũ i núma ngẽxmagũxũ rü tãũtãma nayu ñuxmatãta choxũ nadaugũ na yuwa ícharũdaxũ rü aixcũma ãẽxgacũ ya poracũ na chiĩxũ —ñanagũrũ ga Ngechuchu.

17

Ngechuchu rü toraxũãcũ nangox (Mr 9.2-13; Lc 9.28-36)

¹ Rũ 6 ga ngunexũguwena rü Ngechuchu ínayagũ ga Pedru rü Chaũtiãgu rü Cuãũ ga Chaũtiãgueneẽ. Rũ nüxĩcatama wũxi ga mẽxpũnewa noxrũwama namaã naxũ. ² Rũ yẽma yema ngũexũgũpẽxewa rü toraxũãcũ nangox ga Ngechuchu. Rũ üèxcürũ nixĩ ga nachiwe ga na yayauracũxũ. Rũ naxchiru rü ta üèxcũmarũ nixĩ ga na nangóonexẽãxũ. ³ Rũ ngürũãchi yẽma naxcèx nangoxgũ ga Moĩché rü Ería. Rũ Ngechuchumaã yẽma nidexagũ. ⁴ Rũ yexguma ga Pedru rü ñanagũrũ Ngechuchuxũ: —Pa Corix, name nixĩ nuã tangẽxmagũ. Rũ ngẽxguma cunaxwèxegu rü tá tanaxũ ya tomaẽxpũx ya dũxenũ, rü wũxi ya cuxcèx, rü náĩ ya Moĩchécèx, rü náĩ ya Eríacèx —ñanagũrũ. ⁵ Rũ yexguma íyadexayane ga Pedru rü wũxi ga caixanexũ ga nangóonexẽxũ rü natanũgu nayangaixema. Rũ yema caixanexũwa inanaxũ ga wũxi ga naga ga ñaxũ: —Daa nixĩ ya Chaune ya nüxũ changechaũxũchicũ rü namaã chataãẽxũchicũ. ¡Rũ naga pexĩnũe! —ñanagũrũ. ⁶ Rũ yexguma yemaxũ naxĩnũegu ga yema ngũexũgũ, rü ñaxtũanegu nanangũcuchiãchitanũ, yerũ porãcũ namuũẽ. ⁷ Natürũ ga Ngechuchu rü naxcèx nixũ, rü nüxũ nayarũngõgũ, rü ñanagũrũ nüxũ: —¡Ipechigũ rü tãxũ ipemuũẽxũ! —ñanagũrũ. ⁸ Rũ yexguma wenaxãrũ nadaunagũtanũgu, rü Ngechuchuxũxĩcatama nadaugũ rü taxúema ga toguexũ nadaugũ. ⁹ Rũ yexguma ínaxĩgũgu ga guma mẽxpũnewa, rü Ngechuchu nayaxucuxẽgũ ga taxúemaãma na nüxũ yaxugũexũcèx ga yema yẽma nüxũ nadaugũxũ, ñuxmatãta yuwa ínadxgu rü wena namaũxgu. ¹⁰ Rũ ñuxũchi ga yema ngũexũgũ rü Ngechuchuna nacagũ, rü ñanagũrũgũ: —¿Tũxcũũ i ngẽma ngũexẽruũgũ i ore i mugũwa nguxẽãtaegũxũ rü ñanagũrũgũ: “Ería tá nixĩ ya nüxĩra cuxũpa nuã ücũ?” ñanagũrũgũ. ¹¹ Rũ Ngechuchu nanangãxũ, rü ñanagũrũ: —Aixcũma nixĩ i Ería na nüxĩra tá núma naxũxũ na chauxũpa Tupanacèx yamexẽãxũcèx i duũxũgũ. ¹² Natürũ choma pemaã nüxũ chixu, rü Ería rü marũ núma naxũ, natürũ duũxũgũ rü tama nüxũ nacuèxgũ na texe yĩxũ. Rũ yemacèx chixri namaã nachopetũ. Rũ ngẽxgumarũ tá ta nixĩ na chixri tá chomaã nachopetũxũ i duũxũgũ —ñanagũrũ. ¹³ Rũ yexguma ga yema ngũexũgũ rü nüxũ nicuèxãchitanũ ga Cuãũ ga baiũxẽẽruũchiga na yĩxũ ga yema Ngechuchu namaã nüxũ ixuxũ.

*Ngechuchu rü nanamexêê ga wüxi ga bucü ga ngoxo nawa yexmacü
(Mr 9.14-29; Lc 9.37-43)*

¹⁴ Rü yexguma duüxügü íyexmaxüwa nangugügu, rü wüxi ga yatü Ngechuchucêx nixü. Rü napêxegu nayacaxâpüxü rü ñanagürü nüxü: ¹⁵ —Pa Corix, ¡nüxü nangechaü ya chaune rü naxcêx yataanexêê! Erü muêxpüxcüna rü naxâüãêxü, rü poraâcü nüxü nangux. Rü muêxpüxcüna rü üxüxetügu nayanguxêê, rü êxna dexágu. ¹⁶ —Rü nuã curü ngúexügüxütawa chanaga, natürü nümagü rü tama nüxü nacuêxgü na namexêêgüãxü —ñanagürü. ¹⁷ Rü yexguma Ngechuchu nanangãxü, rü ñanagürü nüxü ga yema duüxügü ga yéma yexmagüxü: —Pa Duüxügü i Tama Yaxögüxü i Chixri Maxêxü, ¿ñuxguratáta i pemaã chanuxmaxü rü yaxna pemaã chaxñnüxü? ¡Nuã penaga ya yima bucü! —ñanagürü. ¹⁸ Rü Ngechuchu nananga ga yema ngoxo ga guma bucüwa yexmaxü. Rü yemaâcü ínanatêxüchi ga yema ngoxo. Rü yexgumatama naxcêx nitaane ga guma bucü. ¹⁹ Rü yemawena ga norü ngúexügü rü noxrüwama Ngechuchumaã nidexagü. Rü nüxna nacagüe, rü ñanagürügü nüxü: —Pa Corix, ¿tüxcüü i toma rü taxuacüma ítanatêxüchi i ngêma ngoxo? —ñanagürügü. ²⁰ Rü Ngechuchu nanangãxü, rü ñanagürü nüxü: —Pema rü taxuacüma ípenatêxüchi erü tama aixcüma peyaxögü. Rü aixcüma pemaã nüxü chixu, rü ngêxguma chi woo wüxi ya motachachirerüxü naxiraxüchigu i perü õ, rü chi daa mëxpünemaã nüxü pixuxgu na yaxügachixüçêx, rü chi pega naxñü. Rü taxuxü chima pexü naguxcha ega aixcüma peyaxögügu. ²¹ —Natürü ñaärüü i ngoxo rü tama ínaxüxü ega tama ixaureãcüma iyumüxêgu —ñanagürü.

*Ngechuchu rü wenaxärü nanaxunagü ga norü yuxchiga
(Mr 9.30-32; Lc 9.43-45)*

²² Rü yexguma norü ngúexügümaã Gariréaarü naãnegu yaxüxgu ga Ngechuchu, rü norü ngúexügümaã nüxü nixu, rü ñanagürü: —Choma ya Tupana Nane na duüxüxü chiixü, rü chixri tá chomaã nachopetü rü âêxgacügüna tá choxü namugü i duüxügü. ²³ —Rü tá choxü nimêxgü, natürü tomaêxpüx i ngunexüguwena rü wena táxarü chamaxü —ñanagürü. Rü yexguma yema orexü naxñnüêgu ga norü ngúexügü, rü poraâcü nangechaügu.

*Ngechuchu ngixü naxütanü ga yema dïêru ga tupauca ga taxüñecêx ngixü
nayauxgücü*

²⁴ Ngechuchu rü norü ngúexügümaã Capernáüärü íãnewa naxí. Rü yexguma yéma nangugügu rü Pedruxü ínayadaugü ga yema yatügü ga tupauca ga taxüñecêx dïêru ngixü yauxgüxü. Rü Pedruna nacagüe rü ñanagürügü: —¿Yima curü Cori rü tama êxna ngixü naxütanü i ngêma dïêru i tupauca ya taxüñeärü ixücü? —ñanagürügü. ²⁵ Rü Pedru nanangãxü, rü ñanagürü: —Ngêmaâcü nanaxütanü —ñanagürü. Rü yixcama ga yexguma íxgu naxüxcuxgu ga Pedru, rü Ngechuchuxira Pedrumaã nidexa, rü ñanagürü nüxü: —¿Ñuxü ñacuxü i cumax, Pa Pedrux, rü ngextá nixí i nayauxgüãxü i norü dïêru i guxü i nachiüãneärü âêxgacügü? ¿Cuxcêx i nügütanüwatama rü êxna togü i duüxügütanüwa? —ñanagürü. ²⁶ Rü Pedru nanangãxü, rü ñanagürü: —Maneca togü i duüxügütanüwa nixí i nayauxgüãxü —ñanagürü. Rü ñuxüchi Ngechuchu nanangãxü rü ñanagürü: —Rü ngêxguma ngêmaâcü yixígu, rü yixema na Tupanaärü ixígüxü rü taxucêxma tanaxütanügü. ²⁷ —Natürü ngêma na taxüema tamaã nuxüçêx, rü chanaxwêxe i cuyaxütanü i ngêma dïêru. ¡Rü yéa naxtaawa naxü, rü ngêma yapoxwaxe! ¡Rü ngêma nüxíraüxü i choxni i cunapoxwaüxü rü naãxwa tá nüxü icuyangau i wüxi i dïêru i nagu mexü na

yangutanüxëxücèx i chauxcèx rü cuxcèx rü ta! ;Rü tupauca ya taxünewa nange i ngëma dïëru, rü yaxütanü! —ñanagürü.

18

*¿Texé tá tixí ya guxãärü yexera ixixë?
(Mr 9.33-37; Lc 9.46-48)*

¹ Rü yexguma ga norü ngúexügü rü Ngechuchucèx naxí rü nüxna nacagü, rü ñanagürügü: —¿Pa Corix, texé tá tixí ya guxãärü yexera ixixë i ngëma Tupana ãëxgacü íxixüwa? —ñanagürügü. ² Rü yexguma ga Ngechuchu rü wüxi ga buxücèx naca, rü norü ngúexügüarü ngãxütanügu nanachixëë. ³ Rü ñuxüchi ñanagürü nüxü: —Dücèx, Pa Chorü Ngúexügüx, aixcüma pemaã nüxü chixu, rü ngëxguma tama nüxü perüxoegu i ngëma na togüarü yexera pegü pixígüxëëchaüxü rü ñuxüchi tama ñaã buxürüü pegü íperüxíragu, rü taxucürüwa pichocu i ngextá Tupana ãëxgacü íxixüwa. ⁴—Rü aixcüma yíxema tügü íruxírase rü ñaã buxürüü ixixë, rü yíxema tá tixí ya guxãärü yexera ixixë i ngextá Tupana ãëxgacü íxixüwa. ⁵—Rü texé ya chauégagu meã nayaxúxe i wüxi i buxü i ñaärüü ixixü rü choxü nixí i tayaxuxü.

*Naxãücüma nixí na pecadugu inguxü
(Mr 9.42-48; Lc 17.1-2)*

⁶—Rü texé ya pecadugu nanguxëxë i wüxi i ñaã buxügü i choxü yaxögüxü rü tümacèx rü narümemaë chi nixí na noxtacüma wüxi ya nuta tümanaãwa nayangacuchixü, rü ñuxüchi ngëmaãcü taxtüchiüwa tuxü nayarütáexü na ngëxma tayuxücèx. ⁷—Ñoma i naãnecüãx i duüxügücèx rü wüxi i taxü i ngechaü nixí na nangëxmaxü i muxüchixü i tacü i pecadugu nayixëëxü. Rü guxüguma tá nangëxma i ngëma chixexügü, natürü wüxi i ngechaüxüchi tá nixí naxcèx i ngëma yatü i togüxü pecadugu nguxëëxü. ⁸—Rü ngëmacèx i ngëxguma chi cuxméx rü ëxna cucutü pecadugu cuxü nguxëëgu, rü name nixí i noxtacüma ícunadae rü yaxügu cuyaña. Erü narümemaë nixí i cuboxméxácüma rü ëxna cubocutüãcüma na cunayaxuxü i curü maxü na tama guxüne ya cuxméxmaã rü ëxna guxüne ya cucutümaã üxü ya taguma ixoxünewa quitëxcuchixücèx. ⁹—Rü ngëxguma chi cuxetü pecadugu cuxü nguxëëgu, rü name nixí i ícunacaxüchi, rü yaxügu cunaña. Erü narümemaë nixí i wüxixetümaã na cunayaxuxü i curü maxü na tama guxüne ya cuxetümaã üxü ya ngoxogü nagu poxcuenewa na quitëxcuchixücèx. [Rü ngëmaãcü woo cuxü naguxchagu, natürü name nixí i nüxna quixügachi i guxüma i ngëma chixexügü i nagu cunguchaüxü.]

*Ore ga carneru ga iyarütaxuxügu ixuxü
(Lc 15.3-7)*

¹⁰—Rü tama name i nüxü pexoox i wüxi i buxü i ñaärüü choxü yaxõxü. Erü ngëma norü dauruügü i orearü ngeruügü i daxücüãx rü guxüguma Chaunatü ya daxügücüpëxewa nangëxmagü na ngema ngëma buxüetüwa nachogüxücèx. ¹¹—Rü choma i Tupana Nane na duüxüxü chiixü rü núma chaxü na chanamaxëëxücèx i duüxügü iyarütaxuxü. ¹²—¿Rü ñuxü ñapegüxü i pema ega wüxi ya yatü rü nüxü nangëxmagu i 100 i carnerugü rü wüxi nüxü iyarütaxuxü? ¿Taux ëxna i nachitaügu namugüãxü i ngëma 99, rü ñuxüchi naxcèx yadauxü i ngëma nüxü iyarütaxuxü? ¹³—Rü ngëxguma nüxü iyan-gauxgu, rü namaã nataãëxüchi i ngëma norü carneru. Rü woo guxüguma namaã nataãë i ngëma 99 i tama iyarütaxuxü, natürü yexeraãcüxüchi namaã nataãë i ngëma wüxi i iyarütaxuxü, erü marü nüxü inayangau. ¹⁴—Rü

ngëxgumarüü ta nixĩ ya Penatü ya daxügucü na tama nanaxwëxexü na wüxi i ñaã buxü na iyarütaxuxü.

*Ñuxãcü tamüçüxü na ingechaüxüchiga
(Lc 17.3)*

¹⁵ –Rü ngëxguma cueneë chixexü cumaã üxgu, rü name nixĩ i nüxĩcatama namaã quidexa, rü nüxna nüxü cucuëxãchixëë i ngëma norü chixexü i cumaã naxüxü. Rü ngëxguma cuga naxĩnügu, rü marü wenaxarü mexüçëx cunataeguxëë i ngëma cueneë. ¹⁶ –Natürü ngëxguma tama cuga naxĩnügu i ngëma cueneë, rü name nixĩ i naxcëx cuca i wüxi rü ëxna taxre i duüxügü na nümagü rü ta namaã yadexagüxüçëx i ngëma cueneë. ¹⁷ –Rü ngëxguma rü ta tama nüxü inaxĩnügu i ngëma taxre i duüxügüarü ore, rü name nixĩ i guxü i yaxögüxümaã nüxü quixu na ngëma cueneëmaã yadexagüxüçëx. Rü ngëxguma rü ta tama nüxü inaxĩnügu i ngëma yaxögüxüarü ore, rü name nixĩ i wüxi i duüxü i tama yaxöxürüügu namaã curüxĩnü. ¹⁸ –Rü aixcüma pemaã nüxü chixu rü yíxema núma ñoma i naãnewa tama pexü irüxĩnüxë i chorü ore rü tãütãma Tupana ãëxgacü íxixüwa tichocu. Natürü yíxema meã pexü irüxĩnüxë i ngëma ore rü aixcüma ngëma tá tangu. ¹⁹ –Rü pemaã nüxü chixu rü ngëxguma chi taxre i pema i núma ñoma i naãnewa rü wüxigu tacüçëx ípecaxgu i Chaunatü ya daxügucüxütawa, rü nüma ya Chaunatü rü tá pexna nanaxã. ²⁰ –Erü ngëma ngextá taxre rü ëxna tomaëxpüx i duüxügü chauégagu íngutaquëxexüwa, rü choma rü ta norü ngãxütanüwa changëxma –ñanagürü. ²¹ Rü yexguma ga Pedru rü Ngechuchucëx nixü, rü nüxna naca, rü ñanagürü: –¿Pa Corix, ngëxguma chaueneë chixexü chomaã üxgu, rü ñuxreëxpüxcüna i namexü na nüxü nüxü changechaüxü naxcëx i ngëma chixexü i chomaã naxüxü? ¿Rü marü namexü i cuçcëx ega 7 ëxpüxcüna yixĩgu na nüxü nüxü changechaüxü? –ñanagürü. ²² Rü Ngechuchu nanangãxü rü ñanagürü: –Tama name i 7 ëxpüxcünaxĩcatama nüxü nüxü cungechaü. Natürü guxügutãma nixĩ i nüxü nüxü na cungechaüxü woo 70 ëxpüxcüna i 7 wa nangu –ñanagürü.

Ore ga ãëxgacüarü duüxü ga tama namüçüaxü nüxü ngechaüxü ga norü ngetanügu ixuxü

²³ Rü Ngechuchu rü ñanagürü: –Rü ngëma Tupana na ãëxgacü íxixü, rü ñoma wüxi ga nachüãneãrü ãëxgacü ga norü duüxügü ga nüxü nange-tanügüxümaã namexëëchaüxürüü nixĩ. ²⁴ –Rü yexguma inaxügüãgu ga meã nüxü na yadaugüxü ga yema nüxü nangetanügüxüpane, rü naxütawa nanagagü ga wüxi ga norü duüxü ga taxüchicü ga dïëru nüxü ngixü ngetanüxü. ²⁵ –Natürü ga yema norü duüxü rü nangearü dïëruãx, rü taxuacüma norü cori ga ãëxgacüaxü nanaxütanüëga. Rü yemacëx ga yema ãëxgacü rü norü churaragüxü namu na to ga corixü namaã nataxegüxüçëx ga yema yatü, wüxigu tümamaã ga naxmëx rü naxãcügü rü norü yemaxügü, na yema natanü ga dïërumaã naxütanüãxüçëx ga norü ngetanü. ²⁶ –Rü yexguma ga yema norü duüxü rü norü ãëxgacüpëxegu nacaxãpüxü, rü nüxü naceëxü, rü ñanagürü:

“Pa Corix ¡choxü nangechaü! Rü marü tá chapuracü, rü tá cuxü chanaxütanü i guxüma”, ñanagürü. ²⁷ –Rü yema norü ãëxgacüaxü nangechaütümüü, rü yemacëx namaã nüxü nixu ga marü tama nüxü na naxütanüãxüçëx ga yema norü ngetanü. Rü ñuxüchi ínananguxuchixëë. ²⁸ –Natürü yexgumatama yéma ãëxgacüxütawa ínaxüüxgu ga yema yatü, rü nüxü inayangau ga wüxi ga namüçü ga írarüwatama nüxü nangetanüxü. Rü yema yatü rü nüxna natüxüe, rü nananuxnaxã, rü ñanagürü nüxü:

“¡Choxũ ngĩxũ naxütanü i ngẽma dñeru i ngĩxũ cungetanücü!” ñanagürü. ²⁹ —Rü yexguma ga yema namücü rü yema yatüpẽxegu nacaxãpũxü, rü nüxũ nacèxũ, rü ñanagürü:

“Pa Chomücũx, ¡choxũ nangechaũ! Rü marü tá chapuracü, rü tá cuxũ chanaxütanü i guxũma”, ñanagürü. ³⁰ —Natürü ga yema yatü rü tama nüxũ nacuáxchaũ ga yema ore. Rü poxcupataũgu tüxũ napoxcuama ñuxmata nüxũ tanaxütanü ga yema tümaãrü ngetanü. ³¹ —Rü yexguma togü ga yema ãẽxgacüarü duũxũgü nüxũ daugügu ga yema ngupetũxũ, rü poraãcü naãẽwa nangux ga yema naxũxũ ga yema yatü. Rü norü corixütawa naxĩ rü nüxũ nayarũxugüe ga guxũma ga yema ngupetũxũ. ³² —Rü yexguma ga yema ãẽxgacü rü nanamu ga norü churaragü na naxütawa nagagüãxũcèx ga yema yatü. Rü yexguma naxütawa nanguxgu, rü ñanagürü nüxũ:

“Wüxi i chixexũ i chorü duũxũ quixĩ. Choma rü cuxũ nüxũ changechaũ ga yema choxũ cungetanũxũ, erü choxũ cucèxũ na tama cuxũ chapoxcuxũcèx. ³³ —Rü cuma rü chita nüxũ nüxũ cungechaũ i ngẽma cumücü i cuxũ nange-tanũxũ, yexgumarüũ ga choma rü cuxũ nüxũ na changechaũxürüũ ga yema choxũ cungetanũxũ”, ñanagürü nüxũ. ³⁴ —Rü poraãcü nanuxũchi ga yema ãẽxgacü. Rü norü churaragũxũ namu na napoxcugüãxũcèx ga yema yatü ñuxmata guxũ nüxũ naxütanü ga yema nüxũ nangetanũxũ —ñanagürü ga Ngechuchu. ³⁵ Rü ñuxũchi ñanagürü ta: —Rü ngẽxgumarüũ tá pemaã nanaxü ya Chaunatü ya daxũgucü i ngẽxguma tama wüxichigü aixcüma peenexègüaxũ nüxũ perüngümaegu i ngema chixexũ i pemaã naxũxũ —ñanagürü.

19

Parichéugü rü Ngechuchuna nacagüe i táxmèxchiga (Mr 10.1-12; Lc 16.18)

¹ Rü yema ñaxguwena ga Ngechuchu rü inaxũãchi ga Gariréaarü naãnewa. Rü natü ga Yudáũãrü tocutüwa naxü ga Yudeaarü naãnewa. ² Rü muxũma ga duũxũgü nawe narũxĩ, rü nüma ga Ngechuchu rü yema nanameẽxèẽ ga yema idaaweexũ. ³ Rü Ngechuchucèx naxĩ ga ñuxre ga Parichéugü, rü nüxna nacagü rü ñanagürügü: —¿Cuxcèx namexũ i wüxi i yatü na ínatáxmèxmarexũ ega tacü rü chixexũ taxũxgu ya naxmèx? —ñanagürügü. Rü yemaãcü nüxna nacagü yerü Ngechuchuxũ chixexũgu nanguxèẽgüchaũ. ⁴ Rü Ngechuchu nanangãxũ rü ñanagürü: —¿Taguma èxna nawa pengüe i ngẽma Tupanaãrü ore i ümatũxũ i nüxũ ixuxũ ga noxri Tupana naxũxgu ga duũxũgü, rü yatũxũ rü ngecũxũ na naxũxũ? ⁵ —Rü ñanagürü ga Tupana:

“Rü ngẽmacèx ya yatü rü tá nanatü rü naẽna nixũgachi na namèxmaã in-axãũxũcèx. Rü ngẽmaãcü i ngẽma taxre rü ñoma wüxitama i duũxürüũ tá nixĩgü”.

⁶ —Rü ñuxũchi tama taxre nixĩ, rü wüxitama nixĩ. Rü ngẽmacèx taxucürüwa texé nügüna tayaxĩgachitanũxèẽ i ngẽma taxre i Tupana nügüna mugũxũ —ñanagürü. ⁷ Rü yexguma Ngechuchuna nacagü rü ñanagürügü: —¿Tüxcüũ nixĩ ga Moiché ga duũxũgümaã nüxũ yaxuxũ rü ngẽxguma texé tümamèxũ ítaxchaũgu rü name nixĩ i wüxi i popera i tèxgüpane ngĩxna taxã, rü ñuxũchi ngĩxũ ítatèx? ñaxũ —ñanagürügü. ⁸ Rü Ngechuchu nanangãxũ, rü ñanagürü nüxũ: —Pegagu nixĩ ga Moiché ga tama pexna nachúxãxũ na pexmèxũ ípetãxũ. Yerü nüma nüxũ nacuèx na tama aixcüma peyaxögũxũ. Natürü noxriarü ügügu rü tama yemaãcü nixĩ. ⁹ —Rü choma pemaã nüxũ chixu rü tama name na texé tümamèxũ ítaxũ ega tama naĩ ya yatümaã nangẽãẽxũgagu yixĩgu. Rü ngẽxguma chi yima yatü rü ñuxũchi naĩ i ngemaã naxãxmèxgu, rü chixexũ naxü, rü ñoma naĩ i ngemaãmare nangẽãẽxürüũ nixĩ. Rü texé ya

ngĩmaã ãmaxê i ngẽma nge i ngĩte ngĩxũ ítèxcũ, rü ñoma naĩ i ngemaãmare itapexũrũ tixĩ –ñanagũrũ ga Ngechuchu. ¹⁰ Rũ ñuxũchi ga norũ ngúexũgũ rũ ñanagũrũgũ nüxũ: –Ega ngẽmaãcü yixĩgu rũ name nixĩ i noxtacũma tama naxãmèx ya yatũ rũ tama ixãte i nge –ñanagũrũgũ. ¹¹ Rũ Ngechuchu norũ ngúexũgũxũ nangãxũ rũ ñanagũrũ: –Taxucũrũwa guxũma i duũxũgũ nüxũ nacuèx i ÷acũchiga na yĩxũ i ngẽma nguxẽẽtae. Natũrũ yĩxema Tupana tũxũ nüxũ cuèxẽexẽxĩcatama tixĩ ya nüxũ cuèxgũxe. ¹² –Rũ nangẽxma i nagũxũraũxũ i guxchaxũ na tama naxãmèxũcèx ya yatũ. Erũ nümaxũ i yatũ rũ woetama taxucũrũwa naxãmèx erũ norũ bucũma nangepũxũchare. Rũ nümaxũ i yatũ rũ taxucũrũwa naxãmèx erũ nayauxpũxũcharee. Rũ togũ tama naxãmèx erũ Tupanaãrũ ngúchaũxĩcatama naxũgũchaũ. Rũ texé ya ngẽmaãcü maxchaũxê rũ marũ name i ngẽmaãcü tamaxũ –ñanagũrũ ga Ngechuchu.

*Ngechuchu rũ buxũgũxũ nameãxê
(Mr 10.13-16; Lc 18.15-17)*

¹³ Rũ duũxũgũ rũ Ngechuchuxũtawana nanagagũ ga ñuxre ga buxũgũ na Ngechuchu nüxũ ingõgũxũcèx rũ namaã nayumũxẽxũcèx. Natũrũ ga Ngechuchuarũ ngúexũgũ rũ inanaxũgũe ga na yangagũãxũ ga yema duũxũgũ ga Ngechuchuxũtawana buxũgũxũ gagũxũ. ¹⁴ Natũrũ ga Ngechuchu rũ ñanagũrũ nüxũ ga norũ ngúexũgũ: –Marũ name i chauxũtawana naxĩ i buxũgũ. ¡Rũ tãxũ i nüxna penachuxuxũ! Erũ Tupana ãẽxgacũ íxĩxũwa rũ tümacèx nixĩ ya yĩxema ñaã buxũgũrũ meã yaxõgũxe –ñanagũrũ. ¹⁵ Rũ ñuxũchi ga Ngechuchu rũ yema buxũgũtũ naxũmèx. Rũ yemawena inaxũãchi ga yéma.

*Wũxi ga ngextũxũcü ga dũruãxũchicũ Ngechuchumaã nidexa
(Mr 10.17-31; Lc 18.18-30)*

¹⁶ Rũ wũxi ga ngextũxũcü rũ Ngechuchuxũtawana nangu, rũ nüxna naca, rũ ñanagũrũ: –Pa Ngúexẽẽruũ ya Mecũx, ¿÷acũ tá chaxũxũ na chanayaxuxũcèx i maxũ i taguma gũxũ? –ñanagũrũ. ¹⁷ Rũ Ngechuchu nanangãxũ rũ ñanagũrũ nüxũ: –¿Tũxcũũ “Mecũ” ñacurũgũ choxũ? Erũ Tupanaxĩcatama nixĩ ya mecũ ixĩcũ, rũ nataxuma i to. Natũrũ ngẽxguma cunayauxchaũgu i maxũ i taguma gũxũ, rũ ¡naga naxĩnũ i Tupanaãrũ mugũ! –ñanagũrũ. ¹⁸ Rũ yexguma ga guma ngextũxũcü rũ ñanagũrũ: –¿Ngẽxũrũxũ tá nixĩ i Tupanaãrũ mugũ i naga chaxĩnũxũ? –ñanagũrũ. Rũ Ngechuchu nanangãxũ rũ ñanagũrũ nüxũ: –¡Tãũtãma cumãeta, rũ tãũtãma naĩ i ngemaã icupe, rũ tãũtãma cungĩtèèx, rũ tãũtãma doraxũ quixu i togũchiga! ¹⁹ –¡Rũ tümaga naxĩnũ ya cunatũ rũ cue, rũ nüxũ nangechaũ i cumũcũgũ ngẽma na cugũ cungechaũxũrũ! –ñanagũrũ. ²⁰ Rũ yexguma ga guma ngextũxũcü rũ ñanagũrũ: –Guxũma i ngẽma mugũ i nüxũ quixuxũ rũ woetama chorũ bucũma meã chayanguxẽẽ. ¿Rũ ÷acũ rũ to tá chaxũ na choxũ nangẽxmaxũcèx i maxũ i taguma gũxũ? –ñanagũrũ. ²¹ Rũ Ngechuchu nanangãxũ rũ ñanagũrũ nüxũ: –Ega aixcũma Tupanapẽxewa mecũ quixĩxchaũgu, rũ name nixĩ i namaã cutaxe i guxũma i curũ ngẽmaxũgũ rũ togũ i ngearũ ngẽmaxũãxgũxũna cunaxã i ngẽma curũ natanũ. Rũ ngẽxguma tá cuxũ nangẽxma i cuchica i daxũguxũ i naãnewa. Rũ ñuxũchi marũ name i chowe curũxũ –ñanagũrũ. ²² Natũrũ yexguma yemaxũ naxĩnũgu ga guma ngextũxũcü rũ porãcü nangechaũ, yerũ namuãrũ dũruãxũchi. ²³ Rũ yexguma ga Ngechuchu rũ norũ ngúexũgũxũ ñanagũrũ: –Aixcũma pemaã nüxũ chixu rũ naguxchaxũchi nixĩ na wũxi i duũxũ i dũruãxũchixũ rũ Tupana ãẽxgacũ íxĩxũwa na nanguxũ. ²⁴ –Rũ aixcũma pemaã nüxũ chixu rũ ñoma wũxi i cameyu na taxucũrũwama wũxi ya ucumaxètũwa naxũpetũxũãrũ yexera narũguxchamaẽ naxcèx i wũxi i duũxũ i dũruãxũchixũ

na yaxücuxü i ngextá Tupana ãëxgacü íxixüwa —ñanagürü. ²⁵ Rü yexguma yemaxü naxĩnëgu ga norü ngúexügü rü poraãcü nabèixãchiãëgü. Rü nügüna nacagüe rü ñanagürügü: —¿Rü texé tá êxna tixĩ ya nayaxúxe i maxü i taguma gúxü? —ñanagürügü. ²⁶ Rü Ngechuchu nüxü nadawenü rü ñanagürü nüxü: —Duüxügü rü taxuacüma nügü namaxëë, natürü Tupanaãxü rü natauxcha na namaxëxëãxü —ñanagürü. ²⁷ Rü yexguma ga Pedru rü ñanagürü nüxü: —Pa Corix, toma rü marü ítanawogü ga guxüma ga torü yemaxügü na cuwe tarüxixüçèx. ¿Rü tacü tá nixĩ i torü natanü i ñuxmax? —ñanagürü. ²⁸ Rü Ngechuchu nanangãxü rü ñanagürü nüxü: —Aixcüma pemaã nüxü chixu rü ngëma ngunexü i Tupana nagu nangexwacaxüxëxü i guxüma, rü choma rü ãëxgacü ya tacü tá chixĩ. Rü chorü tochica i mexëchixüwa tá charüto. Rü pema i 12 i chorü ngúexügü na chowe perüxixü rü pema rü tá ta pexü nangëxma i perü tochicaxü i mexëchixü i chauxütawa. Rü ngëma tá perütogü na norü maxüchigacèx nüxü picagüxü i guxüma i Yudíugü. ²⁹ Rü guxãma ya yíxema tümapata chauxcèx ítaxe, rü êxna tümaëneëgü rü tümaëyëxgüxü chauxcèx ítaxe, rü êxna tümanatü rü tümaëxü chauxcèx ítaxe, rü êxna tümamèx rü tümaxãcügüxü rü tümaärü naãne chauxcèx ítaxe, rü 100 êxpüxcüna i ngëma noxri tüxü ngëxmaxüärü yexera tá tayaxu. Rü naëtü tá tanayaxu i maxü i taguma gúxü. ³⁰ —Natürü muxüma i nümaxü i ñoma i naãnewa duüxügü wixpëxewa ügüxëxü, rü daxügüxü i naãnewa rü Tupana tá wixweama nanaxügüxëë. Rü muxüma i nümaxü i ñoma i naãnewa duüxügü wixweama ügüxëxü, rü daxügüxü i naãnewa rü Tupana tá wixpëxewa nanaxügüxëë.

20

Ore ga puracütanüxügu ixuxü

¹ —Rü ngëma Tupana ãëxgacü íxixüwa rü ñoma wüxi ga ubanecüarü yora ga pëxmama norü puracütanüxü ta yadaucürü nixĩ. ² Rü yema puracütanüxümaã nanamexëë na wüxítachinü ga dñëru gu nüxü na naxütanüãxüçèx ga wüxichigü ga ngunexügu. Rü ñuxüchi naãnewa nanamugü na yéma yapuracüexüçèx. ³ —Rü yixcama ga 9 arü oragu rü ínayadau ga ngextá yatügü ga puracücèx daugüxü íngutaquëxegüxüxüwa. Rü yexma nüxü nayangau ga ñuxre ga yatügü ga ngearü puracüãxgüxü. ⁴ —Rü ñanagürü nüxü:

“¡Ngëma chorü ubanecüwa peyapuracüe! Rü meã tá pexü chanaxütanü”, ñanagürü. Rü nümagü rü yéma naxĩ. ⁵ —Rü yema ubanecüarü yora rü tocuchigu rü wenaxärü togü ga puracütanüxü ta nayadau. Rü tomaëxpüxarü oragu ga yáuanecü rü wenaxärü yexgumarü ta nayadau. ⁶ —Rü yixcama ga wüximëëxpüxarü oragu ga yáuanecü rü wenaxärü ínayadau ga ngextá yatügü ga puracücèx daugüxü íngutaquëxegüxüxüwa. Rü yexma nüxü nayangau ga ñuxre ga togü ga yatügü ga ngearü puracüãxgüxü. Rü ñanagürü nüxü:

“¿Tüxcüü i pema rü nuxã perüchomare i guxü i ñoma i ngunexügu, rü tama pepuracüe?” ñanagürü. ⁷ —Rü nümagü nanangãxügü, rü ñanagürügü nüxü:

“Tama tapuracüe erü taxúema toxcèx tadau na tüxü tapuracüexüçèx”, ñanagürügü. Rü yexguma ga yema naãneärü yora rü ñanagürü nüxü:

“¡Pema rü ta ngëma chorü ubanecüwa pexĩ rü peyapuracüe! Rü meã tá pexü chanaxütanü”, ñanagürü. ⁸ —Rü yexguma marü nachütagu rü yema naãneärü yora, rü naxcèx naca ga norü puracütanüxüärü dauruü, rü ñanagürü nüxü:

“¡Naxcèx naca i ngëma puracütanüxü. Rü nüxĩra nüxü naxütanü i ngëma wixwenaxüchima ngëma íxü, rü nawa tá icuyacuëxëë i ngëma nüxĩra ngëma puracüexü!” ñanagürü. ⁹ —Rü yéma naxĩ ga yema puracütanüxü ga wüximëëxpüxarü oragu ga yáuanecü puracüwa íxü. Rü wüxichigü ngixü

nayauxgü ga wüxitachinü ga dīeru. ¹⁰ —Rü yemawena rü yéma naxī ga yema nüxīrama puracüexü ga puracütanüxü. Rü nümagü nagu naxīnüëgu rü yexera tá ngīxü nayauxgü ga dīeru, natürü nümagü rü ta ngīxü nayauxgü ga wüxitachinütama ga dīeru ga wüxichigü. ¹¹ —Rü yexguma ngīxü nayauxgügu rü inanaxügüe ga chixri na yadexagüxü nachigagu ga yema naãneärü yora. ¹² —Rü ñanagürügü:

“Yixema rü guxü i ngunexügu üexcüxetüwa tapuracüe, natürü i ñaã puracütanüxü i wixwenaxüchi íngugüxü rü wüxi i oratama napuracüe. Natürü ngëma tüxü naxütanüãxüëxpüxtama nüxü nanaxütanü”, ñanagürügü. ¹³ —Natürü ga yema ubanecüarü yora nanangãxü, rü ñanagürü nüxü ga wüxi ga yema puracütanüxü:

“Pa Chomücüx, tama cuxü changīx. ¿Tama ëxna i wüxitachinügu yīxü ga chomaã cunamexëëxü na cuxü chanaxütanüxü i ngëma puracü? ¹⁴ —¡Ñaã i curü dīeru, rü íxü! Rü ngëma puracütanüxü i wüxi i oratama puracüexü, rü choma nüxna ngīxü chaxãxchaü i ngëma cuxna ngīxü chaxãcüëxpüx. ¹⁵ —¿Tama ëxna name i ngëma choma chanaxwëxexüãcüma ngīmaã na chaxüxü i chorü dīeru? ¿Rü ëxna quixãxãchi erü ngëmaãcü chamecüma?” ñanagürü. ¹⁶ —Rü yixema ñuxma duüxügü wixweama tüxü ügüxëexë, rü daxügüxü i naãnewa rü Tupana tá wixpëxewa tüxü naxügüxëë. Rü yixema ñuxma duüxügü wixpëxewa tüxü ügüxëexë rü daxügüxü i naãnewa rü Tupana tá wixweama tüxü naxügüxëë. Erü Tupana rü muxüchiena naxu, natürü noxre-tama tixī ya yixema tüxü nadexe —ñanagürü ga Ngechuchu.

*Ngechuchu rü norü tomaëxpücüna nanaxunagü ga norü yuxchiga
(Mr 10.32-34; Lc 18.31-34)*

¹⁷ Rü yexguma namagu yaxüxgu ga Ngechuchu ga Yerucharéüwa na naxüxü rü noxrüwama naxcëx naca ga yema 12 ga norü ngüexügü, rü ñanagürü nüxü: ¹⁸ —Pema nüxü pecuëx na marü ingaicaxü na Yerucharéüwa ingugüxü. Rü ngëma rü duüxügü rü tá chixri chomaã nachopetü. Rü tá paigüarü ãëxgacügü rü ngüexëëruügü i ore i mugüwa ngüxëëtaegüxüna tá choxü namugü. Rü nümagü rü tá chomaã nanaxuegugü na chayuxücëx. ¹⁹ —Rü tá to i nachüãñecüãxna choxü namugü. Rü ngëmagü tá nixī i chaugu idauxcüräügüxü rü choxü çuaixgüxü. rü ñuxüchi tá curuchawa choxü nipotagü na ngëxma chayuxücëx. Natürü tomaëxpüx i ngunexüguwena rü tá wenaxärü chamaxü —ñanagürü.

*Wüxi ga ngüxëëcëx íca ga Chaütiágu rü Cuáü. Rü yema taxre rü Zebedéu
(Mr 10.35-40)*

²⁰ Rü yéma iyexma ga naë ga Chaütiágu rü Cuáü. Rü yema taxre rü Zebedéu nanegü nixīgü. Rü ngīma rü Ngechuchucëx iyaxü namaã ga yema taxre ga ngīnegü. Rü Ngechuchupëxegu iyacaxãpüxü, rü wüxi ga ngüxëëcëx nüxna iyaca. ²¹ Rü nüma ngīxna naca, rü ñanagürü: —¿Tacü nixī i cunaxwëxexü? —ñanagürü. Rü ngīma inangãxü rü ngīgürügü: —Pa Corix, ngëxguma ãëxgacüxü quingucuchigu rü chanaxwëxe i cunamu na wüxi i ñaã chaune rü curü tügünecüwawa na natoxü, rü ngëma to i curü toxwecüwawa na natoxü —ngīgürügü. ²² Natürü Ngechuchu ngīxü nangãxü rü ñanagürü: —Pema rü tama nüxü pecuëx na tacücëx ípeçaxü. ¿Namaxã chi peporaexü i ngëma ngüxü i tá choxü üpetüxü? —ñanagürü. Rü nümagü nanangãxügü rü ñanagürügü: —Ngëmaãcü namaã tá taporae —ñanagürügü. ²³ Rü Ngechuchu nanangãxü rü ñanagürü nüxü: —Aixcüma tá nixī i chauxrüü ngüxü pingegüxü. Natürü ngëma chorü tügünecüwawa rü chorü toxwecüwawa na perütogüxücëx, rü tama choxmëxwa nangëxma na pexna chanaxãxü. Rü Chaunatumëxëwa

nixĩ na nangẽxmaxũ i ngẽma, rü nüma tá tũxna nanaxã ya yĩxema tümacèx íyĩxẽ —ñanagürü. ²⁴ Rü yexguma yemaxũ naxĩnüegu ga yema togü ga 10 ga Ngechucharü ngúexũgü, rü Chaũtiágumaã rü Cuáũmaã nanuẽ. ²⁵ Natürü Ngechuchu naxcèx naca rü ñanagürü nüxũ: —Pema nüxũ pecuèx rü guxũ i nachiuãnegüarü ãẽxgacügü rü poraãcü nanamu i norü duũxũgü. Rü ngẽma ãẽxgacügü i taxũgü rü norü duũxũgüarü yora nügü nixĩgüxẽ. ²⁶ —Natürü tãütáma ngẽmaãcü nixĩ i petanüwa. Rü ngẽxguma texé naxwèxegu na ãẽxgacü tĩxũ i petanüwa, rü name nixĩ i noxri rü guxãarü ngüxẽeruũ tixĩ. ²⁷ —Rü ngẽxguma chi texé i petanüwa naxwèxegu na tümamücügüeru na tĩxũ, rü name nixĩ i noxri rü guxũma i tümamücügüarü ngüxẽeruũ tixĩ. ²⁸ —Yerü chomatama i Tupana Nane na duũxũxü chiĩxũ rü tama togü choxũ rüngüxẽxücèx nixĩ i núma chaxũxü. Natürü núma chaxũxü na duũxũgüxü charüngüxẽxücèx rü naxcèx na chayuxücèx rü ngẽmaãcü chanaxütanüxücèx na muxũma i nümagü rü nüxũ nangẽxmaxücèx i maxũ i taguma gúxũ —ñanagürü.

Ngechuchu nanameẽxẽ ga taxre ga ngexetügüxü
(Mr 10. 46-52; Lc 18.35-43)

²⁹ Rü yexguma Ngechuchu norü ngúexũgümaã Yericúarü ñãnewa íchoũxgu, rü muxũma ga duũxũgü nawe narüxĩ. ³⁰ Rü yéma namacüwawa narütogü ga taxre ga ingexetüxü. Rü yexguma nüxũ naxĩnüegu na Ngechuchu yéma üpetüxü, rü tagaãcü Ngechuchuna nacagüe, rü ñanagürügü: —Pa Corix, Pa Dabítanüxüx, ¡Cuxũ tangechaütümüügü! —ñanagürügü. ³¹ Rü yema duũxũgü ga Ngechuchuwe rüxĩxü rü nayangagü na iyanangeèxgüxücèx. Natürü nümagü ga yema ingexetüxü rü yexeraãcü Ngechuchuna nacagüe, rü ñanagürügü: —Pa Corix, Pa Dabítanüxüx, ¡cuxũ tangechaütümüügü! —ñanagürügü. ³² Rü yexguma ga Ngechuchu rü yexma nayachiãchi rü naxcèx naca ga yema ingexetüxü. Rü nüxna naca rü ñanagürü: —¿Tacü i penaxwèxexü na pexcèx chanaxüxü? —ñanagürü. ³³ Rü nümagü nanangãxũgü rü ñanagürügü: —Pa Corix, tanaxwèxe na toxü quidauchitanügüxẽxü —ñanagürügü. ³⁴ Rü yexguma ga Ngechuchu rü nüxũ nangechaütümüügü, rü naxètügügu ningõgü. Rü yexgumatama nidauchigü, rü Ngechuchuwe narüxĩ.

21

Yerucharéũgu naxücu ga Ngechuchu
(Mr 11.1-11; Lc 19.28-40; Cu 12.12-19)

¹ Rü yexguma marü yangaicagügu ga Yerucharéũwa na nangugüxü, rü nawa nangugü ga guma ñãne ga Bechagué ga Oríbunecüarü mëxpüneãrü ngaicamana yexmane. Rü Ngechuchu nanamu ga taxre ga norü ngúexũgü. ² Rü ñanagürü nüxũ: —¡Gua tórü toxmèxtawa ngẽxmane ya ñãnexãcüwa pexĩ! Rü ngẽxma tá ngxü pengau i wüxi i buru i ngẽxma ngaxücü namaã i wüxi i ngxãcü i yatüxü i ngxütagu irüxãũxü. ¡Rü ngxü piwèxü, rü nuã chauxütawa ngxü pega namaã i ngxãcü! ³ Rü ngẽxguma texé pexna caxgu na ¡acücèx ngxü piwèxüxü, ¡rü tümamaã nüxũ pixu rü ñapegügü:

“Torü Cori nangixwèxe namaã i ngxãcü, natürü paxa tá ngxü nawoeguxẽ”, ñapegügü tüxü! —ñanagürü. ⁴ Rü yema naxüpetü yerü yemaãcü Tupana nayanguxẽ ga norü ore ga nuxcümaũxü ga norü orearü uruũ ümatüxü ga ñaxü:

⁵ “¡Yerucharéũcüãxgümaã nüxũ pixu rü ñapegü: ‘¡Dücèx ya perü ãẽxgacü ya nuã pexütawa ücü! Rü nüma rü tama nügü yacuèxüũãcü ínangu, rü wüxi i buruxacüétügumare naxaunagü!’ ”

ñanagürü ga yema ore. ⁶ Rû yexguma ga yema taxre ga norü ngúexügü rü yéma naxî, rü nanaxügü ga yema Ngechuchu namaã nüxü ixuxü. ⁷ Rû Ngechuchuxütawa ngixü nagagü ga yema buru ngixacümaã. Rû yema norü ngúexügü rü naxchirumaã nanachatagü ga yema ngixacü, rü ñuxüchi ga Ngechuchu rü natagu naxaunagü. ⁸ Rû yema muxüma ga duüxügü ga nawe rüxixü rü naxchirumaã nayachamatanü ga nama. Rû togü rü naixätü ta nadaügü rü yemamaã nayachamatanü ga nama. ⁹ Rû yema duüxügü ga napëxegu ägüxü, rü yema togü ga wixweama ägüxü, rü tagaäcü ñanagürügü: —¡Nüxü ticuèxüxügü ya daa äëxgacü ya Dabítanüxü! ¡Rû namecümáxüchi ya daa Tupanaegagu núma ücü! ¡Rû pema rü ta, Pa Daxücüäx, rü nüxü picuèxüxügü ya Tupana! —ñanagürügü. ¹⁰ Rû yexguma Ngechuchu Yerucharéüwa ixücuxgu, rü guxüma ga yema ñanecüäx rü nanaxixächiaëgü, rü ñanagürügü: —¿Texe nixî ya daa? —ñanagürügü. ¹¹ Rû yema Ngechuchuwe rüxixü ga duüxügü rü nanangäxügü rü ñanagürügü: —Daa nixî ya Tupanaärü orearü uruü ya Ngechuchu ya Gariréaanewa ngëxmane ya ñane ya Nacharétucüäx ixícü —ñanagürügü.

Ngechuchu rü tupauca ga taxünewa ínanawoxü ga duüxügü ga yéma taxegüxü

(Mr 11.15-19; Lc 19.45-48; Cu 2.13-22)

¹² Rû tupauca ga taxünegu naxücu ga Ngechuchu, rü ínanawoxü ga yema yéma tacümaã taxegüxü rü naxcèx taxegüxü. Rû nanangüegutanü ga norü mechagü ga yema duüxügü ga yéma Tupanaarü ämarewa mexü ga díerumaã taxegüxü rü muxtucugümaã taxegüxü. ¹³ Rû ñanagürü nüxü ga yema duüxügü: —Tupanaärü ore i ümatüxüwa rü ñanagürü: “Chopata rü yumüxëpataü nixî”.

Natürü pema rü ngíteëxgüxüpataü peyaxixëë —ñanagürü. ¹⁴ Rû yéma tupauca ga taxünewa rü Ngechuchucèx naxî ga ñuxre ga ingexetügüxü rü ichixeparagüxü. Rû Ngechuchu nanameëxëë. ¹⁵ Natürü ga paigüarü äëxgacügü rü ngúexëëruügü ga ore ga mugüwa nguxëëtaegüxü, rü nüxü nadaugü ga yema mexügü ga taxügü ga Tupanaärü poramaã naxüxü ga Ngechuchu rü buxügüxü naxínüë ga na ñagüxü: —¡Namexëchi ya daa äëxgacü ya Ngechuchu ya Dabítanüxü! —ñagüxü. Rû yemacèx ga yema äëxgacügü rü nanuë. ¹⁶ Rû ñanagürügü Ngechuchuxü: —¿Nüxü cuxínüxü i ngëma buxügü namaã idexagüxü? —ñanagürügü. Rû Ngechuchu nanangäxü, rü ñanagürü: —Ngü, nüxü chaxínü. ¿Natürü taguma éxna nawa pengúe i Tupanaärü ore i ümatüxü i ñaxü:

“Rü ngëma buxügü i íraxüchixü rü õxchanagü rü tá ta cuxü nicuèxüügü”, ñaxü? —ñanagürü. ¹⁷ Rû yexguma ga Ngechuchu rü nüxna yéma nixü, rü ñuxüchi ínaxüxü ga guma ñanewa. Rû ñane ga Betániawa naxü, rü yexma nayape.

Ngechuchu rü orix ga iguera ga ngearü oðxümaã chixexü naxuegu

(Mr 11.12-14, 20-26)

¹⁸ Rû moxüäcü ga pëxmama rü yexguma wenaxärü Yerucharéücèx nataegugu ga Ngechuchu rü nataiya. ¹⁹ Rû namacüwawa nüxü nadau ga wüxi ga orix ga iguera. Rû naxcèx nixü, natürü taxuüma ga norü oxü inayangau, rü naätüxüxícatama inayangau. Rû yemacèx ñanagürü nüxü ga yema orix: —Rü tagutáma wena cuxox, —ñanagürü. Rû yexgumatama narüñexë ga yema orix. ²⁰ Rû yexguma yemaxü nadaugügu ga norü ngúexügü, rü nabèixächiaëgü. Rû Ngechuchuna nacagüe rü ñanagürügü: —¿Rü ñuxäcü i ñaã orix i paxama nañexëxü? —ñanagürügü. ²¹ Rû Ngechuchu nanangäxü rü ñanagürü: —Aixcüma pemaã nüxü chixu rü ngëxguma chi meã peyaxögügu rü

tama ngēma igueramaã chaxüxüxca chi pexü. Natürü yexeraxü chi pexü. Rü ngëxguma chi daa mëxpúnemaã nüxü pixuxgu na yaxügachixüçèx rü taxtü i taxüchiüwa naxüxüçèx, rü pega chi naxünü. ²² Rü guxüma i tacü i naxçèx ípeçaxü i perü yumüxëwa, rü tá penayauxgü ega aixcüma peyaxögüãcüma naxçèx ípeçaxgu.

*Ngechuchuna nacagüe na texégagu tupauca ga taxünewa nangüxëëtaexü
(Mr 11.27-33; Lc 20.1-8)*

²³ Rü Ngechuchu rü tupauca ga taxünegu naxücu. Rü yexguma yéma ínanguxëëtaeyane rü naxçèx naxí ga paigüarü äëxgacügü rü Yudíugüarü äëxgacügüerugü. Rü Ngechuchuna nacagüe rü ñanagürügü: —¿Rü texégagu nixí i cunaxüxü i ngēma núma cuxüxü? ¿Rü texé cuxü tamu na cunaxüxüçèx i ngēma? —ñanagürügü. ²⁴⁻²⁵ Rü Ngechuchu nanangãxü rü ñanagürü: —Choma rü tá ta pexna chaca, rü ngëxguma choxü pengãxügu i ngēma pexna naxçèx chaçaxü, rü choma rü tá ta pemaã nüxü chixu na ngëxürüxü i äëxgacü na choxü muxü na nuã changüxëëtaexü. ¿Rü texé tanamu ga Cuáü na duüxügüxü ínabaiüxëëxüçèx? ¿Pexçèx rü Tupana yíxü ga namucü rü éxna duüxügümare? —ñanagürü. Rü yexguma ga yema äëxgacügü rü inanaxügüe ga nügümaã na yaporagatanücüxü. Rü nügümaãtama ñanagürügü: —¿Ñuxü ñagügüxü tá? Erü ngëxguma chi nüxü ixuxgu na Tupana núma namuxü rü nüma rü tá ñanagürü tüxü:

“¿Rü tüxcüü ga tama nüxü peyaxögüxü?” ñanagürü tá. ²⁶ —Rü ngëxguma chi nüxü ixuxgu na yatügümare núma namuxü rü taxçèx rü tá naxãücüma, erü duüxügü tá tüxü nadai. Erü nümagü i duüxügü rü nagu narüxñüë na Tupana yíxü ga Cuáüxü núma mucü —ñanagürügü. ²⁷ Rü yemacèx Ngechuchuxü nangãxügü rü ñanagürügü: —Tama nüxü tacuèx ga texé núma na namuxü ga Cuáü ga baiüxëëruü —ñanagürügü. Rü yexguma ga Ngechuchu rü ñanagürü nüxü: —Choma rü tá ta täütáma pemaã nüxü chixu na texé choxü muxü na chanaxüxü i ngēma choxna naxçèx peçaxü —ñanagürü.

Ore ga taxre ga nanegügu ixuxü

²⁸ Rü ñanagürü ta ga Ngechuchu —¿Ñuxü ñapegüxü naxçèx i ñaã ore i tá pemaã nüxü chixuxü? Rü wüxi ga yatü rü nüxü nayexma ga taxre ga nane. Rü wüxi ga guma nanemaã nüxü nixu rü ñanagürü nüxü:

“Pa Chaunex, chanaxwëxe i yéa chorü ubaarü buxgüwa cuyapuracü”, ñanagürü. ²⁹ —Rü guma nane nanangãxü rü ñanagürü:

“Choxü nawëxtümüü na ngēma chaxüxü”, ñanagürü. Natürü ga yixcamaxüra rü nagu narüxñü rü düxwa yéma nayapuracü. ³⁰ —Rü yixcüra ga guma nanatü rü naí ga nanexütawa naxü, rü yexgumarü ta nüxü yema ñanagürü. Rü guma nane nanangãxü rü ñanagürü:

“Marü name, Pa Pa, rü ngēma tá chaxü”, ñanagürü. Natürü tama aixcüma yéma naxü. ³¹ —Rü ñuxma chanaxwëxe i chomaã nüxü pixu rü ngexcürüücü ga guma taxre ga nane ga aixcüma naxücü ga yema nanatü naxwëxexü —ñanagürü. Rü nümagü nanangãxügü rü ñanagürügü: —Ga guma nüxüra namuãcü nixí ga naga ínücü —ñanagürügü. Rü yexguma ga Ngechuchu rü ñanagürü nüxü: —Aixcüma pemaã nüxü chixu rü ngēma yatügü i Dumaãrü äëxgacüçèx dñeru ngíxü dexü rü ngēma ngexügü i chixri maxëxü tá nixí i pexüpa nüxüra ichocuxü i ngextá Tupana äëxgacü íxixüwa. ³² —Yerü Cuáü ga baiüxëëruü rü núma naxü na pemaã nüxü yaxuxüçèx na ñuxãcü tá na pemaxëxü, natürü ga pema rü tama nüxü peyaxögü. Natürü ga yema yatügü ga Dumaãrü äëxgacüçèx dñeru ngíxü dexü rü yema ngexügü ga chixri maxëxü rü Cuáüãxü nayaxögü. Natürü ga pema rü woo nüxü na pedaugüxü ga

ñuxãcü na yaxõgüãxü, rü tama nüxü perüxoechaü i pecüma i chixexü na peyaxõgüxüçèx –ñanagürü.

*Ore ga chixexü ga puracütanüxügu ixuxü
(Mr 12.1-12; Lc 20.9-19)*

³³ Rü ñanagürü ta ga Ngechuchu: –Rü chanaxwèxe i iperüxĩnüë i ñaã to i ore i cuèxruü i tá pemaã nüxü chixuxü. Rü nayexma ga wüxi ga yatü ga nüxü nayexmacü ga wüxi ga norü naãne. Rü yexma nanato ga muxüma ga orix ga uba. Rü ñuxüchi ínanapoxegu, rü nanaxü ga wüxi ga ubaarü yauxtüüxüchica rü wüxi ga dauxütaechica. Rü ñuxüchi ñuxre ga puracütanüxüna nüxü nadauxëë. Rü namaã nanamexëë na ngãxügu namaã ngixü yatoyexüçèx ga yema ubatanü. Rü ñuxüchi ga yema naãneärü yora rü wüxi ga to ga nachiuãne ga yaxüguxüwa naxü. ³⁴ –Rü yexguma norü ubaarü buxgüwa nanguxgu, rü yema naãneärü yora rü yéma nanamugü ga ñuxre ga norü duüxügu na yema puracütanüxüna ngixcèx yaçaxüçèx ga yema ubatanü ga nüxna ücü. ³⁵ Natürü ga yema puracütanüxügu rü ínanayauxü ga yema coriarü duüxügu. Rü nanaçuaixgü ga wüxi, rü ga to rü nayamèxüchigü, rü ga yema to rü nutamaã ínanamuxüchigü. ³⁶ –Rü yema naãneärü yora rü wenaxärü noxriarü yexera rümumaëxü ga norü duüxügu yéma namugü. Natürü ga yema puracütanüxügu rü yema togürüütama chixri namaã nachopetü. ³⁷ –Rü düxwa ga yema naãneärü yora rü yéma nanexüchixü namu yerü nüma nagu naxĩnügu rü chi nanega naxĩnüë ga yema puracütanüxügu. ³⁸ –Natürü yexguma yema cori nanexü nadaugügu ga yema puracütanüxügu, rü nügümaã ñanagürügü:

“Ngëmaärü tá nixĩ i ñaã naãne i yixcama. ¡Rü ngixã tayamèxgü na tóxrü yixüçèx!” ñanagürügü. ³⁹ –Rü nayayauxgü, rü toxnamana nanagagü, rü yexma nayamèxgü –ñanagürü. ⁴⁰ Rü yexguma ga Ngechuchu rü yema paigüarü ãëxgacügüna naca rü ñanagürü: –¿Rü ngëxguma ínanguxgu i ngëma naãneärü yora, rü çacü tá yema puracütanüxümaã naxü? –ñanagürü. ⁴¹ Rü yema ãëxgacügü rü Ngechuchuxü nangãxügu, rü ñanagürügü: –Ngëma naãneärü yora rü tama nüxü nangechaütümüãcüma tá nanadai i ngëma puracütanüxügu i chixri maxëxü. Rü ñuxüchi togü i puracütanüxügu i meã namaã ngixü itoyexü i dïeruna tá nüxü nadauxëë –ñanagürügü. ⁴² Rü Ngechuchu rü ñanagürü nüxü: –¿Taguma ëxna nawa pengüë i Tupanaärü ore i ümatüxü? Erü ngëmawa rü ñanagürü:

“Rü yima nuta ya mecü ya iãrü üruügü nüxü oechirécü rü ñuxma rü yimatama nixĩ ya Tupana nüxĩra yaxücuchicü na namaã inaxügüãxüçèx ya ípata. Rü tórü Cori ya Tupana nixĩ ga naxücü ga yema, rü ñuxma rü namexëchi i taxcèx”,

ñanagürü i ngëma ore. ⁴³ –Rü ngëmacèx pemaã nüxü chixu rü woo pexcèxchirëx na yixü i ngëma naãne i ngextá Tupana ãëxgacü íxixüwa, natürü pexna tá nanapu. Rü togü i duüxügu i aixcüma Tupanaga ínüëxüna tá nanaxã. ⁴⁴ –Rü yima nuta ega texé namaã yarüñaxgu rü tá itapoügü. Rü yixema tümaçtügu nanguxe ya yima nuta, rü tá tüxü niñaixmü –ñanagürü ga Ngechuchu. ⁴⁵ Rü yexguma ga paigüarü ãëxgacügü rü Parichéugü nüxü ínüëgu ga yema ore ga cuèxruü ga Ngechuchu namaã nüxü ixuxü, rü nüxü nicuëxächitanü ga nachiga na yixü ga yema ore. ⁴⁶ Rü yexgumatama ga yema ãëxgacügü rü Ngechuchuxü niyauxgüëga. Natürü taxucürüwama nayayauxgü yerü duüxügüxü namuë, yerü nümagü ga duüxügu rü nayaxõgü ga aixcüma Tupanaärü orearü uruü na yixü ga Ngechuchu.

22

Ore ga ngĩgũarũ petagu ixuxũ
(Lc 14.15-24)

¹ Rũ Ngechuchu rũ wenaxãrũ nanangũexẽẽ. Rũ ore ga cuèxruũgu namaã nayaxu, rũ ñanagũrũ nũxũ: ² –Rũ ngẽma Tupana na ãẽxgacũ ixĩxũ rũ ñoma wũxi ga nachiuãneãrũ ãẽxgacũ ga naneãrũ ngĩgũ ũchiũcũrũũ nixĩ. ³ –Rũ norũ duũxũgũxũ namu na naxcèx yaçaxũcèx ga yema duũxũgũ ga marũ ũpaacũ nũxna naxuxũ. Natũrũ yema duũxũgũ ga marũ nũxna naxuchiréxũ rũ tama yéma naxĩchaũ. ⁴ –Rũ wenaxãrũ togũ ga norũ duũxũgũxũ yéma namugũ. Rũ ñanagũrũ nũxũ:

“¡Ngẽma pexĩ naxũtawa i ngẽma duũxũgũ i nũxna chaxuchiréxũ, rũ namaã nũxũ peyarũxu rũ marũ íname i chorũ òna i taxũ. Rũ marũ chanadai i chorũ wocagũ i ingũexũ rũ guxũma marũ ínamemare. Rũ chanaxwèxe i paxa nuã naxĩ naxcèx i ñaã chorũ peta!” ñanagũrũ. ⁵ –Natũrũ yema duũxũgũ ga nũxna naxuchiréxũ rũ tama naga naxĩnũẽ. Rũ wũxi rũ naãnewa naxũ, rũ ga to rũ norũ taxepataũwa naxũ. ⁶ –Rũ ga togũ rũ yema ãẽxgacũarũ duũxũgũxũ ínayauxũ rũ nayaçuaixgũ ñũxmata nayuexẽẽã. ⁷ –Rũ yexguma ga guma ãẽxgacũ rũ poraãcũ nanu. Rũ norũ churaragũxũ yéma namugũ na yadaiãxũcèx ga yema duũxũgũ ga máẽtagũxũ, rũ na yagugũãxũcèx ga guma norũ íãne. ⁸ –Rũ ñũxũchi ñanagũrũ nũxũ ga norũ duũxũgũ:

“Guxũma i chorũ peta rũ marũ ínamemare. Natũrũ ga yema duũxũgũ ga nũxna chaxuchiréxũ rũ woetama nũxũ chaxo na nuã naxĩxũcèx. ⁹ –¡Rũ yéa taxũ i ítamũwa pexĩ, rũ nũxna peyaxu i guxũ i duũxũgũ i ngẽma nũxũ pedauxũ, na núma chorũ petawa naxĩxũcèx!” ñanagũrũ. ¹⁰ –Rũ yema ãẽxgacũarũ duũxũgũ rũ yéma ítamũwa naxĩ. Rũ nũxna nixuetanũ ga guxũma ga duũxũgũ ga mexũgũ rũ chixexũgũ ga nũxũ iyangaugũxũ. Rũ yemaãcũ duũxũgũmaã nanapa ga guma ãẽxgacũpata. ¹¹ –Rũ yexguma ga guma ãẽxgacũ rũ nixũcu nawa ga yema ucapu ga nawa peta naxũxũ, yerũ ínayadau ga yema duũxũgũ ga nũxna naxuxũ. Natũrũ yéma nũxũ nadau ga wũxi ga yatũ ga tama norũ ngèxãẽchirugu icũxũ. ¹² –Rũ ñanagũrũ nũxũ:

“Pa Chomũcũx ¿ñuxãcũ i nuxã cuxũcuxũ na tama curũ ngèxãẽchirugu quicũxũ?” ñanagũrũ. Natũrũ núma ga yema yatũ rũ nangeèxmare. ¹³ –Rũ yexguma ga guma ãẽxgacũ rũ ñanagũrũ nũxũ ga yema norũ duũxũgũ:

“¡Meã peyanẽixpara rũ peyanẽixchacũgũ i ñaã yatũ, rũ yéma dũxétũwa i poraãcũ ínaxẽãnexũwa peyatá! Rũ ngẽma tá narũdoxũ rũ tá nixũxchapũta erũ poraãcũ tá nũxũ nangux”, ñanagũrũ. ¹⁴ –Rũ Tupana rũ muxũchíena naxu, natũrũ noxretama tixĩ ya yíxema aixcũma Tupana tũxũ ndexe –ñanagũrũ ga Ngechuchu.

Dĩeru i ãẽxgacũna ngixũ ixãcũchiga
(Mr 12.13-17; Lc 20.20-26)

¹⁵ Rũ yexguma ga Parichéugũ rũ nixĩgachi. Rũ noxrũwama nũgũmaã nayamexẽẽgũ na tacũ rũ oremaã tá Ngechuchuna nacagũexũcèx na chixexũgu nanguxẽẽgũãxũcèx rũ ñũxũchi ãẽxgacũxũtawa na ínaxuaxũgũãxũcèx. ¹⁶ Rũ yemacèx Ngechuchuxũtawa nanamugũ ga ñuxre ga norũ duũxũgũ namaã ga ñuxre ga Erodearũ duũxũgũ na yema oremaã Ngechuchuna na yacagũexũcèx. Rũ yexguma Ngechuchuxũtawa nangugũgu rũ ñanagũrũgũ: –Pa Ngũexẽẽruũx, nũxũ tacuèx rũ aixcũma nixĩ i ngẽma nũxũ quixuxũ i curũ ore. Rũ aixcũma cunangũexẽẽ i duũxũgũ na Tupana naxwèxexũãcũma namaxẽxũcèx. Rũ tama duũxũgũgamare cuxĩnũ, erũ tama norũ dũxétũxũnegu cudawenũ, natũrũ nacũma nixĩ i cungugũxũ. ¹⁷ –¡Rũ tomaã nũxũ ixu! rũ ngẽma dĩeru ya ãẽxgacũ ya tacũ ya Dumacũãx totanũwa yayauxchaũxũ, ¿rũ

namexũ yĩxũ na nũxna ngĩxũ taxãxũ rü ěxna tama? –ñanagürügü. ¹⁸ Natürü Ngechuchu nũxũ nacuèxama na chixexũgu naxĩnũèxũ ga yema duũxũgü, rü yemacèx ñanagürü nũxũ: –Pema nixĩ i togüpèxewa meã pemaxènetaxũ, natürü peãewa rü chixexũgu perũxĩnũè. ¿Rü tũxcüü i chixexũgu choxũ penguxèèchaũxũ? ¹⁹ –¿Choxũ ngĩxũ pewé i wüxi i dĩèru i ngĩmaã àèxgacüaxũ penaxütanücü! –ñanagürü. Rü yema naxütawa ngĩxũ nangegü ga wüxitachinü ga yema dĩèru. ²⁰ Rü yexguma Ngechuchu ngĩxũ dèuxgu, rü nũxna naca, rü ñanagürü –¿Rü texéchicünèxã rü texééga nixĩ i ngĩgu üxũ? –ñanagürü. ²¹ Rü nũmagü nanangãxũgü, rü ñanagürügü: –Dumacũãx ya àèxgacü ya tacüchicünèxã nixĩ –ñanagürügü. Rü yexguma ga Ngechuchu rü ñanagürü nũxũ: –¿Àèxgacüna ngĩxũ pexã i ngẽma àèxgacüarü ixĩcü, rü Tupanana ngĩxũ pexã i ngẽma Tupanaãrü ixĩcü! –ñanagürü. ²² Rü yexguma yema orexũ naxĩnũègu, rü nabèixãchiãègü. Rü Ngechuchuna ínixĩ.

*Ngechuchuna nacagüe rü ngoxi yuwa ínadaqü i duũxũgü
(Mr 12.18-27; Lc 20.27-40)*

²³ Rü yematama ngunexũgu rü ñuxre ga Chaduchéugü rü Ngechuchuxütawa naxĩ. Rü nũmagü nixĩ ga nagu naxĩnũèxũ na yuexũ rü tagutáma wena namaxèxũ. Rü yemacèx Ngechuchuna nacagüe, rü ñanagürügü: ²⁴ –Pa Ngúexèèruũx, Moĩché nũxũ ixuxgu rü ngèxguma wüxi ya yatü naxãmèx rü nangexacüyane nayuxgu, rü name nixĩ i naèneètama ngĩmaã naxãmèx i ngẽma yutecü i naxũmèx, na ngẽmaãcü naxããcüxücèx nũxũ ya yima naèneè ya marü yucü –ñanagürü ga yema ore. ²⁵ Rü ñanagürügü ta ga Chaduchéugü: –Nayexma ga totanüwa ga 7 ga nügüeneè. Rü naxãmèx ga guma yacü, natürü tauta naxããcüyane nayu. Rü yexguma ga naĩ ga naèneè nũxĩ ngĩmaã naxãmèx ga yema ngecü. ²⁶ –Rü guma rü ta nayu, rü nangexacü. Rü yexguma rü naĩ ga naèneè nũxĩ ngĩmaã naxãmèx. Rü yemaãcü gucüma ga guma 7 ga nügüeneè rü ngĩmaã naxãmèx ga yema nge. Rü gucüma nayue tauta naxããcüyane. ²⁷ –Rü yemawena rü ngĩma rü ta iyu ga yema nge. ²⁸ –Rü ngèxguma yuexũ wena maxègu, ¿rü ngexcürüücü ga guma 7 ga nügüeneè naxmèx tá iyixĩ i ngẽma nge? Yerü gucüma ga guma 7 ga nügüeneè ngĩmaã naxãmèx –ñanagürügü. ²⁹ Rü yexguma ga Ngechuchu rü nanangãxũ, rü ñanagürü: –Pema rü ipetüe erü tama nũxũ pecuèx i Tupanaãrü ore i ümatüxũ, rü tama nũxũ pecuèx i ñuxãcü na yĩxũ i Tupanaarü pora. ³⁰ –Rü ngèxguma yuexũ wena maxègu rü taxúetáma tixãmèxgü rü ěxna tixãtegü. Erü daxũcüãx i Tupanaãrü orearü ngeruũgürüü tá tixĩgü i ngèxguma. ³¹ –Pema choxna peca i yuexũarü dagüchiga. ¿Natürü tama ěxna nawa pengüé i Tupanaãrü ore i ümatüxũ i ngextá Tupanatama ngẽmachigaxũ pemaã íyaxuxüwa? Erü ngema rü ñanagürü ya Tupana:

³² “Choma nixĩ i Abráũãrü Tupana, rü Ichaáarü Tupana, rü Acobuarü Tupana”, ñanagürü. Rü ngẽma orewa nũxũ tacuèx rü woo ñoma i naãnewa nayuegu i duũxũgü, natürü Tupanaarü ínüwa rü guxũguma namaxè –ñanagürü ga Ngechuchu. ³³ Rü yexguma yemaxũ naxĩnũègu ga duũxũgü, rü guxũma nabèixãchiãègü namaã ga norü nguxèètae ga Ngechuchu.

*Ngẽma Tupanaãrü mu i guxũ i norü mugüarü yexera ixĩxũ
(Mr 12.28-34)*

³⁴ Rü nangutaguèxegü ga Parichéugü ga yexguma nũxũ naxĩnũègu ga ñuxãcü Ngechuchu rü yema Chaduchéugüxũ na iyanangeèxgüxèèxũ. ³⁵ Rü wüxi ga yema Parichéugü ga ore ga mugüwa nguxèètaexũ rü Ngechuchuxũ

chixexügu nanguxëechaü. Rü yemacèx Ngechuchuna naca rü ñanagürü: ³⁶ — Pa Ngúexëëruüx, ¿ngëxürüüxü i Tupanaärü mu nixi i guxü i norü mugüarü yexera ixixü? —ñanagürü. ³⁷ Rü Ngechuchu nanangãxü rü ñanagürü: —Ngëma Tupanaärü mu i guxü i norü mugüarü yexera ixixü, rü ñanagürü:

“¡Rü nüxü nangechaü ya Cori ya curü Tupana i guxüne ya curü maxünemaã, rü guxü i cuãemaã, rü guxü i nagu curüxünüxümaã!” ñanagürü. ³⁸ —Rü ngëma nixi i Tupanaärü mu i guxü i norü mugüarü yexera ixixü. Rü ngëma nixi i nüxiraüxü i norü mu ga duüxügüna naxãxü ga Tupana. ³⁹ —Rü ngëma norü taxre i Tupanaärü mu, rü ngëma nüxiraüxü i norü murüütama nixi, rü ñanagürü:

“¡Nüxü nangechaü i cumücü ngëma na cugü cungechaüxürüü!” ñanagürü. ⁴⁰ —Rü ngëma taxre i Tupanaärü mugüwa nixi inaxügüxü i guxüma i Tupanaärü mugü ga Moïché ümatüxü rü nuxcümaügüxü ga Tupanaärü orearü uruügü namaã nguxëëtaegüxü —ñanagürü.

¿Texétaa yixü ya Cristu?

(Mr 12.35-37; Lc 20.41-44)

⁴¹⁻⁴² Rü yoxni ga Parichéugü rü yéma nangutaquëxegü, rü Ngechuchu nüxna naca, rü ñanagürü: —¿Rü ñuxü ñapegüxü i pema nüxü ya Cristu? ¿Rü texétaa yixü? —ñanagürü. Rü nümagü ga Parichéugü rü nanangãxügü rü ñanagürügü: —Cristu rü nuxcümaücü ga ãëxgacü ga Dabítaa nixi —ñanagürügü.

⁴³ Rü yexguma ga Ngechuchu rü ñanagürü: —¿Tüxcüü ga Dabí ga norü Cori-maã naxuaxü ga Cristu ga yexguma Tupanaãe ga Ünexü Dabíxü idexaxëëgu? Yerü ga Dabí rü ñanagürü:

⁴⁴ “Tupana rü chorü Cori ya Cristuxü ñanagürü: ‘¡Nuã chorü tügünecüwawa rüto ñuxmatáta nüxü charüporamaë i curü uwanügü na cuga naxünüëxücèx!’ ” ⁴⁵ —Naturü ¿ñuxücürüwa i Dabítaa yixü ya Cristu ega nümatama ga Dabí rü norü Cori-maã naxuãgu? —ñanagürü ga Ngechuchu. ⁴⁶ Rü taxumaãma nanangãxügüéga ga yema Parichéugü, rü bai ga wüxi ga oremaã. Rü yemawena rü guxüma namuë na tacücèx Ngechuchuna nacagüexü.

23

Ngechuchu rü duüxügütaniüwa ínanaxuaxü ga Parichéugü rü ngúexëëruügü ga Moïchéarü mugüwa nguxëëtaegüxü

(Mr 12.38-40; Lc 11.37-54, 20.45-47)

¹ Rü yemawena ga Ngechuchu rü duüxügüxü rü norü ngúexügüxü ñanagürü: ² —Ngëma ngúexëëruügü i ore i mugüwa nguxëëtaegüxü rü Parichéugü, rü meãma nüxü nacüëxgü ga Tupanaärü ore ga Moïché ümatüxü. ³ —Rü ngëmacèx name i naga pexñüë i guxüma i ngëma pemaã nüxü yaxugüxü. Naturü tama name i nüma namaxëxüãcüma pemaxë, erü nüma nüxü nixugü i mexü i ore naturü chixri namaxë. ⁴ —Erü nüma rü poraãcü pexü namu na naga pexñüëxücèx i norü mugü i guxchaxü i taxucürüwama texé aurexü. Naturü nümagütama rü bai i írarüwa naga na naxñüëxü i ngëma nawa pexü namuxü. ⁵ —Rü guxüma i ngëma naxügüxü, rü nanaxügü na duüxügü nüxü daugüxücèx. Rü ina-yangegü i Tupanaärü ore na ngëmaãcü duüxügü nagu rüxñüëgu rü aixcüma Tupanaärü duüxügü na yügüxü. Rü nügü nangëxãëgü na duüxügü nüxü rüdaunüxücèx. ⁶ —Rü petagüarü ònawa rü nümagü i Parichéugü rü nanaxwëxegü i ònaärü yoraxütawaxüchi na natogüxü na duüxügü ngëma nüxü rüdaunüxücèx. Rü ngutaquëxepataügüwa rü nanaxwëxegü na napëxewaxüchi ügüxü i naxmëxwëxegüwa natogüxü. ⁷ —Rü íañeärü ítamügüwa rü nanaxwëxegü na duüxügü meã nüxü rümoëgüxü

ñoma ãëxgacüxü meã rümoxëxürüü. Rü nanaxwëxegü na duüxügü rü: “Pa Ngúexëëruüx” ñagüxü nüxü. ⁸—¡Naturü pema rü täütáma ngëmagu perüxñüë! Erü guxãma i pema rü pegüeneëgü pixīgü, rü wüxixicatama nixi ya perü ngúexëëruü ixícü. ⁹—Rü tama name i ñoma i naãnecüãxmaã pexãnatü, erü wüxixicatama nixi ya Penatü, rü nüma rü daxüwa nangëxma. ¹⁰—Rü tama name i texé: “Pa ãëxgacüx” ñatarügü pexü. Erü chaxicatama nixi i perü ãëxgacü chiixü. ¹¹—Rü yixema petanüwa guxãrü yexera ixixë rü tanaxwëxe na guxüma i tümamücüarü ngüxëëruü tiixü. ¹²—Erü yixema tügü írütaxe rü Tupana tá tüxü naxãnexëë. Naturü yixema tügü íruxírase, rü Tupana tá tüxü nicuëxüü. ¹³—Pa Ngúexëëruügü i Ore i Mugüwa Nguxëëtaegüxü rü Pa Parichéugüx, pema nixi i togü i duüxügüpëxewa meã pemaxënetaxü natürü peãëwa rü chixexügu perüxñüëxü. Rü wüxi i ngechaü nixi i pexcëx erü pegagu nixi na tama Tupanaxütawa nangugüxü i togü i duüxügü. Rü pema rü ta rü täütáma ngëxma pechocu, Rü ngëxgumarüü ta rü nüxü penaguxchaxëë na tama ngëxma nachocuxücëx i togü i ngëxma chocuchaüxü. ¹⁴—Pa Ngúexëëruügü i Ore i Mugüwa Nguxëëtaegüxü rü Pa Parichéugüx, pema nixi i togü i duüxügüpëxewa meã pemaxënetaxü natürü peãëwa rü chixexügu perüxñüëxü. Rü wüxi i ngechaü nixi i pexcëx erü tüxna penapuxü ya tümapata ya yixema yutegüxe. Rü ñuxüchi penamëxëë i perü yumüxëgü na duüxügü nagu rüxñüëgu rü aixcüma mexü i Tupanaärü duüxügü na pixīgüxü. Rü ngëmacëx pema tá nixi i togü i duüxügüarü yexera pepoxcuexü. ¹⁵—Pa Ngúexëëruügü i Ore i Mugüwa Nguxëëtaegüxü rü Pa Parichéugüx, pema nixi i togü i duüxügüpëxewa meã pemaxënetaxü natürü peãëwa rü chixexügu perüxñüëxü. Rü wüxi i ngechaü nixi i pexcëx erü guxüwama pexi na togü i duüxügümaã nüxü peyarüxuxücëx i ore na wüxitama ya duüxë pexrüü na yaxöxücëx. Rü ngëxguma marü pexü tanguüxgu, rü tüxü pechixexëë na düxwa taxreëxpüxcüna perü yexera chixexüwa tangëxmaxücëx. ¹⁶—Pa Ngúexëëruügü i Ore i Mugüwa Nguxëëtaegüxü rü Pa Parichéugüx, pema rü ñoma cuëxruügü i ngexetüxürüü pixīgü. Rü wüxi i ngechaü nixi i pexcëx, erü nüxü pixuxgu rü:

“Ngëxguma texé ya tupauca ya taxüneëgagu tacücëx ixunetagu, rü marü name ega tama tayanguxëëgu i ngëma tümäärü uneta”, ñaperügügü. Naturü ngëxguma texé tupauca ya taxüneärü dïëruégagu tacücëx ixunetagu, rü:

“Tanaxwëxe i aixcüma tayanguxëë i ngëma tümäärü uneta”, ñaperügügü. ¹⁷—Pema rü pengëãëgü rü ñoma pengexetügüxürüü pixīgü. ¿Pexcëx rü tacü nixi i yexera rümemaëxü, tupauca ya taxüneärü dïëru rü éxna nümatama ya tupauca ya nagagu naxüünene i ngëma dïëru? ¹⁸—Rü tupauca ya taxünewa nangëxma i ngëma ãmarechica i ngexta Tupanacëx ínadaiaxüwa i naxüna gü na Tupanana naxãmarexücëx. Rü pema rü ñaperügügü:

“Rü ngëxguma texé ya tupauca ya taxüneärü ãmarechicaégagu tacücëx ixunetagu, rü marü name ega tama tayanguxëëgu i ngëma tümäärü uneta. Naturü ngëxguma texé tupauca ya taxüneärü ãmarechicawa ngëxmaxü i ãmareégagu tacücëx ixunetagu, rü tanaxwëxe i aixcüma tayanguxëë i ngëma tümäärü uneta”, ñaperügügü. ¹⁹—Pema rü pengëãëgü rü ñoma pengexetügüxürüü pixīgü. ¿Pexcëx rü tacü nixi i yexera rümemaëxü, rü yima tupauca ya taxüneärü ãmarechicawa ngëxmaxü i ãmare rü éxna nümatama ya tupauca ya taxüneärü ãmarechica i nagagu naxüünexü i ngëma ãmare? ²⁰—Erü yixema tupauca ya taxüneärü ãmarechicaégagu tacücëx ixunetaxe, rü tama ngëma nachicaégaguxicatama itaxuneta, natürü ngëma ãmare i ngëma nachicawa ngëxmaxüëgagu rü ta itaxuneta. ²¹—Rü yixema tupauca ya taxüneëgagu tacücëx ixunetaxe, rü tama ngëma tupaucaégaguxicatama itaxuneta, natürü

Tupana ya ngéma maxücüégagu rü ta itaxuneta. ²² Rü yíxema daxüguxü i naãneegagu tacüçèx ixunetaxe, rü Tupanaärü toruñegagu rü ta itaxuneta, rü ngëxgumarüü ta Tupana ya ngéma rütocüégagu rü ta itaxuneta. ²³ —Pa Ngúexëëruügü i Ore i Mugüwa Nguxëëtaegüxü rü Pa Parichéugüx, pema nixí i togü i duüxügüpëxewa meã pemaxënetaxü, natürü peãewa rü chixexügu perüxñüëxü. Rü wüxi i ngechaü nixí i pexcèx, erü woo tacü i íraxü i pexü ngëxmaxü rü Tupanana penaxã i ngéma nüxna üxü. Natürü tama naga pexñüë i Tupanaärü mugü i guxü i mugüarü yexera ixixü. Erü pexü nataxu na ãëxgacügü i aixcüma meãma duüxügümaã icuèxgüxü na pixígüxü, rü pexü nataxu na duüxügü pexü nangechaütümüügüxü, rü aixcüma meã Tupanamaã pixaixcümagüxü. Rü guxüma i ngéma nixí i Tupana naxwëxexü na penaxüxü, tama nüxü ipeyarüngümaëãcüma i ngéma mexü i marü pexüxü. ²⁴ —Pa Cuèxruügü i Ngexetügüxüx, pema rü guxüma i mugü i woo íraxüchixü rü meãma penaxaure, natürü tama Tupana naxwëxexüãcüma pemaxë. Pema rü ñoma wüxi i duüxü i tunüçèx norü axexü bapetüxü rü ñuxüchi arü wüxi i cameyu ixaxwetaüxürüü pixígü. ²⁵ —Pa Ngúexëëruügü i Ore i Mugüwa Nguxëëtaegüxü rü Pa Parichéugüx, pema nixí i togü i duüxügüpëxewa meã pemaxënetaxü natürü peãewa rü chixexügu perüxñüëxü. Rü wüxi i ngechaü nixí i pexcèx, erü perü düxétüxünewaxicatama pegü pemexëëchaü, natürü perü maxüwa rü poraãcü pichixe. Erü penawomüxëëãcüma poraãcü naxcèx pengix i duüxügüarü ngëmaxügü, rü pegügüxicatama perüxñüë. ²⁶ —Pa Parichéugü i Ñoma Ngexetüxürüü Ixígüxüx, name nixí i pegü pimexëë i perü aixepewa i perü maxüwa. Rü ngëxguma tá nixí i perü düxétüwa rü tá ta pimexü. ²⁷⁻²⁸ —Pa Ngúexëëruügü i Ore i Mugüwa Nguxëëtaegüxü rü Pa Parichéugüx, pema nixí i togü i duüxügüpëxewa meã pemaxënetaxü natürü peãewa rü chixexügu perüxñüëxü. Rü wüxi i ngechaü nixí i pexcèx, erü ñoma yuetachiquëxegü i düxétüwa cómxümaã chauxetügüxü natürü aixepewa rü yuetachinaxãmaã rü nagüxüraüxü i ããchixümaã napagüxürüü pixígü. Erü perü düxétüwa i duüxügü nüxü ídaugüxüwaxicatama pime, natürü aixepewa i peãewa rü poraãcü pichixe. ²⁹ —Rü wüxi i ngechaü nixí i pexcèx, Pa Ngúexëëruügü i Ore i Mugüwa Nguxëëtaegüxü rü Pa Parichéugüx. Pema rü peyamecagü ga naxchiquëxegü ga nuxcümaügüxü ga Tupanaärü orearü uruügü rü yema duüxügü ga imexü ga yuexü. ³⁰ —Rü ñuxüchi ñaperügügü:

“Rü yexguma chi nuxcümaügüxü ga tórü oxigü maxëyane imaxëgu, rü tãü chima nüxü tarüngüxëë ga na nadaiãxü ga yema nuxcümaügüxü ga Tupanaärü orearü uruügü”, ñaperügügü. ³¹ —Rü ngéma oremaã rü pegü pengoxëë na nataagü pixígüxü ga yema duüxügü ga nuxcümaügüxü ga Tupanaärü orearü uruügüxü dëixü. ³² —¡Ëcü, noxtacüma chomaã rü ta peyanguxëëx ga yema chixexü ga nuxcümaügüxü ga perü oxigü ügüexü! ³³ —Pa Æxtapearü Duüxügüx, pema rü poraãcü pichixe. ¿Ñuxãcü tá naxchaxwa pibuxmü ya yima üxü ya Tupana tá namaã pexü poxcuene? ³⁴ —Rü ngëmacèx i choma rü tá pexcèx núma chanamugü i Tupanaärü orearü uruügü, rü yatügü i mexügü i nüxü cuëxüchigüxü, rü ngúexëëruügü i mexügü. Natürü pema rü tá curuchawa peyapotagüãcüma penadai i ñuxre. Rü togü rü ngutaquëxepataügüwa rü tá peyaçuaixgü, rü togü rü ñãnechigüwa rü tá nawe pingëxütanü na chixexü namaã pexügüxüçèx. ³⁵ —Natürü Tupana tá pexü napoxcue naxcèx i guxüma ga norü duüxügü ga imexügü ga perü oxigü dëixü. Rü Abéwa nixí ga inaxügüãxü ga na nadaiãxü rü Chacaríã ga tupauca ga taxünegu peyamëxgücügu nixí ga yacuáxü ga yema. ³⁶ —Rü aixcüma pemaã nüxü chixu rü guxüma ga yema chixexüçèx rü Tupana tá nanapoxcue i duüxügü i ñomaüçüü maxëxü —ñanagürü ga Ngechuchu.

*Ngechuchu rü Yerucharéüçüãx ga duüxügücèx naxaxu
(Lc 13.34-35)*

³⁷ Rü ñanagürü ta ga Ngechuchu: —Pa Yerucharéüçüãx, pema penadai i Tupanaärü orearü uruügü, rü nutamaã ípenamuxüchigü i Tupanaärü orearü ngeruügü i pexcèx núma namugüxü. Rü ñuxreëxpüxcüna wüxigu chaugüxütagu pexü chanutaquëxexëëchaü ñoma wüxi i ota i naxácüxã nügütüügu tüxü nutaquëxexürü. Natürü pema rü tama penaxwèxe. ³⁸ —Dücèx i ñuxma ya perü ñane, rü Tupana tá ínatatèx. ³⁹ —Rü pemaã nüxü chixu rü täütáma wena choxü pedau ñuxmatáta daxügüxü i nañewa ne chaxü. Rü ngëxguma rü tá choxü pedaugü rü tá ñaperügü:

“Namexëchi nixi ya yima Cori ya Tupana núma namucü”, ñaperügü tá —ñanagürü ga Ngechuchu.

24

*Ngechuchu nanaxunagü na tupauca ga taxüne rü tá nagu na napogüexü
(Mr 13.1-2; Lc 21.5-6)*

¹ Rü yexguma tupauca ga taxünewa ínaxüxgu ga Ngechuchu, rü norü ngüexügü naxcèx naxi. Rü ñanagürügü nüxü: —Dücèx, Pa Corix, ñuxácü nimexëchi ya daa tupauca ya taxüneärü ípatagü —ñanagürügü. ² Natürü Ngechuchu nanangãxü rü ñanagürü: —Pema nüxü pedaugü ya guxünema ya yima tupauca ya taxüneärü ípatagü. Natürü pemaã nüxü chixu rü aixcüma guxünema ya daa ípatagü rü tá nagu napogüe. Rü naxtapüxarü nutagü rü taxucütáma nügüétü naxüüra, rü bai ya wüxi —ñanagürü.

*Cuèxruügi i tá nüxü idauxü naxüpa na nagüxü i nañe
(Mr 13.3-23; Lc 17.22-24, 21.7-24)*

³ Rü ñuxüchi guma Mëxpüne ga Oríbunecügu äeganewa naxi. Rü yexguma guma mëxpünewa natoxgu ga Ngechuchu rü norü ngüexügüxicatama naxütawa naxi na noxrüwama nüxna nacagüexücèx. Rü ñanagürügü: —Tanaxwèxe i tomaã nüxü quixu na ñuxgu tá nangupetüxü i ngëma nüxü quixuxü. ¿Rü tacü tá nixi i norü cuèxruü i nawa nüxü tacuáxü i ñuxgu tá wena núma na cuxüxü rü tá na nagüxü i nañe? —ñanagürügü. ⁴ Rü yexguma ga Ngechuchu rü ñanagürü nüxü: —¡Pexuäëgü na taxüema pexü womüxëëxücèx! ⁵ —Erü muxüchixü i duüxügü tá ínangugü, rü chaugu tá nügü nicüxgü rü tá ñanagürügü:

“Choma nixi i Cristu”, ñanagürügü tá. Rü muxüchixü i duüxügüxü tá nawomüxëë. ⁶ —Rü tá nüxü pexinüëchiga na nügü nadëixü i ñuxre i nachiüänegü rü nügü na nadaixchaüxü i togü i nachiüänegü. ¡Natürü täütáma ngëmacèx pebëixächiaëgü! Erü woetama ngëmaäcü tátama nangupetü i noxrix. Natürü täütáma nañeärü gux nixi i ngëma. ⁷ —Erü wüxi i nachiüäne rü to i nachiüänemaã tá nügü nadai. Rü wüxi i äëxgacü rü to i äëxgacümaã tá nanu, rü norü churaragü rü ngëma to i äëxgacüarü churaragümaã tá nügü nadai. Rü tá taiya nangux, rü tá nataxüchi i daaweanegü, rü muxüma i nachicawa rü tá naxiãxächiane. ⁸ —Rü guxüma i ngëma pemaã nüxü chixuxü, rü ngëma nixi i norü ügümare i ngëma ngüxü i tá ngupetüxü. ⁹ —Rü ngëxguma i togü i duüxügü rü tá pexü ínayauxü na chixexü pemaã naxügüxücèx. Rü tá pexü nadai. Rü guxü i nañewa i duüxügü rü tá pexchi naxaie, erü chorü duüxügü pixigü. ¹⁰ —Rü ngëxguma rü tá muxüchixü i chorü duüxügü ínatatèxgü i chorü ore, rü nügütanüwa rü tá nügüchi naxaie. Rü nügüechita tá äëxgacüxütawa nügü ínayaxuaxügü. ¹¹ —Rü muxüchixü i orearü uruügüneta tá ínangugü. Rü tá nüxü nixugügü na Tupana yiüxü ya núma namugücü na nüxü yaxügüxücèx i ore. Rü ngëmaäcü tá muxüchixü i duüxügüxü nawomüxëëgü.

12 —Rü poraãcü tá nangëxma i chixexü, rü ngëmagagu rü muxüchixütáma i duüxügü rü tãütáma nügü nangechaügü. 13 —Natürü yíxema naetüwa meã Tupanaãxü yaxõõmáxë rü yíxema tá tixí ya aixcüma nayaxúxe i maxü i taguma gúxü. 14 —Rü ngëma Tupanaãrü ore i mexü rü guxü i naãnewa tá nüxü nixugügü na guxü i duüxügü nüxü na cuëxgüxücëx. Rü ngëmawena tá nixí i nagúxü i naãne. 15 —Rü nuxcümaücü ga Tupanaãrü orearü uruü ga Danié nachiga nanaxümatü i ngëma chixexü i Tupanapëxewa äüãchixü i ínguxchaüxü. Rü ngëxguma nüxü pedëuxgu na tupauca ya taxünewa nangóxü i ngëma chixexü i Tupanapëxewa chixexüchixü, rü name nixí i pexuãëgü. 16 —Rü ngëxguma ngëma üpetügu, rü ngëma Yudéaanewa ngëxmagüxü i duüxügü rü nanaxwëxe na mëxpüneãnewa nabuxmüxü. 17 —Rü ngëma ngunexügu ega texé tümapataëxtüwa ngëxmagu, rü tama name i tümapatagu tayangaxi na tümaãrü ngëmaxü tayayaxuxücëx. 18 —Rü texé ya tümaãnewa ngëxmaxë rü tama name i tümapatacëx tataegu na tümachirugü tayayaxuxücëx. 19 —Rü ngëma ngunexügügu rü wüxi i ngechaü tá nixí i tümacëx ya yíxema ngeãxtagü ya tacharaügüxe rü yíxema imaïxãcügüxe. 20 —Rü Tupanana naxcëx peça i perü yumüxëwa na tama gáuane ixüyane rü ëxna ngüxchigaarü ngunexüguyane pexü na nangupetüxücëx i ngëma chixexü! 21 —Erü ngëma ngunexügügu rü poraãcü tá nangëxma i ngúxü ga noxri naãne ixügügumama taguma yexmaxü, rü ngëmawena rü tagutáma wena nangëxma. 22 —Rü ngëxguma Tupana tama nanoxrexëëgu i ngëma ngunexügü, rü taxúetáma tamaxü. Natürü Tupana tá nananoxrexëë i ngëma ngunexügü tümacëx ya yíxema nüma tüxü nadexe. 23 —Rü ngëxguma texé pexü ñagügu:

“Düçëx, daa nixí ya Cristu” ñagügu, rü ëxna:

“Gua nixí ya Cristu” ñagügu, rü tama name i nüxü peyaxõgü! 24 —Erü Cristugüneta rü Tupanaãrü orearü uruügüneta tá ínangugü. Rü tá nanaxügü i muxüma i cuëxruügü i taxügü na ngëmaãcü, ega nüxü natauxchagu, na tüxü nawomüxëëgüxücëx ëixrüxe ya yíxema duüxëgü ya Tupanatama tüxü dexe. 25 —Düçëx, naxüpa na nangupetüxü i guxüma i ngëma ngúxü, rü marü pemaã nüxü chixu i nachiga. 26 —Rü ngëmacëx i ngëxguma duüxügü ñagügu pexü:

“Düçëx, yéa taxúema íxãpataxüwa nangëxma ya Cristu”, ñagügu, rü tama name i ngëma pexí. Rü ngëxguma ñagügu pexü:

“Düçëx, nuã ucapuwa nangëxma ya Cristu”, ñagügu, rü tama name i nüxü peyaxõgü. 27 —Erü ñoma wüxi i bëixbëxane i guxüwama nangóonexëëxürüü tá nixí i ngëxguma wenaxãrü núma chaxüxgu i choma i Tupana Nane na duüxüxü chiixü. 28 Rü duüxügü rü tá chauxcëx nangutaquëxegü ñoma ëxchagü nawemüçëx ngutaquëxexürüü.

*Ñuxãcü tá nixí i ngëxguma nataegugu ya Tupana Nane ya duüxüxü ixícü
(Mr 13.24-37; Lc 21.25-33, 17.26-30, 34-36)*

29 —Rü nawena i ngëma ngúxügü rü tá nixo ya üëxcü, rü tãütáma inabáxi ya tauemacü. Rü woramacurigü rü ëxtagü rü tá narüyi. Rü guxüma i ñoma i naãne rü üëxcü rü tauemacü rü woramacurigü rü ëxtagü rü tá naxíãxãchitanü rü tá nu ne nanaxímare. 30 —Rü ñuxüchi duüxügü tá nüxü nadaugü na ñuxãcü daxüwa ne chaxüxü. Rü guxü i nachiüñancüãxí duüxügü rü tá naxauxe. Rü tá choxü nadaugü i ngëxguma caixanexügügu ícharüxíxgu rü núma chaxüxgu. Rü ngëxguma i choma rü äëxgacü ya poraxüchicü rü mexëchicü tá chixí. 31 —Rü tá chanamu i chorü orearü ngeruügü i daxüçüãx na yacuegüãxücëx ya norü cornetagu na ngëmaãcü naxítaquëxexëëãxücëx i guxüma i ngëma duüxügü i chadexü i guxüwama ngëxmagüxü ñuxmata naãne iyacuáxüwa ngëxmagüxü. 32 —Rüperüxínüë i ñaã ore i cuëxruü i orix i iguerachiga, rü naxcëx pengü! Rü

ngëxguma ngexwacaxüxü i nachacüügü iyarüyixgu rü naxüátügu, rü ngëmawa nüxü pecuèx na paxa tá taunecü na yíixü. ³³ —Rü ngëxgumarüü tá nixí i ngëxguma nagúxchaügu i naãne. Erü ngëxguma nüxü pedèuxgu na nangu-petüxü i ngëma pemaã nüxü chixuxü, rü ngëmawa tá nüxü pecuèx na marü chingaicaxüchixü. ³⁴ —Rü aixcüma pemaã nüxü chixu rü guxüma i ngëma nüxü chixuxü rü tá nangupetü naxüpa na nayuexü i duüxügü i ñomaücüü maxëxü. ³⁵ —Rü ñoma i naãne rü ngëma daxüwa nüxü idauxü rü tá nagux. Natürü chorü ore rü tagutáma inayarüxo rü aixcüma tá ningü. ³⁶ —Natürü ngëma ngunexü rü ora i nagu tá nangupetüxü i ngëma pemaã nüxü chixuxü, rü Chaunatü ya Tupanaxícatama nüxü nacuèx na ñuxgu tá nangupetüxü i ngëma, rü taxüema ya togue nüxü tacuèx. Rü woo i norü orearü ngeruügü i daxücüãx rü tama nüxü nacuèxgü, rü woo i choma i Nane na chiixü rü tama nüxü chacuèx na ñuxgu tá nangupetüxü i ngëma. ³⁷ —Rü yexgumarüü ga duüxügüxü ngupetüxü ga yexguma Noë maüxgu, rü ngëxgumarüü tá ta nüxü nangupetü i ngëxguma íchanguxgu i choma i Tupana Nane na duüxüxü chiixü. ³⁸ —Rü yexguma, naxüpa ga guma mucü ga taxüchicü ga guxüwama inanguanexëècü, rü ga duüxügü rü nachibüe, rü naxaxegü, rü nixámèxgü rü nixütexacügü ñuxmata nawa nangu ga yema ngunexü ga nagu Noë naweügu ixüexü. ³⁹ —Rü noxri ga yema duüxügü rü tama nüxü nacuèxgüéga ga tacü tá nüxü na ngupetüxü. Natürü yexguma ínanguxgu ga guma mucü ga taxüchicü ga yema duüxügüxü daicü, rü yexguma nixí ga nüxü yacuèxächitanüxü. Rü ngëxgumarüü tá ta nixí i ngëxguma wenaxârü núma chaxüxgu i choma i Tupana Nane na duüxüxü chiixü. ⁴⁰ —Rü ngëma ngunexügu rü taxre i yatügü rü wüxi i naãnewa tá nügümaã nangëxmagü. Rü wüxi tá nixí i Tupana igaxü rü ngëma to rü tá ngëma natèx. ⁴¹ —Rü taxre i ngexügü tá nügümaã ínacaegü. Rü wüxi tá nixí i Tupana igaxü rü ngëma to rü tá ngëma natèx. ⁴² —¡Rü pexuãégü! Erü tama nüxü pecuèx i tacü rü ora tá íchangu i chomax. ⁴³ —¡Rü nagu perüxĩnüë i ñaã ore! Rü ngëxguma chi wüxi i ípataarü yora nüxü cuèxgu na tacü rü oragu tá ínanguxü i ngítèxáxü rü tãu chima nape. Erü nüxna chi nadau ya napata na tama ngëxma naxücuxüçèx i ngëma ngítèxáxü na tacüçèx ngëma yangíxüçèx. ⁴⁴ —Rü ngëmacèx name nixí i pexuãégü i pemax. Erü ngëma ngunexü i tama nagu íperüxĩnüëxügu tá nixí i ngürüãchi íchanguxü i choma i Tupana Nane na duüxüxü chiixü.

Wüxi ga duüxü ga meã norü coriga ñnüxü rü to ga tama meã norü coriga ñnüxüchiga

(Lc 12.41-48)

⁴⁵ —¿Rü texé tíxü ya tümaârü coriarü duüxü ya aixcüma yanguxëexë rü tümaãëxü cuáxe? ¿Tama ëxna yíxema tíxü ya tümaârü cori tüxna ágaxe na meã nüxna tadauxüçèx rü meã oragu tanachibüexëxüçèx i norü duüxügü? ⁴⁶ Rü tataãë ya yíxema coriarü duüxë ega ngëxguma ínanguxgu i tümaârü cori rü tüxü íyanguexügu na meãma ítanaxüxü i ngëma puracü i nagu tüxü namuxü. ⁴⁷ —Rü aixcüma pemaã nüxü chixu rü ngëma tümaârü cori rü tá guxüma i norü ngëmaxügüarü dauruüxü tá tüxü nixíxëë. ⁴⁸⁻⁵⁰ —Natürü ngëxguma chi ngëma coriarü duüxü rü wüxi i yatü i chixexü yixígu, rü chi nagu naxĩnügu na tãütáma paxa ínanguxü i norü cori, rü chi inaxügüãgu na chixri namuãxü i namücügü i norü coriarü duüxügü, rü chi ngãxëxütanügu naxãxgu na namaã nachibüxüçèx rü naxaxexüçèx, rü ngürüãchi ngëma ngunexü rü ngëma ora i tama nagu ínanguxëãxügu rü tá ínangu i norü cori. ⁵¹ —Rü poraãcüxüchima tá nanapoxcu i ngëma norü duüxü, ñoma meã maxënetaxü i duüxügüxü napoxcuexürüü. Rü ngëma tá narüdoxü rü nixüxchapüta.

25

Ore ga 10 ga pacügu ixuxü

¹ Rü ñanagürü ga Ngechuchu: —Pemaã tá nüxü chixu i wüxi i ore na nawa nüxü pecuáxücèx i ñuxácü tá duüxügüarü âëxgacü na yïxü ya Tupana i ngëxguma naguxgu i naãne. Rü iyexma ga 10 ga pacü ga ngîrû daparinamaã ngîgüarü petawa ïcü na yaxümücügüãxücèx ga guma yatü ga ingîxchaücü. ² — Rü 5 ga yema pacü rü tama ixuãëgü. Rü yema naï ga 5 ga pacü rü meãma ixuãëgü. ³ —Rü yema tama uãëgücü, rü yexguma ngîrû daparina íyangegügu rü tama to ga ngîrû queruchinu ta íyangegü. ⁴ —Natürü ga yema uãëgücü rü to ga ngîrû queruchinu ta íyangegü. ⁵ —Natürü ga guma yatü ga ingîxchaücü rü tama paxa ínangu. Rü düxwa ga yema pacügü rü ipee yerü iyaxtae. ⁶ — Rü yexguma ngãxücüüwa nanguxgu, rü yema pacügü nüxü ixînúë ga wüxi ga naga ga ñaxü:

“Domama nixî ya yima yatü ya ingîxchaücü. ¡Rü íperüdagü, rü ípeyadaugü!” ñaxü. ⁷ —Rü guxcüma ga yema pacügü rü írûdagü, rü iyamexëëgü ga ngîrû daparinagü. ⁸ —Rü yexguma ga yema 5 ga pacügü ga tama uãëgücü rü ngîgürügügü ngîxü ga yema pacügü ga uãëgücü:

“¡Íraxü i perü queruchinu toxnata pexã, erü torü omügü rü nixogü!” ngîgürügügü. ⁹ —Natürü ga yema pacügü ga uãëgücü rü ngîxü ingãxügü, rü ngîgürügügü:

“Taxücürüwa pexna ta taxã, erü ngëxguma chi pexna ta taxãxgu rü tãü chima ningu i toxcèx rü pexcèx. Rü ngëmacèx narümemaë nixî i ngextá namaã íntaxegüxüwa pegüxü nawa pexî”, ngîgürügügü. ¹⁰ —Natürü yexguma ga yema 5 ga pacügü ga tama uãëgücü ngîrû queruchinuwa naxîyane, rü ínangu ga guma yatü ga ingîxchaücü. Rü ga yema pacügü ga uãëgücü rü iyachocu nawa ga guma ï ga nawa iyangîxüne. Rü ñuxüchi narüwãxta ga ïãx. ¹¹ —Rü yemawena íngugü ga yema pacügü ga tama uãëgücü, rü ngîgürügügü:

“¡Pa Corix, toxcèx yawãxna i ïãx!” ngîgürügügü. ¹² —Natürü nüma ga cori, rü ngîxü nangãxü, rü ñanagürü:

“Pemaã nüxü chixu rü aixcüma tama pexü chacuèx na texégü pixîgüxü”, ñanagürü. ¹³ Rü ñuxüchi ñanagürü ga Ngechuchu: —¡Ípexuãëgü! Erü tama nüxü pecuèx i tacü rü ngunexü rü tacü rü ora tá íchangu i choma i Tupana Nane na duüxüxü chiïxü —ñanagürü.

Ore ga dïëru gu ixuxü (Lc 19.11-27)

¹⁴ Rü ñanagürü ta ga Ngechuchu: —Rü ngëma Tupana na duüxügüarü âëxgacü na ixîxü rü ñoma wüxi ga yatü ga ixüãchichaücü ga to ga nachiuãnewa na naxüxücèxrüü nixî. Rü nüma ga guma yatü rü norü duüxügücèx naca, rü nüxna ngîxü naxã ga dïëru na nüxü ngîmaã nanguxüxücèx rü ngîmaã na ínapuracüexücèx. ¹⁵ —Rü wüxi ga yema norü duüxüna ngîxü naxã ga 5000 tachinü ga dïëru. Rü yema tona ngîxü naxã ga 2000 tachinü ga dïëru. Rü yema tona ngîxü naxã ga 1000 tachinü ga dïëru. Rü yemaãcü nanangugü na ñuxácü tá yema dïërumaã napuracüexü ga wüxichigü ga norü duüxügü rü yemaãcü wüxichigüna ngîxü naxã ga yema dïëru. Rü ñuxüchi inaxüãchi ga yema cori na to ga nachiuãnewa naxüxücèx. ¹⁶ —Rü yema norü duüxü ga 5000 tachinü ga dïëru ngîxü yaxuxü, rü ngîmaã napuracü, rü naï ga 5000 tachinü ngîmaã nayaxu. ¹⁷ —Rü yexgumarüü ta ga yema norü duüxü ga 2000 tachinü ga dïëru ngîxü yaxuxü, rü ngîmaã napuracü, rü naï ga 2000 tachinü ngîmaã nayaxu. ¹⁸ —Natürü ga yema norü duüxü ga 1000 tachinü ga dïëru ngîxü yaxuxü, rü ngîmaã ínixü. Rü ngîxü nixaixmaü, rü yexma ngîxü natèx ga yema norü

coriarü dīeru. ¹⁹—Rü nuxcūxūrama nataegu ga yema duūxūgūarü cori. Rü yexguma ínanguxgu rü inanaxūgū ga norü duūxūgūmaã na namexēēãxū ga norü dīeruchiga. ²⁰—Rü nüxīra norü corixūtawa naxū ga yema norü duūxū ga 5000 tachinü ga dīeru ngīxū yaxuxū. Rü norü corina ngīxū naxã ga yema 5000 tachinü. Rü ngīetü ngīxū inaxã ga naī ga 5000 tachinü ga ngīxū nayaxucü ngīmaã ga yema norü cori nüxna ngīxū ãcū ga dīeru. Rü ñanagürü norü corixū:
 “Dücèx Pa Corix, ñã iyixī ga yema 5000 tachinü ga dīeru ga choxna ngīxū cuxãcū. Marü ngīmaã chapuracü rü ngīmaã cuxū ngīxū chayaxu i ñã naī i 5000 tachinü”, ñanagürü. ²¹—Rü norü cori rü ñanagürü nüxū:

“Pa Chorü Duūxūx, wüxi i mexēchixū quixī, rü meãma cupuracü. Rü meã nüxna cudau ga yema noxre ga dīeru ga cuxna ngīxū chaxãcū, rü meãma ngīmaã cupuracü. Rü ngēmācèx i ñuxma rü tá rümumaēcūna cuxū chadauxēē. ¡Rü ixücu i chopatawa rü ngīxã tataãēgü!” ñanagürü. ²²—Rü yemawena ínangu ga yema to ga norü duūxū ga 2000 tachinü ga dīeru ngīxū yaxuxū. Rü ñanagürü norü corixū:

“Dücèx Pa Corix, ñã iyixī ga yema 2000 tachinü ga dīeru ga choxna ngīxū cuxãcū. Marü ngīmaã chapuracü rü ngīmaã cuxū ngīxū chayaxu i naī i 2000 tachinü. Rü ñã iyixī”, ñanagürü. ²³—Rü norü cori rü ñanagürü nüxū:

“Pa Chorü Duūxūx, wüxi i mexēchixū quixī, rü meãma cupuracü. Rü meã nüxna cudau ga yema noxre ga dīeru ga cuxna ngīxū chaxãcū, rü meãma ngīmaã cupuracü. Rü ngēmācèx i ñuxmax rü tá rümumaēcūna cuxū chadauxēē. ¡Rü ixücu i chopatawa rü ngīxã tataãēgü!” ñanagürü. ²⁴—Natürü yexguma norü corixūtawa nanguxgu ga yema norü duūxū ga 1000 tachinü ga dīeru ngīxū yaxuxū, rü ñanagürü norü corixū:

“Dücèx Pa Corix, choma nüxū chacuèx rü wüxi i yatü i aūxū quixī. Rü cunayaxu i nanetüarü o i ngextá tama ícutoexūwa, rü cunabuxarü oōx i nanetü i tama icutoxū. ²⁵—Rü yemacèx chamuū. Rü waixūmügu ngīxū chixaixmaū rü ngīxū ichatèx. Natürü ñã iyixī i ngēma curü dīeru”, ñanagürü. ²⁶ Rü yexguma ga norü cori rü nanangãxū rü ñanagürü:

“Pa Chorü Duūxūx, wüxi i chixexū rü oxū i chorü duūxū quixī. Rü cuma meãma nüxū cucuèx rü ngextá tama íchatoexūwa rü chanayaxu i nanetüarü o, rü chanabuxarü oōx i nanetü i tama ichatoxū. ²⁷—Rü yemacèx narümemaē chi nixī ga bancugu choxū ngīmaã na cunguxūxū ga chorü dīeru na ngēma choxū ngīxū yamuxēēgūxūcèx, rü ngēmaãcū mucü ngīxū na chayaxuxūcèx i ngēxguma íchanguxgu”, ñanagürü. ²⁸—Rü yexguma ga yema cori rü nanamu ga yema togü ga norü duūxūgū ga yema yexmagūxū, rü ñanagürü nüxū:

“¡Nüxna ngīxū peyaxu i ngēma dīeru, rü ngēma yatü i 10,000 i dīeru nüxū ngēxmaxūna ngīxū pexã! ²⁹—Erü yixema tüxū nangēmèxcü rü yexera tá tüxna ngīxū taxã, rü ngēmaãcū tá tüxū imuxūchi. Natürü yixema tüxū natauxcü rü woo ngēma noxre i tüxū ngēmèxcü rü tá tüxna ngīxū tayaxu. ³⁰—¡Rü yéama düxétüwa i poraãcū ínaxēānexūwa peyatá i ñã chorü duūxū i taxuwama mexū! Rü ngēma tá narüdoxü rü tá nixūxchapüta”, ñanagürü.

Naãneärü guxgu rü Cristupēxegu tá nangutaquēxegü i guxü i nachiuñanecūãx i duūxūgü na yadexechiãxūcèx i ngēma mexūgü rü na napoxcueãxūcèx i ngēma chixexūgü

³¹ Rü ñanagürü ga Ngechuchu: —Rü ngēxguma wenaxärü núma chaxūxgu i choma i Tupana Nane na duūxūxū chiixū, rü chorü orearü ngeruūgü i daxūcūãx rü tá choxū naxümücügü. Rü ãēxgacü ya tacü tá chixī rü chorü tochica i mexēchixūwa tá charüto. ³²—Rü guxü i nachiuñanecūãx i duūxūgü rü tá chopēxegu nangutaquēxegü. Rü choma rü tá chayadexechi ñoma wüxi i carneruarü dauruū i norü carnerugü rü chibugü noxrüwama mugūxūrüü.

33 –Rü ngēma choxrü ixīgüxü rü chorü tügünecüwawa tá chanangēxmagüxēē. Rü ngēma tama choxrü ixīgüxü rü chorü toxwecüwawa tá chanangēxmagüxēē.

34 –Rü ngēxguma i choma i tá ãëxgacü ya tacü na chiixü rü ñacharügü tá nüxü i ngēma chorü duüxügü:

“¡Nuã pexi i pema ya texé ya Chaunatü ya Tupana tüxü rüngüxēēgüxe, rü penayaxu i ngēma pechica i ngextá nüma ãëxgacü íyixüwa! Yerü Chaunatü rü pexcèx nanamexēē i ngēma pechica ga yexguma tauta naãne naxüxgu. 35 –Rü ngēmaãcü tá pemaã namecüma yerü yexguma chataiyagu rü pema rü choxü pechibüxēē. Rü yexguma chitawagu rü choxü pexaxexēē. Rü yexguma tama nüxü pecuèxgu na texé chiixü rü meã choxü peyaxgü ga pepatawa. 36 –Rü yexguma changexchirugu rü choxü pexüxchiru. Rü yexguma chidaawegu rü choxü perüngüxēē. Rü yexguma poxcupataüwa chayexmagu rü choxü ípeyadau”, ñacharügü tá nüxü. 37 –Rü ngēxguma i ngēma duüxügü i chadexü rü ñanagürügü tá choxü:

“Pa Corix, ¿ñuxgu ga cuxü tadauxü ga na cutaiyaxü rü cuxü tachibüxēēxü? ¿Rü ñuxgu ga cuxü tadauxü ga na quiñawaxü rü cuxü taxaxēēxü? 38 – ¿Rü ñuxgu ga tochixüwa cunguxü rü meã cuxü tayauxgüxü ga woo tama cuxü tacuèxgügu? ¿Rü ñuxgu ga cungexchiruxü rü cuxü taxüxchirugüxü? 39 –¿Rü ñuxgu ga cuxü tadaugüxü na quidaawexü rü éxna poxcupataüwa cuyexmaxü rü cuxü ítayadaugüxü?” ñanagürügü tá choxü. 40 –Rü choma na ãëxgacü ya tacü na chiixü, rü tá chanangäxü, rü ñacharügü tá:

“Aixcüma pemaã nüxü chixu rü yexguma nüxü perüngüxēēgügu i ngēma chorü duüxü i yexeraãcü ngearü ngemaxüáxü, rü choxü nixi ga perüngüxēēgüxü”, ñacharügü tá nüxü. 41 Rü ñuxüchi i choma na ãëxgacü ya tacü na chiixü, rü ñacharügü tá nüxü i ngēma tama chorü duüxügü ixīgüxü:

“¡Choxna pixigachi i pema i perü chixexücèx poxcuexe! ¡Rü ngema pexi nawa ya yima üxü ya taguma ixoxüne ya Tupana ímexēene naxcèx i ngoxo i Chataná rü norü duüxügü! 42 –Yerü yexguma chataiyagu rü pema rü tama choxü pechibüxēē. Rü yexguma chitawagu rü tama choxü pexaxēē. 43 –Rü yexguma tama nüxü pecuèxgu na texé chiixü rü tama meã choxü peyaxgü ga pepatawa. Rü yexguma changexchirugu rü tama choxü pexüxchirugü. Rü yexguma chidaawegu rü poxcupataüwa chayexmagu rü tama choxü ípeyadaugü”, ñacharügü tá nüxü. 44 –Rü ngēxguma i nümagü i tama chorü duüxügü ixīgüxü, rü ñanagürügü tá choxü:

“Pa Corix, ¿ñuxgu tochixüwa cingu rü tama meã cuxü tayauxgü yerü tama cuxü tacuèxgü? ¿Rü ñuxgu ga cuxü tadaugüxü ga na cutaiyaxü, rü éxna na quiñawaxü, rü éxna na cungexchiruxü, rü éxna quidaawexü, rü éxna poxcupataüwa na cuyexmaxü, rü tama cuxü tarüngüxēēgüxü?” ñanagürügü tá choxü. 45 –Rü choma na ãëxgacü ya tacü na chiixü, rü tá chanangäxü, rü ñacharügü tá nüxü:

“Aixcüma pemaã nüxü chixu rü yexguma tama nüxü perüngüxēēgügu ga wüxi ga duüxü ga yexeraãcü ngearü ngemaxüáxü, rü choxü rü ta tama perüngüxēēgü”, ñacharügü tá nüxü. 46 –Rü ñuxüchi i ngēma duüxügü i tama chorü duüxügü ixīgüxü rü tá poxcu i taguma gúxüwa naxi. Natürü ngēma duüxügü i aixcüma meã chauxcèx maxèxü rü tá nanayauxgü i maxü i taguma gúxü, –ñanagürü ga Ngechuchu.

26

Yudíugüarü ãëxgacügü naxcèx nadaugü na ñuxãcü Ngechuchuxü yayauxgüxü

(Mr 14.1-2; Lc 22.1-2; Cu 11.45-53)

1 Rü yexguma Ngechuchu nüxü rüchauxgu ga yema orexü na yaxuxü, rü ñanagürü norü ngúexügüxü: 2 –Pema nüxü pecuèx rü taxre i ngunexü nataxu na nangõxgüãxücèx i ngêma õna i Üpetüchigaarü petacèx naxügüxü. Rü ngêxguma tá nixĩ i choxü yayauxgüxü i chorü uwanügü na curuchawa choxü yapotagüxücèx –ñanagürü. 3 Rü yexgumaücüü ga paigüarü ãëxgacügü, rü ngúexëëruügü ga ore ga mugüwa nguxëëtaegüxü, rü Yudíugüarü ãëxgacügüerugü rü nangutaquëxegü ga napatawa ga Caipá ga paigüarü ãëxgacü ixícü. 4 Rü yéma nügümaã nanamexëëgü na Ngechuchuxü nawomüxëëgüãcüma na yayauxgüãxücèx rü na yamëxgüãxücèx. 5 Natürü nügümaã ñanagürügü: –Taxucürüwama i ñuxma petagu tayayauxgü, erü duüxügü rü tá tamaã nanuë –ñanagürügü.

*Wüxi ga nge rü Ngechuchuerugu inaba ga pumara
(Mr 14.3-9; Cu 12.1-8)*

6 Rü Ngechuchu rü Betániãwa nayexma napatawa ga Chimáü ga rüchaxü necümaã naxugüãcü. 7 Rü Ngechuchucèx yéma iyaxü ga wüxi ga ngecü ga yéma nangepü ga wüxiweü ga pumara ga tatanüxüchixü ga mexëchicü ga butiyamaã áchiüxü. Rü yexguma mechawa ínachibüyane ga Ngechuchu, rü ngĩma rü naëruugu inaba ga yema pumara. 8 Rü yexguma yemaxü nadaugügu ga Ngechuchuarü ngúexügü, rü naãëwa nanguxgü, rü inanaxügüe ga na ñagüxü. –¿Tüxcüü ngêxma inaxaiyaxü i ngêma pumara? 9 –Rü narümemaë chi nixĩ i tatanüxügu namaã itaxe, rü ñuxüchi ngêma díërumaã nüxü irüngüxëë i ngêma duüxügü i ngearü ngêmaxüãxgüxü –ñanagürügü. 10 Rü Ngechuchu nüxü naxĩnü. Rü ñuxüchi ñanagürü norü ngúexügüxü: –¿Tüxcüü ngĩxü pechixewe i ngêma nge? Erü ngêma chomaã naxüxü rü wüxi i mexü nixĩ. 11 –Ngêma ngearü ngêmaxüãxgüxü rü guxügutáma petanüwa nangëxmagü. Natürü choma rü táütáma guxügu petanüwa changëxma. 12 –Rü ngêma chomaã naxüxü i ñaã ngecü na chaxunegu nabaãxü i ngêma pumara i yixixü, rü ngêmaãcü inaxü erü paxa tá chayü rü tá choxü inatëxgü. Rü ngêmacèx nixĩ i chaxunegu nabaãxü i ngêma pumara. 13 –Rü aixcüma pemaã nüxü chixu rü guxü i naãnewa i ngextá duüxügü nüxü íixugügüxüwa i Tupanaärü ore i mexü, rü ñaã ngecü chomaã üxü rü tá ta nüxü nixugügü. Rü ngêmaãcü tá ngĩxna nacüëxáchie i duüxügü –ñanagürü ga Ngechuchu.

*Yuda rü ãëxgacügümaã nanamexëë na ñuxãcü Ngechuchuxü yayauxgüxücèx
(Mr 14.10-11; Lc 22.3-6)*

14 Rü ñuxüchi ga wüxi ga Ngechuchuarü ngúexü ga Yuda ga Icariúte rü paigüarü ãëxgacügüxütawa naxü rü namaã nayarüdexa. 15 Rü Yuda rü ñanagürü nüxü: –¿Ñuxre tá choxü penaxütanüxü i ngêxguma pexü chanatauxchaxëëgu na Ngechuchuxü piyauxgüxücèx? –ñanagürü. Rü yexguma ga nümagü ga paigüarü ãëxgacügü rü 30 tachinü ga díëruugu namaã naxuneta. 16 Rü yexgumama inanaxügü ga Yuda ga naxcèx na nadauxü ga ñuxãcü nüxü na natauxchaxëëgüãxü na Ngechuchuxü yayauxgüxücèx.

*Coriarü õnachiga
(Mr 14.12-25; Lc 22.7-23; Cu 13.21-30; 1 Co 11.23-26)*

17 Rü nawa nangu ga ngunexü ga nagu inaxügüxü ga yema peta ga pãü ga ngearü puxëëruüãxü nagu nangõxgüxü. Rü norü ngúexügü rü Ngechuchucèx naxĩ, rü ñanagürügü nüxü: –¿Ngextá tá tanamexëë i nachica i nawa nangõxgüxü i õna i Üpetüchigaarü petagu ingõxü? –ñanagürügü. 18 Rü nüma ga Ngechuchu rü ñanagürü nüxü: –¿Ngema ñãnewa pexĩ, rü yima yatü ya pemaã nüxü chaxunetacüpatawa pexĩ! ¿Rü namaã nüxü pixu rü ñapegügü:

“Torü ngúexēēruü rü ñanagürü: ‘Marü ningaicaxüchi na chayuxü rü nuã cupatawa rü chorü ngúexüğümaã chanangupetüxēēchaü i Üpetüchigaarü peta,’” ñaperügüğü tá nüxü! ¹⁹ Rü yéma naxi ga yema norü ngúexüğü. Rü yema Ngechuchu namaã nüxü ixuxürüü nanaxüğü. Rü nanamexēēgü ga yema õna ga Üpetüchigaarü petagu tá nangõxgüxü. ²⁰ Rü yexguma nachütagu rü yéma mechawa nachibü ga Ngechuchu namaã ga yema 12 ga norü ngúexüğü. ²¹ Rü yexguma ínachibüeyane, rü Ngechuchu rü ñanagürü nüxü: —Aixcüma pemaã nüxü chixu rü wüxie i petanüwa tá tixi ya bexma chauechita choxü íyaxuaxüxē —ñanagürü. ²² Rü yexguma ga nümagü ga norü ngúexüğü rü poraãcü nangechaüğü. Rü wüxichigü nüxna nicachigü, rü ñanagürüğü: —Pa Corix, ¿choma ēxna tá chiixü ya yixema cuxü íyaxuaxüxē? —ñanagürüğü. ²³ Rü nüma ga Ngechuchu nanangãxü rü ñanagürü: —Ngēma wüxi ya poratuwa namaã tá chachibüxü, rü ngēma tá nixi i chauechita choxü íyaxuaxüxü. ²⁴ —Rü choma i Tupana Nane na duüxüxü chiixü rü tá chayü ngēxgumarüü i Tupanaärü ore i ümatüxü nüxü ixuxürüü. Natürü wüxi i ngechaüxüchi nixi naxcèx i ngēma yatü i choxü íyaxuaxüxü. Rü narümemaē chi nixi ga noxtacüma tãü chima na nabuxü —ñanagürü. ²⁵ Rü nadexaãchi ga Yuda ga naēchita íyaxuaxüxü, rü ñanagürü: —Pa Ngúexēēruüx, ¿tãütáma choma nixi? —ñanagürü. Rü Ngechuchu nanangãxü rü ñanagürü: —Ngēmáãcü cuma nixi —ñanagürü. ²⁶ Rü yexguma ínachibüeyane rü Ngechuchu nanayaxu ga wüxi ga pãü. Rü Tupanana moxē naxã, rü inanabücu, rü norü ngúexüğüxü nayanu. Rü ñanagürü: —Ñãã pãü rü chaxunechiga nixi. Rü ¡penangõ! —ñanagürü. ²⁷ Rü yemawena rü nanayaxu ga wüxi ga pochiyu ga binumaã ããcuxü. Rü yexgumarüü ta Tupanana moxē naxcèx naxãxira, rü ñuxüchi norü ngúexüğüna nanaxã, rü ñanagürü nüxü: —¡Rü guxãma i pema rü peyaxèüx ya daa binu! ²⁸ —Erü daa binu rü nachiga nixi ya chaugü ya muxüma i duüxügücèx tá ibacü na ngēmaãcü Tupana nüxü nüxü nangechaüxüçèx i norü pecadugü. Rü yimawa Tupana nanangoxēē na aixcüma yixü i norü uneta. ²⁹ —Rü pemaã nüxü chixu rü tagutáma wena binu chayaxaxü ñuxmatáta Chaunatü ya Tupana ãëxgacü íixüxüwa ngexwacaxücü ya binu pemaã chayaxèüx —ñanagürü.

Ngechuchu nüxü nixu rü Pedru rü taxütáma nügü nixu na norü ngúexü yixü
(Mr 14.26-31; Lc 22.31-34; Cu 13.36-38)

³⁰ Rü ñuxüchi nawiyaegü ga wüxi ga Tupanaärü wiyaegu. Rü yemawena rü guma Mèxpüne ga Oríbunecügu ãeganewa naxi. ³¹ Rü yexguma ga Ngechuchu rü ñanagürü nüxü ga norü ngúexüğü: —Guxãma i pema rü tá choxü ípetèxgü i ñoma i chütaxügu. Erü Tupanaärü ore i ümatüxüwa rü ñanagürü: “Tá chayamèx ya carneruarü dauruü, rü tá nanaxüanemare i carnerugü”, ñanagürü i ngēma ore. ³² —Natürü ngēxguma marü yuwa ícharüdaxguwena, rü tá chaxira pexüpa Gariréaanewa chaxü —ñanagürü. ³³ Rü yexguma ga Pedru rü nanangãxü rü ñanagürü: —Rü woo guxüma i togü cuxü ítèxgu, natürü i chomax rü tãütáma cuxü íchatèx —ñanagürü. ³⁴ Rü Ngechuchu ñanagürü nüxü: —Aixcüma cumaã nüxü chixu rü ñomatama i chütaxügu rü naxüpa na otá icaxü, rü tomaëxpüxcüna tá cugü iquicux na chorü duüxü quiixü. ³⁵ Rü Pedru nanangãxü rü ñanagürü: —Rü woo wüxigu cumaã chayuxgu rü tãütáma chaugü ichicux na curü duüxü chiixü —ñanagürü. Rü guxüma ga togü ga norü ngúexüğü rü ta yema ñanagürüğü.

Ngechuchu rü Yechemaníwa nayayumüxē
(Mr 14.32-42; Lc 22.39-46)

³⁶ Rü Ngechuchu rü norü ngúexüğümaã nawa nangugü ga wüxi ga nachica ga Yechemanígu ãegaxü. Rü Ngechuchu rü ñanagürü nüxü: —¡Nuã perütogü!

Rü paxa yoxni yéa chayayumüxê —ñanagürü. ³⁷ Rü Ngechuchu nügüwe nana-gagü ga Pedru rü Zebedéu nanegü ga Chaütiágu rü Cuáü. Rü Ngechuchucèx inaxügü ga na poraãcü nangechaüxü rü naxixãchiãëxü. ³⁸ Rü yexguma ga Ngechuchu rü ñanagürü nüxü: —Poraãcü changechaü rü nagu charüxnü rü ngëmamaã tá chayü. ¡Rü nuxa perücho i pemax, rü chauxrüü ipedaue! —ñanagürü. ³⁹ Rü yexguma ga Ngechuchu rü yéaxüra naxü. Rü waixümüãnegu nanangücuchi. Rü nayumüxê rü ñanagürü: —Pa Chaunatüx, ngëxguma cuma cunaxwèxegu, ¡rü nüxna choxü ínanguxuchixëë i ñaã ngúxü i tá choxü üpetüxü! Natürü chanaxwèxe i cuxrütama ngúchaü cuxü rü tama i choxrü —ñanagürü. ⁴⁰ Rü yemawena ga Ngechuchu rü nataegu ga yema norü ngúexügü íyexmagüxüwa. Rü nüxü inayangau ga na ínapeexü. Rü ñanagürü Pedruxü: —Pa Pedrux, ¿taxucürüwama ëxna namaã peporae na chomaã ipedauexü, rü bai i wüxi i ora? ⁴¹ —¡Rü pexuãëgü rü Tupanana naxcèx peça na pexü nangüxëëxücèx na tama choxü ípetáxücèx ega ngëxguma tacü rü guxchaxü pexü üpetügu! Erü aixcüma peãëwa rü ípememare, natürü pexene nixí ituraxü —ñanagürü. ⁴² Rü yexguma rü wenaxärü noxri ínayumüxëxücèx nataegu ga Ngechuchu. Rü wenaxärü nayumüxê, rü ñanagürü: —Pa Chaunatüx, ngëxguma tama cunaxwèxegu na nawa choxü ícunguxuchixëëxü i ñaã ngúxü i tá chingexü, rü marü name i ngëma cuma cunaxwèxexüãcüma chomaã cunaxü —ñanagürü. ⁴³ Rü ñuxüchi wenaxärü norü ngúexügü íyexmagüxüwa naxü. Rü nüxü inayangau ga na ínapeexü, yerü poraãcü nayaxtaexüchi. ⁴⁴ Rü yéma nüxna nixü, rü wenaxärü nayayumüxê. Rü noxriãcüutama nayumüxê. ⁴⁵ Rü yemawena rü norü ngúexügü íyexmagüxüwa naxü. Rü ñanagürü nüxü: —¡Ñuxma waxi pepe rü iperüngüë! Erü marü nawa nangu i ora na chorü uwanü choxü iyauxgüxü rü pecaduãxgüxüna choxü namugüxü. ⁴⁶ ¡Ipechigü rü ngixã ítitixí! Erü marü ñomatáma nixí i ngëma choxü íyaxuaxüxü —ñanagürü.

Ngechuchuxü niyauxgü

(Mr 14.43-50; Lc 22.47-53; Cu 18.2-11)

⁴⁷ Rü yexguma íyadexayane ga Ngechuchu, rü ínangu ga Yuda ga norü ngúexüchirëx ixixü. Rü nawe narüxí ga muxüma ga duüxügü ga taramaã rü naímaã ixãxnexü. Rü yema nixí ga duüxügü ga paigüarü ãëxgacügü rü Yudíugarü ãëxgacügüerugü yéma mugüxü. ⁴⁸ Rü ga Yuda ga ínaxuaxüxü rü marü yema duüxügümaã nanamexëë, rü ñanagürü: —Ngëma nüxü chachúxuxü tá nixí i Ngechuchu. Rü ngëma tá nixí i piyauxgüxü —ñanagürü: ⁴⁹ Rü yexguma Ngechuchucèx nixü, rü ñanagürü nüxü: —Nuxmaë Pa Ngúexëëruüx —ñanagürü. Rü ñuxüchi nüxü nachúxu. ⁵⁰ Rü Ngechuchu nanangãxü rü ñanagürü: —Pa Chomücüx, ¿tacüwa nuã cuxü? —ñanagürü. Rü yexgumatama Ngechuchuxü niyauxgü ga yema duüxügü ga Yudawe rüxixü. ⁵¹ Rü wüxi ga Ngechuchumücü nanawëxechi ga norü tara, rü paigüarü ãëxgacüarü duüxüxü ínadaechinü. ⁵² Rü yexguma ga Ngechuchu rü ñanagürü: —¡Naxchiügu yaxücuchi i curü tara! Erü guxãma ya yíxema taramaã nuëxê, rü taragu tátama tayue. ⁵³ —¿Tama ëxna nüxü cucuèx rü ngëxguma chi choma chanaxwèxegu, rü Chaunatüna chi naxcèx chaca na choxü núma namugüãxücèx i muxüma i norü orearü ngeruügü i daxücüãx na choxü yanangüxëëgüxücèx? ⁵⁴ —Natürü ngëxguma chi ngëma chaxüxgu, rü ¿ñuxãcü chi ningu i Tupanaärü ore i ümatüxü i nüxü ixuxü na choma rü tá chayuxü? ⁵⁵ Rü yexguma ga Ngechuchu rü ñanagürü nüxü ga yema duüxügü: —¿Tüxcüü taragü rü naíxmenëxãgümaã chauxcèx nuã pexí na choxü peyarüyauxgüxücèx ñoma wüxi i ngítëxáxü chiixürüü? Rü guxü ga ngunexügu rü tupauca ga taxünewa changüxëëtae natürü taguma yexma choxü piyauxgü. ⁵⁶ —Natürü guxüma i ñaã ñuxma ngupetüxü, rü ngëmaãcü nangupetü na yanguxücèx

i Tupanaärü ore ga nuxcümaügüxü ga norü orearü uruügü ümatügüxü — ñanagürü. Rü yexguma ga guxüma ga norü ngúexügü rü nüxna nibuxmü. Rü nüxícatama yéma nanatëxgü ga Ngechuchu.

Äëxgacügü ga taxügüpëxewa Ngechuchuxü nagagü

(Mr 14.53-65; Lc 22.54-55, 63-71; Cu 18.12-14, 19-24)

⁵⁷ Rü Caipá ga paigüarü äëxgacüxütawa Ngechuchuxü nagagü ga yema duüxügü ga yayauxgüxü. Rü yexma nixí ga nangutaquëxëgüxü ga ngúexëëruügü ga ore ga mugüwa nguxëëtaëgüxü rü Yudiügarü äëxgacügüerugü. ⁵⁸ Natürü ga Pedru rü yaxügu nawe nixächigü ñuxmata paigüarü äëxgacü ga Caipáxütawa nangu. Rü purichíagü ga tupaucaarü dauruügümaã yéma ñäxtüwa narüto, yerü nüxü nadauxchañ ga tacü tá Ngechuchumaã na naxüexü. ⁵⁹ Rü ga paigüarü äëxgacügü rü guxüma ga Yudiügarü äëxgacügüerugü rü naxcëx nadaugü ga wüxi ga ore ga doramare ixixü na yemamaã Ngechuchuxü ínaxuaxügüxüçëx na yamëxgüãxüçëx. ⁶⁰⁻⁶¹ Natürü woo muxüma ga duüxügü doraxümare nachigaxü yéma yarüxugüe, natürü taxuxüma ga chixexü inayangaugü ga naxcëx tá yamëxgüãxü. Rü düxwa yéma naxí ga taxre ga yatügü ga doraxümare yéma yarüxugüxü. Rü ñanagürügü: —Toma nüxü taxínüë i ñaã yatü rü ñanagürü:

“Tá nagu chapogü ya daa tupauca ya taxüne ya Tupanaärü, rü tomaëxpüx i ngunëxügu tá wenaxärü íchanadaxëë”, ñanagürügü. ⁶² Rü yexguma ga paigüarü äëxgacü ga Caipá rü inachi, rü ñanagürü Ngechuchuxü: —¿Rü tacümaã cunangãxü i ñuxmax? ¿Rü ñuxü ñaxü yíixü i ngëma cuchiga i nüxü yaxugügüxü? —ñanagürü. ⁶³ Natürü ga Ngechuchu rü nangeëxmare. Rü yemacëx ga paigüarü äëxgacü ga Caipá rü ñanagürü nüxü: —Tupana ya Maxücüëgagu chanaxwëxe i aixcüma tomaã nüxü quixu na texé quiixü. ¿Rü cuma ëxna i Cristu ya Tupana Nane quiixü, rü ëxna tama? —ñanagürü. ⁶⁴ Rü Ngechuchu nanangãxü rü ñanagürü: —Ngü, rü ngëma nüxü quixuxü chixí. Rü pemaã nüxü chixu rü tá choxü pedaügü i ngëxguma Chaunatü ya Poracüxütawa charütoçgu rü ngëxguma caixanëxügu wenaxärü núma chaxüxgu —ñanagürü. ⁶⁵ Rü yexguma ga paigüarü äëxgacü rü norü numaã nügüchirugu nagaügü. Rü ñanagürü: —Rü ñaã yatü rü tacü Tupanamaã nixugü. Rü taxucëxma marü tanaxwëxe i ñuxma i to i ore na napoxcuxüçëx i ñaã yatü. Rü pematama marü nüxü pëxínüë na ñuxäcü chixexümaã na yadëxaxü. ⁶⁶ —¿Ñuxü ñapëgüxü i pemax? —ñanagürü. Rü nümagü ga togü ga äëxgacügü rü nanangãxügü rü ñanagürügü: —Ngëmaãcü chixexü naxü. Rü name nixí i noxtacüma nayu —ñanagürügü. ⁶⁷ Rü yexguma rü Ngechuchuchiwewa naçuaixgüe. Rü nüxna nanäçuaixcagü. Rü togü rü nanapëgüchiewëgü. ⁶⁸ Rü ñanagürügü: —Pa Cristux, jnüxü nacüex na texé cuxü pëgüchiewëgüxü rü cuxna naçuaixcagüxü! —ñanagürügü.

Pedru rü tama nügü nixu na Ngechuchuxü nacüáxü

(Mr 14.66-72; Lc 22.56-62; Cu 18.15-18, 25-27)

⁶⁹ Rü yoxni ga Pedru rü äëxgacüpataëxtüwa narüto. Rü wüxi ga pacü ga äëxgacüarü duüxü ixícü, rü Pedrucëx iyaxü. Rü ngígürügü nüxü: —Cuma rü ta namücü quixí i ngëma Ngechuchu i Gariréaanecüãx —ngígürügü. ⁷⁰ Natürü ga Pedru rü guxü ga yema duüxügüpëxewa rü tama nügü nixu na Ngechuchuarü duüxü yíixü, rü ñanagürü: —Choma rü tama nüxü chacuëx i tacüchiga nixí i ngëma nüxü quixuxü —ñanagürü. ⁷¹ Rü yexguma marü yema ípataëxtüarü ñäxwa ínaxüüxgu ga Pedru, rü naí ga pacü nüxü idau. Rü ngígürügü namaã ga yema duüxügü ga yéma yëxmagüxü: —Ñaã yatü rü Ngechuchu ya Nacharëtucüãxmücü nixí —ngígürügü. ⁷² Natürü ga Pedru rü

wenaxârü tama nügü nixu na Ngechuchuarü duñxü yïixü. Rü ñanagürü: — Choma rü tama nüxü chacuèx i ngêma yatü. Rü Tupana choxü poxcux ega tama aixcüma yixïgu i chorü ore —ñanagürü. ⁷³ Rü yixcamaxûra rü yema duñxügü ga yéma yexmagüxü rü Pedrucèx naxï, rü ñanagürügü nüxü: — Aixcüma nixï i cuma rü ta rü ngêma Ngechuchutanüxü quiixü, erü wüxi i Gariréaanecüñax idexaxürüü quidexa —ñanagürügü. ⁷⁴ Rü nüma ga Pedru rü poraäcü nügü nixã, rü ñanagürü nüxü: —Rü aixcüma tama nüxü chacuèx i ngêma yatü. Rü ngêxguma doraxü chixuxgu rü Tupana choxü poxcux — ñanagürü. Rü yexgumatama nica ga otá. ⁷⁵ Rü nüma ga Pedru rü yexguma nüxna nacuèxãchi ga yema ore ga Ngechuchu namaã nüxü ixuxü ga ñaxü:

“Rü naxüpa na otá içaxü, rü cuma rü tomaëxpüxcüna cugü tá quixã na chorü duñxü quiixü”, ñaxü. Rü yéma ínaxüxü ga Pedru rü poraäcüxüchima naxaxu.

27

Yudíugüarü ãëxgacügü rü Piratuxütawa nanagagü ga Ngechuchu (Mr 15.1; Lc 23.1-2; Cu 18.28-32)

¹ Rü yexguma yangunegu rü guxüma ga paigüarü ãëxgacügü rü Yudíugüarü ãëxgacügüerugü, rü nügümaã nanamexëëgü na ñuxäcü Ngechuchuxü yamèxgüxü. ² Rü nayanëixgüchacüügü rü yemaäcü ãëxgacü ga Piratuxütawa nanagagü. Piratu nixï ga Dumacüñax ga ãëxgacü ga Yudeáanemaã icuácü.

Nayu ga Yuda

³ Rü nüma ga Yuda ga Ngechuchuxü íyaxuaxüxü rü nüxü nadau ga Ngechuchuxü na napoxcuexü. Rü poraäcü nagu narüxïnü ga yema chixexü ga nümatama naxüxü. Rü yéma naxü naxütawa ga yema paigüarü ãëxgacügü rü yema Yudíugüarü ãëxgacügüerugü. Rü ngïxü nayataeguxëë ga yema 30 tachinü ga dïëru ga nüxna ngïxü naxãgücü. ⁴ Rü ñanagürü nüxü: —Choma rü marü chixexü chaxü, erü naëchita íchayaxuaxü i wüxi i yatü i taxuñma i chixexü üxü, rü ñuxma rü tá ngëmagagu nayu —ñanagürü. Natürü nümagü ga ãëxgacügü rü nanangãxüügü, rü ñanagürügü: —Toma rü tama nüxü tacuáxchañ i ngêma. Cugagutama nixï, rü cuma i nüxü cucuáxü na ñuxäcü cugümaã cunamexëëxü i ngêma —ñanagürügü. ⁵ Rü yexguma ga Yuda rü yexma tupauca ga taxünechiãgu ngïxü nawotanü ga yema dïëru. Rü ñuxüchi ínixü rü nügü nayawëxnaxã. ⁶ Rü ga paigüarü ãëxgacügü rü ngïxü nade ga yema dïëru. Rü ñanagürügü: —Taxucürüwa tupauca ya taxüneärü dïëruchiügu ngïxü tanu i ñaã dïëru, erü ngëmamaã tanaxütanü i ngêma yatü i tá yuxü — ñanagürügü. ⁷ Rü ñuxüchi nügümaã nanamexëëgü na yema dïërumaã naxcèx nataxegüxüçèx ga wüxi ga naãne ga waixümmü ga üwechixü nawa nayauxgüxü. Rü yema naãnecèx nataxegü na nüxü nayexmaxüçèx ga nachica ga ngexta na natèxgüãxüçèx ga yema duñxügü ga togü ga nachiüñanecüñax ixígüxü. ⁸ Rü ngëmacèx i ñuxma rü ta i ngêma naãne rü Nagüchitaügu naxãega. ⁹ Rü yemaäcü ningu ga Tupanaärü ore ga nuxcümaücü ga norü orearü uruñ ga Yeremíã ümatüxü ga ñaxü:

“Rü nümagü ngïxü nade ga yema 30 tachinü ga dïëru ga Cristutanü Yudíugü ngïxü ixãgücü. ¹⁰ Rü yema dïërumaã naxcèx nataxegü ga wüxi ga naãne ga waixümmü ga üwechixü nawa nayauxgüxü, yema Cori ga Tupana chomaã nüxü ixuxürüü”, ñaxü.

Piratupëxewa nayexma ga Ngechuchu (Mr 15.2-5; Lc 23.3-5; Cu 18.33-38)

11 Rū ãëxgacü ga Piratuxütawa Ngechuchuxü nagagü. Rū nüma ga Piratu rü Ngechuchuna naca, rü ñanagürü: —¿Cuma quiixü i Yudíugüarü ãëxgacü ya tacü? —ñanagürü. Rū Ngechuchu nanangãxü, rü ñanagürü: —Ngü, rü ngëma nüxü quixuxü chixi i chomax —ñanagürü. 12 Rū Ngechuchuxü ínaxuaxügü ga paigüarü ãëxgacügü rü Yudíugüarü ãëxgacügüerugü. Natürü ga Ngechuchu rü taxuxümaãma nanangãxü. 13 Rū yexguma ga Piratu rü ñanagürü: —¿Tama ëxna nüxü cuxinü i ngëma ore i namaã cuxü ínaxuaxügüxü? —ñanagürü. 14 Natürü ga Ngechuchu rü taxuxümaãma nanangãxü. Rū yemacëx poraãcü nabëixãchiãë ga ãëxgacü ga Piratu.

*Piratu rü Ngechuchumaã nanaxuegu na nayuxücëx
(Mr 15.6-20; Lc 23.13-25; Cu 18.38-19.16)*

15 Rū guxüguma ga yema Üpetüchigaarü petagu, rü Piratu ínananguxuchixëëxü ga wüxi ga poxcuxü ga duüxügü naxcëx ícagüxü, yerü yema nixi ga nacüma. 16 Rū yéma nayexma ga wüxi ga poxcuxü ga guxü ga duüxügü meã nüxü cuáxü. Rū Barabá nixi ga naega. 17 Rū yexguma yéma nangutaquëxegüga ga duüxügü, rü Piratu nüxna naca, rü ñanagürü: —¿Rü ngexürüxüxü i penaxwæxü na íchananguxuchixëëxü? ¿Penaxwëxëxü na Barabáxü íchananguxuchixëëxü rü ëxna Ngechuchu i Cristumaã naxugüxüxü íchananguxuchixëëxü? —ñanagürü. 18 Rū yema ñanagürü ga Piratu yerü nüxü nacüx na Ngechuchuchi naxaieixü ga Yudíugüarü ãëxgacügü, rü yemacëx nixi ga naxütawa nagagüãxü. 19 Rū yexguma norü tochicawa natoxgu ga Piratu, rü naxmëx yéma imuga, rü ngígürügü: —Tama name i cunapoxcu i ngëma yatü i taxuüma i chixexü üxü. Yerü nagagu íne chütacü rü poraãcü chachixenegü —ngígürügü. 20 Natürü yema paigüarü ãëxgacügü rü Yudíugüarü ãëxgacügüerugü, rü duüxügüxü naxucuxëgü na naxcëx ínacagüxücëx na Barabáxü ínanguxuchixëëxücëx rü Ngechuchuxü na nayuxëëgüxücëx. 21 Rū ãëxgacü ga Piratu rü wenaxârü duüxügüna naca, rü ñanagürü: —¿Ngëxürüxüxü i ngëma taxrewa i pema penaxwëxëxü na íchananguxuchixëëxü? —ñanagürü. Rū nümagü ga duüxügü nanangãxügü, rü ñanagürügü: —Tanaxwëxe i Barabáxü ícunguxuchixëë —ñanagürügü. 22 Rū yexguma ga ãëxgacü ga Piratu rü nüxna naca, rü ñanagürü: —¿Tacü tá chaxüxü namaã i ngëma Ngechuchu i Cristugu äegaxü? —ñanagürü. Rū guxüma ga duüxügü rü nanangãxügü, rü ñanagürügü: —¿Curuchawa yapota! —ñanagürügü. 23 Rū yexguma ga Piratu rü ñanagürü nüxü: —¿Natürü tacü rü chixexü naxü? —ñanagürü. Natürü ga nümagü ga duüxügü rü wenaxârü tagaãcü ñanagürügü: —¿Curuchawa yapota! —ñanagürügü. 24 Rū yexguma Piratu nüxü dëuxgu ga marü taxucürüwama Ngechuchuxü na ínanguxuchixëëgaxü, yerü ga duüxügü rü marü nanaxixãchiãëgüchaü, rü yemacëx wüxi ga norü duüxüxü namu ga dexá naxütawa na tanangëxücëx. Rū nügü nayauxmëx ga Piratu napëxewa ga guxüma ga yema duüxügü. Rū ñanagürü: —Tama chaugagu tá nixi i na nayuxü i ñaã yatü i taxuüma i chixexü üxü, rü pegagu tátama nixi —ñanagürü. 25 Rū guxüma ga yema duüxügü nanangãxügü, rü ñanagürügü: —Togagu rü toxocügügagu tá nixi i nayuxü —ñanagürügü. 26 Rū yexguma ga Piratu rü Barabáxü ínanguxuchixëë. Rū ñuxüchi norü churaragüxü namu na Ngechuchuxü naçuaixgüxücëx, rü yemawena curuchawa na yanapotagüãxücëx. 27 Rū ñuxüchi ga yema churaragü rü Piratupataarü aixepewa Ngechuchuxü nagagü. Rū yexma Ngechuchuxütagu nanangutaquëxëxë ga guxüma ga churaragü. 28 Rū ñuxüchi Ngechuchuxü ínacuxuchigü, rü wüxi ga máxü ga naxchiru ga dauxügu nayacuxëëgü. 29 Rū naëruwa nayangëxcuchigü ga wüxi ga boxü ga chuchuxüwa naxügüxü. Rū wüxi ga naixmenëxãxácüxü

nüxü nayayauxächixëë ga norü tügünemëxëwa. Rü ñuxüchi napëxegu nacaxäpüxügü, rü nüxü nacugüe, rü ñanagürügü: —¡Namaüx ya Yudíugüarü Æëxgacü ya Tacüx! —ñanagürügü. ³⁰ Rü nüxna naçuaixgüe. Rü nüxna nanayauxgü ga guma naixmenëxäxäcü, rü naëruwa namaã nanaçuaixcagü. ³¹ Rü yexguma nüxü nacugüeguwena rü ínanacüxuchigü ga yema naxchiru ga daucharaxü. Rü wenaxärü naxchirugutama nayacüxëëgü. Rü ñuxüchi nayagagü na curuchawa yanapotagüãxüçëx.

Ngechuchuxü curuchawa nipotagü
(Mr 15.21-32; Lc 23.26-43; Cu 19.17-27)

³² Rü yexguma yéma inaxíächigu, rü nüxü nadaugü ga wüxi ga yatü ga Chirénecüãx ga Chimáügu äegacü. Rü guma yatüxü ngixü iningexëëgü ga Ngechucharü curucha. ³³ Rü nawa nangugü ga wüxi ga nachica ga Górgutagu äegaxü. Rü ngëma naëga rü Duüxëërchinëxã ñaxüchiga nixí. ³⁴ Rü nüxna nanaxägü ga binu ga ngüxüärü naächixëëruümaã äëxüçü na yaxaxäxüçëx. Rü Ngechuchu nüxü naxaxneta, natürü tama nayaxaxü. ³⁵ Rü yexguma marü curuchawa yapotagüãxguwena rü ga churaragü rü nanade ga Ngechuchuchiru. Rü ñuxüchi wüxi ga dïëru ngixü nañanagügü na yemawa nüxü nacüëxgüxüçëx na tacü tá nayaxuxü ga wüxichigü. ³⁶ Rü ñuxüchi yéma narütogü ga churaragü na Ngechuchuna yéma nadaugüxüçëx. ³⁷ Rü norü curuchatapëxewa nayapocuchi ga wüxi ga mürapewa ga äegatachinüxü ga nüxü ixuxü ga tacüçëx Ngechuchuxü curuchawa na yapotagüxü. Rü ñanagürü: “Ñã nixí i Ngechuchu i Yudíugüarü Æëxgacü ya Tacü”, ñanagürü. ³⁸ Rü yexgumarüü ta curuchawa nayapotagü ga taxre ga máëtagüxü. Rü wüxi rü Ngechucharü tügünecüwawa naxü, rü to ga norü toxwecüwawa. ³⁹⁻⁴⁰ Rü yema duüxügü ga yéma chopetüxü, rü Ngechuchumaã naguxchigagü, rü nanexãërugüäcüma ñanagürügü: —Düçëx, cuma cunangutaüxëëga ya tupauca ya taxüne, rü tomaëxpüx i ngunexügu wenaxärü ícunadaxëëga. ¡Cügütama namaxëë i ñuxmax! Rü ngëxguma chi aixcüma Tupana Nane quixígu, rü ¡rüxí i curuchawa! —ñanagürügü. ⁴¹ Rü yexgumarüü ta Ngechuchuxü nacugüecüraxü ga paigüarü äëxgacügü, rü ngüxëëruügü ga ore ga mugüwa ngüxëëtaegüxü, rü Parichéugü, rü Yudíugüarü äëxgacügüerugü. Rü nügümaã ñanagürügü: ⁴² —Rü nüma rü togüxü namaxëxëë natürü i ñuxma rü tama nüxü nacüëx na nügütama namaxëëxü. Rü ngëxguma chi aixcüma Yudíugüarü äëxgacü yixígu, ¡rü ñuxma rü ínaxíx i curuchawa na nüxü yaxögüxüçëx! ⁴³ —Rü nüma nagu naxínügu rü Tupana tá nüxü narüngüxëë. Ëcü, ñuxma rü Tupana nüxü rüngüxëëx ega aixcüma nüxü nangüxëëchaügu. ¿Tama ëxna nümatama tamaã nüxü yaxuxü na Tupana Nane yíxü? —ñanagürügü. ⁴⁴ Rü woo ga yema máëtagüxü ga naxrüü curuchawa ipotagüxü, rü namaã naguxchigagü.

Nayu ga Ngechuchu
(Mr 15.33-41; Lc 23.44-49; Cu 19.28-30)

⁴⁵ Rü yexguma rü guxü ga nañnewa naxëäne. Rü tocuchigu inaxügü ga yema ñuxmata tomaëxpüxarü orawa nangu ga yáuanecü. ⁴⁶ Rü yema tomaëxpüxarü oragu nixí ga Ngechuchu ga tagaäcü aita naxüxü, rü ñaxü: —Erí, Erí, ¿damá chabátani? —ñanagürü. Rü ngëma rü ñaxüchiga nixí:

“Pa Chorü Tupana, Pa Chorü Tupanax, ¿tüxcüü choxna quixügachixü?” ñaxüchiga nixí. ⁴⁷ Rü nümaxü ga duüxügü ga yéma yexmagüxü rü nüxü naxínüë, rü ñanagürügü: —Ñã yatü rü nuxcümaüçü ga Tupanaärü orearü uruü ga Eríacëx naca —ñanagürügü. ⁴⁸ Rü yexgumatama rü wüxi ga yema duüxügü ga yéma yexmagüxü rü inañaächi rü Ngechuchuxütawa nanange

ga wüxi ga tüaxmü ga binu ga marü ngüchièxüchicümaã yawaixëëxü. Rü wüxi ga dexnewa nayanèix. Rü ñuxüchi Ngechuchuèxgu nanawëx na nüxü natuxuxücèx. ⁴⁹ Natürü ga yema togü ga duüxügü ga yéma yexmagüxü rü ñanagürügü: —Yixrüma. Rü ngixã itarüdaunü ngoxita Eria nuã ü na nüxü yanangüxëëxücèx —ñanagürügü. ⁵⁰ Rü wenaxârü tagaãcü aita naxü ga Ngechuchu, rü ñuxüchi nayu. ⁵¹ Rü yexgumatama ga tupauca ga taxüneârü tüyemachiãxü rü taxregu narügaute. Rü daxüwa inanaxügü ga na nagautexü rü ñuxmata ñaxtüwa nangu. Rü naxiãxãchiane, rü narüngüxtegü ga nutagü ga itacü. ⁵² Rü yuetamaügü rü ningenagü. Rü wena namaxë ga muxüma ga duüxügü ga yuechiréxü ga Tupanaãxü yaxögüxü. ⁵³ Rü yexguma Ngechuchu wena maüxguwena, rü naxmaüwa ínaxoxü ga yema duüxügü ga wena maxëxü. Rü Yerucharéüwa naxi. Rü muxüma ga duüxügü nüxü nadaugü. ⁵⁴ Rü yema churaragüarü äëxgacü rü norü churaragü ga Ngechuchuna ídaugüxü, rü nüxü nadaugü ga na naxiãxãchianexü rü guxüma ga yema ngupetüxü. Rü yexguma rü poraãcü namuüë, rü ñanagürügü: —Aixcüma nixi ya daa yatü i Tupana Nane na yiüxü —ñanagürügü. ⁵⁵ Rü iyexmagü ga mucüma ga ngecügü ga yéma yaxüwa nüxü rüdaunücü. Rü yema ngecügü iyixi ga Ngechuchuxü íxümücügücü rü nüxü rüngüxëëgücü ga yexguma Gariréaanewa ne naxüxgu. ⁵⁶ Rü yema ngecügütanüwa iyexma ga María ga Magadácüãx, rü María ga Chaütiágu rü Yúche naë, rü Zebedéu namèx ga Chaütiágu rü Cuáü naë.

*Ngechuchu rü naxmaügu nayaxücuchigü
(Mr 15.42-47; Lc 23.50-56; Cu 19.38-42)*

⁵⁷ Rü yexguma marü nachütachaügu, rü yéma nangu ga wüxi ga yatü ga Arimatéacüãx ga taarü díeruãcü ga Yúchegu äegacü. Rü nüma rü ta Ngechuchuxü nayaxö. ⁵⁸ Rü nüma rü Piratuna nayaca rü ngoxita name na nayauxãxü ga Ngechuchuxüne ga curuchawa. Rü Piratu norü churaragüxü namu na nüxna naxägüãxücèx ga Ngechuchuxüne. ⁵⁹ Rü Yúche nanayaxu ga Ngechuchuxüne ga curuchawa. Rü wüxi ga naxchápenüü ga ngëmataxümaã nananuque. ⁶⁰ Rü yema naxmaü ga yexwacaxüxü ga Yúche nügücëxtama duüxügüxü yacaxmaxëëxü ga nuta ga tacüarü mëxpüxüwa yexmaxügu nayaxücuchi ga Ngechuchuxüne. Rü ñuxüchi nanangüxtaü namaã ga wüxi ga nuta ga taxüchicü. Rü yemawena rü ínixü. ⁶¹ Rü yéma Ngechuchumaüârü toxmëxtawa irütogü ga María ga Magadácüãx rü naí ga María.

Purichíagü nüxna nadaugü ga yema naxmaü ga Ngechuchuxü nagu yaxücuchigüxü

⁶² Rü moxüãcü ga ngüxchigaarü ngunexügu rü paigüarü äëxgacügü rü Parichéugü rü yéma Piratuxütawa naxi. ⁶³ Rü ñanagürügü nüxü: —Pa Corix, nüxna tacuèxãchie ga yema yatü ga Ngechuchu ga idoratèxáxü rü yexguma namaüxgu rü ñanagürü tomaã:

“Ngëxguma chayuxgu rü tomaëxpüx i ngunexüguwena rü wena táxarü ícharüda”, ñanagürü tomaã. ⁶⁴ —Rü ngëmacèx tanaxwèxe i churaragü ngëma cumugü na nüxna yadaugüxücèx i ngëma naxmaü ñuxmatáta tomaëxpüx i ngunexüwa nangu na tama chütacü ngëma naxiãxücèx i norü ngüexügü na yayauxgüãxücèx i naxüne rü ñuxüchi duüxügümaã nüxü na yaxugüxücèx na marü wena namaxüxü. Erü ngëxguma chi ngëmaãcü naxüpetügu, rü noxriarü yexera tá nixi na duüxügüxü nawomüxëëxü —ñanagürügü. ⁶⁵ Rü Piratu ñanagürü nüxü: —Ngëãgü nixi i churaragü i pexcèx. ¡Ëcü ngëma namaã pexi na meãma pema penaxwèxexüãcüma nüxna pedaugüxücèx i naxmaü! —ñanagürü. ⁶⁶ Rü yema churaragümaã yéma naxi, rü meãma

nayataixēēgü ga guma nuta ga Ngechuchumaxü namaã rüngüxtaücü. Rü nanaxüarü cuèxruüãxgü na taxúema naēchita ínaxügachigüxüçèx ga guma nuta. Rü ñuxüchi yexma nanamugü ga churaragü na nüxna nadaugüxüçèx.

28

Yuwa ínarüda ga Ngechuchu

(Mr 16.1-8; Lc 24.1-12; Cu 20.1-10)

¹ Rü sabaduarü ngunexüguwena ga yüxüarü pèxmama, rü yéma naxmaüwa íyadaugü ga María ga Magadácüãx rü naí ga María. ² Rü ngürüãchi poraãcü naxiãxãchiane, yerü wüxi ga daxüçüãx ga Cori ga Tupanaãrü orearü ngeruü ínarüxí, rü naxmaüwa nangu rü ínanangüxgachi ga guma nuta ga namaã nangüxtaücü ga yema naxmaü. Rü ñuxüchi guma nutaétüwa narüto. ³ Rü yema orearü ngeruü rü wüxi ga bèixbëxanexürüü niyauracüü. Rü nacómüxüchi ga naxchiru. ⁴ Rü yexguma yemaxü nadaugügu ga churaragü rü norü muümaã niduruxe, rü yexma niyuãchitanü. ⁵ Rü yexguma ga yema orearü ngeruü, rü ñanagürü ngíxü ga yema ngeçügü: —¡Tãxü i pemuüëxü! Choma nüxü chacuèx rü naxcèx pedaügü ya Ngechuchu ga guma curuchawa yapotagüãcü. ⁶ Nataxuma i nuã, erü marü wena namaxü, yema nüma üpa pemaã nüxü yaxuxürüü. ¡Rü nuã pexí, rü ípeyadèux i naxmaü i ngëma ínaxügüãxüwa ga naxüne! ⁷ ¡Rü paxa ípixí, rü norü ngúexügümaã nüxü peyarüxugüe rü marü ínarüda rü wena namaxü ya Ngechuchu! Rü ñuxma rü marü pexüpa nüxíra Gariréaanewa naxü i nümax. Rü ngëma tá nixí i nüxü peyadauxü. Rü ngëma nixí i ore i pemaã nüxü chayarüxuxü —ñanagürü. ⁸ Rü yexguma ga yema ngeçügü rü paxama nüxna íyaxí ga yema naxmaü. Rü imuüë, natürü itaãégü ta. Rü poraãcü iixüãchi na Ngechuchuarü ngúexügümaã nüxü na yanaxugüexüçèx ga yema ore ga daxüçüãx ngímaã nüxü ixuxü. ⁹ Rü yexguma ínaxüãchiyane, rü ngürüãchi yéma ngíxcèx nangox ga Ngechuchu, rü ngíxü narümoxë. Rü ngímagü rü Ngechuchucèx iyabuxmü rü nüxü iyacuèxüügü, rü naparawa ínëixãchitanü. ¹⁰ Rü nüma ga Ngechuchu rü ñanagürü ngíxüügü: —¡Tãxü i pemuüëxü! ¡Rü ípixí rü chaueneégü i chorü ngúexügümaã nüxü peyarüxu rü Gariréaanewa naxí! Rü ngëma tá nixí i choxü nadaugüxü —ñanagürü.

Churaragü rü paigüarü ãëxgacügümaã nüxü nayarüxugüe ga yema ngupetüxü

¹¹ Rü yexguma ga yema ngeçügü rü namagu naxíyane, rü ñuxre ga churaragü ga yéma naxmaüwa dauxütaegüxü rü Yerucharéüwa naxí. Rü paigüarü ãëxgacügümaã nüxü nayarüxugüe ga guxüma ga yema ngupetüxü. ¹² Rü yema paigüarü ãëxgacügü rü namaã nayarüdexagü ga Yudíugüarü ãëxgacügüerugü. Rü nügümaã nanamexëégü ga tacümaã tá churaragüxü na yaxucüxëgüxü. Rü ñuxüchi nüxna ngíxü naxägü ga tacü ga díëru. ¹³ Rü namaã nüxü nixugüe rü ñanagürüügü: —¡Pema rü ñaperüügüü tá:

“Ngëxguma chütacü tapeeyane, rü norü ngúexügü toechita ngëma naxí rü nayayauxgü ga naxüne” ñaperüügüü tá! ¹⁴ Rü ngëxguma ãëxgacü ya Piratu tá nüxü cuèxgu i ngëma ngupetüxü, rü toma rü tá namaã tidexagü rü namaã tá tanamexëë na taxuüma pemaã naxüxüçèx —ñanagürüügü. ¹⁵ Rü yexguma ga yema churaragü rü ngíxü nayauxgü ga yema díëru. Rü yema ãëxgacügü namaã nüxü ixugüxürüü duüxügümaã nüxü nixugüe. Rü ñuxma rü ta ngëmatama dexa nixí i nüxü yaxugüxü i Yudíugü.

Ngechuchu nanamu ga norü ngúexügü

(Mr 16.14-18; Lc 24.36-49; Cu 20.19-23)

¹⁶ Rũ yema 11 ga Ngechucharũ ngúexũgũ rũ Gariréa- anewa naxĩ ga guma mèxpũne ga Ngechuchu namaã nüxũ ixuxũnewa. ¹⁷ Rũ yexguma Ngechuchuxũ nadaugũgu rũ nüxũ nicuèxũũgũ, woo ñuxre ga norũ ngúexũgũ rũ tama aixcũma nayaxõgũ na Ngechuchu yĩxũ. ¹⁸ Rũ yexguma ga Ngechuchu rũ naxcèx nixũ, rũ ñanagũrũ nüxũ: —Tupana rũ ãëxgacũxũ choxũ nixĩxẽẽ i guxũ i daxũguxũ i naãnewa rũ guxũ i ñoma i naãnewa. ¹⁹ —Rũ ñuxma rũ chanaxwèxe i guxũ i nachiũãnewa pexĩ i guxũ i duũxũgũtanũwa. ¡Rũ chorũ duũxũgũxũ peyaxĩgũxẽẽx! ¡Rũ ípenabaiũxẽẽx chauégagu rũ Chaunatuégagu rũ Naãẽ i Üünexũegagu! ²⁰ ¡Rũ penangúexẽẽx na naga naxĩnüexũcèx i guxũma i ngẽma pexũ chamuxũ! ¡Rũ dücax, guxũgutáma pexũtawa changẽxmaẽcha ñuxmatáta nagú i naãne! —ñanagũrũ ga Ngechuchu.

ORE I MEXÛ GA MARCU ÜMATÛXÛ

Cuáŭ ga baiŭxêẽruŭ nüxŭ nixu ga Tupanaãrŭ ore ga dauxchitawa ga ngextá taxúema íxãpataxŭwa

(Mt 3.1-12; Lc 3.1-9, 15-17; Cu 1.9-28)

¹ Ñaã nixí i norŭ ügŭ i ore i mexŭ ya Ngechuchu ya Cristu ya Tupana Nanechiga. ² Rŭ nuxcŭmaŭcŭ ga Tupanaãrŭ orearŭ uruŭ ga Ichaxía ümatŭxŭ ga Tupanaãrŭ ore, rŭ ñanagŭrŭ:

“Cupêxegu chayamu i chorŭ orearŭ ngeruŭ na namexêẽxŭcèx i cumaŭ. ³ Rŭ dauxchitawa i ngextá taxúema íxãpataxŭwa rŭ tá nangêxma i wŭxi i duŭxŭ i ngema tagaãcŭ ñaxŭ: ‘¡Pegŭ pemexêẽx naxcèx ya Cori. Rŭ naxcèx ipeyanawêẽxãchixêẽx i perŭ maxŭ!’ ”

ñaxŭ tá. ⁴ Rŭ Cuáŭ rŭ dauxchitawa ga ngextá taxúema íxãpataxŭwa nangox rŭ yéma ínanabaiŭxêẽ ga duŭxŭgŭ. Rŭ namaã nüxŭ nixu ga na namexŭ na Tupanacèx nadaugŭxŭ rŭ ínabaiŭxŭ na Tupana nüxŭ nüxŭ nangechaŭxŭcèx ga norŭ pecadugŭ. ⁵ Rŭ guxŭma ga duŭxŭgŭ ga Yudéaanecŭãx rŭ ñãne ga Yerucharéŭcŭãx rŭ yéma Cuáŭxŭtawa naxŭxŭ ga na nüxŭ iyanaxŭnŭxŭcèx. Rŭ nümagŭ rŭ norŭ pecadugŭxŭ yéma nayarŭxugŭxŭ, rŭ Cuáŭ rŭ natŭ ga Yudáŭwa ínayabaiŭxêẽtanŭ. ⁶ Rŭ naxchiru ga Cuáŭ rŭ cameyutèxanaxcèx nixí, rŭ norŭ goyexŭ rŭ naxchèxmŭnaxcèx nixí. Rŭ beruremaã rŭ munümaã naxãwemü. ⁷ Rŭ Cuáŭ rŭ yema nüxŭ yaxuxŭ ga orewa, rŭ ñanagŭrŭ: — Choweama tá ne naxŭ ya choxŭ rŭyexeracŭ. Rŭ choma rŭ taxuwama chame rŭ bai na ichayarŭmaxãchixŭ na íchayawêẽxŭcèx i norŭ chapatucunŭgŭ. ⁸ — Choma rŭ dexáwamare pexŭ íchabaiŭxêẽ, natŭrŭ nüma rŭ tá Tupanaãe i Üünexŭ pexna nanguxêẽ —ñanagŭrŭ ga Cuáŭ.

Ngechuchuarŭ baiechiga

(Mt 3.13-17; Lc 3.21-22)

⁹ Rŭ yema ngunexŭgŭgu, rŭ Ngechuchu rŭ ínaxŭxŭ nawa ga guma ñãne ga Nacharétu ga Gariréaanewa yexmane. Rŭ Cuáŭ rŭ natŭ ga Yudáŭwa ínanabaieã. ¹⁰ Rŭ yexguma dexáwa ínaxŭãchigu, rŭ Ngechuchu nüxŭ nadau ga na yangenaxŭ ga daxŭwa. Rŭ yema Tupanaãe i Üünexŭ rŭ wŭxi ga muxtucurŭŭ inanago, rŭ Ngechuchuna nangu. ¹¹ Rŭ daxŭwa inanaxŭ ga wŭxi ga naga ga ñaxŭ: —Cuma nixí i Chaune i cuxŭ changechaŭxŭchixŭ rŭ cumaã chataãxŭchixŭ —ñaxŭ.

Ngechuchuxŭ naxŭ ga Chataná

(Mt. 4.1-11; Lc 4.1-13)

¹² Rŭ yemawena rŭ Tupanaãe i Üünexŭ rŭ dauxchitawa ga ngextá taxúema íxãpataxŭwa Ngechuchuxŭ naga. ¹³ Rŭ yéma nayexma ga 40 ga ngunexŭ. Rŭ naêŭgŭ ga idŭraexŭ íyexmagŭxŭwa nayexma, rŭ ngoxo ga Chataná rŭ nüxŭ naxŭ. Natŭrŭ Tupanaãrŭ orearŭ ngeruŭgŭ ga daxŭcŭãx rŭ Ngechuchuxŭ narŭngŭxêẽgŭ.

Ngechuchu rŭ Gariréaanewa inanaxŭgŭ ga norŭ puracŭ

(Mt 4.12-17; Lc 4.14-15)

¹⁴ Rŭ nawena ga poxcupataŭgu na napoxcuxŭ ga Cuáŭ, rŭ Gariréaanewa naxŭ ga Ngechuchu na naxunagŭãxŭcèx ga Tupanaãrŭ ore i mexŭ. ¹⁵ Rŭ ñanagŭrŭ: —Marŭ nawa nangu i ngunexŭ ga Tupana nagu unetaxŭ, rŭ pexcèx ningaica na perŭ ãêxgacŭ na yíxŭ. ¡Rŭ ñuxma rŭ name nixí i Tupanacèx pedaugŭ rŭ peyaxŭgŭ i ngema norŭ ore i mexŭ! —ñanagŭrŭ.

Ngechuchu rü ägümücü ga püchaetanüxücèx naca
(Mt 4.18-22; Lc 5.1-11)

¹⁶ Rü yexguma naxtaxa ga Gariréaanacügu yaxüxgu ga Ngechuchu, rü yéma nüxü nadau ga Chimáü rü naëneë ga Aüdré. Rü nümagü rü woetama püchaetanüxü nixigü rü yéma naxtaawa napüchaegü. ¹⁷ Rü Ngechuchu rü ñanagürü nüxü: —¡Chowe perüxí rü tá pexü charüngüxëë na chauxütawa penagagüxücèx i duüxügü! —ñanagürü. ¹⁸ Rü yexgumatama ga yema taxre, rü yéma nanawogü ga norü püchagü. Rü Ngechuchuwe narüxí. ¹⁹ Rü yéamaxüra naxü ga Ngechuchu, rü yéma nüxü nadau ga Chaütiágu rü naëneë ga Cuáü. Rü Zebedéu nanegü nixigü ga nümagü. Rü wüxi ga nguwa nayexmagü, rü yéma ínanangáitagü ga norü püchagü. ²⁰ Rü yexgumatama Ngechuchu naxcèx naca. Rü nümagü rü yéma nguwa tüxü natèxgü ga nanatü ga Zebedéu namaã ga tümaãrü puracütanüxügü, rü Ngechuchuwe narüxí.

Wüxi ga yatü ga ngoxo nawa yexmaxüchiga
(Lc 4.31-37)

²¹ Rü íãne ga Capernáüwa nangugü. Rü yexguma ngüxchigaarü ngunexüwa nanguxgu, rü Ngechuchu rü ngutaquëxepataüwa naxü rü yexma naxücu. Rü yéma ínanaxügü ga na nangúexëëtaexü. ²² Rü duüxügü rü nabèixächiaëgü namaã ga norü ngüxëëtae, yerü aixcüma Tupanaãrü poramaã meã nanangúexëë rü tama ngúexëëruügü ga Moíchéarü mugüwa ngüxëëtaegüxürüü nixí. ²³⁻²⁴ Rü guma íãneãrü ngutaquëxepataüwa nayexma ga wüxi ga yatü ga ngoxo nawa yexmaxü. Rü aita yéma naxü, rü ñanagürü: —¿Tüxcüü totanüwa cuxü, Pa Ngechuchu Pa Nacharétucüãx? ¿Nuã cuxü na toxü cuyadèixücèx? Choma rü cuxü chacuèx na Tupana Nane ya Üünecü quíxü —ñanagürü. ²⁵ Rü Ngechuchu nüxü naxoox ga yema ngoxo, rü ñanagürü: —¡Iyarüngeèx rü ínaxüxü nawa ya yima yatü! —ñanagürü. ²⁶ Rü yexguma ga yema ngoxo rü guma yatüxü niyuächixëë, rü tagaãcü aita naxüãcüma nawa ínaxüxü. ²⁷ Rü guxüma ga duüxügü rü nabèixächiaëgü, rü namüçügüna nicachigü rü ñanagürügü: —¿Tacü nixí i ñaã? Maneca wüxi i ngexwacaxüxü i ngüxëëtae nixí. Nüma rü aixcüma Tupanaãrü poramaã meã nangüxëëtae. Rü woo i ngoxogü rü naga naxínüë i ngëxguma namuãxgu —ñanagürügü. ²⁸ Rü yemaãcü nixí ga paxa guxüwama ga Gariréaanewa rü Ngechuchuchigaxü nacüèxgüxü ga duüxügü.

Ngechuchu rü Chimáü ga Pedru nèxècèx nayataanexëë
(Mt 8.14-15; Lc 4.38-39)

²⁹ Rü yexguma ngutaquëxepataüwa ínaxüxügu ga Ngechuchu, rü Chaütiágu rü Cuáümaã Chimáü rü Aüdrépatawa naxü. ³⁰ Rü Chimáü nèxë rü ngürücarewa iyexma, yerü iyaxaxüne. Rü Ngechuchumaã ngüxü nixugü. ³¹ Rü ngüxcèx nixü, rü ngüxmëxgu nayayauxãchi, rü ngüxü ínarüdaxëë. Rü yexgumatama igèuxãchi ga na yaxaxünexü. Rü írüda, rü ínaxügü ga naxcèx na namexëëãxü ga õna.

Ngechuchu rü muxüma ga idaaweexüçèx nayataanexëë
(Mt 8.16-17; Lc 4.40-41)

³² Rü yexguma marü yanaxücuxgu ga üèxcü ga na nachütachaüxü, rü Ngechuchuxütawa nanagagü ga guxüma ga duüxügü ga idaaweexü rü guxüma ga ingoxoãxgüxü. ³³ Rü guxüma ga yema íãnecüãx rü yexma guma ípataarü íãxwa naxcèx nangutaquëxegü. ³⁴ Rü nüma nanameëxëë ga muxüma ga duüxügü ga nagüxüraüxü ga ðaawemaã idaaweexü. Rü ínanawoxü ga muxüma ga ngoxogü, natürü nüxna nanachüxu ga na yadexagüxü, yerü nümagü ga ngoxogü rü nüxü nacüèxgü na texé yíxü.

*Ngechuchu rü nanaxunagü ga ore ga mexü ga ngutaquëxepataüwachigü
(Lc 4.42-44)*

³⁵ Rü ngunetüü ga tauta yangóonegu, rü inaxüãchi ga Ngechuchu. Rü ñâneärü yéaxüra ga ngextá taxúema íxãpataxüwa naxü na yéamaxüra yayumüxëxücëx. ³⁶ Rü Chimáü rü namüçügümaã Ngechuchucëx nayadaugü. ³⁷ Rü yexguma nüxü iyangaugügu, rü ñanagürügü nüxü: —Guxüma i duüxügü rü cuxcëx nadaugü —ñanagürügü. ³⁸ Natürü ga nüma rü nanangãxü rü ñanagürü nüxü: —¡Ngïã rü toxnamana taxí náigü ya ñanexãcügü ya ngaicamagünewa na ngema rü ta chanaxunagüxücëx i ore i mexü! Erü woetama ngëmacëx nixí i Capernáüärü ñanewa íchaxüxüxü. ³⁹ Rü yemaãcü ga Ngechuchu rü guxüma ga Gariréaanegu nixüãgüchigü. Rü wüxichigü ga ñâneärü ngutaquëxepataüwa rü nüxü nixuchigü ga ore ga mexü, rü ínayawoxüëtanü ga ngoxogü.

*Ngechuchu rü wüxi ga rüchaxünexüçëx nayataanexëë
(Mt 8.1-4; Lc 5.12-16)*

⁴⁰ Rü Ngechuchucëx nixü ga wüxi ga yatü ga chaxünemaã idaawecü. Rü napëxegu nayacaxãpüxüãcüma ñanagürü nüxü: —Pa Corix, ngëxguma cunaxwëxegu na choxü curümexëëxü, rü cuxü natauxcha na chauxcëx cuyataanexëëxü —ñanagürü. ⁴¹ Rü Ngechuchuaxü nangechaütümüü ga guma yatü. Rü nüxü ningögü rü ñanagürü nüxü: —Ngü, chanaxwëxe. ¡Marü curüme! —ñanagürü. ⁴² Rü yexgumatama nüxü inayarüxo ga na nachaxünexü ga guma yatü. Rü meãma naxcëx nitaane. ⁴³⁻⁴⁴ Rü Ngechuchu rü yexgumatama ínyamu. Rü meãma nanaxucuxë rü ñanagürü nüxü: —¡Düçëx, tãxütáma texémaã nüxü quixu! ¡Natürü ngema paixütawa naxü, rü cugü nüxü yadauxëë! ¡Rü curü mexëëçëx nüxna yaxuaxü i curü ãmare ga yema Moïché tüxü muxü na nüxü nacuáxüçëx i duüxügü na curümexü nawa i curü daawe! —ñanagürü. ⁴⁵ Natürü nüma ga guma yatü rü ínixü rü inanaxügü ga na guxãmaãma nüxü yaxuxü ga yema nüxü ngupetüxü. Rü yemacëx ga Ngechuchu rü marü taxucürüwa ngóxüwama duüxügüpëxewa ñanegügu naxücu. Natürü dauxchitagu ga ngextá duüxügü ítaxuxügu narüxãüx. Rü yéma naxcëx naxïxü ga duüxügü ga guxüãnewa ne íxü.

2

*Ngechuchu rü wüxi ga yatü ga nawãixãchicüçëx nayataanexëë
(Mt 9.1-8; Lc 5.17-26)*

¹⁻² Rü yixcama ga ñuxre ga ngunexüwena rü wenaxãrü Capernáüärü ñanegu naxücu ga Ngechuchu. Rü yexguma duüxügü nüxü cuáchigagügu na ípatawa nayexmaxü, rü yéma nangutaquëxegü ga muxüma ga duüxügü. Rü düxwa ga ñãxtüwa rü nanapá. Rü nüma ga Ngechuchu rü namaã nüxü nixu ga ore i mexü. ³ Rü yéma nangugü ga ägümücü ga yatügü ga yéma nangetaügüxü ga wüxi ga yatü ga nawãixãchicü. ⁴ Natürü yema na namuxüchixü ga duüxügü, rü taxucürüwama Ngechuchuxütawa nangugü. Rü yemacëx ínanapogüétü ga Ngechuchu íyexmaxüwa ga guma ípata. Rü yéma norü caruügu ínanaxüxüetaügü ga guma nawãixãchicü. ⁵ Rü yexguma Ngechuchu nüxü deüxgu ga ñuxãcü aixcüma na yaxögüãxü ga yema duüxügü, rü ñanagürü nüxü ga guma nawãixãchicü: —Pa Chaunex, curü pecadugü rü marü cuxü nüxü changechaü —ñanagürü. ⁶⁻⁷ Natürü ñuxre ga ngüexëëruügu ga Moïchéärü mugüwa nguxëëtaegüxü rü yéma narütogü. Rü naãewa ñaxügu narüxínüë: —¿Ñuxãcü tama namuü na ngëmaãcü yadexaxü? ¿Rü tacü Tupanamaã yaxugüxü? Erü Tupanaxícatama nixí ya duüxügüärü pecaduxü ngechaücü —ñaxügu narüxínüë. ⁸ Natürü yexgumatama ga Ngechuchu

rü nüxü nicuèxâchi ga yema nagu naxĩnũxũ, rü yemacèx nüxna naca rü ñanagürü nüxü: —¿Tüxcüü ngẽmagu perüxĩnũe i pemax? ⁹ —¿Tacü nixĩ i rütauchamaèxü na namaã nüxü ixuxü ya daa nawãixãchicü:

“Curü pecadugü rü marü cuxü nüxü changechaü”, rü ãxna:

“¡Inachi, rü nayaxu i curü caruü, rü íxü!” ñaxü? ¹⁰⁻¹¹ —Natürü ñuxma rü tá pexü nüxü chadauxẽe na Chaunatü núma choxü muxü na duüxügüaxü nüxü changechaüxcèx i norü pecadugü —ñanagürü. Rü yexguma yema ñaxguwena rü guma nawãixãchicüxü ñanagürü: —Cumaã nüxü chixu rü jinachi, rü nayaxu i curü caruü, rü cupatawa naxü! —ñanagürü. ¹² Rü yexgumatama inachi ga guma idaawecü. Rü nanayaxu ga norü caruü, rü ínaxüxü napèxewa ga guxüma ga yema duüxügü ga yéma yexmagüxü. Rü yemacèx ga yema duüxügü rü nabèixãchiãægü, rü Tupanaxü nicuèxüügü, rü ñanagürügü: —Taguma nüxü tatau i tacü i ñaãrüü ixixü —ñanagürügü.

Lebícèx naca ga Ngechuchu
(Mt 9.9-13; Lc 5.27-32)

¹³ Rü yemawena rü wenaxãrü naxtaacutüwa naxü ga Ngechuchu. Rü yema muxüma ga duüxügü rü naxcèx naxĩ. Rü nüma rü nanangüexẽe. ¹⁴ Rü yexguma yéma naxüpetügu ga Ngechuchu, rü yéma nüxü nadau ga Lebí ga Arupéu nane. Rü nüma ga Lebí rü yéma narüto nawa ga yema nachica ga duüxügüna dñeru ngĩxü ínayaxuxüwa naxcèx ga Dumacüãxãrü ãëxgacü yerü woetama yema nixĩ ga norü puracü. Rü Ngechuchu rü ñanagürü nüxü: —¡Chowe rüxü! —ñanagürü. Rü inachi ga Lebí, rü nawe narüxü. ¹⁵ Rü yéma Lebípatawa nachibü ga Ngechuchu. Rü yéma nachibüe ga muxüma ga duüxügü ga Lebírüü Dumaãrü ãëxgacücèx dñeru ngĩxü yauxgüxü. Rü nayexmagü ta ga togü ga duüxügü ga taxúema nacümamaã taãgüxü ga yéma mechawa rütogüxü namaã ga Ngechuchu rü norü ngüexügü. Yerü namu ga yema nawe rüxixü. ¹⁶ Rü yéma nayexmagü ta ga ñuxre ga Parichéugü rü ngüexẽeruügü ga Moíchéarü mugüwa ngüxẽetaegüxü. Rü yexguma nüxü nadaugügu ga yema togümaã na nachibüxü ga Ngechuchu, rü norü ngüexügüna nacagü, rü ñanagürügü: —¿Ñuxãcü i perü ngüexẽeruü rü namaã nachibü i ãëxgacüarü duüxügü i dñeruarü yauxwa puracüexü rü duüxügü i pecaduãxgüxü? —ñanagürügü. ¹⁷ Rü yexguma yemaxü naxĩnügü ga Ngechuchu rü ñanagürü nüxü: —Ngẽma poraexü rü tama nanaxwexe ya duturu, natürü ngẽma idaaweexü waxi nixĩ i naxwèxexü ya duturu. Choma rü tama mexügüna na chaxuxücèx nixĩ ga núma chaxüxü, natürü núma chaxü na nüxna chaxuxücèx i pecaduãxgüxü —ñanagürü.

Ngechuchuna aurechigacèx nacagüe
(Mt 9.14-17; Lc 5.33-39)

¹⁸ Rü wüxi ga ngunexügu rü tama nachibüe yerü Tupanacèx naxauree ga Cuáü ga baiüxẽeruüãrü ngüexügü rü Parichéugüarü ngüexügü. Rü yemaxü nadaugügu ga ñuxre ga duüxügü, rü Ngechuchuxütawa naxĩ rü nüxna nayacagüe, rü ñanagürügü: —Ngẽma Cuáüãrü ngüexügü rü Parichéugüarü ngüexügü rü naxauree. ¿Rü tüxcüü i curü ngüexügü i tama naxaureexü? —ñanagürügü. ¹⁹ Rü Ngechuchu nanangãxü rü ñanagürü nüxü: —¿Éxna wüxi i ngĩgüarü petawa rü pexcèx namexü na naxaureexü i ngẽma nüxna naxugüxü ega natanüwa nangẽxmagu i ngẽma yatü i ngexwacèx ãmaxü? Pemaã nüxü chixu rü ngẽxguma natanüwa nangẽxmayane i ngẽma yatü i ngexwacèx ãmaxü rü taxucürüwama naxauree i ngẽma nüxna naxugüxü. ²⁰ —Natürü wüxi i ngunexü rü ngẽma yatü i ngexwacèx ãmaxü rü tá namücügüna nixügachi.

Rü ngēma ngunexũgu tá nixĩ i naxaureexũ. [Rü chorü ngúexũgü rü taxucürüwama naxauree i ñuxma erü natanüwa changēxma. Natürü ínangu tá i ngēma ngunexũ na nüxna chixũgachixũ, rü ngēxguma tá nixĩ i naxaureexũ.] ²¹ –Rü taxúema wüxi i naxchirutüchi i ngexwacaxũxũmaã tanapaita i wüxi i naxchiru i ngauxũ. Erü ngēxguma nañaãchimügu i ngēma natüchi i ngexwacaxũxũ, rü tá nanagáuxēē i ngēma ngauxũ i naxchiru. Rü noxriarü yexera tá narügáu. ²² –Rü ngēxgumarüü ta taxúema ngexwacaxũcü ya binu rü wüxi i marü ngauxũ i naxchiü i naxchèxmünaxcèxgu tayabacuchi. Erü ngēxguma ngēmaãcü naxũxgu rü yima binu ya ngexwacaxũcü rü narüngu, rü tá nayawãixēē i ngēma naxchiü i ngauxũ i naxchèxmünaxcèx. Rü ngēxma tá inayarüxo ya binu rü naxchiü rü ta. Rü ngēmacèx tanaxwèxe ya ngexwacaxũcü ya binu rü ngexwacaxũxũ i naxchiügu tayabacuchi. [Rü chorü nguxēētae i ngexwacaxũxũ rü ngēxgumarüü ta nixĩ na taxucürüwama namaã nawüxiguxũ i ngēma nuxcümaũxũ i pecümagü –ñanagürü ga Ngechuchu.]

Ngechuchuarü ngúexũgü rü trigu nibuxetanü ga ngüxchigaarü ngunexũgu (Mt 12.1-8; Lc 6.1-5)

²³ Wüxi ga ngüxchigaarü ngunexũgu ga Ngechuchu rü norü ngúexũgümaã trigunecüwa nachopetü. Rü nümagü ga norü ngúexũgü rü inaxĩácüma inanaxügüe ga trigu na yabuxetanüxũ. ²⁴ Rü yema Parichéugü rü Ngechuchuna nacagü rü ñanagürügü: –Dücèx ¿rü tüxcüü i curü ngúexũgü rü nanaxügü i ngēma tama mexü i ngüxchigaarü ngunexũgu na naxüxü? –ñanagürügü. ²⁵ Natürü nüma ga Ngechuchu rü ñanagürü nüxü: –¿Taguma ēxna poperawa nüxü pedau ga tacü na naxüxü ga nuxcümaũcü ga ãëxgacü ga Dabí rü natanüxũgü ga yexguma òna nüxü tauxgu rü nataiyaegu? ²⁶ Rü yexguma paigüarü ãëxgacü yixĩgu ga Abiatáru, rü Dabí rü Tupanapatagu naxücu. Rü nanangõx ga yema pãü ga üünexü ga paigücèxicatama ixĩxü. Rü nüma ga Dabí rü natanüxũmaã rü ta nangau ga yema pãü –ñanagürü. ²⁷ Rü ñanagürü ta ga Ngechuchu: –Ngēma ngüxchigaarü ngunexũ rü duüxügücèx nixĩ ga naxüxü. Rü tama ngüxchigaarü ngunexũcèx nixĩ ga naxüxü ga duüxügü. ²⁸ –Rü ngēmacèx ya Tupana Nane ya duüxüxü ixĩcü rü namaã inacuèx ta i ngüxchigaarü ngunexũ –ñanagürü.

3

Wüxi ga yatü ga yumécüchiga (Mt 12.9-14; Lc 6.6-11)

¹ Rü wenaxârü ngutaquëxepataügu naxücu ga Ngechuchu. Rü yéma nayexma ga wüxi ga yatü ga norü wüxichacüüwa yumécü. ² Rü yema Parichéugü, rü Ngechuchuxü nangugügü ngoxi tá namexēēã ga ngüxchigaarü ngunexũgu, na yemaãcü nüxü nayexmaxüçèx ga tacücèx na ínaxuaxüğüãxü. ³ Rü yexguma ga Ngechuchu rü ñanagürü nüxü ga guma yumécü: –¿Írúda, rü nuxã ngãxütanügu yachi! –ñanagürü. ⁴ Rü yexguma ga Ngechuchu rü yema togü ga yéma yexmagüxüna naca, rü ñanagürü nüxü: –¿Tacü nixĩ i mexü na naxüxü i ngüxchigaarü ngunexũgu? ¿Namexü na naxüxü i mexü rü ēxna chixexü? ¿Rü namexü na namaxēēxü rü ēxna yamáxü? –ñanagürü. Natürü ga nümagü rü yexma nayarüngeëxgümare. ⁵ Rü nüma ga Ngechuchu rü nuchametüácüma nüxü nidaugüãchi ga yema nüxü íchomaëguãchixü. Rü nangechaü yerü tama inaxĩnüëchaü ga yema duüxügü. Rü guma yatüxü ñanagürü: –¿Iyanawëxãchixēē ya cuxmëx! –ñanagürü. Rü yexguma ga guma yatü rü nügü inayarüwëxãchimëxëxēē. Rü yexgumatama rü narümexmëx. ⁶ Natürü yexguma yemaxü nadaugügu ga Parichéugü, rü

ínachoxũ ga yéma. Rũ Erodetanũxũmaã inanaxũgũe ga na naxcèx nadaugũxũ ga ñuxãcü tá na Ngechuchuxũ yamèxgũxũ.

Naxtaacutüwa Ngechuchucèx nangutaquẽxegü ga muxũma ga duũxũgü

⁷ Rũ Ngechuchu rũ norü ngúexũgũmaã naxtaacutüwa naxũ. Rũ muxũma ga duũxũgü ga Gariréaanecũãx rũ nawe narũxĩ. ⁸ Rũ yexguma nüxũ nacuáchigagũgu ga guxũma ga yema mexũgü ga naxũxũ ga Ngechuchu, rũ naxcèx naxĩtaquẽxe ga muxũma ga duũxũgü ga Yudéaanecũãx, rũ Yerucharéũcüãx, rũ Iduméããnecũãx, rũ Yudáũãrũ tocutücüãx rũ yema naãne ga Tiru rũ Chidáũãrũ ñãnegü nawa yexmaxücüãx. ⁹ Rũ yemacèx ga Ngechuchu rũ norü ngúexũgũxũ namu na wüxi ya ngue naxcèx namexèègũxũcèx na tama yéma yaxũxtũgũãxũcèx ga yema muxũma ga duũxũgü. ¹⁰ Yerü nüma rũ nanameèxèè ga muxũma, rũ yemacèx guxũma ga yema idaaweexũ rũ naxcèx naxĩ na nüxũ yangõgũgũxũcèx. ¹¹ Rũ yexguma yema ngoxoãxgũxũ ga duũxũgü nüxũ daugũgu, rũ napèxegu nacaxãpũxũgü rũ tagaãcü ñanagürügü: —Cuma nixĩ ya Tupana Nane quiĩxũ —ñanagürügü. ¹² Natürü nüma ga Ngechuchu rũ poraãcü nayaxucuxègü na tama duũxũgũmaã nüxũ yaxugüexũcèx ga nachiga.

Ngechuchu nanade ga 12 ga norü ngúexũgü na toxnamana namugüãxũcèx (Mt 10.1-4; Lc 6.12-16)

¹³ Rũ yemawena ga Ngechuchu rũ wüxi ga mèxpũnawa ínaxũãchi. Rũ yéma naxcèx naca ga yema ngúexũgü ga nüma nanaxwèxexũ. Rũ naxũtagu naxĩtaquẽxegü. ¹⁴ Rũ yematanüwa nayadexechi ga 12 ga norü ngúexũgü na namüçügũxũchi yĩxũcèx, rũ na yamugüãxũcèx ga norü orearü unagüwa. Rũ yemagü rũ Imugũxũgu nanaxüéga. ¹⁵ Rũ pora nüxna naxã na Tupanaãrũ poramaã ínawoxũãxũcèx ga ngoxogü. ¹⁶ Rũ ñaãgü nixĩ ga naega ga yema 12 ga norü ngúexũgü ga nadexũ. Rũ wüxi nixĩ ga Chimáũ ga Pedrugü naxüégaxũ. ¹⁷ Rũ togü nixĩ ga Chaũtiágu rũ naèneè ga Cuáũ. Rũ nümagü rũ Zebedéu nanegü nixĩ. Rũ Ngechuchu rũ Boanéregü nanaxüéga. Rũ ngẽma nixĩ i Duruanexũ Nanegü —ñaxũchiga. ¹⁸ Rũ togü nixĩ ga Aũdré, rũ Piripi, rũ Baturumé, rũ Mateu, rũ Tumachi, rũ Chaũtiágu ga Arupéu nane, rũ Tadéu, rũ Chimáũ ga iporaãècüücü. ¹⁹ Rũ to nixĩ ga Yuda ga Icariúte ga yixcama bexma Ngechuchuxũ íxuaxũxũ.

Ngechuchuxũ nixugüe na ngoxoarü poramaã napuracüxũ (Mt 12.22-32; Lc 11.14-23, 12.10)

²⁰ Rũ yemawena rũ wüxi ga ñpatagu naxücu ga Ngechuchu. Rũ wenaxãrũ naxcèx nangutaquẽxegü ga muxũma ga duũxũgü. Rũ yemacèx woo na nachibüexũcèx rũ nangechicagü ga nüma rũ norü ngúexũgü. ²¹ Rũ yexguma yemaxũ taxĩnũègu ga guxema natanũxũgü ga Ngechuchu, rũ ítayadaugü na tayagagũxũcèx, yerü nüxũ tixugügü rũ: —Naxãũãèmare —ñatagürügü. ²² Rũ yexgumarüũ ta ga yema ngúexèèruũgü ga Moĩchearü mugüwa nguxèètaegũxũ ga Yerucharéũwa ne íxũ, rũ ñanagürügü: —Ñãã yatü i Ngechuchu, rũ ngoxogünatü i Bechebúarü poramaã nixĩ i ínawoxũãxũ i ngoxogü —ñanagürügü. ²³ Natürü ga Ngechuchu rũ naxcèx naca ga yema ngúexèèruũgü. Rũ wüxi ga ore ga cuèxruũxũ namaã nixu, rũ ñanagürü: —¿Rũ ñuxãcü i Chataná i nügütama ínatexũchixũ? ²⁴ —Rũ ngèxguma chi wüxi i nachiũãnecũãx i duũxũgü rũ nügütanũxũwatama nügü nadaixgu, rũ taxuacüma natai i ngẽma nachiũãne. ²⁵ —Rũ ngèxguma chi wüxi ya ñpatacũãx nügü itoyegu, rũ taxuacüma natai ya yima ñpata. ²⁶ —Rũ ngèxgumarüũ chi ta nixĩ i Chataná ega nügümaã nanuxgu rũ nügü yamèxgu, rũ taxuacü chima natai i ngèxguma. Rũ chi ngèxma nagux. ²⁷ —Rũ taxuacüma texé wüxi ya yatü ya poracüpatagu

taxücu na nüxna tanapuxüxcèx i norü ngēmaxüğü, ega tama tayanèixiragu. Erü ngēmaäcücica tá nixĩ i tüxü nanguxüxü na tanapuxüxü i norü ngēmaxüğü. ²⁸ —Rü aixcüma pemaã nüxü chixu rü Tupana tá nüxü nüxü nangechaü i duüxüğü i guxüma i norü pecadugü rü guxüma i tacü i chixexü i namaã yadexagüxü. ²⁹ —Natürü texé ya chixexü namaã ixugüxe i Tupanaãe i Üünexü, rü tagutáma tüxü nüxü nangechaü ya Tupana. Rü guxügutáma chixexüwa tüxü natèx —ñanagürü. ³⁰ Rü yema ñanagürü ga Ngechuchu, yerü yema ngúexëeruüğü ga Moïchëarü mugüwa nguxëetaegüxü rü: “Nangoxoãx” ñanagürüğü nüxü.

Ngechucharü mamá rü naëneëgüchiga
(Mt 12.46-50; Lc 8.19-21)

³¹ Rü yexgumayane rü ítangugü ga Ngechucharü mamá rü naëneëgü. Natürü ípataarü düxétügu tarücho, rü naxcèx yéma tangemagü. ³² Rü yema duüxüğü ga Ngechuchuxü íchomaëguächixü, rü ñanagürüğü nüxü: —Curü mamá rü cueneëgü rü cueyèxgü, rü yéa düxétüwa tangëxmagü, rü cuxcèx tadaugü —ñanagürüğü. ³³ Rü nüma nanangãxü, rü ñanagürü: —¿Texé tixĩ ya chaue rü chaueneëgü? —ñanagürü. ³⁴ Rü yema nüxü íchomaëguächixüxü nidaugüächi, rü ñanagürü: —Rü daxegü tixĩ ya chaue rü chaueneëgü. ³⁵ —Erü guxáma ya texé ya naxüxe i Tupanaärü ngúchaü, rü yíxema tixĩ ya chaueneë rü chaueyèx rü chaue —ñanagürü.

4

Ore ga toecügu ixuxü
(Mt 13.1-9; Lc 8.4-8)

¹ Rü wenaxärü inanaxüğü ga Ngechuchu ga na nangúexëëãxü ga duüxüğü ga guma naxtaxaãnacüwa. Rü muxüma ga duüxüğü yexma naxcèx nangutaquëxegü. Rü yemacèx düxwa wüxi ga ngue ga yéma naxtaawa yexmanegu nixüe ga Ngechuchu, rü gumawa narüto. Rü yema duüxüğü rü naxtaxaãnacügu narücho. ²⁻³ Rü yexguma ga Ngechuchu rü inanaxüğü ga muxüma ga ore ga cuèxruüwa na nangúexëëãxü ga duüxüğü. Rü norü nguxëetaewa rü ñanagürü: —¡Düxcèx, iperüxĩnüë i ñaã ore! Wüxi ga yatü ga toecü rü triguarü towa naxü. ⁴ —Rü yexguma triguchiremaã nagüaneãgu, rü ñuxre ga triguchire rü namagu nayi. Rü ínangugü ga werigü, rü nanawecu. ⁵ —Rü náigü ga triguchire rü nutatanügu nayi ga ngextá ínachicaxüwa ga waixüümü. Rü paxa narüxüğü ga guma triguchire, yerü ga waixüümü rü tama nayaxcü. ⁶ —Natürü yexguma nangunagügu ga üèxcü, rü ínanagu ga guma trigu rü narüñexgü. Rü nayue, yerü tama poraãcü nixãmaxã. ⁷ —Rü náigü ga triguchire rü toranecügu nayi. Rü yexguma nayaegu ga tora, rü guma triguxü inawocu, rü yemacèx tama nixo. ⁸ —Natürü náigü ga triguchire rü mexü ga waixüümügu nayi. Rü meãma nayae, rü muxüma ga trigu nawa ínanguxuchi. Rü nümaxüneyèxawa rü 30 püxü ínanguxuchi ga norü o, rü náigüwa rü 60, rü náigüwa rü 100 ínanguxuchi —ñanagürü. ⁹ Rü ñuxüchi ñanagürü ta: —Rü yíxema ächixëgüxe, ¡rü nüxü taxĩnüë i ñaã ore! —ñanagürü.

Tacüchiga nixĩ ga yema ore ga cuèxruügu ixuxü
(Mt 13.10-17; Lc 8.9-10)

¹⁰ Rü yemawena ga yexguma nanüxcèxgu ga Ngechuchu, rü yema naxütagugüxü wüxigu namaã ga yema 12 ga norü ngúexüğü, rü nüxna nacagüe ga na tacüchiga yíxü ga yema ore ga cuèxruügu ixuxü. ¹¹⁻¹² Rü nüma nanangãxü rü ñanagürü nüxü: —Tupana rü pexü nüxü nacüèxëe i ngēma èxügüxü i taxüma i togü nüxü cuáxü na ñuxãcü äëxgacü na

yïixũ i nümax. Natürü ngêma togü i tama tatanüxũ ixïxũcèx rü cuèxruũgu chayaxuãcüma namaã nüxũ chixu i ore na woo nüxũ nadaunügu rü ñoma tama nüxũ nadaugüxürüü na yïixũcèx, rü woo nüxũ naxïnüëgu rü tama nüxũ na nacuèxgüxũcèx. Rü ngêmaãcü namaã nüxũ chixu na tama nüxũ naxoexũcèx i nacüma i chixexũ rü tama Tupana nüxũ nüxũ ngechaũxũcèx i norü pecadugü –ñanagürü.

Ngechuchu rü meã nanangoxêẽ ga yema ore ga cuèxruũ ga toecüchigagu ixuxũ

(Mt 13.18-23; Lc 8.11-15)

¹³ Rü Ngechuchu ñanagürü nüxũ: –¿Pema rü ta éxna tama nüxũ pecuèxgü na tacüchiga yïixũ i ngêma ore i cuèxruũ i nüxũ chixuxũ? ¿Rü ñuxũcürüwa tá nüxũ nacuèxgü i ngêma togü? ¹⁴ –Rü yíxema toexe, rü yíxema tixí ya ore i mexũ unagüxe. ¹⁵ –Rü nangëxma i duũxügü i guma triguchire ga namagu yixũnerüü ixïgüxũ. Rü nümagü rü nüxũ naxïnüë i ore i mexũ, natürü yixcama marü nüxũ naxïnüëguwena, ngema nangu i Chataná rü nüxna nanapu i ngêma ore i mexũ ga noxri yaxõgüxũ. ¹⁶ –Rü togü rü ngêma triguchire ga nutatanügu yixũnerüü nixïgü. Rü ngêmagü nixí i nüxũ ñnüëxũ i ore i mexũ, rü taãëacüma nayauxgüxũ. ¹⁷ –Natürü ngêma na tama aixcüma nagu naxïnüëxũ i ngêma ore, rü paxaãchitama nayaxõgü. Rü ngêmacèx i yixcama ngëxguma ngêma oregagu guxchaxügü nüxũ üpetügu rü éxna duũxügü naxchi aiegu, rü nüxũ narüxoe i ngêma ore ga noxri yaxõgüxũ. ¹⁸⁻¹⁹ –Rü togü rü guma triguchire ga toranecügu yixũnerüü nixïgü. Nümagü rü nüxũ naxïnüë i ngêma ore i mexũ, natürü ñoma i naãneãrü ngêmaxügüçèx naxoegaãëgü rü norü dïëruaguama narüxïnüë, rü nanaxwèxegü i nüxũ na nangëxmaxũ i muxüma i to i norü ngêmaxügü. Rü guxüma i ngêma rü nüxũ nüxũ inayarüngümaëxêẽ i ngêma ore i mexũ rü nüxũ nüxũ narüxoeëẽ na tama naxügüãxũcèx i ngêma mexũ i Tupana nüxũ naxwèxexũ. ²⁰ –Rü togü rü guma triguchire ga mexũ ga waixüümügu yixũnerüü nixïgü. Ngêmagü nixí i nüxũ ñnüëxũ i ore i mexũ rü nayauxgüxũ rü meã Tupana naxwèxexũacüma maxëxũ. Rü nümaxũ rü guma trigu ga 30 püxü nawa ínguxuchinerüü nixïgü. Rü nümaxũ rü guma 60 püxü nawa ínguxuchinerüü nixïgü. Rü nümaxũ rü guma 100 püxü nawa ínguxuchinerüü nixïgü –ñanagürü.

Ore ga omügu ixuxũ

(Lc 8.16-18)

²¹ Rü yexgumarüü ta ñanagürü nüxũ: –¿Éxna nuã tanange i wüxi i omü na wüxi i caichãütüügu rü éxna wüxi i pechicatüügu na yaxüçuchixũcèx? Tama ngêmaãcü nixí, erü wüxi i omü rü dauxnagu tanaxünagü na ngema inabaxixũcèx. ²² –Rü ngëxgumarüü ta i guxüma i tacü iicúxũ, rü yixcüra rü duũxügü rü tá nüxũ nacuèxgüama. Rü guxüma i ngêma ñuxma duũxügüçèx ëxügüxũ rü tá nangõxoma i yixcüra. ²³ –Rü yíxema açhixëgüxe, ¡rü nüxũ taxïnüë i ngêma ore! –ñanagürü. ²⁴ Rü yexgumarüü ta ñanagürü nüxũ: –¡Meã naga pexïnüë i ngêma nüxũ pexïnüëxũ! Rü ngêma pema naga na pexïnüëxürüü tá nixí i Tupana i pexna naxããxũ i cuèx. Rü naëtü tá poraãcü pexũ narüngüxêẽ. ²⁵ –Rü pemaã nüxũ chixu, rü texé ya aixcüma naga ñnüë i ñaã ore i mexũ rü Tupana rü yexeraãcü tá tüxũ nüxũ nacuèxêẽ. Natürü yíxema tama naga ñnüë i ñaã ore rü Tupana tá tüxna nanayaxu i ngêma íraxũ i cuèx i tüxũ ngëxmachiréxũ –ñanagürü.

Ore ga triguchire ga rüxüxügu ixuxũ

²⁶ Rü Ngechuchu rü ñanagürü ta: –Pemaã tá nüxũ chixu i wüxi i ore i cuèxruũ na nüxũ pecuáxũcèx na ñuxãcü ãëxgacü na yïixũ ya Tupana.

Rü wüxi ya yatü rü waixümügu nanato ya triguchire. ²⁷ —Rü nüma ya yatü rü chütacü nape rü moxüãcü ínarüda, rü yoxni ya yima triguchire rü narüxü rü niyachigü. Natürü nüma ya yatü rü tama nüxü nacuèx na ñuxãcü na naxüxü rü na nayaxü. ²⁸ —Rü ngẽmaãcü i ngẽma waixümü rü nüëchamatama nanaxüxëë ya yima triguchire. Rü naätügüxira narüxü rü yixcama i nachacu rü ngẽmawena nachacuwa nanguxü i norü o. ²⁹ —Rü ngëxguma marü yadauxgu i ngẽma norü o, rü nanabuxu erü marü nawa nangu i norü buxgü —ñanagürü.

Ore ga motachachiregu ixuxü
(Mt 13.31-32; Lc 13.18-19)

³⁰ Rü ñanagürü ta ga Ngechuchu: —Rü Tupanaarü ore rü yexera nixüchigü ¿Rü nanaçacüraxü rü çacügu tanangu? ³¹⁻³² —Rü ñoma wüxi ya motachachire ya waixümügu itoxünerüü nixí. Rü woo guxünema ya nanetüchirexü narüxíramaë, natürü ngëxguma inatoxgu, rü narüxü rü naya ñuxmata guxüma i togü i nanetüxü nayexera. Rü nachacüü rü nita, rü woo werigü rü natanügu nixüachiãü —ñanagürü.

Cuèxruügu ixuxü ga oremaã nidexa ga Ngechuchu
(Mt 13.34-35)

³³ Rü yemaãcü ga Ngechuchu rü muxüma ga nayexgumaãchiraüxü ga ore ga cuèxruügümaã nanangüexëë ga duüxügü. Natürü yema cuèxruügü rü tama yema duüxügüarü cuèxü nangupetü. ³⁴ Rü ore ga cuèxruügu ixuxüxícatama nixí ga norü nguxëëtae. Rü yixcama ga yexguma nanüxícèxgügu, rü norü ngüexügücèx meãma nanangoxëë ga guxüma.

Ngechuchu rü buanecüxü rü yuapexü ínayachaxãchixëë
(Mt 8.23-27; Lc 8.22-25)

³⁵ Rü yematama ngunexügu ga marü nachütachaügu, rü Ngechuchu rü ñanagürü nüxü ga norü ngüexügü: —¡Ngíxã rü naxtaxaarü tocutüwa taxí! —ñanagürü. ³⁶ Rü yexguma duüxügüna yéma inaxíãchi. Rü norü ngüexügü rü Ngechuchuxü nigagü nagu ga guma ngue ga marü nawa nayexmane. Rü yexgumarüü ta ga togü ga duüxügü rü náigü ga nguegügu ínayaxümücügü. ³⁷ Rü yexguma yaxãüyane rü inaxü ga wüxi ga buanecü ga taxüchicü. Rü yema na nataxüchixü ga buanecü, rü guma nguegu niyauxcuchichigü ga yuape, rü yexma nabaxügüchaü. ³⁸ Natürü ga Ngechuchu rü guma nguechinüwa wüxi ga cüxeruügu naca, rü yéma nape. Rü ínanaçaixgügü, rü ñanagürügü nüxü: —Pa Ngüexëëruüx, ¿éxna curü me nixí na nuxma ibaxügüxü? —ñanagürügü. ³⁹ Rü yexguma ínarüda ga Ngechuchu. Rü buanecüna nachogü rü ñanagürü nüxü ga guma naxtaxa: —¡Iyarüchiane rü íyachaxãchi! —ñanagürü. Rü ínayachaxãchi ga buanecü rü guxüwama ínachaxanemare. ⁴⁰ Rü yemawena ga Ngechuchu rü norü ngüexügüxü ñanagürü: —¿Tüxcüü ngẽmaãcü poraãcü pemuüë? ¿Ñuxma rü ta éxna tama aixcüma peyaxõgü? —ñanagürü. ⁴¹ Natürü nümagü ga norü ngüexügü rü poraãcü namuüë. Rü nügüna nacagüe rü ñanagürügü: —¿Texe éxna nixí ya daa rü èixrücü ya buanecü rü yuape rü naga naxínüëxü? —ñanagürügü.

5

Yatü ga Gadaráciãx ga ngoxogü nawa yexmagüxü
(Mt 8.28-34; Lc 8.26-39)

¹ Rü naxtaxaarü tocutüwa nangugü ga Gadáaraanewa. ²⁻³ Rü yexguma marü nguewa ínaxüegu ga Ngechuchu, rü yéma naxcèx nixü ga wüxi ga yatü ga ngoxo nawa yexmaxü. Rü yema yatü rü duüxëgüchíquëxewa

ne naxũ, yerũ yexma nixĩ ga yanaxauchigũnaxũ. Rũ taxũexũma nanguxũ na tayanáixũ, woo cadenamaã. ⁴ Rũ woo muẽxpũxcũna cadenamaã nayanẽxparagũ rũ nayanẽxchacũgũ, natũrũ nũma rũ guxũguma íraxũgu inanacauũgũama, rũ yemaãcũ taxũexũma nanguxũ. ⁵ Rũ ngunecũ rũ chũtacũ rũ yuetachiquẽxetanũgu rũ naxpũxgũgu nanaxauchigũane. Rũ yexma nanacaeane, rũ nutamaã nũgũgu napogũ. ⁶ Natũrũ yexguma yaxũgutama Ngechuchuxũ nadẽuxgu, rũ naxcẽx inaãñaãchi, rũ napẽxegu nayacaxãpũxũ. ⁷ Rũ aita naxũãcũma ñanagũrũ nũxũ: —¿Tũxcũũ nuã choxũ cuyachixewe, Pa Ngechuchux, Pa Tupanaxũchi Nanex? Rũ Tupanaegagu cuxũ chacẽexũ na tama ngũxũ choxũ quingexẽexũ —ñanagũrũ. ⁸ Rũ yemaãcũ nidexa ga yema ngoxo yerũ Ngechuchu rũ marũ ñanagũrũ nũxũ: —Pa ngoxox, ¡inaxũxũ nawa ya yima yatũ! —ñanagũrũ. ⁹ Rũ yexguma ga Ngechuchu rũ nũxna naca, rũ ñanagũrũ: —¿Tãcũ nixĩ i cuẽga? —ñanagũrũ. Rũ nũma ga ngoxo nanangãxũ, rũ ñanagũrũ: —Muxũchixũ nixĩ i chauẽga, erũ tamu i tomãx —ñanagũrũ. ¹⁰ Rũ porãcũ Ngechuchuxũ nacẽexũgũ na tama ínawoxũãxũcẽx ga yema naãnewa. ¹¹ Rũ yema nachicaarũ ngaicamana ga naxpũxpechinũwa rũ nayexmagũ ga muxũma ga cuchigũ ga yẽma chibũexũ. ¹² Rũ yemacẽx ga yema ngoxogũ rũ Ngechuchuxũ nacẽexũgũ, rũ ñanagũrũgũ: —¡Ngema cuchitanũwa toxũ namugũ na nãgu tachocuxũcẽx! —ñanagũrũgũ. ¹³ Rũ Ngechuchu rũ: —Ngũ —ñanagũrũ. Rũ yexguma ga yema ngoxogũ rũ guma yatũwa ínãchoxũ, rũ yema cuchigũgu nayachocu. Rũ yema cuchigũ ga wixgu 2000 ixĩgũxũ rũ inaxũãchi, rũ naxtaacutũarũ mẽxpũxũwa nayarũyuxgũ. Rũ yexma nayi. ¹⁴ Rũ yema cuchigũarũ dauruũgũ rũ íãnewa nabuxmũ. Rũ íãnewa rũ yema íãneãrũ ngaicamana ipeagũxũ ga duũxũgũtanũwa nũxũ nayarũxugũga ga yema ùpetũxũ. Rũ ga duũxũgũ rũ ínayadaugũ. ¹⁵ Rũ yexguma Ngechuchu íyexmaxũwa nangugũgu, rũ yẽma nũxũ nadaugũ ga guma yatũ ga ngoxoãxchirẽcũ. Rũ yẽma narũto, rũ naxãxchiru, rũ meãma naãẽxũ nacũex. Rũ porãcũ nãbaixãchiãẽgũ ga duũxũgũ. ¹⁶ Rũ yema cuchigũarũ dauruũgũ ga nũxũ daugũxũ ga tacũ na nũxũ ngupetũxũ ga guma yatũ ga ngoxoãxchirẽcũ rũ tacũ nũxũ na ngupetũxũ ga yema cuchigũ, rũ yema nixĩ ga togũ ga duũxũgũmaã nũxũ ixugũexũ ga guxũma ga yema ngupetũxũ. ¹⁷ Rũ yexguma yemaxũ naxĩnũẽgu ga duũxũgũ, rũ inanaxũgũe ga Ngechuchuxũ na nacẽexũgũxũ ga na ínaxũxũxũcẽx ga yema naãnewa. ¹⁸ Rũ yexguma wenaxãrũ ngegu yaxũegu ga Ngechuchu, rũ guma yatũ ga ngoxoãxchirẽcũ, rũ nũxũ nacẽexũ na Ngechuchuwe naxũxũcẽx. ¹⁹ Natũrũ ga Ngechuchu rũ tama nanaxwẽxe, rũ ñanagũrũ nũxũ: —¡Cuchiũwa naxũ rũ cutanũxũmaã nũxũ yarũxu i guxũma i ngẽma cuxcẽx naxũxũ ya Cori ya Tupana, rũ ñuxãcũ nũxũ na cungechaũtũmũxũ! —ñanagũrũ. ²⁰ Rũ nũma ga guma yatũ rũ ínixũ. Rũ inanaxũgũ ga guxũma ga Decaporíchiuanewa yexmagũne ga íãnegũwa nũxũ na yaxuxũ ga yema Ngechuchu naxcẽx ùxũ. Rũ guxũma ga duũxũgũ rũ nãbaixãchiãẽgũ.

*Yáiruxacũchiga rũ yema nge ga Ngechuchuchirugu ingõgũcũchiga
(Mt 9.18-26; Lc 8.40-56)*

²¹ Rũ yexguma ngegu naxtaxaarũ tocutũwa nataegugu ga Ngechuchu, rũ muxũma ga duũxũgũ rũ naxcẽx yẽma nangutaquẽxegũ. Rũ nũma rũ naxtaapechinũwa nayexma. ²² Rũ yexguma yẽma nayexmayane, rũ yẽma naxũtãwa nãgu ga ngutaquẽxepataũãrũ ãẽxgacũ ga Yáirugu ãegacũ. Rũ yexguma Ngechuchuxũ nadẽuxgu, rũ napẽxegu nanangũcuchi. ²³ Rũ porãcũ nũxũ nacẽexũ, rũ ñanagũrũ nũxũ: —Chauxacũ rũ ituraxũchi. Rũ chanaxwẽxe i ngẽma cuxũ na ngĩxũ cuyarũngõgũxũcẽx na ngĩxcẽx yataañexũcẽx rũ namaxũxũcẽx —ñanagũrũ. ²⁴ Rũ yexguma ga Ngechuchu rũ nawe narũxũ.

Rü muxüma ga duüxügü ínayaxümücügü. Rü yéma nayaxüxtügü. ²⁵ Rü yema muxü ga duüxügütanüwa iyexma ga wüxi ga nge ga 12 ga taunecü idaawecü namaã ga na naxãgüechaxü. ²⁶ Rü muxüma ga duturugü ngixü naxüxügü rü poraãcü ngúxü ngixü ningexëëgü. Rü yemaãcü natüçexma ngixü iguxëë ga guxcü ga ngirü dïeru. Natürü tama ngixcèx nitaaneega, rü niyexeraguchigüama ga ngirü ðaawe. ²⁷ Rü üpaacü togüexwa Ngechuchuchigaxü ixinü. Rü yemacèx yéma ixü. Rü natanüwa ga yema muxüma ga duüxügü rü Ngechuchuweama ne ixü rü naxchirugu iyangögü. ²⁸ Yerü ñaxügu irüxinü: —Ngëxguma chi naxchiruxümare chingögügu, rü chi chauxcèx nitaane — ñaxügu irüxinü. ²⁹ Rü yexgumatama ínayachaxãchi ga ngigü, rü nüxü iyacuèxãchi ga ngixinewa ga na ngixcèx yataanexü. ³⁰ Natürü ga Ngechuchu rü nüxü nicuèxãchi ga na nawa ínaxüxüxü ga pora. Rü naxcèx nadauegu ga yema muxüma ga duüxügü, rü nüxna naca, rü ñanagürü: —¿Texé tixí ya chauxchirugu ingögüxe? —ñanagürü. ³¹ Rü norü ngúexügü nanangãxügü, rü ñanagürügü: —Cuma nüxü cudau i ñuxre i duüxügü ngema cuxü na yaxütügüxü rü ngëxguma rü ta:

“¿Texé ya choxü ingögüxe?” ñacuxü —ñanagürügü. ³² Natürü ga Ngechuchu rü nüxü nidaugüãchiana na tüxü nadauxücèx ga na texé na tixü ga guxema nüxü ingögüxe. ³³ Rü yexguma ga yema nge rü ngirü muümaã yaduruxãcüma naxütawa ingu, yerü nüxü icuèx ga tacü na ngixü ngupetüxü. Rü napëxegu iyacaxãpüxü, rü aixcümamaxüchi namaã nüxü iyaxu ga guxüma. ³⁴ Rü nüma ga Ngechuchu rü ñanagürü ngixü: —Pa Chauxacüx, curüme erü cuyaxõ. ¡Rü taãëãcüma íxü, erü marü naxüxü i curü ðaawe! —ñanagürü. ³⁵ Rü yexguma íyadexayane, yéma nangugü ga ñuxre ga natanüxügü ga guma ngutaquëxepataüarü ãëxgacü rü ñanagürügü nüxü: —Cuxacü rü marü iyu. ¿Tüxcüü nüxü cuchixeweëcha ya Ngúexëëruü? —ñanagürügü. ³⁶ Natürü ga Ngechuchu rü tama nüxü nacuáxchaü ga yema duüxügüarü dexa. Rü yemacèx guma ngutaquëxepataüarü ãëxgacüxü ñanagürü: —¡Tãxü i cumüxü, rü yaxõmare! —ñanagürü. ³⁷ Rü yexguma ga Ngechuchu rü ínayagagü ga Pedru rü Chaütiágu rü Cuáü ga Chaütiágueneë. Natürü tama nanaxwëxe na texé ga togue nawe rüxixü. ³⁸ Rü yexguma guma ngutaquëxepataüarü ãëxgacüpatawa nangugügu, rü Ngechuchu nüxü nadau ga na íyacuxcuxü rü poraãcü aita naxüëãcüma naxauxexü ga duüxügü. ³⁹ Rü guma ípatagu naxücu ga Ngechuchu, rü ñanagürü: —¿Tüxcüü ípicuxcu rü ngëmaãcü pexauxe? Ngëma bucü rü tama iyu. Rü ipemare —ñanagürü. ⁴⁰ Rü nüxü nacugüecüraxüãma ga duüxügü. Natürü nüma ga Ngechuchu rü íãxtüwa nanamugü ga guxüma. Rü yema bucünatüçèx naca rü ngië, rü yema namücügü, rü namaã nixücu ga ínayexmaxüwa ga yema bucü. ⁴¹ Rü ngixmëxgu nayayauxãchi, rü ñanagürü ngixü: —Tarita cumi —ñanagürü. Rü ngëma ore rü ñaxüchiga nixí:

“¡Inachi, Pa Bucü, ñacharügü cuxü!” ñaxüchiga nixí. ⁴² Rü yexgumatama ga yema bucü ga 12 ga taunecü ngixü yexmëxcü, rü írüda rü iyaxü. Rü poraãcü nabaixãchiãëgü ga duüxügü. ⁴³ Natürü ga Ngechuchu rü poraãcü nüxna nanachuxu na taxüemaãma nüxü yaxugüexücèx ga yema ngupetüxü. Rü ñuxüchi nanamu na ngixü naxüwemügüxücèx ga yema bucü.

6

Nacharétuwa nayexma ga Ngechuchu (Mt 13.53-58; Lc 4.16-30)

¹ Rü yéma inaxüãchi ga Ngechuchu, rü guma íãne ga Nacharétu ga nawa nayaxünewatama naxü. Rü norü ngúexügü rü nawe narüxí. ² Rü yexguma ngüxchigaarü ngunexüwa nanguxgu rü inanaxügü ga na nangúexëëtaexü ga

ngutaquẽxepataũwa. Rũ yema muxũma ga duũxũgũ ga yema irũxĩnũẽxũ, rũ nabaixãchiãẽgũ. Rũ nũgũna nacagũe rũ ñanagũrũgũ: —¿Ngextá naxcèx nangux i guxũma i ngẽma nguxẽẽtae? ¿Rũ ngextá nanayaxu i ngẽma cuèx? ¿Rũ ñuxãcũ nanaxũ i ngẽma mexũgũ i taxũgũ i naxũxũ? ³ —¿Taux ěxna ñaã yĩxũ i carpinteru i Ngechuchu, i Mariane, ya Chaũtiágu rũ Yúche rũ Chimáũ rũ Yudaẽneẽ ixĩcũ? ¿Rũ taux ěxna i naẽyèxgũ rũ nuxma tatanũgu naxãchiũgũxũ? —ñanagũrũgũ. Rũ yemacèx ga yema duũxũgũ rũ tama naga naxĩnũechaũ. ⁴ Natũrũ ga Ngechuchu rũ ñanagũrũ nũxũ: —Wũxi i Tupanaãrũ orearũ uruũ rũ guxũwama i duũxũgũ rũ nũxũ nangechaũgũ. Natũrũ norũ ñãnewatama rũ natanũxũgũtanũwatama rũ napatawatama rũ tama aixcũma nũxũ nangechaũgũ —ñanagũrũ. ⁵ Rũ yemacèx taxuacũma yema nanaxũ ga muxũma ga mexũgũ ga Tupanaãrũ poramaã naxũxũ. Rũ noxretama ga duũxũgũ ga idaaweexũxũĩcatama ningõgũ rũ naxcèx nayataanexẽẽgũ. ⁶ Rũ nabaixãchiãẽ ga Ngechuchu, yerũ yema duũxũgũ rũ tama nũxũ nayaxõgũ.

Ngechuchu rũ norũ ngũexũgũxũ nimugũ na nũxũ yanaxugũexũcèx ga Tupanachiga

(Mt 10.5-15)

Rũ Ngechuchu rũ guma ngaicamagũne ga ñãnexãcũgũgu nixũgũchigũ, rũ nayangũexẽẽtanũ ga duũxũgũ. ⁷ Rũ naxcèx naca ga yema 12 ga norũ ngũexũgũ, rũ inanaxũgũ ga na namuãxũ ga taxrechigũ. Rũ nũxna nanaxã ga pora na ínawoxũãxũcèx ga ngoxogũ. ⁸ Rũ nũxna naxãga ga na taxuxũma íyangegũxũcèx ga norũ namawaxũ, rũ bai ga choca rũ bai ga pãũ rũ bai ga norũ díeru. Rũ nanaxwèxe ga naxnetũxũĩcatama na íyangegũxũ. ⁹ Rũ namaã nũxũ nixu na nacuaixcuxũ ga norũ chapatu. Natũrũ tama nanaxwèxe ga taxre ga naxchiru na íyangegũxũ. ¹⁰ Rũ ñanagũrũ nũxũ: —Rũ ngẽxguma wũxi ya ñãnewa wũxi ya ñgu pechocuxgu, jrũ ngẽxma pepegu ñuxmata pema ñuxgu ngema ipexĩãchix nawa ya yima ñãne! ¹¹ —Rũ ngẽxguma ngexnerũũne ya ñãnewa tama meã pexũ nayauxgũchaũgu rũ tama pexũ inaxĩnũechaũgu, jrũ ípechoxũ i ngema! Rũ ngẽxguma ipexĩãchigu, jrũ ipenapagũ i perũ ùxaxũcutũ na ngẽmawa nũxũ nacuèxgũxũcèx na nataxũchixũ tá i norũ poxcu i ngẽxguma naguxgu i naãne! —ñanagũrũ. ¹² Rũ yexguma inaxĩãchi ga norũ ngũexũgũ. Rũ duũxũgũmaã nũxũ nixugũe ga na nũxũ naxoexũcèx ga nacũma ga chixexũ rũ Tupanacèx na nadaugũxũcèx. ¹³ Rũ ínawoxũ ta ga muxũma ga ngoxogũ. Rũ chixũmaã yachagũãcũma nanameẽxẽẽ ga muxũma ga idaaweexũ.

Nayu ga Cuáũ ga baiũxẽẽruũ

(Mt 14.1-12; Lc 9.7-9)

¹⁴ Rũ Ngechuchuchigaxũ naxĩnũ ga ãẽxgacũ ga Erode, yerũ guxũwama duũxũgũ poraãcũ nachiga nidexagũ. Rũ yexguma ga Erode rũ ñanagũrũ: —Rũ ngẽma Ngechuchu nixĩ i Cuáũ i baiũxẽẽruũ ixĩxũ rũ wena namaxũ, rũ ngẽmacèx nixĩ i nũxũ nangẽxmaxũ i pora na naxũãxũcèx i ngẽma taxũ i mexũ i Tupanaãrũ poramaã naxũxũ. ¹⁵ Natũrũ ga togũ rũ ñanagũrũgũ: —Nuxcũmaũcũ ga orearũ uruũ ga Ería nixĩ —ñanagũrũgũ. Rũ togũ rũ ñanagũrũgũ: —Wũxi i Tupanaãrũ orearũ uruũ i nuxcũmaũgũxũrũũ nixĩ —ñanagũrũgũ. ¹⁶ Natũrũ yexguma yemaxũ naxĩnũgu ga Erode, rũ ñanagũrũ: —Rũ ngẽma Ngechuchu nixĩ i Cuáũ ga chorũ churaragũxũ chidayenaxãxẽẽchiréxũ, rũ ñuxma rũ wenaxãrũ namaxũ —ñanagũrũ. ¹⁷ Rũ yema ñanagũrũ ga Erode yerũ marũchiréx Cuáũxũ niyaxu rũ poxcupataũgu cadenamaã nayachota. Rũ yemaãcũ nanaxũ ngĩgagu ga naxmèx ga Erodía ga naẽneẽ ga Piripimèxchiréx ixĩcũ ga ngĩxũ napucũ ga Erode. ¹⁸ Yerũ ũpaacũ ga Cuáũ rũ Erodemaã ñanagũrũ: —Tama name i cuxmèxũ cuyaxĩxẽẽ

i cueneēmèx —ñanagürü. ¹⁹ Rù yemacèx ga Erodía rù poraäcü Cuáüchi ixai rù inaxwèxe ga na yamáãxü, natürü poraäcü ngixü naguxcha. ²⁰ Yerü ngite ga Erode rù Cuáüxü namuü, yerü nüxü nacuèxchirèx na wüxi ga yatü ga mecü rù üüncü na yixü, rù yemacèx nixi ga naetüwa nachogüxü. Rù yexguma Cuáüârü orexü naxinügu ga Erode, rù naxoegaãe, natürü meã nüxü inarüxinü. ²¹ Natürü wüxi ga ngunexü nawa nangu na ngixü natauxchaxü na yamáãxücèx ga Cuáü, ga yexguma Erodearü taunecüarü ngunexüwa nanguxgu rù wüxi ga peta ga taxü naxüxgu naxcèx ga norü ñatügumaëgüxü ga äëxgacügü, rù norü churaragüarü äëxgacügü rù yema Gariréaanecüäx ga corigü ga taxügü. ²² Rù yema petawa iyaxücu ga Erodíaxacü, rù yema petatanüxpèxewa íyañaächixüchigüxü. Rù poraäcü norü me iyixi ga Erode rù norü petatanüxügü. Rù yemacèx ga nüma ga äëxgacü ga Erode rù ñanagürü ngixü ga yema pacü: —¡Choxna naxcèx naca i tacü i cunaxwèxexü, rù tá cuxna chanaxã! —ñanagürü. ²³ Rù aixcümáxüchi ngímaã inaxuneta, rù ñanagürü: —Ngèxürüxü i tacü i choxna naxcèx cuçaxü rù tá cuxna chanaxã, woo ngäxügu i chorü naãne yixigu —ñanagürü. ²⁴ Rù nüxna iyaxügachi, rù ngíena iyaca, rù ngígürügü: —¿Tacü i cunaxwèxexü na naxcèx íchaçaxü? —Ngígürügü. Rù ngíe ngixü ingäxü, rù ngígürügü: —¡Naxcèx ínaca i Cuáü ya baiüxëëruüëru! —ngígürügü. ²⁵ Rù yexgumatama ga yema pacü rù paxa iyaxücu ga äëxgacüxütawa rù ngígürügü: —Chanaxwèxe i ñuxmatama paxa wüxi ya poratugu choxna cunaxã i Cuáü ya baiüxëëruüëru —ngígürügü. ²⁶ Rù nüma ga äëxgacü rù poraäcü inayarümaächi, natürü yema norü petatanüxpèxewa marü ngímaã na inaxunetaxücèx, rù tama ngixü nawomüxëëchaü. ²⁷ Rù yemacèx ga Erode rù yexgumatama yéma ínapoxcuxüwa nanamu ga wüxi ga churara na naxütawa nangeaxücèx ga Cuáüëru. ²⁸ Rù poxcupataüwa naxü ga yema churara, rù Cuáüxü nidaeru. Rù wüxi ga poratugu äëxgacüxütawa nanange ga yema naëru. Rù yema pacüna nanaxã. Rù ngíma rù ngíena iyaxã. ²⁹ Rù yexguma yemaxü nacuächigagügu ga norü ngúexügü ga Cuáü, rù yéma poxcupataüwa nayayauxgü ga naxüne, rù inayatèxgü.

Ngechuchu rù nanachibüexëë ga 5000 ga yatügü

(Mt 14.13-21; Lc 9.10-17; Cu 6.1-14)

³⁰ Rù yemawena rù yema norü ngúexügü ga yamugüxü rù Ngechuchumaã nangutaquèxegü. Rù namaã nüxü nixugüe ga guxüma ga yema naxügüxü rù yema nangüxëëtaegüxü. ³¹ Rù Ngechuchu rù ñanagürü nüxü: —¡Nuã pexi, rù ngíã, wüxi i nachica i ngextá taxúema íxãpataxüwa taxí, na paxaächi ngèxma yarüngügüxücèx! —ñanagürü. Rù yema ñanagürü yerü namu ga duüxügü ga yéma ingugütanücüxü rù woeguxü ga togü. Rù yemacèx ga Ngechuchu rù norü ngúexügü rù woo na nachibüexücèx rù nangechicagü. ³² Rù yemacèx wüxi ga nguegu nichoü, rù noxrüwama wüxi ga nachica ga taxúema íxãpataxüwa naxi. ³³ Natürü muxüma ga duüxügü nüxü nadaugü ga yexguma inaxiãchigu, rù nüxü nacuèxgü ga texégü na yixü. Rù yemacèx guxüne ga guma íänegücüäx ga duüxügü, rù dauxchitagu nibuxmü rù napèxegu nayayi. ³⁴ Rù yexguma nguewa ínaxüegu ga Ngechuchu, rù nüxü nadau ga yema muxüma ga duüxügü. Rù nüxü nangechaütümügü yerü ñoma carnerugü ga ngearü dauruäxgüxürü nixigü. Rù inanaxügü ga na nangúexëëãxü ga muxüma ga norü ore. ³⁵ Rù yexguma marü nayáuanegu, rù norü ngúexügü rù naxcèx naxi, rù ñanagürügü: —Marü nayáuanexüchi rù ñãã rù wüxi i nachica i taxúema nagu äpataxü nixi. ³⁶ —Rù ngèmacèx name nixi i ícuyamugü i duüxügü na namapechinüwa ipeagüxü i duüxügüxütawa rù íänexácügü ya ngaicamagünewa naxixücèx na ngema norü ñnacèx yataxegüxücèx —ñanagürügü. ³⁷ Natürü ga Ngechuchu rù nanangäxü, rù ñanagürü

nüxü: —¡Pematama penaxüwemü! —ñanagürü. Rü nümagü nanangãxügü rü ñanagürügü: —¿Éxna cunaxwèxe i 200 tachinü i dīeru naguxü i pãücèx nüxü tayataxexü na ngēmamaã tanachibüexëxücèx? —ñanagürügü. ³⁸ Rü yexguma ga Ngechuchu rü ñanagürü nüxü: —¿Ñuxre i pãü pexü nangëxma? ¡Rü ípeyadèux! —ñanagürü. Rü yexguma íyadaugüãgu, rü ñanagürügü nüxü: —Toxü nangëxma i wüximëxpüx i pãü rü taxre i choxni —ñanagürügü. ³⁹ Rü yexguma ga Ngechuchu rü duüxügüxü namu na ñuxrechigü nügüxütawa rütogüxücèx ga maxëtèxewa. ⁴⁰ Rü ínarütogü ga 100 chigü rü 50 chigü ga duüxügü. ⁴¹ Rü yexguma ga Ngechuchu rü nanade ga yema wüximëxpüx ga pãü rü yema taxre ga choxni. Rü daxügüxü ga naãnegu nadawenüácüma Tupanana moxë naxã. Rü inanabücu ga yema pãü, rü norü ngúexügüna nanana na yema duüxügüxü yanuãxücèx. Rü yema taxre ga choxni rü ta guxüma ga yema duüxügüxü nüxü nayanuxëë. ⁴² Rü guxüma nachibüe ñuxmata meãma nüxü yangu. ⁴³ Rü yemawena rü 12 ga pexchigü nanapagüamatama namaã ga yema pãü rü choxni ga íyaxügüxü. ⁴⁴ Rü yema yéma pãügü ngõxgüxü rü 5000 ga yatügü nixí.

Dexáétügu nixü ga Ngechuchu
(Mt 14.22-27; Cu 6.16-21)

⁴⁵ Rü yemawena ga Ngechuchu rü duüxügüxü íyamugüyane rü wüxi ga nguëgu nayachoüxëë ga norü ngúexügü na yoxni naxtaxaarü tocutüwa Bechaídawa naxíxücèx. ⁴⁶ Rü yexguma duüxügüxü íyamugüguwena, rü mèxpúnëwa naxü ga Ngechuchu na yéma yayumüxëxücèx. ⁴⁷ Rü yexguma marü nachütagu, rü naxtaxaarü ngãxütüwa nayexmagü ga norü ngúexügü. Rü Ngechuchu rü nüxícatama dauxchitawa nayaxüãchi. ⁴⁸ Rü nüxü nadau na guxchaxüácüma yaxãgüxü ga norü ngúexügü, yerü ga buanecü rü nawaama nabuxuchi. Rü yexguma marü yangunechaügu, rü Ngechuchu rü dexáétügu nawe narüxü. Natürü ñoma nüxü naxüpetüchaüxürü nügü nixíxëë. ⁴⁹⁻⁵⁰ Rü yexguma norü ngúexügü nüxü daugügu ga dexáétügu na yaxüxü, rü nagu narüxínüë ga wüxi ga naxchiximare na yíixü. Rü yemacèx aita naxüe, yerü guxüma nüxü nadaugü rü poraãcü nabaixãchiãëgü. Natürü yexgumatama ga Ngechuchu rü namaã nidexa rü ñanagürü nüxü: —¡Peporae! Rü chomachirëxtama chixí. ¡Tãxü i pemuüëxü! —ñanagürü. ⁵¹⁻⁵² Rü nguëgu nixüe, rü inarüxó ga buanecü. Natürü nümagü ga norü ngúexügü rü nabaixãchiãëgümare yerü woo nüxü na nadaugüxü ga yema mexü ga Tupanaãrü poramaã naxüxü ga Ngechuchu ga yexguma yema pãü yamuxëëgu, natürü tama nüxna nacüë x-ãchie na Tupana Nane na yíixü yerü nüxü naguxcha na yaxögüãxü.

Yencharétuanëwa Ngechuchu nanameëxëë ga idaaweexü
(Mt 14.34-36)

⁵³ Rü yexguma marü yangüügu ga naxtaawa, rü Yencharétuanëwa nangügü. Rü yexma naxãnacügu nanangaxügü ga naweü. ⁵⁴ Rü yexguma nguëwa ínachoügu, rü yexgumatama ga duüxügü rü nüxü nicuëxãchitanü ga Ngechuchu na yíixü. ⁵⁵ Rü yema naãnewa rü guxüne ga ígüwa nabuxmü ga yema duüxügü. Rü yexguma nüxü nacüëxgügu ga ngextá na nayexmaxü ga Ngechuchu, rü yéma norü carüügügu naxcèx nanagagü ga idaaweexü. ⁵⁶ Rü guxüwama ga ngextá íyanguchigüxüwa ga Ngechuchu, ga íãnexãcügüwa rü íãnegü ga itaxünewa, rü íãnepechinüwa, rü yexma ítamüpechinügu naxcèx nayamugü ga idaaweexü. Rü nüxü nacëxügü na tama nüxna nachüxãxücèx na naxchirupechinügumare yangögügüxücèx. Rü guxüma ga yema nüxü ingögüëxü, rü naxcèx nitaanëgü.

7

*Tacü nixĩ i Tupanapëxewa duïxügüxü chixexëëxü
(Mt 15.1-20)*

¹ Rü Ngechuchucèx naxĩ ga Parichéugü namaã ga ñuxre ga ngúexëëruüügü ga mugüwa nguxëëtaegüxü ga Yerucharéüwa ne ixü. ² Rü yexguma ñuxre ga Ngechuchuarü ngúexügüxü nadaugügu ga tama Yudíugücüma na yanguxëëgüxü, rü tama Yudíugü yauxmëxgüxürüü na nayauxmëxgüxü naxüpa na nachibüexü, rü chixri nachiga nidexagü. ³ Yerü nümagü ga Parichéugü rü guxüma ga togü ga Yudíugü rü nagu naxĩ ga norü oxigücüma na nayauxmëxiraxü na yemaãcü Tupanapëxewa nügü yamexëëgüxü naxüpa ga na nachibüexü. ⁴ Rü ngëxguma taxepataüwa ne naxíxgu ga nümagü rü tama nachibüe ega tama ngëmaãcü nügü nayauxmëxiragu. Rü nangëxma i muxüma i togü i nuxcümaüxü i nacümagü. Rü ngëmacèx nagu naxĩ i ngëma nacümagü na Tupanacèx nayauxgüãxü i norü pochiyugü rü basugü rü paneragü rü pechicaxügü. ⁵ Rü yemacèx ga yema Parichéugü rü ngúexëëruüügü rü Ngechuchuna nacagü, rü ñanagürügü: —¿Tüxcüü i curü ngúexügü i tama nagu naxíxü i ngëma tórü oxigücüma rü tama toma tayauxmëxgüxürüü nayauxmëxgüxü naxüpa na nachibüexü? —ñanagürügü. ⁶ Natürü Ngechuchu nanangãxü rü ñanagürü: —Pa Duïxügü ya Pegü Naxaixcümaraügüxe, rü aixcüma pechiga nixĩ ga yema ore ga nuxcümaücü ga Tupanaärü orearü uruü ga Ichaxía ümatüxü ga ñaxü:

“Ñaa duïxügü rü naãxmaãmare choxü nicuèxüügü, natürü naãëwa rü tama chaugu narüxñüë. ⁷ Rü taxuwama name na ngëmaãcü natücèxma choxü yacuèxüügüxü. Erü guxüma i ngëma norü nguxëëtae rü yatügüarü mugümare nixĩ, rü tama aixcüma chorü mu nixĩ”,

ñaxü. ⁸ —Rü pema i ñuxma rü aixcüma nüxü perüxoe i Tupanaärü mugü na nagu pexíxücèx i ngëma duïxügücümamare ixíxü —ñanagürü. ⁹ Rü yexgumarüü ta ñanagürü nüxü: —Pema rü penangexrü i Tupanaärü mugü na pecümagügutama pexíxücèx. ¹⁰ —Yerü ga Moïché rü ñanagürü:

“¡Tüxü nangechaü ya cunatü rü cue!”

ñanagürü. Rü ñanagürü ta:

“Texé ya tümanatümaã rü ëxna tümaëmaã chixexü ixügüxe, rü ãëxgacü tá tümamaã nanaxuegu na tayuxücèx”, ñanagürü. ¹¹ —Natürü pema rü ñaperügügü:

“Marü name ega wüxi ya yatü nanatüxü rü naëxü ñaxgu: ‘Taxucürüwama chorü ngëmaxümaã cuxü charüngüxëë, erü guxüma i chorü ngëmaxü rü marü Tupanana chanaxã’,” ñaxgu. ¹² —Rü ngëxguma texé ngëma ñagügu, rü pecèx rü marü namexü na tama tümanatüxü rü tümaëxü tarüngüxëëxü. ¹³ —Rü ngëmaãcü ipeyanaxoxëë i Tupanaärü mugü, na nagu pexíxücèx i pecümagütama i togüwa pexüexëëxü. Rü ngëxgumarüü ta muxüma i to i pecümagü i ngëmarüü ixíxügu pexĩ —ñanagürü. ¹⁴ Rü yexgumawena duïxügücèx naca ga Ngechuchu, rü ñanagürü nüxü: —¡Meã choxü iperüxñüë, rü nüxü pecuá i ñaa chorü ore! ¹⁵ —Rü taxuüma i tacü i düxétüwa ne üxü rü taëxwa ixücuxü nixĩ i Tupanapëxewa tüxü chixexëëxü. Natürü ngëma taãëwa ne üxü, rü ngëma waxi nixĩ i tüxü chixexëëxü i Tupanapëxewa. ¹⁶ —Rü ngëxguma pixãchixëgu, ¡rü nüxü pexíñüë i ngëma ore! —ñanagürü. ¹⁷ Rü yexguma Ngechuchu duïxügüna ixügachigu rü ipatagu naxücuxgu, rü norü ngúexügü nüxna nacagü nachiga ga yema nguxëëtae. ¹⁸ Rü nüma rü ñanagürü nüxü: —¿Pema rü ta ëxna tama nüxü pecuèxéga i ngëma? ¿Éxna tama i nüxü

pecuáxü na taxuüma i tacü i düxétüwa ne üxü rü taèxwa ixücuxü yïxü i Tupanapëxewa tüxü chixexëëxü? ¹⁹ —Erü guxüma i ngëma düxétüwa ne üxü rü taèxwa ixücuxü, rü tama taãëwa nangu. Natürü taanüwa naxümare na yixcama taxünewa ínaxüxüxcèx —ñanagürü. Rü yemaãcü nüxü nixu na guxüma i õna rü namexü na nangõxü. ²⁰ Rü ñanagürü ta: —Rü ngëma duüxüãëwa ne üxü, rü ngëma waxi nixi i Tupanapëxewa nachixexëëxü. ²¹⁻²² —Erü norü aixepewa i naãëwa nixi i ne naxüxü i muxüma i chixexügü. Rü ngëma nixi i chixexügu na naxinüxü, rü naxüneärü ngüchaüwe na naxüxü, rü na nangïxü, rü na namáëtaxü, rü naí i ngemaã na inapexü, rü togüarü ngëmaxü na nüxü nanguchaüxü, rü chixexü na naxüxü, rü na yadoratèxáxü, rü chixexü i nacümagügu na naxáüxü, rü na yaxáüxüachiwèxexü, rü na naxoregütèxáxü, rü nügü na yacuèxüüxü, rü tama meã naãëxü na nacuáxü. ²³ —Rü guxüma i ngëma chixexügü rü duüxüärü aixepewa nixi i ne naxixü, rü ngëma nixi i Tupanapëxewa nachixexëëxü —ñanagürü.

*Wüxi ga ngecü ga to ga nachiuãnecüãx ga Ngechuchuaüxü yaxõcüchiga
(Mt 15.21-28)*

²⁴ Rü yemawena rü ñãne ga Tiru nawa yexmaxü ga naãnewa naxü ga Ngechuchu. Rü yéma wüxi ga ípatawa nangu, natürü tama nanaxwèxe na texé nüxü cuáxü ga yéma na nanguxü. Natürü taxuacüma nügü inicux. ²⁵ Rü paxama nüxü icuáchiga ga wüxi ga nge ga ngïxácüwa ngoxo yexmèxcü. Rü yéma ixü, rü Ngechuchupëxegu iyacaxãpüxü. ²⁶ Rü yema nge rü to ga nachiuãnecüãx ga Chiropeníchiucüãx iyixi. Rü Ngechuchucèx iyaxü, rü nüxü icèèxü na ngïxácüwa ínatèxüchiãxüxcèx ga yema ngoxo. ²⁷ Natürü ga Ngechuchu rü ñanagürü ngïxü: —Name nixi i taxacügüxüxira tachibüexëë. Erü tama name i taxacügüna tanayaxu i norü õna na airugüna naxãxüxcèx —ñanagürü. [Rü yema ñanagürü yerü nümagü ga Yudiügu rü nügü nixugüe na Tupanaxácügüxüchi yixigüxü rü yema togü rü ñoma airugürüü na yixigüxü.] ²⁸ Natürü ngïma ga yema nge rü inangãxü, rü ngïgürügü: —Aixcüma nixi i curü ore, Pa Corix, natürü woo airugü rü ta nanangõx i ngëma õnatüchi i mechatüügu nayixëëxü i ngëma ípataarü yoraxacügü —ngïgürügü. ²⁹ Rü yexguma ga Ngechuchu rü ñanagürü ngïxü: —Aixcüma name nixi i ngëma nüxü quixuxü. Rü marü name i cutaegu, erü ngëma ngoxo rü marü ínaxüxü ngïwa i cuxacü —ñanagürü. ³⁰ Rü yexguma ngïpatawa nanguxgu ga yema ngecü, rü yema ngïrü ngürücarewa ngïxü iyanguéü ga ngïrü bucü. Natürü marü ngïxna ínaxüxü ga yema ngoxo.

Ngechuchu nanamexëë ga wüxi ga yatü ga ngauchixëcü rü moxücü

³¹ Rü Tiruanewa nataegu ga Ngechuchu. Rü Chidãüärü ñãnewa naxüpetü, rü ñuxüchi Decaporíchiuaneärü ñãnegüwa rü ta naxüpetü rü ñuxmata Gariréaaneärü naxtaawa nangu. ³² Rü yéma naxütawa nanagü ga wüxi ga yatü ga ngauchixëcü rü moxücü, rü nüxna naxcèx nacagü ga nüxü na yangögüxüxcèx. ³³ Rü yexguma ga Ngechuchu rü noxrüwama duüxügüna nanaga. Rü naxmachixëgu nixuxmèx, rü naxbüxágümaã nügü yawaixmèxëëcüma norü conügu ningögü. ³⁴ Rü yemawena rü daxü nadawenüãcüma yaxna narüngü, rü guma yatüxü ñanagürü: —Epéta —ñanagürü. Rü ngëma rü: “¡Ingoxna!” ñaxüchiga nixi. ³⁵ Rü yexgumatama ningoxnamachixë ga guma ngauchixëcü, rü norü conü rü marü narüme rü meã nidexa. ³⁶ Rü Ngechuchu rü duüxügüxü namu na taxúemaãma nüxü yaxugüexüxcèx. Natürü yexguma yexeraãcü duüxügüna nachüxãgu ga na taxúemaãma nüxü yaxugüexüxcèx ga nachiga rü yexeraãcü nüxü nixugüeama. ³⁷ Rü poraãcü nãaixãchiãëgü ga duüxügü, rü ñanagürügü: —Meãma nanaxü i

guxŭma rŭ woo ngauchixēgŭxŭ rŭ nayangoxnamachixēgŭxēē, rŭ ngeèxgŭxŭ rŭ nayadexagŭxēē –ñanagŭrŭgŭ.

8

Ngechuchu nanachibŭexēē ga 4000 ga duŭxŭgŭ (Mt 15.32-39)

¹ Rŭ wŭxi ga ngunexŭgu wenaxārŭ naxcèx naxītaquēxe ga muxŭma ga duŭxŭgŭ, rŭ nŭxŭ nataxuma ga norŭ ònagŭ. Rŭ Ngechuchu rŭ norŭ ngúexŭgŭcèx naca, rŭ ñanagŭrŭ nŭxŭ: ² –Choxŭ nangechaŭtŭmŭŭgŭ i ñaã duŭxŭgŭ, erŭ marŭ tomaēxpŭx i ngunexŭ nuã chauxŭtawa nangēxmagŭ, rŭ nataxuma i nawemŭ i nangoxgŭxŭ. ³ –Rŭ ngēxguma chi ngēmaãcŭmare íchayamugŭgu, rŭ chi ngŭrŭãchi namagu tá nayaturae, erŭ nŭmaxŭgŭ rŭ yaxŭwama ne naxī –ñanagŭrŭ. ⁴ Rŭ norŭ ngúexŭgŭ rŭ nanangãxŭgŭ, rŭ ñanagŭrŭgŭ: –¿Natŭrŭ ñuxãcŭ tá tanachibŭexēē i nŭma i ngextá taxúema íxãpataxŭwa? –ñanagŭrŭgŭ. ⁵ Rŭ Ngechuchu nŭxna naca, rŭ ñanagŭrŭ: –¿Ñuxre i pãu pexŭ nangēxma i pemax? –ñanagŭrŭ. Rŭ nŭmagŭ nanangãxŭgŭ, rŭ ñanagŭrŭgŭ: –Toxŭ nangēxma i 7 i pãu –ñanagŭrŭgŭ. ⁶ Rŭ ñuxŭchi ga Ngechuchu rŭ duŭxŭgŭxŭ namu na ñaxtŭanewa natogŭxŭcèx. Rŭ nanade ga yema 7 ga pãu, rŭ Tupanana moxē naxã. Rŭ ñuxŭchi inanabŭcu, rŭ norŭ ngúexŭgŭna nanana. Rŭ nŭmagŭ rŭ duŭxŭgŭxŭ nayanu. ⁷ Rŭ nŭxŭ nayexma ta ga ñuxre ga choxnixãcŭgŭ. Rŭ Ngechuchu rŭ Tupanana moxē naxã, rŭ ñuxŭchi norŭ ngúexŭgŭxŭ namu na iyanuãxŭcèx. ⁸ Rŭ guxŭma ga yema duŭxŭgŭ rŭ meãma nachibŭe ñuxmata meã nŭxŭ yangu. Rŭ yexguma rŭ ta 7 ga pexchi nanapagŭ namaã ga yema íyaxŭgŭxŭ. ⁹ Rŭ yema duŭxŭgŭ ga yema chibŭexŭ rŭ maneca 4000 nixī. Rŭ yemawena ga Ngechuchu rŭ duŭxŭgŭxŭ ínimugŭ. ¹⁰ Rŭ ñuxŭchi wŭxi ga ngegu nixŭe namaã ga norŭ ngúexŭgŭ, rŭ Damanútaanewa naxŭ.

Parichéugŭ naxcèx ínacagŭ ga wŭxi ga cuèxruŭ ga Tupanaãrŭ poramaã ŭxŭ (Mt 16.1-4; Lc 12.54-56)

¹¹ Rŭ Ngechuchuxŭtawa nangugŭ ga Parichéugŭ, rŭ inanaxŭgŭe ga na namaã yaporagatanŭcŭŭxŭ. Rŭ nŭxna nacagŭe na nŭxŭ nŭxŭ nadauxēxŭcèx ga wŭxi ga cuèxruŭ ga Tupanaãrŭ poramaã naxŭxŭ, na yemaãcŭ nŭxŭ naxŭgŭxŭcèx, rŭ nŭxŭ nacuèxgŭxŭcèx ngoxi aixcŭma Tupana Nane yīxŭ. ¹² Rŭ Ngechuchu rŭ poraãcŭ yaxna narŭngŭ, rŭ ñanagŭrŭ: –¿Tŭxcŭŭ i ñaã duŭxŭgŭ naxcèx ínacagŭ i wŭxi i cuèxruŭ i Tupanaãrŭ poramaã ŭxŭ? Rŭ aixcŭma pemaã nŭxŭ chixu rŭ bai i wŭxi i cuèxruŭ tá nŭxŭ chawēx –ñanagŭrŭ. ¹³ Rŭ yema ñaxguwena, rŭ nŭxna yema nixŭ ga yema duŭxŭgŭ. Rŭ wenaxārŭ ngegu nixŭe rŭ naxtaxaarŭ tocutŭwa naxŭ.

Parichéuarŭ pãuãrŭ puxēēruŭchiga (Mt 16.5-12)

¹⁴ Natŭrŭ ga norŭ ngúexŭgŭ rŭ nŭxŭ inayarŭngŭmaē ga norŭ òna na íyangegŭxŭ, rŭ wŭxixicatama ga pãu nŭxŭ nayexma ga nguewa. ¹⁵ Rŭ yexguma ga Ngechuchu rŭ nayaxucŭxēgŭ, rŭ ñanagŭrŭ nŭxŭ: –¿Dŭcèx, pexuãē naxcèx i Parichéugŭarŭ rŭ Erodearŭ pãuãrŭ puxēēruŭ! –ñanagŭrŭ. ¹⁶ Rŭ yema norŭ ngúexŭgŭ rŭ inanaxŭgŭe na nŭgŭmaã ñagŭxŭ: –Ngēma ñanagŭrŭ tŭxŭ erŭ tama tawemŭ ta ítingegŭ –ñanagŭrŭgŭ. ¹⁷ Natŭrŭ ga Ngechuchu rŭ nŭxŭ nacuèxama na yema ñagŭxŭ, rŭ yemacèx ñanagŭrŭ nŭxŭ: –¿Tŭxcŭŭ “Tangearŭ ònaãx”, ñaperŭgŭgŭ? ¿Éxna ñuxma rŭ ta tama nŭxŭ pecuèxgŭéga rŭ tama nŭxŭ picuèxãchitanŭ i ngēmachiga? ¿Éxna pexcèx naxē i ngēma? ¹⁸ Pema rŭ pexãxētŭgŭchirēx, ¿rŭ ñuxãcŭ i tama nŭxŭ pedauxŭ? Rŭ

pexāxmachiḡēgüchirēx, ḡrü ñuxācü i tama nüxü pexĩnüēxü? ḡRü ēxna tama nüxna pecuēxāchie ga yexguma chayamuxēēgu ga yema pāü rü choxni? ¹⁹ — Rü yexguma yema 5000 ga duḡxüḡüxü chayanuxgu ga yema wüximēēxpüx ga pāü, ḡrü ñuxre ga pexchigü yĩxü ga napagücü ga yexguma penadexgu ga yema íyaxüḡüxü? —ñanagürü. Rü nümagü nanangāxüḡü rü ñanagürüḡü: — Rü 12 ga pexchigü —ñanagürüḡü. ²⁰ Rü ñuxüchi ñanagürü ta ga Ngechuchu: —Rü yexguma yema 4000 ga duḡxüḡüxü chayanuxgu ga yema 7 ga pāü, ḡrü ñuxre ga pexchigü yĩxü ga napagücü ga yexguma penadexgu ga yema íyaxüḡüxü? —ñanagürü. Rü nanangāxüḡü rü ñanagürüḡü: —7 ga pexchigü —ñanagürüḡü. ²¹ Rü yexguma rü ñanagürü nüxü: —ḡRü ñuxma rü ta taütama nüxü pecuēxḡüégaxü na Parichéugücüma rü Erodecüma i chixexüchiga yĩxü i ngēma pāüärü puxēēruügu pemaā chixuxü? —ñanagürü.

Ngechuchu rü nanamexēē ga wüxi ga ngexetücü ga Bechaídawa

²² Rü yemawena rü Bechaídaarü ñānewa nangugü. Rü yéma Ngechuchuxütawa nanagagü ga wüxi ga ngexetücü. Rü nüxü nacèèxüḡü na nüxü yangōḡüxüçèx. ²³ Rü Ngechuchu rü guma ngexetücümeḡēgu nayayauxāchi, rü ñāneärü yéamaxüra nanaga. Rü yéma naxbüxágümaā nayawaixetüxēē, rü ñuxüchi naxētügu ningōḡü, rü nüxna naca ngoxi marü ḡacüxü nadau. ²⁴ Rü yexguma ga guma ngexetücü rü inanaxüḡü ga na yadauchixü. Rü ñanagürü: —Nüxü chadau i duḡxüḡü i ñoma naĩḡü i ixixünerüü ixĩḡüxü —ñanagürü. ²⁵ Rü yexguma ga Ngechuchu rü wenaxärü naxētügu ningōḡü. Rü nüma ga guma yatü rü meāma inadawenü. Rü yemaācü naxcèx nitaane rü meāma naxcèx nangox ga guxüma. ²⁶ Rü yemawena ga Ngechuchu rü napatawa nanamu. Rü namaā nüxü nixu na tama ñānecèx nataeguxü.

Pedru nüxü nixu rü Ngechuchu nixĩ ya yima Tupana nüxü unetacü ya Cristu (Mt 16.13-20; Lc 9.18-21)

²⁷ Rü yemawena rü Checharéa ga Piripuanewa yexmane ga ñānexācüḡüwa naxü ga Ngechuchu norü ngüexüḡümaā. Rü namawa rü Ngechuchu rü norü ngüexüḡüna naca, rü ñanagürü nüxü: —ḡÑuxü ñagüxü i duḡxüḡü i chauchiga na texé chiixü i chomax? —ñanagürü. ²⁸ Rü norü ngüexü nanangāxüḡü rü ñanagürüḡü: —Nangēxma i duḡxüḡü rü:

“Cuáü ya baiüxēēruü quixĩ”, ñagüxü, rü togü i:

“Ería quixĩ”, ñagüxü, rü togü rü:

“Wüxi ga nuxcümaücü ga Tupanaärü orearü uruü quixĩ”, ñagüxü —ñanagürüḡü. ²⁹ Rü yexguma Ngechuchu rü nüxna naca rü ñanagürü: —ḡRü pema i ñuxü ñapeḡüḡüxü choxü na texé chiixü? —ñanagürü. Rü Pedru nanangāxü rü ñanagürü: —Cuma nixĩ i Cristu i Tupana cuxü unetacü quiixü —ñanagürü. ³⁰ Rü yexguma ga Ngechuchu rü norü ngüexüḡüxü namu na taxüemaāma nüxü yaxugüexüçèx ga yema ore ga nachiga.

Ngechuchu nanaxunagü ga norü yuchiga (Mt 16.21-28; Lc 9.22-27)

³¹ Rü yemawena rü Ngechuchu inanaxüḡü ga norü ngüexüḡümaā nüxü na yaxuxü ga ḡacü tá nüxü na üpetüxü. Rü ñanagürü nüxü: —Choma i Tupana Nane na duḡxüxü chiixü, rü poraācü ngüxü tá chinge. Rü choxü tá naxoxḡü i Yudíḡüarü āēxgacüḡüerugü, rü paigüarü āēxgacüḡü, rü ngēma ngüexēēruüḡü i Moĩchearü mugüwa nguxēētaegüxü. Rü tá choxü nimèxḡü, natürü tomaēxpüx i ngunexüḡü rü wena táxarü chamaxü —ñanagürü. ³² Rü yema ore rü meāma namaā nanangoxēē. Natürü yexguma ga Pedru rü nüxĩca noxrüwama Ngechuchuxü naga, rü inanaxüḡü ga na naxucüxēāxü

na tama yemaãcü yadeaxüçèx. ³³ Natürü ga Ngechuchu rü nadauegu, rü norü ngúexügüxü nadawenü. Rü Pedruxü nanga, rü ñanagürü: —¡Choxna ixügachi, Pa Chatanáx! Cuma rü tama Tupana nagu rüxñnügü curüxñnü, erü yatügü nagu rüxñnügümare nixi i curüxñnügü —ñanagürü. ³⁴ Rü yexguma ga Ngechuchu rü norü ngúexügüçèx rü duüxügüçèx naca. Rü ñanagürü nüxü: —Rü ngëxguma texé chowe rüxüxchaügu, ¡çècü nüxü tarüxo i tumaärü ngúchaü, rü ñoma wüxi i curucha ngixü tayaxuxürü namaã tapora i guxüma i ngúxü i chauxcèx tingexü, rü chowe tarüxü! ³⁵ —Erü yixema tügü maxèchaxèèchaüxè rü tá tayu. Natürü yixema chaugagu rü ore i mexügagu yuxe, rü aixcüma tá tamaxü. ³⁶ —¿Rü tacüwa nüxü namexü ya yatü ega ngëxguma nayauxägu i guxüma i ñoma i naãneärü ngëmaxügü, natürü norü maxü iyanatauxèègu? ³⁷ —Rü ngëxgumarüü ta, ¿rü ñuxre i dñeru iyangü na ngëmamaã naxcèx nataxexü i norü maxü i wüxi ya yatü? ³⁸ —Rü ngëxguma texé i ñaã duüxügü i pecaduãxgüxü i tama yaxögüxüpëxewa chauxcèx taxãnegu rü naxcèx taxãnegu i chorü ore, rü choma i Tupana Nane i duüxüxü na chiixü rü tá ta tümacèx chaxãne i ngëxguma Chaunatüarü poramaã rü norü orearü ngeruügü i daxüçüãx i üünegüxümaã wenaxärü núma chaxüxgu.

9

¹ Rü yexgumarüü ta ga Ngechuchu rü ñanagürü nüxü: —Aixcüma pemaã nüxü chixu rü ñuxre i duüxügü i nuã ngëxmagüxü rü täütáma nayu ñuxmatáta nüxü nadèux na ñuxãcü ãëxgacü ya poracü na yiixü ya Tupana —ñanagürü.

Ngechuchu rü toraxüãcü nangox (Mt 17.1-13; Lc 9.28-36)

² Rü 6 ga ngunexüguwena rü Ngechuchu rü wüxi ga mëxpúnewa naxü. Rü ínayagagü ga Pedru rü Chaütiägu rü Cuáüxícatama. Rü yéma yema ngúexügüpëxewa toraxüãcü nangox ga Ngechuchu. ³ Rü niyauracüü ga naxchiru rü nacómüxüchi. Rü nataxuma i yaxchiruxü i nüxü cuáxü na ngëmaãcü nacómüxèèãxü. ⁴ Rü nüxü nadaugü ga Ería rü Moiché ga yéma Ngechuchumaã idexagüxü. ⁵ Rü yexguma ga Pedru rü ñanagürü Ngechuchuxü: —Pa Ngúexèèruüx, namexèchi nixi na nuã ingëxmagüxü. Rü tá tanaxü ya tomaëxpüx ya düxenü, rü wüxi ya cuxcèx, rü naí ya Moíchécèx, rü naí ya Eríacèx —ñanagürü. ⁶ Rü yema na poraãcü nabaixãchiãëgüxü ga yema ngúexügü, rü yemacèx ga Pedru rü tama nüxü nacuèx ga na ñuxü ñaxü. ⁷ Rü yexgumatama wüxi ga caixanexü ínaxü, rü natanügu nayangëixema. Rü yema caixanexüwa inanaxü ga wüxi ga naga ga ñaxü: —Daa nixi ya Chaune ya nüxü changechaüxüchicü. ¡Rü nüxü iperüxñnë! —ñaxü. ⁸ Rü yexgumatama nügücüwagu ínadaueguãchitanü, rü taxúexüma ga toguexü nadaugü, rü Ngechuchuxüxícatama. ⁹ Rü yexguma ínaxígügu nawa ga guma mëxpúne, rü Ngechuchu nüxna naxãga ga taxúemaãma na nüxü yaxugüexü ga yema yéma nüxü nadaugüxü, ñuxmatáta yuwa ínadxgu ga nümax. ¹⁰ Rü yemacèx ga yema ngúexügü rü bexma nüxü nacuèxgü ga yema nüxü nadaugüxü. Natürü nügüna nacagü ga tacüchiga na yiixü ga:

“Yuwa ínadxgu”, ñaxü. ¹¹ Rü ñuxüchi ga yema ngúexügü rü Ngechuchuna nacagü, rü ñanagürügü: —¿Tüxcüü i ngúexèèruügü i ore i mugüwa ngüxèètaegüxü rü ñanagürügü:

“Ería tá nixi ya nüxira cuxüpa núma ücü?” ñanagürügü. ¹² Rü Ngechuchu nanangãxü, rü ñanagürü nüxü: —Aixcüma nixi i Ería na nüxira núma naxüxü na chauxüpa namexèèãxüçèx i guxüma. ¿Natürü tüxcüü i ore i ümatüxüwa i ñaxü:

“Rü Tupana Nane ya duïxüxü ixïcü rü tá ngúxü ninge, rü duïxügü rü tá nüxü naxoe”,
ñaxü? ¹³ Natürü i choma rü pemaã nüxü chixu, rü Ería rü marü núma naxü.
Natürü ga duïxügü rü nümagü nanaxwèxegüxüãcüma poraãcü chixri namaã
nachopetü, yexgumarüü ga ore ga ümatüxüwa nüxü yaxuxürüü —ñanagürü.

*Ngechuchu nanamexëë ga wüxi ga buxü ga ngoxo nawa yexmaxü
(Mt 17.14-21; Lc 9.37-43)*

¹⁴ Rü yexguma yema togü ga norü ngúexügütanüwa nangugügu, rü yéma nüxü nadaugü ga muxüma ga duïxügü ga yema ngúexügüxü íchomaëguächixü. Rü ñuxre ga ngúexëëruügü ga Moïchéarü mugüwa nguxëëtaegüxü, rü yéma niporagatanücüü namaã ga yema ngúexügü.
¹⁵ Rü yexguma Ngechuchuxü nadaugügu ga yema muxüma ga duïxügü, rü poraãcü nabaixächiãëgü. Rü guxüma naxcèx nibuxmü na nüxü yanamoxëgüxüçèx. ¹⁶ Rü núma ga Ngechuchu rü nüxna naca, rü ñanagürü nüxü: —¿Tacü nixí i pema namaã naxcèx ípiporagatanücüüxü? —ñanagürü.
¹⁷ Rü wüxi ga yema duïxügü ga yéma yexmagüxü rü nanangãxü, rü ñanagürü: —Pa Ngúexëëruüx, nuã cuxcèx tüxü chaga ya chaune, erü tümawa nangëxma i wüxi i ngoxo i tüxü ngegaxëëxü. ¹⁸ —Rü ngextá ítangëxmaxüwa rü ngëxma tüxü yaxüxgu rü waixü müãnegu tüxü naña. Rü tarüchièx, rü tixüxchapüta, rü ngëxma tiyuãchi. Rü marü nüxü chacèxü i curü ngúexügü na tümawa ínatèxüchiãxüçèx i ngëma ngoxo, natürü tama nüxü inaxínü —ñanagürü.
¹⁹ Rü Ngechuchu nanangãxü, rü ñanagürü: —Pa Duïxügü i Tama Yaxõgüxü, ¿ñuxgurátáta i pemaã chanuxmaxü rü yaxna pemaã chaxínüxü? ¡Nuã penaga ya yima bucü! —ñanagürü. ²⁰ Rü Ngechuchuxütawa nanagagü ga guma bucü. Natürü yexguma Ngechuchuxü nadèuxgu ga yema ngoxo, rü guma bucüxü naxü ga na yayuãchixëëãxü. Rü yexma ñaxtüanegu nayangu. Rü yexma nidixegugü, rü narüchièx. ²¹ Rü Ngechuchu rü guma bucünatüna naca, rü ñanagürü: —¿Rü ñuxgumama nixí ga naxcèx inaxügüxü ga yema? —ñanagürü. Rü guma bucünatü nanangãxü rü ñanagürü: —Nabuxgumamatama. ²² Rü muëxpüxcüna i ngëma ngoxo rü üxüxetügu rü dexágu nanañaüxü na ngëmaãcü yamaãxüçèx. Rü ngëmacèx ega cumaã nanguxügu na tacü toxçèx cuxüxü, ¡rü cuxü tangechaütümüügü, rü toxü rüngüxëë! —ñanagürü. ²³ Rü yexguma ga Ngechuchu rü ñanagürü nüxü: —¿Rü tüxcüü “ega chomaã nanguüxgu”, ñacurügü? Erü guxüma natauxcha tümacèx ya yíxema yaxõxë —ñanagürü. ²⁴ Rü yexguma ga guma bucünatü rü tagaãcü ñatarügü: —Chayaxõ. ¡Choxü rüngüxëë na yexeraãcü chayaxõxüçèx! —ñatarügü. ²⁵ Rü yexguma Ngechuchu nüxü dèuxgu na muxüma ga duïxügü marü yexma ngutaquëxexü, rü nananga ga yema ngoxo. Rü ñanagürü nüxü: —Pa ngoxo i Ngegaxëëruü rü Ngauchixëëëruüx, ¡choma cuxü chamu na nawa ícuxüxüxü ya daa bucü, rü tagutáma wena nagu cuyaxücuxü! —ñanagürü. ²⁶ Rü yexguma ga yema ngoxo rü aita naxü, rü wenaxârü guma bucüxü niyuãchixëë. Rü ñuxüchi nawa ínaxüxü, rü ñoma nayuxuchixürüü yéma nanatèx. Rü yemacèx ga muxüma ga duïxügü rü ñanagürügü: —Marü nayuxuchi nixí —ñanagürügü. ²⁷ Natürü ga Ngechuchu rü naxmëxgu nayayauxãchi, rü ínanadaxëë. Rü núma ga guma bucü rü inachi. ²⁸ Rü yemawena ga Ngechuchu rü wüxi ga ípatagu nayaxücu namaã ga norü ngúexügü. Rü yéma nüxíca nüxna nacagü, rü ñanagürügü nüxü: —Pa Corix, ¿tüxcüü i toma rü taxuacüma ítanatèxüchi i ngëma ngoxo? —ñanagürügü. ²⁹ Rü Ngechuchu nanangãxü rü ñanagürü: —Tama ngëmaãcümare ítanatèxüchi i ngëmarüü ixíxü i ngoxo. Natürü tanaxwèxe i Tupanana tanaxuaxü i tórü

yumũxẽwa na nũma ínatèxüchiãxüçèx. Rũ ngẽmaãcũxícatama nixĩ i ínaxũxũxũ
—ñanagürü.

Ngechuchu ru wenaxãrũ nanaxunagũ ga norũ yuchiga
(Mt 17.22-23; Lc 9.43-45)

³⁰⁻³¹ Rũ yẽma ínaxĩãchi rũ Gariréaanewa nachopetũ. Natürü ga Ngechuchu
rũ tama nanaxwèxe ga texé nüxũ na cuáxũ ga na yẽma nayexmaxũ, yerü
norü ngúexũgũxũ ínangúexẽẽ. Rũ ñanagürü nüxũ: —Tupana Nane ya duũxũxũ
ixĩcü, rũ duũxũgũ tá nayayauxgũ rũ tá nayamèxgũ. Natürü tomaẽxpũx i
ngunexũgu rũ wena tá ínarũda —ñanagürü. ³² Natürü ga nümagü rũ tama meã
nüxũ nacuéxgũ ga ñacüchiga na yĩxũ ga yema ore, rũ namuũẽ ga nüxna na
nacagüexũ.

¿Texé tá tixĩ ya guxããrũ yexera ixĩxẽ?
(Mt 18.1-5; Lc 9.46-48)

³³ Rũ Capernáũãrũ ñãnewa nangugũ. Rũ yexguma ñxwa nayexmagügu, rũ
Ngechuchu nüxna naca, rũ ñanagürü: —¿Rũ ñacü nixĩ ga pegümaã naxcèx
piporagaetanũxũ ga namawa? —ñanagürü. ³⁴ Natürü ga nümagü rũ
nangeèxgũmare, yerü ga namawa rũ nachigagu nügümaã niporagaetanü ga
texé tíxũ ga natanüwa rüyexeramaẽxẽ. ³⁵ Rũ yexguma ga Ngechuchu rũ
ínarũto, rũ naxcèx naca ga yema 12 ga norü ngúexũgũ, rũ ñanagürü nüxũ: —
Rũ ngẽxguma texé naxwèxegu na guxãetüwa na taxũxũ, rũ name nixĩ i noxri
rũ guxããrũ ñaxtũmaẽwa tügũ taxũxẽẽ na guxããrũ ngũxẽẽruũ tíxũ —ñanagürü.
³⁶ Rũ yemawena rũ norü ngãxũtanügu nayachixẽẽ ga wüxi ga buxũ. Rũ
ñuxũchi nachacüügu yayauxãchiãcüma ñanagürü: ³⁷ —Rũ texé ya chauégagu
meã nayaxúxe i wüxi i buxũ i ñããrũũ, rũ choxũ nixĩ i tayaxuxũ. Rũ texé ya
choxũ yaxúxe, rũ tama choxũxĩcatama tayaxu, natürü yima núma choxũ mucü
ya Chaunatũxũ rũ ta nixĩ i tayaxuxũ —ñanagürü.

Texé ya tama taxchi aixe rũ torü ngũxẽẽruũ tixĩ
(Mt 10.42; Lc 9.49-50)

³⁸ Rũ yexguma ga Cuáũ rũ ñanagürü nüxũ: —Pa Ngúexẽẽruũx, nüxũ tatau
ga wüxi ga yatü ga cuégagu ngoxogü íwoxũxũ. Natürü toma nüxna tanachuxu
ga yema, yerü tama tatanũxũ nixĩ ga nümax —ñanagürü. ³⁹ Natürü Ngechuchu
nanangãxũ, rũ ñanagürü: —Tama name i nüxna na penachuxuxũ. Erü texé ya
chauégagu naxúxe i wüxi i mexũ i Tupanaãrũ poramaã üxũ, rũ taxucürüwama
yixcama chixri chauchiga tidexa. ⁴⁰ Erü texé ya tama taxchi aixe, rũ tórü
ngũxẽẽruũ tixĩ. ⁴¹ Rũ texé ya woo wüxitama i pochiyuãcu i dexá pexna ãxẽ
naxcèx na chorü duũxũgũ pixĩgũxũ, rũ aixcüma pemaã nüxũ chixu rũ tá tüxũ
nangèxma i tümaãrũ ãmare —ñanagürü.

Naxãücüma nixĩ na pecadugu inguxũ
(Mt 18.6-9; Lc 17.1-2)

⁴² Rũ ñanagürü ta: —Texé ya pecadugu nanguxẽexẽ i wüxi i ñãã buxũgũ
i choxũ yaxõgũxũ, rũ tümacèx rũ narümemaẽ chi nixĩ i noxtacüma wüxi
ya nuta ya tacü tümanaxãwa tayangacuchi, rũ ngẽmaãcü taxtũchiüwa tüxũ
tayatáe. ⁴³⁻⁴⁴ —Rũ ngẽxguma chi wüxi ya cuxmèx pecadugu cuxũ nguxẽẽgu,
rũ name nixĩ i noxtacüma ícunadae. Erü narümemaẽ nixĩ i cuboxmèxãcüma
cunayaxu i curü maxũ na tama guxũne ya cuxmèx ya mexũnemaã nawa
quitèxcuchixüçèx ya yima üxü ya ngoxogü nagu poxcuene ya taguma
ixoxũne. ⁴⁵⁻⁴⁶ —Rũ ngẽxguma chi wüxi ya cucutü pecadugu cuxũ nguxẽẽgu,
rũ name nixĩ i noxtacüma ícunadae. Erü narümemaẽ nixĩ i cubocutüãcüma
cunayaxu i curü maxũ na tama guxũne ya cucutü ya mexũnemaã nawa
quitèxcuchixüçèx ya yima üxü ya ngoxogü nagu poxcuene. ⁴⁷⁻⁴⁸ —Rũ

ngëxguma chi wüxi ya cuxetü pecadugu cuxü nguxëëgu, rü name nixi i noxtacüma ícunacaxüchi. Erü narümemaë nixi i wüxitama ya cuxetümaã Tupana äëxgacü íixixüwa quixücu, na tama guxüne ya cuxetü ya mexünemaã nawa quitëxcuchixüçex ya yima üxü ya taguma ixoxüne ya ngoxogü nagu poxcuene i ngextá õxmigü taguma íyuexüwa. ⁴⁹ —Rü aixcüma ñoma õnawa yücüra nagüxürüü tá nixi na guxátama guxchaxüwa chopetüxü. ⁵⁰ —Name ya yücüra. Natürü ngëxguma chi nangeacagu, ¿rü ñuxäcü tá wenaxärü naxãäca? ¿Rü meã pegüna pedaugü na ñoma yücüra ya taguma iyarüngeacacürüü na namexüçex i perü maxü! ¿Rü meã pegümaã pemaxë! —ñanagürü.

10

Ngechuchu namaã nangúexëëtae na tama namexü na texé tümamëxü ítáxü (Mt 19.1-12; Lc 16.18)

¹ Rü yexguma ga Ngechuchu rü Capernáüärü ñanewa inaxüächí. Rü Yudéaanewa naxüpetü rü ñuxmata natü ga Yudáüärü tocutüwa nangu. Rü yéma rü wenaxärü naxçex nangutaquëxegü ga duüxügü. Rü nüma rü inanaxügü ga na nangúexëëtaexü guxügürüü. ² Rü ñuxre ga Parichéugü rü naxçex naxi ga na nüxü yaxügüxüçex yerü chixexügu nananguxëëgüchaü. Rü yemacex nüxna nacagüe, rü ñanagürügü: —¿Namexü i cuxçex na wüxi ya yatü rü naxmëxü ínatáxü? —ñanagürügü. ³ Rü nüma nanangäxü, rü ñanagürü nüxü: —¿Rü tacü yixü ga Moiché pexü muxü? —ñanagürü. ⁴ Rü nümagü nanangäxügü, rü ñanagürügü: —Moiché nüxü nixu ga na tama nachuxuxü na wüxi ya yatü rü ínatámaxü, ega wüxi i popera i tëxgüpane ngixna naxäxgu —ñanagürügü. ⁵ Rü yexguma ga Ngechuchu rü nanangäxü, rü ñanagürü nüxü: —Rü yema na taxúegama na pexinüëxügagu nixi ga Moiché ga tama pexna nachüãxü ga pexmëxü na ípetáxü. ⁶ —Natürü noxriarü ügügu, rü Tupana nanaxü ga yatüxü rü ngexü. ⁷ —Rü ngëmacex ya yatü rü tá nanatü rü naëna nixügachi na naxmëxmaã inaxäüxüçex. ⁸ —Rü ngëmaäcü i ngëma taxre rü ñoma wüxitama i duüxürüü tá nixigü. Rü marü täütáma taxre nixi, erü wüxi tátama nixi. ⁹ —Rü ngëmacex taxucürüwa texé nügüna tayaxigachixëë i ngëma taxre i Tupana nügüna mugüxü —ñanagürü. ¹⁰ Rü yexguma marü ípatawa nangugügu, rü norü ngúexügü rü wenaxärü nüxna nacagüe naxçex ga yema. ¹¹ Rü Ngechuchu rü ñanagürü nüxü: —Rü yixema tümamëxü ítáxe rü naí i ngemaã ämaxë rü pecadu taxü ngïmaã i ngëma noxriücü i tümamëx. ¹² —Rü ngëxgumarüü ta, ega wüxi i nge ítëxtegu rü naí ya yatümaã naxãtegu, rü ngïma rü ta pecadu ixü —ñanagürü.

Ngechuchu rü buxügüxü nameãxë (Mt 19.13-15; Lc 18.15-17)

¹³ Rü yéma Ngechuchuxütawa tüxü nagagü ta ga ñuxre ga buxegü na tüxü yangögügüxüçex. Natürü ga yema norü ngúexügü rü inanaxügüe ga tüxü na yangagüxü ga guxema tümaxäcüxegüxü Ngechuchuxütawa gagüxe. ¹⁴ Rü yexguma yemaxü nadëuxgu ga Ngechuchu, rü naãëwa nangux, rü ñanagürü nüxü: —Chanaxwëxe i chauxütawa naxi i buxügü. ¿Rü täxü i nüxna penachuxuxü! Erü Tupana äëxgacü íixixüwa rü tümacex nixi ya yixema ñaã buxügürüü taxuüma i chixexüxü icuáxe. ¹⁵ —Rü aixcüma pemaã nüxü chixu rü texé ya tama wüxi i buxürüü Tupanaxü yaxúxe na tümäärü äëxgacü yixüçex, rü tagutáma nagu taxücu i ngëma naãne i Tupana äëxgacü íixixüwa —ñanagürü. ¹⁶ Rü nüma rü tüxü naganagütanü ga guxema buãxta, rü tümäärugügu naxümëxäcüma ñanagürü tüxü: —¿Tupana pexü rüngüxëëx! —ñanagürü.

*Wüxi ga yatü ga dīeruāxüchixü Ngechuchumaã nidexa
(Mt 19.16-30; Lc 18.18-30)*

¹⁷ Rü yexguma marü inaxüächichaügu ga Ngechuchu, rü yéma naxcèx niña ga wüxi ga yatü. Rü napëxegu nayacaxäpüxü, rü nüxna naca rü ñanagürü nüxü: —Pa Ngúexëëruü ya mecüx, ¿tacü tá chaxüxü na chanayaxuxüçèx i maxü i taguma gúxü? —ñanagürü. ¹⁸ Rü Ngechuchu nanangäxü, rü ñanagürü nüxü: —¿Tüxcüü, “Mecü” ñacurügü choxü? Erü Tupanaxicatama nixi ya mecü ixicü, rü nataxuma i to. ¹⁹ Cuma rü marü nüxü cucuèx i Tupanaärü mugü i ñaxü:

“¡Täütáma cumáëta, rü täütáma naï i ngemaã icupe, rü täütáma cungtèèx, rü täütáma doraxü quixu i togüchiga, rü täütáma quidoratèèx, rü tümaga naxinü ya cunatü rü cue!”

ñaxü —ñanagürü. ²⁰ Rü yexguma ga guma yatü rü ñanagürü nüxü: —Pa Ngúexëëruüx, rü chorü bucumatama meã chanaxaure i guxüma i ngëma mugü i nüxü quixuxü —ñanagürü. ²¹ Rü yexguma ga Ngechuchu rü nüxü nangechaüäcüma nüxü nadawenü, rü nanangäxü rü ñanagürü: —Rü wüxixicatama cuxü nataxu. ¡Rü íixü, rü namaã yataxe i guxüma i curü ngëmaxügü, rü ñuxüchi togü i ngearü ngëmaxüäxgüxüna naxã i ngëma curü natanü! Rü ngëmaäcü tá cuxü nangëxma i cuchica i daxüguxü i nañewa. Rü ngëmawena rü marü name i chowe curüxü —ñanagürü. ²² Natürü nüma ga guma yatü rü nanaxixächiã ga yexguma nüxü naxinügu ga yema ore. Rü nangechaüäcüma ínixü, yerü namuxüchi ga norü yemaxügü. ²³ Rü Ngechuchu rü nüxü nidaugüächi, rü ñanagürü norü ngúexügüxü: —Naguxchaxüchi tá nixi na Tupana äëxgacü íyíxüwa na yachocuxü i ngëma dīeruāxüchigüxü —ñanagürü. ²⁴ Rü nabaixächiãëgü ga norü ngúexügü namaã ga yema ore. Natürü ga Ngechuchu rü wenaxärü namaã nüxü nixu, rü ñanagürü: —Pa Chauxacügüx, ñuxäcü wüxi i guxchaxüchixü nixi na Tupana äëxgacü íyíxüwa na yaxücuxü i wüxi i duüxü. ²⁵ —Rü aixcüma pemaã nüxü chixu rü ñoma wüxi i cameyu na taxucürüwama wüxi ya ucumaxëtüwa naxüpetüxüärü yexera narüguxchamaë naxcèx i wüxi i duüxü i dīeruāxüchixü na yaxücuxü i ngextá Tupana äëxgacü íixüwa —ñanagürü. ²⁶ Rü yexguma yemaxü naxinüëgu ga norü ngúexügü, rü yexeraäcü nabaixächiãëgü. Rü nügüna nacagüe, rü ñanagürügü: —¿Rü texé tá ëxna tixi ya nayaxúxe i maxü i taguma gúxü? —ñanagürügü. ²⁷ Rü Ngechuchu rü nüxü nadawenü, rü nanangäxü rü ñanagürü nüxü: —Yatügü rü taxuacüma nügü namaxëë, natürü Tupanaäxü rü natauxcha i ngëma, erü Tupanacèx rü nataxuma i tacü i guxchaxü —ñanagürü. ²⁸ Rü yexguma inanaxügü ga Pedru ga na yadexaxü, rü ñanagürü nüxü: —Toma rü marü yéma tanawogü ga guxüma ga torü yemaxügü na cuwe tarüxüçèx —ñanagürü. ²⁹⁻³⁰ Rü Ngechuchu nanangäxü, rü ñanagürü: —Aixcüma pemaã nüxü chixu rü texé ya chaugagu rü ore i maxëxëëruügagu tümapatana, rü ëxna tümaëneëgüna, rü ëxna tümaëyëxgüna, rü ëxna tümaëna, rü ëxna tümanatüna, rü ëxna tümaxäcügüna, rü ëxna tümaänegüna ngema ixüxë, rü tá tanayaxu i tümaärü natanü. Rü aixcüma ñuxma i ñoma i nañewa rü tá tanayaxu i 100 ëxpüxcüna ya tümapatagü, rü tümaëneëgü, rü tümaëyëxgü, rü tümaëgü, rü tümaxäcügü, rü tümaänegü. Natürü ngëxgumarüü tá ta tanayaxu i ngúxügü i togü tá tüxü ingexëëgüxü. Natürü yixcamaxüra i daxüguxü i nañewa rü tá tanayaxu i maxü i taguma gúxü. ³¹ —Natürü muxüma i nümaxü i ñuxma ñoma i nañewa duüxügü wixpëxewa ügüxëëxü, rü daxüguxü i nañewa rü Tupana tá wixweama nanaxügüxëë. Rü muxüma i nümaxü i ñuxma ñoma i nañewa duüxügü wixweama ügüxëëxü, rü daxüguxü i nañewa rü Tupana tá wixpëxewa

nanaxügüxëë –ñanagürü.

*Ngechuchu rü wenaxärü nanaxunagü ga norü yuxchiga
(Mt 20.17-19; Lc 18.31-34)*

³² Rü Yerucharéüwaama naxĩ. Rü nüma ga Ngechuchu rü norü ngúexügüpëxegu nixü. Rü nümagü rü nabaixächiaëgü, rü yema togü ga duüxügü ga wixweama ägüxü rü namuüë. Rü Ngechuchu rü wenaxärü noxrüwama naxcèx naca ga yema 12 ga norü ngúexügü. Rü inanaxügü ga namaã nüxü na yaxuxü ga tacü tá nüxü na ngupetüxü. ³³ Rü ñanagürü nüxü: –Pema nüxü pecuèx na marü ingaicaxü na Yerucharéüwa ingugüxü. Rü ngema rü duüxügü rü tá chixri chomaã nachopetü. Rü paigüarü äëxgacügü rü ngúexëëruügü i ore i mugüwa nguxëëtaegüxüna tá choxü naxuaxügü. Rü nümagü rü tá chomaã nanaxuegugü na chayuxü, rü tá ngëma Dumacüãxgüna choxü namugü. ³⁴ Rü ngëmagü tá nixĩ i chaugu idauxcüräügüxü. Rü tá choxna nacuaixgüe, rü tá choxna nanaçuaixcagü, rü tá choxü nayuxëëgü. Natürü tomaëxpüx i ngunexüguwena táxarü chamaxü –ñanagürü.

*Chaütiágu rü Cuáü rü wüxi ga ngüxëëcèx ínacaü
(Mt 20.20-28)*

³⁵ Rü Ngechuchucèx naxĩ ga Chaütiágu rü Cuáü ga Zebedéu nanegü, rü ñanagürügü nüxü: –Pa Ngúexëëruüx, tanaxwèxe i toxcèx cunaxü i ngëma ngüxëë i naxcèx tá cuxna taçaxü –ñanagürügü. ³⁶ Rü nüma rü nüxna naca, rü ñanagürü: –¿Tacü nixĩ i penaxwèxexü na pexcèx chanaxüxü? –ñanagürü. ³⁷ Rü ñanagürügü: –Rü ngëxguma äëxgacüxü quingucuchigu, rü tanaxwèxe na wüxie i toma rü curü tügü necüwawa tarütöxü, rü togue i curü toxwecüwawa –ñanagürügü. ³⁸ Rü Ngechuchu nanangäxü, rü ñanagürü nüxü: –Pema rü tama nüxü pecuèx na tacücèx ípeçaxü. ¿Rü pexü chi natauxchaxü i na peyaxaxüxü i ngëma axexü i üxchiüxü i choma tá chixaxüxü? ¿Rü namaã chi peporaexü i ngëma ngüxü i tá chingexü? –ñanagürü. ³⁹ Rü nümagü nanangäxügü rü ñanagürügü: –Ngëmaäcü, namaã tá taporae –ñanagürügü. Rü Ngechuchu nanangäxü, rü ñanagürü nüxü: –Aixcüma tá nixĩ i chauxrüü peyaxaxüxü i ngëma axexü i üxchiüxü rü chauxrüü ngüxü na pingegüxü. ⁴⁰ –Natürü ngëma chorü tügü necüwawa rü chorü toxwecüwawa na perütogüxücèx, rü tama choxmëxwa nangëxma na pexna chanaxäxü, erü Chaunatü tá tüxna nanaxä ya yíxema tümacèx íyiixë –ñanagürü. ⁴¹ Rü yexguma yemaxü naxĩnüëgu ga yema togü ga 10 ga ngúexügü, rü Chaütiágumaã rü Cuáümaã nanuë. ⁴² Natürü Ngechuchu naxcèx naca rü ñanagürü nüxü: –Pema nüxü pecuèx i togü i nachiüñanegüwa rü nangëxmagü i äëxgacügü i nügü nacüexgügu na namexü na nuäcü namuäxü i norü duüxügü. Rü ngëma äëxgacügü i taxügü rü norü duüxügüarü yora nügü nixĩgüxëë. ⁴³ –Natürü täütáma ngëmaäcü nixĩ i petanüwa. Erü ngëxguma texé naxwèxegu na guxäärü yexera na tiixü i petanüwa, rü name nixĩ i noxri rü guxäärü ngüxëëruü na tiixü. ⁴⁴ –Rü ngëxguma chi texé i petanüwa naxwèxegu na tümamücügüeru na tiixü, rü name nixĩ i noxri rü guxüma i tümamücügüarü ngüxëëruü na tiixü. ⁴⁵ –Rü woo i choma i Tupana Nane na duüxüxü chiixü, rü tama togü choxü rü ngüxëëxücèx nixĩ i núma chaxüxü. Natürü núma chaxü na duüxügüxü charüngüxëëxücèx rü naxcèx ichanaxäxücèx i chorü maxü, na ngëmaäcü chanaxütanüxücèx na norü pecadugüna ínangüxüxücèx i muxüma i duüxügü –ñanagürü.

*Bartiméu ga ngexetüçüxü narümexëë ga Ngechuchu
(Mt 20.29-34; Lc 18.35-43)*

46 Rū Yericúarū ñānewa nangugū. Rū Ngechuchuwe narūxī ga norū ngúexūgū rū muxūma ga togū ga duūxūgū. Rū yexguma guma ñāneārū guxwa nangugūchaūgu ga nūxna na ínachoxūxū, rū yéma namacūwawa narūto ga wūxi ga ngexetūcū ga Bartiméūgu āegacū ga Timéū nane. 47 Rū yexguma guma ngexetūcū nūxū ínūgu ga Ngechuchu ga Nacharétucūāx na yīxū ga guma yéma ūpetūcū, rū inanaxūgū ga porācū aita na naxūxū, rū: —Pa Ngechuchu ya Dabítanūxūx, ¡cuxū changechaūtūmū! —ñānagūrū. 48 Natūrū muxūma ga yema duūxūgū rū ínānangaxūchigūama ga na iyanangeáxūcèx. Natūrū ga nūma rū yexeraācū aita naxūama, ñaxūmaā: —Pa Dabítanūxūx, ¡cuxū changechaūtūmū! —ñaxūmaā. 49 Rū yexguma ga nūma ga Ngechuchu rū inayachiāchi, rū ñānagūrū: —¡Naxcèx peca! —ñānagūrū. Rū guma ngexetūcūcèx nacagū, rū ñānagūrūgū: —¡Nataāē rū inachi! Rū cuxcèx nixī i naçaxū —ñānagūrūgū. 50 Rū guma ngexetūcū rū yexacū nanaña ga norū gáuxūchiru. Rū inayuxnagū rū Ngechuchucèx nixū. 51 Rū Ngechuchu nūxna naca, rū ñānagūrū nūxū: —¿Tacū nixī i cunaxwèxexū na cuxcèx chanaxūxū? —ñānagūrū. Rū nūma ga guma ngexetūcū, rū nanangāxū, rū ñānagūrū: —Pa Ngúexēruūx, chanaxwèxe na chidauchixū —ñānagūrū. 52 Rū yexguma ga Ngechuchu, rū ñānagūrū nūxū: —¡Ēcū, íxū! Rū marū cuxcèx nitaane erū cuyaxō —ñānagūrū. Rū yexgumatama ga guma ngexetūcū rū nidauchi, rū Ngechuchuwe narūxū ga namawa.

11

Ngechuchu rū Yerucharéūgu naxūcu (Mt 21.1-11; Lc 19.28-40; Cu 12.12-19)

1 Rū marū Yerucharéūārū ngaicamana nangugū ga Oríbunecūarū Mèxpúneārū ngaicamana yexmagūne ga ñānexācūgū ga Bechagué rū Betániā. Rū yexguma yéma nangugūgu, rū Ngechuchu nanamu ga taxre ga norū ngúexūgū. 2 Rū ñānagūrū nūxū: —¡Gua tórū toxmèxtawa ngēxmane ya ñānexācūwa pexī! Rū ngēxguma nawa pengugūgu, rū ngēxma tá nūxū peyangau i wūxi i buru i ngēxma ngaxūxū i taguma texé natagu aunagūxū. ¡Rū peyawēxū rū nuā penaga! 3 —Rū ngēxguma texé pexna caxgu na tacūcèx peyawēxūxū i ngēma buru, ¡rū tūmamaā nūxū pixu rū ñapegūgū:

“Torū Cori nanaxwèxe, rū ñuxma tátama nanataeguxē”, ñapegūgū! 4 Rū yéma naxī. Rū yexma namacūwagu nūxū nayangaugū ga yema buru ga wūxi ga ĩpataēxūtagu ngaxūxū. 5 Rū ñuxre ga duūxūgū ga yéma yexmagūxū rū nūxna nacagūe, rū ñānagūrūgū: —¿Tacū ĩpexūe? ¿Rū tūxcūū peyawēxū i ngēma buru? —ñānagūrūgū. 6 Rū nūmagū ga yema ngúexūgū, rū yema ore ga Ngechuchu namaā nūxū ixuxūācū nanangāxūgū. Rū yemacèx tama nūxna nanachūxgū. 7 Rū natagu nanachagūmū ga naxchirugū. Rū yemaācū Ngechuchuxūtawa nanagagū. Rū nūma ga Ngechuchu rū natagu naxaunagū. 8 Rū muxūma ga duūxūgū rū naxchirumaātama nanachamagū. Rū togū rū naīxātūgū ga naānewa nadaūxūmaā nayachamagū. 9 Rū yema duūxūgū ga napēxegu āgūxū rū yema togū ga wixweama āgūxū, rū tagaācū ñānagūrūgū: —¡Cuxū ticuèxūxūgū! ¡Rū naxūūne ya daa Tupanaegagu nūma ūcū! 10 ¡Rū āēxgacū ya Dabírūxū namecūmaxūchi ya daa āēxgacū ya nūma ngucū! ¡Rū pema rū ta, Pa Daxūcūāx, rū nūxū picuèxūxūgū ya Tupana! —ñānagūrūgū. 11 Rū Yerucharéūgu naxūcu ga Ngechuchu, rū tupauca ga taxūnecèx nixū. Rū meāma guxūwama inanadauaxūne. Rū ñuxūchi yema norū 12 ga ngúexūgūmaā Betániāārū ñānecèx nataegu, yerū marū nayáuane.

*Ngechuchu rü orix ga iguera ga ngearü oõxümaã chixexü naxuegu
(Mt 21.18-19)*

¹² Rü moxüãcü yexguma Betániãwa inaxiãchigu ga Ngechuchu rü nataiya.
¹³ Rü yaxügu nüxü nadau ga wüxi ga orix ga iguera ga ããtuxü. Rü nüma ga Ngechuchu rü naxcèx nixü na íyadauãxüçèx rü ngoxi nayexmèx ga norü o. Natürü yexguma naxütawa nanguxgu, rü taxuüma inayangau, rü naãtuxüxĩcatama, yerü tauta norü owa nangu. ¹⁴ Rü yexguma rü ñanagürü igueraxü: —¡Tagutáma texé wena cuxü tamúãrü oõx! —ñanagürü. Rü norü ngüexügu rü nüxü naxĩnüë ga yema.

*Ngechuchu ínanawoxü ga yema tupauca ga taxünewa taxegüxü ga duüxügu
(Mt 21.12-17; Lc 19.45-48; Cu 2.13-22)*

¹⁵ Rü yexguma Yerucharéüwa nangugügu, rü Ngechuchu rü tupauca ga taxünegu naxücu. Rü inanaxügu ga na ínawoxüãxü ga yema yéma tacümaã taxegüxü rü naxcèx taxegüxü. Rü nanangüegutanü ga norü mechagü ga yema duüxügu Tupanaarü ãmarewa mexü ga dñerumaã taxegüxü rü muxtucumaã taxegüxü. ¹⁶ Rü nanachuxu ga texé tacü na yéma ngepetüxü tupauca ga taxünemachiawa. ¹⁷ Rü inanaxügu ga na nangüexëëtaexü, rü ñanagürü: —Tupanaãrü ore i ümatüxüwa rü ñanagürü: “Chopata rü guxüma i nachiüãnecüãxgüarü yumüxëpataügu tá naxãega”, ñanagürü. Natürü pema rü ngítëëxgüxüpataü peyaxĩxëë —ñanagürü. ¹⁸ Natürü yexguma yemaxü naxĩnüëgu ga paigüarü ãëxgacügü rü ngüexëëruügu ga Moíchéarü mugüwa ngüxëëtaegüxü, rü inanaxügüë ga naxcèx na nadaugüxü ga ñuxãcü Ngechuchuxü na yamëxgüxü. Natürü duüxügüxü namuüë, rü yemacèx taxucürüwama duüxügüpegu nayayauxgü. Yerü nüma ga duüxügü rü namaã nataãxëgü ga yema Ngechuchuarü ngüxëëtae. ¹⁹ Natürü yexguma marü nayáuanegu, ga Ngechuchu rü norü ngüexügümaã nawa ínachoxü ga guma íãne.

*Narüñexë ga yema iguera ga ngearü oõxü
(Mt 21.20-22)*

²⁰ Rü moxüãcü pèxmama rü igueraxütawa nachopetü. Rü yéma nüxü nadaugü ga na nañexëxü ñuxmata naxchúmèxãwa nangu. ²¹ Rü yexguma ga Pedru rü nüxna nacüexãchi ga yema íneãcü ngupetüxü, rü ñanagürü Ngechuchuxü: —Pa Ngüexëëruüx, dücax i iguera ga chixexü namaã cuxuegüxü, rü marü narüñexë —ñanagürü. ²² Rü Ngechuchu nanangãxü, rü ñanagürü: —¡Nüxü peyaxögü ya Tupana! ²³ —Rü aixcüma pemaã nüxü chixu rü ngëxguma chi wüxie daa mëxpünexü tamuxgu na yaxügachixüçèx rü taxtü i taxüchiüwa nügü na yatáexüçèx, rü chi pega naxĩnü, ega aixcüma peyaxögüãcüma nüxü ngëma ñapegügu. ²⁴ —Rü ngëmacèx pemaã nüxü chixu rü guxüma i tacü i naxcèx ípeçaxü i perü yumüxëwa, rü name nixĩ na peyaxögüxü na marü penayaxuxü, rü aixcüma tá penayaxu. ²⁵ —Rü ngëxguma peyumüxëgügu, natürü nangëxmagu i tacücèx texémaã na penuëxü, ¡rü tüxü nüxü pengechaü! na Penatü ya daxügücü rü ta pexü nüxü nangechaüxüçèx i perü pecadugü. ²⁶ —Natürü ngëxguma pema tama tüxü nüxü pengechaügügu, rü Penatü ya daxügücü rü tá ta táütáma pexü nüxü nangechaü —ñanagürü.

*Ngechuchuna nacagüë na texéarü oregagu tupauca ga taxünewa nangüxëëtaexü
(Mt 21.23-27; Lc 20.1-8)*

²⁷ Rü yemawena rü Yerucharéüçèx nawoegu. Rü yexguma Ngechuchu rü tupauca ga taxünegu yaxügüchigüyane, rü naxcèx naxĩ ga paigüarü ãëxgacügü, rü ngüexëëruügu ga Moíchéarü mugüwa ngüxëëtaegüxü, rü

Yudíugüarü âëxgacügüerugü. ²⁸ Rû nüxna nacagüe, rû ñanagürügü: —¿Texéarü mugagu nixĩ i cunaxüxü i ngêma núma cuxüxü? ¿Rü texé cuxü tamu na cunaxüxüçèx i ngêma? —ñanagürügü. ²⁹⁻³⁰ Rû yexguma ga Ngechuchu rû nanangãxü, rû ñanagürü nüxü: —Choma rû tá ta pexna chaca, rû ngëxguma choxü pengãxügu i ngêma pexna naxcèx chaçaxü, rû choma rû tá ta pemaã nüxü chixu na texé choxü muxü na chanaxüxüçèx i ngêma. ¿Rü texé tanamu ga Cuáü na duüxügüxü ínabaiüxëëxüçèx? ¿Rü Tupana yĩxü ga namucü rû êxna duüxügümare? —ñanagürü. ³¹ Rû yexguma ga nümagü rû inanaxügüe ga nügümaã na yaporagatanüçüüxü, rû ñanagürügü: —Rü ngëxguma chi:

“Tupana núma nanamu”, ñagügügu, rû nüma rû chi ñanagürü tüxü:

“¿Tüxcüü ga tama nüxü peyaxögüxü?” ñanagürü chi tüxü. ³² ¿Rü ñuxüçürüwa rü:

“Yatügümare núma nanamu”, ñatarügügü tá? Rû yema ñanagürügü yerü duüxügüxü namuê. Yerü guxüma ga duüxügü rû nayaxögü rû aixcüma Tupana nanamu ga Cuáü na nüxü yaxuxüçèx ga norü ore. ³³ Rû yemacèx Ngechuchuxü nangãxügü, rû ñanagürügü: —Tama nüxü tacuèx ga texé núma na namuxü ga Cuáü ga baiüxëëruü —ñanagürügü. Rû yexguma ga Ngechuchu rû nanangãxü rû ñanagürü nüxü: —Choma rû ta tãütãma pemaã nüxü chixu na texé choxü muxü na chanaxüxü i ngêma choxna naxcèx peçaxü —ñanagürü.

12

Ore i puracütanüxü i chixexügügu ixuxü (Mt 21.33-46; Lc 20.9-19)

¹ Rû Ngechuchu rû inanaxügü ga ore ga cuèxruügügu ixuxümaã na nangüexëëtaexü. Rû ñanagürü nüxü: —Nayexma ga wüxi ga yatü ga norü naãnegu ubanecü ücü. Rû ínanapoxegu, rû nanaxü ga wüxi ga ubaarü yauxtüxüchica, rû wüxi ga dauxütaechica na meã nüxna nadauxüçèx ga guxüma. Rû ñuxüchi ñuxre ga puracütanüxüna nüxü nadauxëë. Rû namaã nanamexëë na ngãxügu namaã ngĩxü yatoyexüçèx ga yema ubatanü. Rû ñuxüchi ga yema naãneärü yora rû to ga nachiüãnewa naxü. ² —Rü yexguma nawa nanguxgu ga na yadauxü ga yema ubagü, rû guma yatü rû yéma puracütanüxügüxütawa nanamu ga wüxi ga norü duüxüxü na naxcèx íyaçaxüçèx ga yema ubagü ga nüxna üxü. ³ —Natürü yema puracütanüxügü rû nayayauxgü, rû nanaçuaixgü ga guma yatüarü duüxü. Rû taxuüma ga ubagü nüxna naxägü, rû yemaãcü ínayamugü. ⁴ —Rü yexguma ga guma yatü rû to ga norü duüxüxü yéma namu. Natürü ga guma rû nayamèxërugü, rû namaã naguxchigagü. ⁵ —Rü yexguma rû to ga norü duüxüxü yéma namu. Natürü nayamèxgü. Rû yemawena, rû yéma nanamugü ga muxüma ga togü ga norü duüxügü. Natürü ga yema puracütanüxügü rû nayaçuaixgü ga ñuxre, rû togü rû nanadai. ⁶ —Rü yexguma rû nüxü ínayaxü ga nanexüchi ga poraãcü nüxü nangechaücü. Rû düxwa guma nanexü yéma namu, yerü nüma nagu naxĩnügu rû chi nanega naxĩnüë ga yema puracütanüxügü. ⁷ —Natürü yexguma guma cori nanexü nadaugügu ga yema puracütanüxügü, rû nügümaã ñanagürügü:

“Ngêmaärü tá nixĩ i ñaã naãne i yixcama. ¿Rü ngĩxã tayamèxgü na tóxrü na yĩxüçèx!” ñanagürügü. ⁸ —Rü yemaãcü nayayauxgü, rû nayamèxgü. Rû yema ubanecüpechinüwa nayatèxgü ga naxüne. ⁹ —Rü ñuxma rû pexna chaca, ¿pexcèx rû tacü tá naxü ya yima ubanecüarü yora namaã i ngêma puracütanüxügü i chixexügü? Rû dücax, rû ngema tá naxü, rû tá nanadai i ngêma puracütanüxügü, rû togüna tá nanaxã i ngêma ubanecü. ¹⁰ —¿Taguma êxna nawa pengüe i Tupanaärü ore i ümatüxü? Erü ngëmawa rû ñanagürü:

“Rü yima nuta ya mecü ya ñärü üruügü nüxü oechirécü, rü ñuxma rü yimatama nixi ya Tupana nüxira yaxucuchicü na namaã inaxügüãxücèx ya ñpata. ¹¹ Rü tórü Cori ya Tupana nixi ga naxücü ga yema, rü ñuxma rü namexèchi i taxcèx”, ñanagürü i ngèma ore. ¹² Rü yexguma ga yema paigüarü ãëxgacügü, rü ngüexèëruügü ga Moïchëarü mugüwa nguxèëtaegüxü, rü Yudiügarü ãëxgacügüerugü, rü Ngechuchuxü niyauxgüchaü. Yerü nüxü nacuèxgü ga nachiga na yixü ga yema ore ga cuèxruügu yaxuxü. Natürü duüxügüxü namuñe rü yemacèx taxuüma namaã naxüe. Rü nüxna yéma ñnixmare.

*Ãëxgacüaxü dñërumaã naxütanüxüchiga
(Mt 22.15-22; Lc 20.20-26)*

¹³ Rü yexguma ga yema ãëxgacügü rü Ngechuchuxütawa nanamugü ga ñuxre ga norü duüxügü ga Parichéugü rü Erodetanüxügü na nüxna yacagüexücèx, rü ngoxi tacü rü chixexü ga dexamaã nüxü nangãxü na yemaãcü ãëxgacügüxütawa na íyaxuaxügüãxücèx. ¹⁴ Rü nümagü rü naxütawa naxi, rü ñanagürügü nüxü: —Pa Ngüexèëruüx, nüxü tacuèx rü aixcüma nixi i ngèma nüxü quixuxü i ore. Rü tama duüxügügamare cuxinü, erü tama norü düxétüxünegu cudawenü, natürü nacüma nixi i cungugüxü. Rü aixcüma cunangüexèë i duüxügü na Tupana naxwèxexüãcüma namaxèxücèx. ¡Tomaã nüxü ixu! Rü ngèma dñëru ya ãëxgacü ya tacü ya Dumacüãx totanüwa ngixü yauxchaücü ¿rü namexü yixü na nüxna ngixü taxãxü, rü éxna tama? —ñanagürügü. ¹⁵ Natürü ga Ngechuchu rü nüxü nacuèxama ga na chixexügu namaã naxinüexü ga yema duüxügü woo meã namaã na yanadexagüxü. Rü yemacèx ñanagürü nüxü: —¿Tüxcüü chixexügu choxü penguxèëchaüxü? ¡Nuã ngixü pingè i wüxitachinü i dñëru na ngixü chadauxücèx! —ñanagürü. ¹⁶ Rü yéma naxütawa ngixü nangegü ga wüxitachinü ga dñëru. Rü Ngechuchu rü ñanagürü nüxü: —¿Texéhicünèxã rü texééga nixi i ngügu üxü? —ñanagürü. Rü nümagü nanangãxügü, rü ñanagürügü: —Dumacüãx ya ãëxgacü ya tacüchicünèxã nixi —ñanagürügü. ¹⁷ Rü yexguma ga Ngechuchu rü ñanagürü nüxü: —¡Ãëxgacüna ngixü pexã i ngèma ãëxgacüarü ixicü, rü Tupanana ngixü pexã i ngèma Tupanaärü ixicü! —ñanagürü. Rü yexguma yema orexü naxinüëgu, rü namaã nabaixãchiãëgü.

*Ngechuchuna nacagüe rü ngoxi wena namaxè i duüxügü
(Mt 22.23-33; Lc 20.27-40)*

¹⁸ Rü yemawena rü Ngechuchuxütawa ñayadaugü ga ñuxre ga Chadurchéugü. Rü nümagü nixi i nüxü yaxugüexü na tagutáma wena namaxèxü i yuexü. Rü yemacèx Ngechuchuna nayacagüe, rü ñanagürügü: ¹⁹ —Pa Ngüexèëruüx, Moïchëarü mugüwa rü ñanagürü: “Rü ngëxguma wüxi ya yatü naxmèx ngexacüyane nayuxgu, rü name nixi i naëneëtama ngïmaã naxãmèx i ngèma yutecü i naxümèx, na ngèmaãcü naxãxãcüxücèx ya naëneë ga marü yucü”, ñanagürü ga yema ore. ²⁰ —Dücèx, nayexma ga 7 ga nügüeneëgü. Rü naxãmèx ga guma yacü, natürü tauta naxãxãcüyane nayu. ²¹⁻²² —Rü yexguma ga naï ga naëneë nüxü ngïmaã naxãmèx ga yema ngecü, natürü guma rü ta nayu rü nangexacü. Rü yexguma ga guma norü tomaëxpüx ga naëneë nüxü ngïmaã naxãmèx, natürü ü yexgumarüütama nüxü nangupetü. Rü yemaãcü, gucüma ga guma 7 ga nügüeneë rü ngïmaã naxãmèx ga yema nge. Rü gucüma nayue tauta naxãxãcüyane. Rü düxwa ngïma rü ta iyu ga yema nge. ²³ —Rü dücax, ngëxguma yuexü wena maxëgu, ¿rü ngexcürüücü naxmèx tá iyixi i ngèma nge? Yerü gucüma ga guma 7 ga nügüeneëgü ngïmaã naxãmèx —ñanagürügü.

24 Rū yexguma ga Ngechuchu rü nanangãxũ, rü ñanagürü nüxũ: —Pema rü ípetüe erü tama nüxũ pecuèx i Tupanaärü ore i ümatüxũ, rü tama nüxũ pecuèx i ñuxãcü na naporaxũ ya Tupana. 25 —Rü ngëxguma yuexũ wena maxëgu, rü taxúetáma tixãmèxgü rü êxna tixãtegü. Erü daxüçũãx i Tupanaärü orearü ngeruügürüü tá tixĩgü i ngëxguma. 26 —Pema choxna peca i yuexũärü dagüchiga. ¿Natürü tama êxna nawa pengúe i Tupanaärü ore ga Moïché ümatüxũ ga naixãcü ga íyiauxratanünechigaxũ íyaxuxüwa? Erü yema orewa rü Moïchéxũ ñanagürü ga Tupana:

“Choma nixĩ i Abráüärü Tupana, rü Ichaáarü Tupana, rü Acobuarü Tupana”, ñanagürü. 27 —Rü ngëma orewa nüxũ tacuèx rü Tupana rü maxëxüärü Tupana nixĩ rü tama yuexũärü Tupana nixĩ, erü Tupanaarü ñnüwa rü taxúema tayu. Rü ngëmaãcü i pema rü poraãcü ípetüe —ñanagürü.

Ngëma Tupanaärü mu i guxũ i norü mugüarü yexera ixĩxũ
(Mt 22.34-40)

28 Rü wüxi ga ngúexëëruü ga Moïchéarü mugüwa nguxëëtaexũ, rü nüxũ naxĩnü ga yema togü ga namüçügü ga Ngechuchumaã na íyaporagatanüçüxũ. Rü nüma rü nüxũ nicuèxãchi ga meãma na nangãxũãxũ. Rü yemacèx Ngechuchucèx nixũ, rü nüxna naca, rü ñanagürü nüxũ: —Pa Ngúexëëruüx, ¿ngëxürüxũ i Tupanaärü mu nixĩ i guxũ i norü mugüarü yexera ixĩxũ? —ñanagürü. 29 Rü Ngechuchu nanangãxũ, rü ñanagürü: —Ngëma Tupanaärü mu i guxũ i norü mugüarü yexera ixĩxũ, rü ñaã nixĩ, ñanagürü:

“¡Iperüxĩnüë, Pa Iraéanecũãxgü! Rü nüma ya Cori ya tórü Tupana, rü yixicatama nixĩ ya tórü Cori. 30 ¡Rü nüxũ nangechaũ ya Cori ya curü Tupana guxüne ya curü maxünemaã, rü guxũ i cuãëmaã, rü guxũ i nagu curüxĩnüxũmaã, rü guxũ i curü poramaã!”

ñanagürü. 31 —Rü ngëma norü taxre i Tupanaärü mu, rü ñanagürü:

“¡Rü nüxũ nangechaũ i cumüçü na cugü cungechaũxürüü!”

ñanagürü. Rü nataxuma i to i Tupanaärü mu i ngëmagüarü yexera ixĩxũ —ñanagürü. 32 Rü yexguma ga yema ngúexëëruü ga mugüwa nguxëëtaexũ, rü ñanagürü Ngechuchuxũ: —Marü name, Pa Ngúexëëruüx, erü aixçüma nixĩ i ngëma nüxũ quixuxũ na wüxixicatama na yĩxũ ya Tupana, rü nataxuma ya naĩ. 33 —Rü ngëma Tupanaxũ na ingechaũxũ guxüne ya tórü maxünemaã, rü guxũ i nagu rüxĩnüxũmaã, rü guxũ i tórü poramaã, rü nüxũ na ingechaũxũ i tamüçü i yigü na ingechaũxürüü, rü ngëma rü guxüma i carnerugü i Tupanacèx idëixũ rü íguxüarü yexera narümemaë —ñanagürü. 34 Rü yexguma Ngechuchu nüxũ dëuxgu ga mexügu na naxĩnüãcüma na nangãxũãxũ ga yema ngúexëëruü ga mugüwa nguxëëtaexũ, rü ñanagürü nüxũ: —Marü tama taxũ cuxũ nataxu na cunayaxuxũ ya Tupana na curü ãëxgacü yĩxüçèx —ñanagürü. Rü yemawena rü marü taxuüma nügü naporaxëë na nüxna yacachigüxüçèx.

¿Texé nane nixĩ ya Cristu?
(Mt 22.41-46; Lc 20.41-44)

35 Rü yexguma tupauca ga taxünewa ínangúexëëtaeyane ga Ngechuchu, rü duüxügüna naca, rü ñanagürü: —¿Tüxcüü nixĩ i ngëma ngúexëëruügü i mugüwa nguxëëtaegüxũ i ñagüxũ:

“Yima Cristu ya Tupana nüxũ unetacü rü nuxçümaüçü ga ãëxgacü ga Dabítaa nixĩ”, ñagüxũ? 36 —¿Rü ñuxãcü i ngëmaãcü yadexagüxũ? Yerü nümatama ga Dabí, rü yexguma Tupanaãë i Üünexũ naãëwa ideaxgu rü ñanagürü:

“Cori ya Tupana rü chorü Corixü ñanagürü: ‘¡Nuã chorü tügü necüwawa rüto ñuxmatáta nüxü charüporamaë i curü uwanügü na cuga naxĩnüëxüçèx!’”

ñanagürü ga yema orewa. ³⁷ —¿Natürü ñuxücürüwa i Dabítaa yixü ya Cristu, ega nümatama ga Dabí, rü norü Corimaã naxuãgu? —ñanagürü. Rü yema muxüma ga duüxügü ga yéma yexmagüxü, rü taãëcüma Ngechuchuaxü inarüxĩnüë.

Ngechuchu rü nüxü nixu na tama yameärü maxüãxgüxü ga yema ngüexëëruügü ga Moïchéarü mugüwa ngüxëëtaegüxü
(Mt 23.1-36; Lc 11.37-54, 20.45-47)

³⁸ Ngechuchu rü norü ngüxëëtaewa rü ñanagürü: —¡Pexuãëgü naxcèx i ngëma ngüexëëruügü i Moïchéarü mugüwa ngüxëëtaegüxü! Erü nümagü rü norü me nixĩ i mexü i naxchirumaã na naxĩãneãxü. Rü nanaxwèxegü na ítamüwa duüxügü meã nüxü na rümoxëgüxü. ³⁹ —Rü ngutaquëxepataügüwa rü norü me nixĩ i ãëxgacügümèxwëxewa na natogüxü. Rü õnagü i taxüwa rü ngëma õnaärü yoraxütawa ügüxü i nachicacèx nadaugü. ⁴⁰ —Natürü tüxna nanapuxü ya tümapatagü ya yíxema yutegüxe. Rü ñuxüchi nanamëxëë i norü yumüxëgü na ngëmagu nügü yacüxgüxüçèx rü duüxügü nagu rüxĩnüëxüçèx na aixcüma mexügü na yixígüxü. Natürü nümagü tá nixĩ i yexeraäcü napoxcuexü —ñanagürü.

Yutecü ga ngearü dïëruãxcü ga Tupanacèx dïëru ngixü ixãcü
(Lc 21.1-4)

⁴¹ Wüxicana ga Ngechuchu rü tupauca ga taxüneärü dïëruchiüärü toxmèxtawa narüto. Rü yéma inadawenü ga ñuxäcü duüxügü yexma ngixü yanaxücuchigüxü ga norü dïërugü. Rü muxüma ga duüxügü ga idïëruãxgüxüchixü rü yexma ngixü nayarüxücuchigü ga muxüchicü ga norü dïëru. ⁴² Rü ngürü yéma ingu ga wüxi ga yutecü ga ngearü dïëruãxcü. Rü ngïma rü wüxi ga yema dïëruchiügu ngixü iyarüxücuchi ga taxretachinü ga dïëruxacü ga ítanücü. ⁴³ Rü yexguma ga Ngechuchu rü norü ngüexügüçèx naca, rü ñanagürü nüxü: —Aixcüma pemaã nüxü chixu rü ñaã ngecü i yutecü i ngearü dïëruãxcü, rü guxü i ngëma togü i dïëruchiügu dïëru ngixü ixücuchigüxüärü yexera ngixü ixã. ⁴⁴ Erü guxüma i togü rü ngixü inaxägü i ngëma nüxü íyaxügücü. Natürü ngïma ngixü natauxyane ngixü ixã i guxcüma i ngixü ngëxmèxcü i ngïrü õnatanü —ñanagürü.

13

Ngechuchu nanaxunagü na tupauca ga taxünegu tá na napogüexü
(Mt 24.1-2; Lc 21.5-6)

¹ Rü yexguma tupauca ga taxünewa ínaxüxügu ga Ngechuchu, rü wüxi ga norü ngüexügü rü ñanagürü nüxü: —Pa Ngüexëëruüx ¡dücax ñuxäcü nimexëchi ya daa tupauca ya itaxüne rü naxtapüxarü nutagü! —ñanagürü. ² Natürü Ngechuchu nanangãxü, rü ñanagürü: —Pema nüxü pedaugü ya guxünema ya yima tupauca ya taxüneärü ípatagü. Natürü pemaã nüxü chixu rü aixcüma guxünema ya daa ípatagü rü tá nagu napogüe. Rü norü nutagü rü taxucütáma nügüetü naxüxüra, rü bai tá ya wüxi —ñanagürü.

Cuëxruügü i tá nüxü idauxü naxüpa na nagüxü i naãne
(Mt 24.3-28; Lc 21.7-24, 17.22-24)

³⁻⁴ Rü yemawena rü Oríbunecüarü Mèxpüne ga tupauca ga taxüneärü toxmèxtawa yexmanewa naxĩ. Rü yéma narüto ga Ngechuchu. Rü Pedru rü Chaütiágu rü Cuáü rü Aüdré rü naxütawa naxĩ na noxrüwama nüxna

nacagüexücèx. Rù ñanagürügü: —Tanaxwèxe i tomaã nüxü quixu na ñuxgu tá nangupetüxü i ngēma nüxü quixuxü. ¿Rü tacü tá nixi i norü cuèxruü i nawa nüxü tacuáxü ega nawa tá nanguxgu i ngēma? —ñanagürügü. ⁵ Rù yexguma ga Ngechuchu rü nanangãxü rü ñanagürü nüxü: —¡Pexuãëgü na taxúema pexü womüxëexücèx! ⁶ —Erü muxüchixü i duüxügü tá ínangugü, rü chaugu tá nügü nicuxgü, rü ñanagürügü tá:

“Choma nixi i Cristu”, ñanagürügü tá. Rù muxüchixü i duüxügüxü tá nawomüxë. ⁷ —Rü ngëxguma nüxü pexinüëgu na nügü nadëixü i nachiuñnegü i ngaicamagüxü rü togü i nachiuñnegü i yaxügugüxü, ¡rü tãütama ngëmacèx pebaixãchiãëgü! Erü woetama ngëmaãcü tá nangupetü. Natürü tãütama naãneärü gux nixi i ngēma. ⁸ —Erü wüxi i nachiuñane rü to i nachiuñanemaã tá nügü nadai. Rù wüxi ya ãëxgacüarü churaragü rü to i ãëxgacüarü churaragümaã tá nügü nadai. Rù muxüma i nachicawa rü tá naxiãxãchiane. Rù tá taiya nangux. Natürü guxüma i ngēma rü norü ügümare nixi i ngēma ngúxü i tá ínguxü. ⁹ —¡Rü meã pegüna pedaugü! Erü ãëxgacügüpëxewa tá pexü nagagü, rü ngutaquëxepataügü tá pexü nicuaixgü. Rù nachiuñnegüarü ãëxgacügüpëxewa tá pexü nagagü naxcèx na chorü duüxügü na pixigüxü. Natürü ngëmaãcü tá pexü natauxcha na ngēma ãëxgacügümaã nüxü pixuxü i chauchiga. ¹⁰ —Natürü naxüpa na nagúxü i naãne rü tá nüxü nixugüe i Tupanaärü ore i guxü i nachiuñnegüwa. ¹¹ —Natürü ngëxguma ãëxgacügüpëxewa pexü nagagügu, ¡rü tãütama pexoe-gaãëgü naxcèx na tacümaã tá penangãxüxü! ¡Rü namaã nüxü pixu i ngēma ore i ngëxgumatama Tupana pexna äxü na nüxü pixuxücèx! Erü tãütama pema nixi na pidexagüxü, natürü Tupanaãe i Üünexü tá nixi i pewa idexaxü. ¹² —Rü nügüeneëgüwa tátama rü ãëxgacügüxütawa nügü ínayaxuaxügü na ngëmaãcü tüxü nadëixücèx. Rù ngëxgumarüü tá ta i papágü rü mamágü rü tá naxãcügüxü ínayaxuaxügü. Rù nümagü i naxãcügü rü tá nanatügümaã rü naëgümaã nanuë, rü tá tüxü ínayaxuaxügü na ãëxgacügü tüxü nadëixücèx. ¹³ —Rü guxü i naãnewa rü duüxügü tá pexchi naxaie naxcèx na chorü duüxügü pixigüxü. Natürü yixema naëtüwa meã Tupanaãxü yaxõõmáxë, rü yixema tá tixi ya aixcüma nayaxúxe i maxü i taguma gúxü. ¹⁴ —Rü ngëxguma nüxü pedëuxgu i ngēma ãüãchixü rü ãücümaxüchixü i chixexëeruü i ngextá tama ínaxwëxëxüwa na nangëxmaxü, rü ngëxguma ya yixema Yudéanewa ngëxmagüxe, rü tanaxwèxe i mëxpüneãnewa tabuxmü. Rù texé ya yixema nüxü daumatüxe, ¡rü name nixi i meã nagu tarüxĩnü i ngēma! ¹⁵ —Rü ngēma ngunexügu texé tümapataëxtüwa ngëxmagu, rü tama name i tümapatagu tayan-gaxi na tacü i tümaärü ngëmaxü tayayaxuxücèx. ¹⁶ —Rü texé ya tümaãnewa ngëxmaxë rü tama name i tümapatacèx tataegu na tümachirugü tayayaxuxücèx. ¹⁷ —Rü ngēma ngunexügügu, rü wüxi i ngechaü tá nixi i tümacèx ya yixema ngexegü ya itacharaügüxe rü yixema maixãcügüxe. ¹⁸ —¡Rü Tupanana naxcèx peca i perü yumüxëwa na tama gáuane ixüyane pexü na nangupetüxücèx i ngēma chixexü! ¹⁹ —Erü ngēma ngunexügügu rü poraãcü tá nangëxma i ngúxü ga noxri Tupana naãne ixügügumama taguma yexmaxü, rü ngëmaxena rü tagutáma nangëxma. ²⁰ —Rü ngëxguma Tupana tama nanoxrexëëgu i ngēma ngunexügü, rü taxúetáma tamaxü. Natürü Tupana rü marü nananoxrexëë i ngēma ngunexügü erü tüxü nangechaü ya yixema noxrüxü tüxü nadexe. ²¹ —Rü ngëxguma texé pexü ñagügu:

“Dücèx, daa nixi ya Cristu”, ñagügu, rü ëxna:

“Gua nixi ya Cristu”, ñagügu, ¡rü tãxü i nüxü peyaxõgüxü! ²² —Erü Cristugüneta rü Tupanaärü orearü uruügüneta tá ínangugü. Rù tá nanaxügü i muxüma i cuèxruügü i taxügü. Rù ngëmaãcü, ega nüxü natauxchagu, rü tá

tüxü nawomüxëëgü woo ya yíxema duüxëgü ya Tupanatama tüxü dexe. ²³ — ¡Pexuãëgü! Erü guxüma i ngëma tá ngupetüxü, rü marü naxüpa pemaã nüxü chixu.

Ñuxäcü tá nixí i ngëxguma nataegugu ya Tupana Nane ya duüxüxü ixícü
(Mt 24.29-35, 42, 44; Lc 21.25-36)

²⁴ —Natürü marü nangupetügu i ngëma ngúxügü, rü ngëma ngunexügügu rü tá nixo ya üèxcü rü tãütáma inabaxi ya tauemacü. ²⁵ —Rü woramacurigü rü éxtagü rü tá narüyi. Rü guxüma i daxüwa ngëxmaxü rü tá naxíãxächitanü rü nachicana tá nixígachitanü. ²⁶ —Rü ngëxguma i duüxügü rü tá nüxü nadaugü ya Tupana Nane ya duüxüxü ixícü na caixanexügu ínaxíxü i guxüma i norü poramaã rü norü ngóonexümaã. ²⁷ —Rü tá nanamu i norü orearü ngeruügü i daxücüãx na tüxü nanutaquëxexücèx ya yíxema Tupana tüxü idexechixe ya guxüwama ngëxmagüxe ñuxmatáta naãne íyacuáxüwa nangu. ²⁸ —¡Iperüxínüë i ñaã nguxëëtae i orix i iguerachiga, rü naxcèx pengúe! Rü ngëxguma ngexwacaxüxü i nachacüüxacügü iyarüyixgu rü naxüátügu, rü ngëmawa nüxü pecuèx na paxa tá taunecü yíxü. ²⁹ —Rü ngëxgumarüü ta, rü ngëxguma nüxü pedèuxgu na nangupetüxü i ngëma pemaã nüxü chixuxü, rü ngëmawa tá nüxü pecuèx na paxaxüchi tá ínanguxü ya Tupana Nane ya duüxüxü ixícü. ³⁰ —Rü guxüma i ngëma ñuxma pemaã nüxü chixuxü rü aixcüma tá nangupetü naxüpa na nayuxü i ngëma duüxügü i ngëxguma maxëxü. ³¹ —Daxüguxü i naãne rü ñoma i naãne rü tá inayarüxo. Natürü chorü ore rü tagutáma inayarüxo, rü aixcüma tá ningü. ³² —Natürü ngëma ngunexü rü ora i nagu tá nangupetüxü i ngëma pemaã nüxü chixuxü, rü Tanatü ya Tupanaxícatama nüxü nacuèx i ñuxgu tá na nangupetüxü i ngëma, rü taxúema ya togue nüxü tacuèx. Rü woo i norü orearü ngeruügü i daxücüãx rü tama nüxü nacuèxgü, rü woo i choma na Nane chíxü rü tama nüxü chacuèx i ñuxgu tá na nangupetüxü i ngëma. ³³ —Rü ngëmacèx, ¡ipedaue rü pexuãëgü! Erü tama nüxü pecuèx i tacü rü ora tá íchangu i chomax. ³⁴ —Rü guxüma i ngëma pemaã nüxü chixuxü, rü ñoma wüxi ga yatü ga ixüächichaücü na to ga nachíüãnewa naxüxücèxrüxü nixí. Rü yemacèx norü puracütanüxüna naxâga na mea nüxna nadaugüxücèx ga guma napata. Rü ñuxüchi wüxichigüna nanaxâ ga norü puracü. Rü yëma íãxârü dauruü rü nagu nanamu na mea nadauxütaegüxücèx. ³⁵⁻³⁶ —¡Rü ngëmacèx i pema rü name na ípexuãëgüxü! Erü tama nüxü pecuèx i ñuxgu tá ínangu ya yima cori ya ípataarü yora, rü bexmana noxri nachütagu, rü éxna ngãxücüügu, rü éxna otá icaxgu, rü éxna noxri yangóonegu. ¡Rü ngëmacèx ipedaue na ngürüächí ínanguxgu tama ípepeeyane pexü na íyanguéüxücèx! ³⁷ —Rü ngëma ore i pemaã nüxü chixuxü, rü guxü i duüxügücèx nixí. ¡Rü ipedauecha! —ñanagürü.

14

Äëxgacügü naxcèx nadaugü na ñuxäcu Ngechuchuxü yayauxgüxü
(Mt 26.1-5; Lc 22.1-2; Cu 11.45-53)

¹ Rü taxre ga ngunexü nataxu ga na nawa nanguxü ga Yudíugüarü peta ga Üpetüchiga ga nagu nangõxgüãxü ga pãü ga ngearü puxëëruüãxü. Rü ga paigüarü äëxgacügü rü ngüexëëruüügü ga mugüwa nguxëëtaegüxü rü naxcèx nadaugü ga ñuxäcü bexma duüxügüechita Ngechuchuxü na yayauxgüxü rü na yamëxgüãxücèx. ² Yerü nümaxü rü ñanagürügü: —Taxucürüwama ñuxma petagu tayayauxgü, erü duüxügü rü tá tamaã nanuë —ñanagürügü.

Wüxi ga nge rü Ngechuchuerugu inaba ga pumara
(Mt 26.6-13; Cu 12.1-8)

3 Rū Ngechuchu rü Betániãwa naxũ napatawa ga Chimáũ ga rüchaxü necümaã naxugüãcü. Rū yexguma mechawa natoyane, rü yéma ingu ga wüxi ga ngecü ga wüxiweũ ga pumara ga yixichixũ ga tatanüxũchixũ yéma ngecü. Rū iyapoyenagu ga yema pumarachixũ ga nuta ga mexëchicünaxcèx, rü Ngechuchuerugu inaba. 4 Natürü ñuxre ga yema yéma yexmagüxũ rü nanuë naxcèx ga yema naxüxũ ga yema ngecü, rü nügümaã ñanagürügü: —¿Tüxcüũ ngëxma inaxaiyaxũ i ngëma pumara? 5 —Rü narümemaë chi nixĩ i 300 tachinü i dñerugu namaã itaxe, rü ñuxũchi ngëma dñerumaã nüxũ irüngüxëë i ngëma duüxügü i ngearü dñeruãxgüxũ —ñanagürügü. Rū yemaãcü ngĩchiga nidexagü ga yema nge. 6 Natürü ga Ngechuchu rü ñanagürü nüxũ: —¡Ngexrüma! ¿Tüxcüũ ngĩxũ pechixewe? Erü ngëma chomaã naxüxũ, rü wüxi i mexũ nixĩ. 7 —Rü ngëma ngearü dñeruãxgüxũ rü guxügutáma petanüwa nangëxmagü, rü ngëmaãcü pexũ natauxcha na nüxũ perüngüxëëxũ i ngëxguma penaxwëxegu. Natürü i choma rü tãütáma guxügu petanüwa changëxma. 8 —Rü ñaã nge rü inaxü i guxüma i ngëma ngĩxũ tauxchaxũ, rü ngëmacèx yoxni choxũ ipumaraxüne naxüpa na ichatáxũ. 9 —Rü aixcüma pemaã nüxũ chixu rü guxũ i naãnewa i ngextá duüxügü nüxũ íxugügüxüwa i ore i maxëxëëruũ, rü ñaã ngecü chomaã üxũ rü tá ta nüxũ nixugügü. Rū ngëmaãcü tá ngĩxna nacüëxãchie i duüxügü —ñanagürü ga Ngechuchu.

Yuda rü ãëxgacügümaã nanamexëë na ñuxãcü tá na Ngechuchuxũ yayauxgüxüçèx

(Mt 26.14-16; Lc 22.3-6)

10 Rū Yuda Icariúte ga wüxi ga yema 12 ga ngúexütanüxũ ixĩxũ, rü Yudiugüarü paigüarü ãëxgacügütanüwa naxũ na namaã yamexëëãxüçèx na ñuxãcü tá na Ngechuchuxũ yayauxgüxüçèx. 11 Rū yexguma yemaxũ naxĩnüëgu, rü nümagü ga yema ãëxgacügü rü nataãëgü. Rū dñeru Yudana ngĩxũ naxuaxügü. Rū yexgumama inanaxügü ga Yuda ga naxcèx na nadauxũ ga ñuxãcü nüxũ na natauxchaxëëgüãxũ na duüxügüechita Ngechuchuxũ yayauxgüxüçèx.

Coriarü ðnachiga

(Mt 26.17-29; Lc 22.7-23; Cu 13.21-30; 1 Co 11.23-26)

12 Rū nawa nangu ga ngunexũ ga nagu inaxügüxũ ga yema peta ga pãu ga ngearü puxëëruũãxũ nagu nangõxgüxũ. Rū yema nixĩ ga ngunexũ ga nagu carneruxacü naxcèx yamëxgüxũ ga Üpetüchigaarü peta. Rū yexguma ga norü ngúexügü rü Ngechuchuna nacagüe, rü ñanagürügü: —¿Ngextá cunaxwëxe na tanamexëëxũ i õna i Üpetüchigaarü petagu ingõxũ? —ñanagürügü. 13 Rū yexguma ga nüma rü nanamu ga taxre ga norü ngúexügü, rü ñanagürü nüxũ: —¡Ëcü, yéa ñãnewa pexĩ! Rū ngëxma tá nüxũ peyangau i wüxi i yatü i wüxi ya tüxũ ya dexámaã ããcuxe ngëxma tüxũ ingexũ. ¡Rü nawe perüxĩ! 14 —¡Rü yima ñpata ya nagu yaxücune i ngëma yatü, rü yima ñãrü yoramaã nüxũ pixu, rü ñapegügü nüxũ:

“Torü ngúexëëruũ nüxũ nacüáxchaũ na ngëxũ yĩxũ i ngëma ucapu i norü ngúexügümaã tá nawa nachibüxũ i Üpetüchigaarü õnagu”, ñapegügü nüxũ! 15 —Rü nüma tá pexũ nüxũ nadauxëë i wüxi i ucapu i taxũ i marü meã mexëëxũ i norü daxüchiüwa ngëxmaxũ. ¡Rü ngëma penamexëëx i tórü õna i Üpetüchigacèx ixĩxũ! —ñanagürü nüxũ. 16 Rū inaxĩãchi ga yema taxre ga ngúexügü, rü ñãnewa naxĩ. Rū yexma nüxũ inayangaugü ga guxüma yema Ngechuchu namaã nüxũ ixuxürüü. Rū yéma nanamexëë ga õna ga Üpetüchigacèx ixĩxũ. 17 Rū yexguma marü nachütachaũgu, rü ínangu ga Ngechuchu namaã ga yema 12 ga norü ngúexügü. 18 Rū yexguma mechawa

ínachibüeyane, rü Ngechuchu rü ñanagürü nüxü: —Aixcüma pemaã nüxü chixu rü wüxie ya petanüwa i ñuxma chomaã nuã chibüxe tá tixí ya bexma choxü íyaxuaxüxê —ñanagürü. ¹⁹ Rü yexguma ga nümagü ga norü ngúexügü rü poraãcü nangechaügü. Rü inanaxügü ga na wüxichigü nüxna icachigüxü, rü ñanagürügü: —Pa Corix, ¿choma tá chiixü i cuxü íchayaxuaxüxü? —ñanagürügü. ²⁰ Rü nüma ga Ngechuchu nanangãxü rü ñanagürü nüxü: —Wüxi i pema i 12 tanüwa i daatama poratuwa norü pãu iwaixêxü, rü ngêma tá nixí i choxü íyaxuaxüxü. ²¹ —Rü choma i Tupana Nane na duüxüxü chiixü, rü tá chayü ngêma Tupanaãrü ore i ümatüxü nüxü ixuxürü. Natürü wüxi i ngechaüxüchi nixí naxcèx i ngêma yatü i choxü íyaxuaxüxü. Rü narümemae chi nixí ga noxtacüma tãu chima na nabuxü —ñanagürü. ²² Rü yexguma ínachibüeyane, rü Ngechuchu nanayaxu ga pãu. Rü Tupanana moxê naxã, rü inanabücu, rü norü ngúexügüxü nayanu. Rü ñanagürü nüxü: —¡Penayux i ñãã pãu! Rü ngêma rü chaxunechiga nixí —ñanagürü. ²³ Rü yemawena nanayaxu ga wüxi ga pochiyu ga binumaã aãcuxü. Rü yexgumarü ta Tupanana moxê naxcèx naxãxíra, rü ñuxüchi norü ngúexügüna nanaxã. Rü guxüma nawa naxaxegü. ²⁴ Rü ñanagürü nüxü: —Daa binu ya chaugü i muxüma i duüxügücèx ibacüchiga nixí. Rü yimawa Tupana meãma nanangoxê na aixcüma yíxü i norü uneta. ²⁵ —Rü aixcüma pemaã nüxü chixu rü tãxütáma wena chayaxaxü ya daa binu ñuxmatáta Tupana aëxgacü íixüwa binu ya ngexwacaxücu chayaxaxüx —ñanagürü.

Ngechuchu nüxü nixu rü Pedru rü taxütáma nügü nixu na norü ngúexü yíxü (Mt 26.30-35; Lc 22.31-34; Cu 13.36-38)

²⁶ Rü ñuxüchi nawiyaegü ñuxre ga Tupanaãrü wiyaeü. Rü yemawena rü Oríbunecüarü Mèxpúnewa naxí. ²⁷ Rü yexguma ga Ngechuchu rü ñanagürü nüxü: —Guxãma i pema rü tá choxü ípetèxgü. Erü ngêmaãcü nüxü nixu i Tupanaãrü ore i ümatüxü i ñaxü:

“Tá chayamèx ya carneruarü dauruü, rü tá nanaxüanemare i carnerugü”, ñaxü. ²⁸ —Natürü ngèxguma marü yuwa ícharüdaxguwena, rü chaxira tá pexüpa Gariréaanewa chaxü —ñanagürü. ²⁹ Rü yexguma ga Pedru rü ñanagürü nüxü: —Woo guxüma i togü cuxü itèxgu, rü choma rü tãütáma cuxü íchatèx —ñanagürü. ³⁰ Rü Ngechuchu nanangãxü rü ñanagürü nüxü: —Aixcüma cumaã nüxü chixu rü ñomatama i chütaxügu rü naxüpa na taxreëxpüxcüna yaçaxü i otá, rü tomaëxpüxcüna taxütáma cugü quixu na chorü duüxü quiixü —ñanagürü. ³¹ Natürü nüma ga Pedru rü ñanagürüama: —Woo wüxigu cumaã chayuxgu, rü tãxütáma chaugü ichicux na curü duüxü chiixü —ñanagürü. Rü guxüma ga togü ga norü ngúexügü rü ta yema ñanagürügü.

Ngechuchu rü Yechemaníwa nayayumüxê (Mt 26.36-46; Lc 22.39-46)

³² Rü yemawena rü Ngechuchu rü norü ngúexügü rü nawa naxí ga wüxi ga nachica ga Yechemanígu aëgaxü. Rü Ngechuchu rü ñanagürü nüxü: —¡Nuã perütogü yoxni paxa yéa chayayumüxê! —ñanagürü. ³³ Rü ñuxüchi ínayagagü ga Pedru, rü Chaütiágu, rü Cuáü. Rü naxcèx inaxügü ga na poraãcü nangechaüxü rü naxixächiãêxü. ³⁴ Rü yexguma rü ñanagürü nüxü: —Poraãcü changechaü, rü nagu charüxínü na ngémamaã tá chayuxü. ¡Rü nuxa perücho i pemax, rü ipedaue! —ñanagürü. ³⁵ Rü yexguma ga Ngechuchu rü yéaxüra naxü. Rü ñaxtüanegu nanangücuchi. Rü Tupanana naxcèx naca na nawa íanguxuchixüçèx ga yema ngúxü ga yexguma chi Tupanaãrü ngúchaü yixígu. ³⁶ Rü norü yumüxêwa rü ñanagürü: —Pa Chaunatüx, cuxcèx rü guxüma natauxcha. ¡Rü nüxna choxü íanguxuchixê i ñãã ngúxü i tá choxü

üpetüxü! Natürü chanaxwèxe i cunaxü i cuxrütama ngúchaü rü tama i choxrü —ñanagürü. ³⁷ Rü ñuxüchi nataegu ga norü ngúexüügü íyexmagüxüwa. Rü nüxü inayangau ga na ínapeexü. Rü ñanagürü Pedruxü: —Pa Chimáüx, ¿ícupe? ¿Tama éxna namaã cupora na icudauxü, rü bai i wüxi i ora? ³⁸ — ¡Rü ipedaue, rü Tupanana naxcèx peça na pexü nangüxèèxücèx na tama choxü ípetáxücèx i ngëxguma tacü rü guxchaxü pexü üpetügu! Erü aixcüma peãewa rü ípememare, natürü pexene nixí i ngëma turaxü —ñanagürü. ³⁹ Rü wenaxârü ínixü, rü noxrirüütama nayayumüxë. ⁴⁰ Rü yexguma wenaxârü norü ngúexüügüçèx nataegugu, rü nüxü inayangau ga na wenaxârü ínapeexü, yerü poraãcü nayaxtaexüchi. Rü yemacèx ga nümagü rü tama nüxü nacüexgü ga na tacümaã tá nangãxügüãxü. ⁴¹ Rü norü tomaëxpüxcüna wenaxârü norü ngúexüügüçèx nataegu, rü ñanagürü nüxü: —¿Ñuxma rü ta éxna ípepeema rü iperüngüëãma? ¡Rü marütama! Erü choma i Tupana Nane na duüxüxü chiüxü rü marü nawa nangu i ora na choxü na yayauxgüxü rü nüxna na choxü namugüxücèx i duüxügü i chixexü i pecaduãxgüxü. ⁴² —¡Rü ipechigü, rü ngíxã ítixí! Erü marü ñomama nixí i ngëma choxü íyaxuaxüxü —ñanagürü.

Ngechuchuxü niyauxgü

(Mt 26.47-56; Lc 22.47-53; Cu 18.2-11)

⁴³ Rü yexguma íyadexayane ga Ngechuchu, rü ínangu ga Yuda ga norü ngúexüchiréx ixíxü. Rü nawe narüxí ga muxüma ga duüxügü ga taramaã rü naímaã ixãnxexü. Rü yema nixí ga duüxügü ga yéma namugüxü ga paigüarü äëxgacügü rü ngúexèëruügü ga mugüwa ngüxèëtaegüxü rü Yudíugüarü äëxgacügüerugü. ⁴⁴ Rü Yuda ga ínaxuaxüxü rü marü yema duüxügümaã nanamexëë, rü ñanagürü:

“Ngëma nüxü chachúxuxü nixí i Ngechuchu. Rü ngëma tá nixí i piyauxgüxü rü meã peyanáíãcüma peyagagüxü” —ñanagürü. ⁴⁵ Rü yemaãcü Ngechuchucèx nixü, rü ñanagürü nüxü: —Pa Ngúexèëruüx —ñanagürü. Rü ñuxüchi nanachúxu. ⁴⁶ Rü yexgumatama Ngechuchuxü niyauxgü. ⁴⁷ Natürü wüxi ga Ngechuchutanüxü nanawëxechi ga norü tara, rü yemamaã paigüarü äëxgacüarü duüxüxü ínadaechinü. ⁴⁸ Rü yexguma ga Ngechuchu rü yema duüxügüna naca, rü ñanagürü nüxü: —¿Tüxcüü taragü rü naíxmenèãgümaã chauxcèx nuã pexí na choxü peyarüyaxgüxücèx ñoma wüxi i ngítexáxü chiüxüüü? ⁴⁹ —Rü guxü ga ngunexügu rü petanüwa chayexma ga yexguma tupauca ga taxünewa changüxèëtaegu, rü taguma choxü piyauxgü. Natürü ñaã ñuxma ngupetüxü, rü nangupetü na yangüxücèx i Tupanaârü ore i ümatüxü —ñanagürü. ⁵⁰ Rü yexguma ga guxüma ga norü ngúexüügü rü nüxna nibuxmü. Rü nüxícatama yéma nanatèxgü ga Ngechuchu. ⁵¹ Natürü wüxi ga ngextüxücü ga düxruümaãxíca nügü nuquecü nawe nixüchigü. Rü yema duüxügü rü nayayauxgü. ⁵² Natürü nüma rü nüxü ningëx ga yema düxruü, rü yemaãcü ngexchiruãcüma niña.

Äëxgacügüpëxewa Ngechuchuxü nagagü

(Mt 26.57-68; Lc 22.54-55, 63-71; Cu 18.12-14, 19-24)

⁵³ Rü yexguma ga yema duüxügü rü paigüarü äëxgacüpëxewa nana-gagü ga Ngechuchu. Rü yexma nangutaquëxegü ga guxüma ga togü ga paigü ga äëxgacügü ixígüxü, rü yema Yudíugüarü äëxgacügüerugü, rü yema ngúexèëruügü ga mugüwa ngüxèëtaegüxü. ⁵⁴ Natürü ga Pedru rü yaxügu nawe nixächigü ñuxmata guma paigüarü äëxgacüpataèxtüwa nangu. Rü purichíagü ga tupauca ga taxüneârü dauruügümaã yéma íãxtüwa narüto. Rü nügü yéma nanaixü üxüxütawa. ⁵⁵ Rü yema paigüarü äëxgacügü rü guxüma ga yema togü ga äëxgacügü ga itaxü rü naxcèx nadaugü ga ñuxãcü

Ngechuchuxü na ínaxuaxügüxü rü na yamèxgüãxüçèx. Natürü taxucürüwa nüxü inayangaugü ga tacüçèx tá na yamèxgüãxü. ⁵⁶ Yerü woo muxüma ga duüxügü rü nüxü nixugüe ga doramare ga nachiga, natürü nügütanüwatama rü tama nawüxigu ga norü ore. ⁵⁷⁻⁵⁸ Rü ñuxre ga togü inachigü rü doraxümare nixugüe ga Ngechuchuchiga. Rü ñanagürügü: –Toma nüxü taxínüë ga na ñaxü:

“Tá chanangutaxüxëë ya daa tupauca ya taxüne ya duüxügü üxüne. Rü tomaëxpüx i ngunexügu tá chanaxü ya náí ya tama duüxügü üxüne”, ñaxü –ñanagürügü. ⁵⁹ Natürü woo yema oremaã, rü tama nawüxiguéga ga norü ore. ⁶⁰ Rü yexguma ga guma paigüarü ãëxgacü rü guxüpëxewa inachi. Rü Ngechuchuna naca, rü ñanagürü: –¿Éxna taxuxümaãma cunangãxü i ñuxmax? ¿Rü tacü nixí i ngëma nüxü yaxugüxü i cuchiga? –ñanagürü. ⁶¹ Natürü ga Ngechuchu rü nangeëxmare, rü taxuxümaãma nanangãxü. Rü yemacèx ga nüma ga paigüarü ãëxgacü rü wenaxârü nüxna naca, rü ñanagürü: –¿Rü cuma quiixü ya Cristu ya Tupana ya mecü Nane? –ñanagürü. ⁶² Rü Ngechuchu rü ñanagürü nüxü: –Ngü. Ngëma nüxü quixuxü chixí. Rü tá choxü pedaugü i ngëxguma Tupana ya poracüarü tügünecüwawa charütöxgu rü ngëxguma caixanexügu wenaxârü núma chaxüxgu –ñanagürü. ⁶³ Rü yexguma ga guma paigüarü ãëxgacü rü norü numaã nügüchirugu nagaugü. Rü ñanagürü: –¿Tüxcüü marü tanaxwëxe i to i duüxü i nüxü ixugüxü i nachiga? ⁶⁴ –Rü pematama marü nüxü pexínüë na ñuxãcü Tupanamaã naguxchigaxü. ¿Rü ñuxü ñapegüxü i ñuxmax? –ñanagürü. Rü guxüma wüxigu narüxínüë rü: –Aixcüma nixí na chixexü naxüxü rü namexü na nayuxü –ñanagürügü. ⁶⁵ Rü ñuxre ga nümagü rü inanaxügüe ga nüxna na naçuaixgüexü. Rü nanatüxetügü rü ñuxüchi nüxü nidagügü ñaxümaã: –¿Nüxü nacüèx na texé cuxü idagüxü! –ñanagürügü. Rü yema tupauca ga taxüneârü dauruügü ga purichíagü rü nanapechiwegü.

*Pedru rü tama nügü nixu na Ngechuchuxü nacuéxü
(Mt 26.69-75; Lc 22.56-62; Cu 18.15-18, 25-29)*

⁶⁶ Rü yoxni ga Pedru rü ñaxtüwa ãëxgacüpataëxtüwa nayexma. Rü yexgumayane yéma ingu ga wüxi ga pacü ga guma ãëxgacüarü duüxü ixícü. ⁶⁷ Rü yexguma Pedruxü nadëuxgu ga yéma üxüxütawa nügü na nanaixüxü, rü meã nüxü idawenü, rü ngígürügü nüxü: –Cuma rü ta namücü quixí i ngëma Ngechuchu i Nacharétucüãx –ngígürügü. ⁶⁸ Natürü ga Pedru rü nügü inicux na Ngechucharü duüxü yíxü, rü ñanagürü: –Choma rü tama nüxü chacuèx ya yima. Rü tama nüxü chacuèx i tacüchiga nixí i ngëma nüxü quixuxü –ñanagürü. Rü yexguma ga nüma rü ípataëxtüarü düxétüwa naxü. Rü yexgumatama nica ga otá. ⁶⁹ Natürü ga yema pacü rü wenaxârü Pedruxü idau, rü inaxügü ga yema togümaã nüxü na yaxuxü, rü ngígürügü: –Ñã rü wüxi i natanüxü nixí –ngígürügü. ⁷⁰ Natürü nüma ga Pedru rü wena tama nügü nixu. Rü yixcamaxüra rü yema duüxügü ga yéma yexmagüxü rü wenaxârü ñanagürügü nüxü: –Aixcüma nixí na cuma rü ta ngëma Ngechuchutanüxü na quiixü, erü wüxi i Gariréaanecüãx quixí –ñanagürügü. ⁷¹ Rü yexguma ga Pedru rü poraãcü nügü nixã, rü ñanagürü: –Rü aixcüma tama nüxü chacuèx i ngëma yatü i nachiga pidexagüxü. Rü ngëxguma doraxü chixuxgu rü ¿Tupana choxü poxcux! –ñanagürü. ⁷² Rü yexgumatama norü taxreëxpüxcüna nica ga otá. Rü yexguma ga Pedru rü nüxna nacüèxãchi ga yema ore ga üpaacü Ngechuchu namaã nüxü ixuxü ga ñaxü:

“Rü naxüpa na taxreëxpüxcüna otá içaxü, rü cuma rü tá tomaëxpüxcüna cugü quicux na chorü duüxü quiixü”, ñaxü. Rü yexguma ga Pedru rü poraãcüxüchima naxaxu.

15

Piratupëxewa nayexma ga Ngechuchu (Mt 27.1-2, 11-14; Lc 23.1-5; Cu 18.28-38)

¹ Rû yexguma yangunegu, rû nangutaquëxegü ga âëxgacügü ga taxügü ga paigüarü âëxgacügü rû Yudiügüarü âëxgacügüerugü rû ngúexëëruügü ga mugüwa nguxëëtaegüxü rû guxüma ga togü ga yema âëxgacügütanüwa ügüxü. Rû Ngechuchuxü yanëixgüchacüüäcüma âëxgacü ga Piratuxütawa nanagagü. ² Rû nüma ga Piratu rû Ngechuchuna naca rû ñanagürü: —¿Cuma quüixü i Yudiügüarü âëxgacü ya tacü? —ñanagürü. Rû Ngechuchu nanangäxü, rû ñanagürü: —Ngü, yima nüxü quixucü chixi —ñanagürü. ³⁻⁴ Natürü yema paigüarü âëxgacügü rû poraäcü ínanaxuaxügüama, rû yemacëx ga Piratu rû wenaxärü Ngechuchuna naca, rû ñanagürü: —¿Éxna taxuxümaäma cunangäxü? ¿Düçëx i ñuxre i cuchiga i nüxü yaxugüexü! —ñanagürü. ⁵ Natürü ga Ngechuchu rû taxuxümaäma nanangäxü. Rû yemacëx ga Piratu rû poraäcü nabaixächiaë.

Piratu rû Ngechuchumaã nanaxuegu na nayuxüçëx (Mt 27.15-31; Lc 23.13-25; Cu 18.38-19.16)

⁶ Rû gucü ga taunecügu ga yexguma yema Üpetüchigaarü petawa nanguxgu rû Piratu ínananguxuchixëëxü ga wüxi ga poxcuxü ga duüxügü naxçëx ícagüxü, yerü yema nixi ga nacüma. ⁷ Rû wüxi ga yatü ga Barabágu äegaxü, rû poxcupataügu napoxcu wüxigu namaã ga togü ga natanüxü ga máëtagüxü ga yexguma âëxgacüxü ínatëxüchigüchaügu. ⁸ Rû yema duüxügü rû yéma Piratuxütawa nangugü. Rû ínanaxügüe ga Piratuna na nacagüexü na naxçëx yangéäxüçëx ga wüxi ga poxcuxü aixrügumarüü. ⁹ Rû Piratu nanangäxü, rû ñanagürü: —¿Penaxwëxexü na pexçëx íchananguxuchixëëxü ya yima Ngechuchu ya duüxügü Yudiügüarü âëxgacümaã naxugüäcü? —ñanagürü. ¹⁰ Rû yema ñanagürü ga Piratu yerü nüxü nacüçëx ga na yema paigüarü âëxgacügü rû na yaxauxächixüçëx yüxü ga Ngechuchu nüxna yamugüäxü. ¹¹ Natürü ga yema paigüarü âëxgacügü rû duüxügüxü namugü ga na tagaäcü naxçëx ínacagüxü ga na Barabáxü yangéxüçëx. ¹² Rû yexguma ga Piratu rû nüxna naca, rû ñanagürü: —¿Rü tacü nixi i penaxwëxexü na chanaxüxü namaã ya yima Yudiügüarü Äëxgacügu pexüégacü? —ñanagürü. ¹³ Rû nümagü ga duüxügü rû tagaäcü nanangäxügü, rû ñanagürügü: —¿Curuchawa yapota! —ñanagürügü. ¹⁴ Rû yexguma ga Piratu rû ñanagürü nüxü: —¿Natürü tacü rü chixexü naxü? —ñanagürü. Natürü ga nümagü rû wenaxärü tagaäcü ñanagürügü: —¿Curuchawa yapota! —ñanagürügü. ¹⁵ Rû yexguma ga Piratu rû Barabáxü ínananguxuchixëë, yerü duüxügüxü nataäëxëëchaü. Rû yexguma churaragüxü Ngechuchuxü naçuaixëëguwena ga Piratu, rû ñuxüchi nüxna nanamu na curuchawa yanapotagüäxüçëx. ¹⁶ Rû yexguma ga nümagü ga churaragü rû âëxgacüpataëxtüwa nanagagü. Rû yéma nanangutaquëxexëë ga guxüma ga namücügü ga churaragü. ¹⁷ Rû ñuxüchi ga yema churaragü rû wüxi ga máxü ga daucharaxü ga naxchirugu nayacuxëëgü. Rû naëruwa nayangëxcuchigü ga wüxi ga boxü ga chuchuxüwa naxügüxü. ¹⁸ Rû yemawena ínanaxügüe na tagaäcü ñagüxü: —¿Namaxü ya Yudiügüarü âëxgacü! —ñagüxü. ¹⁹ Rû wüxi ga naixmenëxämaã naëruwa nanaçuaixcagü, rû nüxna nacuaixgüe. Rû napëxegu nacaxäpüxügü rû nüxü nicuëxüügünetä. ²⁰ Rû yexguma yemaäcü nagu yadauxcüraxügüguwena, rû ínanacuxuchigü ga yema naxchiru ga daucharaxü. Rû wenaxärü naxchirugutama nayacuxëëgü. Rû ñuxüchi ínanagaxüchigü na curuchawa yanapotagüäxüçëx.

Ngechuchuxũ curuchawa nipotagũ
(Mt 27.32-44; Lc 23.26-43; Cu 19.17-27)

²¹ Rũ yéma naxüpetũ ga wũxi ga yatũ ga Chirenecũãx ga Chimáũgu ãegacũ ga Areyáũdru rũ Rufu nanatũ ixĩcũ ga naãnewa ne ũcũ. Rũ yexguma yéma naxüpetũgu rũ yema churaragũ rũ guma yatũxũ ngĩxũ iningexẽẽgũ ga Ngechuchuarũ curucha. ²² Rũ Ngechuchuxũ nawa nagagũ ga wũxi ga nachica ga Górgutagu ãegaxũ. Rũ yema naega rũ: Duũxẽẽruchinèxãchitaũ, ñaxũchiga nixĩ. ²³ Rũ nüxna nanaxãgũ ga binu ga miramaã ãeũcũ. Natürũ nüma ga Ngechuchu rũ tama nayaxaxũ. ²⁴ Rũ yemawena curuchawa nayapotagũ. Rũ nümagũ ga churaragũ rũ wũxi ga dĩeru ngĩxũ nañanagũgũ na yemawa nüxũ nacuèxgũxũcèx na ñuxãcũ tá nügũmaã yatoyeãxũcèx ga Ngechuchuchiru, rũ tacũ tá na yangexũ ga wũxichigũ. ²⁵ Rũ meãma 9 arũ oragu ga pèxmama nixĩ ga curuchawa yapotagũãxũ. ²⁶ Rũ yéma nayapocuchi ga wũxi ga mürapewa ga ãegatachinũxũ ga nüxũ ixuxũ ga tacũcèx curuchawa na yapotagũãxũ. Rũ yema naega ga mürapewagu ũxũ, rũ ñanagürũ: “Yudíũgũarũ ãẽxgacũ”, ñanagürũ. ²⁷ Rũ naxrũ curuchawa nayapotagũ ga taxre ga máẽtagũxũ rũ wũxi ga norũ tũgũnecũwawa rũ to ga norũ toxwecũwawa. ²⁸ Rũ yemaãcũ ningu ga Tupanaãrũ ore ga ũmatũxũ ga ñaxũ: “Ngẽma chixexũ ũgũxũtanũwaama natèx”, ñaxũ. ²⁹⁻³⁰ Rũ yema duũxũgũ ga yéma chopetũxũ, rũ Ngechuchumaã naguxchigagũ, rũ nanexãẽrugũãcũma ñanagürũgũ: —¡Dũcèx! Cuma nangutaũxẽẽega ya tupauca ya taxũne, rũ tomaẽxpũx i ngunexũgu wenaaxãrũ ícunadaxẽẽega. ¡Ècũ! ¡Cugũtama namaxẽẽ i ñũxmax, rũ írũxĩ i curuchawa! —ñanagürũgũ. ³¹ Rũ yexgumarũ ta Ngechuchuxũ nacugũecũraxũ ga paigũarũ ãẽxgacũgũ, rũ ngũxẽẽruũgũ ga ore ga mugũwa ngũxẽẽtaegũxũ. Rũ ñanagürũgũ: —Nũma rũ togũxũ namaxẽẽ, natürũ taxucũrũwama nügũtama namaxẽẽ. ³² —¡Ñũxma rũ ínaxĩx i curuchawa i ngẽma Cristu i Iraéanecũãxãrũ ãẽxgacũ na nüxũ idaugũxũcèx rũ nüxũ yaxõgũxũcèx! —ñanagürũgũ. Rũ woo ga yema máẽtagũxũ ga naxrũ curuchawa ipotagũxũ, rũ namaã naguxchigagũ.

Nayu ga Ngechuchu
(Mt 27.45-56; Lc 23.44-49; Cu 19.28-30)

³³ Rũ yexguma tocuchiwa nanguxgu, rũ guxũ ga naãnewa naxẽãne ñũxmata yáuanecũ tomaẽxpũxarũ orawa nangu. ³⁴ Rũ yematama oragu rũ tagaãcũ aita naxũ ga Ngechuchu, rũ ñanagürũ: —Eríx, Eríx, ¿damá chabátani? —ñanagürũ. Rũ ngẽma rũ ñaxũchiga nixĩ: “Pa Chorũ Tupanax, Pa Chorũ Tupanax ¿tũxcũũ choxũ nuã cutèx?” ñaxũchiga nixĩ. ³⁵ Rũ nümaxũ ga duũxũgũ ga yéma yexmagũxũ, rũ nüxũ naxĩnũẽ rũ ñanagürũgũ: —¡Dũcèx, nüxũ pexĩnũẽ! Nuxcũmaũcũ ga Tupanaãrũ orearũ uruũ ga Eríacèx naca —ñanagürũgũ. ³⁶ Rũ yexguma rũ wũxi ga yema duũxũgũ ga yéma yexmagũxũ, rũ inañãchi rũ wũxi ga tüaxmũ niwaixẽẽ namaã ga binu ga marũ ngũchièxũchicũ. Rũ wũxi ga dexnewa nayanèĩx, rũ ñũxũchi Ngechuchuèxgu nanawèx na nüxũ natuxuxũcèx. Rũ yema togũxũ ñanagürũgũ: —¡Yixrũma! ¡Ngĩxã rũ itarũdaunũ ngoxita Ería nuã ũ na curuchawa ínaxĩxẽẽãxũcèx! —ñanagürũgũ. ³⁷ Natürũ nüma ga Ngechuchu rũ tagaãcũ aita naxũ, rũ ñũxũchi nayu. ³⁸ Rũ yexguma ga tupauca ga taxũneãrũ tũyemachiãxũ rũ taxregu narũgaute. Rũ daxũwa inaxũgũ ga na nagautexũ rũ ñũxmata ñaxtũwa nangu. ³⁹ Rũ guma churaragũarũ ãẽxgacũ ga Dumacũãx ga Ngechuchupèxewa yexmacũ, rũ yexguma nüxũ nadèũxgu ga na nayuxũ, rũ ñanagürũ: —Aixcũma nixĩ ya daa yatũ i Tupana Nane na yĩxũ —ñanagürũ. ⁴⁰ Rũ iyexmagũ ta ga ñuxre

ga ngecügü ga yéma yaxüwa nüxü rüdaunücü. Rü yematanüwa iyexmagü ga María ga Magadácüãx, rü Charumé, rü María ga Yúche rü Chaütiágu ga rübumaëcü naë. ⁴¹ Rü yema ngecügü iyixĩ ga Ngechuchuxü íxümücügücü rü nüxü rüngüxëëgücü ga yexguma Gariréaanewa nayexmagu. Rü yexgumarüü ta yéma iyexmagü ga mucüma ga naïgü ga ngecügü ga Ngechuchuwe rüxícü ga yexguma Yerucharéüwa naxüxgu.

Ngechuchu rü naxmaxügu nayanaxücuchigü
(Mt 27.57-61; Lc 23.50-56; Cu 19.38-42)

⁴²⁻⁴³ Rü yexguma marü nachütachaügu ga yema ngunexü ga Yudíugü nagu nügü imexëëgüxü naxcèx ga ngüxchigaarü ngunexü, rü noxtacüma Piratuxütawa naxü ga Yúche ga Arimatéacüãx. Rü nüma ga guma Yúche rü Yudíugarü äëxgacügü ga tacütanüwa naxü, rü wüxi ga äëxgacü ga poraäcü nüxü nangechaügücü nixĩ. Rü nüma rü ta ínananguxëë na Tupana norü äëxgacü yíixüçèx. Rü Piratuxütawa naxcèx ínayaca ga Ngechuchuxüne. ⁴⁴ Rü nabaixächiãë ga Piratu ga marü na nayuxü. Rü yemacèx norü churaragüarü äëxgacücèx nangema na nüxna naçaxücèx na ñuxgumama yíixü ga marü na nayuxü. ⁴⁵ Rü yexguma norü churaragüarü äëxgacü namaã nüxü ixuxgu ga marü na nayuxü, rü nüma ga Piratu rü Yúchena nanaxã ga naxüne. ⁴⁶ Rü yexguma ga Yúche rü naxcèx nataxe ga wüxi ga naxchápenüü ga mexëchixü. Rü curuchawa nanayaxu ga Ngechuchuxüne, rü yema naxchápenüümaã nananuque. Rü wüxi ga mëxpüne ga nutanaxcèxgu üpaacü yacaxmaügüxü ga naxmaxügu nayanaxücuchi. Rü ñuxüchi wüxi ga nuta ga tacümaã nanangüxtaü. ⁴⁷ Rü María ga Magadácüãx rü María ga Yúche naë rü nüxü irüdaunü ga ngexta na yanaxücuchigüãxü.

16

Wenaxärü namaxü ga Ngechuchu
(Mt 28.1-10; Lc 24.1-12; Cu 20.1-10)

¹ Rü sabaduarü ngunexüguwena, rü María ga Magadácüãx, rü Charumé, rü María ga Chaütiágu naë naxcèx itaxegü ga pumara na namaã nachaãxüçèx ga Ngechuchuxüne. ² Rü pëxmamaxüchi ga noxri üëxcü iyarügoxgu ga yüxüarü ngunexügu, rü yema ngecügü rü íyadaugü ga yema naxmaxü ga nagu yanaxücuchigüãxüwa. ³ Rü ngígü ngígürügü: —¿Texé tá taxcèx ítanaxügachi ya yima nuta ya namaã nangüxtaücü? —ngígürügü. ⁴ Natürü yexguma meãma nüxü nadaunügu, rü nüxü idaugü ga marü na ínaxügachixü ga guma nuta ga tacü ga namaã nangüxtaücü ga yema naxmaxü. ⁵ Rü yexguma nagu nadaugügu ga yema naxmaxü, rü nüxü idaugü ga wüxi ga ngextüxücü ga mëxchiruxü ga cómüchiruxü ga yéma naxmaxüarü tügünecüwawa rütöxü. Rü poraäcü íbaixächiãëgü ga yema ngecügü. ⁶ Natürü nüma rü ñanagürü ngíxü: —¡Tãxü i pebaixächixü! Pema rü naxcèx pedaugü ya Ngechuchu ya Nacharétucüãx ga guma curuchawa yapotagüacü. Marü wena namaxü, rü nataxuma i nuã. ¡Dücèx, meã nüxü pedèux i ñaã nachica ga nagu naxügüãxü! ⁷ —¡Rü paxa ípixĩ rü Pedrumaã rü ngëma togü i ngüexügümaã nüxü peyarüxugü, rü ñapegügü nüxü:

“Nüma ya Ngechuchu rü marü nüxíra pexüpa Gariréaanewa naxü. Rü ngema tá nüxü peyadaugü ngëma pemaã nüxü yaxuxürüü”, ñapegügü nüxü! —ñanagürü. ⁸ Rü yexguma ga yema ngecügü rü nüxna íyabuxmü ga yema naxmaxü, yerü ngírü muñëmaã poraäcü iyaduruxe. Rü taxúemaãma nüxü iyaxugügü, yerü poraäcü imuñë.

*Ngechuchu rü ngĩxcèx nangox ga María ga Magadácũãx
(Cu 20.11-18)*

⁹ Rũ yexguma Ngechuchu yuwa írüdaxguwena ga noxri yangunegu ga yũxüarũ ngunexũgu, rü ngĩxcèxira nangox ga María ga Magadácũãx ga ngĩwa ínawoxũãcü ga 7 ga ngoxogũ. ¹⁰ Rũ ngĩma rü íiyaxũ, rü namaã nüxũ iyarũxu ga yema Ngechuchumücügũ ga íngechaũgũxũ rü íxauxexũ. ¹¹ Natürũ ga nümagũ rü tama nayaxõgũchaũ ga yexguma nüxũ naxĩnũẽgu ga na namaxũxũ ga Ngechuchu rü na nüxũ nadauxũ ga ngĩmax.

*Ngechuchu rü taxre ga norũ ngúexũgücèx nangox
(Lc 24.13-35)*

¹² Rũ yemawena ga Ngechuchu rü tõõcü nangox naxcèx ga taxre ga norũ ngúexũgũ ga yexguma nama ga naãnewaama nadaxũgu naxĩxgu. ¹³ Rũ nümagũ rü nawoegu, rü yema togũ ga ngúexũgũmaã nüxũ nayarũxugũ. Natürũ yemagũaxũ rü ta tama nayaxõgũ.

*Ngechuchu nanamu ga norũ ngúexũgũ
(Mt 28.16-20; Lc 24.36-49; Cu 20.19-23)*

¹⁴ Rũ yemawena ga Ngechuchu rü naxcèx nangox ga yema 11 ga norũ ngúexũgũ ga yexguma mechawa ínachibüeyane. Rũ nayangagũ naxcèx ga tama aixcüma na yaxõgũãxũ rü tama na inaxĩnũẽxũ. Yerũ ga nümagũ rü tama nüxũ nayaxõgũchaũ ga yema nüxũ daugũxũ ga marũ wena na namaxũxũ. ¹⁵ Rũ ñanagürũ nüxũ: —¡Guxũ i naãnewa pexĩ rü guxũ i duũxũgũmaã nüxũ peyarũxu i ore i mexũ! ¹⁶ —Rũ yixema yaxõxẽ rü íbaixex rü tá tüxũ nangẽxma i maxũ i taguma gũxũ. Natürũ yixema tama yaxõxẽ rü tá tapoxcu. ¹⁷ —Rũ ñaã tá nixĩ i cuèxruũgũ i nawa nüxũ icuáxũ i ngẽma yaxõgũxũ. Rũ chauégagu tá ínawoxũ i ngoxogũ. Rũ ngexwacaxũxũ i nagagũwa tá nidexagũ. ¹⁸ —Rũ naxmẽxmaã tá nüxũ nayayauxãchi i ãxtapegũ. Rũ ngẽxguma yaxaxgũãgu i tacũ i nawa iyuxũ, rü tãütáma nanachixexẽẽ. Rũ tá tüxũ ningõgũgũ ya idaaweexe rü tá tümacèx nitaanegũ —ñanagürũ.

*Ngechuchu rü daxũguxũ ga naãnewa naxũ
(Lc 24.50-53)*

¹⁹ Rũ nüma ga Cori ga Ngechuchu rü yexguma norũ ngúexũgũmaã yadeaxguwena, rü Tupana rü daxũguxũ ga naãnewa nanaga. Rũ Tupanaãrũ tũgũnecũwawa nayarũto. ²⁰ Rũ nümagũ ga norũ ngúexũgũ rü inaxĩãchi na guxũwama nüxũ yanaxugũexũ ga ore i mexũ. Rũ nüma ga Cori rü nüxũ narüngũxẽẽ, rü nanangoxẽẽ na aixcüma yĩixũ ga yema ore, yerũ wũxigu namaã napuracũ na naxũgũãxũcèx ga mexũ ga taxũgũ ga Tupanaãrũ poramaã naxũgũxũ.

ORE I MEXÜ GA LUCA ÜMATÜXÜ

Norü ügü i ore ga Ngechuchuchiga

¹⁻² Pa Mecü Pa Teóquirux, nayexma ga tacü ga totanüwa ngupetüxü. Rü muxüma ga duüxügü rü marü nanaxümatügü ga yemachiga, yexgumarüü ga tomaã nüxü na yaxugüexürüü ga yema duüxügü ga noxriarü ügügumama Ngechuchuxü daugüxü rü nüxü rüngüxëégüxü ga norü orearü uchigawa. ³⁻⁴ Rü ngëmacëx, Pa Teóquirux, rü choma rü ta meãma naxcëx íchaca ga nachiga ga guxüma ga yema Ngechuchu üxü. Rü ñuxma rü chauxcëx rü name na meãma cuxcëx chanaxümatüxü i ngëma na meãma nüxü cucuáxücëx na aixcüma yíixü ga yema ore ga marüchirëx cuxü nangüxëégüxü ga togü.

Tupanaärü orearü ngeruü ga daxüçüãx nanaxunagü ga Cuáü ga baiüxëëruüärü buxchiga

⁵ Rü yexguma Erode äëxgacü ixixgu ga Yudéaanewa, rü yéma nayexma ga wüxi ga Yudíugüarü pai ga Zacaríagu äegacü. Rü pai ga Arãütaa ga Abíatanüxü nixí ga nümax. Rü namëxéga rü Erichabé nixí. Rü tüma rü ta pai ga Arãütanüxü tixí. ⁶ Rü nüma ga Zacaríá rü namëx ga Erichabé rü meãma Tupanapëxewa, namaxë rü aixcüma naga naxñnüë ga norü mugü. Rü yemaäcü taxucürüwa texé chixri nachiga tidexagü. ⁷ Natürü nangexacügü yerü namëx rü ingexacü. Rü ñuxüchi ga nümagü rü marü yaguãxgü nixígü. ⁸ Rü wüxi ga ngunexügu rü yema paigütücumü ga Zacaríá natanüwa üxügu nangu na tupauca ga taxünewa Tupanaärü puracü naxügüxücëx. ⁹ Rü yema paigü rü nacüma nixí ga nüxü na naxunetagüxü ga wüxi ga natanüxü na tupaucaarü aixepegu naxücuxücëx rü yéma Tupanacëx na yaguãxücëx ga pumara ga yixixü. Rü yema ngunexügu rü Zacaríagu nangu na tupaucaarü aixepegu naxücuxücëx na yéma yaguãxücëx ga pumara. ¹⁰ Rü yema pumara íyaguyane rü guxüma ga duüxügü ga düxétüwa yexmagüxü rü ínayumüxëgü. ¹¹ Rü ngürüächí Zacaríacëx nangox ga wüxi ga Tupanaärü orearü ngeruü ga daxüçüãx. Rü yema nachica ga pumara nawa yagugüüxüärü tügünecüwagu nachí. ¹² Rü yexguma Zacaríá nüxü dëuxgu ga yema Tupanaärü orearü ngeruü ga daxüçüãx, rü poraäcü nabaixächíäë, rü poraäcü namuü. ¹³ Natürü yema daxüçüãx ga Tupanaärü orearü ngeruü rü ñanagürü nüxü: —Pa Zacaríax, jtãxü i cumuüxü! Erü Tupana rü marü nüxü naxñnü i curü yumüxë. Rü cuxmëx i Erichabé rü cuxü tá ixãxäcü, rü Cuáügu tá cunaxüéga. ¹⁴ —Rü cuma rü tá poraäcü cutaäëxüchi i ngëxguma nabuxgu. Rü muxüma i togü i duüxügü rü tá ta nataäëgüxüchi. ¹⁵ —Erü yima cune rü Tupanapëxewa rü tá wüxi ya mexëchicü nixí. Rü tãütáma binu nayaxaxü, rü taxuüma to i tacü rü ngüchixáxü tá nixaxü. Rü tauta nabuyane rü Tupanaäë i Üünexü rü tá nüxna nangu. ¹⁶ —Rü nüma tá muxüma i Yudíugüxü narüngüxëë na norü Cori ya Tupanacëx nawoeguxücëx. ¹⁷ —Rü nüma ya Cuáü rü tá Cori ya Cristupëxegu nixü. Rü nuxcümaäcü ga Tupanaärü orearü uruü ga Eríarüü tá nixí erü tá nüxü nangëxma i Tupanaäë i poraxü. Rü ngëmaäcü tá nüxü narüngüxëë i papágü na naxäcügüxü nangechaüxü, rü ngëma tama Tupanaga ñnüëchaüxü rü na aixcüma inaxñnüëxücëx. Rü ngëmaäcü tá duüxügüxü ínamexëë naxcëx ya Cori ya Cristu —ñanagürü ga yema daxüçüãx. ¹⁸ Rü Zacaríá rü yema daxüçüãxna naca, rü ñanagürü: —¿Ñuxäcü tá nixí i ngëma na naxãxäcüxü i choxmëx? Erü marü chayaxüchi i chomax rü ngíma rü ta marü iya —ñanagürü. ¹⁹ Rü Zacaríaxü nangãxü ga yema daxüçüãx, rü ñanagürü: —Choma nixí i

Gabi i Tupanaärü puracü chaxüxü. Rü nüma núma choxü namu na cumaã nüxü na chixuxücèx i ñaã ore i mexü. ²⁰ —Natürü ñuxma i cuma rü tama choxü cuyaxõ i ngëma ore i cumaã nüxü chixuxü. Rü ngëmacèx i ñuxma rü tá cungega ñuxmatáta nabu i ngëma cune. Natürü ngëma cumaã nüxü chixuxü, rü aixcüma tá ningu nagu i ngëma ngunexü i Tupana ixunetaxü —ñanagürü. ²¹ Rü yoxni ga duüxügü rü tupaucarü düxétüwa Zacaríaxü nananguxëëgü. Rü nügüna nacagüe ga tacücèx na tama paxa yéma ínaxüxüxü. ²² Rü yexguma Zacaríá tupaucawa íxüxgu, rü taxucürüwa duüxügümaã nidexa, yerü nangega. Rü nümagü ga duüxügü rü nüxü nicuèxächitanü ga tacüxü na nadauxü ga Zacaríá ga tupaucarü aixepena. Rü Zacaríá rü naxmëxmaã duüxügüxü nüxü nacuèxëë ga tacü nüxü na üpetüxü, yerü nangega. ²³ Rü yexguma Zacaríá naguxëëgu ga na naxüãxü ga Tupanaärü puracü ga tupauca ga taxünewa, rü wenaxärü napatacèx nataegu. ²⁴ Rü yemawena rü Zacaríá namèx ga Erichabé rü ixãxãcü. Rü ngĩpatagu irüxãüëcha, rü wüximëxpüx ga tauemacü taguma düxétüwa ixü. ²⁵ Rü ngĩxĩcatama ngĩgürügü: —Cori ya Tupana rü poraãcü choxü narüngüxëë. Rü ñuxma rü marü tãütáma chixri chauchiga nidexagü i duüxügü naxcèx na changexacüxü —ngĩgürügü.

Wüxi ga Tupanaärü orearü ngeruü ga daxücüãx nüxü nixu ga Ngechuchuarü buxchiga

²⁶ Rü 6 ga tauemacü marü ngĩxü mexgu ga Erichabé ga yema na naxãxãcüxü, rü Gariréaanewa yexmane ga ñãne ga Nacharétuwa Tupana nanamu ga norü orearü ngeruü ga Gabi. ²⁷ Rü ngĩxütawa naxü ga wüxi ga pacü ga taguma yatü ngĩmaã maüxcü. Rü María nixĩ ga ngĩega. Rü ngĩma rü ixãtechaü namaã ga wüxi ga yatü ga Yúchegu äegacü. Rü nüma ga Yúche rü nuxcümaücü ga äëxgacü ga Dabítanüxü nixĩ. ²⁸ Rü yema nachica ga María nawa yexmaxügu naxücu ga Gabi, rü ñanagürü ngĩxü: —Nuxmaë Pa Maríax. Tupana rü poraãcü cumaã nataãë. Rü Cori ya Tupana rü cuxütawa nangëxma, rü guxü i ngexügüarü yexera marü cuxü narüngüxëë —ñanagürü. ²⁹ Natürü yexguma María nüxü dëuxgu ga yema daxücüãx ga Tupanaärü orearü ngeruü, rü namaã íbaixãchiãë ga yema norü ore ga ngĩmaã nüxü yaxuxü. Rü ngĩgüãëwa nagu irüxĩnü ga tüxcüü yemaãcü ngĩxü na namoxëxü. ³⁰ Rü yexguma ga Gabi rü ñanagürü ngĩxü: —Pa Maríax, tama name na cumuüxü, erü Tupana rü poraãcü cumaã nataãë. ³¹ —Rü ñuxma rü tá tauemacü cuxü inayarütaxu, rü tá cuxãxãcü, rü tá nayatü i cuxacü. Rü Ngechuchugu tá cunaxüéga. ³² —Rü nüma rü wüxi ya äëxgacü ya taxüchicü tá nixĩ. Rü Tupana ya Taxüchicü Nane tá nixĩ i naëga. Rü Cori ya Tupana rü tá nuxcümaücü ga äëxgacü ga Dabírüü äëxgacüxü nayaxĩxëë. ³³ —Rü nüma rü guxügutáma Yudígüarü äëxgacü nixĩ. Rü tagutáma ínanguxuchi na äëxgacü na yĩxü —ñanagürü. ³⁴ Rü yexguma ga María rü Gabina ica, rü ngĩgürügü: —¿Ñuxãcü tá nixĩ i ngëma na chaxãxãcüxü, erü tauta chaxãte? —ngĩgürügü. ³⁵ Rü nüma ga Gabi rü ngĩxü nangãxü, rü ñanagürü: —Tupanaãë i Üünexü tá cuxna nangu. Rü Tupana ya Tacüarü pora rü wüxi i caixanexürüü tá cugu nayangaixema. Rü ngëmacèx ngëma õxchana i namaã cuxãxãcüxü rü Tupanapëxewa mecüxüchi tá nixĩ, rü Tupana Nanemaã tá nanaxugü i duüxügü. ³⁶ —Rü cutanüxü i Erichabé rü marü ixãxãcü woo marü yaguãxchirëx na yĩxü. Rü woo ga duüxügü rü:

“Tagutáma ixãxãcü” ñanagürügü ngĩxü, natürü i ñuxma rü marü 6 ya tauemacü ngĩxü name na marü naxãxãcüxü. ³⁷ —Erü Tupanaãxü rü taxuüma naguxcha —ñanagürü. ³⁸ Rü yexguma ga María rü ngĩgürügü: —Chorü Cori ya Tupanaärü duüxü chixĩ i chomax. Rü marü name i chomaã nanaxü i ngëma

chomaã nüxü quixuxüäcüma –ngigürügü. Rü yexguma ngixna ínixü ga yema Tupanaärü orearü ngeruü ga daxüçüäx ga Gabi.

María rü Erichabéxütagu inaxüãne

³⁹ Rü yexgumaüçüü ga María rü paxama nawa ixü ga guma iãne ga Zacaríapata nawa yexmane ga Yudéaaneärü dauxchitawa. ⁴⁰ Rü Zacaríapatawa ingu, rü iyaxücu, rü Erichabéxü irümoxê. ⁴¹ Rü yexguma Erichabé nüxü ñnügu ga Maríaarü moxê, rü ngirü õxhana ga ngiãnüwa yexmaxü rü nixiãxcüü. Rü Tupanaãe ga Ünexü rü Erichabéna nangu. ⁴² Rü yexguma ga Erichabé rü tagaãcü Maríaxü ngigürügü: –Guxü i ngexügüarü yexera Tupana cuxü narüngüxêê. Rü ngëxgumarüü ta cunexü narüngüxêê. ⁴³ –¿Täcüwa chame na nuã chauxütagu cunaxüãnexü? Pa Chorü Cori Naëx. ⁴⁴ –Erü ngëxguma nüxü chaxinügu i curü moxê, rü chauxacü i chauanüwa ngëxmaxü rü norü taãémaã nixiãxcüü. ⁴⁵ –Cuma rü cutaãe erü nüxü cuyaxõ i norü ore ya Tupana. Rü ngëmacèx Tupana tá nayanguxêê i ngëma ore i cumaã nüxü yaxuxü –ngigürügü ga Erichabé. ⁴⁶ Rü yexguma ga María rü ngigürügü: –Choma rü chauãëwa poraãcü Tupanaxü chicuèxüü. ⁴⁷ –Rü chorü Cori ya chorü Maxëëruümaã chataãëxüchi. ⁴⁸ –Rü woo wüxi i Tupanaärü duüxü i ngerü dïeruãxê chixi, natürü Tupana chaugu narüxinü. Rü ñuxmaüçüü i duüxügü rü taãëxcümaã guxügütáma choxü naxugüe. ⁴⁹ –Erü Tupana ya Poracü rü taxü i mexü chauxcèx naxü. Rü naxüüne i naega ya Tupana. ⁵⁰ –Rü nüma ya Tupana rü guxügütáma nüxü tangechaütümüügü ya guxãma ya yixema aixcüma nüxü muüxê. ⁵¹ –Rü guxü ga norü poramaã tüxü narüyexera ga guxema tügütama icuèxüügüxê. ⁵² –Rü marü ínanawoxü ga yema äëxgacügü ga nügü icuèxüügüxü. Natürü guxema duüxëgü ga tama tügü icuèxüügüxê, rü poraãcü tüxü narüngüxêê. ⁵³ –Rü guxema tüxü nataxüxe, rü muxüma tüxna naxã. Natürü guxema muärü dïeruãxgüxe rü taxuüma tüxna naxãäcüma tüxü ínimugü. ⁵⁴ –Rü poraãcü nüxü narüngüxêê ga norü duüxügü ga Yudíugü. Rü tama nüxü inarüngüma na nüxü ingechaütümüügüxü, yexgumarüü ga nuxcümaügüxü ga tatanüxümaã na inaxunetaxü. ⁵⁵ –Yerü yemaãcü inaxuneta namaã ga tórü õxi ga Abráü rü namaã ga tatanüxügü na guxügütáma tüxü nangüxêëxü –ngigürügü ga María. ⁵⁶ Rü tomaëxpüx ga tauemacü Erichabéxütagu irüxãüx ga María. Rü ñuxüchi ngipatacèx itaegu.

Cuáü ga baiüxëëruüärü buxchiga

⁵⁷ Rü nawa nangu ga ngunexü ga na naxíraxacüxü ga Erichabé. Rü nayatü ga ngixãcü. ⁵⁸ Rü yexguma nüxü nacüxëgügu na ñuxãcü Tupana ngímaã mecümaxü, rü ngirü ngaicamagu pegüxü ga duüxügü rü ngitanüxügü rü ngixü ínayadaugü, rü ngixü narümoxëgü rü ngixü nayataãëgüxêê. ⁵⁹ Rü 8 ga ngunexüguwena rü ínayawiechëxmüpëxechiraügü ga guma ngíne. Rü nanatü ga Zacaríagu nanaxüégagüchaü ga duüxügü. ⁶⁰ Natürü naë ga Erichabé rü tama inaxwëxe. Rü ngigürügü: –Narümemaë nixi i Cuáügu tanaxüéga –ngigürügü. ⁶¹ Rü duüxügü rü ñanagürügü ngixü: –¿Tüxcüü cunaxwëxe i ngëma naega? Erü cutanüxütanüwa rü tataxuma ya texé ya ngëmagu äegaxe –ñanagürügü. ⁶² Rü yexguma ga duüxügü rü naxmëxwa nanatü ga Zacaríana nacagüe ga tacü rü naegagu tá na naxüégaãxü. ⁶³ Rü yexguma ga Zacarí rü poperaxü naxuneta na yexma na naxümatüãxüçèx ga naega. Rü yexma nanaxümatü, rü ñanagürü:

“Cuáü tá nixi i naega”, ñanagürü ga namatü. Rü guxüma ga duüxügü rü nabaixãchiãëgü ga yexguma yema naegaxü nadaugügu. ⁶⁴ Rü yexgumatama wenaxärü nidexa ga Zacarí. Rü inanaxügü ga Tupanaxü na yacuèxüüxü. ⁶⁵ Rü yemacèx guxüma ga yema duüxügü ga norü ngaicamagu äpatagüxü

rü poraãcü nabaixãchiãëgü. Rü guxüwama ga yema naãnewa ga Yudéaanewa rü duüxügü nüxü nixuchigagü ga yema ngupetüxü. ⁶⁶ Rü guxüma ga nüxü cuáchigagüxü ga yema ngupetüxü, rü nügüãxëwa nagu narüxĩnũëëcha, rü ñanagürügü: —¿Tacü tá nixĩ i ngëma buxü? Erü Tupana rü aixcüma naxütawa nangëxma —ñanagürügü.

Zacaría rü Tupanaxü nicuëxüü

⁶⁷ Rü nanatü ga Zacaríana nangu ga Tupanaãë i Üünexü. Rü nüxü nixu ga yema ore ga Tupana namaã nüxü ixuxü. ⁶⁸ Rü ñanagürü: —Name nixĩ i nüxü ticuëxüügü ya tórü Cori ga nuxcümaücü ga tórü oxĩ ga Iraéarü Tupana. Erü núma tatanüwa nangu na tüxü yamaxëxëxüçëx i yixema i norü duüxügü na ixĩgüxü. ⁶⁹ —Rü ngëmacëx tüxna nanamu ya wüxi ya poracü ya tórü maxëxëëruü ga nuxcümaücü ga norü duüxü ga Dabítanüxüwa ne ücü. ⁷⁰ —Rü yemaãcü Tupana tamaã inaxuneta nawa ga yema nuxcümaügüxü ga norü orearü uruügü ga üünegüxü. ⁷¹ —Rü yema orearü uruügüwa nüxü nixu rü tá tüxü Ínanguxüxëë naxmëxwa i tórü uwanügü rü guxüma i ngema duüxügü i taxchi aixü. ⁷² —Rü nuxcümaügüxe ga tórü oxigümaã nüxü nixu na nüxü tangechaütümüügüxü rü tagutáma nüxü iyanangümaxü ga yema tümamaã inaxunetaxü. ⁷³⁻⁷⁵ —Rü yemaãcü ga Tupana rü nuxcümaücü ga tórü oxĩ ga Abráümaã inaxuneta. Rü namaã nüxü nixu rü tá tüxü Ínanguxüxëë nüxna i tórü uwanügü na tama imuüëäcüma naxüxüçëx i Tupanaärü puracü rü aixcüma mecü na ixĩgüxü napëxewa i guxü i tórü maxüwa i wüxichigü i ngunexügu —ñanagürü ga Zacarí. ⁷⁶ Rü ñanagürü ta: —Cumax, Pa Chaunex, rü Tupana ya Taxüchicüarü orearü uruümaã tá cuxü naxugü. Erü cuma rü tá Corixüpa yoxni duüxügümaã nüxü quixu i nachiga ya Cori. ⁷⁷ —Cuma rü Coriarü duüxügüxü tá nüxü cucuëxëë na Tupana tá nüxü nüxü ngechaüxü i norü pecadugü na ngëmaãcü nayauxgüãxüçëx i maxü i taguma gúxü. ⁷⁸⁻⁷⁹ —Erü nüxü tangechaütümüügü ya Tupana ya poraãcü tüxü ngechaücü. Rü ngëmacëx daxügüxü i naãnewa taxcëx ne nanamu i ñoma i naãneärü ngóonexëëruü i ngexwacaxüxü na nangóonetanüxëëãxüçëx i ngëma duüxügü ga noxri guxügüma norü chixexügüagu äñcümaxüwa yexmagüxü. Rü nüma tá tüxü narüngüxëë na Tupanamaã rüngüxmüëxüçëx —ñanagürü ga Zacarí. ⁸⁰ Rü yema buxü rü niyachigü rü wüxichigü ga ngunexügu yexeraãcü Tupanaxü nicuáchigü. Rü dauxchita ga ngextá taxúema íxãpataxüwa nayexma ñuxmata yema ngunexüwa nangu ga na Yudíugüxü nügü nacuëxëëxü.

2

Ngechucharü buxchiga

(Mt 1.18-25)

¹ Rü yexguma Agutu äëxgacü ga tacü ixĩxgu ga Dumawa, rü nanaxunagü ga na yaxugüãxü ga guxüma ga duüxügü ga guxü ga naãnewa. ² Rü yema nüxĩraüxü ga duüxügüarü ugüchiga, rü nanaxü ga yexguma Quirinu äëxgacü ixĩxgu ga Chíriaarü naãnewa. ³ Rü guxüma ga duüxügü rü wüxichigü norü ñãne ga nagu nabuxünewa nixüchigü ga yéma na yaxugüãxüçëx. ⁴ Rü yemacëx ga Yúche rü Gariréaanewa yexmane ga ñãne ga Nacharétuwa Ínaxüxü, rü Yudéaarü naãnewa yexmane ga ñãne ga Beréüwa naxü. Rü guma nixĩ ga ñãne ga nuxcümaücü ga äëxgacü ga Dabí nagu buxüne. Rü yemacëx nixĩ ga Yúche ga yéma naxüxü, yerü Dabítanüxü nixĩ ga nümax. ⁵ Rü Beréüwa naxü ga Yúche na yaxugüxüçëx wüxigu ngĩmaã ga María ga ngĩmaã naxãmëxchaücü. Natürü ga María rü itacharaü ga na naxããcüxü. ⁶ Rü yexguma Beréüwa nayexmagüyane, ngĩxna nangu ga ngĩrü ngunexü ga na naxíraxacüxü ga

María. ⁷ Rû yexma nabu ga nüxîraücü ga ngîne. Rû naxchápenüümaã inanunque. Rû wüxi ga wocaru chibüchicagumare inacanagüxêê, yerü marü guxüma nixãacu ga ucapu nawa ga guma pegüpataü.

Tupanaärü orearü ngeruü ga daxücüâx rü carnerugüarü dauruüçèx nangox

⁸ Rû Beréüärü ngaicamana nayexmagü ga ñuxre ga carnerugüarü dauruüçü ga chütacü nachitaüwa norü carnerugüna ídaugüxü. ⁹ Rû ngürüächi yema carnerugüarü dauruüçèx nangox ga wüxi ga orearü ngeruü ga daxücüâx. Rû Cori ya Tupanaärü üüne rü nawa nayexma rü yemacèx poraäcü nangóone. Rû yema carnerugüarü dauruxüçü rü poraäcü namuüê. ¹⁰ Natürü yema orearü ngeruü ga daxücüâx, rü ñanagürü nüxü: —¡Tãxü i pemüêxü! erü pexcèx nuã chanange i wüxi i ore i mexèchixü i guxü i duüxüçüarü taãèxèeruü tá ixixü. ¹¹ —Erü ñuxma rü Beréügu nabu ya perü maxèxèeruü. Rû nüma rü Cori ya Cristu nixi. ¹² —Rü ñaã tá nixi i perü cuèxruü. Rû tá nüxü ipeyangau i wüxi i õxchana i naxchápenüümaã nuquexü rü wocaru chibüchicagu caxü —ñanagürü. ¹³ Rû yexgumatama ngürüächi yema daxücüâx ga orearü ngeruüçütawa nangox ga muxüma ga togü ga daxücüâx ga orearü ngeruüçü. Rû Tupanaxü nicuèxüçüçü, rü ñanagürüçü: ¹⁴ —Rü ñuxma rü Tupanaxü ínicuèxüçüçü rü ínataãèçü i daxüçüçü i naãnawa. Rû pema i ñoma i naãnecüâx i Tupana pemaã taãèçü, rü name nixi i pegümaã perüngüxmüê —ñanagürüçü. ¹⁵ Rû yexguma daxüwa naxixguwena ga yema orearü ngeruüçü rü yema carnerugüarü dauruüçü rü nüçümaã ñanagürüçü: —¡Ngixã ítayadau i Beréüwa i ngéma ngupetüxü i Cori ya Tupana tamaã nüxü ixuxü nawa i norü orearü ngeruüçü! —ñanagürüçü. ¹⁶ Rû paxa inaxiächi, rü yéma naxi. Rû yexma inayangaugü ga Yúche rü María rü guma bucü ga wocaru chibüchicagu cacü. ¹⁷ Rû yexguma yema bucüxü nadaugügu ga yema carnerugüarü dauruüçü, rü duüxüçümaã nüxü nixugüe ga yema ore ga Tupanaärü orearü ngeruü ga daxücüâx namaã nüxü ixuxü ga guma bucüchiga. ¹⁸ Rû guxüma ga duüxüçü ga nüxü ínüèxü ga yema carnerugüarü dauruüçüarü ore rü namaã naxiächiãèçü. ¹⁹ Natürü ga María rü inayaxu ga guxüma ga yema ngupetüxü rü ngiãèçü namaã inguxü rü nagu irüxínüècha. ²⁰ Rû nawoegu ga yema carnerugüarü dauruüçü. Rû taãèçüma Tupanaxü nicuèxüçüçü naxcèx ga guxüma ga yema nüxü naxínüèxü rü nüxü nadaugüxü yerü aixçüma yema orearü ngeruü ga daxücüâx namaã nüxü ixuxüãçüma nangupetü.

Bucü ga Ngechuchu rü tupauca ga taxünewa nanagagü

²¹ Rû yexguma 8 ga ngunexü nüxü yexmagu ga na nabuxü ga õxchana, rü ínanawiechèxmüpèxechiraüçü. Rû Ngechuchugu nanaxüégagü. Rû yematama nixi ga naega ga daxücüâx ga Tupanaärü orearü ngeruü Maríamaã nüxü ixuxü ga tauta namaã naxãxãçü. ²² Rû yexguma marü yanguxgu ga yema ngunexü na tupauca ga taxünewa Tupanapèxewa na nüçü yamexèèçüçü rü yéma naxi na yemaäcü Tupanapèxewa yanguxèèçüçüçüçü ga yema Moïchëarü mugü nüxü ixuxüçü. Rû Yerucharéüwa ga tupauca ga taxünewa nanagagü ga guma bucü na Tupanana namugüãxüçü. ²³ Rû yemaäcü nanaxüçü yerü Tupanaärü mugüwa naxümatü, rü ñanagürü:

“Ngèxguma wüxi i nge rü nayatügu i nüxîraüxü i ngixãcü, rü name i Cori ya Tupanana inamu”,
ñanagürü. ²⁴ Rû yéma naxi rü yéma nanagagü ga taxre ga muxtucugü ga yexwacèx yaexü, na Tupanacèx nadaiãxüçüçü ga paigü ga tupaucawa, yerü yema ñanagürü ga Tupanaärü mugüwa. ²⁵⁻²⁶ Rû yexgumaäcüçü Yerucharéügu naxiächü ga wüxi ga yatü ga Chimeügu äegacü. Rû wüxi ga yatü ga mecümacü

nixĩ ga nümax, rü aixcüma Tupanaxü ngechaücü nixĩ. Rü nüma rü guxüguma ínananguxẽẽ na ñuxguacü tá ínanguxü ya Yudíugüaru nguxüxẽẽruü ya Cristu. Rü Tupanaãe i Üünexü rü Chimeüxütawa nayexma, rü nüxü nüxü nacuèxẽẽ na tãütãma nayuxü ega tama nüxü nadauxiragu ya Cristu ya Cori ya Tupana núma namucü. ²⁷ Rü yema ngunexügu rü tupauca ga taxünewa Chimeüxü naxüxẽẽ ga Tupanaãe i Üünexü. Rü yéma nayexma ga Chimeü ga yexguma Yúche rü María tupaucawa nagagügu ga guma bucü ga Ngechuchu na Tupanana namugüãxüçex na yemaãcü yanguxẽẽgüãxüçex ga Moíchéarü mu. ²⁸ Rü Ngechuchuxü naganagü ga Chimeü. Rü Tupanaxü nicuèxüü, rü ñanagürü: ²⁹ —Pa Corix, ñuxma rü marü name na chayuxü, erü marü cuyanguxẽẽ ga yema chomaã icuxunetaxü. ³⁰⁻³¹ —Rü chauxetümaãxüchi nüxü chadau ya daa Maxẽxẽẽruü ya guxü i duüxügüçex núma cunamucü. ³² —Rü nüma nixĩ i ngóonexẽẽruü naxcèx i guxüma i duüxügü i tama Yudíugü ixĩgüxü. Rü ñaã õxchanagagu rü togü i duüxügü tá nüxü nicuèxüügü i curü duüxügü i Yudíugü —ñanagürü. ³³ Rü Yúche rü María rü nabaixãchiãẽgü namaã ga Chimeüãrü ore ga ñuxãcü guma õxchanachigamaã na yadexaxü. ³⁴ Rü yexguma ga Chimeü rü Tupanana naca na meã nüxü nangupetügüxüçex ga Yúche rü María rü guma õxchana. Rü ñanagürü ngixü ga María ga Ngechuchu naẽ: —Dücèx, daa õxchana rü tá nanamaxẽxẽẽ i muxüma i Yudíugü, natürü ngẽma tama nüxü yaxõgüchaüxü rü tá inayarütauxe. Rü nüma rü wüxi i cuèxruü tá nixĩ i duüxügüçex, rü muxüma tá nüxü naxoe. ³⁵ —Rü ngẽmaãcü tá nanangoxẽẽãma i guxüma i naãewa nagu naxĩnüxü i muxüma i duüxügü. Rü guxüma i ngẽma tá ñaã õxchanaxü ngupetüxü rü ñoma wüxi i cüxchi i curü maxünewa yarüwãxürü tá cuxü nangux, Pa Maríax —ñanagürü. ³⁶ Rü yéma ta iyexma ga wüxi ga ngecü ga Tupanaãrü orexü ixücü. Rü Ana nixĩ ga ngẽga. Rü Panuexãcü iyixĩ, rü Ácherutanüxü iyixĩ. Rü marü yaguãxüchi iyixĩ. Rü yexguma napaxüchigutama ixãte. Natürü 7 ga taunecü- guxicatama ngĩtemaã iyarüxüxü, yerü nayu ga ngĩte. ³⁷ Rü yemaãcü wüxi ga yutecü ga yaguãxüchi iyixĩ, yerü 84 nixĩ ga ngĩrü taunecü. Rü taguma tupauca ga taxünewa íxüxü. Rü guxüguma ngunecü rü chütacü rü naxaureãcüma iyumüxẽẽcha. Rü yemaãcü Tupanaxü iyacuèxüü rü inataxẽẽ. ³⁸ Rü yexgumatama Chimeü ídexayane, rü yéma ingu ga Ana. Rü Tupanana moxẽ ixã. Rü iinaxügü ga õxchana ga Ngechuchuchiga na yadexaxü napèxewa ga guxüma ga yema Yudíugü ga Yerucharéüçüãx ga Cristuxü ínanguxẽẽgüxü na norü nguxuchixẽẽruü yĩxüçex.

Íãne ga Nacharétucèx nawoegu

³⁹ Rü yexguma marü yanguxẽẽgüãguwena ga guxüma ga yema Tupanaãrü mugü nüxü ixuxü, rü Yúche rü María rü naxcèx nawoegu ga norü íãne ga Nacharétu ga Gariréañewa yexmane. ⁴⁰ Rü guma bucü rü niyachigü, rü yexeraãcü niporachigü, rü yexeraãcü nüxü nicuáchigü. Rü Tupana rü poraãcü nüxü narüngüxẽẽ.

Bucü ga Ngechuchu rü tupauca ga taxünewa naxo

⁴¹ Nanatü rü naẽ rü gucü ga taunecügu Yerucharéüwa taxĩxü naxcèx ga Üpetüchigaarü peta. ⁴² Rü yexguma Ngechuchu 12 ga taunecü nüxü yexmagu, rü Yerucharéüwa taxĩ namaã ga nanatü rü naẽ, yerü yema nixĩ ga Yudíugüçüma naxcèx ga Üpetüchigaarü peta. ⁴³ Rü yexguma yagüechigagu ga Üpetüchigaarü peta, rü tümachiüçex tawoegu ga nanatü rü naẽ. Natürü ga Ngechuchu rü tümãchita tüxna Yerucharéügu narüxãüx. ⁴⁴ Rü tümã nüxü tacuèxgügu rü yema muxü ga duüxügü ga tümaweama

ixixũtanũxũtanũgu naxã ga Ngechuchu. Rũ yemaãcũ marũ itaxĩ ga wũxi ga ngunexũ. Natũrũ yexguma naxcẽx tadaugũgu tũmatanũxũtanũgu rũ yema tũxũ cuẽxgũxũtanũgu rũ tama nũxũ itayangaugũ. ⁴⁵ Rũ yemacẽx wenaxãrũ Yerucharẽũcẽx tawoegu na yexma naxcẽx tayadaugũxũcẽx. ⁴⁶ Rũ tomaẽxpũx ga ngunexũguwena Ngechuchuxũ itayangaugũ ga tupauca ga taxũnegu. Rũ yẽma narũto natanũwa ga yema ngũexẽẽruũgũ ga Tupanaãrũ mugũwa ngũxẽẽtaegũxũ, rũ inarũxĩnũ ga norũ ngũxẽẽtae, rũ nũxna nicachigũ. ⁴⁷ Rũ guxũma ga yema duũxũgũ ga Ngechuchuxũ ñnũẽxũ, rũ nabaixãchiãẽgũ na ñnũãcũ nũxũ nacuẽxũchixũ rũ meãma nangãxũãxũ. ⁴⁸ Rũ yexguma nanatũ rũ naẽ nũxũ daugũgu rũ tabaixãchiãẽgũ. Rũ naẽ rũ ñatarũgũ nũxũ: —Pa Chaunex, ¿tũxcũũ tomaã ngexũ cuwagũ? Cunatũ rũ choma rũ poraãcũ cuxcẽx taxoegaãẽãcũma cuxcẽx tadaugũecha —ñatarũgũ. ⁴⁹ Rũ yexguma ga Ngechuchu rũ ñanagũrũ: —¿Tũxcũũ chauxcẽx pedaugũ? ¿Tama ãxna nũxũ pecuẽx na woetama Chaunatũchiũwa tá changẽxmaxũ? —ñanagũrũ. ⁵⁰ Natũrũ ga tũmagũ rũ tama nũxũ tacuẽxgũẽga ga yema tũmamaã nũxũ yaxuxũ. ⁵¹ Rũ yexguma ga Ngechuchu rũ tũmawe nataegu ga Nacharẽtuwa. Rũ guxũguma meã tũmaga naxĩnũẽcha. Rũ naẽ ga María rũ ngĩãẽwa nagu irũxĩnũẽcha ga guxũma ga yema ngupetũxũ. ⁵² Rũ niyachigũ ga Ngechuchu, rũ yexeraãcũ nũxũ nicuãchigũ. Rũ Tupana rũ namaã nataãẽ, rũ guxũma ga duũxũgũ rũ ta namaã nataãẽgũ.

3

Cuãũ ga baiũxẽẽruũ nũxũ nixu ga Tupanaarũ ore ga dauxchitawa ga ngextã taxũema íxãpataxũwa

(Mt 3.1-12; Mr 1.1-8; Cu 1.19-28)

¹ Rũ yexguma Tibériu 15 ga taunecũ Dumaarũ ãẽxgacũ yixĩxgu, rũ yexguma nixĩ ga Põũchiu Piratu rũ Yudéaaneãrũ ãẽxgacũ yĩxũ, rũ Erode rũ Gariréaaneãrũ ãẽxgacũ yĩxũ, rũ naẽneẽ ga Piripi rũ Itúreaane rũ Tracóníteaneãrũ ãẽxgacũ yĩxũ, rũ Lichániã rũ Abiríniããneãrũ ãẽxgacũ yĩxũ. ² Rũ yexguma ga Aná rũ Caipá rũ paigũeru nixĩgũ. Rũ yexguma nixĩ ga Zacaría nane ga Cuãũmaã yadexaxũ ga Tupana ga dauxchitawa ga ngextã taxũema íxãpataxũwa. ³ Rũ guxũma ga yema nachicagũ ga Yudãũcutũarũ ngaicamana yexmagũxũgu nixũgũchigũ ga Cuãũ. Rũ duũxũgũmaã nũxũ nixuchigũ na nũxũ naxoexũcẽx ga nacũmagũ ga chixexũ rũ ínabaiũxũcẽx na yemaãcũ Tupana nũxũ nũxũ rũngũmaxũcẽx ga norũ pecadugũ. ⁴ Rũ guma nuxcũmaũcũ ga Ichaxía ga Tupanaãrũ orearũ uruũ naxũmatũxũrũũ nixĩ ga nangupetũxũ. Yerũ duũxũgũarũ maxũãrũ mexẽẽchigaxũ nixu ga yexguma ñaxgu:

“Ngẽma nachica i ngextã taxũema íxãpataxũwa rũ tá nangẽxma i wũxi i duũxũ i ngema tagaãcũma ñaxũ: ‘¡Pegũ pemexẽẽ naxcẽx ya Cori! ¡Rũ naxcẽx ipeyanawẽxãchixẽẽ i perũ maxũ!’ ⁵ Rũ guxããrũ maxũ rũ tá inayarũwẽxãchi ñoma wũxi i ngatexũ rũgũtaxũrũũ na iyawẽxũcẽx i nama. Rũ guxãma ya yixema togũtũwa tũgũ ngẽxmaxẽẽgũxe rũ tá ítarũxĩ ñoma wũxi ya mẽxpũne rũ wũxi i ngũchitaeru idoxochixẽẽxũrũũ. Rũ guxũma i nacũma i wũxũ rũ tá inayarũwẽxãchigũ. Rũ ngẽma duũxũgũarũ maxũwa tama mexũ rũ tá nayamexẽẽgũ. ⁶ Rũ guxũma i duũxũgũ rũ tá nũxũ nadaugũ ya yima Maxẽẽẽruũ ya Tupana núma namucũ”

ñanagũrũ ga Ichaxía ũmatũxũ ga ore. ⁷ Rũ yexguma Cuãũxũtawa naxĩxgu ga duũxũgũ na ínabaiũxẽẽãxũcẽx, rũ nũma ga Cuãũ rũ ñanagũrũama nũxũ: —Pa ãxtapearũ Duũxũgũx ¿Rũ ñnũãcũ nagu perũxĩnũe na naxchaxwa pibuxmũxũ i ngema poxcu i marũ ingaicamaxũ ega tama nũxũ perũxoegu i pecũma

i chixexũ? ⁸ —¡Rü meã pemaxê na ngêmaãcü guxũma i duũxũgũ nüxũ daugũxũcèx na aixcüma marü nüxũ perũxoexũ i pecüma i chixexũ! Rü tama name i ñaperügũgũ:

“Tãütãma Tupana toxũ napoxcue, erü Abrãütanũxũ tixĩgũ” ñaperügũgũ. Erü tama ngêmacèx nixĩ ya Tupana i duũxũgũxũ nayaxuxũ. Rü pemaã nüxũ chixu rü ngêxguma Tupana naxwèxegu rü tama nüxũ naguxcha na daa nutawa Abrãütanũxũ nanguxũxêxũ. ⁹ —Tupanaãrũ yuema rü marü íimemare na yadaxũãxũcèx i ngêma nanetügũ i tama mexũ. Rü guxũma i nanetügũ i chixearü õõxũ rü tá nadaxũ, rü ñũxũchi üxüwa tá Ínagu —ñanagürü ga Cuáũ. ¹⁰ Rü yexguma ga duũxũgũ rü Cuáũna nacagü, rü ñanagürügũ: —¿Tacü êxna nixĩ i mexũ na tanaxũxũ? —ñanagürügũ. ¹¹ Rü Cuáũ rü nanangãxũ rü ñanagürü: —Texé ya taxrearü gáuxũchiruãxê rü name nixĩ i texé ya tüxũ nataxúxena tanaxã. Rü texé ya õnaãxê rü name nixĩ i texé ya ngearü õnaãxêmaã tangau i tümaãrũ õna —ñanagürü. ¹² Rü Cuáũxütawa naxĩ ta ga ñuxre ga yatügũ ga Dumaãrũ ãëxgacücèx díeru ngĩxũ ideetanũxũ. Rü nanaxwèxegü ga Cuáũ na Ínabaiũxêxũ. Rü Cuáũna nacagü, rü ñanagürügũ: —Pa Ngúexêeruũx, ¿Tacü nixĩ i mexũ na tanaxũxũ i tomãx? —ñanagürügũ. ¹³ Rü Cuáũ rü ñanagürü nüxũ: —Tama name i ãëxgacü pemaã nüxũ ixuxũãrũ yexera penayauxgü i díeru i duũxũgũxütawa —ñanagürü. ¹⁴ Rü ñuxre ga churragü rü ta Cuáũna nacagüe, rü ñanagürügũ: —¿Toma rü tacü nixĩ i mexũ na tanaxũxũ? —ñanagürügũ. Rü nanangãxũ ga Cuáũ rü ñanagürü: —Tama name i texéxũ pexãxũneãcüma tümaãrũ ngêmaxũgũ pepuxũ. Rü tama name i tacü rü doraxũ tümachigaxũ pixu na ngêmaãcü tümaãrũ ngêmaxũgũ pepuxũxũcèx. Rü name nixĩ i ngêma díeru i ãëxgacü pexũ ngĩmaã naxütanücümaãtama petaãëgũ rü tama yexeracücèx Ípeca —ñanagürü. ¹⁵ Rü yexguma ga duũxũgũ rü porãcü Ínananguxêëgũ na paxa Ínanguxũ ga Tupana Nane ga Cristu. Rü nagu narüxĩnũë ga na bexmana Cuáũ rü Cristu yĩxũ. ¹⁶ Natürü ga Cuáũ rü guxãxũ ñanagürü: —Aixcüma i choma rü dexáwamare pexũ Íchabaiũxêë, natürü tá Ínangu i to i Tupanaãrũ orearü uruũ, rü nüma tá pexna nananguxêë i Tupanaãë i Üünexũ wüxi i üxüemarũ. Erü nüma rü porãcü choxũ narüyexera na ãëxgacü yĩxũ. Rü choma rü napêxewa rü taxuwama chame rü bai i norü chapatucunũãrũ wëgüwa chame. ¹⁷ —Rü nüma rü marü Ínamemare na ñoma i naãnewa yadexechiãxũcèx i norü duũxũgũ ñoma wüxi ya yatü trigu naãtũna idexechixürü. Rü ngêmaãcü tá nayadexechi i ngêma noxrü ixĩgũxũ na naxũ- tawa nangêxmagüxũcèx, natürü ngêma tama noxrü ixĩgũxũ, rü tá Ínangu nawa ya yima üxü ya taguma ixoxũne —ñanagürü. ¹⁸ Rü yema oremaã rü muxũma ga to ga ucuxëgümaã, rü Cuáũ duũxũgümaã nüxũ nixu ga ore ga mexũ ga Ngechuchuchiga. ¹⁹ Rü Cuáũ rü ãëxgacü ga Erodexũ nanga, yerü ngĩmaã naxãmèx ga Erodía ga naëneë ga Piripi namèx. Rü nananga ta naxcèx ga yema togü ga chixexũ ga naxũxũ. ²⁰ Natürü ga Erode rü tama Cuáũga naxĩnü. Rü yexeraxũ ga chixexũ naxü, yerü poxcupataũwa Cuáũxũ namu.

Ngechucharü baiechiga
(Mt 3.13-17; Mr 1.9-11)

²¹ Rü yexguma taxũta napoxcugu ga Cuáũ, rü guxũ ga duũxũgũxũ Ínabaiũxêëxyane, rü yexguma ta nixĩ ga Ngechuchuxũ Ínabaiexêëxũ. Rü yexguma Ngechuchu íyumüxêyane rü ningena ga daxüguxũ ga naãne. ²² Rü Tupanaãë i Üünexũ rü wüxi ga muxtucurũ Ínanago rü Ngechuchuna nangu. Rü daxüwa Ínanaxũ ga wüxi ga naga ga ñaxũ: —Cuma nixĩ, Pa Chaunex, i cuxũ changechaũxũchixũ rü cumaã chataãëxũ —ñaxũ.

*Ngechuchu ya Cristu natanüwa ngóxü ga duïxügüchiga
(Mt 1.1-17)*

²³ Ngechuchu rü 30 ga taunecü nüxü nayexma ga yexguma ínaxügüägu na guxüwama duïxügümaã nüxü yaxuxü ga Tupanaarü Ore. Rü duïxügü nagu narüxñüë rü Yúche nane nixĩ ga nümax.

Rü Yúche rü Erí nane nixĩ.

²⁴ Rü Erí rü Matáx nane nixĩ.

Rü Matáx rü Lebí nane nixĩ.

Rü Lebí rü Merequí nane nixĩ.

Rü Merequí rü Yana nane nixĩ.

Rü Yana rü Yúche nane nixĩ.

²⁵ Rü Yúche rü Matatía nane nixĩ.

Rü Matatía rü Amó nane nixĩ.

Rü Amó rü Naüü nane nixĩ.

Rü Naüü rü Echi nane nixĩ.

Rü Echi rü Nagaí nane nixĩ.

²⁶ Rü Nagaí rü Maãx nane nixĩ.

Rü Maãx rü Matatía nane nixĩ.

Rü Matatía rü Chemeí nane nixĩ.

Rü Chemeí rü Yuchéx nane nixĩ.

Rü Yuchéx rü Yudá nane nixĩ.

²⁷ Rü Yudá rü Yuanáü nane nixĩ.

Rü Yuanáü rü Récha nane nixĩ.

Rü Récha rü Chorobabé nane nixĩ.

Rü Chorobabé rü Charatía nane nixĩ.

Rü Charatía rü Nerí nane nixĩ.

²⁸ Rü Nerí rü Merequí nane nixĩ.

Rü Merequí rü Adí nane nixĩ.

Rü Adí rü Cocháü nane nixĩ.

Rü Cocháü rü Elmadáü nane nixĩ.

Rü Elmadáü rü Erú nane nixĩ.

²⁹ Rü Erú rü Yochué nane nixĩ.

Rü Yochué rü Erieché nane nixĩ.

Rü Erieché rü Yoriü nane nixĩ.

Rü Yoriü rü Matáx nane nixĩ.

Rü Matáx rü Lebí nane nixĩ.

³⁰ Rü Lebí rü Chimeüü nane nixĩ.

Rü Chimeüü rü Yudá nane nixĩ.

Rü Yudá rü Yúche nane nixĩ.

Rü Yúche rü Yonáü nane nixĩ.

Rü Yonáü rü Eriaquíü nane nixĩ.

³¹ Rü Eriaquíü rü Meréa nane nixĩ.

Rü Meréa rü Ména nane nixĩ.

Rü Ména rü Matáta nane nixĩ.

Rü Matáta rü Natáü nane nixĩ.

Rü Natáü rü Dabí nane nixĩ.

³² Rü Dabí rü Ichaxí nane nixĩ.

Rü Ichaxí rü Obé nane nixĩ.

Rü Obé rü Boó nane nixĩ.

Rü Boó rü Cháru nane nixĩ.

Rü Cháru rü Nachóü nane nixĩ.

³³ Rü Nachóü rü Aminadá nane nixĩ.

Rü Aminadá rü Admiü nane nixĩ.

Rü Admiü rü Arni nane nixĩ.

Rü Arni rü Esróü nane nixĩ.

Rü Esróü rü Fare nane nixĩ.

Rü Fare rü Yudá nane nixĩ.

³⁴ Rü Yudá rü Acóbu nane nixĩ.

Rü Acóbu rü Ichaá nane nixĩ.

- Rü Ichaá rü Abráũ nane nixĩ.
 Rü Abráũ rü Taré nane nixĩ.
 Rü Taré rü Nacúx nane nixĩ.
 35 Rü Nacúx rü Cherúx nane nixĩ.
 Rü Cherúx rü Ragáu nane nixĩ.
 Rü Ragáu rü Peréx nane nixĩ.
 Rü Peréx rü Ebéx nane nixĩ.
 Rü Ebéx rü Cháru nane nixĩ.
 36 Rü Cháru rü Caináũ nane nixĩ.
 Rü Caináũ rü Arpacháx nane nixĩ.
 Rü Arpachá rü Chéũ nane nixĩ.
 Rü Chéũ rü Noe nane nixĩ.
 Noe rü Laméx nane nixĩ.
 37 Rü Laméx rü Matucharéũ nane nixĩ.
 Rü Matucharéũ rü Enóx nane nixĩ.
 Rü Enóx rü Yaréx nane nixĩ.
 Rü Yaréx rü Maararéx nane nixĩ.
 Rü Maararéx rü Caináũ nane nixĩ.
 38 Rü Caináũ rü Enóx nane nixĩ.
 Rü Enóx rü Chex nane nixĩ.
 Rü Chex rü Adáũ nane nixĩ.
 Rü Adáũ rü Tupana nane nixĩ.

4

Ngechuchuxũ naxũ ga Chataná (Mt 4.1-11; Mr 1.12-13)

¹ Ngechuchuxütawa nayexma ga Tupanaãe i Üünexũ. Rü yexguma Yudáũchiüwa ínaxũächigu ga Ngechuchu, rü Tupanaãe i Üünexũ rü dau-chitawa ga ngextá taxúema íxãpataxüwa nanaga. ² Rü yéma nayexma ga 40 ga ngunexũ. Rü ngoxo ga Chataná rü nüxũ naxũ. Rü yexguma yéma nayexmagu rü taguma nachibü. Natürü ga yixcama rü nataiya. ³ Rü yexguma ga ngoxo ga Chataná rü ñanagürü nüxũ: —Ega aixcüma Tupana Nane quixĩgu, rü jdaa nutamaã nüxũ ixu na pãuxũ nanguxuchixüçèx! —ñanagürü ga Chataná. ⁴ Rü Ngechuchu nanangãxũ rü ñanagürü: —Tupanaãrü ore i ümatüxüwa rü ñanagürü:

“Tãütáma õnamaãxĩca namaxẽ i duũxügü, natürü guxüma i ore i Tupana nüxũ ixuxũ tá nixĩ i duũxügüxũ maxẽxẽxũ”,

ñanagürü. ⁵ Rü yexguma ga ngoxo ga Chataná rü wüxi ga mëxpünechitaeruwa nanaga. Rü yéma paxaãchi nüxũ nüxũ nadauxẽe ga guxüma ga nachiũãnegü ga ñoma ga naãnecũãx. ⁶ Rü Chataná rü ñanagürü nüxũ: —Guxü i ñaã nachiũãnegü i mexü rü norü ngẽmaxügü rü chi cuxna chanaxã. Erü choxrü nixĩ i guxüma i ñaãgü, rü tüxna chanaxã ya texé ya choma chorü me ixixẽ na tüxna na chanaxãxũ. ⁷ —Rü ngẽxguma chi chopẽxegu cucaxãpüxügu rü choxü quicuèxüügu rü cuxrü chi nixĩ i guxüma i ñaã cuxü chawéxũ —ñanagürü.

⁸ Natürü ga Ngechuchu rü nanangãxũ, rü ñanagürü: —¡Choxna ixügachi! Pa Chata- náx. Erü Tupanaãrü ore i ümatüxüwa rü ñanagürü:

“¡Nüxũ icuèxüü ya Cori ya curü Tupana, rü yimaãxũxĩcatama napuracü!”

ñanagürü. ⁹ Rü yexguma ga ngoxo ga Chataná rü Yerucharéũ ga ñãnewa nanaga. Rü tupauca ga taxünetapẽxegu nanamunagü. Rü ñanagürü nüxũ: —Ega aixcüma Tupana Nane quixĩgu, rü jnuã cugü rütae! ¹⁰ —Erü Tupanaãrü ore i ümatüxüwa rü ñanagürü:

“Tupana tá nanamu i norü orearü ngeruügü i daxüçũãx na cuxna nadaugüxüçèx. ¹¹ Rü naxmẽxmaã tá cuxü niyauxgü na tama çacü rü nutaga cunguxüçèx”,

ñanagürü. ¹² Rû Ngechuchu nanangãxũ rû ñanagürü: –Tupanaãrû ore i ümatüxüwa rû ñanagürü ta:

“¡Tama name i nüxũ na cuxüxũ ya Cori ya curü Tupana!”,

ñanagürü. ¹³ Rû yexguma marü taxucürüwama Ngechuchuxũ naxüxgu, rû nüma ga Chataná rû nüxna niña ñuxmata nüxũ iyangau na ñuxãcü wena nüxũ na naxüxũ.

*Ngechuchu rû Gariréaanewa inanaxügü ga norü puracü
(Mt 4.12-17; Mr 1.14-15)*

¹⁴ Rû Ngechuchu rû Gariréaanecèx nataegu. Rû Tupanaãe i Üünexũ rû naxütawa nayexma rû poraãcü nanaporaxëe. Rû ga duüxügü rû nachiga nidexagü ga guxũ ga yema naãnewa. ¹⁵ Rû wüxichigü ga ñãneãrû ngutaquëxepataügüwa rû nanguxëetae. Rû guxüma ga duüxügü rû nüxũ nicuëxüügü.

*Nacharétuwa nayexma ga Ngechuchu
(Mt 13.53-58; Mr 6.1-6)*

¹⁶ Rû Nacharétuwa naxü ga Ngechuchu. Rû guma nixĩ ga ñãne ga nanatügü nawa nayaxëëgüne. Rû ngüxchigaarü ngunexügu rû ngutaquëxepataügu naxücu, yerü yema nixĩ ga nacüma ga guxũ ga ngüxchigaarü ngunexügu. Rû yéma inachi rû duüxügücèx nüxũ nadaumatü ga Tupanaãrû ore ga ümatüxũ. ¹⁷ Rû nüxna nanaxãgü ga popera ga Tupanaãrû orearü uruü ga Ichaxía ümatüxũ. Rû yexguma yangenaãtütãgu, rû nüxũ inayangau ga ngextá ínaxümatüxüwa ga ore ga ñaxũ:

¹⁸ “Cori ya Tupanaãe rû chauxütawa nangëxma. Rû nüma rû choxü naxuneta na nüxũ chixuxücèx i ore i mexü namaã i ngëma duüxügü i ngearü ngëmaxüãxgüxũ. Rû choxü namu na ngëma duüxügü i pecadutüüwa ngëxmagüxümaã nüxũ na chixuxücèx rû tá na ínanguxüxũ. Rû choxü namu na chayadauchixetüxëëgüxücèx i ngëma ingexetügüxũ rû na íchananguxüxëëxücèx i ngëma duüxügü i togümëxëwa ngëxmagüxũ.

¹⁹ Rû núma choxü namu na duüxügümaã nüxũ chixuxücèx na Tupana nüxũ rüngüxëëchaüxũ i ngëma nüxũ yaxögüxũ”,

ñanagürü ga yema ore. ²⁰ Rû yexguma ga Ngechuchu rû nügüna nananuxãchiátü ga popera. Rû ngutaquëxepataüãrû dauruña nanaxã rû ñuxüchi ínarüto. Natürü guxüma ga yema ngutaquëxepataüwa yexmagüxũ ga duüxügü rû nüxũ narüdaunüëcha. ²¹ Rû yexguma ga Ngechuchu rû inanaxügü ga na yadexaxü, rû ñanagürü: –Ñuxmatama nixĩ i pepëxewa Tupana yanguxëëxũ i ñãã ore ga Ichaxía ümatüxũ –ñanagürü. ²² Rû guxüma ga duüxügü rû meã Ngechuchuchiga nidexagü. Rû nabaixãchiãëgü namaã ga yema ore ga mexü ga namaã nüxũ yaxuxü. Natürü tama aixcüma nayaxögüchaü. Rû yemacèx nügüna nacagü rû ñanagürügü: –¿Taux ëxna daa yüxũ ya Yúche nane? –ñanagürügü. ²³ Rû Ngechuchu rû ñanagürü nüxũ: –Choma nüxũ chacuèx rû tá chomaã penaxuxuchi i ngëma ore i ñaxũ:

“Pa Duturux ¡Cugütama rümexëë!” ñaxũ. Rû ëxna tá choxü ñaperügügü:

“Yema mexü ga taxü ga nüxũ taxĩnüëxü ga Tupanaãrû poramaã cuxüxũ ga Capernáüwa, rû tanaxwëxe i nuã curü ñãnewa rû ta na cunaxüxũ”, ñaperügügü tá. ²⁴ Rû nayadaxëe ga Ngechuchu na yadexaü rû ñanagürü: –Aixcüma pemaã nüxũ chixu rû guxüma i Tupanaãrû orearü uruü, rû norü ñãnewatama i duüxügü rû tama meã nanayauxgü. ²⁵ –Rû aixcüma pemaã nüxũ chixu rû Iraéanewa rû nayexma ga muxüchixüma ga ngexügü ga iyutegüxũ ga yexguma Ería maüxgu. Rû yexguma nixĩ ga tomaëxpüx ga taunecüarü ngãxũ rû taguma napuxü, rû poraãcü nangüxũ ga taiya

ga guxũ ga ñaa nachixũanewa. ²⁶ —Natürü ga Tupana rü tama wüxi ga Iraéanecũãx ga yutecũxõtawa Eríaxũ namu. Natürü ngĩxõtawa nanamu ga yema yutecũ ga Charépacũãx ga Chidãũãrũ ñãneãrũ ngaicamagu ãchiũcũ. ²⁷ —Rü yexguma namaũxgu ga Erichéu, rü Iraéanewa nayexmagũ ta ga muxũma ga duũxũgũ ga chaxũnemaã idaaweexũ. Natürü taxuũma ga yema idaaweexũ ga Iraéanewa yexmagũxũ rü naxcèx nitaaneẽ. Rü Namáũ ga Chíríaanecũãxĩcatama nixĩ ga guma naxcèx yataanecũ —ñanagürü ga Ngechuchu. ²⁸ Rü yexguma yema orexũ naxĩnũẽgu, rü guxũma ga yema duũxũgũ ga guma ngutaquẽxepataũwa yexmagũxũ rü poraãcũ naxcèx nanuẽ. ²⁹ Rü inachigũ ga duũxũgũ rü Ngechuchuxũ ínatèxũchigũ ga guma ñãnewa. Rü guma mèxpũne ga guma ñãne nawa yexmanechitaeruwa nanagagũ na yéma yanataegũãxũcèx. ³⁰ Natürü ga Ngechuchu rü norü ngãxũtanũwa ínaxũxũãma, rü ínixũ.

*Wüxi ga yatü ga ngoxo nawa yexmaxũchiga
(Mr 1.21-28)*

³¹ Rü yexguma ga Ngechuchu rü Gariréaneãrũ ñãne ga Capernáũwa naxũ. Rü ngũxchigaarũ ngunexũgu yéma duũxũgũxũ nangúexẽẽ. ³² Rü duũxũgũ rü nabaixãchiãegũ namaã ga norü nguxẽẽtae, yerü Tupanaãrũ poramaã nidexa. ³³ Rü guma ngutaquẽxepataũwa nayexma ga wüxi ga yatü ga ngoxo nawa yexmaxũ. Rü aita yéma naxũ, rü ñanagürü: ³⁴ —¡Toxna ixũgachi! ¿Tũxcũũ totanũwa cuxũ, Pa Ngechuchux, Pa Nacharétucũãx? ¿Nuã cuxũ na toxũ cudèixũcèx? Choma cuxũ chacuèx na Tupana Nane ya Üünecũ na quiĩxũ —ñanagürü. ³⁵ Rü Ngechuchu nananga ga yema ngoxo rü ñanagürü: — ¡Iyarũngeèx rü ínaxũxũ nawa ya yima yatü! —ñanagürü. Rü yexguma ga yema ngoxo rü duũxũgũpèxegu nayanguxẽẽ ga guma yatü, rü nawa ínaxũxũ. Natürü tama nanapixẽẽ. ³⁶ Rü guxũma ga duũxũgũ rü nabaixãchiãegũ. Rü nügũmũcũgũmaãchigũ nachiga nidexagũ, rü ñanagürũgũ: —¿Tacũ rü ore nixĩ i ngẽma? Erü ñãã yatü rü aixcũma ngẽma ngoxogũmaã inacuèx rü poraãcũ nanamu. Rü nũmagũ rü naga naxĩnũẽ, rü ínachoxũ —ñanagürũgũ. ³⁷ Rü guxũwama ga yema naãnewa rü Ngechuchuchigaxũ nixugũe ga duũxũgũ.

*Ngechuchu rü Chimáũ ga Pedru nèxècèx nayataanexẽẽ
(Mt 8.14-15; Mr 1.29-31)*

³⁸ Rü guma ngutaquẽxepataũwa ínaxũxũ ga Ngechuchu rü Chimáũpatawa naxũ. Rü Chimáũ nèxè rü poraãcũ iyaxaxũne. Rü Ngechuchuna nacagũe ga ngĩxcèx na yataanexẽẽãxũcèx. ³⁹ Rü nũma rü ngĩxõtagu nayachi rü narũmèxãchi rü nananga ga yema axũne. Rü yexgumatama igèuxãchi ga na yaxaxũnèxũ. Rü yexgumatama írũda, rü naxcèx inamexẽẽ ga õna.

*Ngechuchu rü muxũma ga idaaweexũcèx nayataanexẽẽ
(Mt 8.16-17; Mr 1.32-34)*

⁴⁰ Rü yexguma marũ yanaxũcuchaũgu ga üèxcũ, rü Ngechuchuxõtawa nanagagũ ga guxũma ga duũxũgũ ga nagúxũraũxũ ga ðaaweanemaã idaaweexũ. Rü ga Ngechuchu rü wüxichigũ ga yema duũxũgũxũ ningõgũ, rü yemaãcũ naxcèx nayataanexẽẽchigũ. ⁴¹ Rü nanameẽxẽẽ ga muxũma ga duũxũgũ ga idaaweexũ ga ngoxo nawa yexmagũxũ. Rü yema ngoxogũ rü aita naxũe, rü ñanagürũgũ: —Cuma nixĩ i Tupana Nane quiĩxũ —ñanagürũgũ. Natürü ga Ngechuchu rü nayangagũ ga yema ngoxogũ. Rü nũxna nanachuxu ga na yadexagũxũ, yerü yema ngoxogũ rü nũxũ nacuèxgũ na Cristu yĩixũ.

*Ngechuchu rü nanaxunagũ ga ore ga mexũ ga ngutaquẽxepataũwachigũ
(Mr 1.35-39)*

⁴² Rū yexguma noxri yangóonegu rü yema ñānewa ínaxūxū ga Ngechuchu. Rū wūxi ga nachica ga taxúema íxāpataxūwa naxū. Natürü ga duūxūgü rü naxcèx nadaugü rü düxwa naxūtawa nangugü. Rū nüxū nacèèxūgü ga tama na ínaxūxūxūcèx ga yema norü naānewa. ⁴³ Natürü ga Ngechuchu rü ñānagürü nüxū: —Taxucürüwama petanügu charūxāūēcha erü chanaxwèxe na náigü ya ñānegüwa ngēxmagūxū i duūxūgümaā rü ta nüxū chixuxū na ñuxācū āēxgacū yīxū ya Tupana. Erü woetama ngēmacèx núma choxū namu —ñānagürü. ⁴⁴ Rū yemaācū Ngechuchu nüxū nixuchigü ga ore ga ngutaquēxepataūgüwachigü ga guxūma ga Gariréaanewa.

5

Muxūma ga choxni na ínayauxūxūchiga (Mt 4.18-22; Mr 1.16-20)

¹ Rū wūxicana ga yexguma naxtaxa ga Yenecharétuanacūwa nayexmagu ga Ngechuchu, rü muxūma ga duūxūgü rü naxūtawa nangugü. Rū düxwa yéma nayaxāūtügü, yerü nüxū naxīnūēchañ ga Tupanaārü ore. ² Rū Ngechuchu yéma nüxū nadau ga taxre ga ngue ga ingeācune. Rū guma nguegü rü naxnecūpechinūwa nanadagü, yerü ga pūchaetanūxū rü nüxna yéma ínachoñ, yerü norü pūcha niyauxgü. ³ Rū wūxi ga guma nguegu nixūe ga Ngechuchu. Rū guma ngue rü Chimáūārü nixī. Rū Chimáūna naca ga naxnecūpechinūārü ngāxūtūwaxūra na nangeaxūcèx. Rū guma nguewa narūto ga Ngechuchu. Rū yéma inanaxügü ga duūxūgūxū na nangúexēēxū. ⁴ Rū yexguma yagúegagu ga Ngechuchu ga na yadexaxū, rü Chimáūxū ñānagürü: —jyéa ínamátamaxūwa namañ naxā ya daa ngue. Rū ngema penatáe i perü pūcha na choxnita piyauxgūxūcèx! —ñānagürü. ⁵ Rū Chimáū nanangāxū, rü ñānagürü nüxū: —Pa Ngúexēēruūx, ngewèx rü guxū i chūtaxū rü tapūchae, natürü taxuūma i choxni tiyaxu. Natürü ñuxma na choxū cumuxū rü wena táxarü íchanatáe i chorü pūcha —ñānagürü. ⁶ Rū yexguma ínatáegüāgu ga norü pūcha, rü muxūma ga choxni ínayauxū. Rū düxwa narügáuxchañ ga norü pūcha yerü namuxūchi ga choxni. ⁷ Rū naxmēxmaā náí ga nguewa yexmagūxū ga natanūxūgūcèx nacagü na nüxū yanangūxēēgūxūcèx. Rū yéma naxī ga yema natanūxūgü ga naxcèx nacagūxū. Rū nanaxūācugü ga guma taxre ga ngue rü wixgutaèx inangutaūgü yerü namuxūchi ga choxni. ⁸ Rū yexguma yemaxū nadèuxgu ga Chimáū ga Pedru, rü Ngechuchupēxegu nayacaxāpūxū, rü ñānagürü nüxū: —jChoxna ixūgachi! Pa Corix. Erü choma rü wūxi i duūxū i pecaduāxū chixī —ñānagürü. ⁹ Rū yema ñānagürü ga Chimáū yerü nūma rü guxūma ga natanūxūgü rü namañ nabaixāchiāēgü ga yema muxūma ga choxni na ínayauxūxū. ¹⁰ Rū nabaixāchiāēgü ta ga Chimáūmücügü ga Chaūtiāgu rü Cuāñ ga Zebedéu nanegü. Natürü Ngechuchu rü Chimáūxū ñānagürü: —jTāxū i cumuūxū! Erü ñuxmacürüwa rü tá choxū cupuracū na chauxūtawa cunagagūxūcèx i duūxūgü —ñānagürü. ¹¹ Rū yexguma naxānacūwa namañ nangugügu ga naweūgü, rü yéma nanawogü ga norü guxūma rü Ngechuchuwe narūxī.

Ngechuchu rü wūxi ga rüchaxūnèxūcèx nayataanexēē (Mt 8.1-4; Mr 1.40-45)

¹² Rū yexguma wūxi ga yéma yexmagüne ga ñānewa nayexmagu ga Ngechuchu, rü yéma naxūtawa nangu ga wūxi ga yatü ga chaxūnemaā idaawexū. Rū yexguma Ngechuchuxū nadèuxgu rü napēxegu nayacaxāpūxū rü yexma nanangūcuchi. Rū Ngechuchuxū nacèèxū, rü ñānagürü: —Pa Corix, ngēxguma cuma cunaxwèxegu, rü cuxū natauxcha na choxū curümexēēxū nawa i chorü daawe —ñānagürü. ¹³ Rū yexguma ga Ngechuchu

rü nüxü ningögü, rü ñanagürü nüxü: —Ngü, chanaxwèxe. ¡Rüme! —ñanagürü. Rü yexguma yema ñaxgu ga Ngechuchu, rü naxcèx nitaane ga yema yatü ga chaxüneañxü. ¹⁴ Rü Ngechuchu nanaxucuxê rü ñanagürü nüxü: —¡Dücèx, taxúemaãtáma nüxü quixu, natürü paixü cugü yadauxêê na curümexü rü yanguxêê i ngêma Tupana Moïchéwa nüxü ixuxü na duüxügü nüxü cuáxcèx na marü curümexü nawa i curü daawe! —ñanagürü. ¹⁵ Natürü ga Ngechuchuchiga rü guxüwama ninguchigüama. Rü muxüma ga duüxügü rü naxcèx naxítaquëxegü na norü orexü naxĩnüëxcèx, rü naxcèx na yataaneëxêãxücèx ga norü daawegüwa. ¹⁶ Natürü Ngechuchu rü ñuxguacü rü ngextá taxúema íxãpataxüwa naxüüxü. Rü yéma nayayumüxëxü.

*Ngechuchu rü wüxi ga yatü ga nawãixãchicücèx nayataanexêê
(Mt 9.1-8; Mr 2.1-12)*

¹⁷ Rü wüxi ga ngunexü Ngechuchu íngxêetaeyane, rü yéma narütogü ga ñuxre ga Parichéugü rü ñuxre ga ngúexêëruüügü ga Moïchéarü mugümaã nguxêëtaegüxü ga guxü ga Gariréaaneärü ñanexãcügüwa ne íxü, rü Yudéaanewa ne íxü, rü Yerucharéüwa ne íxü. Rü Tupana rü poraãcü Ngechuchuwa inanawëx ga norü pora rü muxüma ga idaaweexü narümeëxêê. ¹⁸ Rü Ngechuchuxütawa nangugü ga ñuxre ga yatügü, rü naxcèx yéma nanangetaügü ga wüxi ga yatü ga nawãixãchicü. Rü ípatagu nanangecuchitaügüchaü na Ngechuchupëxegu yaxütaügüãxücèx. ¹⁹ Natürü taxuacüma yexma nanangecuchitaügüéga, yerü namuxüchi ga duüxügü. Rü yemacèx ñacèxwëxgu naxígü. Rü meãma Ngechuchu íyexmaxüetüwa ínanapogüãxügü ga guma ípata. Rü yéma duüxügütanüwa Ngechuchupëxewa ínanachüxüetaügü ga guma nawãixãchicü. ²⁰ Rü yexguma Ngechuchu nüxü dëuxgu ga na nüxü yaxögüãxü ga yema yatügü, rü ñanagürü guma nawãixãchicüxü: —Pa Chaunex, marü cuxü nüxü changechaü i curü pecadugü —ñanagürü. ²¹ Natürü yema ngúexêëruüügü ga Moïchéarü mugüarü nguxêëtaeruüügü rü Parichéugü, rü nagu narüxĩnüë, rü nügüãëwa ñanagürügü: —¿Tãcü nixí i ñaã yatü ecèx Tupanamaã chixexü yaxugüxü? Erü taxúema pora tuxü nangëxma na duüxügüaxü pecaduxü tangechaüxü. Rü Tupanaxícatama nixí ya nüxü nangëxmacü i ngêma pora —ñanagürügü naãëwa. ²² Natürü ga Ngechuchu rü nüxü nacuèx ga tãcügü na ínaxĩnüëxü. Rü yemacèx ñanagürü nüxü: —¿Tüxcüü ngê-magu perüxĩnüë i pemax? ²³ —¿Tãcü nixí írütaxchamaëxü na namaã nüxü ixuxü ya daa yatü ya nawãixãchicü:

“Curü pecadugü rü marü cuxü nüxü changechaü”, rü éxna:

“¡Inachi rü íxü!” ñágüxü nüxü? ²⁴ —Natürü ñuxma rü tá pexü nüxü chadauxêê na Chaunatü núma choxü muxü na duüxügüaxü nüxü changechaüxcèx i norü pecadugü —ñanagürü. Rü yexguma yema ñaxguwena rü guma nawãixãchicüxü ñanagürü: —Cumaã nüxü chixu rü jinachi, rü nayaxu i curü carü, rü cupatawa naxü! —ñanagürü. ²⁵ Rü yexgumatama guxü ga duüxügüpëxewa inachi ga guma nawãixãchicü. Rü nanayaxu ga norü carü ga nagu nacaxü. Rü Tupanaxü yacuèxüüchigüãcüma napatawa naxü. ²⁶ Rü guxüma ga duüxügü rü nabaixãchiãëgü. Rü Tupanaxü nicuèxüügü. Rü poraãcü namuëãcüma ñanagürügü: —Ñuxma rü nüxü tadaugü i ñuxre i Tupanaärü puracügü i aixcüma mexëchixügü —ñanagürügü.

*Lebícèx naca ga Ngechuchu
(Mt 9.9-13; Mr 2.13-17)*

²⁷ Rü yemawena ga Ngechuchu rü ínaxüxü ga guma íwa. Rü wüxi ga yatü ga Dumaärü ãëxgacücèx dñëru ngixü ideetanüxüxütawa naxüpetü. Rü guma yatü rü Lebí nixí ga naega. Rü yéma dñëru ngixü ínadexüwa narüto. Rü

Ngechuchu rü ñanagürü nüxü: —¡Chowe rüxü! —ñanagürü. ²⁸ Rü inachi ga Lebí, rü yéma nanatèx ga norü guxüma, rü Ngechuchuwe narüxü. ²⁹ Rü yixcama ga Lebí rü Ngechuchucèx napatawa wüxi ga taxü ga òna naxü. Rü muxüma ga yatügü ga Lebírüü dīēruarü degüwa puracüexü, rü muxüma ga togü ga duüxügü rü ta yéma mechawa narütogü. ³⁰ Natürü ga yema Parichéugü rü ngüexēeruügü ga Moīchéarü mugüarü ngüxēētaeruügü, rü inanaxügü na Ngechuchuarü ngüexügüchigagu chixri yadexagüxü. Rü ñanagürügü: —¿Tüxcüü wüxiwa pechibüe rü namaã pexaxegü i ngēma yatügü i Dumaãrü ãēxgacücèx dīēru ngīxü dexü rü ngēma pecaduãxgüxü? —ñanagürügü. ³¹ Rü Ngechuchu nanangãxü, rü ñanagürü nüxü: —Ngēma poraexü rü taxucèxma duturu nanaxwèxegü, natürü ngēma idaaweexü nixī i duturu naxwèxegüxü. ³² —Choma rü tama mexügüna na chaxuxücèx nixī i núma chaxüxü, natürü pecaduãxgüxüna na chaxuxücèx nixī i núma chaxüxü na ngēmaãcü nüxü naxoexücèx i nacümagü i chixexügü rü Tupanawe naxīxü —ñanagürü.

*Ngechuchuna nacagüe ga aurechiga
(Mt 9.14-17; Mr 2.18-22)*

³³ Rü yexguma Ngechuchuna nacagüe ga duüxügü, rü ñanagürügü: —Cuáü ya baiüxēēruüarü ngüexügü rü Parichéugüarü ngüexügü rü nayumüxēgüecha, rü muēxpüxcüna rü naxauree rü tama nachibüe erü Tupanagu narüxīnüē. Natürü i curü ngüexügü, rü guxüguma nachibüe rü naxaxegümare —ñanagürügü. ³⁴ Natürü ga Ngechuchu rü nanangãxü, rü wüxi ga ore ga nügüchigaxütama namaã nixü, rü ñanagürü: —¿Éxna wüxi i ngīgüarü petawa rü pexcèx namexü na penaxaureexēexü i ngēma nüxna naxugüxü ega natanüwa nangēxmagu i ngēma yatü i ngexwacèx ãmaxü? Rü tama nixī. ³⁵ —Natürü wüxi i ngunexü rü ngēma yatü i ngexwacèx ãmaxü, rü tá namücügüna nixügachi. Rü ngēma ngunexügu tá nixī i aixcüma naxaureexü i namücügü —ñanagürü. ³⁶ Rü yexguma ga Ngechuchu rü namaã nüxü nixü ga wüxi ga ore ga yema duüxügücüma ga nuxcümaüxüchiga rü noxrütama ngüxēētae i ngexwacaxüxüchiga. Rü ñanagürü: —Taxüema wüxi i ngexwacaxüxü i naxchiruta tiyo na namaã tanapaitaxücèx i wüxi i naxchiru i marü ngauxü. Erü ngēxguma ngēmaãcü tanaxüxgu rü tanachixexēē i ngēma naxchiru i ngexwacaxüxü. Rü ñüxüchi ngēma natüchi i ngexwacaxüxü rü tama nüxü nayatãxü i ngēma naxchiru i marü ngauxü. ³⁷ —Rü ngēxgumarüü ta rü taxüema ngexwacaxücü ya binu rü nagu tayabacuchi i wüxi i naxchiü i marü ngauxü i naxchèxmünaxcèx. Erü ngēxguma ngēmaãcü naxüxgu rü yima binu ya ngexwacaxücü rü tá narüngu, rü tá nayawãixēē i ngēma naxchiü i ngauxü i naxchèxmünaxcèx. Rü ngēxma tá nayarütaxu ya binu rü ngēma naxchiü rü ta. ³⁸ —Rü ngēmacèx tanaxwèxe na yima ngexwacaxücü ya binu rü ngexwacaxüxü i naxchiügu yabacuchixü. Rü ngēmaãcü rü taxuütama inayarütaxu. ³⁹ —Rü taxüema ya texé ya tümamaã yaxüxe na ngüchiacü ya binu tayaxaxüxü rü tüxü nangüchaü na tayaxaxüxü ya binu ya ngexwacaxücü ya maīcuracü. Rü ngēxgumarüü ta nixī i ngēma duüxügü i marü namaã yaxüxü i nuxcümaüxü i nacüma i chixexü rü tama nanayauxgüchaü i ngēma mexü i ngüxēētae i ngexwacaxüxü —ñanagürü ga Ngechuchu.

6

*Ngechuchuarü ngüexügü rü trigu nicãüētanü ga ngüxchigaarü ngunexügu
(Mt 12.1-8; Mr 2.23-28)*

¹ Rü wüxi ga ngüxchigaarü ngunexügu rü Ngechuchu rü norü ngüexügümaã trigunecüwa nachopetü. Rü norü ngüexügü rü inaxīãcüma

yoxocüne trigu nicãütanü. Rû naxmëxmaã nanadaxi ga trigu rû nayangõëtanü. ² Rû ñuxre ga Parichéugü rû yema ngúexüguna nacagü, rû ñanagürügü: —¿Tüxcüü ngüxchigaarü ngunexügu penabuxu i trigu? Erü ngüxchigaarü ngunexügu rû nachuxu na texé puracüxü —ñanagürügü. ³ Rû Ngechuchu nanangãxü, rû ñanagürü: —¿Taguma ëxna poperawa nüxü pedau ga tacü na naxüxü ga nuxcümaücü ga ãëxgacü ga Dabí ga yexguma nataiyagu ga nüma rû natanüxügü? ⁴ —Rû Tupanapatagu naxücu rû nüxü nadau ga yema pâü ga üünexü ga yexma nuxü. Rû yema pâü rû nachuxu ga ngexerüxemare na nangõxü, rû paigücëxicatama nixí. Natürü Dabí nanayaxu ga yema pâü rû nanangõx, rû natanüxümaã rû ta nangau —ñanagürü. ⁵ Rû ñanagürü ta ga Ngechuchu: —Tupana Nane ya duüxüxü ixícü rû namaã inacuëx i ngüxchigaarü ngunexü —ñanagürü.

*Wüxi ga yatü ga yumécüchiga
(Mt 12.9-14; Mr 3.1-6)*

⁶ Rû to ga ngüxchigaarü ngunexügu rû Ngechuchu rû ngutaquëxepataügu naxücu. Rû inanaxügü ga na nanguxëëtaexü. Rû yéma nayexma ga wüxi ga yatü ga norü tügünewa yumécü. ⁷ Rû yema ngúexëëruügü ga Moïchéarü mugüwa nguxëëtaegüxü rû Parichéugü, rû Ngechuchuxü nangugügü ngoxita ngüxchigaarü ngunexügu guma yumécüxü namexëë, yerü naxcëx nadaugü ga ñuxácü norü ãëxgacügüxütawa na ínaxuaxügüãxü. ⁸ Natürü nüma ga Ngechuchu rû nüxü nacuëx ga yema naãëwa nagu naxínüëxü ga yema yatügü. Rû yemacëx guma yumécüxü ñanagürü: —¿Írüda rû nuxã ngãxütanügu yachi! —ñanagürü. Rû guma yumécü rû inachi rû norü ngãxütanügu nayachi. ⁹ Rû yexguma ga Ngechuchu rû nüxna naca ga yema Parichéugü rû yema mugüwa nguxëëtaegüxü, rû ñanagürü nüxü: —¿tacü nixí i ngema mexü ixüxü i ngüxchigaarü ngunexügu? ¿Rû ngema mexü rû ëxna chixexü? ¿Rû namexü i na namaxëëxü rû ëxna yamáxü? —ñanagürü. ¹⁰ Rû yexguma Ngechuchu nüxü nidaugüãchi ga yema duüxügü ga yéma yexmagüxü. Rû guma yumécüxü ñanagürü: —¿Iyanawëxãchixëë ya cuxmëx! —ñanagürü. Rû guma yatü rû nügü inayarüwëxãchimëxëë, rû narümemëx. ¹¹ Natürü yema Parichéugü rû ngúexëëruügü ga Moïchéarü mugüwa nguxëëtaegüxü, rû poraãcü nanuë. Rû nügü nixucüxëgü na ñuxácü tá Ngechuchuxü na yamëxgüxü.

*Ngechuchu nanade ga 12 ga norü ngúexügü na tóxnamana namugüãxüçëx
(Mt 10.1-4; Mr 3.13-19)*

¹² Rû yexguma ga Ngechuchu rû dauxchitawa, wüxi ga mëxpünëwa naxü na yéma yayumüxëxüçëx. Rû guxü ga yema chütaxügu rû yéma nayumüxë. ¹³ Rû yexguma yangóonegu, rû Ngechuchu norü ngúexügüçëx naca. Rû natanüwa nayadexechi ga 12. Rû yema nixí ga yatügü ga Ngechuchu nüxü unetagüxü na tóxnamana nangegüãxüçëx ga norü ore. ¹⁴ Rû yema yatügü ga nadexü rû Chimáü ga Pedrugu nanaxüéga nixí ga wüxi. Rû to nixí ga Aüdré ga Chimáü naëneë, rû Chaütiágu rû Cuáü, rû Piripi, rû Baturumé, ¹⁵ rû Mateu, rû Tumachi, rû Chaütiágu ga Arupéu nane rû Chimáü ga iporaãëcücü, ¹⁶ rû Yuda ga Chaütiágueneë, rû Yuda Icariúte ga yixcama Ngechuchuxü íxuaxüxü naëchita.

*Ngechuchu rû muxüma ga duüxügüxü nangúexëë
(Mt 4.23-25)*

¹⁷ Rû Ngechuchu rû yema yatügü ga nadexümaã ínarüxíngü nawa ga guma mëxpüne. Rû wüxi ga nachica ga ínametachinüãnexüwa nayachaxãchitanü. Rû yéma nayexmagü ga muxüma ga duüxügü ga guxü ga Yudéaanëwa ne íxü,

rü Yerucharéüwa ne ìxü, rü taxtü ga taxüñnacüwa ga Chidãüwa rü Tiruwa ne ìxü. Rü yéma naxĩ yerü Ngechuchuxü naxĩnüëchaü, rü nanaxwèxegü ga Ngechuchu na nameëxëëxü ga norü daawegüwa. ¹⁸ Rü yema duüxügü ga chixexü ga naã nawa yexmagüxü rü ta naxcèx nitaanegü. ¹⁹ Rü guxüma ga duüxügü rü Ngechuchuxü ningögügüchaü, yerü norü poramaã nanameëxëë.

Duüxügü i taãëgüxüchiga rü duüxügü i ngechaügüxüchiga
(Mt 5.1-12)

²⁰ Rü yexguma Ngechuchu rü norü ngüexügüxü nadawenü, rü ñanagürü nüxü: —¡Petaãëgü i pema ya ingearü ngëmaxüãxgüxe! Rü Tupana ãëxgacü ìxixüwa rü pema rü tá ta pexãchica. ²¹ —¡Rü petaãëgü i pema i ñuxma taiyaexe! ¡Rü tá meãma pingãxcharaügü! ¡Rü petaãëgü i pema i ñuxma auxexe! Rü yixcama rü tá pecugüe. ²² —¡Rü petaãëgü i pema i ngëxguma duüxügü pexchi aiegu, rü pexü ñawoüxgu, rü tacü pemaã yaxugüegu, rü chaugagu chixri pechiga yadexagügu! ²³ —Rü ngëxguma ngëma pexü üpetügu, rü ¡petaãëgüama rü tama pexoegaãëgü! Erü daxügüxü i naãnewa rü tá penayauxgü i wüxi i perü ãmare i mexëchixü. Rü dücax, ñaã duüxügü i ñuxma pexchi aiexüârü oxigü rü yexgumarüü ta nixĩ ga naxchi na naxaiaxü ga nuxcümaügüxü ga Tupanaârü orearü uruügü. ²⁴ —Natürü wüxi i ngechaü tá nixĩ i pexcèx i pema ya muârü ngëmaxüãxgüxe erü núma ñoma i naãnewa rü marü petaãëgü. ²⁵ —Rü wüxi i ngechaü tá nixĩ i pexcèx i pema ya marü ingaxcharaügüxe erü tá petaiyae. Rü wüxi i ngechaü tá nixĩ i pexcèx i pema i ñuxma marü cugüexe, erü yixcama rü perü ngechaümaã tá pexaxe. ²⁶ —Rü wüxi i ngechaü tá nixĩ i pexcèx i ngëxguma guxüma i duüxügü pexü icuëxüügügu. Erü ngëma duüxügü i ñuxma pexü icuëxüügüxüârü oxigü rü yexgumarüü nüxü nicuëxüügü ga nuxcümaügüxü ga orearü uruügüneta.

Name nixĩ i nüxü tangechaü i ngëma tamaã rüxüwanügüxü
(Mt 5.38-48, 7.12)

²⁷ —Natürü pema i ñuxma na choxü pexĩnüëxü rü pemaã nüxü chixu rü: —¡Nüxü pengechaü i ngema pemaã rüxüwanügüxü! ¡Rü meã nüxü perüngüxëëx i ngëma pexchi aiexü! ²⁸ —¡Rü meã nachiga pidexagü rü naxcèx ípeca i Tupanaârü ngüxëë naxcèx i ngëma pemaã guxchigagüxü! ¡Rü naxcèx peyumüxëëgü i ngëma chixri pechigamaã idexagüxü! ²⁹ —Rü ngëxguma texé cumaã nuxgu rü cuxü tapechiwegu rü name nixĩ i tama cuxütanü ega woo curü tochiwewa rü ta cuxü tapechiwegu. Rü ngëxguma texé cuxü napuarü gáuxüchiruãxgu, rü name nixĩ i tüxü cungechaüãma ega woo curü daxü rü ta cuxna tanapuxgu. ³⁰ —¡Rü tüxna naxã ya texé ya curü ngëmaxüçèx ícaxe! Rü ngëxguma texé curü ngëmaxü cuxna napuxgu, rü tama name i naxcèx cungema. ³¹ —Rü ngëma mexü i pema penaxwèxexü na togü pemaã naxüxü, rü name nixĩ i pema rü ta ngëmaãcü mexü namaã pexü. ³² —Rü ngëxguma pema rü ngëma duüxügü i pexü ngechaüxüxüxĩcatama pengechaügu, rü ¿tacüwa namexü i ngëma? Erü ngëma duüxügü i tama yaxögüxü rü ngëmaãcü nanaxügü. ³³ —Rü ngëxguma ngëma duüxügü i cuxü rüngüxëëxüxüxĩcatama curüngüxëëgu, rü ¿tacüwa namexü i ngëma? Erü ngëma duüxügü i tama yaxögüxü rü ngëmaãcü nanaxügü. ³⁴ —Rü ngëxguma ngëma duüxügü i ixãârü dïeruãxüñaxĩcatama cunaxãxgu i curü dïeru, rü ¿tacüwa namexü i ngëma? Erü ngëma duüxügü i tama yaxögüxü rü ngëmaãcü nanaxügü, erü nüxü nacüëxgü rü tá nüxü nanataeguxëë i ngëma dïeru. ³⁵ —Natürü pema rü name nixĩ i nüxü pengechaü i ngema pemaã rüxüwanügüxü, rü nüxü perüngüxëë. Rü ngëxguma tacüçèx pexna nacaxgu, rü name nixĩ i tama pexoegaãëãcüma nüxna penaxã ega woo nagu perüxĩnüëgu na ngürüãchi tãütãma pexü nataeguxëëãxü. Erü

ngëxguma ngëmaãcü penaxüxgu, rü Tupana rü ngëmaãrü yexera tá poraãcü pexü nanataeguxëë, rü naxãcügü tá pixügu ya yima Tupana ya Poraxüchicü ya nüxü rüngüxëëcü ta i ngëma taguma moxë nüxna ägüxü rü ngëma chixecümagüxü. ³⁶ —Rü pema rü name nixi i pengechaüwaxegü, ngëma Penatü ya Tupana na ngechaüwaxexürü.

Tama name i chixexügu namaã perüxñüe i togü
(Mt 7.1-5)

³⁷ —iRü taxü i togüxü pixuxü! Rü ngëxguma ya Tupana rü täxütáma pexü nixu na pechixexü. iRü taxü i poxcu namaã pexueguxü i togü! Rü ngëxguma ya Tupana rü täxütáma poxcu pemaã naxuegu. iRü nüxü nüxü perüngümae i norü chixexü i togü! Rü ngëxguma ya Tupana rü tá pexü nüxü narüngüma i perü chixexü. ³⁸ —iRü togümaã pengau i perü ngemaxügü! Rü ngëxguma ya Tupana rü tá pexna nanaxã. Rü ñoma wüxi i choca i meãma napaxürü rü meama ípoõcuxürü tá Tupana pexna nanaxã. Erü ngëma nguruxü i namaã cumücüna cuxãxü i curü ngemaxü rü ngematama nguruxümaã tá Tupana cuxna nanaxã —ñanagürü. ³⁹ Rü Ngechuchu rü ñaã cuèxruü norü ngüexügümaã nixu, rü ñanagürü: —iNuxãcü i wüxi i ngexetüxü rü to i ngexetüxüxü namaxü nacüxëëxü? Erü ngëma taxre i ngexetüxü rü wüxi i äxmaxügu tá nügümaã nayayicu. ⁴⁰ —Rü taxuüma i ngüexü rü norü ngüxëëruüxü narüyexera. Natürü ngëxguma meã nanguxgu rü tá naxruxü nixi ya norü ngüxëëruü. ⁴¹ —iRü tüxcüü nachiga quidexa i cumücü naxcèx i ngëma íraxü i chixexü i naxüxü natürü tama cugütama cungugü naxcèx i ngëma chixexü i taxü i cuxüxü? ⁴² —Rü ngëxguma tama nüxna cucüxãchigu i ngëma chixexü i taxü i cumatama cuxüxü, rü iñuxücürüwa i nagu curüxñüxü na cunamexëëxü i ngëma cumücüarü chixexü i íraxü? Pa Duüxü i Meã Maxnetaxüx, name nixi i cuxira nüxü curüxo i ngëma chixexü i taxü i cumatama cuxüxü, rü ngëxguma tá cume na nüxü curüngüxëëxüxèx i cumücü na nüxü naxoxüxèx i ngëma chixexü i íraxü i naxüxü.

Wüxi i nanetü rü norü owa nixi i nüxü icuáxü
(Mt 7.17-20, 12.34-35)

⁴³ —Nataxuma i nanetü i mexü i chixearü oóxü. Rü nataxuma i nanetü i chixexü i meärü oóxü. ⁴⁴ —Rü wüxichigü i nanetü rü norü owa nixi i nüxü icuáxü. Rü wüxi i torawa rü taxucürüwama wüxi i orix i imüxü tayaxu. Rü wüxi i chuxchuxüwa rü taxucürüwa uba tayaxu. ⁴⁵ —Rü wüxi ya mecü ya yatü rü mexü i orexü nixu, erü naãëwa rü aixcüma mexügu narüxñü. Natürü wüxi i yatü i chixecümaxü rü chixexü i orexü nixu, erü chixexügu narüxñü. Rü ngëma naãëwa ngexmaxü i chixexü nixi i nüxü yaxuxü.

İpata ya nutaétügu üxñe rü ipata ya naxnücüétügu üxñechiga
(Mt 7.24-27)

⁴⁶ —iTüxcüü i pema rü: “Pa Torü Corix” ñaperügü choxü, natürü tama penaxü i ngëma pemaã nüxü chixuxü? ⁴⁷ —Rü ñuxma tá pemaã nüxü chixu na ñuxãcü tiixü ya yixema chowe rüxüxë rü choxü ñnuxë rü naxüxe i ngëma tümamaã nüxü chixuxü. ⁴⁸ —Rü tümã rü wüxi ga yatü ga üpatacü rü yamèxmañcü ga norü caxta ñuxmata nutawa nangucürü tixi. Rü yexguma namèxgu ga taxtü rü yabaixügu ga napata, rü woo ga na naporaüchiüxü, rü tama niwèxtaü, yerü meãma inapugüarü caxtaax ga guma í. ⁴⁹ —Natürü yixema nüxü ñnümarexe i chorü ore natürü tama naxüxe i ngëma tümamaã nüxü chixuxü, rü wüxi ga yatü ga naxnücüétügumare üpatacü rü tixi. Rü yexguma namèxgu ga taxtü, rü nibaixü ga napata, rü naporaüchiü. Rü niwèxtaü ga napata, rü yexma nayarüxo ga guma í.

7

*Ngechuchu rü Dumacũãx ga churaragüarü ãëxgacüarü duũxũxũ narümemẽẽ
(Mt 8.5-13)*

¹ Rü yexguma nüxũ nachauxgu ga duũxũgümaã na yadexaxũ ga Ngechuchu, rü Capernáũwa naxũ. ² Rü yéma nayexma ga wüxi ga churaragüarü capitáũ ga Dumacũãx. Rü guma capitáũ rü nüxũ nayexma ga wüxi ga norü duũxũ ga poraãcü nüxũ nangechaũxũ. Rü yema norü duũxũ rü niãaawe, rü naturaxüchi. ³ Rü yexguma Ngechuchuxũ naxĩnũchigagu ga guma capitáũ, rü Ngechuchuxũtawa nanamugü ga ñuxre ga Yudíugüarü ãëxgacügüerugü. Rü ñanagürü nüxũ: —¡Ngema Ngechuchuxũtawa pexĩ na nüxũ pecèxũgüxũcèx rü núma naxũ na chorü duũxũcèx yanataanexẽẽãxũcèx! —ñanagürü. ⁴ Rü Ngechuchuxũtawa naxĩ, rü poraãcü nüxũ nacèxũgü, rü ñanagürügü: —Name nixĩ i nüxũ curüngũxẽẽ ya torü capitáũ. ⁵ —Erü nüma rü guxũ i Yudíugüxũ nangechaũ. Rü nümatama nanaxütanü na naxügüãxũcèx ga torü ngutaquẽxepataũ —ñanagürügü. ⁶ Rü yexguma ga Ngechuchu rü nawe narüxũ. Natürü yexguma marü capitáũpataxũ yangaicagu, rü nüma ga capitáũ rü Ngechuchucèx yéma nanamu ga ñuxre ga namücügü na namaã nüxũ yanaxugüxũcèx ga norü ore ga ñaxũ: —Pa Corix, tama cuxũ chachixewechaũ na chopatawa cunguxũ erü choma rü taxuwama chame na chopatagu na cuxücuxũ. ⁷ —Rü ngẽmacèx nixĩ i tama chomatama cuxcèx chayaçaxũ. Rü chanaxwèxe i curü orewaxicatama nüxũ quixu na naxcèx yataanexũ tá i chorü duũxũ. ⁸ —Erü choma rü ta chorü ãëxgacümẽxèwa changẽxma, rü choxmẽxwa nangẽxmagü ta i ñuxre i churaragü. Rü ngẽxguma chanamuxgu i wüxi na ngextá naxũxũcèx, rü ngema naxũ. Rü ngẽxguma chaugüxũtawa naxcèx changemagu i to, rü chauxũtawa nangu. Rü ngẽxguma chorü duũxũxũ chamuxgu na tacü na naxũxũcèx, rü choxũ nanaxü —ñanagürü. ⁹ Rü nüma ga Ngechuchu rü yexguma nüxũ naxĩnũgu ga yema capitáũãrü ore rü nabaixãchiãẽ. Rü yema duũxũgü ga nawe rüxĩxũxũ nadawenü, rü ñanagürü: —Aixcuma pemaã nüxũ chixu rü taxuũma i Yudíugütanüwa nüxũ ichayangau i wüxi i duũxũ i ngẽma yatürüũ aixcuma yaxõxũ —ñanagürü. ¹⁰ Rü yexguma nawoegugu ga yema capitáũmücügü ga Ngechuchuxũtawa namugüxũ, rü nüxũ inayangaugü ga marü naxcèx na yataanexũ ga yema capitáũãrü duũxũ.

Ngechuchu ínanadaxẽẽ ga wüxi ga yutecü ngĩne

¹¹ Rü yemawena ga Ngechuchu rü wüxi ga íãne ga Naĩgu ãeganewa naxũ. Rü nawe narüxĩ ga norü ngüexũgü, rü muxũma ga togü ga duũxũgü. ¹² Rü yexguma guma íãneãrü ngaicamana nanguxgu, rü tüxũ nadau ga wüxi ga yueta ga tẽxgüwa tüxũ nangegüxe. Rü guxema yuetaarü mamá rü tayute rü guma yucü rü guxicatama nixĩ ga tümane ixĩcü. Rü muxũma ga duũxũgü ga guma íãnecũãx rü tüxũ ínixũmücügü. ¹³ Rü yexguma Cori ga Ngechuchu guma yucüarü mamaxũ dèuxgu, rü nüxũ ingechaũtümüũ. Rü ñanagürü ngĩxũ: —¡Tãxũ i cuxaxuxũ! —ñanagürü. ¹⁴ Rü yexguma ga Ngechuchu rü yuetacèx nixũ, rü nüxũ ningõgü ga tümachiũ. Rü yema tüxũ ingetaũgüxũ rü tümamaã inayachiãchitanü. Rü ñanagürü ga Ngechuchu tüxũ ga guxema yueta: —Pa Ngextüxũcux, ¡írüda! —ñanagürü. ¹⁵ Rü yexguma ga guxema yuchiréxe rü ítarüto, rü itanaxügü ga na tidexaxũ. Rü Ngechuchu rü tümãena tüxũ namu. ¹⁶ Rü yexguma yemaxũ nadaugügu ga duũxũgü, rü guxũma namuũẽ. Rü inanaxügüe ga Tupanaxũ na yacuèxüũgüxũ. Rü ñanagürügü: —Wüxi i Tupanaãrü orearü uruũ i poraxũ tatanüwa nangox. Rü ñanagürügü ta: —Tupana nuã naxũ na norü duũxũgüxũ yanangũxèxũcèx —ñanagürügü. ¹⁷ Rü

guxŭma ga Yudéaanewa rŭ norŭ ngaicamana, rŭ duŭxŭgŭ nŭxŭ nacuáchigagŭ ga yema Ngechuchu ũxŭ.

Cuáŭ ga baiŭxēeruŭ rŭ Ngechuchuxŭtawa nanamugŭ ga taxre ga norŭ duŭxŭgŭ

(Mt 11.2-19)

¹⁸ Rŭ Cuáŭ ga baiŭxēeruŭ rŭ nŭxŭ nacuáchiga ga guxŭma ga yema Ngechuchu ũxŭ, yerŭ norŭ ngúexŭgŭ ga Cuáŭ rŭ namaã nŭxŭ nix-ugŭ. Rŭ yemacèx ga Cuáŭ rŭ taxre ga norŭ ngúexŭgŭcèx naca. ¹⁹ Rŭ Ngechuchuxŭtawa nanamugŭ. Rŭ Cuáŭ rŭ ñanagŭrŭ nŭxŭ: —¡Ngema pexŭ rŭ Ngechuchuna peca rŭ ñapegŭgŭ nŭxŭ: “¿Cuma yŭxŭ i Cristu i cuxŭ ítananguxēexŭ, rŭ éxna to tá yixŭ i Cristu?” ñapegŭgŭ nŭxŭ! ²⁰ Rŭ yema yatŭgŭ ga Cuáŭ Ngechuchuxŭtawa mugŭxŭ, rŭ Ngechuchucèx naxŭ. Rŭ ñanagŭrŭgŭ nŭxŭ: —Cuáŭ ya baiŭxēeruŭ nŭma cuxŭtawa toxŭ namugŭ na cuxna tay-acagŭxŭcèx rŭ ¿aixcŭma cuma quiŭxŭ i Cristu ya nŭma ngxuchaŭcŭ, rŭ éxna to tá yixŭ i Cristu? —ñanagŭrŭgŭ. ²¹ Rŭ yexgumatama Ngechuchuxŭtawa nangugŭgu ga Cuáŭrŭ ngúexŭgŭ, rŭ Ngechuchu nanameēxēē ga muxŭma ga duŭxŭgŭ ga nagŭxŭraŭxŭ ga daawemaã idaaweexŭ rŭ yema ingoxoãxŭ. Rŭ nayadauchigŭxēē ga muxŭma ga ingexetŭxŭ. ²² Rŭ yemacèx Ngechuchu nanangãxŭ rŭ ñanagŭrŭ: —¡Pewoegu rŭ Cuáŭmaã nŭxŭ peyarŭxu i ngēma pematama nŭxŭ pedauxŭ rŭ nŭxŭ pexŭnŭēxŭ! ¡Rŭ namaã nŭxŭ pixu i ñuxãcŭ i ngēma ingexetŭxŭ rŭ marŭ nidauchigŭ, rŭ ngēma ichixeparaxŭ rŭ marŭ inachigŭ, rŭ ngēma chaxŭneãxgŭxŭ rŭ marŭ naxcèx nitaanegŭ, rŭ ngēma ngauchixēgŭxŭ rŭ marŭ ningoxnamachixēgŭ, rŭ ngēma yuexŭ rŭ wenaxãrŭ namaxē, rŭ ngēma ingearŭ ngēmaxŭãxŭmaã rŭ marŭ nŭxŭ tixu i Tupanaãrŭ ore i mexŭ! ²³ —Rŭ tataãē ya yŭxema texé ya tama choxŭ rŭxoxe —ñanagŭrŭ ga Ngechuchu. ²⁴ Rŭ yexguma nawoeguxgu ga yema duŭxŭgŭ ga Cuáŭ yema mugŭxŭ, rŭ Ngechuchu inanaxŭgŭ ga guma Cuáŭchiga na yadexaxŭ. Rŭ duŭxŭgŭmaã nŭxŭ nixu, rŭ ñanagŭrŭ: —¿Tacŭ nixŭ ga pema ípeyadaugŭxŭ ga dauxchitawa ga taxŭema íxãpataxŭwa? ¿Éxna wŭxi ga yatŭ ga turaxŭ ga ñoma dexne ga buanecŭ yaxŭãxtanŭcŭxŭēēcŭrŭrŭ íxŭxŭ nixŭ ga ípeyadaugŭxŭ? ²⁵ —Rŭ éxna tama guma ípeyadaugŭgu, ¿rŭ tacŭ nixŭ ga ípeyadaugŭxŭ? ¿Éxna wŭxi ga yatŭ ga poraãcŭ nŭgŭ ngèxãēcŭ ípeyadaugŭ? Pema nŭxŭ pecuèx i ngēma poraãcŭ nŭgŭ ngèxãēgŭxŭ rŭ ãēxgacŭgŭ ya tacŭgŭpatawa nangēxmagŭ, rŭ taxucèxma dauxchitawa nangēxmagŭ. ²⁶ —¿Tacŭ éxna nixŭ ga ípeyadaugŭxŭ? ¿Éxna wŭxi ga Tupanaãrŭ orearŭ uruŭ? Ngēmáãcŭ aixcŭma yema nixŭ ga ípeyadaugŭxŭ. Rŭ pemaã nŭxŭ chixu rŭ Cuáŭ ya baiŭxēeruŭ rŭ tama wŭxi i ngèxŭrŭxŭ i Tupanaãrŭ orearŭ uruŭ nixŭ. ²⁷ —Rŭ Cuáŭchiga nixŭ ga naxŭmatŭxŭ ga yema Tupanaãrŭ ore ga ñaxŭ:

“Cupèxegu chayamu i chorŭ orearŭ ngeruŭ na cuxcèx namexēēãxŭcèx i duŭxŭgŭarŭ maxŭ”,

ñaxŭ. ²⁸ —Rŭ pemaã nŭxŭ chixu rŭ guxŭ i duŭxŭgŭtanŭwa rŭ nataxuma i Tupanaãrŭ orearŭ uruŭ i Cuáŭ ya baiŭxēeruŭrŭ yexera. Natŭrŭ yŭxema Tupana ãēxgacŭ íxŭxŭwa wixwexŭchi ũxe, rŭ Cuáŭrŭ yexera tixŭ —ñanagŭrŭ. ²⁹ Rŭ guxŭma ga duŭxŭgŭ rŭ woo yema yatŭgŭ ga Dumaãrŭ ãēxgacŭcèx dŭeru ngŭxŭ ideetanŭxŭ, rŭ nŭxŭ naxŭnŭē ga yema Ngechucharŭ ore rŭ ñuxŭchi Tupanaxŭ nicuèxŭgŭ yerŭ nŭxŭ nicuèxãchitanŭ na aixcŭma mecŭ yŭxŭ ga Tupana. Rŭ yema nixŭ ga duŭxŭgŭ ga ũpaacŭ Cuáŭ íbaiŭxēexŭ. ³⁰ Natŭrŭ yema Parichéugŭ rŭ yema ngúexŭēruŭgŭ ga Moŭchearŭ mugŭwa ngxŭētaegŭxŭ rŭ tama nanaxwèxegŭ ga Cuáŭ na ínabaiŭxēexŭ. Rŭ yemaãcŭ nŭxŭ naxoe ga yema mexŭ ga Tupana naxcèx ũxchaŭxŭ. ³¹ Rŭ nŭma

ga Cori ga Ngechuchu rü ñanagürü: —¿Tacügu tá chanangu i ñomaücüü maxëxü i duüxügü? ¿Rü nanatacüräügü? ³² —Rü ñaã duüxügü rü taxuxümaãma nataãëgü ngëxgumarüü i ngema buxügü i ñãxtüwa rütogüxü, rü íxñüçëxwëxëgüxü, rü tagaãcü namüçügüxü ñagüxü:

“Marü wowerumaã pexcëx tapaxetagu natürü tama ípixüächitanüxü. Rü marü ngechaüxü i wiyaegu pexcëx tawiyaegü natürü tama pexauxe”, ñagüxü. Rü ngëma buxügürüü taxuxümaãma nataãëgü i ñomaücüü i duüxügü. ³³ —Yerü ga Cuáü ga baiüxëëruü rü núma naxü, rü tama pãü nangõx rü tama binu nayaxaxü. Rü yexguma ga pema rü: “Nangoxoãx” ñaperügü nüxü. ³⁴ —Rü ñuxüchi núma chaxü i choma ya Tupana Nane na duüxüxü chíxü, rü õna changõx rü binu chayaxaxü. Rü ngëxguma i pema rü ñaperügügü choxü:

“Choma rü chataanüxüchi rü changãxwëxe, rü pecaduã x-güxü i duüxügümaã chaxãmücü, rü yatügü i Dumaãrü ãëxgacüçëx dïëru ngïxü ideetanüxümaã chaxãmücü”, ñaperügügü choxü. ³⁵ —Natürü Tupanaãrü cuëx rü meãma nangox tümawa ya yíxema aixcüma nawe rüxíxë —ñanagürü ga Ngechuchu.

Ngechuchu rü Chimáü ga Parichéupatawa nayexma

³⁶ Rü wüxi ga Parichéu rü Ngechuchuna naxu na napatawa nachibüxüçëx. Rü yéma naxü ga Ngechuchu rü yema Parichéuarü mechawa nayarüto. ³⁷ Rü wüxi ga ngecü ga chixri maüxcü ga guma íanecüãx, rü yexguma nüxü nacuáchigagu na Parichéupatawa tá na nachibüxü ga Ngechuchu, rü yéma ixü. Rü yéma inange ga wüxi ga pumara ga yixixü ga wüxi ga butiya ga nutanaxcëxmaã äxchiüxü. ³⁸ Rü naxauxãcüma Ngechuchucutüxütawa iyarütoxõchi. Rü ngïxgüxüxëtümaã iyawaicutüxëë. Rü ngïyaemaã ínapicutü, rü inachuxcutü. Rü ñuxüchi yema pumaramaã inachacutü. ³⁹ Rü yexguma yemaxü nadëuxgu ga yema Parichéu ga Ngechuchuna uxü, rü naãëwa nagu narüxñü rü nügümaãtama ñanagürü: —Ngëxguma chi ñaã Ngechuchu rü aixcüma wüxi i Tupanaãrü orearü uruü yixígu, rü nüxü chi nacuëx na tacü yíxü i ñaã ngexü i nüxü ingõgüxü rü ñuxãcü na namaxüxü rü poraãcü na napecaduãxü —ñanagürü ga naãëwa. ⁴⁰ Rü yexguma ga Ngechuchu rü nüxü nacuëxama rü Parichéuxü ñanagürü: —Pa Chimáüx, choxü nangëxma i wüxi i ore i cumaã nüxü chixuxchaüxü —ñanagürü. Rü nüma ga Parichéu rü Ngechuchuxü nangãxü, rü ñanagürü: —¿Ëcü, chomaã nüxü ixu, Pa Ngúexëëruüx! —ñanagürü. ⁴¹ Rü ñanagürü ga Ngechuchu: —Taxre ga yatügü rü wüxi ga corixütawa nanangetanü. Rü wüxi nanangetanü ga 500 tachinü ga dïëru rü to nanangetanü ga 50 tachinü. ⁴² —Natürü yema taxre rü taxuacü nanaxütanü ga norü ngetanü. Rü yemacëx düxwa yema norü cori rü nüxü nüxü narüngüma ga yema nüxü na nangetanügüãxü. Rü ñuxmax, Pa Chimáüx, rü ¡chomaã nüxü ixu! rü ¿ngëxürüüxü ga yema taxre ga yatügü rü yexeraãcü norü corixü nangechaü? —ñanagürü. ⁴³ Rü Ngechuchuxü nangãxü ga Chimáü, rü ñanagürü: —Chauxcëx ga yema yexeraãcü nüxü nangetanüxü nixí ga yexeraãcü norü corixü ngechaüxü —ñanagürü. Rü Ngechuchu rü ñanagürü nüxü: —Ngëmaãcü aixcüma nüma nixí —ñanagürü. ⁴⁴ Rü yexguma ga Ngechuchu rü ngïxü nadawenü ga yema ngecü, rü ñanagürü Chimáüxü: —¿Ngïxü cudauxü i ñaã ngecü? Rü cupatagu chaxücu i chomax, Pa Chimáüx, natürü tama dexá choxnata cuxã chorü yauxcutüruü. Natürü ñaã ngecü rü ngïxgüxüxëtümaã choxü iyawaicutüxëë, rü ngïyaemaã choxü ípicutü. ⁴⁵ —Cuma rü tama choxü cuchuxu i noxri choxü curümoxëgu, natürü ngïma i ñaã ngecü rü noxri núma changuxgumama rü choxü iyachuxcutüchigü. ⁴⁶ —Cuma rü tama pumaramaã choxü cuchaeruxüra, natürü ngïma i ñaã ngecü rü chaucutügu ínaba i pumara. ⁴⁷ —Rü ngëmacëx woo namu i ngïrü pecadugü

natürü Tupana ngĩxũ nüxũ nangechaũ i guxũma, erü ngĩma rü aixcũma choxũ ingechaũ. Natürü yixema tama aixcũma ngechaũcèx íyaçaxe, rü tama poraãcü Tupanaxũ tangechaũ –ñanagürü. ⁴⁸ Rü yexguma ga Ngechuchu rü yema ngecũxũ ñanagürü: –Curü pecadugü rü marü cuxũ nüxũ changechaũ –ñanagürü. ⁴⁹ Rü yema togü ga nüxna naxugũxũ ga yema Ngechuchumaã mechawa yexmagũxũ, rü inanaxügü ga nügümücügümaãchigü na yadex-agũxũ. Rü ñanagürügü: –¿Tacü nixĩ i ñaã yatü, ecèx ngẽmaãcü duũxũgüaxũ pecaduxũ nangechaũxũ? –ñanagürügü. ⁵⁰ Natürü Ngechuchu rü ñanagürü ngĩxũ ga yema ngecũ: –Marü cuxũ nangẽxma i maxũ i taguma gũxũ, erü choxũ cuyaxõ. ¡Ñuxma rü taãẽcũma cuchiũwa naxũ! –ñanagürü.

8

Ngexũgü ga Ngechuchuxũ rüngũxẽẽgũxũ

¹ Rü yemawena ga Ngechuchu rü Gariréaneãrü ñãnegügu nixũãgüchigü. Rü duũxũgümaã nüxũ nixuchigü ga Tupanaãrü ore na ñuxãcü ãẽxgacü yĩxũ ya Tupana. Rü ínayaxümücügü ga yema 12 ga ngúexũgü ga marü nadexũ. ² Rü yexgumarũ ta íiyaxümücügü ga ñuxre ga ngecügü ga ũpaacü ngoxogü ngĩwa ínawoxũcü rü ngĩrũ daaweewa ngĩxũ nameẽxẽecü. Rü yematanüwa iyexma ga María ga Magadácũãxmaã ngĩxũ naxugücü ga ũpaacü Ngechuchu 7 ga ngoxo ngĩwa ínawoxũcü. ³ Rü yema iyexma ta ga Cuána ga Cuchu naxmèx. Rü Cuchu nixĩ ga wüxi ga ãẽxgacü ga Erodeaxũ puracũxũ. Rü yema nayexmagü ta ga Chuchana rü mucũma ga náigü ga ngecügü ga ngĩrũ dīerumaã Ngechuchuxũ rüngũxẽẽgücü.

Ore ga toecügu ixuxũ (Mt 13.1-9; Mr 4.1-9)

⁴ Rü muxũma ga yema ñãnegücũãx ga duũxũgü, rü Ngechuchuxũtawa ínayadaugü. Rü yexguma yema nangutaquẽxegügu ga muxũma ga duũxũgü, rü Ngechuchu namaã nüxũ nixu ga wüxi ga ore ga cuèxruũ, rü ñanagürü nüxũ: ⁵ –Wüxi ga yatü ga toecü rü trigumaã nanagüane. Rü yexguma trigumaã nagüaneãgu rü ñuxre ga trigu, rü namagu nayi. Rü duũxũgü nawa nangagũxũ, rü werigü rü nanawecu. ⁶ –Rü náigü ga trigu rü nutatanügu nayi. Rü yexguma naxügügu ga guma trigu, rü nipagü rü nayuemare, yerü nataxuma ga norü waianexũ. ⁷ –Rü náigü ga trigu rü tuxunecügu nayi. Natürü yexguma nayaegu ga tuxugü rü guma triguxũ inawocu rü nanadai. ⁸ –Natürü náigü ga trigu rü mexũ ga waixũmügu nayi. Rü yemacèx ga yexguma nayaegu rü muxũma ga trigu nawa ínanguxuchi. Rü wüxipũxũ ga triguwa ínanguxuchi ga 100 pũxũ ga trigu –ñanagürü. Rü yemawena rü Ngechuchu tagaãcü ñanagürü nüxũ ga duũxũgü: –Rü yixema ãchixẽgũxe, rü ¡naga taxĩnüẽ i ngẽma ore! –ñanagürü.

Tacüchiga nixĩ ga yema ore ga cuèxruũgügu ixuxũ (Mt 13.10-17; Mr 4.10-12)

⁹ Rü yexguma ga norü ngúexũgü rü nüxna nacagüe na tacüchiga yĩxũ ga yema ore ga yatü ga toecügu ixuxũ. ¹⁰ Rü Ngechuchu ñanagürü nüxũ: –Tupana rü pexũ nüxũ nacuèxẽẽ i ngẽma èxũguxũ i taxuũma i togü nüxũ cuáxũ i ñuxãcü ãẽxgacü na yĩxũ i nümax. Natürü togücèx rü cuèxruũgu chayaxũãcũma namaã nüxũ chixu i ore. Rü ngexguma woo nüxũ nadaugügu rü ñoma tama nüxũ nadaugũxũrũ nixĩgü, rü woo nüxũ naxĩnüẽgu rü ñoma tama nüxũ naxĩnüẽxũrũ nixĩgü –ñanagürü.

Ngechuchu rü meã nanangoxẽẽ ga yema ore ga toecüchigagu yaxuxũ (Mt 13.18-23; Mr 4.13-20)

¹¹ Rū Ngechuchu rü ñanagürü: —Ngēma ore i toecüchigagu pemaã chixuxü rü ñaãchiga nixĩ. Rū ngēma trigupüxü rü Tupanaärü orechiga nixĩ. ¹² — Rū guma trigu ga namagu yixünerüü nixĩ i duüxügü i ngēma orexü ñnüëxü. Natürü Chataná rü ngēma duüxügüxü nüxü inayarüngümaëxë i ngēma ore, na tama yaxögüãxücèx rü tama nayauxgüãxücèx i maxü i taguma gúxü. ¹³ — Rū guma trigu ga nutatanügu yixüne, rü ngēma nixĩ i duüxügü i nüxü ñnüëxü i Tupanaärü ore rü taãëäcüma yaxögüxü. Natürü tama aixcüma nanayauxgü i ngēma ore, erü paxaãchi nayaxögü, rü yixcüra guxchaxü nüxü üpetügu, rü nüxü narüxoe i ngēma ore. ¹⁴ —Rü guma trigu ga tuxunecügu yixüne, rü ngēma nixĩ i duüxügü i Tupanaärü orexü ñnüëxü rü yaxögüxü natürü ñoma i naãneärü ngēmaxücèx oegaãëgüxü, rü norü ngēmaxüguama rüxñnüëxü rü tama nüxü rüxoechaüxü i norü ngúchaügü. Rū ngēmagagu düxwa tama Tupanacèx namaxë. ¹⁵ —Natürü guma trigu ga mexü ga waixüümügu yixüne, rü ngēma nixĩ i duüxügü i aixcüma taãëäcüma nayauxgüxü i Tupanaärü ore, rü naga ñnüëxü, rü meã naxcèx maxëxü. Rū ngēma nixĩ i duüxügü i aixcüma Tupanawe rüxixü rü naxügüxü i ngēma nüma nanaxwëxexü.

Cuèxruxü ga omügu ixuxü

(Mr 4.21-25)

¹⁶ —Taxúema wüxi i omüwa tanangixichi na tanatüxpechitaxücèx rü éxna tümaärü pechicatüügu tayaxücuchixücèx. Natürü ngóxügu tanaxú na tüxü nabaxixücèx ya yíxema ngexma chocuxe. ¹⁷ —Rü ngëxgumarüü ta i guxüma i tacü i cúäcüma ixüxü rü yixcüra rü duüxügü tá nüxü nacüëxgüama. Rū guxüma i ngēma ñüxma duüxügüçèx ëxügüxü rü tá nangoxoma. ¹⁸ —¡Meã iperüxñnüë i ñüxmax! Erü texé ya naga ñnüëxë i ngēma ore i mexü, rü Tupana tá yexeraäcü tüxü nüxü nacüëxëë. Natürü yíxema tama naga ñnüëxë, rü yexeraäcü tá tüxna nanayaxu i ngēma íraxü i tümaärü cuèx i noxri tüxü ngëxmachiréxü —ñanagürü.

Ngechuchuarü mamá rü naëneëgüchiga

(Mt 12.46-50; Mr 3.31-35)

¹⁹ Rū naë ga Ngechuchu rü naëneëgü, rü yema Ngechuchu íyexmaxüwa tangugü. Natürü taxuacü naxütawaxüchi tangugü, yerü namuxüchi ga duüxügü. ²⁰ Rū wüxi ga duüxü Ngechuchumaã nüxü nixu, rü ñanagürü: —Yéa düxétüwa tangëxma ya cue rü cueneëgü, rü cuxü tadaugüchaü —ñanagürü. ²¹ Natürü nüma ga Ngechuchu rü ñanagürü nüxü ga duüxügü: —Rü yíxema nüxü ñnüëxë i Tupanaärü ore rü naga maxexe rü yíxema tixĩ ya chaue rü chaueneëgü ixügüxë —ñanagürü.

Ngechuchu rü buanecüxü rü yuapexü ínayachaxãchixëë

(Mt 8.23-27; Mr 4.35-41)

²² Rū wüxi ga ngunexügu ga Ngechuchu rü norü ngúexügümaã wüxi ga nguëgu nichoü. Rū ñanagürü nüxü: —¡Ngíxã daa naxtaxaarü tocutüwa taxĩ! —ñanagürü. Rū inaxĩãchi. ²³ Rū yexguma yaxãüyane rü nipechigü ga Ngechuchu. Rū ngürüãchi yexma nüxü naxü ga wüxi ga tacü ga buanecü. Rū guma nguëwa rü niyauxcuchichigü ga dexá. Rū düxwa inayangutaügüchaü. ²⁴ Rū yemacèx nüma ga norü ngúexügü rü Ngechuchuxü nacagü ga na ínadaxücèx. Rū ñanagürügü nüxü: —Pa Ngúexëëruüx, ngēmama itabaxügü —ñanagürügü. Rū yexguma ga Ngechuchu rü ínarüda, rü buanecüxü rü yuapexü nanga. Rū ínayachaxãchi ga buanecü, rü inayarüxo ga yuape, rü ínachaxanemare. ²⁵ Rū yexguma ga Ngechuchu rü ñanagürü nüxü ga norü ngúexügü: —¿Tacü pexü naxüpetü ecèx tama meã peyaxögüxü? —ñanagürü. Natürü ga nümagü rü nabaixãchiãëgü. Rū nügümücügüna nicachigü, rü

ñanagürügü: —¿Tacü ěxna nixĩ i ñaã yatü rü ngẽmacèx èixrücü ya buanecü rü yuape rü naga naxĩnüëxũ? —ñanagürügü.

Yatü ga Gadáracũãx ga ngoxogü nawa yexmagüxũ
(Mt 8.28-34; Mr 5.1-20)

²⁶ Rũ düxwa naxtaxaarü tocutüwa nangugü ga Gadáaarü naãnewa. Rũ yema naane rü Gariréaaneãrũ toxmẽxtawa nayexma. ²⁷ Rũ yexguma marü nguewa ínaxüegu, ga Ngechuchu, rü naxcèx nixũ ga wüxi ga yatü ga guma ãnecũãx ga mucü ga taunecü ngoxogü nawa yexmagücü. Rũ guxüguma nangexchiruecha. Rũ tama ãwa nayexma, yerü duũxẽchiquẽxetanügu nayarüxauxchigünexũ. ²⁸ Rũ yexguma Ngechuchuxũ nadèuxgu, rü napẽxegu nayacaxãpüxü. Rũ aita naxüãcüma ñanagürü: —¿Tüxcüũ nuã choxũ cuyachixewe, Pa Ngechuchux, Pa Tupana ya Tacüxüchi Nanex? Rũ cuxũ chacèèxũ na tama ngúxũ choxũ quingexẽèxũ —ñanagürü. ²⁹ Rũ yema ñanagürü yerü Ngechuchu marü nanamu ga yema ngoxogü na ínachoxũxüçèx. Rũ muẽxpüxcüna rü guma yatüxũ naxãũãèxẽèxũ ga yema ngoxogü. Rũ duũxügü rü cadenamaã nayanèixchacüügüxũ rü nayanèixparagüxũ na taxuwama naxüxüçèx. Natürü nüma rü nagu nacaugüama ga cadenagü. Rũ yema ngoxogü rü dauxchitawa ga taxúema íxãpataxüwa nanagagü. ³⁰ Rũ Ngechuchu nüxna naca rü ñanagürü: —¿Tacü nixĩ i cuéga? —ñanagürü. Rũ nüma rü Ngechuchuxũ nangãxũ, rü ñanagürü: —Muxũchixũ nixĩ i chauéga —ñanagürü. Rũ yema ñanagürü yerü namuxüchi ga yema ngoxogü ga guma yatügu chocuxũ. ³¹ Rũ yema ngoxogü rü Ngechuchuna nacagü ga tama ngẽma poxcuchica i ãxmaxũ i taguma iyacuáxügu na nawocuãxüçèx. ³² Rũ guma mèxpüneãrũ tuãchiwa nayexmagü ga muxüma ga cuchigü ga yéma chibüexũ. Rũ yemacèx ga yema ngoxogü rü Ngechuchuxũ nacèèxügü na yema cuchigügu nayachocuxüçèx. Rũ Ngechuchu rü: —Ngũ —ñanagürü. ³³ Rũ yexguma ga yema ngoxogü rü guma yatüwa ínachoxũ rü yema cuchigügu nayachocu. Rũ guxüma ga yema cuchigü rü inaxũãchi, rü naxtaacutüarü mèxpüxüwa nayarüyuxgü, rü yexma nayi. ³⁴ Rũ yexguma yema cuchigüarü dauruügü nüxũ daugügu ga yema ngupetüxũ, rü nabaixãchiãègü rü ínibuxmü. Rũ ãnewa nüxũ nayarüxugüe, rü yema ãneãrũ ngaicamana ipeagüxũ ga duũxügütanüwa rü ta nüxũ nayarüxugügü. ³⁵ Rũ ga duũxügü rü ínayadaugü ga yema ngupetüxũ. Rũ yexguma Ngechuchuxütawa nangugügu, rü yéma nüxũ nadaugü ga guma yatü ga ngoxoãxchirécü. Rũ Ngechuchucutüxütawa narüto, rü marü tama naxãũãè. Rũ namuẽ ga duũxügü. ³⁶ Rũ yema duũxügü ga nüxũ daugüxũ ga yema ngupetüxũ, rü yema íyadaugüxümaã nüxũ nixugügü ga ñuxãcü Ngechuchu na namexẽèxũ ga guma yatü ga ngoxoãxchirécü. ³⁷ Rũ yexguma yemaxũ naxĩnüëgu, rü guxüma ga yema Gadáaanecũãx ga duũxügü, rü Ngechuchuxũ nacèèxügü na ínaxüxüçèx ga yema naãnewa, yerü porãcü namuẽ. Rũ yemacèx ga Ngechuchu rü ngegu nixüe, rü inaxũãchi. ³⁸ Rũ guma yatü ga ngoxoãxchirécü rü Ngechuchuxũ nacèèxũ ga nawe na naxüxüçèx. Natürü ga Ngechuchu rü nanamu ga yexma na naxãũxüçèx, rü ñanagürü nüxũ: ³⁹ —¿Cuchiüwa naxü, rü duũxügümaã nüxũ yarüxu ga tacü cuxcèx na naxüxũ ga Tupana! —ñanagürü. Rũ ínixũ ga guma yatü, rü guxüma ga yema ãnecũãx ga duũxügümaã nüxũ nayarüxu ga tacü naxcèx na naxüxũ ga Ngechuchu.

Yáiruxacüchiga rü yema nge ga Ngechuchuchirugu ingögücüchiga
(Mt 9.18-26; Mr 5.21-43)

⁴⁰ Rũ yexguma Ngechuchu wenaxârũ taegugu ga naxtaxaarũ tocutũwa, rũ duũxũgũ rũ taããcũma nanayauxgũ, yerũ guxũma ínananguxẽẽgũ. ⁴¹ Rũ yéma Ngechuchuxũtawã nangu ga wũxi ga yatũ ga Yáiru ga naega. Rũ nũma ga Yáiru rũ wũxi ga ngutaquẽxepataũârũ ãẽxgacũ nixĩ. Rũ Ngechuchupẽxegu nayacaxãpũxũ rũ nũxũ nacẽexũ ga napatawa na naxũxũcẽx. ⁴² Yerũ nũxũ iyexma ga wũxi ga naxãcũ ga ngĩgũmaã wũxicacũ, rũ iyadaawe, rũ ituraxũchi. Rũ ngĩma rũ maneca 12 ga tauncũ ngĩxũ nayexma. Rũ yexguma Yáirupatawa naxũxgu ga Ngechuchu, rũ muxũchixũ ga duũxũgũ nawe narũxĩ, rũ dũxwa ínayaxũxtũgũ. ⁴³ Rũ yema duũxũgũtanũwa iyexma ga wũxi ga ngecũ ga 12 ga tauncũ ãgũechacũ. Rũ yemamaã iyadaawechea. Rũ duturugũxũtagu ngĩxũ iguxẽẽ ga guxcũ ga ngĩrũ dĩẽru, natũrũ taxũema ga texẽ ngĩxcẽx tayataanexẽẽega. ⁴⁴ Rũ yema ngecũ ga Ngechuchuweama ne ixũ, rũ naxpechinũchirugu iyangõgũ. Rũ yexgumatama ínayachaxãchi ga na naxãgũxũ. ⁴⁵ Rũ yexguma ga Ngechuchu rũ duũxũgũna naca, rũ ñanagũrũ: —¿Texẽ tixĩ ya choxũ ingõgũxe? —ñanagũrũ. Rũ guxũma ga duũxũgũ rũ: —Taxũema —ñanagũrũgũ. Rũ yexguma ga Pedru rũ namũcũgũ rũ ñanagũrũgũ: —Pa Ngũexẽẽruũx, cuma nũxũ cudau i ñuxre i duũxũgũ ngema cuxũ na nayaxũxtũgũxũ, rũ ngẽxguma rũ ta:

“¿Texẽ ya choxũ ingõgũxe?” ñacuxũ —ñanagũrũgũ. ⁴⁶ Natũrũ ga Ngechuchu rũ ñanagũrũ: —Ngẽmaãcũ wũxie choxũ tingõgũ, erũ nũxũ chucuẽxãchi na chorũ poramaã tũxũ na charũmexẽẽxũ —ñanagũrũ. ⁴⁷ Rũ yexguma nangoxomagu ga na nũxũ nacuxẽamaxũ ga Ngechuchu ga yema nũxũ na yangõgũxũ, rũ yaduruxãcũma naxũtawã ixũ ga yema ngecũ. Rũ napẽxegu iyacaxãpũxũ. Rũ guxũ ga duũxũgũpẽxewa namaã nũxũ iyaxu ga ñacũcẽx nũxũ na yangõgũxũ, rũ ñuxãcũ yexgumatama ngĩxcẽx na yataanexũ. ⁴⁸ Rũ yexguma ga Ngechuchu rũ ñanagũrũ ngĩxũ: —Pa Chauzacũx, cuxcẽx nitaane, erũ cuyaxõ. ¡Rũ ñuxma rũ taããcũma íixũ! —ñanagũrũ. ⁴⁹ Rũ yexguma iyadexayane ga Ngechuchu, rũ yéma nangu ga wũxi ga duũxũ ga ngutaquẽxepataũârũ ãẽxgacũ ga Yáirupatawa ne ũxũ. Rũ ñanagũrũ Yáiruxũ: —Cuxacũ rũ marũ iyu. ¡Rũ tãxũ i cuyachixewechigũxũ ya Ngũexẽẽruũ! —ñanagũrũ. ⁵⁰ Natũrũ yexguma yema orexũ naxĩnũgu ga Ngechuchu, rũ ñanagũrũ Yáiruxũ: —¡Tãxũ i cuyanguãẽxũ! Erũ ngẽxguma cuyaxõxgu rũ cuxacũ rũ tá wena imaxũ —ñanagũrũ. ⁵¹ Rũ yexguma Yáirupatawa nangugũgu, rũ Ngechuchu nayachocuxẽẽ ga Pedru rũ Chaũtiágu rũ Cuáũ rũ ngĩnatũ rũ ngĩẽ ga yema bucũ ga yuxcũ. Natũrũ tama nanaxwẽxe na togũ yexma chocuxũ. ⁵² Rũ guxũma ga duũxũgũ ga yéma yexmagũxũ rũ naxauxe rũ ngĩxcẽx nangechaũgũ. Natũrũ Ngechuchu rũ ñanagũrũ nũxũ: —¡Tãxũ i pexauxexũ! Erũ ngẽma bucũ rũ tama nixĩ i nayuxũ. Rũ ipemare —ñanagũrũ. ⁵³ Natũrũ ga yema duũxũgũ rũ Ngechuchuxũ nacugũeama, yerũ ngĩxũ nadaugũ rũ aixcũma marũ iyu. ⁵⁴ Rũ yexguma ga Ngechuchu rũ ngĩxmẽxgu nayayauxãchi, rũ tagaãcũ ñanagũrũ: —Pa Bucũx, ¡írũda! —ñanagũrũ. ⁵⁵ Rũ yexguma ga ngĩma rũ wena imaxũ, rũ yexgumatama írũda. Rũ Ngechuchu rũ duũxũgũmaã nũxũ nixu na ngĩxũ naxũwemũgũxũcẽx. ⁵⁶ Rũ ngĩnatũ rũ ngĩẽ ga yema bucũ, rũ poraãcũ tabaixãchiãẽgũ. Natũrũ Ngechuchu rũ tũxũ namu na taxũemaãma nũxũ na tixuxũcẽx ga yema ngupetũxũ.

9

Ngechuchu norũ ngũexũgũxũ namu na nũxũ yanaxugũexũcẽx ga Tupanaarũ ore
(Mt 10.5-15; Mr 6.7-13)

¹ Rū Ngechuchu rü nanangutaquëxexëë ga yema 12 ga norü ngúexügü. Rū pora nüxna naxã rü nüxna naxãga na ínawoxüãxücèx ga nagúxüraüxü ga ngoxogü, rü na nameëxëëãxücèx ga duüxügü ga idaaweexü. ² Rū nayamugü na duüxügümaã nüxü yaxugüexücèx ga ore ga mexü na ñuxãcü ãëxgacü yïixü ya Tupana, rü na nameëxëëãxücèx ga duüxügü ga idaaweexü. ³ Rū ñanagürü nüxü: —¡Rü taxuxütáma ípinge i perü namawaü, rü bai ya perü caxüchigüxü ya naïxmenèxã, rü bai i perü choca, rü bai i perü pãü, rü bai i perü díëru. Rū wüxitama i perü daxü ípinge, rü tama i taxre! ⁴—Rü ngëxguma wüxi ya ñãnewa pengugügu, ¡rü wüxi ya ípatagutama perücho rü ñuxmata ipexiãchi nawa ya yima ñãne! ⁵—Rü ngextá tama pexü ínayauxgüxüwa, ¡rü ípechoxü nawa ya yima ñãne! Rū ngëxguma ngema ipexiãchigu ¡rü ipepagücutü i perü üxaxücutü na ngëmawa nüxü nacuëxgüxücèx na chixexü naxügüxü i ngëma duüxügü! —ñanagürü. ⁶ Rū inaxiãchi, rü guxüma ga ñãnexãcüguwa naxi. Rū nüxü nixugüetanü ga Tupanaärü ore ga mexü. Rū guxüwama nanameëxëëtanü ga duüxügü ga idaaweexü.

*Eróde rü tama nüxü nacuëxéga na texe yixü ga Ngechuchu
(Mt 14.1-12; Mr 6.14-29)*

⁷ Rū Gariréaaneärü ãëxgacü ga Erode, rü nüxü nacuáchiga ga guxüma ga yema Ngechuchu üxü. Rū poraãcü nagu narüxñü rü naxoegaãë ga Erode, yerü nümaxü ga duüxügü rü ñanagürügü: —Cuáü ya baiüxëëruü nixi ya yima, rü marü wena namaxü —ñanagürügü. ⁸ Natürü togü rü ñanagürügü: —Nuxcümaücü ga Tupanaärü orearü uruü ga Eria nixi, rü wena nangox —ñanagürügü. Rü togü rü ñanagürügü: —Bexmana náí ga nuxcümaücü ga Tupanaärü orearü uruü nixi, rü wena namaxü —ñanagürügü. ⁹ Natürü Erode rü ñanagürü: —Chomatama chanamu ga churaragü na Cuáüxü yadae-naxãgüxücèx. ¿Rü tacü éxna nixi i ngëma yatü i duüxügü ngëmaãcü poraãcü nüxü ixuchigagüechaxü? —ñanagürü. Rü Erode rü nüxü nangúchxüxüchi na ñuxãcü Ngechuchuxü na nadauxü.

*Ngechuchu rü nanachibüexëë ga 5000 ga yatügü
(Mt 14.13-21; Mr 6.30-44; Cu 6.1-14)*

¹⁰ Rū yexguma nawoeguxgu ga yema Ngechuchuarü ngúexügü ga yamugüxü, rü Ngechuchumaã nüxü nixugüe ga yema naxügüxü. Rü nüma ga Ngechuchu rü yema norü ngúexügümaã nixügachi, rü Bechaídaarü ñãnewa namaã naxü. ¹¹ Natürü yexguma duüxügü nüxü cuëxgügu ga ngextá na nayexmaxü, rü Ngechuchuwe narüxi. Rü Ngechuchu rü meãma yema duüxügüxü nayaxu, rü namaã nüxü nixu na ñuxãcü ãëxgacü yïixü ya Tupana. Rü nanameëxëë ga yema duüxügü ga idaaweexü. ¹² Rū yexguma marü nayáuanegu, rü Ngechuchucèx naxi ga yema 12 ga ngúexügü ga yamugüxü. Rū ñanagürügü nüxü: —¡Yamugü i ñãã duüxügü na ñãnexãcügu rü ípatagü ya ngaicamana ngëxmagünewa na naxixücèx, rü ngëxma na napegüxücèx rü norü ñnatèëx yataxegüxücèx! Erü nuã íngëxmagüxüwa rü nataxuma i tacü rü ñna —ñanagürügü. ¹³ Natürü Ngechuchu rü ñanagürü nüxü: —¡Pematama penaxüwemü! —ñanagürü. Rū nanangãxügü, rü ñanagürügü: —Wüximëëxpüx i pãü rü taxre i choxnixicatama toxü nangëxma. ¿Rü éxna cunaxwëxe na naxcèx tayataxegüxü i ñna naxcèx i guxüma i ñãã duüxügü? —ñanagürügü. ¹⁴ Rū 5000 ga yatügü nixi ga yema yema yexmagüxü. Natürü Ngechuchu rü ñanagürü nüxü ga norü ngúexügü: —¡Écü ípenatogüxëëx rü 50 chigü i wüxi tücumüwachigü! —ñanagürü. ¹⁵ Rū yemaãcü nanaxügü ga norü ngúexügü. Rū ínanatogüxëë ga guxüma ga duüxügü. ¹⁶ Rū yexguma ga Ngechuchu rü nanade ga yema wüximëëxpüx ga pãü rü yema taxre ga choxni. Rū

daxũgu nadawenüãcũma Tupanana moxẽ naxã, rü ñuxũchi inanabũcu ga yema pãu rü choxni. Rü norü ngúexũgũna nanaxã na nüxũ yanuãxũcèx ga yema duũxũgũ. ¹⁷ Rü guxũma ga yema duũxũgũ rü meãma nachibũe. Rü yemawena rü 12 ga pexchigũ nanapagũamatama namaã ga yema pãu rü choxnichipẽxegũ ga iyaxũgũxũ.

Pedru nanangoxẽẽ na Cristu na yĩxũ ga Ngechuchu
(Mt 16.13-19; Mr 8.27-29)

¹⁸ Rü wũxi ga ngunexũ rü Ngechuchu norü ngúexũgũmaã noxrũwama yayumũxẽgu, rü nũma rü norü ngúexũgũna naca, rü ñanagũrũ: —¿Ñuxũ ñaxũ i duũxũgũ i chauchiga i choma na texé chiĩxũ? —ñanagũrũ. ¹⁹ Rü norü ngúexũgũ nanangãxũgũ rü ñanagũrũgũ: —Nangẽxma i duũxũgũ rü:

“Cuáũ ya baiũxẽẽruũ quixĩ”, ñagũxũ, rü togũ rü:

“Ería quixĩ”, ñagũxũ, rü togũ rü:

“Wũxi ga nuxcũmaũcũ ga Tupanaãrũ orearũ uruũ i wena maxũcũ quixĩ”, ñagũxũ —ñanagũrũgũ. ²⁰ Rü yexguma Ngechuchu nüxna naca rü ñanagũrũ: —¿Rü pema i ñuxũ ñapegũxũ choxũ na texé chiĩxũ? —ñanagũrũ. Rü Pedru nanangãxũ rü ñanagũrũ: —Cuma nixĩ i Cristu i Tupana Nane —ñanagũrũ.

Ngechuchu nanaxunagũ ga norü yuxchiga
(Mt 16.20-28; Mr 8.30-9.1)

²¹ Rü Ngechuchu rü nayaxucuxẽgũ ga norü ngúexũgũ na taxúemaãma nüxũ yaxugũexũcèx ga nũma rü Cristu na yĩxũ. ²² Rü ñanagũrũ nüxũ ga norü ngúexũgũ: —Choma i Tupana Nane na duũxũxũ chiĩxũ, rü poraãcũ ngúxũ tá chinge. Rü choxũ tá naxooxgũ i Yudíugũarũ ãẽxgacũgũerugũ, rü paigũarũ ãẽxgacũgũ, rü ngẽma ngúexẽẽruũgũ i Moĩchearũ mugũwa nguxẽẽtaegũxũ. Rü tá choxũ nimèxgũ, natũrũ tomaẽxpũx i ngunexũgu rü wena táxarũ chamaxũ —ñanagũrũ. ²³ Rü yixcama rü guxũma ga norü ngúexũgũxũ ñanagũrũ: —Rü ngẽxguma texé chowe ruxũxchaũgu, jẽcũ nüxũ tarũxo i tũmaãrũ ngúchaũ, rü namaã tapora i ngẽma guxchaxũgũ i tũmacèx ínguxũ i ñoma curuchawa tipotaxũrũ tũxũ ixĩxẽẽxũ, rü ngẽmaetũwa chowe tarũxũãma! ²⁴ —Erũ yĩxema tũgũ maxẽchaxẽẽchaũxẽ rü tá tayu, natũrũ yĩxema chauxcèx yuxe rü aixcũma tá tũxũ nangẽxma i maxũ i taguma gúxũ. ²⁵ ¿Rü tacũwa i nüxũ namexũ ya wũxi ya yatũ ega nayauxãgu i guxũma i ñoma i naãneãrũ ngẽmaxũgũ, natũrũ iyanatauxẽẽãgu i norü maxũ? ²⁶ —Rü ngẽxguma texé chauxcèx ãnegu rü naxcèx taxãnegu i chorũ ore, rü choma i Tupana Nane i duũxũxũ na chiĩxũ rü tá ta tũmacèx chaxãne i ngẽxguma ãẽxgacũ chixĩãcũma núma chaxũxgu. Rü ngẽxguma wenaxãrũ núma chaxũxgu rü Chaunatũ ya Tupanarũ tá chapora, rü daxũcũãx i Tupanaãrũ orearũ ngerũgũ i üünegũxũrũ tá chamexẽchi. ²⁷ —Rü aixcũma pemaã nüxũ chixu rü ñuxre i duũxũgũ i nuã ngẽxmagũxũ rü tá nüxũ nadaugũ na ñuxãcũ ãẽxgacũ na yĩxũ ya Tupana naxũpa na nayuxẽũ —ñanagũrũ.

Ngechuchu rü toraxũ nangox
(Mt 17.1-8; Mr 9.2-8)

²⁸ Rü 8 ga ngunexũguwena ga na yema ñaxũ, rü Ngechuchu rü wũxi ga mèxpũnawa naxũ na yema yayumũxẽxũcèx. Rü ínayaxũmũcũgũ ga Pedru rü Chaũtiãgu rü Cuáũ. ²⁹ Rü yexguma ínayumũxẽyane ga Ngechuchu rü nachiwẽ rü ngũrũãchi niyauracũũ, rü naxchiru rü ta niyauracũũ, rü poraãcũxũchima nacómũ. ³⁰ Rü yexguma rü yema nangox ga taxre ga yatũgũ ga Ngechuchumaã idexagũxũ. Rü Moĩché nixĩ ga wũxi, rü Ería nixĩ ga to. ³¹ Rü yema taxre íyexmagũxũwa rü poraãcũxũchi nangóone. Rü ínindexagũ nachiga ga ñuxãcũ Yerucharẽũgu tá na nayuxũ ga Ngechuchu. ³² Rü woo ga Pedru rü

namüçügü rü poraãcü na nayaxtaexü rü tama napee. Rü nüxü nadaugü ga ñuxãcü poraãcü na nangóonexü ga naxütawa ga Ngechuchu rü yema taxre ga yatügü ga namaã yexmagüxüxütawa. ³³ Rü yexguma yema taxre ga yatügü Ngechuchuna ixīgachitanügu, rü Pedru rü ñanagürü Ngechuchuxü: —Pa Ngúexêeruüx, namexêchi nixi na nuã ingëxmagüxü. ¡Rü ngixã tanaxü ya tomaëxpüx ya düxenü, rü wüxi ya cuxcèx, rü nái ya Moïchécèx, rü nái ya Eríacèx! —ñanagürü. Natürü ga Pedru rü tama nüxü nacuèx ga na ñuxü ñaxü yerü poraãcü nabaixãchiãê. ³⁴ Rü yexguma íyadexayane ga Pedru, rü wüxi ga caixanexü natanügu nayangèixema. Rü poraãcü namuë ga yema ngúexügü ga yexguma yema caixanexü natanügu yangèixemagu. ³⁵ Rü yema caixanexüwa inanaxü ga wüxi ga naga ga ñaxü: —Daa nixi ya Chaune ya nüxü changechaüxüchicü. ¡Rü naga pexinüê! —ñaxü. ³⁶ Rü yexguma yema ñaxguwena ga yema naga rü Ngechuchuarü ngúexügü rü taxúexüma ga toguexü nadaugü, rü Ngechuchuxüxícatama nadaugü. Rü yema ngúexügü rü taxúemaãma nüxü nixugüe ga yema nüxü nadaugüxü.

*Ngechuchu rü nanamexêê ga wüxi ga bucü ga ngoxo nawa yexmacü
(Mt 17.14-21; Mr 9.14-29)*

³⁷ Rü yexguma moxüãcü ga guma mèxpúnewa yanachoügu, rü muxüma ga duüxügü yexma Ngechuchuxü nayangaugü. ³⁸⁻³⁹ Rü yema duüxügütanüwa rü wüxi ga yatü tagaãcü Ngechuchuxü ñanagürü: —Pa Ngúexêeruüx, ¡choxü rüngüxêê, rü tüxü nadau ya chaune! Erü tügümaã choxü tawüxicèx, rü wüxi i ngoxo tümawa nangëxma. Rü ngëxguma tüxü naxüxgu, rü aita tüxü naxüxêê, rü tüxü naxãüãêxêê, rü tüxü narüchièxêê. Rü chixexü tümamaã naxü, rü tama tüxü ningéxchaü. ⁴⁰ Rü marü nüxü chacèxü i curü ngúexügü na tümawa ínatèxüchigüãxüçèx i ngëma ngoxo, natürü tama nüxü inaxinü —ñanagürü. ⁴¹ Rü yexguma Ngechuchu nanangãxü, rü ñanagürü: —Pa Duüxügü i Tama Yaxögüxüx, ¡Ñuxguratáta i pemaã chanuxmaxü rü yaxna pemaã cha xí-nüxü? ¡Nuã naga ya cune! —ñanagürü. ⁴² Natürü yexguma Ngechuchuxütawa nanguxgu ga guma bucü, rü yema ngoxo rü guma bucüxü ñaxtüanegu nayangüxêê, rü nanaxãüãêxêê. Natürü Ngechuchu nananga ga yema ngoxo, rü nanamexêê ga guma bucü. Rü ñuxüchi nanatüxütawa nanamu. ⁴³ Rü guxüma ga duüxügü rü nabaixãchiãêgü ga yexguma nüxü nadaugügu ga ñuxãcü na naporaxü ya Tupana.

*Ngechuchu rü wenaxãrü nanaxunagü ga norü yuxchiga
(Mt 17.22-23; Mr 9.30-32)*

Rü yexguma duüxügü namaã baixãchieyane ga yema Ngechuchu üxü, rü ñanagürü ga Ngechuchu nüxü ga norü ngúexügü: ⁴⁴ —¡Meã iperüxínüê i ñaã ore i pemaã nüxü chixuxü! ¡Rü tãütáma nüxü ipeyarüngümaê! Choma i Tupana Nane na duüxüxü chiixü, rü chauechita tá choxü ínaxuaxügü i duüxügü na ãëxgacügü choxü iyauxgüxüçèx —ñanagürü. ⁴⁵ Natürü ga norü ngúexügü rü tama nüxü nacuèxgüega ga yema namaã nüxü yaxuxü. Yerü Tupana rü tama naxcèx nanangoxêê ga yema ore na nüxü nacuèxgüxüçèx. Rü yema ngúexügü rü namuë ga Ngechuchuna na nacagüxü na meã namaã nangoxêêãxüçèx ga yema namaã nüxü yaxuxü.

*¿Texé tá tixi ya guxãrü yexera ixixê?
(Mt 18.1-5; Mr 9.33-37)*

⁴⁶ Rü yexguma ga norü ngúexügü rü inanaxügüe ga nügümaã na yaporaganücüxü nachiga ga texé tá tiixü ya natanüwa guxãrü yexera ixixê. ⁴⁷ Natürü Ngechuchu rü nüxü nacuèxama ga yema norü ngúexügü nagu rüxínüêxü. Rü yemacèx wüxi ga buxü nügüxütawa naga, rü nügüxütagu

nayachixëë. ⁴⁸ Rû ñanagürü nüxü ga norü ngúexügü: —Texé ya ñaã buxüxü meã yaxúxe chauégagu, rü choxü nixí i tayaxuxü. Rû yíxema meã choxü yaxúxe, rü Chaunatü ya núma choxü mucüxü rü ta meã tayaxu. Rû yíxema guxãärü yexera tügü íruxírxaxé, rü yíxema tixí ya guxãärü yexera ixíxé — ñanagürü.

*Texé ya tama taxchi aixe rü tórü ngüxëëruü tixí
(Mr 9.38-40)*

⁴⁹ Rû yexguma ga Cuáü rü ñanagürü nüxü: —Pa Ngúexëëruüx, nüxü tadau ga wüxi ga yatü ga cuégagu ngoxogü íwoxüxü. Rû toma nüxna tanachuxu ga yema yerü tama tatanüxü nixí ga nümax —ñanagürü. ⁵⁰ Natürü Ngechuchu rü ñanagürü nüxü: —Tama name i nüxna na penachuxuxü. Erü texé ya tama taxchi aixe, rü tórü ngüxëëruü tixí —ñanagürü.

Ngechuchu nayangagü ga Chaütiágu rü Cuáü

⁵¹ Rû yexguma marü yangaicagu ga Ngechuchu ga daxüguxü ga naãnewa na naxüxü, rü tama namuüácüma inaxüãchi ga Yerucharéüwa na naxüxü. ⁵² Rû nügüpëxegu nayamugü ga ñuxre ga norü orearü ngeruügü. Rû nümagü rü nawa naxí ga wüxi ga ñänexãcü ga Chamáriaanewa yexmane, na yexma naxcèx yadaugüxcèx ga wüxi ga í na Ngechuchu nagu pexünexü. ⁵³ Natürü yema Chamáriaanecüãx rü tama nanayauxgüchaü, yerü nüxü nacüexgü ga Yerucharéüwa tá na naxüxü. ⁵⁴ Rû yexguma yemaxü nadaugügu ga norü ngúexügü ga Chaütiágu rü Cuáü, rü ñanagürügü Ngechuchuxü: —Pa Corix, ¿cunaxwèxexü na Tupanana naxcèx tacaxü na daxüwa ne namuãxüxcèx ya üxü na nagüxëëãxüxcèx i guxüma i ñaã duüxügü, yema nuxcümaücü ga Tupanaärü orearü uruü ga Ería üxürüü? —ñanagürügü. ⁵⁵ Rû yexguma ga Ngechuchu rü nüxü nadawenü, rü nayangagü, rü ñanagürü nüxü: —Pema rü tama nagu perüxñüë na texéarü duüxügü pixígüxü. ⁵⁶ —Erü choma i Tupana Nane na duüxüxü chiixü, rü tama duüxügüarü tauxexëëwa núma chaxü, natürü núma chaxü na duüxügüxü chamaxëëxüxcèx —ñanagürü. Rû yexguma rü náí ga ñänexãcüwa naxí.

*Duüxügü ga Ngechuchuwe rüxíxchaüxüchiga
(Mt 8.19-22)*

⁵⁷ Rû yexguma namagu naxíxgu rü wüxi ga yatü Ngechuchuxü ñanagürü: —Pa Corix, cuwe charüxüxchaü i ngextá cuma ícuxüxüwa —ñanagürü. ⁵⁸ Rû Ngechuchu nanangãxü rü ñanagürü: —Ngowagü rü nüxü nangëxma i naxmaxügü, rü werigü rü nüxü nangëxma i naxchiãügü, natürü choma i Tupana Nane na duüxüxü chiixü, rü nataxuma i chauchica i ngextá nagu chicuxeruxü —ñanagürü. ⁵⁹ Rû Ngechuchu ñanagürü nüxü ga wüxi ga to ga yatü: —¡Chowe rüxü! —ñanagürü. Natürü nüma ga yema yatü rü ñanagürü nüxü: —Pa Corix, noxri chanawèxe i chaunatüxü ichayatëxira —ñanagürü. ⁶⁰ Rû Ngechuchu nanangãxü rü ñanagürü: —Nüë ngëma cutanüxü i tama yaxögüxü iyatëxgü i ngëma naxrüü yuexü, natürü cuma rü curü puracü nixí na paxa duüxügümaã nüxü cuyarüxuxü i Tupanaärü ore na ñuxãcü guxãärü äëxgacü na yíixü i nümax —ñanagürü. ⁶¹ Rû wüxi ga to ga duüxü rü ñanagürü Ngechuchuxü: —Pa Corix, ngëmáãcü cuwe charüxüxchaü, natürü noxri chanaxwèxe i nüxü chayarümoxë i ngëma chopatacüãxgü —ñanagürü. ⁶² Natürü Ngechuchu rü ñanagürü nüxü: —Texé ya yíxema inaxügüxe na Tupanaärü puracüwa tapuracüxü natürü tümaärü ngëmaxüguama rüxñüxé, rü tama tame na Tupanaãxü tapuracüxü —ñanagürü.

10

Ngechuchu nayamugü ga 72 ga norü ngúexüğü

¹ Rü yemawena ga Cori ga Ngechuchu rü nayadexeche ga 72 ga to ga norü ngúexüğü. Rü taxrechigü inayamugü na yoxni guxü ga yema ñānegü rü nachicagü ga Ngechuchu nawa üxchaüxüwa na naxixüçèx. ² Rü ñānagürü nüxü: –Aixcümāxüchi nangēxma i muxüchixü i duüxüğü i yaxögüchaüxü natürü ngema Tupanaarü orearü uwa puracüexü rü noxretama nixi. Rü ngēmacèx name i perü yumüxēwa nüxna peca ya yima puracüarü yora na ngema norü puracüwa namugüāxüçèx i to i puracütanüxü. ³ –jRü ipexiāchi rü ngema pexi! Rü dücax, ñoma carnerugü i aigütanüwa imugüxürü nixi i pexü chimugüxü. ⁴ –jRü tāütāma choca ípinge, rü bai i perü dīēru, rü bai i perü chapatu! Rü tama chanaxwèxe i namagu penuxcü i ngēxguma namawa texéxü perümoxēgügu. ⁵ –Rü ngēxguma wüxi ya İwa pengugügu, rü ñāācü tá nüxü perümoxēgü i ngēma duüxüğü:

“jPetaāxē erü Tupana rü napetanügu!”, ñaperügügu tá. ⁶ –Rü ngēxguma ngema nangēxmagu i duüxüğü i Tupanaxü cuèxgüchaüxü rü Tupana rü tá nüxna nanaxā i taāxē. Natürü ngēxguma ngema nataxuxgu i duüxüğü i Tupanaxü cuèxgüchaüxü, rü ngema Tupanaarü taāxē rü pexrütāma nixi. ⁷ –jRü wüxi ya İgutama perücho, rü ngema pechibüe rü peyaxü i ngēma nüxü ngēxmagü i ngēma İcūāxgü! Erü wüxi i puracütanüxü rü name nixi na nayauxāxü i norü natanü naxcèx i norü puracü. Rü yima ñānewa pengēxmagüyane rü tama chanaxwèxe i nái ya İgu peyapegü. ⁸ –Rü ngēxguma wüxi ya ñāne ya nawa meā pexü nayaxunewa pengugügu, jrü penangō i ngēma òna i pexna naxāgüxü! ⁹ –jRü penameēxēx i ngēma İdaaweexü i yima ñānewa ngēxmagüxü! jRü namaā nüxü pixu rü ñapegügu nüxü:

“Tupanaarü pora rü marü pexna nangaicama rü napexüttagu”, ñapegügu nüxü! ¹⁰ –Natürü ega nawa pengugügu ya wüxi ya ñāne i ngextá duüxüğü tama meā pexü İyaxgüxüwa, jrü ngēma İtamügu İpechoxü rü ñapegügu nüxü i ngēma ñānecüāx!:

¹¹ “Rü woo ñāā perü ñānearü üxaxü i tocutüwa yaxüxü, rü itanapagü, na ngēmawa nüxü pecuāxüçèx na Tupana rü tama pemaā nataāēxü. jNatürü tama nüxü ipeyarüngümaē na marü pexna nangaicamaxüchichiréxü ya Tupana na perü āēxgacü yīxü”, ñaperügügu tá nüxü i ngēma ñānecüāx! ¹² –Rü pemaā nüxü chixu rü ngēma ngunexü i nagu nagüxü i naāne, rü Chodomacüāx i duüxügüarü yexera Tupana tá nanapoxcue i ngēma duüxüğü i tama meā pexü yaxgüxü.

İānegü ga tama Tupanaga İnüēne

(Mt 11.20-24)

¹³ –Rü wüxi i ngechaü nixi i pexcèx, Pa Corachİcūāx rü Bechaİdacüāx i Duüxügüx, yerü yexguma chi Tiruarü ñānewa rü Chidāüärü ñānewa chanaxüxgu ga yema mexüğü ga cuèxruüğü ga Tupanaarü poramaā petanüwa chaxüxü, rü woo ga na poraācü yachixexü ga yema Tirucüāx rü Chidāücüāx ga duüxüğü rü nuxcümama chitama nüxü narüxoe ga nacüma ga chixexü, rü poraācüxüchi chima nügümaā nangechaüğü rü naxauxe, yerü chi nügü nicuèxāchitanü ga na yapedaduāxgüxü. ¹⁴ –Natürü pemaā nüxü chixu rü ngēma ngunexü i Tupana nagu napoxcuexü i pecaduāxgüxü, rü ngēma ngunexügu rü Tirucüāx rü Chidāücüāxärü yexera tá pexü napoxcue i pemax. ¹⁵ –Rü pemax, Pa Capernāücüāxgü i Duüxügüx ¿éxna pema nagu perüxīnüēgu rü daxügüxü i naānewa tá pexixü? Pemaā nüxü chixu rü naānetüüwa i ngextá Tupana Chatanaxü İpoxcuxüwa tá nixi i pewogüxü. ¹⁶ Rü

ñuxũchi norũ ngúexũgũxũ ñanagürũ: –Rũ yíxema pega ñnüëxẽ, rũ chauga rũ ta taxĩnüë. Natürũ yíxema tama pega ñnüëxẽ, rũ chauga rũ ta tama taxĩnüë. Rũ yíxema tama chauga ñnüëxẽ, rũ tama naga taxĩnüë ya Chaunatũ ya núma choxũ mucũ –ñanagürũ ga Ngechuchu.

Nawoegu ga yema 72 ga Ngechucharũ ngúexũgũ

¹⁷ Rũ taãëcũma nawoegu ga yema 72 ga norũ ngúexũgũ ga yamugũxũ. Rũ ñanagürũgũ nüxũ: –Pa Corix, ngëxguma cuégagu tidexagũgu, rũ èixrũxũ i ngoxogũ rũ toga naxĩnüë –ñanagürũgũ. ¹⁸ Rũ Ngechuchu rũ ñanagürũ nüxũ: –Ngẽmãacũ aixcũma nixĩ. Yerũ nüxũ chadau ga Chatanã ga daxũguxũ ga naãnewa na natáexũ wũxi ga ãëmacürũ. ¹⁹ –Rũ choma nixĩ ga pexna chanaxãxũ ga pora na tama chixexũ pemaã naxũgũxũcèx ega woo ãxtapegũwa rũ èxna tuxchinawegũwa pengagũgu. Rũ yexgumarũ ta pexna chanaxã ga pora na nüxũ perũ- yexeraxũcèx i guxũma i Chatanãrũ pora na ngẽmaãcũ taxucürũwama tacũ rũ chixexũ pemaã naxũxũcèx. ²⁰ –¡Natürũ tãxũ i petaãëgũxũ naxcèx i ngẽma na pega naxĩnüëxũ i ngoxogũ! Rũ narũmemaë nixĩ i petaãëgũ naxcèx na marũ naxũmatũxũ i peëga i Tupanaãrũ poperawa i daxũguxũ i naãnewa –ñanagürũ.

*Ngechuchu rũ nataãë
(Mt 11.25-27, 13.16-17)*

²¹ Rũ yexgumatama ga Tupanaãë ga Üünexũ rũ poraãcũ Ngechuchuxũ nataãëxẽë. Rũ ñanagürũ ga Ngechuchu: –Pa Chaunatũ, Pa Daxũguxũ i Naãne rũ Ñoma i Naãneãrũ Yorax, cuyũ chicuèxũ, yerũ ñaã chorũ ngúexũgũxũ nüxũ cucuèxẽë i ñaã ore ga naxchaxwa iquicũxũ ga duũxũgũ i ñoma i naãnewa nüxũ cuèxũchigũxũ. Rũ yemaãcũ cunaxũ, Pa Chaunatũx yerũ yemaãcũ nixĩ ga cunaxwèxexũ –ñanagürũ. ²² Rũ ñanagürũ ga Ngechuchu: –Chaunatũ choxna nanaxã i guxũma i tacũ i ngëxmaxũ. Rũ taxúema choxũ tacuèx na Tupana Nane chiĩxũ. Rũ Chaunatũxicatama nixĩ ya choxũ cuácũ na Nane chiĩxũ. Rũ ngëxgumarũ ta taxúema nüxũ tacuèx na texe yĩĩxũ ya Chaunatũ. Rũ choma ya Nane rũ ngẽma duũxũgũ i Chaunatũxũ nüxũ chadauxẽëchaũxũxĩcatama nixĩ i nüxũ cuèxgũxũ na texe yĩĩxũ –ñanagürũ. ²³ Rũ yexguma norũ ngúexũgũxũ nadawenũ, rũ namaãxĩca ñanagürũ: –Tataãëgũ ya yíxema tũmaxëtũmaãxũchi nüxũ daugũxe i ñaã ñuxma pema nüxũ pedaugũxũ. ²⁴ –Erũ pemaã nüxũ chixu, rũ muxũma ga nuxcũmaũgũxũ ga Tupanaãrũ orearũ uruũgũ rũ ãëxgacũgũ ga tacũgũ, rũ nüxũ nangúchaũ ga nüxũ na nadaugũchaũxũ i ñaã ñuxma pema chauxũtawa nüxũ pedaugũxũ. Natürũ tama nüxũ nadaugũ. Rũ nüxũ nangúchaũ ga nüxũ na naxĩnüëchaũxũ i ñaã ñuxma pema chauxũtawa nüxũ pexĩnüëxũ. Natürũ tama nüxũ naxĩnüë –ñanagürũ.

Ore ga mecũ ga Chamãriacũãxgu ixuxũ

²⁵ Rũ yexguma inachi ga wũxi ga ngúexẽëruũ ga Moĩchearũ mugũwa nguxẽëtaexũ, rũ Ngechuchuxũtawa naxũ na namaã yanadexaxũcèx. Rũ Ngechuchuxũ naxũxchaũ, rũ yemacèx nüxna naca rũ ñanagürũ: –Pa Ngúexẽëruũ ya Ngechuchux, ¿Tacũ nixĩ i mexũ na chanaxũxũ na choxũ nangëxmaxũcèx i maxũ i taguma gũxũ? –ñanagürũ. ²⁶ Rũ Ngechuchu nanangãxũ, rũ ñanagürũ: –¿Ñuxũ ñaxũ i ngẽma ore i Moĩchearũ mugũwa ũmatũxũ? ¿Rũ tacũxũ i cumaã yaxuxũ? –ñanagürũ. ²⁷ Rũ yema ngúexẽëruũ ga Moĩchearũ mugũwa nguxẽëtaexũ, rũ Ngechuchuxũ nangãxũ, rũ ñanagürũ: –¡Nüxũ nangechaũ ya Cori ya curũ Tupana i guxũma i curũ maxũmaã, rũ guxũ i cuãëmaã, rũ guxũ i curũ poramaã, rũ guxũ i nagu curũxĩnüxũmaã! ¡Rũ nüxũ nangechaũ i cumũcũ ngẽma na cugũtama cungechaũxũrũ! –ñanagürũ. ²⁸ Rũ yexguma ga Ngechuchu rũ ñanagürũ nüxũ: –Ngẽma ore i choxũ namaã

cungãxũxũ rü marü name. Rü ngëxguma ngëma ore quinguxëëxgu, rü tá cunayaxu i maxũ i taguma gúxũ —ñanagürü. ²⁹ Natürü ga yema ngúexëëruũ ga Moïchëarü mugüwa nguxëëtaexũ, rü nügüetüwa nachogüchaũ. Rü yemacëx Ngechuchuna naca, rü ñanagürü: —¿Rü texé tixĩ ya chomücü? —ñanagürü. ³⁰ Rü yexguma ga Ngechuchu rü nanangãxũ, rü ñanagürü nüxũ: —Wüxi ga yatü Yerucharëüwa ne naxũ, rü Yericú ga ñanewa naxũ. Rü namagu nüxũ nangaugü ga ngítèèxgüxũ. Rü guxũma ga norü yemaxüçèx nangĩxgü, rü èixrũxũ ga naxchiru rü ta naxcèx nangĩxgü. Rü nanaçuaixgü, rü nayayuãchixëëgü, rü yemaãcü yéma nanatèxgü. ³¹ —Rü yematama namawa naxüpetü ga wüxi ga Yudíugüarü pai. Natürü yexguma yema yatüxũ nadèuxgu rü nüxũ yéma naxüpetümare. ³² —Rü yéma naxüpetü ta ga wüxi ga Lebítanüxũ ga tupauca ga taxñewa puracüxũ. Rü yexguma yema yatüxũ nadèuxgu, rü nüma rü ta nüxũ naxüpetümare. ³³ —Natürü yixçüra rü wüxi ga Chamáriaanecüãx ga yatü rü yematama namawa naxüpetü. Rü yexguma guma yatüxũ nadèuxgu rü nüxũ nangechaütümü. ³⁴ —Rü guma yatüçèx nixü. Rü chixũ rü binumaã nanaxüxũ ga norü oxrigü, rü meãma nayanëixgü ga yema norü oxrigü. Rü ñuxũchi norü burugu nanamunagü, rü wüxi ga pegüchicawa nanaga. Rü yéma nüxna nadau. ³⁵ —Rü moxũãcü ga yexguma inaxũãchigu ga yema Chamáriaanecüãx, rü ngĩxũ nayaxu ga taxretachinü ga norü díeru, rü yema pegüchicaarü yorana ngĩxũ naxã. Rü ñanagürü nüxũ:

“¡Nüxna nadau i ñaã yatü! Rü ngëxguma yexeragu naxãtanügu na nuã nangëxmaxũ, rü choma tá cuxũ chanaxütanü i ngëxguma chataeguxgu”, ñanagürü. ³⁶ Rü ñanagürü ga Ngechuchu nüxũ ga yema ngúexëëruũ ga Moïchëarü mugüwa nguxëëtaexũ: —Ñuxma chanaxwèxe i chomaã nüxũ quixu i ngëxürüxũ ga yema tomaëxpüxtanüwa ga aixçüma namücü ixĩxũ ga yema yatü ga ngítèèxgüxũ imèxgüxũ —ñanagürü ga Ngechuchu. ³⁷ Rü yexguma ga yema ngúexëëruũ ga Moïchëarü mugüwa nguxëëtaexũ rü ñanagürü: —Yema Chamáriaanecüãx nixĩ ga yema yatümücü ixĩxũ, yerü nüxũ nangechaütümü —ñanagürü. Rü yexguma ga Ngechuchu rü ñanagürü nüxũ: —¡Ñuxma rü íixũ rü yema Chamáriaanecüãx üxürü naxü! —ñanagürü nüxũ.

Marta rü Maríapatawa nangu ga Ngechuchu

³⁸ Rü yexguma Ngechuchu namagu ixũxgu norü ngúexũgümaã rü wüxi ga ñanexãcüwa nangu. Rü yéma guma ñanexãcüwa rü wüxi ga nge ga Martagu ãegacü ngígüpatawa inanguxëë. ³⁹ Rü Martaaxũ iyexma ga wüxi ga ngíeyèx ga Maríagu ãegacü. Rü ngíma rü Ngechuchucutüxütawa irüto na inaxĩnũçèx ga Ngechuchuarü ore. ⁴⁰ Natürü ga Marta rü itaarü puracüãx rü yemaãcü ngürü puracüguama irüxĩnũ. Rü yemacëx Ngechuchucèx iyaxũ, rü ngígürügü nüxũ: —Pa Corix, ¿tama éxna nagu curüxĩnũ i ngëma na chataarü puracüãx rü ngëma chaueyèx rü choxnaxĩca na nataãxũ i guxũma i ngëma puracü? ¿Rü namaã nüxũ ixu na choxũ nangüxëëxüçèx! —ngígürügü. ⁴¹ Natürü Ngechuchu rü ngĩxũ nangãxũ, rü ñanagürü ngĩxũ: —Pa Martax, cuma rü poraãcü curü puracüçèx cuxoegaãë, rü muxũma i ngëmaxũgu curüxĩnũ. ⁴² —Natürü wüxixicatama nixĩ i guxũarü yexera i mexũ na nagu rüxĩnũxũ. Rü María iyixĩ i ngëmagu rüxĩnücü. Rü taxüetãma ngĩxna tayanuxũ i ngëma —ñanagürü ga Ngechuchu.

11

Ngechuchu nanangúexëë ga yumüxëchiga
(Mt 6.9-15, 7.7-11)

¹ Rū wüxicana wüxi ga nachicawa nayumüxê ga Ngechuchu. Rū yexguma nüxü nachauxgu, rü wüxi ga norü ngúexü rü ñanagürü nüxü: —Pa Corix jtoxü nangúexê na ñuxácü tayumüxêgüxü, yema Cuáü ga baiüxêëruü norü ngúexügüxü nangúexêëxürüü! —ñanagürü. ² Rū Ngechuchu ñanagürü nüxü: —Rū ngêxguma peyumüxêgügu rü ñaperügügu tá:

“Pa Tonatü ya Daxügücüx, rü aixcüma Üünecü quixî i cumax. jRü núma naxü na torü âëxgacü quiixücèx! Rū tanaxwèxe i curü ngúchaü na naxügüxü i duüxügü i ñoma i naãnewa, ngêma daxügüxü i naãnewa na curü ngúchaü ínaxügüxürüü. ³ jRü toxna naxâ i torü òna i wüxichigü i ngunexücèx ixixü! ⁴ jRü toxü nüxü nangechaü i torü pepadugü, erü toma rü ta tüxü nüxü tangechaü ya guxâma ya yíxema chixri tomaã chopetüxe! jRü tâxü i tacü rü chixexüpêxewa toxü cuwogüxü na tama nagu tayixücèx!”

ñanagürü. ⁵ Rū ñanagürü ta ga Ngechuchu: —Ngêxguma chi wüxie i pema rü tüxü nangêmaxgu i wüxi i tümamücü, rü chi ngâxücüü napatawa taxüxgu rü ñatagügu nüxü:

“Pa Chomücüx, jtoxaëxpüx i pãü choxna naxâ! ⁶ —Erü wüxi i chomücü rü yaxüwa ne naxü, rü ngexwacèx chopatawa nangu. Rū choma rü changearü ònaãx, rü taxuümaãma chanachibüxêëega”, ñatagügu. ⁷ —Rü ngêma tümamücü i napatawa ngêmaxü, rü chi tüxü nangâüxgu rü ñaxgu:

“jTâxü i choxü cuchixewexü! Chorü îãx rü marü narüwãxta, rü choma rü chauxacügü rü ngürücarewa tangêxmagü. Rū ngêmacèx taxucürüwa ícharüda na tacü cuxna na chaxãxücèx”, ñaxgu chi tüxü. ⁸ —Rü pemaã nüxü chixu, rü ngêma na tümamücü yíxücèx rü táütáma ínarüda na tacü tüxna naxãxücèx. Natürü tá ínarüda na tama tanachixeweechaxücèx, rü tá tüxna nanaxâ i guxüma i tacü i tanaxwèxexü. ⁹ —Rü ngêmacèx pemaã nüxü chixu rü, jNaxcèx ípeça rü Tupana rü tá pexna nanaxâ! jRü Tupanacèx pedèux rü tá nüxü ipeyangau! jRü îãxwa: Tu tu tu ñapegü, rü tá pexcèx niwãxna i îãx! ¹⁰ —Erü guxâma ya yíxema naxcèx íçaxe rü tanayaxu, rü guxâma ya naxcèx dauxe rü nüxü itayangau. Rū guxâma ya îãxwa: Tu tu tu ñagüxe, rü tümacèx tá niwãxna i îãx. ¹¹ —jRü ñuxácü i wüxi i pema na papágü píixü rü penena penaxãxü ya wüxi ya nuta ega pãücèx pexna nacaxgu, rü êxna wüxi i äxtape ega choxnicèx pexna nacaxgu? ¹² —jRü texé i petanüwa rü penena penaxã i tuxchinawe ega wüxi ya otacharaücèx pexna nacaxgu? ¹³ —Rü ngêma pema na pichixecümachiréxü natürü nüxü pecuèx na ñuxácü mexü i âmare pexacügüna na pexãxü, rü pemaã nüxü chixu rü Penatü ya Daxügücü rü perü yexera tá nixî na pexna mexü naxãxü. Rū guxâma ya yíxema Tupanaxütawa Naãë i Üünexücèx íçaxe, rü tá tüxna nanaxâ —ñanagürü ga Ngechuchu.

*Ngechuchuxü nixugüe na ngoxoarü poramaã napuracüxü nawogüe
(Mt 12.22-30; Mr 3.20-27)*

¹⁴ Rū Ngechuchu ínanatèxüchi ga wüxi ga ngoxo ga wüxi ga yatüxü nge-gaxêëxü. Rū yexguma ínaxüüxgu ga yema ngoxo rü guma yatü rü nidexa. Rū guxüma ga duüxügü rü nabaixãchiãëgü ga yexguma yemaxü nadaugügu. ¹⁵ Natürü ñuxre ga duüxügü rü ñanagürügü: —Naã yatü i Ngechuchu, rü Bechebü i ngoxogüarü âëxgacüarü poramaã nixî i ínanawoxüãxü i ngoxogü —ñanagürügü. ¹⁶ Natürü ga togü rü nüxü naxügüchaü, rü yemacèx naxcèx ínacagü ga nüxü na nawéaxü ga wüxi ga cuèxruü ga daxücüãx na yemawa nüxü nacuèxgüxücèx rü ngoxi aixcüma Cristu yî. ¹⁷ Natürü núma ga Ngechuchu rü nüxü nacuèxama ga tacügu na naxînüèxü, rü yemacèx ñanagürü nüxü: —Ngêxguma chi wüxi i nachiüñanecüãx i duüxügü nügü itoyegu rü nügütanüwa chítama nügü nadaixgu, rü nügü chítama nagüxêë. Rū ngêxguma

chi wüxi ya ícũãx nügümaã nuẽẽchagu rü nügü nadaixgu, rü nügü chitama naguxẽẽ. ¹⁸ —¿Rü ngëxguma chi Chataná nügümaãtama nuxgu, rü nügütama yamëxgu, rü ñuxãcü chi i ãëxgacüecha yĩxũ? Rü ngëma ñacharügü i ñuxma erü pema choxũ pixuxgu rü Bechebúarü poramaã íchanawoxũ i ngoxogü. ¹⁹ —Natürü ngëxguma chi Chatanáärü poramaã íchanawoxũgu i ngoxogü, rü perü ngüexũgü rü chita Chatanáärü poramaã ínanawoxũ i ngoxogü. Rü ngëmawa meã nüxũ tacuèx na pema rü ípetüexũ. ²⁰ —Natürü pemaã nüxũ chixu rü aixcüma Tupanaärü poramaã nixĩ i íchanawoxũxũ i ngoxogü. Rü ngëmawa pexũ nüxũ chacuèxẽẽ na núma petanüwa nanguxũ ya Tupana na ãëxgacü yĩxũcèx. ²¹ —Rü ngëxguma wüxi ya yatü ya poracü rü meãma nügü naxüxnegu rü nüxna nadèuxgu ya napata, rü taxúetáma naxcèx tangix i norü ngëmaxũ i napatawa ngëxmaxũ. ²² —Natürü ngëxguma ínanguxgu i to i yatü i nüxũ rüporamaëxũ, rü nüxũ nayexeragu, rü tá nüxna nanapuxũ ya naxne ya nügü namaã ínaporaãxũne, rü tá nüxna nanapuxũ i guxüma i norü ngëmaxũ, rü tá nayana. ²³ —Yíxema tama choxũ ngechaũxé rü chauxchi taxai. Rü yíxema tama choxũ rüngüxèexé na Tupanacèx tayagagüxũ i duüxügü rü chauxchawa tanangianexẽẽ.

ngoxo i taeguxũchiga

(Mt 12.43-45)

²⁴—Rü ngëxguma wüxi i ngoxo rü wüxi ya yatüwa ínaxũũxgu, rü dauxchitagu nanañaãne, rü naxcèx nadau na ngextá na nangüxũ. Rü ngëxguma taxuguma nangüegagu, rü nügü ínicuèx rü ñanagürü:

“Maneca naxcèx tá chataegu ya yima yatü ga noxri nawa íchaxũxũchirécü”, ñanagürü. ²⁵ —Rü ngëxguma nataegugu, rü yima yatüxũ inayangau na ñoma wüxi ya í ya mexèene rü meã nabixichinerüũ na yĩxũ. ²⁶ —Rü ínixũ rü naxcèx nayadau i to i 7 i ngoxogü i norü yexera i chixexũ. Rü guxüma i ngëma ngoxogü rü wüxigu yima yatügu nachocu, rü ngëxma naxãchiügü. Rü ngëxguma ya yima yatü rü noxriarü yexera nachixe —ñanagürü.

Taãe i aixcüma ixĩxũchiga

²⁷ Rü yemaxũ íyaxuyane, rü wüxi ga ngecü rü duüxügütanüwa tagaãcü ngĩgürügü: —Tataãe ya yíxema tügüanüwa cuxũ yaxèexé rü tügü nixüwa cuxũ maixé —ngĩgürügü. ²⁸ Natürü ga Ngechuchu rü ñanagürü: —Yexeraãcü tataãe ya yíxema nüxũ ínuxé i Tupanaärü ore rü naga ínuxé —ñanagürü.

Duüxügü ga tama yaxõgüchaũxũ rü naxcèx ínacagüama ga to ga cuèxruũ ga Tupanaärü poramaã üxũ

(Mt 12.38-42; Mr 8.12)

²⁹ Rü nimuëtanü ga duüxügü ga Ngechuchuxütawa ngutaquëxegüxũ. Rü inanaxügü ga Ngechuchu ga namaã na yadexaxũ. Rü ñanagürü: —Ñãã duüxügü i ñomaücüü maxèxũ rü nichixecüma. Rü naxcèx ínacagü i wüxi i cuèxruũ i mexũ i Tupanaärü poramaã üxũ. Natürü Tupana rü wüxixicatama i cuèxruũ tá nüxũ nawèx. Rü ngëma nixĩ i cuèxruũ ga Tupanaärü orearü uruũ ga Yonáwa duüxügüxũ nawéxũ na nüxũ nacuèxgüxũcèx na aixcüma Tupana yĩxũ ga guma yéma namucü. ³⁰ —Rü yexgumarüũ ga Yoná rü wüxi ga cuèxruũ nixĩ naxcèx ga Nínibecũãx ga duüxügü, rü ngëxgumarüũ tá ta nixĩ ya Tupana Nane ya duüxüxũ ixícü na wüxi i cuèxruũ tá yĩxũ naxcèx i ñomaücüü maxèxũ i duüxügü. ³¹ —Rü ngëxguma naãneärü guxgu rü Tupana rü ñomaücüü maxèxũ i duüxügüna nacèxgu i norü pecaduchigacèx, rü ngĩma ga nuxcümaücü ga Chabaaneärü ãëxgacü tá írüda rü tá ínaxuaxũ i ñomaücüü maxèxũ i duüxügü. Yerü ngĩma rü yaxüwaxüchi ne ixũ ga na ãëxgacü ga Charumóüxũ naxĩnuxüçèx ga ñuxãcü poraãcü nüxũ na nacuèxüchixũ. Natürü

ñuxma nuã petanüwa nangëxma i wüxi i Charumóũârü yexera ixĩcü. ³² — Rü ngëxguma naãneârü guxgu rü Tupana rü ñomaũcüü maxëxü i duũxügüna nacëxgu norü pecaduchigacëx, rü nuxcümaũgüxü ga Nínibecũãx ga duũxügü rü tá ínarüdagü rü tá ínanaxuaxügu i ñomaũcüü maxëxü i duũxügü. Yerü nümagü ga Nínibecũãxgü ga duũxügü rü nüxü narüxoe ga nacümagü ga chixexü ga yexguma Yoná namaã nüxü ixuxgu ga Tupanaârü ore. Natürü ñuxma nuã petanüwa nangëxma i wüxi i Yonáârü yexera ixĩxü.

Taxüneârü omüchiga
(Mt 5.15, 6.22-23)

³³ —Taxüema wüxi i omüwa tanangixichi rü ñuxüchi itayacux rü éxna tacütüügu tayaxücuchi. Natürü norü üchicaũgu tanaxünagü na ngema tüxü nabaxixüçëx ya yíxema duũxëgü ya yima ígu chocuxe. ³⁴ —Cuxetügü rü ñoma wüxi i omürüü nixĩ i cuxunecëx. Rü ngëxguma ngëma Tupana cuxü naxwëxëçëx cudëuxgu, rü guxüma i curü maxü rü name. Natürü ngëxguma ñoma i naãneârü ngúchaüçëx cudëuxgu, rü guxüma i curü maxü rü chixexüwa nangëxma. ³⁵ —¡Meã cugüna nadau na tama eãnexüxü nanguxuchixüçëx i ngëma ore i mexü i cuxü ngëxmaxü, i ñoma wüxi i omürüü ixĩxü! ³⁶ —Ngëxguma chi guxü i curü maxüwa nangëxmagu i Tupanaârü ngóonexü rü taxuwama nachixëxgu i curü maxü, rü meã chi nüxü cucuëx i Tupanaârü ngúchaü ñoma wüxi i omü i cuxü baxixürüü —ñanagürü.

Ngechuchu rü duũxügütanüwa ínanaxuaxü ga Parichéugü rü ngúexëëruügu ga Moíchéarü mugüwa nguxëëtaegüxü
(Mt 23.1-36; Mr 12.38-40; Lc 20.45-47)

³⁷ Rü yexguma nüxü nachauxgu ga na yadexaxü ga Ngechuchu rü wüxi ga Parichéu nüxna naxu ga napatawa na yachibüxüçëx. Rü yema Parichéupatawa naxü, rü mechawa nayarüto. ³⁸ Rü yema Parichéu rü nabaixãchiãë ga yexguma Ngechuchuxü nadëuxgu na tama yanguxëëãxü ga yema Moíchéarü mu na nayauxmëxgüxiraxü ga yexguma nachibüegu. ³⁹ Natürü nüma ga Cori ga Ngechuchu rü ñanagürü nüxü: —Pema i Parichéugü rü ñoma pochiyu rü poratu i düxëtüwaxicatama iyaxuxürüü pixígü. Natürü i peãxëwa rü nagu perüxĩnüë na pengíxü rü chixexü pexüxü. ⁴⁰ —Pa Naëchitamare Maxëxüx, ¿tama éxna nüxü pecuëx na guma Tupana ga naxücü i ngëma tórü düxëtüxünewa ngëxmaxü, rü gumatama yíxü ga naxücü ga tórü maxü i tórü aixepewa ngëxmaxü? ⁴¹ —Rü name nixĩ i Tupanana penaxã i perü maxü na aixcüma naxcëx pemaxëxüçëx. Rü ngëmaãcü tá pime i guxüwama. ⁴² —Natürü wüxi i ngechaü nixĩ i pexcëx, Pa Parichéugüx, erü pema rü perü ngëmaxüwa rü meã Tupanana penaxã i ngëma noxrü ixĩxü, natürü perü maxüwa rü tama aixcüma naga pexĩnüë rü tama nüxü pengechaü. Rü marü name na perü ngëmaxüwa Tupanana penaxãxü i ngëma noxrü ixĩxü. Natürü perü maxüwa rü ta penaxwëxe i meã naga na pexĩnüëxü rü nüxü na pengechaüxü. ⁴³ —Rü wüxi i ngechaü nixĩ i pexcëx, Pa Parichéugüx, erü pema rü pexü nangúchaü i äëxgacüchicagüwa na perütogüxü i ngutaquëxepataüguwa. Rü penaxwëxe na ñoma äëxgacüxü rümoxëxürüü na meã pexü namoxëgüxü i duũxügü i ítamüguwa. ⁴⁴ —Rü wüxi i ngechaü nixĩ i pexcëx, erü ñoma yuetamaügu i tama nüxü idaaxü i duũxügü naëchitamare naëtüwa chopetüxürüü pixígü. Erü woo perü düxëtüwa pime, natürü aixepewa i peãxëwa rü poraãcü pichixe —ñanagürü ga Ngechuchu. ⁴⁵ Rü wüxi ga ngúexëëruü ga Moíchéarü mugüwa nguxëëtaexü, rü Ngechuchuxü nangãxü rü ñanagürü: —Pa Ngúexëëruü Pa Ngechuchux, rü ngëma na ngëma ñacuxü, rü toma rü toãëwa nangux —ñanagürü. ⁴⁶ Natürü Ngechuchu

rü ñanagürü nüxü: —Wüxi i ngechaü nixi i pexcèx, Pa Ngúexêëruüğü i Moïchéarü Mugüwa Nguxêëtaegüxüx, erü poraäcü penamu i duüxüğü na naga naxĩnüëxüçèx i ngëma Moïchéarü mugü i guxchaxü i pematama bai i írarüwa naga pexĩnüëchaüxü. ⁴⁷—Rü wüxi i ngechaü nixi i pexcèx, erü peyamexêëğü i tümamaüğü ga guxema nuxcümaüğüxe ga Tupanaârü orearü uruüğü ga perü oxigü tüxü dèixe. ⁴⁸—Rü ngëmawa nüxü tacuèx na pema rü ta ipexägüxü nawa ga yema chixexü ga perü oxigü ügüxü. Yerü nümagü rü tüxü nadai ga guxema Tupanaârü orearü uruüğü, rü ñuxma i pema rü peyamexêëğü i tümamaüğü. ⁴⁹—Rü yemacèx nixi ga Tupana ga ñaxü:

“Ngëma duüxüğütanüwa tá chanamugü i chorü orearü uruüğü rü chorü orearü ngeruüğü. Natürü ngëma duüxüğü i chixexüğü rü tá nanadai i nümaxü rü togüxü rü tá nachixewegü rü tá nawe ningëxütanü”, ñaxü ga Tupana. ⁵⁰⁻⁵¹ Rü ñanagürü ga Ngechuchu: —Rü pemaã nüxü chixu rü Tupana tá nayapeguächixêë i pema i ñuxma maxêë erü pema rü ta perü oxigüçümüga pexi. Nümagü rü noxritama nañeârü ügügumama rü nanadai ga muxüma ga Tupanaârü orearü uruüğü. Rü nüxira nayamëxgü ga Abé rü gumawena nayadaietanü ga muxüma ga togü ñuxmata Zacaría ga tupauca ga taxünegu yamëxgüäcüwa nangu. Rü guxüma ga yema orearü uruüğü ga perü oxigü dèixüçèx rü Tupana tá pexna naca, erü pema rü ta perü oxigürüütama pixigü rü tama nüxü perüxoëchaü i ngëma chixexü i pexüxü. ⁵²—Rü wüxi i ngechaü nixi i pexcèx, Pa Ngúexêëruüğü i Moïchéarü Mugüwa Nguxêëtaegüxüx, erü duüxüğüchaxwa ipeyacux i Tupanaârü ore i aixcüma ixixü i pematama tama pixögüxü. Rü nüxna penachüxu i togü i duüxüğü i aixcüma yaxögüchaüxü na nümagü rü ta tama yaxögüäxüçèx —ñanagürü ga Ngechuchu. ⁵³⁻⁵⁴ Rü yexguma Ngechuchu yema ñaxgu, rü yema ngúexêëruüğü ga Moïchéarü mugüwa nguxêëtaegüxü rü yema Parichéugü rü poraäcü Ngechuchumaã nanuë. Rü inanaxüğü ga nüxna na nacagüexü naxcèx ga muxüma ga ore ga guxchaxümaã na yemaäcü chi nüxü iyangaugüxüçèx ga ore ga chixexü na yemamaã norü äëxgacügüxü- tawa Ngechuchuxü íyaxuaxügüxüçèx.

12

Ngechuchu nanangúexêë na tama namexü na duüxügüpëxewa meã imaxnetaxü natürü taãewa rü chixexügu rüxĩnüxü

¹ Rü yoxni yexma nangutaquëxegü ga muxüchixü ga duüxüğü. Rü yema na namuxüchixüçèx rü düxwa nügücutüwa ningagüetanü ga duüxüğü. Rü Ngechuchu inanaxüğü ga norü ngúexüğümaãxira na yadexaxü, rü ñanagürü: —¡Pexuãëgü naxcèx i Parichéugü! Erü duüxügüpëxewa meã namaxënetatürü naãewa rü chixexügu narüxĩnüë. ²—Natürü guxüma i tacü i wüxie cúäcü üxü rü tá nangoxoma. Rü guxüma i tacü iicüxü rü yixcüra rü tá duüxüğü nüxü nacüëxgüama. ³—Rü ngëmacèx guxüma i ngëma ore i eãnexüwa cúäcü nüxü pixuxü rü yixcüra rü tá nangoxoma rü guxü i duüxüğü tá nüxü naxĩnüë. Rü ngëma ore i ucapuarü aixepewa cúäcü nüxü pixuxü, rü yixcüra rü guxãpëxewa tá nüxü nixugüğü i duüxüğü.

Name nixi na Tupanaxü pemuüëxü

(Mt 10.26.31)

⁴—Rü ngëmacèx i pemax, Pa Chomücügüx, rü pemaã nüxü chixu rü ¡tama nüxü pemuüë i ngëma duüxüğü i pexü daixchaüxü! Erü taxünexüxicatama nimëxgü, natürü taxucürüwama taãëxü nimëxgü. ⁵—Natürü pemaã tá nüxü chixu na texéxü tá na pemuüëxü. ¡Nüxü pemuüë ya Tupana! Erü nüma nüxü nangëxma i pora na yamáãxü i pexene, rü napoxcuãxü i peã i ngextá

ngoxogüxü ínapoxcuxügu. ¡Rü yimaxü tá nixí i pemuüëxü! ⁶ —¿Tama éxna taxretachinü i díeruxacügu namaã petaxe i wüximéëxpüx i werixacügu? Natürü Tupana rü tama tüxü inayarüngüma ya yíxema werixacüãxgü, rü bai ya wüxi. ⁷ —Rü woo i peyaegü rü Tupana nüxü nacuèx na ñuxre i peyae ngëxmaxü. Rü ngëmacèx, ¡tãxü i pexoegaãëgüxü! Erü pema rü muxüma i werixacüguarü yexeraxüchi pexü nangechaü ya Tupana.

Yíxema duüxügüpëxewa tügü ixuxe na Ngechuchu ya Cristuarü duüxü tiixü (Mt 10.32-33, 12.32)

⁸ —Rü pemaã nüxü chixu rü guxãma ya texé i ñoma i naãnewa duüxügüpëxewa tügü ixuxe na chorü duüxü tiixü, rü choma i Tupana Nane na duüxüxü chiixü, rü napëxewa i Tupanaãrü orearü ngeruügü i daxüçüãx rü tá tüxü chixu na chorü duüxü tiixü i tümax. ⁹ —Natürü texé ya ñoma i naãnewa duüxügüpëxewa tügü ixuxe na tama chorü duüxü tiixü, rü choma rü tá ta napëxewa i Tupanaãrü orearü ngeruügü i daxüçüãx rü tá tüxü chixu na tama chorü duüxü tiixü i tümax. ¹⁰ —Rü guxãma ya texé ya chixri chauchiga idexaxe i choma i Tupana Nane na duüxüxü chiixü, rü Tupana tá tüxü nüxü nangechaü i ngëma. Natürü texé ya Tupanaãë i Üünexüchiga chixri idexaxe, rü Tupana rü täütáma tüxü nüxü nangechaü i ngëma. ¹¹ —Rü ngëxguma duüxügü ngutaquëxepataügüwa rü éxna äëxgacügüpëxewa pexü nagagügu na pexü napoxcuexüçèx, rü ¡tãxü i pexoegaãëgüxü na ¡acümaã tá penangãxüxü rü éxna ¡acüxü tá namaã na pixuxü! ¹² —Erü ngëxguma nawa nanguxgu na pidexagüxü, rü Tupanaãë i Üünexü tá pexü nanguxëë na ¡acüxü tá namaã pixuxü —ñanagürü ga Ngechuchu.

Wüxi i äüçümaxü nixí na imuãrü díeruãxü

¹³ Rü yema duüxügütanüwa rü wüxi ga yatü Ngechuchuxü ñanagürü: —Pa Ngúexëëruüx, ¡namaã nüxü ixu ya chaueneë rü choxna naxãã i ngëma chaunatü ga yucüarü ngëmaxü i choxna üxü! —ñanagürü. ¹⁴ Natürü Ngechuchu rü ñanagürü nüxü: —Pa Yatüx, ¿texé perü äëxgacüxü choxü tingucuchixëë na chayatoyexüçèx i ngëma penatüarü ngëmaxü? —ñanagürü. ¹⁵ Rü ñanagürü ta ga Ngechuchu: —¡Pexuãë na tama pexü nangüchaüxüçèx i togüarü ngëmaxü! Erü wüxi i duüxü rü tama ngëma na namuãrü ngëmaxüãxüçèx nixí i nayauxãxü i norü maxü i taguma gúxü —ñanagürü. ¹⁶ Rü yexguma wüxi ga ore ga cuèxruüxü namaã nixu, rü ñanagürü: —Nayexma ga wüxi ga yatü ga muãrü díeruãcü, rü guxüma ga yema nanetügü ga naãnegu natogüxü rü meãma nüxü nixo. ¹⁷ —Rü guma yatü rü nagu narüxñü rü naãëwa ñanagürü:

“¿¡acü tá chaxüxü i ñuxmax? Erü nataxuma i chorü nachica i ngexta namaã na changuxüxü i chaunetügüarü o”, ñanagürü. ¹⁸ —Rü naãëwa ñanagürü:

“Marü nüxü chacuèx na ¡acü tá chaxüxü. Rü nagu tá chapogü ya guxünema ya chorü ¡patagü ga nagu namaã changuxüne ga chaunetügüarü o. Rü náí ya taxüragüne tá chaxü na ngëxma namaã changuxüxüçèx i guxüma i chaunetügüarü o rü guxüma i chorü ngëmaxügü. ¹⁹ —Rü ngëxguma marü namexgu i guxüma, rü chaugümaã tá ñacharügü: ‘Ñuxma rü tá icharüngü rü meã tá chachibü rü meã chaxaxe rü ngëmaãcü tá chataãë. Erü namuxüchi i chorü ngëmaxügü, rü mucüma ya taunecü tá choxü nataí’, ñacharügü tá chaugümaã”. ²⁰ —Natürü Tupana rü ñanagürü guma yatüxü:

“Pa Yatüx, cungëãëmare i cuma erü ñoma i chütaxügu tátama cuyu. Rü ngëma curü ngëmaxügü i namaã cunguxüxü, rü ¿texéarü tá nixí i ngëxguma?” ñanagürü ga Tupana. ²¹ —Rü ngëxgumarüü tá ta namaã nangupetü i ngëma duüxügü i nügüçèxtama norü ngëmaxügümaã nguxüxü rü tama nügü ímexëëxü i Tupanapëxewa —ñanagürü ga Ngechuchu.

*Tupana rü naxãcüguna nadau
(Mt 6.25-34)*

²² Rü yemawena rü norü ngüxügüxü ñanagürü ga Ngechuchu: —Pemaã nüxü chixu ;rü tãxü i pexoegaãëgüxü naxcèx i tacü tá na pengõxü rü tacümaã tá na pixãxchiruxü! ²³ —Erü perü maxü rü õnaärü yexera nixĩ, rü pexene rü naxchiruarü yexera nixĩ. ²⁴ —;Dücèx penangugü i werigü i tama toegüchiréxü, rü tama nanetüarü o ibuxgüxü, rü ngepatagüxü na ngexta namaã nanguxügüxüçèx i norü õna! Natürü Tupana rü nanaxüwemü. Rü pema rü Tupanacèx rü poraãcü guxüma i werigüarü yexera pixĩgü. ²⁵ —Rü taxuwama name na pexoegaãëgüxü. Erü taxucürüwama wüxie i pema rü pegütama ipemèxãchixëë ngãxü ya metrugü ega woo poraãcü naxcèx pexoegaãëgügu. ²⁶ —Rü ngëxguma tama pemaã nanguxü i ngëma íraxü rü taxucürüwama pegütama ipemèxãchixëë ega woo naxcèx pexoegaãëgügu, rü çtüxcüü i ngëxguma rü ta tacü i togü i ngëmaxügüçèx pexoegaãëgüxü? ²⁷ —;Dücèx penangugü i putüragü na ñuxãcü nayaexü i nachacu! Rü tama napuracüexü, rü tama nügü üxchirugüxü. Natürü woo guma ãëxgacü ga Charumõu ga na namexëchixü ga naxchiru rü taguma wüxi ga putürachacuarü mexürüü nixĩ. ²⁸ —Rü marü nüxü pedau i ñuxãcü Tupana na nangèxãëxü i putüragü i ñuxma naãnewa rüxügümarexü natürü moxü rü marü taxuxü. Rü ngëxguma Tupana ngëmaãcü nangèxãëgu i putüragü rü pema rü tá ngëmaärü yexera pexchiru pexna naxã, Pa Duüxügü i Írarüwatama Yaxõgüxüx. ²⁹ —Rü ngëmacèx tama name i pexoegaãë naxcèx i tacü tá na pengõxü rü tacü tá na pixaxüxü. ³⁰ —Erü ñoma i naãnecüãx i duüxügü rü naxcèx nadaugü i guxüma i ngëma pemaã nüxü chixuxü. Natürü pema rü pexü nangëxma ya Penatü ya Tupana ya nüëchama nüxü cuácü na pexü nataxuxü i guxüma i ngëma. ³¹ —Rü ngëmacèx narümemaë nixĩ na Tupanaärü ngüchaüçèx pedaugüxü na perü ãëxgacü yĩxüçèx. Rü ñuxüchi nüma rü tá pexna nanaxã i guxüma i tacü i pexü taxuxü.

*Ñuxãcü tüxü nangëxma i tórü ngëmaxügü i daxügüxü i naãnewa
(Mt 6.19-21)*

³² —;Tãxü i pemuñëxü, Pa Chauzacügüx! Pema rü noxretama pixĩgü natürü Penatü ya Tupana rü norü ngüchaü nixĩ na pexna naxããxü i pechica i ngextá nüma ãëxgacü íyĩxüwa. ³³ —;Rü namaã petaxe i perü ngëmaxügü rü togü i duüxügü i nüxü nataxuxüna penaxã i ngëma díëru! Rü ngëmaãcü tá pegüxü penangëxmaxëë i perü ngëmaxügü i taguma pexü ngauxü rü taguma gúxü i daxügüxü i naãnewa i ngextá tama íyaxücuxüwa i ngítèxáxü rü naweane tama ínachixexëëxüwa. ³⁴ —Erü ngextá ínangëxmaxüwa i perü ngëmaxügü, rü ngëxma nixĩ i perüxĩnüëxü.

Name nixĩ i yigü ítamexëëgü naxüpa na ínanguxü ya Cristu

³⁵ —;Rü ípememare namaã i perü omügü i naĩgüxü! ³⁶ —Rü name nixĩ i wüxi i coriarü duüxügü i ímemaregüxürüü na pixĩgüxü. Rü penaxwëxe na ñoma duüxügü i íãxwa norü corixü nanguxëëgüxürüü na pixĩgüxü. Rü ngëxguma norü cori rü wüxi i ngĩgüarü petawa ne naxüxgu rü: Tu tu tu ñaxgu, rü paxa naxcèx nayawãxnagü i íãx. ³⁷ —Rü nataãëgü i ngëma coriarü duüxügü ega inadauegu i ngëxguma ínanguxgu i norü cori. Rü pemaã nüxü chixu rü ngëma cori rü norü mechawa tátama nanatogüxëë i ngëma norü duüxügü i nüxü ínanguxëëgüxü, rü nüma tátama ngëma norü duüxügüxü inaxüwemü. ³⁸ —Rü woo ngãxüçüü ínanguxgu rü ëxna marü yangunechaügu rü nataãëgü i ngëma coriarü duüxügü ega inadauegu i ngëxguma ínanguxgu i norü cori. ³⁹ —Rü ngëxguma chi wüxi ya íärü yora nüxü cuëxgu na ñuxguacü ínanguégaxü

i ngítèxáxũ, rü tãũ chima nape. Rü chi nüxna nadau ya napata na tama yawãxnaãxúcèx rü tama na nüxũ nangĩxúcèx. ⁴⁰ —Rü pema rü ta penaxwèxe na ípememarexũ. Erü ngürüãchi tama nagu íperüxĩnũéyane tá íchangu i choma i Tupana Nane na duũxũxũ chiĩxũ —ñanagürü ga Ngechuchu.

Wüxi ga duũxũ ga meã norü coriga ñnũxũ rü to ga tama meã norü coriga ñnũxũchiga

(Mt 24.45-51)

⁴¹ Rü yexguma ga Pedru rü Ngechuchuna naca rü ñanagürü: —Pa Corix, ¿toxcèxicatama éxna nixĩ i ñaã ore i cuèxruũ i tomaã nüxũ quixuxũ, rü éxna guxũ i duũxũgücèx yĩxũ? —ñanagürü. ⁴² Rü ñanagürü ga Cori ga Ngechuchu: —¿Texé tíxũ ya yíxema tümaãrũ coriarũ duũxè ya aixcũma yanguxèxè rü meã tümaãxũ cuáxe? ¿Tama éxna yíxema tíxũ ya tümaãrũ cori tüxna ágaxe na meã nüxna tadauxúcèx rü meã oragu tanachibüexèxũcèx i norü duũxũgü? ⁴³ —Rü tataãe ya yíxema coriarũ duũxè i ngèxguma ínanguxgu i tümaãrũ cori rü tüxũ íyanguègü na meãma ítanaxũxũ i ngèma puracü i nagu tüxũ namuxũ. ⁴⁴ —Rü aixcũma pemaã nüxũ chixu rü ngèma tümaãrũ cori rü tá guxũma i norü ngèmaxũgüarũ dauruũxũ tá tüxũ nixĩxè. ⁴⁵⁻⁴⁶ —Natürü ngèxguma chi ngèma duũxũ nagu rüxĩnũgu rü norü cori rü tama paxa na ínanguxũ, rü inaxũgüãgu na chixri namuãxũ i natanũxũgü i yatũxũgü rü ngexũgü, rü peta naxũxgu rü nachibũxgu, rü naxaxegu, rü nügü nangãxèègu, rü ngürüãchi ngèma ngunexũ rü ngèma ora i tama nagu ínanguxèèãxũgu tá ínangu i norü cori. Rü poraãcũxüchi tá nanapoxcu ngèma duũxũgü i tama norü coriga ñnũèxũxũ napoxcuexürü. ⁴⁷ —Rü ngèma coriarũ duũxũ i nüxũ cuèxchiréxũ na tacü nanaxwèxexũ i norü cori, natürü tama nügü ímexèèxũ rü tama norü coriga ñnũxũ, rü tá poraãcũ nanaçuaxi. ⁴⁸ —Natürü ngèma coriarũ duũxũ i tama nüxũ nacuãcũma chixri norü coriga ñnũxũ, rü chixexũ üxũ, rü tá írarüwaxüra nanaçuaxi. Rü texé ya Tupana muxũma tüxna ãxè, rü muxũcèxtáma tüxna naca. Rü texé ya muxũna tüxũ nadauxèxè rü tá yexeraãcü tüxna naca.

Ngechuchugagu nixĩ i yatoyexũ i duũxũgü

(Mt 10.34-36)

⁴⁹ —Núma chaxũ na ñoma i naãnewa duũxũgüxũ chidauchitanüxèèxúcèx. Rü chierü aixcũma marü yadauchitanügu. ⁵⁰ —Rü choma rü tá poraãcü ngúxũ chinge, rü chanaxixãchiãe ñuxmatáta yangu i ngèma. ⁵¹ —Rü tama name i nagu perüxĩnũe na núma chaxũxũ na guxũ i duũxũgü rü wüxigu naxĩnũèxúcèx. Natürü pemaã nüxũ chixu rü núma chaxũ na chaugagu yatoyexúcèx i duũxũgü. ⁵² —Erü ñaãwena ega wüxi ya ípatawa nangèxmagu i wüximèèxpüx i duũxũgü, rü tomaèxpüx tá choxũ nayaxõgü rü taxre i tama, rü éxna taxre tá choxũ nayaxõgü rü tomaèxpüx i tama. ⁵³ —Rü wüxi i papá tá nayaxõ rü nane rü tãütáma nayaxõ, rü éxna nane tá nayaxõ natürü nanatü i tama. Rü ngèxgumarüũ ta wüxi i mamá tá iyaxõ rü ngĩxãcü rü tãütáma iyaxõxchãũ, rü éxna ngĩxãcü tá iyaxõ rü ngĩe rü tãütáma iyaxõxchãũ. Rü wüxi ya ngĩxè tá iyaxõ rü ngĩneãx rü tãütáma iyaxõ, rü éxna ngĩneãx tá iyaxõ rü ngĩxè rü tãütáma iyaxõ —ñanagürü ga Ngechuchu.

Cuèxruũgü i nachiga i tacü tá nangupetüxũ

(Mt 16.1-4; Mr 8.11-13)

⁵⁴ Rü Ngechuchu ñanagürü ta nüxũ ga duũxũgü: —Ngèxguma nüxũ pedèuxgu na naxèãchianexũ, rü nagu perüxĩnũe tá na napuxũ. Rü aixcũma ngèmaãcü nixĩ. ⁵⁵ —Rü pema nüxũ pecuèx na ñuxãcü penangugüxũ ya buanecü, rü ngèmaãcü nüxũ pecuèx rü tá na nanguxetüxũ. Rü aixcũma ngèmaãcü nixĩ. ⁵⁶ —Pa Duũxũgüx, pema rü togü i duũxũgüpèxewa meã

pemaxēneta, natürü peãewa rü chixexügu perüxĩnũē. Pema nüxü pecuèx na ñuxãcü penangugüxü ega tá napuxgu rü éxna tá nanguxetügu. ¿Rü ñuxãcü i ñuxma i tama nüxü pecuáxü na Tupana yĩxü ya petanüwa ngucü?

Name nixĩ na curüngüxmüxü namaã i curü uwanü

(Mt 5.25-26)

⁵⁷—Rü tüxcüü tama nüxü pecuáxchaü i ngēma nama i mexü i Tupana pexü naxwèxexü na nagu pexixü. ⁵⁸—Rü ngēxguma chi wüxie wüxi i ngetanüçèx cuxü íxuaxügu rü ãëxgacüxütawa cuxü tagaxgu, rü name nixĩ i namawatama tüxü icurüngüxmüxëē na tama ãëxgacüpëxewa cuxü tagaxüçèx. Erü wüxicana na ãëxgacüxütawa cunguxü rü ãëxgacü tá purichíagüna cuxü namu. Rü purichíagü tá cuxü napoxcu. ⁵⁹—Rü cumaã nüxü chixu rü ngēxma poxcuchicagu tá curüãüx ñuxmatáta ngixü cuxütanü i guxcü i dïeru i nüxü ngixü cungetanüçü. [Rü aixcüma ngēxgumarüü tá cumaã nanaxü ya Tupana ega tama namaã cunamexëëxgu i curü maxü —ñanagürü ga Ngechuchu.]

13

Wüxi i mexü nixĩ na nüxü rüxoexü i tacüma i chixexü

¹ Rü yexgumatama Ngechuchuxütawa nangugü ga ñuxre ga duüxügü. Rü Ngechuchumaã nüxü nixugü ga na ñuxãcü ãëxgacü ga Piratu namuxü ga norü churaragü na nadaiãxüçèx ga ñuxre ga yatügü ga Gariréanecüãx ga yexguma yema yatügü rü Tupanacèx carneru nadaixgu tupauca ga taxünewa. ² Rü Ngechuchu nüxna naca rü ñanagürü nüxü: —¿Pema nagu perüxĩnũēgu rü yemaãcü nüxü nangupetü ga yema yatügü, yerü yema togü ga Gariréanecüãxãrü yexera nipecaduãxgü? ³—Pemaã nüxü chixu rü tama nixĩ. Rü ngēxguma chi pema rü tama nüxü perüxoegu i pecüma i chixexü, rü guxãma i pema rü tá ta ipeyarütauxe. ⁴—¿Rü éxna pema nagu perüxĩnũēgu rü guxü ga Yerucharéüçüãxãrü yexera nipecaduãxgü ga yema 18 ga yatügü ga yuexü ga yexguma Chiruéwa yexmaxü ga dauxütaechica naetü rüngutaügu? ⁵—Pemaã nüxü chixu rü tama nixĩ. Rü ngēxguma chi pema rü tama nüxü perüxoegu i pecüma i chixexü, rü guxãma i pema rü tá ta ipeyarütauxe —ñanagürü ga Ngechuchu.

Ore ga nanetü ga iguera ga ngearü õõxügu ixuxü

⁶ Rü nüma ga Ngechuchu rü nüxü nixu ga wüxi ga ore ga igueragu ixuxü, rü ñanagürü: —Rü wüxi ga yatü nüxü nayexma ga wüxi ga ubanecü. Rü yexma nanato ga wüxi ga iguera. Rü nüma ga guma yatü rü ínayadauuxü ga yema iguera rü ngoxi naxõõ, natürü taxuxüma ga norü oxü inayangau. ⁷—Rü yemacèx yema norü duüxü ga norü naãnena dauxüxü ñanagürü:

“Düçèx, tomaëxpüx ya taunecü guxüguma íchayadauxü i ñaã iguera, rü taguma naxo. Rü ngēmacèx chanaxwèxe na cuyadaxüchixü na tama natüçèxma nuã naãnewa naxíaneãxüçèx”, ñanagürü nüxü. ⁸—Natürü ga yema norü duüxü ga norü naãnena dauxü, rü norü corixü nangãxü, rü ñanagürü:

“Pa Corix, ¡nüetama doma taunecüxicatama nangēmèx! Rü tá chanaxaimüãnepüne rü waxmüãnexümaã tá chanagüpüne. ⁹—Rü bexmana ngēxguma rü tá naxo. Natürü ngēxguma tãütáma naxoxgu rü tá chayadaxüchi”, ñanagürü.

Ngechuchu rü ngüxchigaarü ngunexügu ngixcèx nayataanexëē ga wüxi ga ngecü ga püçèxwecü

¹⁰ Rü wüxi ga ngüxchigaarü ngunexügu rü Ngechuchu nanguxëētae ga wüxi ga ngutaquëxepataüwa. ¹¹ Rü yéma iyexma ga wüxi ga ngecü ga 18 ga taunecü idaawecü. Rü ipüçèxwe yerü wüxi ga ngoxo ngixü napüçèxwexëē,

rü taxuacüma iyarüwëxãchi. ¹² Rü yexguma Ngechuchu ngĩxũ dèuxgu rü ngĩxcèx naca, rü ñanagürü ngĩxũ: —Pa Ngecux, ñuxma rü marü cuxcèx nitaane i curü daawewa —ñanagürü. ¹³ Rü yexguma rü ngĩxũ ningögü, rü yexgumatama iyarüwëxãchiwemüxũ, rü inaxügü ga Tupanaxũ na yacuèxüxũ. ¹⁴ Natürü yema ngutaquëxepataũârü äëxgacü rü nanu, yerü Ngechuchu rü ngüxchigaarü ngunexügu ngĩxũ narümexëë ga yema nge. Rü yemacèx ga yema äëxgacü rü ñanagürü duüxügüxũ: —Nangëxma i 6 i ngunexü i nagu namexü na ipuracüexũ. Rü ngëma ngunexügügu nixĩ i namexü na nuã pexĩxũ na pegü peyarümexëëgüxücèx rü tama i ngüxchigaarü ngunexügu —ñanagürü. ¹⁵ Rü yexguma ga Cori ga Ngechuchu rü nanangãxũ, rü ñanagürü: —Pa Duüxügüx, pema rü togü i duüxügüpëxewa meã pemaxënetä, natürü peãëwa rü chixexügu perüxĩnë. ¿Tama ëxna guxã i pema rü ngüxchigaarü ngunexügu peyawëxũ i perü woca rü ëxna perü buru na peyaxaxexëëgüxücèx? ¹⁶ —Rü ñaã ngecü rü Abráútanüxũ iyixĩ, rü Chataná rü 18 ya taunecü ngĩxũ nachixexëë namaã i ñaã daawe. ¿Rü taux ëxna i namexü na ngĩxcèx chayataanexëëxũ i ngüxchigaarü ngunexügu? —ñanagürü. ¹⁷ Rü yexguma yema ñaxgu ga Ngechuchu, rü guxüma ga norü uwanügü rü poraãcü naxãneë. Natürü guxüma ga togü ga duüxügü rü nataëgü ga yexguma nüxũ nadaugügu ga yema mexügü ga Ngechuchu üxũ.

Ore i motacha- chiregu ixuxũ
(Mt 13.31-32; Mr 4.30-32)

¹⁸ Rü ñanagürü ga Ngechuchu: —¿Ñuxãcü nixĩ i äëxgacü na yĩxũ ya Tupana, rü nañuxraũxũ i nüma äëxgacü íyixüwa? ¿Rü tacügu tá chanangu? ¹⁹ —Maneca wüxi ya motachachire ya wüxi ya yatü naãnegu toxünerüü nixĩ. Rü woo naxíraxüchichirëx ya naxchire natürü narüxü, rü naya ñuxmata wüxi i nanetü i taetaxũ nixĩ. Rü ngëmacèx i werigü rü natanügu nixüachiãũ —ñanagürü.

Ore i pãũârü puxëëruũgu ixuxũ
(Mt 13.33)

²⁰ Rü ñanagürü ta ga Ngechuchu: —¿Ñuxãcü nixĩ i Tupana äëxgacü íxixüwa? ¿Rü tacügu tá chanangu? ²¹ —Rü pãũârü puxëëruũrũ nixĩ na guxüwama nanguxũ. Erü wüxi i ngecü rü íraxũ- tama i pãũârü puxëëruũmaã inaxüéü i taxũ i ngĩrũ pãũchara. Rü ngëma pãũârü puxëëruũ rü woo naxíra rü nayapuxëë i guxüma i ngĩrũ pãũchara —ñanagürü ga Ngechuchu.

Ïãx i íraxüchiga
(Mt 7.13-14, 21-23)

²² Rü inixüchigü ga Ngechuchu ga Yerucharéüwa na naxüxũ. Rü yexguma namagu yaxüxgu rü ñãnegüwa rü ñãnexãcügüwa nixüpetüchigü, rü yéma nayangüxëëtanü ga duüxügü. ²³ Rü wüxi ga duüxũ nüxna naca rü ñanagürü: —Pa Corix ¿noxretátama nixĩ i ngëma nayauxgüxũ i maxũ i taguma gúxũ? —ñanagürü. Rü nüma ga Ngechuchu nanangãxũ, rü ñanagürü: ²⁴ —Daxügüxũ i naãneãrũ ñãx rü naxíraxüchi. ¿Rü paxa naxcèx pedau na nawa pichocuxüçèx! Erü pemaã nüxü chixu rü muxüchixüma i duüxügü tá nüxũ nangüchaũ na nawa yachocuxũ, natürü tãütáma nawa nichocu. ²⁵ —Erü ngëxguma ñãrũ yora marü nawãxtagu i ñãx, rü pema i düxëtüwa ngëxmagüxe rü tá penatutuãũ. Rü ñaperügügu tá:

“Pa Corix, ¿paxa toxcèx yawãxna i ñãx!” ñaperügügu tá. Natürü nüma i cori rü tá pexü nangãxũ, rü ñanagürü tá:

“Tama pexü chacuèx na ngextácüñãx pixĩgüxũ”, ñanagürü tá pexü. ²⁶ —Rü ngëxguma rü tá ñaperügügu nüxũ:

“Cumaãchirêx wüxiwa tachibüe rü taxaxegü. Rü toxü cungúexêê ga torü ñâneärü Ítamüğüwa”, ñaperüğügü tá. ²⁷ —Natürü nüma rü tá pexü nangãxü rü ñanagürü tá: “Marü pemaã nüxü chixu rü tama pexü chacuêx na ngextácüãxgü pixíğüxü. ¡Rü ípixí i nuã chauxütawa i guxãma i pemax, Pa Chixri Maxêxüx!” ñanagürü tá. ²⁸ —Rü ngema tá pexauxe, rü tá pixüxchapütagü i ngêxguma nüxü pedêuxgu i Abráü rü Ichaá rü Acobu rü guxüma i Tupanaärü orearü uruüğü na Tupana ãêxgacü íxíxüwa na nangêxmagüxü rü pema rü nüxna na ípewoxüxü. ²⁹ —Erü guxüwatáma ne naxí i duüxüğü. Rü Tupana ãêx- gacü íxíxüwa tá nangêxmagü. Rü ngema tá narütogü na ngema nachibüexüçêx. ³⁰ —Rü tá nangêxma i nümaxü i ñoma i naãnewa duüxüğü nüxü oexü, natürü daxüguxü i naãnewa rü Tupana tá wixpêxewa nanaxüğüxêê. Rü tá nangêxma i nümaxü i ñoma i naãnewa duüxüğü nüxü icuèxüüğüxü, natürü daxüguxü i naãnewa rü Tupana rü tá wixweama nanaxüğüxêê —ñanagürü ga Ngechuchu.

*Ngechuchu rü Yerucharéüçüãx ga duüxüğüçêx naxaxu
(Mt 23.37-39)*

³¹ Rü yematama ga ngunexügu rü Ngechuchuxütawa nangugü ga ñuxre ga Parichéugü. Rü ñanagürüğü Ngechuchuxü: —¡Íxü i nuã! Erü ãêxgacü ya Erode rü cuxü nimèxéga —ñanagürüğü. ³² Natürü nüma ga Ngechuchu nanangãxü rü ñanagürü: —¡Naxütawa pexí i ngêma yatü i nüxü cuèxüchixü na ñuxãcü duüxüğüxü nawomüxêêxü, rü namaã nüxü pixu rü ñuxma rü moxü rü tá íchana- woxü i ngoxogü, rü tá chanameêxêê i ngêma duüxüğü i idaaweexü, rü pèxmaãcü tá chanagüxêê! ³³ —Natürü chanaxwêxe i ichixüchigü i ñuxma rü moxü rü paxmaãcü ñuxmatáta Yerucharéüwa changu. Erü Yerucharéügu nixí i na nayuexü i guxüma i Tupanaärü orearü uruüğü. ³⁴ —Rü dücax, Pa Yerucharéüçüãx, pema peyadaietanü i Tupanaärü orearü uruüğü, rü nutamaã ípenamuxüchigü i Tupanaärü orearü ngeruüğü i pexcèx núma namugüxü. Rü ñuxreëxpüxcüna wüxigu chaugüxütagu pexü chanutaquêxexêêchaü, ñoma wüxi i ota ya naxãcüãx nügütüügu tüxü nutaquêxexürüü. Natürü pema rü tama penaxwêxe. ³⁵ —Dücèx i ñuxma ya perü ñâne, rü Tupana tá ínanatèx. Rü pemaã nüxü chixu rü täütáma wena choxü pedau ñuxmatáta daxüguxü i naãnewa ne chaxü. Rü ngêxguma rü tá choxü pedau rü tá ñaperüğügü:

“Namexêchi nixí ya yima Cori ya Tupana núma namucü”, ñaperüğügü tá —ñanagürü ga Ngechuchu.

14

Ngechuchu rü naxcèx nayataanexêê ga wüxi ga yatü ga rüchaxünexü

¹ Rü wüxi ga ngüxchigaarü ngunexügu rü Ngechuchu rü wüxi ga Parichéupatawa nayachibü. Rü yéma nayexmagü ga togü ga Parichéugü ga yéma bexma Ngechuchuxü ngugüxü. ² Rü yéma nayexma ta ga wüxi ga yatü ga idaawexü ga rüchaxünexü. ³ Rü yexguma ga Ngechuchu rü yema ngúexêêruüğü ga Moíchéarü mugüwa nguxêêtaegüxüna rü Parichéugüna naca, rü ñanagürü: —¿Tama penachuxuxü ega ngüxchigaarü ngunexügu chanamexêêxgu i wüxi i idaawexü? —ñanagürü. ⁴ Natürü ga nümagü rü nangeëxgümare. Rü yexguma ga Ngechuchu rü naxmêxgu nayayauxãchi ga yema idaawexü, rü nanamexêê. Rü namaã nüxü nixu ga na íyaxüxüçêx. ⁵ Rü Ngechuchu rü ñanagürü Parichéugüxü: —¿Texé i pema i ngêxguma perü buru rü êxna perü woca puchugu nagoxgu, rü taux êxna i ngêxgumatama

Ípeyadauxũ rü ípe- yatúãchixũ i woo ngũxchigaarũ ngunexũgu? —ñanagürũ.
 6 Rũ nũmagũ rü taxuũmaãma nanangãxũgũ.

Duũxũgũ ga ngĩgũarũ petawa nũxna naxugũxũchiga

7 Rũ yexguma mechawa natogũchaũgu ga yema nũxna naxugũxũ, rü Ngechuchu nũxũ nadau na wũxichigũ rü ñãrũ yoraxũtawaxũchi natoxchaũxũ. Rũ yexguma yemaxũ nadèuxgu rü nayaxucuxẽgũ, rü ñanagürũ: 8 —Ngẽxguma texé cuxna uxgu i wũxi i ngĩgũarũ petawa, rü tama name i petaarũ yoraxũtawaxũchi uxũ i naxmèxwèxewa cuyarũto. Erũ yixcũra ngürũãchi tá ínangu i to i nũxna naxuxũ i curũ yexeraxũchi ixĩxũ. 9 —Rũ ngẽma petaarũ yora i pexna uxũ, rü tá cumaã nũxũ nayarũxu na icuchixũcèx i ngẽma nachicawa na ngẽma natoxẽãxũcèx i ngẽma to i curũ yexera ixĩxũ. Rũ ngẽxguma i cuma rü poraãcũ cuxãneãcũma rü nawa iyacuáxũ i naxmèxwèxewa tá cuyarũto. 10 —Rũ narũmemaẽ ega texé cuxna uxgu, rü nawa iyacuáxũ i naxmèxwèxewa curũto. Rũ ngẽxguma i ngẽma petaarũ yora i cuxna uxũ rü ñanagürũ tá cuxũ:

“Pa Chomũcũx, ¡nuã chauxũtawaya yarũto!” ñanagürũ tá cuxũ. Rũ ngẽmaãcũ ngẽma petaarũ yora rü wũxi i mexũ tá cumaã naxũ napèxewa i guxũma i duũxũgũ i nũxna naxuxũ i cumaã ngẽma rütogũxũ. 11 —Erũ texé ya tũgũ írũtaxe rü Tupana tá tũxũ naxãnexẽ. Natürũ texé ya tũgũ írũxírxaxe rü Tupana tá tũxũ nicuèxũũ —ñanagürũ ga Ngechuchu. 12 Rũ ñanagürũ ta ga Ngechuchu nũxũ ga yema yatũ ga nũxna uxũ: —Rũ ngẽxguma wũxi i õnacèx rü éxna petacèx texéna cuxuxchaũgu, rü tama name i nũxna cuxu i cumũcũgũ, rü bai i cueneẽgũ, rü bai i cutanũxũgũ, rü bai i curũ ngaicamagu pegũxũ i duũxũgũ i dũeruãxgũxũ. Erũ nũmagũ rü tá nũxĩ cuxna naxugũe, rü ngẽmaãcũ tá cuxũ nanaxũtanũgũ. 13 —Natürũ ngẽxguma wũxi i peta cuxũxgu, rü narũmemaẽ nixĩ i nũxna cuxu i duũxũgũ i ngearũ dũeruãxgũxũ, rü duũxũgũ i taxucürũwama puracũexũ, rü ngẽma ichixeparagũxũ, rü ngẽma ingexetũgũxũ. 14 —Rũ tá cutaãèxũchi i ngẽxguma erũ nũmagũ rü taxucürũwa cuxũ nanaxũtanũgũ. Natürũ tá cunayaxu i curũ natanũ i ngẽxguma wena namaxègu i Tupanaãrũ duũxũgũ i mexũ —ñanagürũ.

*Ore i taxũ i õnagu ixuxũ
 (Mt 22.1-10)*

15 Rũ yexguma yemaxũ naxĩnũgu ga wũxi ga yatũ ga mechawa rüttoxũ rü Ngechuchuxũ ñanagürũ: —Rũ tataãe ya yíxema Tupana ãèxgacũ íixĩxũwaxa chibũxe —ñanagürũ. 16 Rũ yexguma ga Ngechuchu rü ñanagürũ nũxũ: —Wũxi ga yatũ nanaxũ ga wũxi ga õna ga taxũ. Rũ norũ duũxũxũ namu na nũxna yaxuxũcèx ga muxũma ga duũxũgũ. 17 —Rũ yexguma marũ namexgu ga norũ õna, rü wena norũ duũxũxũ namu na yema duũxũgũ ga marũ nũxna naxugũxũmaã nũxũ na yanaxuxũcèx ga marũ na namemarexũ ga norũ õna, rü paxa yéma na naxĩxũcèx. 18 —Natürũ guxũma ga yema nũxna naxugũxũ, rü inanaxũgũ ga nũgũ na ínaxuegũxũ. Rũ yema nũxĩra nũxna naxu rü ñanagürũ:

“Ngexwacaxtama naxcèx chataxe i wũxi i naãne. Rũ paxa tá íchayadau. ¡Rũ namaã nũxũ i xũ i cori rü taxucürũwama ngẽma chaxũ!” ñanagürũ. 19 —Rũ ga yema to rü ñanagürũ:

“10 i wocagũ i puracũruũcèx chataxe, rü tá ngẽmaxũ chayaxũ. ¡Rũ namaxã nũxũ i xũ i cori rü taxucürũwama ngẽma chaxũ!” ñanagürũ. 20 —Rũ ga to rü ñanagürũ:

“Ngexwacaxtama chaxãmèx rü ngẽmacèx taxucürũwama ngẽma chaxũ”, ñanagürũ. 21 —Rũ yexguma nataegugu ga yema coriarũ duũxũ, rü norũ corimaã nũxũ nixu ga guxũma ga yema ore. Rũ yexguma ga norũ cori rü nanu, rü ñanagürũ nũxũ ga norũ duũxũ:

“¡Paxa ngema ìtamügü i taxüwa rü ìtamüacügüwa naxü, rü nuã nagagü i ngëma duüxügü i ngearü dïëruãxgüxü, rü ngëma duüxügü i taxucürüwama puracüexü, rü ngëma ichixeparagüxü, rü ngëma ingexetügüxü!” ñanagürü.²²—Rü yixcamaxüra ga yema norü cori namaã nüxü ixuxü naxüxguwena rü yema norü duüxü ñanagürü nüxü:

“Pa Corix, marü chanaxü i ngëma chomaã nüxü quixuxürüü, natürü naxächicaaneãmatama i nuã cupatawa”, ñanagürü.²³—Rü yexguma ga norü cori rü ñanagürü nüxü:

“¡Paxa ngema nama i taxügüwa rü nama i íraxügüwa naxü, rü nuã nagagü i togü i duüxügü na nuxã chopatagu nachocuxücèx, rü ngëmaãcü na naxããcuxücèx ya daa chopata!²⁴ Erü pemaã nüxü chixu rü taxuüma ga yema nüxüra nüxna chaxuxü rü nuã chorü ònawa tá nachibüe”, ñanagürü.

Tama natauxcha na Cristuwe rüxüxü (Mt 10.37-38)

²⁵ Rü muxüchixüma ga duüxügü Ngechuchuwa narüxí. Rü nadauegu ga Ngechuchu, rü ñanagürü nüxü: ²⁶—Rü ngëxguma texé chowe rüxüxchaügu, rü tanaxwèxe i choxü tangechaü tümanatüarü yexera, rü tümaëärü yexera, rü tümamèxärü yexera, rü tümaxãcügüarü yexera, rü tümaëneëgüarü yexera, rü tümaëyèxgüarü yexera, rü tümaärü maxüärü yexera rü ta. Rü ngëxguma tama ngëmaãcü choxü tangechaügu rü taxucürüwama aixcüma chorü ngüexü tixí. ²⁷—Rü yíxema tama naxwèxexè na chaugagu ngüxü tingeãcüma chowe tarüxüxü, rü taxucürüwama chorü ngüexü tixí. ²⁸—Rü ngëxguma chi wüxie i petanüwa rü wüxi ya ípata ya taxüne taxüxchaügu, ¿rü tama èxna i noxri i tanangugüxiraxü na ñuxre i dïëru tá nagu ngüxü ítatáxü? Rü ngëmawa nüxü tacuèx rü marü tüxü iyangu i ngëma tümaärü dïëru i tüxü ngëxmacü na tayanguxèëxücèx ya yima í. ²⁹—Erü ngëxguma chi tama meã tanangugügu i tümaärü dïëru na ñuxregu tá naxãtanüxü ya yima í, rü norü caxtaxica chi itapugügu rü yixcüra rü taxucürüwa chi tanaguxèëgu i ngëma puracü, rü guxüma i duüxügü i nüxü daugüxü i ngëma tümaärü puracü rü tá tüxü nacugüe. ³⁰—Rü ñanagürügü tá:

“Ngëma yatü inanaxügü na naxüpataxü, natürü taxucürüwama nayanguxèë”, ñanagürügü tá. ³¹—Rü ngëxguma wüxi i nachiüãneärü ãëxgacü rü to i nachiüãneärü ãëxgacümaã nügü nadaixchaügu, ¿rü tama èxna i noxri inangugüãxü rü ngoxi 10,000 i churaragü rü yangu na nügü nadaixücèx namaã i norü uwanü i 20,000 i churaragü nüxü ngëxmaxü? ³²—Rü ngëxguma nangugüãgu na tama yanguxü i norü churaragü rü, ¿taux èxna i ngëxguma yaxüwa nangëxmagutama i norü uwanü, rü naxütawa namugüãxü i norü orearü ngeruügü, rü namaã nüxü na yanaxugüexücèx na nügümaã nangüxmüëxü? ³³—Rü ngëxgumarüü tá ta nixí i pemax, erü ngëxguma ngexerüxüxe i petanüwa tama ngëma tanawogügu i guxüma i tüxü ngëxmaxü na chowe tarüxüxücèx, rü taxucürüwama aixcüma chorü ngüexü tixí.

Ngëxguma nangeacagu ya yücüra rü taxuwama name (Mt 5.13; Mr 9.50)

³⁴—Pema rü ñoma yücürarüü pixígü i ñoma i naãnewa, erü yima yücüra rü òna na namexèëxürüü rü pema rü ñoma i naãnecüãx i duüxügütanüwa rü norü mexèëruü pixígü. Name ya yücüra. Natürü ngëxguma chi nangeacagu, ¿rü ñuxãcü tá wenaxärü naxããca? ³⁵—Rü taxuwama name. Rü woo waixüümüärü waxmüãnexèëruücèx rü tama name. Rü ítanatèxmare. Rü yíxema aixcüma ãchixexè, ¿rü name nixí i nagu tarüxüñüë i ñaã ore! —ñanagürü.

15

Ore i carneru i iyarütaxuxŭgu ixuxŭ (Mt 18.10-14)

¹ Rŭ guxŭma ga yema yatŭgŭ ga Dumaärŭ ãëxgacŭcèx dŭëru ngŭxŭ idee-tanŭxŭ, rŭ togŭ ga duŭxŭgŭ ga chixexŭ ga nacŭmagu ŭxŭ, rŭ Ngechuchucèx naxŭ na iyanaxŭnŭëxŭcèx ga norŭ ore. ² Rŭ yemacèx ga Parichéugŭ rŭ ngŭexëëruŭgŭ ga Moïchéarŭ mugŭwa nguxëëtaegŭxŭ, rŭ Ngechuchuxŭ nixugŭe, rŭ ñanagŭrŭgŭ: —Ñã yatŭ rŭ norŭ me nixŭ i pecaduãxgŭxŭmaã na naxãmŭcŭxŭ, rŭ namaã na nachibŭxŭ —ñanagŭrŭgŭ. ³ Rŭ yexguma ga Ngechuchu rŭ ñã ore ga cuèxruŭxŭ namaã nixu, rŭ ñanagŭrŭ: ⁴ —¿Texé i petanŭwa rŭ ngëxguma tŭxŭ nangëxmagu i 100 i tŭmaärŭ carnerugŭ rŭ wŭxi tŭxŭ iyarŭtauxgu, rŭ taux éxna i nachitaŭwa tanawogŭxŭ i ngëma 99, rŭ naxcèx tayadauxŭ i ngëma tŭxŭ iyarŭtaxuxŭ ñuxmata nŭxŭ itayangau? ⁵ —Rŭ ngëxguma nŭxŭ itayangëuxgu rŭ taãëcŭma tŭgŭätŭgu tayagaxŭ. ⁶ —Rŭ ngëxguma tŭmapatawa tanguxgu, rŭ tanangutaquëxexëë i tŭmamŭcŭgŭ, rŭ duŭxŭgŭ i tŭmaärŭ ngaicamagu pegŭxŭ, rŭ ñatagŭxŭ nŭxŭ:

“¡Wŭxigu chomaã petaãëgŭ, Pa Chomŭcŭgŭx! Erŭ marŭ nŭxŭ ichayangau i ngëma chorŭ carneru ga iyarŭtaxuxŭ”, ñatagŭxŭ nŭxŭ. ⁷ —Rŭ pemaã nŭxŭ chixu rŭ ngëxgumarŭŭ ta nataãëgŭ i daxŭcŭãx i ngëxguma nangëxmagu i 99 i duŭxŭgŭ i mexŭgŭ i marŭ Tupanaärŭ ixŭgŭxŭ, natŭrŭ yexeraãcŭ nataãëgŭ i ngëxguma wŭxi i duŭxŭ i pecaduãxŭ nŭxŭ rŭxoxgu i nacŭma i chixexŭ rŭ Tupanaãxŭ yaxõõgu —ñanagŭrŭ.

Ore ga dŭëru ga iyarŭtauxcŭgu ixuxŭ

⁸ Rŭ Ngechuchu rŭ wŭxi ga to ga ore ga cuèxruŭxŭ nixu, rŭ ñanagŭrŭ: —Ngëxguma chi wŭxi i ngecŭaxŭ nangëxmagu i 10 tachinŭ i dŭëru, rŭ wŭxi ngŭxŭ iyarŭtauxgu, ¿rŭ taux éxna i omŭwa nangixichiãxŭ rŭ nabixichiãxŭ ya ngŭpata, rŭ meãma ngŭxcèx nadauxŭ ñuxmata ngŭxŭ iyangau? ⁹ —Rŭ ngëxguma ngŭxŭ iyangauxgu, rŭ inangutaquëxexëë i ngŭmŭcŭgŭ i ngexŭgŭ rŭ ngŭtanŭxŭgŭ i ngŭrŭ ngaicamagu pegŭxŭ, rŭ ngŭxŭ nŭxŭ:

“¡Wŭxigu chomaã petaãëgŭ, Pa Chomŭcŭgŭx! Erŭ marŭ ngŭxŭ ichayangau i ngëma chorŭ dŭëru ga iyarŭtauxchirëxcŭ”, ngŭxŭ. ¹⁰ —Rŭ pemaã nŭxŭ chixu rŭ ngëxgumarŭŭ ta nataãëgŭ i daxŭcŭãx i Tupanaärŭ orearŭ ngeruŭgŭ i ngëxguma wŭxi i duŭxŭ i pecaduãxŭ nŭxŭ rŭxoxgu i nacŭma i chixexŭ rŭ Tupanaãxŭ yaxõõgu —ñanagŭrŭ ga Ngechuchu.

Ore ga wŭxi ga ngextŭxŭcŭ ga nanatŭna ixŭcŭgu ixuxŭ

¹¹ Rŭ ñanagŭrŭ ta ga Ngechuchu: —Nayexma ga wŭxi ga yatŭ ga taxre ga nane nŭxŭ yexmacŭ. ¹² —Rŭ guma rŭbumaëcŭ, rŭ nanatŭxŭ ñanagŭrŭ:

“Pa Pa, ¡choxna naxã i ngëma curŭ ngëmaxŭgŭ i choxna ŭxŭ!” ñanagŭrŭ. Rŭ yexguma ga nanatŭ rŭ yema taxre ga nanemaã nayatoye ga norŭ yemaxŭgŭ. ¹³ —Rŭ ñuxre ga ngunexŭguwena rŭ guma nane ga rŭbumaëcŭ rŭ nananutaquëxe ga guxŭma ga norŭ yemaxŭgŭ rŭ namaã nataxe. Rŭ yema dŭërumaã rŭ to ga nachiŭãnewa naxŭ. Rŭ chixri yéma namaxŭ, rŭ yemaãcŭ ngŭxŭ naguxëë ga guxcŭma ga norŭ dŭëru. ¹⁴ —Natŭrŭ yexguma marŭ ngŭxŭ naguxëëguwena ga guxcŭma ga norŭ dŭëru, rŭ poraãcŭ nataxu ga õna ga yema nachiŭãnewa. Rŭ yemacèx ga guma ngextŭxŭcŭ rŭ inanaxŭgŭ ga taiya nŭxŭ na ngŭxŭ. ¹⁵ —Rŭ yexguma rŭ norŭ puracŭcèx nadau naxŭtagu ga wŭxi ga yatŭ ga yema nachiŭãnecŭãx. Rŭ nŭma ga yema yatŭ rŭ norŭ naãnewa nanamu na yéma norŭ cuchigŭna yadauxŭcèx. ¹⁶ —Rŭ dŭxwa nŭxŭ nachixéga ga yema cuchiwemŭ, yerŭ poraãcŭ nataiyaxŭchi. Natŭrŭ taxŭema õna nŭxna taxã. ¹⁷ —Rŭ yexguma naãëwa nagu narŭxŭnŭ, rŭ ñanagŭrŭ:

“¿Ñuxre i chaunatüarü puracütanüxü rü nüxü nangëxma i òna rü nüxü ínayaxü? Rü choma i nuã rü taiyamaã tá nuxma chayü. ¹⁸—Rü chaunatücèx tá chataegu, rü ñachagürü tá tüxü: ‘Pa Papax, marü chixexü Tupanapewa chaxü rü cupewa rü ta. ¹⁹—Rü tama marü chame na Chaune, ñacuxü choxü. ¿Rü wüxi i curü puracütanüxüxü choxü ixixëê!’ ñacharügü tá tüxü ya chaunatü”, ñanagürü. ²⁰—Rü inaxüãchi rü nanatüpatacèx nataegu. Rü yexguma yangaicagu ga nanatüpata, rü yaxügu nüxü tadau ga nanatü, rü tüxü nangechaütümüü. Rü naxcèx tiña, rü nüxna tanëxãchi, rü nüxü tachüxu. ²¹—Rü yexguma ga nüma ga tümane rü ñanagürü tüxü:

“Pa Papax, marü chixexü Tupanapewa chaxü, rü cupewa rü ta. Rü ngemacèx marü tama name na ‘Chaune’ ñacuxü choxü”, ñanagürü. ²²—Natürü tüma ga nanatü rü tümaãrü duüxügüxü ñatarügü:

“¿Paxa nuã penange i naxchiru i mexëchixü rü peyacüxcuchix! ¿Rü wüxi i anera ta naxmëxwa ngixü pingëxcuchix! ¿Rü chapatu rü ta nuãta penge, rü peyacuaxcuchix! ²³—¿Rü peyayaxux i ngëma wocaxacü i rüngümaexü, rü peyamá, rü ngixã namaã tachibüe rü tapetae! ²⁴—Erü daa chaune rü chaucèx rü marü nayu, natürü maxücü chaucèx ínangu. Rü marü inayarütaxchirëx, rü wenaxãrü nangox”, ñanagürü. Rü yexguma inanaxügüe ga na napetaegüxü. ²⁵—Rü yoxni ga guma nane ga rüyamaëcü, rü naãnewa nayexma. Rü yexguma nataegugu rü marü ñarü ngaicamana nangugu, rü nüxü naxinü ga na ínapaxetaxü rü íyaxüãchitanüxüxü. ²⁶—Rü wüxi ga nanatüarü duüxücèx naca, rü nüxna naca ga tacü na ínaxüexü ga ñwa. ²⁷—Rü yema nanatüarü duüxü rü nanangãxü, rü ñanagürü: “Cueneë rü marü ínangu. Rü ngëmacèx cunatü toxü tamu na tayamáxücèx i ngëma wocaxacü i rüngümaexü, erü cueneë rü mecü ínangu rü tama niðaawe”, ñanagürü nüxü. ²⁸—Natürü ga guma naëneë ga rüyamaëcü rü nanu, rü tama ñgu naxücuchaü. Rü yemacèx düxwa ga nanatü rü naxcèx ítaxüxü, rü nüxü tayacèxü na yaxücüxcèx. ²⁹—Rü nüma rü ñanagürü tüxü ga nanatü:

“Cuma nüxü cucuèx i ñuxre ya taunecü cuxü chapuracü, rü taguma chixri cuga chaxinü. Rü bai i ñuxgu wüxicana wüxi i chibuxacü choxna cumu na chomücügümaã chapetaexücèx. ³⁰—Natürü ñuxma na ínanguxü i ngëma cune i chixri curü diëru ngixü guxëexü nagu i ngexügü i ngëãexü, rü naxcèx cuyamèx i ngëma wocaxacü i rüngümaexü”, ñanagürü. ³¹—Rü yexguma ga nanatü rü ñatarügü nüxü:

“Pa Chaunex, cuma rü guxüguma chauxütawa cungëxma, rü guxüma i chorü ngëmaxügü rü cuxrü nixi. ³²—Natürü ñuxma rü name nixi na ipetaegüxü rü na itaãegüxü erü cueneë ga guma chaucèx rü marü yucü, rü maxücü taxcèx ínangu. Rü woo tüxna inayarütaxu, rü wenaxãrü taxcèx nangox”, ñatarügü.

16

Ore ga yatü ga chixri norü coriarü yemaxüna dauxügu ixuxü

¹ Rü ñanagürü ta ga Ngechuchu norü ngüexügüxü: —Nayexma ga wüxi ga cori ga muãrü yemaxüãxüchixü. Rü nüxü nayexma ga wüxi ga norü duüxü ga norü yemaxüãrü dauruü. Natürü togü ga duüxügü rü norü corimaã nüxü nixugü na yema norü duüxü rü chixri norü yemaxüna na nadauxü. ²—Rü yexguma ga yema cori rü yema norü duüxücèx naca, rü ñanagürü nüxü:

“Dücèx, cuchigaxü chomaã nixugügü i duüxügü. ¿Rü tacü nixi i ngëma? ¿Rü chomaã nüxü ixu rü ñuxãcü nixi i curü puracü, erü marü täütáma chorü ngëmaxüãrü dauruüxü cuxü chixixëê!” ñanagürü nüxü. ³—Rü yexguma ga yema coriarü duüxü rü nagu narüxinü, rü nügüãëwa ñanagürü:

“¿Tacü tá chaxü i ñuxmax, erü chorü cori rü marü choxü ínatèxüchi i ngēma chorü puracüwa? Tama chapora na nañnewa chapuracüxücèx, rü chaxãne na díerucèx na íchaçaxü nüxna i togü. ⁴—Rü marü nüxü chacuèx na tacü tá na chaxüxü na choxü nangēxmaxüçèx na texé tümapatawa choxü yaxuxü i ngēxguma changearü puracüãxgu”, ñanagürü. ⁵—Rü yexguma nügüxütawa naxcèx naca ga wüxichigü ga yema duüxügü ga norü coriaxü yangetanügüxü. Rü yema nüxíra yéma naxütawa nguxüna naca, rü ñanagürü:

“¿Ñuxre i nüxü cungetanüxü i chorü cori?” ñanagürü. ⁶—Rü nüma nanangãxü, rü ñanagürü:

“Nüxü chanangetanü i 100 i data i chixü”, ñanagürü. Rü yema coriarü duüxü rü ñanagürü nüxü:

“Ñañ nixí i popera i curü ngetanü nawa ngóxü. ¡Rü paxa íruto rü to i popera naxü, rü 50 i dataguxicatama naxü i curü ngetanü!” ñanagürü. ⁷—Rü yemawena rü yema to ga duüxü ga norü coriaxü nangetanüxüna naca, rü ñanagürü:

“¿Cuma rü ñuxre yíxü i nüxü cungetanüxü i chorü cori?” ñanagürü. Rü nüma rü nanangãxü, rü ñanagürü:

“Nüxü chanangetanü i 100 i choca i trigu”, ñanagürü. Rü yema coriarü duüxü rü ñanagürü nüxü:

“Ñañ nixí i popera i curü ngetanü nawa ngóxü. ¡Rü paxa íruto rü to i popera naxü rü 80 i chocaguxicatama naxü i curü ngetanü!” ñanagürü. ⁸—Rü norü cori rü nüxü nicuèxüüãma ga yema norü duüxü ga chixexü, yerü nüxü nadau ga ñuxãcü na naxããxüchixü. Rü pemaã nüxü chixu rü ñoma i naãneçüãx i duüxügü, rü ngēma Tupanaãxü yaxögüxü i duüxügüarü yexera paxa naxcèx nadaugü na ñux-ãcü nüxü natúxü i duüxügü. ⁹—Rü pemaã nüxü chixu rü ngēma ñoma i naãne i chixexüwa pexü ngēxmaxü rü name nixí i ngēmamaã nüxü penangúchaüxëë i duüxügü na Tupanaxütawa nangugüxü. Rü ngēmaãcü i ngēxguma naguxgu i ngēma ñoma i nañnewa pexü ngēxmaxü rü peyuxgu, rü tá pexü nangēxma ya Penatü ya pexü yaxucü i daxüguxü i nañnewa. ¹⁰—Yíxema meã namaã icuáxe ega woo noxretama tümamëxëwa ngēxmagu, rü ngēxguma muxüma tümamëxëwa ngēxmagu rü tá ta meã namaã itacuèx. Natürü yíxema chixri namaã icuáxe ega noxretama tümamëxëwa ngēxmagu, rü ngēxguma muxüma tümamëxëwa ngēxmagu rü ngēxgumarüü tá ta chixri namaã itacuèx. ¹¹—Rü ngēxguma tama meã namaã ipecuèxgu i ngēma pexmëxwa ngēxmaxü i ñoma i naãne i chixexüwa, ¿rü texé tá pexmëxgu tanaxü i ngēma aixcüma mexü i Tupanaãrü ixíxü? ¹²—Rü ngēxguma tama meã namaã ipecuèxgu i ngēma Tupana pexna ãxü i ñoma i nañnewa, ¿rü ñuxãcü tá pexna nanaxã i pechica i daxüguxü i nañnewa? ¹³—Taxucürüwama i wüxi i duüxü rü nataxrearü coriãx. Erü wüxi i norü corichi rü tá naxai, rü ngēma to rü tá nüxü nangechaü. Rü éxna wüxicèx rü tá meã napuracü rü ngēma to rü tá nüxü naxo. Rü pema rü taxucürüwama Tupanacèx pemaxë ega perü díeruguxicatama perüxñüëgu —ñanagürü ga Ngechuchu. ¹⁴Natürü ga yema Parichéugü rü poraãcü norü díeruguama narüxñüë. Rü yemacèx Ngechuchuxü nacugüe ga yexguma nüxü naxñüëgu ga guxüma ga yema ore. ¹⁵Rü yexguma ga Ngechuchu rü ñanagürü nüxü: —Pema nixí i duüxügüpëxewa meã pemaxënetaxü, natürü Tupana pexü nacuèx na tacügu perüxñüëxü. Rü woo duüxügü pexü nicuèxüüğü naxcèx i ngēma pexüxü, natürü Tupana rü naãëwa nangux i ngēma —ñanagürü ga Ngechuchu.

Tupanaãrü mugü ga Moïché ümatüxü rü ñuxãcü ãëxgacü na yíxü ya Tupanachiga

16 Rū yexguma ga Ngechuchu rü ñanagürü: –Noxri nayexma ga Tupanaärü mugü ga Moïché duñxügüxü nguxëëxü, rü yema nguxëëtae ga nuxcümañgüxü ga Tupanaärü orearü uruügü duñxügüxü namaã nguxëëxü. Natürü yexguma Cuáñ ga baiñxëëruñ ínguxguwena, rü marü duñxügümaã nüxü chixuchiga i Tupanaärü ore i mexü i ñuxácü ãëxgacü na yíxü. Rū ñuxma rü guxüma i ngëma duñxügü rü poraãcü nügü naporaexëe na yachocuxücëx i ngëma Tupana ãëxgacü íxixüwa. 17 –Naxüpa na yanguxü i Tupanaärü mugü rü woo wüxi i mu i íramarexü yixígu, rü naguxchaxüchi na iyanaxoxü i ngëma nüxü yaxuxü. Natürü aixcüma narütauxchamaë nixí na iyanaxoxü i ñoma i naãne rü guxüma i ngëma daxüwa nüxü idauxü.

Ngechuchu namaã nangüexëëtae na tama namexü na texé tümamaxü ítáxü (Mt 19.1-12; Mr 10.1-12)

18 –Ngëxguma wüxi ya yatü ítámëxgu rü nañ i ngëmaã naxãmëxgu rü Tupanapëxewa rü pecadu naxü. Rü texé ya yíxema ngímaã ãmaxë i wüxi i nge i ngíte ngíxü ítëxcü, rü Tupanapëxewa rü tüma rü ta pecadu taxü.

Yatü i dñëruãxüchixüchiga rü Dácharuchiga

19 –Nayexma ga wüxi ga yatü ga dñëruãxüchixü ga guxüguma mexëchixü ga naxchirugu icúxü. Rü guxü ga ngunexügu rü taxüma ga ñna naxü rü napetaexü. 20 –Rü nayexma ta ga wüxi ga yatü ga ngearü dñëruãcü ga Dácharugu ãëgacü. Rü guxüguma yema dñëruãxüchixüpataëxwa nayarütooxü. 21 –Rü guma Dácharu rü nanangõxchañ ga yema ñnatüchi ga yema yatü ga dñëruãxüchixüärü mechawa rüyíixü. Rü naxcëx naxí ga airugü, rü nanawearü oxriãxgü. 22 –Rü wüxi ga ngunexü nayu ga guma ngearü dñëruãcü, rü daxüçüãx ga Tupanaärü orearü ngeruügü rü daxüguxü ga naãnewa nanagagü na wüxiwa Abráümaã nayexmaxücëx. Rü nayu ta ga yema yatü ga dñëruãxüchixü, rü inayatëxgü ga duñxügü. 23 –Rü ngëma nachica i Tupana ngoxogüxü nagu poxcuxüwa naxü ga yema yatü ga dñëruãxüchixü rü yema poraãcü ngúxü ninge. Rü daxü nadau, rü yaxügu Abráüxü nadau na Dácharumaã wüxiwa nayexmaxü ga daxüguxü ga naãnewa. 24 –Rü yexguma ga yema yatü ga dñëruãxüchichiréxü rü aita naxü rü ñanagürü:

“Pa Oxi Pa Abráüx, ¡cuxü changechaütümüñ, rü nuã namu ya Dácharu na dexámaã nügü yawaixpëxëmëxëácüma choxü yanawaixpëxearü conüãxücëx! Erü poraãcü choxü nangux i nuã üxüwa”, ñanagürü. 25 –Natürü Abráü rü ñanagürü nüxü:

“Pa Chaunex, ¡nüxna nacuëxãchi na taxuñma cuzü taxuxü ga yexguma cumañxgu! Natürü Dácharu rü poraãcü chixexü nüxü naxüpetü. Rü ngëmacëx i ñuxma rü nuã mexüwa nangëxma, rü cuma rü ngëma poxcuchicawa ngúxü quinge. 26 –Rü ñuxüchi nangëxma i wüxi i taxüchixü i ngatexü i tórü ngãxüwa üxü. Rü ngëmacëx ega númacüãx ngëma íxchañgu, rü taxucürüwama ngëma naxí. Rü woo ngëmacüãx núma íxchañgu rü taxucürüwama núma naxí”, ñanagürü. 27 –Rü yexguma ga yema yatü ga dñëruãxüchichiréxü rü ñanagürü:

“Cuxü chacëëxü, Pa Oxi, Pa Abráüx, na chaunatüpatawa cunamuxücëx ya Dácharu. 28 –Erü ngëma nangëxmagü ya wüximëëxpüx ya chaueneëgü. Rü chanaxwëxe na namaã nüxü na yanaxuxücëx na tama nuã ñaã poxcuchica i poraãcü choxü ínangúxüwa naxíxücëx”, ñanagürü. 29 –Natürü ga Abráü rü ñanagürü nüxü:

“Cueneëgü nüxü nangëxma i Tupanaärü mugü ga Moïché ümatüxü rü yema ore ga nuxcümañgüxü ga Tupanaärü orearü uruügü ümatüxü. Rü name nixí i ngëma orega na naxíñüëxü”, ñanagürü. 30 –Rü yexguma ga yema yatü ga dñëruãxüchichiréxü rü Abráüxü nangãxü, rü ñanagürü:

“Ngēmáácü, Pa Oxi, Pa Abráüx, natürü ngëxguma chi wüxi i duüxü i yuchiréxü ngema üxgu rü namaã nüxü yanaxuxgu, rü chi nüxü narüxoe i nacüma i chixexü”, ñanagürü. ³¹—Natürü Abráü, rü ñanagürü nüxü:

“Ngëxguma tama naga naxĩnüëgu ga yema ore ga Moïché ümatüxü rü yema ore ga nuxcümaügüxü ga Tupanaärü orearü uruügu ümatüxü, rü woo chi wüxi i marü yuwa írüdaxü i duüxü ngema üxgu, rü namaã nüxü yanaxuxgu i ore, rü tãu chima nüxü nayaxögü”, ñanagürü.

17

Naxãücüma nixĩ na pecadugu inguxü (Mt 18.6-7, 21-22; Mr 9.42)

¹ RÜ Ngechuchu rü norü ngüexügüxü ñanagürü: —Rü guxügutáma nangëxma i tacü i duüxügüxü pecaduãxëxü. Natürü wüxi i ngechaü tá tümacëx nixĩ ya yíxema duüxë ya togüxü pecadugu nguxëxë. ²⁻³—Rü tümacëx rü narümemae nixĩ na tümanaxãwa yangacuchixü ya wüxi ya nuta ya tacü rü ngëmaãcü taxtüwa tüxü na itáexü naxüpa na pecadugu tananguxëxü i wüxi i chorü duüxü. ¡Rü ngëmacëx name nixĩ i pexuãëgü i pemax! RÜ ngëxguma wüxi i cueneë chixexü cumaã üxgu rü ¡meã naxuxcuxë! RÜ ngëxguma nüxü naxoxgu i nacüma i chixexü rü ¡nüxü nüxü nangechaü i ngëma! ⁴—Rü woo 7 ëxpüxcüna chixexü cumaã naxüxgu i wüxi i ngunexügu, rü 7 ëxpüxcüna cuxna yacaxgu na nüxü nüxü cungechaüxcëx, rü name nixĩ i nüxü nüxü cungechaü —ñanagürü ga Ngechuchu.

Ñuxãcü tapora ega yaxõxgu

⁵ RÜ norü ngüexügü ga norü orearü uwa namugüxü rü ñanagürügü: —Pa Corix, ¡toxü rüngüxëë na yexeraãcü tayaxögüxcëx! —ñanagürügü. ⁶ RÜ yexguma ga Cori ga Ngechuchu rü ñanagürü nüxü ga norü ngüexügü: —Rü ngëxguma chi woo naxiraxüchigu i perü õ, rü daa naĩ rü chi pega naxĩnü ega ñapegügu:

“¡Cugü nabëx i nuã rü taxtüchiügu cugü yato!” ñapegügu, rü chi pega naxĩnü.

Wüxi i ngüxëëruüãrü puracüchiga

⁷ —Ngëxguma chi wüxie i petanüwa rü tüxü nangëxmagu i wüxi i tümaärü duüxü i tümañewa ne üxü i puracüwa rü ëxna carneruarü dauwa, rü tama nügücëxira naxüwemü. ⁸ —Natürü norü corixüxĩra naxüwemü na nachibüxcëx rü naxaxexüxcëx, rü nüma rü yixcama nachibü. ⁹ —Rü norü cori rü tama moxë nüxna naxã na naxüwemüãxüxcëx, erü woetama ngëma nixĩ i norü puracü i ngëma norü duüxü. ¹⁰ —Rü ngëxgumarüü tá pixĩgü i pemax. Erü ngëxguma ngëma Tupana pexü üxëëxüxĩcatama pexüxgu, rü penaxwëxe i pegü ñaperügügu:

“Puracütanüxü i taxuwama mexü tixĩgü, erü ngëma nawa tüxü namuxüxĩcatama nixĩ i tinguxëëxü”, ñaperügügu —ñanagürü ga Ngechuchu.

Ngechuchu nanameëxëë ga 10 ga yatügü ga chaxüneãxgüxü

¹¹ RÜ yexguma namagu yaxüxgu ga Ngechuchu ga Yerucharéüwa na naxüxü, rü Chamáriaane rü Gariréaane nügümaã íxüyexüwa naxüpetü. ¹² RÜ yexguma wüxi ga ñanexãcüwa nanguxgu, rü yexma napëxegu nayayi ga 10 ga yatügü ga chaxünemaã idaaweexü. RÜ yaxügu nüxü nachigü. ¹³ RÜ tagaãcü ñanagürügü nüxü: —Pa Ngechuchux, Pa Ngüexëëruüx, ¡cuxü tangechaütümüügü! —ñanagürügü. ¹⁴ RÜ yexguma Ngechuchu nüxü dëuxgu, rü ñanagürü nüxü: —¡Yéa paigüxütawa pexĩ, rü nüxü pegü peyawëxgü! —ñanagürü. RÜ yexguma namagu naxĩyane, rü naxcëx nitaanetanü ga yema yatügü. ¹⁵ Natürü natanüwa rü nayexma ga wüxi ga Ngechuchucëx taeguxü

ga yexguma marü nügü nadèuxgu ga naxcèx na yataanexü. Rù tagaãcü Tupanaxü nicuèxüüchigü. ¹⁶ Rù Ngechuchupèxegu nanangücuchi rù moxè nüxna naxã. Rù yema yatü rù Chamáriaanecüâx nixĩ. ¹⁷ Rù yexguma ga Ngechuchu rù ñanagürü: —¿Taux éxna i 10 chirèx pixígüxü na pexcèx chayataanexèégüxü? ¿Ngèxügü nixĩ i ngèma togü i 9 i yatügü? ¹⁸ —¿Rù ñaã to i nachiüânecüâx i duüxüxĩcatama nixĩ itaeguxü na Tupanaxü yacuèxüüxücèx? —ñanagürü. ¹⁹ Rù yexguma rù guma yatüxü ñanagürü: —¡Inachi rù íxü! Cuxcèx nitaane, erü cuyaxõ —ñanagürü.

*Ñuxãcü tá nixĩ i ngèxguma ínanguxgu ya Tupana na ãèxgacü yĩxü
(Mt 24.23-28, 36-41)*

²⁰ Rù Parichéugü rù Ngechuchuna nacagü, rù ñanagürügü: —¿Ñuxgu tá nixĩ na yangucuchixü ya Tupana na ãèxgacü yĩxücèx i núma? —ñanagürügü. Rù Ngechuchu nanangãxü, rù ñanagürü: —Norü nguchiga ya Tupana rù tama wüxi i tacü i nüxü idauxürüü nixĩ. ²¹ —Rù taxuacüma ñaperügügü:

“Daa nixĩ”, rù éxna “Gua nixĩ”, ñaperügügü. Erü marü petanüwa nangu ya Tupana na ãèxgacü yĩxücèx —ñanagürü. ²² Rù yexguma norü ngúexügüxü ñanagürü: —Rù tá pexcèx ínangu i ngunexü i nagu poraãcü tá choxü pedaugüchaüxü woo wüxi i paxaächicèxtama yixígu. Natürü tãütáma choxü pedaugü i ngèxguma. ²³ —Rù duüxügü rù tá ñanagürügü pexü:

“Daa nixĩ ya Cristu”, rù éxna, “Gua nixĩ ya Cristu”, ñanagürügü tá. Natürü pemax rü tãütáma nüxü peyaxögü, rù tãütáma nawe perüxĩ! ²⁴ —Rù ngèxguma íchanguxgu i choma i Tupana Nane na duüxüxü chiixü, rù wüxi i ãèmacü i guxüâneguma baxixürüü tá chixĩ. ²⁵ —Natürü noxri rù tá poraãcü ngúxü chinge, rù ñoma i naãnecüâx i duüxügü i ñuxma maxèxü rù tá choxü naxoe. ²⁶ —Rù yexgumarüü ga duüxügü na chixri maxèxü ga yexguma Noe maüxgu, rù ngèxgumarüü tá ta chixri namaxè i duüxügü i ngèxguma íchanguxgu i choma i Tupana Nane na duüxüxü chiixü. ²⁷ —Rù ga duüxügü ga yexguma rù nachibüe, rù naxaxegü, rù nixãmèxgü, rù nixütexacügü ñuxmata nawa nangu ga yema ngunexü ga Noe naweügu nagu ixüexü. Rù ínangu ga mucü ga taxüchicü, rù guxüma ga yema duüxügü rù nayue. ²⁸ —Rù yexgumarüü ta nangupetü ga yexguma nuxcümaücü ga Lox maüxgu. Rù duüxügü rù nachibüe, rù naxaxegü, rù norü yemaxücèx nataxegü, rù namaã nataxegü, rù nixüanegü rù nitoegü, rù nixüpatagü. ²⁹ —Natürü yexguma Lox ixüxgu nawa ga guma ñane ga Chodoma, rù daxüwa narüyi ga üxü ga naxĩchine, rù nanadai ga guxüma ga yema duüxügü. ³⁰ —Rù ngèxgumarüü tá ta nangupetü i ngèxguma íchanguxgu i choma i Tupana Nane na duüxüxü chiixü. ³¹ Rù ngèma ngunexügu rù texé tama tümapataarü aixepewa ngèxmagu, rù tama name i tümapatagu tayangaxi na tümaãrü ngèmaxügü tayatoxücèx. Rù texé ya tümaãnewa ngèxmaxè, rù tama name i tümapatacèx tataegu na tacü ngema tayayaxuxücèx. ³² —Rù nüxna pecuèxãchie ga ñuxãcü ngixü na naxüpetüxü ga Lox namèx ga na nayuxü, ga yexguma ngígüweama nadèuxgu. ³³ —Erü yixema tügü maxèchaxèèchaüxè rù tá itayarütaxu, natürü yixema chauxcèx yuxe rù aixcüma tá tüxü nangèxma i maxü i taguma gúxü. ³⁴ —Rù pemaã nüxü chixu rù ngèma chütaxügu rù wüxi i ngürücarewa tá nangèxmagü i taxre i duüxügü. Rù wüxi tá niga, rù ngèma to rù tá ngèma natèx. ³⁵ —Rù taxre i ngèxügü tá nügümaã ínacaegü. Rù wüxi tá niga rù ngèma to rù tá ngèma natèx. ³⁶ —Rù taxre i yatügü rù wüxi i naãnewa tá nangèxmagü. Rù wüxi tá niga rù ngèma to rù tá ngèma natèx —ñanagürü ga Ngechuchu. ³⁷ Rù yemaxü naxĩnüegu ga norü ngúexügü, rù Ngechuchuna nacagü, rù ñanagürügü: —Pa Corix, ¿ngextá tá nixĩ i nangupetüxü i ngèma nüxü quixuxü? —ñanagürügü. Rù

nüma ga Ngechuchu rü nanangãxü, rü ñanagürü: —Duüxügü rü tá chauxcèx nangutaquëxegü ñoma ëxchagü nawemücèx ngutaquëxexürü —ñanagürü.

18

Ore ga ãëxgacügu rü yutecügu ixuxü

¹ Rü Ngechuchu rü wüxi ga to ga orexü namaã nixu na yemawa nangüexëãxücèx na ñuxäcü nanaxwëxexü na taguma nüxü nachaueäcüma guxüguma nayumüxëgüxü. ² Rü ñanagürü nüxü ga norü ngüexügü: —Wüxi ga ñänewa nayexma ga wüxi ga ãëxgacü ga tama Tupanaga ñnuxü rü taxüexüma ngechaüxü. ³ —Rü guma ñänewatama iyexma ga wüxi ga nge ga yutecü ga ngxü nayexmacü ga wüxi ga guxcha namaã ga to ga duüxü. Rü yemacèx yema ãëxgacüxütawa ixüxecha na ngxü namexëãxücèx ga yema guxcha. ⁴ —Rü muëxpüxcüna yéma ixüxü, natürü yema ãëxgacü rü tama ngixü narüngüxëëchaü. Natürü düxwa nagu narüxüna ga yema ãëxgacü rü naãëwa ñanagürü:

“Choma rü tama Tupanaxü changechaü, rü taxüexüma chacuáxchaü. ⁵ —Natürü ngëma choxü na nachixeweechaxücèx i ñaã nge, rü noxtacüma tá ngixü charüngüxëë na tama yeücürü choxü nachixeweechaxücèx”, ñanagürü. ⁶ Rü Cori ga Ngechuchu rü ñanagürü: —Yema nixü ga norü ore ga yema ãëxgacü ga chixexü. ⁷ —¿Taux ëxna i Tupana rü paxa tüxü ñnapoxüxü ya yixema duüxë ya tüxü nayaxuxe i ngëxguma chütacü rü ngunecü rü norü ngüxëëcèx nüxna tacaxgu i tümaärü yumüxëwa? ⁸ —Rü pemaã nüxü chixu rü Tupana rü paxatáma tüxü narüngüxëë. Natürü ngëxguma wenaxärü núma chaxüxgu i choma i Tupana Nane na duüxüxü chixü, ¿rü ñuxre i duüxügü i aixcüma yaxögüxüxü tá ichayangau i ñoma i naãnewa? —ñanagürü ga Ngechuchu.

Ore i Parichégu ixuxü rü dïëruarü deruügu ixuxü

⁹ Rü Ngechuchu rü nüxü nixu ga ñaã ore nachiga ga yema duüxügü ga nügü írümegünetaxü rü tama togüxü cuáxchaügüxü. ¹⁰ Rü ñanagürü: —Taxre ga yatü rü tupauca ga taxünewa nayayumüxëgü. Rü wüxi rü Parichéu nixü, rü yema to rü wüxi ga yatü ga Dumaärü ãëxgacücèx dïëru ngixü dexü nixü. ¹¹ —Rü yema Parichéu rü yexma nachi, rü ñaãcü nayumüxë:

“Pa Tupanax, moxë cuxna chaxã erü tama togü i duüxügürü chixü. Rü tama togürü changitèx, rü tama ngëmarü taxü i chixexü chaxü rü ëxna wüxi i nge i ätecümaã ichape. Rü bai i ñaã yatü i Dumaärü ãëxgacücèx dïëru ngixü dexürü chixü. ¹² —Choma rü guxcü ya yüxügu rü taxreëxpüxcüna chaxaure rü tama chachibü na cugu charüxüxücèx. Rü chorü dïëruwa rü guxüguma meã cuxna chanaxã i ngëma cuxna üxü”, ñanagürü. ¹³ —Natürü ga guma yatü ga Dumaärü ãëxgacücèx dïëru ngixü decü, rü yaxügu narüxãüx. Rü namuü ga daxü na nadawenüxü, rü yema norü ngechaümaã nügü napaxremü, rü ñanagürü:

“Pa Tupanax, ¡Cuxü changechaütümü! Erü wüxi i pecaduãxü chixü”, ñanagürü ga guma yatü. ¹⁴ —Rü ngëmacèx pemaã nüxü chixu rü guma yatü ga Dumaärü ãëxgacücèx dïëru ngixü decü rü yexguma napatacèx nataegugu rü Tupanapëxewa rü mecü nixü. Natürü yema Parichéu rü Tupana rü tama namaã nataãë. Erü texé ya tügü icuëxüxüxe rü Tupana tá tüxü naxänexëë. Natürü texé ya tama tügü icuëxüxüxe rü Tupana rü tá tüxü nicuëxüxü —ñanagürü ga Ngechuchu.

*Ngechuchu rü meã buãxgüxü nayaxu
(Mt 19.13-15; Mr 10.13-16)*

15 Rū yéma Ngechuchuxütawa tüxü tagagü ta ga buãxgü na tüxü yangögüchigüxcèx. Natürü yexguma norü ngüexüğü yemaxü dauxgügu rü tüxü ningagü ga guxema tümãcügü Ngechuchuxütawa tüxü gagüxe. 16 Natürü Ngechuchu rü nügüxütawa tümãcèx naca ga guxema buãxta rü ñanagürü norü ngüexüğüxü: —Chanaxwèxe i chauxütawa naxi i buxüğü. ¡Rü tãxü i nüxna penachuxuxü! Erü Tupana ãëxgacü íxixüwa rü tümãcèx nixi ya yixema ñaã buxügürü ixigüxe. 17 —Aixcuma pemaã nüxü chixu rü texé ya tama wüxi i buxürü Tupanaxü yaxúxe na tümãrü ãëxgacü na yixüxcèx, rü tagutáma nagu taxücu i Tupana ãëxgacü íxixüwa —ñanagürü ga Ngechuchu.

*Wüxi ga yatü ga dïeruãxüchicü Ngechuchumaã nidexa
(Mt 19.16-30; Mr 10.17-31)*

18 Rū wüxi ga yema Yudíugüarü ãëxgacü rü Ngechuchuna naca rü ñanagürü: —Pa Ngüexëeruü ya Mecüx, ¿tácü tá chaxüxü na chanayaxuxüxcèx i maxü i taguma gúxü? —ñanagürü. 19 Rū Ngechuchu nanangãxü rü ñanagürü nüxü: —¿Tüxcüü “Mecü” ñacurüğü choxü? Erü Tupanaxicatama nixi ya mecü ixicü, rü nataxuma i to i mecü ixixü. 20 —Cuma nüxü cucuèx i Tupanaãrü mugü i ñaxü: “¡Tãütáma naí i ngemaã icupe, rü tãütáma cumáëta, rü tãütáma cungtèèx, rü tãütáma doraxü quixu i togüchiga, rü tümaga naxinü ya cunatü rü cue!” ñaxü. 21 Rū yexguma ga guma yatü rü ñanagürü Ngechuchuxü: —Woetama chorü bucüma meãma chayanguxëe i guxüma i ngëma mugü i nüxü quixuxü —ñanagürü. 22 Rū yemaxü naxinügu ga Ngechuchu rü ñanagürü: —Wüxixicatama cuxü nataxu, rü ngëma nixi na namaã cutaxexü i guxüma i curü ngëmaxüğü rü togü i ngearü ngëmaxüãxgüxüna na cunaxãxü i curü natanü, rü ngëxguma rü tá cuxü nangëxma i cuchica i daxüguxü i naãnewa. Rū ñuxüchi marü name i chowe curüxü —ñanagürü. 23 Natürü yemaxü naxinügu ga guma yatü rü porãcü inayarümaãchi, yerü namuãrü dïeruãxüchi. 24 Rū yexguma Ngechuchu nüxü dëuxgu ga ñuxãcü na nangechaüxü, rü ñanagürü nüxü ga norü ngüexüğü: —Naguxchaxüchi tá nixi na Tupana ãëxgacü íxixüwa na yachocuxü i ngëma dïeruãxüchigüxü. 25 —Rü dücax, wüxi i cameyu rü taxucürüwama wüxi ya ucumaxëtüwa naxüpetü. Rū ngëxgumarüü ta nixi i wüxi i duüxü i dïeruãxüchixü rü taxucürüwama Tupana ãëxgacü íxixüwa nixücu [ega norü dïeruguama naxinügu rü tama yaxõõgu —ñanagürü.] 26 Rū yexguma yemaxü naxinügu ga duüxüğü rü ñanagürüğü: —¿Éxna texé tá ya nayaxúxe i maxü i taguma gúxü? —ñanagürüğü. 27 Rū Ngechuchu ñanagürü nüxü: —Duüxüğü rü taxuacüma nüğü namaxëe, natürü Tupanaãxü rü natauxcha na namaxëëãxü —ñanagürü. 28 Rū Pedru ñanagürü Ngechuchuxü: —Pa Corix, toma rü yéma tanawogü ga guxüma ga torü yemaxüğü na cuwe tarüxüxcèx —ñanagürü. 29-30 Rū yexguma ga Ngechuchu rü ñanagürü nüxü ga norü ngüexüğü: —Aixcuma pemaã nüxü chixu rü texé ya Tupanacèx tümapatana, rü éxna tümãnatüna, rü éxna tümãëna, rü éxna tümãëneëgüna, rü éxna tümãëyèxgüna, rü éxna tümãmèxna, rü éxna tümãcügüna ngëma ixüxé na Tupanaãxü tapuracüxcèx, rü ñoma i naãnewa tátama porãcü tanayaxu i tümãrü natanü. Rū daxüguxü i naãnewa rü tá ta tanayaxu i maxü i taguma gúxü —ñanagürü.

*Ngechuchu rü wenaxãrü nanaxunagü ga norü yuxchiga
(Mt 20.17-19; Mr 10.32-34)*

31 Rū Ngechuchu rü noxrüwama naxcèx naca ga norü ngüexüğü, rü ñanagürü nüxü: —Ñuxma rü Yerucharéüwa tá taxü na ngëma yanguxüxcèx i guxüma ga yema ore ga nuxcümaüğüxü ga Tupanaãrü orearü uruüğü ümatüxü ga chauchiga. 32 —Rü Yerucharéücüãx i duüxüğü rü tá to i

nachiũãnecũãxna choxũ namugũ. Rũ ngẽma duũxũgũ rũ tá chaugu nidauxcũraũgũ, rũ tá chomaã naguxchigagũ, rũ tá chauchiwewa nacuaixgũe. ³³ —Rũ tá choxũ nacuaixgũ, rũ yixcũra rũ tá choxũ nimèxgũ. Natürũ tomaẽxpũx i ngunexũguwena rũ tá wenaxãrũ chamaxũ —ñanagürũ. ³⁴ Natürũ yema norũ ngúexũgũ rũ tama nũxũ nacuèxgũega ga na tacũchiga yĩxũ ga yema ore ga namaã nũxũ yaxuxũ. Yerũ poraãcũ nũxũ naguxcha ga aixcũma nũxũ na nacuèxgũxũcèx.

*Ngechuchu nanamexẽẽ ga wũxi ga ngexetücũ ga Yericúwa
(Mt 20.29-34; Mr 10.46-52)*

³⁵ Rũ yexguma Ngechuchu ñãne ga Yericúwa ngxuchaũgu, rũ yéma namacũwawa narũto ga wũxi ga yatũ ga ngexetücũ ga dīerucèx yéma iwémécũ. ³⁶ Rũ yexguma guma ngexetücũ nũxũ ñnũgu ga muxũma ga duũxũgũ na yéma chopetũxũ, rũ duũxũgũna naca ga tacũ na ngupetũxũ. ³⁷ Rũ nanangãxũgũ, rũ ñanagürũgũ: —Ngechuchu ya Nacharétucũãx nuã naxũpetũ —ñanagürũgũ. ³⁸ Rũ yexguma ga guma ngexetücũ rũ tagaãcũ ñanagürũ: —Pa Ngechuchux, Pa Dabítanũxũx, jcuxũ changechaũtũmũ! —ñanagürũ. ³⁹ Rũ yema duũxũgũ ga Ngechuchupẽxegu ñxũ, rũ nanangagũ ga na iyanangeáxũcèx. Natürũ guma ngexetücũ rũ yexeraãcũ tagaãcũ ñanagürũ: —Pa Dabítanũxũx, jcuxũ changechaũtũmũ! —ñanagürũama. ⁴⁰ Rũ yexma nayachiãchi ga Ngechuchu, rũ duũxũgũxũ namu na naxũtawa nagagũãxũcèx. Rũ yexguma marũ naxũtawa nanguxgu, rũ guma ngexetücũna naca ga Ngechuchu, rũ ñanagürũ: ⁴¹ —¿Tacũ i cunaxwèxexũ na cumaã chanaxũxũ? —ñanagürũ. Rũ guma ngexetücũ nanangãxũ rũ ñanagürũ: —Pa Corix, chanaxwèxe na choxũ quidauchixẽẽxũ —ñanagürũ. ⁴² Rũ Ngechuchu ñanagürũ nũxũ —¡Idauchi! Rũ marũ cuxcèx nitaane erũ cuyaxõ —ñanagürũ. ⁴³ Rũ yexgumatama nidauchi ga guma ngexetücũ, rũ Ngechuchuwe narũxũ, rũ Tupanaxũ nicuèxũũchigũ. Rũ guxũma ga duũxũgũ ga nũxũ daugũxũ ga yema ngupetũxũ rũ Tupanaxũ nicuèxũũgũ ta.

19

Ngechuchu rũ Zaquéuchiga

¹ Rũ Ngechuchu rũ Yericúarũ ñanewa naxũpetũ. ² Rũ yéma nayexma ga wũxi ga yatũ ga dīeruãxũchixũ ga Zaquéugu ãegaxũ. Rũ nũma nixĩ ga naèru ga yema yatũgũ ga Dumaãrũ ãèxgacũcèx dīeru ngĩxũ ideetanũxũ. ³ Rũ yema Zaquéu rũ poraãcũ nũxũ nangũchaũ ga Ngechuchuxũ na nadauxũ na nũxũ nacuaũxũcèx. Natürũ taxuacũma nũxũ nadau, yerũ namuxũchi ga duũxũgũ, rũ ñũxũchi nanuxchanexũchi ga nũmax. ⁴ Rũ yemacèx Ngechuchupẽxegu nayangu, rũ namacũwawa wũxi ga naĩgu naxĩnagũ na Ngechuchuxũ nadauxũcèx ga yexguma yéma naxũpetũgu. ⁵ Rũ yexguma yéma naxũpetũgu ga Ngechuchu, rũ daxũ nadau natũũwa ga guma naĩ. Rũ ñanagürũ nũxũ: —Pa Zaquéux, ¡paxa írũxĩ i ngẽma! Erũ cupatawa tá changu i ñũxma —ñanagürũ. ⁶ Rũ paxa ínarũxĩ ga Zaquéu, rũ taãèacũma Ngechuchuxũ nayaxu. ⁷ Rũ yexguma yemaxũ nadaugũgu ga duũxũgũ, rũ guxũma inanaxũgũe ga chixri Ngechuchuchiga na yadexagũxũ. Rũ ñanagürũgũ: —¿Ñuxãcũ i nũma rũ wũxi i duũxũ i pecaduãxũpatawa nangu? —ñanagürũgũ. ⁸ Rũ yexguma ga Zaquéu rũ inachi rũ ñanagürũ Ngechuchuxũ: —Dũcèx, Pa Corix, choma rũ ngearũ dīeruãxgũxũna tá chanaxã i ngãxũgu i guxũma i chorũ ngẽmaxũgũ. Rũ ngẽxguma chi texé tũxũ chawomũxèèacũma tũxũ changĩxgu, rũ ãgũmũcũèxpũxcũna tá tũxũ ngĩxũ chataeguxèè i ngẽma tũmaãrũ dīeru —ñanagürũ. ⁹ Rũ Ngechuchu rũ ñanagürũ nũxũ: —Rũ ñoma

i ngunexügu cupatawa nangu i maxü i taguma gúxü, erü cuma rü ta rü Abráürüü cuyaxõ. ¹⁰—Rü choma i Tupana Nane na duüxüxü chiixü, rü ñoma i nañewa chaxü na naxcèx chayadauxücèx i ngëma duüxügü i iyarütauxexü na chanamaxëxëxücèx —ñanagürü.

Ore i dīeruḡu ixuxü
(Mt 25.14-30)

¹¹ Rü yoxni yema Ngechuchuarü ore inaxĩnüeyane ga duüxügü, rü Ngechuchu rü wüxi ga to ga ore ga cuèxruüxü namaã nixu, yerü marü Yerucharéüxü ningaica, rü duüxügü nagu rüxĩnüëgu rü paxa tá ínangu ga Tupana na norü äëxgacü yĩxücèx. ¹² Rü yexguma ga Ngechuchu rü nügüchiga nidexa rü ñanagürü nüxü: —Nayexma ga wüxi ga yatü ga taxü ga cori ixícü ga nayaxucü ga ore na nachiuãneärü äëxgacüxütawa naxüxücèx ga yaxüwa na yema äëxgacü nüxü unetaxücèx na guma nawa ne naxüxüne ga iãneärü äëxgacü yĩxücèx. ¹³—Rü yexguma tauta inaxüächigu, rü naxcèx nangema ga 10 ga norü duüxügü. Rü wüxichigüna ngĩxü naxã ga wüxitchinü ga tatanücü ga dīeru. Rü ñanagürü nüxü:

“¡Ngĩmaã pepuracüe rü ngĩxü pimuxëë i ñaã dīeru ñuxmatáta chataegu!” ñanagürü. ¹⁴—Natürü yema iãnecüãx ga duüxügü rü naxchi naxaie ga guma cori. Rü yemacèx nawenaãma nayamugü ga ñuxre ga orearü ngeruüḡü na nachiuãneärü äëxgacümaã nüxü yanaxugüxücèx na tama nanaxwëxegüxü na norü äëxgacüxü na yĩxücèx ga guma cori. ¹⁵—Natürü nachiuãneärü äëxgacü rü nayangucuchixëëãma ga guma cori. Rü ñuxüchi ga guma cori rü norü iãnecèx nataegu na yéma äëxgacü na yĩxücèx. Rü yexguma ínanguxgu rü naxcèx nangema ga yema 10 ga norü duüxügü ga dīeru nüxna ngĩxü naxãxü, yerü nüxü nacuáxchaü ga ñuxrechigü ngĩxü na yamuxëëxü ga norü dīeru ga wüxichigü ga yema norü duüxügü. ¹⁶—Rü yema nüxĩra dīeru nüxna ngĩxü naxãxü rü norü corixütawa nangu, rü ñanagürü:

“Pa Corix, curü dīeru rü 10 èxpüxcüna ngĩxü chimuxëë”, ñanagürü. ¹⁷—Rü guma Cori ga yexwaca äëxgacüxü ingucuchicü rü nanangãxü, rü ñanagürü:

“Wüxi i mexü i chorü duüxü quixĩ. Maneca meãma namaã cupuracü i ngëma íraxü i dīeru i cuxna chaxãxü. Rü ñuxma rü 10 ya iãnegüarü äëxgacüxü tá cuxü chixixëë”, ñanagürü. ¹⁸—Rü yéma nangu ga to ga norü duüxü, rü ñanagürü:

“Pa Corix, curü dīeru rü wüximëëxpüxcüna ngĩxü chimuxëë”, ñanagürü. ¹⁹—Rü norü cori nanangãxü rü ñanagürü nüxü:

“Cuma rü wüximëëxpüx ya iãnegüarü äëxgacüxü tá cuxü chixixëë”, ñanagürü. ²⁰—Rü yéma nangu ga to ga norü duüxü rü ñanagürü nüxü:

“Pa Corix, ñaã iyixĩ i curü dīeru. Rü wüxi ya dechugu ngĩxü chanuque, rü ngëmaãcü ngĩmaã changuxü. ²¹—Yerü cuxcèx chamuü, erü wüxi i yatü i aüxü quixĩ. Rü cunayauxtanü i ngëma tama cuxrü ixixü, rü cunayaxu i nanetüarü o i ngextá tama cuma ícutoexüwa”. ²²—Rü yexguma ga guma äëxgacü rü ñanagürü nüxü:

“Wüxi i chorü duüxü i chixexü quixĩ i cumax. Rü curü oretama nixĩ i cuxü ixuxü na cuchixexü. Marü nüxü cucuèxchirèx ga na chaxaüxü, rü chanayautanüxü i ngëma tama choxrü ixixü, rü chanayaxuxü i nanetüarü o i tama choma ichatoxü. ²³—¿Natürü tüxcüü tama bancugu choxü ngĩmaã cunguxü i chorü dīeru na ngëma choxü ngĩxü yamuxëëgüxücèx, rü ngëmaãcü mucü ngĩxü na chayaxuxücèx i ngëxguma íchanguxgu?” ñanagürü. ²⁴—Rü yexguma ga äëxgacü rü yema yexmagüxümaã nüxü nixu, rü ñanagürü:

“¡Nüxna ngĩxü peyaxu i ngëma dīeru, rü ngëma 10 i dīeru nüxü ngëxmaxüna ngĩxü pexã!” ñanagürü. ²⁵—Rü nümagü rü nanangãxügü, rü ñanagürügü:

“Natürü, Pa Corix, nūma rü marü nüxü ingēxma i 10 i dīeru”, ñanagürügü.
26 –Rü guma ãēxgacü nanangãxü, rü ñanagürü:

“Pemaã nüxü chixu rü texé ya chauga ñnuxē rü yexera tá tūxna chanaxã. Natürü texé ya tama chauga ñnuxē rü tá tūxna chanayaxu i woo ngēma íraxü i tūxü ngēxmaxü. 27 –Rü yema chorü uwanügü ga tama naxwèxegüxü ga norü ãēxgacüxü na chiixü, jrü nuã penagagü, rü nuã chopēxegu peyadaí!” ñanagürü.

Ngechuchu rü Yerucharéügu naxücu
(Mt 21.1-11; Mr 11.1-11; Cu 12.12-19)

28 Rü yema orexü yaxuxguwena ga Ngechuchu, rü inixüchigü ga Yerucharéüwa na naxüxü. 29 Rü yexguma marü nawa nangugüchaügu ga guma ñānegü ga Bechagué rü Betāniā ga Oríbunecüarü Mēxpüneārü ngaicamana yexmagüne, rü Ngechuchu nanamu ga taxre ga norü ngúexügü. 30 Rü ñanagürü nüxü: –¡Gua ñānexācüwa pexī! Rü ngēxma tá nüxü peyangau i wüxi i buru i ngexwaca yaxü i ngēxma ngaxüxü i taguma texé natagu aunagüxü. ¡Rü peyawēxü, rü nuã penaga! 31 –Rü ngēxguma texé pexna çaxgu na tacücèx peyawēxüxü i ngēma buru, jrü tümamaã nüxü pixu rü ñapegügü:

“Torü Cori nanaxwèxe”, ñapegügü tūxü! 32 Rü yéma naxī ga yema taxre ga norü ngúexügü. Rü yexma nüxü nayangau ga yema buru ga Ngechuchu namaã nüxü ixuxürüü. 33 Rü yexguma yawēxügüāgu ga yema buru, rü norü yoragü rü yema ngúexügüna nacagüe, rü ñanagürügü: –¿Tüxcüü peyawēxü i ngēma buru? –ñanagürügü. 34 Rü nūmagü nanangãxügü, rü ñanagürügü: –Rü tayawēxü erü torü Cori nanaxwèxe –ñanagürügü. 35 Rü Ngechuchuxütawa nanagagü ga yema buru. Rü yema norü ngúexügü rü norü gáuxüchirumaã nanatütägü. Rü ñuxüchi Ngechuchuxü natagu naxaunagüxēegü. 36 Rü duüxügü rü Ngechuchupēxewa norü gáuxüchirumaã nayachamagü ga nama. 37 Rü yexguma inaxügüāgu na ínaxīgüxü nawa ga yema nama ga Oríbunecüarü Mēxpünewa yarüdaexü, rü guxüma ga yema duüxügü ga yaxögüxü ga nawe rüxixü rü inanaxügü ga taāēācüma aita na naxüexü rü tagaācü Tupanaxü na yacuèxüügüxü naxcèx ga guxüma ga yema cuèxruügü ga taxü ga nüxü nadaugüxü ga Tupanaärü poramaã naxüxü ga Ngechuchu. 38 Rü ñanagürügü: –¡Namecümaxüchi ya daa tórü ãēxgacü ya Tupanaégagu núma ücü! ¡Rü pema rü ta, Pa Daxüçüāx, rü petaāxégü rü nüxü picuèxüügü ya Tupana! –ñanagürügü. 39 Rü yéma duüxügütanüwa nayexmagü ga ñuxre ga Parichéügü. Rü ñanagürügü Ngechuchuxü: –Pa Ngúexēruüx, ¡Yangagü i ngēma cuwe rüxixü i duüxügü na yanachianegüxüçèx! –ñanagürügü. 40 Natürü Ngechuchu nanangãxü rü ñanagürü nüxü: –Pemaã nüxü chixu rü ngēxguma chi iyanangeèxgügu i ñāã duüxügü, rü daa nutagü ya namacüwawa ngēxmagücü rü chi nüxī aita naxüe –ñanagürü. 41 Rü yexguma Yerucharéüärü ngaicamana nanguxgu ga Ngechuchu, rü guma ñānecüāx ga duüxügücèx naxaxu. 42 Rü ñanagürü: –Pa Yerucharéüçüāxgü, chierü ñōma i ngunexügu nüxü pecuèxgu na texé aixcüma taāē pexna āxü. Natürü ngēma rü pexchawa inicux i ñuxma, rü taxuacüma nüxü pecuèx. 43 –Rü tá guxchaxügü pexü naxüpetü. Rü perü uwanügü tá nanaxü i norü poxüchica i norü guxüçüwawa ya perü ñāne. Rü norü churaragü tá pexü ínachoeguāchi, rü guxüçüwawa tá pexcèx ne naxī. 44 –Rü tá nāgu napogüe ya perü ñāne, rü tá pexü nadai. Rü taxucütāma ya nuta ngextá nügüxétü nanugüxüra i perü ñāneärü poeguxütapüwa. Rü ngēmaācü tá pexü naxüpetü, yerü tama nüxü pecuèxgüchaü ga yexguma Tupana petanügu naxüānegu –ñanagürü.

Ngechuchu rü tupauca ga taxünewa ínanawoxü ga duüxügü ga yéma tax-egüxü

(Mt 21.12-17; Mr 11.15-19; Cu 2.13-22)

⁴⁵ Rü Ngechuchu rü tupauca ga taxünewa nangu rü yexma naxücu. Rü inanaxügü na ínawoxüãxü ga yema duüxügü ga tupauca ga taxünewa tax-egüxü. ⁴⁶ Rü Ngechuchu rü ñanagürü nüxü: —Tupanaârü ore i ümatüxüwa rü ñanagürü:

“Chopata rü yumüxëpataü nixi”.

Natürü pema rü ngítèèxgüxpataü peyaxixëë —ñanagürü. ⁴⁷ Rü guxü ga ngunexügu rü tupauca ga taxünewa nayangüxëëtae ga Ngechuchu. Natürü ga paigüarü äëxgacügü, rü ngüexëëruügu ga Moïchëarü mugüwa ngüxëëtaegüxü, rü Yerucharéüârü äëxgacügü, rü naxcëx nadaugü ga ñuxâcü tá na yamëxgüãxüçëx. ⁴⁸ Natürü taxucürüwa tacü namaã naxügü, yerü guxüma ga duüxügü rü namaã nataãëgü, rü meã inarüxînüë ga norü ore.

20

Ngechuchuna nacagü na texëarü oregagu tupauca ga taxünewa nangüxëëtaexü

(Mt 21.23-27; Mr 11.27-33)

¹ Wüxi ga ngunexü ga Ngechuchu rü tupauca ga taxünewa nayexma. Rü nanangüexëë ga duüxügü, rü namaã nüxü nixu ga Tupanaârü ore. Rü yexguma íyadexayane rü yéma nangugü ga paigüarü äëxgacügü, rü ngüexëëruügu ga Moïchëarü mugüwa ngüxëëtaegüxü, rü Yudíugüarü äëxgacügüerugü. ² Rü ñanagürügü nüxü: —¿Texëarü mugagu nixi i cunaxüxü i ngëma núma cuxüxü? ¿Rü texé cuxü tamu na cunaxüxüçëx i ngëma? — ñanagürügü. ³ Rü yexguma ga Ngechuchu rü ñanagürü nüxü: —Choma rü tá ta pexna chaca, rü chanaxwëxe i choxü pengãxügü. ⁴ —¿Rü texé tanamu ga Cuáü na duüxügüxü ínbaiüxëëxüçëx? ¿Pexcëx rü Tupana yíixü ga namucü rü ëxna duüxügümare? —ñanagürü. ⁵ Rü yexguma ga Parichéugü rü inanaxügüe ga nügümaã na yaporagatanücüüxü. Rü nügümaãtama ñanagürügü: —¿Ñuxü ñagüxü tá? Erü ngëxguma chi:

“Tupana núma nanamu”, ñagügu, rü nüma rü chi ñanagürü tüxü:

“¿Rü tüxcüü ga tama nüxü peyaxögüxü?” ñanagürü chi tüxü. ⁶ —Rü ngëxguma chi ñagügu:

“Yatügümare nuã nanamu”, ñagügu, rü guxü i duüxügü chi nutamaã tüxü ínamuxüchigü, rü tüxü chi nadai. Erü nümagü i duüxügü rü nagu narüxînüë na Tupana yíixü ga Cuáüxü mucü. ⁷ Rü Ngechuchuxü nangãxügü rü ñanagürügü: —Tama nüxü tacüx ga texé núma na namuxü ga Cuáü ga baiüxëëruü — ñanagürügü. ⁸ Rü yexguma ga Ngechuchu rü ñanagürü nüxü: —Choma rü ta tãütáma pemaã nüxü chixu na texé choxü muxü na chanaxüxüçëx i ngëma choxna naxcëx peçaxü —ñanagürü.

Ore ga puracütanüxü ga chixëügu ixuxü

(Mt 21.33-44; Mr 12.1-11)

⁹ Rü inanaxügü ga Ngechuchu ga duüxügümaã na yadexaxü. Rü ñaã ore ga cuëxruüxü namaã nixu, rü ñanagürü: —Nayexma ga wüxi ga yatü ga wüxi ga ubanecü ücü ga norü naãnewa. Rü ñuxüchi ñuxre ga puracütanüxüna nanaxã na nüxna nadaugüxüçëx rü yixcama rü norü yoramaã na yayauxyegüãxüçëx ga yema norü o. Rü ñuxüchi ga guma yatü rü nixü ga yéma rü nuxcüma nataegu. ¹⁰ —Rü yexguma nawa nangüxgu ga na yadauxü ga yema ubagü, rü guma yatü rü yéma puracütanüxügüxütawa nanamu ga wüxi ga norü duüxü na naxcëx íyaçaxüçëx ga yema ubagü ga nüxna üxü. Natürü yema

puracütanüxügü rü nanaçuaixgü ga guma yatüarü duüxü, rü taxuüma ga uba nüxna naxägü. Rü yemaäcü ínayamugü. ¹¹—Rü yexguma ga guma yatü rü wenaxârü to ga norü duüxü yéma ta namu. Natürü ga yema puracütanüxügü rü chixexü namaã nixugüe, rü nanaçuaixgü, rü taxuüma ga uba nüxna naxägü. Rü yemaäcü ínayamugü. ¹²—Rü wenaxârü to ga norü duüxü yéma ta namu ga guma yatü. Natürü ga yema puracütanüxügü rü nanapixëë, rü ínatëxüchigü ga yema naãnewa. ¹³—Rü düxwa ñanagürü ga guma naãneârü yora:

“¿Tacü tá chaxüxü i ñuxmax? Rü name nixí i chaune ya nüxü changechaücü ngema chanamu. Rü ngëxguma nüxü nadaugügu rü bexmana naga tá naxínüë”, ñanagürü. ¹⁴—Natürü ga yema puracütanüxügü rü yexguma guma yatü nanexü nadaugügu, rü nügümaã ñanagürügü:

“Ñaaãrü tá nixí i ñaã naãne i yixcama. ¡Rü ngíxã tayamëxgü na tórü na yíixüçèx!” ñanagürügü. ¹⁵—Rü ínatëxüchigü ga yema naãnewa, rü nayamëxgü —ñanagürü ga Ngechuchu. Rü yexguma ga Ngechuchu rü duüxügüna naca, rü ñanagürü: —¿Tacü tá ngëma puracütanüxümaã naxü i ngëma naãneârü yora i ñuxmax? ¹⁶—Rü ngema tá naxü rü tá nanadai i ngëma puracütanüxügü, rü togüna tá nanaxã i norü naãne —ñanagürü ga Ngechuchu. Rü yexguma yemaxü naxínüëgu ga duüxügü rü ñanagürügü: —Chierü tama ngëmaäcü nangupetüxëëãxgu ya Tupana —ñanagürügü. ¹⁷ Natürü Ngechuchu rü nüxü nadawenü, rü ñanagürü nüxü: —¿Natürü ñuxü ñaxüchiga nixí i ngëma Tupanaârü ore i ümatüxü i ñaxü?:

“Yima nuta ya mecü ya ñârü üruügü nüxü oechirécü, rü ñuxma rü yimatama nixí ya Tupana nüxíra yaxüchicü na namaã inaxügüãxü ya ípata”, ñaxü. ¹⁸ Rü ñanagürü ta ga Ngechuchu: —Texé ya yima nutamaã yarüñaxë, rü tá itapoügü. Rü yixema tümaetügu nanguxe ya yima nuta, rü tá tüxü niñáixmü —ñanagürü ga Ngechuchu. ¹⁹ Rü ga paigüarü äëxgacügü rü ngüexëëruügü ga Moïchéarü mugüwa nguxëëtaegüxü, rü yexgumatama Ngechuchuxü niyauxgüchaü. Yerü nüxü nacuëxgü ga nachiga na yíixü ga yema ore ga cuëxruü ga nüxü yaxuxü. Natürü tama nayayauxgü, yerü duüxügüxü namuë.

Äëxgacüaxü dīērumaã naxütanüxüchiga
(Mt 22.15-22; Mr 12.13-17)

²⁰ Rü yemacëx ga yema paigüarü äëxgacügü rü Ngechuchuxütawa nanamugü ga ñuxre ga norü duüxügü na mexü i duüxügürüü yéma iyanaxínüëxüçèx natürü naxcèx na nadaugüxüçèx ga ñuxäcü nachiüãneârü äëxgacüxütawa Ngechuchuxü na ínaxuaxügüxüçèx. ²¹ Rü yemacëx Ngechuchuna nacagü rü ñanagürügü: —Pa Ngüexëëruüx, toma nüxü tacuëx rü aixcüma nixí i ngëma nüxü quixuxü rü ngëma namaã cungüexëëtaexü. Rü tama duüxüârü düxëtüxünegu cudawenü erü nacüma nixí i cungügüxü. Rü aixcüma cunangüexëë i duüxügü na Tupana naxwëxexüãcüma namaxëxüçèx. ²²—Rü dücax, ngëma ñãneârü dīēru i äëxgacü ya tacü ya Dumacüãx naxwëxexü na tanaxütanüxü, ¿rü namexü yíixü na nüxü tanaxütanüxü rü ëxna tama? —ñanagürügü. ²³ Natürü Ngechuchu nüxü nacuëxama na chixexügu naxínüëxü ga yema duüxügü, rü yemacëx ñanagürü nüxü: —¿Tüxcüü i chixexügu choxü penguxëëchaü? ²⁴—¡Choxü ngíxü pewé i wüxi i dīēru na ngíxü chadauxüçèx! ¿Rü texéhicünëxã rü texéëga ngígu üx? —ñanagürü. Rü nanangãxügü rü ñanagürügü: —Dumacüãx ya äëxgacü ya tacüchicünëxã nixí —ñanagürügü. ²⁵ Rü yexguma ga Ngechuchu rü ñanagürü nüxü: —¡Äëxgacüna ngíxü pexã i ngëma äëxgacüarü ixicü, rü Tupanana ngíxü pexã i ngëma Tupanaârü ixicü! —ñanagürü. ²⁶ Rü yemaäcü ga Ngechuchu rü woo norü orewa rü taxucürüwama

chixexügu nananguxêëgü ga duüxügüpêxewa, yerü meãma nanangãxü. Rü guxüma ga duüxügü rü nangeëxgümare yerü nabaixãchiãëgü namaã ga yema norü ore.

*Chaduchéugü rü Ngechuchuna nacagüe rü ngoxi wena namaxê i duüxügü
(Mt 22.23-33; Mr 12.18-27)*

²⁷ Rü Ngechuchuxütawa ínayadaugü ga ñuxre ga Chaduchéugü. Rü nümagü nixí ga nagu naxínüëxü na tagutáma wena namaxêxü i yuexü. Rü yemacêx Ngechuchuxü ñanagürügü: ²⁸ —Pa Ngúexêëruüx, Moïchéarü mugüwa rü ñanagürü:

“Ngëxguma wüxi ya yatü naxmèx ngexacüyane nayuxgu, rü name nixí i naëneëtama ngímaã naxãmèx i ngëma yutecü i naxümèx, na ngëmaãcü naxãxãcüxücèx nüxü ya naëneë ya marü yucü”,

ñanagürü ga yema ore. ²⁹ Rü ñanagürügü ta ga Chaduchéugü: —Nayexma ga 7 ga nügüeneë. Rü naxãmèx ga guma yacü, natürü tauta naxãxãcüyane nayu. ³⁰ —Rü yexguma naí ga naëneë nüxí ngímaã naxãmèx ga yema ngecü. Rü guma rü ta nayu, rü nangexacü. ³¹ —Rü yexguma rü naí ga naëneë nüxí ngímaã naxãmèx. Rü yemaãcü gucüma ga guma 7 ga nügüeneëgü rü ngímaã naxãmèx ga yema nge. Rü gucüma nayue tauta naxãxãcüyane. ³² —Rü ngíma rü ta düxwa iyu ga yema nge. ³³ Rü ngëxguma yuexü wena maxëgu, ¿rü ngecüürüücü naxmèx tá iyixí i ngëma nge? Yerü yexguma namaxëgu rü gucüma ga guma 7 ga nügüeneë ngímaã naxãmèx —ñanagürügü. ³⁴ Rü yexguma ga Ngechuchu rü nanangãxü rü ñanagürü: —Ñoma i naãnewa rü yatügü rü nixãmèxgü rü ngexügü rü nixãtegü. ³⁵ —Natürü ngëma duüxügü i Tupanapêxewa mexü na wena namaxêxü na daxüguxü i naãnewa naxíxücèx rü ngëma rü tãütáma nixãmèxgü rü êxna nixãtegü. ³⁶ —Erü ngëma rü tagutáma nayue. Rü daxücüãx i Tupanaärü orearü ngeruügürüü tá nixígü. Rü aixcüma Tupanaxãcügü nixígü erü yuwa ínarüdagü. ³⁷ —Rü yema ore ga naixãcü ga iyauratanücüxúnechigawa, rü Moïché tüxü nüxü nacüxêë rü yuexü rü tá wena na namaxêxü. Erü yema orewa, rü ñanagürü ga Cori ga Tupana:

“Choma nixí i Abráüärü Tupana, rü Ichaáarü Tupana, rü Acobuarü Tupana”, ñanagürü. ³⁸ —Rü ngëmawa nüxü tacüx rü woo ñoma i naãnewa nayuegu i duüxügü, natürü Tupanacèx rü guxüguma namaxê —ñanagürü. ³⁹ Rü yexguma ga ñuxre ga ngúexêëruügü ga Moïchéarü mugüwa nguxêëtaegüxü rü ñanagürügü: —Aixcüma meãma nüxü quixu, Pa Ngúexêëruüx —ñanagürügü. ⁴⁰ Rü yemawena rü marü namuëë ga tacüchigacèx Ngechuchuna na nacagüexü.

*¿Texé nane nixí ya Cristu?
(Mt 22.41-46; Mr 12.35-37)*

⁴¹ Rü Ngechuchu rü ñanagürü nüxü: —¿Tüxcüü duüxügü nüxü nixugüe rü Cristu rü nuxcümaücü ga ãëxgacü ga Dabítaa nixí? ⁴²⁻⁴³ —Yerü Dabítama ñaãcü nanaxümatü ga Wiyaegüarü poperawa:

“Tupana rü chorü Cori ya Cristuxü ñanagürü: ‘¡Nuã chorü tügünecüwawa rüto, ñuxmatáta cuxmèxwa chanangëxmagüxêë i curü uwanügü na namaã icucuáxücèx!’ ”

ñaãcü nanaxümatü. ⁴⁴ Rü ñanagürü ga Ngechuchu: —¿Ñuxücürüwa i Dabítaa yíxü ya Cristu ega nümatama ga Dabí rü norü Corimaã naxuãgu? —ñanagürü.

*Ngechuchu rü nüxü nixu na tama nameärü maxüãxgüxü ga yema ngúexêëruügü ga Moïchéarü mugüwa nguxêëtaegüxü
(Mt 23.1-36; Mr 12.38-40; Lc 11.37-54)*

⁴⁵ Rū guxūma ga duūxūgū rü yéma inarūxīnūē ga yexguma Ngechuchu norū ngúexūgūxū ñaxgu: ⁴⁶ —¡Pexuãēgū naxcèx i ngēma ngúexēēruūgū i Moīchearū mugūwa nguxēētaegūxū! Erü nūmagū rü norū me nixī i mexū i naxchirumaã na naxīãneãxū. Rū ítamūwa nanaxwèxegū na duūxūgū meã nūxū rümoxēgūxū. Rū ngutaquēxepataūgūwa rü norū me nixī i ãēxgacūgūmèxwēxewa na natogūxū. Rū òna i taxūwa rü ngēma ònaārū yoraxūtawa ũgūxū i nachicacèx nadaugū. ⁴⁷ —Rü tūxū nawomūxēēgūãcūma tūxna nanapuxū ya tūmapatagū ya yíxema yutegūxe. Rū ñuxūchi nanamèxēē i norū yumūxēgū na duūxūgū nagu rüxīnūēxūcèx na aixcūma mexūgū yīīgūxū. Natürü nūmagū tá nixī i yexeraãcū napoxcuxū —ñanagürü.

21

Yutecüarü ãmarechiga (Mr 12.41-44)

¹ Rū yexguma tupauca ga taxūnewa nayexmagu ga Ngechuchu, rü yéma nūxū nadau ga ñuxãcū duūxūgū ga idīeruãxū Tupanana ngīxū na naxāgūxū ga norū dīeru ga tupaucaarū dīeruchiūwa. ² Rū ngīxū nadau ta ga wūxi ga ngecū ga yutecū ga ngearū dīeruãxcū ga tupaucaarū dīeruchiūgu taxretachinū ga íraxūchicū ga dīeru ngīxū ixūcuchicū. ³ Rū ñanagürü ga Ngechuchu: —Aixcūma pemaã nūxū chixu rü ñaã ngecū i yutecū i ngearū dīeruãxcū rü guxū i togū i dīeru ngīxū ixāgūxūārū yexera ngīxū ixā. ⁴ —Erü guxūma i togū rü ngīxū inaxā i ngema nūxū íyaxūgūcū. Natürü ngīma ngīxū natauxyane ngīxū ixā i guxcūma i ngīxū ngexmaxcū i ngīrū ònatanū —ñanagürü.

Ngechuchu nanaxunagū na tupauca ya taxūnegu tá napogüexū (Mt 24.1-2; Mr 13.1-2)

⁵ Rū ñuxre ga norū ngúexūgū rü nidexagū nachiga ga tupauca ga taxūne ga ñuxãcū na namexēchixū ga naxtapūx ga nutanaxcèxgū, rü na namexēchixū ga guxūma ga guma tupaucaarū yemaxūgū ga duūxūgū nūxna ãmarexū. Rū yexguma ga Ngechuchu rü ñanagürü: ⁶ —Rü nawa tá nangu i ngunexūgū i guxūnetama ya daa tupauca ya nūxū pedauxūne, rü tá nagu napogūe. Rū naxtapūxarū nutagū rü taxucūtáma nūgūétū naxūxūra, rü bai ya wūxi —ñanagürü.

Cuèxruūgū i tá nūxū idauxū naxūpa na nagúxū i naãne (Mt 24.3-28; Mr 13.3-23)

⁷ Rū yexguma ga norū ngúexūgū rü Ngechuchuna nacagū, rü ñanagürügū: —Pa Ngúexēēruūx, ¿ñuxgu tá nixī i nangupetūxū i ngēma nūxū quixuxū? ¿Rü tacūwa tá nūxū tacuèx na nangupetūxū tá i ngēma? —ñanagürügū. ⁸ Rū Ngechuchu rü ñanagürü: —¡Pexuãēgū tá na taxuūma pexū womūxēēxūcèx! Erü muxūchixū tá chaugu nūgū nicuxgū rü tá ínangugū rü ñanagürügū tá:

“Choma nixī i Cristu, rü paxa tá nagux i naãne”, ñanagürügū tá pexū. ¡Natürü tãütáma nūxū peyaxōgū! ⁹ —Rü ngēxguma tá nūxū pexīnūēgu na nūgū nadēixū i wūxi i nachiūãne to i nachiūãnemaã, rü ēxna nūxū pexīnūēgu na wūxi i nachiūãnewatama rü duūxūgū rü norū ãēxgacūmaã nūgū nadēixū, ¡rū tãütáma pebaixāchiãgū! Erü ngēmaãcū tá nangupetū i noxrix. Natürü tãütáma naãneārū gux nixī i ngēma. ¹⁰ —Erü wūxi i ãēxgacūarū churaragū rü to i ãēxgacūarū churaragūmaã tá nūgū nadai. Rü wūxi i nachiūãne rü to i nachiūãnemaã tá nūgū nadai. ¹¹ —Rü nūmaxū i nachiūãnegūwa rü poraãcū tá naxīãxāchiane, rü poraãcū tá nagux i taiya, rü tá nataxūchi i ãaaweane. Rü duūxūgū tá nūxū nadaugū i daxūwa i tacū i namaã nabaixāchiexū, rü taxū i cuèxruūgū. ¹² —Natürü naxūpa i guxūma i ngēma rü duūxūgū tá pexū

ínayauxũ, rü tá pewe ningẽxũtanü. Rü ngutaquẽxepataũgüwa tá pexũ nagagü na ngema pexna nacagüxũcèx, rü tá pexũ napoxcue. Rü nachiuãnegüarü ãẽxgacügüpẽxewa tá pexũ nagagü, naxcèx na chorü duũxũgü pixĩgũxũ. ¹³ — Rü ngẽmaãcü tá pexũ natauxcha na ãẽxgacügümaã nüxũ pixũ i chauchiga. ¹⁴ — Rü ngẽxguma tá ngema pexũ nagagügu, jrü tãxũ i pexoegaãẽgũxũ naxcèx na tacümaã tá penangãxũxũ na pegüetüwa pechogüxũcèx! ¹⁵ — Erü choma tá pexũ charüngũxẽẽ na nüxũ pecuáxũcèx na tacümaã penangãxũxũ i perü uwanügü. Rü nümagü rü tãütãma nüxũ nacuèxgü na tacümaã pexũ nangãxũgũxũ i ngẽxguma. ¹⁶ — Natürü pema rü woo penatügü, rü peegü, rü peeneëgü, rü peeyèxgü, rü petanüxũgü, rü pemücügü rü tá napechitaegü na purichíagüxũtawa pexũ íyaxuaxũgũxũ. Rü purichíagü rü tá pexũ nadai i ñuxre i pemax. ¹⁷ — Rü guxũ i naãnewa rü duũxũgü tá pexchi naxaie, erü choxũ peyaxõgü rü chorü duũxũgü pixĩgü. ¹⁸ — Natürü woo tacü pexũ üpetügu rü Tupanamẽxẽwa tá pengẽxmagü, rü nüma tá pexũ ínapoxũ rü bai i wüxi i peyae tá ínayarütaxu. ¹⁹ — Rü ngẽxguma aixcüma peyaxõgüamagu rü tama choxũ ípetèxgu, rü tá penayauxgü i maxũ i taguma gúxũ. ²⁰ — Rü ngẽxguma nüxũ pedèuxgu na perü uwanügüarü churaragü Yerucharéũxũ íchomaẽguãchixũ, rü ngẽmawa tá nüxũ pecuèx na paxa tá nagu napogüexũ ya yima ñãne. ²¹ — Rü yíxema Yudéañewa ngẽxmagüxe rü name nixĩ i mèxpúneãnewa tabuxmü. Rü yíxema Yerucharéũwa ngẽxmagüxe rü tanaxwèxe na paxa ítachoxũxũ. Rü yíxema tümaãnewa ngẽxmagüxe rü tama name na ñãnecèx tawoeguxũ. ²² — Erü ngẽma ngunexũgügu tá ínangu i Tupanaãrü poxcu. Rü ngẽmaãcü tá nayanguxẽẽ i guxũma i ngẽma norü ore i ümatüxũwa nüxũ yaxuxũ. ²³ — Rü ngẽma ngunexũgügu rü tá poraãcü tüxũ naguxcha ya yíxema ngexegü ya iitacharaũgüxe rü yíxema imaĩãcügüxe. Erü tá nangẽxma i taxũ i ngúxũ, rü Tupana rü poraãcü tá nanapoxcue i ngẽma duũxũgü. ²⁴ — Rü ñuxre, rü tá norü uwanügü taramaã nanadai. Rü togü, rü tá ínanayauxũ na to i nachiuãnewa nagagüãxũcèx. Rü ñuxũchi i ngẽma norü uwanügü rü tá nagu napogüe ya yima ñãne ya Yerucharéũ. Rü ngẽmaãcü tá nangupetü ñuxmatáta nawa nangu na Tupana ínamuxũxũ i ngema.

Tupana Nanearü taeguchiga

(Mt 24.29-35, 42-44; Mr 13.24-37)

²⁵ — Rü ngexguma rü tá nangox i cuèxruxũgü. Rü üèxcü rü tauemacü rü woramacurigü rü tá nixĩgachitanü i nachicawa.. Rü guxũ i nachiuãnegüwa rü duũxũgü rü tá nanaxixãchiãetanü rü tá nabaixãchiãegü namaã na poraãcü naxãũgaãchixũ i taxũ i taxtũ rü norü yuapegü. ²⁶ — Rü duũxũgü rü norü muũmaã tá inayayiãxẽ i ngẽxguma nüxũ nadaugu i ngẽma üpetüchaũxũ i ñoma i naãnewa. Erü woo guxũma i tacü i daxũwa nüxũ idauxũ rü tá naxĩãxãchitanü rü tá nu ne nanaxĩmare. ²⁷ — Rü ngẽxguma rü guxũ i duũxũgü i ñoma i naãnecũãx rü tá choxũ nadaugu i ngẽxguma wüxi i caixanexũgu ícharüxĩxgu rü núma chaxũxgu namaã i chorü pora rü üüne. ²⁸ — Rü ngẽxguma inaxũgügu na naxüpetüxũ i ngẽma pemaã nüxũ chixuxũ, rü name nixĩ na petaãẽgũxũ rü meã pedaunagüxũ, erü paxa tá íchangu na pexũ íchanguxũxẽxũcèx — ñanagürü. ²⁹ Rü yemawena rü wüxi ga ore ga cuèxruũxũ namaã nixu ga Ngechuchu, rü ñanagürü: —jDücèx penangugü i iguera, rü ãxna ngẽxürüũxũmare i to i naĩgü! ³⁰ — Rü ngẽxguma nüxũ pedèuxgu na ngexwaca naxüátüxũ, rü ngẽmawa nüxũ pecuèx na paxa tá taunecü na yĩxũ. ³¹ — Rü ngẽxgumarüũ ta i ngẽxguma nüxũ pedèuxgu na nangupetüxũ i ngẽma pemaã nüxũ chixuxũ, rü ngẽmawa tá nüxũ pecuèx na yimama yĩxũ ya Tupana na ãẽxgacü yĩxũcèx. ³² — Aixcüma pemaã nüxũ chixu rü guxũma

i ngēma nūxū chixuxū rü tá ningu naxūpa na nayuexū i duūxūgū i ñuxma maxēxū. ³³ —Daxūguxū i naāne rü ñoma i naāne rü tá nagux. Natürü chorü ore rü tagutáma inayarūxo. ³⁴ —¡Pexuãēgū na tama tacū rü chixexūgagu dūxwa nūxū perūxoexū na peyaxōgūxū! Rū ngēmacèx penaxwèxe na pegūna pedaugūxū na tama pengāxēxū rü ēxna ñoma i naāneārü ngúchaūguama na perūxīnūēxū. Erü ngürüāchi ngēmagu íperūxīnūēyane tá pexū íchayabaixgū. ³⁵ —Rü ñoma wūxi ya yūta ya ngürüāchi tacū iyaxúnerūū tá nixī naxcèx i guxūma i duūxūgū i ñoma i naānecūāx i ngēxguma wenaxārü núma chaxūxgu. ³⁶ —Rü ngēmacèx name nixī i pegū ípemexēēgū. ¡Rü guxūguma peyumūxēgū na ngēmaācū tama pexū naxūpetūxūcèx i ngēma āücūmaxūgū, rü aixcūma pimexūcèx i ngēxguma chopēxewa pengugūgu! —ñanagürü ga Ngechuchu. ³⁷ Rū guxū ga ngunexūgūgu rü tupauca ga taxūnewa nayexma ga Ngechuchu, rü duūxūgūxū nangúexēē. Rū chütacū rü guma Mèxpúne ga Oríbunecūgu āeganegu nayapeexū. ³⁸ Rū guxūma ga duūxūgū rü pèxmamaxūchi tupauca ga taxūnewa nangugūxū na Ngechuchuxū naxīnūēxūcèx.

22

Āēxgacūgū naxcèx nadaugū na ñuxācū Ngechuchuxū yayauxgūxū (Mt 26.1-5, 14-16; Mr 14.1-2, 10-11; Cu 11.45-53)

¹ Rū marü ningaica ga Yudíugüarü peta ga Üpetüchiga ga nagu nangōxgūāxū ga pāu ga ngearü puxēēruūāxū. ² Rū ga paigüarü āēxgacūgū rü ngúexēēruūgū ga Moíchéarü mugūwa nguxēētaegūxū rü naxcèx nadaugū ga ñuxācū duūxūgūechita Ngechuchuxū na yamèxgūxū, yerü duūxūgūxū namuūē. ³ Rū yexguma ga Chataná rü Yuda ga Icariútegu nangaxi. Rū nüma ga Yuda rü yema 12 ga Ngechuchuarü ngúexūgū ga imugūxūtanūxūchirēx nixī. ⁴ Rū nüma ga Yuda rü ínayadau natanūwa ga paigüarü āēxgacūgū rü tupauca ga taxūneārü purichíagüarü āēxgacūgū. Rū namaā nūxū nixu ga ñuxācū na natauxchaxū ga Ngechuchuxū na yayauxgūxūcèx. ⁵ Rū nümagü ga yema āēxgacūgū rü nataāēgū. Rū díeru Yudana ngīxū naxuaxūgū. ⁶ Rū Yuda rü ngixū nayaxu ga yema díeru. Rū inanaxūgū ga naxcèx na nadauxū ga ñuxācū duūxūgūechita Ngechuchuxū na yayauxgūxū ga āēxgacūgū.

Üpetüchigaarü õnawa nachibü ga Cori (Mt 26.17-29; Mr 14.12-25; Cu 13.21-30; 1 Co 11.23-26)

⁷ Rū nawa nangu ga yema petaarü ngunexū ga nagu nangōxgūāxū ga pāu ga ngearü puxēēruūāxū. Rū yema nixī ga ngunexū ga nagu carneruxacū yamèxgūxū naxcèx ga Üpetüchigaarü peta. ⁸ Rū Ngechuchu nanamu ga Pedru rü Cuáú, rü ñanagürü nūxū: —¡Peyamexēēx i tórü õna i Üpetüchigacèx! —ñanagürü. ⁹ Rū nümagü Ngechuchuxū nangāxūgū, rü ñanagürügü: —¿Ngextá nixī i cunaxwèxexū na tanamexēēxū? —ñanagürügü. ¹⁰ Rū Ngechuchu nanangāxū, rü ñanagürü: —Ngēxguma Yerucharéüwa pengugūgu rü ngēxma tá nūxū peyangau i wūxi ya yatü i wūxi i tūxū i dexámaā āācucū ngīxū ingexū. ¡Rü nawe perūxī ñuxmatáta napatawa pengugū! ¹¹ —¡Rü yima ípata ya nagu yaxücune ya yima yatü, rü yima íārü yoramaā nūxū pixu rü ñapegūgū nūxū: “Torü ngúexēēruū rü nūxū nacuáxchaū na ngēxürüüxū yīxū i ngēma ucapu i norü ngúexūgūmaā tá nawa nachibūxū i Üpetüchigaarü õnacèx”, ñapegūgū nūxū! ¹² —Rü tá pexū nūxū nadauxēē i wūxi i ucapu i taxū i marü mexēēxū i norü daxūchiüwa ngēxmaxū. ¡Rü ngēmawa tá penamexēē i ngēma õna i Üpetüchigacèx ixīxū! —ñanagürü nūxū. ¹³ Rū yéma naxī ga nümagü rü nūxū inayangaugū ga guxūma yema Ngechuchu namaā nūxū ixuxürüü. Rü yéma nanamexēēgū ga õna ga Üpetüchigacèx ixīxū. ¹⁴ Rū yexguma nawa nanguxgu

ga ora ga na nachibüexü, rü mechawa narüto ga Ngechuchu namaã ga norü ngúexügü. ¹⁵ Rü yexguma ga Ngechuchu rü ñanagürü: —Ñuxãcü poraãcü choxü nangúchaü na pemaã chachibüxü i ñaã Üpetüchigaarü õnawa naxüpa na chayuxü. ¹⁶ —Natürü pemaã nüxü chixu rü tãütáma wenaxãrü Üpetüchigaarü õnawa chachibü, ñuxmatáta chowa yangu i ngẽma Tupana naxwèxexü — ñanagürü. ¹⁷ Rü yexguma nanayaxu ga wüxi ga pochiyu ga binumaã aãcuxü. Rü Tupanana moxë naxãxira, rü ñuxüchi ñanagürü nüxü ga norü ngúexügü: — ¡Peyaxaxü ya daa binu, rü pegümaã pengau! ¹⁸ —Erü pemaã nüxü chixu rü tagutáma wena chayaxaxü ya binu ñuxmatáta nawa nangu na pecaduarü útanücèx chayuxü na aixcüma pemaã inacuéxücèx ya Tupana —ñanagürü. ¹⁹ Rü nanayaxu ta ga pãü, rü Tupanana moxë naxcèx naxã. Rü ñuxüchi inanabücu, rü norü ngúexügüna nanaxã. Rü ñanagürü nüxü: —Ñaã pãü rü chaxune i pexcèx yuxüchiga nixi. ¡Rü ñaãwena rü ñaãcü tá penaxü na choxna pecuèxãchiexücèx! —ñanagürü. ²⁰ Rü marü chibüwena rü to ga pochiyu ga binumaã aãcuxü norü ngúexügüna naxã, rü ñanagürü: —Daa binu rü Tupanaãrü uneta i ngezwacaxüxüãrü cuèxruü nixi. Rü chaugü ya pexcèx ibacüwa Tupana pexü nüxü nadauxëë na aixcüma yixü i ngẽma norü uneta. ²¹ —Natürü ngẽma yatü i chauechita aëxgacügüna choxü muxchaüxü, rü nuã mechawa tamaã narüto i ñuxmax. ²² —Rü choma i Tupana Nane na duüxüxü chiüxü, rü Chaunatü ixunetaxürü tá chayü. Natürü wüxi i ngechaüxüchi tá nixi naxcèx i ngẽma yatü i aëxgacügüna choxü muxü. ²³ Rü yexguma ga norü ngúexügü rü inanaxügüe ga nügüna na nacagüexü, rü ñanagürügü: —¿Texé tá tixi ya yixema naëchita aëxgacügüna namuxë? —ñanagürügü.

Norü ngúexügü rü nügüna nacagüe na texé tá tixixü ya guxãxü rüyexeraxe i natanüwa

²⁴ Rü yexguma ga yema ngúexügü rü nügümaã niporagatanücüü nachiga na texé tá tiixü ya natanüwa guxããrü yexera ixixë. ²⁵ Natürü ga Ngechuchu rü ñanagürü nüxü: —Ñoma i naãnewa rü guxü i nachiüãnegüarü aëxgacügü, rü poraãcü norü duüxügüxü namugü. Rü ñuxüchi nügü yaxugügu rü norü duüxügüarü dauruü i mexügü nixigü. ²⁶ —¡Natürü pema rü tãütáma ngëxgumarüü pixigü! Rü ngëxguma texé naxwèxegu na guxããrü yexera tiixü i petanüwa, rü name nixi na tügü ítarüxíraxü i guxüma i tümamücügütanüwa. Rü texé naxwèxegu na peeru tiixü i petanüwa, rü name nixi i noxri rü guxããrü ngüxëëruü tixi. ²⁷ —Rü ñoma i naãnewa rü corigü rü mechawa narütogü na nachibüexücèx, rü norü duüxügü nixi i ngẽma naxcèx õna ixüxü rü nüxü rüngüxëëxü. Natürü tatanüwa rü tama ngẽmaãcü nixi, erü choma i perü cori na chiixü rü perü ngüxëëruü chixi. ²⁸ —Rü pemagü nixi ga guxügüma chauxütawa peyexmagüxü ga yexguma ngúxü chingexgu. ²⁹ —Rü ngẽmacèx i choma rü aëxgacügüxü pexü chixigüxëë yema chaunatü aëxgacüxü choxü ingucuchixëëxürü. ³⁰ —Rü ngẽmaãcü aëxgacü íchixixüwa rü chomaã tá pechibüe rü tá pexaxegü. Rü aëxgacüchicawa tá perütogü na norü maxücèx nüxna pecagüxü i guxüma i Yudiügü —ñanagürü.

Ngechuchu nüxü nixu na Pedru tá nügü icüxü na norü ngúexü yixü
(Mt 26.31-35; Mr 14.27-31; Cu 13.36-38)

³¹ Rü Pedruxü ñanagürü ta ga Cori ga Ngechuchu: —Pa Pedrux, Chataná rü pexcèx ínaca na chixexümaã poraãcü pexü naxüxücèx. ³² —Natürü choma rü Chaunatüxü cuxcèx chacèèxü na taguma nüxü curüxoxücèx na cuyaxõxü. Rü ngẽmacèx i cumax, Pa Pedru, rü ngëxguma chauxcèx cutaeguxgu, rü chanaxwèxe i nüxü curüngüxëë i cumücügü na nümagü rü yaxõgüechaãxücèx —ñanagürü. ³³ Rü ñanagürü ga Pedru: —Pa Corix, choma rü marü íchamemare

na wüxigu cumaã na chapoxcuxü rü êxna wüxigu cumaã na chayuxü — ñanagürü. ³⁴ Natürü Ngechuchu rü ñanagürü nüxü: —Pa Pedrux, cumaã nüxü chixu rü ñomatama i chütaxügu naxüpa na otá içaxü, rü cuma rü tomaẽxpüxcüna tá nüxü quixu na tama choxü cucuáxü —ñanagürü.

Marü ningaica ga na guxchaxügü nüxü üpetüxü

³⁵ Rü yexguma ga Ngechuchu rü norü ngúexügüna naca, rü ñanagürü: —Yexguma pexü chimugügu ngearü chocaãxgüxemaã rü ngearü dïeruãxgüxemaã rü ngearü chapatuãxgüxemaã, ¿rü tacü pexü taxuxü ga yexguma? —ñanagürü. Rü nümagü nanangãxügü rü ñanagürügü: —Taxuüma —ñanagürügü. ³⁶ Rü yexguma norü ngúexügüxü ñanagürü ga Ngechuchu: —Natürü ñuxma rü texé ya petanüwa ya chocaãxë rü tanaxwëxe na ítayangexü i tümaãrü choca rü tümaãrü dïeruchixü rü ta. Rü ngëxguma texé ngearü taraãxgu rü tanaxwëxe i namaã tataxe i tümaãrü gáuxüchiru na tümaãrü poxüruü i taracèx tataxexücèx. ³⁷ —Erü pemaã nüxü chixu rü chauchiga nixi i ngëma Tupanaãrü ore i ümatüxü i ñaxü:

“Wüxi i máetaxürüü tá nanapoxcugü rü tá nayamèxgü”, ñaxü. Erü guxüma i ngëma chauchiga ümatüxü i Tupanaãrü ore i ümatüxüwa rü aixcüma ngëmaãcü tá ningu —ñanagürü. ³⁸ Rü yexguma ga norü ngúexügü rü ñanagürügü: —Pa Corix, nuã nangëxma i taxre i tara —ñanagürügü. Rü nüma ga Ngechuchu rü nanangãxü rü ñanagürü: —Marü ningu i ngëma —ñanagürü.

Ngechuchu rü Yechemaníwa nayayumüxë

(Mt 26.36-46; Mr 14.32-42)

³⁹ Rü yexguma ga Ngechuchu rü ínaxüxü ga guma ñánewa. Rü Oríbunecüarü Mèxpúnewa naxü, yerü woetama nacüma nixi ga yéma na naxüüxüxü. Rü norü ngúexügü rü ta nawe narüxi. ⁴⁰ Rü yexguma yema nachicawa nanguxgu, rü norü ngúexügüxü ñanagürü: —¡Tupanana naxcèx peça na pexü nangüxëxücèx na tama Chatanáãrü ügagu chixexügu peyixücèx! —ñanagürü. ⁴¹ Rü yexguma ga Ngechuchu rü yéamaxüra 50 ga metruwa norü ngúexügüna naxü. Rü yexma nacaxãpüxü rü nayumüxë. ⁴² Rü ñanagürü: —Pa Chautatüx, ngëxguma cuma cunaxwëxegu, ¡rü nüxna choxü ínanguxuchixëë i ñaã ngüxü i tá choxü üpetüxü! Natürü chanaxwëxe i cunaxü i curü ngúchaü rü tama i choxrü —ñanagürü. ⁴³ Rü yexguma wüxi ga daxücüãx ga Tupanaãrü orearü ngerü rü naxcèx nangox, rü nanaporaxëë. ⁴⁴ Rü poraãcü nanaxixãchiãë ga Ngechuchu, rü yemacèx yexeraãcü nayumüxë. Rü yema na naxixãchiãëxümaã poraãcü nanaxaiyaãchi. Rü guma norü aiyacümaã nichuruxüne. Rü ñoma nagü waixüümüãnewa ichuruxürüü nixi ga norü aiyacü. ⁴⁵ Rü yema ínayumüxëxüwa rü inachi ga Ngechuchu, rü norü ngúexügütanüwa naxü. Rü nüxü inayangau ga na ínapeexü yerü norü ngechaümaã düxwa nayaxtae. ⁴⁶ Rü yexguma ga Ngechuchu rü ñanagürü nüxü: —¿Tüxcüü ípepee? ¡Íperüdagü rü Tupanana naxcèx peça na pexü nangüxëxücèx na tama Chatanáãrü ügagu chixexügu peyixücèx! —ñanagürü.

Ngechuchuxü niyauxgü

(Mt 26.47-56; Mr 14.43-50; Cu 18.2-11)

⁴⁷ Rü yexguma íyadexayane ga Ngechuchu, rü yéma nangugü ga muxüma ga duüxügü. Rü Yuda ga Ngechuchuarü ngúexüchirëx ixixü nixi ga naxüpëxexü. Rü Ngechuchucèx nixü na nüxü nachüxácüma nüxü namoxëxücèx. ⁴⁸ Rü Ngechuchu rü ñanagürü: —Pa Yudax, ¿tüxcüü wüxi i chüxumaã cuchauechitae? —ñanagürü. ⁴⁹ Rü yema togü ga Ngechuchuarü ngúexügü ga naxütawa yexmagüxü, rü yexguma nüxü nadaugügu ga yema ngupetüxü rü ñanagürügü nüxü: —Pa Corix, ¿cunaxwëxexü na taramaã

tanadèixü? —ñanagürügü. ⁵⁰ Rû wüxi ga Ngechuchuarü ngúexü rû paigüarü âêxgacüarü duüxü nanapixêê, rû ínanadae ga norü tügünechinü. ⁵¹ Natürü Ngechuchu rû ñanagürü: —¡Ngexrüma na pegü namaã pedèixü! —ñanagürü. Rû yexguma ga Ngechuchu rû yema yatü ga ídaechinüxüxü ningögü, rû nanamexêê. ⁵² Rû Ngechuchu namaã nidexa ga yema âêxgacügü ga norü yauxwa yéma íxü. Rû yema âêxgacügütanüwa nayexmagü ga paigüarü âêxgacügü, rû tupauca ga taxüneärü purichíagüarü âêxgacügü, rû Yudíugüarü âêxgacügüerugü. Rû Ngechuchu rû ñanagürü nüxü: —¿Tüxcüü taragü rû naíxmenèxägümaã chauxcèx nuã pexí ñoma wüxi i ngítèxáxü chiixürüü? ⁵³ — Rû guxü ga ngunexügu ga yexguma petanüwa chayexmagu ga tupauca ga taxünewa, rû tama choxü piyaxgü. Natürü marü nawa nangu na pexü natauxchaxü na choxü piyaxgüxü, erü ñoma nixí i ora na naporaxü i Chataná —ñanagürü.

Pedru inayacux na Ngechuchuxü nacuáxü

(Mt 26.57-58, 69-75; Mr 14.53-54, 66-72; Cu 18.12-18)

⁵⁴ Rû Ngechuchuxü niyaxgü, rû paigüarü âêxgacüpatawa nanagagü. Rû Pedru rû nawe narüxü, natürü yaxüguma nüxü nixüchigü. ⁵⁵ Rû yéma paigüarü âêxgacüpataèxtüarü ngäxüwa, rû purichíagü nanaxügü ga wüxi ga üxü. Rû nüxü ínachomaèguãchi. Rû Pedru rû ta yéma natanüwa narüto. ⁵⁶ Rû yexguma yéma üxücutüwa natoxgu ga Pedru, rû wüxi ga ngecü ga âêxgacüarü duüxü nüxü idau. Rû meãma nüxü idawenü, rû ngígürügü: —Ñã yatü rû Ngechuchutanüxü nixí —ngígürügü. ⁵⁷ Natürü Pedru rû tama nüxü nacuáxchaü ga yema ore, rû ñanagürü: —Pa Ngecüx, choma rû tama nüxü chacuèx ya yima Ngechuchu —ñanagürü. ⁵⁸ Natürü yixcamaxüra rû to ga duüxü Pedruxü nadau, rû ñanagürü nüxü: —Cuma rû ta Ngechuchutanüxü quixí —ñanagürü. Natürü Pedru nanangäxü rû ñanagürü: —Tama nixí, Pa Yatüx. Tama natanüxü chixí —ñanagürü. ⁵⁹ Rû wüxi ga ora ngupetüguwena rû to ga duüxü rû nüxí ñanagürüama: —Aixcümáxüchi ñã yatü rû Ngechuchutanüxü nixí, erü Gariréaanecüãx nixí —ñanagürü. ⁶⁰ Rû yexguma ga Pedru rû ñanagürü: —Pa Yatüx, tama nüxü chacuèx na tacüchigaxü quixuxü —ñanagürü. Rû yexgumatama Pedru ídexayane rû nica ga otá. ⁶¹ Rû yexguma ga Cori ga Ngechuchu rû Pedrucèx nügü ínidau. Rû nüma ga Pedru rû nüxna nacuèxãchi ga yema ore ga Cori ga Ngechuchu namaã nüxü ixuxü ga ñaxü:

“Ñomatama i chütaxügu naxüpa na otá ícaxü, rû tomaèxpüxcüna taxütáma cugü quixu na chorü duüxü quiixü”, ñaxü. ⁶² Rû yexguma ga Pedru rû ínaxüxü ga yéma. Rû poraècüxüchi naxaxu.

Ngechuchugu nidaux- cüraüğü

(Mt 26.67-68; Mr 14.65)

⁶³ Rû yema yatügü ga Ngechuchuna daugüxü, rû nagu nidauxcüraüğü, rû nüxna nanaçuaixcagüxü. ⁶⁴ Rû nayadüxétügü, rû nachiwegu nidagügü, rû ñanagürügü: —¡Nüxü nacuèx na texé cuxü na idagüxü! —ñanagürügü. ⁶⁵ Rû muxüma ga to ga ore ga chixexü namaã nixugüe.

Âêxgacügü ga tacügüpèxewa nanagagü ga Ngechuchu

(Mt 26.59-66; Mr 14.55-64; Cu 18.19-24)

⁶⁶ Rû yexguma yangunegu rû nangutaquèxegü ga Yudíugüarü âêxgacügüerugü, rû paigüarü âêxgacügü, rû ngúexèèruüğü ga Moíchéarü mugüwa nguxèètaegüxü. Rû ñuxüchi norü purichíagüxü namu na napèxewa Ngechuchuxü nagagüxücèx. Rû yéma Ngechuchuna nacagü, rû ñanagürügü: ⁶⁷ —Toma rû nüxü tacuáxchaü rû cuma quiixü i Cristu rû éxna tama. ¡Tomaã

cugü ixu! —ñanagürügü. Rû Ngechuchu nanangãxũ rû ñanagürü: —Ngëxguma chi pemaã nüxũ chixuxgu na choma chiixũ i Cristu, rû tãũ chima choxũ peyaxõgü. ⁶⁸ —Rû ngëxguma chi pexna chacaxgu na tacücèx choxna peçaxũ, rû tãũ chima choxũ pengãxũga, rû tãũ chima choxũ pingëxgü. ⁶⁹ —Natürü ñuxmawena rû choma i Tupana Nane na duixũxũ chiixũ rû Chaunatü ya Tupana ya poracüxütawa tá changëxma —ñanagürü. ⁷⁰ Rû yexguma guxũma ga yema ãëxgacügü nüxna nacagü, rû ñanagürügü: —¿Éxna cuma quiixũ i Tupana Nane? —ñanagürügü. Rû Ngechuchu nanangãxũ, rû ñanagürü: —Ngü. Tupana Nane chixĩ ngëxgumarüü i pematama nüxũ pixuxürüü —ñanagürü. ⁷¹ Rû yexguma nügümaã ñanagürügü ga yema ãëxgacügü: —Ñuxma rû marü taxucëxma naxcëx tadau i to i duixũgü i nüxũ ixuxũ i ñaã yatüchiga. Erü yixematama marü naãxwatama nüxũ taxĩnüe i norü ore na ñuxũ ñaxũ —ñanagürügü.

23

Piratupëxewa nayexma ga Ngechuchu

(Mt 27.1-2,11-14; Mr 15.1-5; Cu 18.28-38)

¹ Rû guxũma ga yema ãëxgacügü rû inachigü, rû ãëxgacü ga Dumacũãx ga Piratuxütawa Ngechuchuxũ nagagü. ² Rû yéma Piratupëxewa inanaxügüe ga Ngechuchuxũ na yaxugüexũ. Rû ñanagürügü: —Ñaã yatü rû nüxũ itayan-gaugü na cumaã nanuëxëëãxũ i duixũgü. Rû tomaã nüxũ nixu na tama namexũ na ãëxgacü ya Dumawa ngëxmacüaxũ na tanaxütanüxũ. Rû nügü nixu na nüma na yixũ i torü ãëxgacü i Cristu —ñanagürügü. ³ Rû yexguma ga Piratu rû Ngechuchuna naca rû ñanagürü: —¿Cuma quiixũ i Yudügüarü ãëxgacü? —ñanagürü. Rû Ngechuchu nanangãxũ rû ñanagürü: —Ngëmaãcü, ngëma nüxũ quixuxũ chixĩ i chomax —ñanagürü. ⁴ Rû yexguma ga Piratu rû ñanagürü nüxũ ga paigüarü ãëxgacügü rû togü ga duixũgü: —Chauxcèx rû taxuũma i chixexũ naxü i ñaã yatü —ñanagürü. ⁵ Natürü nümagü rû yexeraãcü Ngechuchuxũ nixugüeama, rû ñanagürügü: —Nüma rû guxũ i Yudeáanewa nanangüexëë i duixũgü na cuxchi naxaieçcèx. Rû Gariréanewa inanaxügü ga yemaãcü na duixũgüxũ nangüexëëxũ, rû ngëmaãcü nanaxü ñuxmata núma Yudeáanewa nangu —ñanagürügü.

Erodepëxewa nayexma ga Ngechuchu

⁶ Rû yexguma yemaxũ naxĩnügu ga Piratu, rû duixũgüna naca rû ngoxi Gariréaanecũãx yixĩ ga Ngechuchu. ⁷ Rû yexguma Piratu nüxũ ñnügu ga aixcüma Gariréaanecũãx na yixũ ga Ngechuchu rû Gariréaneärü ãëxgacü ga Erodexütawa nanamu, yerü Yerucharéüwa nayexma ga Erode ga yexguma. ⁸ Rû yexguma Ngechuchuxũ nadëuxgu ga Erode rû nataãëxũchi. Yerü nuxcümama poraãcü nüxũ nadauxchaũ, yerü üpaacü nüxũ naxĩnü ga nachiga. Rû ínanangüxëë na Ngechuchuxũ nadauxchaũxũ na napëxewa naxüãxũ ga wüxi ga mexũ ga taxũ ga Tupanaärü poramaã naxüxũ. ⁹ Rû muëxpüxcüna Ngechuchuna naca ga Erode. Natürü Ngechuchu rû tama nanangãxũ. ¹⁰ Rû yéma nayexmagü ta ga paigüarü ãëxgacügü rû ngüexëëruügü ga Moïchéarü mugüwa ngüxëëtaegüxũ. Rû nümagü rû poraãcü Ngechuchuxũ ínaxuaxũgü. ¹¹ Rû yexguma ga Erode rû norü churaragü rû poraãcü chixri Ngechuchumaã nachopetü. Rû nagu nidauxcüraũgü. Rû ñuxũchi wüxi ga ãëxgacüchirugu nayacüxëëgü na yemaãcü nüxũ nacugüexüçcèx. Rû yemawena Piratuxüta wenaxãrü Ngechuchuxũ namu ga Erode. ¹² Rû woo üpaacü ga Piratu rû Erodemaã nügüchi na naxaieçcèx, natürü yema ngunexügu nixĩ ga nügümaã nangüxmüexũ.

*Piratu rü Ngechuchumaã nanaxuegu na nayuxćèx
(Mt 27.15-26; Mr 15.6-15; Cu 18.39-19.16)*

¹³ Rü yexguma ga Piratu rü nanangutaquěxexěẽ ga paigüarü ãěxgacügü, rü togü ga Yudíugüarü ãěxgacügü, rü guxüma ga duǎxügü ga yéma yexmagüxü. ¹⁴ Rü Piratu ñanagürü nüxü: —Pema nuã chauxcèx penaga i ñaã yatü, rü nüxü pixu na chomaã nanuěxěẽaxü i duǎxügü. Natürü pepěxewa nüxna chaca i ngěmachiga rü ñuxma rü marü nüxü pedau na taxuüma nawa ichayangauxü i ngěma chixexü i naxcèx ípenaxuaxüxü. ¹⁵ —Rü Erode rü ta taxuüma nawa inayangau i ngěma chixexü, rü ngěmacèx wenaxârü taxcèx nanamuěgu. Rü dücax, taxuüma i chixexü naxü na ngěmagagu nayuxćèx. ¹⁶ —Rü ngěmacèx chorü churaragüxü tá chamu na naçuaixgüãxüćèx, rü ñuxüchi tá chayangěx —ñanagürü. ¹⁷ Rü nüma ga Piratu rü guxüguma ga yexguma yema petawa nanguuǎxgu rü duǎxügüxü nataãěxěẽchaü namaã ga na yangéãxü ga wüxi ga yatü ga poxcuxü. ¹⁸ Natürü guxüma ga yema duǎxügü rü wüxigu inanaxügüe ga aita na naxüexü. Rü ñanagürügü: —¡Napoxcu i ngěma Ngechuchu! ¡Rü Barabáxü waxi ínanguxuchixěẽ! —ñanagürügü. ¹⁹ Rü yema Barabá rü napoxcu yerü ũpaacü Yerucharéüwa ãěxgacümaã nananuěxěẽ ga duǎxügü, rü ñuxüchi namáéta. ²⁰ Natürü ga Piratu rü wenaxârü duǎxügümaã nidexa, yerü nüma rü Ngechuchuxü ningéxchaü. ²¹ Natürü ga duǎxügü rü yexeraãcü aita naxüe rü ñanagürügü: —¡Curuchawa yapota! ¡Curuchawa yapota! —ñanagürügü. ²² Rü Piratu norü tomaěxpüxcüna duǎxügümaã nidexa, rü ñanagürü: —Dücèx, çtacü rü chixexü ěxna naxü? Choma rü taxuüma i chixexüxü nawa ichayangau na ngěmacèx chanayuxěẽxü. Rü chorü churaragüxü tá chamu na naçuaixgüãxüćèx, rü ñuxüchi tá chayangěx —ñanagürü. ²³ Natürü nümagü ga duǎxügü rü yexeraãcü aita naxüeama, rü naxcèx ínacagü na curuchawa yapotaãxüćèx. Rü yema na nayexeragüamaxü ga yema duǎxügü rü düxwa ga Piratu rü duǎxügüga naxĩnü. ²⁴ Rü nüma ga Piratu rü norü churaragüxü namu na naxügüãxüćèx ga yema duǎxügü naxwěxegüxü. ²⁵ Rü Barabáxü ningěx, yerü yema nixĩ ga duǎxügü naxcèx ícagüxü. Rü yema Barabá nixĩ ga poxcuxü naxcèx na duǎxügüxü ãěxgacümaã nanuěxěẽxü rü namáetaxü. Rü yexguma ga Piratu rü duǎxügüna Ngechuchuxü namu na namaã naxügüãxüćèx ga yema nümagü nanaxwěxegüxü.

*Ngechuchuxü curuchawa nipotagü
(Mt 27.32-44; Mr 15.21-32; Cu 19.17-27)*

²⁶ Rü yema duǎxügü rü Ngechuchuxü nigagü na curuchawa yanapotagüãxüćèx. Rü yexguma Ngechuchuxü yagagüyane, rü yexma namagu nüxü nangaugü ga wüxi ga yatü ga Chireneçüãx ga naãnewa ne ücü. Rü Chimáü nixĩ ga naega. Rü Chimáüxü niyauxgü ga duǎxügü, rü naätügu ngĩxü naxünagügü ga curucha na Ngechuchuwe ngĩxü nangexüćèx. ²⁷ Rü muxüma ga duǎxügü rü nawe narüxĩ. Rü yema duǎxügütanüwa nayexmagü ga muxüma ga ngexügü ga auxexü rü aita üexü, yerü Ngechuchucèx nangechaügü. ²⁸ Natürü ga Ngechuchu rü yema ngexügüxü nadawenü, rü ñanagürü nüxü: —Pa Ngeçügüx, Pa Yerucharéüçüãx ¡tãxü i chauxcèx pexauxexü, natürü pegüçextama pexauxe rü pexacügüćèx! ²⁹ —Erü nawa tá nangu i ngunexügü i nagu ñagüxü tá i duǎxügü:

“Tataãęgü ya yíxema ngeãxta ya taxuacüma ãxãcügüxe, rü taguma tacharaügüxe, rü taguma maĩãcügüxe, erü taxucatáma tümãxãcügüćèx taxauxe”, ñagüxü. ³⁰ —Rü ngěxguma i duǎxügü rü tá měxpünegüxü nacèexügü rü ñanagürügü tá:

“¡Toétügu rübuemü!” ñanagürügü tá. Rü tá ngüchitaerugüxüxü nacèexügü, rü ñanagürügü tá:

“¡Toxũ idüxétügü!” ñanagürügü tá. ³¹ —¿Erü ñuxãcü tá namaã nachopetü i ngêma duüxügü i aixcüma chixexũ ügüxũ, ega ñãã chixexũ chomaã naxügügu na woo taxuũma i chixexũ chaxüchiréxũ? —ñanagürü ga Ngechuchu. ³² Rü yéma nanagagü ta ga taxre ga máëtagüxũ na Ngechuchurüũ curuchawa yanapotagüãxüçex. ³³ Rü yexguma nawa nangugügu ga yema nachica ga Duüxëêruchinèxãgu äegaxũ, rü yéma curuchawa Ngechuchuxũ nipotagü. Rü yema taxre ga máëtagüxũ rü ta Ngechuchurüũ curuchawa nipotagü, wüxi ga norü tügüncüwawa rü to ga norü toxwecüwawa. ³⁴ Rü yexguma Ngechuchuxũ curuchawa íyapotagüyane, rü ñanagürü ga Ngechuchu: —Pa Chaunatüx, ¡nüxũ nangechaũ i ñãã duüxügü, erü tama nüxũ nacüèxgü na tacü rü chixexũ naxüexũ! —ñanagürü. Rü yema churaragü rü nanade ga Ngechuchuchiru. Rü ñüxüchi wüxi ga dïëru ngïxũ nañanagügü na yemawa nüxũ nacüèxgüxüçex na texéarü tá yïxũ ga yema Ngechuchuchiru. ³⁵ Rü duüxügü rü yéma inarüdaunü. Natürü yema Yudíugüarü äëxgacügü rü Ngechuchuxũ nacugüe, rü ñanagürügü: —Nüma rü togüxũ namaxëxëë. ¡Ëcü, ñüxma rü nügütama namaxëë ega aixcüma Cristu ya Tupana nüxũ unetacü yixïgu! —ñanagürügü. ³⁶ Rü yema churaragü rü ta Ngechuchuxũ nacugüe. Rü naxütawa naxï, rü nüxna nanaxã ga binu ga üxchiücü. ³⁷ Rü ñanagürügü nüxũ: —Ega Yudíugüarü äëxgacü ya tacü quixïgu, ¡rü cugütama rüngüxëë i ñüxmax, na ícunguxuchixüçex! —ñanagürügü. ³⁸ Rü norü curuchatapëxewa nipota ga wüxi ga mürapewaxacü ga äegatachinüxũ ga Griégugügawa rü Dumacüãxgügawa rü Yudíugügawa ümatüxũ ga ñaxũ: —Daa nixï ya Yudíugüarü Äëxgacü ya Tacüxüchi —ñaxũ. ³⁹ Rü wüxi ga yema máëtaxũ ga naxrüũ curuchawa ipotaxũ rü Ngechuchumaã naguxchiga, rü ñanagürü: —Ega aixcüma Cristu quixïgu, ¡rü cugütama rüngüxëë na ícunguxuchixüçex, rü toxũ rü ta rüngüxëë na ítangüxüçex! —ñanagürü. ⁴⁰ Natürü ga yema to ga máëtaxũ rü namücüxũ ínangaxüchiamá, rü ñanagürü nüxũ: —Cuma rü naxrüũ na curuchawa quipotachiréxũ, ¿rü ngëxguma rü ta tama Tupanaxũ cumuüxũ? ⁴¹ —Yixema rü name nixï na ipoxcuexũ erü tagagutama nixï i ngüxũ ingegüxũ erü ngêma nixï i tórü natanü naxçex ga yema chixexũ ga ixügüxũ. Natürü daa yatü rü taxuũma i chixexũ naxü —ñanagürü. ⁴² Rü yexguma ga yema máëtaxũ rü ñanagürü: —Pa Ngechuchux, ¡choxna nacüèxãchi i ngëxguma wenaxãrü núma cuxüxgu rü äëxgacüxũ ícunguxgu! —ñanagürü. ⁴³ Rü Ngechuchu nanangãxũ rü ñanagürü: —Aixcüma cumaã nüxũ chixu rü ñomatátama i ngunexügu chomaã cüngëxma i mexëchixũ i naãnewa —ñanagürü.

Nayu ga Ngechuchu

(Mt 27.45-56; Mr 15.33-41; Cu 19.28-30)

⁴⁴ Rü yexguma tocuchiwa nanguxgu rü guxüwama naxëãne ñüxmata tomaëxpüxarü orawa nangu ga yáuanecü. ⁴⁵ Rü ga üèxcü rü nixo. Rü tupauca ga taxüneärü tüyemachiüxũ rü ngãxügu narügaute. ⁴⁶ Rü yexguma ga Ngechuchu rü poraãcü aita naxü rü ñanagürü: —Pa Chaunatüx, cuxmëxwa chanangëx i chauãë —ñanagürü. Rü yema ñaxguwena rü nayu. ⁴⁷ Rü yexguma yema churaragüarü äëxgacü ga Dumacüãx nüxũ dëüxgu ga yema ngupetüxũ, rü Tupanaxũ nicüèxüũ, rü ñanagürü: —Aixcüma ñãã yatü rü taxuũma i chixexũ naxü —ñanagürü. ⁴⁸ Rü guxüma ga yema togü ga duüxügü ga yéma yexmagüxũ rü nüxũ daugüxũ ga yema ngupetüxũ, rü poraãcü nangechaüğüãcüma napatacèx nawoegu. ⁴⁹ Natürü guxüma ga yema duüxügü ga aixcüma Ngechuchuxũ cuèxgüxũ rü yaxüwa- tama nüxũ narüdaunü ga yema ngupetüxũ. Rü yema duüxügütanüwa ta iyexmagü ga yema ngeçügü ga Ngechuchuwe rüxïcü ga yexguma Gariréaanewa ne naxüxgu.

*Ngechuchu rü naxmaŭgu nayanaxüchigü
(Mt 27.57-61; Mr 15.42-47; Cu 19.38-42)*

⁵⁰ Rü nayexma ga wüxi ga yatü ga Yudéaanewa yexmane ga iâne ga Arimatéacüâx, rü Yúche nixí ga naega. Rü nüma rü Yudíugüarü âëxgacügütanüwa naxü, natürü namecüma rü meã namaxü. ⁵¹ Rü nüma rü poraãcü ínananguxëë na ínanguxü ga Tupana na yéma âëxgacü yíxücèx. Rü yemacèx tama norü me nixí ga yema Ngechuchumaã naxügüxü ga yema togü ga namücügü ga âëxgacügü. ⁵² Rü nüma ga Yúche rü Piratuxütawa naxü, rü Ngechuchuxü necèx ínayaca. ⁵³ Rü curuchawa nayayaxu ga Ngechuchuxüne, rü wüxi ga düxruümaã nananuque. Rü wüxi ga naxmaŭ ga nutaarü mèxpüxüwa yacaxmaŭgüxügu nayanaxüchü. Rü yema naxmaŭ rü nayexwacaxü, rü taguma texéxü nagu yaxüchigüxü nixí. ⁵⁴ Rü yema nixí ga ngunexü ga nagu Yudíugü nügü imexëëgüxü naxcèx ga ngüxchigaarü ngunexü. Rü marü ningóonechaŭ ga yema ngüxchigaarü ngunexü. ⁵⁵ Rü yema ngecügü ga Ngechuchumaã Gariréaanewa ne ícü, rü Ngechuchuxü íyaxüchigüxüwa íyadaugü. Rü nüxü idaugü ga ñuxácü na íyaxüchigüâxü ga naxüne. ⁵⁶ Rü yexguma ngípatawa nangugügu, rü inamexëëgü ga pumara rü chixü. Rü irüngügu ga ngüxchigaarü ngunexügu, yerü yema nixí ga Tupanaarü mu.

24

*Yuwa ínarüda ga Ngechuchu
(Mt 28.1-10; Mr 16.1-8; Cu 20.1-10)*

¹ Rü pèxmamaxüchi ga yüxüarü ngunexügu, rü yema ngecügü rü wenaxarü naxmaŭwa íyadaugü. Rü yéma inangegü ga yema pumara ga yamexëëgüxü. Rü naígü ga ngecügü rü ta ngixü íyaxümücügü. ² Rü yexguma yéma nangugügu, rü nüxü iyangaugü ga marü na ínaxügachixü ga guma nuta ga naxmaŭarü ngüxtaŭxü. ³ Rü yexma nagu ichocu, natürü taxuüma idaugü ga naxüne ga Cori ga Ngechuchu. ⁴ Rü yema ngecügü rü poraãcü íbaixächiãëgü, rü tama nüxü icuèxgüéga ga tacü na naxügüxü. Rü ngürüachi nüxü idaugü ga taxre ga yatügü ga ngixütagu chigüxü ga poraãcü iyaurachirutanücüxü. ⁵ Rü yema ngecügü rü iyarümaxächierügü, yerü poraãcü imuë. Rü yemacèx ga yema yatügü rü ñanagürügü ngixü: —¿Tüxcüü nuxã yuetamaŭgu naxcèx peyadau ya yima maxücü? ⁶ —Nataxuma i nuã ya Ngechuchu, erü marü wena namaxü. ¡Rü nüxna pecuèxächie ga yema ore ga pemaã nüxü yaxuxü ga yexguma Gariréaanewa nayexmagu! ⁷ —Yerü pemaã nüxü nixu ga ñuxácü pecaduãxgüxü tá na yayauxgüxü, rü curuchawa na yapotagüâxü, rü ñuxácü tomaëxpüx i ngunexügu tá wena na namaxüxü —ñanagürügü ga yema yatügü. ⁸ Rü yexguma ga yema ngecügü rü nüxna icuèxächie ga yema Ngechuchuarü ore. ⁹ Rü nüxna iwoegu ga yema naxmaŭ. Rü yema 11 ga Ngechuchuarü ngüexügümaã nüxü iyarüxugüe ga guxüma ga yema nüxü nadaugüxü. Rü guxüma ga togü ga yaxögüxü ga yéma yexmagüxümaã rü ta nüxü iyarüxugüe. ¹⁰ Rü María ga Magadácüâx, rü Cuána, rü María ga Chaŭtiágu naë, rü naígü ga ngecügü iyixí ga wüxigu yéma Ngechuchuarü ngüexügüxütawa nangegücü ga yema ore. ¹¹ Natürü yema ngüexügücèx rü ñnucamare nixí ga yema ore, rü tama ngixü nayaxögüchaŭ. ¹² Natürü ga Pedru rü inañaächie, rü ínayadau ga naxmaŭwa. Rü yexguma nagu yadaucuchigu ga naxmaŭ, rü nüxü nadau ga düxruügü ga wüxicüwagu na nanuxü. Rü poraãcü nabaixächiãë namaã ga yema ngupetüxü, rü baixächiãëcüma napatacèx nataegu.

*Emaũrũ namawa nangox ga Ngechuchu
(Mr 16.12-13)*

¹³ Rũ yema ngunexũgutama rũ taxre ga yema Ngechuchuarũ ngũexũgũ rũ wũxi ga iãne ga Emaũwa naxĩ. Rũ norũ yaxũ ga guma iãne rũ 11 ga kilómetru nixĩ nũxna ga Yerucharéũ. ¹⁴ Rũ yexguma namagu naxĩyane, rũ nachigagu nidexatanũ ga guxũma ga yema ngupetũxũ. ¹⁵ Rũ yexguma yemachigagu iyadexatanũyane, rũ nũmatama ga Ngechuchu rũ ngũrũãchi naxcèx yéma nixũ, rũ natanũgu nixũchigũ. ¹⁶ Natũrũ yema ngũexũgũ rũ woo Ngechuchuxũ nadaugũ, rũ tama nũxũ nacuèxgũéga na Ngechuchu yĩxũ, yerũ Tupana rũ nanatoõègũ na tama Ngechuchuxũ nacuèxgũxũcèx. ¹⁷ Rũ yexguma ga Ngechuchu, rũ yema taxre ga ngũexũgũna naca, rũ ñanagũrũ: —¿Tacũchiga nixĩ i pidexatanũxũ na nuxã namagu na pexĩxũ? ¿Rũ tacũcèx nixĩ i pengechaũèxũ? —ñanagũrũ. ¹⁸ Rũ wũxi ga yema ngũexũ ga Creopágu ãegaxũ nanangãxũ, rũ ñanagũrũ: —Guxũma i duũxũgũ nixĩ i nũxũ cuáxũ ga yema yexwaca ngupetũxũ ga Yerucharéũwa. Rũ cuma na yexma cunaxũãnechiréxũ rũ maneca cuxicatama nixĩ i tama nũxũ cucuáxũ ga yema ngupetũxũ —ñanagũrũ. ¹⁹ Rũ yexguma ga nũma ga Ngechuchu rũ ñanagũrũ: —¿Tacũ nangupetũ ga Yerucharéũwa? —ñanagũrũ. Rũ nanangãxũgũ ga yema ngũexũgũ, rũ ñanagũrũgũ: —Poraãcũ chixexũ nũxũ naxũpetũ ga Ngechuchu ga Nacharétucũãx. Nũma ga Ngechuchu rũ Tupanaãrũ orearũ uruũ ga mecũ nixĩ. Rũ Tupanapèxewa rũ duũxũgũpèxewa namecũma rũ nanaxũ ga taxũ ga cuèxruũgũ ga Tupanaãrũ poramaã naxũxũ, rũ meã duũxũgũxũ nangũexèè. ²⁰ —Natũrũ ga paigũarũ ãèxgacũgũ rũ tórũ ãèxgacũgũ rũ nayayauxgũ. Rũ Dumacũãx ga ãèxgacũgũna nanamugũ na curuchawa yapotagũãcũma nayuxèègũãxũcèx. Rũ yemaãcũ nayamèxgũ. ²¹ —Toma nũxũ tacuèxgu rũ nũma tá nixĩ i tomaã naporaxũ na ínganguxuchixũcèx i tachiũãne nũxna i Dumacũãxãrũ ãèxgacũ. Rũ ñuxma rũ marũ tomaèxpũx i ngunexũ nawena nixĩ ga na yamèxgũãxũ. ²²⁻²³ —Natũrũ tama ngèxĩcatama nixĩ, yerũ ñuxre ga ngexũgũ ga totanũxũ rũ toxũ ínayabaixgũgũ. Yerũ yema ngexũgũ rũ pèxmamaxũchi ínayadaugũ ga naxmaũwa, rũ tama nũxũ inayangaugũ ga naxũne ga guma Ngechuchu. Rũ yemacèx ga yema ngexũgũ rũ toxcèx nawoegu, rũ tomaã nũxũ nayarũxugũe ga nũxũ na nadaugũxũ ga Tupanaãrũ orearũ ngerũgũ ga daxũcũãx. Rũ yema daxũcũãxgũ rũ namaã nũxũ nixugũgũ ga Ngechuchu rũ na namaxũxũ —ñanagũrũgũ. ²⁴ Rũ yexguma yema ngexũgũarũ orexũ taxĩnũègu, rũ ñuxre ga tomũcũgũ rũ naxmaũwa ínayadaugũ. Rũ yema ngexũgũ nũxũ ixugũxũrũũ nũxũ inayangaugũ ga naxmaũ. Natũrũ tama Ngechuchuxũ nadaugũ —ñanagũrũgũ. ²⁵ Rũ yexguma ga Ngechuchu rũ ñanagũrũ nũxũ: —¿Tũxcũũ tama peãeta ipexũ i pemax? ¿Rũ ñuxgura tá ta ipeyaxõgũxũ i nuxcũmaũgũxũ ga Tupanaãrũ orearũ uruũgũarũ ore? ²⁶ ¿Rũ tama èxna nũxũ pecuèx ga yema ngũxũ tá na yangexũ ga Cristu naxũpa na daxũguxũ i naãnewa naxũxũ, na ngema ãèxgacũ yĩxũcèx? —ñanagũrũ. ²⁷ Rũ yexguma inanaxũgũ ga namaã na nangoxèèãxũ ga guxũma ga Tupanaãrũ ore ga nachiga ùmatũxũ. Rũ yema Tupanaãrũ ore ga Moĩché ùmatũxũmaã inanaxũgũ. Rũ ñuxũchi namaã nũxũ nixu ga guxũma ga yema Tupanaãrũ ore ga nuxcũmaũgũxũ ga Tupanaãrũ orearũ uruũgũ ùmatũgũxũ. ²⁸ Rũ yexguma yema iãne ga Emaũwa nangugũgu, rũ Ngechuchu rũ nũmaxũ toxnamana nũgũ naxũxèènetã. ²⁹ Natũrũ ga yema ngũexũgũ rũ nũxũ nacèèxũgũ na yexma naxãũxũcèx, rũ ñanagũrũgũ: —¡Nuxma toxũtagu nape, erũ marũ nayáuane, rũ paxã tá nachũta! —ñanagũrũgũ. Rũ yexguma ga Ngechuchu rũ nawe yexma narũxãũx. ³⁰ Rũ yexguma chibũcèx wũxiwa mechawa natogũgu, rũ Ngechuchu nanayaxu ga pãũ. Rũ Tupanana moxè naxcèx

naxã. Rũ ñuxũchi inanabũcu, rũ wũxichigũna nanaxã. ³¹ Rũ yexgumatama naãẽxũ nicuẽxãchitanũ. Rũ nũxũ nacuẽxgũ na guma yĩxũ ga Ngechuchu. Natũrũ yexgumatama ngũrũãchi inayarũtaxu ga nũmax. ³² Rũ yema taxre ga ngũexũgũ rũ nũgũmaã ñanagũrũgũ: —¿Tama ẽxna ga itaãẽgũxũ ga tũrũ maxũnewa ga yexguma namawa tamaã yadeaxgu rũ tamaã nangoxẽẽãgu ga Tupanaãrũ ore i ũmatũxũ? —ñanagũrũgũ. ³³ Rũ yexgumatama ga yema taxre ga ngũexũgũ rũ inaxĩãchi ga Yerucharẽũcẽx na nawoeguxũ. Rũ yexma nũxũ nayangau ga na ínangutaquẽxegũxũ ga yema 11 ga Ngechucharũ ngũexũgũ rũ togũ ga natanũxũgũ. ³⁴ Rũ yema duũxũgũ ga íngutaquẽxegũxũ rũ ñanagũrũgũ nũxũ: —Aixcũma nixĩ i marũ wena namaxũxũ ya Cori ya Ngechuchu. Rũ Chimãũ ga Pedru rũ marũ nũxũ nadau —ñanagũrũgũ. ³⁵ Rũ yexguma ga yema taxre ga ngũexũgũ rũ ta nũxũ nixugũgũ ga yema nũxũ ngupetũxũ ga namawa, rũ ñuxãcũ nũxũ na yacuẽxãchitanũxũ ga guma na yĩxũ ga Ngechuchu ga yexguma pãũ inabũcuɣgu.

*Ngechuchu rũ norũ ngũexũgũcẽx nangox
(Mt 28.16-20; Mr 16.14-18; Cu 20.19-23)*

³⁶ Rũ yexguma yemaãcũ íyadexagũyane, rũ ngũrũãchi norũ ngãxũtanũgu nachi ga Ngechuchu. Rũ nũxũ narũmoxẽ, rũ ñanagũrũ: —Nuxmaẽ Pa Chorũ Duũxũgũx —ñanagũrũ. ³⁷ Natũrũ nũmagũ rũ nabaixãchiãẽgũ, rũ poraãcũ namuũẽ, yerũ nagu naxĩnũẽgu rũ wũxi ga naxchĩxixũmare nadaugũ. ³⁸ Natũrũ ga Ngechuchu rũ ñanagũrũ nũxũ: —¿Tũxcũũ pebaixãchiãẽgũ rũ tama peyaxõgũ na choma chĩxũ? ³⁹ —¿Dũcẽx, nũxũ pedẽux ya choxmẽxgũ rũ chaucutũgũ! Rũ chomatama chixĩ. ¿Rũ choxũ pingõgũ rũ meã choxũ perũdaunũ! Erũ wũxi i naxchixi rũ tama choxũ pedauxũrũũ naxãmachi rũ naxãxchinẽxã —ñanagũrũ. ⁴⁰ Rũ yema ñaxguwena, rũ nũxũ nanawẽx ga naxmẽx rũ nacutũ. ⁴¹ Natũrũ ga yema duũxũgũ rũ yexguma rũ ta tama nũxũ nayaxõgũ, yerũ nabaixãchiãẽgũ rũ nataãẽgũ. Rũ yemacẽx ga Ngechuchu rũ nũxna naca rũ ñanagũrũ nũxũ: —¿Pexũ nangẽxmaxũ i õna i nuã? —ñanagũrũ. ⁴² Rũ yexguma nũxna nanaxãgũ ga wũxi ga choxni ga iguxũchipẽxe rũ wũxiweũ ga berure. ⁴³ Rũ nũma ga Ngechuchu rũ nanayaxu. Rũ yema duũxũgũpẽxewa nanangõx. ⁴⁴ Rũ ñuxũchi ñanagũrũ nũxũ: —Rũ yema choxũ ngupetũxũ rũ yema nixĩ ga pemaã nũxũ chixuxũ ga yexguma tauta chayuxgu rũ petanũwa chayexmagu. Yerũ yexguma rũ pemaã nũxũ chixu rũ ñacharũgũ:

“Rũ tá ningu i guxũma i Tupanaãrũ ore i chauchiga ũmatũxũ i Wiyaegũarũ poperawa, rũ Moĩchẽ ũmatũxũ i mugũwa, rũ ore i nuxcũmaũgũxũ ga Tupanaãrũ orearũ uruũgũ ũmatũxũwa”, ñacharũgũchirẽx pexũ. ⁴⁵ Rũ yemaãcũ namaã nanangoxẽẽ ga Tupanaãrũ ore ga ũmatũxũ. ⁴⁶ Rũ ñanagũrũ nũxũ: —Tupanaãrũ ore i ũmatũxũwa rũ nũxũ nixu rũ choma i Cristu rũ tá chayu, rũ tomaẽxpũx i ngunexũgu rũ tá wena chamaxũ. ⁴⁷ —Rũ yematama ore i ũmatũxũwa nũxũ nixu rũ tá chauẽgagu tá nixĩ i nũxũ yaxugũxũ i ore i mexũ. Rũ Yerucharẽũwa tá inaxũgũ i ngẽma ñuxmatáta guxũ i naãnewa nangu na ngẽmaãcũ duũxũgũ nũxũ rũxoexũcẽx i nacũma i chixexũ na Tupana nũxũ nũxũ ngechaũxũcẽx i norũ pecadugũ. ⁴⁸ —Rũ ñuxma rũ pematama nixĩ i chorũ orearũ uruũgũ, rũ tá duũxũgũmaã nũxũ pixu ga yema chauxũtawa nũxũ pedaugũxũ rũ nũxũ pexĩnũẽxũ. ⁴⁹ —Rũ dũcax, choma rũ pexcẽx tá núma chanamu i Naãẽ i ũnẽxũ ga pexcẽx nũxũ naxunetaxũ ya Chaunatũ. Natũrũ chanaxwẽxe i númatátama daa ñãne ya Yerucharẽũwa pengẽxmagũ, ñuxmatáta penayauxgũ i ngẽma Tupanaãẽ i ũnẽxũ i daxũwa ne ũxũ i tá pexũ poraexẽẽxũ —ñanagũrũ.

*Ngechuchu rü daxũguxũ ga naãnewa naxũ
(Mr 16.19-20)*

⁵⁰ Rü yexguma ga Ngechuchu rü Yerucharéũãrũ toxnamana norü ngúexũgũxũ nagagũ, ñuxmata Betániããrũ ngaicamana nangugũ. Rü yéma norü ngúexũgüétü nawémẽx, rü Tupanana naxcèx naca na nũxũ nangũxẽxũcèx. ⁵¹ Rü yexguma yema ngúexũgücèx nayumüxẽguwena rü nũxna nixũgachi. Rü Tupana daxũguxũ ga naãnewa nanaga. ⁵² Rü nümagũ ga norü ngúexũgũ rü Ngechuchuxũ nicuèxüũgũ. Rü ñuxũchi taããcũma Yerucharéũcèx nawoegu. ⁵³ Rü guxũguma tupauca ga taxũnewa naxĩxũ, rü yéma Tupanaxũ nicuèxüũgũ. Rü ngẽmaãcü yĩ.

ORE I MEXŨ GA CUÁŨ ŨMATŨXŨ

Tupana Nane rü duŭxŭãcü nangox

¹ Naxŭpa ga guxŭma, rü marü nayexma ga Tupana Nane. Rü Tupanamaã nayexma rü woetama Tupana nixĩ ga nümax. Nüma rü Tupanaãrŭ Ore nixĩ i naega erŭ tamaã nüxŭ nixu i Tupanachiga. ² Rü naxŭpa ga guxŭma rü nüma ga Tupana Nane rü naxŭtawatama nayexma. ³ Rü guma Nanexŭ nixĩ ga namuxŭ ga Tupana na naxŭãxŭcèx ga guxŭma. Rü nataxuma i tacü i ñuxma ngèxmaxŭ i tama nüma naxŭxŭ. ⁴ Rü Nanewa nixĩ i nangexmaxŭ i maxŭ. Rü ngema maxŭ rü guxŭ i duŭxŭgŭarŭ ngóonexêëruŭ nixĩ. ⁵ Rü yima Nane rü woo chixexŭ íporaxŭwa rü duŭxŭgŭxŭ nüxŭ nacuèxêë i Tupanachiga. Rü ngêma chixexŭ rü taxucü-rŭwama ngêma mexŭxŭ narüyexera. ⁶⁻⁷ Rü nayexma ga wüxi ga yatü ga Cuáŭ ga baiŭxêëruŭgu ãegacü. Rü guma nixĩ ga Tupana núma namucü na nüxŭ yaxuxŭcèx ga nachiga ga guma ngóonexêëruŭ na yemaãcü guxãma nüxŭ yaxôgŭxŭcèx. ⁸ Rü nüma ga Cuáŭ rü tama Tupana Nane ya duŭxŭgŭarŭ ngóonexêëruŭ nixĩ. Natürŭ nüma nixĩ ga Tupana núma namuxŭ na nüxŭ yaxuxŭcèx ga nachiga ga guma ngóonexêëruŭ. ⁹ Rü ñoma ga naãnewa nangu ya yima aixcŭma Tupana Nane ixĩcü i guxŭma i duŭxŭgŭxŭ ngóonetanŭxêëcü. ¹⁰ Rü nüma ga guma Nane ga Tupanaãrŭ Ore ixĩcü rü ñoma ga naãnewa nayexma. Rü woo nagagu nixĩ ga naxŭãxŭ ga guxŭma ga ñoma ga naãne, natürŭ ñoma ga naãne-cŭãx ga duŭxŭgŭ rü tama nüxŭ nacuèxgŭ na texe yĩxŭ. ¹¹ Nuã norŭ naãnewatama nangu, natürŭ norŭ duŭxŭgŭ ga Yudíugŭ rü tama nanayauxgŭ. ¹² Natürŭ guxema nayauxgŭxe rü nüxŭ yaxôgŭxe rü tŭxŭ nanatauxchaxêë na Tupanaxãcŭgŭ tixĩgŭxŭ. ¹³ Rü ñuxma rü Tupanaxãcŭgŭ tixĩgŭ ga guxema yaxôgŭxe. Natürŭ tama noxri tabuexŭgagu nixĩ i ngêma rü tama tümanatŭgŭarŭ ngúchaŭgagu nixĩ. Natürŭ i ñuxma rü Tupanaxãcŭgŭ tixĩgŭ ga guxema yaxôgŭxe yerŭ nümatama ga Tupana rü naxãcŭgŭxŭ tŭxŭ nixĩgŭxêë. ¹⁴ Rü nüma ya yima Nane ya Tupanaãrŭ ore ixĩcü rü duŭxŭãcü nangox. Rü totanŭwa nayexma rü poraãcü toxŭ nangechaŭ rü aixcŭma nixĩ ga norŭ ore. Rü toma nüxŭ tadaugŭ ga ñuxãcü na naxŭünexŭ. Rü Nanatŭxŭtawa nanayaxu ga yema üüne yerŭ nügŭmaã nüxŭ nawüxicèx ga nüma. ¹⁵ Rü gumachigaxŭ nixĩ ga yaxuxŭ ga Cuáŭ ga yexguma ñaxgu: —Daa nixĩ ga guma pemaã nüxŭ chixuchigacü ga yexguma ñachaxgu:

“Rü yima choweama ne ücü rü choxŭ rüyexeracü nixĩ, yerŭ woetama marü nayexma ga tauta chabuxgu ga chomax”, ñanagürŭ ga Cuáŭ. ¹⁶ Rü yima Tupana Nane rü namecŭmaxŭchi rü naxmèxwa nangèxma i guxŭma. Rü naxŭtawa nixĩ i nayauxgŭxŭ i guxŭma i ngŭxêëgŭ. ¹⁷ Rü Moíchéxŭ nixĩ ga namuxŭ ga Tupana na tŭxŭ nangúexêëxŭcèx ga yema norŭ mugŭ. Natürŭ Ngechuchu ya Cristuxŭ nixĩ ga namuxŭ na tŭxŭ nangúexêëxŭcèx na yigŭ ingechaŭgŭxŭ rü nagu imaxèxŭcèx i ore i aixcŭma ixĩxŭ. ¹⁸ Taguma texé ñuxgu nüxŭ tatau ga Tupana. Natürŭ Nane ya nügŭmaã nüxŭ wüxicacü nixĩ ya tŭxŭ nüxŭ cuèxêëcü. Rü yima Nane rü Tupanaxŭchi nixĩ, rü Nanatŭmaã wüxiwa nangèxmagŭ.

Cuáŭ ga baiŭxêëruŭ rü nüxŭ nixu ga Ngechuchu ya Cristuchiga (Mt 3.11-12; Mr 1.7-8; Lc 3.15-17)

¹⁹ Rü yema Yudíugŭarŭ ãëxgacŭgŭ ga Yerucharéüçŭãx rü Cuáŭ ga baiŭxêëruŭxŭtawa nanamugŭ ga paigŭ rü Lebítanŭxŭgŭ na nüxna yacagüexŭcèx na texe yĩxŭ. ²⁰ Rü nüma ga Cuáŭ rü meãma nügŭ nixu, rü ñanagürŭ: —Tama nixĩ i Cristu chiŭxŭ i chomax —ñanagürŭ. ²¹ Rü

wenaxãrũ nüxna nacagũ rũ ñanagürũgũ: —¿Texé êxna quixĩ? ¿Êxna cuma ga nuxcũmaũcũ ga Tupanaãrũ orearũ uruũ ga Ería quixũ? —ñanagürũgũ. Rũ Cuáũ nanangãxũ rũ ñanagürũ: —Tama Ería chixĩ —ñanagürũ. Rũ nümagũ rũ wenaxãrũ nüxna nacagũe rũ ñanagürũgũ: —¿Êxna cuma quixũ ya yima orearũ uruũ ga Moĩché nüxũ ixucũ ga ínguxchaũcũ? —ñanagürũgũ. Rũ Cuáũ nanangãxũ rũ ñanagürũ: —Tama yima chixĩ —ñanagürũ. ²² Rũ yexguma ñanagürũgũama: —¿Êxna texé quixũ? Erũ tanaxwèxe i ngẽma núma toxũ mugũxũtawã tanange i curũ ngãxũga. ¿Rũ ñuxũ ñacuxũ i ñuxma na texé quixũ? —ñanagürũgũ. ²³ Rũ Cuáũ nanangãxũ rũ ñanagürũ nüxũ: —Choma nixĩ i ngẽma duũxũ i dauxchitawã i ngextã taxúema íxãpataxũwã tagaãcũ ñachaxũ:

“¡Rũ nüxũ perũxoe i pecũma i chixexũ rũ ipeyanawẽxãchixẽẽx i perũ maxũ naxcèx ya Cori ya Tupana!” ñachaxũ, guma nuxcũmaũcũ ga orearũ uruũ ga Ichaxía nüxũ ixuxũrũ —ñanagürũ. ²⁴⁻²⁵ Rũ yexguma ga yema paigũ rũ Parichéugũ yéma mugũxũ ga Cuáũmaã na yanadexagũxũcèx rũ wenaxãrũ nüxna nacagũe, rũ ñanagürũgũ: —Rũ ngẽxguma tama Cristu quixĩgu, rũ tama Ería quixĩgu, rũ tama yima orearũ uruũ ya ínguxchaũcũ quixĩgu, ¿rũ tũxcũũ i duũxũgũxũ ícubaiũxẽẽxũ i ñuxmax? —ñanagürũgũ nüxũ. ²⁶⁻²⁷ Rũ Cuáũ nanangãxũ rũ ñanagürũ: —Choma rũ dexãwamare íchanabaiũxẽẽ i duũxũgũ. Natürũ petanũwã nangẽxma ya yima tama nüxũ pecuácũ ya choweama ne ũcũ. Rũ choma rũ napẽxewa rũ taxuwama chame, rũ bai i norũ chapatucunũgũarũ wẽgũwã chame —ñanagürũ ga Cuáũ. ²⁸ Rũ yema nachica ga Betãniãgu ãegaxũwã nixĩ ga Cuáũ ga nüxũ yaxuxũ ga yema ore. Rũ natũ ga Yudãũãrũ tocutũwã nixĩ ga yema nachica ga ngextã Cuáũ duũxũgũxũ íbaiũxẽẽxũwã.

Ngechuchu nixĩ ga Tupana núma namucũ na duũxũgũarũ pecaducèx nayuxũcèx

²⁹ Rũ moxũãcũ ga Cuáũ rũ Ngechuchuxũ nadau ga naxcèx na yaxũxũ. Rũ ñanagürũ ga Cuáũ: —¡Rũ dũcax! Daa nixĩ ya yima Tupana núma namucũ na nayuxũcèx na ñoma i naãnecũãx i duũxũgũarũ pecaduxũ iyanaxoxẽẽxũcèx. ³⁰ —Rũ choma rũ daa Ngechuchuchigaxũ nixĩ ga chixuxũ ga yexguma ñachagu:

“Rũ choweama ne naxũ ya wũxi ya chorũ yexeracũ, yerũ nüma rũ woetama nayexma ga tauta chabuxgu ga chomax”, ñachagu. ³¹ —Rũ chomatama ga noxri rũ tama nüxũ chacuèx ga texe na yĩxũ ga nümax. Natürũ núma chaxũ na dexãwamare duũxũgũxũ íchibaiũxẽẽtanũxũcèx na tatanũxũ i Yudĩugũ nüxũ cuèxgũxũcèx na texé yĩxũ —ñanagürũ. ³² Rũ ñanagürũ ta ga Cuáũ: —Rũ chomatama nüxũ chadau ga Tupanaãe ga Üünexũ ga yexguma wũxi ga muxtucurũ daxũwã ínaxexeegu rũ Ngechuchuxũnegu yanawèxgux. ³³ —Choma rũ noxri tama nüxũ chacuèx ga texe na yĩxũ ga nümax. Natürũ ga Tupana ga choxũ mucũ na dexãwamare duũxũgũxũ íchabaiũxẽẽxũcèx, rũ ñanagürũ choxũ:

“Rũ yima nüxũ cudaucũ ya chauãe i Üünexũ naetũgu írũxexeecũ, rũ yima tá nixĩ ya chauãe i Üünexũ duũxũgũna nguxẽecũ”, ñanagürũ choxũ. ³⁴ —Choma rũ marũ yima Ngechuchuxũ chadau rũ pemaã nüxũ chixu na nüma rũ aixcũma Tupana Nane yĩxũ —ñanagürũ.

Nüxĩraũxũ ga norũ ngúexũgũ ga Ngechuchu

³⁵ Moxũãcũ rũ wenaxãrũ Cuáũmaã yema nachicawã tayexmagũ ga toma ga taxre ga norũ ngúexũgũ. ³⁶ Rũ yexguma Ngechuchuxũ nadèuxgu ga yéma na naxüpetũxũ, rũ Cuáũ rũ ñanagürũ toxũ: —¡Dũcèx! Yima nixĩ ya Tupana

núma namucü na pecaducèx nayuxücèx —ñanagürü. ³⁷ Rù toma ga Cuáũärü ngúexügü rü nüxü taxĩnüë ga yexguma yema ñaxgu. Rù Ngechuchuwe tarüxĩ. ³⁸ Rù nügü ínidaú ga Ngechuchu, rü toxü nadaú ga nawe na tarüxĩxü. Rù toxna naca rü ñanagürü toxü: —¿Tacücèx pedau? —ñanagürü. Rù tomagü rü ñatarügügü: —Pa Ngúexêëruüx, ¿ngexta nixĩ i cupexü? —ñatarügügü. ³⁹ Rù Ngechuchu toxü nangãxü, rü ñanagürü toxü: —¿Nuã chowe perüxĩ rü ípeyadèux! —ñanagürü. Rù nawe tarüxĩ, rü nüxü tadaugü ga na ngexta napexü. Rù yexguma yéma tangugügu, rü marü ägümücüarü orawa nangu ga na nayáuanexü. Rù yexma naxütagu tarücho rü ñuxmata nachüta. ⁴⁰ Rù choma chixĩ ga noxri Cuáũ ga baiüxêëruüxü chaxĩnúxü ga yixcama Ngechuchuwe charüxüxü. Rù chomücü rü Aüdré nixĩ. Rù núma rü Pedru ga Chimáũëneë nixĩ. ⁴¹ Rù yexgumatama ga Aüdré, rü naëneë ga Chimáüçèx nayadaú. Rù ñanagürü nüxü: —Rü marü nüxü itayangau ya yima Cristu ga nuxcüma Tupana nüxü unetacü —ñanagürü. ⁴² Rù yemawena, rü Ngechuchu íyexmaxüwa Chimáüxü naga ga Aüdré. Rù yexguma Ngechuchu Chimáüxü dèuxgu, rü ñanagürü nüxü: —Cuma nixĩ i Chimáü i Cuáũ nane quiüxü. Natürü i ñuxmawena rü Nuta tá nixĩ i cuéga —ñanagürü. Rù ngëma naëga rü Pedru ñaxüchiga nixĩ.

Ngechuchu rü naxcèx naca ga Piripi rü Natanae

⁴³ Rù moxüäcü ga Ngechuchu rü nügü namexëë na Gariréaanewa naxüxücèx. Rù Piripixü inayangau rü ñanagürü nüxü: —¿Chowe rüxü! —ñanagürü. ⁴⁴ Rù núma ga Piripi rü ñane ga Bechaídacüãx nixĩ. Rù yémacüãx ta nixĩ ga Aüdré rü Pedru. ⁴⁵ Rù Piripi rü Natanaeçèx nayadaú, rü ñanagürü nüxü: —Marü nüxü itayangau ya yima Cristu ga Moïché nachiga naxümatücü ga mugüarü poperawa, rü nuxcümaügüxü ga Tupanaärü orearü uruügü ta nachiga naxümatügücü. Yima nixĩ ya Yúche nane ya Ngechuchu ya Nacharétucüãx —ñanagürü. ⁴⁶ Rù ñanagürü ga Natanae: —¿Ñuxäcü i tacü rü mexü i Nacharétuwa ne naxüxü? —ñanagürü. Rù Piripi nanangãxü, rü ñanagürü nüxü: —¿Dücèx, ngixã rü ítayadaú! —ñanagürü. ⁴⁷ Rù yexguma Ngechuchu Natanaexü dèuxgu ga naxcèx na yaxüxü, rü ñanagürü: —¿Dücèx! Yéa ne naxü i wüxi i yatü i aixcüma Yudíu ixixü i aixcüma ngearü chixexüãxü —ñanagürü. ⁴⁸ Rù yexguma ga Natanae rü Ngechuchuna naca, rü ñanagürü nüxü: —¿Ñuxäcü i choxü cucuáxü? —ñanagürü. Rù Ngechuchu nanangãxü rü ñanagürü nüxü: —Naxüpa ga Piripi cuxcèx na yaçaxü, rü choma rü cuxü chadaú ga yexguma orix ga igueratüügu curüxãüxgux —ñanagürü. ⁴⁹ Rù Natanae nanangãxü rü ñanagürü nüxü: —Pa Ngúexêëruüx, cuma rü Tupana Nane quixĩ. Rù cuma nixĩ i guxüma i Yudíugüarü Äëxgacü quiüxü —ñanagürü. ⁵⁰ Rù Ngechuchu nanangãxü, rü ñanagürü nüxü: —Cuma rü choxü cuyaxõ erü cumaã nüxü chixu na igueratüüwa cuxü na chadauxü. Rù ngëmacèxicatama nixĩ i cuyaxõxü. Natürü ngëma ñuxma nüxü cudauxüärü yexera tá nixĩ i nüxü cudauxü i yixcüra —ñanagürü. ⁵¹ Rù ñanagürü ta ga Ngechuchu: —Rü aixcüma pemaã nüxü chixu rü tá nüxü pedaugü na yawãxnaxü i daxüguxü i naãne. Rù tá nüxü pedaugü i Tupanaärü orearü ngeruügü i daxüçüãx i ngema daxü ñgüxü rü írüxíggüxü i naetüwa ya Tupana Nane ya duüxüxü ixícü —ñanagürü.

2

Ngïarü peta ga ñane ga Canáwa üxü ga Gariréaanewa

¹ Rù yexguma marü tomaëxpüx ga ngunexü Gariréaanearü ñane ga Canáwa nayexmagu ga Ngechuchu, rü nayexma ga wüxi ga ngïarü peta. Rù yemawa

ngixna naxugü ga naë ga Ngechuchu. ² Rü Ngechuchuna rü toxna rü ta naxugüe na yéma taxĩxücèx. ³ Rü nagux ga norü axexü ga binu. Rü Ngechuchu naë ngĩgürügü nüxü ga Ngechuchu: —Marü nagúarü binuãxgü —ngĩgürügü. ⁴ Natürü Ngechuchu ngĩxü nangãxü, rü ñanagürü: —Pa Mamax, ¿tũxcüü chomaã nüxü quixu i ngêma? Erü tauta nawa nangu na chanaxüxcèx i tacü rü mexü i Tupanaärü poramaã üxü —ñanagürü. ⁵ Natürü ga ngĩma ga naë rü ngĩgürügü nüxü ga yema baegüxü namaã ga binuchiü: —¡Penaxüx i guxüma i ngêma nüma pemaã nüxü yaxuxü! —ngĩgürügü. ⁶ Rü yéma iyexma ga 6 ga tũxü ga nutagüngĩxcèx. Rü wüxichigü ga yema tũxüwa rü maneca yexma name ga 50 rü êxna 70 litrugü ga dexá. Rü yema tũxügü iyixĩ ga yema Yudíugü ngĩxü ixügüãcugücü ga yexguma dexámaã nügü yayauxmëxgüchaügu na Tupanacèx nügü yamexëëgüxcèx. ⁷ Rü Ngechuchu rü yema baegüxüxü namu, rü ñanagürü: —¡Dexámaã ngĩxü pixügüãcu i ñaã tũxügü! —ñanagürü. Rü nümagü ga yema baegüxü rü meãma ngĩxü nixügüãcu. ⁸ Rü Ngechuchu ñanagürü nüxü: —Rü ñuxma chanaxwëxe i íraxü peyaxu, rü petaarü yoraxütawa penange —ñanagürü. Rü yemaãcü nanaxügü ga yema baegüxü. ⁹ Rü yema petaarü yora nüxü naxaxneta ga yema dexá ga binuxü nacèxichixü. Natürü tama nüxü nacuèx ga ngextá na nayauxgüãxü. Rü yema baegüxüxĩcatama nixĩ ga nüxü cuèxgüxü ga dexámare na yĩxü ga noxrìx. Rü yexgumatama ga yema petaarü yora rü yema yatü ga ingĩxücèx naca. ¹⁰ Rü ñanagürü nüxü: —Guxü i naãnewa rü duüxügü rü noxri rü namaã nabae ya mecü ya binu. Rü ngëxguma marü meãma guxüma axegügu i ngêma nüxna naxuxü, rü ngëmawena rü nüxna nanaxã ya ngexcürüücümare ya binu. Natürü i cuma rü marü nagúxchaügu i peta, rü mexëchicü ya binumaãtama cuyaxaxegüxëë i duüxügü —ñanagürü. ¹¹ Rü guma Gariréaanewa yexmane ga ñãne ga Canáwa nixĩ ga yema naxüxü ga Ngechuchu. Rü yema nixĩ ga nüxĩraüxü ga cuèxruü ga Tupanaärü poramaã üxü ga nawa nügü inawéxü ga Tupana Nane na yĩxü. Rü toma ga norü ngúexügü rü nüxü tayaxögü. ¹² Rü yemawena rü Capernáü ga ñãnewa naxü ga Ngechuchu. Rü naë rü naëneëgü rü toma ga norü ngúexügü rü ta ítayaxümücügü. Rü yéma guma ñãnewa tayexmagü ga ñuxre ga ngunexü.

Ngechuchu rü tupauca ga taxünewa ínanawoxü ga yema duüxügü ga yéma taxegüxü

(Mt 21.12-13; Mr 11.15-18; Lc 19.45-46)

¹³ Rü toma ga Yudíugü rü marü ningaica ga torü peta ga Üpetüchiga. Rü yemacèx ga Ngechuchu rü Yerucharéüwa naxü. ¹⁴ Rü yexma tupauca ga taxünegu nüxü nayangau ga duüxügü ga yéma norü wocagümaã rü carnerugümaã rü muxtucugümaã taxegüxü. Rü yéma nüxü nadau ta ga duüxügü ga norü taxechicawa rütogüxü rü Tupanaarü amarewa mexü ga dñërumaã yéma taxegüxü. ¹⁵ Rü yexguma yemaxü nadëuxgu ga Ngechuchu, rü nanaxü ga wüxi ga cuaixruü ga naxchëxmünaxcèx. Rü yemamaã tupauca ga taxünewa ínanawoxü ga yema duüxügü guxüma ga norü carnerugümaã rü wocagümaã. Rü yema dñërucèx taxegüxüärü dñëru rü ngĩxü narüwoü ñaxtüanegu. Rü norü mechagü rü ta nüxü nawoneta. ¹⁶ Rü yema muxtucugümaã taxegüxüxü ñanagürü: —¡Peyana i ngêma perü muxtucugü i nuã! Tama name i taxepataüxü peyaxixëë ya daa Chaunatüpata —ñanagürü. ¹⁷ Rü yexguma ga toma ga norü ngúexügü rü nüxna tacuèxãchie ga nuxcümaüxü ga ümatüxü ga ñaxü:

“Duüxügü rü tá chauxchi naxaie erü chanachuxu i tacü i chixexü na naxügüxü i Tupanapatawa”,

ñaxŭ. ¹⁸ Rŭ yexguma ga yema ãëxgacŭgŭ rŭ Ngechuchuna nacagŭ, rŭ ñanagŭrŭgŭ: —¿Tacŭ rŭ cuèxruŭxŭ toxŭ cudauxëë na nawa nŭxŭ tacuáxŭcèx na aixcŭma Tupana yŭxŭ ya cuxŭ mucŭ na ícunawoxŭxŭcèx i ñaã duŭxŭgŭ i nuã? —ñanagŭrŭgŭ. ¹⁹ Rŭ Ngechuchu nanangãxŭ, rŭ ñanagŭrŭ: —¡Nagu pepogŭe ya daa tupauca ya taxŭne! Rŭ choma rŭ tomaëxpŭx i ngunexŭgu rŭ tá wena íchanadaxëë —ñanagŭrŭ. ²⁰ Rŭ yexguma ga yema ãëxgacŭgŭ rŭ nanangãxŭgŭ, rŭ ñanagŭrŭgŭ: —Rŭ 46 ga taunecŭ nawa napuracŭe ga duŭxŭgŭ na naxŭgŭãxŭcèx ga daa tupauca ya taxŭne. ¿Rŭ ñuxãcŭ tá i cuma i tomaëxpŭx i ngunexŭ tátama wena ícunadaxëëxŭ? —ñanagŭrŭgŭ. ²¹ Natŭrŭ guma Tupanapata ga Ngechuchu nachiga idexane rŭ naxŭnechigatama nixŭ. ²² Rŭ yemacèx ga toma ga norŭ ngúexŭgŭ, rŭ yexguma Ngechuchu yuwa írŭdaxgu, rŭ nŭxna tacuèxãchie ga yema ore ga Ngechuchu nŭxŭ ixuxŭ. Rŭ aixcŭma tayaxŭgŭ ga yema ore ga nŭxŭ yaxuxŭ rŭ yema Tupanaãrŭ ore ga nuxcŭmaŭgŭxŭ ga orearŭ uruŭgŭ Ngechuchuchigagu ũmatŭgŭxŭ.

Ngechuchu rŭ nŭxŭ nacuèx i guxŭma i duŭxŭgŭ

²³ Rŭ yexguma Ngechuchu Ũpetŭchigaarŭ petacèx Yerucharéŭwa yexmagu, rŭ muxŭma ga duŭxŭgŭ rŭ nŭxŭ nayaxŭgŭ, yerŭ nŭxŭ nadaugŭ ga yema taxŭ ga mexŭgŭ ga Tupanaãrŭ poramaã naxŭxŭ. ²⁴ Natŭrŭ ga nŭma ga Ngechuchu rŭ tama yema duŭxŭgŭmëxëwa nŭgŭ nayexmaxëëchaŭ, yerŭ woetama marŭ nŭxŭ nacuèx ga tacŭgu na naxŭnŭëxŭ ga guxŭma ga yema duŭxŭgŭ. ²⁵ Rŭ yemacèx ga nŭma rŭ taxucèxma texé namaã nŭxŭ tixu na tacŭgu naxŭnŭëxŭ ga yema duŭxŭgŭ. Yerŭ nŭmatama marŭ nŭxŭ nacuèx ga tacŭgu na naxŭnŭëxŭ ga naãëwa ga wŭxichigŭ.

3

Ngechuchuxŭtagu nanaxŭãne ga Nicodému

¹ Nayexma ga wŭxi ga Parichéu ga Nicodémugu ãegacŭ. Rŭ nŭma rŭ wŭxi ga ãëxgacŭ ga nŭxŭ nangechaŭgŭcŭ nixŭ ga Yudŭgŭtanŭwa. ² Rŭ guma Nicodému rŭ Ngechuchuxŭtagu nanaxŭãne ga chŭtacŭ. Rŭ ñanagŭrŭ Ngechuchuxŭ: —Pa Ngúexëëruŭx, toma nŭxŭ tacuèx na aixcŭma Tupana nŭma cuxŭ muxŭ na toxŭ cungúexëëxŭcèx. Erŭ taxucŭrŭwa texé cuxrŭŭ tanaxŭ i ngëma taxŭ i mexŭgŭ i Tupanaãrŭ poramaã ŭxŭ, ega tama Tupana tŭmaxŭtawa ngëxmagu —ñanagŭrŭ. ³ Rŭ Ngechuchu nanangãxŭ rŭ ñanagŭrŭ nŭxŭ: —Aixcŭma cumaã nŭxŭ chixu, rŭ yŭxema tama wenaxãrŭ buxe rŭ taxucŭrŭwama Tupana ãëxgacŭ íxŭxŭwa tangu —ñanagŭrŭ. ⁴ Rŭ Nicodému rŭ Ngechuchuna naca, rŭ ñanagŭrŭ nŭxŭ: —¿Natŭrŭ ñuxãcŭ i wŭxi i yatŭ i marŭ yaxŭ i wena nabuxŭ? ¿Éxna wena naëãnŭgu naxŭcuxŭ rŭ ngëmaãcŭ wena nabuxŭ? —ñanagŭrŭ. ⁵ Rŭ Ngechuchu nanangãxŭ rŭ ñanagŭrŭ: —Rŭ aixcŭma cumaã nŭxŭ chixu rŭ yŭxema tama nŭxŭ rŭxoxe i tŭmaãrŭ pecadu rŭ tama Tupanaãë i Ũnŭxŭwa nayaxŭxe i maxŭ i ngexwacaxŭxŭ, rŭ taxucŭrŭwama Tupana ãëxgacŭ íxŭxŭwa tichocu ⁶ —Yŭxema duŭxŭwa buxe rŭ duŭxŭtama tixŭ. Natŭrŭ yŭxema Naãë i Ũnŭxŭwa nayaxŭxe i maxŭ i ngexwacaxŭxŭ, rŭ Tupanaxãcŭ tixŭ. ⁷ —¡Tãŭtãma cubaixãchiãë na cumaã nŭxŭ chixuxŭ na Tupana naxwèxexŭ na guxŭma i duŭxŭgŭ rŭ wena nabuexŭ! ⁸ —Ya buanecŭ rŭ nŭma ínanaxwèxexŭwa nabu. Rŭ nŭxŭ cuxŭnŭ i naga, natŭrŭ tama nŭxŭ cucuèx na ngextãama ne naxŭxŭ rŭ ngextãama na naxŭxŭ. Rŭ ngëxgumarŭŭ ta tixŭgŭ ya guxãma ya yŭxema Naãë i Ũnŭxŭwa nayaxŭxe i maxŭ i ngexwacaxŭxŭ —ñanagŭrŭ. ⁹ Rŭ Nicodému wenaxãrŭ Ngechuchuna naca, rŭ ñanagŭrŭ: —¿Natŭrŭ ñuxãcŭ nixŭ i ngëma? —ñanagŭrŭ. ¹⁰ Rŭ Ngechuchu nanangãxŭ, rŭ ñanagŭrŭ nŭxŭ: —Cuma rŭ Yudŭgŭarŭ ngúexëëruŭ i nŭxŭ cuáxŭ quixŭ.

¿Rü ñuxãcü chi i cuma i tama nüxũ cucuáxũ i ngẽma? ¹¹ —Aixcüma cumaã nüxũ chixu rü toma rü namaã tidexagü i ngẽma nüxũ tacuáxũ. Rü norü uruũ tixĩgü i ngẽma nüxũ tadaugüxũ. Natürü pema rü tama toxũ peyaxõgü i ngẽma pemaã nüxũ tixuxũ. ¹² —Rü ñuxma na tama choxũ peyaxõgüxũ i ngẽma pemaã nüxũ chixuxũ i ñoma i naãneãrũ ngẽmaxũchiga, rü ¿ñuxãcü tá peyaxõgüxũ ega pemaã nüxũ chixuxgu i daxũguxũ i naãneãrũ ngẽmaxũchiga? ¹³ —Taguma texé daxũguxũ i naãnewa taxũ. Natürü i choma i Tupana Nane na duũxũxũ chiĩxũ, rü chaxicatama nixĩ i ngẽma ne chaxũxũ rü ngẽma tá chaxũxũ. ¹⁴⁻¹⁵ —Pema nüxũ pecuèx ga ñuxãcü nuxcümaxũchima yema nachica ga ngextá taxúema íxãpataxũwa, rü Moĩché wüxi ga naĩgu nanaxünagü ga yema äxtape ga dñerumünaxcèx. Rü ngẽxgumarũũ tá ta i choma i Tupana Nane i duũxũxũ chiĩxũ, rü wüxi i naĩgu tá choxũ naxünagügü i duũxũgü na guxãma ya texé ya choxũ yaxõgüxe rü tüxũ nangẽxmaxũcèx i maxũ i taguma gúxũ.

Tupana rü poraãcü nüxũ nangechaũ i ñoma i naãneãrũ

¹⁶ —Rü Tupana rü poraãcü nüxũ nangechaũ i ñoma i naãneãrũ i duũxũgü. Rü yemacèx inanamu ga Nane ga nügümaã wüxicacü na guxãma ya texé ya nüxũ yaxõgüxe rü tama itarütauxexũcèx rü tüxũ nangẽxmaxũcèx i maxũ i taguma gúxũ. ¹⁷ —Yerü ga Tupana rü tama ñoma ga naãnewa nanamu ga Nane na duũxũgümaã naxueguãxũcèx na napoxcuexũ. Natürü núma nanamu na namaxẽxẽãxũcèx i duũxũgü. ¹⁸ —Rü yixema Tupana Naneãxũ yaxõxẽ, rü Tupana rü tama tümamaã nanaxuegu na tapoxcuxũ. Natürü yixema tama nüxũ yaxõxẽ, rü marü tümamaã nanaxuegu na tapoxcuxũ, erü tama nüxũ tayaxõ ya yima Tupana Nane ya nügümaã wüxicacü. ¹⁹ —Rü yixema tama nüxũ yaxõgüxe, rü Tupana rü marü tümamaã nanaxuegu na tapoxcuexũ. Yerü yexguma ñoma ga naãnewa nanguxgu ga Tupana Nane ya duũxũgüarü ngõonexẽẽruũ, rü tama nawe tarüxĩxchaũ. Natürü yexera tümäärü me nixĩ ga eãnexũwaama na tayexmagüxũ, yerü chixexũ taxügü. ²⁰ —Guxãma ya yixema chixexũ ügüxe rü naxchi taxaie i ngõonexũ. Rü tama nüxna tangaicamagüchaũ erü tama tanaxwèxe na nangóxũ i ngẽma chixexũ i ítaxügüxũ. ²¹ —Natürü yixema aixcüma Tupanaãrü ore nüxũ ixuxũãcüma meã maxẽxẽ rü nüxna tangaicama i ngẽma ngõonexũ. Rü ngẽmaãcü tanaxü na meã nangóxũcèx na Tupanaãrü ngüchaũãcüma na yĩxũ i guxũma i ngẽma taxügüxũ —ñanagürü.

Cuáũ ga baiũxẽẽruũ rü wenaxãrũ nüxũ nixu ga Ngechuchuchiga

²² Rü yemawena rü tomaã Yudéaanewa naxũ ga Ngechuchu. Rü ñuxre ga ngunexũ tomaã yéma nayexma rü yéma duũxũgüxũ ítabaiũxẽẽgü. ²³ Rü Cuáũ ga baiũxẽẽruũ rü Enóãrũ ñãnewa ga Charíarü ngaicamana rü ínanabaiũxẽẽ ta ga duũxũgü yerü yéma nayexma ga taxũ ga dexá. Rü yema yéma íngugüetanũxũ ga duũxũgü, rü Cuáũ ínayabaiũxẽẽtanü. ²⁴ Rü yemaãcü nangupetü naxüpa ga na poxcupataũgu yatèxcuchixũ ga Cuáũ. ²⁵ Rü yexguma rü ñuxre ga norü ngúexũgü ga Cuáũ, rü wüxi ga Yudíumaã niporagatanücüü nachiga ga nacümagü na ñuxãcü namexũ na Tupanacèx nügü yamexẽẽgüxũ ga duũxũgü. ²⁶ Rü Cuáũmaã nüxũ nayarüxugüe, rü ñanagürügü: —Pa Ngúexẽẽruũx, dücax guma yatü ga tomaã nüxũ quixucü rü cumaã yexmacü ga natü i Yudáũãrũ tocutüwa, rü yima rü ñuxma rü duũxũgüxũ ínbaiũxẽẽ, rü guxũma i duũxũgü rü nawe narüxĩ —ñanagürügü. ²⁷ Rü Cuáũ nanangãxũ rü ñanagürü nüxũ: —Taxúema tacü tüxũ nangẽxma ega Tupana tama tüxna naxãxgu. ²⁸ —Pematama rü marü choxũ pexĩnüẽ ga yexguma ñachagu:

“Choma rü tama Cristu chixĩ. Natürü choma chixĩ i Tupana yima Cristupêxegu choxũ imuxũ na nüxũ chixuxücèx i nachiga”, ñachagu. ²⁹—Rü wüxi i ngĩgüwa rü yima yatü ya ingĩcü rü naxmèxãrũ yora nixĩ. Rü yima yatümücü i naxütawa ngèxmaxũ rü nüxũ inarüxĩnü i norü ore. Rü nataãe i ngèxguma nüxũ naxĩnügu i ngèma na yadexaxũ. Rü ngèxgumarũ i choma rü aixcüma Cristumaã chataãèxũchi i ñuxmax. ³⁰—Nüma rü tá nixĩnagüchigü na ãèxgacü yĩxũ, natürü i choma rü tá ícharüxĩchigü.

Yima daxüwa ne üxcüchiga

³¹—Rü yima Cristu ya daxüwa ne üxcü rü guxãetüwa nangèxma. Natürü i choma rü ñoma i naãnewa changèxma, rü ñoma i naãnecũãx chixĩ, rü ngèma ñoma i naãnewa ngèxmaxũchigaxũ chixu. Natürü i nüma ya Cristu ya daxüwa ne üxcü, rü guxãetüwa nangèxma. ³²—Rü nüma rü tamaã nüxũ nixuchiga ga yema nüxũ nadauxũ rü nüxũ naxĩnüxũ. Natürü noxretama nüxũ nayaxögü i ngèma nüxũ yaxuxũ. ³³—Natürü ngèxguma texé nüxũ yaxõxgu i norü ore, rü ngèmaãcü tanangoxèe na aixcüma yĩxũ i ngèma Tupana nüxũ ixuxũ. ³⁴—Rü yima Tupana núma namucü, rü Tupanaãrũ orexũ nixu. Erü Tupana rü nüxna nanamu i Naãe i Üünexũ na guxüguma naxütawa nangèxmaxücèx. ³⁵—Rü Tanatü ya Tupana rü Nanexũ nangechaũ. Rü ngèmacèx marü naxmèxwa nanangèxmaxèe i guxüma i tacü i ngèxmaxũ. ³⁶—Rü yixema Tupana Naneãxũ yaxõxè rü tüxũ nangèxma i maxũ i taguma gúxũ. Natürü yixema tama nüxũ yaxõxchaũxè ya Tupana Nane, rü tãütãma tüxũ nangèxma i ngèma maxũ i taguma gúxũ. Natürü tá tanayaxu i ngèma ãücümaxũ i poxcu i Tupana tá namaã tüxũ poxcuxũ —ñanagürü ga Cuáũ ga baiüxèeruũ.

4

Ngechuchu rü Chamáriaanecũãx ga ngecü

¹ Rü Parichégü rü nüxũ nacuáchigagü ga Ngechuchu rü Cuáũãrũ yexera nüxũ na nayexmaxũ ga norü ngúexügü, rü norü yexera duüxügüxũ na ínabaiüxèexũ. ² Natürü tama Ngechuchu nixĩ ga ínabaiüxèecü ga duüxügü. Rü toma ga norü ngúexügü tixĩ ga tanaxüxũ ga yema. ³ Rü yexguma Ngechuchu nüxũ ñnügu ga Parichégü rü nachigagu na yadexagüxũ, rü yéma Yudéaanewa ítachoxũ na Gariréaanecèx tawoeguxũ. ⁴ Natürü ga yema nama ga nagu tawoeguxũ rü Chamáriaanewa nadapetü. ⁵ Rü yemacèx ga toma rü nawa tangugü ga wüxi ga Chamáriaaneãrũ ñãne ga Chicaru. Rü guma ñãneãrũ ngaicamana nayexma ga yema naãne ga nuxcümaücü ga Acobuaxũ yexmaxũ rü yixcama rü nane ga Yúchena naxãxũ. ⁶ Rü yéma nayexma ga wüxi ga puchu ga duüxügü dexácèx ixaixmaügücü ga Acobuarü Puchugu ãegacü. Rü poraãcü nipa ga Ngechuchu ga namagu na yaxüxũ. Rü yemacèx guma puchuxütawa nayarütoõchi. Rü tocuchiwa nanguxchaũ ga yexguma. ⁷⁻⁸ Rü toma ga norü ngúexügü rü guma ñãnewa taxĩ na torü õnacèx tayataxegüxücèx. Rü towena yéma ingu ga wüxi ga ngecü ga Chamáriaanecũãx ga guma puchuwa dexáwa ücü. Rü Ngechuchu rü ñanagürü ngĩxũ: —¡Íraxũ i dexá choxna naxã! —ñanagürü. ⁹ Natürü ga yema nge rü ñbaixãchiãe yerü ga Yudíugü rü Chamáriaanecũãxgümaã nügüchi naxaie rü yemacèx ga yema nge rü inangãxũ rü ngĩgürügü nüxũ: —¿Ñuxãcü i cuma na Yudíu quiixũ i dexácèx choxna cuçaxũ i choma na Chamáriaanecũãx chiixũ? —ngĩgürügü. ¹⁰ Rü Ngechuchu ngĩxũ nangãxũ, rü ñanagürü: —Ngèxguma chi nüxũ cucuèxgu i ngèma mexũ i Tupana cuxna ãxchaũxũ, rü chi nüxũ cucuèxgu na texé yĩxũ ya yima dexá cuxna taçacü, rü cuma rü chi nüxnata cuca i dexá i maxũ nawa ngèxmaxũ rü nüma rü chi cuxna nanaxã i ngèma dexá —ñanagürü. ¹¹ Rü

yema ngecũ inangãxũ, rü ngĩgürügü nüxũ: —Pa Corix, ¿ñuxãcü tá i dexáta cuyaxu? Erü daa puchu rü namátamaxũchi rü cuxũ nataxuma na tacümaã cunayaxuxũcèx i dexá. ¿Rü ngextá tá i cunayaxuxũ i ngẽma dexá i maxũ nawa ngẽxmaxũ na choxna cunaxãxũcèx? ¹² —Nuxcũmaũcü ga tórü oxu ga Acobu toxçèx núma Chamáriaanewa nanatèx ga daa puchu. Rü gumawa nixĩ ga naxaxexũ ga núma rü nanegü rü norü wocagü. ¿Rü ñuxãcü chi i cuma i norü yexera quiĩxũ? —ngĩgürügü. ¹³ Rü Ngechuchu ngĩxũ nangãxũ, rü ñanagürü: —Rü guxãma ya texé ya daa puchuarü dexáwa axexe, rü wena táxarü tiṭawae. ¹⁴ —Natürü texé ya yixema choma tüxna chaxãxũ i dexáwa axexe, rü tagutáma wena tiṭawa. Erü ngẽma dexá i choma tüxna chaxãxũ rü wüxi ya puchu ya guxũguma ibaibecürüũ tá nixĩ i tümawa, erü ngẽma dexáwa nangẽxma i maxũ i taguma gúxũ —ñanagürü. ¹⁵ Rü ngĩma ga yema nge rü inangãxũ rü ngĩgürügü: —Pa Corix, ¿choxna naxã i ngẽma dexá na taguma wena chiṭawaxũcèx, rü taguma wena daa puchuwa dexáwa chaxũxũcèx! —ngĩgürügü. ¹⁶ Rü Ngechuchu ñanagürü ngĩxũ: —¡Íyadau ya cute, rü naxçèx yaca, rü nuã pexĩ! —ñanagürü. ¹⁷ Rü yema ngecũ rü inangãxũ, rü ngĩgürügü nüxũ: —Nataxuma ya chaute —ngĩgürügü. Rü Ngechuchu ñanagürü ngĩxũ: —Aixcũma nixĩ i ngẽma nüxũ quixuxũ na nataxuũma ya cute. ¹⁸ —Yerü wüximẽxpũxchirẽx nixĩ ga cute, rü yima ñuxma cuxũtawá ngẽxmacü rü tama aixcũma cutexũchi nixĩ. Rü ngẽmacèx aixcũma nixĩ i curü ore i chomaã nüxũ quixuxũ —ñanagürü. ¹⁹ Rü yexguma yemaxũ naxĩnúgu ga yema ngecũ, rü ngĩgürügü: —Pa Corix, nüxũ chicuèxãchi rü cuma rü wüxi i Tupanaãrũ orearü uruũ quixĩ. ²⁰ —Nuxcũmaũgũxũ ga torü oxigü ga Chamáriaanecũãxgü rü daa mèxpũne ga Garachĩũwa Tupanaxũ nicuèxũgü. Natürü i pema i Yudĩgü rü ñaperügügü:

“Rü Yerucharéũ nixĩ i nachica i mexũ i ngextá Tupanaxũ ticuèxũgü”, ñaperügügü. ²¹⁻²² Rü Ngechuchu ngĩxũ nangãxũ rü ñanagürü: —Pema i Chamáriaanecũãxgü rü tama aixcũma nüxũ pecuèxgü ya yima nüxũ picuèxũgücü. Natürü toma i Yudĩgü rü aixcũma nüxũ tacuèx ya yima nüxũ ticuèxũgücü, erü Yudĩgügagu nixĩ i Tupana namaxèxèxũ i guxũma i duũxgü. ¡Choxũ yaxõ, Pa Ngecũx! Rü aixcũma ínangu tá i ngunexũ na tãũtáma daa mèxpũnewa rü èxna Yerucharéũwa tá nüxũ na picuèxũgũxũ ya Tanatü ya Tupana. ²³ —Erü yixema aixcũma Tupanaxũ icuèxũgũxe rü nüetama nixĩ i ngèxürüxũmare i nachicawa Tupanaxũ ticuèxũgü. Erü ñuxma rü ngẽma Naãe i Üünexũ naxwèxexũ nixĩ na guxũma i tümããemaã rü tümããrũ maxũmaã aixcũma Tupanaxũ ticuèxũgũxũ. Rü ngẽmaãcü nixĩ i nanaxwèxexũ ya Tanatü na nüxũ ticuèxũgũxũ. ²⁴ —Erü Tupana rü wüxi i Naãe nixĩ. Rü ngẽmacèx yixema texé ya nüxũ icuèxũgũxe rü tanaxwèxe i guxũma i tümããemaã rü tümããrũ maxũmaã na aixcũma nüxũ ticuèxũgũxũ, ngẽma Naãe i Üünexũ naxwèxexũacũma —ñanagürü. ²⁵ Rü yema ngecũ inangãxũ rü ngĩgürügü: —Choma nüxũ chacuèx rü tá ñoma i naãnewa nangu ya yima Cristu ya Tupana nüxũ unetacü. Rü ngèxguma yima núma üxgu rü tá tamaã nanangoxèe i guxũma i Tupanachiga —ngĩgürügü. ²⁶ Rü Ngechuchu rü ñanagürü ngĩxũ: —Choma na cumaã chidexaxũ, rü yima chixĩ —ñanagürü. ²⁷ Rü yexguma íyadexayane rü ítangugü ga toma ga norü ngüèxgü. Rü tabaixãchiãgü yerü ga Ngechuchu rü wüxi ga ngecũmaã ínidexa. Natürü taxúema ga toma rü togü taporaxèe ga nüxna na tacagũxũ ga tacü ngĩmaã na nanaxwèxexũ rü tacũchiga yiĩxũ ga ngĩmaã na íyadexaxũ. ²⁸ Rü yexguma ga yema ngecũ rü yéma ngĩxũ itèx ga ngĩrũ tüxũ. Rü ñãnewa ixũ na duũxgũmaã nüxũ yanaxuxũcèx. ²⁹ Rü ngĩgürügü: —¡Ngĩxã rü ítayadaugü i wüxi i yatü i

chomaã nüxü ixuxü ga guxüma ga tacü ga chaxüxü! ¿Taux éxna yima yïixü ya Cristu? —ngïgürügü. ³⁰ Rü inaxïãchi ga yema ñanecüãx, rü Ngechuchu íyexmaxüwa naxï. ³¹ Rü yoxni ga toma ga norü ngúexügü rü Ngechuchuxü tachixewegü na nachibüxüçex. ³² Natürü ga nüma rü ñanagürü toxü: —Choma rü choxü nangëxma i chowemü i pema tama nüxü pecuáxü —ñanagürü. ³³ Rü yexguma ga toma ga norü ngúexügü rü togüna tacagüe, rü ñatarügügü: —Bexmana marü çtexé nuã tanange i nawemü? —ñatarügügü. ³⁴ Natürü ga Ngechuchu rü ñanagürü toxü: —Ngëma õna i choxü poraxëëxü nixï na chanaxüxü i norü ngúchaü ya yima nuã choxü mucü ya Chaunatü, rü na chayanguxëëxü i norü puracü. ³⁵ —Rü pema rü ñaperügügü:

“Rü ägümücü ya tauemacü nataxu na yabuxgüxü i trigu”, ñaperügügü. Natürü i choma rü ñacharügü pexü:

“¡Düçex, rü meã penangugü i duüxügü! Erü marü ínamegü na Tupanaxü nayauxgüçex, ngëxgumarüü i wüxi i trigunecü i marü nawa nanguxü na yabuxgüxü erü marü nidau”. ³⁶ —Rü yíxema Tupanacëx nadexe i duüxügü rü tá tanayaxu i tümaärü natanü. Rü guxüma i ngëma duüxügü i tüxü irüxïnüëxü rü tá nanayauxgü i maxü i taguma gúxü. Rü ngëmaäcü rü wüxigu tá tataãëgü ya yíxema tüxira ngëma duüxügümaã Tupanaärü orexü ixuxe rü yíxema yixcama ngëma duüxügüxü Tupanacëx dexe. ³⁷ —Rü aixcüma nixï i ngëma ore i ñaxü:

“Wüxie tixï ya namaã toexe i trigu rü togue tixï ya yíxema yabuxgüxe i norü o”, ñaxü. [Rü ngëxgumarüü rü wüxie tixï ya tüxira duüxügümaã nüxü ixuxe i Tupanaärü ore, rü togue tixï ya yixcama ngëma duüxügüxü dexe Tupanacëx.]

³⁸ —Rü noxri rü togü nixï ga duüxügümaã nüxü ixuxü ga Tupanaärü ore, natürü ga duüxügü rü tama nayaxögü ga yexguma. Rü yemawena rü pexü chamu na yema duüxügümaã nüxü pixuxüçex ga yema ore. Rü pema nixï ga yema duüxügüxü pedexü Tupanacëx, yerü nayaxögü ga yexguma namaã nüxü pixuxgu ga yema ore. Rü yemaäcü ga pema rü marü peyoxnië nawa ga togüarü puracü —ñanagürü. ³⁹ Rü muxüma ga guma Chamáriaanewa yexmane ga ñanecüãx rü Ngechuchuaxü nayaxögü, yerü nüxü nayaxögü ga yema ore ga yema ngecü namaã nüxü ixuxü ga yexguma ngïxgu:

“Guxüma ga tacü ga üpa chaxüxü rü chomaã nüxü nixu” ngïxgu. ⁴⁰ Rü yemacëx ga yema Chamáriaanecüãxgü rü yexguma Ngechuchuxütawa nangugügu rü nüxü nacëxügü ga yexma natanügu na naxäüxüçex. Rü taxre ga ngunexü yexma natanügu narüxãüx ga Ngechuchu. ⁴¹ Rü muxüma ga togüamachigü ga Chamáriaanecüãxgü rü Ngechuchuaxü nayaxögü ga yexguma nüxü naxïnüëgu ga yema norü ore ga nümatama nüxü yaxuxü. ⁴² Rü yexguma ga yema duüxügü rü ñanagürügü ngïxü ga yema ngecü: —Ñuxma waxi nixï i aixcüma nüxü tayaxögüxü erü tomatama nüxü taxïnüë i ngëma norü ore i tomaã nüxü yaxuxü. Rü ngëmawa nüxü tacuëx na aixcüma yima yïixü ya Cristu ya ñoma i nañecüãx i duüxügüarü maxëxëëruü. Rü tama ngëma cuma tomaã nüxü quixuxüçëxicatama tayaxögü —ñanagürügü.

Ngechuchu rü nanamexëë ga wüxi ga äëxgacü nane

⁴³ Rü taxre ga ngunexügüwena ga Ngechuchu rü tomaã inaxüãchi ga Chamáriaanewa na Gariréaanewa naxüxüçex. ⁴⁴ Rü nümatama ga Ngechuchu ga üpaacü rü ñanagürü: —Wüxi i Tupanaärü orearü uruü, rü norü nañewatama i duüxügü rü tama meã nanayauxgü —ñanagürü. ⁴⁵ Natürü yexguma Gariréaanewa tangugügu, rü yema nañecüãx ga duüxügü rü meãma nanayauxgü. Yerü nümagü ga yema nañecüãxgü rü Yerucharéüwa naxï ta naxcëx ga Üpetüchigarü peta, rü yéma nüxü nadaugü ga yema taxü

ga mexŭgŭ ga Tupanaärŭ poramaã naxŭxŭ ga Ngechuchu ga yexguma. ⁴⁶ Rŭ ga Ngechuchu rŭ tomaã nataegu naxcèx ga guma ãane ga Caná ga Gariréaanewa yexmane. Rŭ guma ãanewa nixŭ ga binuxŭ nanguxuchixèèãxŭ ga dexá. Rŭ ãane ga Capernáŭwa nayexma ga wŭxi ga tacŭ ga ãèxgacŭ, rŭ niðaawe ga wŭxi ga nane. ⁴⁷ Rŭ yexguma guma ãèxgacŭ nŭxŭ cuáchigagu ga Ngechuchu rŭ Gariréaanewa na nanguxŭ ga Yudéaanewa na ne naxŭxŭ, rŭ naxŭtawa naxŭ. Rŭ nŭxŭ nayacèèxŭ na napatawa naxŭxŭcèx, rŭ naxcèx na yanataanexèèãxŭcèx ga guma nane ga marŭ turaxŭchicŭ. ⁴⁸ Rŭ Ngechuchu nanangãxŭ, rŭ ñanagŭrŭ nŭxŭ: —Pema rŭ tama peyaxŭgŭ ega tama nŭxŭ pedauxiragu i taxŭ i cuèxruŭgŭ i Tupanaärŭ poramaã ŭxŭ —ñanagŭrŭ. ⁴⁹ Natŭrŭ ga guma ãèxgacŭ rŭ ñanagŭrŭ nŭxŭ: —Pa Corix, ipaxa chowe rŭxŭ naxŭpa na nayuxŭ ya chaune! —ñanagŭrŭ. ⁵⁰ Rŭ Ngechuchu nanangãxŭ rŭ ñanagŭrŭ nŭxŭ: —iNataegu i cupatawa! Erŭ cune rŭ marŭ naxcèx nitaane —ñanagŭrŭ. Rŭ guma yatŭ rŭ nayaxŭ ga yema ore ga Ngechuchu namaã nŭxŭ ixuxŭ. Rŭ napatacèx nataegu. ⁵¹ Rŭ yexguma napatawa nanguxchaŭgu ga guma ãèxgacŭ, rŭ norŭ duŭxŭgŭ napèxegu nayayi, rŭ ñanagŭrŭgŭ nŭxŭ: —Cune rŭ marŭ naxcèx nitaane —ñanagŭrŭgŭ. ⁵² Rŭ yexguma rŭ norŭ duŭxŭgŭna naca, rŭ ñanagŭrŭ nŭxŭ: —¿Tacŭ rŭ oragu inaxŭgŭxŭ na naxcèx yataanexŭ? —ñanagŭrŭ. Rŭ yema norŭ duŭxŭgŭ nanangãxŭ rŭ ñanagŭrŭgŭ: —Ïne tocuchiguwena nixŭ ga nŭxŭ nangupetŭxŭ ga na yaxaxŭnexŭ —ñanagŭrŭgŭ. ⁵³ Rŭ guma bucŭ nanatŭ rŭ nŭxna nacuèxãchi ga yema oragu na yiŭxŭ ga Ngechuchu ga ñaxŭ nŭxŭ:

“Cune rŭ marŭ naxcèx nitaane” ñaxŭ. Rŭ nŭma ga guma ãèxgacŭ rŭ guxŭma ga napatacŭãx rŭ Ngechuchuxŭ nayaxŭgŭ. ⁵⁴ Rŭ yexguma Yudéaanewa ne naxŭxgu ga Ngechuchu, rŭ yema nixŭ ga norŭ taxre ga cuèxruŭ ga taxŭ ga Tupanaärŭ poramaã duŭxŭgŭxŭ nawéxŭ ga Gariréaanewa.

5

Ngechuchu rŭ nanamexèè ga wŭxi ga yatŭ ga idaawexŭ ga Betechawa yexmaxŭ

¹ Rŭ ñuxre ga ngunexŭgŭ ngupetŭguwena rŭ nayexma ga wŭxi ga peta ga Yudŭgŭ auregŭxŭ na yemaãcŭ Tupanaxŭ yacuèxŭŭgŭxŭcèx. Rŭ yemacèx ga Ngechuchu rŭ Yerucharéŭcèx nataegu. ² Rŭ guma ãaneärŭ poxeguxŭ rŭ nŭxŭ nayexma ga wŭxi ga ããx ga Carneruarŭ Choxŭchicagu ãegaxŭ. Rŭ yema ããxärŭ ngaicamana nayexma ga wŭxi ga puchu ga Yudŭgŭgawa Betechagu ãegaxŭ. Rŭ guma puchuanacŭwa nayexma ga wŭximéèxpŭx ga chopetŭchica ga ãxpataŭetŭgŭxŭ. ³ Rŭ yema chopetŭchicagu nacagŭ ga muxŭma ga duŭxŭgŭ ga idaaweexŭ. Rŭ nŭmaxŭ rŭ nangexetŭgŭ, rŭ togŭ rŭ nachixeparagŭ, rŭ togŭ rŭ nanawãixãchigŭ. Rŭ yema idaaweexŭ rŭ yema nananguxèègŭ ga guma puchu ga na naxŭãxãchichiŭxŭcèx. ⁴ Yerŭ ñuxguacŭ rŭ guma puchugu inarŭxŭxŭ ga wŭxi ga daxŭcŭãx ga Tupanaärŭ orearŭ ngeruŭ, rŭ nayaxŭãxchiŭcŭxŭèèxŭ. Rŭ guxema tŭxira tŭgŭ yema táexe nachiŭwa ga guma puchu ga yexguma yaxŭãxchiŭcŭgŭ, rŭ tŭmacèx nitaane woo ga ngèxŭrŭŭmare ga daawe tŭxŭ yexmaxè. ⁵ Rŭ yema natanŭwa nayexma ga wŭxi ga yatŭ ga marŭ 38 ga taunecŭ idaawecŭ. ⁶ Rŭ yexguma Ngechuchu nŭxŭ dèuxgu ga guma yatŭ ga yexma na nacaxŭ, rŭ nŭxŭ nacuáchiga ga marŭ mucŭma ga taunecŭ na yaðaawexŭ. Rŭ yemacèx nŭxna naca rŭ ñanagŭrŭ nŭxŭ: —¿Cunaxwèxexŭ i cuxcèx na yataanexŭ? —ñanagŭrŭ. ⁷ Rŭ Ngechuchuxŭ nangãxŭ ga guma idaawecŭ, rŭ ñanagŭrŭ: —Pa Corix, tataxuma ya texé ya choxŭ rŭngŭxèèxè na ngema choxŭ tataèxŭcèx i ngèxguma naxŭãxãchichiŭgu ya daa puchu. Rŭ guxŭguma i ngèxguma ngema chaugŭ chatáechaŭgu, rŭ

yoxni i togü rü marü nüxĩra nügü ngema natáegü —ñanagürü. ⁸ Rü Ngechuchu rü ñanagürü nüxũ: —¡Inachi, rü nayaxu i curü caruũ, rü íxũ! —ñanagürü. ⁹⁻¹⁰ Rü yexgumatama naxcèx nitaane ga guma yatü. Rü nanayaxu ga norü caruũ, rü ínixũ. Natürü ga yema ngunexũ rü ngüxchigaarü ngunexũ nixĩ. Rü yemacèx ga yémacũâxgü ga Yudiügüarü âëxgacügü rü ñanagürügü nüxũ ga guma yatü ga naxcèx itaanecü: —Ñoma nixĩ i ngüxchigaarü ngunexũ. Rü ngémacèx nachuxu nixĩ na cuyangexũ i curü caruũ erü yemaãcü tamaã nüxũ nixu ga Moĩché —ñanagürügü. ¹¹ Natürü ga guma yatü rü yema Yudiügüarü âëxgacügüxũ nangãxũ, rü ñanagürü: —Yima choxũ rümexêëcü rü ñanagürü choxũ:

“¡Nayaxu i curü caruũ rü íxũ!” ñanagürü. ¹² Rü yexguma ga yema âëxgacügü rü nüxna nacagü, rü ñanagürügü: —¿Texé ngéma ñatarügü cuxũ:

“¡Nayaxu i curü caruũ rü íxũ!” ñatarügü cuxũ? —ñanagürügü. ¹³ Natürü ga guma yatü rü tama nüxũ nacuèx ga texé naxcèx na yataanexêëxũ, yerü namuxüchi ga duũxügü ga yéma, rü yexma nayarütaxu ga Ngechuchu. ¹⁴ Natürü yixcama ga Ngechuchu rü tupauca ga taxũnegu nüxũ nayan-gau ga guma yatü, rü ñanagürü nüxũ: —¡Dücèx i ñuxma marü cuxcèx na yataanexũ, rü tãütáma wena chixexũ cuxü na tama quidaawexüçèx namaã i wüxi i ðaawe i ngéma marü cuxũ ngupetüxũãrü yexera ixĩxũ! —ñanagürü. ¹⁵ Rü ínixũ ga guma yatü, rü Yudiügüarü âëxgacügümaã nüxũ nayarüxu ga Ngechuchu na yĩxũ ga guma namexêëcü. ¹⁶ Rü yemacèx nixĩ ga yema âëxgacügü ga Ngechuchucèx nadaugüxũ na yamèxgüãxüçèx, yerü ngüxchigaarü ngunexügu napuracü. ¹⁷ Natürü ga Ngechuchu rü ñanagürü nüxũ: —Chaunatü ya Tupana rü guxũ i ngunexügu napuracü rü mexũ naxü. Rü ngémacèx i choma rü ta naxrüũ chapuracü —ñanagürü. ¹⁸ Rü yemacèx ga yema Yudiügüarü âëxgacügü rü yexeraãcü Ngechuchuxũ nimèxgüchaũ. Yerü tama naxrüũ nanaxaure ga ngüxchigaarü ngunexũ rü ñuxüchi nüxũ nixu ga Nanatüxüchi na yĩxũ ga Tupana, rü yemaãcü nügü nixu ga Nanatü ga Tupanamaã na nawüxiguxũ.

Nüma ga Tupanatama nixĩ ga Nanena naxããxũ ga pora

¹⁹ Rü yexguma ga Ngechuchu rü ñanagürü nüxũ ga yema âëxgacügü: —Aixcüma pemaã nüxũ chixu rü choma i Tupana Nane rü tama chorü poramaã chanaxü i ðacü rü puracü i mexũ. Natürü ngéma nüxũ chadauxũ i Chaunatü üxüxĩcatama nixĩ ichaxüxũ. Rü guxũma i ngéma Chaunatü üxũ, rü choma ya Nane rü ta chanaxü. ²⁰ —Chaunatü ya Tupana rü choxũ nangechaũ, rü ngémacèx choxũ nüxũ nadauxêë i guxũma i ðacü i nüma naxüxũ. Rü ngéma ñuxma choxũ nüxũ nadauxêëxũãrü yexera tá choxũ nüxũ nadauxêë i yixcüra. Rü ngëxguma i pema ega ngémaxũ pedaugügu, rü tá pebaixãchiãëgü namaã. ²¹ —Rü Chaunatü rü ínanadagüxêë i yuexügü rü wena nanamaxêë. Rü ngëxguma-rü ta i choma i Nane rü tüxna chanaxã i maxũ ya yixema chatümawèxéxe na tüxna chanaxãxũ. ²²⁻²³ —Rü tama Chaunatü nixĩ ya duũxügüxũ icagüçü i norü maxüchiga. Natürü choxũ nixĩ i namuxũ na chanaxüçèx i ngéma, na choxũ yacuèxüügüxüçèx i duũxügü, ngéma Chaunatüxũ na yacuèxüügüxürü. Rü yixema tama choxũ icuèxüxüxê, rü tama nüxũ ticuèxüũ ta ya Chaunatü ya choxũ nuã mucü. ²⁴ —Aixcüma pemaã nüxũ chixu rü yixema texé ya choxũ irüxĩnuxê i chorü ore, rü nüxũ yaxõxê ya yima Chaunatü ya núma choxũ mucü, rü tüxũ nangëxma i maxũ i taguma gúxũ. Rü Chaunatü rü tãütáma tümamaã nanaxuegu na tapoxcuxũ erü marü nawa ítanguxuchi na tayuxũ, rü tüxũ nangëxma i maxũ i taguma gúxũ. ²⁵ —Rü aixcüma pemaã nüxũ chixu rü marü nawa tá nangu i ngunexũ rü ñuxmatama nixĩ i chauga naxĩnüxũ tá i ngéma duũxügü i norü pecadugu yuexũ rü

iyarütaxexũ. Rũ texé ya chauga ñnũxẽ rũ tá tamaxẽ. ²⁶ —Nũma ya Chaunatũ rũ nũxũ nangẽxma i pora na namaxẽxẽãxũcèx i duũxũgũ. Rũ ngẽma pora rũ choxna nanaxã ya Chaunatũ na choma rũ ta duũxũgũxũ chamaxẽxẽxũcèx. ²⁷ —Rũ Chaunatũ ya Tupana choxũ namu na duũxũgũna chaçaxũcèx naxcèx i norũ maxũchiga, erũ choma nixĩ i Nane i duũxũxũ chiĩxũ. ²⁸ —¡Tãxũ i pebaixãchiãgũxũ namaã i ñãã ore i pemaã nũxũ chixuxũ! Erũ tá ínangu i ngẽma ngunexũ i nagu guxũma i duũxũgũ i yuexũ rũ tá na nũxũ naxĩnũxũ i chauga. ²⁹ —Rũ naxmaũgũwa tá ínachoxũ. Rũ ngẽma meã maxẽxũ, rũ tá ínarũdagũ na nayauxgũãxũcèx i maxũ i taguma gũxũ. Natürũ ngẽma chixexũ ügũxũ, rũ tá ínarũdagũ na napoxcuexũcèx.

Nawa nũxũ icuáxũ na Tupana yĩxũ ga Ngechuchuna naxãcü ga pora

³⁰ —Choma rũ taxucürũwa tacũ chaxũ chauechamatama ega tama choxũ naxũxẽãgu ya Chaunatũ. Rũ Chaunatũ chomaã nũxũ ixuxũãcüma nixĩ i nũxna chaçaxũ i duũxũgũ i norũ maxũchiga. Rũ ngẽxguma nũxna chacaxgu rũ aixcüma meãma chanangugũ i duũxũgũ. Erũ tama choxrũtama ngũchaũ nixĩ i ngẽma chaxũxũ, natürũ Chaunatũ ya nuã choxũ mucũarũ ngũchaũ nixĩ i ngẽma chaxũxũ. ³¹ —Rũ ngẽxguma chi chauchigaxũtama chixuxgu rũ taxuwama name i ngẽma. ³² —Natürũ nangẽxma i to i chauchigaxũ ixuxũ. Rũ nũxũ chacuèx rũ aixcüma nixĩ i norũ ore i pemaã nũxũ yaxuxũ. ³³ Pema rũ Cuáũ ya baiũxẽeruũxũtawa penamugũ ga perũ duũxũgũ na nũxũ pecuáxũcèx ga ore ga aixcüma ixĩxũ ga chauchiga. Rũ yema ore ga Cuáũ pexũ namaã ngãxũxũ rũ aixcüma nixĩ. ³⁴ —Natürũ i choma rũ tama chanaxwèxe i tacũ rũ yatũ chauétũwa nachogũ, erũ choma tátama chaugũna chadau. Natürũ pemaã nũxũ chixu i ngẽma Cuáũãrũ ore na choxũ peyaxõgũxũcèx rũ na penayauxgũxũcèx i maxũ i taguma gũxũ. ³⁵ —Cuáũ rũ wũxi ga omũ ga iyauracũxũ rũ pexũ baxixũ-rũ nixĩ ga pexcèx. Rũ pema rũ paxaãchi namaã petaãgũ. ³⁶ —Natürũ nangẽxma i tacũ i Cuáũãrũ orearũ yexera chauétũwa íchogũxũ. Rũ ngẽma nixĩ ga yema taxũgũ ga cuèxruũgũ ga Chaunatũ choxũ muxũ na norũ poramaã chanaxũxũcèx. Rũ yemawa pexũ nũxũ chadauxẽ na aixcüma Chaunatũ ya Tupana yĩxũ ga núma choxũ mucũ. ³⁷ —Rũ ngẽxgumarũ ta ya Chaunatũ ga guma núma choxũ mucũ, rũ marũ chauétũwa ínachogũ, woo taguma nũxũ pexĩnũe ga naga rũ taguma nũxũ pedau. ³⁸ —Rũ ngẽma Chaunatũarũ ore rũ ta tama peãewa nixũcu, erũ tama choxũ peyaxõgũ woo Chaunatũ núma choxũ na muxũ. ³⁹⁻⁴⁰ —Pema meãma nawa pengúe i Tupanaãrũ ore i ùmatũxũ, erũ nagu perũxĩnũe rũ ngẽmawa tá nũxũ ipeyangau i perũ maxũ i taguma gũxũ. Natürũ woo ngẽmatama Tupanaãrũ ore i ùmatũxũwa rũ chauchiga meã na yadexaxũ, natürũ i pema rũ tama choxũ peyaxõgũchaũ na ngẽmaãcü penayauxgũxũcèx i ngẽma maxũ. ⁴¹⁻⁴² —Rũ choma rũ tama chanaxwèxe na choxũ picuèxũgũxũ erũ meãma pexũ chacuèx, rũ nũxũ chacuèx na tama aixcüma Tupanaxũ pengechaũgũxũ. ⁴³ —Chaunatũ ya Tupana nixĩ ga núma choxũ mucũ, natürũ i pema rũ tama choxũ peyauxgũchaũ. Natürũ ngẽxguma chi tomare i yatũ nagagutama núma ùxgu, rũ ngẽma chi nixĩ i taãẽãcüma peyauxgũxũ. ⁴⁴ —¡Rũ ñuxãcü chi choxũ peyaxõgũ ega penaxwèxegu na pemũcũgũtama pemaã taãexũ rũ tama naxcèx pedaugũgu na Tupanaxũchi pemaã taãexũ? ⁴⁵ —¡Tãxũ i nagu perũxĩnũxũ na choma tá yĩxũ na pexũ chixugũxũ i Chaunatũxũtawa! Erũ Moĩché ga guma perũ maxũcèx nũxũ peyaxõgũcü tátama nixĩ ya yima pexũ ixugũcü i Chaunatũxũtawa. ⁴⁶ —Rũ ngẽxguma chi peyaxõgũgu i ngẽma ore ga Moĩché ùmatũxũ, rũ choxũ rũ chi ta peyaxõgũ. Yerũ ga Moĩché rũ chauchigagu nixĩ ga naxũmatũãxũ ga norũ poperawa. ⁴⁷ —Natürũ ngẽxguma tama peyaxõgũgu

i ngēma Moïché ümatüxü i ore, ¿rü ñuxácü tá peyaxögü i ngēma choma pemaã nüxü chixuxü? —ñanagürü ga Ngechuchu.

6

Ngechuchu rü nanachibüexē ga 5000 ga yatügu
(Mt 14.13-21; Mr 6.30-44; Lc 9.10-17)

¹ Rü yemawena ga Ngechuchu rü naxtaxa ga Gariréagu ãeganearütocutüwa tomaã naxü. Rü norü toéga ga guma naxtaxa rü Tibéria nixí. ² Rü muxüma ga duüxügu rü nawe narüxí. Yerü üpaacü rü marü nüxü nadaugü ga ñuxácü Ngechuchu na naxüxü ga taxü ga mexügu ga Tupanaärü poramaã üxü ga yexguma duüxügu ga idaaweegüxcèx yataanexēgüãgu. ³ Rü yexguma ga Ngechuchu rü wüxi ga mëxpünewa tomaã ínaxüãchi. Rü wüxigu tomaã yéma narüto. ⁴ Rü marü ningaica ga yema Yudíugüarü peta ga Üpetüchiga. ⁵ Rü yexguma Ngechuchu nüxü dawenügu rü nüxü nadau ga muxüma ga duüxügu ga nawe rüxíxü. Rü yemacèx Piripina naca, rü ñanagürü: —¿Rü ngextá tá naxcèx tataxe i nawemü i ñã duüxügu na nachibüexēxüxcèx? —ñanagürü. ⁶ Rü nümatama ga Ngechuchu rü marü nüxü nacüex ga tacü tá na naxüxü. Natürü yema ñanagürü Piripixü, yerü nüxü nacüáxchaü ga tacümaã tá na nangäxüãxü. ⁷ Rü yexguma Ngechuchuxü nangäxü ga Piripi, rü ñanagürü: —Woo chi naxcèx itaxegügu i 200 i dñeru naguxü i pãü, rü tãü chima nüxü ningu ega woo wüxichigüna íraxü íxächigügu —ñanagürü. ⁸⁻⁹ Rü yexguma ga Aüdré ga Ngechuchuarü ngüexü ga Pedru ga Chimáü naēneē, rü ñanagürü: —Nuã nangëxma i wüxi i buxü rü nüxü nangëxma i 5 i pãü i chebadanaxcèx rü taxre ta i choxni. ¿Natürü tacüwa name i ngēma naxcèx i ñã muxüchixü i duüxügu? —ñanagürü. ¹⁰ Rü yexguma ga Ngechuchu rü ñanagürü toxü: —jËcü, namaã nüxü pixu i duüxügu na ínatogüxcèx! —ñanagürü. Rü yema nachicawa rü nametëxéane ga guma maxë. Rü gumatëxewa narütogü ga duüxügu. Rü maneca 5000 wa nangu ga yexguma yatügüxica ixugügu. ¹¹ Rü yexguma ga Ngechuchu rü nanade ga yema pãügu, rü Tupanana moxë naxã. Rü yemawena rü toxü nayanu na yema duüxügu ga yéma rütogüxüxü tayanuxüxcèx. Rü yexgumarüü ta ga choxni rü nüxü toxü nayanuxëē, ñuxmata meãma nachibüe ga guxüma ga yema duüxügu. ¹² Rü yexguma marü meã nachibüegu ga guxüma, rü Ngechuchu toxü namu rü ñanagürü toxü: —jPenade i ngēma naxchipëxegü i íyaxügüxü na tama inaxaiyèxüxcèx! —ñanagürü. ¹³ Rü tanade ga yema naxchipëxegü ga yema 5 ga pãüwa íyaxüxü, rü 12 ga pexchi namaã tanaxüãcugü. ¹⁴ Rü yexguma yema duüxügu nüxü daugügu ga yema mexü ga taxü ga Tupanaärü poramaã naxüxü ga Ngechuchu, rü ñanagürügu: —Aixcümaxüchi daa nixí ya Tupanaärü orearü uruü ga guma ínangüxëécü —ñanagürügu. ¹⁵ Natürü ga Ngechuchu rü nüxü nicüexãchi ga duüxügu rü na norü ãëxgacüxü yangucuchixëégüchaüãxü. Rü yemacèx nüxna nixügachi rü yéamaxüra naxü nawa ga guma mëxpüne na nüxícatama nayexmaxüxcèx.

Dexáétügu nixü ga Ngechuchu
(Mt 14.22-27; Mr 6.45-52)

¹⁶ Rü yexguma marü nachütagu, rü toma ga Ngechuchuarü ngüexügu rü wenaxärü naxtaacutüwa taxí. ¹⁷ Rü poraãcü naxëãne. Rü tama ínangu ga Ngechuchu. Rü yemacèx wüxi ga ngue ga taxünegu tichoü, rü itaxíãchi ga na tocutüwa taxíxü ga Capernáüärü íãnewa na tangügüxcèx. ¹⁸ Rü yexguma tixãüyane rü inaxügü ga na poraãcü yabuaxü. Rü yemagagu rü poraãcü nayuape. ¹⁹ Rü yexguma marü 5 ga kilómetru tixãügu, rü Ngechuchuxü

tadaugü ga na dexáchiüétügu yaxüxü. Rü toma ga norü ngúexüğü rü poraãcü tamuüë. ²⁰ Natürü nüma ga Ngechuchu rü ñanagürü toxü: —Choma chixi. ¡Rü tãxü i pemuüëxü! —ñanagürü. ²¹ Rü yexguma ga toma ga norü ngúexüğü rü taãëãcüma tanayauxgüchaü ga toweüwa. Rü yexgumatama ítangügü ga yema ítaxüüwa.

Ngechuchucèx nadaugü ga duüxüğü

²² Rü moxüãcü ga yema duüxüğü ga naxtaxaarü tocutügu rüchoxü, rü nüxü nicuëxãchitanü ga toma ga Ngechuchuarü ngúexüğü ga marü nagu na taxüxü ga guma ngue ga taxüne ga nügümaã wüxicane. Rü nüxü nacuëxgü ta ga Ngechuchu rü tama towe na naxüxü. ²³ Rü yexguma yemagu ínaxüñüëyane, rü yoxocüne ínangügü ga náigü ga ngue ga itaxüne ga Tibériaarü íãnewa ne íxüne. Rü norü ngaicamana nangügü ga yema nachica ga ngextá Ngechuchu ínachibüexëëxüwa ga yema muxüma ga duüxüğü ga yexguma moxë ínaxãxgu naxcèx ga yema pãü. ²⁴ Rü yexguma yema duüxüğü nüxü daugügu ga guma nguewa na Ngechuchu rü toma ga na tatauxexüma rü yexma guma nguegügu nichoü na Ngechuchucèx yadaugüxü Capernáüãrü íãnegu.

Ngechuchu nixi i pãü i maxü tüxna äxü

²⁵ Rü yexguma guma naxtaxaarü tocutüwa nangügüga yema duüxüğü, rü Ngechuchuxü yexma nayangaugü. Rü nüxna nacagüe, rü ñanagürügü: —Pa Ngúexëëruüx, ¿ñuxgu nixi i nuã cunguxü? —ñanagürügü. ²⁶ Rü Ngechuchu nanangãxü, rü ñanagürü nüxü: —Aixcüma pemaã nüxü chixu rü tama yema nüxü na picuëxãchitanüxüçèx ga yema mexüğü ga Tupanaarü poramaa chaxüxü nixi i chauxcèx pedaugüxü. Natürü chauxcèx pedaugü yerü meãma pechibüe nawa ga yema òna ga pexna chaxãxü. ²⁷ —¡Tãxü i naxcèx pepuracüexü i òna i paxama gúxü! Rü narümemae nixi i naxcèx pepuracüe i ngema maxü i aixcüma ixüxü i taguma gúxü. Rü ngëma nixi i maxü i choma i Tupana Nane ya duüxüxü chixücü tá pexna chaxãxü, erü Chaunatü ya Tupana rü marü nanangoxëë na aixcüma Nane chiüxü —ñanagürü. ²⁸ Rü yexguma ga nümagü rü nüxna nacagü, rü ñanagürügü: —¿Tacü tá taxüe na tayanguxëëxüçèx i ngëma Tupana toxü naxwëxexü? —ñanagürügü. ²⁹ Rü Ngechuchu nanangãxü rü ñanagürü nüxü: —Rü Tupana rü núma choxü namu. Rü ngëma nüma pexü nanaxwëxexü nixi na choxü peyaxögüxü —ñanagürü. ³⁰ Rü yexguma ga nümagü rü nüxna nacagü, rü ñanagürügü nüxü: —¿Tacü rü cuëxruüxü tá toxü cudauxëë na cuxü tayaxögüxüçèx na aixcüma Cristu quiüxü? ¿Rü tacü i to i mexü tá toxcèx cuxüxü i ñuxmax? ³¹ Yerü nuxcümaügüxü ga tórü oxigü, rü nanangögüga yema pãü ga Tupana nüxna äxü ga chianexüwa ga ngextá taxüema íxãpataxüwa. Rü Tupanaãrü ore i ümatüxüwa rü ñanagürü:

“Tupana rü daxüçüãx ga pãümaã nanachibüexëë ga duüxüğü”, ñanagürü i ngëma orewa. ³² Rü Ngechuchu nanangãxü rü ñanagürü nüxü: —Aixcüma pemaã nüxü chixu rü tama nixi ga Moïché yüxü ga nüxna naxãxü ga yema pãü ga daxü- çüãx, natürü Chaunatü ga Tupana nixi ga nüxna naxãcü. Rü nüma nixi i ñuxma i pexna naxããxü i pãü i aixcüma ixüxü i daxüwa ne üxü. ³³ —Erü ngëma pãü i Tupana íxãxü, rü daxügüxü i naãnewa ne naxü rü nanamaxëëë i ñoma i naãnecüãx i duüxüğü —ñanagürü. ³⁴ Rü nümagü rü naxcèx ínacagü, rü ñanagürügü nüxü: —Pa Corix, ¡guxüguma toxna naxãëcha i ngëma pãü! —ñanagürügü. ³⁵ Rü Ngechuchu ñanagürü nüxü: —Choma nixi i ngëma pãü i maxëxëëruü chiüxü. Rü yixema texé ya chauxütawa üxë rü tagutáma tataiya. Rü texé ya choxü yaxöxë rü tagutáma titawa. ³⁶ —Natürü marü pemaã nüxü chixu rü woo na choxü pedaugüxü rü tama choxü

peyaxōgü i pemax. ³⁷—Rü guxâma ya yixema duixēgü ya Chaunatü choxna tüxü mugüxe rü chorü duixügü tixīgü. Rü texé ya choxü yaxōgüxe rü täütáma tüxü chaxōx. ³⁸—Yerü tama choxrütama ngúchaŭ na chaxüxcèx nixĩ ga daxüguxü ga nañewa ne chaxüxü. Natürü núma chaxü na chanaxüxcèx i norü ngúchaŭ ya Chaunatü ya núma choxü mucü. ³⁹—Rü ngēma norü ngúchaŭ ya Chaunatü ya Tupana ya núma choxü mucü nixĩ i na taxúexüma ichayarütauxēexü ya yixema choxna tüxü namugüxe. Erü núma ya Chaunatü nanaxwae na tüxü yuwa ícharüdagüxēexü i nañeârü guxgu. ⁴⁰—Choma nixĩ i Tupana Nane chiixü. Rü ngēma norü ngúchaŭ ya Chaunatü ya Tupana ya núma choxü mucü nixĩ na tüxü nangēxmaxü i maxü i taguma gúxü ya guxâma ya texé ya choxü daugüxe rü choxü yaxōgüxe. Erü choma tá nixĩ i tüxü ícharüdagüxēexü i nañeârü guxgu —ñanagürü. ⁴¹ Rü yexguma yema orexü naxĩnügü ga yema Yudíugü, rü inanaxügü ga Ngechuchuga na yadexagüxü. Yerü ñanagürü ga Ngechuchu: —Choma nixĩ i pãu i daxüguxü i nañewa ne chaxüxü —ñanagürü. ⁴² Rü ñanagürügü: —¿Taux éxna ñaã yixü i Ngechuchu i Yúche nane? Rü yixema rü tüxü tacuèx ya nanatü rü naè. ¿Rü ñuxácü i núma i “Daxüwa ne naxüxü”, ñaxü? —ñanagürügü. ⁴³ Rü Ngechuchu ñanagürü nüxü: —¡Nüxü perüxoe na choxü na pixuechaxü! ⁴⁴ —Taxúema chauxütawa tangu ega tama choxna tüxü namuxgu ya chaunatü ga guma núma choxü mucü. Rü texé ya chauxütawa ngugüxe rü choma rü tá wena tüxü chamaxēxē i nañeârü guxgu. ⁴⁵ —Nuxcúmaügüxü ga Tupanaârü orearü uruügüarü poperawa naxümatü i ore i ñaxü:

“Tupana tá guxäxü nangüexē”,

ñaxü. Rü ngēmacèx guxâma ya texé ya Chaunatüxü ñnuxē rü naxütawa ngüxe, rü chauxütawa taxĩ. ⁴⁶ —Taguma texé Chaunatü ya Tupanaxü tatau. Rü chaxicatama nixĩ i nüxü chadauxü erü naxütawa ne chaxü. ⁴⁷ —Aixcúma pemaã nüxü chixu rü texé ya choxü yaxōxē rü tüxü nangēxma i maxü i taguma gúxü. ⁴⁸ —Choma nixĩ i pãu i maxēxēeruü chiixü. ⁴⁹ —Rü perü oxigü ga nuxcúmaügüxü rü nanangōx ga yema pãu ga Tupana nüxna äxü ga yema nachica ga ngextá taxúema íxâpataxüwa. Natürü woo nanangōxgü ga yema pãu rü nayueamatama. ⁵⁰ —Natürü ñaã pãu i pemaã nüxü chixuxü i daxüwa ne üxü rü chomatama chixĩ. Rü guxâma ya texé ya choxü yaxúxe ñoma pãu tangōxürüü rü tá tamaxēcha. ⁵¹ —Chomatama nixĩ i pãu i maxēxēeruü i daxüwa ne chaxüxü. Rü texé ya ñoma chomaã taxāwemüxürüü choxü yaxōxē rü guxügutáma tamaxēcha. Erü ngēma pãu i choma tüxna chaxäxü rü chaxunetama nixĩ. Rü ichanaxä i chaxune na namaxēxcèx i ñoma i nañecüâx i duixügü —ñanagürü ga Ngechuchu. ⁵² Rü yexguma ga yema Yudíugü rü poragaâcü nügüna nacagüe, rü ñanagürügü: —¿Ñuxácü tá i ñaã yatü i naxüne tátama tüxü nangōxēexü? —ñanagürügü. ⁵³ Rü Ngechuchu ñanagürü nüxü: —Rü choma i Tupana nane na duixüxü chiixü rü aixcúma pemaã nüxü chixu rü ngēxguma pema rü tama chaxunemaã pexāwemügügu rü tama nawa pexaxegügu ya chaugü, rü täütáma pexü nangēxma i maxü i taguma gúxü. ⁵⁴ —Texé ya chaxunemaã äwemüxē rü chaugüwa axexe rü tüxü nangēxma i maxü i taguma gúxü. Erü choma rü tá tüxü chamaxēe ega nañeârü guxgu. ⁵⁵ —Erü chaxune rü õnaxüchi nixĩ rü chaugü rü axexüxüchi nixĩ. ⁵⁶ —Texé ya chaxunemaã äwemüxē rü chaugüwa axexe rü chowa tayaxüx rü choma i tümawa. ⁵⁷ —Chaunatü ga núma choxü mucü rü namaxü. Rü núma choxna nanaxä i maxü. Rü ngēxgumarüü ta i choma rü tá tüxna chanaxä i maxü ya yixema choxü yaxúxe rü choxü yaxōxē. ⁵⁸ —Marü pemaã nüxü chixu na choma rü pãu i daxüwa ne üxü chiixü. Natürü choma rü tama yema pãu ga nuxcúmaügüxü ga perü oxigü ngōxgüxü ga pãürüü chixĩ. Yerü

woo ga yema pãu na nangõxgũxũ ga perũ oxigũ rũ nayueamatama. Natürũ texé ya choxũ yaxúxe, ñoma pãu tangõxürũ, rũ choxũ yaxõxê rũ guxũgutáma tamaxũ —ñanagürũ. ⁵⁹ Rũ Ngechuchu rũ duũxũgũmaã nüxũ nixu ga yema ore ga yexguma nangúexẽẽãgu ga Yudíugüarũ ngutaquẽxepataũwa ga ñane ga Capernáũwa.

Ngechucharũ orewa nangẽxma i maxũ i taguma gúxũ

⁶⁰ Rũ yexguma nüxũ naxĩnũegu ga yema nguxẽẽtae, rũ muxũma ga yema duũxũgũ ga nawe rüxĩxũ rũ ñanagürũgũ: —Rũ ngẽma tamaã nüxũ yaxuxũ, rũ naguxchaxũchi na nüxũ icuáxũ na ñuxũ ñaxũ. ¿Ñuxãcü texé tüxũ natauxcha na naga taxĩnũxũ? —ñanagürũgũ. ⁶¹ Natürũ ga Ngechuchu rũ nüxũ nacuèxama ga yemaãcü nügũmaã na iyadexagũxũ naxcèx ga yema nguxẽẽtae, rũ yemacèx nüxna naca, rũ ñanagürũ: —¿Éxna peãẽwa nangux i ngẽma ore? ⁶² —Rũ ngẽxguma peãẽwa nanguxgu i ngẽma ore i pemaã nüxũ chixuxũ, rũ ¿tacügu chi perüxĩnũxũ ega choxũ pedèuxgu na wenaxãrũ daxũ na chaxĩxũ, ga noxri ne chaxũxũwa na chaxũxũ i choma i Tupana Nane na duũxũxũ chiĩxũ? ⁶³ —Tupanaãe i Üünexũ nixĩ i inaxãxũ i maxũ i taguma gúxũ. Rũ tama pexene nixĩ i pexũ maxẽxẽxũ. Rũ ngẽma ore i pemaã nüxũ chixuxũ rũ peãẽcèx nixĩ, rũ nawa nangẽxma i maxũ i taguma gúxũ. ⁶⁴ —Natürũ tangẽxma i petanũwa ya ñuxre ya tama yaxõgũxe —ñanagürũ. Rũ yema ñanagürũ ga Ngechuchu yerũ noxriarũ ügũgumama marũ nüxũ nacuèx ga texé tá nüxũ na yaxõgũxũ, rũ texé tá cúãcü ínaxuaxũxũ. ⁶⁵ Rũ ñanagürũ ta: —Rũ ngẽmacèx marũ pemaã nüxũ chixu rũ taxuacũma texé chauxũtawa tangu ega tama Chaunatũ chauxũtawa tüxũ gaxgu —ñanagürũ. ⁶⁶ Rũ yexguma inanaxũgũe ga nüxna na yaxĩgũxũ ga muxũma ga yema duũxũgũ ga noxri nawe rüxĩchiréxũ. Rũ marũ tama nawe ínaxĩxũ. ⁶⁷ Rũ yexguma ga Ngechuchu rũ norũ 12 ga ngúexũgũna naca, rũ ñanagürũ nüxũ: —¿Éxna pema rũ ta choxna pixĩgachitanũchaũ? —ñanagürũ. ⁶⁸ Natürũ Chimáũ ga Pedru rũ nanangãxũ, rũ ñanagürũ: —Pa Corix, ¿Texéxũtawa chi taxĩxũ ega cuxna tixĩgachitanũgu? Erũ cuma rũ cuxũ nangẽxma i ore i nawa nangẽxmaxũ i maxũ i taguma gúxũ. ⁶⁹ —Toma rũ marũ cuxũ tayaxõgũ, rũ nüxũ tacuèx na cuma quiĩxũ ya Cristu ya Üünecũ ya Tupana Nane —ñanagürũ. ⁷⁰ Rũ Ngechuchu toxũ nangãxũ, rũ ñanagürũ: —¿Taux éxna choma yĩxũ ga pexũ chidexechixũ ga pema ga 12? Natürũ nangẽxma i wüxi i petanũwa i Chatanáãrũ duũxũ ixĩxũ —ñanagürũ. ⁷¹ Rũ Yuda ga Icarĩute ga Chimáũ nanechiga nixĩ ga yadexaxũ ga Ngechuchu. Yerũ Yuda tá nixĩ ga cúãcü ínaxuaxũxũ rũ woo ga nüma rũ wüxi ga totanũxũchiréx na yĩxũ.

7

Ngechuchueneẽgũ rũ tama nüxũ nayaxõgũ

¹ Rũ yemawena ga Ngechuchu rũ Gariréaanewa yexmagũne ga ñãnegũgu nixũãgũchigũ. Rũ tama Yudéaanewa nayexmachau yerũ yemacũãx ga Yudíugüarũ ãẽxgacũgũ rũ naxcèx nadaugũ ga na yamèxgũchaũãxũcèx. ² Natürũ marũ ningaica ga yema Yudíugüarũ peta ga nagu norũ düxenũgũ yaxũgũxũ na yemawa nüxna nacuèxãchiexũcèx ga ñuxãcü nuxcũmaũgũxũ ga norũ oxigũ na naxũgũxũ ga norũ düxenũgũ ga naĩxãtũnaxcèx ga yexguma Moĩchéwe naxĩxgu ga ngextá taxúema íxãpataxũwa. Rũ yemacèx nixĩ ga Düxenũgüarũ Petagu naxãegaxũ. ³ Rũ naẽneẽgũ ga Ngechuchu rũ ñanagürũgũ nüxũ: —Tama name i nuxã Gariréaarũ naãnegu curũxãũx. Rũ name nixĩ i petacèx Yudéawa cuxũ, na ngẽma duũxũgũ i cuwe rüxĩxũ i ngema ngẽxmagũxũ nüxũ daugũxũcèx i ngẽma cuèxruũgũ i mexũgũ i Tupanaãrũ poramaã cuxũxũ. ⁴ —Erũ ngẽxguma chi wüxi ya yatũ rũ duũxũgũxũ nügũ

nacuèxèèchaůgu rü tama cúäcü nanaxü i tacü i naxüxü. Rü ñuxma na cunaxüxü i muxüma i mexügu i Tupanaärü poramaã cuxüxü, rü name nixi i guxü i duüxügüpèxewa cunaxü —ñanagürügü. ⁵ Rü yema ñanagürügü ga naèneègü yerü woo ga nümagü rü ta tama nüxü nayaxögü. ⁶ Rü yexguma ga Ngechuchu rü nanangäxü, rü ñanagürü nüxü: —Tauta nawa nangu i ngunexü na petawa chaxüxü. Natürü pexcèx rü ngèxürüxümare i ngunexü nixi i mexü na petawa nagu pexixü. ⁷ —Ngèma duüxügü i ñoma i naãnecüäx rü tama pexchi naxaie. Natürü chauxchi naxaie erü chanangoxèè i ngèma naxügüxü rü na nachixexü. ⁸ —Name nixi i petawa pexi i pemax. Choma rü tauta ngèma chaxü erü tauta nawa nangu i ngunexü i nagu ngèma chaxüxü —ñanagürü ga Ngechuchu. ⁹ Rü yexguma yema ñaxguwena, rü Gariréaanegu narüxäüx.

Ngechuchu rü Düxenügüarü Petawa naxü

¹⁰ Natürü nawena ga naèneègü ga petawa na naxixü, rü Ngechuchu rü ta yéma naxü. Natürü cúäcü yéma naxü, rü tama poraäcü duüxügüxü nügü nadauxèè. ¹¹ Rü yema Yudügüarü äèxgacügü rü naxcèx nadaugü ga yema petawa, rü ñanagürügü: —¿Ngextá nangèxma i ngèma yatü? —ñanagürügü. ¹² Rü nügütanüwa ga yema duüxügü ga yéma yexmagüxü, rü poraäcü Ngechuchuchiga ínidexagü. Rü ñuxre ga yema duüxügü rü ñanagürügü: —Yima rü wüxi ya yatü ya mecü nixi —ñanagürügü. Natürü ga togü rü ñanagürügü: —Ngèma yatü rü tama name erü duüxügüxü nawomüxèè —ñanagürügü. ¹³ Natürü taxuüma ga duüxügü rü mea togüpèxewa Ngechuchuxü nicuèxüügüchaü, yerü yema Yudügüarü äèxgacügüxü namuüè. ¹⁴ Rü yexguma marü yema petaarü ngäxüwa nanguxgu, rü nixücu ga Ngechuchu nawa ga tupauca ga taxüne. Rü inanaxügü ga na nanguxèètaexü. ¹⁵ Rü yema Yudügüarü äèxgacügü, rü nabaixächiaègü namaã ga yema ore ga Ngechuchu nüxü ixuxü. Rü ñanagürügü: —¿Ñuxäcü i ngèmaäcü poraäcü nüxü nacuáxü, rü taguma texé nanguxèè? —ñanagürügü. ¹⁶ Rü Ngechuchu nanangäxü rü ñanagürü nüxü: —Ñaa chorü nguxèètae rü tama choxrü nixi, erü Chaunatü ya núma choxü mucüarü nixi. ¹⁷ —Ngèxguma texé naxüxchaůgu i Tupanaärü ngüchaü rü yixema tá nüxü tacuèx ngoxi aixcüma Tupanaxütawa chanayaxu i ngèma chorü nguxèètae rü éxna chaugüxütawatama chayaxuxü yixi i ngèma. ¹⁸ —Yixema texé ya mexü i tümachigaxütama ixuxe rü ngèmaäcü tanaxü erü tanaxwèxe i duüxügü na tüxü icuèxüügüxü. Natürü texé nüxü tixu i ore i mexü nachiga i ngèma tüxü muxü, rü aixcüma nixi i tümaärü ore. Rü tama dora nixi i ngèma nüxü tixuxü. ¹⁹ —¿Tama éxna aixcüma yixü ga Moiché pexna naxäxü ga Tupanaärü mugü? Natürü taxüema i pema naga pexinüè i ngèma mugü. ¿Rü ñuxma rü tüxcüü nixi i choxü pimèxgüchaüxü? —ñanagürü. ²⁰ Rü yema duüxügü nanangäxügü, rü ñanagürügü: —Cuma rü ngoxo cuwa nangèxmamare. ¿Éxna texé cuxü timèxgüchaü? —ñanagürügü. ²¹ Natürü ga Ngechuchu rü ñanagürü nüxü: —Choma rü ngüxchigaarü ngunexügu chanamexèè ga wüxi ga yatü. Rü guxäma i pema rü penuäègü naxcèx ga yema wüxitama ga mexü ga ngüxchigaarü ngunexügu chaxüxü. ²² —Natürü pema rü ta ngüxchigaarü ngunexügu pepuracüe na nagu pexixüçèx ga Moichéarü mugü. Rü Moiché pemaã nüxü nixu na tüxü ípewiechèxmüpèxechiraüxü ya guxäma ya yatüxe ya buxe. Natürü tama Moiché nixi ga inaxügücü ga yema, yerü nuxcümaügüxü ga perü oxigüwa nixi ga ne naxüxü. Rü ñuxma i pema rü yema mugagu rü tüxü ípewiechèxmüpèxechiraü ya guxäma ya buxe ya yatüxe woo ngüxchigaarü ngunexü yixigu. ²³ —Rü ngèmaäcü i pema rü ngüxchigaarü ngunexügu buxexü ípewiechèxmüpèxechiraü erü

naga pexĩnüēchaũ i Moĩchēarũ mugũ. ¿Rũ ñuxma rü tüxcüũ yĩxũ i chomaã penuēxũ naxcèx na ngüxchigaarũ ngunexũgu chanamexēēxũ ga wüxi ga yatü ga idaaweecü? ²⁴—Rũ ngēmacèx tama name i ngürümare penangugũ i ngēma chaxũxũ. Rũ penaxwèxe i meã nagu perüxĩnüēxira, na aixcüma meã penangugüxcèx —ñanagürü ga Ngechuchu.

Ngechuchu rü Tupana Nane nixĩ

²⁵ Rũ ñuxre ga yema duũxũgũ ga Yerucharéũgu āchiũgũxũ rü nügüna nacagüe, rü ñanagürügü: —¿Taux ēxna daa yĩxũ ya yima yatü ya āēxgacügũ naxcèx daugücü na yamèxgüchaũāxücèx? ²⁶—¿Dücèx! Gua nixĩ rü yéa guxũ i duũxũgüpēxewa nidexa rü taxúema ñuxũ ñatarügü nüxũ. ¿Taux ēxna i tórü āēxgacügũ i marü nüxũ yaxōgüāxũ na aixcüma Cristu na yĩxũ i nümax? ²⁷—Natürü i yixema rü nüxũ tacuèxgü na ngextá ne naxũxũ i nümax. Natürü ngēxguma aixcüma Cristu núma üxgu rü taxúetáma nüxũ tacuèx na ngextá na ne naxũxũ —ñanagürügü. ²⁸ Rũ nüma ga Ngechuchu rü tupauca ga taxũnewa ínanangüexēē ga duũxũgü. Rũ yexguma nüxũ naxĩnügu ga yema ore ga Yudíugü nüxũ ixugüexũ ga nachiga, rü tagaācü ñanagürü: —Pema rü marü choxũ pecuèx rü nüxũ pecuèx na ngextá na ne chaxũxũ. Natürü tama chaugagu nixĩ i núma chaxũxũ. Choma núma chaxũ yerü núma choxũ namu ga Tupana ya naxwèxecü na nüxũ yaxōgüxũ natürü i pema rü tama nüxũ pecuácü. ²⁹—Choma rü nüxũ chacuèx yerü naxütawa ne chaxũ, rü nüma nixĩ i núma choxũ namuxũ —ñanagürü. ³⁰ Rũ yexguma ga yema āēxgacügũ rü Ngechuchuxũ niyauxgüchaũ. Natürü taxuũma nayayauxgü, yerü tauta nawa nangu ga ngunexũ ga na yayauxgüāxũ rü na yamèxgüāxücèx. ³¹ Natürü muxũma ga duũxũgü rü nüxũ nayaxōgü. Rũ ñanagürügü: —¿Ngēxguma ínanguxgu ya Cristu rü tacü rü cuèxruũ i taxũ tá naxü ya daa yatü tama üxũ i ñuxmax? —ñanagürügü.

Parichéugü rü Ngechuchuxũ niyauxgüchaũ

³² Rũ yema Parichéugü rü duũxũgũxũ naxĩnüē ga yemaācü Ngechuchuchiga na yadexagüxũ. Rũ yemacèx ga nümagü rü paigüarü āēxgacügü rü yéma nanamugü ga tupauca ga taxũneärü purichíagü na Ngechuchuxũ yanayauxgüxcèx. ³³ Rũ yexguma ga Ngechuchu rü ñanagürü nüxũ: —Paxaāchi tátama nixĩ i petanüwa changēxmaxũ, rü ñuxũchi tá chataegu naxütawa ya yima núma choxũ mucü. ³⁴—Pema rü tá chauxcèx pedaugü, natürü tãütáma choxũ ipeyangaugü. Erü ngēma ngextá tá íchangēxmaxüwa rü taxuacü ngēma pengugü. ³⁵ Rũ yexguma ga yema Yudíugüarü āēxgacügü rü nügüna nacagüe, rü ñanagürügü: —¿Ngextá tá naxü ega taxuacütáma nüxũ iyarüngaugügu? ¿Éxna ngēma Yudíugü i to i nachiũānewa ngēxmagüxütanüwa tá naxü rü ēxna ngēma tama Yudíugü ixĩgüxütanüwa tá naxü na yangüexēēāxücèx? ³⁶—¿Rũ tacüchiga nixĩ i ngēma na ngēma ñaxũ:

“Tá chauxcèx pedaugü natürü tãütáma choxũ ipeyangaugü, erü taxuacütáma ngēma pexĩ i ngēma tá íchangēxmaxüwa”, ñaxũ? —ñanagürügü.

Dexá i maxēēruũchiga nidexa ga Ngechuchu

³⁷ Rũ yema nawa iyacuáxũ ga petaarü ngunexũ nixĩ ga guxũ ga togü ga ngunexũärü yexera rümemaxũ naxcèx ga Yudíugü. Rũ yema ngunexũgu nixĩ ga inachixũ ga Ngechuchu rü tagaācü ñaxũ: —Rũ ngēxguma texé itawaxgu rü ¡nuã chauxütawa taxũ rü tayaxaxe! ³⁸—Rũ “texé ya choxũ yaxōxē rü tumaärü maxũnewa tá nibaibe i taxũ i dexá i maxēēruũ” ngēma Tupanaärü ore i umatüxũ nüxũ ixuxürüũ —ñanagürü. ³⁹ Rũ yexguma yema ñaxgu ga

Ngechuchu rü Tupanaãe i Üünexüchiga nixĩ ga yadexaxü. Rü nüxü nixu ga guxüma ga yema nüxü yaxögüxü rü tá na nayauxgüãxü i Naãe i Üünexü. Natürü tama yexgumatama nanayauxgü, yerü tauta wenaxãrü daxügüxü ga naãnecèx nataegu ga Ngechuchu na guxüãrü ãëxgacü na yĩxüçèx.

Ngechuchugagu nügü nitoye ga duüxügü

⁴⁰ Rü nümaxü ga yema duüxügü rü yexguma nüxü naxĩnüëgu ga yema Ngechuchu nüxü ixuxü, rü ñanagürügü: —Aixcüma ñaã yatü nixĩ i ngëma Tupanaãrü orearü uruü i ínguxchaüxü —ñanagürügü. ⁴¹ Rü togü rü ñanagürügü: —Daa nixĩ ya Cristu —ñanagürügü. Natürü togü rü ñanagürügü: —Tama nixĩ, erü taxucürüwa Gariréaanecüãx nixĩ ya Cristu. ⁴² —Erü Tupanaãrü ore i ümatüxüwa rü ñanagürü:

“Cristu rü tá Dabítaa nixĩ, rü tá nangox i ñãne i Beréüwa ga ngextá Dabí íbuxüwa”, ñanagürügü. ⁴³ Rü yemaãcü Ngechuchugagu nügü nitoye ga duüxügü. ⁴⁴ Rü ñuxre ga yema duüxügü rü Ngechuchuxü niyauxgüchaü, natürü taxuüma nayayauxgü.

Yudüguãrü ãëxgacügü rü tama Ngechuchuaxü nayaxögüchaü

⁴⁵ Rü yema tupauca ga taxüneãrü purichíagü, rü Parichéugücèx rü paigüarü ãëxgacügücèx nawoegu. Rü yema ãëxgacügü rü nüxna nacagü, rü ñanagürügü: —¿Tüxcüü tama nuã penaga? —ñanagürügü. ⁴⁶ Rü yema purichíagü rü nanangãxügü rü ñanagürügü: —Taguma texé tidexa i ñaã yatü idexaxürüü —ñanagürügü. ⁴⁷ Rü yexguma ga Parichéugü rü ñanagürügü nüxü: —¿Éxna pexü rü ta marü nawomüxëë i nümax? ⁴⁸ —Dücèx, rü taxúema i tomax i Parichéugü rü taxuüma i tórü ãëxgacügü rü nüxü nayaxögü i ngëma Ngechuchu. ⁴⁹ —Natürü ñaã duüxügü i tama Tupanaãrü mugüxü cuèxgüxü rü marü nachixexügügü —ñanagürügü. ⁵⁰ Natürü Nicodému ga Parichéu ixícü ga wüxicana Ngechuchuxütagu naxüãnecü, rü ñanagürü nüxü: ⁵¹ —Ngëma tórü mugü i ümatüxüwa rü ñanagürü:

“Taxuacüma wüxi i yatüxü tapoxcu ega tama nüxü ixĩnüëxĩragu i norü dexa na nüxü icuáxüçèx na tacü na naxüxü”, ñanagürü. ⁵² Rü yexguma ga natanüxügü rü nanangãxügü, rü ñanagürügü nüxü: —¿Éxna cuma rü ta Gariréaanecüãx quixĩ? ;Nawa nangux i Tupanaãrü ore i ümatüxü rü ngema tá nüxü cudau rü taxuütáma i Tupanaãrü orearü uruü rü Gariréaanecüãx nixĩ! —ñanagürügü. ⁵³ Rü yexguma ga wüxichigü rü nachiüwa naxĩ.

8

Nge ga ãtecü ga naĩ ga yatümaã ngëãëxcü

¹ Rü Ngechuchu rü Oríbunecügu ãegane ga mëxpúnewa naxü. ² Rü moxüãcü ga yexguma yangunegu, rü wenaxãrü tupauca ga taxüneçèx nataegu. Rü ga duüxügü rü naxcèx naxĩ. Rü nüma ga Ngechuchu rü ínarüto, rü inanaxügü ga na nangüexëëãxü ga duüxügü. ³ Rü yema ngüexëëruügü ga Moíchearü mugüwa ngüxëëtaegüxü rü Parichéugü, rü Ngechuchuxütawa ngixü nagagü ga wüxi ga nge ga ãtecü ga ngixü nadaugücü ga naĩ ga yatümaã na inapexü. Rü guxüma ga yema duüxügü ga yema yexmagüxüpëxegu ngixü nayachixëëgü. ⁴ Rü ñanagürügü Ngechuchuxü: —Pa Ngüexëëruüx, ñaã nge i ãtecü rü ngixü itayangau na naĩ ya yatümaã na inapexü. ⁵ Moíchearü mugüwa tamaã nüxü nixu na nutamaã ngixü ímuxüchiãcüma ngixü imáxü i wüxi i nge i ngëmaãcü maxücü. ¿Ñuxü ñacuxü i cuma i ñuxmax? —ñanagürügü. ⁶ Rü yema ñanagürügü ga nümagü, yerü Ngechuchuxü guxchaxügu nanguxëëgüchaü na

nüxŭ nayexmaxŭcèx ga tacŭcèx na ínaxuaxŭgüãxŭ. Natürü ga Ngechuchu rü inayarümaxãchi rü inanaxŭgü ga naxmèxmaã waixŭmüwa na naxümatüãxŭ. ⁷ Natürü nüxŭ nacèxŭgüama, rü yemacèx düxwa wenaxârü nadaunagü ga Ngechuchu, rü ñanagürü nüxŭ: —Ngexerŭxe i petanüwa ya ngearü pecaduãxè rü tüxira nuta ngŭxŭ tanaña —ñanagürü. ⁸ Rŭ wenaxârü inayarümaxãchi ga Ngechuchu rü naxmèxmaã nanaxümatü ga waixŭmüwa. ⁹ Natürü yexguma nüxŭ naxŭnŭëgu ga yema ore ga Parichéugü rü inanaxŭgüe ga nügü na yawüxŭxŭ ga nügüwe na ínachoxŭxŭ. Rŭ yaguãxgü ga Parichéugüwa inaxŭgü ga na ínachoxŭxŭ rü düxwa guxŭma ínachoxŭ. Rŭ yexguma marü guxŭma ga Parichéugü íchoŭxgu, rü Ngechuchu rü yema ngecŭxicatama yéma duŭxŭgüpèxewa nayaxŭgü. ¹⁰ Rŭ yexguma ga Ngechuchu rü wena nadaunagü. Rŭ ngŭxna naca rü ñanagürü ngŭxŭ: —Pa Ngecŭx, ¿Ngèxŭgü nixŭ i ngèma cuxŭ ixugüexŭ? ¿Rŭ taxuŭma cuxŭ imáxchaŭ? —ñanagürü. ¹¹ Rŭ ngŭma rü ngŭgürügü nüxŭ: —Taxuŭma Pa Corix —ngŭgürügü. Rŭ yexguma ga Ngechuchu rü ñanagürü ngŭxŭ: —Choma rü ta tama cuxŭ chapoxcu. Ñuxma rü marü name rü íquixŭ rü tama wena pecadu cuxŭ —ñanagürü.

Ngechuchu rü ñoma i naãneãrŭ ngóonex- èëruŭ nixŭ

¹² Rŭ wenaxârü duŭxŭgümaã nidexa ga Ngechuchu, rü ñanagürü nüxŭ: —Choma nixŭ i ñoma i naãnecŭãxârü ngóonexèëruŭ. Rŭ yŭxema chowe rŭxŭxè rü chorü ngóonexŭwa tangèxma rü tüxna chanaxã i maxŭ. Rŭ tá nüxna ítanguxuchi i tümaãrŭ chixexŭ —ñanagürü. ¹³ Rŭ yexguma ga Parichéugü rü ñanagürügü nüxŭ: —Cuma rü cugŭchigaxŭtama quixu. Rŭ ngèma cuchiga i nüxŭ quixuxŭ rü taxuwama name —ñanagürügü. ¹⁴ Rŭ Ngechuchu nanangãxŭ rü ñanagürü nüxŭ: —Rŭ ngèma ore i chauchiga nüxŭ chixuxŭ rü aixcŭma nixŭ woo chomatama yixŭgu i namaã chaugüétüwa chidexaxŭ. Erü choma rü nüxŭ chacuèx i ngextá ne chaxŭxŭ, rü ngextá tá chaxŭxŭ. Natürü pema rü tama nüxŭ pecuèx na ngextá ne chaxŭxŭ rü tama nüxŭ pecuèx na ngextá tá chaxŭxŭ. ¹⁵ Pema rü choxŭ pengugü i ñoma i naãnecŭãx i duŭxŭgü nagu rŭxŭnŭëxŭãcŭmamare. Natürü i choma rü taxúexŭma changugü. ¹⁶ Natürü ngèxguma chi texéxŭ changugügu rü aixcŭma meãma tüxŭ changugü. Erü tama chaxicatama tüxŭ changugü, natürü yima Chaunatü ga núma choxŭ mucümaã nixŭ i wŭxigu tüxŭ tangugŭxŭ. ¹⁷ Rŭ ngèma mugü ga Moŭché ŭmatŭxŭ i nagu pexŭxŭ, rü ñanagürü:

“Ngèxguma taxre i duŭxŭgü rü wŭxitama i orexŭ yaxugügu, rü ngèmwaa ãèxgacü nüxŭ nacuèx na aixcŭma yŭxŭ i ngèma nüxŭ yaxugüexŭ”, ñanagürü. ¹⁸ Rŭ dücax, choma nixŭ i wŭxi i chauchigaxŭ chixuxŭ rü Chaunatü ga núma choxŭ mucü nixŭ ya naŭ. ¿Rŭ tüxcüŭ tama choxŭ peyaxögüchaŭ i ñuxmax? —ñanagürü. ¹⁹ Rŭ yexguma ga nümagü rü nüxna nacagüe rü ñanagürügü: —¿Ngexcü ya yima Cunatü? —ñanagürügü. Rŭ Ngechuchu nanangãxŭ rü ñanagürü: —Choxŭ rü tama pecuèx rü Chaunatŭxŭ rü ta tama pecuèx. Rŭ ngèxguma chi choxŭ pecuèxgügu rü Chaunatŭxŭ rü chi ta pecuèxgü —ñanagürü. ²⁰ Rŭ yema orexŭ nixu ga Ngechuchu ga yexguma nanguxèëtaegu ga tupauca ga taxŭnewa naxŭtawa ga yema nachica ga ngextá duŭxŭgü tupaucana dŭëru ngŭxŭ íxãgüxŭwa. Natürü taxuŭma Ngechuchuxŭ niyauxgü, yerü tauta nawa nangu ga yema ngunexŭ ga nagu yayauxgüãxŭ.

Ngechuchu rü Parichéugümaã nüxŭ nixu rü ngextá nüma ínaxŭxŭwa rü taxucürüwa ngema naxŭ

²¹ Rŭ Ngechuchu rü wenaxârü namaã nüxŭ nixu, rü ñanagürü: —Choma rü tá pexna chixŭ i núma, rü pema rü tá chauxcèx pedaugü, natürü tá perü

pecadugu peyue. Rŭ ngextá íchaxŭxŭwa rŭ taxucŭrŭwama ngema pexĩ — ñanagŭrŭ. ²² Rŭ yexguma ga yema Yudíugŭ rŭ ñanagŭrŭgŭ: —¿Éxna nŭgŭ tátama nimèx rŭ ngēmacèx tamaã nŭxŭ yaxuxŭ na taxucŭrŭwama ngema ixĩxŭ i ngēma ínaxŭxŭwa? —ñanagŭrŭgŭ. ²³ Rŭ Ngechuchu ñanagŭrŭ nŭxŭ: —Pema rŭ ñoma i naãnecŭãx i duŭxŭgŭ pixĩgŭ, natŭrŭ i choma rŭ daxŭguxŭ i naãnewa ne chaxŭ. Pema rŭ ñoma i naãneãrŭ duŭxŭgŭ pixĩgŭ natŭrŭ i choma rŭ tama ñoma i naãnecŭãx chixĩ. ²⁴ —Rŭ ngēmacèx pemaã nŭxŭ chixu rŭ tá perŭ pecadugu peyue. Erŭ ngēxguma tama choxŭ peyaxŭgŭgu na choma chiŭxŭ ya Cristu, rŭ perŭ pecadugu tá peyue —ñanagŭrŭ. ²⁵ Rŭ yexguma nŭxna nacagŭe, rŭ ñanagŭrŭgŭ: —¿Natŭrŭ texé quixĩ i cumax? —ñanagŭrŭgŭ. Rŭ Ngechuchu nanangãxŭ, rŭ ñanagŭrŭ: —Marŭ noxritama pemaã nŭxŭ chixu na texé chiŭxŭ. ²⁶ —Rŭ choma rŭ choxŭ nangēxma i muxŭma i tacŭ i chomatama pexŭ changŭexēēchaŭxŭ rŭ tacŭcèx pexna na chaçaxŭ, natŭrŭ tãtãtama chanaxŭ i ngēma. Erŭ yima Chaunatu ga núma choxŭ mucŭ chomaã nŭxŭ ixuxŭ i orexicatama nixĩ i ñoma i naãnecŭãxgŭmaã nŭxŭ chixuxŭ. Rŭ guxŭma i ngēma nŭxŭ yaxuxŭ ya Chaunatu, rŭ aixcŭma nixĩ —ñanagŭrŭ. ²⁷ Natŭrŭ nŭmagŭ rŭ tama nŭxŭ nacuèxgŭéga ga Nanatu ya Tupanachiga na yĩxŭ na yema ñaxŭ ga Ngechuchu. ²⁸ Rŭ yemacèx ga Ngechuchu rŭ ñanagŭrŭ nŭxŭ: —Choma nixĩ i Tupana Nane i duŭxŭxŭ chiŭxŭ. Rŭ yixcŭra ngēxguma curuchawa choxŭ pipotagŭgu, rŭ tá nŭxŭ picuèxãchitanŭ na Cristu na chiŭxŭ. Rŭ tá nŭxŭ pecuèx na taxuŭma chauexamatama chaxŭxŭ. Rŭ ngēma Chaunatu chomaã nŭxŭ ixuxŭxĩcatama nixĩ i pemaã nŭxŭ chixuxŭ. ²⁹ —Yima núma choxŭ mucŭ ya Chaunatu rŭ chauxŭtawa nangēxma. Rŭ taguma choxna nixŭgachi, erŭ choma rŭ guxŭguma chanaxŭ i ngēma norŭ ngŭchaŭ ixĩxŭ —ñanagŭrŭ. ³⁰ Rŭ yexguma yema ñaxgu ga Ngechuchu rŭ muxŭma ga duŭxŭgŭ nŭxŭ nayaxŭgŭ.

Yíxema Tupanaxãcŭgŭ ixĩgŭxechiga, rŭ yíxema pecadutŭtŭwa ngēxmagŭxechiga

³¹ Rŭ yexguma ga Ngechuchu rŭ ñanagŭrŭ nŭxŭ ga yema Yudíugŭarŭ ãēxgacŭgŭ ga nŭxŭ yaxŭgŭxŭ: —Ngēxguma pema meãma peyaxŭgŭechagu i ngēma pemaã nŭxŭ chixuxŭ, rŭ aixcŭmaxŭchi tá chorŭ ngŭexŭgŭ pixĩgŭ. ³² —Rŭ tá nŭxŭ pecuèx i ore i aixcŭma ixĩxŭ. Rŭ ngēma ore tá pexŭ ínanguxŭxēē —ñanagŭrŭ. ³³ Rŭ nŭmagŭ rŭ Ngechuchuxŭ nangãxŭgŭ, rŭ ñanagŭrŭgŭ: —Toma rŭ nuxcŭmaŭcŭ ga torŭ oxŭ ga Abráŭtaa tixĩgŭ rŭ taguma texémèxēwa tangēxmagŭ. ¿Ñuxãcŭ i cumax rŭ tá na ítanguxŭxŭ, ñacuxŭ? —ñanagŭrŭgŭ. ³⁴ Rŭ Ngechuchu ñanagŭrŭ nŭxŭ: —Aixcŭma pemaã nŭxŭ chixu rŭ guxãma ya pecaduãxē rŭ pecadutŭtŭwa tangēxmagŭ. ³⁵ —Wŭxi i coriarŭ duŭxŭmare rŭ tama norŭ coripatacŭãx nixĩ. Natŭrŭ wŭxi i cori nane rŭ guxŭguma nanatu nane nixĩ. ³⁶ —Choma rŭ Tupana Nane chixĩ. Rŭ ngēxguma chi choma pecaduna pexŭ íchanguŭxēēgu, rŭ aixcŭma tá nŭxna ípenguŭ. ³⁷ —Marŭ nŭxŭ chacuèx na Abráŭtaa pixĩgŭxŭ i pemax. Natŭrŭ choxŭ pimèxgŭchaŭ erŭ tama aixcŭma choxŭ peyaxŭgŭ i ngēma ore i pemaã nŭxŭ chixuxŭ. ³⁸ —Choma rŭ yema Chaunatu choxŭ wéxŭ nixĩ i pemaã nŭxŭ chixuxŭ. Natŭrŭ pema rŭ penaxŭ i ngēma penatŭ pemaã nŭxŭ ixuxŭ —ñanagŭrŭ ga Ngechuchu. ³⁹ Rŭ nŭmagŭ rŭ Ngechuchuxŭ nangãxŭ rŭ ñanagŭrŭgŭ: —Torŭ oxŭ nixĩ ga Abráŭ —ñanagŭrŭgŭ. Natŭrŭ Ngechuchu nanangãxŭ rŭ ñanagŭrŭ nŭxŭ: —Ngēxguma chi aixcŭma Abráŭtaa pixĩgŭgu rŭ chi Abráŭ ŭxŭrŭŭ penaxŭ. ⁴⁰ —Natŭrŭ woo pemaã nŭxŭ chixu i ore i aixcŭma ixĩxŭ ga Chaunatu ga Tupana choxŭ nguxēēxŭ, rŭ pema rŭ choxŭ pimèxgŭchaŭ. Natŭrŭ ga Abráŭ rŭ taguma yemaãcŭ nanaxŭ. ⁴¹ —Pema rŭ penaxŭ i penatŭgŭcŭmatama —ñanagŭrŭ. Rŭ yexguma ga nŭmagŭ rŭ ñanagŭrŭgŭ: —Toma rŭ tama tangŭrŭwaŭgŭmare, rŭ

toxŭ nangĕxma ya wŭxitama ya tonatŭ. Rŭ yima nixŭ ya Tupana —ñanagŭrŭgŭ.
⁴² Rŭ Ngechuchu nanangăxŭ, rŭ ñanagŭrŭ nŭxŭ: —Ngĕxguma chi aixcŭma Tu-
 pana yixŭgu ya penatŭ rŭ choxŭ chi pengechaŭ, erŭ choma rŭ Tupanaxŭtawa
 nixŭ i ne chaxŭxŭ, rŭ ngĕmacĕx chanuxma. Rŭ tama chauechamatama nŭma
 chaxŭ, natŭrŭ nŭma chaxŭ yerŭ Chaunatŭ ya Tupana nŭma choxŭ namu. ⁴³ —
 ¿Tŭxcŭŭ tama nŭxŭ pecuĕxĕga i ngĕma pemaã nŭxŭ chixuxŭ? Pexŭ naguxcha
 erŭ woetama tama iperŭxŭnŭĕchaŭ i ngĕma pemaã nŭxŭ chixuxŭ i ore. ⁴⁴ —
 Penatŭ rŭ Chataná nixŭ rŭ pema rŭ naxăcŭgŭ pixŭgŭ. Rŭ ngĕmacĕx penaxŭ i
 ngĕma nŭma pexŭ nanaxwĕxexŭ. Rŭ ngĕma Chataná rŭ noxriarŭ ŭgŭgumama
 wŭxi i máĕtaxŭ nixŭ. Rŭ taguma ore i aixcŭmaxŭgu narŭxŭnŭ rŭ taguma ore
 i aixcŭmaxŭ nixu. Rŭ ngĕxguma yadeaxgu rŭ doraxŭxŭcatama nixu, erŭ nŭma
 rŭ wŭxi i doratĕxăxŭ nixŭ. Rŭ guxŭma i doratĕxăxŭnatŭ nixŭ. ⁴⁵ —Natŭrŭ i
 pema rŭ tama choxŭ peyaxŭgŭchaŭ erŭ ore i aixcŭmaxŭ chixu. ⁴⁶ —¿Texĕ ya
 petanŭwa choxŭ dauxe na pecadu chaxŭxŭ? Rŭ ñuxma na nŭxŭ chixuxŭ i ore
 i aixcŭma ixŭxŭ, rŭ ¿tŭxcŭŭ tama choxŭ peyaxŭgŭ? ⁴⁷ —Texĕ ya Tupanaârŭ
 duŭxŭ ixŭxĕ rŭ itarŭxŭnŭ i Tupanaârŭ ore. Natŭrŭ i pema rŭ tama Tupanaârŭ
 duŭxŭgŭ pixŭgŭ, rŭ ngĕmacĕx nixŭ i tama iperŭxŭnŭĕchaŭxŭ i Tupanaârŭ ore
 —ñanagŭrŭ.

Tauta nangoxgu ga Abrăŭ rŭ Cristu rŭ marŭ nayexma

⁴⁸ Rŭ yexguma ga yema Yudŭgŭarŭ âĕxgacŭgŭ rŭ ñanagŭrŭgŭ nŭxŭ: —Rŭ
 aixcŭma nixŭ ga yema torŭ ore ga yexguma ñatagŭgŭgu:

“Cuma rŭ wŭxi i Chamăriacŭăx quixŭ, rŭ ngoxo cuwa nangĕxma”,
 ñatagŭgŭgu —ñanagŭrŭgŭ. ⁴⁹ Rŭ Ngechuchu nanangăxŭ, rŭ ñanagŭrŭ nŭxŭ:
 —Chowa rŭ nataxuma i ngoxo. Rŭ ngĕma chaxŭxŭ nixŭ na Chaunatŭxŭ
 chicuĕxŭxŭ, natŭrŭ i pema rŭ chixri chauchiga pidexagŭ. ⁵⁰ —Choma rŭ
 tama naxcĕx chadau na texĕ choxŭ icuĕxŭŭgŭxŭcĕx. Natŭrŭ Tupana nixŭ
 ya naxwĕxecŭ na duŭxŭgŭ choxŭ icuĕxŭŭgŭxŭ. Rŭ nŭma tá nanapoxcue i
 ngĕma chauxchi aiexŭ. ⁵¹ —Aixcŭma pemaã nŭxŭ chixu, rŭ texĕ ya naga ŭnŭxĕ
 i ngĕma tŭmamaã nŭxŭ chixuxŭ rŭ guxŭgutăma tamaxĕcha —ñanagŭrŭ. ⁵² Rŭ
 yexguma ga yema Yudŭgŭarŭ âĕxgacŭgŭ, rŭ Ngechuchuxŭ nangăxŭgŭ, rŭ
 ñanagŭrŭgŭ: —Ñuxma rŭ meăxŭchima nŭxŭ tacuĕx na cuwa nangĕxmaxŭ i
 wŭxi i ngoxo. Yerŭ ga Abrăŭ rŭ guxŭma ga nuxcŭmaŭgŭxŭ ga Tupanaârŭ ore-
 arŭ uruŭgŭ rŭ nayue. Natŭrŭ cuma rŭ ñuxma tomaã nŭxŭ quixu rŭ texĕ ya
 naga ŭnŭxĕ i ngĕma curŭ ore rŭ guxŭgutăma tamaxĕcha —ñacurŭgŭ. ⁵³ —¿Ĕxna
 cuma rŭ tŭrŭ oxŭ ga Abrăŭârŭ yexera quixŭ? Yerŭ nŭma rŭ nayu rŭ guxŭma
 ga nuxcŭmaŭgŭxŭ ga Tupanaârŭ orearŭ uruŭgŭ rŭ ta nayue. ¿Rŭ cugŭcĕx rŭ
 texĕ quixŭ? —ñanagŭrŭgŭ. ⁵⁴ Rŭ Ngechuchu nanangăxŭ, rŭ ñanagŭrŭ nŭxŭ:
 —Ega chaugŭ chitama chicuĕxŭŭgu rŭ ngĕma rŭ taxuwama name. Natŭrŭ
 yima choxŭ icuĕxŭŭcŭ rŭ Chaunatŭ nixŭ. Rŭ yima Chaunatŭtama nixŭ ya perŭ
 Tupana ixŭcŭ —ñapegŭcŭ nŭxŭ. ⁵⁵ —Natŭrŭ i pema rŭ tama aixcŭma nŭxŭ
 pecuĕx ya Chaunatŭ ya Tupana. Natŭrŭ i choma rŭ ngĕmăăcŭ nŭxŭ chacuĕx.
 Rŭ ngĕxguma chi:

“Tama nŭxŭ chacuĕx”, ñachaxgu, rŭ pexrŭŭ chi wŭxi i doratĕxăxŭ chixŭ.
 Natŭrŭ i choma rŭ aixcŭmaxŭchima nŭxŭ chacuĕx ya Chaunatŭ ya Tupana,
 rŭ naga chaxŭnŭ i guxŭma i norŭ ore i chomaã nŭxŭ yaxuxŭ. ⁵⁶ —Perŭ oxŭ ga
 Abrăŭ rŭ nataăĕ yerŭ aixcŭma nayaxŭ rŭ tá na íchanguxŭ i ñoma i naănewa. Rŭ
 yemaxŭ nacuĕx rŭ yemacĕx nataăĕ —ñanagŭrŭ ga Ngechuchu. ⁵⁷ Rŭ yexguma
 ga yema Yudŭgŭarŭ âĕxgacŭgŭ rŭ Ngechuchuxŭ nangăxŭgŭ, rŭ ñanagŭrŭgŭ:
 —Cuma rŭ tauta 50 ya taunecŭ cuxŭ nangĕxma. ¿Ñuxăcŭ Abrăŭxŭ cudau ga
 tauta cungoxgux ga yexguma? —ñanagŭrŭgŭ. ⁵⁸ Rŭ Ngechuchu nanangăxŭ

rü ñanagürü nüxũ: —Aixcũma pemaã nüxũ chixu rü tauta Abráũ ngoxgu rü choma rü marü chayexma —ñanagürü. ⁵⁹ Rü yexguma ga nũmagü rü nutane nanayauxgü na gumamaã ínamuxũchigüãxũcèx. Natürü ga Ngechuchu rü naxchaxwa inicux. Rü yemaãcü ínaxũxũ nawa ga guma tupauca ga taxũne.

9

Ngechuchu nanamexẽẽ ga wũxi ga yatü ga norü bucũma ngexetücü

¹ Rü yexguma namagu tomaã yaxũxgu ga Ngechuchu, rü yéma nüxũ nadau ga wũxi ga yatü ga woetama norü bucũma ngexetücü. ² Rü toma ga norü ngúexũgü rü nüxna tacagü, rü ñatarügügü: —Pa Ngúexẽẽruũx, ¿Tũxcüũ ngexetücüma nabu ya daa yatü? ¿Éxna nanatü rü naẽãrũ pecadugagu rü éxna norü pecadugagutama? —ñatarügügü. ³ Rü Ngechuchu toxũ nangãxũ, rü ñanagürü toxũ: —Tama norü pecadugagu rü tama i nanatü rü naẽãrũ pecadugagu nixĩ i ngẽmaãcü nabuxũ. Natürü ngẽmaãcü nabu na nawa nüxũ pedauxũcèx na ñuxãcü Tupana tũxũ na rümexẽẽxũ. ⁴—Rü ñoma rü ta nangune rü name nixĩ na paxama na naxũxũ i ngẽma puracü ya Chaunatü ga núma choxũ mucü tũxna ãxũ. Erü paxa tá nachũta rü ngẽxguma rü taxucürũwama texé tá tapuracü. ⁵—Rü ñuxma na ñoma i naãnewa changẽxmaxũ rü ñoma i naãneãrũ ngóonexẽẽruũ chixĩ —ñanagürü. ⁶ Rü yexguma yema ñaxguwena rü Ngechuchu waixũmũãnewa nacuaxi. Rü yema waixũmü ga iwaixũmaã nanachaxetü ga guma yatü ga ngexetücü. ⁷ Rü yexguma guma ngexetücüxũ ñanagürü: —¡Dexámaã cugü yayauxetü i Chiruéarü puchuwa! —ñanagürü. Rü ngẽma naega rü “Tũxũ muxũ”, ñaxũchiga nixĩ. Rü yéma naxũ ga guma ngexetücü rü nügü dexámaã nayauxetü. Rü yexguma nataegugu rü marü nidauchixetü. ⁸ Rü yexguma ga yema duũxũgü ga guma ngexetücüpataarü ngaicamagu pegũxũ rü yema duũxũgü ga ũpaacü nüxũ daugũxũ ga na nangexetũxũ, rü ñanagürügü: —¿Taux éxna i ñaã yĩxũ ga yema yatü ga ngexetüchiréxũ ga duũxũgũxũ dīerucèx cèxũxũ? —ñanagürügü. ⁹ Rü nümaxũ rü ñanagürügü: —Ngẽmaãcü núma nixĩ —ñanagürügü. Rü togü rü ñanagürügü: —Tama nixĩ i yima yĩxũ, natürü nanangẽxgumaraũxũchi —ñanagürügü. Natürü nümatama ga guma yatü ga ngexetüchirécü, rü ñanagürü: —Ngẽmaãcü choma chixĩ —ñanagürü. ¹⁰ Rü yexguma ga yema duũxũgü rü nüxna nacagü rü ñanagürügü: —¿Rü ñuxãcü nixĩ i marü quidauchixũ i ñuxmax? —ñanagürügü. ¹¹ Rü nüma nanangãxũ rü ñanagürü: —Yima yatü ya Ngechuchugu ãegacü rü yima waixũmũãnewa nacuaxi. Rü yema waixũmü ga iwaixũmaã choxũ nachaxetü. Rü ñanagürü choxũ:

“¡Yéa Chiruéarü puchuwa naxũ rü ngẽma dexámaã cugü yayauxetü!” ñanagürü choxũ. Rü yéma chaxũ, rü yexguma dexámaã chaugü chayauxetügu rü chidauchi —ñanagürü ga guma yatü. ¹² Rü yexguma nüxna nacagüe, rü ñanagürügü: —¿Ngextá nangẽxmaxũ i ñuxma ya yima yatü ya cuxũ rümexẽẽcü? —ñanagürügü. Rü nüma ga guma yatü ga ngexetüchirécü rü ñanagürü: —Tama nüxũ chacuèx —ñanagürü.

Parichéugü rü guma ngexetücü ga Ngechuchu namexẽẽcüna nacagüe

¹³⁻¹⁴ Natürü yema ngunexũ ga Ngechuchu nagu namexẽẽxũ ga guma ngexetücü, rü ngũxchigaarü ngunexũ nixĩ. Rü yemacèx ga duũxũgü rü Parichéugũxũtawa nanagagü ga guma yatü ga ngexetüchirécü. ¹⁵ Rü yexguma ga yema Parichéugü rü nüxna nacagüe ga guma yatü, rü ñanagürügü: —¿Ñuxãcü i marü curümexètũxũ i ñuxmax? —ñanagürügü. Rü nüma nanangãxũ rü ñanagürü: —Waixũmü ga naxbũxágũmaã yawaixẽẽxũmaã choxũ nachaxetü ga Ngechuchu, rü ñuxũchi dexámaã

chaugü chayayauxetü, rü ngēmacèx marü chidauchi –ñanagürü. ¹⁶ Rü yexguma ga ñuxre ga Parichéugü rü ñanagürügü: –Yema yatü ga cuxü rümexēēxü rü tama Tupanaärü duüxü nixi, erü tama nanaxaure i ngüxchigaarü ngunexü –ñanagürügü. Natürü togü ga Parichéugü rü ñanagürügü: –¿Ñuxácü nanaxü i ngēma cuèxruü i mexü i taxü ega wüxi i pecaduáxü yixixgux? –ñanagürügü. Rü yemaácü nügü nitoye ga nagu naxĩnëxüwa ga yema Parichéugü. ¹⁷ Rü wena nüxna nacagüe ga guma yatü ga ngexetüchirécü, rü ñanagürügü: –¿Natürü cuma rü ñuxü ñacuxü nachiga i ngēma yatü ga cuxü rümexēēxü? –ñanagürügü. Rü nüma nanangāxü, rü ñanagürü: –Chauxcèx rü wüxi i Tupanaärü orearü uruü nixi –ñanagürü. ¹⁸ Natürü ga yema Yudíugüarü äëxgacügü rü tama nüxü nayaxögüchaü ga nüma na yixü ga na nangexetüchiréxü ga noxrix, rü ñuxma rü marü na yadauchixü. Rü yemacèx ga yema äëxgacügü rü tümacèx nangemagü ga nanatü rü naë ga guma yatü ga rümexëtücü. ¹⁹ Rü tüxna nacagü, rü ñanagürügü: –¿Daa yixü ga guma pene ga nüxü pixucü ga woetama ngexetüácü bucü? ¿Ñuxácü i ñuxma i yadauchixü? –ñanagürügü. ²⁰ Rü nanatü rü naë tanangāxügü rü ñatarügügü: –Ngēmaácü nüxü tacuèx rü daa nixi ya tone ga ngexetüácüma buchirécü. ²¹ Natürü tama nüxü tacuèx ga ñuxácü na yadauchixü i ñuxmax. Rü tama nüxü tacuèx ga texé na namexëtüxēēxü. ¡Ëcü nüxnatama pecagü! Erü nüma rü marü naya, rü nümatama pemaã nüxü na yaxuxücèx –ñatarügügü. ²² Rü yema ñatarügügü ga nanatü rü naë, yerü tamuüë. Yerü ga Yudíugüarü äëxgacügü rü marü nügümaã nanamexēēgü na tüxü ínatèxüchigüxücèx ga ngutaquëxepataüwa ga texé ga Ngechuchuaxü yaxõxë na Cristu yixü. ²³ Rü yemacèx nixi ga nanatü rü naë ga ñatagügüxü: “¡Ëcü, nüxnatama pecagü! Erü nüma rü marü naya rü nümatama pemaã nüxü na yaxuxücèx”, ñatagügüxü. ²⁴ Rü yexguma ga yema Yudíugüarü äëxgacügü rü wenaxärü naxcèx nacagü ga guma ngexetüchirécü. Rü ñanagürügü nüxü: –Rü ñuxma tanaxwèxe i Tupanapéxewa rü aixcüma tomaã nüxü quixu na texé cuxü rümexēēxü. Erü toma rü meãma nüxü tacuèx i ngēma Ngechuchu rü wüxi i pecaduáxü na yixü –ñanagürügü. ²⁵ Rü nüma nanangāxü rü ñanagürü nüxü: –Choma rü tama nüxü chacuáxü nixi ga na changexetüchiréxü ga noxrix rü ñuxma rü na chidauchixü –ñanagürü. ²⁶ Rü wenaxärü nüxna nacagüe, rü ñanagürügü: –¿Rü tacü nixi ga cumaã naxüxü? ¿Rü ñuxácü ga naxüáxü ga cuxü na yadauchixetüxēēxü? –ñanagürügü. ²⁷ Rü nanangāxü rü ñanagürü nüxü: –Marü pemaã nüxü chixu, rü tama choxü iperüxĩnüéchaü. ¿Tüxcüü penaxwèxe na wena pemaã nüxü chixuxü? ¿Éxna pema rü ta nüxü peyaxögüchaü? –ñanagürü. ²⁸ Rü yexguma rü guma yatümaã chixexü nixugüe, rü ñanagürügü: –Cumaërü nixi i nüxü cuyaxõxü i ngēma yatü, natürü i toma rü Moïchéarü oreaxü nixi i tayaxögüxü. ²⁹ –Toma rü nüxü tacuèx ga Tupana rü aixcüma Moïchémaã na yadexaxü, natürü ngēma Ngechuchu rü tama nüxü tacuèx na ngextá na ne naxüxü –ñanagürügü. ³⁰ Rü guma yatü nanangāxü, rü ñanagürü nüxü: –¿Ñuxácü nixi i ngēma? Nüma rü marü choxü narümexëtüxēë, natürü ¿ñuxácü i pema i tama nüxü pecuáxü na ngextá ne naxüxü? ³¹ –Rü guxāma i yixema rü meãma nüxü tacuèx rü Tupana tama nüxü naxĩnü i pecaduáxgüxüärü yumüxë. Natürü Tupana rü tüxü nüxü naxĩnü i tümäärü yumüxë ya yixema nüxü icuèxüügüxe rü naxüxe i Tupanaärü ngüchaü. ³² –Taguma ñuxgu nüxü taxĩnüchiga i wüxi i yatü na yadauchixēēáxü i wüxi i duüxü i norü bucüma ngexetüxü. ³³ –Rü

ngëxguma chi tama Tupana núma namuxgux ya daa yatü ya choxü rümexëëcü, rü taxuacü chima mexü naxü —ñanagürü ga guma yatü ga ngexetüchirécü. ³⁴Rü yexguma ga yema Yudíugüarü äëxgacügü, rü ñanagürügü nüxü: —Cuma na pecadugu na cubuxü, ¿rü ñuxäcü cunaxwëxe na toxü cungúexëëchaüxü? —ñanagürügü. Rü ñuxüchi ínanatëxüchigü ga ngutaquëxepataüwa.

Duüxügü i tama yaxögüxü rü ngexetüxürüü nixígü

³⁵ Rü Ngechuchu rü nüxü nacuáchiga ga na ínatëxüchigüäxü ga guma ngexetüchirécü. Rü yexguma nüxü nadëuxgu, rü ñanagürü nüxü: —¿Nüxü cuyaxöxü ya Tupana Nane ya duüxüxü ixícü? —ñanagürü. ³⁶ Rü yexguma ga nüma rü Ngechuchuxü nangäxü rü ñanagürü: —Pa Corix, ¿chomaã nüxü ixu na texe yíixü na nüxü chayaxöxücèx! —ñanagürü. ³⁷ Rü Ngechuchu nanangäxü, rü ñanagürü: —Marü nüxü cudau ya Tupana Nane. Rü chomatama nixí i cumaã na íchidexaxü chíixü —ñanagürü. ³⁸ Rü yexguma ga guma yatü ga ngexetüchirécü rü Ngechuchupëxegu nacaxäpüxü, rü nüxü nicuëxüü, rü ñanagürü nüxü: —Ngëmäácü cuxü chayaxö, Pa Corix —ñanagürü. ³⁹ Rü yexguma ga Ngechuchu rü ñanagürü: —Rü ñoma i naãnewa chaxü na chayadexechixüçèx i chorü duüxügü nüxna i ngëma duüxügü i tama choxrü ixígüxü. Rü nuã chaxü na chanameëxëëxüçèx i ngëma duüxügü i noxri tama Tupanaxü cuëxgüxü. Rü ngëxgumarüü ta núma chaxü na duüxügü i tama choxü cuëxgüchaüxüxü chanawéxü na duüxügü i ngexetüxürüü na yixígüxü, erü tama choxü nayaxögüchaü —ñanagürü. ⁴⁰ Rü ñuxre ga Parichéugü ga yéma Ngechuchumaã yexmagüxü, rü yexguma yema orexü naxíñüëgu, rü Ngechuchuna nacagü, rü ñanagürügü: —¿Éxna toma rü ta tama Tupanaxü tacuëxgü ñacuxü? —ñanagürügü. ⁴¹ Rü Ngechuchu nanangäxü rü ñanagürü nüxü: —Ngëxguma chi tama aixcüma Tupanaxü pecuëxgügu rü täü chima pegagu nixí na pepecaduäxgüxü. Natürü ngëma na pegü pixuxü na Tupanaxü pecuáxü rü ngëmacèx pegagutama nixí na pepecaduäxgüxü i ñuxmax —ñanagürü.

10

Carnerugüarü dauruü rü norü carnerugü

¹ Rü yexguma ga Ngechuchu rü ñanagürü: —Rü aixcüma pemaã nüxü chixu rü ngëma yatü i tama carnerupüxüärü íäxwa ixücuxü rü wüxi i ngítëxáxü nixí i ngëma, erü ngextámare nixücu. ² —Natürü ngëma carnerupüxüärü íäxwa meãma ixücuxü, rü ngëma nixí i norü dauruüxüchi i carnerugü. ³ —Rü ngëma yatü i carnerupüxüärü íäxna dauxü rü nayawäxna i íäx na yaxücuxüçèx i carnerugüarü dauruü. Rü nüma i carnerugü rü nüxü nacuëxgü i naga i ngëma norü dauruü. Rü ngëma norü dauruü rü wüxichigü i norü carneru rü naegamaã naxcèx naca na ínamuxüäxüçèx i naxpüxüwa. ⁴ —Rü ngëxguma ínamuxüäxgu i guxüma i norü carnerugü, rü nüma i norü dauruü rü napëxegu nixüchigü. Rü nümagü i carnerugü rü nawe narüxí, erü nüxü nacuëxgü i naga. ⁵ —Natürü ngëxguma wüxi i yatü i tama aixcüma norü dauruü ixíxü, rü tama nawe narüxí i ngëma carnerugü. Rü nüxna naxígü, erü tama nüxü nacuëxgü i naga i ngëma tama norü dauruü ixíxü —ñanagürü ga Ngechuchu. ⁶ Rü Ngechuchu rü duüxügümaã nüxü nixu ga yema ore ga cuëxrüü, natürü ga nümagü rü tama nüxü nacuëxgüéga ga tacüchiga na yíixü.

Ngechuchu rü carneruarü dauruü ya mecü nixí

⁷ Rü yexguma ga Ngechuchu rü wenaxärü ñanagürü nüxü: —Aixcüma pemaã nüxü chixu rü choma nixí i carnerupüxüärü íäx i nawa yachocuxüxü i carnerugü. ⁸ Guxüma ga yema chopegu nüxira núma íxü rü ngítëëxgüxü rü

maétagüxü nixĩgü. Natürü yema carnerugü rü tama naga naxĩnüë. ⁹ Choma nixĩ i ãx. Rü texé ya chowa ixücuxe rü tá tamaxü. Rü meãma tá tüxü naxüpetü ngëxgumarüü i wüxi i carneru i naxpüxügu ücuxü rü íxüxüxü rü nüxü iyangaucü ya mecü ya maxë. ¹⁰ Ngëma ngítëxáxü rü núma naxü na yangíxücëx rü namáëtaxücëx rü nachixexëëãxücëx. Rü ngëmacëxicatama núma naxü. Natürü i choma rü núma chaxü na chanamaxëxëëxücëx i duüxügu rü na aixcüma nüxü nangëxmaxücëx i maxü i taguma gúxü. ¹¹ Choma nixĩ i carneruarü dauruü ya mecü chiixü. Erü wüxi i carneruarü dauruü ya mecü rü norü carnerugüxü ínapoxü rü ñuxmata naxcëx nayux. ¹² Natürü ngëma dñërucëxmare puracüxü, rü ega ngëxguma aixü nadëuxgux rü carnerugüna ngëma niña. Rü ngëmaãcü nanaxü erü tama aixcüma norü dauruü nixĩ i nümax, rü tama noxrü nixĩ i ngëma carnerugü. Rü ngëma ai rü carnerugüxü ínayauxü rü ngëxma tüxü naxüanexëëmare. ¹³ Rü ngëma yatü rü niña, erü norü dñërucëxicatama ngëma napuracü. Rü tama aixcüma carnerugügu narüxĩnü. ¹⁴⁻¹⁵ Choma nixĩ i carnerüarü dauruü ya mecü chiixü. Rü ngëxgumarüü ya Chaunatü na choxü nacuáxü rü choma rü Chaunatüxü na chacuáxü, rü ngëxgumarüü ta nüxü chacuëx i chorü carnerugü, rü nümagü rü choxü nacuëxgü. Rü choma rü naxcëx chayü i chorü carnerugü. ¹⁶ Rü choxü nangëxmagü ta i togü i carnerugü i tama ñã naxpüxüwa ngëxmagüxü. Rü ngëmagü rü tá ta nuã chanagagü, rü tá chauga naxĩnüë. Rü wüxitücumü tátama nixĩ rü choma tátama nixĩ i norü dauruü chiixü. ¹⁷ Chaunatü rü choxü nangechaü, erü chorü carnerugüçëx chayü rü wena táxarü chamaxü. ¹⁸ Taxúema choxü tayuxëë, natürü chomatama chorü ngúchaümaãtama ichanaxã i chorü maxü. Erü choxmëxwa nangëxma na ichanaxãxücëx, rü wena na chanayaxuxücëx, yerü yemaãcü choxü namu ga Chaunatü —ñanagürü. ¹⁹ Rü yexguma yema orexü naxĩnüëgu ga yema Yudíugüarü ãëxgacügü rü wenaxârü nügü nitoye ga yema nagu naxĩnüëxüwa. ²⁰ Rü muxüma ga nümagü rü ñanagürügü: —¿Tüxcüü nüxü iperüxĩnüë i ñã yatü i ngëãëxü i ngoxo nawa ngëxmaxü? —ñanagürügü. ²¹ Natürü ga togü rü ñanagürügü: —Taxuüma i yatü i ngoxo nawa ngëxmaxü rü ñãrüü meã nidexa. ¿Ñuxãcü i wüxi i yatü i ngoxo nawa ngëxmaxü rü tüxü narü mexëtüxëë ya wüxi ya ngëxetüxe? —ñanagürügü.

Yudíugüarü ãëxgacügü rü Ngechuchuxü naxoe

²² Rü nawa nangu ga yema peta ga gucü ga taunecügu norü tupauca ga taxüncëx naxügüxü ga Yudíugü na nüxna nacuëxãchigüxücëx ga yema ngunexü ga nagu yanguxü ga guma tupauca. Rü nagáuane ga Yerucharéüwa ga yexguma. ²³ Rü guma tupauca ga taxünewa nayexma ga wüxi ga chopetüchica ga Charumóüarü Chopetüchicagu ãegaxü. Rü yemagu narüxüxü ga Ngechuchu. ²⁴ Rü ga yema Yudíugüarü ãëxgacügü rü nüxü ínachomaëguãchi, rü ñanagürügü nüxü: —¿Ñuxguratáta tomaã quixaixcüma na cügü quixuxü na texé na quixü? Ega aixcüma cuma rü Cristu quixügu, rü ñmeã noxtacüma tomaã nüxü ixu! —ñanagürügü. ²⁵ Rü Ngechuchu nanangãxü, rü ñanagürü nüxü: —Marü pemaã nüxü chixu, natürü i pema rü tama choxü peyaxögü. Guxüma i tacü i chaxüxü rü Chaunatüarü poramaã nixĩ i chanaxüxü, rü ngëmawa meãma pexü nüxü chadauxëë na choma rü Cristu na chiixü. ²⁶ —Natürü pema rü tama peyaxögü, erü tama chorü carnerugütanüxü pixügu. ²⁷ —Chorü carnerugü rü nüxü nacuëx i chauga, rü choma rü chorü carnerugüxü chacuëx, rü nüma rü chowe narüxü. ²⁸ —Rü choma rü nüxna chanaxã i maxü i taguma gúxü. Rü nümagü rü tagutáma inayarütauxe, rü taxúetáma choxna tanapuxü i choxmëxwa.

29 –Rü yíxema Chaunatü choxna tüxü mugüxe ya chorü carnerugü, rü guxüärü yexera tixí i napéxewa. Rü taxúema texé nüxna tüxü tapuxü.
 30 –Chaunatü rü choma rü wüxitama tixígu –ñanagürü. 31 Rü yexguma ga yema Yudíugüarü ãëxgacügu rü wenaxärü nutane nanayauxgü na gumamaã Ngechuchuxü ínamuxüchigüxüçèx. 32 Natürü ga Ngechuchu rü ñanagürü nüxü: –Pepéxewa chanaxü i muxüma i mexügu i Chaunatüarü poramaã chaxüxü. ¿Rü ngëxürüxü i ngëma mexü i chaxüxüçèx nixí i choxü nutamaã ípemuxüchigüchaüxü? –ñanagürü. 33 Rü yema Yudíugüarü ãëxgacügu rü Ngechuchuxü nangäxügu, rü ñanagürügu: –Tama wüxi i puracü i mexüçèx cuxü ítamuxüchigüchaü. Natürü cuxü ítamuxüchigüchaü erü Tupanamaã rü tacü quixugü. Cuma rü wüxi i duüxümare quixí rü cugü Tupanaxü quixíxëchaü –ñanagürügu. 34 Rü nüma ga Ngechuchu rü ñanagürü nüxü: –Perü mugüpanewa rü naxümatü i Tupanaärü ore i ñaxü: “Rü pematama nixí i tupanagü pixíguxü”, ñaxü. 35 –Rü ngëma Tupanaärü ore i ümatüxüwa nüxü yaxuxü, rü nüxü tacuèx rü taxucürüwama texé itayanaxoxëë. Rü ngëma orewa rü Tupana rü ñanagürü: “Guxãma ya yíxema texé yanayauxgüxe i chorü ore rü tupanagü tixígu”, ñanagürü i ngëma orewa. 36 –Rü Tupana choxü nayaxu na chanaxüxüçèx i norü puracü, rü yemacèx ñoma ga naãnewa choxü namu. ¿Rü ñuxäcü i pema nagu perüxíñüëgu rü chixexü Tupanamaã chaxüxü i ngëxguma Tupana Nane chixí –ñachagu pemaã? 37 –Rü ngëxguma chi tama chanaxüxgu i ngëma mexü i Chaunatü üxü, rü marü name ega woo tama choxü peyaxögügu. 38 –Natürü ngëxguma chanaxüxgu i ngëma Chaunatü üxü, rü woo tama choxü peyaxögügu, rü chanaxwëxe i nüxü peyaxögü i ngëma taxü i mexügu i Chaunatüarü poramaã chaxüxü. Erü ngëmawa tá nüxü pecuèx na Chaunatü rü chowa nangëxmaxü rü choma i nawa –ñanagürü. 39 Rü wenaxärü Ngechuchuxü niyauxgüchaü ga yema Yudíugüarü ãëxgacügu. Natürü nüma ga Ngechuchu rü naxchaxwa niña. 40 Rü yexguma ga Ngechuchu rü natü ga Yudáüärü tocutüçèx tomaã nataegu. Rü yema nachica ga Cuáü duüxüguxü üpaacü nawa íbaiüxëxügu tomaã narüxãüx. 41 Rü muxüma ga duüxügu rü Ngechuchuxü ínayadaugü, rü ñanagürügu: –Cuáü rü taxuüma ga taxü ga mexü ga cuèxruü naxü ga Tupanaärü poramaã. Natürü guxüma ga ore ga Cuáü tamaã nüxü ixuxü ga ñaã yatüchiga rü aixcüma nixí –ñanagürügu. 42 Rü yema nachicawa rü muxüma ga duüxügu rü Ngechuchuaxü nayaxögü.

11

Dácharuarü yuxchiga

1 Nayexma ga wüxi ga yatü ga idaawecü ga Dácharugu ãëgacü. Rü nüma rü naëyèxgü ga María rü Marta rü ñãne ga Betániãcüãx nixígu. 2 Rü yema María iyixí ga Cori ga Ngechuchucutügu pumara bacü rü ñuxüchi ngíyaemaã ínapicutüçü. Rü guma Dácharu ga idaawecü nixí ga ngíëneë. 3 Rü poraãcü nidaawe ga Dácharu. Rü yemacèx ga naëyèxgü, rü Ngechuchuxütawa imugagü, rü ngígürügügu: “Pa Corix, cumücü ya Dácharu ya nüxü cungechaüçü rü nidaawe”, ngígürügügu. 4 Rü yexguma yema orexü naxíñügu ga Ngechuchu, rü ñanagürü: –Ngëma daawe rü táütáma yumaã inayacuèx. Natürü nidaawe na duüxügu nüxü nadaugüxüçèx na ñuxäcü naporaxü ya Tupana rü ñuxäcü choma i Nane rü ta na chaporaxü –ñanagürü. 5 Rü Ngechuchu poraãcü María rü Marta rü Dácharuxü nangechaü. 6 Natürü yexguma nüxü naxíñügu ga na yadaawexü ga Dácharu, rü tama paxa ínayadau. Rü taxre ga ngunexüãmatama yexma narüxãüx ga yema nachica ga nawa nayexmaxüwa. 7 Rü yixcama ga

yemawena rü toxŭ ñanagürü: —¡Ngĩxã rü wena Yudéaanewa taxĩ! —ñanagürü.
⁸ Rŭ toma ga norü ngúexŭgŭ rü ñatarŭgŭgŭ nüxŭ: —Pa Ngúexëëruŭx,
 yexwacatama nixĩ ga yémacŭãx ga Yudiŭgŭarŭ ãëxgacŭgŭ yexma nutamaã
 cuxŭ ímuxŭchigŭchaŭxŭ. ¿Rŭ tŭxcŭŭ wena ngema cuxŭxchaŭ i ñuxmax?
 —ñatarŭgŭgŭ. ⁹ Rŭ Ngechuchu rü tomaã nüxŭ nixu ga wŭxi ga ore na
 nüxŭ tacuëxgŭxŭcèx na tauta nawa nanguxŭ na nayuxŭ ga nümax. Rŭ
 ñanagürü toxŭ: —¿Taux ëxna i wŭxi i ngunexŭ rü 12 i ora nawa ngëxmaxŭ?
 Ngëxguma texé ngunecŭ ixŭxgu rü tama tacŭmaã itayarŭña, erŭ tŭmacèx
 nangóone. ¹⁰ —Natürŭ ngëxguma wŭxie chŭtacŭ ixŭxgu rü ngëmaãcŭ tacŭmaã
 itayarŭña, erŭ tŭmacèx naxëãne —ñanagürü. Rŭ yemaãcŭ nanangoxëë na
 tauta nawa nanguxŭ na nayuxŭ ga nümax. ¹¹ Rŭ yemawena ga Ngechuchu
 rü ñanagürü toxŭ: —Tamŭcŭ ya Dácharu rü napemare. Natürŭ ñuxma rü
 tá chayabaixãchixëë —ñanagürü. ¹² Rŭ yexguma ga toma ga norü ngúexŭgŭ
 rü ñatarŭgŭgŭ: —Pa Corix, ega napemaregu, rü ngëmawa nüxŭ tacuèx na
 naxcèx tá yataanexŭ —ñatarŭgŭgŭ. ¹³ Natürŭ ga Ngechuchu rü nüxŭ nixux-
 chaŭchirëx ga Dácharu ga marŭ na nayuxŭ. Natürŭ ga toma nüxŭ tacuèxgŭgŭ
 rü na napemarexŭchigaxŭ yŭxŭ ga tomaã yaxuxŭ. ¹⁴ Rŭ yexguma ga
 Ngechuchu rü meãma tomaã nüxŭ nixu rü ñanagürü: —Dácharu rü marŭ nayu.
¹⁵ —Natürŭ choma rü chataãë na tama ngema changëxmaxŭ, erŭ ngëmaãcŭ
 nixĩ i namemaëxŭ i pexcèx na choxŭ peyaxôgŭxŭcèx. ¡Rŭ ngĩxã rü ítayadaugŭ!
 —ñanagürü. ¹⁶ Rŭ yéma nayexma ga totanŭxŭ ga Tumachi ga Wŭxigu Buexŭ
 ga Taxreëxpŭxŭmaã, naxugŭxŭ. Rŭ nüma ga Tumachi rü ñanagürü toxŭ: —
 ¡Ngĩxã i yixema rü ta ngema taxĩ na wŭxigu Ngechuchumaã iyuexŭcèx! —
 ñanagürü.

Ngechuchu nixĩ i wena namaxëxëxŭ i yuexŭ

¹⁷ Rŭ yexguma Betániãwa tomaã nanguxgu ga Ngechuchu, rü marŭ
 ägŭmŭcŭ ga ngunexŭ nangupetŭ ga na iyatëxgŭãxŭ ga Dácharu. ¹⁸ Rŭ
 guma Betániã rü Yerucharëŭarŭ ngaicamana nayexma. Rŭ tomaëxpŭx ga
 kilómetru nixĩ ga norü yaxŭ. ¹⁹ Rŭ muxŭma ga Yudiŭgŭ rü Dácharueyëx
 ga Marta rü Maríaxŭtawa naxĩ na ngĩxŭ yataãëxëëgŭxŭcèx, yerŭ nayu
 ga ngĩëneë. ²⁰ Rŭ yexguma Marta nüxŭ cuëxgu ga marŭ na ínanguxŭ ga
 Ngechuchu, rü nüxŭ iyatŭxãchi. Natürŭ ga María rü íxgutama irŭxãŭx. ²¹ Rŭ
 Marta rü ngĩgŭrŭgŭ nüxŭ ga Ngechuchu: —Pa Corix, yexguma chi cuma
 cunumëxgu rü tãŭ chima nayu ga chaueneë. ²² —Natürŭ choma nüxŭ chacuèx
 na woo i ñuxma na nayuxŭ, rü Tupana tá cuxna nanaxã i guxŭma i tacŭ i
 naxcèx ícuçaxŭ —ngĩgŭrŭgŭ. ²³ Rŭ Ngechuchu ngĩxŭ nangãxŭ rü ñanagürü:
 —Cueneë rü wena tá namaxŭ —ñanagürü. ²⁴ Rŭ Marta ngĩgŭrŭgŭ nüxŭ: —
 Ngëmaãcŭ nüxŭ chacuèx rü wena tá namaxŭ i ngëxguma naguxgu i naãne rü
 ngëxguma wena namaxëgu i guxŭma i yuexŭ —ngĩgŭrŭgŭ. ²⁵ Rŭ yexguma ga
 Ngechuchu rü ñanagürü: —Choma nixĩ i íchanadagŭxëëxŭ i yuexŭgŭ, rü wena
 chanamaxëxëëxŭ. Rŭ yixema choxŭ yaxôxë rü woo tayuxgu rü tá wenaxãrŭ
 tamaxŭ. ²⁶ —Rŭ guxãma ya texé ya maxŭxë rü choxŭ yaxôxë, rü guxŭgutáma
 tamaxŭ. ¿Cuyaxôxŭ yŭxŭ i ngëma? —ñanagürü ga Ngechuchu. ²⁷ Rŭ ngĩma
 rü ngĩgŭrŭgŭ nüxŭ: —Ngŭ, Pa Corix, choma rü chayaxô na cuma rü Tupana
 Nane ya Cristu ga ítananguxëëcŭ na quiŭxŭ —ngĩgŭrŭgŭ.

Dácharu itáxŭwa naxaxu ga Ngechuchu

²⁸ Rŭ yema ñaxguwena rü Marta rü ngĩëyëx ga Maríacë x iyaca. Rŭ bexma
 ngĩmaã nüxŭ iyarŭxu, rü ngĩgŭrŭgŭ: —Marŭ nuã nangu ya Ngúexëëruŭ
 ya Ngechuchu, rü choxŭ cuxcèx nayacaxëë —ngĩgŭrŭgŭ. ²⁹ Rŭ yexguma
 María nüxŭ ínŭgu ga marŭ yéma na nanguxŭ ga Ngechuchu, rü paxa

ichi, rü Ngechuchuxŭ íyadau. ³⁰ Rü Ngechuchu rü tauta íānewa nangu ga yexguma, rü yema nachica ga Marta nüxŭ ídauxŭwatama nixŭ ga nayexmaxŭ. ³¹ Rü Maríapatawa nayexma ga ñuxre ga yémacŭāx ga Yudíugŭarŭ āēxgacŭgŭ ga ngŭxŭ yéma taāēxēēgŭxŭ. Rü yexguma ngŭxŭ nadaugŭgu ga paxa na inachixŭ rü na ínaxŭxŭxŭ, rü ngŭwe narŭxŭ. Yerŭ nŭma nüxŭ nacuēxgŭgu rü yéma Dácharu itáxŭwa ixŭ na yéma yaxaxuxŭcèx. ³² Rü yexguma Ngechuchuxŭtawa nanguxgu ga María, rü napēxegu iyacaxāpŭxŭ, rü ngŭgŭrŭgŭ: —Pa Corix, yexguma chi cuma cunumèxgu rü tãu chima nayu ga chaueneē ya Dácharu —ngŭgŭrŭgŭ. ³³ Rü yexguma Ngechuchu ngŭxŭ dēuxgu ga na naxaxuxŭ rü na naxauxexŭ ga yema Yudíugŭarŭ āēxgacŭgŭ ga ngŭwe rŭxŭxŭ, rü poraācŭ ngechaŭ nüxŭ nangux. ³⁴ Rü Ngechuchu nüxna naca rü ñanagŭrŭ: —¿Ngexta nixŭ i ipenatáxŭ? —ñanagŭrŭ. Rü nŭmagŭ nanangāxŭ rü ñanagŭrŭgŭ: —Pa Corix, ¡dŭcax, nuā naxŭ, rü íyadau! —ñanagŭrŭgŭ. ³⁵ Rü naxaxu ga Ngechuchu. ³⁶ Rü yema Yudíugŭ rü ñanagŭrŭgŭ: —¡Dŭcèx ñuxācŭ poraācŭ Dácharuxŭ nangechaŭ! —ñanagŭrŭgŭ. ³⁷ Natŭrŭ ñuxre ga yema āēxgacŭgŭ ga Yudíugŭarŭ rü ñanagŭrŭgŭ: —Daa nixŭ ga guma yatŭ ga ngexetŭcŭxŭ rŭmexēēcŭ. ¿Rŭ tŭxcŭŭ taxucŭrŭwa tacŭ rü mexŭ Dácharucèx naxŭ na tama nayuxŭcèx? —ñanagŭrŭgŭ.

Wenaxŭrŭ namaxŭ ga Dácharu

³⁸ Rü Ngechuchu poraācŭ ngechaŭ nüxŭ nangux rü Dácharumaxŭcèx nixŭ. Rü wŭxi ga mēxpŭneārŭ āxmaxŭ nixŭ ga yema naxmaxŭ. Rü nayexma ga wŭxi ga nuta ga norŭ ngŭxtaŭruŭ. ³⁹ Rü Ngechuchu rü ñanagŭrŭ: —¡Ípenangŭxgachix ya yima nuta ya namaā nangŭxtaŭcŭ! —ñanagŭrŭ. Natŭrŭ ga Marta ga Dácharueyèx rü ngŭgŭrŭgŭ: —Pa Corix, cuxá marŭ nayixane nixŭ, erŭ marŭ āgŭmŭcŭ i ngunexŭ naetŭ nixŭ ga na nayuxŭ —ngŭgŭrŭgŭ. ⁴⁰ Natŭrŭ ga Ngechuchu rü ñanagŭrŭ ngŭxŭ: ¿Taux ēxna i marŭ cumaā nüxŭ chixuchiréxŭ rü ngēxguma cuyaxŭxgu rü tá nüxŭ cudau i wŭxi i mexŭ i taxŭ i Tupana ŭxŭ? —ñanagŭrŭ. ⁴¹ Rü yexguma ínanangŭxgachigŭ ga guma nuta. Rü Ngechuchu daxŭgu nadawenŭācŭma ñanagŭrŭ: —Pa Chaunatŭ Pa Tupanax, moxē cuxna chaxā erŭ marŭ choxŭ cuxŭnŭ. ⁴² —Choma nüxŭ chacuèx rü guxŭguma choxŭ cuxŭnŭ. Natŭrŭ moxē cuxna chaxā i ñuxma erŭ chanaxwèxe i ñaā duŭxŭgŭ na yaxŭgŭāxŭ na cuma núma choxŭ cumuxŭ —ñanagŭrŭ. ⁴³ Rü yexguma yema ñaxguwena, rü tagaācŭ ñanagŭrŭ: —Pa Dácharux, ¡ínaxŭxŭ i ngema! —ñanagŭrŭ. ⁴⁴ Rü ínaxŭxŭ ga Dácharu ga naxchápenŭŭmaā guxŭwama rŭbuxpŭxŭcŭ. Rü Ngechuchu ñanagŭrŭ nüxŭ ga duŭxŭgŭ: —¡Ípeyawēxpŭxŭ na íyaxŭxŭcèx! —ñanagŭrŭ.

Āēxgacŭgŭ naxcèx nadaugŭ na ñuxācŭ Ngechuchuxŭ yayauxgŭxŭ (Mt 26.1-5; Mr 14.1-2; Lc 22.1-2)

⁴⁵ Rü yema Yudíugŭarŭ āēxgacŭgŭ ga Maríawe rŭxŭxŭ rü nüxŭ nadaugŭ ga yema Ngechuchu ŭxŭ, rü muxŭma Ngechuchuaxŭ nayaxŭgŭ ga yexguma nüxŭ nadaugŭgu ga ñuxācŭ wena Dácharuxŭ na namaxēēxŭ. ⁴⁶ Natŭrŭ ñuxre ga yema āēxgacŭgŭ rü Parichéugŭmaā nüxŭ nayarŭxugŭ ga yema Ngechuchu ŭxŭ. ⁴⁷ Rü yexguma ga yema Parichéugŭ rü paigŭarŭ āēxgacŭgŭ rü nangutaquēxegŭ namaā ga guxŭma ga yema āēxgacŭgŭtŭcumŭwa ŭgŭxŭ. Rü ñanagŭrŭgŭ: —¿Tacŭ tá taxŭe? Erŭ ñaā yatŭ i Ngechuchu rü nanaxŭ i muxŭma i mexŭ i cuèxruŭgŭ. ⁴⁸ —Ngēxguma chi tama yayauxgŭgu, rü guxŭtáma i duŭxŭgŭ rü tá nüxŭ nayaxŭgŭ, rü Dumacŭāxgŭarŭ churaragŭ rü núma chi naxŭ rü nagu napogŭe ya tórŭ tupauca ya taxŭne, rü dŭxwa tãu chima tóxrŭ nixŭ i ñaā tachiŭñane —ñanagŭrŭgŭ. ⁴⁹ Natŭrŭ guma taunecŭgu rü yema paigŭtanŭwa rü Caipá nixŭ ga norŭ āēxgacŭ. Rü nŭma rü ñanagŭrŭ

nüxŭ: –Pemagü rü taxuŭma pecuèx. ⁵⁰ –¿Éxna tama nüxŭ pecuèx rü taxcèx rü na namemaèxŭ na wüxitama i yatü guxŭ i duŭxŭgücèx na yuxŭ, na tama nayuexŭcèx i guxŭma i tachiŭñanecŭŭax i duŭxŭgü? –ñanagürü. ⁵¹ Natürü ga Caipá rü tama nüèchama yema ñanagürü, yerü guma taunecügu rü nüma nixŭ ga paigüarü àëxgacü yŭxŭ. Rü yemacèx rü Tupana nixŭ ga Caipáwa idexacü ga yexguma nüxŭ yaxuxgu na Ngechuchu rü guxŭma i Yudiŭgücèx tá na nayuxŭ. ⁵² Rü yema orewa rü nanangoxèè na tama Yudiŭgücèxicatama tá na nayuxŭ, natürü guxŭma i Tupanaârü duŭxŭgü i guxŭ i nañewa ngèxmagŭxŭcèx rü tá ta na nayuxŭ, na ngèmaäcü wüxigu nangutaquèxexŭcèx i guxŭma i ngèma duŭxŭgü i Tupanaârü ixŭgŭxŭ. ⁵³ Rü yexgumaäcü nixŭ ga inaxŭgüèaxŭ ga Yudiŭgüarü àëxgacügü ga nagu na naxŭnèxŭ ga ñuxäcü tá na Ngechuchuxŭ yamèxgŭxŭ. ⁵⁴ Rü yemacèx ga Ngechuchu rü marü tama yema Yudiŭgü ímuxŭtanügu naxä. Rü tomaã inaxŭxŭ ga Yudéaanewa, rü wüxi ga ñanexäcü ga Efraïgu àeganewa naxŭ. Rü yexma tomaã narüxäŭx. Rü guma ñane rü wüxi ga nachica ga ngextá taxüema íxäpataxŭârü ngaicamana nayexma. ⁵⁵ Rü marü ningaica ga yema Yudiŭgüarü peta ga Üpetüchiga. Rü yemacèx muxŭma ga duŭxŭgü ga nái ga ñanecŭŭax rü Yerucharéŭwa naxŭ na Tupanacèx nügü yamexèègŭxŭcèx naxŭpa ga yema peta. ⁵⁶ Rü Ngechuchucèx nadaugü ga duŭxŭgü. Rü tupauca ga taxŭnewa nügüna nicagüetanü, rü ñanagürügü: –¿Ñuxŭ ñapegŭxŭ i pemax? ¿Ñoma i petawa tá naxŭxŭ rü èxna tama? –ñanagürügü. ⁵⁷ Rü yema Parichèugü rü paigüarü àëxgacügü rü duŭxŭgüna naxägagü, rü ñanagürügü: –Ngèxguma ngextá nüxŭ pedaugügu i ngèma Ngechuchu, jrü tomaã nüxŭ peyarüxu na tayayauxgŭxŭcèx! –ñanagürügü.

12

Wüxi ga nge rü Ngechuchucutügu pumara iba (Mt 26.6-13; Mr 14.3-9)

¹ Rü 6 ga ngunexŭ naxŭpa ga Üpetüchigarü peta, rü Ngechuchu rü tomaã Betániäwa naxŭ. Rü guma ñane nixŭ ga nagu naxächixŭne ga Dácharu ga Ngechuchu wena namaxèècü. ² Rü yéma Dácharuchixŭwa Ngechuchucèx nanaxŭgü ga taxŭ ga òna. Rü totanüwa ga yema mechawa yexmagŭxe rü Dácharu nixŭ ga Ngechuchuxŭtawaama chibücü. Rü Marta iyixŭ ga inaxŭcü ga òna. ³ Rü yexguma ga María rü yéma inange ga wüxi ga taxüraweŭxŭ ga pumara ga yixichixŭ rü tatanüxŭchixŭ. Rü Ngechuchuxŭ namaã iyixcutü. Rü ñuxŭchi ngŭyaemaã ínapicutü. Rü guma í rü guxŭwama nayixmachŭã namaã ga yema pumara. ⁴⁻⁵ Rü yexguma ga Yuda ga Icariúte ga wüxi ga totanüxŭchirèx ixŭxŭ ga yixcama bexma cúäcü Ngechuchuxŭ íxuaxŭxŭ, rü ñanagürü: –¿Tüxcüŭ tama tatanüxŭgu namaã itaxe i ngèma pumara na ngèma dŭerumaã nüxŭ nangŭxèèxŭcèx i ngèma duŭxŭgü i ngearü dŭeruäxgŭxŭ? –ñanagürü. ⁶ Natürü ga Yuda rü tama aixcuma nagu narüxŭnü ga yema ngearü dŭeruäxgŭxŭ. Natürü yema ñanagürü yerü nüma rü wüxi ga ngŭtèxáxŭ nixŭ. Rü naxmèxwa nayexma ga yema choca ga dŭeru ngŭxŭ nagu taxŭgŭxŭ ga guxäma ga toma ga Ngechuchuarü ngüexŭgü. Rü Yuda rü ñuxguacü rü noxrüxŭtama ngŭxne nangŭxŭxŭ. ⁷ Rü yexguma ga Ngechuchu rü ñanagürü nüxŭ: –¡Täxŭ i ngŭxŭ cuchixewexŭ! Erü choma rü paxa tá chayü rü tá ichatèx. Rü ngèmacèx nixŭ i ngèma pumaramaã choxŭ nachaxŭ. ⁸ –Ngèma ngearü dŭeruäxgŭxŭ rü guxŭgutáma petanüwa nangèxmagü. Natürü i choma rü täütáma guxŭgu petanüwa changèxma –ñanagürü.

Paigüarü ãëxgacügü rü nügümaã nanamexëëgü ga ñuxãcü Dácharuxü tá na yamëxgüxü

⁹ Rü muxüma ga Yudiügü rü nüxü nacuáchiga ga Betániãwa na nayexmaxü ga Ngechuchu. Rü yéma naxi na nüxü nadaugüxüçèx. Rü tama Ngechuchuxüxícatama nadaugüchaü natürü nüxü nadaugüchaü ta ga Dácharu ga Ngechuchu wena namaxëëcü. ¹⁰ Rü yexguma ga paigüarü ãëxgacügü rü nügümaã nanamexëëgü ga Dácharuxü rü ta na yamëxgüxüçèx. ¹¹ Yerü Dácharugagu nixi ga muxüma ga Yudiügü ga Ngechuchuaxü yaxögüãxü rü yema paigüna naxigüxü.

*Ngechuchu rü Yerucharéüga naxücu
(Mt 21.1-11; Mr 11.1-11; Lc 19.28-40)*

¹² Rü muxüma ga duüxügü rü Yerucharéüwa naxi naxçèx ga Üpetüchigaarü peta. Rü moxüãcü duüxügü nüxü nacuáchigagü ga Ngechuchu rü guma ñãnewa na nanguxchaüxü. ¹³ Rü yexguma moruátüta nadaügü rü yemamaã Ngechuchuxü nayatüxgütanüãchi. Rü tagaãcü ñanagürügü: —¡Rü naxüüne rü namecümáxüchi ya daa Tupanaégagu núma ücü! ¡Rü yixema na Iraétanüxü ixigüxü rü namecümáxüchi ya daa tórü ãëxgacü! —ñanagürügü. ¹⁴ Rü Ngechuchu nüxü inayangau ga wüxi ga buru, rü naetügu naxaunagü ga yema Tupanaãrü ore ga ümatüxü nüxü ixuxürüü ga yexguma ñaxgu:

¹⁵ “¡Tãxü i pemuëxü, Pa Yerucharéüçüãxgüx! ¡Rü iperüdaunü na ngema ne naxüxü ya perü ãëxgacü ya wüxi i buru i íraxüetügu aunagüçü!”

ñaxü. ¹⁶ Rü noxri ga toma ga norü ngüexügü rü tama nüxü tacuëxgüéga ga Ngechuchuchiga na yiixü ga yema ore. Natürü yixcüra marü Ngechuchu Tupanaxütawa üxgu, rü yexguma nixi ga nüxna tacuëxãchiexü ga guxüma ga yema Ngechuchuxü ngupetüxü, rü yema Tupanaãrü ore nüxü ixuxüãcütama nüxü na nangupetüxü. ¹⁷ Rü yema duüxügü ga Ngechuchuxütawa yexmagüxü ga yexguma Dácharuxü wena namaxëëgu, rü nüxü nixugüe ga yema nüxü nadaugüxü. ¹⁸ Rü yemacèx nixi ga duüxügü ga Ngechuchuxü yatüxãchitanüxü na nayauxgüãxüçèx, yerü nüxü nacuáchigagü ga yema taxü ga mexü ga Tupanaãrü poramaã naxüxü. ¹⁹ Natürü ga yema Parichéügü rü nügümaã ñanagürügü: —Marü nüxü pedauxü i ñuxma na taxucürüwama tacü namaã ixüxü. ¡Rü dücax, guxüma i duüxügü rü nawe narüxí! —ñanagürügü.

Griégugü rü Ngechuchuxü nadaugüchaü

²⁰ Rü muxüma ga duüxügü rü petacèx Yerucharéüwa naxi na yéma Tupanaxü na yanacuëxüügüxüçèx. Rü yema duüxügütanüwa nayexma ga ñuxre ga Griégugü. ²¹ Rü yema Griégugü rü Piripicèx naxi. Rü nüma ga Piripi rü Gariréaaneãrü ñãne ga Bechaídacüãx nixi. Rü nüxü nacèexügü rü ñanagürügü: —Pa Corix, nüxü tadauxchaü ya Ngechuchu —ñanagürügü. ²² Rü Piripi rü Aüdrémaã nüxü nayarüxu. Rü yema taxre rü wüxigu Ngechuchuxütawa naxi, rü namaã nüxü nayarüxugü. ²³ Rü yexguma ga Ngechuchu rü ñanagürü nüxü: —Rü marü nawa nangu tá na chayuxü rü wenaxãrü Chaunatüxütawa tá na chaxüxü i choma i Tupana Nane i duüxüxü chiixü. ²⁴ —Rü aixcüma pemaã nüxü chixu rü ngëxguma chi wüxipüxü i trigu tama waixüümüãnegu toxgu rü wüxipüxüchatama nixi. Natürü ega waixüümügu natoxgu, rü ngema naxüxgu, rü muxüchinema ínanguxuchi. [Rü ngëxgumarüü tá ta Tupanaxütawa nangugü i muxüma i duüxügü ega chayuxgux.] ²⁵ —Rü pemaã nüxü chixu rü texé ya yixema tümaãrü maxüxü ngechaüxë i ñoma i naãnewa rü tá itayarütaxu. Natürü texé ya yixema tama tümaãrü maxüxü ngechaüxë rü tama yuxü muüxë i ñoma i naãnewa, rü tá tüxü nangëxma i maxü i taguma gúxü. ²⁶ —Rü ngëxguma texé choxü puracüchaügu rü name nixi i chowe tarüxü. Rü

ngẽma choma tá íchangẽxmaxũwa rü ngẽma rü tá ta tangẽxma i tümax. Rü ngẽxguma texé choxũ puracũgu rü Chaunatü ya Tupana rü tá tümamaã nataãẽ –ñanagürü.

Ngechuchu nanaxunagü ga norü yuxchiga

²⁷ –Rü Ngechuchu ñanagürü: –Rü ñuxma rü poraãcü changechaũ rü chanaxixãchiãẽ. ¿Rü tacũxũ tá Chaunatümaã chixuxũ? Taxucürüwa namaã nüxũ chixu na choxũ ínanguxuchixẽẽxúcèx na tama chayuxúcèx, erü woetama ngẽmacèx núma chaxũ –ñanagürü. ²⁸ Rü ñanagürü: –Pa Chaunatüx, ¿Choxũ rüngũxẽẽ na duũxũgüpẽxewa cuzũ chataxẽẽxúcèx! –ñanagürü. Rü yexguma ga yema duũxũgü ga yema yexmagũxũ rü nüxũ naxĩnüẽ ga wüxi ga naga ga daxũwa inaxũxũ ga ñaxũ: –Marü cuzũ charüngũxẽẽ na choxũ cutaxẽẽxũ ga noxrix, rü wena táxarü cuzũ charüngũxẽẽ na choxũ cutaxẽẽxúcèx –ñanagürü ga yema naga. ²⁹ Rü yema duũxũgü ga yema yexmagũxũ ga nüxũ ñnüxũ ga yema naga, rü ñanagürügü: –Wüxi i duruanexũ nixĩ –ñanagürügü. Natürü togü rü ñanagürügü: –Wüxi i Tupanaãrü orearü ngeruũ i daxũcũãx nixĩ i namaã idexaxũ –ñanagürügü. ³⁰ Rü yexguma ga Ngechuchu rü ñanagürü nüxũ: –Tama chauxcèx nixĩ i nüxũ pexĩnüẽxũ i ngẽma naga. Rü pexcèxtama nixĩ i nüxũ pexĩnüẽxũ. ³¹ –Rü ñuxma tá nixĩ i Tupana inaxũgüãxũ na tüxũ napoxcuxũ ya duũxẽ naxcèx i tümaãrü pepadugü. Rü ñuxma tá nixĩ i Tupana ínatèxüchixũ i ngẽma ñoma i naãnewa poraxũ i Chataná. ³² –Rü ngẽxguma curuchawa chipotagu rü chaugũxütawa tá chanagagü i guxũma i duũxũgü –ñanagürü ga Ngechuchu. ³³ Rü yema orewa duũxũgümaã nüxũ nixu ga ñuxãcü tá na nayuxũ. ³⁴ Rü yema duũxũgü nanangãxũgü, rü ñanagürügü: –Torü mugü i ümatüxũwa nüxũ tadaugü na guxũgutáma namaxẽchaxũ ya Cristu. ¿Rü ñuxãcü i cuma rü ñacurügü: “Rü Tupana Nane ya duũxũxũ ixĩcü rü curuchawa tá nipota”, ñacurügü? ¿Rü texé tixĩ ya yíxema Tupana Nane ya duũxũxũ ixĩxẽ? –ñanagürügü. ³⁵ Rü yexguma ga Ngechuchu rü ñanagürü nüxũ: –Ñoma rü ta petanüwa changẽxma na ñoma i naãnewa pexũ changüexẽẽxúcèx rü ngẽmaãcü pexũ changóonetanüxẽẽxúcèx. Natürü paxaãchicèxicatama petanüwa changẽxma. Rü name nixĩ i paxa choxũ peyaxõgü ñoma rü ta pexcèx chanangóonexẽẽ naxüpa na naxẽãnexũ. Erü yíxema ããnexũwa ngẽxmaxẽ rü tama nüxũ tacuèx na ngextá taxũxũ. ³⁶ –Rü ñoma rü ta petanüwa changẽxma rü name nixĩ i paxa choxũ peyaxõgü na chorü ngóonexũwa pengẽxmagũxúcèx –ñanagürü. Rü yema ñaxguwena rü natanüwa ínaxũxũ ga Ngechuchu. Rü naxchaxwa inicux.

Tacüçèx nixĩ ga Yudügu ga tama Ngechuchuaxũ yaxõgüãxũ

³⁷ Rü woo ga Ngechuchu rü duũxũgüpẽxewa nanaxü ga muxũma ga taxũ ga mexũ ga cuèxruũgü ga Tupanaãrü poramaã naxũxũ, natürü yexguma rü ta tama nüxũ nayaxõgü ga duũxũgü. ³⁸ Rü yemaãcü Tupana nayanguxẽẽ ga yema ore ga Ichaxía ümatüxũ ga ñaxũ:

“Pa Corix, taxúema tayaxõ ga yema ore ga tüxũ tangüexẽẽxũ. Rü woo nüxũ tadaugü na ñuxãcü naporaxũ ya Tupana, rü tama tayaxõgü”, ñaxũ. ³⁹⁻⁴⁰ Rü yemaãcü ga yema duũxũgü rü tama nayaxõgü yema Ichaxía ümatüxũwa nüxũ yaxuxürüũ, rü:

“Yema duũxũgü rü tama nüxũ nadaugüchaũ rü tama nayaxõgüchaũ rü tama Tupanacèx nawoeguchaũ. Rü yemacèx ga Tupana rü nüxna nixũ na tama nüxũ nadaugüxúcèx rü tama yaxõgüãxúcèx rü tama naxcèx nawoeguxúcèx na núma nüxna naxããxúcèx i maxũ i ngexwacaxũxũ”, ñaxũ. ⁴¹ Rü yema ñanagürü ga Ichaxía yerü nangoxetügu marü nüxũ nadau na ñuxãcü ãẽxgacü ya tacüxüchi na yíixũ ya Ngechuchu ya Cristu. Rü yemaãcü

nachiga nidexa. ⁴² Natürü muxŭma ga yema Yudíugüarü ãëxgacügü rü Ngechuchuaxŭ nayaxögü, rü woo ga ñuxre ga naërugü rü ta nayaxögü, natürü tama nügü nixugüchaŭ ga duŭxŭgŭpëxewa, yerü namuë na Parichéugü ngutaquëxepataŭwa ínawoxŭxŭ. ⁴³ Rü yemaãcü tama nügü nixugüchaŭ, yerü norü me nixí ga duŭxŭgŭ namaã nataãëgŭxŭ rü tama aixcüma naxcëx nadaugü na Tupana namaã taãëxŭ.

Texé ya tama Ngechuchuarü oreaxŭ yaxöxë rü tá tapoxcu

⁴⁴ Rü tagaãcü ñanagürü ga Ngechuchu: —Texé ya choxŭ yaxöxë rü tama choxŭxícatama tayaxö. Natürü Chaunatü ya núma choxŭ mucüaxŭ rü ta tayaxö. ⁴⁵ —Rü texé ya choxŭ dauxe, rü Chaunatü ya núma choxŭ mucüxŭ rü ta tadau. ⁴⁶ —Choma na ngónexëëruŭ chíxŭ, rü ñoma i naãnewa changu na guxãma ya texé ya choxŭ yaxöxë rü tama ëãnexŭwa na tangëxmagüechaxŭcëx. ⁴⁷ —Natürü ngëxguma texé nüxŭ ínügu i chorü ore rü tama tayaxöxgu rü tama choma nixí i tüxŭ chapoxcuxŭ. Erü tama ñoma i naãnewa changu na chanapoxcuexŭcëx i duŭxŭgŭ, natürü núma chaxŭ na chanamaxëxëxŭcëx. ⁴⁸ —Yíxema texé ya tama choxŭ yaxöxë rü tama chauga ínüxë rü marü tüxŭ nangëxma na tacüçëx tá Tupana tüxŭ poxcuxŭ. Erü ngëma ore i nüxŭ chixuxŭgagu tátama nixí ya Tupana i tüxŭ napoxcuxŭ i naãneärü guxgu, erü tama tayaxö i ngëma ore i nüxŭ chixuxŭ. ⁴⁹ —Tama chaugagutama chidexa, natürü guma Chaunatü ga núma choxŭ mucü, rü guma nixí ga chomaã nüxŭ ixücü na tacüxŭ tá duŭxŭgŭmaã chixuxŭ rü ñuxãcü tá chanangüexëxŭ. ⁵⁰ —Rü nüxŭ chacuèx na Chaunatüarü orewa nangëxmaxŭ i maxŭ i taguma gúxŭ. Rü ngëmacëx i ngëma ore i nüxŭ chixuxŭ, rü ngëmatama ore nixí i Chaunatü choxŭ muxŭ na nüxŭ chixuxŭ —ñanagürü ga Ngechuchu.

13

Ngechuchu rü norü ngüexŭgŭxŭ niyauxgücutü

¹ Rü wüxi ga ngunexŭ nataxu ga nawa na nanguxŭ ga yema Yudíugüarü peta ga Üpetüchiga. Rü Ngechuchu nüxŭ nacuèx ga marü nawa na nanguxŭ ga ñoma ga naãnewa na yaxŭxŭ rü wenaxärü Nanatüxŭtawa na naxŭxŭ. Rü nüma rü yexguma ñoma ga naãnewa nayexmagu rü guxŭguma tüxŭ nangechaŭ ga guxema noxrü ixígxë. Rü yexgumarüŭ ta ga yexguma toxna yaxŭxchaŭgu ga daxŭguxŭ ga naãnewa na naxŭxŭ, rü yemaãcü poraãcü toxŭ nangechaŭ. ²⁻⁴ Natürü ga Chataná rü marü Yuda ga Chimáŭ ga Icariúte nanena nangu na bexma cúãcü Ngechuchuxŭ ínaxuaxŭxŭcëx. Rü Ngechuchu rü marü nüxŭ nacuèx ga Nanatüxŭtawa na ne naxŭxŭ rü wena táxarü Nanatüçëx na nataeguxŭ. Rü nüxŭ nacuèx ga Nanatü rü naxmëxgu na naxŭãxŭ ga guxŭma ga pora. Rü yemacëx ga yema chütaxŭgu ga yexguma mechawa ítachibüeyane, rü inachi ga Ngechuchu. Rü ínacuxuchi ga norü gáuxŭchiru, rü wüxi ga tuayamaã nügü nigoye. ⁵ Rü ñuxŭchi yauxmëxŭpáxŭgu dexáta naba, rü toxŭ niyauxgücutü. Rü guma tuaya ga namaã yagoyecümaã toxŭ ínapigücutü. ⁶ Rü yexguma Chimáŭ ga Pedruxŭ nayauxcutüchaŭgu rü ñanagürü ga Pedru: —Pa Corix, ¿ñuxãcü tá i cuma i choxŭ cuyauxcutüxŭ? —ñanagürü. ⁷ Rü Ngechuchu nanangãxŭ rü ñanagürü: —Ñuxma rü tama nüxŭ cucuèx i tüxcüŭ na chanaxŭxŭ i ñaã, natürü yixcama rü tá nüxŭ cucuèx —ñanagürü. ⁸ Natürü ga Pedru rü ñanagürü: —Choma rü tãütáma chanaxwëxe na choxŭ cuyauxcutüxŭ —ñanagürü. Rü Ngechuchu nanangãxŭ rü ñanagürü nüxŭ: —Ngëxguma tama cuxŭ chayauxcutügu, rü tãütáma choxrü quixí —ñanagürü. ⁹ Rü yexguma

ga Chimáũ ga Pedru rü ñanagürü nüxũ: —Pa Corix, ¡Tama choxũ cuyauxcutüxicatama! Natürü chanaxwèxe i choxũ cuyauxmèx rü choxũ cuyauxeru ta —ñanagürü. ¹⁰ Natürü Ngechuchu nanangãxũ rü ñanagürü nüxũ: —Texé ya ngexwacèx aiyaxe rü tanaxwèxe i tümacutüxicatama tayaxu, erü guxũwama tangemata. Rü pema rü marü pingematagü, natürü tama guxãma aixcüma tingemata —ñanagürü. ¹¹ Rü Ngechuchu nüxũ nacuèx na texé tá bexma cúãcü ínaxuaxũxũ, rü yemacèx ñanagürü nüxũ: —Natürü tama guxãma aixcüma tingemata —ñaxũ. ¹² Rü yexguma toxũ yayauxgücutüguwena, rü Ngechuchu wena nicüxcuchi ga norü gáuxũchiru. Rü wenaxãrü mechawa narüto. Rü ñanagürü toxũ: —¿Nüxũ pecuáxũ yĩxũ i ngẽma chaxũxũ? ¹³ —Pema rü: “Pa Ngúexẽeruũ” rü “Pa Corix”, ñaperügü choxũ. Rü marü name i ngẽma ñaperügü, erü aixcümaxũchi ngẽma chixĩ. ¹⁴ —Rü ñuxma i choma na ngúexẽeruũ chixĩxũ rü pemaã na ichacuáxũ, rü pexũ chiyauxgücutü. Rü ngexgumarũxũ ta i pema rü name i wüxichigü i pemücũxũ piyauxgücutü.. ¹⁵ —Choma rü pexũ nüxũ chadauxẽẽ na ñuxãcü tá penaxũxũ na pema rü ngema pemaã chaxũxũãcü penaxũxũcèx. ¹⁶ —Rü aixcüma pemaã nüxũ chixu rü taxuũma i wüxi i coriarü duũxũ rü norü coriétüwa nügü nangexmaxẽẽ. Rü taxuxũma i ãẽxgacüarü orearü ngeruxũ i norü ãẽxgacü i namuxũtëtüwa nügü nangexmaxẽẽ. ¹⁷ —Rü ngẽxguma nüxũ pecuèxgu i chorü ore rü penaxũxgu i ngẽma pemaã nüxũ chixuxũ, rü aixcüma tá petaãgü. ¹⁸ —Rü tama guxãma i pechiga nixĩ i chidexaxũ. Erü choma rü tüxũ chacuèx rü texégü tixĩ ya yixema tüxũ chidexechixe. Natürü Tupana nayanguxẽẽchaũ i norü ore i ümatũxũ i ñaxũ: “Texé ya chomaã chibüxe rü chomaã tarüxuwãnu”, ñaxũ. Rü ngẽmaãcü tá nangupetü na yanguxũcèx i ngema Tupanaarü ore. ¹⁹ —Natürü naxũpa na nangupetũxũ i ngẽma, rü pemaã nüxũ chixu na choxũ peyaxögüxũcèx i ngẽxguma nangupetũxgu. ²⁰ —Aixcüma pemaã nüxũ chixu rü texé ya tüxũ yaxúxe ya yixema choma ngema tüxũ chamuxẽ, rü choxũ nixĩ i tayaxuxũ. Rü texé ya choxũ yaxúxe, rü Chaunatü ga núma choxũ mucũxũ nixĩ i tayaxuxũ —ñanagürü ga Ngechuchu.

*Ngechuchu nüxũ nixu ga Yuda rü tá bexma cúãcü na ínaxuaxũãxũ
(Mt 26.20-25; Mr 14.17-21; Lc 22.21-23)*

²¹ Rü yexguma yema ñaxguwena ga Ngechuchu rü porãcü ngechaũ nüxũ nangux, rü meãma tomaã nanangoxẽẽ, rü ñanagürü toxũ: —Aixcüma pemaã nüxũ chixu rü wüxie i petanüwa tá nixĩ i bexma cúãcü choxũ ítaxuaxũxũ —ñanagürü. ²² Rü yexguma ga toma ga norü ngúexũgü rü wüxichigü togü tadawenü, rü tama nüxũ tacuèxgü ga texéchiga na yema ñaxũ. ²³ Rü choma ga norü ngúexũ ga porãcü choxũ nangechaũxẽ rü nacüwawa charüto ga Ngechuchu ga mechawa. ²⁴ Rü Chimáũ ga Pedru rü bexma choxũ naxuneta ga na Ngechuchuna chaçaxũcèx ga texéchiga na yĩxũ ga yema. ²⁵ Rü yexguma ga choma rü yexeraãcü Ngechuchuna chimaxcuchi rü nüxna chaca, rü ñacharügü: —Pa Corix, ¿texé tá tixĩ ya yixema? —ñacharügü. ²⁶ Rü Ngechuchu choxũ nangãxũ, rü ñanagürü: —Wüxi i pãũãrü bücuxũ tá íchacúe, rü yixema tüxna chanaxãxẽ, rü yixema tixĩ —ñanagürü. Rü yexguma ínanaçúe ga wüxi ga pãũãrü bücuxũ rü Yuda ga Icariúte ga Chimáũ nanena nanaxã. ²⁷ Rü yexgumatama Yuda nayauxgu ga yema pãũãrü bücuxũ rü ngoxo ga Chataná rü Yudagu naxücu. Rü yexguma ga Ngechuchu rü ñanagürü nüxũ: —Rü ngẽma cuxũxchaũxũ, ¡rü paxa naxü! —ñanagürü. ²⁸ Natürü taxúema ga toma ga mechawa chibüxe nüxũ tacuèxgü ga tacüchiga na yĩxũ ga yema ñaxũ ga Ngechuchu. ²⁹ Rü núma ga Yuda rü dïeruchiũãrü dauruũ nixĩ. Rü yemacèx ñuxre ga toma nüxũ tacuèxgügu rü Ngechuchu taxewa nanamu, na tacücèx yataxexũcèx naxcèx ga peta, rü èxna duũxũgü ga ngearü dïeruãxũna ngĩxũ

na naxāxūcèx ga dīeru. ³⁰ Rū yexguma Yuda nayauxgu ga yema pāū, rū inaxūxū ga yema ucapuwa. Rū marū nachūta ga yexgumax.

Ngechuchu norū ngúexūgūmaā nūxū nixu ga yexwacaxūxū ga norū mu

³¹ Rū yexguma Yuda íxūxguwena, rū Ngechuchu rū ñanagürü: —Rū ñuxma rū tá aixcūma nangox na ñuxācū naporaxū ya Tupana Nane ya duūxūxū ixīcū. Rū yimawa tá nixī i nangoxēēxū ya Tupana i norū pora. ³² —Rū ngēxguma yima Tupana Nane nangoxēēxgu i Tupanaārū pora, rū ngēxgumarūū tá ta ya Tupana rū nanangoxēē i Naneārū pora. Rū paxa tá nixī i ngēma. ³³ —Pa Chauxacūāxgūx, tāūtāma muxū i ngunexū petanūwa changēxma. Rū pema rū tá chauxcèx pedaugū, natürü ngēma choma íchaxūxūwa rū taxucürūwama ngēma pexī. Rū ñāātama ore nixī ga marū Yudiūgüarū āēxgacūgūmaā nūxū chixuxū, rū ñuxma rū pemaā rū ta nūxū chixuxū. ³⁴ —Rū pemaā nūxū chixu i wūxi i ngexwacaxūxū i mu. Rū ngēma pexū chamuxū nixī i pemücügūxū na pengechaūxū i wūxichigū. Rū ngēma na choma pexū changechaūxūrūū, rū chanaxwèxe i wūxichigū i pema rū pemücügūxū pengechaūgū. ³⁵ —Rū ngēxguma wūxichigū pemücügūxū pengechaūgu, rū guxūma i duūxūgū tá nūxū nicuèxāchitanū na chorū ngúexūgū pixīgūxū —ñanagürü.

Ngechuchu nūxū nixu rū Pedru rū tāxūtāma nūgū nixu na norū ngúexū yixīxū (Mt 26.31-35; Mr 14.27-31; Lc 22.31-34)

³⁶ Rū Chimáū ga Pedru rū Ngechuchuna naca, rū ñanagürü: —Pa Corix ¿ngextá tá cuxū? —ñanagürü. Rū Ngechuchu nanangāxū, rū ñanagürü: —Ngēma íchaxūxūwa rū taxucürūwa chowe curūxū i ñuxmax. Natürü yixcama rū ngēmāācū tá chowe curūxū —ñanagürü. ³⁷ Rū yexguma ga Pedru rū ñanagürü: —Pa Corix, ¿tūxcūū taxucürūwa cuwe charūxū i ñuxmax? Erū marū íchamemare na cuxcèx na chayuxū —ñanagürü. ³⁸ Rū Ngechuchu nanangāxū, rū ñanagürü: —¿Aixcūma yīxū i marū ícumemarexū na chauxcèx cuyuxū? Aixcūma cumaā nūxū chixu rū tāūtātama yacaxgu ya otá, rū tomaēpūxcūna tá nūxū quixu na tama choxū cucuáxū —ñanagürü ga Ngechuchu.

14

Ngechuchu rū nama i Nanatūxūtawa nadaxū nixī

¹ —¡Tāxū i penaxixāchiāēgūxū i pemax! ¡Tupanaāxū peyaxōgū rū choxū rū ta peyaxōgū! ² —Chaunatūxūtawa nangēxma i muxūchixūma i nachicagū. Ngēxguma chi natauxguma, rū tāū chima pemaā nūxū chixu na pexcèx chayamexēēxūcèx i pechicagū. ³ —Rū ngēxguma marū ngēma chaxūxgu rū wūxi i pechica chamexēēxgu, rū wena táxarū núma chaxū. Rū pexū tá chayagagū na ngēma nachica i chomatātama nawa changēxmaxūwa na pengēxmagūxūcèx i pemax. ⁴ —Rū pema rū nūxū pecuèx na ngextá tá na chaxūxū, rū marū nūxū pecuèx i nama i ngēma nadaxū —ñanagürü ga Ngechuchu. ⁵ Rū Tumachi rū ñanagürü: —Pa Corix, tama nūxū tacuèx na ngextá na cuxūxū. ¿Rū ñuxācū tá i nūxū tacuáxū i ngēma nama? —ñanagürü. ⁶ Rū Ngechuchu nanangāxū, rū ñanagürü: —Choma nixī i ngēma nama i Chaunatūxūtawa nadaxū chíxū. Rū aixcūma nixī i ngēma ore i nūxū chixuxū. Rū choma nixī i duūxūgūxū chamaxēēxū. Rū chaugaguxicatama nixī i Chaunatūxūtawa nangugūxū i duūxūgū. ⁷ —Rū ngēxguma chi pema rū aixcūma meā choxū pecuèxgūgu, rū Chaunatūxū rū chi ta pecuèxgū. Rū ñuxmaūcūū nixī i Chaunatūxū pecuáxū, erū marū nūxū pedaugūecha —ñanagürü. ⁸ Rū yexguma ga Piripi rū ñanagürü: —Pa Corix, ¡Toxū nūxū nadauxēē ya Cunatū! Rū ngēxīcatama i tanaxwèxegūxū —ñanagürü. ⁹ Rū

Ngechuchu nanangãxŭ, rŭ ñanagŭrŭ: —Pa Piripix, ¿ñuxre ya taunecŭ marŭ petanŭwa changẽxma rŭ ñuxma rŭ ta tama choxŭ cucuèégaxŭ? Yíxema choxŭ dauxe rŭ Chaunatŭxŭ rŭ ta tadau. ¿Rŭ tŭxcŭŭ i ngẽxguma rŭ ta cunaxwèxexŭ i pexŭ nŭxŭ na chadauxẽẽxŭ ya Chaunatŭ? ¹⁰ —¿Tama ẽxna cuyaxŭ na choma rŭ Chaunatŭmaã rŭ wŭxitama tixĩgŭxŭ? Rŭ guxŭma i ore i pemaã nŭxŭ chixuxŭ rŭ tama chauechama nŭxŭ chixu. Erŭ yima Chaunatŭ ya wŭxiwa chomaã ngẽxmacŭ, rŭ yima nixĩ ya naxŭcŭ i guxŭma i noxrŭtama puracŭ. ¹¹ —Chanaxwèxe i choxŭ peyaxŭgŭ na choma rŭ Chaunatŭmaã wŭxitama tixĩgŭxŭ. Natŭrŭ woo tama ngẽma pixŭgŭgu rŭ chanaxwèxe na choxŭ peyaxŭgŭxŭ naxcèx i ngẽma mexŭgŭ i taxŭ i Tupanaãrŭ poramaã chaxŭxŭ. ¹² —Aixcŭma pemaã nŭxŭ chixu rŭ yíxema choxŭ yaxŭxè rŭ tá tanaxŭ i guxŭma i choma chaxŭxŭ. Rŭ ngẽma chaxŭxŭãrŭ yexera tá taxŭ, erŭ choma rŭ tá Chaunatŭxŭtawa chaxŭ. ¹³ —Rŭ guxŭma i tacŭ i chauégagu Tupanaxŭtawa naxcèx ípeçaxŭ rŭ tá pexna chanaxã. Rŭ ngẽmaãcŭ tá chanaxŭ na chaugagu nangŭxŭcèx i Chaunatŭarŭ pora. ¹⁴ —Rŭ choma tá chanaxŭ i guxŭma i tacŭ i chauégagu choxna naxcèx peçaxŭ.

Ngechuchu rŭ norŭ ngúexŭgŭmaã inaxuneta na naxcèx tá núma namuãxŭ i Naãe i Üünexŭ

¹⁵ —Rŭ ngẽxguma aixcŭma choxŭ pengechaŭgu, rŭ naga tá pexĩnŭe i chorŭ mugŭ. ¹⁶ —Rŭ choma tá Chaunatŭna naxcèx chaca na núma peçcèx namuãxŭcèx i to i perŭ ngŭxẽẽruŭ i Naãe i Üünexŭ, na guxŭgutáma petanŭwa nangẽxmaxŭcèx. Rŭ núma tá nixĩ i peçcèx nangŭxẽẽãxŭ i ore i aixcŭma ixĩxŭ. ¹⁷ —Rŭ ñoma i naãnecŭãx i duŭxŭgŭ rŭ taxucŭrŭwama nanayauxgŭ, erŭ tama nŭxŭ nadaugŭ rŭ tama nŭxŭ nacuèxgŭ. Natŭrŭ i pema rŭ marŭ nŭxŭ pecuèx, erŭ núma rŭ petanŭwa nangẽxma. Rŭ guxŭgutáma pemaã inarŭxãŭx. ¹⁸ —Rŭ tãutáma núma pexŭ chawogŭmare i chomax, erŭ wena táxarŭ peçcèx chataegu, na petanŭwa changẽxmaxŭcèx. ¹⁹ —Rŭ paxa tá nixĩ na tãutáma choxŭ nadaugŭxŭ i ñoma i naãnecŭãx i duŭxŭgŭ. Natŭrŭ i pema rŭ tá choxŭ pedaugŭ. Rŭ tá pemaxè, erŭ choma rŭ chamaxŭ. ²⁰ —Rŭ ngẽxguma yuwa ícharŭdaxgu rŭ wena chamaŭxgu, rŭ ngẽxguma tá nŭxŭ picuèxãchitanŭ na choma rŭ Chaunatŭwa chamaxŭxŭ rŭ pema i chowa rŭ choma i pewa. ²¹ —Yíxema texé ya nŭxŭ cuáxe rŭ naga ínŭxè i chorŭ mugŭ, rŭ tanangŭxè na aixcŭma choxŭ tangechaŭxŭ. Rŭ Chaunatŭ tá tŭxŭ nangechaŭ ya yíxema choxŭ ngechaŭxè, rŭ choma rŭ tá ta tŭxŭ changechaŭ. Rŭ tŭxŭ tá chaugŭ chawèx —ñanagŭrŭ ga Ngechuchu. ²² Rŭ nayexma ga to ga Ngechucharŭ ngúexŭ ga Yudagu ãegaxŭ ta. Rŭ yema rŭ ñanagŭrŭ: —Pa Corix, ¿tŭxcŭŭ toxŭ cugŭ cuwèx, rŭ tama ñoma i naãnecŭãx i duŭxŭgŭxŭ cugŭ cuwèx? —ñanagŭrŭ. ²³ Rŭ Ngechuchu nanangãxŭ, rŭ ñanagŭrŭ: —Yíxema choxŭ ngechaŭxè rŭ naga taxĩnŭ i ngẽma ore i tŭmamaã nŭxŭ chixuxŭ. Rŭ Chaunatŭ tá tŭxŭ nangechaŭ. Rŭ choma rŭ Chaunatŭmaã wŭxigu tŭmaxŭtawa tá tangẽxmagŭ. ²⁴ —Yíxema tama choxŭ ngechaŭxè rŭ tama naga taxĩnŭ i ngẽma chorŭ ore. Rŭ ngẽma ore i chauxŭtawa nŭxŭ pexĩnŭexŭ rŭ tama chorŭ ore nixĩ, natŭrŭ guma Chaunatŭ ga núma choxŭ mucŭarŭ ore nixĩ. ²⁵ —Ñoma rŭ ta petanŭwa changẽxma rŭ pemaã nŭxŭ chixu i guxŭma i ngẽma ore i peçcèx choxŭ ngẽxmaxŭ. ²⁶ —Natŭrŭ Chaunatŭ rŭ tá chauégagu núma nanamu i Naãe i Üünexŭ na pexŭ nangŭxẽẽxŭcèx. Rŭ núma i Naãe i Üünexŭ tá pexŭ nangúexèe i guxŭma, rŭ tá nŭxna pexŭ nacuèxãchixèe i guxŭma i ore ga pemaã nŭxŭ chixuxŭ. ²⁷ —Rŭ ñuxma na pexna íchixŭxŭ, rŭ pexna chanaxã i taãe. Natŭrŭ ngẽma taãe i pexna chaxãxŭ, rŭ tama ñoma i naãnecŭãx pexna ãxŭ i taãerŭŭ nixĩ. Rŭ tama chanaxwèxe i penaxixãchiãegŭ rŭ pemuŭe. ²⁸ —Marŭ pemaã

nüxŭ chixu na pexna tá íchixŭxŭ rŭ wena táxarŭ pexcèx chataeguxŭ na pemaã changèxmaxŭcèx. Rŭ choxŭ pexĩnüë ga yexguma yema ñachaxgu. Rŭ ngèxguma aixcŭma choxŭ pengechaŭgu rŭ tá petaãègŭ ega nüxŭ pecuèxgu na Chaunatŭcèx chataeguxŭ, erŭ Chaunatŭ rŭ chorŭ yexera nixĩ. ²⁹—Rŭ naxŭpa na nangupetŭxŭ i ngèma, rŭ pemaã nüxŭ chixu na choxŭ peyaxŭgŭxŭcèx i ngèxguma nangupetŭgu. ³⁰—Marŭ tãütáma poraãcŭ pemaã chidexa, erŭ marŭ ínangu i Chataná i ñoma i naãneãrŭ ãèxgacŭ ixĩxŭ. Natŭrŭ nüma rŭ taxuwama choxŭ narŭyexera. ³¹—Natŭrŭ ngèma tá choxŭ ngupetŭxŭ, rŭ ngèmaãcŭ tá nixĩ na guxŭma i ñoma i naãnecŭãx i duŭxŭgŭ nüxŭ nacuáxŭcèx na choma rŭ Chaunatŭxŭ na changechaŭxŭ, rŭ chanaxŭxŭ i ngèma nüma choxŭ namuxŭ. ¡Rŭ ipechigŭ, rŭ ngĩxã ítixĩ! —ñanagŭrŭ ga Ngechuchu.

15

Ubanegu nügŭ nangu ga Ngechuchu

¹ Rŭ ñanagŭrŭ ga Ngechuchu: —Choma nixĩ i ñoma wŭxi i ubanerŭŭ chiŭxŭ rŭ Chaunatŭ nixĩ ya norŭ yora ixĩcŭ i ngèma uba. ²—Rŭ chorŭ duŭxŭgŭ rŭ ngèma ubachacŭgŭrŭŭ nixĩgŭ. Rŭ ngèma ubachacŭŭ i tama oxŭ, rŭ norŭ yora rŭ nayadae. Natŭrŭ ngèma nachacŭŭ i oxŭ, rŭ meã nanamexèetanŭ na yexeraãcŭ poraãcŭ naxoxŭcèx. ³—Pema rŭ marŭ pime, yerŭ naga pexĩnüë ga yema ore ga pexŭ changŭexèèxŭ. ⁴—Rŭ name nixĩ i guxŭguma chowa peyaxŭxgŭ, ngèma na choma rŭ pewa chayaxŭxŭrŭŭ. Erŭ wŭxi i ubachacŭŭ rŭ tama nüxĩca naxo, ega tama nanewa yaxŭxgux. Rŭ ngèxgumarŭŭ ta i pema rŭ taxuacŭma chauxcèx pemaxè, ega tama chowa peyaxŭxgŭechagu. ⁵—Choma nixĩ i ubane, rŭ pema i nachacŭgŭ. Rŭ yíxema chowa yaxŭèchaxe rŭ choma i tŭmawa, rŭ aixcŭma tá chauxcèx tamaxŭ. Rŭ ngèmaãcŭ wŭxi i ubachacŭŭ i oxŭrŭŭ tá tixĩ. Natŭrŭ ngèxguma tama chowa peyaxŭxgŭechagu, rŭ taxucŭrŭwama ŭacŭ pexŭe. ⁶—Rŭ texé ya tama chowa yaxŭèchaxe rŭ tá ítatèxŭchi. Rŭ wŭxi i ubachacŭŭ i daexŭ rŭ ipaxŭ rŭ iguxŭrŭŭ tá tixĩ, rŭ ngèxma tá tayarŭxo. ⁷—Rŭ ngèxguma chowa peyaxŭxgŭechagu rŭ taguma nüxŭ ipeyarŭngŭmaègu i ngèma ore i pexŭ changŭexèèxŭ, rŭ marŭ name i naxcèx ípeca i ŭacŭ i penaxwèxexŭ, rŭ choma rŭ tá pexna chanaxã. ⁸—Rŭ ngèxguma aixcŭma meã chauxcèx pemaxègu, rŭ Chaunatŭxŭ tá nicuèxŭgŭ i duŭxŭgŭ. Rŭ ngèmaãcŭ aixcŭma chorŭ ngŭexŭgŭ tá pixĩgŭ. ⁹—Choma rŭ pexŭ changechaŭ ngèma na Chaunatŭ choxŭ ngechaŭxŭrŭŭ. Rŭ chanaxwèxe i aixcŭma meã chauga pexĩnüëècha, erŭ choma rŭ guxŭguma pexŭ changechaŭ. ¹⁰—Choma rŭ naga chaxĩnŭ i Chaunatŭarŭ mugŭ rŭ nüma rŭ guxŭguma choxŭ nangechaŭ. Rŭ ngèxgumarŭŭ tá ta nixĩ ega naga pexĩnüëgu i chorŭ mugŭ, rŭ guxŭgutáma pexŭ changechaŭècha. ¹¹—Choma rŭ ngèmaãcŭ pemaã nüxŭ chixu na wŭxigu chomaã petaãègŭxŭcèx. Rŭ ngèmaãcŭ tá aixcŭma petaãègŭ. ¹²—Rŭ choma pexŭ chamu na pemŭcŭgŭxŭ pengechaŭgŭxŭcèx, ngèma choma na pexŭ changechaŭxŭrŭŭ. ¹³—Rŭ ngèxguma wŭxie aixcŭma tŭmamŭcŭxŭ ngechaŭgu, rŭ nüxŭ tangechaŭãma rŭ nüetama ega woo tŭmamŭcŭcèx tayuxgu. Rŭ nataxuma i to i ngechaŭ i ngèmaãrŭ yexera. ¹⁴—Pema rŭ chomŭcŭgŭ pixĩgŭ i ngèxguma chauga pexĩnüëgu. ¹⁵—Choma rŭ marŭ tama chorŭ duŭxŭgŭmareãcŭ pexŭ chaxu. Erŭ wŭxi i coriarŭ duŭxŭmare rŭ tama nüxŭ nacuèx i ngèma norŭ cori ŭxŭ. Natŭrŭ ñuxma rŭ chomŭcŭgŭmaã pexŭ chaxu, erŭ pexŭ nüxŭ chacuèxèè i guxŭma i ore ga Chaunatŭ chomaã nüxŭ ixuxŭ. ¹⁶—Pema rŭ tama pexira chauxcèx pedaugŭ, natŭrŭ chaxira nixĩ ga pexcèx chadauxŭ rŭ pexŭ chamuxŭ na aixcŭma chauxcèx pemaxèxŭcèx rŭ chauxŭtawa penagagŭxŭcèx i muxŭma i duŭxŭgŭ na guxŭguma choxŭ

yaxögüãxücèx. Rü Chaunatü ya Tupana tá pexna nanaxã i guxüma i tacü i chauégagu nüxna naxcèx pecaxü. ¹⁷—Rü ngẽma nixĩ i pexü chamuxü na pemücügüxü pengechaügüxücèx.

Ñoma i naãnecüãx i duüxügü rü Ngechuchuchi rü norü ngüexügüchi naxaie

¹⁸—Ngëxguma ñoma i naãnecüãx i duüxügü pexchi aiegu, rü jñuxna pecuèxãchie ga chaxira chauxchi na naxaieü! ¹⁹—Rü ngëxguma chi ñoma i naãnecüãx i duüxügürüü pixīgügu, rü ñoma i naãnecüãx i duüxügü rü chi pexü nangechaügü ngẽma natanüxügüxü na nangechaügüxürüü. Natürü choma nixĩ ga pexcèx chadauxü natanüwa ga ñoma ga naãnecüãx ga duüxügü. Rü ngẽmacèx nixĩ i pexchi naxaieü, erü marü tama naxrüü pixīgü. ²⁰—jNüxna pecuèxãchie ga pemaã ñachagu:

“Taxuxüma i wüxi i coriarü duüxü rü norü coriétüwa nügü nangexmaxëë”, ñachagu! Rü yema na chauxchi na naxaieü, rü pexchi rü tá ta naxaie. Rü yexguma chi chauga naxĩnüëgu rü ñuxma rü chi ta pega naxĩnüë. ²¹—Rü ngẽmaãcü ta chaugagu pexchi naxaie i ñoma i naãnecüãx i duüxügü erü tama nüxü nacuèxgü ya Chaunatü ga núma choxü mucü. ²²—Rü ngëxguma chi choma tama namaã chanangoxëëgu na ñuxãcü chixri na namaxëxü, rü tãü chima nüxü nacuèxgü ga pecadu na naxügüxü. Natürü ñuxma namaã nüxü na chixuxü na ñuxãcü chixri namaxëxü, rü ngẽmacèx i ñuxma rü taxuacüma nüxü nixugü na yangearü pecaduãxü. ²³—Rü guxüma i duüxügü i chauxchi aieü rü Chaunatüchi rü ta naxaie. ²⁴—Rü ngẽma duüxügüpëxewa rü Tupanaärü poramaã chanaxü i mexügü i taxü i taguma texé ya togue üxü. Rü ngëxguma chi tama napëxewa chanaxüxgu i ngẽma mexügü rü tãü chima Tupana namaã nanaxuegu na nagagutama yapecaduãxgüxü. Natürü na woo marü nüxü nadaugüxü i ngẽma mexügü i taxü i Tupanaärü poramaã chaxüxü, rü ngëxguma rü ta chauxchi naxaieama rü Chaunatüchi rü ta naxaie. ²⁵—Natürü ngẽmaãcü nangupetü erü Tupana nayanguxëëchaü i norü ore i ümatüxü i ñaxü:

“Chauxchi naxaie woo taxuüma i chixexü chaxüxgu”, ñaxü. ²⁶—Natürü choma rü tá Chaunatüégagu pexcèx núma chanamu i perü ngüxëëruü i Tupanaãë i Üünexü i tá pexü nüxü cuèxëëxü i ore i aixcüma ixĩxü. Rü nüma tá nixĩ i meãma pemaã nüxü yaxuxü i chauchiga. ²⁷—Rü pema rü tá ta chauchigaxü pixugüë, yerü noxri ichanaxügügu ga duüxügümaã nüxü na chixuxü ga chorü ore, rü woetama marü chauxütawa peyexmagü—ñanagürü ga Ngechuchu.

16

¹ Rü Ngechuchu rü ñanagürü nüxü: —Rü pemaã nüxü chixu i ñaã ore na tama nüxü na perüxoexücèx na choxü peyaxögüxü. ²—Rü ngutaquëxepataügüwa tá pexü ínawoxü. Rü aixcüma tá nawa nangu na texé pexü deixü rü tá nagu tarüxĩnuxü na ngẽmaãcü mexü Tupanacèx taxüxü. ³—Rü ngẽmaãcü tá pemaã namaxë i duüxügü, erü taguma nüxü nacuèxgü ya Chaunatü, rü choxü rü ta tama nacuèxgü. ⁴—Rü pemaã nüxü chixu i ñaã ore i ñuxmax, na nüxna pecuèxãchieüxücèx i ngëxguma yixcüra ngẽmaãcü pexü nangupetügu.

Tupanaãë i Üünexüärü puracüchiga

—Noxri rü tama pemaã nüxü chixu i ñaã ore, yerü petanügu charüxãüx. ⁵—Natürü i ñuxma rü tá pexna íchixü na Chaunatü ga núma choxü mucüxütawa na changëxmaxücèx. Rü pema rü taxüema choxna peca na ngextá tá na chaxüxü. ⁶—Natürü poraãcü pengechaügüama erü pemaã nüxü chixu i

ngēma ore. ⁷ —Natürü aixcūma pemaã nüxũ chixu rü pexcèx narümemaẽ nixĩ na Chaunatuçèx chataeguxũ. Rü ngēxguma chi tama Chaunatũxũtawa chaxũxgu rü tãũ chima núma naxũ i Naãẽ i Üünexũ i pexũ rüngũxẽxũ. Natürü ngēxguma ngēma chaxũxgu rü choma tá núma chanamu i Naãẽ i Üünexũ. ⁸ —Rü ngēxguma Naãẽ i Üünexũ núma ũxgu rü tá guxũ i duũxũgũxũ nüxũ nacuèxẽẽ na yapecaduãxgũxũ. Rü tá nanangoxẽẽ i ñuxãcü na yĩxũ i ngēma maxũ i Tupanapēxewa aixcūma mexũ. Rü tá duũxũgũxũ nüxũ nacuèxẽẽ na Tupana tá napoxcuexũ i duũxũgũ naxcèx i norü pecadugũ. ⁹ —Rü nüma i Naãẽ i Üünexũ tá duũxũgũxũ nüxũ nacuèxẽẽ na pecaduãxgũxũ yĩxũ erü tama choxũ nayaxõgũ. ¹⁰ —Rü tá nanangúexẽẽ i ñuxãcü na yĩxũ i ngēma maxũ i Tupanapēxewa aixcūma mexũ, erü choma rü tá Chaunatũxũtawa chaxũ, rü pema rü tãũtãma marü choxũ pedaugũ. ¹¹ —Rü Naãẽ i Üünexũ tá duũxũgũxũ nüxũ nacuèxẽẽ na Tupana tá napoxcuexũ i duũxũgũ i chixexũ ügũxũ, erü Tupana rü namaã nanaxuegu na marü napoxcuãxũ i Chataná i ñoma i naãnemaã icuáxũ. ¹² —Choma rü choxũ nangēxma i muxũma i to i ore i pemaã nüxũ chixuxchaũchiréxũ. Natürü ega ñuxma chi pemaã nüxũ chixuxgu rü tãũ chima nüxũ pecuèxgũ. ¹³ —Rü Tupanaãẽ i Üünexũ rü nüxũ nixu i ore i aixcūma ixĩxũicatama. Rü ngēxguma núma naxũxgu rü nüma tá pexũ nangúexẽẽ i guxũma i ore i aixcūma ixĩxũ. Erü nüma rü tama nüèchama tá nidexa, natürü ngēma ore i Chaunatũxũtawa rü chauxũtawa nüxũ naxĩnüxũxũxica tátama nixu. Rü tá pexũ nüxũ nacuèxẽẽ i guxũma i tacü i yixcũra tá ngupetũxũ. ¹⁴ —Rü nüma rü tá choxũ nataxẽẽ, erü chauxũtawa tá nanayaxu i norü nguxẽẽtae, rü ñuxũchi tá pexũ nangúexẽẽ namaã i ngēma nguxẽẽtae. ¹⁵ —Guxũma i Chaunatũaxũ ngēxmaxũ rü choxrü ta nixĩ. Ngēmacèx pemaã nüxũ chixu rü Naãẽ i Üünexũ rü chauxũtawa tá nanayaxu i norü nguxẽẽtae, rü ñuxũchi pexũ tá namaã nangúexẽẽ. ¹⁶ —Rü paxa tãũtãma choxũ pedau. Natürü ngēmawena rü wena táxaru choxũ pedau erü Chaunatũxũtawa tá chaxũ —ñanagürü ga Ngechuchu.

Ngema guxchaxũgũ rü yixcũama rü tá taãẽxũ nananguxuchi

¹⁷ Rü yexguma ñuxre ga toma ga Ngechuchuarü ngúexũgũ rü togũna tacagũ, rü ñatarũgũgũ: —¿Tacũchiga nixĩ na ngēma ñaxũ:

“Rü paxa tãũtãma choxũ pedaugũ. Natürü ngēmawena rü wena táxaru choxũ pedaugũ”, ñaxũ? ¿Rü tacũchiga ta nixĩ na ñaxũ:

“Choma rü Chaunatũxũtawa tá chaxũ”, ñaxũ? ¹⁸ —¿Rü tacũchiga ta nixĩ na ñaxũ:

“Rü paxa tãũtãma choxũ pedaugũ”, ñaxũ? Rü yixema rü tama nüxũ tacuèxgüega na tacũchigaxũ tamaã yaxuxũ —ñatarũgũgũ. ¹⁹ Rü Ngechuchu rü nüxũ nacuèxama ga nüxna na tacagũchaũxũ ga tomãx. Rü yemacèx ñanagürü toxũ: —Choma rü marü pemaã nüxũ chixu rü paxa tãũtãma choxũ pedau, natürü ngēmawena rü wena táxaru choxũ pedau. ¿Rü ngēma dexacèxtama i pegũna pecagũxũ? ²⁰ —Rü aixcūma pemaã nüxũ chixu rü pema rü tá pexauxe, rü tá pengechaũgũ. Natürü ñoma i naãnecũãx i duũxũgũ rü tá nataãgũ. Natürü woo pema tá pengechaũgũ, rü ngēma perü ngechaũ rü tá taãẽxũ nananguxuchi. ²¹ —Ngēxguma wüxi i nge íraxacũchaũgu rü inaxixãchiãẽ, erü inguxneca. Natürü ngēxguma marü tabuxgu ya ngĩrũ õxchana, rü nüxũ iyarũngũma na ñuxãcü porãcü ngĩxũ na nanguxchiréxũ i noxrix, erü tümamaã itaãẽ ya ngĩrũ õxchana. ²² —Rü ngēxgumarũũ tá ta pexũ nangupetü i pemãx, erü ñuxma rü penaxixãchiãẽgũ. Natürü wena táxaru chataegu rü pexũ íchayadau. Rü ngēxguma rü tá pexũ nangēxma i wüxi i taãẽ i taxucürüwama texé pexna yaxuxũ. ²³ —Rü ngēxguma ínanguxgu tá i ngēma

ngunexũ na yanguxũ i ñaã pemaã nüxũ chixuxũ, rü taxucèxtáma tacüçèx choxna pecagü erü aixcüma Chaunatü tá nixĩ ya pexna naxãcü i guxũma i tacü i chauégagu nüxna naxcèx pecaxũ. ²⁴—Ñuxmarüta i pema rü taxuüçèxma chauégagu ípecagü. ¡Naxcèx ípeca rü tá penayaxu i ngêma naxcèx ípecaxũ! Rü ngêmaãcü rü tá aixcüma petaãgü.

Ngechuchu rü marü nüxũ narüyexera i guxũma i tacü i ñoma i naãnewa ngêxmaxũ

²⁵—Ñuxma rü cuèxruüggügu chayaxuãcüma pemaã nüxũ chixu i ore. Natürü nawa tá nangu i ngunexũ i marü täütáma ngêmaãcü pemaã nüxũ chixu. Rü ngêxguma rü tá noxtacüma meã pemaã chanangoxêẽ i Chaunatüchiga. ²⁶⁻²⁷—Rü ngêma ngunexügu i pema rü Chaunatüxütawa tá chauégagu naxcèx ípeca i tacü i penaxwèxexũ. Rü taxucèxma tüxcüũ choma tá Chaunatüxütawa pexũ naxcèx íchaca, erü nümatama ya Chaunatü rü woetama pexũ nangechaũ, erü pema rü choxũ pengechaũ rü peyaxögü na naxütawa ne chaxũxũ. ²⁸—Chaunatüxütawa ne chaxũ na ñoma ga naãnewa chaxũxüçèx. Rü ñuxma rü tá nüxna chataegu i ñoma i naãne na wenaxãrü Chaunatüxütawa chaxũxüçèx —ñanagürü. ²⁹ Rü yexguma ga toma ga norü ngúexüggü rü ñatarüggü: —Ñuxma waxi nixĩ i meãxüchima tomaã cunangoxêẽxũ i curü ore i tomaã nüxũ quixuxũ. Rü tama tacügu ixuxũãcüma tomaã nüxũ quixu. ³⁰—Rü ñuxma rü nüxũ tacuèx na aixcüma guxũxũma na cucuáxũ. Rü taxuacüma texé ñuxũ ñatagürü cuxũ. Rü ngêmacèx nixĩ i tayaxögüxũ na aixcüma Tupanaxütawa na ne cuxũxũ —ñatarüggü. ³¹ Rü Ngechuchu toxũ nangãxũ rü ñanagürü: —¿Aixcüma peyaxögüxũ i ñuxmax? ³²—Rü nawa tá nangu i ngunexũ rü ñuxmatátama nixĩ i na pegü pewoonexũ. Rü wüxichigü i pema rü tá pepatawa pexĩ, rü chaxica tá nuã choxũ petèx. Natürü tama chaxica tá icharüxãũx, erü Chaunatü rü chauxütawa nangêxma. ³³—Rü guxũma i ñaã ore rü pemaã nüxũ chixu na chaugagu petaãgüxüçèx. Rü ñoma i naãnewa rü tá ngúxũ pingè. Natürü ¡peporae! erü choma rü marü nüxũ charüyexera i guxũma i tacü i ñoma i naãnewa ngêxmaxũ —ñanagürü.

17

Ngechuchu rü norü ngúexüggüçèx nayumüxẽ

¹ Rü yema ñaxguwena rü Ngechuchu daxügu nadawenü, rü ñanagürü: —Pa Chaunatüx, marü nawa nangu i ngunexũ na chayuxũ. Rü chanaxwèxe na duüxüggüxũ nüxũ cucuèxêẽxũ na aixcüma choma rü cune chiĩxũ. Rü ngêmaãcü i choma rü tá nüxũ nüxũ chacuèxêẽ na cuma rü aixcüma Tupana na quiĩxũ. ²—Erü marü guxũ i duüxüggüarü ãëxgacüxũ choxũ quixĩxêẽ, na chanamaxêẽxüçèx i guxũma i duüxüggü i choxna cumugüxũ. ³—Rü ngêma duüxüggü tá nüxũ nangêxma i maxũ i taguma gúxũ ega cuxũ nacuèxgügu na cuxicatama Tupana na quiĩxũ, rü choxũ nacuèxgügu na choma rü Cristu ga núma choxũ cumucü na chiĩxũ. ⁴—Choma rü marü cuxũ chataxêẽ i ñoma i naãnewa rü chayanguxêẽ i guxũma i puracü ga nawa choxũ cumuxũ. ⁵—Rü ñuxma Pa Chaunatüx, rü chanaxwèxe i cugüxütawa choxũ cungêxmaxêẽ na choxũ nangêxmaxüçèx ga yematama pora ga cumaã choxũ yexmaxũ ga noxri tauta naãne üxgu. ⁶—Rü guxema duüxëgü ya tüxũ quidexechixe ga ñoma ga naãnewa na choxna tüxũ cumugüxüçèx, rü marü tüxũ nüxũ chacuèxêẽ i texé na quiĩxũ i cumax. Rü woetama cuxrügü tixügu rü cuma nixĩ ga choxna tüxũ cumugüxũ. Rü tümagü rü marü naga taxĩnüẽ i curü ore. ⁷—Rü ñuxma rü marü nüxũ tacuèx rü guxũma i ngêma choxna cuxãxũ, rü aixcüma cuxütawa ne naxũ. ⁸—Rü choma rü marü tümamaã nüxũ chixu ga curü ore ga chomaã nüxũ quixuxũ. Rü tümagü rü marü tayaxögü i

ngēma ore. Rū nūxŭ ticuèxāchitanū na aixcūma cuxŭtawa na ne chaxŭxŭ i chomax. Rū tayaxōgŭ ga cuma núma choxŭ na cumuxŭ. ⁹—Rū ngēmacèx cuxna chaca na tūxŭ na curūngŭxēxŭcèx. Rū tama cuxna chaca na nūxŭ curūngŭxēxŭcèx i ñoma i naānecŭāx i duŭxŭgŭ, natŭrŭ cuxna chaca na tūxŭ curūngŭxēxŭcèx ya guxema choxna tūxŭ cumugŭxe, erŭ curŭ duŭxŭgŭ tixŭgŭ. ¹⁰Rū guxāma ya yŭxema choxrŭgŭ ixŭgŭxe rŭ cuxrŭgŭ tixŭgŭ. Rū guxāma ya cuxrŭgŭ ixŭgŭxe rŭ choxrŭgŭ tixŭgŭ. Rū tŭmagagu rŭ duŭxŭgŭ choxŭ nicuèxŭgŭ. ¹¹—Choma rŭ marŭ tātŭtāma ñoma i naānewa changēxmaēcha, natŭrŭ i tŭmagŭ rŭ ngēmaācŭ ñoma i naānewa tá tangēxmagŭ ngēxguma cuxŭtawa chaxŭyane. Pa Chaunatŭ ya Ŭnecŭx, rŭ chanaxwèxe na curŭ pora ga choxna cuxāxŭmaā tŭxna cudauxŭ ya yŭxema choxna tūxŭ cumugŭxe, na ngēmaācŭ guxāma wŭxigu rŭxŭnŭxŭcèx, ngēma cuma rŭ choma na wŭxigu rŭxŭnŭxŭrŭŭ. ¹²—Rū yexguma guxema choxna tūxŭ cumugŭxetanŭwa chayexmagu ga ñoma ga naānewa, rŭ curŭ pora ga choxna cuxāxŭmaā tŭxna chadau rŭ tūxŭ íchapoxŭ. Rū taxŭema ga guxema choxna tūxŭ cumugŭxe rŭ itayarŭtauxe. Rū Yuda ga woetama iyarŭtaxuxŭxicatama inayarŭtaxu na yanguxŭcèx i curŭ ore i ũmatŭxŭ. ¹³—Rū ñŭxma rŭ cuxŭtawa tá chaxŭ. Natŭrŭ ñomarŭta ñoma i naānewa changēxma-yane rŭ nūxŭ chixu i ñaā curŭ ore na tŭmagŭ rŭ ta tūxŭ nangēxmaxŭcèx i ngēma taāē i aixcūma ixŭxŭ i choma choxŭ ngēxmaxŭ. ¹⁴—Choma rŭ marŭ tŭmamaā nūxŭ chixu i curŭ ore. Natŭrŭ ñoma i naānecŭāx i duŭxŭgŭ rŭ tŭmachi naxaie, erŭ tŭma rŭ tama naxrŭŭ tixŭgŭ, ngēxgumarŭŭ i choma rŭ tama ñoma i naānecŭāxrŭŭ chixŭ. ¹⁵—Tama cuxna tŭmacèx chaca na tūxŭ na quigagŭxŭcèx i ñoma i naānewa. Natŭrŭ cuxna chaca na tūxŭ na ícupoxŭxŭcèx nŭxna i ngoxo i Chataná. ¹⁶—Choma rŭ tama ñoma i naānecŭāx chixŭ. Rū tŭmagŭ rŭ ta tama ñoma i naānecŭāx tixŭgŭ, erŭ cuxrŭgŭ tixŭgŭ i ñŭxmax. ¹⁷—Curŭ ore rŭ aixcūma nixŭ. Rū chanaxwèxe i tūxŭ cungŭxēē i curŭ ore, na aixcūma cupēxewa tixŭnŭxŭcèx ya yŭxema choxna tūxŭ cumugŭxe. ¹⁸—Rū yexgumarŭŭ ga ñoma ga naānecŭāx ga duŭxŭgŭtanŭwa choxŭ na cumuxŭrŭŭ, rŭ ngēxgumarŭŭ i choma rŭ ta ñoma i naānecŭāx i duŭxŭgŭ-tanŭwa tūxŭ chamugŭ. ¹⁹—Rū tŭmagagu chaugŭ ichaxā na tūxŭ changŭxēxŭcèx i curŭ ore i aixcūma ixŭxŭ, na cupēxewa tixŭnŭxŭcèx ya yŭxema choxna tūxŭ cumugŭxe. ²⁰—Natŭrŭ tama yŭxema ñŭxma yaxōgŭxecèxicatama cuxna chaca. Natŭrŭ cuxna chaca ta tŭmacèx ya yŭxema yixcŭra tá yaxōgŭxe nagagu i tŭmaārŭ ore ya yŭxema ñŭxma yaxōgŭxe. ²¹—Rū guxāma ya yŭxemacèx cuxna chaca na aixcūma wŭxitama tixŭgŭxŭcèx. Rū ngēma cuma rŭ choma na wŭxitama ixŭgŭxŭrŭŭ, Pa Chaunatŭx, rŭ chanaxwèxe i guxāma i tŭma rŭ ta wŭxitama tixŭgŭ. Rū ngēmaācŭ i ñoma i naānecŭāx i duŭxŭgŭ, rŭ tá nayaxōgŭ na cuma núma choxŭ cumuxŭ. ²²—Rū choma rŭ marŭ tŭxna chanaxā i ngēmatama pora i cuma choxna cuxāxŭ na ngēmaācŭ wŭxitama tixŭgŭxŭcèx ngēma cuma rŭ choma na wŭxitama ixŭgŭxŭrŭŭ. ²³—Rū chanaxwèxe na tŭmawa changēxmaxŭ rŭ cuma i chowa na cungēxmaxŭ na ngēmaācŭ aixcūma wŭxi-tama ixŭgŭxŭ i guxāma i yixema. Rū ngēmaācŭ i ñoma i naānecŭāx i duŭxŭgŭ rŭ tá nūxŭ nicuèxāchitanū na cuma núma choxŭ cumuxŭ, rŭ tá nūxŭ nicuèxāchitanū na tūxŭ cungechaŭxŭ ya yŭxema choxna tūxŭ cumugŭxe ngēma na choxŭ cungechaŭxŭrŭŭ. ²⁴—Pa Chaunatŭx, cuma choxna tūxŭ cumugŭ. Rū chanaxwèxe i chauxŭtawa tangēxmagŭ i ngēma tá íchangēxmaxŭwa, na nūxŭ tadaugŭxŭcèx i chorŭ pora ga choxna cuxāxŭ. Yerŭ choxŭ cungechaŭ ga yexguma tauta naāne ixŭgŭgumama. ²⁵—Pa Chaunatŭ ya Mecŭx, ñoma i naānecŭāx i duŭxŭgŭ rŭ tama cuxŭ nacuèxgŭ. Natŭrŭ choma rŭ cuxŭ chacuèx. Rū yŭxema choxna tūxŭ cumugŭxe rŭ ta marŭ nūxŭ tacuèxgŭ na cuma núma choxŭ cumuxŭ.

26 —Rü marü tüxŭ nüxŭ chacuèxêê na texé quiixŭ. Rü guxŭgutáma tüxŭ nüxŭ chicuèxêêãmachigü na cuma choxŭ cungechaŭxŭrüü tügü tangechaŭgŭxŭcèx rü choma rü tümaxŭtawa na changêxmaxŭcèx —ñanagŭrü ga Ngechuchu.

18

Ngechuchuxŭ niyauxgü

(Mt 26.47-56; Mr 14.43-50; Lc 22.47-53)

¹ Rü yema ñaxguwena ga Ngechuchu rü tomaã inaxŭãchi, na Cheduruarü ngatexŭärü tocutüwa taxŭcèx. Rü yéma nayexma ga wüxi ga nanetüncü. Rü yemawa naxŭ ga Ngechuchu tomaã. ² Rü Yuda ga yema bexma cúãcü Ngechuchuxŭ iyaxuaxŭxŭ rü nüxŭ nacuèx ga yema nachica, yerü Ngechuchu rü muèxpŭxcüna yéma tomaã nangutaquèxexŭ. ³ Rü yéma nangu ga Yuda namaã ga ñuxre ga churaragü rü ñuxre ga tupauca ga taxŭneärü purichíagü ga yéma namugŭxŭ ga paigŭarü àèxgacŭgü rü parichéugü. Rü meãma nixãxne, rü yéma nanangegü ga omügü. ⁴ Natürü ga Ngechuchu rü marü nüxŭ nacuèx ga guxŭma ga tacü tá nüxŭ na ngupetŭxŭ. Rü yemacèx naxcèx nixŭ, rü nüxna naca, rü ñanagŭrü: —¿Texécèx nixŭ i pedaugŭxŭ? —ñanagŭrü. ⁵ Rü nümagü rü Ngechuchuxŭ nangãxŭgü, rü ñanagŭ-rügü: —Nacharétucŭãx i Ngechuchucèx nixŭ i tadaugŭxŭ —ñanagŭrügü. Rü Ngechuchu nanangãxŭ, rü ñanagŭrü: —Choma chixŭ —ñanagŭrü. Rü Yuda ga bexma cúãcü ínaxuaxŭxŭ rü yema churaragŭtanüwa nayexma. ⁶ Rü yexguma yema ñaxgu ga Ngechuchu: “Choma chixŭ”, ñaxgu, rü nügüweama nacaixŭtanü ga yema churaragü, rü yexma nayayi. ⁷ Rü yexguma ga Ngechuchu rü wena nüxna naca, rü ñanagŭrü: —¿Texécèx nixŭ i pedaugŭxŭ? —ñanagŭrü. Rü nümagü rü nanangãxŭgü rü ñanagŭrügü: —Nacharétucŭãx i Ngechuchucèx nixŭ i tadaugŭxŭ —ñanagŭrügü. ⁸ Rü Ngechuchu rü wenaxärü ñanagŭrü nüxŭ: —Marü pemaã nüxŭ chixu rü choma chixŭ. Rü ngèxguma chauxcèx pedaugŭgu rü ¡ipeyaxŭxêê i ñaã chorü ngúexŭgü! —ñanagŭrü. ⁹ Rü yemaãcü nangupetü na yanguxŭcèx ga norü ore ga nümatama ga Ngechuchu nüxŭ yaxuxŭ ga ñaxgu:

“Yíxema Chaunatü choxna tüxŭ mugŭxe rü taxúetáma itayarütaxe”, ñaxgu.

¹⁰ Rü Chimáü ga Pedru rü nüxŭ iyexma ga wüxi ga cŭxchi. Rü ngŭxŭ nayaxu ga norü cŭxchi rü yemamaã ínanadaechinü ga paigŭarü àèxgacŭarü duŭxŭ ga Macugu àegaxŭ. Rü norü tügünechinü ínadae. ¹¹ Natürü ga Ngechuchu rü Pedruxŭ ñanagŭrü: —¡Ngŭxchixŭgu ngŭxŭ ixŭcuchi i curü cŭxchi! ¿Tama èxna nüxŭ cucuèx na choma rü tá ngúxŭ chingexŭ ngèma Chaunatü chomaã naxueguxŭrüü? —ñanagŭrü.

Anápatawa Ngechuchuxŭ nagagü

(Mt 26.57-58; Mr 14.53-54; Lc 22.54)

¹² Rü yexguma ga churaragŭarü àèxgacü, namaã ga norü churaragü rü tupaucaarü purichíagü, rü Ngechuchuxŭ niyauxgü. Rü nayanèixchacüügü. ¹³ Rü noxri rü àèxgacü ga Anápatawa nanagagü. Rü Aná rü Caipánèxtü nixŭ. Rü guma tauncügu ga Caipá rü paigŭeru nixŭ. ¹⁴ Rü yema Caipá nixŭ ga ũpaacü yema Yudiugŭarü àèxgacŭgümaã nüxŭ ixuxŭ ga na namemaèxŭ ga wüxitama ga yatü guxŭma ga Yudiugŭcèx na yuxŭ.

Pedru rü Ngechuchuxŭ nixã

(Mt 26.69-70; Mr 14.66-68; Lc 22.55-57)

¹⁵ Rü choma rü Chimáü ga Pedru rü wüxigu Ngechuchuwe tarŭxŭ. Rü yema paigŭarü àèxgacü rü choxŭ nacuèx. Rü yemacèx ga choma rü wüxigu Ngechuchumaã tichocu ga àèxgacŭpataèxtüwa. ¹⁶ Natürü ga Pedru rü ñaxärü düxétügutama narŭxãŭx. Rü yemacèx íchaxŭxŭ ga choma, rü yema ñaxärü

dauruŦ ga ngecŦmaã chayarŦdexa rŦ yexguma PedruxŦ iyamucuchi. ¹⁷ RŦ yexguma ga yema ngecŦ ga ĩãxãrŦ dauruŦ, rŦ Pedruna ica, rŦ ngĭgŦrŦgŦ: –¿Tama ěxna cuma rŦ ta wŦxi i norŦ ngŦexŦ quiŦxŦ i ngĕma yatŦ i yayauxgŦxŦ? –ngĭgŦrŦgŦ. RŦ Pedru ngĭxŦ nangãxŦ, rŦ ñanagŦrŦ: –Tama nixĭ –ñanagŦrŦ. ¹⁸ RŦ yema ĩãxtŦwa rŦ ãĕxgacŦarŦ duŦxŦgŦ rŦ purichĭagŦ rŦ nanaxŦgŦ ga wŦxi ga ũxŦ, yerŦ nagáuane. RŦ guma ũxŦxetŦarŦ ngaicamagu nachigŦ, rŦ yema nŦgŦ ninaŦxŦgŦ. RŦ Pedru rŦ ta yema nŦgŦ nanaŦxŦ naxĕtŦwa ga guma ũxŦ.

*PaigŦarŦ ãĕxgacŦ rŦ Ngechuchuna naca
(Mt 26.59-66; Mr 14.55-64; Lc 22.66-71)*

¹⁹ RŦ yema paigŦarŦ ãĕxgacŦ rŦ inanaxŦgŦ ga Ngechuchuna na naçaxŦ, rŦ ñanagŦrŦ: –¿TacŦ nixĭ ga duŦxŦgŦxŦ namaã cungŦexĕxŦ? ¿RŦ texĕgŦ tixĭ ya yĭxema curŦ ngŦexŦgŦ? –ñanagŦrŦ. ²⁰ RŦ Ngechuchu ñanagŦrŦ nŦxŦ: –Choma rŦ guxŦ ga duŦxŦgŦpĕxewa nŦxŦ chixu ga chorŦ ore. RŦ ngutaquĕxepataŦgŦwa rŦ tupauca ya taxŦnewa i ngextá guxŦma i YudĭgŦ ĩngutaquĕxegŦxŦwa chanangŦexĕ ga duŦxŦgŦ. RŦ yemaãcŦ taxuŦma ichicux ga chorŦ ore. ²¹ –¿RŦ tŦxcŦŦ i choxna cuçaxŦ i ñuxmax? ĖcŦ, ĩnŦxna naca i ngĕma duŦxŦgŦ ga nŦxŦ ĩnŦxŦ ga chorŦ ore! RŦ nŦmagŦ tá cumaã nŦxŦ nixugŦe ga tacŦchigaxŦ namaã na chixuxŦ. ErŦ nŦmagŦ rŦ nŦxŦ nacuĕxgŦ i guxŦma ga tacŦ ga namaã nŦxŦ chixuxŦ –ñanagŦrŦ. ²² RŦ yexguma Ngechuchu yema ñaxgu, rŦ wŦxi ga tupauca ga taxŦneãrŦ purichĭa ga naxŦtagu chixŦ, rŦ Ngechuchuchiwegu nidagŦ. RŦ ñanagŦrŦ NgechuchuxŦ: –¿TŦxcŦŦ ngĕmaãcŦ cunangãxŦ ya daa paigŦarŦ ãĕxgacŦ? –ñanagŦrŦ. ²³ RŦ Ngechuchu nanangãxŦ rŦ ñanagŦrŦ: –RŦ ngĕxguma tacŦ rŦ chixexŦxŦ chixuxgu, ĩrŦ nŦxŦ ixu na ñuxãcŦ chixri na chidexaxŦ! NatŦrŦ ega chorŦ ore rŦ aixcŦma yĭxĭgu, rŦ ¿tŦxcŦŦ i choxŦ quidagŦxŦ i ñuxmax? –ñanagŦrŦ. ²⁴ RŦ yexguma ga Aná rŦ NgechuchuxŦ yanáĭãcŦma paigŦarŦ ãĕxgacŦ ga CaipáxŦtawa nanamu.

*Pedru rŦ wenaxãrŦ tama NgechuchuxŦ nacuĕxnetaxŦ
(Mt 26.71-75; Mr 14.69-72; Lc 22.58-62)*

²⁵ RŦ yoxni ga Pedru rŦ ũxŦarŦ ngaicamagu nachiecha, rŦ yema nŦgŦ nanaŦxŦãma. RŦ yema yema yexmagŦxŦ rŦ nŦxna nacagŦe, rŦ ñanagŦrŦgŦ: –¿Tama ěxna cuma rŦ ta norŦ ngŦexŦ quiŦxŦ i ngĕma yatŦ i yayauxgŦxŦ? –ñanagŦrŦgŦ. NatŦrŦ ga Pedru rŦ tama nŦgŦ nixu, rŦ ñanagŦrŦ: –Tama nixĭ –ñanagŦrŦ. ²⁶ RŦ yema nayexma ga wŦxi ga paigŦarŦ ãĕxgacŦarŦ duŦxŦ. RŦ yema rŦ Pedru ĩdaechinŦxŦtanŦxŦ nixĭ. RŦ Pedruna naca, rŦ ñanagŦrŦ: –¿Tama ěxna cuma yĭxŦ ga nanetŦnecŦwa Ngechuchumaã cuxŦ chadauxŦ? –ñanagŦrŦ. ²⁷ RŦ Pedru rŦ wena tama nŦgŦ nixu. RŦ yexgumatama nica ga otá.

*Ngechuchu rŦ Piratu-pĕxewa nayexma
(Mt 27.1-2, 11-14; Mr 15.1-5; Lc 23.1-5)*

²⁸ RŦ yexguma Ngechuchumaã nŦxŦ nachauegu ga nŦxna na nacagŦxŦ, rŦ Caipápatawa ĩnanagaxŦchigŦ rŦ YudĕaaneãrŦ ãĕxgacŦ ga DumacŦãxpatawa nanagagŦ. NatŦrŦ marŦ ningóonechaŦ ga yexguma rŦ yemacĕx ga yema YudĭgŦ rŦ tama guma ãĕxgacŦpatagu nachocu, yerŦ norŦ mugŦ nŦxŦ nixu rŦ taxŦ ga pecadu nixĭ na wŦxi ga DumacŦãxpatagu na nachocuxŦ ga yema ngunexŦgu. RŦ yemaãcŦ tama Tupanapĕxewa nŦgŦ nixŦxaarŦ maxŦãxĕĕgŦchaŦ, yerŦ yexguma nŦgŦ yaxŦxaarŦ maxŦãxĕĕgŦgu, rŦ taxucŦrŦwa nanangŦxgŦ ga ōna ga ŨpetŦchigarŦ petacĕx namexĕxŦ. ²⁹ RŦ yemacĕx ga guma ãĕxgacŦ ga DumacŦãx ga Piratu rŦ napatawa ĩnaxŦxŦ ga

duŭxŭgŭmaã na yadexaxŭcèx. Rŭ ñanagŭrŭ nŭxŭ: —¿Tacŭcèx ípenaxuaxŭ ya daa yatŭ? —ñanagŭrŭ. ³⁰ Rŭ nŭmagŭ rŭ Piratuxŭ nangãxŭgŭ, rŭ ñanagŭrŭgŭ: —Ngëxguma chi tama wŭxi i taxŭ i chixexŭ naxŭxgu, rŭ tãu chima cuxŭtawa tanaga —ñanagŭrŭgŭ. ³¹ Rŭ yexguma ga Piratu rŭ ñanagŭrŭ nŭxŭ: —¿Ëcŭ perŭ ãëxgacŭgŭxŭtawa penaga, rŭ perŭ mugŭ pemaã nŭxŭ ixuxŭãcŭma penapoxcux! —ñanagŭrŭ. Natŭrŭ ga yema Yudíugŭ rŭ Piratuxŭ nangãxŭgŭ, rŭ ñanagŭrŭgŭ: —Natŭrŭ pema i Dumacŭãxgŭ rŭ marŭ toxna penachuxu na texéxŭ timèxgŭxŭ tŭmaãrŭ chixexŭcèx —ñanagŭrŭgŭ. ³² Rŭ yemaãcŭ ningu ga yema ore ga Ngechuchu ũpaacŭ nŭxŭ ixuxŭ ga ñuxãcŭ tá na nayuxŭ. ³³ Rŭ Piratu rŭ wenaxãrŭ napatagu naxŭcu, rŭ Ngechuchucèx nangema. Rŭ nŭxna naca, rŭ ñanagŭrŭ: —¿Cuma yíxŭ i Yudíugŭarŭ Æëxgacŭ quiŭxŭ? —ñanagŭrŭ. ³⁴ Rŭ Ngechuchu ñanagŭrŭ nŭxŭ: —¿Cuechamatama i nagu curŭxŭnŭxŭ na ngëmaãcŭ choxna cuçaxŭ, rŭ ëxna togŭ marŭ cumaã nŭxŭ nixu na ngëmaãcŭ choxna cuçaxŭcèx? —ñanagŭrŭ. ³⁵ Rŭ Piratu Ngechuchuxŭ nangãxŭ, rŭ ñanagŭrŭ: —¿Ëxna cuma nagu curŭxŭnŭgu rŭ Yudíu chiŭxŭ? Rŭ ngëma cuchiŭãnecŭãxgŭ rŭ paigŭarŭ ãëxgacŭgŭtama nixŭ i chauxŭtawa cuxŭ gagŭxŭ. ¿Ëxna tacŭ rŭ chixexŭ cuxŭ? —ñanagŭrŭ. ³⁶ Rŭ yexguma ga Ngechuchu rŭ nanangãxŭ, rŭ ñanagŭrŭ: —Choma rŭ tama ñoma i naãnewa ãëxgacŭ chixŭ. Rŭ ngëxguma ñoma i naãnewa ãëxgacŭ chixŭgu, rŭ chorŭ duŭxŭgŭ rŭ chi Yudíugŭarŭ ãëxgacŭgŭmaã nŭgŭ nadai rŭ tãu chima choxŭ niyauxgŭ i ngëxguma. Natŭrŭ tama ñoma i naãnewa ãëxgacŭ chixŭ —ñanagŭrŭ. ³⁷ Rŭ yexguma ga Piratu rŭ ñanagŭrŭ nŭxŭ: —¿Ëxna to i nachíŭãneãrŭ ãëxgacŭ quixŭ i cumax? —ñanagŭrŭ. Rŭ Ngechuchu nanangãxŭ rŭ ñanagŭrŭ: —Cumatama marŭ nŭxŭ quixu na ãëxgacŭ chiŭxŭ. Rŭ yemacèx ga choma rŭ chabu rŭ ñoma ga naãnewa chaxŭ na duŭxŭgŭmaã nŭxŭ chayarŭxuxŭcèx i ore i aixcŭma ixŭxŭ. Rŭ guxãma ya texé ya nŭxŭ cuáxchaŭxë i ngëma ore i aixcŭma ixŭxŭ, rŭ choxŭ itarŭxŭnŭë i ngëma ore i nŭxŭ chixuxŭ —ñanagŭrŭ. ³⁸ Rŭ Piratu rŭ ñanagŭrŭ nŭxŭ: —¿Tacŭ nixŭ i ngëma ore i aixcŭma ixŭxŭ? —ñanagŭrŭ.

Ngechuchumaã nanaxuegu na yamèxgŭãxŭ
(Mt 27.15-31; Mr 15.6-20; Lc 23.13-25)

Rŭ yemaãcŭ Ngechuchuna nacaxguwena ga Piratu, rŭ wenaxãrŭ Yudíugŭmaã nayarŭdexa. Rŭ ñanagŭrŭ nŭxŭ: —Taxuŭma i chixexŭxŭ nawa chadau i ñaã yatŭ. ¿Rŭ tŭxcŭŭ chi inapoxcuxŭ? ³⁹ —Natŭrŭ guxŭguma ega Ũpetŭchigaarŭ petawa nanguxgu, rŭ pecŭma nixŭ na choxna naxcèx na peçaxŭ na íchananguxuchixëxŭcèx i wŭxi i duŭxŭ i poxcuxŭ. ¿Rŭ penaxwèxexŭ na pexcèx íchananguxuchixëxŭ i ñaã perŭ ãëxgacŭ, Pa Yudíugŭx? —ñanagŭrŭ. ⁴⁰ Rŭ yexguma ga guxŭma ga yema duŭxŭgŭ, rŭ tagaãcŭ aita naxŭe, rŭ ñanagŭrŭgŭ: —Tama tanaxwèxe na cuya-ngéxŭ i ngëma yatŭ. Rŭ Barabá waxi nixŭ i tanaxwèxexŭ na cuyangéxŭ —ñanagŭrŭgŭ. Rŭ yema Barabá rŭ wŭxi ga máetaxŭ nixŭ.

19

¹ Rŭ yexguma ga Piratu rŭ churaragŭxŭ namu na Ngechuchuxŭ naçuaixgŭxŭcèx. ² Rŭ yema churaragŭ rŭ chuchuxŭwa nanaxŭgŭ ga wŭxi ga boxŭ, rŭ ñuxŭchi naëruwa nayangèxcuchigŭ. Rŭ wŭxi ga máxŭ ga naxchiru ga daucharaxŭgu nayacuxëëgŭ. ³ Rŭ ñuxŭchi naxcèx naxŭ, rŭ nŭxŭ nacugŭeãcŭma ñanagŭrŭgŭ nŭxŭ: —¿Namaxŭ, Pa Yudíugŭarŭ Æëxgacŭx! —ñanagŭrŭgŭ. Rŭ nanapechiwegŭ. ⁴ Rŭ Piratu rŭ wenaxãrŭ dŭxétŭwa naxŭ, rŭ Yudíugŭxŭ ñanagŭrŭ: —¿Dŭcèx! ñuxma tá nuã pepèxewa chanaga na nŭxŭ pecuáxŭcèx na taxuŭma i chixexŭxŭ nawa chadauxŭ —ñanagŭrŭ.

⁵ RŦ dŦxétŦwa naxŦ ga Ngechuchu. RŦ namaã nangèxcueru ga yema boxŦ ga chuchuxŦwa naxŦgŦxŦ. RŦ nagu nicŦx ga yema máxŦ ga naxchiru ga dauxcharaxŦ. RŦ yex-guma ga Piratu rŦ YudíugŦxŦ ñanagŦrŦ: —Daa nixŦ ya yima yatŦ —ñanagŦrŦ. ⁶ NatŦrŦ yexguma NgechuchuxŦ nadaugŦgu ga paigŦarŦ ãèxgacŦgŦ rŦ purichíagŦ, rŦ inanaxŦgŦe ga aita na naxŦexŦ. RŦ ñanagŦrŦgŦ: —¡Curuchawa yapota! ¡Curuchawa yapota! —ñanagŦrŦgŦ. RŦ Piratu rŦ ñanagŦrŦ nŦxŦ: —¡ÈcŦ, peyaga rŦ pematama curuchawa peyapota! ErŦ choma rŦ taxuŦma i chixexŦxŦ nawa chadau —ñanagŦrŦ ga Piratu. ⁷ NatŦrŦ ga yema YudíugŦ rŦ PiratuxŦ nangãxŦgŦ, rŦ ñanagŦrŦgŦ: —Toma toxŦ nangèxma i wŦxi i torŦ mu. RŦ ngèma torŦ mu toxŦ nŦxŦ nacuèxèè na namexŦ na nayuxŦ i ñaã yatŦ, yerŦ nŦma rŦ nŦxŦ nixu ga Tupana Nane na yŦxŦ —ñanagŦrŦgŦ. ⁸ RŦ yexguma yemaxŦ naxŦnŦgu ga Piratu, rŦ yexeraãcŦ namuŦ. ⁹ RŦ wena Ngechuchumaã napatagu naxŦcu. RŦ yema Ngechuchuna nayaca, rŦ ñanagŦrŦ: —¿NgextácŦãx quixŦ i cumax? —ñanagŦrŦ. NatŦrŦ ga Ngechuchu rŦ tama nanangãxŦ. ¹⁰ RŦ yexguma ga Piratu rŦ NgechuchuxŦ ñanagŦrŦ: —¿Èxna ngèma tãŦtãma choxŦ cungãxŦ? ¿Tau èxna i nŦxŦ cucuãxŦ na choxmèxwa cungèxmaxŦ na curuchawa cuxŦ chipotaxŦ rŦ èxna cuxŦ na íchanguxuchixèèxŦcèx? —ñanagŦrŦ. ¹¹ RŦ Ngechuchu nanangãxŦ, rŦ ñanagŦrŦ: —TãŦ chima cuxmèxwa changèxma, ega tama Tupana naxwèxegu. RŦ ngèmacèx nixŦ i ngèma duŦxŦgŦ i cuxna choxŦ mugŦxŦ rŦ curŦ yexera poraãcŦ napecaduãxŦgŦ —ñanagŦrŦ. ¹² RŦ yemawena rŦ Piratu nagu narŦxŦnŦ ga ñuxãcŦ NgechuchuxŦ na ínanguxuchixèègaxŦ. NatŦrŦ yema YudíugŦ rŦ poraãcŦ aita naxŦe, rŦ ñanagŦrŦgŦ: —Ngèxguma tá ícunanguxuchixèèxgu rŦ tama curŦ ãèxgacŦ ya tacŦ ya DumacŦãx ya ChécharuxŦ cungechaŦ. ErŦ ngexerŦxe ya ãèxgacŦ ya tacŦxŦ tŦgŦ ingucuchixèèxè, rŦ DumacŦãx ya ãèxgacŦ ya tacŦ ya ChécharuarŦ uwanŦ tixŦ —ñanagŦrŦgŦ. ¹³ RŦ yexguma yemaxŦ naxŦnŦgu ga Piratu, rŦ churaragŦxŦ namu ga NgechuchuxŦ dŦxétŦwa na nagagŦxŦcèx. RŦ nawa nayarŦto ga wŦxi ga tochicaŦ ga taxŦ ga nutagŦnaxcèx ga togawa rŦ Gabatagu ãegaxŦ. RŦ yema nachicawa nixŦ ga poxcuexŦ ga duŦxŦgŦna naçaxŦ ga ãèxgacŦ. ¹⁴ RŦ wŦxi ga ngunexŦ nataxu ga ŦpetŦchigaarŦ petawa na nanguxŦ ga yexguma, rŦ marŦ tocuchiwa nangu. RŦ Piratu rŦ YudíugŦxŦ ñanagŦrŦ: —¡Daa nixŦ ya yima perŦ ãèxgacŦ! ñanagŦrŦ. ¹⁵ NatŦrŦ ga nŦmagŦ rŦ aita naxŦe, rŦ ñanagŦrŦgŦ: —Tanaxwèxe na nayuxŦ. RŦ ¡curuchawa yapota! —ñanagŦrŦgŦ. RŦ Piratu nŦxna naca rŦ ñanagŦrŦ nŦxŦ: —¿ÑuxãcŦ i choma rŦ ichanamu na curuchawa yapotagŦãxŦcèx ya perŦ ãèxgacŦ? —ñanagŦrŦ. NatŦrŦ ga paigŦarŦ ãèxgacŦgŦ rŦ PiratuxŦ nangãxŦgŦ, rŦ ñanagŦrŦgŦ: —Yima ãèxgacŦ ya tacŦ ya Chécharu ya Dumawa ngèxmacŦ rŦ yima nixŦ ya torŦ ãèxgacŦ, rŦ nataxuma i to —ñanagŦrŦgŦ. ¹⁶ RŦ yexguma ga Piratu rŦ yema YudíugŦna NgechuchuxŦ namu na curuchawa yapotagŦãxŦcèx. RŦ nŦmagŦ rŦ nayagagŦ.

Curuchawa NgechuchuxŦ nipotagŦ
(Mt 27.45-56; Mr 15.33-41; Lc 23.44-49)

¹⁷ RŦ ínaxŦxŦ ga Ngechuchu, rŦ norŦ curucha ngŦxŦ ininge. RŦ yema nanagagŦ nawa ga wŦxi ga nachica ga “DuŦxèèruchinèxãgu” ãegaxŦ. RŦ yema rŦ Górguta nixŦ ga naega ga togawa. ¹⁸ RŦ yema curuchawa NgechuchuxŦ nayarŦpotagŦ. RŦ NgechuchurŦ curuchawa nayapotagŦ ga taxre ga to ga yatŦgŦ, rŦ wŦxi ga norŦ tŦgŦnecŦwawa rŦ to ga norŦ toxwecŦwawa. ¹⁹ RŦ Piratu rŦ churaragŦxŦ namu na NgechucharŦ curuchatapèxewa na yapocuchigŦãxŦcèx ga wŦxi ga mŦrapewaxacŦ ga ãegatachinŦxŦ ga ñaxŦ:

“Ngechuchu ya Nacharétucũãx ya Yudíugüarü Æ̃xgacü”, ñaxũ. ²⁰ Rü muxüma ga yema Yudíugü nüxũ nadaumatü ga yema namatü ga mürapewaxacügu üxũ. Yerü yema nachica ga Ngechuchuxũ curuchawa íyanapotagüxüwa, rü ñãneãrũ ngaicamana nixĩ. Rü tomaẽxpüx ga nagawa naxümatü ga yema naega ga yema mürapewawa. Rü togawa rü Griégugügawa rü Dumacũãxgügawa naxümatü. ²¹ Rü yemacèx ga yema Yudíugüarü paigüarü ã̃xgacügü rü Piratuxũ ñanagürügü: —Toma rü tama tanaxwèxe i cunaxümatü i “Yudíugüarü Æ̃xgacü”, ñaxũ. Rü narümemaẽ nixĩ i cunaxümatü rü ñacurügü:

“Nügü ixücü na Yudíugüarü Æ̃xgacü yĩxũ”, ñacurügü. ²² Natürü Piratu nanangãxũ rü ñanagürü: —Ngẽma chaxümatüxũ rü marü ngẽxma naxümatü —ñanagürü. ²³ Rü curuchawa marü Ngechuchuxũ yapotagüguwena ga churragü, rü nanade ga Ngechuchuchiru. Rü yema ágümücü ga churragü rü nügümaã nayatoye ga naxchiru. Rü nanayauxgü ta ga norü gáuxũchiru ga máxũ. Natürü taxuwama narüngèixte, yerü woetama yemaãcü naxü. ²⁴ Rü yemacèx ga yema churragü rü nügümaã ñanagürügü: —¡Tãütáma nagu tagaugüe! Rü narümemaẽ nixĩ i naxcèx tá naxĩnücèxwèxegü rü ngĩxũ tañanagügü i wüxi i dñeru na ngẽmawa nüxũ icuèxgüxücèx na texéarü tá na yĩxũ —ñanagürügü. Rü yemaãcü ningu ga Tupanaãrü ore ga ümatüxũ ga ñaxũ: “Nügümaã nayatoye i chauxchiru, rü naxcèx ngĩxũ tanañanagügü i wüxi i dñeru”,

ñaxũ. Rü aixcüma yemaãcü nixĩ ga naxügüãxũ ga churragü. ²⁵ Rü Ngechuchuarü curuchapünewa iyexma ga naẽ ga María, rü ngĩyèx, rü María ga Creopá naxmèx, rü María ga Magadácũãx. ²⁶ Rü yexguma Ngechuchu naèxũ dèuxgu ga yexma chauxütagu na nachixũ, rü ñanagürü ngĩxũ: —Pa Mamax, yima nixĩ ya cune, —ñanagürü. ²⁷ Rü yemawena, rü ñanagürü choxũ: —Ngẽma iyixĩ i cue —ñanagürü. Rü yexgumamama rü chopatawa ngĩxũ chayaxu. Rü chauxütawa iyexmaẽcha.

Nayu ga Ngechuchu

²⁸ Rü Ngechuchu nüxũ nacuèx ga marü na yanguxũ ga guxüma ga norü puracü ga ñoma ga naãnewa. Rü yema Tupanaãrü ore ga ümatüxũ na yanguxèxücèx, rü ñanagürü: —Chitawa —ñanagürü. ²⁹ Rü yema iyexma ga wüxi ga tũxüxãcü ga binu ga marü üxchiücümaã ããcucü. Rü wüxi ga tüèxmü guma binumaã niwaixèegü, rü wüxi ga dexnemenèxãwa nayanèix. Rü yemamaã naãxgu nanawèxgü. ³⁰ Rü Ngechuchu nayaxaxü ga guma binu ga üxchiücü rü ñanagürü: —Marü ningu i guxüma i chorü puracü —ñanagürü. Rü ñuxüchi inayarümaxãchieru, rü nayu.

Wüxi ga churara rü wocaxemaã Ngechuchuxũ nacanapacütüxũ

³¹ Natürü ga yema Yudíugüarü ã̃xgacügü rü tama nanaxwèxegü ga curuchagüwa na nayexmagüxũ ga yema naxünegü. Yerü moxüãcü rü ngüxchigaarü ngunexũ nixĩ. Rü yema Yudíugücèx rü yema nixĩ ga guxü ga ngüxchigaarü ngunexũãrü yexera ga üünexũ, yerü norü peta ga Üpetüchigaarü ügü nixĩ. Rü yemacèx Piratuna naxcèx nacagü na churragü yema namugüxücèx na yapoyeparagüãxücèx na paxa nayuexücèx ga yema curuchawa ipotagüxũ, rü paxa na nadeãxücèx ga curuchawa naxüpa ga ngüxchigaarü ngunexũ. ³² Rü yema naxĩ ga churragü rü inanapoeparagü ga yema taxre ga yatügü ga Ngechuchumaã yema curuchawa ipotagüxũ. ³³ Rü Ngechuchucèx naxĩ ga churragü, natürü nüxũ nadaugü ga marü na nayuxũ. Rü yemacèx tama nayapoyeparagü. ³⁴ Natürü wüxi ga churara rü Ngechuchuxũ nacanapacütüxũ. Rü yexgumatama ínayèxüchi ga nagü rü dexá. ³⁵ Rü choma i Cuáũ rü nüxũ chadau i guxüma ga ñaã pemaã nüxũ

chixuxŭ. Rŭ aixcŭma nixĩ i ñaã chorŭ ore. Rŭ chomatama nŭxŭ chacuèx i aixcŭma na yĩxŭ, rŭ pemaã nŭxŭ chixu na pema rŭ ta peyaxôgŭxŭcèx. ³⁶ Rŭ yema nangupetŭ na yanguxŭcèx i Tupanaãrŭ ore i ũmatŭxŭ i ñaxŭ: “Rŭ taxúnetáma ya naxchinèxã nipoyegŭ”, ñaxŭ. ³⁷ Rŭ toxnamana i Tupanaãrŭ ore i ũmatŭxŭwa rŭ ñanagŭrŭ: “Tá nŭxŭ narŭdaunŭ ya yima nacanapacŭtŭxŭgŭãcŭ”, ñanagŭrŭ.

Ngechuchuxŭ inatèxgŭ

(Mt 27.57-61; Mr 15.42-47; Lc 23.50-56)

³⁸ Rŭ nayexma ga wŭxi ga yatŭ ga Arimatéacŭãx ga Yúchegu ãegacŭ. Rŭ nŭma rŭ ta Ngechuchuxŭ nayaxô, natŭrŭ cúãcŭ nayaxô yerŭ natanŭxŭ ga Yudíugŭarŭ ãèxgacŭgŭxŭ namuŭ. Rŭ guma nixĩ ga Piratuna yaçacŭ na nayauxãxŭcèx ga Ngechuchuxŭne. Rŭ Piratu rŭ: —Ngŭ, —ñanagŭrŭ. Rŭ yexguma ga Yúche rŭ yéma naxŭ ga curuchawa íyapotaxŭwa, rŭ curuchawa nayayaxu ga naxŭne ga Ngechuchu. ³⁹ Rŭ yéma nangu ga Nicodému ga ũpaacŭ chŭtacŭ Ngechuchuxŭtagu naxŭãnecŭ. Rŭ yéma nanange ga 30 kilo naguxŭ ga pumara ga yixichixŭ na Ngechuchuxŭ namaã nachaxŭnegŭxŭcèx. ⁴⁰ Rŭ yemaãcŭ ga Yúche rŭ Nicodému rŭ curuchawa nanayauxgŭ ga naxŭne ga Ngechuchu. Rŭ naxchiru ga marŭ pumarachaxŭmaã nayanáxpŭxŭgŭ. Yerŭ yema nixĩ ga tocŭma ga toma ga Yudíugŭ ga yexguma wŭxi ga yueta tŭxŭ itatèxgŭgu. ⁴¹ Rŭ yema nachica ga Ngechuchu curuchawa ípotaxŭwa nayexma ga wŭxi ga nanetŭnecŭ. Rŭ yema nanetŭnecŭwa nayexma ga wŭxi ga naxmaxŭ ga yexwacaxŭxŭ ga taguma texéxŭ nagu natèxgŭxŭ. ⁴² Rŭ yema naxmaxŭgu nayaxŭcuchigŭ ga Ngechuchuxŭne yerŭ nangaicama, rŭ paxa tá ningune ga ngŭxchigaarŭ ngunexŭcèx.

20

Ínarŭda ga Ngechuchu

(Mt 28.1-10; Mr 16.1-8; Lc 24.1-12)

¹ Rŭ yŭxŭarŭ pèxmamaxŭchi ga tauta meã yangóonegu, rŭ María ga Magadácŭãx rŭ Ngechuchuxŭ íyaxŭcuchigŭxŭwa ixŭ. Rŭ nŭxŭ idau ga guma nuta ga Ngechuchumaxŭ namaã rŭngŭxŭtaŭcŭ, rŭ marŭ na ínaxŭgachixŭ. ² Rŭ yexgumatama iñaãchi, rŭ yema choma rŭ Chimáũ ga Pedrumaã ítayexmagŭxŭwa iña. Rŭ ngŭgŭrŭgŭ toxŭ: —Rŭ marŭ nanayauxgŭ ya Cori ya Ngechuchu i naxmaxŭwa. Rŭ tama nŭxŭ tacuèx na ngexta na naxŭgŭãxŭ —ngŭgŭrŭgŭ. ³ Rŭ yexguma ga choma rŭ Pedru rŭ Ngechuchuxŭ íyaxŭcuchigŭxŭwa taxŭ. ⁴ Rŭ wŭxigu itaxŭãchi ga tomax, natŭrŭ ga choma rŭ poraãcŭ Pedruarŭ yexera ichañaãchi. Rŭ chaxira Ngechuchuxŭ íyaxŭcuchixŭwa changu. ⁵ Rŭ ichayarŭmaxãchi na nagu chidaucuchixŭcèx. Rŭ nŭxŭ chadau ga naxchiru ga namaã yanáxpŭxŭgŭãxŭ ga yexma na naxŭxŭ. Natŭrŭ tama aixepegu chaxŭcu. ⁶ Rŭ choweama ínangu ga Chimáũ ga Pedru. Rŭ nŭma rŭ yema naxmaxŭgu naxŭcu. Rŭ nŭma rŭ ta nŭxŭ nadau ga yema naxchiru ga namaã yanáxpŭxŭchiréxŭ. ⁷ Rŭ nŭxŭ nadau ta ga naxchiru ga namaã yanéixèrugŭãxŭ ga meãma dixcumŭxŭ ga nŭxŭruguma ũxŭ. Rŭ tama wŭxigu namaã nanu ga yema naxchiru ga namaã yanáxpŭxŭgŭãxŭ. ⁸ Rŭ yexguma ga choma ga chaxiraxŭchi yéma na changuxŭ, rŭ choma rŭ ta chixŭcu. Rŭ nŭxŭ chadau ga guxŭma, rŭ chayaxô ga Ngechuchu rŭ marŭ wena na namaxŭxŭ. ⁹ Yerŭ noxri rŭ tama nŭxŭ tacuèxgŭéga ga yema Tupanaãrŭ ore ga ũmatŭxŭ ga ñaxŭ: “Cristu rŭ tá wena namaxŭ”, ñaxŭ. ¹⁰ Rŭ yexguma ga toma rŭ tochiŭcèx tawoegu.

*Ngechuchu rü ngĩxcèx nangox ga María ga Magadácũãx
(Mt 16.9-11)*

¹¹ Natürü ga María rü yexma irüxãũx naxütagu ga Ngechuchumaxũ. Rü yéma ixaxu. Rü naxauxácüma iyarümaxãchi, rü nagu iyadaucuchi ga nax-maxũ. ¹² Rü nüxũ idau ga taxre ga daxücũãx ga Tupanaãrũ orearũ ngeruũgũ ga icómüchiruxũ. Rü Ngechuchuxũne ixüchiréxũwa narütogũ, rü wüxi ga Ngechuchueru ixüxũwaama rü to ga nacütawaama. ¹³ Rü yema daxücũãx ga duũxũgũ rü ngĩxna nacagüe, rü ñanagürügũ: —Pa Ngecũx, ¿tacücèx cuxaxu? —ñanagürügũ. Rü ngĩma rü inangãxũ, rü ngĩgürügũ: —Chaxaxu erü nayangegũ i naxũne ya chorü Cori, rü tama nüxũ chacuèx na ngexta naxügũãxũ —ngĩgürügũ. ¹⁴ Rü yexgumatama yema ngĩxgu, rü ngĩgũweama idau. Rü nüxũ idau ga Ngechuchu ga ngĩxütawa na nayexmaxũ. Natürü tama nüxũ icuèx ga Ngechuchu na yĩxũ ga guma. ¹⁵ Rü yexguma ga Ngechuchu rü ngĩxna naca, rü ñanagürü: —Pa Ngecũx, ¿tacücèx cuxaxu? ¿Rü texécèx nixĩ i cudauxũ? —ñanagürü. Rü ngĩma nüxũ nacuèxgu rü yema nixĩ ga yema nanetüncüarũ dauruũ. Rü yemacèx ngĩgürügũ nüxũ: —Pa Corix, ega cuma cuyangexgu i naxũne ya Ngechuchu, rü ¡chomaã nüxũ ixu na ngexta na cunaxũxũ na choma chayayaxuxücèx! —ngĩgürügũ. ¹⁶ Rü yexguma ga Ngechuchu rü ñanagürü ngĩxũ: —Pa Maríax —ñanagürü. Rü ngĩma rü naxcèx idaueguãchi, rü togawa ngĩgürügũ nüxũ: —Pa Rabunix —ngĩgürügũ. Rü ngẽma rü “Pa Ngüexẽruũx”, ñaxüchiga nixĩ. ¹⁷ Rü Ngechuchu rü ñanagürü ngĩxũ: —¡Tãxũ i choxũ quingögũxũ, erü tauta Chaunatüxütawa chaxũ! ¡Natürü ngẽma chaueneẽgütanüwa naxũ rü namaã nüxũ yarüxu na choma rü tá Chaunatü ya chorü Tupana ya Penatü ya perü Tupanaxütawa chaxũxũ! —ñanagürü. ¹⁸ Rü yexguma ga María ga Magadácũãx rü tomaã nüxũ iyarüxu ga marü nüxũ na nadauxũ ga Cori ga Ngechu-chu. Rü ñuxüchi tomaã nüxũ iyaxu ga yema ore ga Ngechuchu ngĩmaã nüxũ ixuxũ.

*Norü ngüexũgücèx nangox ga Ngechuchu
(Mt 28.16-20; Mr 16.14-18; Lc 24.36-49)*

¹⁹ Rü yema yüxüarü ngunexüarü chütacü, rü tangutaquèxegü ga toma ga Ngechuchuarü ngüexũgü. Rü togü tarüwãtaũgü, yerü yema Yudügüarü ãèxgacügũxũ tamuũẽ. Rü Ngechuchu rü ngürüãchi yéma nangox, rü torü ngãxütanügu nachi. Rü toxũ narümoxẽ, rü ñanagürü: —¡Petaãègü! —ñanagürü. ²⁰ Rü yema ñaxguwena rü toxũ nügü nawémèx, rü nügü inawépacütüxũ. Rü tomagü ga norü ngüexũgü rü tataãègü, yerü nüxũ tadaugü ga guma torü Cori. ²¹ Rü yexguma rü wenaxãrũ ñanagürü toxũ: —¡Petaãègü! Rü yema Chaunatü núma choxũ na muxürüũ tátama nixĩ i pexũ chamuxũ i chomax —ñanagürü. ²² Rü yexguma rü toétü “cue” ñanagürü ga Ngechuchu. Rü ñuxüchi ñanagürü toxũ: —¡Penayauxgü i Tupanaãẽ i Üünexũ! ²³ Rü ngëxguma duũxũgü nüxũ rüxoegu i norü pecadugü, rü pema rü pexũ nangëxma i pora na namaã nüxũ pixuxũ na Tupana marü nüxũ nüxũ rüngümaxũ i norü pecadugü. Natürü ngëxguma duũxũgü tama nüxũ rüxoegu i norü pecadugü, rü pema rü pexũ nangëxma i pora na namaã nüxũ pixuxũ na marü ngẽma norü pecadugüwatama nangëxmagũxũ —ñanagürü ga Ngechuchu.

Tumachi nüxũ nadau ga Cori ga wena maxücü

²⁴ Natürü totanüxũ ga Tumachi ga Wüxigu Buexümaã taxugũxũ, rü tama totanüwa nayexma ga yexguma Ngechuchu toxcèx ngoxgu. ²⁵ Rü yixcama ga toma rü Tumachimaã nüxũ tixugüe, rü ñatarügügü: —Marü nüxũ tadau ya tórü Cori ya Ngechuchu —ñatarügügü. Natürü ga Tumachi rü toxũ nangãxũ rü ñanagürü: —Ngëxguma tama nüxũ chadèuxgu i norü itapuamaxũ i naxmèxwa

rü tama nüxũ chingõgũgu i ngẽma itapuamaxũ rü ngẽma norü cana-pacütũxũ, rü täütãma chayaxõ i ngẽma ore i chomaã nüxũ pixuxũ –ñanagürü. ²⁶ Rü 8 ga ngunexũguwena rü wenaxãrũ tangutaquẽxegũ ga toma ga wüxi ga ãpatawa. Rü totanũwa nayexma ga Tumachi ga yexguma. Rü woo ga na nawãxtaxũ ga ãax, rü ngürũachi yẽma nangox ga Ngechuchu, rü torü ngãxũtanũgu nachi. Rü toxũ narümoxẽ, rü ñanagürü: –¡Petaãẽgũ! –ñanagürü. ²⁷ Rü yexguma Tumachixũ ñanagürü ga Ngechuchu: –¡Nüxũ ingõgũ i ñãã chorü itapuamaxũ i choxmẽxwa ngẽxmaxũ, rü nüxũ nadau ya daa choxmẽx! ¡Rü nuxa chorü canapacütũxũgu ingõgũ! ¡Rü nüxũ rüxo na tama cuyaxõxũ! ¡Rü meãma yaxõ i ñuxmax! –ñanagürü. ²⁸ Rü yexguma ga Tumachi rü Ngechuchuxũ nangãxũ, rü ñanagürü: –Pa Chorü Corix, cuma nixĩ i chorü Tupana quiixũ –ñanagürü. ²⁹ Rü Ngechuchu rü ñanagürü nüxũ: –Pa Tumachix, cuma cuyaxõ i ñuxma erü choxũ cudau. Natürü tataãẽgũ ya yĩxema tama choxũ daugũãcũma yaxõgũxe –ñanagürü.

Tacücèx naxümatü i ñãã popera

³⁰ Rü Ngechuchu rü topẽxewa nanaxü ga muxũma ga to ga mexũgũ ga cuèxruũgũ i tama ñãã poperagu ümatũxũ. ³¹ Natürü guxũma i ñãã poperagu ümatũxũ, rü naxümatü na peyaxõgũxũcèx na Ngechuchu rü Cristu ya Tupana Nane na yĩxũ. Rü ngẽxguma nüxũ peyaxõgũgu rü tá pexũ nangẽxma i maxũ i taguma gũxũ.

21

Ngechuchu rü 7 ga norü ngüexũgũcèx nangox

¹ Rü yemawena ga Ngechuchu rü wenaxãrũ toxcèx nangox nahtaxa ga Gariréaanacüwa. Rü Tibéria nixĩ ga to ga naega. Rü ñããcũ nixĩ ga toxcèx nangõxũ. ² Rü wüxiwa tayexmagũ ga choma rü Chaũtiãgu ga Zebedeu nanegü rü Chimãũ ga Pedru, rü Tumachi ga Wüxigu Buexũmaã taxugũxũ, rü Natanae ga Gariréaanegune ga ããne ga Canãcũãax, rü to ga taxre ga tomücũgũ ga Ngechuchuarü ngüexũgũ. ³ Rü Chimãũ ga Pedru rü ñanagürü toxũ: –Tã chayapũchae –ñanagürü. Rü yexguma ga toma rü tanangãxũgũ, rü ñatarũgũgũ nüxũ: –Toma rü tá ta cuwe tarũxĩ –ñatarũgũgũ. Rü yẽma taxĩ, rü wüxi ga ngegu tichoũ. Natürü yema chũtaxũgu rü taxuũma ga choxni tiyauxgũ. ⁴ Rü yexguma noxri yangõonegu rü Ngechuchu toxcèx nangox ga nahtaxaanacüwa. Natürü ga toma rü tama nüxũ tacuèxgũ ga Ngechuchu na yĩxũ. ⁵ Rü yexguma ga Ngechuchu rü toxna naca, rü ñanagürü toxũ: –Pa Ngextũxücũgũx, ¿éxna taxuũma i choxni piyauxgũ? –ñanagürü. Rü toma rü tanangãxũgũ rü ñatarũgũgũ: –Taxuũma –ñatarũgũgũ. ⁶ Rü yexguma ga Ngechuchu rü ñanagürü toxũ: –¡Peweũãrũ tũgũnecũwawaama penatãe i perü pũcha! rü tá ãpenayauxũ i choxni –ñanagürü. Rü yẽmaãma tanatãegũ ga torü pũcha, rü taxucürũwa ãtanatũãchigũ, yerü muxũchixũ ga choxni tiyauxgũ. ⁷ Rü yexguma ga choma rü Pedruxũ ñacharũgũ: –Yima nixĩ ya Cori ya Ngechuchu –ñacharũgũ. Rü yexguma yemaxũ naxĩnũgu ga Pedru ga guma na yĩxũ ga Cori, rü nicuxcuchi ga naxchiru yerü noxri rü ãnacuxuchichirẽx. Rü natũchiũwa nayuxu, rü naxãnacüwa naxcèx nawẽxẽ. ⁸ Rü toma ga natanũxũ rü nguemaãtama naxãnacüwa taxãgũ. Rü yẽma tanatũgũ ga yema pũcha ga choxnimaã ããcuxũ yerü 100 metruxicatama nataxu ga na naxãnacüwa na tangugũxũ. ⁹ Rü yexguma nguewa ãtachoũgu rü yẽma nüxũ tadau ga wüxi ga üxũ, rü naxëtũgu naxü ga wüxi ga choxni. Rü yẽma nayexma ta ga wüxi ga pãũ. ¹⁰ Rü Ngechuchu rü ñanagürü toxũ: –¡Nuãta penge i ñuxre i ngẽma choxni i ãpeyauxũxũ! –ñanagürü. ¹¹ Rü Chimãũ ga Pedru rü ngegu nixüe. Rü yema

püchamaã naxnücügu ínanatúãchiwetaũ ga choxni ga ínayauxũxũ. Rũ 153 ga choxni ga itaxũ nayexma nawa ga yema pücha. Rũ woo ga na namuxũchixũ, rũ tama narügáu ga pücha. ¹² Rũ yexguma ga Ngechuchu rũ ñanagürü toxũ: — ¡Nuã pexĩ rũ peyachibüe! —ñanagürü. Rũ taxúema ga toma rũ nüxna tacaxchaũ na texé yĩxũ ga nümax, yerü marü nüxũ tacuèxgü ga guma na yĩxũ ga Cori ga Ngechuchu. ¹³ Rũ yexguma ga Ngechuchu rũ yéma toxütawa naxũ. Rũ nanayaxu ga pãũ rũ wüxichigü toxna nanaxã. Rũ yexgumarüũ ta ga choxni rũ toxna nanaxã. ¹⁴ Rũ yema nixĩ ga norü tomaèxpüxcüna ga toxcèx na nangóxũ ga Ngechuchu ga yuwa ínadaxguwena.

Ngechuchu rũ Pedrumaã nidexa

¹⁵ Rũ yexguma chibüewa tingugüguwena rũ Ngechuchu rũ Chimáũ ga Pedruna naca, rũ ñanagürü: —Pa Chimáũ Pa Cuáũ Nanex, ¿aixcüma choxũ cungechaũxũ i ñaã cumücügüxũ na cungechaũxũârü yexera? —ñanagürü. Rũ Pedru nanangãxũ, rũ ñanagürü: —Ngũ, Pa Corix, cuma nüxũ cucuèx na cuxũ changechaũxũ —ñanagürü. Rũ Ngechuchu rũ ñanagürü nüxũ: — ¡Nachibüexẽ i chorü duũxügü! —ñanagürü. ¹⁶ Rũ wenaxãrũ Pedruna naca, rũ ñanagürü: —Pa Chimáũ Pa Yoná Nanex, ¿aixcüma i choxũ cungechaũxũ? —ñanagürü. Rũ Pedru nanangãxũ, rũ ñanagürü: —Ngũ, Pa Corix, cuma nüxũ cucuèx na cuxũ changechaũxũ —ñanagürü. Rũ Ngechuchu rũ ñanagürü nüxũ: —Ëcü, ¡nüxna nadau i chorü duũxügü! —ñanagürü. ¹⁷ Rũ norü tomaèxpüxcüna wenama Pedruna naca, rũ ñanagürü: —Pa Chimáũ Pa Yoná Nanex, ¿aixcümaxũchi yĩxũ i choxũ cungechaũxũ? —ñanagürü. Rũ yexguma ga Pedru rũ düxwa nangechaũ, yerü norü tomaèxpüxcüna Ngechuchu nüxna naca ngoxi aixcüma nüxũ nangechaũ. Rũ ñanagürü ga Pedru: —Pa Corix, cuma nüxũ cucuèx i guxüma. Rũ cuma nüxũ cucuèx na aixcümaxũchi cuxũ changechaũxũ —ñanagürü. Rũ Ngechuchu ñanagürü nüxũ: —Ëcü ¡nachibüexẽ i chorü duũxügü! ¹⁸ —Rũ aixcüma cumaã nüxũ chixu rũ yexguma cunxetüxügu rũ cugü quicüxcuchi ga na ngextá cuma ícunaxwèxexüwa cuxũxücèx. Natürü ngèxguma yaguãx quixĩgu rũ tá quixuuchichacüü na togue cuxũ icüxcuchixücèx. Rũ ngẽma tama cuma ícunaxwèxexüwa tá cuxũ nagagü —ñanagürü. ¹⁹ Rũ Ngechuchu rũ yema ñanagürü na nüxũ nüxũ nacuèxèxücèx ga ñuxãcü tá na nayuxũ ga Pedru na yemaãcü Tupanaxũ nataxèxücèx. Rũ yemawena ga Ngechuchu rũ ñanagürü nüxũ: —¡Chowe rüxũ! —ñanagürü.

Yema ngüexũ ga Ngechuchu poraãcü nüxũ ngechaũxũchiga

²⁰ Rũ yexguma nügüweama nadèuxgu ga Pedru rũ choxũ nadau ga naweama na ne chaxũxũ. Rũ chomachirèx nixĩ ga chibüwa Ngechuchucüwawa charütoxũ rũ nüxna chaçaxũ rũ ñachaxũ:

“Pa Corix, ¿texé tá tixĩ ya yixema bexma cuechita cuxũ íxuaxũxẽ?” ñachaxũ.

²¹ Rũ yexguma Pedru choxũ dèuxgu rũ Ngechuchuna naca, rũ ñanagürü: — Pa Corix, ¿ñaã Cuáũ rũ tacü tá nüxũ üpetüxũ? —ñanagürü. ²² Rũ Ngechuchu nanangãxũ, rũ ñanagürü nüxũ: —Ngèxguma choma chanaxwèxegu rũ chanamaxẽ ñuxmatáta wena núma chaxũ. ¿Rũ tüxcüxũ i nagu curüxĩnũxũ i ngema? Rũ cuma ¡rü chowe rüxũ! —ñanagürü. ²³ Rũ yexguma yema chomücügü nüxũ ínüègu ga yema chauchiga, rũ nagu narüxĩnüe na taxütáma chayuxũ. Natürü Ngechuchu rũ tama nüxũ nixu ga tãxütáma na chayuxũ. Natürü ñanagürümare:

“Ngèxguma choma chanaxwèxegu rũ chanamaxẽ ñuxmatáta wena núma chaxũ. ¿Rũ tüxcüxũ i nagu curüxĩnũxũ i ngẽma?”, ñanagürümare. ²⁴ Rũ chomatama nixĩ ga nüxũ chadauxũ i guxüma i ñaã pemaã nüxũ chixuxũ, rũ

chomatama nixĩ i pexcèx chanaxümatüxũ i ñaã ore. Rũ guxãama i toma rü nüxũ tacuèx na aixcüma na yĩxũ i ñaã pemaã nüxũ chixuxũ. ²⁵ Rũ nayexma ga to ga muxũchixũma ga tacü ga Ngechuchu üxũ. Rũ ngëxguma chi naxümatügu i guxũma ga yema naxüxũchiga, rü nagu charüxĩnügu rü tãũ chima ñoma i naãnegu name i ngẽma poperagü i nachiga ümatüxũ.

NGECHUCHUARÜ NGÚEXÜGÜ GA YAMUGÜXÜÄRÜ PURACÜCHIGA

Tupana inaxuneta rü tá ínangu i Naãe i Üünexü

¹⁻² Pa Mecü Pa Teóquirux, nüxíra chaxümatüxü ga poperawa cumaã nüxü chixu ga guxüma ga Ngechuchu üxü rü duüxügüxü namaã nangúexëxü ga noxritama inaxügüãgu ga norü puracü ñuxmata yema ngunexü ga Tupana daxüguxü ga naãnewa nagaxgu. Rü yexguma tauta daxüguxü ga naãnewa naxüxgu ga Ngechuchu rü nayadexechi ga norü ngúexügü ga yamugüchaüxü na Tupanaärü puracü naxügüxcèx. Rü Tupanaãe i Üünexüärü poramaã nanangúexëe ga yema duüxügü, rü namaã nüxü nixu ga tacü tá na naxüexü. ³ Rü yexguma marü yuwa ínadxëguwena ga nüma ga Ngechuchu rü 40 ga ngunexügu rü nügü nangoxëxü naxcèx ga norü ngúexügü rü muxüma ga togü ga nüxü yaxögüxü na yemaãcü nüxü nacüexgüxcèx na aixcüma wena namaxüxü. Rü namaã nüxü nixuchiga na ñuxácü na yixixü i Tupana ãëxgacü iyixüwa. ⁴ Rü yexguma yema ngúexügü ga yamugüxütanüwa nayexmagu ga Ngechuchu, rü namaã nüxü nixu ga tama nüxna na ngextá naxüxcèx ga Yerucharéü. Rü ñanagürü nüxü: —¡Ípenanguxëe i ngëma Tupanaãe i Üünexü ga Chaunatü pemaã ixunetaxü ga pemaã nüxü chixuchigaxü! ⁵ Aixcüma nixi ga Cuáü rü dexáwa duüxügüxü ínabaiüxëxü, natürü i pema rü tãütáma muxü i ngunexü nangupetü na Tupanaãe i Üünexü tá pexna nguxü —ñanagürü.

Daxüguxü ga naãnewa naxü ga Ngechuchu

⁶ Rü yexguma nangutaquëxëgüga ga yema norü duüxügü, rü Ngechuchuna nacagü, rü ñanagürügü: —Pa Corix, ¿éxna ñoma tá nixi i ngunexü i marü ícunawoxü i nuã Yudiügüchiüãnewa i torü uwanügüarü churaragü na wenaxärü tomatama namaã itacuáxcèx i ñaã tochiüãne? —ñanagürügü. ⁷ Rü Ngechuchu nanangäxü, rü ñanagürü: —Pema rü taxucëxma nüxü pecuáxchaü i ñuxgu tá nixi i ngëma ngunexü, erü Chaunatüxicatama nüxü nangëxma i pora na nüxü naxunetaxü i ngëma ngunexü i choxna naxcèx peçaxü. ⁸ Natürü ngëxguma pexna nanguxgu i Tupanaãe i Üünexü, rü tá pexü naporaexëe. Rü tá ípechoxü na nüxü peyarüxügüexüxcèx i chauchiga i Yerucharéüwa, rü guxüma i Yudéaanewa, rü Chamáriaanewa, rü ñuxmatáta guxü i naãnewa nangu —ñanagürü. ⁹ Rü yexguma yema ñaxguwena rü nüxü ínadaunüyane ga norü ngúexügü, rü Tupana rü daxüguxü ga naãnewa Ngechuchuxü naga. Rü wüxi ga caixanexügu nayaxücu, rü yemaãcü tama wenaxärü nüxü nadaugü. ¹⁰ Rü yexguma Ngechuchuxü ínadaunüyane ga daxüwa na naxüxü, rü ngürüächi natanüwa nangox ga taxre ga yatü ga ícómüchiruxü. ¹¹ Rü ñanagürügü nüxü: —Pa Yatügü i Gariréaanecüãx, ¿tüxcüü daxügu íperüdaunü? Erü daatama Ngechuchu ga petanüwa yexmacü rü ñuxma Tupana daxüwa nagacü, rü ngëma ñuxma nüxü na pedauxü na ñuxácü daxüwa naxüxü, rü ngëmaãcü tátama nixi i wena núma naxüxü —ñanagürügü.

Yudachicüü nanayauxgü ga Matía

¹² Rü yema ngúexügü ga Ngechuchu imugüxü na Tupanaärü puracü naxügüxcèx, rü nüxna ínixi ga guma mëxpüne ga Oríbunecügu äegane. Rü Yerucharéüxcèx nawoegu. Rü guma ñanearü yaxü nüxna ga guma mëxpüne rü wüxi ga kilómetru nixi. ¹³ Rü yexguma Yerucharéüärü ñãnewa nangugügu, rü nagu nachocu ga guma í ga nagu napegüne. Rü dauxna naxügü naxcèx ga

yema ucapu ga taxü ga nagu napegüxü. Rü nümagü nixi ga Pedru, rü Cuáü, rü Chaütiágu, rü Aüdré, rü Piripi, rü Tumachi, rü Baturumé, rü Mateu, rü Chaütiágu ga Arupéu nane, rü Chimáü ga Iporaãécüücü, rü Yuda ga Chaütiágu naëneë. ¹⁴ Rü guxüma ga nümagü rü guxüguma nangutaquëxegüxü na wüxigu nayumüxëgüxcëx namaã ga Ngechuchueneëgü, rü ngïmaã ga María ga Ngechuchu naë, rü ñuxre ga togü ga ngexügü. ¹⁵ Rü guxüma ga yema ngunexügügu rü nangutaquëxegüxü ga yema yaxögüxü. Rü 120 nixi. Rü wüxi ga ngunexügu ga Pedru rü inachi ga norü ngäxütanüwa, rü ñanagürü: ¹⁶ — Pa Chomücügüx, marü ningu ga yema Tupanaãë i Üünexü nuxcüma Dabíxü muxü na naxümatüãxüxcëx nachiga ga Yuda ga namaãrü cuëxruü ixixü naxcëx ga yema duüxügü ga Ngechuchuxü iyauxgüxü. ¹⁷ —Rü tatanüxüchirëx nixi ga Yuda, rü nüma rü ta taxrüü ñaã Tupanaãrü puracüwa napuracü ga noxrix. ¹⁸ —Natürü nüma ga Yuda rü bexma Ngechuchuxü ínaxuaxü. Rü yemacëx ga äëxgacügü rü nüxü nanaxütanü. Natürü yixcama ga Yuda rü naxcëx ínicuëx ga yema chixexü ga naxüxü, rü yemacëx nanataeguxëë ga yema díëru. Rü yemawena rü nügü nawëxnaxã rü naítanüwa nügü narütáe. Rü yexguma duüxügü nadaexügügu rü inanago, rü niwãixpütüwe rü ínayixü ga naünüta. Rü yema díëru ga nataeguxëëxümaã ga äëxgacügü rü naxcëx nataxe ga wüxi ga naãne. ¹⁹ —Rü nüxü nacuáchigagü ga guxüma ga Yerucharéücüãx, rü yemacëx Achédamagu nanaxüéga ga yema naãne. Rü ngëma nixi i “Nagüchitaü” ñaxüchiga. ²⁰ —Rü Wiyaegüarü poperawa yemachiga nanaxümatü ga Dabí, rü ñanagürü:

“Yixrüma rü ngema natá ya napata, rü taxúema nagu pe”,

ñanagürü. Rü toxnamana i ngëma poperawa rü ñanagürü ta:

“Rü name nixi na togue naxüxü i ngëma norü puracü”,

ñanagürü. ²¹⁻²² —Rü nuã tatanüwa nangëxmagü i ñuxre i yatügü ga guxüguma tüxü ümücügüxü ga yexguma tatanüwa nanuxmagu ga Cori ga Ngechuchu. Rü nümagü rü tawe narüxí ga noxritama Cuáü Ngechuchuxü íbaixëëgu rü ñuxmata yema ngunexü ga daxügüxü ga naãnewa naxüxgu. Rü name nixi i ngëmatanüwa na nayaxuxü i wüxi i Yudachicüüxü na tamücü yixüxcëx rü tarüü nüxü yaxuxüxcëx i ñuxácü wena na namaxüxü ya Ngechuchu. ²³ Rü yemawena rü nüxü naxunetagü ga taxre ga yatügü. Rü wüxi nixi ga Yúche ga Yuchugu äegaxü ga Bachabámaã naxugüxü. Rü Matía nixi ga to. ²⁴⁻²⁵ Rü ñaãcü nayumüxëgü: —Pa Corix, cuma nüxü cucuëx i guxüma i duüxügüarü maxü. ¡Rü ñuxma rü toxü nawëx i ngëxürrüüxü i cuxcëx mexü i ñaã taxrewa na cunamuxüxcëx rü nüma na naxüãxüxcëx i ñaã puracü ga Yuda ítáxü ga yexguma norü poxcuwa naxüxgu! —ñanagürügü. ²⁶ Rü wüxi ga díëru ga cuëxruü ngixü nañanagügü na yemawa nüxü nacuëxgüxcëx ga ngëxürrüüxü ga yema taxre tá na ixücuxü. Rü Matíagu nangu na yangucuchixüxcëx. Rü yexgumatama rü yema 11 ga duüxügü ga Ngechuchu imugüxütanügu naxã ga Matía.

2

Ínangu ga Tupanaãë i Üünexü

¹ Rü nawa nangu ga yema Yudíugüarü peta ga Pëtecóstegu äegaxü. Rü yema ngunexügu rü guxüma ga yema yaxögüxü rü wüxi ga nachicawa nangutaquëxegü. ² Rü ngürüächi daxüwa ne naxü ga wüxi ga naga ñoma wüxi ya buanecü ya taxüchicü icuxcugurüü, rü guxüne ga guma í ga nawa nayexmagünegu nayaxüga. ³ Rü naxcëx nangox ga üxüema ga ñoma n-conügüraüxü. Rü yema üxüema rü nügüna nixigü, rü wüxichigü ga yema yaxögüxüna ninguchigü. ⁴ Rü guxüma ga yema yexmagüxü rü Tupanaãë

ga Ūünexŭ nüxna nangu. Rŭ yema Naãe i Ūünexŭ yadexagŭxëxŭãcŭma inanaxŭgŭe ga to ga nagawachigŭ na yadexagŭxŭ. ⁵ Rŭ yema ngunexŭgŭgu rŭ yema petacèx Yerucharéŭwa nayexmagŭ ga muxŭma ga toxnamana ne ĩxŭ ga Yudíugŭ ga Tupanaga ĩnŭxŭ ga guxŭ ga togŭ ga nachiŭñewa ne ĩxŭ. ⁶ Rŭ yexguma nüxŭ naxĭnŭëgu ga ñuxácŭ na yadexagŭxŭ ga yema yaxôgŭxŭ, rŭ nangutaquëxegŭ ga muxŭma ga yema duŭxŭgŭ ga toxnamana ne ĩxŭ. Rŭ nabaixãchiãëgŭ yerŭ yema yaxôgŭxŭ rŭ wŭxichigŭ ga yema togŭ ga duŭxŭgŭgawachigŭ nidexagŭ. ⁷ Rŭ yema na poraãcŭ nabaixãchiãëgŭxŭcèx, rŭ nŭgŭmaã rŭ ñanagŭrŭgŭ: —¿Tama éxna Gariréaanecŭãx yixĭgŭxŭ i guxŭ i ñaã duŭxŭgŭ i tagawa idexagŭxŭ? ⁸ —¿Rŭ ñuxácŭ éxna i nüxŭ ĩxĭnŭxŭ i wŭxichigŭ i yixema i taga i nawa iyaexŭwa na yadexagŭxŭ? ⁹⁻¹¹ —Yixema tixĭgŭ i Pártiaanecŭãx, rŭ Médiaanecŭãx, rŭ Eraŭñanecŭãx, rŭ Mechopotámiãanecŭãx, rŭ Yudeaanecŭãx, rŭ Capadóchiaanecŭãx, rŭ Pôtuaneŭãx, rŭ Áchiaarŭ naãnecŭãx, rŭ Piríquiaanecŭãx, rŭ Paŭpíríiaanecŭãx, rŭ Equituarŭ naãnecŭãx, rŭ Díbiaarŭ naãnecŭãx i Chireneŭãx. Rŭ tatanŭwa nangëxma ta i duŭxŭgŭ i Crétaanewa rŭ Arábíaarŭ naãnewa ne ĩxŭ. Rŭ ñuxre i yixema rŭ Dumacŭãx i Yudíugŭ tixĭgŭ. Rŭ nuã tatanŭwa nangëxma ta i Dumacŭãx i tama Yudíugŭ ĩxĭgŭxŭ natŭrŭ tacŭmagu ĩxŭ. Rŭ guxãma rŭ nüxŭ taxĭnŭe na wŭxichigŭ i tagawachigŭ na yadexagŭxŭ i ñaã ngŭexŭgŭ. Rŭ tagawa tamaã nüxŭ nixugŭe i ñuxácŭ na namexëchixŭ ya Tupana —ñanagŭrŭgŭ. ¹² Rŭ guxŭma poraãcŭ nabaixãchiãëgŭ, rŭ tama nüxŭ nacuèxgŭ ga ñuxácŭ na yĭxŭ ga yema. Rŭ nŭgŭna nacagŭe, rŭ ñanagŭrŭgŭ: —¿Tacŭchiga nixĭ i guxŭma i ñaã? —ñanagŭrŭgŭ. ¹³ Natŭrŭ ga togŭ rŭ nüxŭ nacugŭecŭraxŭ, rŭ ñanagŭrŭgŭ: —Nangãxëmare rŭ ngëmacèx nixĭ i ngëmaãcŭ yadexagŭxŭ —ñanagŭrŭgŭ.

Pedruarŭ dexa

¹⁴ Rŭ yexguma inachi ga Pedru namaã ga yema 11 ga namŭcŭgŭ, rŭ tagaãcŭma ñanagŭrŭ: —Pa Yudíugŭ i nuxma Yerucharéŭgu naxĭãnexŭ rŭ Pa Nuãcŭãxgŭx, ĩrŭ dŭcax, meã iperŭxĭnŭe i ñaã tá pemaã nüxŭ chixuxŭ! ¹⁵ —Rŭ ñaã chomŭcŭgŭ rŭ tama nangãxë i pema nagu perŭxĭnŭexŭrŭŭ, erŭ pëxmamatama nixĭ rŭ ngexwacèx 9 arŭ orawa nangu. ¹⁶ —Natŭrŭ ñaã ñuxma nüxŭ pedauxŭ nixĭ ga yema Tupanaãrŭ orearŭ uruŭ ga Yoé marŭ nüxŭ ĩxuchigaxŭ ga yexguma ñaxgux:

¹⁷ “Rŭ ñanagŭrŭ ya Tupana: ‘Ngëma nawa iyacuáxŭ i ngunexŭgŭgu rŭ guxŭ i duŭxŭgŭtanŭwa tá chanamu i Chauãe i Ūünexŭ, rŭ penegŭ rŭ pexacŭgŭ rŭ tá chauchigagu nidexagŭ. Rŭ choma rŭ tá chayangoxetŭxëe i perŭ ngextŭxŭxŭgŭ rŭ tá nüxŭ nadaugŭ i ngëma tá nüxŭ chawéxŭ. Rŭ perŭ yaguãxgŭmaã tá chidexa i nanegŭwa. ¹⁸ Rŭ chorŭ duŭxŭgŭtanŭwa tá chanamu i Chauãe i Ūünexŭ i ngëma ngunexŭgŭgu, rŭ tá chauchigagu nidexagŭ. ¹⁹ Rŭ naãnetŭwewa tá ichanawëx i mexŭgŭ i taguma nüxŭ idauxŭ. Rŭ ñoma i naãnewa tá ichanawëx i cuèxruŭgŭ i nagŭ, rŭ ŭxŭema, rŭ taemaxŭ. ²⁰ Rŭ üèxcŭ rŭ tá nixoema rŭ tauemacŭ rŭ tá nagŭrŭŭ naduema naxŭpa na wenaxãrŭ núma naxŭxŭ ya Cori. Rŭ ngëma ngunexŭ i nagu núma naxŭxŭ, rŭ wŭxi i ngunexŭ i mexëchixŭ tá nixĭ. ²¹ Rŭ guxãma ya yĭxema Corina çaxe na tŭxŭ nangŭxëxŭcèx, rŭ tá tamaxë’ ”,

ñanagŭrŭ ga yema orewa. ²² Rŭ ñanagŭrŭ ga Pedru: —Pa Duŭxŭgŭ Pa Yudíugŭx, ĩperŭxĭnŭe i ñaã ore! Rŭ pema rŭ meãma nüxŭ pecuèx rŭ Ngechuchu ga Nacharétucŭãx rŭ guma nixĭ ga wŭxi ga yatŭ ga Tupana pepëxewa nüxŭ yaxucŭ na Nanexŭchi yĭxŭ. Rŭ yemacèx ga Tupana rŭ norŭ poramaã nüxŭ nanaxŭxëe ga muxŭma ga mexŭgŭ rŭ cuèxruŭgŭ ga noxri taguma nüxŭ idauxŭ. ²³ —Rŭ Tupana pexna nanamu ga guma

Ngechuchu na pecaducèx nayuxücèx yerü yemaãcü nanaxüxchaŭ ga Tupana, rü yemaãcü nagu narüxĩnü ga noxri tauta naxüxgux ga naãne. Rü pema penamu ga yatügü ga tama yaxõgüxü na yayauxgüãxücèx rü curuchawa na yapotagüãxücèx. Rü yemaãcü penayuxëë. ²⁴—Rü woo nayuchirëx natürü tama yexma nayacuèx, yerü Tupana wena nanamaxëë rü ínanadaxëë. Rü yemaãcü ga yema yu rü taxuacüma marü nüxü narüporamaëëcha. ²⁵—Yerü ga ãëxgacü ga Dabí rü Ngechuchuchigagu nidexa, rü ñanagürü:

“Guxüguma nachauxütagu ya Cori ya Tupana rü choxü narüngüxëë na taxucèxma chaxoegaãëxücèx. ²⁶Rü yemacèx marü chataãë rü taãëxü ga oremaã chidexa. Rü choma nüxü chacuèx na mexü tá choxü üpetüxü i ngëxguma chayuxgux. ²⁷Erü cuma täütáma yuexüchicawa choxü cutèx, rü täütáma cunaxwèxe na yayixixü i chaxune i choma ya Cune ya Üünecü na chiixü. ²⁸Marü choxü nüxü cucuèxëë i ñuxãcü tá chanayaxu i maxü i taguma gúxü, rü tá poraãcü choxü cutaãëxëë, erü chomaã tá icurüxãüx”,

ñanagürü ga Dabí. ²⁹Rü ñanagürü ga Pedru: —Pa Chaueneëgüx, rü aixcüma pemaã nüxü chixu na nayuxü ga nuxcümaücü ga tórü ãëxgacü ga Dabí, rü marü inatèx, rü ñuxma rü ta tatanüwa nangëxma i naxmaxü. ³⁰—Natürü nüma ga Dabí rü wüxi ga Tupanaärü orearü uruü nixĩ. Rü yemacèx nüxü nacuèx rü wüxi ga nataa tá nixĩ i ãëxgacü ya Cristuxü ingucuchicü, yerü ga Tupana rü yemaãcü namaã inaxuneta. ³¹—Rü yemacèx nuxcümaxüchima ga Dabí rü ñoma marü nüxü nadauxuchixürüü nüxü nixu rü Cristu rü tá yuwa ínarüda rü täütáma naxmaxüwa nangëxmaëcha rü täütáma niyixi i naxüne. ³²—Rü ñuxma ya Tupana rü marü wena nanamaxëë ga guma Ngechuchu, rü guxãma ga toma rü nüxü tadaugü na wena namaxüxü, rü ngëmacèx pemaã nüxü tixuchiga. ³³—Rü Tupana rü daxüguxü ga naãnewa nanaga na norü tügü necüwawa yanatoxücèx. Rü Tanatü ya Tupana rü marü nüxna nanamu ga Naãë i Üünexü ga nuxcüma nüxü yaxuxü rü tá nuã na namuãxü. Rü ñuxma ya yima Ngechuchu rü núma totanüwa nanamu i ngëma Naãë i Üünexü. Rü ngëma Naãë nuã üxü nixĩ i ñuxma nüxü pedauxü rü nüxü pexĩnüëxü. ³⁴⁻³⁵—Rü taguma daxüwa naxü ga Dabí, natürü nümatama rü ñanagürü:

“Tupana rü chorü Cori ya Cristumaã nüxü nixu rü ñanagürü: ‘¡Rü chorü tügü necüwawa rüto ñuxmatáta cuxmëxwa chanangëxmagüxëë i curü uwanügü!’ ”

ñanagürü. ³⁶Rü ñanagürü ga Pedru: —Name nixĩ i guxãma i pema i Yudíugü na nüxü pecuëxgüxü rü guma Ngechuchu ga curuchawa peyapotacü, rü Tupana rü marü perü Cori ya Cristuxü nayaxixëë —ñanagürü ga Pedru. ³⁷Rü yexguma yemaxü naxĩnüëgu ga yema duüxügü ga yéma yexmagüxü, rü poraãcü nanaxixãchiãëgü. Rü Pedruna nacagüe, rü yema togü ga Pedrumücügüna rü ta nacagüe, rü ñanagürügü: —¿Rü tacü tá taxüexü i ñuxmax, Pa Toeneëgüx? —ñanagürügü. ³⁸Rü Pedru nanangãxü, rü ñanagürü: —¡Nüxü perüxoe i pecüma i chixexü rü Tupanacèx pedaugüe rü Ngechuchuégagu ípebaiü na pexü nüxü nangechaüxücèx i perü pecadugü ya Tupana! Rü Tupana tá pexna nanamu i Naãë i Üünexü. ³⁹—Rü ñaã Tupanaärü uneta, rü pexcèx nixĩ, rü pexacügücèx, rü guxü i duüxügü i yaxüwa ngëxmagüxücèx nixĩ. Erü guxü i duüxügü i tórü Cori ya Tupana nügüxütawa naxcèx çaxücèx nixĩ i ngëma uneta —ñanagürü ga Pedru. ⁴⁰Rü yema oremaã rü muxüma ga to ga oremaã nayaxucuxëgü ga Pedru, rü ñanagürü: —¡Nüxna pixigachi i ngëma duüxügü i chixexü ügüxü na pema rü ta tama chixexü pexügüxücèx! —ñanagürü. ⁴¹Rü yema duüxügü ga naga ñnüëxü ga yema ore ga Pedru namaã nüxü ixuxü, rü ínabaiü. Rü yema ngunexügu rü poraãcü nayexera ga na yamuxü ga yema yaxõgüxü.

Rü 3,000 ga duŭxŭgŭ nixī ga Ngechuchuaxŭ yaxōgŭxŭ ga yexguma. ⁴² Rü yema yexwacèx yaxōgŭxŭ rŭ guxŭguma inarŭxīnŭē ga yema ngŭexŭgŭ ga Ngechuchu imugŭxŭârŭ ngŭxēētae. Rü meã nŭgŭmaã nangaugŭ ga norŭ yemaxŭgŭ. Rü guxŭguma nayumŭxēgŭxŭ rŭ chibŭcèx nangutaquēxegŭxŭ.

Yema yaxōgŭxŭ rŭ aixcŭma nŭgŭ nangechaxŭgŭ

⁴³ Rü yema ngŭexŭgŭ ga Ngechuchu imugŭxŭ rŭ nanaxŭgŭ ga muxŭma ga mexŭgŭ ga Tupanaârŭ poramaã naxŭgŭxŭ. Rü yexguma yemaxŭ nadaugŭgu ga togŭ ga duŭxŭgŭ, rŭ poraãcŭ nabaixãchiãēgŭ ga guxŭma. ⁴⁴ Rü guxŭma ga yema yaxōgŭxŭ, rŭ wŭxigu narŭxīnŭē. Rü meã nŭgŭmaã nangaugŭ ga norŭ yemaxŭgŭ. ⁴⁵ Rü namaã nataxegŭxŭ ga norŭ naãnegŭ rŭ guxŭma ga togŭ ga norŭ yemaxŭgŭ. Rü nŭgŭmaã ngŭxŭ nitoyegŭxŭ ga yema dĭeru yexgumarŭŭ na ñuxre natŭmawèxexŭ ga norŭ ònatanŭ ga wŭxichigŭ. ⁴⁶ Rü guxŭ ga ngunexŭgu tupauca ga taxŭnewa nangutaquēxegŭxŭ, rŭ chibŭcèx nangutaquēxegŭxŭ ga napatagŭwa, rŭ taãēãcŭma nŭgŭmaã nachibŭexŭ. ⁴⁷ Rü guxŭguma Tupanaxŭ nicuèxŭŭgŭxŭ. Rü guxŭma ga yema iãnecŭãx rŭ nŭxŭ nangechaŭgŭ ga yema yaxōgŭxŭ. Rü wŭxichigŭ ga ngunexŭgu rŭ nimuētanŭ ga duŭxŭgŭ ga yaxōgŭxŭ, yerŭ nŭma ga Cori ga Ngechuchu rŭ nŭxŭ narŭngŭxēē na nayauxgŭãxŭcèx ga norŭ maxŭ i taguma gŭxŭ.

3

Naxcèx nitaane ga wŭxi ga yatŭ ga chixeparacŭ

¹ Rü wŭxi ga ngunexŭgu ga Pedru rŭ Cuáŭ rŭ tomaēxpŭxarŭ oragu ga yáuanecŭ rŭ tupauca ga taxŭnewa naxī, yerŭ yema nixī ga yumŭxēârŭ ora. ² Rü yéma guma tupauca ga taxŭnewa nayexma ga wŭxi ga yatŭ ga norŭ bucŭmatama chixeparacŭ. Rü guxŭ ga ngunexŭgu rŭ natanŭxŭgŭ rŭ guma tupauca ga taxŭneârŭ iãx ga Mexēchixŭgu ãegaxŭgu nayamugŭxŭ, na dĭerucèx ínacauŭxŭcèx nŭxna ga duŭxŭgŭ ga guma tupauca ga taxŭnegu chocuxŭxŭ. ³ Rü yexguma Pedru rŭ Cuáŭxŭ nadèuxgux ga tupauca ga taxŭnegu na nachocuxŭ, rŭ guma chixeparacŭ rŭ nŭxŭ nawémèx rŭ dĭerucèx nŭxna naca. ⁴ Rü Pedru rŭ Cuáŭ meãma nŭxŭ narŭdaunŭ, rŭ Pedru rŭ ñanagŭrŭ nŭxŭ: —jToxŭ nadawenŭ! —ñanagŭrŭ. ⁵ Rü nŭma ga yatŭ rŭ nŭxŭ nadawenŭ, yerŭ nŭma nŭxŭ nacuèxgu rŭ chi tacŭ nŭxna naxãgŭ. ⁶ Natŭrŭ ga Pedru rŭ ñanagŭrŭ nŭxŭ: —Choxŭ nataxuma i dĭeru. Natŭrŭ ngēma choxŭ ngēxmaxŭ tá cuxna chaxã. Rü naegagu ya Ngechuchu ya Cristu ya Nacharétucŭãx cuxŭ chamu, rŭ jinachi rŭ ixŭ! —ñanagŭrŭ. ⁷ Rü yema ñaxguwena ga Pedru, rŭ norŭ tŭgŭnemèxēgu nayayauxãchi, rŭ inanachixēē, rŭ yexgumatama napura ga namèxtŭxŭgŭwa rŭ nacusŭgŭwa. ⁸ Rü nayuxnagŭ rŭ inachi, rŭ inanaxŭgŭ na iyaxŭxŭ. Rü nŭmatama iyaxŭãcŭma Pedru rŭ Cuáŭwe tupauca ga taxŭnegu naxŭcu. Rü nanayuxnagŭane rŭ Tupanaxŭ nicuèxŭŭ. ⁹ Rü guxŭma ga duŭxŭgŭ nŭxŭ nadaugŭ ga na íyaxŭxŭ, rŭ Tupanaxŭ na yacuèxŭŭxŭ. ¹⁰ Rü poraãcŭ nabaixãchiãēgŭ ga duŭxŭgŭ naxcèx ga yema nŭxŭ ngupetŭxŭ ga guma yatŭ. Yerŭ nŭxŭ nacuèxgŭ ga na guma yŭxŭ ga tupauca ga taxŭneârŭ iãx ga Mexēchixŭgu ãegaxŭwa rŭtooxŭchirécŭ rŭ yéma dĭerucèx ícacŭ.

Tupaucacŭwawa yexmaxŭ ga chopetŭchica ga Charomóŭarŭ Ūpetŭchicagu ãégaxŭwa nidexa ga Pedru

¹¹ Rü guma chixeparachirécŭ ga marŭ naxcèx yataanecŭ, rŭ tama Pedru rŭ Cuáŭna nixŭgachichaŭ. Rü guma tupauca ga taxŭnecŭwawa nayexma ga wŭxi ga chopetŭchica ga “Charomóŭârŭ Ūpetŭchicagu” ãegaxŭ. Rü yema chopetŭchicawa rŭ Pedru rŭ Cuáŭcèx naxŭtaquēxe ga guxŭma ga duŭxŭgŭ yerŭ poraãcŭ nabaixãchiãēgŭ. ¹² Rü yexguma Pedru nŭxŭ dèuxgu ga yema

duūxūgū ga yéma naxcèx ìtaquēxegūxū, rü ñanagürü nüxū: —Pa Chau-tanūxūgū i Yudíugūx, ¿Tūxcūū pebaixāchie namaã i ngēma ñaã yatūmaã ngu-petūxū? ¿Rü tūxcūū toxū perūdaunū ñoma torū poramaã rü torū mexūmaã tanamexēēxūrūū? ¹³ —Nuxcūmaūgücū ga tórū oxigū ga Abráū rü Ichaá rü Acobu rü togū ga tórū oxigū rü nüxū nayaxōgū ga Tupana. Rü yimatama Tupana nixī ya ñuxma Ngechuchuxū taxēēcū, na guxūārū yexera yīxūcèx. Rü gumatama Ngechuchu ya Tupanaārū ngūxēēruū ixīcū nixī ga pema āēxgacū ga Piratuxūtawa penagagücū. Rü yexguma nüxū yangéxchaūgu ga Piratu, rü pema rü tama penaxwèxegū ga na yangéāxū. ¹⁴ —Pema rü tama penaxwèxe ga na ínguxuchixū ga guma üünecū ga aixcūma mecū ga Ngechuchu, natürü naxcèx ípeca na pexcèx ínguxuchixēēāxūcèx ga wūxi ga máētaxū. ¹⁵ —Rü yemaācū pematama peyamèxgū ga guma Ngechuchu ya tūxū maxēēēcū. Natürü ga Tupana rü wena nanamaxēē. Rü toma nixī ga nüxū tadaugūxū ga wena na namaxūxū. ¹⁶ —Rü ñaã yatū ga chixeparachiréxū i pema nüxū pedauxū rü nüxū pecuáxū rü marū naxcèx nitaane erū Ngechuchuaxū nayaxō. Rü ngēma Ngechuchuaxū na yaxōōxūcèx nixī i naxcèx yataanexū ngēma ñuxma guxāma i pema nüxū pedauxūrūū. ¹⁷ —Rü dücax i ñuxma Pa Chaueneēgūx, rü yexguma pema rü wūxigu perū āēxgacūgūmaã peyamèxgūgu ga Ngechuchu, rü tama nüxū pecuèxgū ga tacū na pexüexū. ¹⁸ —Natürü ga Tupana rü yemaācū nayanguxēē ga yema uneta ga nuxcūma nūmatama nüxū yaxuxū nawa ga guxūma ga norū orearū uruūgū. Yerū yema norū ore ga ūmatūxūwa rü ñanagürü:

“Cristu rü tá ngúxū ninge”,

ñanagürü. ¹⁹⁻²⁰ —Rü ngēmacèx, Pa Chaueneēgūx, rü name nixī i nüxū perūxoe i pecūma i chixexū, rü Tupanacèx pedaugū, rü nüxū peyaxōgū na nūma pexū ínapíāxūcèx i perū pepadugū. Rü ngēxguma i nūma rü tá pexū nataāēgūxēē, rü tá nūma nanamu ya Ngechuchu ga noxritama naāne ixūgūgu pexcèx nüxū naxunetacū na perū āēxgacū ya Cristu na yīxūcèx. ²¹ —Natürü i ñuxma rü Tupana nanaxwèxe i daxūguxū i naānegu na naxāūxū ya Ngechuchu ñuxmatáta nūma ya Tupana wena namexēēāgu i guxūma i ñoma i naānewa ngēxmaxū. Yerū yemaācū nixī ga nüxū yaxuxū ga Tupana nawa ga nuxcūmaūgūxū ga norū orearū uruūgū ga ixūūnexū. ²² —Rü Moīché rü tórū oxigūmaã nüxū nixu rü ñanagürü:

“Rü perū Cori ya Tupana rü petanūwa tá nüxū naxuneta i wūxi i norū orearū uruū i chauxrūū ixīxū. Rü name nixī na naga pexīnūēxū i guxūma i ngēma pemaã nüxū yaxuxū. ²³ Rü texé ya tatanūwa tama naga ínūxē i ngēma orearū uruū, rü tá tūxū ínatēxūchi i tatanūwa”,

ñanagürü ga Moīché. ²⁴ —Rü Chamue rü guxūma ga togū ga Tupanaārū orearū uruūgū ga naweama ūgūxū rü ta nüxū nixugūe ga tacū tá na ūpetūxū i ñomaūcūū. ²⁵ —Rü nuxcūmaxūchima ga Tupana rü tórū oxi ga Abráūmaã nüxū nixu rü ñanagürü:

“Rü wūxi i cutaa tá nixī i nüxū rüngūxēēxū i guxūma i duūxūgū i ñoma i naānecūāx”,

ñanagürü. Rü yemaācū ta Tupana ínaxuneta nawa ga nuxcūmaūgūxū ga norū orearū uruūgū. Rü pemaã nüxū chixu i ñuxma, rü pexcèx nixī ga yema unetagū ga nuxcūmaūgūxū ga orearū uruūgūwa tórū oxigūmaã nüxū yaxuxū ga Tupana. ²⁶ —Rü pemaã nüxū chixu Pa Chautanūxūgū i Yudíugūx, rü yexguma Tupana wena namaxēēgu ga Nane ga Ngechuchu rü petanūwaxira nanamu na pexū nangūxēēxūcèx, erū nanaxwèxe i wūxichigū i pema na nüxū perūxoexū i pecūmagū i chixexū —ñanagürü ga Pedru.

4

Āëxgacügüpëxewa nayexmagü ga Pedru rü Cuáü

¹ Rü yexguma duüxügümaã iyadexagügu ga Pedru rü Cuáü, rü yexgumayane yéma nangugü ga guma tupauca ga taxünearü purichíarü äëxgacü, rü paigü, rü Chaduchéugü. ² Rü Pedru rü Cuáümaã nanuë ga paigü yerü duüxügüxü nangúexëë ga na marü wena namaxüxü ga Ngechuchu, rü naxrüü tá ta wena namaxëxü i guxüma i duüxügü i marü yuexü. ³ Rü ínanayauxü, rü poxcupataügu nanawocu ñuxmata moxüãcü, yerü marü nayáuane. ⁴ Natürü muxüma ga yema duüxügü ga nüxü ñnüëxü ga yema Tupanaärü ore rü nayaxögü. Rü 5000 wa nangu ga yatüxüxica ixugügu. ⁵ Rü moxüãcü Yerucharéüwa nangutaquëxegü ga Yudíugüarü äëxgacügü namaã ga naerugü, rü ngúexëëruügü ga ore ga mugüwa nguxëëtaegüxü. ⁶ Rü yéma nayexma ta ga Aná ga paigüeru ixícü, rü Caipá, rü Cuáü, rü Areyáüdrü, rü guxüma ga yema togü ga paigü ga paigüerutanüxü ixígüxü. ⁷ Rü nanamu na naxütawa nagagüãxücëx ga Pedru rü Cuáü. Rü yexma norü ngäxütanügu nanachigüxëë rü nüxna nacagü, rü ñanagürügü: —¿Texé pexü tamu, rü texé pexna tanaxã i pora na penamexëëxücëx i ñaã yatü? —ñanagürügü. ⁸⁻⁹ Rü Pedruwa nayexma ga Tupanaãë ga Ünexü rü nanaporaxëë. Rü yemacëx ga Pedru rü nanangãxü, rü ñanagürü: —Pa Íãneärü Āëxgacügüx, rü Pa Yudíugüarü Āëxgacügüerugüx, rü ñuxma toxna naxcëx peca naxcëx ga norü mexëë i ñaã chixeparachiréxü erü nüxü pecuáxchaü ga ñuxãcü na namexü. ¹⁰ —Rü ñuxma tá pemaã nüxü tixu na nüxü pecuáxücëx i guxãma i pema rü nüxü nacüëxgüxücëx i guxüma i tatanüxügü i Yudíugu. Rü ñaã yatü i ñuxma pepëxewa ngëxmaxü rü Ngechuchu ya Cristu ya Nacharétucüãx nixí ga namexëëcü. Rü guma nixí ga pema curuchawa peyapotacü rü peyuxëëcü. Natürü ga Tupana rü wena nanamaxëë. ¹¹ —Rü gumatama Ngechuchu nixí ga pema nüxü pexoecü. Natürü ga Tupana rü nayamucuchi na guxüarü äëgacü yixíxücëx. ¹² —Rü yima Ngechuchuxicatama nixí ya tórü maxëëëruü, erü yixicatama nixí ga Tupana nüxü unetacü i ñoma i naanewa na tüxü namaxëëëxücëx —ñanagürü ga Pedru. ¹³ Rü yexguma yema äëxgacügü nüxü daugügu ga ñuxãcü tama muüëãcüma na yadexagüxü ga Pedru rü Cuáü, rü nabaixãchiãëgü, yerü nüxü nicuëxãchitanü ga tama meã poperaxü na yacuáxü rü puracütanüxümare yixígüxü. Rü aixcüma nüxü nicuëxãchitanü ga Ngechuchuarü ngúexügü na yixígüxü. ¹⁴ Rü ñuxüchi nüxü nadaugü ta ga guma yatü ga rümecü ga Pedru rü Cuáüxütagu na nachixü. Rü yemacëx ga yema äëxgacügü rü taxuacüma ñuxü ñanagürügüega nachiga ga yema ngupetüxü. ¹⁵ Rü yexguma ga yema äëxgacügü rü ínanamuxü ga yema ínangutaquëxegüxüwa, rü nüxícatama nügümaã nidexagü. ¹⁶ Rü ñanagürügü: —¿Tacü tá namaã ixüexü i ñaã yatügü? Erü guxüma i Yerucharéüçüãx i duüxügü rü nüxü nacüëxgü i ngëma mexü i taxü i naxügüxü, rü taxuacüma itayacux. ¹⁷ —Natürü ngëma na tama yexeraãcü duüxügütanüwa nanguchigaxücëx i ngëma ngupetüxü, ¡rü ngíxã tanamuüëxëë na ñuxmawena rü taxúemaãma ngëma Ngechuchuchigagu yadexagüxücëx! —ñanagürügü. ¹⁸ Rü wenaxärü Pedru rü Cuáücëx nacagü, rü nüxna naxãga na tama Ngechuchuchigamaã yadexagüxücëx, rü bai i texéxü na nangúexëëxücëx i nachiga. ¹⁹ Natürü ga Pedru rü Cuáü rü nanangãxügü, rü ñanagürügü: —¡Nagu perüxíñüë i pematama! ¿Rü namexü i Tupanapëxewa na pega taxíñüëxü rü ëxna Tupanaga taxíñüëxü? ²⁰ —Erü toma rü taxuacüma nüxü tarüxoe na nüxü tixuxü ga yema nüxü tadaugüxü rü nüxü taxíñüëxü —ñanagürügü. ²¹ Rü yexguma ga yema äëxgacügü rü nayaxãxünegü rü yemaãcü ínayamugü, yerü

nataxuma ga tacücèx na napoxcueãxü rü duüxügüxü namuüë, yerü guxüma ga duüxügü rü Tupanaxü nicuèxüügü naxcèx ga yema nüxü ngupetüxü ga guma yatü ga chixeparawa rümecü. ²² Rü guma yatü ga yemaãcü Tupanaãrü poramaã naxcèx itaanecü, rü 40 arü yexera nixi ga norü taunecü.

Yema yaxögüxü rü Tupanaarü ngüxëcèx ínacagü

²³ Rü yexguma marü ínamuxüãxgu, rü Pedru rü Cuáü rü namücügü íyexmagüxüwa naxi. Rü namaã nüxü nixugüe ga guxüma ga yema ore ga Yudiügarü ãëxgacügü rü paigüarü ãëxgacügü namaã nüxü ixuxü. ²⁴ Rü yexguma Pedru rü Cuáüxü naxinüëgu ga namücügü, rü guxüma wüxigu nayumüxëgü rü Tupanamaã nidexagü rü ñanagürügü: –Pa Corix, cuma cunaxü ga daxügüxü ga naãne rü ñoma ga naãne, rü taxü i taxtü, rü guxüma i tacü i nawa ngëxmaxü. ²⁵ –Rü cumatama nixi ga nuxcüma Cuãe i Üünexüxü cumuxü na curü ngüxëëruü ga Dabíwa yanadexaxüçèx rü ñaxüçèx:

“¿Tüxcüü ínipuræ i ñoma i naãnecüãx i duüxügü i tama yaxögüxü? ¿Rü tüxcüü ngëma natüçèxmamare ixigüxügu narüxñüë i guxü i nachiüãnegüãx?

²⁶ –Nümagü i nachiüãnegüarü ãëxgacügü rü Tupanamaã nanuë, rü nügümaã nangutaquëxegü na wüxigu nügümaã nagu naxinüëxüçèx na ñuxäcü tá nüxü na nayexeragüxüçèx ya Cori ya Tupana rü Nane ya nüxü naxunetacü ya Cristu”,

ñanagürü. ²⁷ –Rü aixcüma nixi ga ñoma ga ñãnewa ga ãëxgacügü ga Erode rü Piratu ga nangutaquëxegüxü namaã ga to ga nachiüãnegüçüãx rü totanüxü ga Yudiügü, na chixexü naxügüxüçèx namaã ya curü ngüxëëruü ya üünecü ya Ngechuchu ya Cristuxü nüxü cuxunetacü. ²⁸ –Rü yemaãcü ga nümagü rü nayanguxëë ga guxüma ga yema cuma nuxcümmama nagu curüxñüxü rü nüxü cuxunetaxü rü tá na yanguxü. ²⁹ –¡Rü dücax, Pa Corix, cuma nüxü cucuèx na ñuxäcü toxü naxãxñüegüxü! Toma nixi i curü ngüxëëruü rü tanaxwèxe na toxü cuporaexëëxü na tama tamuüëãcüma nüxü tixuxüçèx i curü ore. ³⁰ –¡Rü curü poramaã nameëxëë i duüxügü i idaaweexü! ¡Rü duüxügüxü nawëx i cuëxruügü i curü poramaã cuxüxü i naegagu ya curü ngüxëëruü ya üünecü ya Ngechuchu! –ñanagürügü. ³¹ Rü yexguma yumüxëwa nüxü nachauegu, rü guma ípata ga nawa nangutaquëxegüne rü naxiãxãchi. Rü Tupanaãe i Üünexü rü nüxna nangu ga guxüma. Rü tama namuüëãcüma nüxü nixugüe ga Tupanaãrü ore.

Yema yaxögüxüãrü yemaxügü rü guxüãrü nixi

³² Rü namu ga yema yaxögüxü. Rü guxüma rü wüxigu narüxñüë. Rü taxuüma nagu narüxñü ga noxrüxicatama na yixü ga norü yemaxügü, natürü guxüma ga namücügümaã nangau. ³³ Rü yema ngüexügü ga Ngechuchu imugüxü na Tupa-naãrü puracü naxügüxüçèx, rü Tupanaãrü poramaã nüxü nixugüe ga ñuxäcü wena na namaxüxü ga Cori ga Ngechuchu. Rü Tupana rü poraãcü nüxü narüngüxëë ga guxüma ga yema yaxögüxü. ³⁴⁻³⁵ Rü natanüwa rü nataxuma ga wüxi ga nüxü nataxuxü, yerü guxüma ga yema nüxü yexmaxü ga naãnegü rü ëxna ípatagü, rü namaã nataxegü. Rü yema díëru ga ngixü nayauxgücü rü yema ngixü nangegü, rü yema ngüexügü ga Ngechuchu imugüxüna ngixü nayaxägü. Rü ñuxüchi nügü ngixü ninuüxü ga ñuxrechigü nüxü nataxuxü ga wüxichigü. ³⁶ Rü nayexma ga wüxi ga yatü ga Lebítanüxü ga Chiprecüãx ga Yúchegu ãegacü. Rü yema ngüexügü ga Ngechuchu imugüxü na Tupanaãrü puracü naxügüxüçèx rü Bernabémaã nanaxugü. Rü ngëma naega, rü: “Taãëxëëruü”, ñaxüchiga nixi. ³⁷ Rü nüma ga Bernabé rü nüxü nayexma ga wüxi ga naãne, rü namaã nataxe. Rü yema ngüexügü ga Ngechuchu imugüxüxütawa ngixü nana ga yema díëru.

5

Ananiã rü Chacuíraarü pecaduchiga

¹ Rŭ nayexma ga wŭxi ga yatŭ ga Ananiãgu ãegaxŭ rŭ Chacuíra ga namèx. Rŭ nŭmagŭ rŭ namaã nataxegŭ ga wŭxi ga norŭ naãne. ² Natŭrŭ nŭma ga Ananiã rŭ namèxmaã wŭxigu nagu narŭxĩnŭe na nŭgŭxŭ ngĩxne nayauxgŭxŭ ga ñuxre ga yema naãnetanŭ. Rŭ ñuxŭchi yema ngúexŭgŭ ga Ngechuchu imugŭxŭxŭtawana ngĩxŭ nangegŭ ga yema nŭxŭ íyaxŭcŭ. ³ Rŭ yexguma ga Pedru rŭ ñanagŭrŭ nŭxŭ: —Pa Ananiãx, ¿tŭxcŭŭ ngoxo i Chatanága cuxĩnŭ rŭ Tupanaãe i Ūñexŭmaã quidora, rŭ cugŭxŭ ngĩxne cuyaxu i ñuxre i ngẽma curŭ naãnetanŭ? ⁴ —¿Éxna yexguma tauta namaã cutaxegu, rŭ tama éxna cuxrŭ yĩxŭ ga yema naãne? ¿Rŭ yexguma namaã cutaxegu, tama éxna cuxrŭ yĩxŭ ga yema dŭeru na ngĩxŭ cuguxẽexŭcèx i ngẽma cuma cunaxwèxexŭãcŭma? ¿Tŭxcŭŭ i cunaxŭxŭ i ñaã? Tama yatŭgŭmaãxĩca quidora, natŭrŭ Tupanamaã rŭ ta nixĩ i quidoraxŭ —ñanagŭrŭ ga Pedru. ⁵ Rŭ yexguma yema orexŭ naxĩnŭgu ga Ananiã, rŭ yuxŭma inayangu. Rŭ poraãcŭxŭchima namuũe ga guxŭma ga yema duŭxŭgŭ ga yexguma yemaxŭ nacuáchigagŭgu. ⁶ Rŭ ñuxre ga yema yexmagŭxŭ ga ngextŭxŭxŭgŭ rŭ nanayauxgŭ ga naxŭne, rŭ nananuquegŭ, rŭ inayatèxgŭ. ⁷ Rŭ tomaèxpŭx ga ora ngupetŭxgu rŭ íngu ga namèx. Rŭ yexma ixŭcu natŭrŭ tama nŭxŭ icuèx ga tacŭ na ngupetŭxŭ. ⁸ Rŭ Pedru ngĩxna naca, rŭ ñanagŭrŭ: —¿Yema natanŭ ga ipexunetaxŭgu yĩxŭ ga namaã petaxegŭxŭ ga perŭ naãne? —ñanagŭrŭ. Rŭ ngĩma rŭ: —Ngŭ, ngẽxgumaèxpŭxgu nixĩ —ngĩgŭrŭgŭ. ⁹ Rŭ Pedru rŭ ñanagŭrŭ ngĩxŭ: —¿Tŭxcŭŭ pegŭmaã ngẽmaãcŭ wŭxigu perŭxĩnŭe na namaã pidoraexŭcèx i Tupanaãe i Ūñexŭ? ¿Dŭcèx, ngẽma cutexŭ iyatèxgŭxŭ rŭ marŭ ínangugŭ, rŭ ñuxma rŭ cuxŭ rŭ tá ta ngema nangegŭ! —ñanagŭrŭ. ¹⁰ Rŭ yexgumatama yuxcŭma Pedrupèxegu iyangu. Rŭ yexguma nachocuxgu ga yema ngextŭxŭxŭgŭ, rŭ yuxcŭma ngĩxŭ inyangaugŭ. Rŭ ngĩxŭ nayauxgŭ, rŭ ngĩtexŭtagutama ngĩxŭ nayatèxgŭ. ¹¹ Rŭ yexguma nŭxŭ nacuèxgŭgu ga yema ngupetŭxŭ, rŭ guxŭma ga yema yaxŭgŭxŭ rŭ yema togŭ ga duŭxŭgŭ rŭ ta poraãcŭxŭchima namuũe.

Tupanaãrŭ poramaã nanaxŭgŭ ga muxŭma ga mexŭgŭ

¹² Rŭ yema ngúexŭgŭ ga Ngechuchu imugŭxŭ, rŭ duŭxŭgŭpèxewa nanaxŭgŭ ga muxŭma ga mexŭgŭ ga Tupanaãrŭ poramaã naxŭgŭxŭ. Rŭ inanawèxgŭ ga muxŭma ga cuèxruŭgŭ. Rŭ guxŭma ga yema yaxŭgŭxŭ rŭ guxŭguma naxĩtaquèxegŭxŭ nagu ga yema tupauca ga taxŭnewa yexmaxŭ ga chopetŭchica ga Charomóũarŭ Ūpetŭchicagu ãegaxŭ. ¹³ Rŭ yema togŭ ga duŭxŭgŭ ga tama yaxŭgŭxŭ rŭ namuũe na yema yaxŭgŭxŭtanŭgu naxŭgŭxŭ, natŭrŭ poraãcŭ yema yaxŭgŭxŭxŭ nangechaŭgŭ. ¹⁴ Rŭ nimuètanũama ga yema yaxŭgŭxŭ yerŭ muxŭma ga duŭxŭgŭ ga yatŭxŭgŭ rŭ ngexŭgŭ rŭ Coriaxŭ nayaxŭgŭetanŭ. ¹⁵ Rŭ nŭma ga duŭxŭgŭ rŭ itamŭgŭgu nayamugŭxŭ ga idaaweexŭ naxchápenuũmaã rŭ norŭ caruŭgŭmaã na yexguma Pedru yema ũpetŭxgu, rŭ naxchipetamare nŭxŭ na nachixŭcèx. ¹⁶ Rŭ yexgumarŭŭ ta rŭ yema naxĩtaquèxegŭxŭ ga muxŭma ga duŭxŭgŭ ga Yerucharéũarŭ ngaicamana imugŭne ga ñanewa ne íxŭ. Rŭ yema naxcèx nanagagŭxŭ ga yema idaaweexŭ rŭ yema ngoxoãxgŭxŭ. Rŭ guxŭma naxcèx nitaanegŭ.

Pedru rŭ Cuáũwe ningèxŭtanŭ ga paigŭ

¹⁷ Rŭ yexguma ga guma paigŭeru rŭ guxŭma ga yema natanŭxŭgŭ ga Chaduchéugŭ rŭ poraãcŭ nixŭũxŭchigŭ naxcèx ga yema mexŭgŭ ga naxŭgŭxŭ ga yema ngúexŭgŭ ga Ngechuchu imugŭxŭ. ¹⁸ Rŭ yemacèx norŭ purichíagŭxŭ namu na ínayauxŭãxŭcèx ga yema ngúexŭgŭ. Rŭ ñaneãrŭ

poxcupataũgu nanapoxcue. ¹⁹ Natürü Coriarü orearü ngeruũ ga daxũcũãx
 naxcèx nayawãxna ga yema poxcupataũãrũ ããxgũ ga chũtacü. Rũ Ínanamuxũ,
 rũ ñanagürü nüxũ: ²⁰ –¡Ngema tupauca ya taxũnewa pexĩ, rũ guxũ i
 duũxũgũmaã nüxũ pixu na ñuxãcü Tupana inaxãxũ i ngexwacaxũxũ i maxũ!
 –ñanagürü. ²¹ Rũ yexguma ga yema ngúexũgũ ga Ngechuchu imugũxũ rũ
 naga naxĩnũe ga yema ore. Rũ moxũãcü ga pèxmamaxũchi rũ tupauca ga
 taxũnewa naxĩ, rũ duũxũgũxũ nangúexẽe. Rũ yoxni ga guma paigüeru rũ
 natanũxũgũ, rũ nanangutaquẽxexẽe ga guxũma ga yema togü ga ãẽxgacũgũ
 ga ãẽxgacũgũtũcumüwa ügũxũ. Rũ poxcupataũwa nanamugũ ga purichíagũ
 na yagagũãxũcèx ga yema ngúexũgũ ga Ngechuchu imugũxũ. ²²⁻²³ Rũ
 yexguma poxcupataũwa nangugũga ga yema purichíagũ, rũ taxuxũxũma
 inayangaugũ. Rũ nayawoegu, rũ nüxũ nayarũxugüe, rũ ñanagürügũ: –
 Yima poxcupataũ rũ narüwãxta, rũ meãma nataichirẽx, rũ purichíagũ nüxna
 nadaugũ i naãxwa. Natürü ngẽxguma tayawãxnagu, rũ taxuxũxũma itayan-
 gaugũ i aixepewa –ñanagürügũ. ²⁴ Rũ yexguma yema orexũ naxĩnũegu
 ga yema paigüeru rũ yema togü ga paigũ ga ãẽxgacũgũ ixĩgũxũ rũ yema
 tupauca ga taxũneãrũ purichíagũarũ ãẽxgacũ rũ guxũma nabaixãchiãegũ
 yerü tama nüxũ nacuèxgũ ga ngextá tá na nanguxũ ga guxũma ga yema
 rũ ñuxãcü tá na iyanaxoxẽegũãxũ. ²⁵ Rũ yexguma yemagu ínaxĩnũeyane
 rũ yema nangu ga wüxi ga yatü, rũ namaã nüxũ nixu, rũ ñanagürü: –
 Ngẽma yatügũ i pepoxcuechirẽxũ, rũ tupauca ya taxũnewa nangẽxmagũ,
 rũ ínanangúexẽe i duũxũgũ –ñanagürü. ²⁶ Rũ yema naxĩ ga tupauca ga
 taxũneãrũ purichíagũarũ ãẽxgacũ wüxigu namaã ga norü purichíagũ na
 yagagũãxũcèx. Natürü namuẽ na duũxũgũ nutamaã yamuxũtanũxũ,
 rũ yemacèx meãmare yema ngúexũgũxũ nigagũ. ²⁷ Rũ yexguma namaã
 ínangugũgu, rũ yema ãẽxgacũgũpẽxewa nanagagũ. Rũ yema paigüeru rũ
 namaã nidexa rũ ñanagürü nüxũ: ²⁸ –Marü poraãcü pexna tanachuxu
 na tama ngẽma Ngechuchuégamaã penangúexẽexũcèx. Natürü i pema rũ
 guxũne ya Yerucharéũwa penangúexẽe i duũxũgũ, rũ ñuxũchi toxna pe-
 naxuxchaũ ga na togagu nayuxũ ga yema Ngechuchu –ñanagürü. ²⁹ Rũ
 Pedru rũ namüçügũmaã nanangãxũgũ, rũ ñanagürügũ: –Narümemae nixĩ na
 Tupanaga taxĩnũexũ rũ tama i yatügũga. ³⁰ –Guma Tupana ga nuxcũmaũgũxũ
 ga tórü oxigũ nüxũ yaxõgücü, rũ guma nixĩ ga wena namaxẽecü ga
 Ngechuchu ga pema peyamácü ga yexguma curuchawa peyapotagũgu. ³¹ –
 Natürü Tupana rũ nanataxẽãma, rũ nügũarũ tügüncüwawa nanatoxẽe. Rũ
 tórü cuèxruũ rũ maxẽxẽeruũ nayangucuchixẽe na tatanũxũgũ i Yudíugũxũ
 nangũxẽexũcèx na nüxũ naxoexũcèx i norü chixexũgũ, rũ Tupana nüxũ
 nüxũ nangechaũxũcèx i norü pecadugũ. ³² –Rũ toma nüxũ tacuèx na
 aixcũma yĩxũ i guxũma i ngẽma pemaã nüxũ tixuxũ erü tomatama nüxũ
 tadaugũ. Rũ ngẽxgumarũ ta i Tupanaãe i Üünexũ i Tupana tüxna ãxũ ya
 yíxema naga ínũexẽ, rũ nüxũ nacuèx na aixcũma yĩxũ –ñanagürügũ. ³³ Rũ
 yexguma yemaxũ naxĩnũegu ga yema ãẽxgacũgũ, rũ poraãcüxũchima nanuẽ,
 rũ nanadaixchaũ. ³⁴ Natürü yema ãẽxgacũgũtanüwa nayexma ga wüxi ga
 Parichéu ga Gamarié ga naega. Rũ nüma rũ meãma nanangúexẽe ga Tu-
 panaãrũ mugũ. Rũ guxũma ga duũxũgũ rũ nüxũ nangechaũgũ. Rũ nüma ga
 Gamarié inachi rũ nanamu na paxaãchi Ínamuxũãxũcèx ga yema ngúexũgũ
 ga Ngechuchu imugũxũ. ³⁵ Rũ ñuxũchi namüçügũ ga ãẽxgacũgũmaã nüxũ
 nixu rũ ñanagürü: –Pa Chautanũxũx, ¡pexuãegũ na tacü tá namaã pexüexũ
 i ñaã yatügũ! ³⁶ –Rũ nüxna pecuèxãchie ga ũpa ga ñuxãcü ãẽxgacũxũ nügũ
 ningucuchixẽechaũ ga Teudá. Rũ nügũtama nixu na wüxi ga tacü na yĩxũ. Rũ
 maneca 400 naguxũ ga yatügũ nawe narüxĩ. Natürü churaragũ nayamèxgũ,

rü nayu. Rü guxüma ga yema nawe rüxixü rü nangĩachi, rü yexma nayarüxo ga guxüma. ³⁷ –Rü yixcüra ínangu ga to ga yexguma tachiüãneärü ãëxgacü duüxügüxü ixugügu, rü yema nixĩ ga Yuda ga Gariréaanecüãx ga ãëxgacüxü nügü ingucuchixëëchaüxü. Rü nayaxucuxëgü ga duüxügü rü nawe narüxĩ ga ñuxre. Natürü yemaxü rü ta nimëxgü rü nayu. Rü guxüma ga yema nawe rüxixü rü nangĩachi. ³⁸ –Rü ngëmacëx i ñuxma rü pexü chaxucuxë na peyangëxgüxü i ñaã yatügü, rü tama penapoxcuexü. Erü ngëxguma nagagutama yixĩgu i ngëma nüma naxügüxü, rü tá inayarüxo. ³⁹ –Natürü ngëxguma Tupanaärü yixĩgu i ñaã naxügüxü, rü taxuacüma ipeyanaxoxëë. ¡Rü pexuãëgü na tama ngürüãchi Tupanamaã yĩxü i penuëxü! –ñanagürü. Rü guxüma ga yema ãëxgacügü rü naga naxĩnüë ga yema norü ucuxë. ⁴⁰ Rü ñuxüchi nanachocuxëë ga yema ngúexügü ga Ngechuchu imugüxü. Rü nayacuaixgü. Rü nüxna naxãga na tama Ngechuchuchiga yadexagüxüçëx. Rü yemawena rü nayangëxgü. ⁴¹ Rü yema ãëxgacügüna ínixĩ ga yema ngúexügü. Rü nataãëgü yerü woetama Tupana nanaxwëxe ga yemaãcü Ngechuchucëx ngüxü na yangegüxü. ⁴² Rü guxü ga ngunexügu tupauca ga taxünewa rü ĩpatagüwa, rü nanangúexëëãma, rü nüxü nixugüetanü ga ore ga mexü ga Ngechuchu ya Cristuchiga.

6

Yema ngúexügü ga Ngechuchu imugüxü rü nüxü naxuneta ga 7 ga yatügü na nüxü nangüxëëgüxüçëx ga Tupanaärü puracüwa

¹ Rü yexgumaücüü rü yexeraãcü nimuchigü ga yema duüxügü ga yaxögüxü. Rü natanüwa nayexmagü ga Yudíugüchirëx ga Griéguanewa ne ĩxü rü Griégugawa idexagüxü. Rü nayexma ta ga yaxögüxü ga Yudíugü ga Yerucharéüçüãx ga woetama nagawa idexagüxü. Rü yema yaxögüxü ga Griégugawa idexagüxü rü nidexagüecha nachigagu ga yema yaxögüxü ga Yerucharéüçüãxgü ixígüxü, rü ñanagürügü: –Totanüwa yutegüxe rü tama meã õna tuxna naxãgüxü i ngëxguma õna inaxãgüüxgu i wüxichigü i ngunexügu –ñanagürügü. ² Rü yexguma ga yema 12 ga ngúexügü ga Ngechuchu imugüxü rü guxüma ga yema yaxögüxüxü nangutaquëxëëgü, rü ñanagürügü nüxü: –Tama name na ítanangëxü i Tupanaärü orearü uchiga i tomax na õnamaã itacuáxüçëx. ³ –Rü ngëmacëx, Pa Tomücügüx, rü ¡Naxcëx pedëux i petanüwa ya 7 ya yatügü ya guxãma nüxü ngechaücü, rü meã naãëxü cuácü, rü aixcüma Tupanaãë i Üünexü nawa ngëxmacü! Rü toma tá nüxna tanaxã i ngëma puracü na nümagü õnamaã inacuëxgüxüçëx. ⁴ –Rü ngëxguma i toma rü yumüxëwa rü Tupanaärü orearü uchigawaxicatama tá tapuracüe –ñanagürügü. ⁵ Rü yexguma ga guxüma ga yema duüxügü rü: – Ngü –ñanagürügü naxcëx ga yema ore. Rü nüxü naxunetagü ga Etébañ ga meã yaxöcü rü aixcüma Tupanaãë i Üünexü nawa yexmacü, rü Piripi, rü Pócoro, rü Nicanúru, rü Timú rü Paruménu, rü Nicuráchi ga Aütioquíacüãx ga tauta Ngechuchuaxü yaxõõgu Yudíugücüma yaxucü. ⁶ Rü yema ngúexügü ga Ngechuchu imugüxüxütawa nanagagü. Rü nümagü naxmëxmaã nüxü yangögüãcüma naxcëx nayumüxëgü. ⁷ Rü yema Tupanaärü ore rü yexeraãcü nixüchigü. Rü poraãcü nimuëtanü ga yema yaxögüxü ga Yerucharéüwa. Rü woo muxüchixüma ga Yudíugüarü paigü rü ta Ngechuchuaxü nayaxögü.

Etébañxü niyauxgü

⁸ Rü Etébañ nixĩ ga wüxi ga yatü ga Tupana poraãcü nüxü rüngüxëëcü rü naporaxëëcü na duüxügüetanüwa naxüãxüçëx ga mexügü ga taxügü rü cuëxruügü ga Tupanaärü poramaã naxüxü. ⁹ Rü nayexma ga wüxi

ga ngutaquēxepataũ ga Yudiŷgüarü ga Ínguxũũârü Ngutaquēxepataũga ãegane. Rũ gumawa nangutaquēxegü ga duũxũgü ga ũpaacü corigümēxēwa yexmagũxũ. Rũ ñuxre ga guma ngutaquēxepataũcũãx rü wũxigu namaã ga ñuxre ga Chireneãnecũãx, rü Aleyãdríaanecũãx, rü Chiríchiaanecũãx, rü Áchiaarü naãnecũãx, rü inanaxũgüe ga Etébaũmaã na iyaporagatanücüxũ. ¹⁰ Natürü taxuacüma Etébaũxũ narüyexeragü, yerü nüma ga Etébaũ rü nidexa namaã ga yema cuèx ga Tupanaãe i Üünexũ nüxna ãxũ. ¹¹ Rũ yexguma ga yema duũxũgü rü togüaxũ nanaxütanügu na Etébaũchiga doraxũ yaxugũxücèx. Rũ ñanagürügu ga yema idoraegũxũ: —Toma nüxũ taxĩnüēgu, rü Moĩchéchiga rü Tupanachigamaã chixexũ ga ore nixugü ga Etébaũ —ñanagürügu. ¹² Rũ yemaãcü nananuēxēe ga duũxũgü rü Yudiŷgüarü ãēxgacügüerugü rü ngúexēēruũgü ga ore ga mugüwa nguxēētaegũxũ. Rũ yemacèx Etébaũcèx nibuxmü, rü nayayauxgü, rü ãēxgacügüerugü íngutaquēxegũxũwa nanagagü. ¹³ Rũ naxcèx nadaugü ta ga yatügü ga doraxũ ixugüemarexũ rü yema rü ñanagürügu: —Ñã yatü rü guxũguma chixexũmaã nidexa i nachigagu ya daa tupauca ya taxũne, rü nachigagu i Tupanaãrũ mugü. ¹⁴ —Rũ toma rü nüxũ taxĩnüē rü:

“Yima Ngechuchu ya Nacharétucũãx rü tá nanangutaũxēe ya daa tupauca, rü tá inayanaxoxēe i nacümagü ga Moĩché tũxũ ngúexēēxũ”, —ñanagürügu. ¹⁵ Rũ yexguma Etébaũxũ nadaunügu ga guxũma ga yema ãēxgacügü ga yema rütogũxũ, rü nüxũ nadaugü ga nachametü rü wũxi ga daxũ-cũãx ga orearü ngeruũchametürü na yĩxũ.

7

Etébaũrũ ore

¹ Rũ nüma ga paigüeru, rü Etébaũna naca rü ñanagürü: —¿Aixcüma yĩxũ i ñãã ore i nüxũ yaxugüexũ? —ñanagürü. ² Rũ Etébaũ nanangãxũ, rü ñanagürü: —Pa Chautanũxũ Pa ãēxgacügüx, ¡Choxũ iperũxĩnüē! Guma Tupana ya mexēchicü, rü nuxcümaũcü ga tórü oxĩ ga Abráũcèx nangox ga yexguma Mechopotãmiãârü naãnegu naxãchiũgu ga yexguma tauta Arãũârü naãnewa naxũxgu na yexma yaxãchiũxücèx. ³ —Rũ Tupana rü ñanagürü nüxũ:

“¡Nüxna ixũ i cuchĩũãne rü cutanũxũ, rü ngēma choma tá cuzũ nüxũ chadauxēēxũ i naãnewa naxũ!”

ñanagürü. ⁴ —Rũ yexguma ínaxũxũ ga Abráũ nawa ga yema Cadéucũãxãrũ naãne ga ngextá noxri ínaxãchiũxũwa, rü Arãũârü naãnegu nayaxãchiũ. Rũ yexguma nanatü yuxguwena, rü ñoma ga naãne i ñuxma nagu pexãchiũxũwa naxũ, yerü yemaãcü Tupana núma nanaga. ⁵ —Natürü yexguma rü ta taxuũma ga noxrũxüchi ga naãne nüxna naxã ga Tupana i ñoma i naãnewa, rü bai ga íraxũ ga noxrũxüchi ga naãne. Natürü Abrãũmaã inaxuneta ga yixcama tá nüxna na naxããxũ ga ñoma i naãne na noxrũxüchi yĩxũcèx, rü yixcama marü nayuxguwena rü nanegüarü na yĩxũcèx. Rũ yemaãcü Abrãũmaã inaxuneta ga woo na nangexacũxũ ga yexguma. ⁶ —Rũ ñanagürü Abrãũxũ ga Tupana:

“Rũ yixcama i cutaagü rü tá to i nachĩũãne i tama noxrü ixĩxũwa nangēxmagü. Rũ ngēma nachĩũãnecũãx i duũxũgü rü norü duũxũgũxũ tá nayaxĩgũxēe. Rũ 400 ya taunecü rü ngēma duũxũgü rü tá chixri namaã nachopetü i cutaagü. ⁷ Natürü choma tá chanapoxcue i ngēma nachĩũãnecũãx i norü duũxũgũxũ yaxĩgũxēēxũ. Rũ ngēmawena i cutaagü rü tá ínachoxũ nawa i ngēma naãne, rü nuã ñãã i naãnewa tá choxũ nicuèxüũgü”,

ñanagürü ga Tupana. ⁸ –Rü yexguma Tupana rü Abráũ rü nügümaã nanamexêê, rü ñanagürü ga Tupana:

“Choma rü tá cuxũ charüngũxêê ega cuma rü guxũma i cutanũxũgũ ípewiũchêxmüpêxechiraũgu. Rü ngêma tá nixĩ i cuèxruũ i yigümaã imexêêxũ”,

ñanagürü ga Tupana. Rü nabu ga wũxi ga nane ga Abráũ, rü Ichaágu nanaxüéga. Rü yexguma ⁸ ga norü ngunexũwa nanguxgu ga Ichaá, rü nūmatama ga Abráũ rü ínanawiechêxmüpêxechiraũ. Rü yexguma marü nayèxgu ga Ichaá rü nabu ga nane ga Acobu, rü nūmatama ga Ichaá rü ínanawiechêxmüpêxechiraũ. Rü yixcama marü nayèxgu ga Acobu rü nüxũ nayexma ga ¹² ga nanegü. Rü nūmatama ga Acobu rü ínanawiechêxmüpêxechiraũ ga guxũma ga yema ¹² ga nanegü. Rü yema ¹² ga nanegü nixĩ ga yema ¹² ga nuxcūmaũgũxũ ga tórü oxigü. ⁹⁻¹⁰ –Rü yema ¹² ga Acobu nanegü ga tórü oxigü ixĩgũxũtanüwa rü wũxi rü Yúche nixĩ ga naega. Natürü naêneêgü ga guma Yúche rü nixãũxãchie, rü yemacèx Equituarü naãnewa íxũ ga taxetanũxũxũ Yúchemaã nataxegü na Equituarü naãnewa nagagüãxücèx. Natürü Tupana rü Yúchemaã nayexma, rü nüxũ narüngũxêê na tama pecadu naxüxücèx ga yexguma guxchaxũwa nayexmagu. Rü nüxna nanaxã ga cuèx, rü Yúchexũ narüngũxêê ga meã na nayauxãxücèx ga Equituaneärü ãêxgacü ga Faraũ. Rü yemacèx ga Faraũ rü ãêxgacüxũ nayangucuchixêê. Rü nūma ga Yúche nixĩ ga ãêxgacü ga Faraũpatawa rü guxũma ga yema naxiũãnewa. Rü Faraũxĩcatama nixĩ ga Yúhearü yexera na ãêxgacü yĩxũ ga yema naãnewa. ¹¹ –Rü yexgumaũcüü nayexma ga taiya ga guxũ ga Equituarü naãnewa rü Canaãärü naãnewa. Rü poraãcü taiya nüxũ nangux ga duũxũgü. Rü yemacèx ga yema nuxcūmaũgũxũ ga tórü oxigü rü düxwa taxuacüma nüxũ inayangaugü ga nabü ga Canaãärü naãnewa. ¹² –Natürü yexguma nüxũ nacuáchigaxgu ga Acobu ga na nayexmaxũ ga nabü ga Equituanewa, rü yéma nanamugü ga nanegü ga guma tórü oxigü ixĩgücü. Rü yema nixĩ ga nawa inaxügũxũ ga noxrima nabücèx Equituanewa na naxĩxũ. ¹³ –Rü yixcama marü naguxgu ga yema nabü rü wenaxärü Equituanewa naxĩ nawa ga nabü. Rü yexguma wenaxärü yéma naxĩxgu ga naêneêgü, rü nügü nixu ga Yúche namaã. Rü yexguma nüxũ nacuèx ga Faraũ ga ngextácũãx na yĩxũ ga Yúche. ¹⁴ –Rü yixcamaxũra ga Yúche rü tümacèx nangema ga nanatü rü guxũma ga natanüxũ. Rü maneca ⁷⁵wa nangu ga yema duũxũgü ga Yúchetanüxũ. ¹⁵ –Rü yemaãcü Equituanewa naxü ga Acobu na yexma yaxãchiũxücèx. Rü yexma nayu ga nūmax. Rü yexma nayue ta ga nanegü ga tórü oxigü. ¹⁶ –Rü yexguma nayuxgu ga Acobu, rü Chiquéũwa nanangegü ga naxũne na yexma yatèxgüãxücèx nagu ga yema naxmaxũ ga Abráũ dīërumaã naxcèx taxexũ ga Amú nanegüxũtawa ga Chiquéũwa. ¹⁷ –Rü düxwa nawa nangu na Equituanewa ínanguxũxücèx ga tatanüxũ ga yexgumarüũ ga Tupana Abráũmaã ixu-netaxũ. Rü yexguma rü marü poraãcü nimu ga tatanüxũ ga Equituanewa. ¹⁸ –Rü yexguma ningucuchi ga to ga Equituaneärü ãêxgacü ga tama Yúchechigaxũ cuáxũ. ¹⁹ –Rü yema ãêxgacü rü tatanüxũxũ nawomüxêê rü chixri tümamaã naxüpetü ga guxema nuxcūmaũgũxe ga tórü oxigü. Rü tüxũ namu na yexwaca buexe ga tümaxãcügũxũ ítawogũxũ na tayuexücèx. ²⁰ –Rü yexgumaũcüü nabu ga Moĩché, rü Tupanaãxũ nangúchaũ. Rü tomaèxpũx ga tauemacü nüxna tadaugü ga tümapatawa ga naë rü nanatü. ²¹ –Rü yexguma düxwa ítanatèxgügu, rü Faraũxãcü inayaxu, rü ngĩnexũ inayaxêê. ²² –Rü yemaãcü Moĩchéxũ nanguxêêgü ga guxũma ga Equituanecũãxärü cuèx. Rü nūma ga Moĩché rü wũxi ga ãêxgacü ga poracü nixĩ, rü norü dexawa rü ta napora. ²³ –Rü

yexguma 40 ga norü taunecüwa nanguxgu ga Moïché rü nagu narüxĩnü ga natanüxügü ga Yudíugütanügu na naxũãneãxũ. ²⁴ –Rü nüxũ nadau ga wüxi ga Equituanecũãx ga wüxi ga Yudíuxũ na naçuaxixũ. Rü yemacèx ga Moïché rü yema Yudíuétüwa ínayuxu, rü yema Equituanecũãxũ nimèx rü nanayuxẽẽ. ²⁵ –Rü nüma ga Moïché nagu rüxĩnügu rü chi natanüxügü ga Yudíugü rü chi nüxũ nacuèxgü na Tupana yéma namuxũ na ínanguxũẽẽãxüçèx. Natürü tama nüxũ nacuèxgüéga ga yema natanüxügü. ²⁶ –Rü moxũãcü ga Moïché rü nüxũ nadau ga to ga taxre ga Yudíugü ga nügü yexma dèixũ, rü nüxna nachogüchaũ. Rü ñanagürü nüxũ:

“Pema rü pegütanüxügü pixígü. ¿Rü tüxcüũ pegü pedai i pemax?” ñanagürü. ²⁷ –Rü yexguma ga yema namücüxũ icuaxixũ rü Moïchéxũ natèxnetá, rü ñanagürü nüxũ:

“¿Texé cuyũ tamu na toeru quiĩxüçèx rü tomaã icucuáxüçèx? ²⁸ –¿Éxna choxũ quimáxchaũ ta, ga ñne quimáxũ ga Equituanecũãxrüũ?” ñanagürü. ²⁹ –Rü yexguma yemaxũ naxĩnügu ga Moïché, rü niña ga yema naãnewa. Rü Madiáũãnewa naxũ. Rü yema nachiũãne ga tama noxrü ixixügu nayaxãchiũ. Rü yexma naxãmèx rü nabu ga taxre ga nanegü. ³⁰ –Rü 40 ga taunecüguwena ga dauxchitawa ga Chinaĩ ga mèxpüneärü ngaicamana, rü wüxi ga naĩxètaxacü ga yéma iyauraxüwa Moïchéçèx nangox ga wüxi ga Tupanaärü orearü ngeruũ ga daxüçũãx. ³¹ –Rü nabaixãchiãe ga Moïché ga yexguma nüxũ nadèuxgu. Rü naxcèx nixũ rü nüxna nangaicama na meã nüxũ nadauxüçèx. Rü yexguma Moïchémaã nidexa ga Cori ga Tupana, rü ñanagürü nüxũ:

³² “Choma nixĩ i curü oxigüarü Tupana chiĩxũ rü Abráũ rü Ichaá rü Acobuarü Tupana chiĩxũ”, ñanagürü. Rü yexguma ga Moïché rü inanaxügü ga norü muũmaã na yaduruxũ. Rü namuũ ga yexma na nadawenüxũ. ³³ –Rü yexguma ga Cori ga Tupana rü ñanagürü nüxũ:

“¡Ínacuaixũ i curü chapatu erü ñaã naãne i nagu cuchixũ rü naxüüne, erü chanuxma! ³⁴ Choma rü ngóxüwama nüxũ chadau i ñuxãcü poraãcü ngúxũ na yangegüxũ i chorü duũxügü i Equituanewa. Rü nüxũ chaxĩnü i na naxauxexũ. Rü ngèmacèx núma chaxũ na íchananguxũẽẽxüçèx. ¡Nuã naxũ na Equituanewa cuyũ chamuxüçèx!”, ñanagürü. ³⁵ –Rü woo ga noxri ga nümagü ga natanüxügü rü guma Moïchéxũ naxoe ga yexguma ñagügu:

“¿Rü texé cuyũ tamu na toeru quiĩxüçèx rü tomaã icucuáxüçèx?” ñagügu, natürü ga Tupana rü yéma nanamuãma na yema duũxügüxũ ínanguxũẽẽxüçèx rü norü ãèxgacü na yĩxüçèx. Rü yemaãcü Moïchéxũ namu ga Tupana ga yexguma naxütawa namuãxgu ga yema norü orearü ngeruũ ga yema naĩxètaxacü ga iyauraxüwa naxcèx ngóxũ. ³⁶ –Rü Moïché nixĩ ga Equituarü naãnewa ínagaxüxũ ga nuxcümaũgüxũ ga tórü oxigü. Rü Equituanewa, rü Dauchiüxũ ga Taxtüwa, rü dauxchitawa ga ngextá taxúema íxãpataxüwa inanawèx ga cuèxruũgü, rü nanaxü ga mexũ ga taxügü ga Tupanaärü poramaã naxüxũ. Rü yemaãcü 40 ga taunecü nüxũ na rüngüxẽẽ ga yema duũxügü. ³⁷ –Rü nümatama ga Moïché nixĩ ga tatanüxügü ga Yudíugümaã ñaxũ:

“Tupana rü yixcüra tá pexcèx nüxũ naxuneta i petanüwa i wüxi i norü orearü uruũ ga yexgumarüũ ga choxũ na naxunetaxürüũ”, ñanagürü. ³⁸ –Rü nümatama ga Moïché nixĩ ga nuxcümaũgüxũ ga tórü oxigümaã nangutaquèxexũ ga yema naãne ga ngextá taxúema íxãpataxüwa. Rü tórü oxigümaã nayexma ga Chinaĩ ga mèxpünewa ga yexguma namaã

yadeaxgu ga Tupanaārū orearū ngeruū ga daxūcūāx. Rū nūmatama ga Moīché nixī ga nayauxāxū ga Tupanaārū ore i maxēxēēruū na nūxī tūxna naxāāxūcèx. ³⁹ –Natürū ga tórū oxigū rü tama naga naxīnūēchaū ga guma Moīché. Rū Ínanatèxüchigüama, rü Equituaneguama narūxīnūāēgü. ⁴⁰ – Rū tórū oxigū rü Moīchéeneē ga Arāūxū ñanagürügü: “¡Rü toxçèx naxū i tupanachicünèxāgü na nawe tarūxīxūcèx! Erü tama nūxū tacuèxgü i tacü nūxū na üpetūxū i ngēma Moīché ga Equituanewa tūxū yagagūxū”, ñanagürügü. ⁴¹ –Rü yexguma nanaxügü ga wūxi ga wocaxacüchicünèxā norü tupanaxū. Rū ñuxūchi naxçèx nanadai ga ñuxre ga carnerugü na yemamaā nūxū yacuèxüügūxūcèx. Rū wūxi ga peta naxçèx naxügü ga yema wocaxacüchicünèxā ga nūmatama naxügūxū. ⁴² –Rü yemacèx ga Tupana rü nūxna nixūgachi ga yema duūxügü. Rū Ínanawogü na woramacuri rü üèxcü rü tauemacümaā natupanaāxēēāxūcèx. Yerü yemaācü Tupanaārū orearū uruūgüarü poperagu naxümatü, rü ñanagürü:

“Pema, Pa Yudíugüx, ¿Chauxçèx yīxū ga penadèixū ga carnerugü ga yexguma 40 ga taunecü dauxchitawa ga ngextá taxúema Íxāpataxūwa peyexmagügu? ⁴³ Tama aixcūma chauxçèx nixī yerü ga pema rü ngextá ípexīxūwa rü ípenangeexū ga napata ga perü tupananeta ga Moro rü ípenangeexū ga perü tupananeta ga Refāārū woramacurichicünèxā. Rü yemaācü pegümaā ípenangeexū ga yema tupananetachicünèxāgü ga pematama pexügūxū na nūxū picuèxüügūxūcèx. Rü ngēmacèx i ñuxma rü perü naānewa tá pexū Íchawoxū rü yaxūwa i Babiró-niāārū yexerawa tá pexū chamugü”,

ñanagürü ga Tupana ga yema orewa. ⁴⁴ –Rü yema naāne ga ngextá taxúema Íxāpataxūwa rü tórū oxigü nūxū nayexma ga wūxi ga ípata ga naxchirunaxçèx ga nagu namaā nanguxügüne ga Tupanaārū mugü ga nutagu ümatūxū. Rü guma ípata ga naxchirunaxçèx nixī ga nūxū nawéācüma Tupana Moīchéxū naxūxèxene. ⁴⁵ –Rü yexguma nayuxguwena ga Moīché, rü Yochué ningucuchi ga āēxgacü na yīxū. Rü tórū oxigü rü nuā tórū naānewa nanangegü ga guma ípata ga naxchirunaxçèx ga yexguma Yochuémaā napugūāgu ga ñāā naāne nūxna ga yema duūxügü ga Tupana íwoxūxū napēxewa ga tórū oxigü. Rü núma nayexma ga guma ípata rü ñuxmata Dabí ingucuchigu ga āēxgacü na yīxū. ⁴⁶ –Rü guma āēxgacü ga Dabí rü Tupana rü poraācü namaā nataāē, rü nūxū narūngūxēē. Rü núma ga Dabí rü Tupanana naxçèx naca na naxūāxūcèx ga wūxi ga tupauca ga taxūne ga nawa Tupanaxū na yacuèxüügūxūcèx ga tatanūxügü ga Acobutaagü. ⁴⁷ –Natürü Dabí nane ga Charumóū nixī ga naxücü ga guma tupauca ga Tupanacèx ixīxūne. ⁴⁸ – Natürü ya Tupana ya tacüxüchima rü tama duūxügü üxūne ya tupaucagümaā naxāpata. Rü yemacèx ga Tupana rü nuxcūmaūcü ga norü orearū uruūwa rü ñanagürü:

⁴⁹⁻⁵⁰ “Choma nixī ya āēxgacü ya tacüxüchima, rü daxūguxū i naāne nixī i chorü toxmaxwèxeruū ixīxū rü ñoma i naāne nixī i chorü chicutüruū ixīxū. ¿Rü ñuxücürüwa i nagu perüxīnūēxū tá na penaxūxū ya wūxi ya tupauca ya chaugu mexūne?”

ñanagürü ga Cori ya Tupana. Rü ñanagürü ta ga Tupana:

“¿Tama ēxna choma yīxū ichanaxūxū ga guxūma i tacü i ngēxmaxū? ¿Rü ñuxācü chi penaxūxū i wūxi i nachica i nagu charūngūxū?”

ñanagürü ga norü orewa. ⁵¹ Rü ñanagürü ga Etébaū: –Düçèx Pa Āēxgacügüx, pema rü guxüguma nūxū pexoe i Tupanaārū ore, rü tama iperüxīnūēchaū. Rü peāēwa rü tama peyaxōgüchaū. Rü pema rü guxüguma Tupanaāē i Üünexūmaā penuēēcha. Yema nuxcūmaūgūxū ga perü oxigürüütama pixīgü

i pemax. ⁵²—Rü perü oxigü rü chixeäcūma namaã nachopetü ga guxūma ga Tupanaärü orearü uruūgü. Rü nanadai ga yema orearü uruūgü ga nüxū ixuchigagüxū ga na núma naxūxū tá ga guma mecü ya Ngechuchu. Rü yexguma ínguxgu ga guma Ngechuchu rü pema Piratuna penamu rü penayuxēē. ⁵³—Rü woo pema rü Tupanaärü orearü ngeruūgü ga daxūcūāxūtawa penayaxu ga Tupanaärü ore, natürü tama naga pexīnūē —ñanagürü ga Etébaū.

Nayu ga Etébaū

⁵⁴ Rü yexguma nüxū naxīnūēgu ga yema ore, rü nanuēxūchiamā ga yema duūxūgü. Rü norü numaã Etébaūcèx nixūxchapütägü. ⁵⁵ Natürü ga Etébaū rü aixcūma Tupanaãē i Ūünexū nawa nayexma. Rü daxū nadawenü, rü nüxū nadau na ñuxācū namexēchixū ga Tupana. Rü nüxū nadau ga Ngechuchu ga Tupanaärü tūgūneguama chicü. ⁵⁶ Rü yexguma rü ñanagürü: —Nüxū chadau i na yangoxnaāchixū i naānetüwe, rü nüxū chadau ya Cristu ya Tupana Nane ya duūxūxū ixīcū ya Tupanaärü tūgūneguama chicü —ñanagürü ga Etébaū. ⁵⁷ Natürü nūmagü rü nūgü narütütamachixēgü, rü tagaācū aixta naxūeäcūma nüxna nayuxgü. ⁵⁸ Rü ínanagaxūchigü ga íānewa, rü nutagūmaã ínanamuxūchigü. Rü yéma nayexma ga wūxi ga ngextūxūxū ga Chaurugu āegaxū. Rü yemaxū nanawotanü ga norü gāuxūchirugü ga ínacūxuchigüxū ga yema duūxūgü ga Etébaūxū imēxgüxū. ⁵⁹ Rü yexguma nutamaã ínamuxūchigüāguyane, rü nayumūxē ga Etébaū rü ñanagürü: —Pa Cori Pa Ngechuchux, ¡Nayaxu i chauāē! —ñanagürü. ⁶⁰ Rü yemawena rü ínacaxāpūxū, rü tagaācū aixta naxū, rü ñanagürü: —Pa Cori Pa Tupanax, ¡Tāxū i ñāā pecaducèx cunapoxcuexū i ñāā duūxūgü! —ñanagürü. Rü yexguma yema ñaxguwena rü nayu.

8

Chauru rü guxema yaxōgūxewe ningēchigü na tūxū napoxcuexūcèx

¹ Rü Chauru rü norü me nixī ga Etébaūxū na yamēxgüxū. Rü yematama ngunexūgu rü norü uwanūgü rü ínanaxūgūe ga na poraācū nawe yangēxūtanūxū ga yema yaxōgūxū ga Yerucharéūwa yexmagüxū. Rü düxwa ga guxūma rü Yudéaanegu rü Chamáriiaanegu nūgü nawoone. Rü yema ngúexūgü ga Ngechuchu imugūxūxicatama ínayaxūgü ga Yerucharéūwa. ² Rü ñuxre ga yatūgü ga meāma Tupanaāxū yaxōgūxū rü nanayauxgü ga Etébaūxūne, rü ínanatèxgü rü poraācū naxcèx naxauxe. ³ R yexguma ga Chauru rü chixri tūmamaã naxūpetü ga guxema yaxōgūxe. Rü tūmapatagu nixūcuchigü na tūxū ínayauxūxūcèx. Rü yéma tūxū ínatūxū ga yatūgü rü ngexegü, rü ñuxūchi poxcupataūgu tūxū nawocu.

Chamáriawa nüxū nixuchiga ga Tupanaärü ore i mexū

⁴ Rü yema yaxōgūxū ga Chauruchaxwa ibuxmūxū ga Yerucharéūwa, rü guxūwama ga ngextá ínaxīxūwa rü nüxū nixuchigagü ga ñuxācū Ngechuchu tūxū na maxēxēēxū. ⁵ Rü Piripi nixī ga wūxi ga yema orexū ixuchigacü. Rü nūma rü íāne ga Chamáriawa naxū, rü yéma ínanaxūgü ga Cristuchigaxū na yaxuxū. ⁶ Rü yema duūxūgü ga Chamáriacūāx, rü Piripicèx nangutaquēxegü. Rü guxūma meāma ínarūxīnūē ga yema ore ga namaã nüxū yaxuxū, yerü nüxū nadaugü ga yema mexūgü ga taxūgü ga Tupanaärü poramaã naxūxū ga Piripi. ⁷ Rü muxēma ga duūxēgü ga ngoxogü tūmawa yexmaxē rü tūmacèx nitaanegü. Rü yema ngoxogü rü tagaācū aita naxūeäcūma tūmawa ínachoxū. Rü yexgumarūū ta rü muxēma ga nawāixāchigūxe rü chixeparagūxe rü tūmacèx nitaanegü. ⁸ Rü yemacèx poraācū nataāēgü ga guxūma ga duūxūgü ga guma íāne ga Chamáriawa. ⁹ Natürü guma íānewa nayexma ga wūxi ga

yatü ga Chimáũgu ãegaxü ga ñuxre ga taunecü norü yuümaã duũxügxü womüxëẽxü ga guma ñãnewa. Rü nügü nixu ga na wüxi ga tacüxü cuáxü na yïxü. ¹⁰ Rü guxüma meãma nüxü inarüxĩnüë woo ga buxügü rü yaxügü. Rü ñanagürügü: —Ñãã yatü rü aixcüma nüxü nangëxma i Tupanaãrü pora i taxü —ñanagürügü. ¹¹ Rü naga naxĩnüë ga duũxügü, yerü mucüma ga taunecü rü norü yuümaã nanawomüxëẽ. ¹² Rü Piripi rü yema duũxügümaã nüxü nixu ga ore ga mexü ga Ngechuchu ya Cristuchiga, rü ñuxãcü na ãëxgacü yïxü ya Tupana. Rü yexguma yema ore yaxögügu ga duũxügü, rü Piripi ñanabaiũxëẽ ga yatüxü rü ngexügü. ¹³ Rü nümatama ga Chimáũ rü ta nayaxõ, rü ínabaie. Rü inanaxügu ga Piripixü na naxümücüxü. Rü yexguma nüxü nadëuxgu ga yema cuèxruügu rü mexügu ga taxü ga Tupanaãrü poramaã naxüxü ga Piripi, rü poraãcü nabaixãchiãẽ ga Chimáũ. ¹⁴ Rü yema Ngechucharü ngüexügu ga Yerucharéüwa yexmagüxü rü nüxü naxĩnüëchiga ga meã na nayauxgüãxü ga Tupanaãrü ore ga Chamáriawa. Rü yemacèx yéma nanamugü ga Pedru rü Cuáũ. ¹⁵ Rü yexguma Chamáriawa nangugügu ga Pedru rü Cuáũ, rü naxcèx nayumüxëgü ga yema yexwaca yaxögüxü ga duũxügü, na nayauxgüãxücèx ga Tupanaãẽ i Üünexü. ¹⁶ Yerü yexguma noxri yaxögüãgu ga yema duũxügü rü Piripi marü ñanabaiũxëẽmare naegagu ga Cori ga Ngechuchu, natürü taxuxñnata nangu ga Tupanaãẽ i Üünexü. ¹⁷ Rü yemacèx ga Pedru rü Cuáũ naxmëxmaã nüxü ningögügu ga yema yaxögüxü, rü yexguma nanayauxgü ga Tupanaãẽ i Üünexü. ¹⁸⁻¹⁹ Rü nüxü nadau ga Chimáũ ga na duũxügüna nanguxü ga Tupanaãẽ i Üünexü ga yexguma Pedru rü Cuáũ naxmëxmaã yema duũxügüxü yangögügu. Rü yemacèx dïëru Pedru rü Cuáũna ngixü naxãxchaũ ga Chimáũ rü ñanagürü nüxü: —¡Choxna rü ta penaxã i ngëma pora, na yíxema tüxü chingögüxe rü ta tüxna nanguxücèx i Tupanaãẽ i Üünexü! —ñanagürü. ²⁰ Rü yexguma ga Pedru rü ñanagürü nüxü: —¡Cuxrüütama iyanataxux i curü dïëru, erü ngímaã naxcèx cutaxechaũ i Naãẽ i Üünexü i Tupana tüxna mumarexü! ²¹ Cuma rü taxucürüwama cunayaxu i ngëma pora, erü curü maxü rü tama name i Tupanapëxewa. ²² ¡Nüxü rüxo i ngëma curü chixexü, rü Tupanana naxcèx naca na cuxü nüxü nangechaũxücèx! Rü bexmana tá cuxü nüxü nangechaũ i ngëma chixexü i cuãëwa nagu curüxĩnüxü. ²³ Erü nüxü chacuèx rü poraãcü cunuãëwëxe, rü ngëma curü chixexü rü cumaã inacuèx rü ñoma cupoxcuxürüü cuxü nixĩxëẽ —ñanagürü. ²⁴ Rü Chimáũ nanangãxü, rü ñanagürü: —¡Pema Tupanana chauxcèx peça na tama choxü nangupetüxücèx i ngëma nüxü pixuxü! —ñanagürü. ²⁵ Rü Pedru rü Cuáũ rü yema Chamáriaanecüãx ga duũxügümaã nüxü nixugüe ga Cori ga Ngechuchuchiga, rü namaã nüxü nixugüe ga Tupanaãrü ore. Rü yemawena rü Yerucharéücèx nawoegu. Rü namawa rü muxüne ga Chamáriaanewa yexmane ga ñanexãcügüwa rü nüxü nixuetanü ga Tupanaãrü ore i mexü.

Piripi rü namagu nüxü nangau ga wüxi ga ãëxgacü ga Etiópiaanecüãx

²⁶ Rü yemawena, rü Tupanaãrü orearü ngeruũ ga daxücüãx rü Piripimaã nüxü nixu, rü ñanagürü: —¡Rü paxa inaxüãchi rü ñãne ya Gachawaama naxü nawa i ngëma nama i Yerucharéüwa ne daxü rü Gachawa iyarügoxü! —ñanagürü. Rü ngëma nixĩ i nama i dauxchitawa i ngextá taxúema íxãpataxüwa dapetüxü. ²⁷ Rü inaxüãchi ga Piripi rü yema namawa naxü. Rü yexma nügü nangau namaã ga wüxi ga yatü ga Etiópiaanenanguxü ga guxcüma ga yema ãëxgacüarü dïëru. Rü ñeãcü Yerucharéüwa naxü na Tupanaxü yanacuèxüxücèx. ²⁸ Rü nachiũãnecèx nataegu, rü norü autu ga cowaru itúchigünewa narüto. Rü nawa ningúchigü ga yema ore ga Tupanaãrü orearü uruũ ga Ichaxía ümatüxü. ²⁹ Rü Tupanaãẽ i Üünexü rü Piripixü ñanagürü:

—¡Paxa naxcèx ixũ i ngēma autu! —ñanagürü. ³⁰ Rũ paxa yema autucèx niña ga Piripi. Rũ yexguma naxütawa nanguxgu rũ nüxũ naxĩnũ ga na Tupanaärü orearü uruũ ga Ichaxía ümatüxũ ga orewa nangúxũ ga yema ãëxgacü. Rũ yexguma ga Piripi rũ nüxna naca rũ ñanagürü nüxũ: —¿Nüxũ cucuáxũ i tacüchiga na yĩxũ i ngēma nawa cungúxũ? —ñanagürü. ³¹ Rũ nüma ga ãëxgacü ga Etiópiāanecũãx rũ nanangãxũ, rũ ñanagürü: —¿Ñuxũcürüwa i nüxũ chacuáxũ ega taxúema chomaã inanguxũxëëgux? —ñanagürü. Rũ Piripicèx naca na naxĩnagüxũcèx, rũ naxütawa na natoxücèx. ³² Rũ yema nawa yangúchigüxũ ga Tupanaärü ore ga ümatüxũ, rũ ñanagürü:

“Rũ ñoma wüxi i carneru i norü mèxwa nagagüxürüüãcü nayagagü. Rũ wüxi i carneruxacü i ngēma yayoxtèxagüxüpèxewa tama aita üxürüü nachianemare, rũ taxu ñanagürü. ³³ Rũ yexguma duüxügü poraãcü chixri namaã chopetügu rũ taxúema naëtüwa tachogü. ¿Rũ texé tá meã nachiga tidexa ga yema duüxügü ga yemaãcü poraãcüxüchima chixexũ ügüxũ? Yerü nayamèxgü na nataxuxücèx i norü maxũ i ñoma i naãnewa”,

ñanagürü ga yema ore ga nawa nangúxũ. ³⁴ Rũ Piripina naca ga yema ãëxgacü ga Etiópiāanecũãx, rũ ñanagürü: —¡Chomaã nüxũ ixu! ¿Rũ texéchigagu nixĩ ga yadexaxũ ga yema Tupanaärü orearü uruũ? ¿Nügüchigagutama rũ ëxna toguechigagu? —ñanagürü. ³⁵ Rũ yexguma nanangãxũ ga Piripi. Rũ yematama ore ga ümatüxũmaã inanaxügü na namaã nüxũ yaxuxũ ga ore i mexũ ga Ngechuchuchiga. ³⁶ Rũ yixcamaxüra ga yexguma inaxĩyane, rũ dexá íyexmaxüwa nangugü. Rũ ñanagürü ga yema ãëxgacü: —Nuã nangëxma i dexá. ¿Rũ tama ëxna inamexũ na nuã choxũ ícubaixëëxũ? —ñanagürü. ³⁷ Rũ ñanagürü ga Piripi: —Ngëxguma aixcüma meãma cuyaxõxgux, rũ marü name i na cuxũ íchabaixëëxũ —ñanagürü. Rũ nanangãxũ ga yema ãëxgacü, rũ ñanagürü: —Ngēmáãcü chayaxõ na Ngechuchu ya Cristu yĩxũ ya Tupana Nane —ñanagürü. ³⁸ Rũ yexguma ínayachaxãchixëë ga norü autu, rũ wüxigu dexáchiüwa nachoũ. Rũ Piripi ínabaiexëë ga yema ãëxgacü. ³⁹ Rũ yexguma dexáwa ínachoõchigu, rũ Tupanaãë i Ünexũ rũ Piripixũ niga. Rũ yema ãëxgacü rũ marü tama wena Piripixũ nadau. Natürü taãëãcü namagu nixũ. ⁴⁰ Natürü Achotowa nayangox ga Piripi. Rũ yema ñãnewa inaxũãchi, rũ nüxũ nixuchigü ga ore i mexũ ga guxüma ga ñãnewa ñuxmata Checharéaarü naãnewa nangu.

9

Ngechuchuaxũ nayaxõ ga Chauru

¹⁻² Rũ yoxni ga Chauru rũ daimaã nayaxãxũnechigüama ga yema duüxügü ga Cori ga Ngechuchuaxũ yaxõgüxũ. Rũ yemacèx paigüeruxütawa naxũ, rũ naxcèx nüxna naca ga popera ga nüxna ãgaxũ na Yudíugüarü ngutaquëxepataügü ga Damacuwa yexmagünegu yaxüchigüxũcèx rũ yexma tümacèx nadauxücèx ga guxema yaxõgüxe ga yatüxe rũ ngexegü na Yerucharéüwa tüxũ nagagüxücèx rũ yexma tüxũ yapoxcuxëcèx. ³ Natürü yexguma marü Damacuxũ yangaicagu, rũ ngürüãchi meãma nüxũ nabáxi ga wüxi ga omü ga poraxũ ga daxüwa íbáxixũ. ⁴ Rũ ñaxtúanegu nayangu ga Chauru, rũ nüxũ naxĩnũ ga wüxi ga naga ga nüxna çagüxũ ga ñaxũ: —Pa Chauru Pa Chaurux, ¿tüxcüũ i chowe quingëchigüxũ? —ñaxũ. ⁵ Rũ Chauru nanangãxũ, rũ ñanagürü: —¿Rũ texé quixĩ, Pa Corix? —ñanagürü. Rũ nüma ga Cori rũ nanangãxũ rũ ñanagürü: —Choma nixĩ i Ngechuchu, rũ chorü duüxügü nixĩ i ngēma nawe quingëchigüxũ. ⁶ ¡Rũ inachi, rũ ngema Damacuarü ñãnewa naxũ! Rũ ngema rũ wüxi ya yatü tá cumaã nüxũ nixu na

ṭacü tá cuxüxü —ñanagürü. ⁷ Rū yema yatügu ga Chauruxü íxümücügüxü, rü inayanguãëgü, yerü nüxü naxĩnũë ga yema ore natürü taxúexüma nadaugü. ⁸ Rū ñuxüchi inachi ga Chauru ga ñaxtüanewa ga íyanguxüwa, rü nidauchixetü, natürü taxuüma nadau yerü nixoxetü. Rū yemacëx ga namücügü, rü nachacüügu nayayauxãchi, rü yemaãcü Damacuwa nanagagü. ⁹ Rū tomaëxpüx ga ngunexügu, rü nangexetü, rü tama nachibü, rü tama naxaxe. ¹⁰ Rū Damacuwa nayexma ga wüxi ga yatü ga Ngechuchuaxü yaxõxü ga Ananiã ga naëga. Rū Cori ya Ngechuchu naxcëx nangox, rü ñanagürü nüxü: —Pa Ananiãx —ñanagürü. Rū nüma ga Ananiã nanangãxü, rü ñanagürü: —¿Ṭacü? Pa Corix —ñanagürü. ¹¹⁻¹² Rū nüma ga Cori nanangãxü, rü ñanagürü: —¿Dücëx, ngëma ítamü i Meã i Wëxügu ãëgaxüwa naxü! ¡Rü ngëma Yudapatawa naxcëx ínaca i wüxi i yatü i Tarsucüãx i Chaurugu ãëgaxü! Rū nüma rü ngëma ínayumüxë rü nangoxetü rü marü cuxü nadau, Pa Ananiãx, na ngëxma cuxücuxü rü naxëtügu quingõgüxü na wena yadauchixücëx —ñanagürü ga Cori ga Tupana. ¹³ Rū yexguma yemaxü naxĩnügu ga Ananiã, rü ñanagürü: —Pa Corix, muxüma i duüxügu chomaã nüxü nixu i ngëma yatüchiga na ñuxre i chixexü naxüxü namaã i curü duüxügu i Yerucharéüwa. ¹⁴ Rū ñuxma rü paigüarü ãëxgacügüarü mumaã núma naxü na ínayauxüãxücëx i guxüma i duüxügu i cuégagu yumüxëgüxü —ñanagürü. ¹⁵ Natürü nüma ga Cori rü ñanagürü nüxü: —¿Ngëma naxü! Erü choma chanayaxu i ngëma yatü na choxü yaxuchigaxücëx namaã i togü i nachiuãnecüãxgü i duüxügu rü norü ãëxgacügü, rü ngëma Iraécüãxgü. ¹⁶ Rū choma tá nüxü nüxü chadauxëë i ñuxre i ngúxü i tá yangexü i chauxcëx —ñanagürü ga Cori. ¹⁷ Rū guma ñpata ga Chauru nawa yexmanewa naxü ga Ananiã. Rū nagu naxücu, rü nüxü ningõgü, rü ñanagürü nüxü: —Pa Chaueneë Pa Chaurux, nüma ya Cori ya Ngechuchu ga guma namawa cuxcëx ngócü ga yexguma núma cuxüxgu, rü núma choxü namu na wenaxãrü quidauchixücëx, rü cuxna nanguxücëx i Naãë i Üünexü —ñanagürü. ¹⁸ Rū yexgumatama rü ñoma ṭacüchicutëxerüü naxëtüwa ínayi, rü yexguma wenaxãrü meã nidauchixetü. Rū yexguma inachi ga Chauru, rü Ananiã ínabaiexëë. ¹⁹ Rū yemawena nachibü, rü wenaxãrü napora. Rū ñuxre ga ngunexügu yexma Damacugu narüxãüx namaã ga yema yaxõgüxü ga yexma ãchiügüxü.

Chauru rü Damacuwa nüxü nixu ga Ngechuchuchiga

²⁰ Rū yexguma inanaxügu ga Chauru ga ngutaquëxepataügüwa nüxü na yaxuchigaxü na Ngechuchu yüxü ya Tupana Nane. ²¹ Rū guxüma ga yema nüxü ñnüëxü rü poraãcü nabaixãchiãëgü, rü ñanagürügü: —¿Tama ëxna ñaã yatü yüxü ga Yerucharéüwa íyayauxügüxü ga guxüma ga duüxügu ga Ngechuchuaxü yaxõgüxü? ¿Rü tama ëxna ñaãtama yüxü ga yema núma üxü na ínayauxüãxücëx rü ñuxüchi paigüarü ãëxgacüxütawa nagagüãxücëx i duüxügu i yaxõgüxü? —ñanagürügü. ²² Natürü ga Chauru rü guxü ga ngunexügu yexeraãcü tama namuãcüma nüxü nixuchigaama ga ore ga Ngechuchuchiga. Rū inayanangeëxgüxëë ga Yudíugü ga Damacuwa yexmagüxü, yerü meãma nanangoxëë na Cristu yüxü ga Ngechuchu.

Chauru rü Yudíugü- chaxwa niña

²³ Rū marü muxüma ga ngunexügu ngupetüguwena rü yema Yudíugü rü wüxigu nügümaã nagu narüxĩnüë na Chauruxü yamëxgüxücëx. ²⁴ Natürü nüma ga Chauru rü nüxü nacuáchiga ga na yamëxgüchaüãxü. Rū yema Yudíugü rü ngunecü rü chütacü rü guma ñãneãrü poxeguxüãrü ñãxgügu Chauruxü nanëixgüxü na yamëxgüãxücëx. ²⁵ Natürü ga Chauruarü ngüexügu

rü chütacü rü wüxi ga pexchi ga tacügu guma ñāneärü poxeguxütapüxétüwa ínanachüxüetaügüama, rü yemaäcü niña ga Chauru.

Yerucharéüwa nayexma ga Chauru

²⁶ Rü yexguma Yerucharéüwa nanguxgu ga Chauru, rü yema yaxögüxümaā nangutaquēxechaü. Natürü yema yaxögüxü rü nüxü namuüē, yerü nüma nüxü nacuèxgügu rü tama aixcüma Ngechuchuaxü nayaxō. ²⁷ Natürü Bernabé rü yema ngúexügü ga Ngechuchu imugüxütanüwa nanagaama. Rü yema ngúexügümaā nüxü nixu ga ñuxäcü Cori ya Ngechuchuxü na nadauxü ga Chauru ga namawa, rü ñuxäcü Cori namaā na idexaxü. Rü nüxü nixu ta ga ñuxäcü Damacuwa rü tama namuüäcüma nüxü na yaxuxü ga Ngechuchuchiga. ²⁸ Rü yemaäcü ga Chauru rü Yerucharéügu narüxäüx. Rü yema ngúexügü ga Tupana imugüxütanügu naxä. Rü tama namuüäcüma Cori ya Ngechuchuchigaxü nixuchigü. ²⁹ Rü yema Yudügü ga Griégugawa idexagüxümaā nidexaxü ga Chauru, rü Ngechuchuchigagu nügümaā nayaporagaexü. Natürü ga nümagü rü naxcèx nadaugüama ga ñuxäcü tá na yamèxgüäxü. ³⁰ Rü yexguma nüxü yacuèxächitanügu ga yema togü ga yaxögüxü, rü Checharéawa Chauruxü nagagü. Rü yexguma yéma nangugügu rü wüxi ga wapurugu nayamuëgü rü Tarsuwa naxü. ³¹ Rü yexguma rü meāma nüxü naxüpetü ga yema yaxögüxü ga guxüma ga Yudéaanewa, rü Gariréaanewa rü Chamáriaanewa. Rü yexeraäcü meā nayaxögüetanü rü aixcüma Tupana naxwèxexüäcüma meā namaxē. Rü Tupanaäe i Ünexüärü ngüxēemaā nimuëtanüāma ga yema yaxögüxü.

Eneä rü narüme

³² Rü yexguma Pedru yema yaxögüxütanügu ixüägüchigüxgu, rü yema Didágu ächiügüxü ga yaxögüxütanüwa rü ta nangu. ³³ Rü yexma nüxü nayan-gau ga wüxi ga yatü ga Eneä ga naega ga 8 ga taunecü norü pechicagu cacü, yerü nanawäixächi. ³⁴ Rü Pedru ñanagürü nüxü: —Pa Eneäx, Ngechuchu ya Cristu cuxü narümexēē. ¡Inachi rü namexēē i cuxchapenüxü! —ñanagürü. Rü yexgumatama inachi. ³⁵ Rü guxüma ga yema Didáçüäxgü rü Charunacüäxgü rü nüxü nadaugü ga na inachixü ga guma yatü, rü nüxü narüxoe ga nacümagü ga chixexü, rü Cori ya Ngechuchuwa narüxü.

Wena imaxü ga Dorca

³⁶ Rü yexgumaücüü ga ñāne ga Yopewa rü iyexma ga wüxi ga Tupanaäxü yaxōxcü ga ngecü ga Tabita ga ngíega. Rü ngéma naega i Griégugawa rü Dorca ñaxüchiga nixü. Rü ngíma rü wüxi ga mecü iyixü ga ngírü üwa, rü guxüguma nüxü irüngüxēē ga yema duüxügü ga tacü nüxü taxuxü. ³⁷ Rü yexgumaücüü iyadaawe ga Dorca, rü iyu, rü ngímücügü nanamexēē ga ngíxíne. Rü ñpataarü daxüchiüwa yexmaxü ga ucapugu nanaxügü ga ngíxíne. ³⁸ Rü Yopearü ngaicamana nayexma ga guma ñāne ga Didá ga Pedru nawa yexmane. Rü yema yaxögüxü ga Yopecüäx rü nüxü nacuèxgü ga Didáwa na nayexmaxü ga Pedru. Rü naxcèx yéma nanamugü ga taxre ga yatü ñaxümaā: —¡Rü paxa toxcèx nuā naxü! —ñaxümaā. ³⁹ Rü yexguma ga Pedru rü nawe narüxü. Rü yexguma ínanguxgu, rü yema ucapu ga yema yueta nawa yexmaxüwa nanagagü. Rü guxüma ga yutegüxü rü Pedruxü ínachomaëguächi, rü naxauxe, rü nüxü nayawégü ga yema naxchirugü ga Tabita nüxü íxüxüxü ga yexguma namaüxgu. ⁴⁰ Rü Pedru rü düxétüwa nanamugü ga guxüma. Rü inacaxäpüxü, rü nayumüxē. Rü ñuxüchi ngíxcèx nadauegu ga yema yüxcü, rü ñanagürü: —Pa Tabitax, ¡Írüda! —ñanagürü. Rü yexguma rü iyadauchixetü, rü Pedruxü idau, rü írüto. ⁴¹ Rü yexguma ngíxmëxgu nayayauxächi, rü ngíxü inachixēē. Rü ñuxüchi naxcèx naca ga yema yaxögüxü rü yema yutegüxü, rü

maxūxcü nüxū ngīxū nawēx. ⁴² Rū guxūma ga yema duūxūgü ga Yopewa yexmagūxū rü nüxū nacuáchigagü ga yema. Rū Cori ga Ngechuchuaxū nayaxōgü ga muxūma. ⁴³ Rū muxūma ga ngunexū Yopegu narūxāūx ga Pedru napatagu ga Chimáū ga naxchèxmüärü paxēewa puracūxū.

10

Pedru rü Cornériuchiga

¹ Rū ñāne ga Checharéawa nayexma ga wūxi ga yatü ga Cornériugu āegacü. Rū 100 ga Itáriaanecūāx ga churaragüärü capitáū nixī. ² Rū nüma nixī ga wūxi ga yatü ga meāma Tupanaāxū yaxōcü. Rū wūxigu namēxmaā rü naxācūgūmaā Tupanaxū nangechaūgü. Rū mucūma ga norü dīerumaā nüxū narūngūxēē ga duūxūgü ga Yudíugü ga tacü nüxū taxuxū. Rū guxūguma nayumūxē rü Tupanamaā nidexa. ³ Rū wūxi ga ngunexū ga yexguma tomaēxpūxarü orawa nanguxchaūgu ga yáuanecü, rü nangoxetü. Rū meāma nüxū nadau ga wūxi ga Tupanaārü orearü ngeruū ga daxūcūāx ga yema ucapu ga nawa nayexmaxūgu ücuxū. Rū ñanagürü nüxū: —Pa Cornériux —ñanagürü. ⁴ Natürü nüma ga Cornériu rü meāma nüxū nadawenü, rü poraācü namuūācūma nüxna naca, rü ñanagürü: —¿Tacü cunaxwēxe, Pa Corix? —ñanagürü. Rū nanangāxū ga yema orearü ngeruū ga daxūcūāx, rü ñanagürü: —Curü yumūxēgü rü Tupana marü cuxū nüxū naxīnū, rü cumaā nataāē na ñuxācü nüxū curūngūxēēxū i duūxūgü i tacü nüxū taxuxū. ⁵ —¿Rü chanaxwēxe i Yopewa cunamugü i ñuxre i yatügü na naxcèx yacagūxūcèx i wūxi i yatü i Chimáū i Pedrugu āegaxū! ⁶ —Rü to i Chimáū i naxchèxmüärü paxēewa puracūxūpatawa nangēxma rü ngēxma nape. Rū yima napata rü taxtū i taxūcutüwa nangēxma —ñanagürü. ⁷ Rū yexguma nüxna iyanatauxgu ga yema orearü ngeruū ga namaā yéma idexaxū, rü Cornériu rü naxcèx naca ga taxre ga norü puracūtanūxū rü wūxi ga churara ga meā naga ñnūxū ga meā Tupanaāxū yaxōxū. ⁸ Rū namaā nüxū nixu ga guxūma ga yema nüxū nadauxū, rü ñuxūchi Yopewa nanamugü. ⁹ Rū moxūācü ga yexguma namagu naxīyane rü marü Yopexū yangaicagūgu ga yema duūxūgü ga Cornériu yéma mugūxū, rü Pedru rü daxū naxī ga ĩpataétüwa na yéma nayumūxēxūcèx. Rū tocuchiarü oragu nixī ga yexguma. ¹⁰ Rū nataiya, rü nüxū nachixéga ga na nachibūxū. Rū yexguma norü ōna ĩnaxūgūyane, rü nangoxetü ga Pedru. ¹¹ Rū nüxū nadau ga na yangoxnaxū ga naānetüwe, rü yéma ĩnarūxī ga wūxi ga naxchiru ga ñoma wūxi ga taxū ga naxchāpenüürü ĩxīxū. Rū norü āgūmūcūpēxewa naxātūxū rü yemaācü ĩnarūchūxūe ñuxmata ñaxtūanewa nangu. ¹² Rū yemagu ĩnarūchūxūewetaxū ga nagūxūraūxū ga naēxūgü, rü āxtapegü, rü werigü. Rū yema naxchāpenüūwa nayexma ta ga tacü ga tama nangōxgūxū ga Yudíugü. ¹³ Rū Pedru nüxū naxīnū ga Tupanaga ga nüxū ñaxū: —Pa Pedrux ĩnachi, rü ta imèx, rü nangōx! —ñaxū. ¹⁴ Rū Pedru nanangāxū rü ñanagürü: —Taxucürüwa nixī, Pa Corix, erü taguma chanangōx i tacü i toxcèx āūāchixū —ñanagürü. ¹⁵ Rū yexguma ga yema Tupanaga, rü wenaxārü ñanagürü: —Ngēma choma chamexēēxū rü tama name i āūāchi nüxū cuwogü —ñanagürü. ¹⁶ Rū tomaēxpūxcūna yemaācü nangupetü. Rū yexguma wenaxārü daxū naçhūxnagü ga yema naxchāpenüū namaā ga guxūma ga nawa yexmagūxū. ¹⁷ Rū poraācü nagu narūxīnū ga Pedru ga tacūchiga na yīxū ga yema nüxū nadauxū ga yexguma nangoxetügu. Rū yemagu ĩnaxīnūyane, rü guma ĩpataēxwa nangugü ga yema yatügü ga Cornériu yéma mugūxū ga naxcèx ĩcaetanūxū ga Chimáūpata. ¹⁸ Rū yéma naxcèx ĩnacagü rü aixcūma yexma nape ga wūxi ga yatü ga Chimáū ga Pedrugu āegaxū. ¹⁹ Rū Pedru nagu ĩrūxīnūyane ga yema nüxū nadauxū ga yexguma nangoxetügu, rü Tupanaāē i Üünexū rü ñanagürü nüxū: —Ngēāgü

nixī i tomaēxpūx i yatūgū i cuxcèx daugūxū. ²⁰ —¡Inachi, rü íruxī, rü tama cux-oegaãēcūma nawe rūxū! Erü choma nixī i núma chanamugūxū —ñanagürü. ²¹ Rū yexguma naxcèx ínaruxī ga Pedru, rü ñanagürü nüxū ga yema yatūgū: —Choma nixī i chauxcèx pedaugūxū. ¿Rü tacūwa nuã pexī? —ñanagürü. ²² Rū nūmagū nanangāxūgū, rü ñanagürügū: —Capitáũ ya Cornériuxūtawa ne taxī rü nūma nixī i nuã toxū namugūxū. Rū wūxi ya yatū ya mecū nixī, rü Tupanaxū nangechaũ. Rū guxūma i Yudíugū nüxū nangechaũ i nūmax. Rū wūxi ga Tupanaärü orearü ngeruũ ga daxūcūãx nanamu na cuxcèx toxū yacaxēxūcèx ga Cornériu rü napatawa cuxūxūcèx rü nüxū na naxīnūxūcèx i curü ore —ñanagürügū. ²³ Rū yexguma nanachocuxēē ga Pedru, rü yexma nanapegūxēē ga yema chūtaxūgu. Rū moxūãcū inaxīãchi rü nawe narūxū ga Pedru. Rū ínayaxūmücügū ga ñuxre ga Yopecūãx ga yaxōgūxū. ²⁴ Rū moxūãcū Checharéawa nangugū ga ngextá Cornériu ínanguxēēxūwa namaã ga guxūma ga natanūxūgū rü namücügū ga nüxū nangechaũgūxū ga nüxna naxuxū. ²⁵ Rū yexguma Cornériupatawa nanguxgu ga Pedru, rü íãxtūwa naxcèx naxū ga Cornériu, rü Pedrupéxegu nayacaxápūxū, rü nüxū nicuèxū. ²⁶ Natürü ga Pedru rü inanachixēē rü ñanagürü: —¡Inachi! Rū choma rü ta cuxrū duūxūmare chixī rü tama Tupana chixī —ñanagürü. ²⁷ Rū nügūmaã yadexagūãcūma wūxigu nichocu. Rū Pedru yéma namaã inayarūxū ga muxūma ga duūxūgū ga yexma ngutaquēxegūxū. ²⁸ Rū yexguma ga Pedru rü ñanagürü nüxū ga yema duūxūgū ga yexma ngutaquēxegūxū: —Pema nüxū pecuèx i toma i Yudíugūcèx rü nangēxma i torü mugū i toxna nachuxuxū na pemaã tangutaquēxegūxū, rü pepatagu na tachocuxū. Natürü Tupana choxū nangoxetūxēē rü choxū nüxū nadauxēē na tama namexū na ngēmaãcū nagu na charūxīnūxū pemaã. ²⁹ Rū ngēmacèx tama chaxoõcūma núma chaxū i ngēxguma chauxcèx pengemagu. Rū ñuxma rü chanaxwèxe i chomaã nüxū pixu na tacūcèx chauxcèx pengemaxū —ñanagürü. ³⁰ Rū Cornériu nanangāxū, rü ñanagürü: —Marü ägümücū i ngunexū nangupetū ga ñūxgumaãcū ga tomaēxpūxarü oragu ga yáuanecū, rü nuã chopatawa chayumūxē erü guxūguma ngēmaãcū chanaxū. Rū yexguma chayumūxēgu rü changoxetū, rü chauxcèx nangox ga wūxi ga yatū ga iyaurachirucūxū. ³¹ —Rü ñanagürü choxū:

“Pa Cornériux, Tupana marü nüxū naxīnū i curü yumūxē rü cumaã nataãē na ñuxãcū nüxū curūngūxēēxū i duūxūgū i tacū nüxū taxuxū. ³² —¡Rü Yopewa namugū i ñuxre i yatūgū na naxcèx yacagūxūcèx i Chimáũ i Pedrugu ägaxū! Rū to i Chimáũ i naxchèxmüärü paxēēwa puracūxūpatagu pexū. Rū yima napata rü taxtū i taxūcutūwa nangēxma”, ñanagürü choxū. ³³ Rū yemacèx rü yexgumatama paxa cuxcèx yéma chanamugū, rü cuma rü mexū toxcèx cuxū erü núma cuxū. Rū ñuxma i guxāma i toma rü Tupanapēxewa tangēxmagū. Rū nüxū taxīnūēchaũ i gux-ūma i ngēma ore i Cori namaã núma cuxū muxū na tomaã nüxū quixuxūcèx —ñanagürü ga Cornériu.

Pedru rü Cornériupatawa nüxū nixu ga Ngechuchuchiga

³⁴ Rū yexguma inanaxūgū ga Pedru ga na yadexaxū, rü ñanagürü: —Ñuxma waxi nixī i nüxū chacuáxū na Tupanacèx nawūxiguxū i guxūma i duūxūgū erü nūma rü aixcūma guxāxūma nangechaũ. ³⁵ —Rü nūma rü wūxichigū i nachiũãnewa nanade i ngēma duūxūgū i nüxū ngechaũgūxū rü mexū ügūxū. ³⁶ —Rü nūma ga Tupana rü Yudíugütanūwaxíra nanamu ga norü ore rü marü nüxū nixu na tūxū nüxū nangechaũxū i tórü pecadugū i ngēxguma Cristu ya guxāärü Cori ixīcūaxū yaxōgūgu. ³⁷ —Pema rü meãma nüxū pecuèx na tacū ngupetūxū ga guxūwama ga Yudíugüarü naãnewa. Rū

noxri ga Cuáü rü nüxü nixu na Tupana naxwèxexü na ínbaiüxü ga duüxügü. Rü yemawena ga Ngechuchu rü Gariréaanewa inanaxügü ga duüxügümaã nüxü na yaxuxü ga ore i mexü. ³⁸—Rü pema nüxü pecuèx ga ñuxácü Tupana na naporaxèèxü ga Ngechuchu ya Nacharétucüâx yerü nüxna nanaxã ga Naãe i Üünexü. Rü nüma ga Ngechuchu rü mexü naxü ga yema íyaxügüxüwa, rü nanameèxèè ga guxüma ga yema duüxügü ga ngoxoâxgüxü. Rü yemaácü nanaxü yerü Tupana nüxü narüngüxèè. ³⁹—Rü toma nixi ga nüxü tadaugüxü rü nüxü tixuchigaxü i guxüma ga naxüxü ga Ngechuchu ga Yudéaanewa rü Yerucharéüârü íânewa. Rü yemawena rü nayamèxgü rü curuchawa nayapotagü. ⁴⁰—Natürü ga Tupana rü tomaèxpüx ga ngunexü ngupetügu rü wena nanamaxèè rü toxçèx nanangoxèè. ⁴¹—Natürü tama guxü ga duüxügüçèx nangox. Rü toxçèxicatama nangox ga toma ga üpamama Tupana toxü dexe na nüxü tixuxüçèx i Ngechuchuchiga. Rü yexguma marü yuwa ínadaxguwena rü namaã tachibüe rü namaã taxaxegü. ⁴²—Rü nümatama ga Ngechuchu toxü nimugü na duüxügümaã nüxü tixuxüçèx na Tupana marü âèxgacüxü yangucuchixèèxü na guxü i duüxügüârü ngugüruü na yüüxüçèx. Rü nüma ya Ngechuchu nixi i tórü maxüxü nangugüxü, rü nüma tá nixi i guxü i duüxügü i maxèxü rü yuexüxü yacagüxü naxçèx i norü maxüchiga. ⁴³—Rü üpamamatama guxüma ga Tupanaârü orearü uruügü rü Ngechuchuchiga nidexagü, rü ñanagürügü:
 “Rü nüma tá nüxü nüxü nangechaü i norü pecadugü i guxüma i duüxügü i nüxü yaxögüxü”,
 ñanagürügü.

Tupanaãe i Üünexü rü yema duüxügü ga tama Yudíugü ixígüxütanüwa nangu

⁴⁴ Rü yexguma íyadexayane ga Pedru, rü Tupanaãe i Üünexü nüxna nangu ga guxüma ga yema yéma irüxínüèxü ga yema ore. ⁴⁵ Rü yema yaxögüxü ga Yudíugü ga Pedrumaã yéma íxü, rü poraácü nañaxíachiãègü yerü Tupanaãe i Üünexü rü nüxna rü ta nangu ga yema duüxügü ga tama Yudíugü ixígüxü. ⁴⁶ Rü nüxü naxínüè ga to ga nagawachigü na yadexagüxü, rü Tupanaxü na yacuèxüügüxü. ⁴⁷ Rü yexguma ga Pedru rü ñanagürü: —¿Éxna nangèxmaxü i texé na nüxna nachuxuxü i na ínbaiüxü i ñaã duüxügü i marü taxrüü Tupanaãe i Üünexü nüxna nguxü? —ñanagürü. ⁴⁸ Rü nanamu na Ngechuchu ya Cristuégagu na ínbaiüxü ga yema duüxügü ga yexwaca yaxögüxü. Rü yexguma Pedruxü nacèèxügü na yexma naxãüxüçèx ga ñuxre ga ngunexü.

11

Pedru rü Yerucharéüwa yexmagüxü ga yaxögüxümaã nüxü nixu ga tacü na ngupetüxü ga Checharéawa

¹ Rü yema ngüexügü ga Ngechuchu imugüxü rü yema yaxögüxü ga Yudéagügüxü, rü nüxü nacuáchigagü na yema tama Yudíugü ixígüxü rü ta nayauxgüâxü ga Tupanaârü ore. ² Natürü yexguma Yerucharéüwa nanguxgu ga Pedru, rü ñuxre ga Yudíugü ga yaxögüxü rü Pedruxü nixugüe. ³ Rü ñanagürügü: —¿Rü tüxcüü natanüwa cuxü i ngèma tama Yudíugü ixígüxü, rü namaã cuchibü? —ñanagürügü. ⁴ Rü Pedru meãma namaã nüxü nixu ga guxüma ga tacü na ngupetüxü, rü ñanagürü nüxü: ⁵ —Choma rü Yopearü íânewa chayexma, rü yexguma íchayümüxèyane, rü changoxetü. Rü nüxü chadau ga wüxi ga naxchápenüürüü ixixü ga norü ägümücüpèxewa ätüxüxü ga írüçhüxüèxü ñuxmata chauxütawa nguxü. ⁶—Rü meãma nüxü chadawenü na nüxü chadauxüçèx na tacü yexmaxü ga aixepewa. Rü nüxü chadau ga naxünagü ga ixägümücüparaxü rü naèxügü ga idüraexü, rü äxtapegü rü

werigü. Rü yema naxchápenüüwa nayexma ta ga tacü ga tama ingõxü, erü taxcèx i yixema i Yudíugü rü naxãũãchi. ⁷—Rü nüxü chaxĩnü ta ga Tupanaga ga choxü ñaxü:

“¡Inachi! Pa Pedrux. ¡Rü ta imèx, rü nangõx!” ñaxü. ⁸—Natürü choma chanangãxü, rü ñacharügü:

“Taxucürüwa nixĩ, Pa Corix, erü taguma chanangõx i tacü i toxcèx ãũãchixü”, ñacharügü. ⁹—Rü yexguma wenaxãrü ñanagürü choxü ga yema Tupanaga ga daxüwa inaxüxü:

“Ngëma choma i Tupana chamexëëxü, rü tama name i ãũãchi nüxü cuwogü”, ñanagürü. ¹⁰—Rü tomaëxpüxcüna yemaãcü nangupetü, rü yexguma wenaxãrü daxü nachüxnagü ga yema naxchápenüü namaã ga guxüma ga nawa yexmagüxü. ¹¹—Rü yexgumatama guma í ga nawa chayexmanewa nangugü ga tomaëxpüx ga yatügü ga Checharéawa ne mugüxü ga chauxcèx daugüxü. ¹²—Rü Tupanaãe i Üünexü choxü namu na nawe charüxüxcèx woo tama Yudíugü na yixígüxü ga yema duüxügü. Rü chomaã ta yéma naxĩ ga ñaã 6 ga yaxõgüxü. Rü napatawa tangugü ga guma yatü ga Cornériu, rü yexma tachocu. ¹³—Rü tomaã nüxü nixu ga ñuxãcü na napatawa nüxü nadauxü ga Tupanaãrü orearü ngeruü ga daxücüãx ga yexma chixü ga ñaxü nüxü:

“¡Yopewa namugü i yatügü na naxcèx yacagüxüxcèx i Chimáũ i Pedrugu ãegaxü! ¹⁴—Rü nüma tá cumaã nüxü nixu na ñuxãcü tá cuma rü guxü i cupatagugüxümaã penayaxuxü i perü maxü i taguma gúxü”, ñanagürü nüxü. ¹⁵—Rü yexguma ichanaxügügu ga na chidexaxü, rü nüxna nangu ga Tupanaãe i Üünexü, yexgumarüü ga noxri tüxna nanguxgurüü. ¹⁶—Rü yexguma ga choma rü nüxna chacuèxãchi ga Cori ya Ngechucharü ore ga yexguma ñaxgu:

“Rü aixcüma nixĩ ga Cuáũ ga dexáwamare ínabaiüxëëãxü, natürü i pema rü Tupanaãe i Üünexü tá pexna nangu”, ñaxgu. ¹⁷—Rü pema nüxü pecuèx na ñuxãcü Tupana tüxna nanguxëëxü ga Naãe i Üünexü i yixema na Cori ya Ngechuchu ya Cristuaxü yaxõgüxü. Rü ñuxma na taxrüü Tupana yema duüxügüna nanguxëëxü ga Naãe i Üünexü, ¿rü ñuxücürüwa i choma i nüxü chaxoxü na naga chaxĩnüxü ya Tupana? —ñanagürü ga Pedru. ¹⁸ Rü yexguma yema orexü naxĩnüëgu ga yema yaxõgüxü ga Yerucharéücüãx, rü nachianegümare. Rü Tupanaxü nicuèxüügü. Rü ñanagürügü: —Rü ngëmawa nüxü tacuèx na Tupana tüxü dexü ya yixema woo tama Yudíugü ixígüxe. Rü ngëxguma nüxü tarüxoegu i tümaãrü chixexü rü Tupanacèx tadaugügu, rü nüma tüxna nanaxã i maxü i taguma gúxü —ñanagürügü.

Yaxõgüxü ga Aütioquíawa yexmagüxüchiga

¹⁹ Rü yexguma Etébaüxü yamëxgüguwena, rü norü uwanügü poraãcü nawe ningëxütanü ga yema yaxõgüxü. Rü yemacèx nügü nawoone. Rü Peníchiawa, rü Chiprewa rü Aütioquíawa nabuxmü. Rü yéma nüxü nixugüe ga ore ga mexü ga Ngechuchuchiga. Natürü Yudíugümaãxĩcatama nüxü nixugüe ga yema ore rü tama ga togümaã. ²⁰ Natürü yéma Aütioquíawa nangugü ta ga ñuxre ga togü ga yaxõgüxü ga Chíperecüãx, rü Chirenecüãx. Rü nümagü rü yema tama Yudíugü ixígüxümaã rü ta nüxü nixugüe ga ore i mexü i Cori ya Ngechuchuchiga. ²¹ Rü Tupana nüxü narüngüxëë, rü nanaporaexëë. Rü yemacèx muxüma ga yema duüxügü rü nüxü narüxoe ga nuxcümaüxü ga nacümagü, rü Cori ya Ngechuchuauxü nayaxõgü. ²² Rü yexguma yemaxü nacuáchigagügu ga yema yaxõgüxü ga Yerucharéüwa yexmagüxü, rü Aütioquíawa nanamugü ga Bernabé. ²³ Rü yexguma yéma

nanguxgu ga Bernabé, rü nüxũ nadau ga ñuxãcü Tupana nüxũ na rüngũxẽẽxũ ga yema yaxõgũxũ ga Aũtioquíacũãx, rü poraãcü namaã nataãe. Rü nayaxucuxẽgũ ga guxũma na meãma Cori ya Ngechuchuwe naxĩãmaxũcèx, rü taguma nüxũ naxoexũcèx. ²⁴ Yerü nüma ga Bernabé rü wüxi ga yatũ ga mecü nixĩ. Rü aixcüma Tupanaãe i Üünexũ rü nawa nayexma, rü napora ga norü õwa. Rü yemacèx muxũchixũma ga duũxũgũ rü Cori ya Ngechuchucèx naxĩ rü nüxũ nayaxõgũ. ²⁵ Rü yemawena ga Bernabé rü Tarsuwa naxũ na Chaurucèx yadauxũcèx. ²⁶ Rü yexguma nüxũ iyangauxgu, rü Aũtioquíawa nanaga. Rü wüxi ga tauncü wüxiwa yema nayexmagũ namaã ga yema yaxõgũxũ. Rü nanangũxẽẽ ga muxũchixũma ga duũxũgũ. Rü Aũtioquíawa nixĩ ga inaxũgũxũ ga duũxũgũ na Cristutanũxũmaã na naxugũãxũ ga yema yaxõgũxũ. ²⁷ Rü yexgumaũcüü Yerucharéũwa ne naxĩ ga ñuxre ga Tupanaãrũ orearũ uruũgũ rü Aũtioquíawa naxĩ. ²⁸ Rü natanũwa nayexma ga wüxi ga orearũ uruũ ga Agabu ga naega. Rü nanangutaquẽxexẽẽ ga yema yaxõgũxũ ga Aũtioquíawa yexmagũxũ. Rü yema ngutaquẽxewa rü inachi ga Agabu rü Tupanaãe i Üünexũ nanamu ga na yadexaxũ, rü ñanagürü: —Wüxi i taiya i taxũ tá ínangu i guxũ i ñaã nachiũãnewa —ñanagürü. Rü aixcüma ínangu ga yema taiya ga yexguma Cádiu ãẽxgacü ixĩxgu. ²⁹ Rü yexguma ga yema yaxõgũxũ ga Aũtioquíawa yexmagũxũ, rü marü wüxigu nagu narũxĩnũe na yema ngĩxũ namugũxũcèx ga dĩeru na nüxũ nangũxẽẽgũxũcèx ga yema yaxõgũxũ ga Yudéaanegu ãchiũgũxũ. Rü wüxichigũ ngĩxũ inaxã ga dĩeru yexgumarũũ ga ñuxre ga nüxũ yexmacü. ³⁰ Rü yemaãcü nanaxũgũ, rü Bernabé rü Chaurumaã yema ngĩxũ namugũ ga yema dĩeru naxcèx ga yema yaxõgũxũãrũ ãẽxgacũgũ ga Yudéaanewa yexmagũxũ.

12

Ãẽxgacü ga Erode rü Chaũtiáguxũ nimèx rü Pedruxũ napoxcu

¹ Rü yexgumaũcüü inanaxũgũ ga ãẽxgacü ga Erode ga na ínayauxũãxũ ga ñuxre ga yaxõgũxũ ga Yerucharéũcũãx na napoxcuexũcèx. ² Rü norü churaragũxũ namu na taramaã Chaũtiágu ga Cuáũẽneẽxũ yamèxgũxũcèx. ³ Rü yexguma nüxũ nadèuxgu ga Erode ga norü me na yĩxũ ga Yudíugũ ga yema na naxũxũ, rü norü churaragũxũ namu na Pedruxũ rü ta yayauxgũxũcèx. Rü yema nangupetũ ga Yudíugũarũ peta ga Üpetũchigagu ga yexguma pãũ ga ngearũ puxẽẽruũãxũ nangõxgũgu. ⁴ Rü yexguma Pedruxũ yayauxgũgu, rü poxcupataũgu nayatèxcuchi. Rü ñuxũchi ga Erode rü nanamu ga ãgũmũcũtũcumũ ga norü churaragũ na nüxna nadaugũxũcèx. Rü wüxitũcumũwachigũ rü nayexma ga ãgũmũcü ga churaragũ. Rü yemaãcü nanaxũ ga Erode, yerü nagu narũxĩnũ ga yema petawena guxũ ga duũxũgũpèxewa na nagaãxũcèx na yamèxgũãxũcèx. ⁵ Rü yemaãcü ga Pedru rü poxcupataũwa nayexma rü churaragũ rü meãma nüxna nadaugũ. Natürü ga yema yaxõgũxũ ga Yerucharéũcũãx rü poraãcü nayumũxègũ, rü Tupanana naxcèx nacagũ.

Tupana rü Pedruxũ ínanguxuchixẽẽ ga poxcupataũwa

⁶ Rü yematama ga chũtaxũgu naxũpa ga yema ngunexũ ga Erode duũxũgũpèxewa nagaxchaũxũ, rü taxre ga churaragũarũ ngãxũwa nape ga Pedru. Rü taxre ga cadenamaã ninèixgũchacũü. Rü togũ ga churaragũ ga dauxũtaexũ nüxna nadaugũ ga poxcupataũãrũ ããx. ⁷ Rü ngürũãchi yema poxcupataũwa nangõx ga wüxi ga orearũ ngeruũ ga daxũcũãx ga Coriarũ. Rü poraãcü nangõone ga guma poxcupataũwa. Rü yema orearũ ngeruũ

Pedruḡ nacuḡagü, rü nanabaixächixēē. Rü ñanagürü: —¡Paxama írüda! — ñanagürü. Rü yexgumatama íniwēgü ga guma cadena ga Pedru namaã inēḡgüchacüücü. ⁸ Rü Pedruḡ ñanagürü ga yema orearü ngeruḡ: —¡Rü icuḡcuchichiru rü nacuaixcu i curü chapatu! —ñanagürü. Rü yemaäcü nanaxü ga Pedru. Rü ñanagürü ta: —¡Rü icuḡcuchi i curü gáuxüchiru, rü chowe rüxü! —ñanagürü. ⁹ Rü nawe narüxü ga Pedru. Rü tama nüxü nacuèx ga aixcüma na yīxü ga yema orearü ngeruḡ namaã üxü. Rü naxcèx rü nangoxetümare. ¹⁰ Rü nüxü nachopetü ga nüxīraüxü ga dauḡtaexü, rü ñuxüchi ga yema to ga dauḡtaexü. Rü yexguma nawa nangugüga ga yema iāx ga áchumenēxānaxcèx ga ítamüwaama üxü, rü nüēchama niwāxna. Rü ínachoxü. Rü yexguma marü wüxi ga ítamü inaxīxgu, rü nüxna inayarütaxu ga yema orearü ngeruḡ. ¹¹ Rü yexguma nüxü nicuèxāchi ga Pedru, rü nügümaã ñanagürü: —Ñuxma waxi i nüxü chacuáxü na aixcüma Cori ya Tupana núma namuxü i norü orearü ngeruḡ na Erodemēxēwa choxü napuxü, rü nawa choxü ínanguxuchixēēxü i guxüma i ngēma chomaã naxügüchaüxü i ngēma Yudügü i tama yaxōgüxü —ñanagürü. ¹² Rü yexguma yemaxü yacuèxāchigu ga Pedru, rü ngīpatawa naxü ga wüxi ga ngecü ga Mariagu āegacü. Rü ngīma iyixī ga Cuáü Marcu naē. Rü yema nangutaquēxegü ga muxüma ga duḡxügü ga yema yumüxēgüxü. ¹³ Rü iāxtüarü poxeguxüarü iāxwa, rü: —Tu tu tu —ñanagürü ga Pedru. Rü wüxi ga pacü ga Rode ga ngīega íyadau. ¹⁴ Rü yexguma nagawa nüxü nacuèxgu ga na Pedru yīxü, rü ngīrü taāēmaã rü íyañamare na nüxü yanaxuxü ga na Pedru yīxü ga iāxtüarü iāxgu chicü. Rü tama iyawāxna ga iāx. ¹⁵ Rü yema yexmagüxü rü: —Cungēāēmare —ñanagürügü ngīxü. Natürü ngīma rü: —Aixcüma nixī —ngīgürügü. Rü yexguma ñanagürügü: —Maneca tama nüma nixī. Rü norü dauruḡ i daxücüāxmare nixī —ñanagürügü. ¹⁶ Natürü ga Pedru rü yoxni iāxwa: —Tu tu tu —ñanagürüama. Rü yexguma naxcè x yawāxnaāgu rü nüxü nadaugüga ga Pedru na yīxü, rü nabaixächiaēgü. ¹⁷ Natürü nüma naxunagümēxē, rü naxmēxmaã nayanachianexēēgü. Rü namaã nüxü nixu na ñuxācü Cori ínanguxuchixēēxü ga poxcupataüwa. Rü ñanagürü ta: — ¡Chaütiágumaã rü ngēma togü i yaxōgüxümaã nüxü pixu i ngēma ore! — ñanagürü. Rü yexguma inaxüāchi, rü toxnamana naxü. ¹⁸ Rü yexguma yangunegu, rü yema churaragü ga poxcupataüwa dauḡtaegüxü rü poraäcü nanaxixächiaēgü yerü tama nüxü nacuèxgü ga tacü na ngupetüxü namaã ga Pedru. ¹⁹ Rü yemacèx ga Erode rü yema churaragüxü namu na Pedrucèx yadaugüxüçèx. Rü yexguma taxuxüma iyangaugüga, rü Erode rü yema churaragügutama nananguxēē na nayuexüçèx. Rü yemawena ga Erode rü inaxüxü ga Yudéaanewa, rü Checharéagu nayaxāchiü.

Nayu ga Erode

²⁰ Rü Erode rü namaã nanu ga Tirucüāxgü rü Chi-dāücüāxgü. Natürü ga yema Tirucüāxgü rü Chidāücüāxgü rü naxcèx nadaugü na ñuxācü Erodexü nangüxmüxēēgüxü, yerü Erodexiüānewa nixī ga nayauxgüāxü ga nabü. Rü yemacèx wüxi ga Erodearü duḡxü ga āēxgacü ga Batumaã naxāmücügü na nüxü nangüxēēxüçèx na Erodemaã yadexagüxüçèx. ²¹ Rü Erode rü namaã inaxuneta ga wüxi ga ngunexü na namaã yadexaxüçèx. Rü yexguma yema ngunexü ga nagu inaxunetaxüwa nanguxgu, rü yema Tirucüāx rü Chidāücüāx rü Erodexütawa nangugü. Rü nicuḡcuchi ga Erode ga norü āēxgacüchiru, rü norü tochicaxüwa narüto, rü duḡxügümaã nüxü nixu ga norü ore. ²² Rü yexguma ga guxüma ga yema duḡxügü rü tagaäcü ñanagürügü: —Ñaa āēxgacü rü tama duḡxüarü dexaruḡ nixī i norü dexe,

natürü ñoma Tupanaârü dexarüü nixĩ —ñanagürügü. ²³ Rŭ Erode rŭ yema duũxŭgŭarŭ oremaã nataãẽ, rŭ tama Tupanaxŭ nicuèxüüchaŭ ga ñuxãcü Tupana nüxŭ narüngŭxëẽxŭ. Rŭ yemacèx wŭxi ga Tupanaârü orearŭ ngeruŭ ga daxŭcŭãx rŭ yexgumatama Erodexŭ niðaawexëẽ. Rŭ õxmigŭ nanangõx, rŭ yemamaã nayu. ²⁴ Natürü yema yaxõgŭxŭ rŭ yexeraãcü guxŭwama nüxŭ nixugŭe ga Cori ga Tupanaârü ore. Rŭ muxŭchixŭ ga duũxŭgŭ nüxŭ nayaxõgŭ. ²⁵ Rŭ yexguma marŭ yanguxëẽãgu ga norŭ puracŭ ga Chauru rŭ Bernabé, rŭ ínachoxŭ ga Yerucharéŭwa, rŭ wenaxârŭ Aŭtioquíacèx nawoegu. Rŭ nayagagŭ ga Cuáŭ Marcu.

13

Bernabé rŭ Chauru rŭ inanaxŭgŭe ga to ga nachiŭãnewa na nangegŭãxŭ ga Tupanaârŭ ore

¹ Rŭ yema yaxõgŭxŭ ga Aŭtioquíawa yexmagŭxŭtanŭwa rŭ nayexma ga ñuxre ga yatŭgŭ ga Tupanaârŭ orearŭ uruŭgŭ, rŭ ñuxre ga yatŭgŭ ga Tupanaârŭ orewa nguxëẽtaegŭxŭ. Rŭ yematanŭwa nayexma ga Bernabé, rŭ Chimáŭ ga Waxwegu ãegaxŭ, rŭ Dúchiu ga Chirenecŭãx, rŭ Manaẽ ga wŭxigu ãëxgacŭ ga Erodemaã yaexŭ, rŭ Chauru. ² Rŭ wŭxi ga ngunexŭ ga yexguma Coricèx ínangutaquëxegŭgu rŭ tama nachibŭeãcüma ínayumŭxëgŭguyane, rŭ Tupanaãẽ i Üünexŭ rŭ ñanagürŭ nüxŭ: —¡Choxna penamugŭ i Chauru rŭ Bernabé na naxŭgŭãxŭcèx i ngẽma puracŭ i choma nawa chanamugŭchaŭxŭ! —ñanagürŭ. ³ Rŭ yexguma nüxŭ nachauegu ga tama nachibŭeãcüma na nayumŭxëgŭxŭ, rŭ Chauru rŭ Bernabéëtŭgu naxŭmëxgŭ ga yema yaxõgŭxŭ, rŭ ñuxŭchi inanamuãchitanŭ na naxŭgŭãxŭcèx ga Tupanaârŭ puracŭ.

Chiprewa naxĩ ga Bernabé rŭ Chauru

⁴⁻⁵ Rŭ Tupanaãẽ i Üünexŭ rŭ inanamuãchitanŭ ga Bernabé rŭ Chauru. Rŭ ñãne ga Cheúchiawa naxĩ, rŭ gumaârŭ türewa inaxĩãchi, rŭ capaxŭ ga Chiprewa naxĩ. Rŭ Cuáŭ Marcu nawe narŭxŭ na nüxŭ nangŭxëẽxŭcèx. Rŭ yexguma Charamína ga ñãneârŭ türewa nangugŭgu, rŭ inanaxŭgŭe ga nüxŭ na yaxugŭxŭ ga Tupanaârŭ ore ga Yudíugŭarŭ ngutaquëxepataŭgŭwa. ⁶ Rŭ guxŭgu nixĩãgŭtanŭ ga yema capaxŭwa ñuxmata Papu ga ñãnewa nangugŭ. Rŭ yéma namaã inayarŭxĩ ga wŭxi ga Yudíu ga yuŭxŭ ga Barechúgu ãegaxŭ. Rŭ nüma rŭ wŭxi ga idoratëxáxŭ nixĩ yerŭ nügŭ yaxuxgu rŭ aixcüma Tupanaârŭ orearŭ uruŭ nixĩ. ⁷ Rŭ nayexma ga yema capaxŭârŭ ãëxgacŭ ga Chérqui Paurugu ãegaxŭ. Rŭ nüma nixĩ ga wŭxi ga yatŭ ga meã naãëxŭ cuácŭ. Rŭ yema yuŭxŭ rŭ guma ãëxgacŭarŭ ngŭxëẽruŭ nixĩ. Rŭ nüma ga ãëxgacŭ rŭ norŭ duũxŭgŭxŭ namu na Chauru rŭ Bernabécèx yacagŭxŭcèx, yerŭ nüxŭ naxĩnŭchaŭ ga Tupanaârŭ ore. ⁸ Natürü yema yuŭxŭ ga Griégugawa Erimínugu ãegaxŭ, rŭ Chauru rŭ Bernabéna nayanuxŭ na Tupanaârŭ orexŭ yaxugŭxŭ. Yerŭ tama nanaxwèxe na yaxõõxŭ ga guma ãëxgacŭ. ⁹⁻¹⁰ Natürü ga Chauru ga Paurugu ta ãegaxŭ, rŭ aixcüma Tupanaãẽ i Üünexŭ nawa nayexma. Rŭ nüma ga Pauru rŭ meãma nüxŭ nadawenŭ ga yema yuŭxŭ, rŭ ñanagürŭ nüxŭ: —Pa Idoratëxáxŭ Pa ngoxo Nanex, cuma rŭ chixexŭxicatama cuxŭxchaŭ, rŭ naxchi cuxai i guxŭma i mexŭ. ¿Ñuxgura tá ta i nüxŭ curŭxoxŭ na ícuyatóxëẽxŭ i Cori ya Tupanaârŭ ore i aixcüma íxŭxŭ? ¹¹ —Ñuxmatátama cuxŭ napoxcu ya Cori ya Tupana. Rŭ tá cungexetŭ, rŭ ñuxre i ngunexŭgu rŭ táütama nüxŭ cudau ya üèxcŭ —ñanagürŭ. Rŭ yexgumatama naxcèx naxëãnexŭchi ga yema yuŭxŭ, rŭ naxmëxmaã nadaugŭ na texé naxmëxgu yayauxãchixŭcèx rŭ namaã ítixŭxŭcèx. ¹² Rŭ yexguma yemaxŭ nadèuxgu ga yema capaxŭârŭ

ãëxgacü rü nayaxõ ga Tupanaärü ore, yerü namaã nabaixãchiãë ga yema Pauru rü Bernabé nüxü nguxëëxü ga Cori ya Tupanachiga.

Pauru rü Bernabé rü Pichídiaanewa yexmane ga ãëne ga Aũtioquíawa nangugü

¹³ Rü Papuwa inaxiãchi ga Pauru namüçügümaã rü nixãũ ga taxtũ ga taxüwa. Rü Pérupe ga ãënewa nangugü ga Paũpíriaanewa. Natürü yéma nüxna naxo ga Cuáũ Marcu, rü Yerucharéüçèx nataegu. ¹⁴ Rü Pérupewa inaxiãchi ga Pauru rü Bernabé rü ãëne ga Aũtioquíawa nangugü ga Pichídiaanewa. Rü yéma rü ngüxchigaarü ngunexügu rü Yudíugüarü ngutaquëxepataũgu nachocu, rü yéma narütogü natanüwa ga yema íngutaquëxegüxü. ¹⁵ Rü yema ngutaquëxewa rü nüxü nadaumatügü ga Tupanaärü mugü ga Moíché ümatüxü rü yema ore ga Tupanaärü orearü uruügu ümatüxü. Rü yemawena, rü guma ngutaquëxepataũrü ãëxgacügü, rü Bernabé rü Pauruna nacagü, rü ñanagürü: —Pa Toeneëgüx, ngëxguma pexü nangëxmagu i perü ore i taãëxëëruü i toxçèx rü marü name i ñuxma tomaã nüxü pixu —ñanagürü. ¹⁶ Rü yexguma inachi ga Pauru, rü naxunagümëxë na iyanachianexüçèx ga duüxügü. Rü yexguma duüxügümaã nidexa, rü ñanagürü: —Pa Duüxügü Pa Chautanüxügüx rü Guxãma i Pema i To i Nachiüãnecüãx Ixíguex ya Tupanaxü Ngechaüğüxe, rü jiperüxñüë! ¹⁷ —Yima tórü Tupana i yixema i Yudíugü, rü tüxü nade ga nuxcümaüğüxe ga tórü oxigü na tüxü nangüxëëxüçèx. Rü poraãcü tüxü nimuxëë ga yexguma woo to ga nachiüãne ga Equituanewa tayexmagügu. Rü yemaãcü wüxi ga taxü ga nachiüãne tüxü nixíguëë. Rü ñuxüchi yemawena, rü norü poramaã tüxü ínagaxü ga yema naãnewa. ¹⁸ —Rü dauxchitawa ga ngextá taxúema íxãpataxüwa tüxü nagagü. Rü yéma 40 ga taunecü Tupana yaxna tümamaã naxñü ga guxema tórü oxigü. ¹⁹ —Rü Tupana nanadai ga yema 7 ga ãëxgacügü ga Canaãnecüãxgü guxüma ga norü duüxügümaãchigü. Rü yemaãcü nanaxü na tórü oxigüna naxãxüçèx ga yema naãne na tümäärüğüxüchi yíxüçèx. ²⁰ —Rü 450 ga taunecü rü yemaãcü tüxü narüngüxëë. Rü yemawena rü tüxna nanamu ga togü ga ãëxgacügü ga dauruügu ñuxmata Tupanaärü orearü uruü ga Chamue ingucuchix. ²¹ —Rü yexguma ga duüxügü rü Tupanana naxçèx nacagü ga wüxi ga ãëxgacü ga rei na namaã inacuáxüçèx. Rü Tupana rü nüxna nanamu ga Chaú ga Chiche nane ga Beyamítaa ixícü. Rü nüma nüxna nadau ga duüxügü ga 40 ga taunecügu. ²² Rü yemawena ga Tupana rü ínatatëxüchi ga Chaú, rü Dabíxü naxuneta na guma norü ãëxgacü yíxüçèx. Rü Dabíxü nixuchiga ga Tupana, rü ñanagürü:

“Nüxü chadau rü Dabí ya Ichaí nane rü wüxi ya yatü ya poraãcü choxü ngüchaüçü nixí. Rü nüma tá nanaxü i guxüma i ngëma choma chanaxwëxexü”,

ñanagürü ga Tupana. ²³ Rü nuxcüma ga Tupana rü marü inaxuneta rü wüxi i Dabítaa tá nixí i Cristu ixíxü, rü tá nanamaxëëë i Yudíugü. Rü Ngechuchu nixí ga guma maxëxëëruü ga tórü oxigümaã nüxü yaxucü ga Tupana. ²⁴ Natürü naxüpa ga Ngechuchu na ínguxü, rü Cuáũ ga baiüxëëruü rü guxüma ga Yudíugümaã nüxü nixuchiga ga ore i mexü rü ñanagürü:

“Rü name nixí i nüxü perüxoe i pecüma i chixexü, rü Tupanacèx pedaügü, rü ípebaiü”, ñanagürü. ²⁵ Rü yexguma marü yangaicaxgu ga tá na nayuxü ga Cuáũ, rü ñanagürü:

“Rü tama choma nixí i ngëma pema nagu perüxñüëxü i Cristu chiixü. Natürü chowëama ne naxü i nüma ya aixcüma Cristu ixícü. Rü choma rü napëxewa taxuwama chame, rü bai i norü chapatucunüärü wëgüwaxüra chame erü nüma rü wüxi i ãëxgacü i tacüxüchima nixí”, ñanagürü ga Cuáũ.

²⁶ Rü ñanagürü ga Pauru, —Pa Chautanüxügü i Abráütaagüx, rü Guxãma

i Pema i To i Nachiũãnecũãx i Tupanaxũ Ngechaũgũxex, rü pexcèx nixĩ i ñaã ore i tüxũ maxèxèẽxũ. ²⁷ –Rü aixcũma yema Yerucharéũcũãxgũ ga duũxũgũ rü yema norũ ãẽxgacũgũ rü tama nüxũ nacuèxgũ ga Tupana Nane na yĩxũ ga Ngechuchu. Rü tama meã nüxũ nacuèxgũ ga tacũchiga na yĩxũ ga yema ore ga nuxcũmaũgũxũ ga Tupanaãrũ orearũ uruũgũ ũmatũxũ i ñuxma perũ ngutaquẽxepataũwa nüxũ pedaumatũgũxũ i wũxichigũ i ngũxchigaarũ ngunexũgu. Rü yemaãcũ nümagũtama ga yema duũxũgũ ga Ngechuchuxũ imèxgũxũ rü yexguma yamèxgũãgu rü nayanguxèẽ ga yema ore ga nuxcũma ũmatũxũ. ²⁸ –Rü woo taxuũma ga tacũ ga chixexũ nawa inayangaugũ na nayuxèẽãxũcèx, natürũ Piratuna naxcèx nacagũ na yamáãxũcèx. ²⁹ –Rü ningu ga guxũma ga yema ore ga Tupanaãrũ orearũ uruũgũ ũmatũxũ ga Ngechuchuchiga ga ñuxãcũ tá na nayuxũ. Rü yemawena rü nanayauxgũ ga naxũne ga curuchawa, rü wũxi ga naxmaxũgu nayanaxũcuchigũ. ³⁰ –Natürũ ga Tupana rü wena nanamaxèẽ ga woo marũ na nayuxũ. ³¹ –Rü nüma ga Ngechuchu rü muxũma ga ngunexũ naxcèx nangox ga yema duũxũgũ ga nawe rüxĩxũ ga yexguma Gariréaanewa ne naxũxgu rü Yerucharéũwa naxũxgu. Rü ngẽma duũxũgũ nixĩ i ñuxma i guxũ i duũxũgũmaã nüxũ ixugũxũ i nachiga. ³²⁻³³ Rü ngẽmaãcũ i toma rü núma tangugũ na pemaã nüxũ tixuxũcèx i ngẽma ore i aixcũma mexũ. Rü dücax, rü yema uneta ga nuxcũmaũgũxũ ga tórũ oxigũmaã nüxũ yaxuxũ ga Tupana, rü taxcèx nayan-guxèẽ ga yexguma Ngechuchuxũ wena namaxèẽgu. Rü wiyægũpanewa i norũ taxre i capíturuwa rü ngẽmachiga nüxũ nixu i ngẽxguma:

“Cuma nixĩ i Chaune, rü choma nixĩ i Cunatũ chiĩxũ”, ñaxgu. ³⁴ –Rü Tupana rü nuxcũma rü marũ nüxũ nixu ga wena tá na namaxèẽãxũ ga Ngechuchu na tama yayixixũcèx ga naxũne. Rü norũ orewa rü ñanagürũ:

“Rü choma tá pexcèx chayanguxèẽ ga yema unetagũ i ũünegũxũ i aixcũma ixĩgũxũ ga nuxcũma Dabímaã nüxũ chixuxũ”,

ñanagürũ. ³⁵ –Rü ngẽmacèx toxnamana i Tupanaãrũ orewa rü ñanagürũ ta:

“Tama cunaxwèxe na yayixixũ i naxũne ya Cune ya ũünecũ,”

ñanagürũ. ³⁶ –Rü yexguma namaũxgu ga Dabí, rü nüxũ narüngũxèẽ ga norũ duũxũgũ, yexgumarũũ ga ñuxãcũ Tupana namuxũ. Natürũ ñuxũchi nayu, rü nanatũ rü naẽxũtagu natèx ga naxũne, rü niyixi. ³⁷ –Natürũ guma Tupana wena namaxèẽcũ ga Ngechuchu rü tama niyixi ga naxũne.

³⁸ –Rü ñuxmax, Pa Chaueneẽgũx, rü chanaxwèxe i nüxũ pecuèx rü yimatama Ngechuchugagu Tupana tüxũ nüxũ nangechaũ i tórũ pecadugũ ngẽxgumarũũ i pemaã nüxũ tixuxũrũũ. ³⁹ –Rü ñuxma ya guxãma ya yĩxema nüxũ yaxõgũxe, rü Ngechuchugagu Tupana tüxũ nüxũ nangechaũ i guxũma ga yema pecadugũ ga noxri taxucürũwa tüxũ nüxũ nangechaũxũ ga yexguma nagu taxĩxgu ga yema mugũ ga Moĩché ũmatũxũ. ⁴⁰ –Rü pexuãègũ na tama pegu nanguxũcèx i ngẽma poxcu i Tupanaãrũ orearũ uruũgũ nüxũ ixuchigaxũ ga yexguma ñagũgu:

⁴¹ “Rü dücax, Pa Duũxũgũ i Tupanaãrũ Orexũ Cugũexũx, rü tá pebaixãchie rü tá peyue erũ pema pemaxèyane rü tá chanaxũ i tacũ i taxũ. Rü pema rü tãũtãma peyaxõgũ i woo texé pemaã nüxũ ixuxgu”,

ñanagürũ. Rü yexma nayacuèxèẽ ga Pauru ga norũ ore. ⁴² Rü yexguma guma ngutaquẽxepataũwa ínachoxũgu ga Pauru rü namücũgũ, rü yema duũxũgũ ga tama Yudíugũ ixĩgũxũ rü nüxũ nacèxũgũ na to ga ngũxchigaarũ ngunexũgu rü wenaxãrũ yematama orexũ namaã yaxuxũcèx. ⁴³ Rü yexguma marũ nüxũ nachauegu ga na nangutaquẽxegũxũ, rü Pauru rü Bernabéwe narũxĩ ga muxũma ga Yudíugũ rü muxũma ga togũ ga duũxũgũ ga tama Yudíugũ ixĩgũxũ natürũ Yudíugürũũ yaxõgũxũ. Rü Pauru rü Bernabé

rū namaã nidexagü rü nayaxucuxëgü na guxüguma nagu naxĩnũëëchaxüçèx ga ñuxãcü Tupana nüxü ngechaüãcüma na nadexü. ⁴⁴ Rŭ yema to ga ngüxchigaarü ngunexügu, rü wixgutaèx guxüma ga yema ãñecüãx nangutaquëxegü na inaxĩnũëxüçèx ga Tupanaarü ore. ⁴⁵ Natürü nayexma ga ñuxre ga Yudíugü ga tama ngutaquëxegu chocuxü. Rŭ yexguma nüxü nadaugügu ga na namuxüchixü ga duüxügu ga Paurucèx ngutaquëxegüxü rü poraãcü nixãüxãchie. Rŭ inanaxügüe ga na Pauruxü nachoxügagüxü rü namaã naguxchigagüxü. ⁴⁶ Natürü ga Pauru rü Bernabé rü tama namuëãcüma yema Yudíugüxü nangãxügu, rü ñanagürügu: –Tupana nanaxwèxe na pe-maãxĩra nüxü tixuxü i norü ore. Natürü ñuxma na nüxü pexoexü i ngëma ore rü tama na penayauxgüchaüxü i maxü i taguma gúxü, rü ngëmacèx i ñuxmax i toma rü tá ngëma tama Yudíugü ixíngüxütanüwa taxĩ. ⁴⁷ –Yerü yemaãcü toxü namu ga Cori, rü ñanagürü:

“Duüxügu i tama Yudíugü ixíngüxüarü ngóonexëëruü marü cuxü chixixëë, na guxüwama i ñoma i naãnewa cunangexüçèx i chorü ore i maxëxëëruü”, ñanagürü. ⁴⁸ Rŭ yexguma yema orexü naxĩnũëgu ga yema duüxügu ga tama Yudíugü ixíngüxü, rü nataãëgü rü ñanagürügu: –Rŭ namexëchi nixĩ i ñaã Cori ya Tupanaarü ore –ñanagürügu. Rŭ nayaxögü ga guxüma ga yema duüxügu ga Tupana marü nüxü unetaxü na nayauxgüãxüçèx i maxü i taguma gúxü. ⁴⁹ Rŭ yemaãcü guxüwama ga yema naãnewa nanguchigü ga Cori ya Tupanaarü ore. ⁵⁰ Natürü yema Yudíugü ga tama Ngechuchuaxü yaxögüchaüxü, rü chixexümaã nayaxucuxëgü ga ñuxre ga ngexügu ga mexügu ga Tupanaxü ngechaügüxü rü guma ãñeãrü ãëxgacügü na Pauru rü Bernabéxü ínawoxüçèx. Rŭ yemacèx ínawoxü ga yema naãnewa. ⁵¹ Rŭ yexguma ga Pauru rü Bernabé rü inapagücutü ga norü üxaxücutü na yemawa nüxü yacuëxãchitanüxüçèx ga norü chixexü ga yema ãñecüãxgü ga duüxügu. Rŭ ñuxüchi ga Pauru rü Bernabé rü ãñe ga Içúniüwa naxĩ. ⁵² Natürü yema yaxögüxü ga guma ãñe ga nawa ínachoxünewa yexmagüxü rü poraãcü Tupanamaã nataãëgü, rü Naãë i Üünexü rü aixcüma nawa nayexma.

14

Pauru rü Bernabé rü ãñe ga Içúniüwa nayexmagü

¹ Rŭ Içúniüwa rü wüxigu Yudíugüarü ngutaquëxepataügu nachocu ga Pauru rü Bernabé. Rŭ meãma nüxü nixuchiga ga Tupanaarü ore rü yemaãcü nayaxögü ga muxüma ga duüxügu ga Yudíugü rü yema tama Yudíugü ixíngüxü rü ta. ² Natürü yema Yudíugü ga tama Ngechuchuaxü yaxögüxü, rü chixexümaã nayaxucuxëgü ga yema tama Yudíugü ixíngüxü na yema yaxögüxüchi naxaixüçèx. ³ Rŭ yemacèx muxüma ga ngunexü yexma narücho ga Pauru rü Bernabé, rü tama namuëãcüma nüxü nixuchiga ga Cori ya Tupanaarü ore. Rŭ yema duüxügümaã nüxü nixu na ñuxãcü Tupana poraãcü tüxü nangechaüxü. Rŭ nüma ga Cori rü yema duüxügüxü nüxü nadauxëë na namaã nataãëxü ga yema ore. Rŭ yemacèx Pauru rü Bernabéxü narüngüxëë na inawëxgüãxüçèx ga cuëxruügu rü na naxügüãxüçèx ga mexügu ga Tupanaarü poramaã naxügüxü. ⁴ Natürü ga guma ãñecüãx ga duüxügu rü nitoye. Rŭ nümaxü rü yema Yudíugüwaama naxügü rü togü rü Pauru rü Bernabéwaama naxügü. ⁵ Rŭ yexguma ga yema Yudíugü, rü yema duüxügu ga tama Yudíugü ixíngüxü, rü guma ãñeãrü ãëxgacügümaã wüxigu nagu narüxĩnüë na Pauruxü rü Bernabéxü yayauxgüxü na nutamaã ínawoxüchigüãxüçèx. ⁶⁻⁷ Natürü yexguma nüxü nacuáçigagügu ga Pauru rü Bernabé, rü nibuxmü. Rŭ Dicóniüãnewa yexmane ga ãñegü ga Listra rü

Derbewa naxī. Rū guma ĩānegūwa rū guxūma ga yema naānewa ipeagūxū ga duūxūgūmaā rū ta nūxū nixuchigagū ga ore i mexū.

Nutagūmaā Pauruxū ĩnamuxūchigū ga Listrawa

8-9 Rū yéma Listrawa nayexma ga wūxi ga yatū ga ĩnapogūcutūxū norū bucūmatama. Rū yéma narūto rū ĩnarūxīnū ga yema Pauru nūxū ĩxuxū ga ore. Rū Pauru rū meāma nūxū nadawenū, rū nūxū nadau ga na nūxū nayexmaxū ga norū ō na naxcèx yataanexūcèx. 10 Rū yexguma ga Pauru rū tagaācū űanagūrū nūxū: —ĩnachi, rū meāma ĩnangacutū! —űanagūrū. Rū yexguma ĩnayuxnagū ga guma yatū, rū ĩnanaxūgū ga na ĩyaxūxū. 11 Rū yexguma yema muxūma ga duūxūgū nūxū daugūgu ga yema na naxūxū ga Pauru, rū tagaācū yema Dicóniūgawa nidexagū, rū űanagūrūgū: —Tupanagū ĩ naduūxūgūraūxū ĩnarūxīgū, rū tatanūwa nangugū —űanagūrūgū. 12 Rū Bernabé rū tupana ga Chéumaā nanaxūégagū. Rū Pauru rū Érememaā nanaxūégagū yerū nūma nixī ga yadexaxū. 13 Rū guma ĩāne ĩxūcuxūwa nayexma ga tupana ga Chéuarū tupauca ga taxūne. Rū guma tupaucaarū pai rū yéma nanagagū ga wocagū ga ĩyatūxū ga putūramaā ngèxāēgūxū. Rū nūma ga pai rū ga duūxūgū rū nanadaixchaū ga yema wocagū naxcèx ga Pauru rū Bernabé na yemamaā nūxū yacuèxūgūxūcèx. 14 Natūrū yexguma nūxū yacuèxāchitanūgu ga Bernabé rū Pauru, rū norū gāuxūchirugu nagāugūe na yema duūxūgū nūxū cuèxgūxūcèx na tama namexū ga yema naxcèx naxūechaūxū. Rū yema muxūma ga duūxūgūtanūwa nabuxmū, rū űaxūmaā aita naxūe: 15 —Pa Yatūgūx, ¿tūxcūū toxcèx penaxū ĩ ngēma? Toma rū pexrūū duūxūgūmare tixīgū. Rū nuā taxī na pemaā nūxū tayarūxuxūcèx na nūxū perūxoexūcèx ĩ ngēma chixexūgū ĩ taxuwama mexū rū naxcèx pedaugūxūcèx ya Tupana ya maxūcū ga naxūcū ga daxūguxū ĩ naāne, rū űoma ĩ naāne, rū taxtū ĩ taxū, rū guxūma ĩ nawa ngēxmaxū. 16 —Rū nuxcūmayerū nixī ga Tupana ga yaxna namaā naxīnūxū ga duūxūgū ga woo nūmagū nanaxwèxegūxū naxūgūgu. 17 —Natūrū nūma ga Tupana rū taguma nūxū narūchau na duūxūgūxū nangūxēēxū. Rū yemaācū tūxū nūxū nacuèxēē na Tupana yīxū ĩ nūmax. Rū nūmatama nixī ĩ nūma namuāxū ya pucū rū meā pexū nayaexēēāxū ĩ penetūgū. Rū nūma nixī ĩ pexna naxāāxū ĩ pewemū na ngēmaācū petaāēgūxūcèx —űanagūrūgū ga Pauru rū Bernabé. 18 Natūrū woo yema orexū namaā na yaxugūxū rū poraācū nūxū naguxcha ga Pauru rū Bernabé ga nūxna na nachogūxū ga duūxūgū ga tama naxcèx na nadaiāxūcèx ga yema wocagū na yemamaā nūxū yacuèxūgūxūcèx. Rū dūxwa yemacèx tama naxcèx nanadai. 19 Natūrū yexgumayane rū ĩnangugū ga űuxre ga Yudīugū ga Aūtīoquíawa rū Icūniūwa ne ĩxū. Rū chixexūmaā nayaxucūxēgū ga yema muxūma ga duūxūgū na tama Pauru rū Bernabéga naxīnūēxūcèx, rū namaā nanuēxūcèx. Rū yemacèx ga yema duūxūgū rū nutamaā Pauruxū ĩnamuxūchigū, rū ĩāneārū ĩxpemawa nanatūchigūgū, yerū nūma nūxū nacuèxgūgu rū marū nayu. 20 Natūrū yexguma yema yaxōgūxū naxūtawa ngutaquēxegu, rū ĩnachi ga Pauru, rū wenaxārū nagu naxūcu ga guma ĩāne. Rū moxūācū ĩnaxūāchi ga yéma, rū Bernabémaā Derbewa naxū. 21 Rū guma ĩānewa nūxū nixugūe ga ore ga mexū. Rū nanangūxēē ga duūxūgū, rū muxūma Tupanaāxū nayaxōgū. Rū yemawena rū wenaxārū naxcèx nawoegu ga Lистра, rū Icūniū, rū Aūtīoquía. 22 Rū guma ĩānegūwa rū yema yaxōgūxūxū nixucūxēgū, rū nūxū nanangūchaūxēēgū na guxūguma meā na yaxōgūāxūcèx. Rū namaā nūxū nixugūe, rū űanagūrūgū: —Ngēma Tupana āēxgacū ĩxūxūwa na ĩxūcuxūcèx, rū tanaxwèxe na muēxpūxcūna guxchaxūgūmaā yaxna ĩxīnūēxū ĩ űoma ĩ naānewa —űanagūrūgū. 23 Rū Pauru rū Bernabé rū wūxichigū ga ĩānewa rū nūxū nixunetatanū ga űuxre ga yatūgū

na yaxōgūxūārū āēxgacūgū yixīgūxūcèx. Rū tama nachibūeācūma naxcèx nayumūxēgū. Rū yemawena rū yima Cori ya Tupana ga nūxū yaxōgūācūna nanaxuaxūgū na guxūguma namaā inaxāūxūcèx rū meā nūxna nadauxūcèx ga yema yaxōgūxūārū āēxgacūgū.

Pauru rū Bernabé rū naxcèx nawoegu ga Aūtioquía ga Chíriaanewa yexmane

²⁴ Rū Pichídiaanewa nichopetū, rū Paūpíriaanewa nangugū. ²⁵ Rū Pérupe ga ãñewa nūxū nixugūe ga Tupanaārū ore, rū ñuxūchi Atária ga ãñewa naxī. ²⁶ Rū yéma rū wūxi ga wapurugu nichoū na Aūtioquíacèx nawoeguxūcèx. Rū guma ãñe ga Aūtioquíawa nixī ga noxri duūxūgū Tupanana namugūxū ga Pauru rū Bernabé na naxūgūāxūcèx ga yema puracū ga ñuxma marū yanguxēēgūxū. ²⁷ Rū yexguma ínangugūga ga Pauru rū Bernabé, rū nanangutaquēxexēe ga guxūma ga yema duūxūgū ga yaxōgūxū. Rū namaā nūxū nixugūgū ga guxūma ga ñuxācū Tupana poraācū nūxū na rüngūxēēxū. Rū yexgumarūū ta rū namaā nūxū nixugūgū ga ñuxācū na yaxōgūāxū ga yema duūxūgū ga tama Yudíugū ixīgūxū, yerū Tupana nūxū nanatauxchaxēe na yaxōgūāxūcèx. ²⁸ Rū muxūma ga ngunexūgu yema yaxōgūxūtanūwa nayexmagū ga Pauru rū Bernabé.

15

Yerucharéūwa nangutaquēxegū

¹ Rū yexgumaūcūū rū nayexma ga ñuxre ga duūxūgū ga Yudéaanewa ne íxū ga Aūtioquíawa ngugūxū. Rū nūmagū inanaxūgūe ga tūxū na nangūxēēxū ga guxema yaxōgūxe ga Aūtioquíacūāx, rū ñanagūrūgū: —Ngēxguma tama pegū ípewiūchēmūpēxechiraūgu yema Moíché tūxū muxūrūū rū taxuacūma pexū nangēxma i maxū i taguma gūxū —ñanagūrūgū. ² Natūrū ga Pauru rū Bernabé rū tama norū me nixī ga yema, rū yemacèx poraācū nūgū namaā nachoxūgagū ga yema duūxūgū ga Yudéaanewa ne íxū. Rū dūxwa Pauru rū Bernabé rū ñuxre ga togū ga Aūtioquíacūāx ga yaxōgūxūxū naxunetagū na Yerucharéūwa naxīxūcèx na yema ngúexūgū ga Ngechuchu imugūxū rū yema yaxōgūxūārū āēxgacūgūmaā yamexēēgūāxūcèx ga yemachiga. ³ Rū yemaācū ga yema yaxōgūxū ga Aūtioquíacūāx rū Yerucharéūwa nanamugū ga yema yatūgū na naxcèx íyacagūxūcèx rū yamexēēgūāxūcèx ga yema ore. Rū Peníchiaanewa rū Chamáriaanewa nachopetū ga Pauru rū Bernabé. Rū yéma rū duūxūgūmaā nūxū nixugūe ga ñuxācū yema tama Yudíugū ixīgūxū rū nūxū na naxoexū ga nuxcūmaūxū ga nacūmagū na Tupanawe naxīxūcèx. Rū yema oremaā poraācū nanataāēxēēgū ga guxūma ga yema yaxōgūxū. ⁴ Rū Yerucharéūwa nangugū ga Pauru rū Bernabé. Rū guxūma ga yema yaxōgūxū rū yema ngúexūgū ga Ngechuchu imugūxū rū yema yaxōgūxūārū āēxgacūgū rū meāma nanayauxgū. Rū Pauru rū Bernabé namaā nūxū nixugūgū ga guxūma ga ñuxācū Tupana poraācū nūxū na rüngūxēēxū na duūxūgūmaā nūxū yaxugūxūcèx ga ore i mexū. ⁵ Natūrū ñuxre ga Parichéugū ga Ngechuchuaxū yaxōgūxū, rū inachigū, rū ñanagūrūgū: —Name nixī na nūgū ínawiūchēmūpēxechiraūgūxū i ngēma tama Yudíugū ixīgūxū i ngexwaca yaxōgūxū. Rū name nixī na naga naxīnūēxū i ngēma mugū ga Moíché ūmatūxū —ñanagūrūgū. ⁶ Rū yexguma nangutaquēxegū ga yema ngúexūgū ga Ngechuchu imugūxū rū yema yaxōgūxūārū āēxgacūgū na namexēēgūāxūcèx ga yema ore. ⁷ Rū yixcama marū ñuxgumama nūgūmaā yéma yapora-gatanūcūūgu, rū inachi ga Pedru, rū ñanagūrū nūxū: —Pa Chaueneēgūx, pema nūxū pecuēx ga na ūpamama Tupana choxū yaxuxū ga petanūwa na yema duūxūgū i tama Yudíugū ixīgūxūmaā nūxū chixuxūcèx i norū ore i mexū i maxēēruū, na nūmagū rū ta Ngechuchuaxū yaxōgūāxūcèx. ⁸ —Rū yima

Tupana ya guxããëxũ cuácũ rü tũxũ nüxũ nadauxëë na nadeãxũ i ngëma duũxũgũ i tama Yudíugũ ixĩgũxũ, yerũ nüxna nanamu ga Naãë i Üünexũ yema tũxna namuãxũrũ. ⁹ –Rü Tupanapëxewa rü yixema i Yudíugũ rü namaã tawũxigu i ngëma duũxũgũ i tama Yudíugũ ixĩgũxũ. Yerũ nümagũ rü ta Tupana nüxũ nüxũ nangechaũ ga norũ pecadugũ ga yexguma nüxũ yaxõgũãgu. ¹⁰ –¿Rü tũxcũũ tama namaã petaãë i ñuxma i ngëma Tupana üxũ? ¿Rü tũxcũũ ngëma ngexwacëx yaxõgũxũxũ penaxüxëëchaũ i ngëma Moĩchëarũ mugũ i guxchaxũ ga tórũ oxigũ rü taxuacũma naga taxĩnũëxũ rü woo yixemagũ rü ta taxuacũma inguxëëxũ? ¹¹ –Rü tama ngëma mugũ nixĩ i tũxũ maxëxëëxũ. Natürũ yixema rü tayaxõgũ na tórũ Cori ya Ngechuchu tamaã mecũmaxũgagu yĩxũ na tũxna naxãmareãxũ i maxũ i taguma gúxũ. Rü ngëxgumarũũ ta nixĩ i naxcëx i nümagũ i tama Yudíugũ ixĩgũxũ –ñanagürũ ga Pedru. ¹² Rü inanaxũgũ ga Bernabé rü Pauru na yadexagũxũ. Rü guxũma ga yema duũxũgũ rü inarũchianegũ rü inarũxĩnũëmare. Rü Bernabé rü Pauru rü namaã nüxũ nixugũe ga ñuxãcũ Tupana na nüxũ rüngũxëëgũxũ na naxũgũãxũcëx ga mexũ ga taxũgũ ga Tupanaãrũ poramaã naxũgũxũ natanũwa ga yema duũxũgũ ga tama Yudíugũ ixĩgũxũ. ¹³ Rü yexguma Bernabé rü Pauru igúegagũgu, rü nüxĩãrũ nidexa ga Chaũtiágu, rü ñanagürũ: –Pa Chaueneëgũx, ¡choxũ iperũxĩnũë! ¹⁴ –Pedru i Chimáũ rü tamaã nüxũ nixu na ñuxãcũ Tupana inaxũgũxũ ga nüxũ na nangũxëëxũ ga yema duũxũgũ i tama Yudíugũ ixĩgũxũ. Rü tamaã nüxũ nixu ta na ñuxãcũ Tupana yema duũxũgũtanũwa nadeãxũ ga ñuxre ga duũxũgũ na noxrũ yixĩgũxũcëx. ¹⁵ –Rü ngëma Pedru nüxũ ixuxũ rü nawũxigu namaã ga yema ore ga nuxcũmaũgũxũ ga orearũ uruũgũ ümatũxũ ga ñaxũ:

¹⁶ “Rü ngëmawena rü tá chataegu, rü tá nüxũ charũngũxëë i Dabítaagũ i Yudíugũ. Rü woo nawoonemare i ñuxmax, natürũ wena táxarũ wũxiwa chanaxĩxëë, rü tá íchanadagũxëë na noxrirũ naporaexũcëx. ¹⁷ Rü ngëmaãcũ tá nüxũ charũngũxëë na ngëma duũxũgũ i tama Yudíugũ ixĩgũxũ rü chauxcëx nadaugũxũcëx, wũxigu namaã i guxũma i chorũ duũxũgũ i Yudíugũ i choma chadexũ. ¹⁸ Rü yemaãcũ nüxũ nixu ga nüma ga Cori ya Tupana ga nuxcũmama tũxũ nüxũ cuëxëëcũ ga yema”, ñanagürũ ga yema ore ga nuxcũma ümatũxũ. ¹⁹ Rü ñanagürũ ga Chaũtiágu: –Rü ngëmacëx, Pa Chaueneëgũx, rü chauxcëx rü tama name na guxũ i Moĩché ümatũxũ i mugũmaã nüxũ ichixewexũ i ngëma duũxũgũ i tama Yudíugũ ixĩgũxũ i nüxũ rüxoexũ i nuxcũmaũxũ i nacũmagũ na Tupanawe naxĩxũcëx. ²⁰ –Rü narũmemaë nixĩ i naxcëx tanaxũmatũ i popera, rü ngëmawa namaã nüxũ tixu:

- (1) Rü tama name na nangõxgũãxũ i ngëma naxũnagũmachi i togũ norũ tupananetachicũnëxãgũcëx dëixũ.
- (2) Rü tama name na naĩ i ngemaã rü ëxna naĩ ya yatũmaã inapexũ.
- (3) Rü tama name na nangõxgũãxũ i namachi i ngëma naëxũ rü ëxna naxũna i wëxnaãxũ rü ëxna natũgu nguxũ.
- (4) Rü tama name na nangõxgũãxũ ya nagũ.

Rü ngëxĩcatama nixĩ i inaxwëxexũ na naxcëx naxũmatũxũ. ²¹ –Erũ guxũne ya ñãnewa nangëxma ya Yudíugũarũ ngutaquëxepataũ i ngextá nuxcũmama guxũ i ngũxchigaarũ ngunexũgu nawa ínangúe rü nüxũ nixuchigagũ i guxũma i ngëma mugũ ga Moĩché ümatũxũ –ñanagürũ ga Chaũtiágu.

Popera ga yema duũxũgũ ga tama Yudíugũ ixĩgũxũcëx ümatũxũ

²² Rü yema ore rü norũ me nixĩ ga yema ngúexũgũ ga Ngechuchu imugũxũ, rü yema yaxõgũxũãrũ ãëxgacũgũ, rü guxũma ga yema yaxõgũxũ. Rü nügũmaã ñanagürũgũ: –¡Ngĩãã tatanũwa tanade ya taxre ya yatũgũ na

Aŭtioquíawa namugŭxŭcèx namaã ya Pauru rŭ Bernabé! —ñanagŭrŭgŭ. Rŭ nŭxŭ naxunetagŭ ga Yuda ga Barsabágu ãgaxŭ rŭ Chira. Rŭ nŭmagŭ ga Yuda rŭ Chira rŭ ãgaxgacŭgŭ nixŭ ga natanŭwa ga yema yaxŭgŭxŭ ga Yerucharéŭwa yexmagŭxŭ. ²³ Rŭ namaã yéma nanamugŭ ga popera, rŭ ñaã nixŭ ga yema ore ga naxŭmatŭgŭxŭ:

“Pa Toeneëgŭ i Tama Yudiŭgŭ Ixŭgŭxe i Aŭtioquíagu rŭ Chíriaanegu rŭ Chiríchiaanegu Áchiŭgŭxe, rŭ toma i peeneëgŭ i Ngechuchu toxŭ imugŭxe rŭ toma i yaxŭgŭxŭárŭ ãgaxgacŭgŭ ixŭgŭxex, rŭ pexŭ tarŭmoxëgŭ. ²⁴ Rŭ nŭxŭ tacuáchigagŭ rŭ ñuxre ga duŭxŭgŭ ga núma ne İxŭ rŭ woo tama toma yéma tanamugŭ natŭrŭ nŭmagŭ rŭ yéma naxŭ rŭ Moïchéarŭ mugŭmaã pexŭ nachixewegŭ rŭ yemaãcŭ pexŭ ínátŭxëë. ²⁵ Rŭ yemacèx guxãma ga toma rŭ wŭxigu naxŭ tarŭxŭnŭë na totanŭwa nŭxŭ taxunetaxŭ ga taxre ga taeneëgŭ na pexcèx ngema tanamugŭxŭcèx namaã i taeneëgŭ i nŭxŭ ingechaŭgŭxŭ i Bernabé rŭ Pauru. ²⁶ Rŭ nŭmagŭ i Bernabé rŭ Pauru nixŭ ga poraãcŭ ãcŭmaxŭwa nayexmagŭxŭ naxcèx ga tŭrŭ Cori ya Ngechuchu ya Cristu. ²⁷ Rŭ ñuxma rŭ pexcèx ngema tanamugŭ i Yuda rŭ Chira na nŭmagŭxŭchi pemaã nŭxŭ yaxugŭxŭcèx rŭ pemaã nangŭxëëgŭãxŭcèx i guxŭma i torŭ ore. ²⁸⁻²⁹ Erŭ Tupanaãë i Üünexŭcèx name, rŭ toxcèx rŭ ta name na tama muxŭma i mugŭ pexna taxãgŭxŭ. Rŭ ñaã ãgŭmŭcŭ i mugŭxicatama nixŭ i pexŭ tamuxŭ:

(1) Rŭ tama name na penangŭxŭ i naxŭnagŭmachi i togŭ norŭ tupanetachicŭnèxãgŭcèx dèixŭ.

(2) Rŭ tama name na penangŭxŭ i namachi i ngëma naxŭnagŭ i wëxnaãxŭ.

(3) Rŭ tama name na penangŭxŭ ya nagŭ.

(4) Rŭ tama name na naŭ i ngemaã rŭ ëxna naŭ ya yatŭmaã ipepexŭ.

Rŭ mexŭ tá pexŭgŭ ega penaxauregu i ngëma mugŭ. Rŭ nuãma pexna”, ñanagŭrŭ ga yema ore ga naxŭmatŭgŭxŭ. ³⁰ Rŭ natanŭxŭxŭ namoxëgŭguwena, rŭ inaxŭãchi ga yema yéma mugŭxŭ, rŭ Aŭtioquíawa naxŭ. Rŭ yexguma yéma nangugŭgu rŭ nanangutaquëxexëë ga guxŭma ga yema yaxŭgŭxŭ ga duŭxŭgŭ, rŭ nŭxna nanaxãgŭ ga yema popera. ³¹ Rŭ yexguma nŭxŭ nadaumatŭgŭgu, rŭ poraãcŭ nataãgŭ namaã ga yema ucŭxëgŭ ga nŭxna naxãgŭxŭ. ³² Rŭ Yuda rŭ Chira ga Tupanaãrŭ orearŭ uruŭgŭ na yixŭgŭxŭ, rŭ muxŭma ga oremaã nayaxucŭxëgŭ ga yema yaxŭgŭxŭ, rŭ nŭxŭ narŭngŭxëë na yexeraãcŭ yaxŭgŭãxŭcèx. ³³ Rŭ marŭ ñuxre ga ngunexŭ yéma nayexmagŭguwena, rŭ ínixŭ. Rŭ yema yaxŭgŭxŭ ga Aŭtioquíacŭãx, rŭ taãëãcŭma Yuda rŭ Chiraxŭ narŭmoxëgŭ rŭ meãma ínayamugŭ na naxcèx nawoeguxŭcèx ga yema Yerucharéŭcŭãx ga noxri natanŭwa namugŭxŭ. ³⁴ Natŭrŭ ga Chira rŭ naxŭ narŭxŭnŭ na yexma Aŭtioquíagu naxãxŭ, rŭ yemacèx Yudaxicatama Yerucharéŭcèx nataegu. ³⁵ Rŭ Pauru rŭ Bernabé rŭ ta yexma narŭcho. Rŭ wŭxigu namaã ga muxŭma ga togŭ, rŭ nanangŭxëë ga duŭxŭgŭ, rŭ namaã nŭxŭ nixugŭgŭ ga Cori ya Tupanaãrŭ ore i mexŭ.

Pauru rŭ wenaxãrŭ inaxŭãchi ga to ga nachŭãnegŭwa na nangeaxŭ ga Tupanaãrŭ ore

³⁶ Rŭ yexguma marŭ ñuxre ga ngunexŭ ngupetŭgu, rŭ ñanagŭrŭ ga Pauru Bernabéxŭ: —İNgŭã wenaxãrŭ natanŭgu tanaxŭãne i ngëma yaxŭgŭxŭ i guxŭne ya ñãne ga ngextá nŭxŭ íxuchigaxŭwa ga Cori ya Tupanaãrŭ ore na nŭxŭ idauxŭcèx na ñuxãcŭ nŭxŭ ínangupetŭgŭxŭ! —ñanagŭrŭ. ³⁷ Rŭ Bernabé rŭ nayagaxchaŭ ta ga Cuáŭ Marcu. ³⁸ Natŭrŭ ga Pauru rŭ tama nanaxwëxe ga na yagaãxŭ, yerŭ Paŭpíriawa nŭxna naxo ga noxri, rŭ tama ínaxŭmŭcŭ ga yema puracŭwa. ³⁹ Rŭ poraãcŭ nŭgŭmaã niporagatanŭcŭcŭ naxcèx ga yema, rŭ dŭxwa nŭgŭna nixŭgŭ. Rŭ Bernabé nayaga ga Marcu,

rü Chiprearü capaxūwa naxū. ⁴⁰ Rü yoxni ga Pauru rü Chiraxū niga. Rü yema Aütioquiacūāx ga yaxōgūxū rü naxcèx nayumūxēgū na Tupana nūxū rüngūxēgūxūcèx. Rü yexguma inaxiāchi. ⁴¹ Rü Chíríiaanewa rü Chiríchiaanewa nachopetü, rü yéma Tupanaärü oremaā nanataāxēgū ga yema yaxōgūxū.

16

Pauru rü Chirawe narūxū ga Timutéu

¹ Rü Derbewa rü Listrawa nangugü ga Pauru rü Chira. Rü yéma nayexma ga wūxi ga yaxōcū ga Timutéugu āegacü. Rü naē rü wūxi ga Yudíu ga yaxōxcü iyixī. Rü nanatü rü wūxi ga Griégu tixī. ² Rü guxūma ga yema yaxōgūxū ga Listracūāxgū rü Icóniūcūāxgū rü nūxū nixugüe na mea maxūcū yixīxū ga nūma ga Timutéu. ³ Rü Pauru rü nanaxwèxe na Timutéu íyaxümücūxū. Natürü naxūpa ga na yagaāxū rü ínanawiechēmüpēxechiraū, yerü yemaācū nanaxwèxegü ga yema Yudíugü ga yema naānewa yexmagūxū. Yerü guxūma nūxū nacuèxgü ga na Griégu tixū ga nanatü. ⁴ Rü guxūnema ga guma iānegü ga nawa nachopetūnewa, rü duūxūgūmaā nūxū nixugüetanü ga yema ucuxē ga yema Yerucharéūcūāx ga ngúexūgü ga Ngechuchu imugūxū rü yema yaxōgūxūärü āēxgacūgü nūxū ixugūxū. ⁵ Rü yemaācū yexeraācū meā nayaxōgü ga guxūma ga yema yaxōgūxū, rü guxū ga ngunexū rü yexeraācū nimuētanü ga yema yexwacèx yaxōgūxū.

Pauru nangoxetü rü wūxi ga yatü ga Machedóniācūāxū nadau

⁶ Rü Áchiaanewa naxīxchaū na yéma nūxū yaxugūxūcèx ga ore i mexū. Natürü Tupanaāē i Üünexū rü nūxna nanachuxu ga yema. Rü yemacèx Piríquiaanewa rü Gárataanewaama nachopetü. ⁷ Rü Míchiaarü naānewa nangugü, rü yéma nagu narūxīnūē ga na Bitíniāärü naānewa naxīxū. Natürü yéma rü ta Tupanaāē i Üünexū nūxna nanachuxu ga na yéma naxīxū. ⁸ Rü yemacèx Míchiaanewa nachopetūmare rü iāne ga Tróawa nangugü. ⁹ Rü yema chütaxūgu rü Pauru nangoxetü rü nūxū nadau ga wūxi ga yatü ga Machedóniācūāx ga napēxegu chicü. Rü nūxū nacèxū, ñaxūmaā: —¡Machedóniāwa naxū, rü toxū rüngūxēē! —ñaxūmaā. ¹⁰ Rü yexguma yemaxū nadēuxgu ga Pauru, rü yexgumatama togü tamexēgü na Machedóniāwa taxīxūcèx. Yerü nūxū tacuèxgü rü aixcūmaxūchi nixī ga Tupana toxcèx çaxū na yema duūxūgūmaā nūxū tixuxūcèx ga ore i mexū.

Piripuwa nayexmagü ga Pauru ru Chira

¹¹ Rü Tróaarü türewa itaxiāchi, rü capaxū ga Chamotáchiucèx wēxgu taxī. Rü moxūācū Neāporiwa tangugü. ¹² Rü yéma rü dauxchitagu taxī rü Piripuwa tangugü. Rü guma nixī ya Dumacūāxgūarü iāne ga Machedóniāānegu naxūgüne. Rü guma nixī ya guxūne ya iāneärü tamaēne ga yéma. Rü yéma tayexmagü ga ñuxre ga ngunexūgü. ¹³ Rü ngūxchigaarü ngunexūgu, rü guma iāne iyacuáxūwa taxī ga natūpechinūwa, yerü nagu tarūxīnūēgu rü yéma nayexma ga Yudíugūarü yumūxēchica. Rü yéma tarütogü, rü namaā tidexagü ga ñuxre ga ngexūgü ga yéma ngutaquēxegūxū, rü namaā nūxū tixugü ga Tupanaärü ore. ¹⁴ Rü yéma iyexma ga wūxi ga ngecū ga Díria ga ngīega ga Tupanaxū icuèxūūxcü. Rü Tiatíra ga iānecūāx iyixī. Rü dauxracharaxū ga naxchirumaā itaxe yerü yema nixī ga ngírú puracü. Rü ngīma rü meāma yéma irūxīnū, yerü nūma ga Cori ya Tupana rü ngīxū nanangūchaūxēē na meā inaxīnūxūcèx ga yema ore ga Pauru nūxū ixuxū. ¹⁵ Rü yemawena rü ñuxūchi líbaie wūxigu namaā ga guxūma ga ngītanūxūgü. Rü yixcama rü toxū icèxū ñaxūmaā: —Ngēxguma pema choxū pedēuxgu na aixcūma nūxū chayaxōxū ya Cori ya Tupana, rü marü name ega chopatagu

peyapegūgu –ngīgūrūgū. Rū yéma toxū ixīxēē. ¹⁶ Rū wūxi ga ngunexūgu ga yexguma yumūxēwa taxīxgu ga tomāx, rū yexma ngīxū tayangau ga wūxi ga pacū ga corigūxūtaxū ixīcū ga ngoxoāxcū. Rū yema pacū rū wūxi ga tacūxū cuēxcū iyixī, rū duūxūgūmaā nūxū iyaxu ga tacū tá yixcūra na ngupetūxū. Rū yemacēx ga duūxūgū rū dīerumaā ngīxū nanaxūtanū na nūxū yaxuxūcēx na tacū tá na ngupetūxū. Rū yemaācū poraācū dīeruxū itú nāxcēx ga ngīrū corigū. ¹⁷ Rū ngīma towe ingē ga toma rū Pauru, rū tagaācū ngīgūrūgū: –Ŋāā yatūgū rū Tupana ya tacūxūchimaārū duūxūgū nixī, rū pemaā nūxū nixu na űuxācū tá penayaxuxū i maxū i taguma gūxū –ngīgūrūgū. ¹⁸ Rū yemaācū iyixī ga muxūma ga ngunexūgu. Rū dūxwa nūxū nawēxtūmūxū ga Pauru, rū ngīxcēx nadauegu, rū űanagūrū nūxū ga yema ngoxo ga ngīwa yexmaxū: –Ngechuchu ya Cristuégagu cuxū chamu, na ngīwa ícuxūxūxūcēx –űanagūrū. Rū yexgumatama ngīwa ínaxūxū ga yema ngoxo. ¹⁹ Rū yexguma nūxū nadaugūgu ga ngīrū corigū ga marū tama ngīgagu dīeru ngīxū na nayauxgūxū, rū Pauru rū Chiraxū ínayauxū, rū āēxgacūgūarū ngutaquēxechicawa nanagagū. ²⁰ Rū āēxgacūgūna nanaxuaxū ga yema ngīrū corigū, rū űanagūrūgū: –Ŋāā Yudīgū rū tórū íānewa nanachixeāēxēēgū i duūxūgū. ²¹ –Rū tūxū nangúexēē na naxaurexūcēx i nacūmagū i tūxna chūxuxū i yixema i Dumacūāxgū –űanagūrūgū. ²² Rū yexguma ga guxūma ga yema íānecūāx, rū Pauru rū Chirana nayuxgū. Rū yema āēxgacūgū nanamu na ínacūxūāxūcēx rū ngexchiruxūma naīxmenēxāmaā yaꝓuaixgūāxūcēx. ²³ Rū yexguma marū poraācū yaꝓuaixgūāguwena, rū poxcupataūgu nanawocu. Rū nūxna naxāga ga yema poxcupataūārū dauruū na meāma nūxna nadauxūcēx. ²⁴ Rū yexguma yemaxū naxīnūgu ga yema dauruū, rū poxcupataūārū aix-epexūchixū ga uꝓapugu nanawocu, rū meāma nayachotaparagū. ²⁵ Natūrū ngāxūcūūgu rū nayumūxēgū ga Pauru rū Chira, rū nawiyaegū, rū Tupanaxū nicuēxūūgū. Rū yema togū ga poxcuexū rū nūxū naxīnūē. ²⁶ Rū ngūrūāchi poraācū naxīāxāchiane, rū ínayangogūtanūāchi ga guma poxcupataūārū cax-tagū. Rū yexgumatama niwāxnagū ga guxūma ga íāxgū ga guma poxcupataū. Rū guxūma ga yema poxcuexūārū cadenaparagū rū niwēgū. ²⁷ Rū pewa nabaixāchi ga yema poxcupataūārū dauruū. Rū yexguma nūxū nadēuxgu ga na yawāxnagūxū ga íāxgū ga guma poxcupataū rū nanayaxu ga norū tara na nūgū yamāxūcēx, yerū nūma nūxū nacūēxgu rū marū nibuxmū ga yema poxcuexū. ²⁸ Natūrū tagaācū aixta naxū ga Pauru, rū űanagūrū nūxū: –¡Tāxū i cugū quimāxū! Rū guxāma i toma rū tanuxmagū –űanagūrū. ²⁹ Rū yexguma ga yema poxcupataūārū dauruū rū nāxcēx ínaca ga wūxi ga omū, rū inaűāāchiācūma yema duūxūgū ípoxcuexūgu nayangaxi, rū yadurūxācūma Pauru rū Chirapēxegu nayacaxāpūxū. ³⁰ Rū yexguma íāxtūwa Pauru rū Chiraxū nagagū, rū űanagūrū nūxū: –Pa Corigūx, ¿Tacū tá chaxūxū i choma na choxū nangēxmaxūcēx i maxū i taguma gūxū? –űanagūrū. ³¹ Rū nūmagū rū nanangāxūgū rū űanagūrūgū nūxū: –¡Nūxū yaxō ya Cori ya Ngechuchu, rū tá cuxū nangēxma i maxū i taguma gūxū i cuma rū guxū i cupatacūāx! –űanagūrūgū. ³² Rū namaā rū guxūma ga yema napatacūāxgūmaā rū ta nūxū nixugūe ga Cori ya Tupanaārū ore. ³³ Rū yematama oragu ga chūtacū, rū nūma ga yema poxcupataūārū dauruū nayayauxgū ga norū oxrigū ga Pauru rū Chira. Rū yemawena rū űuxūchi ínabaie ga nūma wūxigu tūmamaā ga naxmēx rū naxacūgū. ³⁴ Rū űuxūchi ga nūma ga poxcupataūārū dauruū rū napatawa Pauruxū rū Chiraxū nagagū. Rū űna nūxna naxā rū nataāē ga nūma rū guxūma ga napatacūāxgū ta, yerū Tupanaāxū nayaxōgū. ³⁵ Rū moxūācū pēxmama rū yema íāneārū āēxgacūgū rū yema poxcupataūārū dauruūxūtawa nanamugū ga purichíagū na namaā nūxū yanaxugūxūcēx

na Pauru rü Chiraxü ínamuxüxü. ³⁶ Rü yexguma ga yema poxcupataüärü dauruü rü ñanagürü Pauruxü: —Rü ngëma äëxgacügü rü nuã nanamugü i ore na pexü íchamuxüxüçèx. ¡Rü ëcü ípechoxü, rü meã ípixí! —ñanagürü. ³⁷ Natürü ga Pauru rü ñanagürü nüxü ga yema purichíagü: —Marü chixri tomaã nachopetü i toma i Dumacüãxüchigü na tixígüxü, rü tama toxna nacaxiraácüma toxü niçuaixgü ga napëxewa ga guxüma ga duüxügü, rü ñuxüchi poxcupataügu toxü nawocu. Rü ñuxma rü cúácüma toxü ínamuxüchaü. Rü tãütáma ngëmaácü nixí. ¡Rü ëcü nümatama núma naxí i äëxgacügü na nümatama toxü íyamuxüxüçèx! —ñanagürü ga Pauru. ³⁸ Rü yexguma ga yema purichíagü rü äëxgacügümaã nüxü nayarüxugüe ga yema ore. Rü poraácü nabaixächíäëgü ga yema äëxgacügü ga yexguma nüxü naxínüëgu ga na Dumacüãxüchi yixígüxü. ³⁹ Rü yéma naxí, rü Pauru rü Chirana nayacagü na nüxü nüxü nangechaügüxüçèx naxçèx ga yema namaã naxügüxü. Rü ínamamuxü, rü nüxü nacèxügü na nawa ínachoxüxüçèx ga guma íáne. ⁴⁰ Rü yexguma poxcupataüwa ínachoxügu ga Pauru rü Chira, rü Díriapatawa naxí. Rü yema yaxögüxümaã nangutaquëxegü, rü nayaxucüxëgü, rü Tupanaärü oremaã nanataäëxëgü. Rü ñuxüchi yemawena rü inaxíächí.

17

Pauru rü Chiramaã nanuë ga duüxügü ga Techarónicawa

¹ Rü íänegü ga Aüfípori rü Aporóniãwa nachopetü ga Pauru rü Chira, rü íáne ga Techarónicawa nangugü. Rü yéma nayexma ga wüxi ga ngutaquëxepataü ga Yudíugüarü. ² Rü guma ngutaquëxepataüwa naxüüxü ga Pauru, yerü woetama yema nixí ga nacüma. Rü tomaëxpüx ga ngüxchigaarü ngunexügu rü Tupanaärü ore ga ümatüxüchiga yema Yudíugümaã yéma nidexa. ³ Rü meãma naxçèx nanangoxëë ga yema ore, rü namaã nüxü nixu ga tacücèx na nayuxü ga Cristu rü tüxcüü wena na namaxüxü. Rü ñanagürü: —Rü yima Cristu rü Ngechuchu nixí, rü nachiga nixí i pemaã nüxü chixuxü —ñanagürü ga Pauru. ⁴ Rü ñuxre ga yéma yexmagüxü ga Yudíugü rü nayaxögü, rü Pauru rü Chiratanügu naxägü. Rü yexgumarüü ta Ngechuchuaxü nayaxögü ga muxüma ga Griégugü ga noxri Yudíugürüü yaxögüxü. Rü muxüma ga ngexügü ga díeruãxgüxü rü ta nayaxögü. ⁵ Rü yemacèx ga yema Yudíugü ga tama yaxögüxü, rü nanuë rü nixáüxächigü yerü muxüma ga duüxügü nüxü nayaxögü ga Pauru rü Chiraarü ore. Rü norü numaã nanaxítaquëxexëë ga ñuxre ga yatügü ga chixexügü ga taxuwama mexü. Rü yemaxü namugü na nanuëxëëaxü ga yema íänecüãx ga duüxügü. Rü Yachãüpatawa nabuxmü ga yema chixexü ga duüxügü na Pauru rü Chiracèx nadaugüxüçèx, yerü yema muxüma ga duüxügüpëxewa nanagagüchaü. ⁶ Natürü yexguma tama yexma nüxü yangaugügu, rü Yachãüxü niyauxgü, rü ñuxre ga yaxögüxüxü rü ta ínayauxü. Rü nayagauxütanü, rü guma íáneärü äëxgacügüpëxewa nanagagü. Rü tagaácü ñanagürügü: —Ngëma Pauru rü Chira i guxü i naãnewa duüxügüxü chixexëëgüxü, rü núma rü ta nangugü. ⁷ —Rü Yachãü nixí ga nayaxuxü ga napatawa. Rü guxüma i nümagü i ngëma yatügü rü tama naga naxínüëchaü i tórü äëxgacü ya Dumacüãxärü mugü, erü nüxü nixugüe rü nangëxma i to i äëxgacü i Ngechuchu —ñanagürügü ga yema chixexü ga duüxügü. ⁸ Rü yexguma nüxü naxínüëgu ga yema oregü, rü poraácü nanuë ga yema muxüma ga duüxügü rü yema íáneärü äëxgacügü ta. ⁹ Natürü ga Yachãü rü namücügü rü díerumaã nügü naxütanügü, rü yemacèx nayangëxgü.

Pauru rü Chira rü Beréawa nayexmagü

¹⁰ Rū yematama ga chütaxŭgu rü yema yaxōgŭxŭ ga Techarónicacŭāx rü ãne ga Beréawa nanamugŭ ga Pauru rü Chira. Rū yexguma yéma nangugŭgu, rü Yudíugŭarŭ ngutaquēxepataŭwa naxī. ¹¹ Rū yema Yudíugŭ ga Beréacŭāx, rü yema togŭ ga Yudíugŭ ga Techarónicawa yexmagŭxŭārŭ yexera narŭmemaēgŭ. Rū norŭ ngúchaŭmaā meāma nanayauxgŭ ga yema ore. Rū guxŭ ga ngunexŭgu rü Tupanaārŭ ore ga ũmatŭxŭwa nangúe na meā nŭxŭ nacuēxgŭxŭcèx ngoxi aixcŭma yīxŭ ga yema ore ga Pauru rü Chira namaā nŭxŭ ixuxŭ. ¹² Rū muxŭma ga yema Beréacŭāx ga Yudíugŭ rü Ngechuchuaxŭ nayaxōgŭ. Rū yexgumarŭŭ ta ga muxŭma ga Griégugŭ ga Yatŭxŭgŭ rü ngexŭgŭ ga āēxgacŭgŭ namèx ixīgŭxŭ, rü nayaxōgŭ. ¹³ Natŭrŭ yexguma yema Yudíugŭ ga Techarónicacŭāx nŭxŭ cuáchigagŭgu ga na Beréawa rü ta nŭxŭ na yaxuxŭ ga Tupanaārŭ ore ga Pauru, rü yéma naxī, rü nananuēxēē ga yema ãnecŭāx ga duŭxŭgŭ na Paurumaā chixri nachopetŭxŭcèx. ¹⁴ Natŭrŭ yexguma yemaxŭ nacuáchigagŭgu ga yema yaxōgŭxŭ, rü paxama Pauruxŭ ínaxŭxŭēēgŭ ga guma ãnewa. Rū ñuxre ga yema yaxōgŭxŭ rü Pauruxŭ ínixŭmŭcŭgŭ. Rū dauxchitagu naxī rü ñuxmata taxtŭpechinŭwa nangugŭ. Natŭrŭ ga Chira rü Timutéu rü Beréagu narŭchooma. ¹⁵ Rū yema duŭxŭgŭ ga Pauruxŭ íxŭmŭcŭgŭxŭ, rü wapurugu ínayaxŭmŭcŭgŭ ñuxmata ãne ga Atenawa nangugŭ, rü ñuxŭchi Beréacèx nawoegu. Rū Pauru rü yema duŭxŭgŭxŭ yéma namuga na paxa naxŭtawa naxīxŭcèx ga Chira rü Timutéu.

Atenawa nayexma ga Pauru

¹⁶ Rū yexguma Pauru rü Atenawa Chira rü Timutéuxŭ nanguxēēgu, rü tama nataāēcŭraxŭ yerŭ nŭxŭ nadau ga guma ãnewa ga na poraācŭ naxchicŭnèxāmaāmare na natupanaāxgŭxŭ. ¹⁷ Rū yemacèx ga Pauru rü Yudíugŭarŭ ngutaquēxepataŭwa Cristuchigaxŭ nixu namaā ga yema Yudíugŭ rü yema togŭ ga tama Yudíugŭ ixīgŭxŭ ga Tupanaxŭ icuèxŭŭgŭxŭ. Rū guxŭ ga ngunexŭgu ga ãneārŭ plaza ga taxŭwa rü ta Cristuchigaxŭ nixu namaā ga yema duŭxŭgŭ ga yéma āmŭcŭwa íxŭ. ¹⁸ Rū nayexmagŭ ta ga ñuxre ga yatŭgŭ ga Epicúriugŭarŭ nguxēētaewa ngúexŭ, rü togŭ ga Etóicugŭarŭ nguxēētaewa ngúexŭ. Rū nŭmagŭ rü inanaxŭgŭe ga Paurumaā na yaporagatanŭcŭxŭ. Rū ñuxre ga nŭmagŭ rü ñanagŭrŭgŭ: —¿Rŭ tacŭ nixī i nŭxŭ yaxuxŭ i ñaā yatŭ i idexaechamarexŭ? —ñanagŭrŭgŭ. Rū togŭ nanangāxŭgŭ, rü ñanagŭrŭgŭ: —Maneca wŭxi i to i nachiŭñanecŭāxārŭ tupanagŭarŭ orearŭ uruŭ nixī —ñanagŭrŭgŭ. Rū yemaācŭ nidexagŭ ga yema duŭxŭgŭ, yerŭ Pauru rü nŭxŭ nixu ga ore ga mexŭ ga Ngechuchuchiga ga nuxācŭ wena na namaxŭxŭ. ¹⁹ Rū dŭxwa norŭ āēxgacŭgŭarŭ ngutaquēxechica ga Areópagu āegaxŭwa nanagagŭ. Rū yéma nŭxna nacagŭ, rü ñanagŭrŭgŭ nŭxŭ: —Toma nŭxŭ tacuáxchaŭ na tacŭ rü nguxēētae i ngexwacaxŭxŭ yīxŭ i ngēma namaā cunguxēētaexŭ. ²⁰ Erŭ toxcèx rü wŭxi i taguma nŭxŭ taxŭnŭēxŭ nixī i ngēma ore, rü nŭxŭ tacuáxchaŭ na tacŭchiga yīxŭ i ngēma nŭxŭ quixuxŭ —ñanagŭrŭgŭ. ²¹ Rū yemaācŭ nidexagŭ, yerŭ guxŭma ga Atenacŭāxgŭ rü yema to ga nachiŭñanecŭāxgŭ ga yexma āchiŭgŭxŭ, rü woetama yexicagu narŭxŭnŭē ga na nŭxŭ yaxuxŭcèx rü nŭxŭ naxŭnŭēxŭcèx ga yexwacaxŭxŭ ga oregŭ. ²² Rū yemacèx ga Pauru rü inachi norŭ ngāxŭtanŭwa ga yema duŭxŭgŭ ga yema Areópaguwa ngutaquēxegŭxŭ, rü ñanagŭrŭ: —Pa Atenacŭāxgŭx, nŭxŭ chadau na poraācŭ perŭ tupanagŭgu perŭxŭnŭēxŭ. ²³ —Erŭ ngēxguma perŭ ngutaquēxechicagŭwa chixŭpetŭchigŭgu, rü nŭxŭ chadau i naxchicŭnèxāgŭ i nŭxŭ picuèxŭŭgŭxŭ. Rū wŭxi i nachicawa namaā chayarŭxŭ i wŭxi i yumŭxēchica, rü ngēxma naxŭmatŭ i naega i ñaxŭ: “Tupana ya tama nŭxŭ icuácŭ”, ñaxŭ. Rū yima Tupana ya tama nŭxŭ pecuáācŭma nŭxŭ picuèxŭŭgŭcŭ nixī ya choma pemaā nŭxŭ chixuchigacŭ. ²⁴ —Rŭ guma

Tupana ga naxücü ga guxūma ga naānegü rü guxūma i nawa ngēxmaxū, rü nüma nixī i norü yora yiixū i daxūguxū i naāne rü ñoma i naāne. Rü ngēmacèx nüma rü tama duixūgü üxüne ya tupaucagügu naxāchiū. ²⁵ —Rü nümatama ya Tupana rü taxucèxma nanaxwèxe i duixūgüarü ngüxēē na namaxūxücèx i nümax, erü taxuūma nüxū nataxu. Rü nümatama guxāna nanaxā i maxū, rü tüxna nanaxā ya buanecü ya namaā ingüātanücücü. Rü nümatama tüxna nanaxā i guxūma. ²⁶ —Nüma rü wüxi ga duixūwatama nanaxü ga guxūma ga duixūgü na guxū i naānewa nangēxmagüxücèx. Rü nüma inaxuneta i ñuxgu tá na nabuxū i duixūgü rü ngexta tá naxāchiixū i wüxichigü. ²⁷⁻²⁸ —Rü yemaācü nanaxü na naxcèx nadaugüxücèx ga duixūgü rü ñoma ēānexūwa tacücèx idaugüxürüü nüxū iyangaugüxücèx. Natürü nüma ya Tupana rü woetama guxūguma tüxna nangaicamachirèx, erü nagagu nixī i imaxèxü rü ixīāxtanücüxü rü ingēxmaxū, ngēxgumarüü i ñuxre i perü poperaarü ümatüxūgü naxümatüxürüü, rü ñanagürügü:

“Rü Tupanaxācü tixīgü”, ñanagürügü. ²⁹ —Rü ñuxma na Tupanaxācügü ixīgüxū, rü tama name i nagu tarüxīnūē rü Tupana rü wüxi i naxchicünèxā i uirümüwa rü ēxna dīērumüwa rü ēxna nutawa ixüxürüü nixī. Erü guxūma i ngēma naxchicünèxāgü rü nümatama i duixūgü nagu naxīnūēxūācüma nanaxügü. ³⁰ —Rü nuxcüma ga duixūgü rü naēchitamare ínatüē, natürü nüma ga Tupana rü namaā yaxna naxīnū. Natürü i ñuxma ya Tupana rü nanamu i duixūgü i guxūwama na naxcèx nadaugüxū rü nüxū naxoexū i nacüma i chixexügü. ³¹ Yerü nüma ga Tupana rü marü nüxū naxuneta i wüxi i ngunexū i nagu tá aixcüma guxū i ñoma i naānecūāx i duixūgüna naçaxū i norü maxūchiga. Rü marü nüxū naxuneta ya wüxi ya yatü ya Ngechuchu, rü yima tá nixī ya duixūgüna çacü. Rü Tupana rü guxāxūma nüxū nacuèxēē ga yema ga yexguma Ngechuchuxū wena namaxēēgu —ñanagürü ga Pauru. ³² Rü yexguma yema wena na namaxèxūchigaxū naxīnūēgu ga duixūgü, rü ñuxre ga nümagü rü Pauruxū nacugüē. Natürü ga togü rü ñanagürügü: —Rü wenagu táxarü cuxū itarüxīnūē i ngēmachiga —ñanagürügü. ³³ Rü yexguma ga Pauru rü ínaxūxū ga natanüwa. ³⁴ Natürü ñuxre ga duixūgü rü Pauruwe narüxī, rü Ngechuchuaxū nayaxōgü. Rü natanüwa nayexma ga Diuníchiu ga wüxi ga Areópagutanüxū, rü wüxi ga ngecü ga Dámari ga ngēga. Rü ñuxre ga togü rü ta nayaxōgü.

18

Corñtiüwa nayexma ga Pauru

¹ Rü yemawena rü inaxūāchi ga Pauru ga Atenawa, rü íāne ga Corñtiüwa naxū. ² Rü yéma namaā inayarüxū ga wüxi ga yatü ga Aquiru ga Pōtuanecūāx ga yexwacèx Dumawa ga Itáriaanewa ne üxū namèx ga Prisilamaāx. Rü yéma Corñtiüwa nayexma yerü Dumacūāxgüarü āēxgacü ga Cádiu nanamu ga na ínachoxūxücèx ga guxūma ga Yudíugü ga Dumawa. Rü Pauru rü naxūtagu nanaxūāne. ³ Rü yexma nape rü naxchirunaxcèx ga düxenüārü üwa nügümaā napuracüē yerü woetama yema nixī ga norü puracü ga Pauru rü Aquiru rü Prisila. ⁴ Rü guxū ga ngüxchigaarü ngunexūgu rü Yudíugüarü ngutaquēxepataūwa naxūxū ga Pauru, rü duixūgümaā nidexaxū, rü nayaxucüxēgüxū. Rü yexgumarüü ta nayaxucüxēgüxū ga yema duixūgü ga tama Yudíugü ixīgüxū. ⁵ Rü yixcamaxūra ínangugü ga Chira rü Timutéu ga Machedóniāwa ne íxū. Rü yexguma inanaxügü ga Pauru ga aixcüma poraācü nüxū na yaxuxū ga Tupanaārü ore. Rü meāma Yudíugüxū nangúexēē na Ngechuchu rü Tupana Nane ya Cristu na yiixū. ⁶ Natürü nümagü ga yema Yudíugü rü inanaxügüē ga Paurumaā na nanuèxū, rü

namaã naguxchigagũxũ. Rũ yexguma inapamũchiru ga Pauru, yerũ yema nixĩ ga wũxi ga cuẽxruũ naxcẽx ga yema duũxũgũ na yemawa nũxũ yacuẽxãchitanũxũcẽx ga norũ chixexũ. Rũ ñanagũrũ nũxũ: —Pegagu tátama nixĩ i na ipeyarũtauxexũ, rũ marũ tama chaugagu tá nixĩ. Rũ ñomaũcũũ i choma rũ tá ngẽma tama Yudĩgũ ixĩgũxũtanũwa chaxũ —ñanagũrũ ga Pauru. ⁷ Rũ inaxũxũ ga guma ngutaquẽxepataũwa. Rũ yema nayexma ga wũxi ga yatũ ga Tĩchiu ga Yuchugu aẽgaxũ. Rũ nũma rũ Tupanaxũ nangechaũ rũ yexma ngutaquẽxepataũcũwagu naxãpata. Rũ yemaxũtawa naxũ ga Pauru, rũ yexma nape. ⁸ Rũ Cripu ga ngutaquẽxepataũãrũ aẽxgacũ rũ namẽx rũ guxũma ga naxãcũgũ rũ Cori ya Ngechuchuaxũ nayaxõgũ. Rũ yexgumarũũ ta rũ muxũma ga Corĩtiucũãxgũ rũ nayaxõgũ ga yexguma nũxũ naxĩnũẽgu ga yema ore, rũ ñuxũchi Pauru inabaiũxẽẽ. ⁹ Rũ wũxi ga chũtaxũ rũ nangõxetũ ga Pauru. Rũ Cori ya Tupana namaã nidexa, rũ ñanagũrũ: —¡Rũ tãxũ i cumuũxũ! ¡Rũ nũxũ iXuama i chorũ ore! ¡Rũ tãxũ i curũchianexũ! ¹⁰ —Erũ choma rũ chacuxũtagu, rũ taxũetãma chixexũ cumaã taxũ. Erũ daa iãnewa rũ choxũ nangẽxma i muxũma i chorũ duũxũgũ —ñanagũrũ ga Tupana. ¹¹ Rũ wũxi ga taunecũarũ ngãxũ Corĩtiuwa nayexma ga Pauru. Rũ yema yema duũxũgũtanũwa namaã nangũxẽẽtae ga Tupanaãrũ ore. ¹² Natũrũ yexguma Acayaaneãrũ aẽxgacũ yixĩgu ga Gariõũ, rũ yema Yudĩgũ rũ wũxigu Pauruxũ niyaxugũ, rũ aẽxgacũpẽxewa nanagagũ. ¹³ Rũ ñanagũrũgũ nũxũ ga guma aẽxgacũ: —Ñãã yatũ rũ duũxũgũxũ naxucuxẽ na Tupanaxũ yacuẽxũũgũxũcẽx rũ tama naga na naxĩnũẽxũcẽx i tachiũãneãrũ mugũ —ñanagũrũgũ. ¹⁴ Rũ Pauru marũ nachonagũchaũ, natũrũ nũma ga aẽxgacũ ga Gariõũ rũ yema Yudĩgũxũ nangãxũ, rũ ñanagũrũ: —Rũ ngẽxguma chi wũxi i taxũ i chixexũ naxũxgu, rũ õxna namãẽtagu, rũ ngẽxguma chi nixĩ i choma i pexũ ichaxĩnũxũ, Pa Yudĩgũx. ¹⁵ —Natũrũ ngẽma pecũmachiga rũ perũ mugũchiga rũ perũ nguxẽẽtaechiga na yĩxũ, rũ choma rũ tama nũxũ chacuãxchaũ i ngẽma. ¡Rũ pematama penamexẽẽx! Rũ choma rũ tama ngẽmachigaarũ aẽxgacũ chixĩxchaũ —ñanagũrũ. ¹⁶ Rũ yexguma inanaxũ ga yema. ¹⁷ Rũ yexguma guxũma ga yema duũxũgũ rũ Yudĩgũarũ ngutaquẽxepataũãrũ aẽxgacũ ga Chõtenegu aẽgaxũxũ yexma niyaxugũ. Rũ yexmatama aẽxgacũ ga Gariõũpẽxegu nanaçuaixgũ. Natũrũ nũma ga Gariõũ rũ taxu ñanagũrũama.

Pauru rũ Aũtioquĩacẽx nataegu, rũ ñuxũchi wenaxãrũ inaxũãchi na norũ tomaẽxpũxcũna to ga nachĩũãnegũwa nangeaxũ ga Tupanaãrũ ore

¹⁸ Rũ yemawena rũ muxũma ga ngunexũ yema Corĩtiuwa nayexma ga Pauru. Rũ yixcama nũxũ narũmoxẽ ga yema yaxõgũxũ rũ nũxna inaxũãchi. Rũ iãne ga Chẽcreawa naxũ namaã ga Prisila rũ Aquiru. Rũ Chẽcreawa nũgũ nidũpũxũeru ga Pauru yerũ marũ nayanguxẽẽ ga wũxi ga uneta ga Tupanamaã nũxũ yaxuxũ. [Rũ woetama yema nixĩ ga nacũmagũ ga Yudĩgũ ga yexguma yanguxẽẽgũãxgu ga wũxi ga uneta ga Tupanamaã nũxũ yaxuxũ.] Rũ ñuxũchi Chẽcreaarũ tũrewa rũ wũxi ga wapurugu nichoũ na Chĩriaanewa naxĩxũcẽx. ¹⁹ Rũ yexguma Epẽchiuwa nangugũgu, rũ Pauru nũxna nixũgachi ga Prisila rũ Aquiru, rũ Yudĩgũarũ ngutaquẽxepataũwa naxũ. Rũ yema namaã nidexa ga yema Yudĩgũ ga guma ngutaquẽxepataũwa ngutaquẽxegũxũxũ. ²⁰ Rũ yema Yudĩgũ, rũ muxũma ga ngunexũgũ nũxũ nacẽxũgũ ga yexma na naxãũxũcẽx, natũrũ ga nũma rũ tama nanaxwẽxe. ²¹ Rũ yemacẽx nũxũ narũmoxẽãma, rũ ñanagũrũ nũxũ: —Rũ ngẽxguma Tupana naxwẽxegu, rũ wena táxarũ pexcẽx chataegu —ñanagũrũ. Rũ yemawena rũ Epẽchiuarũ tũrewa nayarũxũe, rũ inaxũãchi. ²² Rũ Checharãaarũ tũrewa nangu, rũ yema inaxũe. Rũ ñuxũchi Yerucharẽũwa naxũ na nũxũ yanamoxẽxũcẽx ga guxũma ga

yema yaxōgūxū. Rū ñuxūchi Aūtioquíawa naxū. ²³ Rū yexguma marū ñuxre ga ngunexū yéma Aūtioquíawa nayexmagu, rū wenaxārū inaxūāchi ga Pauru na wūxichigū ga ñāne ga Gárataanewa rū Fríyiaanewa yexmagūnewa íyadauxūcèx rū yataāxēēgūāxūcèx ga guxūma ga yema yaxōgūxū ga guma ñānegūwa yexmagūxū.

Aporu rū Epéchiuwa nūxū nixu ga Tupanaārū ore

²⁴ Rū yexgumaūcūū rū Epéchiuwa nangu ga wūxi ga Yudíu ga Aporugu āegaxū. Rū nūma rū ñāne ga Aleyādriacūāx nixī, rū nūxū natauxcha ga duūxūgūpēxewa na yadexaxū. Rū meāma nūxū nacuèx ga Tupanaārū ore i ūmatūxū. ²⁵ Rū nūma meā nūxū nacuèx ga Cuáū ga baiūxēēruūārū nguxēētae ga Cori ga Ngechuchuchiga, rū nūxū nacuèx na ñuxācū Cuáū duūxūgūxū íbaiūxēēxū. Natūrū yexicaxūtama nacuèx ga Ngechuchuchiga. Natūrū poraācū nataāēācūma nidexa rū aixcūma nanangúexēē ga duūxūgū. ²⁶ Rū nūma ga Aporu rū tama namuūācūma inanaxūgū ga na yadexaxū ga Yudíugūarū ngutaquēxepataūwa. Natūrū yexguma Aporuxū naxīnūēgu ga Prisila rū Aquiru, rū napatawa nanagagū na yexeraācū namaā inanguxūxēēāxūcèx ga Ngechuchuchiga. ²⁷ Rū yexguma Acayaanewa naxūxchaūgu ga Aporu, rū yema yaxōgūxū ga Epéchiucūāx nūxū narūngūxēēgū. Rū popera yéma namugū naxcèx ga yema yaxōgūxū ga Acayacūāx na meā Aporuxū nayauxgūxūcèx. Rū yexguma Acayawa nanguxgu ga Aporu rū poraācū nūxū narūngūxēē ga yema duūxūgū ga Tupanaārū ngechaūgagu Ngechuchuaxū yaxōgūxū. ²⁸ Rū guxū ga duūxūgūpēxewa nūxū nūxū nacuèxēē ga poraācū na ínatūexū ga yema Yudíugū ga tama Ngechuchuxū cuáxchaūgūxū. Rū nūmagū ga Yudíugū rū taxucūrūwama ñuxū ñānagūrūgū, yerū ga Aporu rū Tupanaārū ore ga ūmatūxūwa meāma nūxū nanawēx ga na Ngechuchu rū aixcūma Tupana Nane ya Cristu na yīxū.

19

Epéchiuwa nayexma ga Pauru

¹ Rū yexguma Corītiuwa nayexmayane ga Aporu, rū Pauru rū naxpūxanegu idaxū ga namawa nixūpetū, rū Epéchiuwa nangu. Rū yexma nūxū nayangau ga ñuxre ga yaxōgūxū. ² Rū nūxna naca, rū ñānagūrū nūxū: —¿Marū penayaxuxū i Tupanaāē i Ūūnexū ga yexguma peyaxōgūgu? —ñānagūrū. Rū nūmagū nanangāxū, rū ñānagūrūgū: —Tama. Taguma nūxū taxīnūēchiga na tacū yīixū i Tupanaāē i Ūūnexū —ñānagūrūgū. ³ Rū yexguma ga Pauru rū nūxna naca rū ñānagūrū nūxū: —¿Texéaxū peyaxōgūxū ga yexguma ípebaiūgu? —ñānagūrū. Rū nūmagū nanangāxū, rū ñānagūrūgū: —Toma nūxū tayaxō ga yema Cuáū ga baiūxēēruūārū nguxēētae —ñānagūrūgū. ⁴ Rū yexguma ga Pauru rū ñānagūrū nūxū: —Cuáū ínanabaiūxēē ga yema duūxūgū ga nūxū ruxoexū ga nacūma ga chixexū rū Tupanacèx daugūxū. Natūrū yema duūxūgūmaā nūxū nixu ta na nūxū yaxōgūāxūcèx ga Ngechuchu ga naweama ācū —ñānagūrū ga Pauru. ⁵ Rū yexguma yemaxū naxīnūēgu ga yema duūxūgū rū ínabaiū naegagu ga Cori ya Ngechuchu. ⁶ Rū yexguma Pauru rū yema yaxōgūxūetūgu naxūmēxgu, rū nūxna nangu ga Tupanaāē i Ūūnexū, rū to ga nagawachigū nidexagū, rū nūxū nixugūe ga Tupanaārū ore. ⁷ Rū maneca 12 ga yatū nixīgū ga yema duūxūgū. ⁸ Rū tomaēxpūx ga tauemacū yéma nayexma ga Pauru. Rū Yudíugūarū ngutaquēxepataūwa naxūūxū rū tama namuūācūma nūxū nixuuxū ga Tupanaārū ore. Rū nanangúexēē na ñuxācū āēxgacū na yīxū ya Tupana, rū nūxū nanangūchaūxēē na Ngechuchuaxū yaxōgūāxūcèx.

9 Natürü nayexma ga ñuxre ga duñxügü ga tama nüxü cuèxgüchañxü rü tama yaxögüchañxü. Rü nümagü inanaxügü ga na yema muxüma ga duñxügüpëxewa chixexü yaxugüexü nachigagu ga Cori ga Ngechuchu. Rü yemacèx nüxna nixügachi ga Pauru, rü toxnamana nanagagü ga yema yaxögüxü. Rü guxü ga ngunexügu namaã nüxü nixuchiga ga ore nawa ga wüxi ga ngutaquëxepatañ ga Tiranuärü ngüepatañ ga naega. 10 Rü yemaãcü nanaxü ga taxre ga taunecü, rü yemaãcü guxüma ga Áchiacññxgü ga Yudiügü rü Griégugü rü nüxü naxínüë ga Cori ya Tupanaärü ore. 11 Rü Tupana Pauruxü narüngüxëë ga na naxüãxü ga taxügü ga mexügü ga Tupanaärü poramaã naxüxü. 12 Rü èixruxü ga norü dechugü ga Pauru rü naxchirugü rü duñxügü rü yema idaaweexütawa nanangegü. Rü yexguma yema idaaweexü nüxü ingögügüga ga yema naxchiru rü éxna dechu, rü naxcèx nitaanegü. Rü yema duñxügü ga ngoxoãxgüxü rü ta naxcèx nitaanegü. 13 Natürü nayexma ga ñuxre ga Yudiügü ga ñanagüwachigü ixîetanüxü rü ngoxogüarü woxüwa puracüexü. Rü nüxü naxügü na Cori ya Ngechuchuégagu na ínawoxüãxü ga ngoxogü nawa ga yema duñxügü ga ngoxoãxgüxü. Rü ñanagürügü: –Ngechuchu ya Pauru nüxü ixuchigacüégagu pexü tamu na ípechoxüxcèx –ñanagürügü ga yema Yudiügü. 14 Rü yema 7 ga yema ügüxü, rü wüxi ga Yudiügüarü paigüarü ãëxgacü ga Echebaga äegaxü nanegü nixîgü. 15 Natürü wüxi ga ngunexügu ga yexguma wüxi ga ngoxoxü ínatëxüchigüchañgu, rü yema ngoxo nanangãxü, rü ñanagürü: –Nüxü chacuèx ya Ngechuchu, rü nüxü chacuèx ya Pauru na texé yîxü. ¿Natürü i pema rü texégü pixîgü? –ñanagürü. 16 Rü yexguma ga yema yatü ga ngoxoãxü rü yema duñxügü ga ínatëxüchigüchañxüna nayuxu, rü nüxü narüporamaë ga guxüma, rü ínanagáuñxüne. Rü yemaãcü ngexchiruxüma rü napíexüma nibuxmü ga guma íwa. 17 Rü guxüma ga Yudiügü rü Griégugü ga Epéchiuwa yexmagüxü rü nüxü nacuáchiga ga yema. Rü poraãcü namuñë ga guxüma. Rü yemaãcü yexeraãcü natachiga ga Cori ga Ngechuchu ga yéma. 18 Rü muxüma ga yema yaxögüxü rü yéma ningugüetanü, rü guxü ga duñxügüpëxewa nüxü nixugüechigü ga nüma rü ta na nayuüechiréxü, natürü tá nüxü na naxoexü ga yema. 19 Rü muxüma ga yema iyuüechiréxü, rü yéma nanana ga norü poperagü ga yuüpane ga nawa nangüexü, rü guxãpëxewa ínanagu. Rü yexguma nangugügüãgu ga natanü ga yema poperagü, rü maneca 50,000 tachinü ga díeru ga tatanüxüwa nangu. 20 Rü yemaãcü ga Cori ya Tupanaärü ore, rü yexeraãcü nixüchigü, rü yexeraãcü duñxügü nüxü nadau na ñuxãcü naporaxü ga yema ore. 21 Rü yemawena ga Pauru, rü nagu narüxînü ga Machedóniãñewa rü Acayaanewaxíra na naxüxü, rü yéma ñuxüchi Yerucharéñwa na naxüxü. Yerü yema ñanagürü: –Rü ngema Yerucharéñwa tá chaxü, rü yixcama rü Dumawa rü tá ta chaxü –ñanagürü. 22 Rü yemacèx nügüpëxegu Machedóniãñewa nanamugü ga taxre ga norü ngüxëëruñ ga Timutéu rü Eratu. Natürü nüma ga Pauru rü ñuxre ga ngunexü Áchiagu narüxãñx.

Nanuë ga duñxügü ga Epéchiuwa

23 Rü yexgumañcü rü Epéchiuwa rü nanaxixächitanüãë ga duñxügü, rü poraãcü nanuë nachigagu ga Cori ya Tupanaärü ore. 24 Rü yemaãcü naxüpetü nagagu ga wüxi ga yatü ga díerumüwa puracüxü ga Demétriugu äegaxü. Rü nüma rü ínanaxüxü ga norü tupana ga Atemícharü tupaucachicünëxãgü ga díerumünaxcèx. Rü nayexma ga muxüma ga norü puracütanüxü ga yemawa puracüexü. Rü guxüma poraãcü meã nüxü naxätanü ga yema puracü. 25 Rü nüma ga Demétriü rü nanangutaquëxexëë ga guxüma ga

puracŭtanŭxŭ ga yemawa puracŭexŭ, rŭ űanagŭrŭ nŭxŭ: —Pa Chomŭcŭgŭx, meã nŭxŭ pecuèxgŭ na űaã tŏrŭ dŭerumŭãrŭ puracŭgu na ngŭxŭ iyaxuxŭ i tŏrŭ dŭeru. ²⁶ Rŭ marŭ nŭxŭ pedaugŭ i ngẽma Pauru rŭ nŭxŭ pexĩnŭe na űuxãcŭ yaxucŭxẽgŭãxŭ i duŭxŭgŭ, rŭ űuxãcŭ namaã nŭxŭ yaxuxŭ na tama aixcŭma tupanagŭ yŭixŭ i ngẽma tupanagŭ i yixema ixŭgŭxŭ. Rŭ ngẽmaãcŭ muxŭma i duŭxŭgŭxŭ nŭxŭ narŭxoexẽe na tama tŏrŭ tupanagŭaxŭ yaxŏgŭãxŭcèx. Rŭ tama nŭma Epẽchiuwaxicatama ngẽxŭ nawagŭ natŭrŭ wixguxŭchi taèx guxŭ i Áchiaanewa ngẽmaãcŭ chixri nayaxucŭxẽgŭ i duŭxŭgŭ. ²⁷ Rŭ pema nŭxŭ pecuèx rŭ tŏrŭ puracŭcèx rŭ naxãcŭma i ngẽma. Rŭ wŭxi i chixexŭ ta nixŭ i naxcèx i tŏrŭ tupana i Atemŭchaarŭ tupauca ya taxŭne. Rŭ űuxma rŭ muxŭma i duŭxŭgŭ rŭ ngŭxŭ nangechaŭ i Atemŭcha i guxŭ i Áchiaanewa rŭ guxŭ i naãnewa. Natŭrŭ ngẽma Pauruarŭ ucŭxẽgagu rŭ dŭxwa taxuxŭtãma ngŭxŭ nangechaŭ i duŭxŭgŭ, rŭ ngẽmaãcŭ dŭxwa inaãrŭxo tá ta i tŏrŭ puracŭ —űanagŭrŭ ga Demetriu. ²⁸ Rŭ yexguma yemaxŭ naxĩnŭeŭ, rŭ poraãcŭ nanuẽ, rŭ tagaãcŭ űanagŭrŭgŭ: —¡Namaxŭ i Epẽchiucŭãxgŭarŭ tupana i Atemŭcha! —űanagŭrŭgŭ. ²⁹ Rŭ guxŭma ga yema űãnecŭãxgŭ rŭ poraãcŭ yexma ínatŭeãe. Rŭ ínanayauxŭ ga Gayu rŭ Aritãrcu ga Machedŏniããnecŭãxgŭ ga Paurumŭcŭgŭ, rŭ guma ű ga űãneãrŭ ngutaquẽxepataŭwa nanagauxŭtanŭ. ³⁰ Rŭ Pauru rŭ ta yexma naxŭcuchaŭ na yema duŭxŭgŭmaã yadexaxŭcèx, natŭrŭ yema yaxŏgŭxŭ nŭxna nanachŭxu ga yexma na naxŭcuxŭ. ³¹ Rŭ yema Áchiaaneãrŭ ãẽxgacŭgŭtanŭwa rŭ nayexma ga űuxre ga Paurumŭcŭgŭ ixŭgŭxŭ. Rŭ nŭmagŭ rŭ ta Pauruxŭtawa namugagŭ na tama yema ngutaquẽxechicagu naxŭcuxŭcèx. ³² Rŭ yoxni ga duŭxŭgŭ ga yema ínangutaquẽxegŭxŭwa, rŭ nŭmaxŭ rŭ wŭxi ga oremaã aita naxŭe, rŭ togŭ ga to ga oremaã aita naxŭe. Yerŭ poraãcŭ nanaxixãchiãẽgŭ ga guxŭma ga yema duŭxŭgŭ ga yema ngutaquẽxegŭxŭ. Rŭ muxŭma rŭ tama nŭxŭ nacuèxgŭ ga űacŭcèx na nangutaquẽxegŭxŭ. ³³ Natŭrŭ yema nayexma ga wŭxi ga Yudŭu ga Areyãŭdrugŭ ãegaxŭ. Rŭ yema togŭ ga Yudŭugŭ rŭ namaã nŭxŭ nixu ga űacŭcèx na nangutaquẽxexŭ. Rŭ duŭxŭgŭpẽxewa nanamugŭ na yadexaxŭcèx rŭ naetŭwa nachogŭxŭcèx ga yema Yudŭugŭ ga yema yexmagŭxŭ. Rŭ nŭma ga Areyãŭdru rŭ naxunagŭmẽxẽ na iyanachianegŭxŭcèx ga duŭxŭgŭ, na namaã yadexaxŭcèx. ³⁴ Natŭrŭ yexguma nŭxŭ yacuèxãchitanŭgu ga Arẽ rŭ Yudŭu na yŭixŭ, rŭ guxŭma ga yema duŭxŭgŭ rŭ wŭxigu tagaãcŭ aita naxŭe. Rŭ taxre ga ora ninge ga na tagaãcŭ űagŭxŭ: —¡Namaxŭ i Epẽchiucŭãxgŭarŭ tupana i Atemŭcha! —űagŭxŭ. ³⁵ Rŭ dŭxwa yema űãneãrŭ ãẽxgacŭ nanachiãchixẽe ga yema muxŭma ga duŭxŭgŭ, rŭ űanagŭrŭ nŭxŭ: —Pa Epẽchiucŭãxgŭx, guxŭma i duŭxŭgŭ nŭxŭ nacuèx na Atemŭchaarŭ tupauca ya taxŭneãrŭ dauruŭ na ixŭgŭxŭ. Rŭ guxŭma nŭxŭ nacuèx na nŭma tŭxŭ nangẽxmaxŭ i Atemŭchachicŭnèxã i daxŭwa rŭnguxŭ. ³⁶ —Rŭ űuxma na guxŭma nŭxŭ na cuãxŭ na aixcŭma yŭixŭ i ngẽma, rŭ name nixŭ na pechiãchixŭ, rŭ taxuŭma i chixexŭ pexŭexŭ. ³⁷ —Erŭ űaã yatŭgŭ i nuã pegagŭxŭ, rŭ taxuŭma i chixexŭ ngŭmaã naxŭgŭ i tŏrŭ tupana, rŭ tama chixexŭ nixugŭe ngŭchigagu. ³⁸ —Rŭ ngẽxguma chi Demetriu rŭ ngẽma namŭcŭgŭ i namaã napuracŭexŭ rŭ nŭxŭ nangẽxmagu i űacŭ i tama norŭ me ixŭxŭ, rŭ nangẽxma i ngutaquẽxechicagŭ i ngextã ãẽxgacŭgŭ duŭxŭgŭxŭ ícagŭxŭwa. Rŭ name nixŭ na ngẽma ãẽxgacŭgŭpẽxewa namexẽãxŭ i űacŭ i tama norŭ me ixŭxŭ. ³⁹ —Rŭ ngẽxguma nangẽxmagu i űacŭ i to i perŭ guxchaxŭgŭ, rŭ name nixŭ i űãneãrŭ ãẽxgacŭgŭarŭ ngutaquẽxewa penamexẽe i ngẽma. ⁴⁰ —Erŭ űuxma rŭ taxãcŭmaxŭgugŭ rŭ ngŭrŭãchi ãẽxgacŭ ya tacŭ ya Dumawa ngẽxmacŭ rŭ tŭxna tá naxcèx naca i ngẽma űuxma ngupetŭxŭ. Erŭ aixcŭma taxumaãma tanangãxŭega i ãẽxgacŭ, ega tŭxna nacaxgu naxcèx i űaã

ngutaquẽxe i nawa pexãũgatanũxũ —ñanagürü. ⁴¹ Rũ yexguma marũ yema ñaxguwena, rũ ínayamugũ ga yema duũxũgũ.

20

Machedóniãñewa rũ Griégugũchiũñewa naxũ ga Pauru

¹ Rũ yexguma marũ nangupetũgu ga yema na íyacuxcuxũ ga duũxũgũ, rũ Pauru naxcèx nangema ga yema yaxõgũxũ na yaxucuxègũãxũcèx. Rũ yexguma marũ namaã nüxũ nachaugu, rũ nüxũ narũmoxè, rũ inaxũãchi ga Machedóniãñewa na naxũxũ. ² Rũ yexguma yema naãñewa yaxüpetũgu, rũ taãèxũ ga oremaã nayaxucuxègũ ga yema yaxõgũxũ ga wũxichigũ ga ñãñewa yexmagũxũ. Rũ yemaãcü Griégugũchiũñewa nangu. ³ Rũ yema nayexma ga tomaèxpũx ga tauemacü. Rũ yexguma marũ inaxũãchichaũgu ga Chíríaanewa na naxũxũ, rũ tama wapurugu nixũ yerũ nüxũ nacuáchiga ga na ñuxre ga Yudíugũ yamèngxũchaũxũ. Rũ yemacèx nagu narũxĩnũ ga dauxchitagu na nataeguxũ, rũ wenaxãrũ Machedóniãñewa na naxüpetũxũ. ⁴ Rũ ínayaxũmücũgũ ga Chópate ga Beréacũãx ga Píru nane, rũ Aritárcu rũ Segũdu ga Techarónicacũãxgũ, rũ Gayu ga Derbecũãx, rũ Timutéu, rũ Tíquicu, rũ Turuquínu ga Áchiaanecũãxgũ. ⁵ Rũ yema yatũgũ rũ nüxĩra topèxegu naxãgũ, rũ Tróawa toxũ nayarũngxũègũ. ⁶ Rũ nawena ga yema Yudíugũarũ peta ga üpetũchiga ga pãũ ga ngearũ puxèèruũãxũ nagu nangõxgũxũ, rũ wapurugu Piripuwa itaxĩãchi. Rũ wũximèèxpũx ga ngunexũ ngupetũgu, rũ Tróagu nüxũ tayangaugũ ga yema topèxegu ãgũxũ. Rũ yexma tarũcho ga ⁷ ga ngunexũ.

Tróagu nanaxũãne ga Pauru

⁷ Rũ yema yũxũarũ ngunexũgu rũ tangutaquèxegũ namaã ga yema yaxõgũxũ na tanangõxũcèx ga pãũ ga bũcuxũ yema Ngechuchu toxũ ngũexèèxũrũ. Rũ yema yaxõgũxũmaã nidexa ga Pauru. Rũ nanamèxèè ga norũ dexa ñuxmata ngãxũcũwa nangu, yerũ moxũãcü inaxũãchichaũ. ⁸⁻⁹ Rũ daxũwa ga guma ñpataarũ tomaèxpũxchiũwa yexmaxũ ga ucapuwa tangutaquèxegũ. Rũ namu ga omũ ga yema naĩgũxũ. Rũ nayexma ga wũxi ga ngextũxũcü ga Eutícugu ãegacü. Rũ yema wũxi ga yema ucaputapũxarũ ñãxwa narũto. Natürũ ga Pauruarũ dexa, rũ poraãcü namèx. Rũ yemacèx ga guma ngextũxũcü rũ poraãcü nayaxta, rũ dũxwa nipeãchi rũ yema ñãxwa narũngu, rũ ñaxtũanegu nangu. Rũ yema yucũma nanayauxgũ. ¹⁰ Rũ ínaruĩ ga Pauru, rũ nayanawũxũchi ga guma ngextũxũcü, rũ duũxũgũxũ ñanagürü: —¡Tãxũ i pebaixãchiexũ, erũ namaxũ nixĩ! —ñanagürü. ¹¹ Rũ yexguma wenaxãrũ daxũ naxĩ, rũ inanabũcu ga yema pãũ, rũ nanangõx. Rũ wenaxãrũ nidexa ñuxmata yangune, rũ yexguma inaxũãchi. ¹² Rũ guma ngextũxũcü rũ maxũcü napatawa nanagagũ. Rũ yemacèx poraãcü nataãègũ ga guxũma ga nümagũ.

Tróawa inaxũãchi ga Pauru rũ Miretuwa naxũ

¹³ Rũ yexguma ga Pauru rũ ñanagürü: —Dauxchitagu tá chixũ ñuxmatáta ñãne ya Achuwa changu na ngema pexũ chixũexũcèx —ñanagürü. Rũ yemacèx ga toma rũ wapurugu tichoũ rũ yoxni napèxegu taxĩ ñuxmata Achuwa tangugũ. ¹⁴ Rũ yexguma Achugu Paurumaã togũ tayangauxgu, rũ yema toxũ nixũe. Rũ tachopetũ ga yema ñuxmata Miterèñewa tangugũ. ¹⁵ Rũ yema itaxĩãchi rũ moxũãcü Quíuarũ toxmèxtawa tachopetũ. Rũ yemaãrũ moxũãcü Chamowa tangugũ. Rũ yemaãrũ moxũãcüama Miretuwa tangugũ. ¹⁶ Rũ yemaãcü ítixĩ yerũ ga Pauru rũ tama Áchiaanegu nanuxcũchaũ. Yerũ

nanaxwèxe ga paxa Yerucharéŭwa na nanguxŭ naxcèx ga Pētecóstearŭ ngunexŭ. Rŭ yemacèx nagu narŭxŭnŭ na tama Epéchiugu Íyadauxŭ.

Yaxōgŭxŭārŭ āēxgacŭgŭ ga Epéchiucŭāxmaā nidexa ga Pauru

¹⁷ Natŭrŭ yexguma Miretuwa tangugŭgu rŭ Epéchiuwa naxcèx namuga ga Pauru na naxŭtawa naxŭxŭcèx ga yema yaxōgŭxŭārŭ āēxgacŭgŭ ga Epéchiucŭāx. ¹⁸ Rŭ yexguma Pauruxŭtawa nangugŭgu, rŭ űanagŭrŭ nŭxŭ: — Pema meā nŭxŭ pecuèxgŭ ga űuxācŭ pepèxewa na chamaxŭxŭ ga guxŭgu ga yexguma noxritama nuā Áchiaanewa chaxŭxgu. ¹⁹ Rŭ guxŭguma ga yexguma petanŭwa chayexmagu, rŭ meāma chanaxŭ ga Cori ya Tupanaārŭ puracŭ, taguma chaugŭ chicuèxŭācŭma. Rŭ woo muēxpŭxcŭna poraācŭ changechaŭgu, nagagu ga yema chixexŭ ga chomaā naxŭgŭchaŭxŭ ga Yudŭgŭ, natŭrŭ naetŭwa chanaxŭama ga yema puracŭ. ²⁰ Rŭ taguma íchayachaxāchi ga pemaā nŭxŭ na chixuxŭ ga guxŭma ga yema ore ga perŭ mexŭcèx íxŭxŭ. Rŭ guxŭ ga duŭxŭgŭpèxewa, rŭ pepatagŭwa rŭ ta pexŭ changŭexēē ga yema ore. ²¹ Rŭ Yudŭgŭmaā rŭ yema tama Yudŭgŭ íxŭgŭxŭmaā nŭxŭ chixu na namexŭ ga na nŭxŭ naxoexŭcèx ga norŭ chixexŭgŭ rŭ Tupanaga naxŭnŭexŭcèx, rŭ nŭxŭ na yaxōgŭāxŭcèx ga tórŭ Cori ya Ngechuchu. ²² Rŭ űuxma rŭ Yerucharéŭwa chaxŭ erŭ Tupanaāē i Ŭnexŭ rŭ ngema choxŭ namu. Natŭrŭ tama nŭxŭ chacuèx na tacŭ tá choxŭ ŭpetŭxŭ i ngema. ²³ Rŭ ngēma nŭxŭ chacuáxŭ nixŭ i duŭxŭgŭ tá choxŭ napoxcu rŭ guxchaxŭgŭ tá choxŭ naxŭpetŭ i Yerucharéŭwa. Rŭ ngēxŭcatama nixŭ i chomaā nŭxŭ yaxuxŭ i Tupanaāē i Ŭnexŭ i guxŭne ya űāne i ngextá íchixŭgŭxŭwa. ²⁴ Natŭrŭ tama ngēma āŭcŭmaxŭgu charŭxŭnŭ erŭ nŭetama nixŭ ega woo chayŭxgu. Natŭrŭ ngēma chanaxwèxexŭ nixŭ na taēēcŭma chapuracŭamaxŭ na meā chayangŭxēēxŭcèx i ngēma puracŭ ga tórŭ Cori ya Ngechuchu choxna āxŭ rŭ nŭxŭ chixuxŭcèx i norŭ ore i mexŭ na űuxācŭ Tupana tŭxŭ ngechaŭxŭ. ²⁵ Rŭ űuxma rŭ marŭ nŭxŭ chacuèx rŭ tagutáma wena choxŭ pedaugŭ i pema ga marŭ pemaā nŭxŭ chixuxe na űuxācŭ āēxgacŭ na yŭxŭ ya Tupana. ²⁶ Rŭ ngēmacèx i űoma i ngunexŭgu rŭ pemaā nŭxŭ chixu rŭ marŭ tama chaugagu nixŭ ega texé petanŭwa iyarŭtauxgu. ²⁷ Erŭ marŭ meāma pemaā nŭxŭ chixu i guxŭma i ngēma Tupana pexŭ naxwèxexŭ, rŭ taxuŭma ichicux. ²⁸ Rŭ ngēmacèx i űuxma rŭ penaxwèxe na pexuāēgŭxŭ rŭ meā nŭxna pedaugŭxŭ i guxŭma i yaxōgŭxŭ i petanŭwa ngēxmagŭxŭ. Erŭ ngēma nixŭ i Tupanaāxē i Ŭnexŭ nagu pexŭ mugŭxŭ na nŭxna pedaugŭxŭcèx i ngēma Tupanaārŭ duŭxŭgŭ i yaxōgŭxŭ i Ngechuchu nagŭmaātama naxcèx taxexŭ. ²⁹ Choma nŭxŭ chacuèx rŭ ngēxguma íchixŭxgu, rŭ chowena tá pexcèx nuā naxŭ i togŭ i duŭxŭgŭ. Rŭ tá nanachixexēēchaŭ i ngēma yaxōgŭxŭ űoma airugŭ i idŭraexŭ i carnerugŭxŭ ngŭāchixēēxŭrŭ. ³⁰ Rŭ woo petanŭwatátama nangēxmagŭ i nŭmaxŭ i tá doramaremaā nangŭexēēxŭ i ngēma yaxōgŭxŭ na nŭgŭwe naxŭxēēāxŭcèx. ³¹ ¡Pegŭna pedaugŭ, rŭ nŭxna pecuèxāchie na űuxācŭ tomaēxpŭx ga taunecŭgu rŭ ngunecŭ rŭ chŭtacŭ rŭ taguma íchayachaxāchixŭ ga pexcèx chaxauxācŭma na pexŭ chixucuxēgŭxŭ ga wŭxichigŭ! ³² Rŭ űuxmax, Pa Chaueneēgŭx, rŭ Tupanana pexŭ chamugŭ. Rŭ chanaxwèxe i naga pexŭnŭē i norŭ ore i tŭxŭ nŭxŭ cuèxēēxŭ na űuxācŭ poraācŭ tŭxŭ nangechaŭxŭ. Erŭ ngēma norŭ ore tá pexŭ naporaexēē na tórŭ Coricèx pemaxēxŭcèx rŭ pexŭ nangēxmaxŭcèx i pechica namaā i guxŭma i duŭxŭgŭ i Tupana dexŭ. ³³ Choma rŭ taxuguma chaugŭcèx chanaxwèxe ga texéarŭ dŭeru rŭ texéchiru. ³⁴ Rŭ pematama rŭ meā nŭxŭ pecuèx ga űuxācŭ daa choxmēxmaā na chapuracŭxŭ naxcèx ga yema choxŭ rŭ chomŭcŭgŭaxŭ taxuxŭ. ³⁵ Rŭ guxŭguma meā pexŭ changŭexēē na ngēmaācŭ pepuracŭexŭ

na nüxŭ perüngŭxēēxŭcèx i ngēma duŭxŭgŭ i nüxŭ nataxuxŭ. Rŭ name nixŭ na nüxna pecuèxāchiexŭ i Cori ya Ngechucharŭ ore ga nümatama ñaxŭ:

“Rŭ narŭmemaē nixŭ i pema na toguena penaxāxŭ rŭ tama i tŭma pexna tanaxāxŭ”, ñaxŭ. ³⁶ Rŭ yexguma yema ñaxguwena ga Pauru, rŭ inacaxāpŭxŭ namaā ga guxŭma, rŭ nayumŭxē. ³⁷ Rŭ guxŭma poraācŭ naxauxe, rŭ Pauruna nanèixāchigŭ, rŭ nüxŭ nachúxgŭ. ³⁸ Yerŭ poraācŭ nangechaŭē naxcèx ga yema ore ga namaā nüxŭ yaxuxŭ ga:

“Marŭ tagutáma wena choxŭ pedaugŭ” ñaxŭ. Rŭ nümagŭ ínayaxŭmŭcŭgŭ ñŭxmata wapuruwa nangu.

21

Yerucharéŭwa naxŭ ga Pauru

¹ Rŭ yexguma nüxna itaxŭāchi ga yema yaxŭgŭxŭ, rŭ wapurugu tichoŭ. Rŭ capaxŭ ga Coscèx noxtacŭma tixaŭ. Rŭ moxŭācŭ rŭ Rodawa taxŭ. Rŭ yéma itaxŭāchi, rŭ Pátarawa tangugŭ. ² Rŭ yexma nüxŭ tayangau ga wŭxi ga wapuru ga Peníchiawa ŭxŭne. Rŭ nagu tichoŭ, rŭ itaxŭāchi. ³ Rŭ yixcamaxŭra nüxŭ tadaugŭ ga Chipre. Rŭ torŭ toxwecŭwawaama naxŭ, rŭ nüxŭ tachopetŭ. Rŭ itiñaxwetaxŭ ñŭxmata Chíríaanewa tangugŭ. Rŭ Tiruwa ítachoŭ, yerŭ yéma nixŭ ga ínanuŭācuxŭ ga guma wapuru. ⁴ Rŭ yexma nüxŭ tayangau ga yémacŭāx ga yaxŭgŭxŭ, rŭ 7 ga ngunexŭ yéma natanŭwa tayexmagŭ. Rŭ Tupanaāē i Ūñexŭ nayadexagŭxēē ga yema yaxŭgŭxŭ, rŭ Pauruxŭ ñanagŭrŭgŭ: —¡Tāxŭ i Yerucharéŭwa cuxŭxŭ! —ñanagŭrŭgŭ. ⁵ Natŭrŭ yexguma nangupetŭgu ga yema 7 ga ngunexŭgŭ, rŭ itaxŭāchi. Rŭ yema yaxŭgŭxŭ rŭ towe narŭxŭ. Rŭ naxmèxmaāchigŭ rŭ naxācŭgŭmaāchigŭ toxŭ ínixŭmŭcŭgŭ ga guxŭma ñŭxmata guma íānechipenŭwa tangugŭ. Rŭ yexma naxnŭcŭgu tacaxgŭāpŭxŭ, rŭ tayumŭxègŭ. ⁶ Rŭ yexguma ga toma rŭ nüxŭ tarŭmoxègŭ, rŭ tichoŭ ga wapuruwa. Rŭ nümagŭ rŭ napatacèx nawoegu. ⁷ Rŭ toma rŭ Tiruwa itaxŭāchi rŭ Turemáidawa tangugŭ. Rŭ yéma ítachoŭ, yerŭ yexma nayacuèx ga wapurugu na taxŭxŭ. Rŭ nüxŭ tarŭmoxègŭ ga yema yaxŭgŭxŭ ga yéma yexmagŭxŭ, rŭ wŭxi ga ngunexŭ natanŭgu tarŭcho. ⁸ Rŭ moxŭācŭ itaxŭāchi ga yéma, rŭ Checharéawa tangugŭ. Rŭ Piripí ga Tupanaārŭ orearŭ uruŭpatawa taxŭ. Rŭ nüma rŭ yema 7 ga ngŭxēēruŭgŭ ga tupaucana daugŭxŭtanŭxŭ nixŭ. Rŭ yexma naxŭtagu tapegŭ. ⁹ Rŭ nüma nüxŭ iyexma ga āgŭmŭcŭ ga naxācŭgŭ ga taguma ixātecŭ ga Tupanaārŭ orexŭ ixugŭecŭ. ¹⁰ Rŭ yexguma marŭ ñuxre ga ngunexŭ yéma tayexmagŭgu, rŭ Yudéaanewa ne naxŭ ga wŭxi ga Tupanaārŭ orearŭ uruŭ ga Agabugu āegaxŭ. ¹¹ Rŭ yexguma toxŭtawa nanguxgu ga Agabu, rŭ nanayaxu ga Pauruarŭ goyexŭ. Rŭ namaā nügŭ ninèixgŭcutŭ, rŭ nügŭ nináímèx, rŭ ñanagŭrŭ: —Tupanaāē i Ūñexŭ marŭ chomaā nidexa rŭ ñanagŭrŭ:

“Rŭ ñācŭ tá nayanèixgŭ i Yudíugŭ i Yerucharéŭwa i ñāā goyexŭārŭ yora. Rŭ ngēma duŭxŭgŭ i tama Yudíugŭ ixŭgŭxŭna tá nanamugŭ”, ñanagŭrŭ. ¹² Rŭ yexguma yema orexŭ taxŭnŭègu, rŭ toma rŭ yema Checharéacŭāxgŭmaā Pauruxŭ tacèxŭgŭ ga tama Yerucharéŭwa na naxŭxŭcèx. ¹³ Natŭrŭ nüma ga Pauru rŭ toxŭ nangāxŭ rŭ ñanagŭrŭ: —¡Tŭxcŭŭ pexauxe rŭ choxŭ pengechaŭxēē? Choma rŭ íchamemare na chináixŭ. Rŭ ngèxgumarŭŭ ta rŭ marŭ íchame na Yerucharéŭgu chayuxŭ naxcèx ya Cori ya Ngechuchu —ñanagŭrŭ. ¹⁴ Rŭ yexguma marŭ taxuacŭma tanachŭxugu, rŭ tachianemare, rŭ ñatarŭgŭ: —¡Ēcŭ yangu i Cori ya Tupanaārŭ ngúchaŭ! —ñatarŭgŭgŭ. ¹⁵ Rŭ yemawena rŭ togŭ tamexèègŭ, rŭ Yerucharéŭwa taxŭ. ¹⁶ Rŭ towe narŭxŭ ga ñuxre ga yaxŭgŭxŭ ga Checharéacŭāxgŭ, rŭ Machŭŭpatawa toxŭ nagagŭ.

Rü nüma nixĩ ga wüxi ga Chíperecũãx ga ũpamama woetama yaxõxũ. Rü naxũtagu tapegũxũ.

Chaũtiáguxũtagu nanaxũãne ga Pauru

¹⁷ Rü yexguma Yerucharéũwa tangugũgu, rü yema yaxõgũxũ rü taããcũma toxũ nayauxgũ. ¹⁸ Rü moxũãcũ ga Pauru rü tomaã Chaũtiáguxũtagu nanaxũãne. Rü yéma nangutaquẽxegũ ga guxũma ga yaxõgũxũãrũ ãẽxgacũgũ. ¹⁹ Rü nüxũ narũmoxẽ ga Pauru, rü ñuxũchi meãma namaã nüxũ nixu ga guxũma ga yema Tupana ũxũ ga yexguma yema tama Yudĩgũ ixĩgũxũmaã nüxũ yaxuxgu ga Tupanaãrũ ore. ²⁰ Rü yexguma Pauruarũ orexũ naxĩnũẽgu ga nũmagũ, rü Tupanaxũ nicuẽxũũgũ. Rü ñanagũrũgũ Pauruxũ: —Dũcẽx, Pa Toeneẽx, cuma nüxũ cucuẽx rü nangẽxma i muxũchixũ i Yudĩgũ i yaxõgũxũ. Rü guxũma i nũmagũ rü nanaxwẽxegũ na nagu naxĩxũ i ngẽma mugũ ga Moĩché ũmatũxũ. ²¹ Natũrũ ga togũ ga tama yaxõgũxũ rü marũ namaã nüxũ nixugũgũ na cuma rü cunangũxẽẽxũ i guxũma i Yudĩgũ i togũ i nachiũãnewa ngẽxmagũxũ, na tama naga naxĩnũẽxũcẽx i ngẽma mugũ ga Moĩché ũmatũxũ. Rü marũ namaã nüxũ nixugũgũ na cunangũxẽẽxũ na tama tũxũ ínawiũchẽxmũpẽxechiraũxũcẽx ya nanegũ, rü na tama naga naxĩnũẽxũcẽx i tacũmagũ ga Moĩché tũxũ muxũ. ²² ¿Tacũ tá ixũexũ i ñuxmax? Erũ ngẽma Yudĩgũ i yaxõgũxũ rü aixcũma tá nüxũ nacuẽxgũ na marũ nuã cunguxũ. ²³ ¡Rũ ngẽmacẽx name nixĩ na cunaxũxũ i ngẽma tá cumaã nüxũ tixuxũ! Nuã totanũwa nangẽxma i ãgũmũcũ i yatũgũ i yanguxẽẽchaũxũ i wüxi i uneta i Tupanamaã nüxũ yaxuxũ. ²⁴ ¡Ngẽma tupauca ya taxũnewa nagagũ, rü wüxigu namaã yanguxẽẽ i ngẽma tacũma ga Moĩché tũxna ãxũ, rü Tupanapẽxewa pegũ peyamexẽẽgũ! ¡Rũ nüxũ naxũtanũ i ñuxregu nüxũ naxãtanũ na yadũpũxũerugũxũcẽx i ngẽma yatũgũ na ngẽmaãcũ yanguxẽẽgũãxũcẽx i norũ unetagũ! Rü ngẽmawa rü guxũma i ngẽma Yudĩgũ rü tá nüxũ nacuẽxgũ na aixcũma cuma rü ta naga cuxĩnũxũxũ i ngẽma mugũ ga Moĩché ũmatũxũ rü tama aixcũma na yĩĩxũ ga yema ore ga cuchiga ga nüxũ yaxugũexũ. ²⁵ Rü ñuxũchi ngẽma yaxõgũxũ i tama Yudĩgũ ixĩgũxũ, rü marũ naxcẽx tanaxũmatũ ga torũ ore na tama nangõxgũãxũcẽx i tacũ i namachi i marũ togũ norũ tupanenetachicũnẽxãgũxũ namaã icuẽxũũgũxũ, rü tama na nangõxgũãxũcẽx ya nagũ, rü tama nangõxgũãxũcẽx i naẽxũgũ rü ãxna naxũnagũ i wẽxnaãxũ, rü tama naĩ i ngemaã rü ãxna naĩ ya yatũmaã inapexũcẽx —ñanagũrũgũ.

Tupauca ga taxũnegu Pauruxũ niyauxgũ

²⁶ Rü yexguma ga Pauru rü yéma tupauca ga taxũnewa nanagagũ ga yema ãgũmũcũ ga yatũgũ. Rü moxũãcũ rü Tupanapẽxewa nügũ namexẽẽ ga Pauru wüxigu namaã ga yema yatũgũ. Rü ñuxũchi guma tupauca ga taxũnegu namaã naxũcu na paimaã nüxũ yaxuxũcẽx na 7 ga ngunexũgu tá yĩĩxũ na yanguxẽẽgũãxũ ga yema norũ uneta ga Tupanamaã nüxũ yaxugũxũ, rü yemawena rü tá na inaxãmaregũãxũ ga norũ ãmaregũ ga Tupanaxũ namaã yacuẽxũũgũxũ ga wüxichigũ. ²⁷ Rü yexguma marũ nagũxchaũgu ga yema 7 ga ngunexũ, rü ñuxre ga Yudĩgũ ga Achiaanecũãxgũ rü Pauruxũ nadaugũ ga tupauca ga taxũnewa. Rü yema Yudĩgũ rü duũxũgũxũ nanuẽxẽẽ na Pauruxũ yayauxgũxũcẽx. Rü yemacẽx Pauruna nayuxgũ. ²⁸ Rü tagaãcũ aita naxũe ñaxũmaã: —Pa Tomũcũgũ Pa Yudĩgũx, ¡Paxa toxũ perũngũxẽẽx! Ñãã nixĩ i ngẽma yatũ i guxũwama yangũxẽẽchigũxũ i duũxũgũ na taxchi naxaixũcẽx i yixema i Yudĩgũ, rü naxchi na naxaixũcẽx i ngẽma mugũ ga Moĩché ũmatũxũ rü daa tupauca ya taxũne. Rü naetũwa i ñuxmax rü nuxa daa tupauca ya taxũnegu nanamucu i ñuxre i duũxũgũ i tama tacũmagu

ixü, rü ngēmaācū nanaxūxaxēē i ñāā nachica i üünexü —ñanagürügü. ²⁹ Rü yema ñanagürügü yerü ũpaacü Yerucharéüwa Paurumaā nüxü nadaugü ga Turuquínu ga wüxi ga Epéchiucüãx ga tama Yudíu ixixü. Rü nüxü nacuèxgügu rü Pauru marü yexma nanaxücuxēē ga tupauca ga taxünegu. ³⁰ Rü guxüma ga yema ñānecüãxgü rü poraācū nanuē. Rü tupauca ga taxünegü nibuxmü, rü Pauruxü niyauxgü, rü tupaucaarü ñāxtüwa nanatúchigügü. Rü yexguma paxa nanawāxtagü ga guma tupauca ga taxüneärü ñāxgü. ³¹ Rü yexguma Pauruxü yamèxgüchaügu ga duüxügü, rü Dumacüãx ga churaragüarü āēxgacüxütawa nanguchiga ga ore na guxüwama ga Yerucharéüwa rü na nanuēxü ga duüxügü. ³² Rü yexgumatama ga guma churaragüarü āēxgacü rü nanangutaquēxexēē ga yema norü capitáügu namaā ga norü churaragü, rü paxa yema duüxügü íyexmagüxüwa naxí. Rü yexguma guma āēxgacüxü rü yema churaragüxü nadaugügu ga duüxügü, rü Ínayachaxāchigü ga na Pauruxü yamèxgüxü. ³³ Rü yexguma ga guma āēxgacü rü Paurucèx nixü rü nayayaxu. Rü nanamu na taxre ga cadenamaā na yanèixgüãxücèx. Rü nüxna naca na texé yíixü, rü tacü naxüxü. ³⁴ Natürü yema muxüma ga duüxügü rü toxica ga oremaā aita naxüe ga wüxichigü. Rü yexguma taxuacüma meā nüxü nacuèxgu ga tacücèx na nanuēxü, rü guma āēxgacü rü nanamu na churaragüpatawa Pauruxü nagagüxü. ³⁵⁻³⁶ Rü yexguma churaragüpataarü toxõnewa nanguxgu ga Pauru, rü churaragü nayangetaügu naxchaxwa ga yema muxüma ga duüxügü, yerü nanuēxüchi rü nawe nicaetanü rü ñanagürügü: —¡Yamèxüchi! —ñanagürügü.

Pauru rü duüxügüpēxewa nügüétüwa nidexa

³⁷ Rü yexguma marü churaragüpatagu yamucuchigüchaüãgu rü Pauru rü Griégugawa guma āēxgacüna naca rü ñanagürü: —¿Cuxü namexü na cumaā nüxü chixuxü i wüxi i ore? —ñanagürü. Rü nüma ga āēxgacü nanangāxü rü ñanagürü: —Ēxna nüxü cucuèx na Griégugawa quidexaxü. ³⁸ ¿Tama ēxna cuma yíixü i Equitucüãx ga ũpaxüra rü duüxügüxü cunuēxēēxü na āēxgacümaā nügü nadèixücèx rü dauxchitawa ga taxüema íxāpataxüwa cunagagüxü ga 4000 ga yatügü ga máētaxügü? —ñanagürü. ³⁹ Rü yexguma ga Pauru rü nanangāxü, rü ñanagürü: —Choma rü Yudíu chixí, rü Tarsucüãx chixí. Rü Chiríchiaanewa rü yima nixí ya wüxi ya ñāne ya taxüchine. Rü ngēxguma curü me yixígu, rü cuxna chaca na duüxügümaā chidexaxücèx —ñanagürü. ⁴⁰ Rü yexguma ga guma āēxgacü rü: —Ngü —ñanagürü. Rü nüma ga Pauru, rü churaragüpataarü toxõnegu nachinagü, rü naxunagüméxē na nachiaächixücèx ga duüxügü. Rü yexguma nachiachiegu, rü Yudíugawa nidexa, rü ñanagürü nüxü:

22

¹ —Pa Chautanüxügüx, ¡rü choxü iperüxñinüē i ngēma ñuxma tá pemaā nüxü chixuxü na chaugüétüwa chidexaxücèx! —ñanagürü. ² Rü yexguma nüxü naxñinüēgu ga na Yudíugawa namaā yadexaxü, rü yexeraācü inayarüchianegü. Rü yexguma namaā yadexagu ga Pauru, rü ñanagürü: ³ —Choma rü Yudíu chixí, rü Chiríchiaaneärü ñāne ga Tarsugu chabu. Natürü doma ñāne ya Yerucharéüwa chaya, rü Gamaniéu nixí ga chorü nguxēēruü. Rü meāma nawa changüx ga guxüma ga mugü ga nuxcümaüxügü ga tórü oxigü nagu íxü. Rü guxügüma naxcèx chadau na guxüma i chorü ngüchaümaā Tupanaāxü chapuracüxü, ngēxgumarüü i guxāma i pema i ñuxmax. ⁴ —Rü choma ga ũpa rü poraācū nawe chingēchigü ga yema Ngechuchuaxü yaxögüxü na chanadèixücèx. Rü íchanayauxü, rü chanapoxcue ga muxüma ga yema yaxögüxü ga yatüxügü rü ngexügü. ⁵ —Rü nüma ya paigüeru rü guxüma i

tupauca ya taxŭneārŭ āēxgacŭgŭerugŭ rŭ nŭxŭ nacuēxgŭ na aixcŭma yīxŭ i űnā chorŭ ore. Yerŭ nŭmagŭ rŭ choxna nanaxāgŭ ga popera na choxŭ nangŭxēēgŭxŭcēx ga tatanŭxŭgŭ ga Yudŭgŭ ga Damacuwa yexmagŭxŭ. Rŭ yēma Damacuwa chaxŭ na naxcēx chayadauxŭ-cēx ga yema Ngechuchuaxŭ yaxōgŭxŭ, rŭ nuā Yerucharēŭwa na chanagagŭxŭcēx rŭ nuxā chayapox-cuexŭcēx.

Pauru nŭxŭ nixu na űnuxācŭ Ngechuchuaxŭ yaxōōxŭ

⁶ –Natŭrŭ yexguma namagu chixŭyane rŭ marŭ chingaicaxgu ga Damacuwa na changuxŭ, rŭ meāma tocuchigu nixŭ ga yexguma. Rŭ ngŭrŭāchi wŭxi ga omŭ ga poraxŭ ga daxŭwa ne baxixŭ rŭ choxŭ nabaxi.

⁷ –Rŭ űnaxtŭanegu chayangu, rŭ nŭxŭ chaxŭnŭ ga wŭxi ga naga ga űnaxŭ choxŭ: “Pa Chaurux, ŭtŭxcŭŭ i chowe quingēchigŭxŭ?” űnaxŭ. ⁸ –Rŭ yexguma ga choma rŭ chanangāxŭ, rŭ űnaxarŭgŭ:

“ŭRŭ texē quixŭ Pa Corix?” űnaxarŭgŭ. Rŭ nŭma ga yema naga rŭ choxŭ nangāxŭ, rŭ űnaxarŭrŭ:

“Choma nixŭ i Ngechuchu ya Nacharētucŭāx, rŭ chorŭ duŭxŭgŭ nixŭ i ngēma nawe quingēchigŭxŭ”, űnaxarŭrŭ choxŭ. ⁹ –Rŭ yema chomŭcŭgŭ rŭ nŭxŭ nadaugŭ ga yema omŭ, rŭ nabaixāchiāēgŭ, natŭrŭ tama nŭxŭ naxŭnŭē ga yema naga ga chomaā idexaxŭ. ¹⁰ –Rŭ nŭxna chaca, rŭ űnaxarŭgŭ ga chomax:

“ŭRŭ űacŭ tá chaxŭxŭ, Pa Corix?” űnaxarŭgŭ. Rŭ yexguma űnaxarŭrŭ choxŭ ga Cori:

“ŭŭrŭda, rŭ inachi, rŭ Damacuwa naxŭ, rŭ ngēma tá cumaā nŭxŭ nixu ya wŭxi ya yatŭ na űacŭ tá cuxŭxŭ!” űnaxarŭrŭ ga nŭma ga Cori. ¹¹ –Rŭ yexguma ga choma rŭ chixoxetŭ yema omŭēmamaā, rŭ yemacēx ga yema chomŭcŭgŭ rŭ choxmēxgu yangŭgŭācŭma choxŭ nigagŭ, rŭ yemaācŭ Damacuwa changu.

¹² –Rŭ yēma nayexma ga wŭxi ga yatŭ ga Ananŭāgu āēgacŭ. Rŭ nŭma nixŭ ga wŭxi ga yatŭ ga aixcŭma Tupanaga űnŭcŭ, rŭ nŭma rŭ meāma nayanguxēē ga yema mugŭ ga Moŭché űmatŭxŭ. Rŭ guxŭma ga Yudŭgŭ ga Damacuwa yexmagŭxŭ, rŭ meā nachiga nidexagŭ. ¹³ –Rŭ nŭma ga Ananŭā rŭ choxŭ űnayadau. Rŭ yexguma chauxŭtawa nanguxgu rŭ űnaxarŭrŭ choxŭ:

“Pa Chaueneē Pa Chaurux, űwenaxārŭ ingoxnaxētŭ!” űnaxarŭrŭ. Rŭ yexgumatama wenaxārŭ chingoxnaxētŭ rŭ meāma nŭxŭ chadau. ¹⁴ –Rŭ yexguma űnaxarŭrŭ ta:

“Yima Tupana ya nuxcŭmaŭgŭxŭ ga tŭrŭ oxigŭarŭ Tupana cuxŭ naxuneta na nŭxŭ cucuāxŭcēx i norŭ ngŭchaŭ, rŭ na nŭxŭ cudauxŭcēx ya yima Cristu ya mecŭ, rŭ naāxwatama nŭxŭ cuxŭnŭxŭcēx i naga. ¹⁵ –Erŭ cuma tá nixŭ i guxŭ i duŭxŭgŭmaā nŭxŭ quixuchigaxŭ ga űnuxācŭ na Tupanaxŭ cudauxŭ rŭ cumaā yadexaxŭ. ¹⁶ –ŭRŭ űnuxma rŭ marŭ taxuŭma űcunanguxēē! ŭRŭ űrŭda rŭ űnabaie! ŭRŭ Cori ya Ngechuchuegagu naxcēx űnaca na cuxŭ nŭxŭ nangechaŭxŭcēx i curŭ pecadugŭ!” űnaxarŭrŭ choxŭ.

Pauru nŭxŭ nixu na űnuxācŭ Tupana namuxŭ na yema tama Yudŭgŭ űxŭgŭxŭtanŭwa naxŭxŭcēx

¹⁷⁻¹⁸ –Rŭ yexguma Yerucharēŭcēx chataeguxgu, rŭ tupauca ga taxŭnewa chaxŭ na yēma chayumŭxŭcēx. Rŭ changoxetŭ, rŭ nŭxŭ chadau ga Cori ya Tupana. Rŭ űnaxarŭrŭ choxŭ:

“ŭNapaxaāē, rŭ inaxŭāchi i nuā Yerucharēŭwa, erŭ duŭxŭgŭ rŭ tāŭtāma naga naxŭnŭē i ngēma ore i chauchiga nŭxŭ quixuxŭ!” űnaxarŭrŭ. ¹⁹ –Rŭ choma chanangāxŭ, rŭ űnaxarŭgŭ:

“Pa Corix, nŭma i duŭxŭgŭ rŭ nŭxŭ nacuēxgŭ ga choma na yīxŭ ga guxŭne ga ngutaquēxepataŭgŭwa chaxŭxŭ rŭ űchanayauxŭxŭ rŭ chanapoxcuexŭ rŭ

chayaꝓaixgũxũ ga yema cuxũ yaxõgũxũ. ²⁰ –Rũ yexguma yamèxgũãgu ga guma curũ duũcũ ga Etébaũ ga curũ orearũ uruũ, rũ chomatama yéma chayexma, rũ chorũ me nixĩ ga na yamèxgũãxũ. Rũ choma nixĩ ga nũxna chadauxũ ga naxchiru ga yema yamèxgũxũ”, ñacharũgũ nũxũ. ²¹ –Natürũ nũma ga Cori rũ ñanagürũ choxũ:

“¡Rũ paxa cugũ namexẽẽ rũ inaxũãchi! Erũ yaxũguxũ i nachiũãnegũwa i ngẽma duũxũgũ i tama Yudĩgũ ixĩgũxũtanũwa tá cuxũ chamu” –ñanagürũ.

Churaragüarũ ãëxgacũmëxëwa nayexma ga Pauru

²² Rũ yexguma Pauru yema ñaxgu rũ yexma nayacuèxẽẽgũ ga na meã nũxũ inaxĩnũxũ ga yema duũxũgũ. Rũ yexguma aita naxüeãcũma ñanagürũgũ: –¡Noxtacũma peyamá! Rũ name nixĩ i na nayuxũ rũ ngẽxma na yanaxoxũ –ñanagürũgũ. ²³ Rũ yexguma aita naxüegu, rũ norũ gáuxũchirumaã nibu-atanücüü, rũ ãtëxeanexũ daxũ niwogũtanücüü. ²⁴ Rũ yexguma yemaxũ nadëuxgu ga churaragüarũ ãëxgacũ, rũ nanamu ga churaragũpatagu na yamucuchigũãxũcèx ga Pauru. Rũ nanamu na poraãcü naꝓaiaxgũãxũcèx na yadexaxũcèx na nũxũ nacuáxũcèx ga tũxcüũ yĩxũ na yemaãcü nachigamaã aita naxüexũ ga duũxũgũ. ²⁵ Rũ yexguma marũ yanëixgũãgu na naꝓaiaxgũãxũcèx, rũ Pauru nũxna naca ga yema capitáũ ga yéma yexmaxũ, rũ ñanagürũ: –¿Éxna pexmëxwa nangëxma na penaꝓaiaxixũ i wũxi i Dumacũãx ega tama nũxna pecaxiragu? –ñanagürũ. ²⁶ Rũ yexguma yemaxũ naxĩnũgu ga capitáũ, rũ guma churaragüarũ ãëxgacũxũtawa naxũ, rũ namaã nũxũ nixu, rũ ñanagürũ: –¿Tacu tá cuxũ? Erũ ñaã yatũ rũ Dumacũãx nixĩ –ñanagürũ. ²⁷ Rũ yexguma ga guma churaragüarũ ãëxgacũ, rũ Paurucèx nixũ, rũ nũxna naca rũ ñanagürũ nũxũ: –¿Aixcũma yĩxũ na Dumacũãx quiĩxũ i cumax? –ñanagürũ. Rũ nũma ga Pauru nanangãxũ, rũ: –Ngũ –ñanagürũ. ²⁸ Rũ yexguma ga guma churaragüarũ ãëxgacũ rũ nanangãxũ, rũ ñanagürũ: –Choma rũ poraãcü choxũ naxãtanũ na Dumacũãx chaugũ chixĩxẽẽxũ –ñanagürũ. Rũ yexguma nachonagũ ga Pauru, rũ ñanagürũ: –Natürũ i choma rũ woetama chorũ bucũma Dumacũãx chixĩ –ñanagürũ. ²⁹ Rũ yexgumatama nũxna nixĩgachi ga yema Pauruxũ ꝓaiaxgũchaũxũ. Rũ nũmatama ga yema churaragüarũ ãëxgacũ rũ ta namuũ ga yexguma nũxũ nacuèxgu ga Dumacũãx na yĩxũ ga Pauru, yerũ marũ cadenamaã nayanëixchirëx.

Yudĩgüarũ ãëxgacũgũtũcumüpëxëwa nayexma ga Pauru

³⁰ Rũ yema churaragüarũ ãëxgacũ meãma nũxũ nacuáxchaũ ga tũxcüũ na ínaxuaxũgũãxũ ga yema Yudĩgũ. Rũ yemacèx ga moxũãcü rũ nanamu na nangutaquëxegũxũcèx ga paigüarũ ãëxgacũgũ rũ guxũma ga yema ãëxgacũgũtũcumũ ga Yudĩgüarũ. Rũ nayawëgũ ga Pauruarũ cadena rũ yéma ãëxgacũgũpëxëwa nanagagũ.

23

¹ Rũ Pauru meãma nũxũ nadawenũ ga yema ãëxgacũgũ, rũ ñanagürũ nũxũ: –Pa Chautanũxũgũx, chomatama nũxũ chacuèx rũ guxũguma meã chamaxũ ga Tupanapëxëwa ñũxmata ñoma i ngunexũwa nangu –ñanagürũ. ² Rũ yexguma ga yema paigüeru ga Ananiã rũ nanamu ga yema Pauruarũ ngaicamana yexmagũxũ na naãxwa tayamèxgũxũcèx. ³ Rũ yexguma ga Pauru rũ ñanagürũ nũxũ: –Tupana tá cuxũ napéax, Pa ãëxgacũx. Cuma rũ düxëtũwaxica cume natürũ aixepena rũ nachixe i curũ maxũ. Rũ ñũxma rũ ngema curũto na Moĩché ümatũxũ i mugũ nũxũ ixuxũãcũma choxna cuꝓaxũcèx. Natürũ wũxi i chixexũ cuxũ erũ cumatama rũ tama naga cuxĩnũ i ngẽma Tupana tũxũ muxũ erũ cunamu na choxũ napéaxũcèx –ñanagürũ

ga Pauru. ⁴ Rū yexguma ga yema yexmagüxü rü ñanagürügü: —¿Tüxcüü i ngēmaācū tacü namaā quixugüxü i paigüeru ya Tupana nüxü unetacü? — ñanagürügü. ⁵ Rū Pauru nanangāxü, rü ñanagürü: —Tama nüxü chacuèx, Pa Chautanüxügüx, na paigüeru yüxü. Erü Tupanaärü ore i ümatüxüwa nüxü tadau rü ñanagürü:

“¡Tama curü ãëxgacümaā chixexü quixugü!”

ñanagürü. ⁶ Rū yexguma nüxü nacuèxgu ga Pauru ga na Chaduchéugü yüxü ga togü, rü na Parichéugü yüxü ga togü, rü yema ãëxgacügüpëxewa tagaācüma ñanagürü: —Pa Chautanüxügüx, choma rü Parichéu chixü, rü Parichéu nane chixü. Rū ngēmacèx choxna pecagü i ñuxmax, erü chayaxō i wena tá na namaxèxü i yuexü —ñanagürü. ⁷ Rū yexguma yema ñaxgu ga Pauru, rü yema Parichéugü rü Chaduchéugü rü inanaxügüe ga nügümaā na iyaporagaexü, rü yexma nügü nitoye ga yema ngutaquëxewa. ⁸ Erü ngēma Chaduchéugü nagu rüxñüëgu rü tama wena namaxè i ngēma yuexü, rü nataxuma i orearü ngeruügu i daxüçüãx, rü nataxuma i naāëgü —ñanagürügü. Natürü ngēma Parichéugü rü nayaxōgü na nangëxmaxü i guxüma i ngēma. ⁹ Rū yemacèx guxüma aita naxüe. Rū ñuxüchi ñuxre ga ngüexëëruügu ga Moïchéarü mugüwa ngüxëëtaegüxü ga Parichéugütücümüwa ügüxü rü inachigü, rü ñanagürügü: —Toxcèx rü taxuüma i chixexü naxü i ñaā yatü. Bexmana wüxi i tacü rü naāë namaā nidexa rü ëxna wüxi i orearü ngeruü i daxüçüãx —ñanagürügü. ¹⁰ Rū yexeraācü norü numaā nanaxixächiaëgü ga yema duüxügü. Rū yemacèx naxoegaāë ga guma churaragüarü ãëxgacü ga na Paurugu nagaugügüchaüxü. Rū norü churaragüxü namu na yéma duüxügütanüwa Pauruxü napugüxüçèx rü wena churaragüpatawa na nagagüãxüçèx. ¹¹ Rū moxüãcüarü chütaxügu Paurucèx nangox ga Cori ga Tupana, rü ñanagürü nüxü: —¡Rü nataāë! Rū ngëxgumarüü i núma Yerucharéüwa choxü na quixuchigaxü, rü ngëxgumarüü tá ta nixü i Dumawa na choxü quixuchigaxü —ñanagürü ga Tupana.

Yudügu naxcèx nadaugü na ñuxäcü Pauruxü yamèxgüchaüxü

¹² Rū moxüãcü, rü ñuxre ga Yudügu rü nügümaā inaxunetagu ga täütáma na nachibüexü rü naxaxegüxü ñuxmatáta Pauruxü yamèxgü. Rü ñanagürügü: —Tachixexüguü tá ega tacü ingōxgügu naxüpa na yamáxü i Pauru —ñanagürügü. ¹³ Rū 40 arü yexera ga yatügü nixü ga yema nügümaā ixunetagüxü. ¹⁴ Rū paigüarü ãëxgacügütanüwa rü Yudüguarü ãëxgacügügütanüwa naxü, rü ñanagürügü nüxü: —Marü togümaā itaxuneta rü tachixexüguü tá ega tacü tangōxgügu naxüpa na tayamáxü i Pauru. ¹⁵ Rū name nixü i pema rü ngēma togü i pexrüü ãëxgacügütücümüwa ügüxü, rü churaragüarü ãëxgacüna naxcèx peyacagü i ñuxma na moxü wena pepëxewa nagagüãxüçèx i Pauru. ¡Rü namaā nüxü pixu na penaxwèxegünetaxü na meā nüxü pecuáxchaüxü i nachiga! Rü toma rü tá marü ítamemare na namagu tayamáxüçèx naxüpa na ínanguxü —ñanagürügü. ¹⁶ Natürü ngīne ga Paurueyèx rü nüxü nacuáchiga ga Pauruxü na yamèxgüchaüxü, rü yemacèx churaragüpatawa naxü na Paurumaā nüxü yanaxuxüçèx. ¹⁷ Rū Pauru naxcèx naca ga wüxi ga capitáü, rü ñanagürü nüxü: —¡Curü ãëxgacüxütawa naga i ñaā ngextüxüxü, erü nüxü nangëxma i ore i namaā nüxü yaxuxchaüxü! —ñanagürü. ¹⁸ Rū yema capitáü rü ãëxgacüxütawa nanaga ga yema ngextüxüxü. Rü ñanagürü nüxü: —Ngēma poxcuxü i Pauru rü chauxcèx naca, rü choxna naca na nuā cuxütawa chanagaxüçèx i ñaā ngextüxüxü, erü nüxü nangëxma i ore i cumaā nüxü yaxuxchaüxü —ñanagürü. ¹⁹ Rū naxmëxgu yayauxächiaçüma toxnamana nanaga ga ãëxgacü, rü yéma nüxna naca rü ñanagürü: —¿Tacü yüxü i ngēma chomaā nüxü quixuxchaüxü? —ñanagürü. ²⁰ Rū núma ga ngextüxüxü nanangāxü, rü ñanagürü: —Ngēma Yudügu, rü nügümaā inaxunetagu na

cuxna naxcèx nacagüxcèx na moxü Yudiügüarü ãëxgacügütücümüpëxewa na cunagaxücèx i Pauru. Rü tá cumaã nüxü nixugü na meã nüxü nacuèxgüchaüxü i nachiga. ²¹ —¡Natürü täütáma nüxü cuyaxõ! Erü 40 arü yexera i yatügü rü marü nügümaã inaxunetagu, rü ñanagürügü:

“Tachixexügügü tá ega tacü ingõxgügu rü ëxna ixaxegügu naxüpa na yamáxü i Pauru”, ñanagürügü. Rü ñuxma rü marü ínamemare, rü namagu nananèixgü, rü curü orexicatama nixí i ñuxma ínanguxëëgüxü —ñanagürü. ²² Rü yexguma ga ãëxgacü rü ínayamu ga yema ngextüxüxü, rü nüxna naxãga na taxúemaã nüxü yaxuxücèx ga na namaã nüxü yaxuxü ga yemachiga.

Ãëxgacü ga Perixütawa Pauruxü namu

²³ Rü yexguma ga guma ãëxgacü rü taxre ga norü capitáüxcèx naca, rü ñanagürü nüxü: —¡Penamexëë i 200 i churaragü i nacutümaãmare ixíxü, rü 70 i churaragü i cowarutagu íxü, rü 200 i churaragü i wocaxemaã ixãxnexü na 9 arü oragu i chütacü Checharéawa naxíxcèx! ²⁴ —¡Rü ngëxgumarüü ta penamexëë i ñuxre i cowarugü i Paurucèx na tórü ãëxgacü i Perixütawa naxüxcèx rü na taxuüma nüxü üpetüxcèx i namawa! —ñanagürü. ²⁵ Rü yema capitáügümaã yéma nanamu ga wüxi ga popera ga ñaxü:

²⁶ “Choma i Cláudiu Díchiu, rü cuxü charümoxë Pa ãëxgacü ya Mecüxüchi Pa Perix. ²⁷ Rü yima yatü ya cuxcèx ngëma chanamucü, rü Yudiügü nayayauxgü rü wixguxüchi taèx nayamëxgü. Natürü yexguma nüxü chacuáchigagu na Dumacüãx na yíxü, rü yéma chaxü chorü churaragümaã, rü nüxna chanapu. ²⁸ Rü nüxü chacuáxchaü ga tacü ga chixexümaã na ínaxuaxügüãxü, rü yemacèx Yudiügüarü ãëxgacügütücümüpëxewa chanaga. ²⁹ Rü yexguma nüxü chacuèx ga na Yudiügüarü muchigacèxmare na ínaxuaxügüãxü. Natürü taxuüma ga chixexü naxü na tüxcüü yamáxcèx rü napoxcuxücèx. ³⁰ Natürü yexguma nüxü chacuáchigagu ga na nügümaã inaxunetaxü ga Yudiügü ga na yamëxgüãxücèx, rü yexgumatama nagu charüxínü na cuxütawa chanamuxü. Rü yema ínaxuaxügüxü, rü namaã tá nüxü chixu na cuxütawa naxíxü rü cumaã nüxü na yanaxugüxcèx na tacücèx ínaxuaxügüãxü”,

ñanagürü. ³¹ Rü yema chütaxügu inaxíãchi ga yema churaragü, yexgumarüü ga norü ãëxgacü na namuxürüü. Rü Pauruxü nigagü ñuxmata Aütípatiwa nangugü. ³² Rü moxüãcü rü nawoegu ga yema churaragü ga nacutümaãmare ixíxü rü naxpataüwa naxí. Rü yema churaragü ga cowarutagu íxü, rü Paurumaã inaxíãma. ³³ Rü yexguma Checharéawa nangugügu, rü ãëxgacü ga Perina nanaxã ga yema popera, rü Pauruxü rü ta inamugü. ³⁴ Rü yexguma nüxü nadaumatügu ga popera ga ãëxgacü ga Peri, rü Pauruna naca ga ngextácüãx na yíxü. Rü yexguma nüxü nacuèxgu ga na Chiríchiaanecüãx yíxü, rü ñanagürü nüxü: ³⁵ —Cuxü tá icharüxínü i ngëxguma ínangugügu i ngëma cuxü íxuaxügüxü —ñanagürü. Rü yexguma nanamu ga churaragü na wüxi ga ucapu ga ãëxgacü ga Erodepatawa yexmaxüwa nüxna na nadaugüxcèx.

24

Pauru rü ãëxgacü ga Peripëxewa nügüétüwa nidexa

¹ Rü wüximëëxpüx ga ngunexü ngupetügu, rü Yerucharéüwa ne naxü ga paigüeru ga Ananíã, namaã ga ñuxre ga Yudiügüarü ãëxgacügüerugü rü wüxi ga yatü ga meãma dexaxü cuáxü ga Téturu ga naega. Rü nümagü rü ãëxgacü ga Perixütawa naxí na namaã nüxü yanaxugüxcèx ga tüxcüü Pauruxü na

ínaxuaxŭgŭxŭ. ² Rŭ yexguma Pauruxŭ yéma nagagŭgu, rŭ inanaxŭgŭ ga Téturu ga nŭxŭ na yaxuxŭ, rŭ ñanagŭrŭ:

—Moxēxŭchima i cuma Pa Āēxgacŭ Pa Perix, erŭ cugagu nixī i meāma toxŭ naxŭpetŭxŭ i nuā. Rŭ cugagu nixī i nuā i ñoma i nachiuñānewa na toxŭ nangēxmaxŭ i muxŭma i mexŭgŭ. ³ Rŭ moxē cuxna taxā erŭ guxŭwama rŭ guxŭguma cuxŭtawata tanayauxgŭ i guxŭma i ngēma mexŭgŭ Pa Āēxgacŭxŭchima, Pa Perix. ⁴ Natŭrŭ tama yexeraācŭ cuxŭ chachixewechaŭ. Rŭ ngēmacēx cuxna chaca na paxaāchi meā toxŭ icurŭxŭnŭxŭ. ⁵ Rŭ ñuxma rŭ wŭxi i orexŭ cumaā chixuxchaŭ. Rŭ marŭ nŭxŭ tadau i ñāā yatŭ rŭ wŭxi i daaweanerŭŭ na yīxŭ, erŭ chixexŭmaā nayaxucuxēgŭ i Yudŭgŭ i guxŭ i naānewa na nŭgŭ yatoyexŭcēx. Rŭ nŭma nixī i norŭ āēxgacŭ i ngēma duŭxŭgŭ i nŭxŭ yaxŭgŭxŭ i Ngechuchu i Nacharētucŭāx. ⁶ Rŭ toma tayayauxgŭ i ñāā yatŭ ga yexguma tupauca ga taxŭne naxŭxaxēēchaŭgu. Rŭ torŭ mugŭ tomaā nŭxŭ ixuxŭācŭma nŭxna tacagŭchaŭ. ⁷ Natŭrŭ ínangu ga churaragŭarŭ āēxgacŭ ga Díchiu, rŭ muxŭma ga norŭ churaragŭmaā toxna nanapu. Rŭ toma i ínaxuaxŭgŭxe, rŭ toxŭ namu na cuxŭtawata taxŭxŭcēx. ⁸ Rŭ ñuxma rŭ marŭ name i cumatama nŭxna cuca i ngēma Pauru na nŭxŭ cucuáxŭcēx na aixcŭma yīxŭ i guxŭma i ngēma naxcēx ítanaxuaxŭgŭxŭ i tomax —ñanagŭrŭ. ⁹ Rŭ yema togŭ ga Yudŭgŭ rŭ ta, rŭ ñanagŭrŭgŭ: —Rŭ aixcŭma nixī i ngēma ore —ñanagŭrŭgŭ. ¹⁰ Rŭ yexguma ga guma āēxgacŭ ga Peri rŭ naxmēxmaā Pauruxŭ naxuneta na yadexaxŭcēx. Rŭ yexguma ga Pauru, rŭ ñanagŭrŭ: —Chorŭ taāēmaā cupēxewa chaugŭcēx chidexa, erŭ nŭxŭ chacuēx na mucŭma ga taunecŭ ñoma i nachiuñāneārŭ āēxgacŭ quiŭxŭ. ¹¹ Marŭ name i cumatama naxcēx ícuca, erŭ ¹² i ngunexŭxŭcatama nangupetŭ ga na Yerucharēŭwa changuxŭ na Tupanaxŭ chayaruēxŭxŭcēx. ¹² Rŭ bai ga tupauca ga taxŭnewa, rŭ bai ga ngutaquēxepataŭgŭwa, rŭ bai ga ngŭrŭanewamare ga ñānewa choxŭ nadaugŭ ga Yudŭgŭ ga na texémaā íchiporagacŭxŭ, rŭ na chananuēxēxŭ ga duŭxŭgŭ. ¹³ Rŭ ñuxma i ñāā duŭxŭgŭ i choxŭ íxuaxŭgŭxŭ, rŭ bai i wŭxiwaxŭra cuxcēx nanangoxēēgŭ na aixcŭma yīxŭ i ngēma naxcēx choxŭ ínaxuaxŭgŭxŭ. ¹⁴ Natŭrŭ cumaā nŭxŭ chixu, rŭ nuxcŭmaŭgŭxŭ ga chorŭ oxigŭarŭ Tupanaāxŭ nixī i chapuracŭxŭ ngēxgumarŭŭ i choxŭ na nanaxwēxexŭ ya Ngechuchu ya Cristu ya nŭxŭ chayaxŭcŭ. Rŭ ngēma nixī i nŭmagŭ i Yudŭgŭ naxugŭāgu rŭ na:

“Tomare i ore”, ñagŭxŭ. Rŭ aixcŭma nŭxŭ chayaxŭ i guxŭma i Tupanaārŭ mugŭ ga Moīché ŭmatŭxŭ rŭ guxŭma i Tupanaārŭ ore ga nuxcŭmaŭgŭxŭ ga norŭ orearŭ uruŭgŭ ŭmatŭgŭxŭ. ¹⁵ Rŭ choma rŭ ta yema nuxcŭmaŭgŭxŭrŭŭ Tupanaāxŭ chayaxŭ. Rŭ naxrŭŭ chayaxŭ rŭ tá wena na namaxēxŭ i ngēma yuexŭ i mexŭgŭ rŭ chixexŭgŭ. ¹⁶ Rŭ ngēmacēx nixī i guxŭguma meā chaugŭna chadauxŭ na chauāēwatama nŭxŭ chacuáxŭcēx na chamexŭ i Tupanapēxewa rŭ duŭxŭgŭpēxewa. ¹⁷ Rŭ dŭcax, Pa Āēxgacŭx, rŭ ñuxre ga taunecŭ togŭ ga nachiuñānegu chixŭgŭ, rŭ dŭxwaxarŭ chauchiñānecēx wena chataegu na nuā chanangexŭcēx ga díeru ga namaā nŭxŭ charŭngŭxēēchaŭxŭ i chautanŭxŭgŭ i Yudŭgŭ i nŭxŭ nataxuxŭ, rŭ nuā Tupanana chanaxāxŭcēx i chorŭ āmaregŭ. ¹⁸⁻¹⁹ Rŭ yema ngunexŭgu rŭ tupauca ya taxŭnewa Tupanana íchanaxā ga chorŭ āmaregŭ, nawena na chaugŭ chamexēēxŭ ga Tupanapēxewa. Rŭ tama muxŭ ga duŭxŭgŭmaā chayexma, rŭ tama chananuēxēē ga duŭxŭgŭ ga yexguma ñuxre ga Yudŭgŭ ga Áchiaanecŭāx choxŭ daugŭgu ga yéma tupauca ya taxŭnewa. Rŭ ngēmagŭ chi nixī i ñuxma nuā íxŭ na choxŭ ínaxuaxŭgŭxŭcēx ega tacŭ nŭxŭ ngēxmagu i chauchiga. ²⁰ Rŭ ngēxguma tama tacŭ nŭxŭ ngēxmagu ga yema tupauca ya taxŭnewa choxŭ daugŭxŭ, jrŭ ēcŭ ñāā ñuxma nuxmagŭxŭ cumaā nŭxŭ

ixugü na tacü ga chixexüxü chowa nadaugüxü ga yexguma Yudíugüarü äëxgacügütücumüpëxewa chayexmagu! ²¹ Rü ñaxüxĩcatama nixĩ ga chorü ore ga tagaãcü namaã chachonagüxü ga yexguma yema äëxgacügüpëxewa chayexmagu:

“Rü ñuxma rü choxna pecagü erü choma chayaxõ i wena tá na namaxëxü i yuexü”, ñacharügü ga yexguma —ñanagürü ga Pauru. ²² Natürü ga Peri rü meã nüxü nacuëx ga yema Cristuaxü yaxõchiga. Rü yemacëx ga yexguma Pauruaru orexü naxĩnügu, rü ínayachaxãchi ga na nüxna naçaxü, rü ñanagürü Yudíugüxü: —Ngëxguma churaragüarü äëxgacü ya Díchiu núma üxgu, rü tá meãma nüxü chacuëx i ngëma naxcëx ípenaxuaxüxü —ñanagürü. ²³ Rü yexguma ga Peri rü norü capitáüxü namu ga na Pauruna nadauxüçëx. Natürü tama nanapoxcuxüchi, rü tama nanachuxu ga na naxütagu naxĩãneãxü ga namücügü, rü nüxü na nangüxëëgüxü. ²⁴ Rü ñuxre ga ngunexü marü ngupetügu rü wena yéma naxü ga Peri ngĩmaã ga naxmëx ga Drusíla ga Yudíu ixĩcü. Rü Paurucëx nayacaxëë, rü nüxü naxĩnü ga yema ore ga Pauru namaã nüxü ixuxü ga Cristuaxü na yaxõxüchiga. ²⁵ Natürü yexguma Pauru meãma namaã nüxü ixuxgu na ñuxãcü Tupana naxwëxexü na meã imaxüxü rü ñuxãcü nanaxwëxexü na tórü maxümaã meã icuáxü rü ñuxãcü tá tüxna naçaxü i tórü maxüchiga, rü poraãcü nabaixãchiãë ga Peri. Rü düxwa ñanagürü nüxü: —Ëcü íixü i ñuxmax! Rü ngëxguma ñuxguacü icharüxãüxmaregu, rü wena táxarü cuxcëx changema —ñanagürü. ²⁶ Yerü Peri ínananguxëë na Pauru chi dīeru nüxna ixãxü na yangéãxüçëx, rü yemacëx muëxpüxcüna naxcëx nangemaxü, rü namaã nidexaxü. ²⁷ Rü taxre ga taunecü yemaãcü nixĩgü. Rü ínanguxuchi ga Peri ga na äëxgacü yĩxü, rü nachicüü ningucuchi ga Pórchiu ga Festu. Natürü nüma ga Peri, rü Yudíugümaã nügü namecümamaxëëchaü, rü yemacëx tama ínananguxuchixëë ga Pauru.

25

Äëxgacü ga Festupëxewa nayexma ga Pauru

¹ Rü Checharéawa nangu ga Festu na yéma äëxgacüxü yaxücuxüçëx. Rü marü tomaëxpüx ga ngunexü yéma nayexmagu, rü wenaxãrü inaxüãchi, rü Yerucharéüwa naxü. ² Rü yéma Yerucharéüwa rü yema paigüarü äëxgacügü rü Yudíugüarü äëxgacügü rü Pauruxü ínaxuaxügü Festupëxewa. ³ Rü naxcëx ínacagü ga Yerucharéüwa Pauruxü na namuxüçëx. Yerü nümagü rü nagu narüxĩnüë na namagu yacuxëügüãxü na yexma yamëxgüãxüçëx. ⁴ Natürü ga Festu rü nanangãxü, rü ñanagürü: —Checharéagu napoxcu i Pauru, rü choma rü tá paxa ngëma Checharéawa chaxü. ⁵ Rü ngëmacëx name nixĩ i perü äëxgacügü rü chowe narüxĩ i Checharéawa, rü ngëxguma tacü rü chixexü naxüxgu i ngëma yatü, rü ngëma tá nixĩ i chomaã nüxü pixugüxü —ñanagürü. ⁶ Rü maneca 8 rü ëxna 10 ga ngunexü Yerucharéüwa nayexma ga Festu, rü ñuxüchi Checharécëx nataegu. Rü yexguma ínanguxguarü moxüãcü rü yema nachica ga ngextá duüxügüna ínaçaxüwa naxü, rü yéma nayarüto norü tochicaxüwa. Rü Paurucëx nangema na yéma napëxewa nagagüãxüçëx. ⁷ Rü yexguma yexma yaxücuxgu ga Pauru, rü yema Yudíugü ga Yerucharéüwa ne íxü, rü naxcëx naxĩ. Rü muxüma ga chixexügümaã ínaxuaxügü. Natürü taxuwama nüxü nüxü nadauxëë na aixcüma yĩxü rü yema naxcëx ínaxuaxügüãxü. ⁸ Rü yexguma ga Pauru rü nanangãxü, rü ñanagürü: —Pa Äëxgacüx, taxuüma ga chixexü namaã chixugü ga yema mugü ga Moíché ümatüxü, rü bai ga tupauca ya taxünemaã, rü bai ga äëxgacü ya Chécharumaã —ñanagürü. ⁹ Natürü nüma ga Festu rü Yudíugümaã

nügü namecūmaxēēchaŭ, rü yemacèx Pauruna naca, rü ñanagürü nüxŭ: — ¿Cunaxwèxexŭ na Yerucharéŭwa cuxŭxŭ na ngema cuxna chaçaxŭcèx naxcèx i guxŭma i ngēma naxcèx cuxŭ ínaxuaxŭgŭxŭ? —ñanagürü. ¹⁰ Rü yexguma ga Pauru rü nanangāxŭ, rü ñanagürü: —Choma rü cupèxewa changèxma na choxna cuçaxŭcèx, erü cuma nixŭ i cuxŭ naxunetaxŭ i ãèxgacŭ ya tacŭ ya Chécharu na ãèxgacŭ quiŭxŭ i núma. Rü ngēmacèx chanaxwèxe i nuã choxna cuca. Erü taxuŭma i chixexŭ chaxŭ i Yudíugŭmaã, ngèxgumarŭŭ i cuma meãma nüxŭ cucuèx. ¹¹ Ngèxguma chi tacŭ i chixexŭ chaxŭxgu rü marü name na naxcèx choxŭ yamèxgŭxŭ, rü marü name i na chayuxŭ. Natürü ngèxguma nataxŭxguma i tacŭ i aixcūma ixŭxŭ i ngēma naxcèx choxŭ ínaxuaxŭgŭxŭ, rü taxuacūma texé Yudíugŭna choxŭ tamu. Rü naxcèx íchaca na nūmatama ya ãèxgacŭ ya tacŭ ya Chécharu choxna naçaxŭcèx —ñanagürü ga Pauru. ¹² Rü yexguma ga Festu rü norü ucuxèruŭgŭ ga ãèxgacŭgŭmaã nidexa, rü ñuxŭchi ñanagürü Pauruxŭ: —Marü naxcèx ícuca na ãèxgacŭ ya tacŭ ya Chécharu cuxna çaxŭcèx. Ècü, ñuxma rü naxŭtawa tá cuxŭ chamu —ñanagürü.

Ãèxgacŭ ga Agripapèxewa nayexma ga Pauru

¹³ Rü ñuxre ga ngunexŭ ngupetügu, rü Checharéawa nangugŭ ga Yudíugŭarŭ ãèxgacŭ ga Agripa rü naëyèx ga Bereniche, na Festuxŭ yanamoxègŭxŭcèx. ¹⁴ Rü marü ñuxre ga ngunexŭ yéma nayexmagügu, rü Agripamaã nüxŭ nixu ga Festu ga Pauruchiga, rü ñanagürü: —Nuã nangèxma i wŭxi i yatŭ i poxcuxŭ ga Peri tama ínguxuchixèèxŭ. ¹⁵ —Rü yexguma choma Yerucharéŭwa chayexmagu, rü paigŭarŭ ãèxgacŭgŭ rü Yudíugŭarŭ ãèxgacŭgŭerugŭ rü inanaxuaxŭgŭ, rü naxcèx ínacagŭ na namaã chanaxueguxŭcèx rü na yamèxgŭãxŭcèx. ¹⁶ —Rü choma chanangāxŭ, rü tama tocūma nixŭ i toma i Dumacŭãxgŭ i na tayamáxŭ i wŭxi i duŭxŭ ega tama nügüétüwa yadexaxíragu napèxewa i ngēma ínaxuaxŭgŭxŭ. ¹⁷ —Rü yemacèx ga yexguma núma nangugŭgu ga yema Yudíugŭ, rü yexgumaarŭ moxŭãcü rü chorŭ tochicaxŭwa chitocuchi na nüxna chaçaxŭcèx nachiga ga yema, rü yéma naxcèx changema ga yema yatŭ. ¹⁸ —Natürü ga yema Yudíugŭ ga ínaxuaxŭgŭxŭ, rü taxuŭma ga tacŭ ga chixexŭ ga choma íchananguxèèxŭxŭ nixugŭ. ¹⁹ —Natürü norü Tupanachiga rü wŭxi ga yatŭ ga Ngechuchuchiga nixŭ ga yema nagu yadexagŭxŭ. Rü nüma ga Yudíugŭ nüxŭ nixugŭ ga na nayuxŭ ga yema Ngechuchu, natürü Pauru nüxŭ ixuxgu rü marü wena namaxŭ. ²⁰ —Rü yexguma ga choma ga tama na nüxŭ chacuáxŭ ga ñuxãcü tá chanamexèèxŭ ga yema guxchaxŭ, rü yemacèx nüxna chaca ga Pauru ngoxi nanaxwèxe ga Yerucharéŭwa na naxŭxŭ, na yéma nüxna chaçaxŭcèx. ²¹ —Natürü nüma ga Pauru naxcèx ínaca ga na ãèxgacŭ ya tacŭ ya Chécharupèxewa naxŭxŭ na nūmatama ya Chécharu nüxna çaxŭcèx. Rü yemacèx chanamu na meã nüxna nadaugŭxŭcèx ñuxmata choma ãèxgacŭ ya Chécharuxŭtawa chanamux —ñanagürü. ²² Rü yexguma ga Agripa rü ñanagürü Festuxŭ: —Choma rü ta nüxŭ chaxŭnŭchaŭ i norü ore i ngēma yatŭ —ñanagürü. Rü Festu nanangāxŭ rü ñanagürü: —Moxŭ tátama nüxŭ cuxŭnŭ —ñanagürü. ²³ Rü moxŭãcü yema ucapu ga ãèxgacŭgŭ íngutaquèxegŭxŭwa nangugŭ ga Agripa rü Bereniche rü poraãcü nangèxãègŭ. Rü namaã ínangugŭ ta ga churaragŭarŭ ãèxgacŭgŭ rü yema íañecŭãxgŭ ga corigŭxŭchi ixŭgŭxŭ. Rü ñuxŭchi Paurucèx nangema ga Festu na yema ãèxgacŭgŭpèxewa nagagŭãxŭcèx. ²⁴ Rü ñanagürü ga Festu: —Pa ãèxgacŭ Pa Agripax, rü Pa Guxãma i Pema ya Nuxmagŭxe, ñaã nixŭ i ngēma yatŭ i nachigamaã yadexagŭxŭ i guxŭma i Yudíugŭ. Rü chopèxewa ínanaxuaxŭgŭ ga Yerucharéŭwa rü núma rü ta. Rü guxŭguma tagaãcüma choxna naxcèx nacagŭ na nayuxŭ. ²⁵ —Natürü i choma rü

taxuŭma i tacü i chixexŭ i naxüxŭ nawa chadau na naxcèx yamáxŭ. Natürü nüma ga Pauru rü naxcèx ínaca na ãëxgacü ya tacü ya Chécharu nüxna çaxŭ, rü ngëmacèx nagu charüxînü na ngema chanamuxŭ. ²⁶ —Natürü taxuŭma i ore i aixcüma ixîxŭ i nachiga choxŭ nangëxma na chorü ãëxgacü ya Chécharucèx chanaxümatüxücèx. Rü ngëmacèx chanamu na nuã pepëxewa nagagüãxücèx, rü cuxcèx türü nixî, Pa ãëxgacü Pa Agripax, na nüxna cuçaxücèx, na nüxŭ chacuáxücèx i tacü tá na chaxümatüxŭ naxcèx ya ãëxgacü ya Chécharu. ²⁷ —Erü chauxcèx rü tama name na ngextá namuxŭ i wüxi i poxcuxŭ ega tama naxümatüxíragu nachiga na tacücèx ínaxuaxŭgüãxŭ.

26

Pauru rü ãëxgacü ga Agripapëxewa nügüétüwa nidexa

¹ Rü yexguma ga Agripa rü ñanagürü Pauruxŭ: —Marü name i ñuxma i cugüétüwa quidexa —ñanagürü. Rü yexguma naxunagümëxë ga Pauru, rü inanaxügü ga nügüétüwa na yadexaxŭ, rü ñanagürü: ² —Chataãë, Pa ãëxgacü Pa Agripax, erü cupëxewa chidexa i ñuxma na chaugüétüwa chachogüxücèx i guxŭma i ngëma choxŭ na ínaxuaxŭgüxŭ i ngëma chautanüxŭ i Yudíugü. ³ —Rü yexeraãcü chataãë erü cuma nüxŭ cucuèx i guxŭma i tocüma i toma i Yudíugü, rü guxŭma i Moïché ümatüxŭ i mugü i naxcèx yadexagüxŭ i chautanüxŭgü. Rü ngëmacèx cuxna chaca na meã choxŭ icurüxînüxücèx.

Pauruarü maxŭ naxŭpa ga Ngechuchuaxŭ na yaxõõxŭ

⁴ —Rü guxŭma i ngëma chautanüxŭgü i Yudíugü rü nüxŭ nacuèxgü ga ñuxãcü na chamaxüxŭ ga natanüwa ga chauchiüãnewa rü Yerucharéüwa ga yexguma changextüxüüragu. ⁵ —Rü ngëxguma chauchigaxŭ yaxugüechaügu, rü nüma nüxŭ nacuèxgü ga choma rü woetama Parichéu na chiixŭ. Rü toma i Yudíugü i Parichéugü na tixígüxŭ, rü toma nixî i guxŭma i totanüxŭ i Yudíugüarü yexera na poraãcü tanaxaurexŭ i ngëma tocüma. ⁶ —Rü ñuxma i ngëma chautanüxŭgü i Yudíugü rü nuã pepëxewa choxŭ nagagü erü chayaxõ na Cristugagu nangëxmaxŭ i maxŭ i taguma gúxŭ, yema Tupana nuxcümaügüxŭ ga torü oxigümaã inaxunetaxŭrüü. ⁷ —Rü guxŭma i totanüxŭgü i Yudíugü rü ínangüxëgü na nüxŭ nadaugüxŭ rü tá na yanguxŭ i ngëma uneta. Rü ngëmacèx Tupanaxŭ nicuèxüügü rü guxŭguma i ngunecü rü chütacü rü Tupanaãxŭ napuracüe. Rü choma rü ta íchanangüxëë na nüxŭ chadauxŭ rü tá na yanguxŭ i ngëma uneta, rü ngëmacèx nixî, Pa ãëxgacüx, i ñuxma i choxŭ ínaxuaxŭgüxŭ i ngëma chautanüxŭgü i Yudíugü. ⁸ —¿Rü tüxcüü tama peyaxõgü na Tupana wena namaxëxëxŭ i ngëma yuexŭ?

Pauru rü nüxŭ nixu ga ñuxãcü yema yaxõgüxŭwe na yangëchigüxŭ

⁹ —Rü choma nagu charüxînügu ga noxri rü name ga muxŭma ga chixexŭ namaã na chaxüxŭ ga yema Ngechuchu ya Nacharétucüãxãxŭ yaxõgüxŭ. ¹⁰ —Rü yemacèx nawe chingëchigü ga Yerucharéüwa. Rü paigüarü ãëxgacügüxŭtawa naxcèx íchaca ga popera na chanapoxcuexücèx ga yema yaxõgüxŭ. Rü yexma chanapoxcue ga muxŭma. Rü yexguma chautanüxŭ ga Yudíugü nadaixgu ga yema yaxõgüxŭ, rü choma rü chorü me nixî. ¹¹ —Rü muëxpüxcüna rü chanapoxcuexŭ na nüxŭ naxoexücèx ga yema na yaxõgüãxŭ. Rü yemaãcü chanaxü ga guxŭnema ga ngutaquëxepataügüwa. Rü poraãcü naxchi chaxaxichi ga yema yaxõgüxŭ, rü yemacèx nawe chingëchigü ñuxmata to ga nachüãnegune ga ñanegüwa.

Pauru rü wenaxãrü nüxŭ nixu ga ñuxãcü na yaxõõxŭ ga noxrix

¹² Rū ñanagürü ga Pauru: —Rū yema yaxōgūxūxū na chapoxcuexūcèx nixī ga Damacuwa chaxūxū. Rū yemacèx ga paigüarü ãëxgacügü rü choxū namugü rü choxna nanaxāgü ga popera ga nawa choxna naxāgagūxū na chanapoxcuexūcèx ga yema yaxōgūxū. ¹³—Rū yexguma namagu taxīyane, Pa Æëxgacūx, rü yexguma meāma tocuchiwa nanguxgu, rü nüxū chadau ga wūxi ga omü ga daxūwa ne ūxū ga üèxcüarü yexera ixīxū ga choxū baxixū rü yema chomücügūxū rü ta baxixū. ¹⁴—Rū guxāma ga toma rü ñaxtūanegu tayayi. Rü choma rü nüxū chaxīnū ga wūxi ga naga ga Yudíugawa choxū ñaxū:

“Pa Chauru Pa Chaurux, ¿tüxcüü i chowe quingēchigūxū? Poraācü cugütama cuchixexēē ñoma wūxi i tacü i āmaguxūgu cucuxgūxūrū”, ñanagürü choxū. ¹⁵—Rü choma chanangāxū, rü ñacharügü:

“¿Texé quixī, Pa Corix?” ñacharügü. Rü nüma ga Cori rü ñanagürü choxū:

“Choma nixī i Ngechuchu rü chorü duūxügü nixī i ngēma nawe quingēchigūxū. ¹⁶—¡Natürü írüda rü inachi! Rū marü cuxcèx changox i ñūxmax, erü cuxū chamuxchañ na choxū cupuracūxūcèx rü nüxū quixuchigaxūcèx i ngēma ñūxma na choxū cudauxū rü ngēma yixcūra tá chauxūtawa nüxū cudauxū. ¹⁷—Rü cuxna tá chadau i natanūwa i cutanūxügü i Yudíugü rü ngēma tama Yudíugü ixīgūxū i ñūxma tá natanūwa cuxū chamuxū. ¹⁸—Rü ngema cuxū chamu na ngēma duūxügūxū choxū cucuèxēēxūcèx rü nüxū naxoexūcèx i nacūma i chixexügü rü chauga naxīnūēxūcèx. Rü ngema tá cuxū na Chatanámēxēwa ícunanguxūxēēxūcèx i ngēma duūxügü na chowe naxīxūcèx rü choxū yaxōgūāxūcèx na choma rü nüxū nüxū changechaūxūcèx i norü pecadugü, rü nüxū nangēxmaxūcèx i nachica namaā i guxūma i chorü duūxügü i üūnegūxū”, ñanagürü choxū ga Cori.

Pauru rü naga naxīnū ga yema Ngechuchu namaā nüxū ixuxū

¹⁹—Rü yemacèx ga chomax, Pa Æëxgacü Pa Agripax, rü naga chaxīnū ga yema ore ga Ngechuchu chomaā nüxū ixuxū ga yexguma choxū nabaxixgu ga yema omü ga daxūwa ne ūxū. ²⁰—Natürü noxri rü Damacucūāxgūmaā nüxū chixuchiga ga Tupanaārü ore. Rü yixcama ga Yerucharéüçūāxgūmaā, rü yemawena rü guxū ga Yudéaanewa, rü ñūxūchi yema tama Yudíugü ixīgūxūmaā nüxū chixu. Rü ñacharügü:

“¡Nüxū perüxoe i pecūma i chixexügü, rü Tupanacèx pedaugü, rü meā pemaxē na duūxügü nüxū daugūxūcèx na aixcūma peyaxōgūxū!” ñacharügü.

²¹—Rü yemacèxtama nixī ga tupauca ya taxūnegu choxū yayauxgūxū rü choxū yamèxgūchaūxū ga chautanūxügü i Yudíugü. ²²⁻²³—Natürü Tupana choxū narüngūxēē rü ngēmacèx taguma íchayachaxāchi na guxūma i duūxügūmaā nüxū chixuxū rü woo buxū rü yaxū. Rü namaā nüxū chixu ga yema ore ga nuxcūmaūgūxū ga Tupanaārü orearü uruūgü rü Moíché nüxū ixugūxū na ñuxācü tá nüxū nangupetūxū ga Cristu rü ñuxācü tá na nayuxū, natürü yemawena rü nüma tá yīxū ga nüxīra yuwa ínadxū. Rü namaā nüxū chixu ta ga yema nuxcūmaūgūxūārü ore ga ñaxū:

“Rü Cristu rü tatanūxū i Yudíugūmaā rü ngēma to i duūxügü i tama Yudíugü ixīgūxūmaā tá naxunagūāxū i ore i tüxū maxēxēēxū”, ñaxū. Rü yemachigaxūxīcatama nixī ga namaā chixuxū —ñanagürü ga Pauru.

Pauru rü Agripaaxū nanangūchaūxēē na yaxōōxūcèx

²⁴ Rü yexguma yemaācü nügüétüwa yadeaxgu ga Pauru, rü ñanagürü ga Festu tagaācüma: —Cungēāēmare Pa Paurux. Rü ngēma na yeüçürü cungūechañ, rü düxwa nawa cungēāē —ñanagürü. ²⁵ Natürü ga Pauru rü nanangāxū, rü ñanagürü: —Tama changēāē Pa Æëxgacūxūchi, Pa Festux. Erü

ñaã ore i nüxŭ chixuxŭ, rŭ aixcŭmaxŭchima nixŭ. ²⁶ —Rŭ daa ãëxgacŭ ga Agripa rŭ meãma nüxŭ nacuèx i guxŭma i ngẽma pemaã nüxŭ chixuxŭ. Rŭ ngẽmacèx tama chamuŭãcŭma chorŭ taãemaã napëxewa nüxŭ chixu, erŭ nüxŭ chacuèx na nüma rŭ ta nüxŭ nacuáxŭ i tacŭchiga na yŭxŭ i guxŭma i ñaã ore. Erŭ tama ngextámare cúãcŭ naxŭpetŭ i ngẽma. ²⁷ —¿Cuyaxõxŭ, Pa Agripax, i ngẽma Tupanaãrŭ orearŭ uruŭgŭ nüxŭ ixuxŭ? Choma nüxŭ chacuèx rŭ cuyaxõ —ñanagŭrŭ ga Pauru. ²⁸ Rŭ Pauruxŭ nangãxŭ ga Agripa, rŭ ñanagŭrŭ: —¿Ëxna cuma nagu curŭxŭnŭgu rŭ ngẽmaãcŭ noxre i curŭ oremaã na choxŭ cuyaxõxëxŭ? —ñanagŭrŭ. ²⁹ Rŭ ñanagŭrŭ ga Pauru: —Woo noxre i oremaã rŭ woo muxŭ i oremaã rŭ Tupana nanaxwèxe na cuyaxõxŭ. Rŭ tama i cuxicatama, natŭrŭ guxŭma i ñaã nuã choxŭ ñnŭxŭ rŭ ta, rŭ Tupana nanaxwèxe na chauxrŭŭ yixŭgŭxŭ, natŭrŭ tama chauxrŭŭ daa cadenagŭmaã na yanëxgŭxŭ —ñanagŭrŭ ga Pauru. ³⁰ Rŭ yexguma inachigŭ ga Agripa, rŭ Festu, rŭ Bereniche, rŭ guxŭma ga yema namaã yema rŭtogŭxŭ. ³¹ Rŭ yexguma ga nümagŭ rŭ noxrŭwama naxŭ na yema nügŭmaã Pauruchiga yadexagŭxŭcèx. Rŭ ñanagŭrŭgŭ: —Rŭ ngẽma yatŭ, rŭ taxuŭma i chixexŭ naxŭ na naxcèx yamáxŭ rŭ ëxna naxcèx napoxcuxŭ —ñanagŭrŭgŭ. ³² Rŭ Festuxŭ ñanagŭrŭ ga Agripa: —Ngëxguma chi tama nümatama naxcèx ínacaxgu na Chécharu nüxna çaxŭcèx, rŭ chi ítananguxuchixëë —ñanagŭrŭ.

27

Pauruxŭ Dumawa namugŭ

¹ Rŭ yema ãëxgacŭgŭ rŭ düxwa nagu narŭxŭnŭë na norŭ ãëxgacŭ ga Chécharu ga Itáriaanewa yexmacŭxŭtawá na toxŭ namugŭxŭ. Rŭ norŭ churragŭarŭ capitáŭna nanamu ga Pauru namaã ga ñuxre ga togŭ ga poxcuexŭ na Chécharuxŭtawá nagagŭãxŭcèx. Rŭ guma capitáŭ rŭ Yúriu nixŭ ga naega, rŭ norŭ churragŭtŭcumŭ rŭ Chécharuarŭ Dauruŭgŭ nixŭ ga naega. ² Rŭ nagu tichoŭ ga wŭxi ga wapuru ga buanecŭmaã ixŭxŭne ga Adamíchiuwa ne ŭxŭne ga Áchiaarŭ ñãnegŭwa ŭxchaxŭne. Rŭ towe ta nixŭe ga Aritárcu ga Machedóniããnecŭŭãx ga Techarónicawa ne ŭxŭ. ³ Rŭ moxŭãcŭ rŭ Chidãŭarŭ türewa tangugŭ. Rŭ Paurumaã namecŭma ga capitáŭ ga Yúriu. Rŭ ínanaxŭexëë na yemacŭŭãx ga namŭcŭgŭxŭtagu naxŭãneãxŭcèx ga Pauru, na nümagŭ nüxŭ nangŭxëëgŭxŭcèx. ⁴ Rŭ yema itaxŭãchi. Rŭ Chiprearŭ capaxŭãrŭ tocŭwaguama taxŭ, naxchaxwa ga buanecŭ, yerŭ towaama nabu. ⁵ Rŭ yema Chiprewa tixãŭ ga taxtŭ rŭ Chiríchiaanecutŭwa tarŭyicu. Rŭ yemacutŭgu taxŭ, rŭ Paŭpíriaanewa tachopetŭ rŭ ñuxmata Díchiaanewa yexmane ga ñãne ga Mirawa tangugŭ. ⁶ Rŭ yema capitáŭ yexma nüxŭ nayangau ga wŭxi ga wapuru ga Aleyãdríawa ne ŭxŭne ga Itáriaanewa ŭxŭne. Rŭ gumagu toxŭ nichoŭxëë, rŭ tomaã inaxŭãchi. ⁷ Natŭrŭ írarŭwatama itañaxwetaxŭ ga muxŭma ga ngunexŭgu, rŭ guxchaãcŭma Guíduarŭ toxmèxtawá tangugŭ. Natŭrŭ towaama nabuema ga buanecŭ, rŭ yemacèx capaxŭ ga Chamonaãrŭ toxmèxtawá tachopetŭ rŭ capaxŭ ga Crétaxŭ ítachoeguãchi. ⁸ Rŭ guxchaãcŭma nacutŭgu taxŭ ga yema capaxŭ, rŭ wŭxi ga nachica ga Mexŭ ga Türegu ãegaxŭwa tangugŭ. Rŭ ñãne ga Dácheaarŭ ngaicamana nayexma. ⁹ Natŭrŭ marŭ porãcŭ namagu tanuxcŭ ga na itaxŭxŭ, rŭ marŭ naxãŭcŭma ga na itaxŭãmaxŭ yerŭ marŭ nawa nangu ga guma tauemacŭgŭ ga nagu nagáuanecŭ. Rŭ yemacèx ga Pauru rŭ nayaxucuxë ga duŭxŭgŭ, rŭ ñanagŭrŭ: ¹⁰ —Pa Chomŭcŭgŭx, nüxŭ chacuèx i ngëxguma chi ixŭãmagu, rŭ tá naxãŭcŭma. Rŭ daa wapuru rŭ tá inayarŭtaxu namaã i guxŭma i naãcu. Rŭ ngŭrŭãchi i yixema rŭ tá ta tayue —ñanagŭrŭ. ¹¹ Natŭrŭ yema churragŭarŭ capitáŭ rŭ yexeraãcŭ guma

wapuruarü yoragaama naxĩnũ, rü marinerugüarü capitáũgaama naxĩnũ, rü tama aixcũma Pauruga naxĩnũ. ¹² Natürü yema türe rü tama name ga yéma na tanangupetüxẽxũ ga gáuanexũ. Rü yemacèx wixguxüchi guxũma ga duũxũgü nagu narũxĩnũe rü narümemaẽ nixĩ ga na itaxĩächixũ ga yéma. Rü nanaxwèxegü ga chi Cueníchewa na tangugũxũ na yéma tanangupetüxẽxũ ga gáuanexũ, yerü yema nixĩ ga wüxi ga Crétaarü türe ga mexũ ga tama poraãcü buanecü ga taxũ nawa ngxũ.

Taxtũarü ngãxũtügu nüxũ naxü ga buanecü ga tacü

¹³ Rü inanaxügu ga na meãma topèxewaama nabuxũ ga buanecü, rü yemacèx ga nümagü ga marinerugü rü nüxũ nacuèxgügu rü chi meã ítangugü ga yema ítaxĩxũwa. Rü yemacèx itaxĩachi, rü nacutũarü ngaicamagu taxĩ ga yema Crétaarü capaxũ. ¹⁴⁻¹⁵ Rü natürü ngürüãchi yixcamaxũra rü wüxi ga buanecü ga taxüchicü ga capaxũarü tocüwawa ne üxcü ngãxũtüwaama nanacue ga guma wapuru. Rü taxuacũma itixũtaũ nawaama ga buanecü. Rü yemacèx düxwa ítayachaxãchi ga na tanatochinũxũ, rü toxũ ínicuetaũ. ¹⁶ Rü wüxi ga capaxũxãcü ga Caudagu aegaxũarü tocüwawaama tachopetü ga ngextá tama poraãcü íyabuaxũwa. Rü yéma poraãcü tapuracüe na guma wapurugu tanatúnagũxũ ga norü ngue ga yatúchigüne. ¹⁷ Rü yexguma marü natúnagügüãgu ga guma ngue, rü napanaxãgü ga tanütaxũmaã nayanèixgütüwe ga guma wapuru. Rü ñuxũchi nayawègü ga yema naxchirutachinügu ga namaã yacuetaũxũ ga noxrix, yerü namuũe ga na Chirutearü naxnücüwa yanangaixtaũgũxũ. Rü yema buanecü toxũ nicuetaũmare. ¹⁸ Rü moxũãcü ga buanecü rü tama nangupetüéga, rü yemacèx inanaxügu ga na ínawoũãcuãxũ. ¹⁹ Rü norü tomaèxpüx ga ngunexügu, rü naxmèxmaãtama ínanawoũ ga yema natüxügu ga guma wapuru, rü guxũma ga to ga norü yemaxügu. ²⁰ Rü muxũma ga ngunexügu, rü tama nangox ga üèxcü rü èxtagü, rü tama nangupetüéga ga guma buanecü ga taxüchicü. Rü düxwa nagu tarũxĩnũe ga marü tãütáma na tamaxèxũ. ²¹ Rü yexguma marü muxũma ga ngunexũ tingegügu ga tama na tachibüexũ, rü yexguma guxũma ga yema duũxũgütanüwa inachi ga Pauru, rü ñanagürü: —Narümemaẽ chi nixĩ, Pa Chomücügüx, ga chauga na pexĩnũexũ, rü tãu chima na ixĩächixũ ga Crétawa, rü tãu chima ñuxmarüũ tüxũ naxüpetü i ñaã aũcũmaxũ rü taxuxũ chima i chixexũ tüxũ nangupetü. ²² —Natürü ¡petaãegü! erü wapuruxica tá inayarütaxu, natürü i yixema rü taxúetáma tayue. ²³ —Erü ngewèxarü chütaxũgu ya Tupana ya nüxũ chapuracücü ya chorü cori ixĩcü rü núma nanamu i wüxi i norü orearü uruũ i daxüçũãx i chauxcèx ngóxũ. ²⁴ —Rü ñanagürü choxũ:

“¡Tãxũ i cumuũxũ, Pa Paurux! Erü aèxgacü ya Chécharupèxewa tá cingu, rü cugagu tá Tupana nanamaxèxèe i guxũma i ngẽma cumücügü i cumaã ngèxma wapurugu íxũ”, ñanagürü choxũ. ²⁵ —Rü ngẽmacèx, Pa Chomücügüx, ¡rü petaãegü! erü choma rü aixcũma Tupanaãxũ chayaxõ, rü aixcũma tá nixĩ i ngẽmaãcü tá nangupetüxũ ngèxgumarüũ i ngẽma chomaã nüxũ yaxuxũ. ²⁶ —Natürü wüxi i capaxũwa tá tayarüçüxcuchitaũgü —ñanagürü ga Pauru. ²⁷ Rü yexguma taxre ga yüxü tingexgu ga na itaxĩxũ, rü taxũ ga taxtũ ga Ariáticuwa tayexmagü, yerü ga buanecü rü núxĩca toxũ nacuetaũ. Rü ngãxũcüügu nüxũ nicuèxãchitanü ga yema marinerugü ga na dauxchitacutüwa tangugüchaũxũ. ²⁸ Rü ínanataegü ga norü ngugütamaxũ rü 36 ga metru nixĩ ga norü mátama. Rü yexguma marü írarüwa yaxüguxũra itaxĩxgu rü wexaxãrü nanangugütamagü, rü 27 ga metru nixĩ ga norü mátama ga yexgumax. ²⁹ Rü namuũe ga na nutamaã yanañataũgũxũ ga naxãnacüwa, rü yemacèx guma wapuruchinüwa ínanawoũ ga aũgümücü ga aũclagü ga achugünaxcèx

ga napanaxāmaā ixātūxūxū na yemaācū íyachaxāchigūxēēāxūcèx ga guma wapuru. Rū nayumūxēgū ga paxa na yangunexūcèx. ³⁰ Natürü ga yema marinerugü rü nibuxmūchaū ga guma wapuruwa, rü yemacèx nanawāixēgū ga guma wapuruarü ngue, rü ñanagürügü: —Ngēma wapurupēxearü aūclagü tá ítawoū na nataixūcèx ya wapuru —ñanagürügüneta. ³¹ Natürü ga Pauru rü churaragüarü capitáūmaā rü norü churaragümaā nüxū nixu rü ñanagürü: —Ngēxguma ñā marinerugü rü tāūtáma nuxā wapurugu nachoxgu, rü guxāma i pema rü tá peyue —ñanagürü. ³² Rū yexguma ga yema churaragü rü nayadaecunügü ga guma ngue, rü inananguxēēgü. ³³ Rū yexguma marü yangunechaūgu, rü Pauru nayaxucuxēgü ga guxūma na nachibüexūcèx, rü ñanagürü: —Taxre i yūxū nixī i ñuxma na taguma aixrügumarüū pechibüexū, rü bai i tacü na pengōxū yerü poraācū pexoegaāēgü. ³⁴ Rū ñuxma rü pemaā nüxū chixu na pechibüexū na peporaexūcèx, rü taxuūma pexū üpetūxūcèx. Erü taxúetáma itayarütaxu rü bai i wüxi i peyaexüra inayarütaxu —ñanagürü. ³⁵ Rū yexguma marü yema ñaxgu, rü nanayaxu ga wüxi ga pāū, rü Tupanana moxē naxā napēxewa ga guxūma. Rū inanabücu ga yema pāū, rü inanaxügü ga na nangōōxū. ³⁶ Rū yexguma nataāēgü ga guxūma, rü nümagü rü ta nachibüe. ³⁷ Rū 276 tixīgü ga guxāma ga toma ga guma wapurugu íxē. ³⁸ Rū yexguma marü nangāxēgu, rü ínanawoū ga yema trigu ga wapuru namaā āacuxū na nangūnagūāchixüraxūcèx ga guma wapuru.

Inangu ga guma wapuru

³⁹ Rū yexguma yangunegu, rü yema marinerugü tama nüxū nacuéane ga yéma. Natürü nüxū nadaugü ga wüxi ga axcuchixū ga naxnücüpechinūāxū, rü nagu narüxīnūē ga yéma na yanangaixēēgūāxū ga wapuru. ⁴⁰ Rū yexguma nanadaū ga norü ngaxūxū ga aūclagü, rü yéma nanawogü. Rū nayawēgü ga norü toxchinūxūārü nēixruūgü, rü inananga ga yema napēxewa üxū ga naxchirutachinü ga namaā iticuetaūxū. Rū itanaxügü ga nüxū na tingaicaxū ga yema naxnücüpechinü. ⁴¹ Natürü wüxi ga naxnücüarü nuxtamaxūwa tayarūngaixtaū. Rū yéma naxnücüwa nayarüwápēxe ga guma wapuru rü marü tama yéma itaxīāchi. Rū yoxni ga nachinüwa, rü yuape nayapuxēē. ⁴² Rū yema churaragü rü nagu narüxīnūē ga na nadaiāxū ga yema poxcuexū na taxuūma iñaxūcèx ga yexguma naxānacüwa nangugügu. ⁴³⁻⁴⁴ Natürü yema norü capitáū ga churaragü, rü Pauruxū namaxēēchaū, rü yemacèx tama nanaxwēxe ga na nadaiāxū ga yema poxcuexū. Natürü nanamu na yema ixānūxū rü nüxīra ínayuxgūxū na naxānacüwa nawēxgūxūcèx, rü yema togü rü mürapewagügu rü éxna yema wapurutüchigügu meā na ínachoūxūcèx. Rū yemaācū guxāma meāma naxānacüwa tangugü.

28

Capaxū ga Mártawa nayexma ga Pauru

¹ Rū yexguma meāma naxānacüwa tangugügu ga guxāma rü yexguma nüxū tacuēxgü na Márta na yīixū ga naega ga yema capaxū. ² Rū yema yémacūāxgü ga duūxügü rü meāma toxū nayauxgü ga guxāma. Rū nanangixtagü ga wüxi ga üxū ga taxūne. Rū toxcèx nacagü ga guxāma na yéma togü tanaixūgūxūcèx, yerü napu rü nagáuane. ³ Rū Pauru nanadetaquēxe ga ñuxre ga naīchacüügü, rü üxüxetüwa nayawocu. Natürü yexguma yéma yawocuāgu, rü üxüarü naīemaxūchaxwa inayago ga wüxi ga āxtape. Rū Paurumēxēwa nayuxu, rü yéma nayarütuāchi. ⁴ Rū yexguma yema yémacūāxgü nüxū daugügu ga yema āxtape ga Paurumēxēwa na natuxū, rü nügümaā ñanagürügü: —Ñā yatü rü maneca wüxi i máētaxū nixī. Rū woo taxtūwa yuwa na yañaxū, natürü Tupana

tama nanamaxēēchaŭ –ñanagürügü. ⁵ Natürü guma üxüxetügu nanamaxŭ ga yema äxtape, rü taxuŭma nüxŭ naxüpetü ga Pauru. ⁶ Natürü guxŭma ga yema duŭxŭgü rü ínananguxēēgü rü ngoxi tá nachamé rü ěxna nayux. Rŭ marü nuxcŭxürama ga yema nüxŭ na nadaunüxŭ rü taxuŭma nüxŭ na üpetüxŭ, rü düxwa togu narüxŭnŭē rü inanaxügüe ga na ñagŭxŭ: –Maneca wŭxi ya tupana nixŭ –ñagŭxŭ. ⁷ Rŭ yema nachicaarü ngaicamana nayexma ga norü naäne ga yema capaxŭärü äëxgacü ga Púbiru ga naega. Rŭ nüma meäma toxŭ nayaxu, rü yexma toxŭ napegŭxēē ga tomaëxpŭx ga ngunexŭ. Rŭ tomaã namecŭmaxŭchi. ⁸ Rŭ guxema Púbiru nanatü rü ngürücarewa tayexma, yerü tixaxüne rü taduŭ. Rŭ yéma tümamaxŭtawa nangu ga Pauru, rü tümamaã nayumüxē, rü tümaxŭtŭgu naxŭxmēx, rü tüxŭ narümexēē. ⁹ Rŭ yexguma yemaxŭ nadaugügu, rü Paurucèx yéma naxŭ ta ga guxŭma ga togü ga idaaweexŭ ga yema capaxŭcŭäx, rü narümeē. ¹⁰ Rŭ nümagü rü muxŭma toxna naxãmaregü. Rŭ yexguma itaxŭächigu, rü toxna nananagü ga guxŭma ga tanaxwèxexŭ ga torü namawaŭ ga òna.

Dumawa nangu ga Pauru

¹¹ Rŭ tomaëxpŭx ga tauemacü yéma capaxŭwa tayexmagü. Rŭ ñuxŭchi nagu tichoŭ ga wŭxi ga wapuru ga yema capaxŭwa gáuanexŭ ngupetüxèxene. Rŭ Aleyadríacŭäx nixŭ ga guma wapuru. Rŭ napëxeraŭwa nayexmagü ga taxre ga norü tupanachicŭnèxägü ga Catu rü Porugu äegagŭxŭ. ¹² Rŭ Chiracúchaarü türewa tangugü, rü tomaëxpŭx ga ngunexŭ yéma tayexmagü. ¹³ Rŭ yéma itaxŭächi, rü nacutŭarü ngaicamagu taxŭ ñuxmata Dequíuwa tangugü. Rŭ moxŭäcŭ ínangu ga wŭxi ga buanecü ga ítaxŭxŭwaama bucü rü toxŭ inicuetaŭ. Rŭ yemaärü moxŭäcŭama rü Puteriwa tangugü. ¹⁴⁻¹⁵ Rŭ yexma nüxŭ tayangau ga ñuxre ga duŭxŭgü ga yaxögŭxŭ. Rŭ toxna naxu na wŭxi ga yŭxŭ yexma naxŭtagu tarüchoxŭcèx. Rŭ marü wŭxi ga yŭxŭ ngupetügu rü itaxŭächi na namagu Dumawa taxŭxŭcèx. Rŭ marü toxŭ nacuáchigagü ga yema yaxögŭxŭ ga Dumagugŭxŭ. Rŭ yema nama ga Ápiugu äegaxŭgu naxŭ na yexma toxŭ yangaugŭxŭcèx. Rŭ ñuxre rü yema nachica ga Tomaëxpŭx ga Taxepataŭgu äegaxŭwa toxŭ nayarünguxēēgü Rŭ togü rü nachopetü ñuxmata yema nachica ga Ápiuarü Ngüëchicagu äegaxŭwa nangugü. Rŭ yexguma Pauru nüxŭ dèuxgu ga yema yaxögŭxŭ, rü Tupanana moxē naxã rü poraãcü nataãē. Rŭ yemaäcŭ Dumawa tangugü. ¹⁶ Rŭ yexguma Dumawa tangugügu rü wŭxi ga ípatawa nananguxēēgü ga Pauru nüxŭca namaã ga wŭxi ga churara ga nüxna dauxŭ.

Dumawa nayexma ga Pauru

¹⁷ Rŭ tomaëxpŭx ga ngunexŭ marü yéma nayexmagu, rü Pauru naxcèx nangema ga yema Yudíugüarü äëxgacügü ga Dumawa yexmagŭxŭ. Rŭ yexguma nangutaquëxegügu, rü ñanagürü ga Pauru nüxŭ: –Choma, Pa Chaueneëgŭx, rü taxuŭma i chixexŭ chaxŭ namaã i tatanüxŭgü, rü bai i nuxcŭmaŭgŭxŭ i tórü oxigŭcŭmagŭmaã. Natürü Yerucharéŭgu choxŭ niyauxgü ga tatanüxŭgü, rü Dumacŭäx ga churaragüna choxŭ namugü. ¹⁸ Rŭ yexguma marü choxna nacagüegu ga Dumacŭäxgü, rü choxŭ ningëxgŭchaŭ, yerü taxuŭma ga tacü ga chixexŭ chowa nadaugü na choxŭ yamëxgŭxŭcèx. ¹⁹ Natürü yema tatanüxŭgü ga Yudíugü rü nayamuëtanü na tama choxŭ yangëxgŭxŭcèx, rü yemacèx düxwa naxcèx íchaca na nümatama ya äëxgacü ya Chécharu choxna çaxŭcèx. Natürü tama tatanüxŭgŭxŭ na íchaxuaxŭxŭcèx nixŭ ga yemacèx íchaçaxŭ. ²⁰ Rŭ ngëmacèx nixŭ i pexcèx nuã changemaxŭ na pexŭ chadauxŭcèx rü pemaã chidexaxŭcèx. Pema nüxŭ pecuèx rü yixema i Yudíugü rü ítananguxēē i na ínanguxŭ ya Cristu. Rŭ yima Cristucèx nixŭ

i choma i ñuxma i daa cadenamaã chináixũ —ñanagürü. ²¹ Rũ nümagũ nanangãxũgũ, rũ ñanagürügũ: —Toma rũ taxuũma i popera i Yudeáawa ne muxũ i cuchigagu ũmatũxũ tayauxgũ. Rũ ngẽma taeneẽgũ i ngẽma ne ìxũ rũ núma ngugũxũ rũ bai i wũxi i nüxũ ixuxũ i tacũ rũ ore i chixexũ i cuchiga. ²² Rũ cuxũtawa nüxũ taxĩnũẽchaũ rũ ¿ñuxũ ñacuxũ i cumax? Erũ nüxũ tacuẽxgũ rũ guxũwama i Yudíugũ rũ chixri nachiga nidexagũ i ngẽma ore i ngexwacaxũxũ i Ngechuchuchiga —ñanagürügũ. ²³ Rũ yexguma Paurumaã inaxunetagu ga wũxi ga ngunexũ, rũ napatawa naxĩ ga muxũma ga duũxũgũ. Rũ Pauru namaã nüxũ nixu ga Tupanaãrũ ore ga ñuxãcũ ãẽxgacũ na yĩixũ ya Tupana. Rũ pèxmama inanaxũgũ, rũ ñuxmata nachũtaxũ rũ nüxũ nanangũchaũxẽẽ ga yema duũxũgũ na Ngechuchuauxũ yaxõgũãxũcèx. Rũ yemacèx Moĩché ũmatũxũ ga mugũwa rũ nuxcũmaũgũxũ ga Tupanaãrũ orearũ uruũgũ ũmatũxũ ga orewa namaã nüxũ nixu ga Ngechuchuchiga. ²⁴ Rũ nümaxũ rũ nayaxõgũ ga yema Pauru namaã nüxũ ixuxũ natürũ ga togũ rũ tama nayaxõgũ. ²⁵ Rũ yexguma tama wũxigu naxĩnũẽgu ga yema duũxũgũ, rũ inanaxũgũ ga na íyaxĩxũ. Rũ yemacèx ga Pauru rũ ñanagürũ nüxũ: —Meã perũ oxigũmaã nidexa ga Tupanaãẽ i Ũñexũ ga yexguma Ichaxíaxũ yadexaxẽẽgu rũ ñaxgu:

²⁶ “¡Rũ ngẽma naxũ, rũ ngẽma duũxũgũmaã nüxũ yarũxu rũ ñacurügũ tá nüxũ: ‘Rũ woo nüxũ pexĩnũẽgu rũ tãũtãma aixcũma nüxũ pecuẽxgũ. Rũ woo nüxũ perũdaunũgu rũ tãũtãma aixcũma peyaxõgũ. ²⁷ Rũ ngẽmaãcũ pixĩgũ i ñuxmax, erũ tama choxũ pecuáxchaũ i pemax. Rũ tama nüxũ pexĩnũẽ i chorũ ore erũ tama nüxũ pexĩnũẽchaũ. Rũ tama nüxũ peyaxõgũ i ngẽma choma pexũ nüxũ chadauxẽẽxũ erũ tama nüxũ peyaxõgũchaũ. Rũ tama peãẽwa chaugu perũxĩnũẽ erũ tama nüxũ perũxoechaũ i pecũma i chixexũgũ rũ tama chauxcèx pedaugũchaũ na choma pexũ chamaxẽẽxũcèx!’ ”

ñanagürũ ga Tupanaãẽ i Ũñexũ. ²⁸ Rũ ñanagürũ ta ga Pauru: —Rũ name nixĩ i pema rũ ta nüxũ pecuèx rũ ñuxma rũ marũ inaxũgũ na ngẽma tama Yudíugũ ixĩgũxũtanũwa naxunagũxũ i ñaã Tupanaãrũ ore i tũxũ maxẽẽxũ. Rũ nümagũ tá nixĩ i aixcũma inaxĩnũẽxũ —ñanagürũ. ²⁹ Rũ yexguma Pauru yema ñaxgu, rũ ínixĩ ga yema Yudíugũ, rũ poraãcũ nügũmaã íniporagatanũcũũ. ³⁰ Rũ taxre ga tauncũ ga mecũ yéma nayexma ga Pauru nawa ga guma ñ ga naxũtanũne ga nagu na napexũcèx. Rũ yéma meãma nanayaxuxũ ga guxũma ga duũxũgũ ga naxũtawa íyadaugũxũxũ. ³¹ Rũ nüxũ nixuchiga ga ñuxãcũ ãẽxgacũ na yĩixũ ga Tupana. Rũ taxúema nüxna tanachuxu na nangúexẽẽãxũ ga Cori ya Ngechuchu ya Cristuchiga. Rũ taxúema naxcèx tanachixewe.

POPERA GA DUMAWA YEXMAGŪXŪ GA YAXŌGŪXŪTANŪWA NAMUXŪ GA PAURU

Pauru rü nüxŭ narŭmoxē ga yema yaxōgŭxŭ ga Dumaārŭ ĩānewa yexmagŭxŭ

¹ Pa Chaueneēgŭx, choma i Pauru nixŭ i pexcèx chanaxŭmatŭxŭ i ñāñ popera. Rü choma nixŭ i Ngechuchu ya Cristuarŭ duŭxŭ chiŭxŭ. Rü choma nixŭ ga Tupana choxŭ yaxuxŭ na choxŭ yamuxŭcèx na duŭxŭgŭmaā nüxŭ chixuxŭcèx i norŭ ore i mexŭ i tüxŭ maxēxēxŭ. ² Rü nuxcŭmaxŭchima Tupana nanamu ga norŭ orearŭ uruŭgŭ na naxŭmatŭgŭāxŭcèx ga norŭ ore i mexŭ. Rü yemaācŭ tüxŭ nüxŭ nacuèxēē ga ñāñ ore i mexŭ. ³ Rü ñāñ ore i mexŭ rü tórŭ Cori ya Ngechuchu ya Cristuchiga nixŭ. Rü nüma rü woo Tupana Nane na yŭxŭ, natŭrŭ duŭxŭgŭrŭŭ nabu ga yexguma ñoma ga naānewa nanguxgu. Rü nuxcŭmaŭcŭ ga āēxgacŭ ga Dabŭtaa nixŭ. ⁴ Natŭrŭ nümatama ya Ngechuchu rü ũnecŭ nixŭ. Rü yexguma yuwa ĩnadaxgu rü Tupana tüxŭ nüxŭ nadauxēē na aixcŭma Nanexŭchi na yŭxŭ. Rü nüxna nanaxā ga guxŭma ga pora. ⁵ Rü Ngechuchu ga Cristugagu nixŭ ga chomaā namecŭmaxŭ rü choxŭ naxunetaxŭ ga Tupana na norŭ puracŭ chaxŭxŭcèx. Rü yemacèx Ngechuchuégagu choxŭ namu na guxŭ i nachŭŭānewa nüxŭ chixuxŭcèx i norŭ ore na yaxōgŭāxŭcèx i duŭxŭgŭ rü Tupanaga naxŭnŭxŭcèx. ⁶⁻⁷ Rü pema rü ta, Pa Dumacŭāxgŭx, rü ngēma duŭxŭgŭtanŭwa pengēxmagŭ yerŭ Tupanaāxŭ peyaxōgŭ rü naga pexŭnŭē. Rü nüma rü pexŭ nangechaŭ rü marŭ pexŭ naxuneta na Ngechuchu ya Cristuarŭ duŭxŭgŭ pixŭgŭxŭcèx rü ngēma norŭ duŭxŭgŭtanŭxŭ na pexŭgŭxŭcèx. Rü ñuxmax, Pa Chaueneēgŭ i Dumacŭāxgŭx, rü chanaxwèxe i nüma ya Tanatŭ ya Tupana rü tórŭ Cori ya Ngechuchu ya Cristu pemaā namecŭmagŭ rü pexŭ narŭngŭxēēgŭ na meā pexŭ naxŭpetŭxŭcèx rü aixcŭma petaāēgŭxŭcèx.

Pauru rü nüxŭ nangúchaŭ na ĩyadauāxŭ ga yema yaxōgŭxŭ ga Dumawa yexmagŭxŭ

⁸ Rü ñuxma rü Ngechuchu ya Cristuégagu Tupanana moxē chaxā pexcèx, erŭ guxŭwama i guxŭ i naānewa rü duŭxŭgŭ nüxŭ nixugŭgŭ na aixcŭma Cristuaxŭ peyaxōgŭxŭ rü Tupanacèx pemaxēxŭ. ⁹ Rü nüma ya Tupana choxŭ nadau rü nüxŭ nacuèx na aixcŭma guxŭguma pexcèx chayumŭxēxŭ. Rü yimaāxŭ nixŭ i guxŭma i chorŭ ngúchaŭmaā chapuracŭxŭ rü nüxŭ chixuxŭ i norŭ ore i mexŭ i Nanechiga. ¹⁰ Rü guxŭguma nüxna chaca na choxŭ ngēma namuxŭcèx rü ngēmaācŭ düxwa pexŭ ĩchayadauxŭcèx ega norŭ ngúchaŭ yixŭgu. ¹¹ Erŭ aixcŭma choxŭ nangúchaŭ na pexŭ chadauxŭ na pemaā nüxŭ chixuxŭcèx i Tupanaārŭ ore na aixcŭma meā peyaxōgŭxŭcèx rü yexeraācŭ peporaexŭcèx. ¹² Rü ngēxguma ngēmaācŭ wŭxiwa ĩngēxmagŭgu, rü tá wŭxichigŭ yigŭ tataāēgŭxēē rü yigŭaxŭ tanangúchaŭxēē. Erŭ choma rü tá nüxŭ chadau na ñuxācŭ tórŭ Coriaxŭ peyaxōgŭxŭ rü pema rü tá ta nüxŭ pedau na ñuxācŭ chayaxōxŭ. ¹³ Pa Chaueneēgŭx, chanaxwèxe i nüxŭ pecuèx na muēxpŭxcŭna pexŭ ĩchayadauxchaŭxŭ, natŭrŭ ñuxmarŭta rü choxŭ naguxcha. Natŭrŭ ngēma petanŭwa chaxŭxchaŭ, erŭ chanaxwèxe na pemaā nüxŭ chixuxŭ i Tupanaārŭ ore yema toxnamana yexmagŭxŭ ga duŭxŭgŭmaā nüxŭ chixuxŭrŭŭ. Erŭ chanaxwèxe i ngēma duŭxŭgŭrŭŭ meā peyaxōgŭ na ngēmaācŭ Cristuwe naxŭxŭcèx i ngēma petanŭxŭgŭ i ñuxma tama yaxōgŭxŭ. ¹⁴ Rü aixcŭma ngēma changuxchaŭ erŭ nümatama ya Tupana choxŭ namu na guxŭ i duŭxŭgŭmaā nüxŭ na chixuxŭcèx i norŭ ore. Rü nanaxwèxe i duŭxŭgŭ

i meã poperaxũ icuáxũmaã nüxũ na chixuxũ rü duũxũgü i tama poperaxũ icuáxũmaã ta nüxũ chixuxũ i ngẽma norü ore. Rü ngẽxgumarũ ta nanaxwexe na ngẽma duũxũgü i cuèx nüxũ ngẽxmaxũmaã nüxũ na chixuxũ rü ngẽma duũxũgü i taxuguma rüxĩnüèxũmaã nüxũ na chixuxũ. ¹⁵ Rü ngẽmacèx, Pa Chaueneëgü i Dumagu Āchiũgũxũ, rü choma rü marü íchamemare na petanüwa na chaxũxũ, na pemaã rü ta nüxũ chixuxũcèx i Tupanaãrü ore i mexũ.

Tupanaãrü ore rü napora

¹⁶ Rü taxucèxma naxcèx chaxãne i ngẽma ore i mexũ. Erü ngẽma ore rü napora, rü ngẽmamaã nixĩ i napuracũxũ ya Tupana na guxãma ya yixema Cristuaxũ yaxõgũxe rü tüxũ nangẽxmaxũcèx i maxũ i taguma gúxũ. Rü ngẽma maxũ, rü Yudíugüçèxirachirèx nixĩ, natürü i ñuxma rü guxũma i ngẽma tama Yudíugü ixĩgũxũcèx rü ta nixĩ. ¹⁷ Rü ngẽma norü orewa nixĩ i tamaã nüxũ yaxuxũ ya Tupana na tórü õgaguxicatama yĩxũ na napèxewa imexũ. Erü norü ore i ümatüxũwa rü ñanagürü:

“Rü yixema tümaãrü õgagu Tupanapèxewa mexẽ, rü tá tüxũ nangẽxma i maxũ i taguma gúxũ”,
ñanagürü.

Nagagutama nixĩ i duũxũgü inapoxcuexũ

¹⁸ Rü nüxũ tadaugü na Tupana daxũgũxũ i naãnewa ne namuxũ i norü poxcu i ãücũmaxũ naxcèx i guxũma i ngẽma duũxũgü i tama naga ñnüèxũ rü chixexũ ügũxũ rü ngẽma norü chixexũmaã togũaxũ naguxchaxèègũxũ na tama nüxũ nacuèxgũxũcèx i ngẽma ore i aixcũma ixĩxũ. ¹⁹ Rü ngẽma duũxũgü i chixexũ ügũxũ rü meã nüxũ nacuèxgũchirèx na ñuxãcü yĩxũ ya Tupana yerü nümatama ga Tupana rü marü nüxũ nüxũ nadauxèè ga yema. ²⁰ Rü woo tama nüxũ idaugügu ya Tupana, natürü guxũma i tacü i naxüxũwa nixĩ i nüxũ idaugũxũ. Rü yexguma noxri naãne naxüxgumama nixĩ ga meãma duũxũgũxũ nüxũ nadauxèèxũ na aixcũma Tupana na yĩxũ rü guxũguma na naporaxũ. Rü ngẽmacèx i ngẽma duũxũgü i chixexũ ügũxũ, rü taxucürüwama tacũmaã nügü inapoxũgü i Tupanapèxewa. ²¹ Yerü woo nüxũ nacuèxgũchirèx na ñuxãcü yĩxũ ga Tupana, natürü tama nanayauxgũchaũ na norü Tupana yĩxũcèx, rü bai na moxè nüxna naxãgũxũ. Natürü yema ore ga taxuwama mexũguama narüxĩnüè, rü yemaãcü naèchitamare namaxè rü yexeraãcü chixexũgu narüxĩnüè. ²²⁻²³ Rü nügü yaxugüegu rü duũxũgü i nüxũ icuáxũ nixĩgü natürü taxuguma narüxĩnüè. Yerü nüxna nixĩgachitanü ga Tanatü ya Tupana ya mexèchicü ya taguma yucü, na nawe naxĩxũcèx ga norü naxchicünèxãgũmare ga duũxũgü i yuxwèxexũchicünèxãmare ixĩgũxũ rü werigüchicünèxãmare ixĩgũxũ rü naèxũgüchicünèxãmare ixĩgũxũ rü ãxtapegüchicünèxãmare ixĩgũxũ. ²⁴ Rü yemacèx ga Tupana rü düxwa yemawa nanawogü ga yema duũxũgü na naxügüãxũcèx ga guxũma ga yema chixexũ ga nüxũ ngúchaũgũxũ rü nügũmaã na naxügüãxũcèx ga naxũneãrü ngúchaũgü i ãne tüxna ãxũ. ²⁵ Rü yemaãcü nüxna nixĩgachi ga guma aixcũmaxũchi Tupana ixĩcü na nawe naxĩxũcèx ga norü tupanagü ga tama aixcũma ixĩgũxũ. Rü yema Tupana üxũpèxewa nayumüxègü rü yemaxũ nicuèxüũgü, natürü tama nüxũ nicuèxüũgü ga Tanatü ya Tupana ga naxücü rü inaxwèxecü na guxũguma nüxũ icuèxüũgũxũ. Rü ngẽmaãcü yixĩ. ²⁶ Rü yemacèx ga Tupana rü düxwa yemawa nanawogü ga yema duũxũgü na naxügüãxũcèx ga naxũneãrü ngúchaũ i ãne tüxna ãxũ. Rü èxrüũ ga ngexũgü rü naxrüũ ngexũgũmaãtama nangèãègü rü tama yatügũmaã. ²⁷ Rü yexgumarü ta ga yatügü rü naxrüũ

yatūxūmaātama nangēāēgū, rü tama ngexūgūmaā. Rü yema naxūneārū ngúchaū ga chixexūgū rü nüxū napora na naxrūū yatūxūmaā namaxēxū. Rü yemaācū ga yema yatūgū rü nūgūmaā nanaxūgū ga yema naxūneārū ngúchaū i āne tūxna āxū, rü düxwa yemagagu nīdaawee rü naturaxūnegū. ²⁸ Rü yema na tama Tupanaxū nacūèxgūchaūxū, rü yemacèx ga nūma ga Tupana rü düxwa yemawa nanawogū ga yema duūxūgū na norū chixexūga na naxīnūēechaxūcèx rü na naxūgūāxūcèx ga yema chixexū. ²⁹ Rü düxwa ga yema duūxūgū rü guxūraūxū ga chixexū naxūgū ga Tupanapēxewa. Rü tama aixcūma meā naxmèxmaā rü natemaā namaxē. Rü naxaū rü nūgūnaxīcatama nananugūchaū i guxūma i tacū. Rü toguāxū nachixexēēgūchaū. Rü nixāūāchiwèxegū, rü namáētagū, rü nanuēwèxe, rü nawomūxēēwèxegū, rü naxūneārū ngúchaū nüxū napora, rü naxoregütèèxgū. ³⁰ Rü chixexūmaā toguāxū nixugūe, rü Tupanachi naxaie, rü toguāxmaā naguxchigagū. Rü nūgūga naxīnūēgu rü togūarū yexera nixīgū, rü nūgū nicuèxūūgū. Rü naxcèx nadaugū na yexera chixexū naxūgūxū. Rü tama nanatūga rü naēga naxīnūēchaū. ³¹ Rü tama inarūxīnūēchaū. Rü tama aixcūma nayanguxēē i ngēma nüxū yaxugūxū. Rü taxūxūma nangechaūgū. Rü tama togūaxū nüxū nangechaū i tacū rü guxchaxū. Rü tama toguāx nüxū tangechaūtümūgū. ³² Rü nūmagū i ngēma duūxūgū rü meāma nüxū nacūèxgūchirēx rü Tupana rü marū namaā nanaxuegu na noxtacūma nayuxē i ngēma duūx-ūgū i ngēmaācū maxēxū. Natürü woo meāma nüxū nacūèxgūchirēx i guxūma i ngēma, natürü nanaxūgūama i ngēma chixexū, rü nataāēgū ega togū naxūxgu.

2

Ngēxguma Tupana duūxūgūxū poxcugu, rü tama chixexū naxū, erū ngēma duūxūgū rü norū chixexūgagutama nanapoxcue

¹ Rü ngēmacèx, Pa Duūxūx, rü woo texé quixīgu rü taxuacūma Tupanapēxewa cugütūwa cuchogū, ega togūxū quixuechagu. Erū ngēxguma togūxū quixuechagu na nachixexū rü cugūtama cupoxcu, erū cuma na cumūcūxū quixuechaxū rü cuma rü ta cunaxū i ngēma chixexū i cumūcūxū naxcèx quixuechaxū. ² Rü nüxū tacuèx rü Tupana tá nanapoxcue i ngēma duūxūgū i namūcūgūxū ixugūechaxū. Rü ngēxguma napoxcueāgu, rü tama chixexū naxū ya Tupana, erū ngēma duūxūgū rü norū chixexūgagutama nixī i napoxcueāxū. ³ Rü dücax, Pa Duūxūx, rü ngēxguma togūxū quixuechagu, natürü cuma rü ta cunaxūxgu i ngēmatama chixexū i nūma naxūxū, ¿rū ñuxūcürüwa tá i nagu curūxīnūxū na Tupanachaxwa iquicūxū na tama cuxū napoxcuxūcèx? ⁴ ¿Rü tūxcūū tama nagu curūxīnū i ngēma mexū i Tupana cuxcèx üxū? Nūma rü porācūxūchi cumaā namecūma rü yaxna cumaā naxīnū rü tama paxa curū chixexūcèx cuxū napoxcuchaū. ¿Rü ñuxma rü tūxcūū nüxū cuxo? ¿Tama ēxna nüxū cucuèx na Tupana ngēmaācū cumaā mecūmaxū na nüxū curūxoxūcèx i curū chixexū rü naxcèx na cumaxūxūcèx ya Tupana? ⁵ Natürü cuma rü tama Tupanaxū cucuáxchaū rü tama nüxū curūxoxchaū i curū chixexū. Rü ngēmaācū cugūcèxtama cunayexeraxēē i curū poxcu i tá cuyaxuxū i ngēma ngunexū i nagu Tupana napoxcuexū i ngēma chixexū ügūxū. Rü ngēma ngunexūgu rü Tupana tá aixcūma ngēma duūxūgūmaā nanaxuegu na ñuxācū tá na napoxcueāxū. ⁶ Rü ngēxguma tá nixī i Tupana nüxū yaxūgūtanūxū i wūxichigū i duūxū naxcèx i ngēma naxūgūxū. ⁷ Rü maxū i taguma gūxūmaā Tupana tá tūxū nanaxūtanū ya yīxema guxūguma mexū taxūgūācūma naxcèx daugūxe na Tupana tūmamaā taāēxū rü naxcèx daugūxe na aixcūma Tupanaxūtawa tangugūxū. ⁸ Natürü

Tupana tá tūmamaã nanu rü tá tüxũ napoxcu ya yíxema tūgūguxicatama rüxĩnūēxē rü tama naga ĩnūēchaũxē i ore i aixcūma ixĩxũ rü naxcèx daugūxe na ngēma chixexũ taxūgūxũ. ⁹ Rū guxūma i ngēma duũxūgū i chixexũ ũgūxũ rü tá ngūxũ ningegū rü poraãcū tá chixexũ nüxũ naxūpetū. Rū ngēma Yudíugū i chixexũ ũgūxũira tá nixĩ i Tupana inapoxcuexũ. Rū ngēmawena rü tá nanapoxcue i guxūma i ngēma togū i duũxūgū i chixexũ ũgūxũ. ¹⁰ Natürü ngēma duũxūgū i mexũ ũgūxũ, rü Tupana tá namaã nataãē, rü tá nanatachigaxēē, rü tá nanataãēxēē. Rū ngēma Yudíugū i mexũ ũgūxũcèxira tá nixĩ i ngēma. Rū ngēxgumarũ i guxūma i togū i duũxūgū i mexũ ũgūxũcèx rü tá ta nixĩ. ¹¹ Erü Tupanapēxewa rü nawūxigu i ngēma duũxūgū i Yudíugū ixĩgūxũ rü ngēma togū i duũxūgū i tama Yudíugū ixĩgūxũ. Rū guxāma ya texé ya chixexũ ũgūxe rü tá tanayaxu i tūmaãrū poxcu, natürü guxāma ya texé ya mexũ ũgūxe rü tá Tupana tūmamaã nataãē. ¹² Rū guxūma i duũxūgū i pecadu ũgūxũ i tama nüxũ cuèxgūxũ i ngēma mugū ga Moĩché ũmatüxũ, rü tá inayarūtauxe. Rū ngēxgumarũ ta i guxūma i ngēma pecaduãxgūxũ i nüxũ cuèxgūxũ i ngēma mugū ga Moĩché ũmatüxũ, rü ngēma mugū nüxũ ixuxũãcūma Tupana tá nanapoxcue. ¹³ Erü Tupanapēxewa rü taxuwama name i ngēma duũxūgū i nüxũ ĩnūēmarexũ natürü tama nagu maxēxũ i norü mugū. Natürü ngēma duũxūgū i Tupanaãrū mugūga ĩnūēxũ nixĩ i aixcūma Tupanapēxewa imexũ. ¹⁴ Dúcèx, i ngēma duũxūgū i tama Yudíugū ixĩgūxũ. Nūmagū rü tama nüxũ nacuèxgū i Tupanaãrū mugū. Natürü ngēxguma nūēchamatama naxūgūmareāgu i ngēma Tupana tüxũ muxũ, rü tüxũ nüxũ nadauxēē na nüxũ nacuèxgūxũ i tacū na yĩxũ i mexũ rü tacū na yĩxũ i chixexũ, woo tama nüxũ na nacuèxgūchiréxũ i Tupanaãrū mugū. ¹⁵ Erü nacūmagūwatama nixĩ i tüxũ nüxũ nadauxēēxũ na nüxũ nacuèxgūxũ na tacū yĩxũ i mexũ rü tacū na yĩxũ i chixexũ. Rū ngēma duũxūgū rü ngēxguma chixexũ naxūgūgu, rü naãēwatama nixĩ i nüxũ nacuèxgūxũ na nachixexũ i ngēma naxūgūxũ. Rū ngēxgumarũ ta i ngēxguma mexũ naxūgūgu, rü naãēwatama nixĩ i nüxũ nacuèxgūxũ na namexũ i ngēma naxūgūxũ. ¹⁶ Rū ngēma ngunexũ i nagu Tupana Cristuxũ namuxũ na guxũ i duũxūgūxũ yacagūxũcèx i norü maxūchiga, rü ngēma duũxūgū i tama Tupanaãrū mugūxũ cuèxgūxũ rü naãēwa tátama nixĩ i nüxũ nacuèxgūxũ na chixexũ naxūgūxũ rü ēxna mexũ naxūgūxũ. Rū ngēxguma tá nixĩ i nangóxũ i guxūma i ngēma chixexũ i cúãcūma naxūgūxũ i duũxūgū, rü ngēma chixexũ i nüxĩcatama nagu naxĩnūēxũ. Rū Tupanaãrū ore i pemaã nüxũ chixuxũ nixĩ i tüxũ nüxũ cuèēēxũ i ngēma.

Yudíugūchiga rü mugū ga Moĩché ũmatüxũchiga

¹⁷ Natürü pema Pa Chaueneēgū i Yudíugūx, rü ñaperūgūgū:

“Toma rü Yudíugū tixĩgū rü meãma nüxũ tacuèx i Tupanaãrū mugū ga Moĩché ũmatüxũ”, ñaperūgūgū. Rū ngēmaãcū nagu perüxĩnūē na Tupanapēxewa pimexũ erü meãma nüxũ pecuèx i ngēma Tupanaãrū mugū ga Moĩché ũmatüxũ. Rū ngēmaãcū Tupanamaã pegū picuèxũgū erü nagu perüxĩnūē na Tupana pexũ nangechaũxũ erü Yudíugū pixĩgū. ¹⁸ Rū nüxũ pixu na meãma nüxũ pecuáxũ i tacū nixĩ i Tupanaãrū ngúchaũ rü tacū nixĩ i mexũ rü tacū nixĩ i chixexũ. Rū Tupanaãrū mugūwa naxcèx pengúe na naxcèx pedauxũ i ngēma aixcūma mexũ ixĩxũ. ¹⁹ Rū pema rü ñaperūgūgū:

“Toma rü meãma nüxũ tacuèx na tanaxucuxēxũ i ngēma togū i duũxūgū i tama Tupanaxũ cuèxgūxũ. Rū meãma nüxũ tacuèx na itayanawēxãchixēēxũ i ngēma togū i chixexũwa ngēxmagūxũ”, ñaperūgūgū. ²⁰ Rū pema nagu perüxĩnūēgu rü nüxũ pecuèx na ñuxãcū penaxucuxēxũ i ngēma togū i duũxūgū i tama Tupanaxũ cuèxgūxũ rü ñuxãcū penangúexēēxũ i ngēma duũxūgū i ngexwacèx yaxōgūxũ. Rū ngēmaãcū nagu perüxĩnūē na togūarü

ucuxēruŭgü pixīgüxŭ, erü Tupanaärü mugüwa pengüé rü ngēmacèx meāma nüxŭ pecuèx i tacü nixī i mexŭ rü tacü nixī i ore i aixcüma ixīxŭ. ²¹ Rü dücax, Pa Chaueneëgü i Yudíugüx, pema na togüxŭ pengüexēxŭ, ¿rü tüxcüŭ tama pegütama pengüexē? Pema nüxŭ pixu na tama namexŭ na ingīxŭ, ¿rü tüxcüŭ i pema ipengīxŭ? ²² Rü pema nüxŭ pixu na tama namexŭ na naī i ngemaā ipexŭ, ¿rü tüxcüŭ i pema i ngēmaācü pemaxēxŭ? Rü pema na naxchi pexaiexŭ i togüarü tupanagünetachicünèxāgü, ¿rü tüxcüŭ i naxcèx pengīxŭ i norü tupaucagüarü ngēmaxŭgü? ²³ Pema nüxŭ pixu na namexŭ i Tupanaärü mugü i ümatüxŭ, rü petaāe erü meā nüxŭ pecuèxgü i ngēma mugü. Natürü Tupanamaā chixexŭ pexüe, erü tama naga pexīnüē i ngēma pexŭ namuxŭ i norü mugüwa. ²⁴ Rü ngēmacèx i Tupanaärü ore i ümatüxŭwa rü ñanagürü:

“Rü pegagu nixī na chixri Tupanachiga yadexagüxŭ i ngēma duŭxŭgü i tama Yudíugü ixīgüxŭ”,

ñanagürü. ²⁵ Pema rü pegü ípewiechèxmüpēxechiraŭgü na Tupanaärü duŭxŭgü pixīgüxŭcèx. Rü name nixī na penaxüxŭ i ngēma, ega aixcüma naga pexīnüēgu i Tupanaärü mugü. Natürü ngēxguma chi tama naga pexīnüēgu i Tupanaärü mugü, rü woo Yudíugü pixīgügu, natürü Tupanapēxewa rü taxuwama pexŭ name i ngēma na pegü ípewiechèxmüpēxechiraŭgüxŭ. ²⁶ Rü ngēma togü i duŭxŭgü i tama nügü íwiechèxmüpēxechiraŭgüxŭ, rü woo tama ngēma naxügu, natürü Tupanaärü duŭxŭgü tá nixīgü ega naga naxīnüēgu i norü mugü. ²⁷ Rü dücax, Pa Chaueneëgü i Yudíugüx, rü ngēma duŭxŭgü i tama íwiechèxmüpēxechiraŭgüxŭ natürü naga ñnüēxŭ i Tupanaärü mugü, rü ngēma duŭxŭ rü tá Tupana-pēxewa pexŭ nixu na ñuxācü pechixexŭ. Rü ngēmaācü tá pexŭ naxüpetü erü tama naga pexīnüē i Tupanaärü mugü i woochirēx na nüxŭ pecuāxŭ i ngēma mugü, rü woochirēx na ípewiechèxmüpēxechiraŭgüxŭ. ²⁸ Rü dücax, rü tama ngēma na Yudíuxacügu pixīgüxŭcèx nixī na aixcüma Tupanaxācügu pixīgüxŭ. Rü tama ngēma na ípewiechèxmüpēxechiraŭgüxŭcèx nixī na Tupanaärü duŭxŭgü pixīgüxŭ. ²⁹ Erü yíxema aixcüma tumaärü maxŭnewa Tupanaga ñnüxē tixī ya aixcüma Tupanaxācü ixīxē. Rü ngēxguma aixcüma taāewa yaxōxgu nixī i aixcüma Tupanaärü ixīxŭ. Rü Tupanaāe i Üünexŭ nixī i tüxŭ rüngüxēxŭ na yaxōxŭcèx, rü tama ngēma mugü ga Moíché ümatüxŭgagu nixī. Rü yíxema aixcüma Tupanaärü ixīxē, rü Tupana rü tümamaā nataāe woo duŭxŭgü tama tümamaā taāegügu.

3

¹ ¿Rü ñuxma rü tacüwa tüxŭ namexŭ na Yudíugü ixīgüxŭ? ¿Rü tacüwa namexŭ na íwiechèxmüpēxechiraŭgüxŭ? ² Rü poraācüxüchima tüxŭ name na Yudíugü ixīgüxŭ. Yerü nüma ga Tupana rü tüxnaxŭchi nixī ga naxāāxŭ ga norü mugü i ümatüxŭ. ³ ¿Rü tacü tá ngupetüxŭ i ñuxma ega ñuxre i tatanüxŭ i Yudíugü rü tama meā yanguxēēgüāgu i ngēma Tupana tüxŭ muxŭ? ¿Rü pexcèx rü ngēmacèx tāütāma yanguxēēāxŭ ya Tupana i ngēma tamaā inaxunetaxŭ? ⁴ Rü tama ngēmaācü nixī. Erü woo guxŭ i duŭxŭgü rü yadoratèxgügu, natürü Tupana rü taguma nidora rü guxŭguma nayanguxēē i ngēma nüma tamaā inaxunetaxŭ. Rü yemacèx norü ore ga Dabí ümatüxŭwa rü ñanagürü:

“Cumax, Pa Tupanax, rü aixcüma nixī i curü ore i nüxŭ quixuxŭ. Rü ngēxguma cuxŭ tangugügu rü nüxŭ tadaugü na aixcüma cumexŭ”,

ñanagürü. ⁵ Natürü duŭxŭgü rü ínatüe erü ñanagürügü:

“Rü nüetama nixī na chixexŭ ixügüxŭ erü ngēmaācü yexeraācü nangox na namecümāxŭ ya Tupana”, ñanagürügü. Rü ñanagürügü ta:

“Rü ngëxguma chi tórü chixexügagu yexeraäcü nangoxgu na aixcüma namecümaxü ya Tupana, rü maneca tama name ega tórü chixexücèx tüxü napoxcuegu”, ñanagürügü. ⁶ Natürü ngëma ñaxügu na naxĩnüëxü i duüxügü rü poraäcü ínatüe, erü tama ngëmaäcü nixĩ. Erü ngëxguma chi tama namexgu ya Tupana, çrü ñuxäcü chi i meã duüxügüxü yacagüxü i naãneärü guxgu? ⁷ Natürü i duüxügü rü ñanagürügü:

“Rü ngëxguma chi chorü chixexügagu yexeraäcü nangoxgu na ñuxäcü aixcüma namexü ya Tupana, çrü tüxcüü yĩxü i choxna naçaxü naxcèx i chorü chixexü rü choxü napoxcuxü naxcèx i ngëma?” ñanagürügü. ⁸ Natürü ngëma ñaxügu na naxĩnüëxü i duüxügü rü poraäcü ínatüe. Erü ngëxguma chi aixcüma yixügu i ngëma nagu naxĩnüëxü i duüxügü, rü chi narümemaë nixĩ na yexeraäcü chixexü naxügüxü na yexeraäcü mexü na ínguxuchixücèx. Rü dücax, Pa Chaueneëgüx, nangëxma i chixexü i duüxügü i choxü ügagümarexü i nüxü ixügüexü na ngëma yĩxü i chorü nguxëëtae i duüxügüxü namaã changüexëëxü. Natürü ngëma duüxügü i ngëma ñagüxü rü nagagu tátama napoxcue.

Guxãma i yixema rü taxüetüxügü

⁹ ¿Rü ñuxäcü nixĩ i ñuxmax? ¿Pexcèx rü yixema i Yudíugü rü togü i duüxügüarü yexera Tupanapëxewa imexü? Pemaã nüxü chixu rü tama ngëmaäcü nixĩ. Erü guxüma i duüxügü i Yudíugü ixígüxü rü guxüma i duüxügü i tama Yudíugü ixígüxü, rü naxüetüxügü. ¹⁰ Erü Tupanaärü ore i ümatüxüwa rü ñanagürü:

“Rü tataxuma ya texé ya aixcüma Tupanapëxewa mexë, rü bai ya wüxie.

¹¹ Rü tataxuma ya texé ya aixcüma nüxü cuáxe i Tupanaärü ore na ñuxäcü nanaxwëxexü na naxcèx imaxëxü. Rü tataxuma ya texé ya aixcüma Tupanacèx dauxe. ¹² Rü guxãma ítatüe, rü guxãma itayarütauxe rü chixexü taxügü i Tupanapëxewa. Rü tataxuma ya texé ya aixcüma mexü üechaxe, rü bai ya wüxie. ¹³ Rü tümaãx rü wüxi i yuetamaxü i ingenaxürüü nixĩ erü ngëma ítanaxüxüxëë i nagúxüraüxü i dexa i chixexü. Rü tümaärü conümaã rü poraäcü tidorae. Rü ngëma tümaärü dexa rü ñoma äxtapeguchatarüü nixĩ erü togüxü nachixexëë. ¹⁴ Rü chixexü i ore i duüxügüäëwa ngúxümaãxícatama tidexagü. ¹⁵ Rü ítamemare na duüxëxü timáxü. ¹⁶ Rü ngextá ítaxüxüwa rü togüxü tachixexëë rü tanangechaüxëë rü chixexügu tanayixëë. ¹⁷ Rü tama nüxü tacuèx na ñuxäcü togü i duüxügüxü tangechaügüxü rü meã natanüwa tamaxëxü.

¹⁸ Rü tama nüxü tacuáxchaü na Tupanaxü tamuüëxü”, ñanagürü i ngëma ore i ümatüxüwa. ¹⁹ Rü nüxü tacuèx rü ngëma poxcu i Tupanaarü mugüwa nüxü yaxuxü rü naxcèx nixĩ i ngëma Yudíugü ga natanüwa nanguxü ga yema mugü. Rü woo ngëma tama Yudíugü ixígüxü i duüxügücèx rü ta nixĩ i ngëma poxcu. Erü taxúema aixcüma naga taxĩnü i ngëma mugü. Rü ngëmacèx taxucürüwa texé Tupanapewa tügü ítapoxü i ngëxguma Tupana tüxü icagügu i tümaärü pecaduchiga. ²⁰ Rü ñuxma na taxúema aixcüma naga ñnüëxü i ngëma mugü, rü ngëmacèx taxucürüwama texé tügü tixu na ngëma mugü taxaurexügagu Tupanapëxewa tamexü. Erü ngëma mugü tüxü nüxü cuëxëëxü nixĩ na poraäcü ípecaduãgüxü.

Tórü õgagu nixĩ i Tupana tüxna naxãxü i maxü

²¹⁻²² Rü ñuxma na taxucürüwama Tupanapëxewa tüxü yamexëëxü i ngëma mugü, rü ngëmacèx ya Tupana rü tüxü nüxü nacuëxëë na ñuxäcü yĩxü i tüxü yamexëëxü na napëxewa imexücèx. Rü pemaã nüxü chixu rü Ngechuchu ya Cristuaxü na yaxõgüxügagu nixĩ i tüxü yamexëëxü ya Tupana na aixcüma

napēxewa imexūcèx. Rū yema mugū ga Moīché ūmatūxū rū yema ore ga nuxcūmaūgūxū ga orearū uruūgū ūmatūxū rū tūxū nūxū nacuēxēē i ngēma. Rū yema mexū ga Tupana taxcèx ūxū ga yexguma nūma namuāgu ga Nane na tórū pecadu naxūtanūxūcèx, rū guxū i duūxūgū i yaxōgūxūcèx nixī, erū Tupanapēxewa rū nawūxigu i guxūma i ngēma duūxūgū. ²³ Rū guxāma tipecaduāxgū rū nūxna tayaxūgugū ya Tupana ya tūxū maxēxēēcū. ²⁴ Natūrū ga Tupana rū poraācū tamaā namecūma rū yemacèx tūxū nangetanūācūma tūxū nimexēēgū na napēxewa imexūcèx. Rū ñuxma rū tūxū nangēxma i maxū i taguma gūxū, yerū Ngechuchu ya Cristu rū marū tūxū nanaxūtanū ga tórū pecadugū. ²⁵⁻²⁶ Rū Tupana rū aixcūma nūma nanamu ga Cristu na nayuxūcèx rū yemaācū tórū pecadu naxūtanūxūcèx na Tupana tūxū nūxū rūngūmaxūcèx i ngēxguma aixcūma Cristuaxū yaxōgūgu. Rū yemaācū nanaxū ga Tupana na tūxū nūxū nadauxēēxūcèx na ñuxācū nūma nūgūcèx tūxū yamexēēxū na aixcūma napēxewa imexūcèx. Rū nuxcūma ga Tupana rū yaxna namaā naxīnū ga duūxūgū ga yexguma chixexū naxūegu, rū tama paxa nanapoxcue. Rū ñuxma rū ta tūxū nanawēx na ñuxācū aixcūma namexū i ngēma nūma naxūxū erū tūxū ínanapi i tórū pecadugū. Rū ngēmaācū tūxū nūxū nadauxēē na ñuxma rū ta aixcūmacū yīxū i ngēxguma tūxū yaxuxgu na napēxewa marū timexū ya guxāma ya yīxema Ngechuchuaxū yaxōgūxe. ²⁷ Rū ngēmacèx i ñuxma rū taxucūrūwama yīgū ticuēxūūgū rū nūxū tixu na yixematama yīgū imexēēgūxū i napēxewa. Erū taxucūrūwama texé tūgū tamexēē i Tupanapēxewa. Rū tama ngēma na naxaurexūcèx i ngēma mugū nixī i imexū, rū tama ngēma na mexū ixūgūxūcèx nixī i imexū. Natūrū Tupanapēxewa time i ñuxma, erū Cristuaxū tayaxōgū. ²⁸ Rū yixema nūxū tacuèx rū ngēxguma Cristuaxū yaxōgūgu nixī i Tupanapēxewa imexū, rū tama ngēma mugū na ixauregūxūcèx nixī i napēxewa imexū. ²⁹ ¿Éxna pexcèx rū Tupana rū Yudíugūarū Tupanaxīcatama yīxū? ¿Rū tama ēxna i ngēma togū i duūxūgūarū Tupana rū ta yīxū? Ngēmaācūx, ngēma togū i duūxūgū i tama Yudíugū ixīgūxūārū Tupana ta nixī. ³⁰ Rū nūxū tacuèxgū na nangēxmaxū ya wūxitama ya Tanatū ya Tupana. Rū guxūma i duūxūgū i Cristuaxū yaxōgūxū, rū nūma ya Tupana rū nayamexēē na napēxewa yamexūcèx. Rū ngēmaācū i nūma ya Tupana rū Yudíugūxū nimexēē i ngēxguma yaxōgūāgu. Rū ngēxgumarūū ta nayamexēē i guxūma i togū i duūxūgū i ngēxguma Cristuaxū yaxōgūāgu. ³¹ Rū ñuxma na Cristuaxū yaxōgūxū, rū bexmana nagu perūxīnūē na ngēmaācū iyanaxoxēēxū i ngēma mugū. Natūrū tama ngēmaācū nixī. Erū ñuxma na Cristuaxū yaxōgūxū rū aixcūma tayanguxēē i ngēma Tupana tūxū muxū.

4

Abráū rū Tupanaāxū nayaxō rū yemacèx Tupana nūxū nixu na namexū

¹ ¿Rū ñuxma rū ñuxū ñagūxū tá i nachiga ga nuxcūmaūcū ga tórū oxi ga Abráū? ¿Rū ñuxācū nixī ga nūxū naxūpetūxū ga Tupanapēxewa? ¿Rū tūxcūū yīxū ga Tupana nūxū ixuxū ga Abráū rū mecū na yīxū? ²⁻³ Rū dūcax, yexguma chi wūxi ga norū puracū ga mexūcèx Tupanapēxewa namexgu ga Abráū, rū yexguma chi waxi nixī ga nūxū nayexmaxū ga tacūcèx nūgū na yacuēxūūxū. Natūrū taxucèxma Tupanapēxewa nūgū nicuēxūū ga Abráū, erū Tupanaārū ore i ūmatūxūwa rū ñanagūrū:

“Abráū rū Tupanaāxū nayaxō, rū yemacèx Tupana nanayaxu rū nūxū nixu na namexū”,
ñanagūrū i ngēma ore. ⁴ Rū ngēxguma texé wūxi i puracū ūxgu rū tūxū naxūtanūgu rū woetama tūmaārū natanū nixī rū tama āmare nixī i ngēma.

⁵ Natürü tama ngēmaācū nixī i ngēxguma Tupanaāxū yaxōxgu. Erü ngēxguma yaxōxgu, rü tama tacū rü puracū i mexūcèx nixī i Tupanapēxewa imexū, natürü Tupanapēxewa time erü tayaxō. Rü ngēmaācū Tupana tūxū nayaxu ya yíxema yaxōxē woo taxuūma i tacū rü puracū i mexū taxūxgu na ngēmacèx Tupana tūxū rüngūxēxū. ⁶ Rü nuxcūmaūcū ga āēxgacū ga Dabí rü ta tūmachiga nidexa ga guxema duūxē ga yaxōxē. Rü nüxū nixu ga na tataāēxū ga guxema duūxē yerü Tupanapēxewa tame, woo tama tacū rü mexū taxūxgu na yemaācū Tupanapēxewa tamexūcèx. ⁷ Rü nüma ga Dabí rü ñanagürü:

“Rü tataāēgü ya yíxema duūxēgü ya Tupana tūmaārü chixexūgūxū ngechaūxē rü tūmaārü pecadugūxū iyanangūmaxē. ⁸ Rü tataāē ya yíxema duūxē ya Tupana tama tūxū nagu naxīnūxē i tūmaārü pecadu”,

ñanagürü ga Dabí. ⁹ Rü dücax, ¿pexcèx rü ngēma taāē rü ngēma duūxūgü i Yudíugü ixīgūxūcèxicatama yīxū, rü ēxna ngēma togü i duūxūgūcèx ta yīxū? Dücèx, rü marü pemaā nüxū tixu rü Tupanapēxewa name ga Abráū yerü nayaxō. Rü yemacèx Tupana nanayaxu. ¹⁰ ¿Natürü ñuxgu nixī ga nayauxāxū? ¿Éxna marü ínawiechèxmüpēxechiraūguwena, rü ēxna naxūpa ga na ínawiechèxmüpēxechiraūxū? Rü pemaā nüxū chixu rü naxūpa nixī ga na Tupana nayaxuxū ga Abráū. ¹¹ Rü Tupana nayaxuxguwena nixī ga ínawiechèxmüpēxechiraūxū ga Abráū. Rü yema nixī ga norü cuèxruū ga nawa nüxū nacuáxū na aixcūma Tupana marü nayaxuxū rü nüxū nadauxū na namexū yerü nüxū nayaxō. Rü ngēmacèx i ñuxma ya Abráū rü tūmanatü yīxū ya guxāma ya yíxema yaxōgūxe woo tama ítawiechèxmüpēxechiraūgūgu. Rü ngēmaācū ya Tupana rü tūxū nayaxu ya guxāma ya yíxema yaxōgūxe, rü tūxū nadau na tímexū erü tayaxōgü. ¹² Rü ngēxgumarü ta ya Abráū rü tūmanatü nixī ya guxāma ya yíxema íwiechèxmüpēxechiraūgūxe rü Abráūrü yaxōgūxe. Natürü tama ngēma na tūgü ítawiechèxmüpēxechiraūgūxūcèx nixī i tūmanatü yīxū. Natürü tūmanatü nixī erü tayaxōgü yexgumarü ga na yaxōōxū ga nüma ga tanatü ga Abráū naxūpa ga na ínawiechèxmüpēxechiraūxū.

Abráū rü Tupanaāxū nayaxō rü yemacèx Tupana nayanguxēē ga norü uneta ga Abráūmaā nüxū yaxuxū

¹³ Rü Tupana rü Abráūmaā inaxuneta na nüma ya Abráū rü guxūma i naxrū yaxōgūxū rü tá na nayauxgūāxū i ñoma i naāne na noxrü yīxūcèx. Natürü tama yema na mugü naxaurexūcèx nixī ga Tupana yemaācū Abráūmaā ixunetaxū. Natürü yemaācū namaā inaxuneta yerü Abráū nayaxō, rü yemacèx Tupanapēxewa name. ¹⁴ Natürü ngēxguma chi ngēma duūxūgü i mugü auregūxūcèxicatama yixīgu i ngēma Tupanaārü uneta, rü natüçèxmamare chi nixī i ngēma na yaxōgūxū, rü chi ngēma Tupanaārü uneta rü taxuwama name. ¹⁵ Nüxū tacuèx rü ngēma mugü ga Moiché ümatūxū rü poxcuwa tūxū naga erü taxūema aixcūma meā tayanguxēē. Natürü yexguma chi natauxguma ga yema mugü rü tataxu chima na texé chixri yanguxēēxū. ¹⁶ Rü yexguma Tupana Abráūmaā ixunetagu na nüxū tá nangūxēēxū, rü Abráūārü ōgagu nixī ga namaā inaxunetaxū. Rü ngēmacèx i guxāma i yixema na Abráūrü yaxōgūxū rü taxcèx ta nixī ga yema Tupanaārü uneta ga Abráūmaā nüxū yaxuxū. Rü ngēmawa nüxū tacuèx rü tama yíxema mugü auregūxecèxicatama nixī i ngēma Tupanaārü uneta, natürü guxāma ya yíxema Abráūrü Tupanaāxū yaxōgūxecèx ta nixī. Rü ñuxma rü guxāma i yixema na Abráūrü meā yaxōgūxū rü Abráūācūgü tixīgü rü nüma rü tanatü nixī i Tupanapēxewa yerü nüxīra nayaxō. ¹⁷ Rü Tupanaārü ore i ümatūxūwa rü Abráūchigaxū nixu rü ñanagürü:

“Rü muxūma i duūxūgūnatū tá cuxū chixīxēē”,
ñanagürü. Rü Abráū rü Tupanaāxū nayaxō, rü yemacèx Tupana nayanguxēē
ga norū uneta ga namaā nūxū yaxuxū. Rü yima Tupana nixī ya wena
namaxēxēēcū i yuexū. Rü yimatama nixī ya naxücū i ngēma woo ñuxma
taxuxū. ¹⁸ Rü nūma ga Abráū rü aixcūma nayaxō ga yexguma Tupana nūxū
ñaxgu:

“Rü tá namuxūchi i cutaagū”,

ñaxgu. Rü woo ga Abráū ga marū yaguāxūchichirēx na yīxū rü na nangex-
acūxū, natürü nayaxōōma ga yema Tupanaārū uneta rü meā ínananguxēē
na wūxi ga nane tá nūxū yexmaxū. Rü yemaācū ningu na muxūma i
duūxūgūnatū yīxū, yema Tupana namaā nūxū ixuxūrū. ¹⁹ Rü Abráū
rü wixguxuchi 100 ga taunecū nūxū nayexma ga yexguma. Natürü tama
inayarūmaāchi ga na yaxōōxū woo nūxū na nacuáxū ga paxa tá na nayuexū
ga nūma rü namèx ga Chara rü marū poraācū nangupetūarū taunecūāxgūxū
ga na naxācūgūxūcèx. ²⁰ Rü yemaācū ga Abráū rü nayaxōōma na nūxū
tá nayexmaxū ga wūxi ga nane yema Tupana namaā ixunetaxūrū. Rü
tama nagu narūxīnū na Tupana ngürūāchi nawomūxēēxū. Natürü yexeraācū
Tupanaāxū nayaxōōma, rü nūxū nicuèxū. ²¹ Rü aixcūmaxūchi nayaxō na
naporaxū ya Tupana na yanguxēēāxūcèx i guxūma i ngēma norū uneta.
²² Rü yemacèx ga Tupana rü nūxū nixu na napèxewa namexū ga Abráū.
Yerü Tupana nūxū nadau ga ñuxācū aixcūma nūxū na yaxōōxū. ²³ Rü tama
Abráūchigaxicatama nixī ga naxūmatūxū ga Tupanaārū ore ga ñaxū:

“Rü Tupana rü nūxū nixu na napèxewa namexū ga Abráū, yerü nūxū nadau
ga ñuxācū aixcūma nūxū na yaxōōxū”,

ñaxū. ²⁴ Natürü guxāma i yixema na yaxōgūxūchiga ta nixī i ngēma ore.
Erü Tupana rü tórü ōgagu tūxū nade na napèxewa imexū i yixema i nūxū
na yaxōgūxū ya yima yuwa tórü Cori ya Ngechuchuxū írūdaxēēcū. ²⁵ Rü
Ngechuchuxū nixī ga namuxū ga Tupana na tórü pecaducèx nayuxūcèx. Rü
ñuxūchi nūma ga Tupana rü wenaxārū Ngechuchuxū ínarūdaxēē na nagagu
imexūcèx i Tupanapèxewa.

5

Ñuxma rü Tupanapèxewa tame erü Cristuaxū tayaxōgū

¹ Rü ñuxma rü Tupanapèxewa time erü tayaxōgū. Rü ngēmacèx marū
tama Tupanamaā taxuwanūāxgū i ñuxmax, erü tórü Cori ya Ngechuchu ya
Cristu rü marū tamaā nanangūxmūxēē ya Tupana. ² Rü Cristugagu nixī na
tamaā namecūmaxū ya Tupana i ñuxmax erü tayaxōgū. Rü nūxū tacuèx
rü guxūgutāma tamaā namecūma. Rü tataāēgū erü nūxū tacuèx na tūxū tá
nangēxmaxū i tachica i mexū i Tupanaxūtawa. ³ Rü ngēxgumarūū ta tataāēgū
i woo ngúxū ingegūgu. Erü nūxū tacuèx rü ngēma ngúxū rü tūxū narūngūxēē
na yexeraācū iporaexū rü yaxna namaā ixīnūēxūcèx. ⁴ Rü ngēxguma yaxna
namaā ixīnūēgu rü Tupana rü tamaā nataāē. Rü ngēma na tamaā nataāēxū
rü ngēmacèx meā ítananguxēē na tūxū tá nangēxmaxū i tachica i mexū i
Tupanaxūtawa. ⁵ Rü ñuxma na ínanguxēēxū na tūxū tá nangēxmaxū i tachica
i Tupanaxūtawa, rü ngēmacèx taxucèxma tangechaūgū. Erü Tupana rü
poraācū tūxū nangechaū. Rü ngēma Naāē i Üünexū i tūxna namuxū nixī i tūxū
nūxū cuèxēēxū i ngēma. ⁶ Rü yexguma taxucürūwama yigūtama imaxēxēēgu,
rü nawa nangu na Tupana yanguxēēxū ga yema norū uneta. Rü yexguma
nixī ga ñoma ga naānewa namuāxū ga Cristu na pecaduāxgūxūcèx nayuxūcèx.
⁷ Rü tama natauxcha na wūxie rü to i duūxūcèx tayuxū, woo wūxi i duūxū i
mexūcèx yixīgu. Rü woo tangēxmagu ya texé ya naxcèx yuchaūchiréxe i wūxi

i duūxū i aixcūma mexēchixū, natürü tama tüxū natauxcha i ngēma. ⁸ Natürü Tupana tüxū nüxū nadauxēē na ñuxācū tüxū nangechaūxū yerü yexguma ipecaduāxgūgu nixī ga taxcèx nayuxū ga Cristu. ⁹ Rü ñuxma rü Tupanapewa time yerü taxcèx nayu ga Cristu. Rü ngēmacèx meāma nüxū tacuèx rü nüma rü aixcūma tá tüxū ínanguxūxēē na tama tüxū napoxcuexūcèx ya Tupana. ¹⁰ Rü yexguma norü uwanügü ixīgūgu, rü nūmatama ga Tupana rü nügūmaā tüxū narüngüxmüēxēē ga yexguma nayuxgu ga Nane. Rü ñuxma na marü namaā irüngüxmüēxū, rü yexeraācū nüxū tacuèx na tüxū nangēxmaxū i maxū i taguma gūxū nagagu na namaxūxū i nūmax. ¹¹ Rü tama ngēxīcatama nixī. Natürü i ñuxma rü tórü Cori ya Ngechuchu ya Cristugagu rü Tupanamaā tataāēgü, yerü Cristugagu nixī ga Tupana ga tamaā nangüxmüxū.

Adáūchiga rü Cristuchiga

¹² Rü nüxiraxūcū ga yatü ga Adáūgagu nixī ga guxūma ga duūxūgūwa nanguxū ga pecadu. Rü pecadugagu ínangu i yu. Rü yemaācū guxūma ga duūxūgūwa naxūe na nayuexū, yerü guxūma nipecaduāx. ¹³ Rü naxūpa na Tupana Moīchéna naxāxū ga yema mugü ga naxūmatūxū, rü duūxūgü rü chixexū naxügüecha, rü yemacèx nayue. Natürü yema mugü rü tauta nayexma ga yexguma, rü yemacèx taxucürüwa texé nüxū tixu ga yema duūxūgü ga na chixri naga naxīnūēxū ga yema mugü. ¹⁴ Rü yema duūxūgü ga Adáūwena buexū rü tama Adáūrūū nanangōx ga yema orix ga Tupana nüxna chuxuxū. Natürü chixexū naxügü, rü yemacèx nayue. Rü yemaācū nixī ñuxmata Tupana Moīchéna naxā ga yema mugü ga naxūmatūxū. Rü Adáūwa inaxügü na nayuexū ga duūxūgü, natürü Cristuwa inaxügü na nayaxuxū i maxū i taguma gūxū. ¹⁵ Natürü yema chixexū ga Adáū üxū rü taxuacū nagu tanangu i ngēma āmare ga Tupana tüxna āxū, erü tama namaā nawūxigu. Rü aixcūma nixī ga wūxi ga yatüarü chixexūgagu na nayuexū i guxūma i duūxūgü. Natürü tama yemaācū tamaā nanaxū ga Tupana. Yerü nüma rü tüxū nangetanūācūma nüma nanamu ga Nane ya Ngechuchu ya Cristu na tórü pecaducèx nayuxūcèx. Rü yemaācū guma Cristugagu Tupana nanamaxēxēē i muxūma i duūxūgü. ¹⁶ Rü yema pecadu ga Adáū üxū rü taxuacūma nagu tanangu ga yema āmare ga Tupana tüxna āxū. Yerü wūxitama ga Adáūārü pecadugagu, rü Tupana nüxū nixu rü tá nayu naxcèx ga yema. Natürü Ngechuchu ya Cristugagu rü Tupana nüxū nixu na napēxewa imexū rü nüxna ínguxūxū i guxūma i tórü pecadugü. ¹⁷ Rü guxūma i duūxūgü nayue yerü wūxitama ga yatü ga Adáū rü pecadu naxū. Natürü tama yemaācū tamaā nanaxū ga Tupana, yerü ga nüma rü poraācū tamaā namecūma rü tüxū nangetanūācūma tüxū narüngüxēē. Rü ngēmacèx i ñuxma rü guxūma i ngēma duūxūgü i Tupana nüxū ixuxū na napēxewa yamexū, rü nūmatama ya Tupana rü Nane ya Ngechuchu ya Cristugagu nanamaxēxēē na namaā wūxigu āēxgacügü yixīgüxūcèx. ¹⁸ Rü yema Adáūārü chixexū rü poxcuwa nanagagü ga guxūma ga duūxūgü. Natürü yema mexū ga Ngechuchu ya Cristu üxū rü pecaduwa ínananguxūxēē i guxūma i duūxūgü i yaxōgüxū, rü nüxna nanaxā i maxū i taguma gūxū. ¹⁹ Rü guma nüxīraūcū ga yatü ga Adáū rü tama Tupanaga naxīnū. Rü yemaācū wūxitama ga yatūgagu rü muxūma ga duūxūgü rü nipecaduāx. Natürü ínangu ga guma yatü ga Ngechuchu, rü meā Tupanaga naxīnū. Rü gumagagu rü muxūma i duūxūgü rü tá nime i Tupanapēxewa. ²⁰ Rü Tupana rü Moīchéna nanaxā ga norü mugü na duūxūgüxū nüxū nacuèxēēxūcèx na ñuxācū poraācū pecadu naxügüxū. Natürü yexguma yexeraācū pecadu naxügügu ga duūxūgü, rü yexeraācū Tupanaāxū nangechaūtümüūgü. ²¹ Rü ñuxma woo pecadugagu na iyuxū, natürü Tupanaāxū tangechaūtümüūgü i guxūguma. Rü ngēmaācū pecaduwa

tūxū ínanguxūxēē na napēxewa imexūcèx rü tórü Cori ya Ngechuchu ya Cristugagu tūxū nangēxmaxūcèx i maxū i taguma gúxū.

6

Ñuxma rü tama pecadu ixügūxūcèx nixī i imaxēxū, natürü Cristucèx nixī i imaxēxū

¹ Rū ñuxma na Tupanaāxū ingechaütümüügūxū, ¿rū ñuxācū tá imaxēxū i ñuxmax? ¿Rü pexcèx rü namexū na pecadu ixügüechaxū na yexeraācū Tupanaāxū ingechaütümüügūxūcèx? ² Rū dücax, tama ngēmaācū nixī. Erü ñuxma pecaduchaxwa rü ñoma iyuxürüü tixīgü, erü marü tama naga taxīnūē. Rū ngēmacèx tama name i yeücürü pecadu taxügüecha. ³ ¿Tama ēxna nüxū pecuèx na tacücèx yīxū na íbaiūxū? Rū ítabaiū na ngēmaācū duūxūgūxū nawéxūcèx na aixcūma Ngechuchu ya Cristuarü duūxūgü na ixīgūxū. Rū yexguma íbaiūgu, rü nüma nayuxürüü yexma nayu ga tacüma ga nuxcūmaūxū. ⁴ Rū yexguma íbaiūgu, rü Cristu yuxürüü yexma nayu ga tacüma ga nuxcūmaūxū, rü Cristu itáxürüü inatèx ga yema tacüma ga nuxcūmaūxū. Rū yemaācū naxüpetü na wena imaxēxūcèx rü tūxū nangēxmaxūcèx i maxū i ngexwacaxūxū, yexgumarüü ga Ngechuchu na yuwa írüdaxū rü wena namaxūxū ga yexguma Nanatü ga Tupana norü poramaā ínadaxēēgu. ⁵ Rū ñuxma na Cristumaā wüxigu nayuxū ga tacüma ga nuxcūmaūxū, rü nüxū tacuèx na aixcūma Cristumaā tūxū nangēxmaxū i maxū i ngexwacaxūxū. ⁶ Rū nüxū tacuèx rü yema tórü maxū ga nuxcūmaūxū rü Cristumaā wüxigu curuchagu nayu na yexma yanaxoxūcèx ga yema tacüma ga chixexū. Rū ñuxma rü tama pecadutüüwa tangēxmagü, rü ngēmacèx marü tama naga taxīnūē. ⁷ Erü yíxema yúxe rü marü tama pecadutüüwa tangēxma na yeücürü pecadu taxüechaxūcèx. ⁸ Rū ñuxma na Cristumaā nayuxū ga tórü maxū ga nuxcūmaūxū, rü nüxū tacuèx na Cristurüü tūxū nangēxmaxū i maxū i ngexwacaxūxū. ⁹ Rū nüxū tacuèx rü ñuxma na yuwa ínadaxū ya Cristu, rü tagutáma wena nayu. Yerü nüma rü marü yuxū narüyexera. ¹⁰ Rū yexguma nayuxgu ga Cristu rü pecaducèx nixī ga nayuxū, rü noxtacüma yexma wüxicana ningutanü ga guxūma ga duūxūgüarü pecadugü. Natürü ñuxma na namaxūxū, rü Tupanacèx nixī i namaxūxū na Tupanaärü ngúchaū naxūxūcèx. ¹¹ Rū ngēxgumarüü ta i pema rü name nixī i pegügu perüxīnūē na marü peyuxū pecaduchaxwa rü Tupanacèx pemaxēxū, erü Ngechuchu ya Cristuarü duūxūgü pixīgü. ¹² Rū ngēmacèx rü tama name i pecadutüüwa pegü pengēxmagüxēē na pemaā inacuáxūcèx. Rü tama name i penaxüchica i pecadu na pexeneärü ngúchaūgü i chixexū pexū naxūxēēxūcèx. ¹³ Rü tama name i pecaduna penaxāgü i pexene na ngēmamaā chixexū pexügūxūcèx. Rü name nixī i Tupanana pegü pexāgü, erü ñoma duūxūgü i yuexū rü wena maxēxürüü pixīgü. Rü ngēmacèx name nixī i Tupanana penaxāgü i pexene na ngēmamaā mexū pexügūxūcèx. ¹⁴ Rū ñuxma rü tātáma pecadutüüwa pengēxmagü na pemaā inacuáxūcèx. Rü yexguma yema mugü ga Moíché ümatüxūwe perüxīxgu, rü pemaā inacuèx ga pecadu. Natürü i ñuxma rü Cristugagu Tupana pemaā namecūma, rü nüma nixī i pemaā inacuáxū i ñuxmax.

Ngēxguma wüxi i corimēxēwa yigü ingēxmagüxēēgu, rü ngēmaga nixī i ixīnūēxū

¹⁵ Rū ñuxma na tama yema Moíché ümatüxū ga mugütüüwa ingēxmagüxū, rü ñuxma na Tupana rü Cristugagu tamaā mecūmaxū, ¿rü ñuxācū tá imaxēxū? ¿Rü pexcèx namexū na yeücürü pecadu ixügüechaxū? Rü dücax, tama name na ngēmaācū imaxēxū. ¹⁶ Rü pema nüxū pecuèx rü ngēxguma wüxi i corimēxēwa pegü pengēxmagüxēēgu na naga pexīnūēxūcèx rü ngēma

tá nixī i perū cori ixīxū, rü pema rü norü duūxūgü tá pixīgü i ngēma cori i naga pexīnūēxū. Rü ñuxma rü pema tá nüxū pedaugü ngoxi ngēxūrūūxū perū me yixī na ngēmaga pexīnūēxūcèx. Rü ngēxguma pecadu i yuwa tüxū gagūxū perū me yixīgu, rü ngēma tá nixī i pemaā icuāxū. Rü ngēxguma perū me yixīgu na Tupanaga na pexīnūēxū, rü yimaga tá pexīnūē na napēxewa pimexūcèx. ¹⁷ Natürü Tupanana moxē chaxā, yerü woo pecaduga na pexīnūēchiréxū, natürü i ñuxma rü aixcūma naga pexīnūē i ngēma nguxēētae i marü peyaxuxū i Cristuchiga. ¹⁸ Rü ñuxma rü Tupanaärü duūxūgü pixīgü erü nüma rü chixexūna pexū ínguxūxēē na tama pecadu pexūgüechaxūcèx. Rü ngēmaācū pexū narūngūxēē na napēxewa pimexūcèx rü meā naxcèx pemaxēxūcèx. ¹⁹ Rü ñoma i naānecūāx i duūxūgūmaā chidexarūū nixī i tauxchaxū i oremaā pemaā chidexaxū i ñuxmax, erü pema rü woetama taguma nüxū pexīnūē i ñāā ore, rü ngürūāchi tāūtáma nüxū pecuèx i tacūchiga na yīxū i ngēma pemaā nüxū chixuxū. Rü dücax, rü nuxcūma rü ipenaxā ga pexene na namaā penaxūgūxūcèx ga nagúxūraūxū ga chixexū. Natürü i ñuxma rü name nixī i Tupanana pegü pexā na aixcūma napēxewa pexūūnegūxūcèx rü naxcèxicatama pemaxēxūcèx. ²⁰ Rü yexguma pecadutūūwa peyexmagūgu, rü taxucürūwama Tupanapēxewa mexū pexūgü ga yexguma. ²¹ ¿Natürü tacūwa pexū namexū ga yema chixexū i ñuxma rü wūxi i āne pexna āxū? Yerü yema chixexū rü yuwamare pexū nagagü, rü tama i maxūwa. ²² Natürü marü tama pecadutūūwa pengēxmagü i ñuxmax, erü marü nüxna ípenguū rü marü Tupanaärü duūxūgü pixīgü. Rü ngēma waxi nixī i poraācū pexū mexū erü ngēmagagu penayaxu i maxū i Tupanapēxewa ünexū rü ngēmawena tá penayaxu i maxū i taguma gúxū. ²³ Rü ngēma natanü na pecadu ixūxū, rü yu nixī. Natürü yíxema tórü Cori ya Ngechuchuaxū yaxōgūxe, rü Tupana tüxna nanaxāmare i maxū i taguma gúxū.

7

Wūxi i ngecü rü ngēxguma nayutegu rü marü tama ngītemēxēwa ingēxma. Rü ñuxma na taxcèx nayuxū ya Cristu, rü marü tama yema Moiché ūmatūxū ga mugütūūwa tangēxmagü

¹ Pa Chaueneēgūx, rü pema na nagu pexīxū i ngēma mugü, rü nüxū pecuèx rü ngēxguma tamaūxguxicatama nixī na ngēma mugütūūwa tangēxmaxū ya wūxichigü ya duūxē. ² Rü dücax, rü wūxi i ngecü i ātecü rü ngītemēxēwa ingēxma ega namaxyane ya ngīte, erü ngēma ñanagürü i ore i mugü. Natürü ngēxguma nayuxgu ya ngīte, rü marü tama ngītemēxēwa ingēxma. Rü yema mugü ga ngītemēxēwa ngīxū yexmaxēēxū ga noxri rü marü tama ngīmaā inacuèx. ³ Rü ngēmaācū i ngēxguma namaxyane ya ngīte rü to i yatūmaā inapexgu, rü pecadu ixü. Natürü ngēxguma marü nayuxgu ya ngīte, rü marü nüxna ínguxuchi i ngēma mugü ga ngītemēxēwa ngīxū yexmaxēēxū ga noxrix. Rü ngēxguma wenaxärü naxātegu rü taxuūma i chixexū ixü. ⁴ Rü ngēxgumarūū ta i pemax, Pa Chaueneēgūx, rü marü tama yema Moiché ūmatūxū ga mugütūūwa pengēxmagü yerü nüma ga Cristu rü pexcèx nayu. Rü ngēmacèx i ñuxma rü Cristu ga yuwa írüdacūarü pixīgü. Rü ngēmaācū nanaxü ya Tupana na naxcèx imaxēxūcèx, rü norü ngúchaū ixūgūxūcèx. ⁵ Rü yexguma nuxcūmaūxū ga tacūmawe rüxīxgu rü poraācū tanaxü ga taxūneärü ngúchaūgü woo yema mugü tüxna na nachuxuxū ga yema. Natürü yexguma nüxū icuèxgu na nachuxuxū ga yema pecadu ga ixūxū, rü yexeraācū tanaxūxchaū. Rü yemaācū ga yema tórü pecadugü rü yuwa tüxū nagagü. ⁶ Natürü i ñuxma rü marü tama ngēma mugütūūwa tangēxmagü, erü Tupana rü marü nüxna tüxū ínguxūxēē. Rü ngēmacèx i ñuxma rü ñoma

duūxūgū i iyuexūrū tixīgū i napēxewa i ngēma mugū, erū marū tama tamaā inacuèx. Rū ngēmacèx tama nagu taxī i ngēma nuxcūma ūmatūxū ga mugū, erū marū nūxna ítanguxū na Tupanaārū ngúchaū ixūgūxūcèx rū naxcèx na imaxēxūcèx namaā i tórū maxū i ngexwacaxūxū i Naāē i Üünexū tūxna āxū.

Ngēma pecadu i chowa ngēxmaxū rū chomaā inacuèx

⁷ ¿Rū ñuxū ñagūxū tá i ñuxmax? ¿Rū pexcèx rū yema mugū yīxū ga tūxū pecaduāxēēxū? ¿Rū dūcax, tama name i ngēmaācū nagu tarūxīnūē! Natūrū yexguma chi yema mugū rū tama choxū nūxū nacuèxēēgu, rū tāū chima nūxū chacuèx na pecadutūūwa chayexmaxū. Rū dūcax, rū yexguma chi yema mugū rū tāū chima choxū nūxū cuèxēēgu na wūxi i pecadu yīxū na toguāxārū ngēmaxūcèx chixauxāchixū, rū tāū chima nūxū chacuèx na pecadu yīxū i ngēma. ⁸ Natūrū yexguma yema mugū choxū nguxēēgu na nachixexū na toguāxārū ngēmaxū choxū ngúchaūxū, rū yexguma ga pecadu rū nayoxniē na yexeraācū choxū na nangúchaūxēēāxū. Rū ngēmaācū nūxū tadau rū ngēxguma chi natauxgu i ngēma mugū, rū tāū chima nūxū tacuèxgū na ñuxācū wūxi i chixexūchixū na yīxū i ngēma pecadu. ⁹⁻¹⁰ Rū noxri tauta yema mugūxū chacuèxgu, rū choma nagu charūxīnūgu rū chame. Natūrū yexguma yema mugūxū chacuèxgu, rū nūxū chicuèxāchi na chixexū chaxūxū rū ngēma chixexūcèx rū tá na chayuxū. Rū yemaācū ga yema mugū ga Tupana Moīchéna āxū na duūxūgūxū namaxēxēēxūcèx, rū choxū nayuxēēāma. ¹¹ Rū nūma ga pecadu rū nayoxniē namaā ga yema mugū. Yerū yexguma yema mugū choxū nguxēēgu na ñuxācū nachixexū ga yema pecadu, rū yexeraācū choxū nangúchaū ga yema pecadu. Rū yemaācū ga yema pecadu rū choxū nawomūxēē rū nayoxniē namaā ga yema mugū rū yuwa choxū naga. ¹² Natūrū yema mugū rū aixcūma naxūūne i Tupanapēxewa. Rū guxūma i ngēma Tupana tamaā nūxū ixuxū rū naxūūne rū aixcūma name rū tūxū narūngūxēē. ¹³ ¿Natūrū ñuxācū nixī i ngēma i ñuxmax? ¿Éxna pexcèx rū yema mugū yīxū ga yuwa choxū gaxū? Rū dūcax, rū tama ngēmaācū nixī. Erū ngēma pecadu nixī i Tupanaārū mugūmaā yoxniēxū na yuwa choxū nagaxūcèx. Rū ngēmaācū nūxū tacuèx na ñuxācū poraācū nachixexū i pecadu. Rū yexguma yema mugū choxū nguxēēgu na ñuxācū poraācū nachixexū ga yema pecadu, rū yexeraācū choxū nangúchaū ga yema chixexū rū yexeraācū chanaxūama ga pecadu. ¹⁴ Nūxū tacuèx i ngēma mugū rū Tupanaāē i Üünexūwa ne naxū. Natūrū choma rū duūxūmare chixī, rū ngēmacèx nixī i chomaā inacuáxū i ngēma pecadu i chaxūxū. ¹⁵ Rū tama nūxū chacuèx na tacū choxū ūpetūxū erū tama chanaxū i ngēma mexū i chanaxwèxexū na chaxūxū, natūrū ngēma chixexū i tama chanaxwèxexū na chaxūxū rū ngēmaāma nixī i chaxūxū. ¹⁶ Natūrū i ñuxma na chanaxūxū i ngēma tama chanaxwèxechiréxū na chaxūxū, rū ngēmawa nūxū chicuèxāchi na namexū i ngēma mugū. ¹⁷ Rū ngēmacèx i ñuxma rū tama chauechama nixī i chanaxūxū i ngēma chixexū. Natūrū ngēma pecadu i chowa ngēxmaxū nixī i chomaā icuáxū, rū ngēma nixī i chixexū choxū ūxēēxū. ¹⁸ Rū choma nūxū chacuèx rū wūxi i pecaduāxū i duūxūmare chixī, rū ngēmacèx chowa rū nataxuma i tacū i mexū. Erū woo chanaxwèxe na mexū chaxūxū, natūrū tama chomaā nanguxū na chanaxūxū. ¹⁹ Erū ngēma mexū i chanaxwèxexū na chaxūxū, rū tama chanaxū. Natūrū chanaxūama i ngēma chixexū i tama chanaxwèxexū na chanaxūxū. ²⁰ Rū ngēxguma chi chanaxūamagu i ngēma chixexū i tama chanaxwèxexū na chaxūxū, rū meāma nangox na tama chauechama chanaxūxū. Natūrū ngēma pecadu i chowa ngēxmaxū nixī i chomaā icuáxū rū chixexū choxū ūxēēxū. ²¹ Rū ngēmaācū nūxū chadau i

ñuxăcŭ na chiixŭ. Rŭ ngĕxguma mexŭ chaxŭchaŭgu rŭ choxŭ natauxcha na chixexŭăma chaxŭxŭ. ²² Choma rŭ chauăewa rŭ chorŭ me nixŭ i Tupanaărŭ mugŭ, rŭ naga chaxŭnŭchaŭ. ²³ Natŭrŭ ñăă chaxune i ñoma i naănecŭăx ixŭxŭwa, rŭ nangĕxma i ŭacŭ i tama naxŭxchaŭxŭ i ngĕma chauăe naxwĕxexŭ. Rŭ ngĕma pecadu i chowa ngĕxmaxŭ nixŭ i chomaă icuăxŭ rŭ chixexŭ choxŭ ŭxĕĕxŭ. ²⁴⁻²⁵ Rŭ ngĕmaăcŭ i choma rŭ chauăewa chayanguxĕĕchaŭ i Tupanaărŭ mugŭ, natŭrŭ ñoma i naănecŭăx i chaxune rŭ nanaxŭxchaŭ i ngĕma nanaxwĕxexŭ i pecadu. Rŭ taxucĕxma chataăe i chomax. ĵRŭ texĕ tá nŭxna choxŭ itanguxuchixĕĕ i ñăă pecadu i chowa ngĕxmaxŭ rŭ yuwa choxŭ gaxchaŭxŭ? Rŭ Tupanana moxĕ chaxă erŭ tŕrŭ Cori ya Ngechuchu ya Cristu rŭ tá choxŭ nŭxna ĩnganguxuchixĕĕ.

8

Tupanaăe i Ŭnĕxŭ naxwĕxexŭăcŭma tamaxĕ

¹ Rŭ ñuxma ya Tupana rŭ marŭ taxucĕxma nanapoxcue i ngĕma duŭxŭgŭ i Ngechuchu ya Cristuarŭ duŭxŭgŭ ixŭgŭxŭ. ² Erŭ Tupanaăe i Ŭnĕxŭ i Ngechuchu ya Cristugagu tŭxŭ maxĕxĕĕxŭ, rŭ nŭxna tŭxŭ ĩnganguxŭxĕĕ i pecadu na tama yuwa tŭxŭ nagagŭxŭcĕx. ³ Rŭ yema taxŭneărŭ ngŭchaŭgŭ rŭ marŭ nŭxŭ narŭyexera ga yema mugŭ ga Moĭché ŭmatŭxŭ. Rŭ yemacĕx ga yema mugŭ rŭ taxucŭrŭwa mexŭ tŭxŭ naxŭxĕĕ. Natŭrŭ nŭma ga Tupana rŭ marŭ nanaxŭ ga yema taxucŭrŭwa naxŭxŭ ga yema mugŭ. Yerŭ ga Tupana rŭ ñoma ga naănewa nanamu ga Nanexŭchi. Rŭ woo taxŭne i pecaduăxŭrŭŭ nixŭ ga naxŭne, natŭrŭ nŭma ga Nane rŭ taguma napecaduăx. Rŭ nŭma ga Nane rŭ tŕrŭ pecaducĕx nayu, rŭ yemaăcŭ inayanaxoxĕĕ ga norŭ pora ga yema pecadu ga taxŭnewa yexmaxŭ. ⁴ Rŭ yemaăcŭ nanaxŭ ga Tupana na tŭxŭ na natauxchaxŭcĕx na yanguxĕĕxŭ i ngĕma tŭxŭ namuxŭ i ngĕma mugŭ. Erŭ ñuxma rŭ tama ñoma i taxŭne naxwĕxexŭăcŭma tamaxĕ, natŭrŭ Tupanaăe i Ŭnĕxŭ naxwĕxexŭăcŭma nixŭ i imaxĕxŭ. ⁵ Rŭ yĭxema tŭmaxŭne naxwĕxexŭăcŭma maxĕxĕ, rŭ naxcĕx tadaugŭ i ngĕma ñoma i naănecŭăx naxwĕxexŭ. Natŭrŭ yĭxema Tupanaăe i Ŭnĕxŭ naxwĕxexŭăcŭma maxĕxĕ, rŭ ngĕma Tupanaăe i Ŭnĕxŭ naxwĕxexŭ nixŭ i naxcĕx tadaugŭxŭ. ⁶ Rŭ yĭxema Tupanaăe i Ŭnĕxŭ naxwĕxexŭcĕx daugŭxe rŭ tataăĕgŭ, rŭ tá tŭxŭ nangĕxma i tŭmaărŭ maxŭ i taguma gŭxŭ. Natŭrŭ yĭxema tŭmaxŭne naxwĕxexŭcĕx daugŭxe rŭ ngĕma rŭ tá yuwa tŭxŭ nagagŭ. ⁷ Rŭ yĭxema tŭmaxŭne naxwĕxexŭcĕx daugŭxe rŭ Tupanamaă tarŭxuwănŭgŭ. Rŭ tama Tupanaga taxŭnŭĕchaŭ erŭ taxucŭrŭwama naga taxŭnŭĕ. ⁸ Rŭ ngĕmacĕx ya yĭxema tŭmaxŭneărŭ ngŭchaŭwe rŭxŭxĕ, rŭ taxucŭrŭwa Tupanaărŭ ngŭchaŭ taxŭgŭ. ⁹ Natŭrŭ ngĕxguma aixcŭma pewa nangĕxmagu i Tupanaăe i Ŭnĕxŭ rŭ tama pexeneărŭ ngŭchaŭ pexŭ, natŭrŭ Naăe i Ŭnĕxŭărŭ ngŭchaŭ nixŭ i pexŭxŭ. Rŭ yĭxema tama tŭxŭ nangĕxmaxĕ i Tupanaăe i Ŭnĕxŭ i Cristu tŭxnaăxŭ, rŭ tama Cristuarŭ duŭxŭ tixŭ. ¹⁰ Natŭrŭ ngĕxguma pewa namaxŭxgu ya Cristu, rŭ peăxĕ rŭ namaxŭ erŭ Cristugagu Tupana pexŭ nŭxŭ inayarŭngŭma i perŭ pecadugu. Rŭ woo i pexene rŭ pecadugagu tá nayuama, natŭrŭ peăxĕ rŭ Cristugagu tá namaxŭ, erŭ Tupana pexŭ nadau na pimexŭ. ¹¹ Rŭ ngĕxguma pewa namaŭxgu i Naăe ya yima Tupana ga Ngechuchu ya Cristuxŭ ĩrŭdaxĕĕcŭ, rŭ nŭmatătama ya yima Cristuxŭ ĩrŭdaxĕĕcŭ tá wena nanamaxĕĕ i pexene i yuxwĕxexŭ, rŭ Naăe i Ŭnĕxŭ i pewa maxŭxŭ tá nixŭ i naxŭxŭ i ngĕma. ¹² Rŭ ngĕmacĕx, Pa Chaueneĕgŭx, rŭ tanaxwĕxe i Tupanaărŭ ngŭchaŭ taxŭ, rŭ tama tanaxwĕxe i taxŭne i pecaduăxŭărŭ ngŭchaŭ taxŭ. ¹³ Erŭ ngĕxguma chi pexeneărŭ ngŭchaŭ pexŭxgu rŭ tá ipeyarŭtauxe. Natŭrŭ

ngēxguma Tupanaãe i Üünexũârü ngũxēēmaã ipeyanaxoxēēgu i ngēma pexene üxchaũxũ, rü aixcũma tá pexũ nangēxma i maxũ i taguma gúxũ. ¹⁴ Erü guxãma ya yíxema Tupanaãe i Üünexũ tümamaã icuáxe, rü aixcũma Tupanaxãcügü tixĩgü. ¹⁵ Yerü tama penayauxgü ga wüxi ga naãxē ga pecaduwa pexũ gagüxũ rü ngemagagu wenaxarü Tupanaarü poxcucèx pemuũ. Natürü yema Naãxē ga peyauxgüxũ rü Tupanaãxē i Üünexũ i naxacügü pexũ ixĩgüxēēxũ nixĩ. Rü ngēmatama Naãe i Üünexũ nixĩ i tüxũ rüngüxēēxũ na tama imuũēxücèx na Tupanana ingaicamagüxũ rü:

“Pa Chaunatüx”, ñagüxũ nüxũ. ¹⁶ Rü ngēmatama Naãe i Üünexũ nixĩ i aixcũma tüxũ nüxũ cuèxēēxũ na Tupanaxãcügü na ixĩgüxũ. ¹⁷ Rü ñuxma na Tupanaxãcügü ixĩgüxũ i yixema, rü nüxũ tacuèx rü daxügüxũ i naãnewa tá tanayaxu i ngēma mexügü i Tupana tüxna ãxchaũxũ. Rü ngēmaãcü Cristumaã tá tüxũ nangēxma i tachica i mexü i Tupanaxütawa, erü Cristurüü ngúxũ tingegü na yixcūra wüxigu namaã mexüwa ingēxmagüxücèx.

Ngēma mexü i yixcūra tá nüxũ idauxũchiga

¹⁸ Rü dücax, choma nagu charüxĩnü rü ngēma ngúxũ i ñuxma ñoma i naãnewa ingegüxũ, rü taxuũma nixĩ i ngēxguma nagu nanguxgu i ngēma mexü i yixcūra tá nüxũ idauxũ i ngēxguma Cristumaã ingēxmagügu i daxügüxũ i naãnewa. ¹⁹ Rü ñuxma rü guxũma i tacü i Tupana üxũ rü taxü i norü ngúchaũmaã ínananguxēēgü i ngēma ngunexũ i nagu tá nataeguxü ya Cristu na Tupana guxüpxewa naxãcügüxũ iwéxũ. ²⁰ Rü nüxũ tacuèxgü rü yexguma pecadu naxüxgu ga guma nüxĩraücü ga yatü rü yexguma nixĩ ga nachixexũ ga guxũma ga yema Tupana üxũ. Rü tama yema Tupana üxũârü ngúchaũ nixĩ ga yema, natürü yemaãcü nüxũ naxüpetü yerü ga Tupana rü yemaãcü inaxuneta ga yexguma pecadu naxüxgu ga guma yatü. Natürü i ñuxma rü guxũma ga yema Tupana üxũ rü ínananguxēē na ngēma chixexüwa ínanguxüxücèx. ²¹ Erü ngēma ngunexũ i Tupana tá nagu nadexü i naxãcügü na naxütawa nangēxmagüxücèx, rü ngēxguma tá ta nixĩ i chixexüwa ínanguxüxēēãxũ i guxũma ga yema nümatama naxüxũ. Rü ngēmaãcü wenaxãrü noxrirüü tá name i guxũma. ²² Rü nüxũ tacuèx rü ñaa naane rü guxũma i nawa ngexmaxü rü ñoma wüxi i nge i ixraxacüchaxüçürüxũ poraãcü ngúxũ ninge ñuxmatáta nawa nangu i ngema ngunexũ i nagu Tupana wena nangexwacaxüxēēxũ i guxũma. ²³ Rü tama ñaa naanexĩcatama nixĩ i ngúxũ ingexü i ñuxma, natürü yixema i tüxũ ngexmaxü i Tupanaãxē i Üünexũ rü ta ngúxũ tingegü ñuxmatáta nawa nangu na Tanatü tüxũ dexü rü ngexwacaũxũ i taxünegü tüxna ãxũ. Rü woo tüxũ nangexma i Naãxē i Üünexũ ya Tupana tüxna muxü na norü ügü yixĩxücèx i ngema mexügü i Tupana tá tüxna naxãxũ i dauxügüxü i naanewa, natürü tanaxwèxe na ngemaxüchi ingugüxũ. ²⁴ Cristu tüxna nanaxã i maxü i taguma gúxũ, natürü ítananguxēēgümare na naxü-tawa ingugüxũ na nayauxgüxücèx i ngēma maxü. Natürü nüxũ tacuèx rü ngēxguma chi marü nüxũ idaugügu i ngēma írünguxēēgüxũ, rü taxucèxma tüxcüü ítananguxēēgü. Erü ngēma marü nüxũ idauxũ, rü taxucèxma ítananguxēē. ²⁵ Natürü ngēxguma tauta nüxũ idaugügu i ngēma írünguxēēgüxũ, rü tanaxwèxe i meã ítananguxēēgüecha ñuxmatáta nüxũ idaugü. Rü ngēmaãcü nixĩ i Cristuxü írünguxēēgüxũ. ²⁶ Rü Tupanaãe rü tüxũ narüngüxēē ta na iporaexücèx i ngēxguma ituraegu i tórü õwa. Rü yixema rü tama nüxũ tacuèx na ñuxãcü Tupanamaã idexagüxũ rü tacücèx iyumüxégüxũ. Natürü Naãe i Üünexũ rü naxauxãcüma ore i tama nüxũ icuáxũmaã Tupanamaã nidexa rü taxcèx nayumüxē. ²⁷ Rü Tupana ya meã tüxũ cuácü rü nüxũ nacuèx na ñuxü ñaxüchiga yĩxü i ngēma Naãe i

Ūünexŭ nüxŭ ixuxŭ. Erŭ ngēma Naãē i Ūünexŭ rŭ Tupana naxwèxexŭãcŭma Tupanaxŭ nacèèxŭ tŭmacèx ya yíxema Tupanaãrŭ duŭxŭgŭ ixīgŭxe.

Cristu rŭ tŭxŭ naporaexēãma na taxuŭma i guxchaxŭgŭ tŭxŭ narŭ- yexeraxŭcèx

²⁸ Rŭ nüxŭ tacuèx rŭ tŭmaãrŭ mexŭcèx nixŭ i Tupana ínanguxēèxŭ i guxŭma i ngēma tŭxŭ ũpetŭxŭ ya yíxema nüxŭ ngechaŭgŭxe ga nŭma nanaxwèxexŭãcŭma tŭxŭ nadexe. ²⁹ Rŭ woetama nuxcŭmama ga Tupana rŭ marŭ tŭxŭ nacuèx na texégŭ tá tixīgŭxŭ ya yíxema noxrŭ ixīgŭxe. Rŭ noxritama naãne ixŭgŭgumama tŭxŭ nade na Nanerŭŭ timexŭ i napèxewa, rŭ yima Nane rŭ tŭmamaã nayaxŭcèx rŭ tŭmamaã inacuáxŭcèx ya guxãma ya yíxema naēneēgŭ ixīgŭxe. ³⁰ Rŭ guxema noxri naãne ixŭgŭgumama Tupana tŭxŭ dexe, rŭ tŭmacèx naca na noxrŭ tixīgŭxŭcèx. Rŭ guxema tŭmacèx naçaxe, rŭ nŭgŭcèx tŭxŭ nimexēēgŭ. Rŭ guxema nŭgŭcèx tŭxŭ yamexēēgŭxe, rŭ daxŭwa tá tŭxŭ nagagŭ na guxŭgutãma naxŭtawa tangèxmagŭxŭcèx. ³¹ ¿Rŭ ñuxŭ ñagŭxŭ tá i ñuxma i ngēmachiga? Rŭ ngēxguma Tupana taétŭwa chogŭgu, ¿rŭ texé tá tŭxŭ rŭyexeraxŭ? ³² Yerŭ nŭma ga Tupana rŭ tama tŭxna nayanuxŭ ga Nanexŭchi. Natŭrŭ taxcèx inanamu ga Nane na taxcèx nayuxŭcèx i guxãma i yixema. Rŭ ñuxma na yemaãcŭ taxcèx inamuãxŭ ga Nane, ¿rŭ taux éxna tŭxna naxããxŭ i guxŭma i ñacŭ i inaxwèxexŭ na naxcèx imaxèxŭcèx? ³³ Rŭ Tupana tŭxŭ nade rŭ tŭxŭ nixu na napèxewa imexŭ. Rŭ ngēmacèx ¿rŭ texé tá napèxewa tŭxŭ tixugŭ na ichixexŭ? Erŭ Tupanatama nixŭ ya tŭxŭ ixucŭ na tŭxŭ nataxuŭma i chixexŭ. ³⁴ ¿Rŭ texé tá poxcuwa tŭxŭ tamugŭ i ñuxmax? ¿Pexcèx rŭ Cristu tá yŭxŭ? Dŭcèx, taxucŭrŭwama ngēmaãcŭ nixŭ yerŭ Cristu nixŭ ga taxcèx yucŭ na tŭxŭ namaxèxèxŭcèx. Rŭ tama ngēxŭcatama taxcèx naxŭ, natŭrŭ wenaxãrŭ ínarŭda. Rŭ ñuxma rŭ Tupanaxŭtawa nangèxma rŭ ngema ãèxgacŭ nixŭ. Rŭ ngema taétŭwa nachogŭ rŭ Tupanaxŭ taxcèx nacèèxŭ. ³⁵ ¿Rŭ ñuxma rŭ ñacŭ tá Cristuna tŭxŭ ixīgachixèèxŭ na tama tŭxŭ nangechaŭxŭcèx? Rŭ woo ngŭxŭ ingegŭgu, rŭ éxna guxchaxŭgŭ tŭxŭ ngèxmagu, rŭ éxna duŭxŭgŭ Cristugagu taxchi aiegu, rŭ éxna itaiyaegu, rŭ éxna ingexchirugŭgu, rŭ éxna ãŭcŭmaxŭwa ingèxmagŭgu, rŭ éxna duŭxŭgŭ tŭxŭ daixchaŭgu, natŭrŭ woo guxŭma i ngēma tŭxŭ ũpetŭgu, natŭrŭ ya Cristu rŭ tãŭtãma nüxŭ narŭchau na tŭxŭ nangechaŭxŭ. ³⁶ Natŭrŭ guxŭguma ãŭcŭmaxŭwa tangèxmagŭ, ngēma Tupanaãrŭ ore i ũmatŭxŭ nüxŭ ixuxŭrŭŭ. Erŭ ngēma ore rŭ ñanagŭrŭ:

“Rŭ cugagu duŭxŭgŭ toxŭ nadaixchaŭ rŭ duŭxŭgŭpèxewa rŭ ñoma carnerugŭ i daiwa íxŭrŭŭ tixīgŭ”,

ñanagŭrŭ i ngēma ore. ³⁷ Natŭrŭ woo guxŭma i ngēma tŭxŭ na ngupetŭxŭ, rŭ Ngechuchu ya Cristu ya tŭxŭ ngechaŭcŭ, rŭ tŭxŭ naporaexèèãma na taxuŭma i guxchaxŭgŭ tŭxŭ narŭyexeraxŭcèx, rŭ bai i ñacŭ. ³⁸⁻³⁹ Rŭ ngēmacèx aixcŭma chayaxŭ na taxucŭrŭwama ñacŭ Tupanana tŭxŭ ixīgachixèèxŭ na ngēmaãcŭ tama tŭxŭ nangechaŭxŭcèx. Rŭ woo iyuxgu rŭ woo imaxègu, natŭrŭ Tupana tá tŭxŭ nangechaŭècha. Rŭ taxucŭrŭwama Tupanana tŭxŭ nixīgachixèè i ñacŭ i norŭ orearŭ ngeruŭgŭ, rŭ éxna ñacŭ rŭ ngoxogŭ rŭ éxna ñacŭ i to i poraxŭ. Rŭ bai i ñacŭ i ñuxma tŭxŭ ũpetŭxŭ, rŭ bai i ñacŭ i yixcŭra tá ngèxmaxŭ, rŭ bai i ñacŭ i daxŭwa ngèxmaxŭ, rŭ bai i ñacŭ i naãnetŭŭwa ngèxmaxŭ, rŭ bai i ñacŭ i to i Tupana ũxŭ, rŭ taxucŭrŭwama Tupanana tŭxŭ nixīgachixèè na tama tŭxŭ nangechaŭxŭcèx. Rŭ ngēmaãcŭ nixŭ i tŭxŭ nangechaŭxŭ ya Tupana nagagu ya tŭrŭ Cori ya Ngechuchu ya Cristu.

9

Tupana rü nanade i Yudíugü na norü duüxüğü na yixíğüxüçèx

¹ Düçèx, Pa Chaueneëgüx, rü pemaã tá nüxü chixu i wüxi i ore. Rü ngëma ore i pemaã tá nüxü chixuxü rü aixcüma nixí erü Cristuarü duüxü chixí. Rü tama chidora. Rü chauãëwatama nüxü chacuèx na aixcüma na yíixü i ngëma ore erü Tupanaãë i Üünexü nixí i chauãëmaã icuáxü. ² Rü poraãcü changechaü, rü choxü nangúecha i chauãëwa, erü tama nayaxögü i chautanüxüğü i Yudíugü. ³ Rü aixcüma pemaã nüxü chixu rü guxüguma ngëma chautanüxügu charüxñü, rü poraãcü chanaxwèxe na Cristuaxü yaxögüáxü. Rü choma rü aixcüma íchamemare na poxcuwa choxü namuxü ya Tupana rü Cristuna choxü yaxügachixëëxü ega ngëmaãcü chi nüxü chayaxögüxëëgu rü chanamaxëxëëgu i ngëma chautanüxüğü i Yudíugü. ⁴ Rü nümagü rü chauxrüü Yudíugü nixíğü. Rü Tupana rü nuxcümaxüchima namaã inaxuneta na naxácüğü yixíğüxüçèx. Rü norü oxigü rü nüxü nadaugü na ñuxácü namexëchixü ga Tupana ga yexguma naxcèx nangoxgux. Rü Tupana rü norü oxigümaã inaxuneta rü ñanagürü nüxü:

“Rü ngëxguma chauga pexñüëgu rü tá pexü charüngüxëë”,
ñanagürü nüxü. Rü Tupana rü nüxna nanaxã ga yema mugü ga Moíché ümatüxü. Rü nanangüxëë na ñuxácü nüxü yacuèxüüğüxüçèx. Rü meãma namaã inaxuneta na Cristu rü naxcèx núma tá namuáxü na namaxëxëëáxüçèx rü nüxna na naxãáxüçèx i maxü i taguma gúxü. ⁵ Rü yema nuxcümaüğüxü ga tórü oxigütaa nixíğü i ngëma Yudíugü, rü ngëmacèx naxcèx ta nixí ga yema uneta ga tórü oxigümaã nüxü yaxuxü ga Tupana. Rü ngëma Yudíugütanüxüwatama nixí ga nabuxü ga Cristu ya Tupanaxüchi ixícü ya guxüetüwa ngëxmacü. Rü tanaxwèxe i guxüguma nüxü ticuèxüüğü. Rü ngëmaãcü yí. ⁶ Rü ñuxma rü woo tama guxü i Yudíugü na yaxögüxü, natürü taxucürüwama texé nüxü tixu na Tupana rü tama yanguxëëáxü i ngëma norü uneta. Erü ngëma Yudíugü rü tama aixcüma guxüma Tupanaärü duüxüğü nixíğü. ⁷ Rü tama guxüma i duüxüğü i Abráütaagü ixíğüxü, rü aixcüma Abráütanüxü nixíğü i Tupanapëxewa. Yerü ga Tupana rü Abráümaã nüxü nixu, rü ñanagürü:

“Rü cune ya Ichaátanüxüğü tá nixí i aixcüma cutanüxüğü ixíğüxü i chopëxewa”,

ñanagürü. Rü yemaãcü namaã inaxuneta woo na nayexmaxü ga togü ga Abráüxácüğü. ⁸ Rü ngëmawa meãma nüxü tacuèx rü tama ngëma na Abráütaa tixíğüxüçèx nixí i Tupanaxácüğü tixíğüxü. Natürü yíxema aixcüma Tupanaärü uneta nüxü ixuxürüüácüma yaxögüxe waxi tixí ya aixcüma Abráütaa ixíğüxe i Tupanapëxewa. ⁹ Yerü naxüpa ga na nabuxü ga Abráü nane, rü yema Tupanaärü uneta ga Abráümaã nüxü yaxuxü, rü ñanagürü:

“Rü naí ya taunecüarü ñúxgumaãcü tá wena nuã chaxü, rü cuxmèx i Chara rü tá ixãxácü i ngëxguma”,

ñanagürü. ¹⁰ Natürü tama Abráümaãxícatama nixí ga yemaãcü yadexaxü ga Tupana. Yerü tórü oxí ga Ichaá namèx ga Rebecamaã rü ta nidexa ga Tupana. Rü ngíma rü ngíteaxü ixãxácü rü nataxreëxpüx ga ngíne. ¹¹⁻¹³ Natürü yexguma tauta nabuegu rü taxuüma ga mexü rü éxna chixexü naxüegu ga yema ngínegü, rü Rebecamaã nidexa ga Tupana, rü ñanagürü:

“Rü ngëma nüxíra buxü i cune, rü ngëma wixweama buxüärü duüxü tá nixí”,
ñanagürü ngíxü. Rü yema dexe rü namaã nawüxigu i Tupanaärü ore i ümatüxü i ñaxü:

“Marü chanayaxu ya Acobu, natürü nüxü chaxo ya Echaú”,

ñaxŭ. Rŭ yemaãcŭ ga Tupana rŭ ngĩmaã nanangoxẽẽ na namẽxwa nangẽxmaxŭ na tũxŭ nayaxuxŭ ya yĩxema woetama nũxŭ ngúchaŭxẽ na tũmacèx naçaxŭ tama nagu naxĩnũãcũma i tacŭ rŭ mexŭ rŭ ěxna tacŭ rŭ chixexŭ na taxũxŭ. ¹⁴ ¿Rŭ ñuxŭ ñagũxŭ i ñuxmax? ¿Pexcèx rŭ Tupana rŭ chixexŭ naxũxŭ ga yexguma tama Acobuxŭ nangechaŭxŭrũ nũxŭ na nangechaŭgu ga Echaú? Rŭ dũcax, tama chixexŭ naxũ. ¹⁵ Yerũ norũ orewa rŭ Tupana rŭ Moĩchẽxŭ ñanagŭrũ:

“Rŭ ngẽxguma chi texemaã chamecũmachaŭgu, rŭ tũmamaã tá chamecũma. Rŭ choxŭ tá tangechaŭtũmũŭ ya yĩxema choxŭ ngechaŭtũmũŭchaŭxẽ”, ñanagŭrũ. ¹⁶ Rŭ ngẽmaãcŭ tama ngẽma tũmatama tanaxwèxexũgagu rŭ ěxna ngẽma taxũxũgagu nixĩ i Tupana tũxŭ yaxuxŭ ya texé. Natŭrũ tũxŭ nayaxu erũ nũxŭ tangechaŭtũmũŭ. ¹⁷ Rŭ yexgumarũŭ ta ga Tupana rŭ norũ ore i ũmatũxũwa rŭ ñanagŭrũ nũxŭ ga Equituaneãrũ ãẽxgacũ:

“Rŭ ãẽxgacũxŭ cuxŭ chingucuchixẽẽ na cuwa duũxũgũxŭ nũxŭ chadauxẽẽxũcèx i ñuxãcũ na chaporaxŭ. Rŭ ngẽmaãcũ chanaxŭ na guxŭ i duũxũgũ i guxŭ i naãnewa ngẽxmagũxŭ, nũxŭ na cuáxũcèx i chauchiga”,

ñanagŭrũ. ¹⁸ Rŭ ngẽmaãcũ ya Tupana rŭ nũxŭ tangechaŭtũmũŭ ya yĩxema nũxŭ ngechaŭtũmũŭchaŭxẽ. Rŭ ngẽxguma tũxŭ nataiãchiarũ maxũãxẽẽchaŭgu rŭ tũxŭ nanataiãchiarũ maxũãxẽẽ ya yĩxema tama nũxŭ cuáxchaŭxẽ. ¹⁹ Natŭrũ bexmana tá ñacurũgũ choxŭ:

“Rŭ ngẽxguma chi ngẽmaãcũ yixĩgu ya Tupana, ¿rŭ tũxcũŭ nũxŭ nixu na tagagu yĩxŭ na chixexŭ ixũgũxŭ rŭ tama naga ixĩnũẽxŭ? ¿Rŭ texé tabora na itayanaxoxẽẽxũcèx i Tupanaãrũ ngúchaŭ?” ñacurũgũ tá. ²⁰ Natŭrũ Pa Duũxũx, ¿texé quixĩ i cuma rŭ ngẽmacèx ngẽmaãcũ Tupanaxŭ cuyaxũgaxŭ? ¿Cuxcèx rŭ ěxna wũxi i tũxŭ i waixũmũwa ũxŭ rŭ namexŭ i ngẽma norũ ũruũmaã na ñaxŭ?

“¿Rŭ tũxcũŭ ngẽmaãcũ choxŭ cuxŭ na ngẽmaãcũ chixĩxũcèx i ñuxmax?” ñaxŭ. ²¹ Rŭ ngẽma tũxũãrũ ũruŭ rŭ waixũmũwa nanaxũ i tacŭ i nũma naxũxchaŭxŭ. Rŭ ngẽxguma nanaxwèxegu, rŭ ngẽma waixũmũwa nanaxũ i wũxi i tũxŭ na norũ merũŭ yĩxũcèx. Rŭ ngẽxguma nanaxwèxegu, rŭ ngẽmatama waixũmũwa nanaxũ i wũxi i tũxŭ na norũ guxchirechixŭ yĩxũcèx. ²² Rŭ ngẽxgumarũũtama nixĩ i naxũãxŭ ya Tupana. Erũ tũxŭ nanawéxchaŭ na ñuxãcũ naporaxŭ i nũma rŭ ñuxãcũ napoxcueãxŭ i ngẽma duũxũgũ i chixexŭ ũgũxŭ, natŭrũ poraãcũ yaxna namaã naxĩnũ i ngẽma duũxũgũ, rŭ tama paxa nanapoxcue i ngẽma ímemaregũxŭ na napoxcuxŭ. ²³ Natŭrũ ga Tupana rŭ inanawéxchaŭ na ñuxãcũ poraãcũ tamaã namecũmaxŭ i yixema na yaxõgũxŭ. Rŭ ngẽmacèx nixĩ i nũxŭ ingechaŭtũmũŭgũxŭ, rŭ nuxcũmamatama tũxŭ nadexŭ na naxũtawa ingẽxmagũxũcèx i daxũguxŭ i naãnewa i ngextá ínamexẽchixũwa. ²⁴ Rŭ ngẽmaãcũ i yixema na Yudĩugũ ixĩgũxŭ, rŭ tatanũwa Tupana tũxŭ nidexechi ya ñuxre na norũ duũxũgũ tixĩgũxũcèx. Rŭ ngẽxgumarũŭ ta i ngẽma tama Yudĩugũ ixĩgũxũtanũwa rŭ nayadexechi i togũ. ²⁵ Rŭ ngẽmacèx rŭ Tupanaãrũ ore ga Ochéa ũmatũxũwa rŭ ñanagŭrũ:

“Rŭ ngẽma duũxũgũ i tama chorũ duũxũgũchirẽx ixĩgũxŭ, rŭ: ‘Pema rŭ chorũ duũxũgũ pixĩgũ i ñuxmax’, ñacharũgũ tá nũxŭ. Rŭ ngẽma duũxũgũ i tama Yudĩugũrũŭ nũxŭ changechaŭchirẽxŭ, rŭ: ‘Pexŭ changechaŭ i ñuxmax’, ñacharũgũ tá nũxŭ. ²⁶ Rŭ noxri ga Tupana rŭ yema duũxũgũ ga tama Yudĩugũ ixĩgũxũmaã nũxŭ nixu, rŭ ñanagŭrũ nũxŭ: ‘Pema rŭ tama chorũ duũxũgũ pixĩgũ’, ñanagŭrũ nũxŭ. Natŭrũ yematama nachica ga ngextá nũxŭ íyemañaxũwa, rŭ wenaxãrũ yema duũxũgũ

ga tama Yudíugü ixíngüxümaã nidexa ga Tupana ya Maxëxëëruŭ, rü ñanagürü nüxü: ‘Pema rü chauxacügü tá pixíngü’, ñanagürü nüxü”.

Rü yema nixí ga Tupanaärü ore ga Ochéa ümatüxü. ²⁷⁻²⁸ Rü Yudíugüchiga rü ta nidexa i Tupanaärü ore, yerü nuxcümaücü ga norü orearü uruŭ ga Ichaxía rü ñanagürü:

“Rü woo namuxüchichirëx i Yudíugü yima naxnücü ya taxtüpechinüwa yimacürüŭ, natürü noxre tátama nixí i aixcüma nayauxgüxü i maxü i taguma gúxü. Rü paxa tá ínangu ya tórü Cori na napoxcueäxüçèx i guxüma i ngëma tama noxrü ixíngüxü”,

ñanagürü ga Ichaxía. ²⁹ Rü nümatama ga Ichaxía, rü ñanagürü ga ũpa:

“Rü ngëxguma chi nüma ya tórü Cori ya guxü i naãneärü yora rü tãü chima íyaxügüxëëãgu i ñuxre i tatanüxügü i Yudíugü, rü chi itayarüxoxochi, yexgumarüŭ ga na iyanaxogüxü ga guma ñänegü ga Chodoma rü Gomora namaã ga guxüma ga yema duüxügü ga yéma yexmagüxü”,

ñanagürü ga Ichaxía.

Yudíugü rü tama nayaxögüchaŭ i ore i mexü i Cristuchiga

³⁰ ¿Rü ñuxü ñagüxü i ñuxmax? Rü pemaã nüxü chixu rü ngëma duüxügü i tama Yudíugü ixíngüxü ga tama Tupanacèx daugüxü ga noxrix, rü ngëmatama duüxügü nixí i ñuxma Tupanapëxewa imexü yerü nayaxögü. ³¹ Natürü yema Yudíugü ga nagu íxchaüxü ga yema Moíchéarü mugü na Tupanapëxewa yamexüçèx, rü ínatüe. ³² ¿Rü ñuxäcü ínatüe? Düçèx, ínatüe yerü yema mugüguama naxí na Tupanapëxewa yamexüçèx, rü tama Ngechuchuaxü nayaxögüchaŭ. Rü yemaäcü ga Ngechuchu rü yema duüxügüçèx rü wüxi ga guxchaxü nixí. ³³ Rü ngëmachiga nixí i Tupanaärü ore i ümatüxü i ñaxü:

“Choma rü Yudíugütanüwa chanamu ya Cristu. Rü nüma rü ngëma Yudíugüçèx rü wüxi i guxchaxü tá nixí erü ngëxguma tama nüxü yaxögüãgu rü tá inayarütauxe. Natürü ngëma duüxügü i nüxü yaxögüxü, rü aixcüma tá namaxë”,

ñanagürü.

10

¹ Pa Chaueneëgüx, rü ngëma poraäcü chanaxwëxexü rü chorü yumüxëwa Tupanana naxcèx chaçaxü, rü ngëma nixí na guxüma i chautanüxügü i Yudíugü na yaxögüxü rü ngëmaäcü aixcüma Tupanaärü na yixíngüxüçèx.

² Rü aixcüma pemaã nüxü chixu, rü nümagü i Yudíugü rü aixcüma poraäcü Tupanagu narüxínüë rü nanaxügüchaŭ i Tupanaärü ngüchaŭ. Natürü ínatüe erü tama Cristuaxü nayaxögüchaŭ na ngëmaäcü Tupanapëxewa yamexüçèx.

³ Rü woo Tupana ñoma ga naãnewa nanamu ga Cristu na gumagagu Tupanapëxewa yamexüçèx i duüxügü, natürü nümagü i Yudíugü rü tama nüxü nacüëxgüchaŭ i ngëma. Rü nügütama nimexëëgüchaŭ, rü ngëmacèx nagu naxíãma i ngëma mugü ga Moíché ümatüxü rü tama Cristuaxü nayaxögüchaŭ na nagagu Tupanapëxewa yamexüçèx. ⁴ Natürü nüma ga Cristu rü nayan-guxëë ga yema mugü rü yemaäcü inayanaxoxëë na tama tamaã inacuáxüçèx i ngëma mugü. Rü yemaäcü nanaxü ga Cristu na guxüma i duüxügü i nüxü yaxögüxü rü aixcüma Tupanapëxewa yamexüçèx. ⁵ Rü Moíché nanaxümatü nachiga na ñuxäcü Tupanapëxewa tamexü ya wüxie ega naga taxínügu i ngëma mugü, rü ñanagürü:

“Tupana pexü namu na guxügütama meã peyanguxëëxü i guxüma i ngëma mugü erü ngëxguma naga pexínüëgu i guxüma i ngëma mugü rü tá pemaxë. Natürü ngëxguma tama naga pexínüëgu i wüxitama i ngëma mugü, rü tãütama pemaxë”,

ñanagürü. ⁶ Natürü ñuxma rü Tupanapëxewa time ega Cristuaxŭ yaxögügu. Rü ngëmacèx taxucèxma i cuãëwa rü ñacurügü:

“¿Texé tá daxŭguxŭ i naãnewa taxŭ na Cristucèx tayaçaxŭ na nuã naxŭxŭcèx rü tŭxŭ yanangŭxëxŭcèx na imexŭcèx i Tupanapëxewa?” ñacurügü. ⁷ Rü taxucèxma cuãëwa ñacurügü:

“¿Rü texé tá yuexŭtanüwa taxŭ na ngëxma Cristucèx tayadauxŭcèx na nuã tanagaxŭcèx?” ñacurügü. ⁸ Erü tama ngëmaãcü nixŭ i Cristucèx idauxŭ, yerü yema ore ga Moïché ümatŭxŭ rü ñanagürü:

“Rü marü cuxŭtawana nangëxma i Tupanaärü ore. Rü cuèxwaxma nangëxma na nŭxŭ quixuxŭcèx. Rü cuãëwa nangëxma na naga curŭxŭnŭxŭcèx”, ñanagürü. Rü ñuxma Pa Chaueneëgŭx, rü pemaã nŭxŭ chixu rü ngëmatama ore nixŭ i guxŭwama duŭxŭgümaã nŭxŭ tixuxŭ. Rü ngëma ore nixŭ i pexŭ nŭxŭ cuèxëxŭ na ñuxãcü pexŭ nangëxmaxŭ i maxŭ ega aixcŭma peyaxögügu. ⁹ Erü ngëxguma cuèxmaã nŭxŭ quixuxgu na curü Cori yŭxŭ ya Ngechuchu, rü ngëxguma cuãëwa cuyaxöxgu na yuwa Tupana ínadaxëxŭ, rü tá cuxŭ nangëxma i maxŭ i taguma gŭxŭ. ¹⁰ Erü taãëwa tayaxögü na ngëmaãcü Tupanapëxewa imexŭ. Rü taèxmaã nŭxŭ tixu na Ngechuchu rü tórü Cori yŭxŭ, rü ngëmaãcü tanayaxu i maxŭ i taguma gŭxŭ. ¹¹ Rü Tupanaärü ore i ümatŭxŭwa rü ñanagürü:

“Rü guxãma ya yŭxema ya Ngechuchuaxŭ yaxöxë, rü nüma ya Ngechuchu rü taxútãma tŭxŭ narümaãchiixë erü tá nayanguxëë i guxŭma i ngema tŭmamaã inaxunetaxŭ”,

ñanagürü. ¹² Rü Tupanapëxewa rü guxŭma i duŭxŭgü rü nawüxigu. Rü woo Yudŭgü yixŭgu rü ëxna woo tama Yudŭgü yixŭgu, natürü Tupanapëxewa rü nawüxigu i guxŭma i duŭxŭgü. Erü nüma ya tórü Cori, rü guxãärü Cori nixŭ. Rü nüma rü aixcŭma tŭxŭ namaxëxëë ya guxãma ya texé ya nŭxna çaxe na tŭxŭ namaxëxëxŭcèx. ¹³ Erü Tupanaärü ore i ümatŭxŭwa rü ñanagürü:

“Rü guxãma ya texé ya tórü Corina çaxe na tŭxna naxãaxŭcèx i maxŭ, rü tá tanayaxu i tŭmaärü maxŭ i taguma gŭxŭ”,

ñanagürü. ¹⁴ ¿Natürü ñuxãcü tá tórü Corina naxcèx tacagü, ega tama nŭxŭ tayaxögügu? ¿Rü ñuxãcü tá nŭxŭ tayaxögü, ega taguma nŭxŭ taxŭnŭëgu i nachiga? ¿Rü ñuxãcü tá nŭxŭ taxŭnŭë i norü ore, ega taguma texé tŭmamaã nŭxŭ ixuxgu? ¹⁵ ¿Rü ñuxãcü tá texé nŭxŭ tixu i Cristuchiga ega taxúema tŭxŭ nŭxŭ yarŭxuxëëgu? Rü ngëmacèx nixŭ i Tupanaärü ore i ümatŭxŭ i ñaxŭ:

“Rü wŭxi i taãë nixŭ na ínangugŭxŭ i Tupanaärü orearü uruŭgü na duŭxŭgümaã nŭxŭ yaxugŭxŭcèx i Tanatŭarü ore i mexŭ i Cristuchiga”, ñaxŭ. ¹⁶ Natürü tama guxŭma i duŭxŭgü naga naxŭnŭë i ngëma ore i mexŭ. Rü Ichaxía nŭxŭ ixuxŭrŭü nixŭ. Yerü ga nüma rü ñanagürü:

“Pa Corix, noxretama nixŭ i ngëma duŭxŭgü i toxŭ yaxögŭxŭ i ngëma ore i nŭxŭ tixuxŭ”,

ñanagürü. ¹⁷ Rü dücax, rü ngëma na Cristuchigaxŭ naxŭnŭëxŭwa nixŭ i ne naxŭxŭ na yaxögüaxŭ i duŭxŭgü. Rü ngëma nŭxŭ naxŭnŭëxŭ, rü ore i mexŭ i Cristuchiga nixŭ. ¹⁸ Natürü i ñuxma rü pexna chaca, ¿éxna pexcèx rü ngëma Yudŭgü rü taguma nŭxŭ naxŭnŭë i ngëma ore i mexŭ i Cristuchiga? Dücèx, ngëmaãcü marü nŭxŭ naxŭnŭë. Erü Tupanaärü ore i ümatŭxŭwa rü ñanagürü:

“Rü ngëma Tupanaärü orearü uruŭgü, rü guxŭwama i ñoma i naãnewa rü nŭxŭ nixugüë i norü ore. Rü ngextá ínangëxmagŭxŭwa i Yudŭgü, rü ngema rü ta nŭxŭ nixugü”,

ñanagürü i ngëma ore. ¹⁹ Natürü wena pexna chaca, ¿rü ngëma Yudŭgü rü tama ëxna nŭxŭ nicuèxãchitanü na Cristugagu yŭxŭ na Tupana nadexŭ i

duŭxŭgü i ñuxmax? Rŭ ngēmaācŭ nŭxŭ nacuèxgü. Yerü Tupanaärü ore ga Moïché ūmatŭxŭwa rŭ ñanagŭrŭ:

“Dŭcèx, Pa Yudíugŭx, choma rŭ tá chanamaxēxēē i ngēma duŭxŭgü i tama Yudíugŭ ixíguŭxŭ, rŭ ngēmacèx i pema rŭ tá pixāŭxāchigü. Rŭ ngēxguma chanamaxēxēēgu i ngēma togŭ i duŭxŭgü i tama choxŭ cuèxgŭchiréxŭ, rŭ pema i Yudíugŭ rŭ tá penuē erŭ nŭxŭ charŭngŭxēē i ngēma togŭ”, ñanagŭrŭ. ²⁰ Rŭ yemawena ga Ichaxía, rŭ tama namuŭ ga yema Yudíugŭmaā nŭxŭ na yaxuxŭ ga yema Tupanaärü ore ga ñaxŭ:

“Rŭ ngēma duŭxŭgü i tama Yudíugŭ ixíguŭxŭ i tama chauxcèx daugŭxŭ, rŭ choxŭ tá inayangaugü. Rŭ choma rŭ tá chaugŭ changoxēē naxcèx i ngēma duŭxŭgü i tama chauxcèx ícagŭchiréxŭ”,

ñaxŭ. ²¹ Rŭ Tupana rŭ Ichaxíawa Yudíugŭchiga nidexa rŭ ñanagŭrŭ:

“Rŭ guxŭ i ngunexŭgu rŭ nŭxna chaxuecha i ngēma duŭxŭgü i tama chauga ñnŭēchaŭxŭ rŭ chomaā nuèxŭ. Natŭrŭ tama choxŭ inarŭxñnŭēchaŭ”, ñanagŭrŭ.

11

Nangēxma i ñuxre i Yudíugŭ i Tupana dexŭ na aixcŭma noxrŭ yixíguŭxŭcèx

¹ Ñuxma pexna chaca rŭ, ¿pexcèx ēxna ya Tupana rŭ marŭ nŭxŭ naxo i norŭ duŭxŭgü i Yudíugŭ? Tama nixí i nŭxŭ naxoxŭ. Erŭ choma i Pauru rŭ Yudíu chixí. Rŭ Abráŭtanŭxŭ chixí, rŭ Abráŭtaa ya Beyamitanŭxŭ chixí. ² Rŭ nuxcŭmamata Tupana Yudíugŭmaā inaxuneta na norŭ duŭxŭgü yixíguŭxŭcèx, rŭ ñuxma rŭ tama Yudíugŭxŭ naxo. ¿Tama ēxna nŭxŭ pecuèx na ñuxŭ ñaxŭ ga Tupanaärü orearŭ uruŭ ga Ería? Rŭ Tupanaärü orewa nŭxŭ tadaugŭ rŭ Ería rŭ Tupanapēxewa poraācŭ yema Yudíugŭxŭ nixugŭ. ³ Rŭ ñanagŭrŭ ga Ería:

“Pa Corix, ngēma Yudíugŭ rŭ marŭ nanadai i curŭ orearŭ uruŭgŭ. Rŭ nagu napogŭe i ngēma nachicagŭ i ngextá duŭxŭgü cuxŭ ícuèxŭŭgŭxŭwa. Rŭ chaxicatama íchayaxŭāchi. Rŭ choxŭ rŭ ta nimèxgŭchaŭ”,

ñanagŭrŭ ga Ería. ⁴ Natŭrŭ Tupana nanangāxŭ, rŭ ñanagŭrŭ:

“Dŭcèx, choma rŭ marŭ choxŭ nangēxma i 7000 i yatŭgŭ i chaugŭxŭ chidexechixŭ. Rŭ nŭmagŭ rŭ taguma nŭxŭ nicuèxŭŭgŭ i ngēma tupanane-tachicŭnèxā i Baá”,

ñanagŭrŭ. ⁵ Rŭ ngēxgumarŭŭ ta nixí i ñuxmax. Rŭ woo muxŭma i Yudíugŭ tama nayaxŭgŭ, natŭrŭ nangēxma i ñuxre i Tupana namaā mecŭmaxŭgagu dexŭ. ⁶ Rŭ ñuxma na Tupana tŭxŭ ngechaŭxŭgagu tŭxŭ nadexŭ, rŭ taxucŭrŭwama texé nŭxŭ tixu na ŭacŭ rŭ mexŭ na ixŭgŭxŭgagu na yixíxŭ. Erŭ ngēxguma chi ŭacŭ rŭ mexŭ ixŭgŭxŭgagu yixgu na tŭxŭ nadexŭ, rŭ natŭcèxmamare chi nixí na nŭxŭ ingechaŭtŭmŭxŭgŭxŭ. ⁷ ¿Rŭ ñuxācŭ yíixŭ i ñuxmax? Rŭ ngēma rŭmumaēxŭ i Yudíugŭ rŭ tama nŭxŭ inayangaugŭ i ngēma maxŭ i naxcèx nadaugŭxŭ. Natŭrŭ ngēma noxretama i Yudíugŭ i Tupana dexŭ, rŭ ngemagŭ nixí i nŭxŭ iyangaugŭxŭ. Rŭ guxŭma ga yema togŭ ga Yudíugŭ rŭ Tupana ínanawogŭ yerŭ tama naga naxñnŭe. ⁸ Rŭ ngēmachiga nixí i Tupanaärü ore i ūmatŭxŭ i ñaxŭ:

“Tupanatama ngēma duŭxŭgŭaxŭ nanaguxchaxēē. Rŭ ngēmacèx woo nŭxŭ nadaugŭgu i ngēma ore i aixcŭma ixíxŭ, rŭ tama nŭxŭ nacuèxgŭéga. Rŭ woo nŭxŭ naxñnŭe i ngēma ore, rŭ tama nayaxŭgŭ. Rŭ ñuxma rŭ ta ngēmaācŭ nixí”,

ñanagŭrŭ. ⁹ Rŭ Dabí rŭ ta rŭ ñanagŭrŭ:

“Rŭ ngēma duŭxŭgŭ rŭ norŭ petacèx naxŭgŭxŭ i ōnagŭgagu rŭ norŭ muxŭma i ngēmamaxŭgŭgagu rŭ chixexŭgu tá nayi rŭ ngēmacèx tá napoxcue. ¹⁰ Rŭ

naãēwa rü tãütáma nüxŭ nacuèxgü, rü guxchaxüğü tá nüxŭ nangëxma. Rü ñoma wüxi i duŭxŭ i tacü i yaxŭ ípaxixŭrŭü tá nixŭgü namaã i norü guxchaxüğü”, ñanagŭrŭ.

Tupana nanamaxëxë i ngëma tama Yudíugü ixŭgŭxŭ

¹¹ Rü pexna chaca, rü ñuxma na Cristuxŭ naxoexŭ i ngëma Yudíugü, ¿rü pexcèx èxna rü ngëmacèx ya Tupana rü tá nüxŭ naxoxochixŭ? Tama nüxŭ naxo. Natürŭ ñuxma na tama Cristuaxŭ yaxögüãxŭ i ngëma Yudíugü, rü ngëmacèx ya Tupana rü nüxŭ narüngŭxëë rü nanamaxëxëë i ngëma tama Yudíugü ixŭgŭxŭ. Rü ngëmaãcŭ nanaxŭ ya Tupana na yaxãuxãchiexŭcèx i ngëma Yudíugü, rü Cristuaxŭ na yaxögüãxŭcèx. ¹² Rü yema na ínatüexŭ ga yema Yudíugü, rü yemagagu muxŭma ga togü ga duŭxŭgü nanayauxgü ga Tupanaãrŭ ngŭxëë i taxŭ. Rü yema na noxretama ga Yudíugü nayaxögŭxŭ, rü yemagagu Tupana nanamaxëxëë ga yema tama Yudíugü ixŭgŭxŭ. Natürŭ ngëxguma tá Tupanacèx nawoeguxgu i guxŭma i Yudíugü, rü Tupana rü tá yexeraãcŭ nüxŭ narüngŭxëë i guxŭma i ngëma duŭxŭgü i tama Yudíugü ixŭgŭxŭ. ¹³⁻¹⁴ Rü ñuxma Pa Duŭxŭgü i Tama Yudíugü Ixŭgŭxŭx, rü choxŭ nangëxma i wüxi i ore i pemaã nüxŭ chixuxchaŭxŭ. Rü dücax, petanüwa nixŭ i choxŭ namuxŭ ya Tupana na pemaã nüxŭ chixuxcèx i norü ore. Rü ñuxma rü aixcŭma meã chayanguxëë i ngëma puracŭ, erü chanaxwëxe na pexŭ nadaugŭxŭ i ngëma chautanüxŭ i Yudíugü na ñuxãcŭ Tupana pexŭ na rüngŭxëëxŭ. Rü ngëmaãcŭ tá nixãuxãchie i ñuxre i nümagŭ, rü tá Cristuaxŭ nayaxögŭ, rü ngëmaãcŭ tá nanayauxgü i maxŭ i taguma gúxŭ. ¹⁵ Nüxŭ tacuèx rü ngëma Yudíugü rü tama Cristuaxŭ nayaxögŭchaŭ i ñuxmax. Rü ngëmacèx ya Tupana rü nanade i ngëma togü i duŭxŭgü i tama Yudíugü ixŭgŭxŭ. Natürŭ ñuxma na ngëmaãcŭ yŭxŭ, ¿rü ñuxãcŭ tá nixŭ i ngëxguma Cristuaxŭ yaxögüãgu i ngëma Yudíugü, rü wena Tupana nadexgu? Rü wüxi i mexëchixŭ tá nixŭ naxcèx i ngëma Yudíugü. Erü ñoma wüxi i duŭxŭ i yuxŭ rü wenaxãrŭ maxŭxŭrŭü tá nixŭgü. ¹⁶ Rü Tupana rü wena tá nanade i ngëma Yudíugü i ngëxguma yaxögüãgu. Rü ngë-maãcŭ tá nixŭ, yerü nuxcŭmaŭcŭ ga nanatŭ ga Abrãŭ rü Tupanaãrŭ duŭxŭ nixŭ. Rü ngëmacèx i nataagŭ i Yudíugü rü Tupanaãrŭ duŭxŭgü ta nixŭgü. Rü ñoma wüxi i pãŭ i Tupanana ixãxŭrŭü tá nixŭ. Erü ngëxguma ngëma pãŭwa íraxŭ Tupanaãrŭ yixŭgu, rü ngëmawa nüxŭ tacuèx na guxŭma i ngëma pãŭ rü noxrŭ na yŭxŭ. Rü ngëma wüxi i nanetŭ i Tupanana ixãxŭrŭü tá nixŭ. Rü ngëxguma ngëma nanetŭchumëxã rü Tupanaãrŭ yixŭgu, rü ngëmawa nüxŭ tacuèx na guxŭma i ngëma nanetŭ rü noxrŭ na yŭxŭ. Rü ngëmaãcŭ tá nixŭ i ngëma Yudíugümaã nangupetŭxŭ, erü wüxi i ngunexŭgu rü guxŭma i nümagŭ rü Tupanacèx tá nawoegu. ¹⁷ Tupana nüxŭ naxo ga yema Yudíugü ga tama yaxögŭchaŭxŭ. Rü ñoma wüxi i orixchacŭü i idaexŭrŭü nixŭ ga yema Yudíugŭxŭ naxoxŭ. Natürŭ nachicŭü Tupana pexŭ nade woo tama Yudíugü na pixŭgŭxŭ. Rü wüxi i naŭxnecŭcŭãx i orixchacŭü rü orix i toxŭwa yarŭñaxcuchixŭrŭü pixŭgŭ. Rü ñuxma i pema rü ta pexŭ nangëxma i pechica i natanüwa i ngëma duŭxŭgü i Tupanaãrŭ ixŭgŭxŭ. Rü Tupana rü pexŭ narüngŭxëë rü pexŭ rü ta namaxëxëë. ¹⁸ Natürŭ pema i tama Yudíugü na pixŭgŭxŭ, rü tama name i pegŭ picuèxŭŭ rü nüxŭ pixu na ngëma Yudíugŭarŭ yexera pixŭgŭxŭ. Rü ngëxguma chi ngëmaãcŭ pegŭ picuèxŭŭgŭchaŭgu, rü name nixŭ i nüxna pecuèxãchie na tama petanüwa ne naxŭxŭ ga Cristu ya pexŭ maxëxëëcŭ, natürŭ Yudíugŭtanüwa nixŭ ga ne naxŭxŭ. Rü ngëma Yudíugŭgagu nixŭ i Tupana pexŭ dexŭ rü pexŭ namaxëxëëxŭ i ñuxmax. ¹⁹ Natürŭ bexmana tá ñaperŭgŭgü:

“Tupana rü marü nüxü naxo ga yema Yudíugü rü yemacèx nachicüü tüxü nade”, ñaperügügü tá. ²⁰ Ngēmaācū aixcūma nixī ga Tupana nüxü oxü ga yema Yudíugü yerü tama nayaxōgü. Rü ngēma na peyaxōgüxüçèxicatama nixī i nachicüü Tupana pexü dexü i ñuxmax. Rü ngēmacèx tama name i pegü picuèxüügü. ¡Natürü pexuāēgü na tama yema Yudíugüxü üpetüxürüü pexü üpetüxüçèx! ²¹ Yerü yema Yudíugü ga noxri Tupanaärü ixīgüxü, rü Tupana nüxü naxo yerü tama nayaxōgü. Rü yexguma yemaācū Tupana nüxü oxgu ga yema duüxügü rü pexü rü tá ta naxo ega täütáma peyaxōgüechagu. ²² Dücèx, na ñuxācū namecūmaxü ya Tupana. Natürü tüxü napoxcu ta ega tama aixcūma yaxōgügu. Rü nanapoxcue ga yema duüxügü ga chixexügu yixü, natürü pemaā rü namecūma. Natürü penaxwèxe i guxüguma nüma nanaxwèxexüācūma pemaxē rü peyaxōgü na guxüguma pemaā namecūmaēchaxüçèx. Erü ngēxguma tama nüma nanaxwèxexüācūma pemaxēgu rü tama peyaxōgüechagu, rü täütáma pemaā namecūma. Rü pexü rü tá ta naxo, rü tá pexü ínawogü. ²³ Natürü ngēxguma yaxōgüāgu i ngēma Yudíugü i ñuxma maxēxü, rü woo Tupana na nüxü oxü ga noxrix, natürü wena táxarü nanade erü nüxü nangēxma i pora na wenaxārü nadeāxüçèx ega aixcūma yaxōgüāgu. ²⁴ Rü pema na tama Yudíugü na pixīgüxü, rü tama Tupanaärü duüxügü pixīgü ga noxrix. Natürü Tupana pexü nade na noxrü pixīgüxüçèx. Rü ñuxma na yemaācū Tupana pexü dexü, rü ngēxguma yaxōgüāgu i ngēma Yudíugü, rü Tupana rü pexü nadexüärü yexera tá nüxü natauxcha na nadeāxü i ngēma Yudíugü, yerü woetama norü duüxügüchirēx nixīgü ga noxrix.

Wüxi i ngunexü rü guxüma i Yudíugü tá nanayauxgü i maxü i taguma gúxü

²⁵ Pa Chaueneēgü i Yaxōgüxüx, nangēxma i wüxi i ore ga noxri tama duüxügüxü nüxü nacuèxēēxü ga Tupana. Natürü chanaxwèxe i nüxü pecuèx i ngēma ore na tama nagu perüxīnūexüçèx na duüxügü i nüxü cuèxüchixü pixīgüxü, rü pexicatama Tupana pexü dexü. Rü dücax, noxretama nixī i ngēma Yudíugü i aixcūma yaxōgüxü. Rü ngēmaācū tá nixī ñuxmatáta yaxōgüā i guxüma i ngēma togü i duüxügü i Tupana dexü. ²⁶ Natürü ngēmawena rü guxütáma i Yudíugü rü tá ta nayaxōgü, rü tá nanayauxgü i maxü i taguma gúxü. Erü Tupanaärü ore i ümatüxüwa rü ñanagürü:

“Yima Cristu ya ínanguxüxēēcū, rü Yudíugütanüwatama ne naxü. Rü nüma rü tá Yudíugüxü chixexüwa ínanguxüxēē. ²⁷ Rü aixcūma norü pecaduwa tá íchananguxüxēē i ngēma Yudíugü. Rü ngēxguma tá nixī na aixcūma chayanguxēēxü i ngēma chorü uneta ga üpaxüchima Abráümaā nüxü chixuxü”,

ñanagürü ga Tupana. ²⁸ Natürü i ñuxma ya Tupana rü Yudíugüxü nadau na norü uwanügü yīxü erü tama nayaxōgü i ngēma ore i mexü. Natürü ngēmaācū naxüpetü na pexü natauxchaxüçèx na peyaxōgüxü i pema i tama Yudíugü na pixīgüxü. Natürü nüma ya Tupana rü ñuxma rü ta ngēma Yudíugüxü nangechaü yerü nuxcūmaügüxü ga norü oxigümaā inaxuneta na nüxü tá nangüxēēxü. ²⁹ Rü ngēxguma Tupana rü tacü i mexümaā inaxunetagu, rü aixcūma nayanguxēē i ngēma, rü taguma nüxü inayarüngüma. Rü ngēxgumarüü ta i ngēxguma texécèx nacaxgu, rü taguma nüxü inayarüngüma i ngēma. ³⁰ Rü pema na tama Yudíugü pixīgüxü, rü üpa rü tama Tupanaga pexīnūē. Natürü ñuxma na tama naga naxīnūēxü i Yudíugü, rü ngēmacèx Tupanaāxü pengechaütümüügü erü peyaxōgü i pemax. ³¹ Rü ngēma pexü ngupetüxürüü nixī i ngēma Yudíugüxü nangu-petüxü. Nümagü rü tama Tupanaga naxīnūē i ñuxmax, natürü ngēmaācū nüxü nangupetü na Tupanaāxü pengechaütümüügüxüçèx, rü nümagü rü ta

Tupanaāxū nangechaŭtümüügūxūcèx i ñuxmax. ³² Yerü nüma ga Tupana rü guxūma ga duūxūgūmaā nanaxuegu na chixexūwa nangēxmagūxū nagagu ga norü pecadugü. Natürü yemaācū namaā nanaxuegu ga Tupana na nüxū nangechaŭtümüügūxūcèx i guxūma i duūxūgü. ³³ Rü namexēchi ya tórü Tupana, rü poraācūxūchima tūxū narūngūxēē. Rü nüma rü nüxū nacuèxūchi erü guxūxūma nacuèx. Rü yixema rü taxucürüwama nüxū tacuèx i tūxcūū yīxū i tūxū nadexū, rü taxucürüwama nüxū tacuèx i guxūma i ngēma naxūxū i nümax. ³⁴ ¿Erü texé i tatanūwa nüxū tacuèx i guxūma i ngēma tórü Cori nagu rüxīnūxū? ¿Rü texé nüxū tacuèx na tórü Corixū taxucūxēxū? ³⁵ ¿Rü texé tūxira tacü rü āmare tórü Corina taxā, na yīxcama nüxī tacūmaā tūxū nataeguxēēāxūcèx? ³⁶ Erü guxūma i tacü ingēxmaxū rü Tupanaxūtawa ne naxī. Rü nüma nixī ga naxūāxū ga guxūma na noxrü yīxūcèx. Rü name nixī i guxūguma nüxū ticuèxūūgü rü tanataxēē. Rü ngēmaācū yī.

12

Pexū chacèèxū na pegütama Tupanana pexāgūxū na wūxi i āmare i maxūxū na pixīgūxūcèx

¹ Rü dücax, Pa Chaueneēgūx, ñuxācū Tupana poraācūxūchima tamaā namecūma. Rü ngēmacèx pexū chacèèxū na pegütama Tupanana pexāgūxū na wūxi i āmare i maxūxū na pixīgūxūcèx. Rü ngēma āmare nixī i aixcūma napēxewa üünexū rü namaā nataāēxū. Rü ngēmaācū nixī ya Tupana i nanaxwèxexū na nüxū picuèxūūgūxū. ² Rü tama name i ñoma i naānecūāx i duūxūgūcūmagu pexī. Natürü name nixī i Tupanana pegü pexāgü na nüma pexū naxūchicūxūcèx rü ngexwacaxūxū i peāē pexū ngēxmaxūcèx rü ngēmaācū naxcèxicatama pemaxēxūcèx. Rü ngēmaācū tá nüxū pecuèx i tacü nixī i Tupana pexū naxwèxexū na penaxūxū, rü tacü nixī i aixcūma mexū i napēxewa, rü tacü nixī i namaā nataāēxū. ³ Rü Tupana ya chomaā mecūmacū, rü choxū namu na pemaā nüxū chixuxūcèx i guxāma i pema na tama namexū na texé i petanūwa tūgü írütaxū rü tūgūgu tarūxīnūxū na togūarü yexera tīxū. Natürü name nixī na wūxichigü meā tūgü ngugūarü maxūāxū rü tūgūgu rüxīnūxū na ñuxācū Tupana tūxna naxāxū i tūmaārü cuèx wūxigu namaā i tūmaārü ō. ⁴ Rü dücax, rü taxūnewa nangēxma i taeru rü tachacūūgü rü taparagü rü muxūma i to i taxūneārü ngēmaxūgü. Rü wūxichigü i ngēma taxūneārü ngēmaxūgü rü nüxū nangēxma i noxrütama puracū. ⁵ Rü ngēxgumarūū ta i yixema na yaxōgūxū, rü woo na imuxū natürü wūxitama i duūxūgü tixīgü, erü Cristuarü duūxūgü tixīgü. Rü ngēmacèx i guxāma i yixema rü yigūmücūgü tixīgü, erü woetama wūxitama i duūxūgü tixīgü. ⁶ Rü wūxichigü i yixema, rü Tupana tūxna nanaxā i tórü cuèx i nüma nanaxwèxexū na tūxū nangēxmaxū. Rü tanaxwèxe i meāma nagu taxī i ngēma cuèx i Tupana tūxna āxū. Rü ngēxguma tūxna naxāāgu i tórü cuèx na norü orearü uruū ixīgūxūcèx, rü name nixī i ngēma ō i tūxū ngēxmaxūmaā tanaxū i ngēma puracū. ⁷ Rü ngēxguma tūxna naxāāgu i tórü cuèx na togūxū rūngūxēēgūxūcèx, rü name nixī i meāma tanaxū i ngēma. Rü ngēxguma texēna naxāāgu i tūmaārü cuèx na togūxū tangūxēēxūcèx, rü name nixī i meāma tanaxū i ngēma. ⁸ Rü yixema nüxū cuāxe na Tupanaārü oremaā togūxū tataāēxēēxū, rü name nixī i meāma tanaxū i ngēma. Rü yixema nüxū cuāxe na togūmaā tangauxū i tūmaārü ngēmaxū, rü name nixī i tūmaārü ngūchaūmaā tanaxū i ngēma. Rü yixema āēxgacū ixīxē rü name nixī i meāma tayanguxēē i ngēma puracū. Rü yixema nüxū cuāxe na togū tūxū ngechaŭtümüügūxū, rü name nixī i taāēācūma tanaxū i ngēma.

Ñuxăcŭ nanaxwèxe na namaxêxŭ i duŭxŭgŭ i Cristuaxŭ yaxôgŭxŭ

⁹ Rŭ name nixŭ i aixcŭma meăma pegŭ pengechaŭgŭ i wŭxichigŭ. ;Rŭ nŭxŭ pexo i guxŭma i tacŭ i chixexŭ ixŭxŭ! ;Rŭ nagu pexŭ i ngēma aixcŭma mexŭ ixŭxŭ! ¹⁰ Rŭ name nixŭ i wŭxichigŭ pegŭ pengechaŭgŭ, ñoma pegŭeneêxŭchixŭ pengechaŭxŭrŭ. Rŭ name nixŭ i naxcèx pedaugŭ na ñuxăcŭ peeneêgŭxŭ petaxêxŭ rŭ ñuxăcŭ pegŭ perŭngŭxêxŭ. ¹¹ Rŭ tama name i cuxo ega tacŭ rŭ puracŭ cuxŭ namŭxgu ya tórŭ Cori. Natŭrŭ name nixŭ i curŭ ngŭchaŭmaă cunaxŭ i norŭ puracŭ. ¹² Rŭ name nixŭ i petaăegŭ erŭ ípenanguxêê na Tupanaxŭtawa pengugŭxŭ. Rŭ ngêxguma tacŭ rŭ ngŭxŭ pexŭ ngupetŭgu, rŭ name nixŭ i yaxna namaă pexŭnŭê. ;Rŭ tama name i nŭxŭ perŭchaue na peyumŭxêgŭxŭ! ¹³ Rŭ ngêxguma nŭxŭ pedèuxgu na tacŭ nŭxŭ taxuxŭ i ngēma togŭ i yaxôgŭxŭ, rŭ name nixŭ i nŭxŭ perŭngŭxêê. ;Rŭ meă penayaxu i ngēma duŭxŭgŭ i pexŭtagu naxŭănexŭ! ¹⁴ Rŭ ngêxguma chi texé chixri pemaă ũpetŭgu, rŭ name nixŭ i tŭmacèx peyumŭxêgŭ na meă tŭxŭ naxŭpetŭxŭcèx. Rŭ ngēmaăcŭ name nixŭ i Tupanana tŭmacèx peca na tŭxŭ nangŭxêxŭcèx rŭ tama tŭxŭ napoxcuxŭcèx. ¹⁵ ;Rŭ wŭxigu tŭmamaă petaăegŭ ya yŭxema taăegŭxe! ;Rŭ wŭxigu tŭmamaă pexauxe ya yŭxema ngechaŭgŭxe rŭ auxexe! ¹⁶ ;Rŭ meă pegŭ pengechaŭgŭ i wŭxichigŭ! ;Rŭ tama pegŭ picuèxŭŭgŭ! ;Rŭ namaă pegŭ pewŭxiguxêê i ngema tama nŭgŭ icuèxŭŭgŭxŭ! ;Rŭ tama pegŭgu perŭxŭnŭê na togŭarŭ yexera nŭxŭ cuèxŭchigŭxŭ na pixŭgŭxŭ! ¹⁷ Rŭ ngêxguma texé chixexŭ pemaă ũxgux, ;rŭ tăŭtăma chixexŭmaă pexŭtanŭ! Natŭrŭ name nixŭ i naxcèx pedau na mexŭ pexŭxŭ i guxŭ i duŭxŭgŭpêxewa. ¹⁸ ;Rŭ naxcèx pedau na guxŭma i duŭxŭgŭmaă meă pemaxêxŭ rŭ namaă na iperŭngŭxmŭxŭcèx i guxŭguma! ¹⁹ Pa Chaueneêgŭ ya Pexŭ Changechaŭgŭxe, tama name i pegŭtama pexŭtanŭ ega texé tacŭ rŭ chixexŭ pemaă ũxgu. Natŭrŭ name nixŭ i Tupanamêxêgu penaxŭ i ngēma na nŭma napoxcuăxŭcèx. Erŭ Tupanaărŭ ore i ũmatŭxŭwa rŭ ñanagŭrŭ:

“Rŭ choxmêxwa nangêxma na duŭxŭgŭxŭ chapoxcuxŭ i norŭ chixexŭcèx. Rŭ choma tá nŭxŭ chanaxŭtanŭ i ngēma duŭxŭ i chixexŭ ũxŭ”, ñanagŭrŭ ya tórŭ Cori. ²⁰ Rŭ ngêxguma tacŭ rŭ chixexŭ cumaă naxŭxgu i togŭ, rŭ tama name i chixexŭmaă cunataeguxêê. Natŭrŭ name nixŭ i nagu quixŭ i Tupanaărŭ ore i ñaxŭ,

“Rŭ ngêxguma curŭ uwanŭ taiyèxgu, ;rŭ nachibŭxêê! Rŭ ngêxguma yaŭawaxgu, ;rŭ naxaxexêê! Erŭ ngêxguma ngēmaăcŭ cunaxŭxgu, rŭ poraăcŭ tá cunaxănexêê”, ñaxŭ. ²¹ Rŭ ngêxguma togŭ chixexŭ cumaă ũxgux, rŭ name nixŭ i cuxuăê na tama chixexŭgu cunguxŭcèx. Rŭ name nixŭ na mexŭ cuxŭxŭ namaă i ngēma duŭxŭ. Rŭ ngēmaăcŭ tá icuyanaxoxêê i ngēma chixexŭ i cumaă naxŭxchaŭxŭ.

13

¹ Rŭ name nixŭ i guxŭma i duŭxŭgŭ rŭ meă nórŭ âêxgacŭga naxŭnŭê. Erŭ Tupana nixŭ ya nŭxŭ unetacŭ i guxŭma i âêxgacŭgŭ. Erŭ nataxuma i âêxgacŭ i tama Tupana ingucuchixêxŭ. ² Rŭ ngēmacèx, texé ya tama tŭmaărŭ âêxgacŭga ŭnŭchaŭxê, rŭ Tupanaga nixŭ i tama taxŭnŭxŭ. Rŭ yŭxema tama naga ŭnŭêchaŭxê, rŭ tá tapoxcue. ³ Erŭ ngēma âêxgacŭgŭ rŭ tama ngēma mexŭ ŭgŭxŭărŭ poxcuruŭ nixŭ, natŭrŭ ngēma chixexŭ ŭgŭxŭărŭ poxcuruŭ nixŭ. Rŭ ngêxguma cunaxwèxegu na tama nŭxŭ cumuŭxŭ i wŭxi i âêxgacŭ, rŭ name nixŭ i meă cumaxŭ. Rŭ nŭma i âêxgacŭ rŭ tá cumaă nataăê. ⁴ Erŭ nŭma i âêxgacŭ rŭ Tupanaărŭ ngŭxêêruŭ nixŭ rŭ ngēmacèx nanamu na cuxŭ nangŭxêxŭcèx. Natŭrŭ ngêxguma chixri cumaŭxgu, rŭ ngêxguma tá waxi nixŭ i nŭxŭ cumuŭxŭ. Erŭ nŭma i âêxgacŭ rŭ tama natŭcèxma nixŭ

na nüxŭ nangēxmaxŭ i pora na cuxŭ napoxcuxŭ. Erü woetama Tupana nanamu na napoxcuāxŭcèx i ngēma duŭxŭ i chixri maxŭxŭ. ⁵ Rŭ ngēmacèx name nixŭ i naga cuxŭnŭ i curŭ āēxgacŭgŭ. Rŭ tama ngēma poxcuxŭ na cumuŭxŭcèxicatama nixŭ i namexŭ na naga cuxŭnŭxŭ, natŭrŭ name nixŭ i naga cuxŭnŭ erü marŭ nüxŭ cucuèx na namexŭ i ngēma. ⁶ Rŭ ngēmacèx name nixŭ i meā nüxŭ penaxŭtanŭ i ngēma dŭeru i perŭ āēxgacŭgŭcèx ixŭxŭ i ngēma nŭmagŭ nagu naxunetaxŭēxpŭx na nüxŭ penaxŭtanŭxŭcèx. Erü ngēma āēxgacŭgŭ rŭ Tupanaāxŭ nixŭ i napuracŭexŭ i ngēxguma naxŭāgu i ngēma puracŭ na pemaā inacuáxŭ. ⁷ Rŭ wŭxichigŭ i ngēma āēxgacŭgŭ, rŭ name nixŭ i nüxna penaxā i ngēma nüxna ŭxŭ. ;Rŭ nüxŭ penaxŭtanŭ i ngēma dŭeru i perŭ āēxgacŭgŭ nagu unetaxŭēxpŭx na nüxŭ penaxŭtanŭxŭ! ;Rŭ penaxŭx i ngēma ĩāneārŭ puracŭ i perŭ āēxgacŭgŭ pexŭ muxŭ na penaxŭxŭcèx! ;Rŭ nüxŭ pengechaŭgŭ rŭ naga pexŭnŭē i ngēma perŭ āēxgacŭgŭ! Erü ngēmaācŭ nixŭ i namexŭ na penaxŭxŭ. ⁸ Rŭ tama name i texéaxŭ tacŭ pengetanŭ. Natŭrŭ nangēxma i wŭxitama i ngetanŭ i taguma tŭxŭ ingutanŭxŭ. Rŭ ngēma nixŭ na yigŭ ingechaŭgŭxŭ. Rŭ ngēmacèx ya yŭxema aixcŭma tŭmamŭcŭxŭ ngechaŭxē rŭ marŭ tayanguxēē i guxŭma i ngēma Tupana tŭxŭ muxŭ. ⁹ Rŭ ñanagŭrŭ i Tupanaārŭ mugŭ:

“;Rŭ tāŭtáma naŭ i ngemaā icupe! ;Rŭ tāŭtáma cumáēta! ;Rŭ tāŭtáma cungŭx!
;Rŭ tāŭtáma toguāxārŭ ngēmaxŭ cuxŭ nangŭchaŭ!”

ñanagŭrŭ. Natŭrŭ ngēma mugŭ rŭ guxŭma i togŭ i Tupanaārŭ mugŭmaā rŭ wŭxigu nanu nagu i norŭ ore i ñaxŭ:

“;Rŭ nüxŭ nangechaŭ i cumŭcŭ na cugŭtama cungechaŭxŭrŭrŭ!”

ñaxŭ. ¹⁰ Rŭ yŭxema tŭmamŭcŭxŭ ngechaŭxē, rŭ taxuŭma i chixexŭ namaā taxŭ. Rŭ ngēmacèx i ngēxguma tamŭcŭxŭ ingechaŭgu, rŭ aixcŭma tayanguxēē i Tupanaārŭ mugŭ. ¹¹ Rŭ name nixŭ i tanaxŭ i guxŭma i ngēma, erü ñomaŭcŭŭ rŭ nangēxma i muxŭma i guxchaxŭgŭ. Rŭ name nixŭ i pegŭ ĩpemexēē rŭ paxa penaxŭ i tŭrŭ Coriarŭ puracŭ. Erü ñŭxma rŭ noxri yaxŭgŭguarŭ yexera ningaicamachigŭ i ngēma ngunexŭ i nagu tá taxcèx nataeguxŭ ya tŭrŭ Cori. ¹² Rŭ woo na naporaxŭ i Chataná i ñoma i naānewa i ñŭxmax, natŭrŭ paxa tá nagux i ngēma, rŭ paxa tá ínangu ya Cristu na nügŭxŭtawa tŭxŭ nagagŭxŭcèx. Rŭ ngēmacèx name nixŭ i nüxŭ tarŭxoe i guxŭma i chixexŭ ixŭgŭxŭ. Rŭ ñŭxma na nüxŭ icuáxŭ i Tupanaārŭ ore, ;rŭ ngŭxā yigŭna tadaugŭ na tama nagu iyixŭcèx i tacŭ rŭ chixexŭgŭ! ;Rŭ ngŭxā meā tamaxē na ngēmaācŭ nüxŭ rŭyexeragŭxŭcèx i guxŭma i chixexŭ! ¹³ ;Rŭ ngŭxā mexŭ taxŭgŭ rŭ meā tamaxē! Erü aixcŭma Cristuarŭ duŭxŭgŭ tixŭgŭ, rŭ tanaxwèxe i nüma nanaxwèxexŭācŭma tamaxē. Rŭ tama name na ingāxèxŭ rŭ na naxŭgŭxŭ i petagŭ i chixexŭ i duŭxŭgŭ nawa āŭgatanŭxŭ. Rŭ tama name i tingēāēmare rŭ ēxna to i chixexŭ taxŭgŭ, rŭ bai na yigŭ ichoxŭgagŭxŭ, rŭ bai i togŭchi ixaiexŭ naxcèx i norŭ ngēmaxŭgŭ. ¹⁴ Natŭrŭ name nixŭ i nacŭmagu pexŭ ya tŭrŭ Cori ya Ngechuchu ya Cristu, rŭ nüxna naxcèx peca na pexŭ nangŭxŭēxŭcèx na meā naxcèx pemaxŭxŭcèx. Rŭ tama name i naxcèx pedaugŭ na ñuxācŭ pexeneārŭ ngŭchaŭ na pexŭgŭxŭ.

14

Tama name i nüxŭ quixu i cueneē i yaxŭxŭ

¹ Rŭ ngēxguma petanŭgu naxāxchaŭgu i wŭxi i peeneē i tama perŭŭ meā Tupanaārŭ orexŭ cuáxŭ, rŭ name nixŭ i meā penayaxu. Natŭrŭ tama name i namaā pegŭ pechoxŭga naxcèx i nacŭmagŭ i nagu yaxŭxŭ i Tupanapēxewa.

² Rŭ dŭcax, nangēxma i ñuxre i taeneēgŭ i nagu rŭxŭnŭēxŭ na namexŭ na guxŭraŭxŭ i ōna nangŭxgŭxŭ. Natŭrŭ nangēxma i togŭ i taeneēgŭ i tama

aixcūma meā Tupanaārū orexū cuèxgūxū i tama namachi ngōxgūchaūxū. Rū nūmagū nūxū nacuèxgūgu rū Tupanapēxewa nachuxu na tacū rū namachi nangōxgūxū, rū ngēmacèx nixī i nabū rū orixgūxicatama nangōxgūxū. ³ Rū ngēxguma tangēxmagu ya texé ya namachi ngōxē, rū tama name i nūxū taxoox i ngēma togū i duūxūgū i tama namachi ngōxgūxū. Rū ngēxgumarūū ta ya yixema tama namachi ngōxē, rū tama name na nūxū tixuxū i ngēma duūxūgū i namachi ngōxgūxū, erū nūmagū rū ta Tupanaārū duūxūgū nixīgū. ⁴ Rū texé quixī i cuma rū ngēmacèx nūxū quixu i to i coriarū duūxūgū? Rū dūcax, pemaā nūxū chixu rū ngēma norū cori tá nixī i nangugūxū rū ngoxi mexū naxūx i ngēma norū duūxū, rū ēxna tama. Rū ngēma duūxū rū Tupanapēxewa rū tá name, erū nūma ya tórū Cori ya Cristu rū nūxū nangēxma i pora na nūgūcèx namexēēxū i ngēma duūxū. ⁵ Rū dūcax, nangēxma i ñuxre i duūxūgū i nagu rūxīnūēxū na ngūxchigaarū ngunexū rū togū i ngunexūārū yexera namexū na nagu Tupanaxū yacuèxūgūxū. Rū nangēxma i togū i duūxūgū i nagu rūxīnūēxū na guxūma i ngunexūgū rū nawūxīgūxū i Tupanapēxewa. Natūrū wūxichigū i yixema rū tanaxwēxe i meā taāēwa nūxū tacuèx na aixcūma Tupanapēxewa namexū i ngēma taxūxū rū tixōxū. ⁶ Rū yixema duūxē ya tacū rū ngunexū Tupanacèx íxūxūchixe, rū ngēmaācū tanaxū na ngēma ngunexūgu tórū Corixū ticuèxūūxūcèx. Rū yixema namachi ngōxē, rū ngēmaācū tanangōx na tórū Corixū ticuèxūūxūcèx, rū Tupanana moxē taxā naxcèx i ngēma tangōxū. Rū yixema tama namachi ngōxē, rū ngēmaācū tanaxū na tórū Corixū ticuèxūūxūcèx, rū tūma rū ta Tupanana moxē taxā naxcèx i ngēma nabū i tangōxū. ⁷ Rū ñuxma na ñoma i naānewa imaxēxū, rū taxūema tūgūcèxtama tamaxū rū ēxna tūgūcèxtama tayu. ⁸ Erū ñuxma na imaxēxū, rū tórū Coriarū ngūchaū na ixūgūxūcèx nixī i imaxēxū. Rū ngēxguma iyuegu, rū ngēma rū ta tórū Corimēxēwa nangēxma. Rū ngēmaācū nūxū tadau rū woo imaxēgu rū ēxna woo iyuegu, rū tórū Coriarū duūxūgū tixīgū, rū namēxwa tangēxmagū. ⁹ Rū yemacèx nixī ga nayuxū ga Cristu rū wenaxārū namaxūxū na tūmaārū Cori yīxūcèx ga guxāma ga guxema yaxōgūxe ga marū yuexe rū guxāma ya yixema yaxōgūxe ya ñuxma rū ta maxēxē. ¹⁰ Rū ngēmacèx Pa Chaueneēx, ¿rū tūxcūū i nūxū quixuxū i cueneē i yaxōxū? Rū cumax, Pa To i Chaueneēx, ¿rū tūxcūū i nūxū cuxoxū i cueneē? Erū guxātāma i yixema rū Tupanapēxewa tá tangugū na nūma tūxū nangugūxūcèx rū ngoxi ime rū ēxna tama. ¹¹ Erū Tupanaārū ore i ūmatūxūwa rū ñanagūrū ya tórū Cori: “Ngēma aixcūma na chamaxūxūrūū tá ta nixī i aixcūma guxūtāma i duūxūgū chopēxegu caxāpūxūgūxū, rū guxūtāma choxū icuèxūūgūxū”, ñanagūrū. ¹² Rū ngēmaācū nūxū tacuèx na wūxichigū i yixema rū aixcūma tá Tupanapēxewa na ingugūxū na namaā nūxū ixuxūcèx na ñuxācū imaxēxū rū tacū na íxūxū.

Tama name i chixexūgu cunanguxēē i cueneē i yaxōxū

¹³ Rū ngēmacèx nixī, Pa Chaueneēgūx, i tama namexū na tamūcūgūxū ixuechaū. Natūrū narūmemaē nixī i nūxū perūxoe i guxūma i tacū i peeneēgūxū pecadugu yixēēxū rū ēxna norū ōxū chixexēēxū. ¹⁴ Choma nūxū chacuèx rū nataxuma i ōna i Tupanapēxewa chixexū. Rū aixcūmaxūchi nūxū chacuèx i ngēma erū tórū Cori ya Ngechuchu ya Cristuarū duūxū chixī, rū nūma choxū nūxū nacuèxēē i ngēma. Natūrū ngēxguma chi texé nagu rūxīnūgu na tama Tupanapēxewa namexū i tacū rū ōna na tangōxū, rū name nixī i noxtacūma tama na tanangōxū ega nagu tarūxīnūgu na tama namexū i ngēma. ¹⁵ Rū ngēxguma ngēma cungōxūcèx tūmaāēwa cunanguxēēgu ya cueneē, rū cumaā nūxū chixu rū tama aixcūma tūxū cungechaū. Rū tama name i ngēma cungōxūgagu chixexūgu tūxū cunguxēē rū tūxū icuyarūtauxēē ya yixema

cueneē ya Cristu tūmacèx yuxe. ¹⁶ Rū ngēmacèx, woo cuxcèx namexgu i ngēma cuxūxū, natürü tama name na cunaxüamaxū ega ngēmacèx togū tá cuxū ixuxgu na pecadu yīxū i ngēma cuxūxū. ¹⁷ Rū ngēma Tupanapēxewa na imexūcèx rü tama tacü rü òna na ingōxū rü ēxna tacü rü axexū na ixaxūxūgagu nixī. Natürü napēxewa na imexūcèx rü tanaxwèxe i Naāē i Üünexūārü ngūxēēmaā meā tayanguxēē i ngēma Tupana naxwèxexū rü yigūmaā itarüngüxmūē rü aixcūma tataāēgū napēxewa ya Tupana. ¹⁸ Rū yīxema ngēmaācū Cristucèx maxūxē, rü Tupana rü tūmamaā nataāē, rü guxūma i duūxūgū rü ta tūmamaā nataāēgū. ¹⁹ Rū ngēmacèx, jngīxā naxcèx tadaugū i guxūma i nacūma i mexū i yigūmaā tūxū rüngüxmūēxēxū! jRū ngīxā yigū tarüngūxēē na yexeraācū iyaexūcèx i tórü òwa rü Tupanaārü orewa! ²⁰ Rū tama name i tacü rü òna na cungōxūgagu icuyanax-oxēē i Tupanaārü puracü i cueneēārü maxūwa. Rū aixcūma nixī i guxūma i ònagū i namexū i Tupanapēxewa. Natürü wūxi i chixexū nixī ega ngēma òna i ingōxūgagu chixexūgu nayixēēgu i taeneēgū. ²¹ Rū ngēmacèx tama name i cunangōx i namachi, rü ēxna cuyaxaxū ya binu, rü ēxna cunaxū i tacü i to, ega ngēmagagu chixexūgu cunanguxēēgu i cueneē i yaxōxū. ²² Rū ngēxguma cuma nagu curūxīnūgu na namexū na cunangōxū i ngēxūrūxūmare i òna, rü Tupanapēxewa rü name nixī i cuxicatama nūxū cucuèx i ngēma. Rū tataāē ya yīxema tūmaāēwa nūxū cuáxe na Tupanapēxewa namexū i ngēma taxūxū. ²³ Natürü ngēxguma wūxie nagu rūxīnūgu na tama namexū i Tupanapēxewa na tacü rü òna na tangōxū, rü pemaā nūxū chixu rü chixexū taxū ega tanangōxomagu, erü tūmaāēwa nagu tarūxīnū na tama aixcūma namexū i ngēma taxūxū. Rū guxūma i ngēma tūmaāēwa nagu tarūxīnūxū na nachixexū rü aixcūma pecadu taxū ega tanaxūmagu.

15

Name nixī i cumūcūxū cutaāxēxēē

¹ Rū yīxema na iporaexū i tórü òwa, rü name nixī i nūxū tarüngūxēē i ngēma tamūcūgū i turaexū i norü òwa. Rū tama name i yigūguxicatama tarūxīnūē rü tóxrūcèxicatama tadaugū. ² Natürü wūxichigū i yīxema rü name nixī i taeneēāxū tanangūchaūxēē na ngēmaācū nūxū rüngūxēēxūcèx na yexeraācū yaxōōxūcèx. ³ Yerü woo ga Cristu rü tama noxrütama ngūchaū naxū. Natürü nayanguxēē ga yema Tupanaārü ore ga ñaxū:

“Pa Chaunatūx, rü ngēma duūxūgū i cumaā guxchigagūxū, rü chomaā nixī i naguxchigagūxū”,

ñaxū. ⁴ Rū guxūma ga yema nuxcūma ümatūxū ga Tupanaārü orewa, rü naxūmatü na tūxū nanguxēēxūcèx na taguma nūxū rüxoexū ega woo tacü rü guxchaxū tūxū üpetūgu. Rū yema Tupanaārü ore rü naxūmatü na tūxū nataāēxēēxūcèx rü tūxū nūxū nacuèxēēxūcèx na aixcūma Tupanaārü ixīgūxū. ⁵ Rū Tupana nixī ya tūxū rüngūxēēcū na yaxna namaā ixīnūēxūcèx i guxūma i guxchaxūgū. Rū nūma nixī i tūxū nataāēxēēxū. Rū chanaxwæe i nūma ya Tupana pexū narüngūxēē na aixcūma ngēma Cristu pexū naxwæexūācūma pemaxēxū. ⁶ Rū chanaxwèxe na ngēmaācū pemaxēxū na guxāma i pema rü wūxigu nūxū picuèxūūgūxūcèx ya Tupana ya Nanatü ya tórü Cori ya Ngechuchu ya Cristu.

Duūxūgū i tama Yudíugū ixīgūxūmaā nūxū nixu i ore i mexū

⁷ Rū ngēmacèx, yema Cristu pexū na dexūrūü rü name nixī i wūxichigū meā pegū peyaxu na ngēmaācū Tupanaxū yacuèxūūgūxūcèx i duūxūgū. ⁸ Rū pemaā nūxū chixu rü Cristu nūma naxū na Yudíugūxū yanangūxēēxūcèx, na yemaācū yanguxēēāxūcèx ga yema uneta ga nuxcūmaūgūxū ga tórü

oxigümaã nüxŭ yaxuxŭ ga Tupana. Rŭ yemaãcü ga Cristu rŭ tüxŭ nüxŭ nadauxëẽ na aixcŭmacü na yïxŭ ya Tupana rŭ aixcŭma yanguxëẽãxŭ i ngëma norü uneta. ⁹ Rŭ yexgumarüŭ ta ga Cristu rŭ núma naxŭ naxcèx i ngëma duŭxŭgü i tama Yudíugü ixígxŭ na nümagü rŭ ta Tupanaxŭ yacuèxüŭgŭxŭcèx naxcèx na poraãcü Tupanaãxŭ nangechaŭtümüŭgŭxŭ. Rŭ yemachiga nixí ga yema Tupanaãrŭ ore ga Dabí ũmatŭxŭ ga ñaxŭ:

“Rŭ ngëmacèx guxŭ i nachiŭãnecŭãx i duŭxŭgŭpëxewa tá cuxŭ chicuèxŭ. Rŭ tá chorü wiyaewa cuxŭ chataxëẽ”,

ñaxŭ. ¹⁰ Rŭ toxnamana i Tupanaãrŭ ore i ũmatŭxŭwa rŭ ñanagürü:

“Pa Duŭxŭgü i Tama Yudíugü Ixígxŭ, rŭ name nixí i pema rŭ wüxigu chorü duŭxŭgü i Yudíugümaã petaãgü”,

ñanagürü. ¹¹ Rŭ toxnamana, rŭ ñanagürü ta:

“Pa Duŭxŭgü i Tama Yudíugü Ixígxŭ, rŭ name nixí i nüxŭ picuèxüŭgü ya tórü Cori. Rŭ Pa Guxŭma i Nachiŭãnecŭãx i Duŭxŭgŭx, rŭ name nixí i penataxëẽ”,

ñanagürü. ¹² Rŭ Ichaxía rŭ ta nanaxŭmatü rŭ ñanagürü:

“Rŭ Dabí nanatü ya Ichaiwa tá ne naxŭ i wüxi i nataa i tá Cristu ixíxŭ. Rŭ nüma tá nixí i norü ãëxgacü yïxŭ i guxŭma i ngëma duŭxŭgü i tama Yudíugü ixígxŭ. Rŭ ngëma duŭxŭgü rŭ tá aixcŭma nüxŭ nayaxŭgü rŭ tá ínananguxëëgü na yimagagu Tupana nüxŭ rŭngŭxëëgŭxŭ”,

ñanagürü. ¹³ Rŭ ñuxma i pema na nüxŭ peyaxŭgŭxŭ rŭ chanaxwèxe i poraãcü pexŭ nataãëxëẽ ya yima Tupana ya pexŭ rŭngŭxëëcü na meã Cristuxŭ ípenanguxëëgŭxŭcèx. Rŭ ngëmaãcü i Tupanaãë i Üünexŭ rŭ tá pexŭ naporaexëẽ na yexeraãcü Cristuxŭ ípenanguxëëgŭxŭcèx. ¹⁴ Pa Chaueneëgŭx, meãma nüxŭ chacuèx na guxŭ i duŭxŭgümaã pemecŭmaxŭ, rŭ aixcŭma Tupanaxŭ na pecuáxŭ, rŭ aixcŭma meãma pegü pixucuxëgŭxŭ. ¹⁵ Natürü ñaã poperawa rŭ meãma pexcèx chanaxŭmatü i ñuxre i Tupanaãrŭ ucuxëgü, erü tama chanaxwèxe i nüxŭ ipeyarŭngümaë. Rŭ tama chamuŭ na pexcèx chanaxŭmatŭxŭ i ngëmachiga yerü Tupana nixí ga choxŭ mucü na pemaã nüxŭ chixuxŭcèx. ¹⁶ Rŭ nüma nixí ga choxŭ namuxŭ na Ngechuchu ya Cristuarü puracü chaxŭxŭcèx i natanüwa i ngëma duŭxŭgü i tama Yudíugü ixígxŭ. Rŭ ngëma puracü ga nawa choxŭ namuxŭ nixí na ngëma duŭxŭgümaã nüxŭ chixuxŭ i ore i mexŭ na Tupanaxŭtawa chanagagŭxŭcèx, na wüxi i ãmare i Tupana namaã taãxŭ i ngëma duŭxŭgü i Naãë i Üünexŭ imexëëgŭxŭ.

¹⁷ Rŭ ñuxma na Ngechuchu ya Cristuarü duŭxŭ na chíxŭ, rŭ ngëmacèx chataãë namaã i ngëma puracü i Tupanaãxŭ chaxŭxŭ. ¹⁸⁻¹⁹ Rŭ ñuxma rŭ yema Cristu chorü maxŭwa ũxŭchigaxŭxŭcatama nixí i chixuxŭ. Rŭ nüma nixí ga choxŭ nangŭxëëxŭ na Tupanaxŭtawa chanagagŭxŭcèx ga yema duŭxŭgü i tama Yudíugü ixígxŭ, na nümagü rŭ ta Tupanaga naxíñüëxŭcèx. Rŭ yemaãcü chorü oremaã, rŭ chorü puracümaã, rŭ cuèxruŭgü ga taxŭ ga Tupana ũxŭmaã, rŭ Naãë i Üünexŭãrŭ poramaã Tupanaxŭtawa chanagagü ga yema duŭxŭgü. Rŭ yemaãcü Yerucharéŭwa rŭ guxŭwama ñuxmata Íliricuarü naãnewa meãma chayanguxëẽ na nüxŭ chixuxŭ ga yema ore i tüxŭ maxëëëxŭ i Cristuchiga. ²⁰ Rŭ yemaãcü chapuracü na nüxŭ chixuxŭcèx ga Tupanaãrŭ ore i mexŭ ga ngextá taguma ñuxgu Cristuchigaxŭ ínaxíñüëxŭwa ga duŭxŭgü. Yerü tama chanaxwèxe ga marü togü nüxŭ íxuxŭwa rŭ duŭxŭgü marü nüxŭ ícuáxŭwa nüxŭ na chixuxŭ ga yema ore. ²¹ Rŭ yemachiga nixí ga Tupanaãrŭ ore ga Ichaxía ũmatŭxŭ ga ñaxŭ:

“Rŭ yíxema taguma Cristuchigaxŭ cuèxgŭxe, rŭ taguma nachigaxŭ ñnüëxë, rŭ tá nüxŭ tacuèxgü i nachiga”,

ñaxŭ.

Pauru rü Dumawa naxūxchaŭ

²² Rü yema toxnamana na chapuracūxūcèx nixī ga taxucürüwa petanüwa chaxūxŭ woo muēxpūxcünachirēx yéma chaxūxchaŭ. ²³ Natürü ñuxma na marü chanaguxēēxŭ i ngēma puracü i toxnamana, rü nagu charūxīnū na petanüwa chaxūxŭ. Yerü ñuxgumamatama nixī ga nagu charūxīnūēchaxŭ na petanüwa chaxūxchaŭxŭ. ²⁴ Rü ngēxguma Españawa chaxūxgu, rü nagu charūxīnū na woe pexūtagu íchidauxŭ. Rü nagu charūxīnū na ñuxre i ngunexŭ ngēxma petanügu charūxāŭxŭ. Rü wūxi i chorü taēē tá nixī i ngēma. Rü ngēmawena rü chanaxwèxe i choxŭ perüngŭxēē na Españawa chaxūxūcèx. ²⁵ Natürü i ñuxma rü Yerucharéŭwa tá chaxŭ, na ngēma chanangexūcèx i ñuxre i dīeru naxcèx i taeneēgü i ngēma ngēxmagūxŭ. ²⁶ Erü ngēma taeneēgü i yaxōgūxŭ i Machedóniāānēwa rü Acayaanēwa ngēxmagūxŭ, rü norü ngúchaŭmaā nagu narūxīnūē na ngīxŭ nanutaquēxegūxŭ i ñuxre i dīeru na ngēmaācū nūxŭ nangūxēēgūxūcèx i taeneēgü i nūxŭ nataxuxŭ i Yerucharéŭwa ngēxmagūxŭ. ²⁷ Rü ngēma taeneēgü i Machedóniācŭāx rü Acayacŭāx rü norü me nixī na ngēmaācū naxūgūāxŭ. Rü ngēma duŭxūgü rü aixcūma nūxŭ nangēxma i norü ngetanü i taeneēgü i Yudíugütanüwa. Erü ngēma taeneēgü i Yudíugūgagu nixī i ngēma togü i duŭxūgütanüwa nanguxŭ i Tupanaārü ore. Rü ñuxma rü name nixī i ngēma togü i duŭxūgü rü norü ngēmaxūmaā taeneēgü i Yudíugü i yaxōgūxŭxŭ narüngŭxēēgü. ²⁸ Rü ngēxguma chanaguxēēgu i ngēma puracü, rü ngēxguma taeneēgü i Yudíugūna marü ngīxŭ chaxāxgu i ngēma dīeru, rü Españawa tá chaxŭ. Rü ngēxguma ngēma chaxūxgu, rü tá woe pexūtagu íchidau. ²⁹ Rü nūxŭ chacuèx rü ngēxguma petanüwa changuxgu, rü wūxigu tá tataāēgü, erü nūma ya Cristu tá tūxŭ nataāēxēē i ngēxguma ngēmaācū wūxiwa ingēxmagūgu. ³⁰ Pa Chaueneēgūx, tórü Cori ya Ngechuchu ya Cristuégagu, rü ngēma na Naāēārü ngūxēēmaā choxŭ pengechaŭxūgagu pexŭ chacèxŭ na Tupanana chauxcèx peçaxŭ i perü yumūxēwa. Rü ngēmaācū tá choxŭ perüngŭxēē nawa i ñāā puracü i Tupana choxna āxŭ. ³¹ ;Rü Tupanana peça na choxŭ ínapoxŭxūcèx nūxna i ngēma Yudíugü i Yudéaanēwa ngēxmagūxŭ i tama yaxōgūxŭ! ;Rü nūxna peça naxcèx i ngēma taeneēgü i yaxōgūxŭ i Yerucharéŭwa ngēxmagūxŭ, na taāēācūma nayauxgūāxūcèx i ngēma dīeru i ngēma naxcèx changexŭ! ³² Rü ngēmaācū ngēxguma Tupana naxwèxegu, rü taāēācūma petanüwa tá changu, na wūxigu pemaā chataāēxūcèx. ³³ Rü chanaxwèxe na pemaā inaxāŭxŭ ya Tupana ya tūxŭ taāēxēēcū. Rü ngēmaācū yī.

16*Pauru rü nūxŭ narūmoxē ga yema duŭxūgü ga yaxōgūxŭ ga Dumawa yexmagūxŭ*

¹ Rü ñuxma na petanüwa naxūxchaŭxŭ i taeyèx i Febe, rü pemaā ngīxŭ chixu rü wūxi i taeyèx i mecü iyixī. Erü ngīma rü nūxŭ irüngŭxēē i ngēma yaxōgūxŭ i Chēcréaarü íānēwa ngēxmagūxŭ. ² Rü chanaxwèxe i meā ngīxŭ peyaxu, naegagu ya tórü Cori ya Ngechuchu, erü ngēma nixī i mexŭ na penaxūxŭ namaā i guxūma i yaxōgūxŭ. Rü chanaxwèxe i guxūma i tacü i ngīxŭ taxuxŭwa rü ngīxŭ perüngŭxēē, erü ngīma rü poraācū togūxŭ irüngŭxēē, rü choxŭ rü ta irüngŭxēē. ³ ;Rü nūxŭ perūmoxēgü i Prisila rü Aquiru! Rü nūmagü rü chomūcūgü nixīgü i Ngechuchu ya Cristuarü puracūwa. ⁴ Rü nūmagü rü āūcūmaxŭwa nichocu na chauétüwa nachogūexūcèx, na tama chayuxūcèx ga chomax. Rü ngēmacèx moxē nūxna chaxā. Rü tama chaxicatama moxē naxcèx nūxna chaxā, natürü moxē nūxna naxāgü ta i guxūma i taeneēgü i yaxōgūxŭ i tama Yudíugü ixīgūxŭ. ⁵ ;Rü nūxŭ perūmoxēgü ta i guxūma

i taeneēgü i Aquirupatawa ngutaquēxegüxü! ;Rü ngēxgumarüü ta nüxü perümoxēgü ya chomücü ya nüxü changechaücü ya Epenétu! Rü nüma nixi ga nüxira Cristuaxü yaxōoxü ga Áchiaanewa. ⁶ ;Rü ngixü perümoxēgü i María ga poraäcü petanüwa Tupanaaxü puracücü! ⁷ ;Rü nüxü perümoxēgü i chautanüxügü i Aüdrünicu rü Yüniä ga wüxigu chomaä poxcuexü! Rü nümagü nixi i yatügü i aixcüma Tupana imugüxü i guxüma i yaxōgüxü nüxü ngechaügüxü. Rü nümagü rü nüxira chauxüpa Cristuaxü nayaxōgü. ⁸ ;Rü nüxü perümoxēgü ya Aüpriátu ya chomücü ya nüxü changechaücü ya chauxrüü tórü Coriaxü yaxōcü! ⁹ ;Rü nüxü perümoxēgü ya Urubánu ya tomücü ixücü i Cristuarü puracüwa! ;Rü ngēxgumarüü ta nüxü perümoxēgü ya Estaqui ya nüxü changechaücü! ¹⁰ ;Rü nüxü perümoxēgü ya Apere ya aixcüma tüxü nüxü dauxēcü na ñuxäcü Cristuaxü yaxōoxü! ;Rü ngēxgumarüü ta nüxü perümoxēgü i Aritúburutanüxügü! ¹¹ ;Rü nüxü perümoxēgü i chautanüxü i Erudiü! ;Rü ngēxgumarüü ta nüxü perümoxēgü i Narsíchutanüxü i tórü Coriaxü yaxōgüxü! ¹² ;Rü ngixü perümoxēgü i Trifena rü Trifocha! Rü ngimagü rü tórü Coriaxü ipuracü. ;Rü ngēxgumarüü ta ngixü perümoxēgü i taeyex i Péchida i ngixü ingechaügücü! Rü ngima rü marü poraäcü tórü Coriaxü ipuracü. ¹³ ;Rü nüxü perümoxēgü ya Rufu ya aixcüma meä tórü Coriaxü yaxōcü! ;Rü ngēxgumarüü ta ngixü perümoxēgü i naē ga chauerüü chomaä ixücü! ¹⁴ ;Rü nüxü perümoxēgü i Achícritu, rü Peregúte, rü Erme, rü Patroba, rü Erma, rü guxüma i togü i taeneēgü i natanüwa ngēxmagüxü! ¹⁵ ;Rü nüxü perümoxēgü ta i Firórugu, rü Yúria, rü Neréu, rü naēyex, rü Oripa, rü guxüma i togü i taeneēgü i yaxōgüxü i natanüwa ngēxmagüxü! ¹⁶ Rü chanaxwèxe i pegü pengechaügüäcüma pegü perümoxēgü i wüxichigü. Rü guxüma i ngēma yaxōgüxü i toxnamana ngēxmagüxü, rü pexü narümoxēgü. ¹⁷ Pa Chaueneēgüx, pexü chacèxü na pegüna pedaugüxücèx nüxna i ngēma duüxügü i pexü itoyechaüxü rü chixexügu pexü yixēgüchaüxü. Erü ngēma duüxügüarü nguxēētae rü tama namaä nawüxigu i ngēma nguxēētae ga noxri peyaxgüxü ga yexguma noxri peyaxōgügu. Rü name nixi i noxtacüma nüxna pixigachi i ngēma duüxügü rü tama natanügu pexägü. ¹⁸ Erü ngēma duüxügü rü tama tórü Cori ya Ngechuchu ya Cristuarü ngúchaü naxügü, natürü noxrütama ngúchaü nixi i naxügüxü. Rü ore i tauxchaxügümaä nayaxucuxēgü i duüxügü, rü ngēmaäcü nanawomüxēgü i ngēma duüxügü i tama meä nüxü cuëxgüxü. ¹⁹ Rü guxüma i duüxügü nüxü nacüxgü na aixcüma meä Tupanaga pexinüexü i pemax. Rü ngēmacèx pemaä chataäe i chomax. Rü chanaxwèxe na meä nüxü pecuáxü i tacü nixi i mexü i Tupanapēxewa na penaxüxcèx i ngēma. Natürü ngēma Tupanapēxewa chixexü, rü ;nüxna pixigachi na tama nagu peyixücèx! ²⁰ Rü ngēxguma ngēmaäcü meä pemaxēgu rü nüma ya Tanatü ya Tupana ya tüxü taäxēcü rü tá pexü naporaxēē na aixcüma nüxü perüyexeraxücèx i Chataná. Rü chanaxwèxe i tórü Cori ya Ngechuchu ya Cristu pemaä inarüxäüx rü pexü narüngüxēē. ²¹ Rü pexü narümoxē ya Timutéu ya chomücü ixücü i Tupanaärü puracüwa. Rü ngēxgumarüü ta pexü narümoxēgü i chautanüxügü i Dúchiu, rü Yachóü rü Sochípatru. ²² Rü choma i Téchiu na chanaxümatüxü i ñaä popera, rü choma rü ta pexü charümoxē naegagu ya tórü Cori. ²³ Rü pexü narümoxē ta ya Gayu ya napatawa changēxmacü. Rü nüma rü inanaxä ya daa napata na nawa nangutaquēxegüxücèx i guxüma i yaxōgüxü. Rü ngēxgumarüü ta pexü narümoxēgü i Eratu i daa ñañeärü dñeruarü dauruü ixüxü, rü taeneē i Cuarto. ²⁴ Rü chanaxwèxe i tórü Cori ya Ngechuchu ya Cristu pexü narüngüxēē i guxüma i pemax. Rü ngēmaäcü yü.

Pauru rü Tupanaxü yacuèxüüãcüma nanaguxêê i norü popera

²⁵⁻²⁶ ¡Rü ñuxmax, rü ngĩxã nüxü ticuèxüügü ya Tanatü ya Tupana! Rü nüma nüxü nangẽxma i pora na pexü naporaexêêxücèx na meã peyaxõgüamaxücèx i ngẽma norü ore i tüxü maxẽxêêxü tamaã nüxü ixuxürüü. Rü ngẽma nixĩ i ore i guxüwama nüxü chixuxü rü namaã changúexêêtaexü i Ngechuchu ya Cristuchiga. Rü ngẽmatama ore i Cristuchiga rü taxchaxwa naxẽxügu ga noxrix, natürü i ñuxma ya Tupana rü marü tüxü nüxü nacuèxêê i ngẽma. Rü nuxcüma tauta naãne üxgu rü Tupanaxĩcatama nüxü nacuèx ga yema, natürü i ñuxma rü norü orearü uruügü ümatüxü ga orewa taxcèx nanangoxêê. Rü ngẽma ore rü namaã nawüxigu ga yema ore ga nuxcüma nüxü yaxuxü ga Tupana ya guxüguma maxêchacü. Rü ñuxma ya Tupana rü guxüwama nanamugü i norü orearü uruügü na guxü i duüxügümaã nüxü na yaxugüexücèx i ngẽma ore i Cristuchiga na nüxü yaxõgüãxücèx rü naga na naxĩnüèxücèx.

²⁷ Rü nüma ya Tupana rü nüxĩcatama nixĩ i Tupana yĩxü, rü nüxĩcatama nixĩ i guxüxü nacuáxü. ¡Rü ñuxmax, rü ngĩxã guxüguma nüxü ticuèxüügü, erü Nane ya Ngechuchu ya Cristu rü poraãcü tüxü narüngüxêê! Rü ngẽmaãcü yĩ.

Rü nuãma pexna,
Pauru

NÜXĪRAÜXÜ GA POPERA GA CORÍTIUCŪĀX GA YAXŌGÜXÜTANÜWA NAMUXÜ GA PAURU

Pauru rü nüxü narümoxē ga yema yaxōgüxü ga Corītiuarü iānewa yexmagüxü

¹⁻² Pa Chaueneēgü i Corītiucūāxgüx, choma i Pauru nixī i Tupana yaxuxü norü ngüchaxümaā na Ngechuchu ya Cristu norü puracüwa choxü namuxücèx. Rü choma rü namaā i taeneē i Chótene nixī i pexü tarümōxēgüxü rü pexcèx tanaxümatüxü i ñaā popera. Pa Chaueneēgü ya Tupanaārü Ixīgüxex, pema rü marü Tupanapēxewa pixüüne yerü Ngechuchu ya Cristu marü pexü nixüünexēē. Rü Tupana rü marü pexü nade na norü duüxügü pixīgüxücèx wüxigu namaā i güxüma i ngēma duüxügü i güxüwama tórü Cori ya Ngechuchu ya Cristuxü icuèxüügüxü. Rü nüma ya Ngechuchu ya tórü Cori ixīcü, rü ngēma duüxügüarü Cori ta nixī. ³ Rü chanaxwēxe ya Tanatü ya Tupana rü tórü Cori ya Ngechuchu ya Cristu norü ngechaxügagu poraäcü pexü narüngüxēē rü pexü nataāēxēē.

Tupana tüxü narüngüxēē erü Cristuarü duüxügü tixīgü

⁴ Rü taguma nüxü charüchau na Tupanana moxē pexcèx chaxāxü. Rü moxē nüxna chaxā naxcèx i ngema ngüxēē i Ngechuchu ya Cristugagu Tupana pexna āmarexü. ⁵ Yerü Cristugagu Tupana pexna nanamu ga Naāxē i Üünexü na pemaxā inaxāüxücèx. Rü pexna nanaxā ga norü ore, rü naétü pexü nanatauxchaxēē na nüxü pecuáxücèx na ñuxü ñaxüchiga yixīxü. ⁶ Rü yemaäcü yexguma nüxü pexīnūēgu ga yema ore ga Cristuchiga rü aixcüma peyaxōgü. ⁷ Rü ngēmacèx i ñuxma na ípenangüxēēxü na wena táxarü núma naxüxü ya tórü Cori ya Ngechuchu ya Cristu, rü Tupana pexna nanaxā i taxü i cuèx na taxuüma pexü taxuxücèx na naxcèx pemaxēxü. ⁸ Rü ngēmaäcü tá pexna nadau ya Tupana ñuxmatáta nagú i naāne, rü güxügutáma pexü naporaexēē na aixcüma peyaxōgüamaxücèx rü naxcèx pemaxēxücèx, na taxúema chixexümaā pexü ixügüxücèx i ngēxguma wenaxārü núma naxüxgu ya tórü Cori ya Ngechuchu ya Cristu. ⁹ Rü Tupana rü güxüguma nayangüxēē i norü uneta. Rü nüma nixī ga pexü nadexü na aixcüma Nane ya tórü Cori ya Ngechuchu ya Cristumücügü pixīgüxücèx.

Nügü nitoye ga yema yaxōgüxü

¹⁰ Pa Chaueneēgüx, tórü Cori ya Ngechuchu ya Cristuégagu pexü chacèèxü na wüxigu pegümaā perüxīnūēxü rü tama pegü pitoyexücèx. Rü name nixī i aixcüma pegü pengechaügü rü aixcüma wüxigutama perüxīnūē i peāēwa. ¹¹ Pa Chaueneēgüx, pemaā nüxü chixu i ngēma ore, yerü Croétanüxütanüwa nüxü chacuáchiga ga pegümaā na penuēxü, rü tama aixcüma wüxigu na perüxīnūēxü. ¹² Rü pemaā nüxü chixu i ngēma erü ñuxre i pema rü ñaperügügü:

“Choma rü Pauruwe charüxü”, ñaperügügü. Rü togue rü:

“Choma rü Aporuwe charüxü”, ñaperügügü. Rü togue rü:

“Choma rü Pedruwe charüxü”, ñaperügügü. Rü togue rü:

“Choma rü Cristuwe charüxü”, ñaperügügü. ¹³ ¿Rü ñuxäcü nixī i ngēma?

¿Pexcèx rü Cristu rü marü niyauxye? ¿Éxna pema nüxü pecuèxgu rü choma i Pauru chiixü ga curuchawa pexcèx chipotaxü rü chayuxü? ¿Rü éxna pema nüxü pecuèxgu rü chauégagu yixü ga ípebaiüxü? ¹⁴ Rü Tupanana moxē chaxā, yerü taxúema pexü íchabaiüxēē ga pemax. Rü Crispu rü Gayuxicatama nixī

ga íchabaiũxẽxũ. ¹⁵ Rũ ngẽmacèx taxucũrũwa texé tũgũ tixu na chauégagu ítabaiexũ. ¹⁶ Rũ yemáãcũ aixcũma íchanabaiũxẽẽ ga Estéfanatanũxũgũ ta, natũrũ chauxcèx rũ taxúema ga togue tũxũ íchabaiũxẽẽ. ¹⁷ Yerũ nũma ga Cristu rũ tama choxũ namu ga duũxũgũxũ na íchabaiũxẽẽxũcèx, natũrũ choxũ namu na duũxũgũmaã nũxũ chixuxũcèx i norũ ore i mexũ i tũxũ maxẽxẽxũ. Rũ nanaxwèxe i tauxchaxũ i oremaã nũxũ chixu i ngẽma ore. Erũ ngẽxguma chi ñoma nũxũ cuèxũchixũrũũ nũxũ chixuxgu i ngẽma ore, rũ ngũrũãchi i duũxũgũ rũ tá chauguama narũxĩnũẽ rũ tá nũxũ inayarũngũmaẽ na Cristu yĩxũ ga tũxũ maxẽxẽcũ ga yexguma curuchagu nayuxgux.

Cristuwa nixĩ ga Tupana inawéxũ ga norũ pora rũ norũ cuèx

¹⁸ Rũ ngẽma ore na ñuxãcũ tórũ pecaducèx curuchagu nayuxũ ga Cristu, rũ wũxi i natũcèxmamare nixĩ naxcèx i ngẽma duũxũgũ i poxcuwa íxũ. Natũrũ yixema na Tupana tũxũ maxẽxẽxũ, rũ nũxũ tacuèx na ngẽma ore rũ Tupanaãrũ pora yĩxũ. ¹⁹ Erũ norũ ore i ũmatũxũwa rũ ñanagũrũ ga Tupana: “Rũ tá ichayanaxoxẽẽ i guxũma i norũ cuèx i ngẽma duũxũgũ i nũxũ cuèxũchigũxũ. Rũ tá nũxũ chaxo i ngẽma duũxũgũarũ cuèx”, ñanagũrũ. ²⁰ Rũ ñuxmax, Pa Chaueneẽgũx, ¿Tupanapẽxewa rũ tacũwa namexũ i ngẽma duũxũgũ i poraãcũ nũxũ cuèxũchixũ? ¿Rũ tacũwa namexũ i ngẽma duũxũgũ i Moĩché ũmatũxũ i mugũwa nguxẽẽtaegũxũ? ¿Rũ tacũwa namexũ i ngẽma duũxũgũ i meã nũxũ cuèxgũxũ i ñoma i naãneãrũ cuáchigagu na yadexagũxũ? Erũ guxũma i ngẽma cuèx i duũxũgũ nagu rũxĩnũẽxũ rũ Tupanacèx rũ taxuwama name. ²¹ Natũrũ nũma ya Tupana ya guxũxũma cuácũ, rũ tama nanaxwèxe na ñoma i naãnecũãx i duũxũgũarũ cuágagu na yĩxũ i naxũtawana nangugũxũ i nũmagũ. Natũrũ nanaxwèxe na ngẽma norũ ore i mexũgagu na yĩxũ i namaxẽxẽãxũ i ngẽma duũxũgũ i yaxõgũxũ woo togũcèx rũ natũcèxmamare yixĩgu i ngẽma ore. ²² Ngẽma Yudĩugũ rũ nũxũ nadaugũchaũ i cuèxruũgũ i Tupanaãrũ poramaã ũxũ. Rũ ngẽma Griégugũ rũ naxcèx nadaugũ i ñoma i naãneãrũ cuèx. ²³ Natũrũ ngẽma ore i toma nũxũ tixuxũ, rũ Cristu ga curuchawa ipotacũchiga nixĩ. Rũ ngẽma ore rũ naãẽwa nangux i ngema Yudĩugũ. Rũ ngẽma duũxũgũ i tama Yudĩugũ ixĩgũxũcèx rũ wũxi i natũcèxmamare nixĩ. ²⁴ Natũrũ ngẽma duũxũgũ i Tupana dexũ i Yudĩugũ rũ éxna tama Yudĩugũ ixĩgũxũ rũ ngẽma duũxũgũcèx Tupana inanawéx i norũ pora rũ norũ cuèx ga yexguma pecaducèx nayuxgu ga Cristu. ²⁵ Rũ yema Tupana ũxũ ga yexguma nayuxgu ga Cristu rũ muxũma i duũxũgũcèx rũ wũxi i ngẽãemare nixĩ. Natũrũ ngẽma Tupana nagu rũxĩnũxũ rũ guxũma i ñoma i naãnecũãx i duũxũgũarũ cuèxarũ yexera nixĩ. Rũ yexguma curuchagu nayuxgu ga Cristu rũ muxũma ga duũxũgũcèx rũ natura ga Tupana ga yexguma. Natũrũ yexguma nixĩ ga inawéãxũ ga ñuxãcũ guxũ i duũxũgũarũ yexera na naporaxũchixũ. ²⁶ Pa Chaueneẽgũx, name nixĩ i nagu perũxĩnũẽ na ñuxãcũ Tupana pexũ dexũ na norũ duũxũgũ pixĩgũxũcèx. Rũ noxretama pixĩgũ na nũxũ pecuèxũchixũ ega duũxũgũ pexũ ngugũgu, rũ noxretama pixĩgũ na ãẽxgacũgũ pixĩgũxũ, rũ noxretama pixĩgũ i ngẽma itaarũ dũẽruãxũtanũxũ pixĩgũxũ. Natũrũ woo ngẽma na pixĩgũgu rũ Tupana rũ pexũ nade na norũ duũxũgũ pixĩgũxũcèx. ²⁷ Rũ Tupana nanade ga yema duũxũgũ ga togũ ga duũxũgũ nũxũ ixuxgu rũ taxuũma icuáxũ. Rũ yemaãcũ nanaxũ ga Tupana na naxãneẽxẽãxũcèx i ngẽma duũxũgũ i nũxũ icuèxũchixũ. Rũ Tupana nanade ga yema duũxũgũ ga togũ nũxũ ixuxgu rũ turaexũ. Rũ yemaãcũ nanaxũ ga Tupana na naxãneẽxẽãxũcèx i ngẽma duũxũgũ i poraexũ. ²⁸ Rũ Tupana nanade ga yema duũxũgũ ga togũ nũxũ oexũ, rũ ñoma i naãnewa taxuũma ixĩgũxũ. Rũ yemaãcũ Tupana nanaxãneexẽẽ i ngẽma duũxũgũ i ñoma i naanewa norũ ngemaxũgũmaã nũgũ icuèxũũgũxũ. ²⁹ Rũ

ngēmacèx taxucürüwama texé tügü ticuèxüü i Tupanapēxewa. ³⁰ Rū nūmatama ga Tupana nixī ga Ngechuchu ya Cristuarü duūxūgūxū pexū yaxīgūxēēxū. Rū tatanüwa nanamu ga Cristu na nūma tūxna naxāāxūcèx i cuèx i aixcūma ixīxū, rū pecaduwa tūxū ínanguxūxēēxūcèx. Rū nūma ya Cristu nixī i tūxū namaxēxēēxū rū tūxū yamexēēgūxū na aixcūma ixūūnexūcèx napēxewa ya Tupana. ³¹ Rū ngēmacèx i Tupanaārü ore i ūmatūxūwa rū ñanagürü: “Rū ngēxguma texé tügü icuèxūūchaūgu rū name nixī i tórü Corixū ticuèxūū”, ñanagürü.

2

Cristu ga curuchawa ipotacūchiga

¹ Pa Chaueneēgūx, yexguma noxri petanüwa chaxūxgu na pemaā nūxū chixuxūcèx ga Tupanaārü ore i aixcūma ixīxū i Cristuchiga, rū tama ñoma nūxū cuèxūchixürüūācūma pemaā chidexa, rū tama ore ga guxchaxūmaā nixī ga pemaā nūxū chixuxū. ² Yerü yexguma petanüwa chayexmagu, rū Cristuchigaxūīcatama nixī ga pemaā chixuxū. Rū taxuūma ga tacū ga togu charūxīnū. Rū yemaācū Ngechuchu ya Cristu ga curuchawa ipotacūguxicatama nixī ga charūxīnūxū. ³ Rū yexguma petanüwa changuxgu rū nūxū chadau ga taxū ga guxchaxūgū ga petanüwa, rū yemacèx poraācū chaxoegaāē rū Tupanapewa chorü muūmaā chidurux. ⁴ Rū yexguma pemaā chideaxgu rū pemaā nūxū chixuxgu ga Tupanaārü ore, rū tama ñoma nūxū cuèxūchixürüūācūma pemaā nūxū chixu na yemaācū pexū chanangūchaūxēēxū na peyaxōgūxūcèx. Natürü Tupanaāē i Üūnexūārü ngūxēēmaā rū Tupanaārü poramaā nixī ga pexū chanangūchaūxēēxū. ⁵ Rū yemaācū Tupanaārü poramaā pemaā nūxū chixu ga yema ore na Tupanagagu yīxū na nūxū peyaxōgūxū, rū tama ñoma i naānecūāx i duūxūgūarü cuāgagu na yīxū.

Tupana rū Naāē i Üūnexūwa nūgū tūxū nacuèxēē

⁶ Natürü pemaā nūxū chixu, rū ngēxguma natanüwa changēxmagu i ngēma duūxūgū i marü meāma yaxōgūxū, rū ngēxguma nixī i chanangūxēēxū i ngēma aixcūma Tupanaarü cuèx i üūnexū. Natürü ngēma cuèx rū tama ñoma i naānewa ne naxū, rū bai i ñoma i naāneārü āēxgacūgū i paxa tá iyarūxoxūwa ne naxū. ⁷ Natürü ngēma cuèx rū Tupanawa nixī i ne naxūxū. Rū ngēma cuèx nixī ga noxri tauta naāne ūxgu Tupanaxīcatama nūxū cuáxū ga na ñuxācū tá tūxna naxāāxū i maxū i taguma gūxū. ⁸ Natürü yema Tupana nagu rūxīnūxū, rū taxuūma ga ñoma ga naānecūāx ga āēxgacū nūxū nacuèx. Yerü yexguma chi aixcūma nūxū nacuèxgūgu ga yema Tupana nagu rūxīnūxū rū tāū chima curuchawa nayapotagū ga guma mecū ya tórü Cori. ⁹ Rū ngemachiga nixī i Tupanaārü ore i ūmatūxūwa i ñaxū:

“Rū ngēma duūxūgū i Tupanaxū ngechaūgūxūcèx, rū nūma nanamexēē i tacū i taxúema nūxū dauxū, rū taguma texé nūxū ínūxū, rū bai i texé nagu rūxīnūxū”,

ñaxū. ¹⁰ Rū ngēma Tupana mexēēxū naxcèx i ngēma duūxūgū i nūxū ngechaūgūxū, rū ñuxma rū tūxū nūxū nacuèxēē i ngēma, yerü nūma nanamu ga Naāē i Üūnexū na taxcèx nangoxēēāxūcèx. Rū ngēma Naāē i Üūnexū rū guxūxūma nacuèx, rū èixrūxū i ngēma Tupanaxīcatama nūxū cuáxū rū ta nūxū nacuèx. ¹¹ Rū duūxūgūtanüwa rū ¿texé nūxū tacuèx na tacūgu naxīnūxū i wūxi ya yatü? Rū naāēxīcatama nixī i nūxū cuáxū i ngēma nagu naxīnūxū i ngēma yatü. Rū ngēxgumarūū ta Tupanaāē i Üūnexūxīcatama nixī i nūxū cuáxū na tacūgu naxīnūxū ya Tupana. ¹² Rū yixema rū tama ñoma i naānecūāx i naāē

nixī ga iyauxgūxū. Natürü tanayauxgü i ngema Naãe i Üünexū ga Tupana taxcèx núma muxū na aixcūma nūxū icuáxūcèx i guxūma i ngēma mexūgü ga Tupana norü ngechaūmaã tüxna ãmarexū. ¹³ Rū ñuxma na pemaã nūxū tixuxū i ngēmachiga, rü Tupanaãe i Üünexū toxna ãxū i oremaã nixī i pemaã nūxū tixuxū. Rū tama ore i torü cuèxwa tayaxuxūmaã nixī i pemaã nūxū tixuxū. Rū ngēmaãcü nūxū tixu i Tupanaãe i Üünexūãrū ore namaã i ngēma duūxūgü i aixcūma Tupanaãe nawa ngēxmagūxū. ¹⁴ Rū texé ya tama Tupanaãe i Üünexū tümawa ngēxmaxē, rü taxucürüwa tanayaxu i ngēma Tupanaãe i Üünexū tüxū nguxēēxū, erü tümacèx ya yíxema duūxē rü natüçèxmamare nixī. Rū tama nūxū tacuèxéga erü yíxema Tupanaãe i Üünexū tümawa ngēxmaxēĩcatama tixī ya nūxū cuáxe na tanangugūxū na ñuxū ñaxūchiga yīxū i ngēma Tupanaãe i Üünexū tüxū nguxēēxū. ¹⁵ Rū yíxema duūxē ya Tupanaãe i Üünexū tümawa ngēxmaxē, rü meã tanangugü i guxūma. Natürü ngēma togü i duūxūgü i tama Tupanaxū cuèxgūxū, rü taxucürüwama tümäärü maxūxū nangugü ya yíxema duūxē ya aixcūma Tupanaãe tümawa ngēxmaxē. ¹⁶ Erü Tupanaãrū ore i ümatüxūwa rü ñanagürü:

“¿Texé nūxū tacuèx na tacügu naxīnūxū ya tórü Cori? ¿Rü texé nūxū tacuèx na Tupanaxū taxucuxēxū?”

ñanagürü. Natürü yixema nixī i aixcūma nūxū icuáxū i ngēma Cristu nagu rüxīnūxū.

3

Pauru rü Aporu rü wüxigu Tupanaãxū napuracüe

¹ Pa Chaueneēgūx, yexguma noxri petanüwa changuxgu, rü taxucürüwa ngēma duūxūgü i Tupanaãe nawa ngēxmaxūmaã chidexaxürüüãcü pemaã chidexa. Natürü ñoma i naãnecūāx i tama Tupanaxū cuèxgūxūmaã chideaxgurüü nixī ga pemaã chidexaxū. Yerü pema rü yexwacèx, peyaxōgü ga yexguma, rü yemacèx yexwacèx yaxōgūxūmaã chideaxürüüãcü pemaã nūxū chixu ga Cristuchiga. ²⁻³ Rū taxchaxū ga oremaã pexū changúxēē, ngēxgumarüü i wüxi i õxchana ega noxri nabuxgu rü naēgünenixū ya tauxchaãcü yaxaxüne nūxna taxã. Rū yemaãcü taxchaxū ga oremaã pemaã nūxū chixu ga Tupanaãrū ore ga noxrix, yerü taxucürüwa nūxū pecuèxéga ga Tupanaãrū ore ga guxchaxū. Rū ñuxma rü ta tama nūxū pecuèxéga i Tupanaãrū ore i guxchaxū, erü ñoma tama yaxōgūxū i duūxūgürüütama pemaxē. Rū dücax, ngēxguma ñuxma rü ta pixāūxāchiwèxegu rü pegümaã penuēgu, rü ngēmawa nangox na ngēma tama yaxōgūxürüüãcütama nagu perüxīnūēxū rü ñoma i naãnecūāxrüüãcütama na pemaxēxū. ⁴ Rū ngēxguma petanüwa wüxie ñágügu rü:

“Choma rü Pauruwe charūxū”, ñágügu, rü togue rü:

“Choma rü Aporuwe charūxū”, ñágügu, rü ngēmawa nūxū tacuèx na ngēma duūxūgü i tama yaxōgūxürüüãcüma na pemaxēxū. ⁵ Rū ngēxguma meã nagu rüxīnūēgu, ¿rü tacü chixī i choma i Paurux? rü ¿tacü nixī i nüma i Aporux? Toma rü Tupanaãrū duūxūgūmare tixīgü, rü togagu nixī ga nūxū peyaxōgūxū ga tórü Cori ya Ngechuchu. Rū wüxichigü ga toma rü tanaxū ga yema puracü ga tórü Cori toxna ãxū. ⁶ Rū chauxütawa nixī ga nūxū pexīnūēxū rü peyaxōgūxū ga Tupanaãrū ore ga noxrix. Rü Aporu nixī ga pexū rüngūxēēcü na yexeraãcü meã peyaxōgūxū ga yema ore. Natürü Tupana nixī ga pexū maxēxēēcü. ⁷ Rū ngēmacèx woo yíxema tüxira duūxūgūmaã nūxū ixuxe i Tupanaãrū ore rü woo yíxema wixwena yexeraãcü duūxūgūxū ngúxēēxē, rü taxuūma tixīgü. Natürü Tupana nixī ya guxūma ücü, erü nüma nixī i duūxūgūxū namaxēxēēxū. ⁸ Rū ngēmaãcü ya yíxema tüxira duūxūgūmaã nūxū

ixuxe i Tupanaārū ore, rü yíxema wixwena yexeraācū duūxūgūxū ngúexēxē rü tawūxigumare i ngēma puracūwa. Natürü Tupana rü tá tūxū nanaxūtanū i tūmaārū puracū ya wūxichigū ngēxgumarūū na ñuxācū tanaxūxū i ngema puracū. ⁹ Rū ngēmaācū i toma rü wūxigu Tupanaāxū tapuracūe. Rū ngēmaācū nixī i perū maxūwa napuracūxū ya Tupana na nūma nanaxwēxexūācūma pixīgūxūcèx. ¹⁰ Rū choma nixī ga Tupana choxū muxū na chaxira pemaā nūxū chixuxūcèx ga Cristuchiga. Rū togū nixī ga chowena yexeraācū pexū ngúexēxū. Natürü guxāma ya texé ya naxúxe i ñā puracū rü name nixī i taxuāē na meā tanaxūxūcèx. ¹¹ Rū ñā puracū rü Ngechuchu ya Cristuwa nixī ga inaxūgūxū, rü ngēmacèx taxucürūwama texé tayangucuchixēē i to i tūxū maxēxēxū. ¹² Rū ñuxma na norū puracū ixūxū i wūxichigū i yixema, rü tanaxwēxe i taxuāē na aixcūma meā naxūxū i ngēma. Erū yíxema aixcūma meā naxúxe i norū puracū, rü ñoma wūxi i ĩpataarū ūruū i uirumū rü dīerumū rü nuta i mexēchixūmaā ūpataxūrūū tixī. Natürü yíxema tama aixcūma meā naxúxe i ngēma Cristuarū puracū rü ñoma ĩpataarū ūruū i chixexū i naī rü naīxātū rü dexnemenēxāmaremaā ūpataxūrūū tixī. ¹³ Natürü ngēxguma nagūxgu i naāne, rü tá nangox na ñuxācū naxūāxū i Tupanaārū puracū i wūxichigū i duūxū. Erū ngēma ngunexūgu rü tá nangēxma ya ūxū ya taxūchine. Rū ñoma tacū ūxūwa iguxūrūū tá nixī i Tupana nūxū na ūxū i wūxichigū i duūxūārū puracū na nūxū nacuāxūcèx ngoxi aixcūma name rü ēxna tama. ¹⁴ Rū yíxema aixcūma meā naxúxe i Cristuarū puracū, rü yima ĩpata ya taixūne ya tama ūxūmaā ixaxūnerūū tá nixī i ngēma tūmaārū puracū. Rū tá Tupanaxūtawa tanayaxu i tūmaārū natanū naxcèx i ngēma taxūxū. ¹⁵ Natürü yíxema tama aixcūma meā naxúxe i ngēma puracū, rü yima ĩpata ya tama taixūne ya ūxūmaā ixaxūnerūū tá nixī i ngēma tūmaārū puracū. Rū tá ngēxma inayarūxomare i guxūma i ngēma taxūxū. Rū tūxicatama tāūtāma tixa ñoma wūxi i duūxū i ūxūemawa iyagoxūrūū. ¹⁶ ¿Tama ēxna nūxū pecuèx i pema rü Tupanapata na pixīgūxū, rü ngema Naāē ya Tupana rü pewa na namaxūxū? ¹⁷ Rū ngēxguma texé pexū chixetanūxēēgu, rü Tupana tá tūxū napoxcu, erū Tupanapata ya nawa namaxūne rü naxūūne. Rū pematama nixī ya yima Tupanapata na pixīgūxū. ¹⁸ Tama name i texé tūgūtama tawomūxēē. Rū ngēxguma petanūwa texé tūgūgu rūxīnūgu na wūxi i duūxū i nūxū cuāxe na tiixū i ñoma i naānewa, rü name nixī i ñoma taxuūma tacuāxūrūū tūgū tixīxēē. Rū ngēxguma tá nixī i wūxi i duūxū i aixcūma nūxū cuāxe tá tiixū. ¹⁹ Erū ñoma i naāneārū cuèx rü wūxi i ngēāēmare nixī i Tupanacèx. Erū Tupanaārū ore i ūmatūxūwa rü ñanagürü:

“Rū ngēma duūxūgū i nūgūgu rūxīnūēxū na nūxū cuèxūchigūxū yīixū, rü norū cuèxgutama ínanatūexēē ya Tupana”,

ñanagürü. ²⁰ Rū toxnamana i Tupanaarū orewa rü ñanagürü ta:

“Tórü Cori ya Tupana rü nūxū nacuèx na taxuwama namexū i ngēma norū ĩnū i ngēma duūxūgū i ñoma i naanewa cuèxwa ngugūxū”,

ñanagürü. ²¹ Rū ngēmacèx tama name i texé tūgū ticuèxūxū ega duūxūgūarū cuèxwamare tarūxūxgu. Erū Tupana rü marū pexna nanaxā i guxūma na pexrū yīixūcèx. ²² Rū ngēmacèx i choma i Pauru, rü taeneē ya Aporu, rü taeneē ya Pedru, rü ñoma i naāne, rü torū maxū, rü torū yu, rü ñomatama i ngunexū, rü moxūārū ngunexū, rü guxūma i ngēma rü pexrū nixī. ²³ Rū pematama rü Cristuarū pixīgū. Rū Cristu rü Tupanaārū nixī.

4

Yema ngúexūgū ga Ngechuchu imugūxūārū puracūchiga

1 Rū ngēmacèx tanaxwèxe i tomaã nagu perüxĩnũē na Cristuarü puracütanüxũmare na tixĩgũxũ. Rū nũma nixĩ i toxũ namuxũ na pexũ tangúexēēxũcèx ga yema ore ga noxri Tupanaxĩcatama nüxũ cuáxũ. 2 Rū ngēxguma texé tacü rü puracü tũxna ãxgu, rü name nixĩ i aixcüma tayanguxēē i ngēma puracü i tũxna taxãxũ na ngēmaãcü itanawéxũcèx na aixcüma wüxi i duũxũ i mexũ tixĩxũ. 3 Rū ngēmacèx i ñuxma na meã chayanguxēēchaũxũ i ngēma puracü i Tupana choxna ãxũ, rü taxucèxma chaugücèx chaxoegaãē ega woo choxna pecagu rü ēxna tacü rü ãēxgacügü choxna caxgu naxcèx i ngēma puracü i chaxũxũ. Rū woo i chomatama rü taxuxũcèxma íchicuèx na ngextá chixri chanaxũxũ i ngēma puracü. 4 Natürü ñuxma na chomatama nagu charüxĩnũxũ na nataxuũma i chorü chixexũ i Tupanapēxewa, rü tama ngēmacèx Tupana choxũ nadau na changearü pecaduãxũ. Erü nũmatama ya tórü Cori ya Tupana nixĩ i aixcüma choxũ nacuáarü maxũãxũ. 5 Rū ngēmacèx tama name na toxũ pengugüarü maxũãxũ naxũpa na núma naxũxũ ya tórü Cori. Natürü name nixĩ i nüxũ ípenanguxēē, erü nũma tá nixĩ i nangoxēēãxũ i guxũma i ngēma ñuxma icúxũ rü guxũma i ngēma duũxũgü naãēwa nagu rüxĩnũēxũ. Rū ngēxguma tá nixĩ ya Tupana i tümamaã nataãēxũ ya wüxichigü ya yixema aixcüma mexũ ügüxe. 6 Pa Chaueneëgüx, perü mexũcèx nixĩ i pemaã nüxũ tixuxũ i ngēma ore na ngēma Tupana naxwèxexũãcüma pemaxēxũ. Rū choma rü Aporu nixĩ i perü cuèxruũgü tixĩgũxũ na towa pengüexũ na Tupanaãrü ore pemaã nüxũ ixuxürüũãcü penaxũxũ. Rū ngēmacèx tama name na wüxi i perü nguxēētaexũmaã petaãëgüxũ rü to rü nüxũ pexoexũ. 7 Rū ñuxma rü pexna chaca, ¿rü texé tixĩ ya yixema pemaã nüxũ ixuxe na togüarü yexera pexũ ixixēēxē? ¿Erü guxũma i ngēma cuèx i pexũ ngēxmaxũ rü Tupana pexna nanaxã? Rū ñuxma na nũma pexna naxããxũ i ngēma cuèx ¿rü tũxcüũ pegü picuèxüũgü ñoma pematama perü poramaã penayaxuxürüũ? 8 Rū pegügu perüxĩnũēgu rü aixcüma marü meãma Tupanaxũ picuèxüchi rü marü pexũ nangēxma i guxũma i tacü i penaxwèxexũ na naxütawa pengugüxũcèx. Rū pegügu perüxĩnũēgu rü ñoma ãēxgacügü i taxürüũ pixĩgü rü taxuũma toxütawa penaxwèxe i ñuxmax. ¿Chierü aixcüma Tupanapēxewa ãēxgacügü pixĩgügu na toma rü ta wüxigu pemaã ãēxgacügü na tixĩgüxũcèx! 9 Rū toma na Ngechuchu toxũ imugüxũ, rü chauxcèx rü wixwe toxũ nawogü ya Tupana. Rū ñoma poxcuexũ i yuewa íxürüũ tixĩgü. Rū ñoma wüxi i tacü i nüxũ nacugüexürüũ tixĩgü i napēxewa i Tupanaãrü orearü ngeruũgü i daxüçüãx, rü napēxewa i ñoma i naãnecüãx i duũxũgü, rü napēxewa i guxũma i tacü i Tupana üxũ. 10 Rū ñuxma na Cristuwe tarüxĩxũ, rü ngēmacèx taxuũma icuáxũ toxũ nawogü i duũxũgü, natürü i pema rü pegügu perüxĩnũēgu rü guxũxũma pecuèx i Cristuchiga. Toma nüxũ tacuèx na duũxũgüpēxewa taturaexũ, natürü i pema rü pegügu perüxĩnũē na aixcüma peporaexũ. Rü duũxũgü toxũ naxo, natürü pexũ nangechaũgü. 11 Rū ñuxma rü ta tama inayacuèx na ngúxũ tingegüxũ, erü ñuxma rü ta taiya toxũ nangux, rü titawae, rü tangexchiru. Rü duũxũgü rü chixri tomaã nachopetü, rü tangepata. 12 Rü tipae na yeüçürü toxmēxmaã tapuracüeechaxũ. Rü duũxũgü rü tacü tomaã nixugüē, natürü i toma rü mexũ i oremaã tanangãxũgü. Rü towe ningēxũtanü, natürü yaxna namaã taxĩnũē. 13 Rü chixri tochiga nidexagü, natürü i toma rü meã nachiga tidexagü. Rü ñoma guxchirexũ nadaugüxürüũ tomaã nixĩgü, rü ñoma duũxũgü i taxuwama mexũãcü toxũ nixĩxēē. Rü ñuxma rü ta ngemagutama tomaã naarüxĩnũē. 14 Tama pexcèx chanaxümatü i ñaã popera na pexũ chaxãneēxēēxũcèx. Natürü pexcèx chanaxümatü na pexũ chixucuxēgüxũcèx chauxacügüxüchirüũ, erü pexũ changechaũ. 15 Erü woo nangēxmagu i muxũma i perü nguxēēruũgü i Cristuchiga pexũ ngüexēēxũ,

natürü chaxicatama nixī i penatü chiixū ga Cristuxū na peyaxuxūwa. Yerü chauxūtawa nixī ga noxri ga penayaxuxū ga Ngechuchu ya Cristuarü ore i tūxū maxēxēxū. Rū ngēmacèx chaxicatama nixī i penatü chiixū i perü òwa. ¹⁶ Rū ngēmacèx pexū chacèxū na chauxrūxū meā pemaxēxū. ¹⁷ Rū ngēmacèx pexūtawa chanamu ya Timutéu ya poraācū nūxū changechaūcū ya chaune ixīcū i tórü Coriarü orewa. Rū nūma rü aixcūma meā nayanguxēē i guxūma i ngēma nagu chanamuxū. Rū nūma tá pexna nūxū nacuèxāchixēē na ñuxācū Ngechuchu ya Cristu naxwèxexūācūma meā chamaxūxū rü chanangūxēēxū ga yema yaxōgūxū ga natanūgu chixūgūxū. ¹⁸ Rū ñuxre i pemagū rü pegū picuèxūūgū, erü nagu perūxīnūē na tagutáma pexūtawa íchayadauxū. ¹⁹ Natürü ngēxguma nanaxwèxegu ya tórü Cori, rü paxa tá ngēma chaxū na pexū íchayadauxūcèx. Rū ngēxguma rü tá chomaxūchi nūxū chadau ngoxi ngēma duūxūgū i nūgū icuèxūūgūxū nūxū nangēxma i Tupanaārü pora rü ēxna yadoragūmare. ²⁰ Erü Tupanaarü pora rü tama nūxū tixumare, natürü nagu ítamaxē i ngēma pora. ²¹ ¿Rü ñuxma rü tacū ēxna nixī i penaxwèxexū i pema? ¿Penaxwèxe na pexū chingagūxū i ngēxguma ngēma changuxgu, rü ēxna penaxwèxe na pexū changechaūācūma rü pemaā chamecūmaācūma pexū na íchayadauxū?

5

Duūxūgū i chixri maxēxūchiga

¹ Rū duūxūgū nūxū nixugūgū rü wūxi i yatü i petanūwa rü naērücūmaātama naxāmèx. Rū ngēma nixī i pecadu i poraācū chixexūchixū, erü woo ngēma duūxūgū i tama yaxōgūxūtanūwa rü tama ngēmaācū naxūpetü. ² ¿Rü ñuxācū i pema i ngēxguma i pegū picuèxūūgūamaxū? Rū narümemaē chi nixī na poraācū pengechaūgūxū. Rū ngēma yatü i ngēma chixexū ūxū rü name nixī na ípenamuxūchixū i petanūwa. ³ Rū woo tama petanūwa changēxmagu i chomax, natürü guxūguma pegu charūxīnū. Rū ñoma pexūtawa changēxmaxūrū rü tórü Cori ya Ngechuchu ya Cristuégagu pemaā nūxū chixu na tacū tá namaā pexūxū i ngēma duūxū. ⁴ Rū name nixī i tórü Cori ya Ngechuchu ya Cristuégagu pengutaquēxegū. Rū nūma ya tórü Cori ya Ngechuchu rü tá napetanūgu na pexū naporaexēēxūcèx. Rū choma rü tá pexna chacuèxāchi i chorü yumūxēwa. ⁵ Rū ngēma norü poxcu i tá nūxna pexāxū i ngēma yatü, rü ngēma tá nixī na ípenamuxūchixū i petanūwa na Chataná ngúxū nūxū ingexēēxūcèx. Rū ngēmaācū tá inayarūxo i naxūneārü ngúchaū i chixexū, natürü naē rü tá namaxū i ngēxguma wena nūma naxūxgu ya tórü Cori ya Ngechuchu. ⁶ ¿Rü tama name i pema rü pegū picuèxūū naxcèx i ngēma pexūxū! ¿Tama ēxna nūxū pecuèx i ngēma ore i ñaxū:

“Wūxi i íraxū i pāūārü puxēēruū rü taxūma i pāūchara nipuxēē”, ñaxū? ⁷ Rū ngēmacèx name nixī i nūxū perūxoe i guxūma i nuxcūmaūxū i pecūma i pexū chixexēēxū. Rū ngēxguma ngēmaācū penaxūxgu, rü ñoma ngexwacaxūxū i pāū i ngearü puxēēruūāxū i Üpetūchigaarü petawa ingōxūrū tā pime. Rū ñuxma i pema rü aixcūma ngexwacaxūxū i duūxūgū pixīgū, yerü Cristu rü ñoma wūxi i carnerurū marü tachicū tórü pecaducèx nayu. ⁸ Rū ngēmacèx name nixī i nūxū tarūxoe i nuxcūmaūxū i tacūma i chixexūgū rü aixcūma Tupanagu tarūxīnūē rü meā naxcèx tamaxē, erü ngexwacaxūxū i norü duūxūgū tixīgū. ⁹ Nūxīraūxū ga chorü poperawa rü pemaā nūxū chixu na tama natanūgu pexāgūxū i ngēma duūxūgū i naī i ngēmaā naxūneārü ngúchaū ūgūxū. ¹⁰ Natürü yexguma yema ñachagu pexū, rü tama pemaā nūxū chixu na nūxna pixīgachitanūxūchixū i ngēma duūxūgū i tama yaxōgūxū i naī i ngēmaā maxēmarexū, rü ēxna ngēma duūxūgū i guxūma i tacū nūgūna nugūchaūgūxū,

rū ēxna ngīteēxgūxū, rū ēxna ngēma duūxūgū i tupananetachicūnēxāxū icuēxūūgūxū. Erū ngēxguma chi naxchaxwa ípechoūxgu i ngēma duūxūgū, rū chi taxucūruwa i ñoma i naānewa pengēxmagū. ¹¹ Natūrū yexguma pemaā nūxū chixuxgu na tama natanūgu pexāgūxū i ngēma duūxūgū i chixri maxēxū, rū nachiga chidexa i ngēma duūxūgū i nūgū ixugūxū na peeneēgū i yaxōgūxū na yixīgūxū natūrū naī i ngemaā maxēxū, rū ēxna aūexū, rū ēxna tupananetachicūnēxāxū icuēxūūgūxū, rū ēxna oregūtēēxgūxū, rū ēxna ngāxēwēxegūxū, rū ēxna ngīteēxgūxū. Rū ngēma duūxūgū nixī i pemaā nūxū chixuxū na tama namexū na natanūgu pexāgūxū rū bai i namaā na pechibūexū. ¹²⁻¹³ Erū tama choxmēxwa nangēxma na nūxna chaçaxū i ngēma duūxūgū i tama Tupanaāxū yaxōgūxū. Rū Tupana tá nixī ya nūxna çacū i ngēma duūxūgū. Natūrū i pema rū pemēxwa nangēxma na nūxna peçaxū i ngēma peeneēgū i yaxōgūxū i tama meā maxēxū. Rū name nixī i petanūwa ípenamuxūchi i ngēma duūxū i chixri maxūxū.

6

Ngēxguma tacū rū guxchaxū tūxū ngēxmagu taeneēmaā, rū tama name i āēxgacūgū i tama yaxōgūxūpēxewa tayamexēē i ngēma

¹ Rū ngēxguma wūxie i pema pexū nangēxmagu i tacū rū guxchaxū i wūxi i peeneē i yaxōxūmaā, ¿rū tūxcūū wūxi i āēxgacū i tama yaxōxūārū ngūxēēcēx ípeyaca na nūma pexū namexēēāxūcēx i ngēma perū guxchaxūgū? ¿Rū tama ēxna inamexū i ngēma peeneēgū i yaxōgūxū na namexēēgūxū i ngēma perū guxchaxūgū? ² ¿Tama ēxna nūxū pecuēx na yixema na yaxōgūxū tá yīxū i naāneārū guxgu nūxna icagūxū i guxūma i ñoma i naānecūāx i duūxūgū? Rū ñuxma na pema tá yīxū i ñoma i naānecūāx i duūxūgūxū picagūxū, ¿rū tūxcūū taxucūruwa i pematama penamexēē i ngēma perū guxchaxūgū i írachirēxū? ³ ¿Tama ēxna nūxū pecuēx rū woo ngēma daxūcūāx i Tupanaārū orearū ngeruūgū, rū yixema tá yīxū i nūxū icagūxū? Rū ngēmacēx nixī i yexeraācū pemēxwa nangēxmaxū na ñuxācū penamexēēxū i ngēma guxchaxūgū i ñoma i naānewa pexū ngēxmagūxū. ⁴ Rū ngēmacēx, ngēxguma tacū rū guxchaxū pexū ngēxmagu i ñoma i naānewa, ¿rū tūxcūū i ngēma āēxgacūgū i tama yaxōgūxūxūtawa pegū ípeyaxuaxūgūxū na pexū namexēēgūāxūcēx i ngēma? ⁵ Rū pemaā nūxū chixu i ngēma ore na pexāneēxūcēx. ¿Éxna tataxuma i petanūwa ya wūxie ya nūxū cuáxe na tanamexēēxū i ngēma guxchaxūgū i petanūwa ngēxmaxū? ⁶ Rū tama pegūmaā penuēxīcatama, natūrū naētū rū āēxgacūgū i tama yaxōgūxūxūtawa pexī na penamexēēxūcēx i ngēma perū guxchaxūgū. ⁷ Rū ngēma na pegūmaā penuēxū, rū ngēma rū poraācū chixexū nixī. ¿Rū tūxcūū tama yaxna namaā pexīnūē i ngēma guxchaxūgū i peeneē pemaā ūxū? ¿Rū tūxcūū tama namaā peporae ega texé perū tacūcēx ngīxgux? ⁸ Natūrū i pema rū poraācū chixexū pexūe, erū woo peeneēgū i yaxōgūxūāxū rū ta pengix. ⁹⁻¹⁰ ¿Tama ēxna nūxū pecuēx na ngēma duūxūgū i chixexū ūgūxū rū nataxuxūtáma i nachica i ngextá Tupana āēxgacū íyīxūwa? ¿Rū tama name i pegūtama pewomūxēēgū! Erū ngextá Tupana āēxgacū íyīxūwa rū nataxūtáma i nachica i ngēma duūxūgū i naī i ngemaā ipexū, rū ngēma duūxūgū i tupananetachicūnēxāxū icuēxūūgūxū, rū ngēma duūxūgū i naxmēxēchita rū ēxna natechita ngēāēxū, rū ngēma yatūgū i naxrūū yatūxūmaā ngēāēxū, rū ngēma ngīteēxgūxū, rū ngēma duūxūgū i nūgūnaxica nanuxūchixū i norū ngēmaxūgū, rū ngēma duūxūgū i ngāxēwēxegūxū, rū ngēma duūxūgū i oregūtēēxgūxū, rū ngēma duūxūgū i womūxēēwēxegūxū. Rū guxūma i ngēmagū rū nataxūtáma i nachica i ngextá Tupana āēxgacū íyīxūwa. ¹¹ Rū yexgumarūūtama pixīgū ga ñuxre ga pema

ga ūpax. Natürü i ñuxma ya Tupana rü marü pexũ ínanapi i perü chixexũ na noxrüxicatama pixĩgũxũcèx. Rü ñuxma rü aixcũma napèxewa pime yerü Naãe i Üünexũ rü tórü Cori ya Ngechuchu ya Cristuégagu marü perü pecaduna pexũ ínanguxũxèe.

Ñuxãcü naxüüne i taxüne

¹² Rü ñuxre i pema rü ñaperügügü:

“Rü marü name na chanaxũxũ i ngẽma chanaxwèxexũ”, ñaperügügü. Rü aixcũma nixĩ i ngẽma, natürü tama guxũ i ngẽma ixügũxũ rü tüxũ name. Rü aixcũma nixĩ i Tupana choxũ ínguxuchixèexũ na chanaxũxũcèx i ngẽma chanaxwèxexũ, natürü tama name na tacü rü chixexũgu chaugü changuxèexũ na chomaã inacuáxũcèx. ¹³ Rü ngèxgumarũũ ta rü ñuxre i duũxũgü rü ñanagürügü:

“Rü õna rü taxü necèx nixĩ, rü taxüne rü õnacèx nixĩ”, ñanagürügü. Rü aixcũma ngẽmaãcü nixĩ, natürü ya Tupana rü tá inayanaxoxèe i guxũma i ngẽma. Rü taxüne rü tama naĩ i ngemaã namaã na ingèãẽmarexũcèx nixĩ. Erü taxünemaã nixĩ i naxũxũ i tórü Coriarü ngúchaũ. Rü tórü Cori nixĩ ya taxünexũ maxèecü. ¹⁴ Rü yema Tupana wena namaxèexũrũũ ga tórü Cori ya Ngechuchu, rü ngèxgumarũũ tá ta norü poramaã wena tüxũ namaxèxèe. ¹⁵ ¿Rü tama èxna nüxũ pecuèx na ngẽma pexene rü Cristuarü na yĩixũ? ¿Rü ñuxãcü i ngẽma chaxune i Cristuarü ixĩxũ rü ngexũ i ngèãexũmaã inapexũ? Taxucürüwama ngẽmaãcü nixĩ. ¹⁶ ¿Rü èxna tama nüxũ pecuèx ega wüxi i ngexũ i ngèãexũmaã inapexgu ya wüxi ya yatü rü ngẽma taxre i naxüne rü wüxitama i naxüne yĩixũ? Erü Tupanaãrũ ore i ümatũxũwa rü ñanagürü:

“Ngẽma taxre i naxüne rü wüxitama i naxüne tá nixĩ”, ñanagürü. ¹⁷ Natürü ngèxguma wüxi i duũxũ rü tórü Cori ya Cristuaxũ yaxõõxgu, rü ngẽma naãe i ngẽma duũxũ rü Cristuãẽmaã wüxigutama narüxĩnũe. ¹⁸ Rü ngẽmacèx name nixĩ na nüxũ perüxoexũ i pexeneãrũ ngúchaũ na pexũxũ. Rü guxũma i togü i pecadu i wüxi i duũxũ üxũ rü tama naxünexũ nachixexèe. Natürü ngẽma na naĩ i ngemaã nangèãexũ rü ngẽma waxi nixĩ i naxünexũ chixexèexũ. ¹⁹ ¿Tama èxna nüxũ pecuèx i pexene rü Tupanaãe i Üünexũpata na yĩixũ? Rü pegu nixĩ i naxãchiũxũ i ngẽma Naãe i Üünexũ i Tupana pexna muxũ. Rü ngẽmacèx i pema rü tama pegüarü yoratama pixĩgü. ²⁰ Erü Tupana rü marü pexcèx nataxe rü poraãcü nüxũ petatanü. Rü ngẽmacèx penaxwèxe i ngẽma pexenemaã meã Tupanacèx pemaxè na ngẽmaãcü namaã penataxèexũ ya Tupana.

7

Ucuxègü i ãmèxchiga

¹ Rü ñuxma rü tá pexũ changãxũ ga yema ãmèxchiga ga choxna naxcèx pecaxũ ga perü poperawa. Rü narümemaẽ chi nixĩ i noxtacũma tama naxãmax ya yatü. ² Natürü ngẽma na naxüneãrũ ngúchaũ na naxügümarexũ i duũxũgü, rü narümemaẽ nixĩ i wüxichigü ya yatü rü na naxãmaxũ, rü wüxichigü i nge rü na naxãtexũ. ³ Rü yima yatü ya ãmacü rü taxucürüwama naxmèxna nügü ninuxũ. Rü ngẽma nge i ãtecü rü taxucürüwama ngĩtena ngĩgü iyanuxũ. ⁴ Erü ngẽma nge i ãtecü rü tama ngĩgũxũneãrũ yoratama iyixĩ, erü ngĩte nixĩ ya ngĩxĩneãrũ yora ixĩcü. Rü ngèxgumarũũ ya ngĩte rü tama nügũxũneãrũ yora nixĩ, erü naxmèx iyixĩ i naxüneãrũ yora ixĩcü. ⁵ Rü tama name i wüxi ya yatü rü namèxna nügü ninuxũ, rü èxna wüxi i ngecü rü ngĩtena ngĩgü iyanuxũ, ega tama nügümaã namexèẽãgu na ñuxre i ngunexũ tama nügümaã namaxèxũ naxcèx na nayumüxègũxũ. Rü ngẽmawena rü name nixĩ

na wenaxārū noxrirūū nūgūmaā namaxēxū na tama Chataná nūxna ĩnūxūcèx na chixexūgu nayixēēxūcèx. ⁶ Rū guxūma i ñaā ore i pemaā nūxū chixuxū i āmèxchiga rū ātechiga rū tama wūxi i mu nixī i ngēma. Natürū pemaā nūxū chixumare na nūxū pecuáxūcèx na namexū i ngēmaācū na penaxūxū. ⁷ Rū chomatama nagu charūxīnū rū chierū name nixī ega choma chamaxūxūrūū namaxēgu i guxūma i duūxūgū. Natürū Tupana rū wūxichigū i duūxūna nanaxā i nacūma na ñuxācū namaxēxūcèx rū ñuxācū nagu naxīnūxūcèx. Rū ngēmacèx tama guxāma tawūxigu. ⁸ Rū ngēma ngemèxgūxū rū ngetegūxū rū yutegūxū rū namaā nūxū chixu rū narūmemaē nixī i chauxrūū tama naxāmèx rū tama naxāte. ⁹ Natürū ngēxguma wūxi i duūxū taxucūrūwa naxūneārū ngúchaūmaā naporagu, rū name nixī na naxāmaxū rū ēxna naxātexū. Erū narūmemaē nixī i noxtacūma naxāmèx rū ēxna naxāte na tama ngema norū ngúchaūgagu dūxwa chixexūgu nanguxūcèx. ¹⁰ Natürū yixema marū āmaxē rū ātexe, rū tūmamaā nūxū chixu na tama namexū na tūmatexū na ítatáxū. Rū ngēma mu rū tórū Coriarū mu nixī, rū tama choxrū nixī. ¹¹ Natürū ngēxguma chi ngürūāchi wūxi i ngexū natexū ítéxgu, rū name nixī i noxtacūma nangete rū ēxna wena natecèx nataegu. Rū ngēxgumarūū ta ya yatū rū tama name i namèxū ínatèx. ¹² Rū ñuxma rū choxū nangēxma i wūxi i ore i tūmacèx ya yixema āmaxē ngīmaā i wūxi i nge i tama yaxōxcū. Rū ngēma ore rū choxrūtama nixī rū tama tórū Coriarū nixī. Rū ngēxguma wūxi ya yatū ya ōcū ngīmaā āmaxgu i wūxi i nge i tama yaxōxcū, rū tama name i ngīxū ínatèx, ega ngīma rū aixcūma namaā naxātechaūgu. ¹³ Rū ngēxguma wūxi i nge i yaxōxcū ātegu namaā ya wūxi ya yatū ya tama yaxōcū, rū tama name i ínatèx ya yima ngīte ega nūma ya yima yatū rū aixcūma ngīmaā naxāmèxchaūgu. ¹⁴ Rū yima yatū ya tama yaxōcū, rū namèx i yaxōxcūgagu Tupana nūxū nacuèx. Rū ngēma ngecū i tama yaxōxcū, rū ngīte ya yaxōcūgagu Tupana ngīxū nacuèx. Erū ngēxguma chi tama ngēmaācū yixīgu, rū chi ngēma naxācūgū rū duūxūgū i tama yaxōgūxūācūgūrūū tá nixīgū. Natürū i ñuxma ya naxācūgū rū marū Tupana tūxū nacuèx. ¹⁵ Natürū ngēxguma yima yatū ya tama yaxōcū rū namèxū ínatáxchaūgu rū ꝑnoxtacūma ngīxū ínatá! Rū ngēxgumarūū ega ngēma ngecū i tama yaxōcū rū ngītexū ínatáxchaūgu, rū ꝑnoxtacūma ngītexū ínatá! Rū ngēxguma ya yima yatū ya yaxōcū rū marū name ega wena naxāmèxgu. Rū ngēma ngecū i yaxōcū rū marū name ega wena naxātegu. Erū Tupana pexū nade na pegū pengechaūgūxūcèx. ¹⁶ Rū ngēmacèx, Pa Ngecū i Tupanaāxū Yaxōxcūx, rū ngēxguma cute i tama yaxōxū cuxū ítáxchaūgu, namē nixī i tama cunachūxu, erū tama nūxū cucuèx ngoxi tá nūxū cuyaxōxēē i ngēma cute rū ēxna tama. Rū cumax, Pa Yatū ya Yaxōxcūx, rū ngēxguma cuxmèx i tama yaxōxū cuxū ítáxchaūgu, rū name nixī i tama cunachūxu, erū tama nūxū cucuèx ngoxi tá ngīxū cuyaxōxēē i ngēma cuxmèx rū ēxna tama. ¹⁷ Rū ñuxma rū pemaā nūxū chixu rū nūma ga Tupana rū wūxichigū ga duūxēna nanaxā ga tūmaārū cuèx na tūmaārū maxūmaā itacuáxūcèx rū meā tanaxūxūcèx i ngēma puracū ga noxri tūxū yexmaxū ga tauta Tupana tūmacèx caxgu. Rū ngēma nguxēētae nixī i namaā chanangūexēēxū i guxūma i yaxōgūxū i wūxichigū ya tupaucawa ngēxmagūxū. ¹⁸ Rū ngēxguma Tupana naxcèx caxgu i wūxi i duūxū i marū Yudíugūrūū íwiechèxmūpēxechiraūxū, rū nūetama nixī ega ngēmaācūtama yixīgu. Rū ngēxguma Tupana nayauxgu i wūxi i duūxū i tama íwiechèxmūpēxechiraūxū, rū nūetama nixī ega ngēmaācūtama yixīgu. ¹⁹ Erū Tupanapēxewa rū nūetama nixī ega wūxi i duūxū rū ínawiechèxmūpēxechiraūgu rū ēxna tama. Erū ngēma Tupana aixcūma naxwèxexū nixī na naga naxīnūxū i wūxichigū i duūxū. ²⁰ Rū wūxichigū i duūxū rū name nixī i nawatama napuracū ga yema puracū ga nūxū yexmaxū

ga yexguma Tupana noxri naxcèx caxgu. ²¹ Rū yexguma wūxi ga coriarū duūxū quixīyane Tupana cuxcèx caxgu, rū tama name i ngēmacèx cuxoegaãē. Natürü ngēxguma cuxū natauxchagu na nūxna ícunguxuchixū i ngēma cori, rū marū name na ícunguxuchixū. ²² Rū cuma ga na cucoriāxyane cuxcèx naçaxū ga Tupana, rū name nixī i nūxna cucuèxāchi na Cori ya Cristu pecaduwa cuxū ínguxuchixēēxū. Rū cuma ga na cungearū coriāxyane cuxcèx naçaxū ga Tupana, rū name nixī i nūxna cucuèxāchi na tórü Cori ya Cristuarū duūxū quīxū i ñuxma na nūxū cupuracūxcèx. ²³ Tupana rū marū pexcèx nataxe rū poraācū nūxū petatanū. ¡Rū ngēmacèx i ñuxma rū tāūtāma naga pexīnūē i ngēma duūxūgū i wenaxārū ñoma i naāneārū chixexūwa pexū gagūchaūxū! ²⁴ Rū name nixī, Pa Chaueneēgūx, i wūxichigū i pema rū meā Tupanapēxewa penaxūama ga yema puracū ga noxri pexū yexmaxū ga yexguma Tupana pexcèx caxgu. ²⁵ Rū ñuxma rū tá pemaã nūxū chixu i nachiga i ngēma duūxūgū i ngemèxgūxū rū ngetegūxū. Rū tórü Cori ya Ngechuchu rū taxuūma i mu choxna naxā i ngēmachiga. Natürü tá pemaã nūxū chixu i ñuxācū nagu charūxīnū i ngēmachiga. Rū ngēma chorū ore rū aixcūma nixī erū choma nixī i wūxi i duūxū ga nūxū changechaūtümūūācūma choxū nayaxuxū ga tórü Cori. ²⁶ Natürü ngema ñuxma nūxū idauxū i guxchaxūgūgagu rū chauxcèx rū chi name i tama nixāmèx i ngēma yatūgū i ngemèxgūxū. ²⁷ Rū ngēxguma marū cuxāmèxgu rū tama name i ngīxū ícutèx. Natürü ngēxguma cungemèxgu rū name i tama cuxāmèx. ²⁸ Natürü ngēxguma cuxāmèxgu rū tama pecadu nixī i ngēma. Rū ngēxguma wūxi i paxū ātegu rū tama pecadu nixī i ngēma. Natürü ngēma ixāmèxgūxū rū ixātegu rū tá nayexera i norū guxchaxūgū i ñoma i naānewa, rū ngēma nixī i tama chanaxwèxexū na nūxū nangupetūxū. ²⁹ Pa Chaueneēgūx, pemaã nūxū chixu rū tama muxū i ngunexū tūxū nangēxma na naxūxcèx i Tupanaārū puracū. Rū ngēmacèx ya yīxema ixāmèxgūxe rū name nixī i meā tanaxūgū i Tupanaārū puracū ñoma tangemèxgūxūrū. ³⁰ Rū yīxema ngexwaca yutanūgūxe rū yixema peta ūgūxe rū yīxema itaxegūxe, rū tama name i ngēmacèx Tupanaārū puracū na ítangēxgūxū. ³¹ Rū yīxema tūxū nangēxmaxē i tūmaārū ngēmaxūgū i ñoma i naānewa, rū tama name i ngēmacèx Tupanaārū puracū na ítangēxgūxū. Erū ñoma i naāne i ñuxma nūxū idauxū rū paxa tá nagux. ³² Rū tama chanaxwèxe na tacūcèx pexoegaãēgūxū. Rū ngēxguma wūxi i yatū ngemèxgu, rū Tupanaārū puracūgu narūxīnū rū nagu narūxīnū na ñuxācū Tupanaārū ngūchaū naxūxū. ³³⁻³⁴ Natürü ngēxguma naxāmèxgu ya wūxi ya yatū, rū ñoma i naāneārū ngēmaxūgu narūxīnū rū nagu narūxīnū na ñuxācū namèxū nataāēxēēxū. Rū ngēmaācū muxūgu narūxīnū. Rū ngēxgumarūū ta nixī i ngexūgū. Rū ngēma ngexū i ngetexū rū Tupanaārū puracūgu narūxīnū, erū marū Tupanana nūgū naxā rū guxū i naxūnemaã rū naāēmaã naxcèx namaxū. Natürü ngēma ngexū i ātexū rū ñoma i naāneārū ngēmaxūgu narūxīnū, rū nagu narūxīnū na ñuxācū natexū nataāēxēēxū. ³⁵ Rū perū mexūcèx nixī i pemaã nūxū chixuxū i ngēma, rū tama pexna na chanachuxuxūcèx nixī. Natürü ngēma ñacharūgū na meā pemaxēxūcèx rū aixcūma penaxūxcèx i tórü Coriarū puracū. ³⁶ Rū ngēxguma texé nagu rūxīnūgu na tūmaxācū rū marū na napaxū, rū tūmacèx namexgu na naxātexū, rū marū name i ngīxū taxūte ega aixcūma tūmacèx namexgu. Rū ngēma na naxātexū i tūmaxācū rū tama pecadu nixī. ³⁷ Natürü ngēxguma wūxi i yatū nūxū nangēxmagu i norū pacū rū tama nanaxwèxegu na ngīxū naxūtexū, rū ngēma rū ta marū name. Erū naxmèxwa ingēxma rū taxucèxma texé tanachixewe na ngīxū naxūtexūcèx. ³⁸ Rū ngēmawa nūxū tadau rū ngēma yatū i naxācū ngīxū ūtexū rū mexū naxū. Rū ngēma yatū i tama naxācū ngīxū ūtexū rū yexeraxū i mexū naxū. ³⁹ Rū

wūxi i nge i ātecū rü ngītemēxēwa ingēxma i ngēxguma namaūxgu ya ngīte. Natürü ngēxguma nayuxgu ya ngīte, rü marü name ega to i yatü i ngīma ngīxū ngúchaūxūmaã naxātegu. Natürü inaxwēxe na wūxi ya yatü ya yaxōcūmaã naxātexū. ⁴⁰ Natürü chauxcèx rü yexeraācü chi itaãe i ngēxguma chi tãū chima wena naxātegu. Rū ngēma ore rü choxrütama nixī, natürü nagu charūxīnū rü Tupanaãe i Ūünexūārū ĩnū ta nixī.

8

Tupananetachicünèxāgūna naxuaxūgūxū ga ònachiga

¹ Ñuxma rü tá pemaã nūxū chixu i nachiga i ngēma ònagü i ngēma duūxūgü i tama Ngechuchuaxū yaxōgūxū norü tupananetachicünèxāgūna uaxūgūxū. Rū aixcūma nixī i wūxichigü i yixema i meãma nūxū icuáxū i ngēmachiga. Natürü ngēma nūxū na icuáxūgagu rü ñuxguacü rü yigü namaã ticuèxūxū. Natürü ngēma na yigü ingechaūxū rü tūxū narüngūxēe na yexeraācü meã yaxōgūchigūxū. ² Rū ngēxguma chi texé nagu rüxīnūgu na tacūxū tacuáxū, rü name nixī i nūxna tacuèxāchi na ngēxguma rü ta tama aixcūma nūxū tacuáxū i guxūma i ngēma cuèx i aixcūma ixīxū. ³ Natürü ngēxguma texé aixcūma Tupanaxū ngechaūgu, rü Tupana rü tūxū nacuèx ya yixema. ⁴ Rū ngēma na nangōxū i ngēma ònagü i tupananetachicünèxāgūna naxuaxūgūxū i duūxūgü, rü meãma nūxū tacuèx na taxuwama namexū i ngēma tupananetachicünèxāgü erü tama aixcūma Tupanaxūchi nixīgü. Erü wūxixicatama nixī ya aixcūma Tupana ixīcü, rü nataxuma ya naī. ⁵ Rū woo duūxūgü nagu narūxīnūe rü nangexma i muxūma i tupanagü i ñoma i naanewa rü dauxūguxū i naanewa, natürü taxcèx rü tama ngemaācü nixī. ⁶ Erü yixema nūxū tacuèx na wūxitama yixīxū ya Tupana ya Tanatü ixīcü. Rū nūma ya Tanatü nixī i naxūāxū i guxūma i tacü i ngēxmaxū, rü naxcèx nixī i imaxēxū i yixemax. Rū ngēxgumarūū ta nangēxma i wūxitama ya tórü Cori ya Ngechuchu ya Cristu. Rū yimagagu nixī na nangēxmaxū i guxūma, rü yimagagu nixī i tūxū nangēxmaxū i maxū. ⁷ Natürü tama guxūma i yaxōgūxū nūxū nacuèx na nangēxmaxū ya wūxitama ya Tupana rü wūxitama ya tórü Cori. Rū ñuxre i nūmagü ga ūpa rü nūxū nayapue na nūxū yaxōgūāxū i ngēma tupananetachicünèxāgü, rü ñuxma rü ta tama aixcūma nūxū nacuèxgü i ngēma mexū i Tupana nūxū naxwèxexū. Rū ngēmacèx nixī i ñuxma i nagu naxīnūèxū na chixexū naxūgūxū i ngēxguma nangōxgūāgu i ngēma naxūnamachi i togü i duūxūgü norü tupananetachicünèxāgūna uaxūgūxū na nūxū namaã yacuèxūūgūxūcèx. ⁸ Rū yixema nūxū tacuèx na tama tacü rü namachi na ingōxūgagu yīxū na Tupana tūxū dexū. Rū tãūtáma yexera time i napēxewa ega nangōxgūgu i ngēma namachi. Rū tãūtáma yexera tichixe i napēxewa ega tama nangōxgūgu. ⁹ Natürü i pema i nūxū na pecuáxū na tama pecadu yīxū na nangōxū i ngēma namachi, rü pexuãégü erü ngürüāchi ngēma na pengōxūgagu chixexūgu tá penayixēe i ngēma peeneégü i tauta aixcūma meã nūxū cuèxgūxū na tacü yīxū i Tupana nūxū naxwèxexū! ¹⁰ Erü cuma na meã Tupanaxū cucuáxū, rü ngēxguma chi cunangōxgu i ngēma namachi i ngextá tupananetachicünèxāgūxū íyacuèxūūgūxūwa, rü ngürüāchi wūxi i cueneē i tauta meã Tupanaxū cuáxū tá cuxū nadau. Rū ngürüāchi nūma rü tá ta nanangōx i ngēma namachi woo naãēwa nagu naxīnūgu na wūxi i chixexū yīxū na nangōxū i ngēma namachi. ¹¹ Rū ngēmaācü i cuma na meã Tupanaxū cucuáxū, rü tá icuyanatauxēe i ngēma cueneē i Cristu naxcèx yuxū i tauta meã Tupanaxū cuáxū. ¹² Rū ngēmacèx i ngēxguma chixexūgu cunanguxēēxgu i ngēma cueneē i tauta meã Tupanaxū cuáxū, rü Cristumaã rü ta chixexū cuxū. ¹³ Rū ngēmacèx i ngēxguma ngēma namachi i

changōxūgagu chixexūgu chananguxēēxgu i chaueneē, rü narümemaē nixī i noxtacūma taguma namachi changōx na tama pecadugu chananguxēēxūcèx i ngēma chaueneē.

9

Yixema Cristu tūxū muxē na nūxū tapuracūxūcèx, rü tūxna naxū i tūmaārū natanū

¹ Rü pemaā nūxū chixu rü tórū Coritama nixī ya choxū yaxucū rü choxū mucū na norū puracū chaxūxūcèx, rü ngēmacèx taxuūma i duūxūgūmēxēwa changēxma i ñuxmax. Rü chomatama chauxetūmaā tórū Cori ya Ngechuchuxū chadau, rü ngēma puracū i nūxū chaxūxūgagu nixī i peyaxōgūxū i pemax. ² Rü woo togū i duūxūgū tama choxū cuèxgūchaūgu na tórū Cori choxū muxū, natürü i pema rü meāma nūxū pecuèx na nūma yīxū ga choxū namuxū. Yerü chauxūtawa nixī ga tórū Coriaxū peyaxōgūxū, rü ngēmawa nūxū pecuèx na aixcūma yīxū na nūma choxū namuxū. ³⁻⁴ Rü ñaā nixī i chorü dexa i namaā chanangāxūxū i ngēma duūxūgū i chauchiga idexagūxū:

“¿Éxna tama name na duūxūgū choxna naxāxū i chorü òna rü chorü axexū naxcèx i chorü puracū? ⁵ ¿Éxna tama inamexū ta na wūxi i ngexū i yaxōxūmaā na chaxāmaxū na chayagaxūcèx ngēxgumarūū na naxāmaxū i Pedru, rü naēneēgū ya tórū Cori, rü ngēma togū i yatūgū i Tupana imugūxū? ⁶ ¿Rü éxna pema nagu perūxīnūēgu rü choma rü Bernabéxicatama i tama namexū na toxū perūngūxēēgūxū ngēma togū i orearū uruūgūxū na perūngūxēēgūxūrūū? ⁷ ¿Tacū rü duūxū i churarawa ūxū i nūgūxūtama naxūtanūxū i norū òna? ¿Rü tacū rü duūxū i orix itoxū i tama namūxū i norū o? ¿Rü tacū rü duūxū i carnerugūna dauxū i tama nagūnenixū ne ixaxūxū?” Ngēma ñacharūgū nūxū i ngēma duūxūgū i chauchiga idexagūxū. ⁸ ¿Rü ñuxma rü tāūtāma nagu perūxīnūē na chorü orexicatama yīxū i ñaā nūxū chixuxū! Erü Tupanaārū ore ga Moīché ūmatūxūwa rü ta ngēma ñanagürü. ⁹ Erü ngēma ore rü ñanagürü:

“¿Rü ngēma woca i aruchuarū putēxewa puracūxū, rü tāūtāma cunawēxnagu na tama yima aruchuwa nachibūxūcèx!”

ñanagürü i ngēma ore. Rü nūxū tacuèx na tama wocagūgu naxīnūxū ga Tupana ga yexguma yema ñaxgu. ¹⁰ Natürü pemaā nūxū chixu rü tagu nixī ga naxīnūxū ga yexguma yema ñaxgu ga Tupana. Rü tachiga nixī ga naxūmatūxū ga yema ore. Erü yixema aruchunecū ūxe rü yixema norū oarū puxwa puracūxe, rü ngēxguma tapuracūeyane rü tanaxwēxegū na ítananguxēēgūxū i ngēma norū o i tūxna ūxū. ¹¹ Rü toma rü wūxi ya nanetūchire ya itatoxūnerūū tixīgū ga yexguma pemaā nūxū tixuxgu ga Tupanaārū ore. ¿Rü ñuxma rü tama éxna i pexcèx namexū na toxna penaxāxū i tacū i toxū taxuxū? ¹² Rü ngēxguma ngēma togū i orearū uruūgū petanūwa nayauxgūgu i ngēma nūxū taxuxū, rü maneca toma rü yexera name nixī i petanūwa tanayaxu i ngēma toxū taxuxū. Natürü i toma rü tama ngēmaācū tanaxū. Erü toma rü guxū i guxchaxūmaā taporae na tama pexū tanaguxchaxēēxūcèx na Cristuaxū peyaxōgūxū. ¹³ Pema nūxū pecuèx rü guxūma i duūxūgū i tupauca ya taxūnēwa puracūexū, rü ngēma òna ya yima tupaucawa ngēxmaxūtama nangōxgū. Rü ngēma duūxūgū i tupaucagu Tupanacèx naxūnagū dēixū, rü nanade i ñuxre i ngēma namachi norū ngōxruū. ¹⁴ Rü ngēxgumarūū ta ya yixema nūxū ixugūxe i ore i tūxū maxēxēxū, rü tórū Cori nūxū nixu rü name nixī i tanayauxtanū i ngēma tūmaarū puracū. ¹⁵ Natürü i choma rü taguma ngēmaācū chanaxū. Rü ñuxma na pexcèx chanaxūmatūxū i ñaā popera,

rū tama tacū choxna pexāxūcèx nixī. Erū ngēma na taguma texéxūtawa tacūcèx íchaçaxū, rū wūxi i chorū taãe nixī. Rū narümemaẽ chierū nixī na chayuxū naxūpa na texé choxna nayaxuxū i ñaã taãe i choxū ngēxmaxū. ¹⁶ Rū ñuxma na nūxū chixuxū i ngēma ore i tūxū maxēxēxū, rū taguma ngēmacèx chaugū chicuèxū. Erū woetama ngēma nixī i chorū puracū ga Tupana choxna āxū, rū ngēmacèx taxucūruwama chanangexrū. Erū poraãcū chi chachixexūgu i ngēxguma tãū chima nūxū chixuxgu. ¹⁷ Rū ngēxguma chi chaugu chitama chanaxūxgu i ngēma puracū, rū nagu chi charūxīnū na choxū naxātanūxū. Natürū ngēxguma Tupana choxū muxūãcūma chanaxūxgu, rū chanaxūama erū woetama ngēma nixī i chorū puracū ga Tupana choxna āxū. ¹⁸ ¿Rū ñuxma rū tacū tá nixī i chorū natanū naxcèx i ngēma puracū i chaxūxū? Rū dūcax, rū chorū natanū nixī i ngēma taãe i chayaxuxū i ngēxguma ngetanūãcūma nūxū chixuxgu i ngēma ore i tūxū maxēxēxū. Rū ngēmaãcū woo Tupanapēxewa name na petanūwa chanayaxuxū i chorū natanū na ngēmamaã chamaxūxūcèx, natürū taguma texena naxcèx chaca. ¹⁹ Rū woo taxūxemēxēwa changēxma i chomax, natürū guxāmēxēwa chaugū changēxmaxē, na ngēmaãcū yexeraãcū muxūma i duūxūg ūxū charūngūxēxūcèx na Cristuaxū yaxōgūãxūcèx. ²⁰ Rū ngēxguma chautanūxū i Yudíugūtanūwa changēxmagu, rū namaã chaugū chawūxiguēẽ na ngēmaãcū nūxū charūngūxēxūcèx na Cristuaxū yaxōgūãxūcèx. Rū woo tama yema Moíché ūmatūxū ga mugütūūwa changēxmagu, natürū chayanguxēãma i ngēma mugū na ngēmaãcū Cristuxūtawa chanagagūxū i ngēma duūxūgū i ñuxma rū ta nagu íxū i ngēma mugū ga Moíché ūmatūxū. ²¹ Rū ngēxguma natanūwa changēxmagu i ngēma duūxūgū i tama Yudíugū ixīgūxū, rū ngēma duūxūgūmaã chaugū chawūxiguxēẽ na ngēmaãcū nūxū charūngūxēxūcèx na Cristuaxū yaxōgūãxūcèx. Natürū taguma íchanangēx i Tupanaãrū mugū erū guxūguma Cristuarū mugütūūwa changēxma. ²² Rū ngēxguma natanūwa changēxmagu i ngēma duūxūgū i tama poraãcū Cristuchigaxū cuèxgūxū, rū choma rū ta ngēma duūxūgūmaã chaugū chawūxiguxēẽ, na ngēmaãcū nūxū charūngūxēxūcèx na Cristuaxū yaxōgūãxūcèx. Rū ngēmaãcū guxūma i duūxūgūrū chaugū chixīxēẽ, rū nagūxūraūãcūma naxcèx chadau na ngēmaãcū dūxwa Tupanaxūtawa chanagagūxūcèx i ñuxre i nūmagū. ²³ Rū ngēmaãcū nixī i chapuracūxū na guxūwama nanguxūcèx i ngēma ore i tūxū maxēxēxū. Erū chanaxwèxe na choma rū ta choxū nangēxmaxū i ngēma maxū i taguma gūxū, naxrū i guxūma i ngēma duūxūgū i nūxū yaxōgūxū. ²⁴ Pema rū meãma nūxū pecuèx i wūxi i inūca i nawa iñaãchixū rū muxūma inaxūãchi, natürū wūxixicatama nixī i ngēma nūxīra ínguxū rū nayaxuxū i norū ãmare. Rū name nixī i pegūna pedau na Tupana pexna naxāxūcèx i ngēma perū ãmare. ²⁵ Guxūma i ngēma duūxūgū i nūgū ngúexēxū naxcèx i wūxi i inūca na toguegūxū naporamaexūcèx, rū meã nūgūna nadaugū na ngēmaãcū nayauxgūãxūcèx i norū ãmare i paxaãchiruū ixīxū. Natürū yixema na yaxōgūxū rū yigūna tadaugū na meã naxūgūxūcèx rū meã imaxēxūcèx na nayauxgūxūcèx i tórū ãmare i taguma gūxū. ²⁶ Rū ngēmacèx i choma rū tama ñoma chauechitamare chiñaxūrū chixī, rū tama ñoma tacū i nūgū dèixū i ngürüanegumare idagūxūrū chixī. ²⁷ Rū ngēmacèx meã chaugūmaã ichacuèx na taxuūma i chaxuneãrū ngúchaū chaxūxūcèx. Erū tama chanaxwèxe i mexūmaã togūxū changuxēẽchirēxãcūma chixexū chaxū rū ngemagagu tama chanayaxu i chorū ãmare.

10

Nayaxucuxēgū na tama nūxū yacuèxūūgūxūcèx i tupananetachicünèxãgū

1 Pa Chaueneēgūx, chanaxwèxe i nūxna pecuèxāchie ga tacū nūxū na ngu-petūxū ga yema nuxcūmaūgūxū ga tórū oxigū ga Moïchéwe ruxīxū. Rū pema nūxū pecuèx rū yexguma nawe naxīxgu rū wūxi ga caixanexū napēxegu nixū rū nayadūxū. Rū guxūma ga yema duūxūgū rū wūxigu Moïchémaā natūūgu nixīxūtanū. Rū yexgumarūū ta Moïchémaā nawa nichoū ga yema Taxtū ga Dauchiūxū. 2 Rū guxūma ga yema duūxūgū rū yexguma wūxigu Moïchémaā yema caixanexūpechitatūūgu yaxīxūtanūgu rū yema Taxtū ga Dauchiūxūwa yachoūgu, rū yemaācū nūgū nangoxēēgū na Moïchéweama naxīxū. 3 Rū yexgumarūū ta ga guxūma ga yema duūxūgū nanangōxgū ga yema pāū ga daxūwa ruyixū. 4 Rū guxūma ga yema duūxūgū nayaxaxgū ga yema dexá ga Cristu nūxna āxū. Yerū Cristu rū yema duūxūgūxū ínixūmūcū ga yema ínaxīxūwa, rū nūxna nanaxā ga yema dexá ga yaxaxgūxū. 5 Natūrū narūmumaē ga yema duūxūgū ga tama Tupanaārū ngúchaū ūgūxū. Rū yemacèx ga yema duūxūgū rū yexma nayue rū yēma nawogū ga naxūnegū ga dauxchitawa ga taxúema íxāpataxūwa. 6 Rū guxūma ga yema nangupetū na tórū cuèxruū yīxūcè rū tama tórū oxigūrūxū chixexūcèxama idaugūxūcèx. 7 Rū ngēmacèx tama name i nūxū picuèxūūgū i tacū rū tupananchicūnèxāgū, yexgumarūū ga ñuxre ga nūmagū naxūgūxūrūū. Erū Tupanaārū ore i ūmatūxūwa rū tórū oxigūchigaxū nixu rū ñanagūrū:

“Rū duūxūgū ínarūtogū na nachibūexūcèx rū na naxaxegūxūcèx, rū ngēmawena rū inachigū na íyayūxexūcèx”,

ñanagūrū i ngēma ore. 8 Rū tama name i yixema rū naī i ngemaā itape yexgumarūū ga ñuxre ga nūmagū naxūgūxūrūū. Rū yemacèx wūxitama ga ngunexūgu rū nayue ga 23,000. 9 Rū tama name i nūxū taxū ya tórū Cori na ñuxācū yaxna tamaā naxīnūxū yexgumarūū ga ñuxre ga nūmagū naxūgūxūrūū. Rū yemacèx nixī ga yema duūxūgūxū nangōxcuxū ga āxtapegū rū nayuexū. 10 Rū tama name i chixexū Tupanamaā pixugū yema ñuxre ga nuxcūmaūgūxū ga tórū oxigūrūū. Rū yemacèx ga Tupanaārū orearū ngerū ga daxūcūāx rū nanadai. 11 Rū guxūma ga yema nuxcūmaxūgūxū ga duūxūgūxū ngupetūxū, rū ñomaxūcūū rū tórū cuèxruū nixī. Rū naxūmatū na ngēmawa nūxū icuáxūcèx na ñuxācū Tupana naxwèxexū na imaxēxū i yixema i ñomaūcūū. 12 Rū ngēmacèx ya yīxema tūgūgu ruxīnūxē na taporaxū i Tupanapēxewa, rū name nixī na meā tūgūna tadauxū na tama chixexūgu tangūxūcèx. 13 Rū ñuxma rū ta taguma pexcèx ínangu i ngúchaxū i chixexū i taxucūrūwama namaā yaxna pexīnūxū. Rū name nixī i Tupanana perūyoū erū nūma rū aixcūma nayanguxēē i ngema tamaā inaxunetaxū rū taxūtāma nawa pexū nawogū i ngúchaxūgū i taxucūrūwama yaxna namaā pexīnūxū. Natūrū ngexguma tá ngúchaxūgū i chixexū pexcèx ínguxgu rū nūma rū tá pexū ínapoxū na tama nagu peyixūcèx. 14 Rū ngēmacèx, Pa Chaueneēgū ya Pexū Changechaūgūxex, jrū nūxū perūxoe i ngema nacūmagū i tupananchicūnèxāgūcèx naxūgūxū i ngema duūxūgū i tama yaxōgūxū! 15 Pemaā nūxū chixu i ngēma ore, erū chauxcèx rū duūxūgū i nūxū cuáxū pixīgū. Rū pema tátama nagu perūxīnūē i ngēma pemaā nūxū chixuxū. 16 Rū ngēxguma ōna i ūūnexūcèx ingutaquēxegūgu, rū yaxaxgūgu ya yima binu ya ūūnecū rū moxē naxcèx íxāgūgu, rū ngēmaācū yigū tangoxēē na Cristu ya taxcèx nagū ibacūwe ruxīxū. Rū ngēxguma nangōxgūgu i ngēma pāū i ibūcuxū, rū ngēmaācū yigū tangoxēē na Cristu ya taxcèx naxūne íxācūwe ruxīxū. 17 Rū woo na imuxū i yixema, natūrū wūxitama i pāū tangōxgū. Rū ngēmaācū nixī i wūxitama íxīgūxū erū wūxiwetama tarūxī. 18 Rū dūcax i ngēma Yudíugū i nangōxgūxū i ngēma naxūnamachi i Tupanacèx nadèixū! Rū ngēxguma wūxigu nūgūmaā nangōxgūāgu, rū guxūma i ngēma nangōxgūxū

rū ngēmaācū nūgū nangoxēē na wūxigu Tupanawe naxīxū. ¹⁹ Rū ñuxma na ngēma ñachaxū, rū tama chanaxwēxe i nagu perūxīnūē na naxūūnexū i ngēma namachi i ngēma duūxūgū i tama yaxōgūxū norū tupananetachicūnēxācēx dēixū. Rū tama chanaxwēxe i nagu perūxīnūē na tacūwa namexū i ngēma norū tupananetachicūnēxāgū, erū nangearū maxūāx. ²⁰ Natūrū pemaā nūxū chixu rū ngēxguma ngēma duūxūgū i tama Tupanaxū cuēxgūxū, norū tupananetachicūnēxācēx nadaiāgu i tacū rū naxūna, rū tama Tupanacēx nixī i nadaiāxū, natūrū ngoxogūcēx nixī i nadaiāxū. Rū tama chanaxwēxe i ngoxogūtanūxūxū pegū pixīgūxēē. ²¹ Rū pema na peyaxaxgūxū ya yima binu ya tōrū Corixū namaā picuēxūūgūcū rū taxucūrūwama namaā pexāmūcū i ngēma duūxūgū i Chatanáwe rūxīxū. Rū pema na tōrū Coriarū mechawa penangōxū i ngēma ōna i nūxū namaā picuēxūūgūxū rū taxucūrūwama ngēma duūxūgū i Chatanáwe rūxīxūārū mechawa peyachibūe. ²² ¿Rū ñuxū ñapegūxū i ñuxmax? ¿Éxna penanuxēēchaū ya tōrū Cori? ¿Éxna pexcēx rū nūxū tarūporamaēgū i yixemax?

Name nixī i taeneēarū mexūc ēx tadaugū rū tama i tóxrūtama

²³ Pema rū ñaperūgūgū:

“Marū name na tanaxūxū i tacū i tanaxwēxegūxū”, ñaperūgūgū. Rū aixcūma nixī i ngēma, natūrū tama tūxū name i guxūma i ngēma ixūxchaūxū. Rū ngēmaācū Cristu tūxū ínanguxūxēē na naxūūcēx i ngēma inaxwēxexū, natūrū tama guxūma i ngēma ixūxū tūxū narūngūxēē na yexeraācū meā yaxōgūamachigūxūcēx. ²⁴ Rū tama name nixī i tóxrūtama mexūcēx tadaugū, natūrū name nixī i togūarū mexūcēx tadaugū. ²⁵ Rū marū name i penangōx i nagūxūraūxū i namachi i namaā nataxegūxū, natūrū taxucēxma tūxcūū naxcēx ípeca ngoxi marū tupananetagūxū namaā yacuēxūxūgūxū i namachi yixī. ²⁶ Erū ñoma i naāne rū guxūma i nawa ngēxmaxū, rū tōrū Cori ya Tupanaarū nixī. ²⁷ Rū ngēxguma chi wūxi i duūxū i tama yaxōxū pexna uxgu na naxūtawa peyachibūexūcēx, rū chi ngēma pexīxgu, rū marū name i penangōx i guxūma i ōna i pepēxegu yaxūxūchixū. Rū taxucēxma tūxcūū naxcēx pexoegaāē rū nūxna peca na ngextá ne naxūxū i ngēma namachi i pemaā nangōxū. ²⁸ Natūrū ngūrūāchi wūxie tá pemaā nūxū tixu rū ñatarūgū:

“Ñāā namachi rū tupananetachicūnēxācēx yamēxgūxū i naxūnawa ne ūxū nixī”, ñatarūgū. Rū ngēxguma i pema rū tama name na penangōxū i ngēma namachi na tama chixexūgu tūxū penguxēēxūcēx ya yixema pemaā nūxū ixuxe, rū tama ngēmacēx taxoegaāēxūcēx i tūmax. ²⁹ Rū tama pechiga nixī i chidexaxū i ngēxguma:

“Na tama taxoegaāēxūcēx”, ñachagu. Natūrū yixema pemaā nūxū ixuxechiga nixī i chidexaxū. Natūrū bexmana ngūrūāchi wūxi i yaxōxū tá cuxna naca rū ñanagūrū tá cuxū:

“¿Tūxcūū i togū naxcēx oegaāēxūgagu choxna cunachuxu na tama chanaxūxū i tacū i chanaxwēxexū? ³⁰ Rū ngēxguma chi Tupanana moxē chaxāxgu naxcēx i ngēma ōna i changōxū, ¿rū tūxcūū i ngēma ōnacēx choxū quixu?” ñanagūrū. ³¹ Dūcēx, pemaā nūxū chixu rū name nixī i guxūma i ngēma pexūxūmaā Tupanaxū picuēxūxūgū. Rū ngēxguma tacū pengoxgūgu rū exna tacū pixaxgūgu rū ēxna tacū i to pexūgūgu, rū name nixī i ngēmamaā Tupanaxū picuēxūxūgū. ³² Rū tama name i penaxū i tacū i togūxū chixexūgu yixēēxū, rū woo Yudíugū yixīgūgu rū ēxna tama Yudíugū yixīgūgu, rū ēxna yaxōgūxū yixīgūgu. ³³ Rū choma rū guxūwama guxūxūma chataāēxēēchaxū. Rū ngēmacēx tama chanaxū i ngēma chomatama namaā chataāēxū, natūrū

chanaxū i ngema togū namaã taãxēxū na ngemaãcū nūmagū rü ta nuxū nangúchaxū na yaxōgūãxū rü nayauxgūãxū i maxū i taguma gúxū.

11

¹ Rū name nixī i nagu pexī i chaucūma ngēxgumarūū i choma na Cristucūmagu chixūūrūū.

Name nixī i ngexūgū rü mexū i nacūmagu naxī

² Pa Chaueneēgūx, pemaã chataãē erū guxūguma chaugu perūxīnūē rü nagu pexī ga yema nguxēētae ga pexū changúexēēxū. ³ Natürü chanaxwèxe i nūxū pecuèx na Cristu rü wūxichigū i yatūeru na yīixū. Rū yatūxūgū rü naxmèxēru nixīgū ngēxgumarūū ya Tupana rü Cristueru na yīixū. ⁴ Rū ngēmacèx i ngēxguma wūxi ya yatū ngutaquèxewa yumūxēgu rü ēxna Tupanaärü orexū yaxuxgu, rü tama íngèxūchipatèxegu, rü ngēma rü wūxi i chixexū nixī i Cristupèxewa naxūxū. ⁵ Natürü ngēxguma chi wūxi i ngecū ngutaquèxewa yumūxēgu rü ēxna Tupanaärü orexū yaxuxgu, rü chi tama ngīgū natūerugu, rü ngēma rü wūxi i chixexū nixī i ngītepèxewa naxūxū. Rū ñoma ngīgū yadūeruxūūrūū iyixī. ⁶ Erū ngēxguma chi tama ngīgū natūeruchaūgu, rü narūmemaē nixī i noxtacūma ngīgū ibèixeru. Natürü ngēxguma chi wūxi i ngīrū āne yixīgu i ngēma na ngīgū nabèixeruxū rü ēxna ngīgū yadūeruxū, rü narūmemaē nixī i ngīgū itūeru. ⁷ Natürü yatūgū rü tama name na nūgū natūerugūxū. Yerū ga Tupana rü nūgūraūācū nanaxū ga yatū rü Tupanachipeta nixī. Rū yima yatūwa nixī i nangóxū na ñuxācū namexēchixū ya Tupana. Rū ngēma ngecūwa nixī i nangóxū na ñuxācū namexū ya yatū. ⁸ Yerū yexguma noxri Tupana naxūxgu ga yatū, rü tama ngecūwa nixī ga naxūāxū. Rū ngīma waxi nixī ga yatūwa ngīxū naxūxū. ⁹ Rū yatūcèx nixī ga Tupana ngīxū ūxū ga ngecū, rü tama ngecūcèx nixī ga Tupana naxūxū ga yatū. ¹⁰ Rū ngēmacèx name nixī i ngīgū itūeru na duūxūgūpèxewa rü Tupanaärü orearū ngeruūgū i daxūcūāxgūpèxewa nangóxūcèx na ngītemèxēwa nangēxmaxū. ¹¹ Natürü Tupanapèxewa rü taxuūma nixī ya yatū ega natauxgu i ngecū. Rū ngēxgumarūū ta i ngecū rü taxuūma iyixī ega natauxguma ya yatū. ¹² Yerū yexguma noxri Tupana ngīxū ūxgu ga ngecū, rü yatūwa nixī ga ngīxū naxūxū. Rū ngēxgumarūū ta ya yatū rü ngecūwa nixī i nabuxū. Natürü Tupana nixī ya naxūcū i guxūma i duūxūgū. ¹³ Rū pematama tá penangugū rü ngoxi name na wūxi i ngecū rü tama ngīgū natūeruācūma nayumūxèxū. ¹⁴ Rū woetama tórü bucūma nixī i nūxū na icuáxū na wūxi i āne yīixū na nūgū namèxyaexēēxū i wūxi i yatūxū. ¹⁵ Natürü ngecūcèx rü wūxi i mexēchixū nixī na namèxyaexū. Erū Tupana rü ngīxna nanaxā i ngīyae na ngēmamaã ngīgū natūeruxūcèx. ¹⁶ Natürü ngēxguma chi texé ngēmachiga tūgū choxūgagūgu, rü name nixī i nūxū tacuèx na ngēmatama yīixū i tacūma rü nacūma i guxūma i yaxōgūxū i guxūnema ya tupaucagūwa.

Duūxūgū rü chixri namaã inacuèxgū ga Coriarū òna i üünexū

¹⁷ Rū ñuxma i ñaã popera i pexcèx chaxūmatūxūwa rü pemaã nūxū chixu rü nangēxma i wūxi i pecūma i chixexū i tama namaã chataãēxū. Erū chauxcèx i ngēma perū ngutaquèxegū rü pexū nachixexēē, rü tama aixcūma perū meruūgū nixī. ¹⁸ Erū duūxūgū chomaã nūxū nixugūgū rü ngēxguma tórü Coricèx pengutaquèxegūūxgu rü pegū pitoye. Rū ngāxūgu chayaxō na aixcūma yīixū i ngēma nūxū yaxugūgūxū. ¹⁹ Choma rü nūxū chacuèx na aixcūma woe tátama yīixū i pegū pitoyexū na ngēmawa nūxū icuáxūcèx na texégū tīixū ya yíxema aixcūma Cristuarū duūxūgū ixīgūxe. ²⁰ Rū ngēma pegū na pitoyexūgagu nixī na tama aixcūma tórü Corixū picuèxūūgūācūma yīixū

i penangõxũ i tórũ Coriarũ õna i Üünexũ i ngẽxguma pengutaquẽxegũũxgu. ²¹ Erũ ngẽxguma penangõxgu i ngẽma õna i Üünexũ rü wüxichigũ rü peñuxãẽgũ na pexira na penayaxuxũcèx i ngẽma õna. Rü yoxni i ngẽma togũ rü ngẽxma nataiyae, rü togũ rü nayaxaxgũ ya binu ñuxmata nangãxẽ. ²² ¿Éxna pengechiũgũ ecèx tama ngẽma pechibüexũ rü pexaxegũxũ? ¿Tũxcũũ nüxũ pexoe i ngẽma togũ i yaxõgũxũ rü penaxãneẽxẽe i ngẽma yaxõgũxũ i ngearũ ngẽmaxũãxgũxũ? ¿Rü tacũxũ tá pemaã chixu i ñuxmax? ¿Pexcèx rü tá pemaã chataãẽxũ? Dücèx, pemaã nüxũ chixu rü tama pemaã chataãẽ naxcèx i ngẽma pexũgũxũ.

Tórũ Coriarũ õna i üünexũchiga

²³ Rü ngema nguxẽẽtae i pemaã nüxũ chixuxũ rü tórũ Corixütawatama chanayaxu. Rü yexguma tórũ Cori ga Ngechuchuxũ ínaxuaxũgu, rü yematama chütaxũgu rü nüma rü nanayaxu ga wüxi ga pãũ. ²⁴ Rü Tupanana moxẽ naxã, rü yemawena rü inanabücu, rü ñanagürü:

“Ñãã nixĩ i chaxune i pexcèx ichaxãxũchiga. ¡Rü penangõ i ñãã pãũ na ngẽmaãcü peãẽwa choxna pecuẽxãchiexũcèx!” ñanagürü. ²⁵ Rü yexgumarũũ ta ga chibüwena rü Ngechuchu nanayaxu ga wüxi ga pochuyu ga binuchiümaããacũxũ, rü ñanagürü:

“Rü daa binu rü wüxi i cuèxruũ nixĩ na ngexwacèx Tupana duũxũgũmaã ixunetaxũ i maxũ i taguma gũxũchiga. Rü chaugũ ya pexcèx ibacũmaã nixĩ i Tupana pexũ nüxũ cuèxẽẽxũ i ngẽmachiga. Rü ngẽxguma ñuxguacũ daa binu pixaxgũgu rü ñuxma choma na chanaxũxũrũũ tá penaxũ na peãẽwa choxna pecuẽxãchiexũcèx”, ñanagürü ga Ngechuchu. ²⁶ Rü guxũguma i ngẽxguma penangõxgu i ñãã pãũ rü peyaxaxgũgu ya daa binu rü ngẽmawa tá duũxũgũxũ nüxũ picuẽxẽẽ na ñuxãcü tórũ pecaducèx nayuxũ ga tórũ Cori. Rü ngẽmaãcü tá penaxũ ñuxmatáta wena nataegu i nümax.

Texegüçèx nixĩ i tórũ Coriarũ õna i üünexũ

²⁷ Natürü ngẽxguma chi texe tama tũgũ tamexẽẽarũ maxũxãcüma nangõxgu i Coriarũ pãũ i üünexũ rü tayaxaxũxgu ya yima binu ya üünecũ, rü pecadu taxũ napewa ya tórũ Cori ya taxcèx yucũ rü nagũ ibacũ. ²⁸ Rü ngẽmacèx naxũpa na tanangõxũ i ngẽma pãũ rü na tayaxaxũxũ ya yima binu, rü name nixĩ i wüxichigũ meã tũmaarũ maxũgu tarũxĩnũ ngoxi nataxuma i tacũ rü chixexũ i tũmaarũ maxũwa. ²⁹ Erũ ngẽxguma tama tũgũ tamaxẽẽarũ maxũãcüma tanangõxgu rü tayaxaxũxgu, rü tũgũtama poxcuwa taga. Erũ tama aixcüma tayaxõ na tórũ Corichiga yixĩxũ i ngema pãũ rü yima binu.. ³⁰ Rü ngẽmacèx nixĩ i muxũchixe i petanüwa rü pidaaweexũ rü peturaexũ, rü ñuxre i togũ rü marũ nayuexũ. ³¹ Natürü ngẽxguma chi tórũtama maxũgu rüxĩnũegu naxũpa na nangõxũ i ngẽma Coriarũ õna, rü nüma rü taxucèx tũxũ napoxcue. ³² Natürü ngẽxguma tórũ Cori ñoma i tórũ maxũwa tũxũ poxcugu, rü ngẽmaãcü tũxũ inayarüwẽxãchixẽẽ na tama yixcüra naãneãrũ guxgu tũxũ napoxcuxũcèx wüxigu namaã i ngẽma duũxũgũ i tama yaxõgũxũ. ³³ Rü ngẽmacèx, Pa Chaueneẽgũx, ngẽxguma pengutaquẽxegũgu na penangõxũcèx i ngẽma õna i üünexũ, name nixĩ i pegũ ípenanguxẽẽ na guxãma wüxigu meã penangõxũcèx. ³⁴ Rü ngẽxguma chi texé taiyèxgu, rü name nixĩ i tũmapatawatama tachibü na tama Tupana pexũ poxcuexũcèx naxcèx na chixexũ pexüexũ i perũ ngutaquẽxegüwa. Rü ngẽma to i guxchaxũgũ i pexũ ngẽxmaxũ, rü choma tá chanamexẽẽ i ngẽxguma petanüwa chaxũxgu.

12

Ngẽma cuèx i Tupanaãẽ i Üünexũ tũxna ãxũchiga

¹ Pa Chaueneēgūx, chanaxwèxe i nūxū pecuèx na ñuxācū yīxū i ngēma cuèx rü ñuxacū na yixīxū i ngema tauxcha i Tupanaāē i Üünexū tūxna āxū. Rū ngēmachiga nixī i pemaā nūxū chixuxchaūxū i ñuxmax. ² Rū pema meāma nūxū pecuèx ga yexguma tauta Cristuaxū peyaxōgūgu, rü pegū nūxna pexāgū ga tupananetachicūnèxāgū ga tama idexaxū. ³ Rū ngēmacèx i ñuxma rü chanaxwèxe i meā nūxū pecuèx rü taxucürüwama texe ya Tupanaāē i Üünexū tūmawa ngexmaxe rü chixri Ngechuchuchuga tidexa. Rū ngexgumarūxū ta rü taxucürüwama texe ngürümare tüechama rü:

“Ngechuchu rü tórü Cori nixī”, ñatarügü ega tama Tupanaāē i Üünexū tūxū muxgu na ngēmaācū tidexaxūcèx. ⁴ Rū nūma ya Tupana rü duūxūgūna nanaxā i naguxūraū i tauchagū. Natürü ngema Naāxē i Üünexū i nawa ne naxīxū i ngema tauchagū rü wūxitama nixī. ⁵ Nangēxma i nagúxūraūxū i Tupanaarū puracū, natürü yima tórü Cori ya tūxna naxācū i ngema puracūgū rü wūxitama nixī. ⁶ Rū Tupanaarū pora rü nagúxūraūācū nangox. Natürü wūxitama nixī ya yima Tanatū ya tawa gúxūraūācū nangoxēēcū i ngema norü puracū. ⁷ Rū ngema Naāē i Üünexū wūxixewachigū nanangoxēē i Tupanaarū pora i norü duūxūgūtanūwa na ngemaācū guxāarū ngūxēēruū yixīxūcèx. ⁸ Rū Naāē i Üünexū rü tūmāxena rü nanaxā i tauxcha na ucuēxū tacuāxūcèx. Rū ngēmatama Naāē i Üünexū rü togueāxū rü nanatauxchaxēē na nūxū tacuāxū na mea tangúexēētaexū i Tupanaarū ore. ⁹ Rū togue rü ngēmatama Naāē i Üünexū tūxū nanatauxchaxēē na Tupanana tarüyoexūcèx. Rū togue rü tūxna nanaxā i pora na ngēmamaā naxcèx tayataanegūxēēxūcèx i ngēma idaaweexū. ¹⁰ Rū togue rü tūxna nanaxā i pora na tanaxūxūcèx i mexūgū i Tupanaarū poramaā ūxū. Rū togue rü tūxū nanatauxchaēē na nūxū tixuxūcèx i Tupanaarū ore. Rū togue rü tūxna nanaxā i cuèx na nūxū tacuāxūcèx i tacū yīxū i ngoxogūarū ixīxū rü tacū yīxū i Tupanaāē i Üünexūārū ixīxū. Rū togue rü tūxna nanaxā i tauxcha na ngēma tama nūxū tacuāxū i nagawa tidexaxūcèx. Rū togue rü tūxna nanaxā i cuèx na tanangoxēēxūcèx na tacūchiga yīxū na tidexaxū ya yixema to i nagawa idexáxe. ¹¹ Rū guxūma i ngēma rü Tupanaāē i Üünexūtama nixī i naxūxū. Rū nūma nixī i wūxichigū i duūxūna naxāāxū i ngēma cuèx i nūma nanaxwèxexū na nūxna naxāāxū.

Guxāma i yaxōgūxū rü wūxitama i naxūnewa naxūgū

¹² Rū duūxūxūne rü woo muxūgu nixūye, natürü wūxitama i naxūne nixī. Rū ngexgumarūxū ta i ngema Cristuāxū yaxōgūxū rü woo namu, natürü wūxitama i naxūnewa naxūgū. ¹³ Rū yexguma íbaiūgu rü Tupanaāē i Üünexū rü wūxitama i naxūne tūxū nixīgūxēē. Rū woo Yudíugū na ixīgūxū, rü ēxna tama Yudíugū na ixīgūxū, rü woo togūmēxēwa ingexmagūxū rü ēxna taxúxemēxēwa ingēxmagūxū, natürü wūxitama i naxūne tūxū nixīgūxēē i nūma i Naāē i Üünexū i nūxicatama ixīxū. Rū guxāma i yixema rü marū tūxna nangu i ngēma Naāē i Üünexū. ¹⁴ Wūxi i naxūne rü tama naxāmenāxamare, natürü muxūgu nixūye. ¹⁵ Rū ngēxguma chi yima nacutū ñaxgu:

“Rü ñuxma na tama naxmēx chiīxū, rü ngēmacèx tama ngēma naxūnewa changēxma”, ñaxgu, rü tama ngēmacèx nūxū narūxo na ngema naxūnewa nangexmaxū. ¹⁶ Rū ngēxguma chi yima naxpaxchinū ñaxgu:

“Rü ñuxma na tama naxētū chiīxū, rü ngēmacèx tama naxūnewa changēxma”, ñaxgu, rü tama ngēmacèx nūxū narūxo na ngema naxūnewa nangexmaxū. ¹⁷ Rū ngēxguma chi guxūma i naxūne rü naxētū yixīgu, ¿rū tacūmaā chi i nūxū naxīnūxū i ngema naxūne? Rū ngēxguma chi

guxūma i naxūne rü naxmachixē yixīgu, ɷrū ɷacūmaã chi i nüxū nawāxīxū?
 18 Natürü Tupana ga naxúcü ga taxūne, rü ngexta nüma ínanaxwèxexūwa nanangexmaxēē i taeru rü tachacüügü rü taparagü. 19 Rū ngēxguma chi nataxuxgu i norü üyechigü i taxūne rü chi naxāmenèxāmare. 20 Rū ngema naxūne rü woo muxūgu nixūye, natürü wüxitama i naxūne nixī. 21 Rū taxetü rü taxucürüwa taxmēxū ñanagürü:

“Choma rü tama chacuxwèxe”, ñanagürü. Rū ngēxgumarüü ta i taeru rü taxucürüwa tacutügüxū ñanagürü:

“Choma rü tama chapexwèxe”, ñanagürü. 22 Natürü ngēma yexeraācü āücūmaxū i taxūnewa, rü ngēma nixī i yexera nanaxwèxexū i taxūne. 23 Rū ngēma taxūnewa yexeraācü naxcèx ixānexū, rü ngēma nixī i yexera meã ixūxchiruxū. Rū ngēma taxūnewa ngēxmaxū i tama inaxwèxexū na nangóxū, rü ngēma nixī i yexera meã idūxūxū. 24 Natürü tama ngēmaācü tanaxū namaã i ngēma taxūnewa ngēxmaxū i guxāxūma iwéxū. Rū ngēmaācü Tupana nanaxū i taxūne, na yexeraācü nüxna idauxúcèx i ngēma yexera naxcèx ixānexū. 25 Rū ngēmaācü Tupana nanaxū i taxūne na wüxichigü i norü üye nügügu naxīnüexúcèx rü nügü nangūxēēgüxúcèx. 26 Rū ngēxguma chi wüxi i ngēma taxūnearü üye nüxū nguxgux, rü guxūma i ngēma togü i natanūxügü rü ta nüxū nangux. Rū ngēxguma chi wüxi i ngēma taxūnearü üye taāēxgu, rü guxūma i ngēma togü i natanūxügü rü ta nataāēgü. 27 Rū ñuxma i wüxichigü i pema rü Cristuxūnearü üye pixīgü, rü ngema naxūnewa pexügü. 28 Rū ngēmacèx ya Tupana rü nanaxwæe na ñaacü nügü inanuxū i norü duūxügü: Rū yíxema tüxira tüxū naxunetagusē tixī ya norü puracüwa tüxū namugūxe. Rū tüxū naxuneta ya togegü na nüxū tixugūxúcèx i norü ore. Rū tüxū naxuneta ya togegü na duūxügüxū tangúexēēxúcèx i norü ore, rü togegü na tanaxügüxúcèx i mexügü i Tupanaārü poramaã taxügüxū. Rū togegü rü tüxū nanatauxchaxēē na tanameexēēxúcèx i idaaweexū, rü togegü na nüxū tarüngūxēēgüxúcèx i ngema ɷacü nüxū taxuxū, rü togegü yaxōgüxūārü āēxgacügü na tixīgüxúcèx. Rū tüxū nanatauchaxēē ya togegü na ngēma naga i tama nüxū tacuáxūwa tidexagüxúcèx. 29 Rū tama guxāma Tupana tüxū imugūxe tixīgü, rü tama guxāma Tupanaārü orearü uruū tixīgü. Rū tama guxāma norü orewa nguxēētaegūxe tixīgü, rü tama guxāma nüxū tacuèx na tanaxūxū i mexügü i taxügü i Tupanaārü poramaã üxū. 30 Rū tama guxāma nüxū tacuèx na tanameēxēēxū i duūxügü i idaaweexū. Rū tama guxāma nüxū tacuèx na nawa tidexagüxū i wüxi i naga i tama nüxū tacuáxū. Rū tama guxāma nüxū tacuèx na tanangoxēēxū na ɷacüchiga yadexaxū i ngēma duūxügü i tama nüxū nacuáxū i nagawa idexaxū. 31 Rū name nixī inaxcèx pedèux na Tupana pexna naxāxúcèx i ngēma cuèx rü tauxchagü i rümemaegüxū.

Yigü na ingechaügüxūchiga

Natürü i ñuxma rü tá pexū changúexēē i ɷacü nixī i guxūma i ngēma pemaã nüxū chixuxūārü yexera rümemaēxū.

13

1 Rū woo togü i nagawa chideaxgu, rü woo Tupanaārü orearü ngeruügü i daxūcūāxgawa chideaxgu, natürü ñoma wüxi i ɷacü i āgaxürüūmare chixī ega tama guxāxū changechaügu. 2 Rū woo nüxū chacuèxgu na meã duūxügümaã nüxū chixuxū i Tupanaārü ore, rü woo nüxū chacuèxgu i guxūma i ɷacü i ēxūguxū i Tupanachiga, rü woo choxū natauxchagu na chorü õmaã chayaxīgachixēēxū ya mēxpūnegü, natürü taxuwama chame ega tama guxāxū changechaügu. 3 Rū woo ngēma duūxügü i ngearü dīeruāxgüxūxū

chayanuxgu i guxūma i tacū i choxū ngēxmaxū, rü woo Tupanaärü ore cèx chaugū ichaxāxgu na üxūwa choxū yagugūxcèx, rü taxuwama choxū name i ngēma ega tama guxāxū changechaūgu. ⁴ Rü yíxema guxāxū ngechaūxē, rü yaxna namaā taxīnū, rü namaā tamedūma. Rü tama tixāūxāchiwèxe, rü tama togūxū tūgū tarüyexera rü tama tūgū ticuèxū. ⁵ Rü yíxema aixcūma guxāxū ngechaūxē, rü tama taguxchigawèxe, rü tama tūgūguxicatama tarūxīnū, rü tama tanuxwèxe, rü tama nagu tarūxīnūēcha ega texé chixexū tūmamaā üxgu. ⁶ Rü tama namaā tataāē i chixexūgū, natürü namaā tataāē i ngēma ore i aixcūma ixīxū. ⁷ Rü yíxema aixcūma guxāxū ngechaūxē, rü yaxna namaā taxīnū, rü guxūguma nūxū tayaxō, rü guxūguma mexūgu namaā tarūxīnū, rü taguma naxchi taxai woo tacū tūmamaā naxūxgu i togū. ⁸ Rü ngēma yigū na ingechaūxū rü tagutāma inayacuèx. Natürü ngēma na nūxū ixuxū i Tupanaärü ore rü wūxi i ngunexūgu tá inayacuèx. Rü ngēma tama nūxū icuáxū i nagawa na idexaxū, rü tá ta inayacuèx. Rü ngēma ñuxma nūxū icuáxū rü wūxi i ngunexūgu rü marū taxuwatāma tūxū name. ⁹ Erü ngēma tórü cuèx i ñuxma tūxū ngēxmaxū, rü Tupanapēxewa rü naxíra. Rü ngēxgumarū ta i ngēma norü orexū na ixuxū, rü wūxi i íramarexūtama nixī. ¹⁰ Rü guxūma i ngēma rü tá inayarūxo i ngēxguma Tupanapēxewa ingugūgu rü nūma tá guxūxūma tūxū nacuèxēēgu. ¹¹ Yexguma chabuxgu ga chomax, rü wūxi ga buxūrū chidexa, rü buxū nagu rüxīnūxūgu charūxīnū, rü tama meā chauāēxū chacuèx. Natürü yexguma marū chayèxgu, rü nūxū charūxo ga guxūma ga yema chorū bucūma. ¹² Rü ngēma ñuxma nūxū idauxū i Tupanachiga, rü ñoma wūxi i worua ya üxachametūxewa yigū idauxūrū nixī na taxcèx naxèxū. Natürü yixcūra rü tá aixcūma meā nūxūxūchi tadau ya Tupana. Rü ñuxma rü írarūwatama nūxū chacuèx i Tupanachiga. Natürü wūxi i ngunexūgu rü tá meā nūxū chacuèx i guxūma i nachiga, ngēma na Tupana meāma choxū cuáxūrū. ¹³ Rü ñuxma rü nangēxma i tomaēxpūx i nacūmagū i guxūgutāma ngexmaxū. Rü ñaāgū nixī:

1 Rü Tupanaāxū tayaxōgū

2 Rü nūxū ítananguxēē na nataeguxū ya Cristu

3 Rü nūxū tacuèx na tamücūxū ingechaūxū.

Natürü ngēma tomaēxpūxtanūwa rü ngēma rümemaexū nixī na guxāxū ingechaūxū.

14

Ngēma tama nūxū icuáxū i nagawa na idexaxūchiga

¹ Rü naxcèx pedèux na guxāxū pengechaūxū! Rü ngēxgumarū ta name nixī i naxcèx pedau i ngema tauxchagū rü ngema cuèx i Naāē i Üünexūwa ne īxū. Rü ngēma cuèx i yexeraācū penaxwaexū nixī na pexū natauxchaxū na nūxū pixuxū i Tupanaarü ore. ² Yíxema duūxē ya tama nūxū tacuáxū i nagawa idexaxe, rü Tupanamaā nixī i tidexaxū rü tama i duūxūgūmaā, erü taxúema nūxū tacuèx na ñuxū ñaxūchiga yīxū. Rü Tupanaāē i Üünexū nixī i tūxū idexaxēēxū, natürü ngēma ore i nūxū tixuxū rü ēxūguxū nixī. ³ Naturü yíxema nūxū ixuxe i Tupanaarü ore rü ngema yaxōgūxūarü ngūxēēxū tixī, erü yexeraācū cuèxwa tanangugūxēē rü nūxū tanangúchaxūxēē i ngema ore rü tanataāēxēē i ngema yaxōgūxū i ngexguma guxchaxū nūxū üpetūgu. ⁴ Rü yíxema duūxē ya tama nūxū tacuáxū i nagawa idexaxe, rü tūmacèxtama nixī i ngema na yexeraācū mea Tupanaāxū tayaxōxūcèx. Natürü yíxema nūxū ixuxe i Tupanaarü ore rü nūxū tixu na yexeraācū Tupanaāxū yaxōgūāxūcèx i guxūma i yaxōgūxū. ⁵ Choma chierü chanaxwèxe na guxāma i pema rü ngēma tama nūxū pecuáxū i nagawa na pidexagūxū. Natürü yexeraācū chanaxwèxe

na duūxūgūmaā nūxū pixuxū i Tupanaārū ore. Erū ngēma to i nagawa na pidexagūxūārū yexera narūmemaē na togūmaā nūxū pixuxū i Tupanaārū ore. Natūrū ngēma to i nagawa na idexaxū, rū name ega ngēma yaxōgūxūmaā nūxū ixuxgu na ſacūchiga yīixū i ngēma dexta, na nūmagū rū ta yexeraācū meā Tupanaāxū yaxōgūāxūcēx. ⁶ Rū ngēmacēx, Pa Chaueneēgūx, rū ngēxguma chi pexūtawa chaxūxgu, rū chi to i nagawa chideaxgu, ſrū ſacūwa chi pexū namexū i ngēma? Natūrū ngēxguma chi pemaā nūxū chixuxgu i ngēma Tupana tūxū nūxū cuēxēēxū, rū ēxna ngēma chomatama nūxū chacuāxū na aixcūma yīixū, rū ēxna ngēma ēxūguxū i űuxma Tupana tūxū nūxū cuēxēēxū, rū ēxna ſacū rū to i nguxēētae i Tupanachiga, rū ngēma waxi nixī i pexū mexū. ⁷ ſRū dūcax ngēma paxetarū i quena rū ēxna arpa! Rū ngēxguma tāū chima texé meā napaūxgu, rū tāū chima nūxū tacuēx na ſacūgu tanapaxūxū. ⁸ Rū ngēma churaragū, rū ngēxguma norū uwanūgūmaā nūgū nadaixchaūgu, ſrū űuxācū tá nūgū namexēē na nūgū nadēixūcēx ega tama meā nangógagu ya yima corneta ya dēixcēx naxcēx çaxūne? ⁹ Rū ngēxgumarūū ta pexū nangupetū. Rū ngēxguma chi perū conūmaā nūxū pixuxgu i dexta i taxúema nūxū cuāxū, ſrū űuxācū tá nūxū tacuēx na űuxū űaxūchiga yīixū i ngēma nūxū pixuxū? Rū űoma ngūrūanewa pidexagūxūrūū tá pixīgū. ¹⁰ Rū aixcūma nixī i namuxū i nagagū i űoma i naānewa. Rū guxūma i ngēma nagagū rū name naxcēx i ngēma duūxūgū i nawa idexagūxū. ¹¹ Natūrū ngēxguma chi tama nūxū chacuēxgu i ngēma naga i to i duūxū chomaā nawa idexaxū, rū ngēma duūxūcēx rū űoma to i nachiūānecūāxrūū chixī, rū chauxcēx rū űoma to i nachiūānecūāx i duūxūrūū nixī i nūmax. ¹² Choma nūxū chacuēx rū pema rū pexū nangūchaū na pexū nangēxmaxū i ngēma nacūmagū i Tupanaāē i Ūūnexū tūxna āxū. Natūrū name nixī i naxcēx pedau na guxūārū yexera pexna naxāāxū i ngēma nacūmagū i namaā nūxū perūngūxēēxū i guxūma i yaxōgūxū na yexeraācū meā Tupanaāxū yaxōgūāxūcēx. ¹³ Rū ngēmacēx yīxema duūxē ya taxúema nūxū cuāxū i nagawa idexaxe, rū name nixī i Tupanana naxcēx taca na tūxna naxāāxūcēx i cuēx na togūmaā nūxū tixuxūcēx na űuxū űaxūchiga yīixū i ngēma nūxū tixuxū. ¹⁴ Rū ngēxguma chi taxúema nūxū cuāxū i nagawa chayumūxēgu, rū chauāē nixī i ngēma yumūxēxū. Natūrū chomatama rū taxuūma chacuēx na ſacūchiga yīixū i ngēma. ¹⁵ ſRū űuxācū tá chayumūxēxū i űuxmax? Rū marū name nixī ega taxúema nūxū cuāxū i nagawa chayumūxēgu, natūrū chanaxwēxe i guxāma nūxū cuāxū i nagawa rū ta chayumūxē. Rū marū name nixī ega taxúema nūxū cuāxū i nagawa chawiyae, natūrū chanaxwēxe i guxāma nūxū cuāxū i nagawa rū ta chawiyae. ¹⁶ Erū ngēxguma chi taxúema nūxū cuāxū i nagawa Tupanaxū quicuēxūūgu, rū yīxema duūxēgū ya ngēma irūxīnūēxē, rū taxucūrūwa cumaā wūxigu Tupanaxū ticuēxūūgū, erū tama nūxū tacuēx na űuxū űaxūchiga yīixū i ngēma nūxū quixuxū. ¹⁷ Rū woo ngēma curū yumūxē rū namexēchixgu, natūrū yīxema duūxēgū ya ngēma irūxīnūēxē rū taxuūma i mexū nawa tayaxu ega to i nagawa quideaxgu. ¹⁸ Tupanana moxē chaxā, erū perū yexera taxúema nūxū cuāxū i nagawa chidexa. ¹⁹ Natūrū woo muxūma i ore i taxúema nūxū cuāxū i nagawa na chidexaxū, natūrū ngēma yaxōgūxūārū ngutaquēxegūwa rū chauxcēx rū narūmemaē chi nixī ega woo noxre i ore i meāma nūxū icuāxūwa namaā nūxū chixuxgu i Tupanaārū ore na ngēmaācū ngēmamaā meā chanangūxēēxūcēx. ²⁰ Pa Chaueneēgūx, tama name i űoma buxūgūrūū chixri nagu perūxīnūe i ngēma ore i pemaā nūxū chixuxū. Rū narūmemaē nixī i űoma buxūgūrūxū pegū pixīgūxēē naxchēxwa i ngēma chixexū, natūrū ngēma peru űnūwa rū penaxwēxe i duūxūgū i marū yaxūrūū mea nagu perūxīnūe rū nagu pexī i ngēma ore i pemaā nūxū

chixuxū. ²¹ Tupanaārū ore ga nuxcūmaūxū ga norū orearū uruū ūmatūxū rū ñanagūrū:

“Rū nuā tá chanamugū i to i nachiuñecūāx i duūxūgū na to i nagawa yadexagūxūcèx namaā i ñaā Yudiūgū i tama yaxōgūxū. Natūrū woo ngēmaācū chanaxūxgu, rū tāūtāma chauga naxīnūē i ngēma Yudiūgū i tama irūxīnūēchaūxū”,

ñanagūrū ga Tupana. ²² Rū ngēmacèx ngēma na taxúema nūxū cuáxū i nagawa idexaxū, rū wūxi i cuèxruū nixī naxcèx i ngēma duūxūgū i tama irūxīnūēchaūxū. Rū tama duūxūgū i marū yaxōgūxūcèx nixī i ngēma. Natūrū ngēma Tupanaārū orexū na ixuxū, rū duūxūgū i marū yaxōgūxūcèx nixī na yexeraācū meā Tupanaāxū yaxōgūāxūcèx. Rū tama duūxūgū i tama irūxīnūēchaūxūcèx nixī i ngēma. ²³ Rū ngēxguma chi pema i yaxōgūxe pengutaquēxegūgu, rū guxā chima to i nagawa pidexagūgu, ¿rū ñuxū ñaxū tá ega petanūgu naxūcuxgu i wūxi i duūxū i ngēma iyarūxīnūxū rū ēxna wūxi i duūxū i tauta yaxōxū? ¿Taux ēxna i nagu tá naxīnūxū na pexāūāēgūxū i pemax? ²⁴ Natūrū ngēxguma chi guxāma i pema nūxū pixuxgu i Tupanaārū ore, rū chi petanūgu naxūcuxgu i wūxi i duūxū i tama yaxōxū rū ēxna wūxi i duūxū i ngēma iyarūxīnūxū, rū tá nūxū naxīnū i ngēma Tupanaārū ore i nūxū pixuxū. Rū ngēmaācū tá nūxū nacuèx na nūma rū wūxi i pecaduāxū na yīxū. Rū nūgūgu tátama ínarūxīnū i ngēxguma nūxū naxīnūgu i ngēma nūxū pixugūexū. ²⁵ Rū ngēma chixexū i nūxīcatama nūxū nacuáxū rū tá naxcèx ínicuèx. Rū nūma rū ngēxma tá nacaxāpūxū, rū tá Tupanaxū nicuèxū. Rū tá nūxū nixu na aixcūma Tupana petanūwa nangēxmaxū.

Tama name i penaxīxāchiāxēgū i perū ngutaquēwa, rū name i meamare penaxū

²⁶ Dūcèx, Pa Chaueneēgūx, ñuxma tá pemaā nūxū chixu na ñuxācū tá penaxūxū ega ngēxguma pengutaquēxegūgu. Rū ñuxre i pema rū marū name na Tupanaārū wiyaegu pewiyaegūxū, rū togue rū tanguxēētaegūxū, rū togue rū nūxū tixuxū i ngēma ore i Tupana tūxū nūxū cuèxēēxū, rū togue rū nawa tidexagūxū i naga i tama nūxū tacuèxgūxū, rū togue rū tanangoxēēgūxū i ngēma dexa i to i nagawa nūxū yaxugūxū. Natūrū guxūma i ngēma rū tanaxwēxe i yaxōgūxūārū ngūxēēcèx na yīxū, na yexeraācū yaxōgūāxūcèx rū meā Tupanacèx namaxēxūcèx. ²⁷ Rū ngēxguma to i naga i pema tama nūxū pecuáxūwa pidexagūgu, rū name nixī i taxre rū ēxna tomaēxpūxicatama tidexagū. Rū tanaxwēxe i wūxiexira tidexa i noxri rū yixcama ya togue. Rū ngēxguma chi texé to i nagawa ideaxgu, rū name nixī na tangēxmaxū ya wūxie ya nūxū ixuchigūxe na tacūchiga yīxū i ngēma ore i to i nagawa nūxū yaxuxū. ²⁸ Natūrū ngēxguma chi tatauxgu na texé nūxū ixuchigūxū na tacūchiga yīxū i ngēma ore i to i nagawa nūxū yaxuxū, rū narūmemaē nixī na noxtacūma tama to i nagawa pidexagū i perū ngutaquēxewa. Rū narūmemaē i wūxichigū tūxica Tupanamaāxīcatama bexma tidexa. ²⁹ Rū ngēxgumarūū ta ngēxguma pengutaquēxegūgu, rū name nixī i taxre rū ēxna tomaēxpūxicatama nūxū tixu i Tupanaārū ore. Rū ngēma togū i ngutaquēxetanūxū rū name nixī na meā nangugūgūāxū i ngēma ore. ³⁰ Natūrū ngēxguma chi íyadexayane i wūxi i duūxū, rū Tupana tūmamaā ideaxgu ya togue ya ngēma rūtōxe, rū name nixī na iyanachianexū i ngēma nūxīra idexaxū na tidexaxūcèx ya yīxema duūxē ya Tupana tūmamaā idexaxe. ³¹ Rū ngēmaācū guxāma i pema na Tupana pemaā idexaxū, rū name nixī i wūxichigū ípenanguxēē na pewa nanguxū na pidexagūxū i Tupanaārū ore. Rū ngēmaācū i ngēma togū i ngutaquēxetanūxūgū rū tá Tupanachiga meā nangúe rū tá nataāēgū. ³² Rū ngēmaācū tanaxwēxe i meāma tūmaāēmaā itacuèx ya wūxichigū ya yīxema Tupanaārū orexū ixuxe.

33-34 Erū perū ngutaquēxegūwa rü Tupana nanaxwèxe na meã penaxūxū i guxūma, rü tama nanaxwèxe na ngema pexãũgatanūxū rü pegū ípetüexēēxū. Rū guxūma i togū i yaxōgūxūãrū ngutaquēxegūwa rü marū nūxū nayapue na tama yadexagūxū i ngexūgū. Rū name nixī i pema rü ta ngēmaãcū penaxū, erū nachuxu na yadexagūxū i ngexūgū i ngutaquēxegūwa. Rū name nixī na yatūgūga naxīnūēxū i ngexūgū, ngēma Tupanaãrū ore tūxū muxūrū. 35 Rū ngēxguma chi tacūxū nacuáxchaũgu i wūxi i ngexū, rü name nixī i nachiwatama natena naca i nachiga i ngēma. Erū wūxi i ãne nixī ega ngutaquēxewa yadeaxgu i wūxi i ngexū. 36 Pa Corītiucūãxgūx, name nixī na nūxna pecuēxãchiexū na tama pewaxira ne naxūxū i Tupanaãrū ore. Rū tama pexicatama nixī i penayauxgūxū i ngēma. 37 Rū ngēxguma chi texé tūgūgu rūxīnūgu na Tupanaãrū orearū uruū tīxū rü ēxna tūgūgu tarūxīnūgu na Tupanaãē i Üünexū tūxna naxāxū i tacū rü cuèx, rü name nixī i nūxna tacuēxãchi na tórū Coriarū ore yīxū i ñaã ore i pexcèx chaxūmatūxū. 38 Natürü ngēxguma chi texé tama nūxū cuáxchaũgu i ngēma pemaã nūxū chixuxū, rü name nixī i tama tūxū pecuáxchaũ. 39 ¡Rū ngēmacèx, Pa Chaueneēgūx, rü Tupanana naxcèx peca i cuèx na meãma nūxū pixuxücèx i norū ore! ¡Rū tama penachuxu na to i nagawa yadexagūxū i duūxūgū! 40 Rū perū ngutaquēxegūwa, rü name nixī na meã penaxūxū i guxūma. Rū tama name i ngema pexãũgatanū rü pegū ípetüexēē.

15

Cristu na yuwa írüdaxūchiga

1 Rū ñuxmax, Pa Chaueneēgūx, rü chanaxwèxe i nūxna pecuēxãchie i ngēma Tupanaãrū ore i tūxū maxēxēēxū ga pemaã nūxū chixuxū. Rū yematama ore nixī ga pema peyauxgūxū. Rū ñuxma rü ngēmatama oregagu nixī i meã peyaxōgūxū. 2 Rū ngēma oregagu nixī i pexū nangēxmaxū i maxū i taguma gúxū, ega aixcūma guxūguma peyaxōgūamagu. Natürü ngēxguma tama guxūguma peyaxōgūgu, rü natüçèxmamare nixī i ngēma perū õ. 3 Rū yexguma noxri petanūwa changuxgu, rü yema nūxira pexū changuxēēxū nixī ga yema chaxira togū choxū nguxēēxū na Cristu rü tórū pecaducèx nayuxū, ngēma Tupanaãrū ore i ümatūxūwa nūxū yaxuxūrū. 4 Rū yexgumarū ta pexū changúexēē na ñuxãcū inatèxgūãxū, rü ñuxãcū norū tomaēxpūx ga ngunexūgu rü wena na namaxūxū, ngēma Tupanaãrū ore i ümatūxūwa nūxū yaxuxūrū. 5 Rū yexgumarū ta pexū changúexēē ga ñuxãcū Pedrucèx na nangóxū ga Cristu, rü ñuxãcū yixcūra rü norū ngúexūgū ga yamugūxūcèx na nangóxū. 6 Rū yemawena ga Cristu rü noxtacūma 500 arū yexera ga yaxōgūxūcèx nangox. Rū muxūma i ngēma duūxūgū rü ñuxma rü ta namaxē, natürü nūmaxū rü marū nayue. 7 Rū yemawena rü Chaũtiágucèx nangox, rü yixcama guxūma ga yema togū ga ngúexūgūcèx nangox. 8 Rū düxwa chowa inayacuèx ga chauxcèx rü ta na nangóxū, woo ngürüãchimare nixī ga yema, ngēxgumarū i wūxi i buxū i tautama norū ngunexūwa nanguyane buxūrū. 9 Rū choma rü guxūma i ngēma togū i Tupana imugūxūtūwa chaxū. Rū ngemacèx tama name i Tupana imuxūmaã choxū naxugūxū i duūxūgū, yerū nawe chingēchigū ga Tupanaãrū duūxūgū rü poraãcū chixexū chaxū. 10 Natürü ga Tupana rü chomaã namecūma, rü ngēmacèx i ñuxma rü choxū pedau na tacū chiixū rü ñuxãcū na chiixū. Rū yema chomaã na namecūmaxū rü tama natüçèxma nixī. Yerū choma rü guxū ga togū ga yamugūxūãrū yexera chanaxū ga Tupanaãrū puracū. Natürü tama chauechama chanaxū ga yema puracū, natürü Tupana ga chomaã mecūmacū rü chomaã puracūcū nixī ga naxūcū ga yema puracū na nūxū chixuxücèx ga norū ore. 11 Natürü i ñuxma

rü nüetama nixĩ ega woo choma chixĩgu rü ěxna togü yixĩgu ga pemaã nüxũ ixuxũ ga yema ore. Yerü yema ore ga pemaã nüxũ tixuxũ, rü Tupanaãrũ ore i tüxũ maxẽẽxũ nixĩ, rü yema nixĩ ga pixõgũxũ.

Ñuxãcü wena tá namaxẽ i duũxũgũ i yuexũ

¹² Marü pemaã nüxũ tixu na Cristu rü yuwa ínadxũ. ¿Rü tüxcüũ ñuxre i pema rü ñaperügũgũ:

“Yuexũ rü tagutáma wena namaxẽ”, ñaperügũgũ? ¹³ Rü ngẽxguma chi ngẽma yuexũ rü tagu chima wena namaxẽgu rü yima Cristu rü tãu chima wena namaxũ. ¹⁴ Rü yexguma chi Cristu tama wena maũxgu, rü ngẽma ore i nüxũ tixuxũ i nachiga rü taxuwa chima name, rü natüçèxmamare chi nixĩ i perü õ. ¹⁵ Rü ngẽxguma chi ngẽmaãcü yixĩgu, rü toma i Tupanaãrũ orearũ uruũgũ rü doratèèxgũxũ tixĩgũ. Erü nüxũ tixu na Tupana Cristuxũ wena maxẽẽxũ. Rü ngẽxguma chi tama aixcüma yixĩgu na wena namaxẽxũ i yuexũ, rü chi wüxi i doramare nixĩ na Tupana Cristuxũ wena maxẽẽxũ. ¹⁶ Rü ngẽxguma chi ngẽma yuexũ rü tagu chima wena namaxẽgu, rü ga Cristu rü chi ta tãu chima wena namaxũ. ¹⁷ Rü yexguma chi Cristu tama wena maũxgu, rü natüçèxmamare chi nixĩ i peyaxõgũxũ, rü ñuxma rü chi ta perü pecadugagu ipeyarütaxe. ¹⁸ Rü chi ngẽmaãcü yixĩgu rü ngẽma duũxũgũ i Cristuaxũ yaxõgũxũ i marü yuexũ, rü chi ta tãu chima nüxũ nangẽxma i maxũ i taguma gũxũ. ¹⁹ Rü ngẽxguma chi ñoma i maxüçèxicatama yixĩgu na Cristuaxũ yaxõgũxũ, rü chi guxũ i togü i duũxũgũarũ yexera tangechaütümüügũ. ²⁰ Natürü aixcümaxũchi nixĩ ga Cristu ga yuwa na ínadxũ. Natanüwa i guxũma i ngẽma yuexũ i yixcüra tá írüdagũxũ, rü Cristu nixĩ ga namaã inaxügücü na ínadxũ, yerü nüma nixĩ ga nüxĩra wena namaxũxũ. ²¹ Rü yexgumarũ wüxi ga yatügagu na nayuexũ ga duũxũgũ, rü ngẽxgumarũ tá ta nixĩ na wüxi i yatügagu wena namaxẽxũ i ngẽma marü yuexũ. ²² Rü ngema na Adáũgagu guxãma na yuexũ, rü ngẽxgumarũ ta Cristugagu tá namaxẽxũ i guxũma i duũxũgũ i nüxũ yaxõgũxũ. ²³ Natürü wüxichigü tá tümawa nangu na wena tamaxũxũ. Rü Cristu nixĩ ga nüxĩra maxücü. Rü ngẽxguma wena núma naxũxgu i nümax, rü ngẽxguma tá nixĩ i wena namaxẽxũ i ngẽma duũxũgũ i noxrü ixĩgũxũ. ²⁴ Rü ngẽmawena tá nixĩ i nagúxũ i naãne. Rü ngẽxguma tá nixĩ ya Cristu i nüxũ naporamaẽxũ i guxũma i norü uwanügü. Rü ngẽxguma tá nixĩ i Nanatü ya Tupanana naxãaxũ i guxũma na nüma namaã inacuáxüçèx. ²⁵ Erü nüma ya Cristu rü ãèxgacü tá nixĩ ñuxmatáta nüxũ naporamaẽ i guxũma i norü uwanügü. ²⁶ Rü ngẽma nawa iyacuáxũ i norü uwanü i tá nüxũ naporamaẽxũ, rü yu nixĩ. ²⁷ Yerü Tupana rü marü Cristumẽxẽwa nanayexmagüxẽẽ ga guxũma. Natürü woo Tupanaãrũ ore nüxũ ixuxgu na Cristumẽxẽwa nangẽxmagüxũ i guxũma, natürü nümatama ya Tupana rü tama Cristumẽxẽwa nangẽxma. Yerü nüma ga Tupana nixĩ ga Cristumẽxẽwa nayexmagüxẽẽãxũ ga guxũma. ²⁸ Rü ngẽxguma guxũma Cristumẽxẽwa ngẽxmagügu, rü ñuxũchi nümatama ya Cristu ya Tupana Nane rü tá Nanatümẽxẽwa nügü nangẽxmaxẽẽ. Yerü nüma ga Tupana nixĩ ga Cristumẽxẽwa nayexmagüxẽẽãxũ ga guxũma. Rü ngẽmaãcü ya Tupana rü guxũmaã tá inacuèx. ²⁹ Rü nangẽxma i ñuxre i duũxũgũ i petanüwa i Tupanaegagu yuexũchicüü íbaiũxũ. ¿Rü tüxcüũ ngẽma naxügü? Rü ngẽxguma chi tama wena namaxẽgu i duũxũgũ i yuexũ, ¿rü tüxcüũ ngẽma yuexũchicüü ínabaiũ? ³⁰ ¿Rü tüxcüũ i toma rü guxũguma ãücümaxũwa tangẽxmagü? ³¹ Pemaã nüxũ chixu, Pa Chaueneegũx, rü guxũ i ngunexũgu rü ãücümaxũwa changẽxma, rü tama nüxũ chacuèx i tacü rü ngunexũgu Tupanaãrũ oregagu tá na chayuxũ. Rü ngẽma rü aixcümaxũchi nixĩ, ngẽxgumarũ na aixcüma yiĩxũ na choxũ nangẽxmaxũ i wüxi i taãe i taxũ

i ñuxma na tórü Cori ya Ngechuchu ya Cristuaxŭ peyaxōgŭxŭ. ³² Choma rŭ nuã Epéchiuwa rŭ Tupanaãrŭ orechigagu chorŭ uwanŭmaã poraãcŭ togŭ tachoxŭgagŭ. Rŭ ñoma naëxŭ i idŭraexŭmaã togŭ tadèixŭrŭŭ tixŭgŭ. ¿Natŭrŭ tacŭwa choxŭ namexŭ ga yema ega chorŭ maxŭ i ñoma i naãnewa choxŭ ngëxmaxŭcèxicatama yixŭgu? Rŭ ngëxguma chi aixcŭma yixŭgu na tama wena namaxëxŭ i yuexŭ, rŭ marŭ name i ñatarŭgŭgŭ:

“¡Ngŭxã tachibŭe rŭ taxaxegŭ, erŭ paxa tá tayue!” ñatarŭgŭgŭ. ³³ ¡Natŭrŭ tãütáma nawe perŭxŭ i ngëma duŭxŭgŭ i ngëmaãcŭ chixri idexagŭxŭ! Erŭ aixcŭma nixŭ i ngëma ore i ñaxŭ:

“Rŭ texé ya chixexŭ i duŭxŭmaã ãmŭcŭxe, rŭ tŭxŭ inayanaxoxëë i tŭmacŭmagŭ i mexŭ”, ñaxŭ. ³⁴ Rŭ name nixŭ i meã pegŭãëgu perŭxŭnŭë rŭ nŭxŭ perŭxoe i ngëma perŭ chixexŭgŭ. Rŭ wŭxi i perŭ ãne nixŭ na pemaã nŭxŭ chixuxŭ rŭ ñuxre i pema rŭ tama aixcŭma Cristuarŭ duŭxŭgŭ pixŭgŭxŭ rŭ tama aixcŭma Tupanaxŭ pecuëxgŭxŭ.

Ñuxãcŭ wena namaxë i yuexŭgŭ

³⁵ Natŭrŭ ngŭrŭãchi tá texe pexna taca rŭ ñatarŭgŭ pexŭ:

“¿Ñuxãcŭ tá wena namaxëxŭ i yuexŭ? ¿Rŭ nañuxraŭxŭ i naxŭnemaã tá ínadagŭxŭ?” ñatarŭgŭ tá pexŭ. ³⁶ Pa Duŭxŭ i Ngëãëmarexŭx ŭrŭ dŭcax! Rŭ ngëxguma wŭxi ya nanetŭchire itoxgu, rŭ nŭma ya yima naxchire rŭ nayu na ngemaãcŭ naxŭxŭcèx i ngëma nanetŭ. ³⁷ Rŭ ngëma waixŭmŭgu itoxŭ, rŭ tama marŭ nanetŭ ixŭxŭ nixŭ, natŭrŭ naxchire nixŭ ya yima itoxŭne woo triguchire rŭ ëxna ngexŭrŭxŭmare i to i nanetŭchire yixŭgu. ³⁸ Rŭ ngëxguma marŭ inatoxguwena, rŭ Tupana nixŭ i yanaxŭxëcŭ ya yima nachire na nŭma nanaxwëxexŭãcŭma yŭxŭcèx i ngëma nanetŭ. ³⁹ Rŭ tama guxŭ i naxŭnegŭ nawŭxigu. Rŭ duŭxëxŭne rŭ nanatoraxŭ, rŭ naëxŭgŭxŭne rŭ to nixŭ, rŭ werigŭxŭne rŭ to nixŭ, rŭ choxnigŭxŭne rŭ to nixŭ. ⁴⁰ Rŭ ngëxgumarŭŭ ta nangëxma i naxŭnegŭ i daxŭguxŭ i naãnecŭãx, rŭ nangëxma i naxŭnegŭ i ñoma i naãnecŭãx. Rŭ ngëma daxŭguxŭ i naãnecŭãx i naxŭnegŭ rŭ nŭxŭ nangëxma i noxrŭtama mexŭ, rŭ ngëma ñoma i naãnecŭãx i naxŭnegŭ rŭ ta nŭxŭ nangëxma i noxrŭtama mexŭ. Natŭrŭ tama nawŭxigu i ngëma norŭ mewa. ⁴¹ Rŭ ùexcŭarŭ yauracŭŭ rŭ tama namaã nawŭxigu i tauemacŭarŭ yauracŭŭ. Rŭ woramacurigŭarŭ yauracŭŭ rŭ to nixŭ. Rŭ nŭgŭtanŭwa ya woramacurigŭ, rŭ tama nawŭxigu i norŭ yauracŭŭwa. ⁴² Rŭ ngëxgumarŭŭ tá ta naxŭpetŭ namaã i naxŭnegŭ i ngëma duŭxŭgŭ i yuexŭ. Erŭ ngëma naxŭne i noxri nŭxŭ ngëxmaxŭ rŭ iyarŭxoxwëxexŭ nixŭ. Natŭrŭ ngëma naxŭne i tá nŭxŭ ngëxmaxŭ i ngëxguma wena namaxëgu, rŭ ngëma rŭ tagutáma inayarŭxo. ⁴³ Rŭ ngëma naxŭne i yuxŭ rŭ taxuwama name i ngëxguma inatëxgux. Natŭrŭ ngëxguma wena namaŭxgu rŭ tá namexëchi. Rŭ ngëma naxŭne i ñuxma turaxŭ rŭ ngëxguma wena namaŭxgu rŭ tá napora. ⁴⁴ Rŭ itanatëx i ngëma naxŭne i ñoma i naãnecŭãx ixŭxŭ. Natŭrŭ ngëxguma ínadxgu, rŭ daxŭcŭãx i naxŭne tá nixŭ. Rŭ ñuxma na nangëxmaxŭ i naxŭne i ñoma i naãnecŭãx rŭ ngëmawa nŭxŭ tacuëx na nangëxmaxŭ ta i naxŭne i daxŭcŭãx. ⁴⁵ Tupanaãrŭ ore i ũmatŭxŭwa rŭ ñanagŭrŭ:

“Guma nŭxŭraŭcŭ ga yatŭ ga Adáŭ rŭ nŭxŭ nayexma ga ñoma ga naãnecŭãx ga naxŭne ga paxaãchi maxŭxŭ”, ñanagŭrŭ. Natŭrŭ ya Cristu rŭ daxŭcŭãx nixŭ. Rŭ nŭma nixŭ i tŭxna naxããxŭ i maxŭ i taguma gŭxŭ. ⁴⁶ Noxri rŭ tŭxŭ nangëxma i ñoma i naãnecŭãx i taxŭne. Natŭrŭ yixcama rŭ Tupana tá tŭxna nanaxã i to i taxŭne i daxŭcŭãx ixŭxŭ. ⁴⁷ Guma nŭxŭraŭcŭ ga yatŭ ga waixŭmŭwa ũcŭ, rŭ ñoma ga naãnecŭãx nixŭ. Natŭrŭ tórŭ Cori ya Cristu rŭ daxŭguxŭ i naãnecŭãx nixŭ. ⁴⁸ Rŭ ngëma

taxūnegü i ñoma i nañewa tüxü ngēxmaxü, rü guma Adáüxüne ga waixümüwa ücürüü nixīgü. Natürü ngēma naxūnegü i daxüwa nüxü ngēxmaxü i duüxügü, rü Cristuxūnerüü nixīgü. ⁴⁹ Rü ñgexgumarüü na Adáü ga waixümüwa ücürüü na yīixü i taxüne, rü ngēxgumarüü tá ta Cristu ya daxüwa ngēxmacürüü nixī i taxüne i yixcūra. ⁵⁰ Rü dücax, Pa Chaueneēgüx, pemaã nüxü chixu rü ñaã taxüne i namachinaxcèx rü naxchinèxānaxcèx, rü taxucürüwa Tupana ãēxgacü íyīixüwa nangu. Erü ngēma iyarüxoxü, rü taxucürüwama Tupanaxütawa i ngextá taxuüma íyarüxoxüwa nixücu. ⁵¹ Natürü chanaxwèxe na nüxü pecuáxü i wüxi i ore i èxügüxü ga noxri Tupanaxīcatama nüxü cuáxü. Rü dücax, tãütáma guxã tayue, natürü guxãxüne rü tá naxüchicüü. ⁵² Rü ngürüächimare wüxi i peãxëtügu tá nixī i ngēma na naxüchicüüxü i taxüne i ngēxguma naãneãrü guxgux naxãgagu ya corneta. Rü tá naxãga ya yima corneta, rü ngēxguma i ngēma duüxügü i yuexü rü tá ínarüdagü na tagutáma wena nayuexüçèx. Rü yixema na imaxèxü rü tá naxüchicüü i taxūnegü. ⁵³ Erü ngēma taxüne i yuxwèxexü rü woetama tama taixü rü tá naxüchicüü. Rü wüxi i ngexwacaxüxü i naxüne i aixcüma taixü rü tagutáma yuxü tá nixī. ⁵⁴ Rü ngēxguma ngēmaãcü naxüchicüügu i taxüne i yuxwèxexü, rü tüxü nangēxmagu i taxüne i ngexwacaxüxü i taguma yuxü, rü ngēxguma tá nixī i yanguxü i Tupanaãrü ore i ümatüxü i ñaxü:

“Marü inayarüxo na nayuexü i duüxügü. Rü Tupana rü marü yuxü narüyexera. ⁵⁵ Rü dücax, Pa Yux, ¿ngēxü i curü pora i namaã toxü curüyexeraxü? ¿Rü ngēxü i ngēma cuxne i namaã toxü cudèixü?”

ñanagürü i ngēma Tupanaãrü ore. ⁵⁶ Rü ngēma naxne i yu, rü pecadu nixī. Erü ngēma pecadu nixī i naporaxèèxü i ngēma yu na tüxü nadèixüçèx. Rü ngēma mugü ga Moíché ümatüxü nixī i naporaxèèxü i pecadu, erü woo namexgu i ngēma mugü, natürü taxucürüwama texé aixcüma tayanguxèè. ⁵⁷ Natürü name nixī i Tupanana moxè taxã yerü núma nanamu ga tórü Cori ya Ngechuchu ya Cristu na ngēma yuxü tüxü naporamaèxèèxüçèx. ⁵⁸ Rü ngēmacèx, Pa Chaueneēgü ya Pexü Changechaügüxex, rü name nixī i meã peyaxögüama rü taguma ípenatèx i Tupanaãrü ore. Rü name nixī i guxüguma meã penaxü i tórü Coriarü puracü, erü pema nüxü pecuèx rü ngēma puracü i nüxü pexüxü, rü tama natüçèxma nixī.

16

Togü i yaxögüxüçèx inanutaque ga dīeru

¹ Rü ñuxma tá pemaã nüxü chixu i nachiga i ngēma dīeru i penutaquèxexü na namaã nüxü perüngüxèègüxüçèx i taeneēgü i yaxögüxü i Yudéaanewa ngēxmagüxü. Rü ngēma yaxögüxü i Gárataanewa ngēxmagüxü rü marü namaã nüxü chixu na ngīxü nanutaquèxegüxü i ngēma dīeru. Rü chanaxwèxe i pema rü ta ngēxgumarüü penaxü. ² Rü ngēma dīeru i perü puracüwa ngixü peyaxucüwa rü güxcü i yüxüarü ngunexügu rü tá ngixü pexã i ngēma dīeru i Tupanaarü ixïcü. Rü ngīmaã tá penguxü na tama ngēxguma ngēma changuxguama ngīxü na pedexüçèx. ³ Rü ngēxguma petanüwa changuxgu, rü tá chanaxümatü i ñuxre i poperagü naxcèx i taeneēgü i Yerucharéüwa ngēxmagüxü. Rü ñuxüchi ngēma poperamaã tá Yerucharéüwa chanamugü i ngēma duüxügü i pema nüxü pexunetaxü na ngēma ngīxü nangegüxüçèx i ngēma dīeru i taeneēgüçèx ngīxü penutaquèxecü. ⁴ Rü ngēxguma chi choxü natauxchagu na ngēma Yerucharéüwa chaxüxü, rü nümagü rü tá wüxigu chomaã ngēma naxī.

Pauru nagu narüxñü na Corītiuwa naxüxü

5 Choma rü Machedóniãñewa tá chaxüpetü na íchayadauxüçèx i taeneëgü i ngema ngëxmagüxü. Rü ngëmwena rü tá petanüwa changu na pexü íchayadauxüçèx. 6 Rü ngürüãchi tá ñuxre i ngunexügü ngëxma petanügu charüãüx, rü bexmana ngürüãchi ngema petanüwa tá chanangupetüxëe ya mucü. Rü ngëxguma rü tá pexü natauxcha na choxü perüngüxëëgüxü na ngëma íchaxüxchaüxüwa chaxüxüçèx. 7 Erü tama chanaxwèxe i paxaãchimare pexü chadau. Natürü petanügu charüãüxchaü i ñuxre i ngunexü ega chi norü ngúchaxü yixüxgu ya tórü Cori. 8 Natürü nuã Epéchiuarü ñãnewa tá changëxma ñuxmatáta Pëtecóstearü ngunexüwa nangu. 9 Erü nuã rü tórü Cori poraãcü choxü nanatauxchaxëe na nüxü chapuracüxüçèx rü nüxü yaxögüãxüçèx i muxüma i duüxügü woo namu i ngëma tama naxwëxegüxü na nuã chapuracüxü. 10 Rü ngëxguma chi Timutéu petanüwa nguxgu, rü chanaxwèxe i meãma penayaxu na petanüwa nataãëxüçèx. Erü nüma rü ta chauxrüü tórü Coriarü puracüwa napuracü. 11 Rü ngëmacèx tama chanaxwèxe i texé petanüwa nüxü taxoe. Natürü chanaxwèxe i nüxü perüngüxëe na taãëacüma nuã naxüxü na choxü íyadauxüçèx. Erü poraãcü íchananguxëe na nuã nanguxüçèx namaã i ngëma togü i taeneëgü. 12 Rü ngëma taeneë i Aporu rü poraãcü nüxü chacèxü na petanüwa íyadauxüçèx namaã i ngëma togü i taeneëgü. Natürü tama ngëma naxüxchaü i ñuxmax. Natürü ngëxguma naxãchicagu rü tá ngëma naxü.

Pauru nüxü narümoxë ga yema yaxögüxü

13 ¡Rü pexuãëgü na taxuüma i chixexügu peyixüçèx! ¡Rü meãma peyaxögüama woo tacü pexü üpetügu! Rü name nixü i peporaëama rü taxucèxma pemuë. 14 Rü guxüma i ngëma pexüxü, rü name nixü i pegü pengechaügüãcüma penaxü. 15 Rü dücax, Pa Chaueneëgüx, pema nüxü pecuèx na Estéfanatanüxügü yixü ga nüxüra yaxögüxü ga Acayaanewa. Rü meãma nüxü pecuëxgü na ñuxãcü poraãcü taeneëgü i yaxögüxüxü na nangüxëëgüxü. 16 Rü chanaxwèxe i naga pexüñüë i ngëma duüxügü i Estéfanatanüxügürüü ixügüxü. Rü ngëxgumarüü ta chanaxwèxe i naga pexüñüë i guxüma i ngëma duüxügü i ñaã Tanatüarü puracüwa puracüexü rü ngüxëëtaegüxü. 17-18 Rü ñuxma na taxucürüwama chauxütawa pengëxmagüxü, rü wüxi ga chorü taãe nixü na núma naxüxü ga taeneëgü ga Estéfana rü Fortunátu rü Acáicu. Rü yema taeneëgü ga núma íxü rü pexü nixuchigagü rü yemaãcü choxü nataãëxëëgü ga yema pexü na nataãëxëëgüxü. Rü tanaxwèxe i naga pexüñüë rü nüxü pengechaü i ngëma duüxügü i ngëmagürüü ixügüxü. 19 Rü guxüma i taeneëgü i yaxögüxü i Áchiaaneärü ñãnegüwa ngëxmagüxü, rü moxë pexcèx ngëma namugü. Rü Aquiru rü Prisila rü guxüma i ngëma yaxögüxü i Aquirupatawa ngutaquëxegüxü, rü moxë pexcèx ngëma namugü naëgagu ya tórü Cori. 20 Rü guxüma i taeneëgü i núma ngëxmagüxü rü moxë pexcèx ngëma namu. Rü chanaxwèxe i wüxichigü i pema rü pegü pengechaügüãcüma pegü perümoxëgü. 21 Choma i Pauru rü choxmëxmaãtama pexcèx chanaxümatü i ñaã chorü moxë. 22 Rü ngëxguma chi texé tama tórü Cori ya Ngechuchu ya Cristüxü ngechaügu, rü Tupana tá tüxü napoxcu. Rü paxa tá ínangu ya tórü Cori. 23 Rü chanaxwèxe i tórü Cori ya Ngechuchu ya Cristu poraãcü pexü narüngüxëe. 24 Rü guxüma i pema, rü poraãcü pexü changechaüãcüma pexü charümoxë naëgagu ya tórü Cori ya Ngechuchu ya Cristu.

Rü nuãma pexna,
Pauru

NORŪ TAXRE GA POPERA GA CORĪTIUCŪĀX GA YAXŌGŪXŪTANŪWA NAMUXŪ GA PAURU

Pauru rü nüxŭ narümoxē ga yema yaxōgŭxŭ ga Corĭtiuwa yexmagŭxŭ

¹ Pa Chaueneēgŭ i Corĭtiucŭāxgŭ i Tupanaāxŭ yaxōgŭxŭ, rü Pa Chaueneēgŭ i Guxŭma i Acayaanewa Ngēxmagŭxŭ, choma i Pauru nixĭ i pexcēx chanaxŭmatŭxŭ i űaā popera wŭxigu namaā i taeneē i Timutéu. Rü choma nixĭ i Tupana choxŭ yaxuxŭ na Ngechuchu ya Cristu choxŭ muxŭ na nüxŭ chixuxŭcēx i norŭ ore. ² Rü tanaxwēxe na Tanatŭ ya Tupana rü tŏrŭ Cori ya Ngechuchu ya Cristu pexna nanaxā i norŭ ngechaxŭ rü norŭ taāxŭ.

Pauru rü ngŭxŭ ninge

³ Rü toma rü nüxŭ ticuēxŭgŭ ya Tupana ya Nanatŭ ya tŏrŭ Cori ya Ngechuchu ya Cristu. Erŭ nüma nixĭ ya Tanatŭ ya nüxŭ ingechaŭtŭmŭgŭcŭ rü tŏrŭ Tupana ya guxŭguma tŭxŭ taāxēēcŭ. ⁴ Rü nüma ya Tupana rü toxŭ nataāxēē i ngēxguma ngŭxŭ tingexgu, na toma rü ta tanataāxēēgŭxŭcēx i ngēma togŭ i duŭxŭgŭ i ngŭxŭ ingegŭxŭ. Rü ngēmaācŭ ngēma Tupana toxŭ na taāxēēxŭrŭŭ toma rü ta tanataāxēēgŭ i ngēma togŭ i duŭxŭgŭ. ⁵ Rü űuxma na Cristurŭŭ poraācŭ ngŭxŭ tingegŭxŭ, rü ngēxgumarŭŭ nümatama poraācŭ toxŭ nataāxēē. ⁶ Rü ngēmacēx, ngēxguma toma ngŭxŭ tingegŭgu, rü ngēmaācŭ toxŭ nangupetŭ na pema rü pexŭ nangēxmaxŭcēx i perŭ taāē rü perŭ maxŭ i taguma gŭxŭ. Rü ngēxguma Tupana toxŭ taāxēēgu, rü ngēmaācŭ tomaā nanaxŭ na pema rü ta pexŭ nangēxmaxŭcēx i perŭ taāē rü yaxna namaā pexĭnŭēxŭcēx i ngēxguma ngēmatama ngŭxŭ i toma tingegŭxŭ pexŭ ngēxmagu. ⁷ Toma rü aixcŭma tayaxōgŭ na pema rü tagutāma ipenatāxŭ i Tupanaārŭ ore. Erŭ nüxŭ tacuēx rü ngēma na toxrŭŭ ngŭxŭ pingegŭxŭ, rü ngēxgumarŭŭ tá ta toxrŭŭ pexŭ nangēxma i ngēma taāē i Tupanawa ne ŭxŭ. ⁸ Pa Chaueneēgŭx, tanaxwēxe i nüxŭ pecuēx na űuxre ga guxchaxŭgŭ toxŭ ngupetŭxŭ ga Achiaanewa. Rü yema na poraācŭ toxŭ naguxchaxŭ, rü dŭxwa marŭ tama namaā taporae, rü nagu tarŭxĭnŭē na marŭ tāŭtāma tamaxēxŭ. ⁹ Rü nagu tarŭxĭnŭē rü űoma yuwa taxĭxŭrŭŭ tixĭgŭ. Natŭrŭ yemaācŭ toxŭ naxŭpetŭ, erŭ Tupana ya yuexŭxŭ írŭdagŭxēēcŭ toxŭ nangŭexēēchaŭ na nüxĭcatama nüxŭ nangēxmaxŭ i pora na yuwa toxŭ ínanguxŭxēēxŭcēx, rü taxucŭrŭwama togŭtama na ítanguxŭxēēxŭ. ¹⁰ Rü Tupana rü toxŭ ínanguxŭxēē nawa ga yema guxchaxŭ ga yuwa toxŭ gagŭchaŭxŭ. Rü ngēxgumarŭŭ tá ta toxŭ ínanguxŭxēē nawa i űaā taxŭ i guxchaxŭ i űuxma toxŭ ngēxmaxŭ. Rü aixcŭma tayaxōgŭ na nüma rü guxŭgutāma ngēmaācŭ toxŭ nangŭxēēxŭ. ¹¹ Natŭrŭ tanaxwēxe i pema rü perŭ yumŭxēmaā toxŭ perŭngŭxēē. Rü ngēxguma chi ngēmaācŭ penaxŭxgux, rü muxŭma i duŭxŭgŭ rü tá Tupanana moxē naxŭgŭ naxcēx i ngēma na űuxācŭ toxŭ nangŭxēēxŭ.

Tŭxcŭŭ tama Corĭtiuwa naxŭ ga Pauru

¹² Nangēxma i űacŭ i toxŭ taāxēēxŭ. Rü ngēma nixĭ na toōēwa nüxŭ tacuāxŭ na űoma i naānewa rü aixcŭma Tupana naxwēxexŭācŭma meā tamaxēxŭ. Rü pepēxewa nixĭ ga guxŭārŭ yexera yemaācŭ tamaxēxŭ. Natŭrŭ tama togagu nixĭ ga yema, yerŭ Tupana ya tomaā mecŭmacŭ nixĭ ga toxŭ rŭngŭxēēcŭ na yemaācŭ pepēxewa tamaxēxŭcēx. ¹³⁻¹⁴ Rü yema poperagu ga pexcēx taxŭmatŭxŭwa, rü nataxuma ga űacŭ ga icŭxŭ. Natŭrŭ yema toma tamaxēxŭācŭma nixĭ ga pexcēx tanaxŭmatŭxŭ na yemawa meā nüxŭ

pecuáxúcèx na ñuxácü tixīgüxü. Rü woo i ñuxma rü tama aixcüma meã toxü na pecuáxü, natürü chanaxwèxe i wüxi i ngunexügu rü aixcüma meã toxü pecuèx. Rü ngëxguma meã toxü pecuèxgu rü pema rü tá tomaã petaãëgü i ngëxguma íngaxgu ya tórü Cori ya Ngechuchu, rü ngëxgumarüü i toma rü tá ta pemaã tataãëgü. ¹⁵⁻¹⁶ Rü yemagu charüxínüxúcèx nixĩ ga noxri ga pexütawa na chaxüxchaüxü na pexü íchayadauxúcèx rü yemaãcü pexü na charüngüxëèxúcèx. Rü nagu charüxínü ga Machedóniãñewa chaxüxgu na pexütagu íchidauxü, rü yexguma Machedóniãñewa ne chaxüxgu rü wenaxãrü pexütagu íchidauxü. Rü yemaãcü chanaxüxchaü, yerü nagu charüxínü na yemawena choxü perüngüxëèxü na Yudéañewa chaxüxúcèx. ¹⁷ Bexmana pema nagu perüxínüëgu rü tama aixcüma chayanguxëëgaãcüma nagu charüxínü ga yema pexütawa na chaxüëgaxü. ¿Éxna pema nagu perüxínüëgu rü ñoma wüxi i duüxü i tama Tupanaãxü yaxõxürüüácüma chamaxü, rü “Ngü” ñacharügüchiréx woo tama chayanguxëëgagu i ngëma nüxü chixuxü? ¹⁸ Natürü Tupana toxü nacuèx na aixcüma yíxü i ngëma torü ore ega pemaã itaxunetagu. ¹⁹ Erü yima Ngechuchu ya Cristu ya Tupana Nane ga guma Chiribánu rü Timutéu rü choma pemaã nüxü tixuchigacü, rü ore i aixcüma ixixüxüxícatama nixu. Rü nüma rü aixcüma nayanguxëë i ngëma nüxü yaxuxü. ²⁰ Rü Cristu nixĩ ya yima yanguxëëcü ga guxüma ga yema unetagu ga Tupana nuxcümaxüchi nüxü ixuxü. Rü ngëmacèx ngëxguma Ngechuchuëgagu Tupanaxü icuèxüügügu, rü ñatarügügu:

“Rü aixcüma nixĩ i ngëma”, ñatarügügu. ²¹ Rü ñuxma na Cristuarü duüxügu ixīgüxü, rü Tupana nixĩ ya toxü poraexëëcü rü pexü poraexëëcü na taguma Cristuna ixīgachixúcèx. Rü nümatama nixĩ ga tüxü nadexü na noxrü ixīgüxúcèx. ²² Rü nüma ya Tupana rü naëga tagu naxü erü tórü yora nixĩ. Rü nüma rü tüxna nanamu i Naãë i Ünexü na wüxi i tórü cuèxruü yíxüxúcèx, rü ngëmawa nüxü icuáxúcèx na yixcüra tá tüxna naxããxü i muxüma i to i mexügu. ²³ Pema nüxü pecuèx ga noxri rü Corítuwa chaxüxchaü, natürü tama yéma petanüwa chaxü yerü tama chanaxwèxe na pexü changechaüxüxëèxü. Rü yemacèx tama pexütawa íchayadau, yerü tama pexü chingagüchaü. Rü Tupana nüxü nacuèx na aixcüma na yíxü ga yema. ²⁴ Rü tama tanaxwèxe na pexü tamuxü na ñuxácü tá Tupanaãxü peyaxõgüxü. Erü pema rü marü aixcüma meãma peyaxõgü. Natürü ngëma tanaxwèxexü nixĩ na pexü tarüngüxëègüxü na yexeraãcü petaãëgüxúcèx.

2

¹ Rü yemacèx nixĩ ga tama wena pexütawa chaxüxü, yerü tama chanaxwèxe ga pexü na changechaüxëèxü. ² Erü ngëxguma chi pexü changechaüxëëgu, ¿rü texé tá choxü tataãëxëë? ¿Rü ñuxácü tá choxü petaãëxëë, ega pexü changechaüxëëgu? ³ Rü yemacèx nixĩ ga yemaãcü pexcèx popera chaxümatüxü na penamexëègüxúcèx i perü guxchaxügu naxüpa na pexütawa chaxüxü. Yerü tama chanaxwèxe ga yexguma chi yéma chaxüxgu na choxü pengechaüxëèxü. Erü pema nixĩ i chanaxwèxexü na choxü petaãëxëègüxü. Rü aixcüma nagu charüxínü rü ngëxguma choma chataãëxgu rü pema rü tá ta petaãëgü. ⁴ Rü yexguma pexcèx chanaxümatügu ga yema popera, rü poraãcü chanaxixãchiãë, rü düxwa yema chorü ngechaümaã chaxaxu. Natürü tama pexcèx chanaxümatü na pexü changechaüxëèxúcèx, natürü pexcèx chanaxümatü na nüxü pecuáxúcèx na ñuxácü poraãcü pexü changechaüxü.

Pauru rü nüxü nüxü nangechaü ga yema duüxü ga chixexü namaã üxü

⁵ Rū yema yatü ga choxü ngechaüxëxü, rü tama choxüxīcatama nixī ga nangechaüxëxü, natürü pexü rü ta nangechaüxë. Natürü tama chanangu-petüxëchaxü na pexna chacaxü i ngemachiga.. ⁶ Rū yema poxcu ga nüxna pexāxü ga yema duüxü ga yexguma pengutaquëxegügu, rü chauxcëx rü marü name na ngëxīcatama na yīxü. ⁷ Rū ngëmacëx i ñuxma rü chanaxwëxe i nüxü nüxü pengechaü i norü chixexü rü nüxü perüngüxë na tama yexeraxü i chixexüwa nagaāxüçëx i ngëma norü ngechaü. ⁸ Rū ngëmacëx chanaxwëxe i wenaxärü noxrirü nüxü nüxü pedauxë na aixcüma nüxü pengechaüxü. ⁹ Rū yemacëx nixī ga yemachiga marü pexcëx chanaxümatüxü, yerü pexü chaxüxchaü, rü nüxü chacuāxchaü ngoxi marü aixcüma chauga pexīnü. ¹⁰ Rū ñuxma pemaā nüxü chixu rü yixema pema tüxü nüxü pengechaüxë i tümaärü chixexü, rü choma rü tá ta tüxü nüxü changechaü. Rū ngëxguma chi tacü rü chixexüxü tüxü changechaügu, rü pegagu nixī i Cristupëxewa tüxü nüxü changechaüxü i ngëma. ¹¹ Rū ngëmaäcü chanaxü na tama nayoxniëxüçëx i Chataná na chixexügu tüxü nayixëxüçëx. Erü yixema rü meāma nüxü tacuëx i nacüma i Chataná na ñuxäcü chixexügu tüxü nayixëëchaüxü.

Tróaarü ñānēwa rü nanaxixāchiāē ga Pauru

¹² Rū yexguma Tróaarü ñānēwa changuxgu na nüxü chixuxüçëx ga Cristuarü ore, rü poraäcü choxü natauxcha na yéma tórü Coriaxü chapuracüxü. ¹³ Natürü tama aixcüma chataāē ga yéma, yerü tama yexma nüxü chayangau ga taeneē ga Titu. Rū yemacëx nüxü charümoxë ga yemacüāx ga duüxügü, rü ichaxüāchi, rü Machedóniānēwa chaxü.

Cristu rü Paurumaā napora

¹⁴ Rū Tupanana moxë taxägü erü norü duüxügüxü toxü nixīgüxë. Rū ñuxma na Cristuarü duüxügü tixīgüxü, rü nüma ya Tupana rü guxüguma tomaā nanaxüpëxe. Rū nüma nixī i toxü namuxü na duüxügüxü nüxü tacuëxëxüçëx i norü ore. Rū ngëma norü ore rü guxüwama nangu rü guxüguma nipuema ñoma wüxi i pumara i yixichixürü. ¹⁵ Rū ñuxma i toma i Cristugagu Tupanapëxewa na timexü, rü guxüwama tanguchigagü natanüwa i ngema yaxögüxü rü ngema tama yaxögüxü.. ¹⁶ Rū ngëma duüxügü i tama yaxögüxü rü nüxü nawëxtümüxü i tohiga, erü ngema ore i nüxü tixuxü rü norü poxcuchigaxü namaā nixu. Natürü ngëma yaxögüxü rü namaā nataxëgü i tohiga erü ngema ore i nüxü tixuxü rü ore i namaxëxëxü nixī. Rū ngëmacëx çtexëāxü natauxcha i ñānē puracü na nüxü tixuxü i ngëma ore? ¹⁷ Rū yixema toxrüü ixīgüxëxīcatama tixī ya tüxü natauxchaxe. Rū toma rü tama Tupanaärü oregu dīeru ngīxü tayaxu ngëma togü naxügüxürü. Natürü Tupanapëxewa rü aixcüma meā nüxü tixu i ngëma norü ore, erü nüma toxü nimügü rü Cristuarü tixīgü.

3

Tupanaärü uneta i ngexwacaxüxüchiga

¹ Rū ñuxma na pemaā nüxü tixuxü na aixcüma Tupana yīxü ga toxü mucü, rü bexmana tá nagu perüxīnü na wenaxärü togüétüwa tidexagüxü. ¿Éxna penaxwëxe na wüxi i carta i cuëxruü pexü tawéxü na nawa nüxü pecuáxüçëx na aixcüma Tupanaärü orearü uruügü tixīgüxü, rü éxna penaxwëxe na pexütawa naxcëx itaçaxü i cartagü na ngëmawa duüxügü toxü cuáxüçëx naxrüxü i ngema togü? ² Rū pemaā nüxü tixu rü tama tanaxwëxe i tacü rü carta na duüxügü toxü cuáxüçëx, erü pematama nixī i ngëma cartarüü pixīgüxü, rü pewa nixī i nangóxü na aixcüma Tupana yīxü ga toxü mucü. Rū meāma toðëwa nüxü tacuëx i ngëma. Rū yema na naxüchicüxü ga perü

maxū, rü ngēmawa guxūma i duūxūgū nūxū nadau na aixcūma wūxi ga mexū ga puracū taxūxū ga petanūwa. ³ Rū ñuxma rü meāma nangox na pema rü ñoma wūxi i carta i Cristutama ūmatūxūrūū na pixīgūxū. Rū torū puracūgagu nixī i ngēma. Natürū tama wūxi i carta i tacū rü ūmatūxūmaā ūmatūxū pixīgū, natürū pema nixī i carta i Tupana ya Maxūcūāē i Ūūnexū ūmatūxū. Rū ngēma carta rü tama popera rü ēxna nutawa iwūcuchixū nixī, natürū perū maxūwa nixī i nangóxū i ngēma. ⁴ Rū ngēmacèx tama tamuūē na ngēmaācū togūcèxtama tidexagūxū, erū tayaxōgū na Cristugagu Tupana toxū dauxū na timexū. ⁵ Rū tama toxrūtama cuèxmaā nixī i tanaxūxū i tacū rü mexū. Natürū guxūma i ngēma taxūxū rü Tupanaārū ngūxēēmaā nixī i tanaxūxū. ⁶ Rū Tupana rü toxū narūngūxēē na duūxūgūmaā nūxū tixuxū i ngēma ngexwacaxūxū i norū uneta na ñuxācū Cristugagu tá tūxna naxāāxū i maxū i taguma gūxū. Rū ngēma maxū rü tama yema mugū ga Moīché ūmatūxūgagu tanayaxu, natürū tanayaxu erū Tupanaāē i Ūūnexū tūxna nanaxā. Rū yema mugū ga Moīché ūmatūxū rü yuwa tūxū nagagū, natürū Tupanaāē i Ūūnexū rü tūxna nanaxā i maxū i taguma gūxū. ⁷ Rū yema mugū ga Moīchéna naxāxū ga Tupana, rü nutagu nixī ga naxūmatūxū. Rū yexguma Moīché nayauxgu ga yema mugū, rü poraācū niyaurachiwecūxū. Rū yemacèx ga duūxūgū rü taxucūrūwama Moīchéchiwegu narūdaunū. Natürū yema norū yaurachiwecūū rü nixochigū. Natürū ga yema mugū ga Moīché tūxna āxū i yuwa tūxū gagūxū, rü taxū ga yauracūūxūmaā ínangu. Rū yemaācū namexēchi ga yexguma ínanguxgu. ⁸ Natürū yexeraācū namexēchi nixī i ngēma uneta i ngexwacaxūxū i Tupanaāē i Ūūnexū taxcèx ngoxēēxū. ⁹ Rū yemaācū woo namexēchi ga yema mugū ga yuwa tūxū gagūxū, natürū yexeraācū namexēchi i ngēma uneta i ngexwacaxūxū i Tupanapēxewa tūxū mexēēxū. ¹⁰ Rū yema mugū ga noxri mexēchixū, rü ñuxma rü taxuwama name, ega namaā nūgū nangūgūgu i ngēma Tupanaārū uneta i ngexwacaxūxū i yexeraācū mexēchixū. ¹¹ Rū yemaācū woo namexēchi ga yema mugū ga paxaāchi ixīxū, natürū yexeraācū namexēchi i ngēma uneta i ngexwacaxūxū i guxūgutáma ixīxū. ¹² Rū toma aixcūma nūxū tacuèx na guxūgutáma yīixū i ngēma Tupanaārū uneta i ngexwacaxūxū i mexēchixū, rü ngēmacèx tama cúācūma duūxūgūmaā nūxū tixu. ¹³ Rū ngēmacèx tama duūxūgūchaxwa iticūxgū yema Moīché ūxūrūū. Yerū ga Moīché rü nūgū nidūxchiwe na tama nūxū nadaugūxūcèx ga yema Yudíugū ga ñuxācū na yaxochigūxū ga norū yaurachiwecūū. ¹⁴ Natürū ga yema duūxūgū ga Moīchéxū íxūmūcūgūxū rü ñoma yadūxgūchiwexūrūū nixīgū yerū tama nūxū nacuèxgūéga ga tacūchiga na yīixū ga yema mugū. Rū ñuxma rü ta i ngēma Yudíugū rü tama nūxū nacuèxgūéga i ngēxguma nawa nangúegu i ngēma mugū. Erū nangēxma i tacū i ñoma yadūxgūchiwexūrūū nūxū naguxchaxēēxū na tama nūxū nacuèxgūxūcèx. Rū ñuxma rü ta tama nūxna ínanguéga i ngēma nacūma erū Cristuxicatama nixī ya yima nūxna ínanguxēēcū. ¹⁵ Rū ñuxma rü ta i ngēma Yudíugū, rü ngēxguma nawa nangúegu i ngēma ore ga Moīché tūxna āxū, rü nangēxma i tacū i ñoma yadūxgūchiwexūrūū nūxū naguxchaxēēxū na tama nūxū nacuèxgūégaxūcèx na tacūchiga yīixū i ngēma ore. ¹⁶ Natürū ngēxguma wūxi i duūxū nūxū rūxoxgu i nacūma i chixexū, rü tórū Coriaxū yaxōōgu, rü ngēxguma nixī i nūxna ínanguxū i ngēma nūxū naguxchaxēēxū. ¹⁷ Erū nūma ya tórū Cori rü Naāē i Ūūnexū rü wūxitama nixī rü ngextá ínangēxmaxūwa i tórū Coriāē i Ūūnexū, rü tūxū nanatauxchaxēē na Tupanana ingaicamagūxū. ¹⁸ Rū ngēmacèx guxāma i yixema na Cristuaxū yaxōgūxū rü ñoma wūxi i woruarūū tawa nangóchipeta na ñuxācū namexēchixū ya tórū Cori erū nataxuma i tacū i tūxū idūxūxū

naxchaxwa. Rū nūma ya tórū Cori i Naãē i Üünexŭ ixĩcŭ, rŭ guxŭguma yexeraãcŭ tŭxŭ nimexēēchigŭ na naxrŭŭ aixcŭma imexŭcèx.

4

¹ Rŭ ngēmacèx taguma nŭxŭ tarŭchau i ñaã puracŭ, erŭ Tupana ya nŭxŭ tangechaŭtŭmŭŭcŭ nixĩ ga toxŭ mucŭ na tanaxŭxŭcèx i ñaã puracŭ na duŭxŭgŭmaã nŭxŭ tixuxŭcèx i norŭ ore. ² Rŭ yemacèx nŭxŭ tarŭxoe ga guxŭma ga ŭacŭ ga chixexŭ i ãne tŭxna ãxŭ i cúacŭ ŭxŭ. Rŭ tama tanawomŭxēēãcŭma nixĩ i namaã nŭxŭ tixuxŭ i ore rŭ tama tanaxŭchicŭŭ i ngēma ore. Natŭrŭ ngēma ore i aixcŭma ixĩxŭxĩcatama nixĩ i nŭxŭ tixuxŭ. Rŭ ngēmaãcŭ Tupanapēxewa tamaxē rŭ duŭxŭgŭpēxewa togŭ itawēx na nŭxŭ nacuèxgŭxŭcèx na ñuxãcŭ tixĩgŭxŭ i tomãx. ³ Rŭ ngēxguma chi texécèx naguxchagu i ngēma ore i mexŭ i nŭxŭ tixuxŭ, rŭ ngēma duŭxŭgŭ i iyarŭtauxexŭcèxicatama nixĩ i naguxchaxŭ. ⁴ Erŭ nŭmagŭ rŭ tama nayaxogŭ. Rŭ ngēmacèx i ñoma i naãneãrŭ ãēxgacŭ i Chataná rŭ nŭxŭ nanaguxchaxēē na tama nŭxŭ nacuèxgŭxŭcèx na ñuxãcŭ namexēchixŭ i norŭ ore ya Cristu ya Üünecŭ. Rŭ Cristuwa nixĩ i nangóxŭ na ñuxãcŭ na yĩxŭ ya Tupana. ⁵ Rŭ ngēxguma duŭxŭgŭmaã nŭxŭ tixuxgu i ngēma ore, rŭ tama tochigaxŭtama tixugŭ. Natŭrŭ nŭxŭ tixu na Ngechuchu ya Cristu rŭ tórŭ Cori yĩxŭ, rŭ nŭma tŭxŭ na nangechaŭxŭgagu perŭ ngŭxēēruŭgŭ na tixĩgŭxŭ. ⁶ Erŭ nŭmatama ya Tupana ga noxri naãne naxŭxgux rŭ ãanexŭwa nangoxēēcŭ ga ngóonexŭ, rŭ nŭmatama nixĩ i ñuxma i tŭxŭ yangoxnaãēxēēgŭxŭ na ngēmawa nŭxŭ icuáxŭcèx na ñuxãcŭ namexēchixŭ i nŭmax. Rŭ ngēma norŭ mexŭ rŭ Ngechuchu ya Cristuchiwewa nixĩ i nŭxŭ idauxŭ.

Tayaxogŭama ega woo ngŭxŭ ingegŭgu

⁷ Rŭ ngēma nŭxŭ na icuáxŭ na ñuxãcŭ namexēchixŭ ya Tupana, rŭ ngēma cuèx rŭ wŭxi i mexēchixŭ nixĩ. Natŭrŭ ngēma cuèx i mexēchixŭ rŭ taxŭne i maĩraxŭnaxcèxwa nangēxma, na nangóxŭcèx na Tupanawa ne naxŭxŭ i guxŭma i pora rŭ tama i tawatama. ⁸ Rŭ guxŭwama toxŭ nangēxma i guxchaxŭgŭ, natŭrŭ taguma nŭxŭ tarŭchau i ñaã puracŭ. Rŭ woo poraãcŭ taxoegaãēgŭgu, natŭrŭ taguma ítanangēx. ⁹ Rŭ woo togŭ towe ingēxŭtanŭgu, natŭrŭ ya Tupana rŭ taguma toxŭ ínawogŭ. Rŭ woo duŭxŭgŭ toxŭ napíexēēgu, natŭrŭ tama ngēxma tayacuèxēē i ñaã puracŭ. ¹⁰ Rŭ guxŭwama i ngextá ítaxĩxŭwa rŭ ãŭcŭmaxŭwa tangēxmagŭ, yexgumarŭŭ ga Ngechuchu na ãŭcŭmaxŭwa nayexmaxŭrŭŭ. Natŭrŭ ngēmaãcŭ toxŭ naxŭpetŭ na duŭxŭgŭ nŭxŭ daugŭxŭcèx na ñuxãcŭ towa namaxŭxŭ ya Ngechuchu. ¹¹ Rŭ ñuxma na tamaxēxŭ, rŭ guxŭ i ngunexŭgu rŭ Ngechuchugagu ãŭcŭmaxŭwa tangēxmagŭ. Natŭrŭ ngēmaãcŭ toxŭ naxŭpetŭ na Ngechuchu inawéxŭcèx i norŭ pora nawa i ñaã toxone i yuxwèxexŭ. ¹² Rŭ ngēmaãcŭ Tupanaãrŭ orecèx ãŭcŭmaxŭwa tangēxmagŭ, natŭrŭ ngēmaãcŭ toxŭ naxŭpetŭ na pema rŭ pexŭ nangēxmaxŭcèx i maxŭ i taguma gŭxŭ. ¹³ Tupanaãrŭ ore i ŭmatŭxŭwa rŭ ñanagŭrŭ:

“Nŭxŭ chayaxŭ rŭ yemacèx Tupanachiga chidexa”,

ñanagŭrŭ. Rŭ ngēxgumarŭŭtama tixĩgŭ i toma na tayaxogŭxŭ rŭ Tupanachiga tidexagŭxŭ. ¹⁴ Erŭ nŭxŭ tacuèxgŭ rŭ Tupana ga yuwa ínadaxēēcŭ ga Ngechuchu ya tórŭ Cori, rŭ yimatama Tupana tá nixĩ ya toxŭ írŭdagŭxēēcŭ, erŭ Ngechuchuarŭ duŭxŭgŭ tixĩgŭ. Rŭ ngēmaãcŭ wŭxigu pemaã nŭgŭxŭtawa tá toxŭ nagagŭ. ¹⁵ Rŭ guxŭma ga yema toxŭ ngupetŭxŭ rŭ perŭ mexŭcèx nixĩ na yexeraãcŭ yamuētanŭxŭcèx i ngēma duŭxŭgŭ i Tupana nŭxŭ rŭngŭxēēgŭxŭ. Rŭ ngēmaãcŭ tá dŭxwa namuxŭchi i ngēma duŭxŭgŭ i moxē Tupanana ãgŭxŭ rŭ nŭxŭ icuèxŭgŭxŭ. ¹⁶ Rŭ ngēmacèx taguma nŭxŭ tarŭxoe

na nūxū tixuxū i ngēma ore. Rū woo yayachigūgu rū yaturachigūgu i toxone, natürü toðēwa rū guxū i ngunexūgu rū yexeraācū tiporaetanū. ¹⁷ Erū ngēma ngúxū i toxū üpetūxū i ñaã torū maxūwa, rū ngēma rū wūxi i paxaāchimare nixī rū paxa tá nangupetū. Natürü ngēmaācū tá tanayaxu i wūxi i maxū i mexēchixū i tagutáma gúxū i ñoma i naānecūāx i maxūārū yexeraxūchi ixīxū. ¹⁸ Rū tama ngēma ñuxma nūxū idauxūgu nixī itarūxīnūēxū, natürü nagu tarūxīnūē i ngēma ñuxma tama nūxū idauxū. Erū ngēma ñuxma nūxū idauxū rū tama natai, natürü ngēma ñuxma tama nūxū idauxū, rū guxūgutáma nangēxmaēcha.

5

¹ Rū nūxū tacuēxgū ega ngēxguma iyanaxoxgu i ñaã toxone i paxaāchi ñuxma toxū ngēxmaxū, rū daxūguxū i naānewa tá tanayaxu i wūxi i toxone i tagutáma iyarūxoxū i Tupanatama toxcèx mexēēxū rū tama i duūxūgū. ² Rū ngēmacèx i ñuxma i ñaã toxonewa tamaxēyane, rū tama aixcūma tataāēgū. Erū tanaxwèxe na paxa toxū nangēxmaxū i ngēma toxone i daxūguxū i naānewa ngēxmaxū. ³ Rū ngēma toxone i daxūguxū i naānewa tá toxū ngēxmaxū rū ñoma wūxi i naxchirurūū tá toxū nidūxū, na ngēmaācū naxāxūnēxūcèx i toðē. ⁴ Rū ñaã toxone i ñuxma toxū ngēxmaxūwa tamaxēyane, rū tanaxixāchiāēgū rū tama aixcūma tataāēgū. Rū tama aixcūma ítanatáxchaū i toxone i ñoma i naānewa toxū ngēxmaxū, natürü tanaxwèxegū na tanayaxuxū i toxone i ngexwacaxūxū na ngēmaācū ngēma maxū i ngexwacaxūxū iyanaxoxēēxūcèx i toxone i ñuxma toxū ngēxmaxū. ⁵ Rū Tupana nixī ya toxū imexēēcū naxcèx i ngēma ngexwacaxūxū i maxū rū ngēma ngexwacaxūxū i toxone. Rū toxna nanamu ga Naãē i Üünexū na ngēmawa nūxū tacuáxūcèx na aixcūma tá tanayaxuxū i ngēma. ⁶ Rū ngēmacèx taxucèxma taxoegaāēgū. Erū nūxū tacuèx rū ñuxma ñaã toxonewa tamaxēyane, rū taxucürūwama tórū Corixūtawa tangēxmagū i daxūguxū i naānewa. ⁷ Rū woo tama nūxū tadaugūgu ya yima tórū Cori i ñuxmax, natürü tayaxōgū na wūxi i ngunexū rū tá nūxū tadaugūxū. Rū ngēma nixī i toxū poraxēēxū i ñaã torū maxūwa. ⁸ Rū ngēmacèx taxucèxma taxoegaāēgū ega tayuegu. Erū toxcèx rū narūmemaē nixī na nūxna ítachoxūxū i ñaã toxone, na tórū Corixūtawa tayangēxmagūxūcèx. ⁹ Rū ngēmacèx, woo ñoma i toxonewa tangēxmagūgu rū ēxna tama nawa tangēxmagūgu, rū tanaxwèxe na guxūguma tórū Coriarū ngúchaū na taxūxū. Rū ngēmacèx naxcèx tadaugū na tanaxūxū i ngēma nanaxwèxexū i nūmax. ¹⁰ Erū guxātama i yixema rū Cristupēxewa tá tangugū na wūxichigū nayaxuxūcèx i ngēma tūxna ūxū. Rū nūma tá wūxichigūxū nangugūarū maxūāx. Rū ngēxgumarūū na ñuxācū meā imaxēxū rū ēxna chixri imaxēxū ga yexguma ñoma ga taxūnewa iyexmagūgu, rū ngēmaācū tá tūxna nanaxā ya wūxichigū.

Cristu rū taxcèx Tupanaxū narūngūxmūxēē

¹¹ Rū ngēmacèx Tupanaārū orearū uwa tapuracūe rū tayaxucuxēgū i duūxūgū na yaxōgūāxūcèx. Erū toma rū aixcūma torū Corixū tamuūē. Rū Tupana toxū nacuèx na ñuxācū yīxū i tórū maxū, rū chierūna pema rū chi ta toxū pecuèxgux. ¹² Rū tama tanaxwèxe i wenaxārū togüētūwa tidexagū, natürü pexū tarūngūxēēchaū na pexū nangēxmaxūcèx na tacūcèx tomaā petaāēgūxū na nūxū pecuáxūcèx na ñuxācū penangāxūxū i ngēma duūxūgū i pepēxewa nūgū írūmegūnetaxū natürü norū maxūwa rū tama ixaixcūmagūxū. ¹³ Rū woo duūxūgū toxū daugūgu na Tupanagu taxāūāēgūxū, rū nüētama nixī i ngēma erū nūmatama ya Tupana rū meāma toxū nacuèx. Natürü i pema rū meāma toxū pecuèx na meāma toðēxū tacuāācūma pema nūxū tixuxū ga norū ore. ¹⁴ Rū Cristu ya poraācū toxū ngechaūcū

nixī ya ñuxma tomaã icuácü, erü tayaxõ na nüma rü guxãärü pecaducèx nayuxü na yexma yanaxoxücèx ga guxãärü chixexügü. ¹⁵ Rü yemaãcü guxüma ga duüxügücèx nayu ga Cristu, na ngēma duüxügü i ñuxma maxëxü, rü tama nümatama nagu naxīnūëxügu namaxëxücèx, natürü naxcèx na namaxëxücèx ya yima naxcèx yucü rü wena írüdacü. ¹⁶ Rü ngēmacèx i toma rü tama ñoma i naānecüāx i duüxügü nagu rüxīnūëxürüü texéxü tangugüarü maxüāx. Rü woo ga ũpa rü ñoma ga naānecüāx ga duüxügü nagu rüxīnūëxürüü Cristuxü tangugü, natürü i ñuxma rü tama ngēmaãcü namaã nagu tarüxīnūë. ¹⁷ Rü ngēxguma texé Cristuaxü yaxõxgu, rü ngexwacaxüxü i duüxü tixī. Rü nuxcūmaüxü ga tūmacūma rü marü tūxna inayarüxo, rü ngexwacaxüxü i maxü tūxü nangëxma. ¹⁸ Rü guxüma i ngēma rü Tupana nixī ya naxücü. Rü nüma nixī ga Cristugagu tamaã inangüxmüxü. Rü ñuxma rü toxü namu na duüxügümaã nüxü tixuxü na namaã inangüxmüëxücèx. ¹⁹ Yerü Tupana rü Cristugagu duüxügümaã nügü narüngüxmüxëë. Rü tama duüxügüarü pecadugu naxīnūëcūma nanaxü ga yema. Rü ñuxma rü toxü namu na ngēmachigaxü duüxügümaã tixuxü. ²⁰ Rü ngēmaãcü Cristuarü orearü ngeruügü tixīgü, rü towa nixī i Tupana pexü cèèxüxü na namaã iperüngüxmüëxücèx. Rü ngēmacèx Cristuégagu pexü tacèèxügü na Tupana-maã iperüngüxmüëxücèx. ²¹ Cristu rü taguma pecadu naxü. Natürü tagagu nixī ga Tupana ga ñoma pecaduāxürüüācūma namaã naxüāxü na yemaãcü nagagu tūxü inanguxüxëëxücèx nawa i torü chixexü na aixcūma napëxewa imexücèx.

6

¹ Rü ñuxma na Tupanaärü ngüxëëruü tixīgüxü, rü pexü tacèèxü na tama nüxü pexoexücèx ga yema pemaã na namecūmaxü ga yexguma nayuxgu ga Nane. ² Erü Tupana rü norü ore i ümatüxüwa, rü ñanagürü: “Rü yema ngunexü ga nagu namexügu na choxü peyaxuxü, rü yexguma nixī ga pexü chaxīnūxü. Rü yexguma pexna chanaxuāxügu ga maxü i taguma gúxü, rü yexguma nixī ga pexü charüngüxëëxü”, ñanagürü. Rü ñuxma nixī i ngēma ngunexü i nagu namexü na Tupanaxü peyaxuxü, rü ñuxma nixī i ngēma ngunexü i pexna naxuaxüāxü i maxü i taguma gúxü. ³ Rü toma rü guxüguma naxcèx tadau na guxāpëxewa meã tamaxëxü na taxucèxma texé chixri torü puracüchiga idexaxücèx. ⁴⁻⁵ Rü guxüwama duüxügüxü nüxü tadauxëëchaü na aixcūma Tupanaärü duüxügü tixīgüxü. Rü ngēmacèx yaxna namaã taxīnūë i ngēxguma woo ngúxü toxü ngupetügu, rü éxna tacü toxü tauxgu, rü éxna tacü rü guxchaxü toxü ngëxmagu, rü éxna toxü yaçuaixgügu, rü éxna toxü napoxcuegu, rü éxna naxixāchiāëtanügu rü tomaã nanuëgu. Rü poraäcüxüchima tapuracüe, rü ñuxguacü rü tama tapee, rü ñuxguacü rü taiya toxü nangux. Natürü yaxna namaã taxīnūë i guxüma i ngēma. ⁶ Rü ngexgumarüxü ta duüxügüxü nüxü tadauxëë na aixcūma namexü i torü maxü, erü aixcūma Tupanapëxewa meã tamaxë, rü meã Tupanaxü tacuèx, rü yaxna duüxügümaã taxīnūë, rü namaã tamecūma. Rü nüxü nüxü tadauxëë na towa nangëxmaxü i Tupanaãë i Üünexü rü aixcūma guxü i duüxügüxü tangechaüxü. ⁷ Rü duüxügüxü nüxü tadauxëë na aixcūma namexü i torü maxü, erü namaã nüxü tixu i ngēma ore i aixcūma ixīxü, rü itanawëx i Tupanaärü pora i towa ngëxmaxü. Rü ngēma toxne ixīxü rü ngēma nixī i torü maxü i aixcūma mexü i Tupanapëxewa. Rü ngēmamaã nixī i togü itapoxüxü i torü uwanügüpëxewa. ⁸ Rü ñuxguacü i duüxügü rü toxü nicuèxüügü, rü ñuxguacü rü tacü tomaã nixugüe. Rü ñuxguacü rü meã tochiga nidexagü, rü ñuxguacü rü chixri tochiga nidexagü. Rü woo aixcūmachirëx yixīgu i ngēma ore i nüxü tixuxü, natürü doratèèx

toxŭ nawogŭe. ⁹ Rŭ woo meã toxŭ nacuèxgŭchirèxgu, natŭrŭ ñoma tama toxŭ nacuáxŭrŭŭ tomaã nixŭgŭ i duŭxŭgŭ. Rŭ ñuxguacŭ rŭ wixgutaèx tayue, natŭrŭ naetŭwa tamaxèãma. Rŭ toxŭ napoxcue, natŭrŭ tama toxŭ nadaixichi. ¹⁰ Rŭ woo tangechaŭgŭgu, natŭrŭ guxŭguma tataãgŭama. Rŭ woo ñoma i naãnewa tama tamuãrŭ ngèmaxŭãxgŭgu, natŭrŭ muxŭma i duŭxŭna tanaxã i taxŭ i mexŭ erŭ togagu nanayaxu i maxŭ i taguma gúxŭ. Rŭ woo taxuŭma toxŭ ngèxmèxgu i ñoma i naãnewa, natŭrŭ daxŭ-guxŭ i naãnewa rŭ toxŭ nangèxma i guxŭma. ¹¹ Pa Chaueneègŭ i CorŭtiucŭĀx, dŭcax aixcŭma pemaã nŭxŭ tixu rŭ guxŭ i torŭ maxŭnemaã pexŭ tangechaŭgŭxŭchi. ¹² Rŭ toma rŭ tama pexŭ taxoe, natŭrŭ pema waxi nixŭ i tama petoxwèxexŭ. ¹³ Rŭ dŭcax, Pa Chaueneègŭx, rŭ ñoma wŭxi i papá naxãcŭgŭxŭ cèèxŭxŭrŭŭ pexŭ chacèèxŭ na choxŭ pengechaŭgŭxŭcèx ngèma choma pexŭ changechaŭxŭrŭŭ.

Tupana ya maxŭcŭpata tixŭgŭ

¹⁴ ¿Rŭ tãutãma namaã pexãmŭcŭ i ngèma duŭxŭgŭ i tama yaxõgŭxŭ! Erŭ ngèxguma chi ngèmaãcŭ penaxŭxgu rŭ tãutãma guxã wŭxigu perŭxŭnŭe. ¿Rŭ ñuxãcŭ nawŭxiguxŭ i ngèma mexŭ namaã i ngèma chixexŭ? ¿Rŭ ñuxãcŭ nawŭxigu i ngóonexŭ namaã i èãnexŭ? ¹⁵ ¿Rŭ ñuxãcŭ nawŭxiguxŭ ya Cristu namaã i Chataná? ¿Rŭ ñuxãcŭ nawŭxiguxŭ i wŭxi i duŭxŭ i yaxõxŭ namaã i wŭxi i duŭxŭ i tama yaxõxŭ? ¹⁶ ¿Rŭ ñuxãcŭ Tupanapatawa nangèxmaxŭ i tupanetachicŭnèxãgŭ? Erŭ yixema rŭ Tupana ya maxŭcŭpata tixŭgŭ, rŭ tawa namaxŭ i nŭmax. Rŭ Tupana rŭ pechiga nidexa ga yexguma ñaxgu:

“Rŭ ngèma duŭxŭgŭwa tá chamaxŭ, rŭ natanŭgu tá chayarŭxŭxŭ. Rŭ norŭ Tupana tá chixŭ, rŭ nŭmagŭ rŭ tá chorŭ duŭxŭgŭ nixŭgŭ”, ñaxgu. ¹⁷ Rŭ yemacèx ñanagŭrŭ ta ga tórŭ Cori:

“¿Rŭ ípechoxŭ i natanŭwa i ngèma duŭxŭgŭ i tama chorŭ duŭxŭgŭ ixŭgŭxŭ! ¿Rŭ tãxŭ i nŭxŭ pingõgŭxŭ i ngèma chopèxewa chixexŭ! Rŭ choma rŭ tá pexŭ chayaxu. ¹⁸ Rŭ choma rŭ Penatŭ tá chixŭ, rŭ pemagŭ rŭ tá chaunegŭ rŭ chauxacŭgŭ pixŭgŭ”, ñanagŭrŭ ya tórŭ Cori ya Tupana ya guxŭãrŭ yexera poraxŭchicŭ.

7

¹ Rŭ dŭcax, Pa Chaueneègŭ ya Pexŭ Changechaŭgŭxex, rŭ ngèma Tupanaãrŭ unetagŭ i pemaã nŭxŭ chixuxŭ, rŭ taxcèx nixŭgŭ. Rŭ ngèmacèx tanaxwèxe na yigŭna idaugŭxŭ na tama taxŭnemaã rŭ èxna taãemaã naxŭxŭcèx i ngèma Tupanapèxewa tama mexŭ. Rŭ tanaxwèxe i aixcŭma Tupanaxŭ imuŭèãcŭma nŭxna yigŭ taxãgŭ rŭ naxcèxicatama tamaxè.

Pauru rŭ ngema CorŭtiucŭĀxgŭmaã nataãxè

² Rŭ tanaxwèxe i toxŭ pengechaŭgŭ. Rŭ dŭcax ga toma rŭ taxŭxemaãma chixexŭ taxŭgŭ. Rŭ taxŭxexŭma chixexŭgu tanguxèè. Rŭ taxŭxexŭma tawomŭxèègŭ. ³ Rŭ tama pexŭ chixuxŭcèx nixŭ i pemaã nŭxŭ chixuxŭ i ngèma. Yerŭ marŭ pemaã nŭxŭ chixu na ñuxãcŭ guxŭ ga chorŭ maxŭmaã pexŭ changechaŭxŭ. Rŭ ngema pexŭ na changechaŭxŭgagu rŭ íchamemare na petanŭwa chamaxŭxŭ rŭ èxna wŭxigu pemaã chayuxŭ. ⁴ Rŭ ñuxma rŭ taxucèxma pexŭ chaxãneãcŭma pemaã chidexa erŭ poraãcŭ pemaã chataãè. Rŭ woo ngŭxŭ na tingegŭxŭ, natŭrŭ aixcŭma choxŭ penangŭchaŭxŭxèè rŭ choxŭ petaãèxèè. ⁵ Rŭ yexguma Machedóniããnewa tangugŭgucŭrŭwa rŭ taguma itarŭngŭgŭ. Yerŭ guxŭwama ga ngexta itaxŭxŭwa rŭ nŭxŭ itayangau ga guxchaxŭgŭ. Rŭ duŭxŭgŭ rŭ toxŭ nanaguxchaxèè na tanaxŭxŭ i Tupanaarŭ puracŭ rŭ yemacèx poraãcŭ taxoegaãxègŭ. ⁶ Natŭrŭ ya Tupana ya tŭxŭ taãèxèècŭ ya yixema ngechaŭgŭxe, rŭ toxŭ rŭ ta nataãèxèè ga yexguma toxŭtawa nanguxgu ga taeneè ga Titu. ⁷ Rŭ tama yema toxŭtawa na

nanguxĕcèicatama tataãēgü, natürü tataãēgü ta yerü ga pema rü poraãcü nüxŭ penangúchaŭxēē rü penataãēxēē ga guma taeneē ga Titu. Rü nüma ga Titu rü tomaã nüxŭ nixu na ñuxãcü poraãcü penaxwèxexŭ na toxŭ pedauxŭ. Rü tomaã nüxŭ nixu na ñuxãcü naxcèx pengechaŭgüxŭ ga yema chomaã pexüxŭ, rü na ñuxãcü chauxcèx pexoegaãēgüxŭ. Rü guxŭma ga yema oremaã rü yexeraãcü chataãē. ⁸ Choma nüxŭ chacuèx rü yema popera ga pexcèx chaxümatüxŭ rü pexŭ nangechaŭgüxēē, natürü ñuxma rü marü tama naxcèx changechaŭ na chanaxümatüxŭ ga yema popera. Rü noxri rü yemaãcü naxcèx changechaŭ ga yexguma nüxŭ chacuèxgu ga na pexŭ nangechaŭgüxēēxŭ ga yema popera ga yexguma penayauxgu. ⁹ Natürü i ñuxma rü chataãē na pexcèx chanaxümatüxŭ ga yema popera. Rü tama yema na pengechaŭgüxŭcèx chataãē, natürü chataãē yerü yema perü ngechaŭgagu Tupanana pecuèxãchie rü penaxüchicüü ga perü maxŭ. Rü pema rü aixcüma Tupanana pecuèxãchieãcüma namaã peporae ga yema ngechaŭ, rü yemaãcü taxuŭma ga chixexŭ pemaã taxü ga yexguma pexcèx tanaxümatügu ga yema popera. ¹⁰ Rü ngēma ngechaŭ i Tupana naxwèxexŭãcüma namaã iporaexŭ, rü name nixŭ, erü ngēma ngechaŭgagu naxüchicüü i tórü maxŭ rü ngēmagagu tanayaxu i maxŭ i taguma gúxŭ. Rü ngēmacèx taxucèxma naxcèx pixãŭxãchie i ngēma ngechaŭ. Natürü ngēma ngechaŭ i ñoma i naãnecŭĀx i duŭxŭgü nüxŭ ngēxmaxŭ rü taxuwama name erü yuwa nanaga. ¹¹ Rü yexguma yema poperamaã pexŭ changechaŭxēēgu, rü Tupana naxwèxexŭãcüma nixŭ ga namaã peporaexŭ ga yema ngechaŭ. ¡Rü dücax i ñuxma i tacü Tupana pemaã üxŭ i ngēma perü ngechaŭgagu! Yerü yema perü ngechaŭgagu rü aixcüma nagu perüxŭnŭē ga yema chixexŭ ga petanüwa üpetüxŭ, rü meãma chomaã nüxŭ pixu ga yema. Rü yema perü ngechaŭgagu rü peãewa nangux ga yema chixexŭ, rü poraãcü Tupanaxŭ pemuŭē. Rü yemacèx penaxwèxe na yéma chaxŭxŭ na pexŭ chayarüngüxēēxŭcèx yerü penamexēēgüchaŭ ga yema chixexŭ. Rü yema perü ngechaŭgagu rü aixcüma penaxucuxē ga yema duŭxŭ ga chixexŭ üxŭ. Rü guxŭ ga yemawa rü ipenawèx na tama pegagu yŭxŭ ga yema chixexŭ ga ngupetüxŭ. ¹² Rü yemacèx, yexguma pexcèx chanaxümatügu ga yema popera, rü tama yema duŭxŭ ga chixexŭ üxŭgu charüxŭnŭãcüma chanaxümatü, rü tama yema duŭxŭ ga namaã chixexŭ naxüxŭgu charüxŭnŭãcüma chanaxümatü. Natürü chanaxümatü ga yema popera na yemawa Tupanapèxewa nüxna pecuèxãchiexŭcèx na ñuxãcü aixcüma toxŭ pengechaŭgüxŭ. ¹³ Rü yema na toxŭ pengechaŭgüxŭ, rü wüxi ga taãē nixŭ ga toxcèx. Natürü yema taãēärü yexera nixŭ ga yema taãē ga toxŭ yexmaxŭ ga yexguma nüxŭ tadèuxgu ga Titu ga ñuxãcü taxŭ ga taãē petanüwa na nayaxuxŭ. Rü aixcüma guxãma ga pema nixŭ ga wenaxãrü poraãcü nüxŭ penangúchaŭxēēxŭ. ¹⁴ Rü noxri tauta yéma naxŭxgu ga Titu, rü namaã nüxŭ chixu na mexŭ i duŭxŭgü na pixŭgüxŭ. Rü ñuxma rü taxucèxma chaxãne, erü guxŭma ga yema Titumaã nüxŭ chixuxŭ ga pechiga rü aixcüma ngēmaãcü nixŭ, yexgumarüü na aixcüma yŭxŭ ga guxŭma ga yema Tupanaãrü ore ga pemaã nüxŭ tixuxŭ. ¹⁵ Rü ñuxma i Titu rü yexeraãcü pexŭ nangechaŭ i ngēxguma nüxna nacuèxãchigu na ñuxãcü meã naga pexŭnŭēxŭ rü ñuxãcü nüxŭ pengechaŭãcüma meã penayaxuxŭ. ¹⁶ Rü choma rü ta poraãcü pemaã chataãēxŭchi, erü nüxŭ chacuèx na aixcüma peyanguxēēxŭ ga guxŭma ga yema pemaã nüxŭ chixuxŭ.

8

Yema yaxôgüxŭ rü woo tama na namuãrü dŭeruãxgüxŭ, natürü yema nüxŭ yexmacü ga dŭerumaã meã togüxŭ narüngüxēēgü

1 Rū ñuxmax, Pa Chaueneēgūx, rū pemaã nüxũ tixuxchaũ na ñuxãcü Tupana namaã mecūmaxũ i ngēma yaxōgūxũ i Machedóniããneãrũ ñãnegüwa ngēxmagūxũ. 2 Rū woo taxũ ga guxchaxũgü nüxũ na üpetügūxũ, natürü nataãēgüama. Rū woo tama na namuãrũ dīeruãxgūxũ, natürü yema nüxũ yexmacü ga dīerumaã meã togūxũ narüngūxēēgü. 3 Rū choma nüxũ chadau rū pemaã nüxũ chixu rū nümagü rū taãēãcüma ngīxũ inaxãgü ga guxcüma ga dīeru ga nüxũ tauxchacü na ngīxũ inaxãgūxũ. Rū ngīetü yemaãrũ yexera taãēãcüma ngīxũ inaxãgü. 4 Rū poraãcü toxũ nacèèxũgü na tama nüxna tanachuxuxücèx na yemaãcü yema togü ga taeneēgūxũ nangūxēēgūxücèx. 5 Rū yema nagu tarūxĩnūēxũãrũ yexera ngīxũ inaxãgü ga yema yaxōgūxũ ga Machedóniããnecũãx. Yerü Tupananaxĩra nügü naxãgü rū yemawena toxna nügü naxuaxũgü na toga naxĩnūēxücèx, yema Tupana naxwèxexürü. 6 Rū yemacèx Tituxũ tacèèxũ na wena petanüwa naxũxücèx na ngīxũ pinguxēēxücèx ga yema dīeru ga marü pemaã ngīxũ inaxügücü na ngīxũ penutaquēxexũ naxcèx i ngēma togü i taeneēgü i nüxũ nataxuxũ. 7 Pema rū guxũwama meã ipexĩ erü meã peyaxōgü, rū pexũ natauxcha na meã nüxũ pixuxũ i Tupanaãrũ ore erü meã nüxũ pecuèx na ñacüchiga yĩxũ. Rū aixcüma togūxũ perüngūxēēchaũ, rū yema pexũ tangúexēēxũãcüma pegü pengechaũgü. Rū ñuxma rū ngēxgumarũ ta penaxwèxe na aixcüma meã ipexĩxũ nawa i ngēma mexũ i nacüma na dīeru ngīxũ ipexãxũ naxcèx i ngēma taeneēgü i nüxũ nataxuxũ. 8 Tama wüxi i mu nixĩ i ngēma pemaã nüxũ chixuxũ. Natürü chanaxwèxemare na nüxũ pecuáxũ na ñuxãcü taãēãcüma ngīxũ inaxãgūxũ ga togü ga yaxōgūxũ. Rū pemaã nüxũ chixu i ngēma na pema rū ta ngīxũ ipexãgūxücèx i ngēma dīeru i togü i taeneēgüarũ ngūxēēcèx ixĩcü, na ngēmaãcü ipenawéxücèx na aixcüma nüxũ pengechaũgūxũ. 9 Erü pema rū marü nüxũ pecuèx na ñuxãcü tamaã namecūmaxũ ga tórü Cori ya Ngechuchu ya Cristu. Rū woo nüxũ nayexma ga guxũma, natürü ñoma wüxi ga ngearü yemaxũãxürü pexcèx nügü nixĩxēē na ngēmaãcü pexũ nangēxmaxücèx i muxũma i mexügü. 10 Rū ñuxma rū perü mexücèx nixĩ i pemaã nüxũ chixuxũ i ngēma dīeruarü nutaquēxechiga. Rū tauncü ga ngupetücügutama nixĩ ga ipenaxügūxũ ga ngīxũ na penutaquēxexũ. Rū yema rū aixcüma perü ngúchaũmaã nixĩ ga penaxũxũ. 11 Rū ñuxma rū yema noxri na meã ipenaxügūxürü, rū name nixĩ i taãēãcüma rū perü ngúchaũmaã peyanguxēē rū ngēma dīeru i pexũ ngēxmacüwa ngīxũ ipexã naxcèx i ngēma peeneēgü i nüxũ nataxuxũ. 12 Erü ngēxguma aixcüma wüxi ya duũxē tumaãrũ ngúchaũmaã ngēma dīeru i tüxũ ngēxmèxcüwa tumaēneēcèx ngīxũ itaxãxgu, rū Tupana rū taãēãcüma ngīxũ nayaxu. Erü nüma ya Tupana rū taguma tüxna ngīxcèx naca i ngēma tüxũ tauxcü. 13 Rū ngēmacèx tama chanaxwèxe i ngēma togūxũ na perüngūxēēxũgagu pexũ nataxu i pemax. 14 Natürü chanaxwèxe i guxãma tüxũ nangēxma i ñacü i tanaxwèxexũ, erü tama name na texéaxũ nataxuxũ i ñacü. Rū ñuxma na pexũ nangēxmaxũ i perü dīeru, rū name nixĩ i nüxũ perüngūxēēgü i ngēma taeneēgü i nüxũ nataxuxũ. Rū ngürüãchi to i ngunexũgu i pema pexũ natauxgu, rū nümagü rū tá nüxĩ nüxũ nangēxma na pexũ nangūxēēgūxücèx. Rū ngēmaãcü tá guxãtama tawüxigu. 15 Rū Tupanaãrũ ore i ümatüxüwa rū ñanagürü: “Guxema muxũma tüxũ yexmaxē rū taxuũma tüxũ ínayaxü. Rū guxema noxretama tüxũ yexmaxē rū tama tüxũ inayataxu”, ñanagürü.

Titu rū namücügüchiga

16 Natürü Tupanana moxē chaxã, erü nüma rū Tituxũ nagu narüxĩnūxēē na aixcüma pexũ nangūxēēxücèx, ngēma choma pegu charüxĩnūxürü. 17 Rū

nūma ga Titu rü: “Ngü” ñanagürü na wena petanüwa chanamuxü. Yerü nūma rü woetama poraäcū pegu narüxīnū. Rū ngēmacèx i ñuxma rü wena petanüwa naxü, erü nüxü nangúchaü. ¹⁸ Rū Titumaã ngēma tanamu i wüxi i taeneē i guxūma i yaxōgüxü nüxü ngechaügüxü erü nūma rü aixcūma meã nüxü nixu i Tupanaärü ore i tüxü maxēxēxü. ¹⁹ Rū tama ngēmacèxicatama nixī. Erü guxūma i ngēma yaxōgüxü rü ngēma taeneēxü naxunetagu na toxü ýaxümücüxücèx rü toxü nangüxēxücèx i ngēxguma Yerucharéüwa ngīxü tangexgu i ngēma dīeru, na ngēmaäcū nüxü ticuèxüügüxücèx ya tórü Cori, rü na guxāma nüxü dauxücèx na ñuxäcū taäēäcūma yigü rüngüxēēgüxü. ²⁰ Rū ýtayaga i ngēma taeneē, erü tama tanaxwèxe i texé toxü tixu i yixcama ngīxcèx i ngēma tacü i dīeru i taeneēgücèx ngīxü inutaquēxegücü. ²¹ Erü tama Tupanapēxewaxicatama tanaxwèxe na meã tanaxüxü, natürü guxü i duüxügüpēxewa rü ta tanaxwèxe na meã tanaxüxü. ²² Rū Titumaã rü ngēma to i taeneēmaã petanüwa tanamu i wüxi i to i taeneē i toxü nüxü dauxēxü na aixcūma nüxü nangúchaü na naxüäxü i Tupanaärü puracü. Rū ñuxma rü yexeraäcū petanüwa naxüxchaü i nümax, erü nüxü nacuèx na ñuxäcū pema rü taäēäcūma togüxü na perüngüxēēgüchaüxü. ²³ Rū ngēxguma texé pexna caxgu na texe ýīxü ya Titu, jrü tümamaã nüxü pixu na nūma rü chomücü ya wüxiwa chomaã pexcèx puracücü na ýīxü! Rū ngēma taxre i togü i namücügü, rü ngēma nixī i yatügü i guxūma i yaxōgüxü nüxü unetagüxü na Cristuarü puracü naxügüxücèx. Rū nümagü rü aixcūma norü maxūmaã Cristuxü nicuèxüügü. ²⁴ Rū ngēmacèx chanaxwèxe i ngēma taeneēgüxü nüxü pedauxēē na aixcūma nüxü pengechaügüxü, na guxūma i yaxōgüxü nüxü cuèxgüxücèx i ngēmachiga. Rū ngēmaäcū guxūma i ngēma yaxōgüxü tá nüxü nacuèxgü na aixcūma ýīxü i ngēma mexü i ore i pechiga namaã nüxü tixuxü.

9

Yema dīeru ga yema togü ga yaxōgüxücèx ngīxü inutaquēxecüchiga

¹ Rū taxucèxma tüxcüü pexcèx chanaxümatü ngīchiga i ngēma dīeru i ngīxü penutaquēxegücü naxcèx i ngēma taeneēgü i yaxōgüxü i Yudéaanewa ngēxmagüxü. ² Erü marü nüxü chacuèx rü perü ngúchaümaã ipenaxā i ngēma dīeru. Rū guxüguma taäēäcūma ngēma yaxōgüxü i Machedóniãānewa ngēxmagüxümaã nüxü chixu na ñuxäcü i pema i Acayaanewa ngēxmagüxe rü naī ya taunecügutama marü ípememarexü na ngīxü ipexägüxü i ngēma dīeru. Rū yema rümumaēxü ga yaxōgüxü ga Machedóniãānecüāx, rü yexguma nüxü naxīnüēgu na ñuxäcü taäēäcūma togücèx ngīxü na ipexägüxü i perü dīeru, rü nümagü rü ta inanaxügü na ngīxü inaxägüxü. ³ Natürü i ñuxma rü ngēma petanüwa chanamugü i ngēma taeneēgü na nüxü nadaugüxücèx, na aixcūma ýīxü i ngēma nüxü chixuxü i pechiga. Rū chanaxwèxe na aixcūma ípememarexü na ngīxü ipexäxü i ngēma dīeru, ngēma taeneēgümaã nüxü chixuxürü. ⁴ Erü ngēxguma chi ñuxre i taeneēgü i Machedóniãānecüāx rü ngürüächi chomaã petanüwa naxīxgu, rü tama chanaxwèxe na pexü na íyangauxü na tama aixcūma ípememarexü na ngīxü ipexäxü i ngēma dīeru. Rū toxü rü chi wüxi i ānexüchi nixī, erü marüchirēx namaã nüxü tixu na ñuxäcü aixcūma ípememarexü na ngīxü ipexäxü i ngēma dīeru. Rū maneca pexü rü chi ta wüxi i ānexüchi nixī. ⁵ Rū ngēmacèx nixī i chauxcèx namexü na naxcèx íchaçaxü i ngēma taeneēgü na nüxīra petanüwa naxīxücèx rü nümatama pexü yanangüxēēgüxücèx na ngīxü penutaquēxegüxücèx i ngēma dīeru ga ūpamama ngīxü pixucü. Rū ngēmaäcü aixcūma tá ímemare i ngēma dīeru i ngēxguma ngēma changuxgu. Rū togü tá nüxü nadaugü na aixcūma perü

ngúchaŭmaã yīxū na ngīxū ipexāgūxū rü tama aüäcūma na yīxū. ⁶ Rü nüxna pecuèxāchie i ngema dexa i ñaxū:

“Rü yīxema noxretama i nanetüchire itoxe, rü noxretama i norü o tayaxu.

Natürü yīxema muxū i nanetüchire itoxe, rü muxūma i norü o tayaxu”, ñaxū! ⁷ Rü wüxichigü tanaxwèxe na ngīxū itaxāxū i ngēma ngīgu tarūxīnücū na ñuxre ngīxū itaxāxchaūxū. Rü tama name i aüäcūma ngīxū itaxā rü ēxna texé tūxū muäcūma ngīxū itaxā. Erü Tupana rü nüxū nangechaū i ngēma duūxū i taēēäcūma ngīxū ixāxū. ⁸ Rü Tupanamēxēwa nangēxma na poraäcū pexna naxāāxūcèx i guxūma i mexū i pexū taxuxū, na guxūguma pexū nangēxmaxūcèx i ngēma penaxwèxexū rü naetü na pexū íyaxūxūcèx na togūxū namaã perüngūxēēgūxūcèx. ⁹ Tupanaärü ore i ümatūxūwa rü ñanagürü:

“Yima yatü ya mecü rü norü ngúchaŭmaã meã inanaxā nüxna i ngēma duūxūgü i taxuūma nüxū ngēxmaxū. Rü Tupana rü tá guxūgu nüxna nacuèxāchi na ñuxäcū namecūmaxū i nümax”,

ñanagürü. ¹⁰ Tupana nixī ya tūxna naxäcū ya nanetüchire na inatoxūcèx, rü tūxna naxäcū i õna na nangõxūcèx. Rü nüma tá nixī i pexna naxāāxū ya guxūnema ya nanetüchire ya penaxwèxene na ipenatoxūcèx. Rü nüma tá nanaxūxēē rü nanayaxēē ya yima nanetüchire. Rü tá nanamuxēē i norü o, na muxūchixū nawa peyaxuxūcèx na ngēmamaã togūxū perüngūxēēgūxūcèx.

¹¹ Rü ngēmaäcū i pema rü tá pexū nangēxma i guxūma i mexū na tauxchaäcūma nüxū perüngūxēēgūxūcèx i togū. Rü ngēxguma ngēma togū i taeneēgūxūtawa ngīxū tangegügu i ngēma dīeru i naxcèx ngīxū ipexäcū, rü nümagü rü tá poraäcū Tupanana moxē naxāgü ngixcèx. ¹² Erü ngēxguma nüxna ngīxū taxāxgu i ngēma dīeru i nüxū ngīmaã perüngūxēēgücū i ngēma taeneēgü, rü tama ñacū i nüxū taxuxūcèxicatama ta nixī, natürü naetü i nümagü i taeneēgü rü perü ämaregagu tá poraäcū Tupanana moxē naxāgü.

¹³ Rü nümagü i ngēma taeneēgü rü tá Tupanaxū nicuèxūügü, erü ngēma perü ämaremaã tá nüxū nüxū pedauxēē na aixcūma naga pexīnüēxū i Cristuarü ore i mexū. Rü nümagü rü tá Tupanana moxē naxāgü naxcèx i ngēma perü ämare i perü ngúchaŭmaã nüxna rü guxūma i yaxõgūxūna pexāgūxū. ¹⁴ Rü ngēxgumarüü i ngēma taeneēgü rü tá poraäcū pexcèx nayumūxēgü, erü pexū nangechaūgü. Rü tá Tupanana moxē naxāgü naxcèx na ñuxäcū nüma ya Tupana poraäcū pexū nangūxēēxū na yemaäcū pexū natauxchaxūcèx na nüxū perüngūxēēgūxū. ¹⁵ Rü ngēmacèx i ñuxma rü Tupanana moxē taxā, yerü tūxna nanamu ga Nane na tórü ämare yīxūcèx. Rü nataxuma i ore i nagu mexū na nüxū ixuxūcèx na ñuxäcū namaã itaēēgūxūchixū i ngēma ämare.

10

Pauruarü ore rü aixcūma nixī yerü Tupana nixī ga nüxna āgacü

¹ Rü ñuxma rü yema Cristu yaxna tamaã naxīnüxürüü rü tamaã namecūmaxürüü, rü choma rü ta pemaã yaxna chaxīnüäcūma rü pemaã chamecūmaäcūma pexū chacèxū na chauga pexīnüēxūcèx. Erü nümaxū i duūxūgü rü nüxū nixugü na pexū chamuūxū ega pexūtawa changēxmagu natürü ngēxguma pexna chayaxūgu rü tama pexū chamuū. ² Natürü ngēxguma ngēma petanūwa chaxūxgu, rü chierü natauxguma na ñacūcèx namaã chaporagaxū rü na chanaxucuxēxū i ngēma duūxūgü i petanūwa toxū ixuxū na ñoma tama yaxõgūxürüü na tamaxēxū. Erü choma rü íchamemare na namaāxūchi na chidexaxū. ³ Rü aixcūma woo duūxūgü tixīgü natürü tama ñoma i naanecüāxrxūxū togü tadai i ngexguma ítanapoxūgu i Tupanaärü ore. ⁴⁻⁵ Erü ngēma toxne i namaã ítanapoxūxū i Tupanaärü ore rü tama ñoma i naānecūāx namaã āxnexū nixī. Erü toma rü toxū nangēxma i Tupanaärü

pora na ngēmamaã itayanaxoxēēxūcèx i Chatanáãrū pora. Rū ngēmaãcü itayanaxoxēē i guxūma i chixexū i ore i Tupanaxū namaã yaxugūgūxū i duūxūgū. Rū ngēmaãcü itayanaxoxēē i guxūma i Tupanaãrū uwanūgūarū ore i nūgū namaã yacuèxūūgūãcüma duūxūgūmaã nūxū yaxugūgūxū na tama Tupanaãxū yaxōgūãxūcèx. Rū guxūma i tacū i nagu naxīnūēxū i ngēma duūxūgū i chixexū, rū Cristuna tanaxuaxū na nūma namaã inacuáxūcèx. ⁶ Rū wūxicana marū meã Cristuga pexīnūēgu, rū toma rū ítamemare na tūxū tapoxcuexū ya guxāma ya texé ya tama naga īnūēxē i Cristuarū ore. ⁷ Pema rū norū dūxétūxūnewaxicatama nixī i penangugūxū i wūxi i duūxū. Natūrū ngēxguma texé tūgū cuèxgu na Cristuarū duūxū tiīxū, rū name nixī i nūxū tacuèx na toma rū ta tūmarūū Cristuarū duūxūgū tixīgūxū. ⁸ Rū woo írarūwa chanangupetūxēē na chaugū chicuèxūūxū namaã i ngēma na Tupana toxū muxū, natūrū taxucèxma naxcèx chaxāne. Erū aixcüma Cori nixī ya toxū mucū na pexū tarūngūxēēgūxūcèx na yexeraãcü meã peyaxōgūxūcèx. Rū tama tacū rū chixexūgu pexū na tayixēēxūcèx nixī i toxū namuxū. ⁹ Rū tama chanaxwèxe i nagu perūxīnūē na pexū íchabaixgūchaūxū namaã i ngēma poperagū i pexcèx chaxūmatūxū. ¹⁰ Erū nūmaxū i duūxūgū rū nūxū nixugū na chorū poperawaxicatama pexū íchabaixgūxū, natūrū chomaxūchi pexūtawa changexmagu rū tama aixcüma nūxū chacuèx na ñuãcü mea chidexaxū na ngemaãcü chauga pexū chaxīnūexēēxūcèx, ñaxūmaã choxū nixugūe. ¹¹ Natūrū texe ya ngemaãcü idexáxe rū tanaxwèxe i nagu tarūxīnū rū ngēma pexna tayaxūgūãcüma torū poperawa pemaã nūxū tixuxūrūū tátama tixīgū i ngēxguma petanūwa tangēxmagūgu. ¹² Toma rū tama tanaxwèxe i namaã togū tawūxiguxēē rū ēxna nagu togū tangugū i ngēma duūxūgū i nūgūtama icuèxūūgūxū. Nūmagū rū nūgūtama nawomūxēēgū, erū nūgūmaã nūgū nawūxiguxēē rū nūgūgutama nūgū nangugū. ¹³ Natūrū toma rū tama togū namaã ticuèxūūgū i ngēma yaxōgūxū i tama Tupana toxmēxwa ngēxmagūxēēxū. Yerū Tupana nixī ga tomaã nūxū ixucū na ngextá nanaxwèxexū na tapuracūexū. Rū nūma nixī ga noxri Corītiuwa ga petanūwa toxū nangugūxēēxū na pemaã nūxū tixuxūcèx ga norū ore. ¹⁴ Rū yemaãcü toxira nixī ga noxri petanūwa tangugūxū na pemaã nūxū tixuxūcèx ga yema Cristuarū ore. Rū ngēmacèx i ñuxma na petanūwa taxīxū, rū tama tanangupetūxēē ga yema Tupana tomaã nūxū ixuxū, yerū nūma nixī ga toxū namuxū na pexū tarūngūxēēgūxūcèx. ¹⁵ Rū ngēmacèx tama togūarū puracūmaãmare nixī i togū ticuèxūūgūxū. Rū tama nūxū tachopetūchaū i ngēma Tupana tomaã nūxū ixuxū na pexū tangúexēēxū. Natūrū ngema pexū tanaxwaexū nixī na yexeraãcü nūxū pecuáxū i Tupanaarū ore na ngemaãcü yexera peyaxōgūxūcèx. ¹⁶ Rū ngēxguma marū petanūwa tangugūguwena rū tanaxwèxe i ngēma duūxūgū i perū yéamaxūra ngēxmagūxū i ngextá taguma texé nūxū íxuxūwa taxī na ngēmamaã rū ta nūxū tixuxūcèx i ore i mexū. Erū tama tanaxwèxe i togūarū puracūmaã togū ticuèxūūgū. ¹⁷ Erū Tupanaãrū ore i ūmatūxūwa rū ñanagūrū:

“Rū ngēxguma texé tūgū icuèxūūchaūgu, rū name nixī i tórū Corixū ticuèxūū, erū nūma nixī i tūxū nangūxēēxū”,
ñanagūrū i ngēma ore. ¹⁸ Erū ngēma yatū i aixcüma Tupanapēxewa mexū rū tama nūgūtama nicuèxūū. Natūrū ngēma yatū i tórū Cori nūxū icuèxūūxū nixī i aixcüma Tupanapēxewa mexū.

11

Pauru rū nūxū nixuchiga ga yema orearū uruūgūneta ga tama Tupana imugūxū

¹ Rū ñuxma i ngēma tá pemaã nüxũ chixuxũ, rü bexmana pexcèx rü wüxi i ngēãmare nixĩ, natürü chanaxwèxe i choxũ iperüxĩnüẽmare rü yaxna chomaã pexĩnüẽ. ² Erü Tupana pexũ inuxũürüü pexũ chinuxũ. Erü chaugagu nixĩ i Cristuaxũ peyaxõgũxũ, rü marü Cristuna pexũ chaxuaxũ na noxrüxicatama pixĩgũxũcèx. Rü ngēmacèx chanaxwèxe i ngearü chixexũãe Cristuxũ pexũ chawèx ñoma wüxi i pacü i taguma yatũxũ cuèxcürüü. ³ Natürü chaxoe-gaãe rü yema äxtape norü doramaã Ebaxũ na womüxẽxürüü, ngürüãchi tá ta texé pexũ tawomüxẽe, na nüxũ perüxoexũcèx na Cristugu perüxĩnüẽxũ rü naxcèxicatama na pemaxèxũ. ⁴ Erü pema rü tauxchaãcü nixĩ na pexũ nawomüxẽegũxũ. Rü ngëxguma ínangugügu i duũxügü i pemaã nüxũ ixuxũ i to i Ngechuchuchiga ya tama yima toma nüxũ tixuchigacü, rü pema rü nüxũ peyaxõgü i ngēma duũxügü. Rü pema rü taãeãcüma penayaxu i to i naãe i tama Tupanaãe i Üünexũ ga marü peyaxuxũ ixĩxũ. Rü peyaxõgü i to i ore i tama Tupanaãrü ore i mexũ ga noxri peyaxuxũ ixĩxũ. ⁵ Dücèx, rü woo nawe perüxĩxgu i ngēma togü i orearü uruũgüneta, natürü chauxcèx rü taxuwama choxũ narüyexeragü. ⁶ Rü woo tama choxũ nangëxmagu i tauxcha na duũxügüpèxewa chidexaxũ, natürü aixcüma meã nüxũ chacuèx i ngēma nachiga chidexaxũ. Rü ngēma rü guxüma i torü puracüwa marü pexũ nüxũ tadauxẽe i guxüguma. ⁷ ¿Pexcèx rü chixexũ pemaã chaxü ga yexguma chaugü ícharüxíragu na pexũ chataxẽxũcèx rü choxmèxmaã chapuracügu na ngetanüãcüma pemaã nüxũ chixuxũ ga Tupanaãrü ore i tüxũ maxèxẽxũ? ⁸ Rü aixcüma yema togü ga yaxõgũxũ choxna ngĩxũ ägücü ga diëru ngĩxũ chayaxu na yemamaã petanüwa chapuracüxũcèx rü pexũ charüngũxẽxũcèx. ⁹ Rü yexguma petanüwa chayexmagu rü aixcüma choxũ itaxu ga diëru, natürü taguma texéna ngĩxcèx chaca. Rü taeneegü ga Machedóniããnewa ne íxũ rü choxna ngĩxũ naxãgü ga yema choxũ tauxcü. Rü yemaãcü tama pexütawa ngĩxcèx íchaca ga yexguma. Rü ñuxma rü ta tagutáma tacücèx pexna chaca. ¹⁰ Rü Cristu ya chowa ngexmacüégagu pemaã nüxũ chixu i ngema na aixcüma ngetanüãcüma petanüwa chapuracüxũ. Rü ngema rü chorü taãxè nixĩ. Rü taxucürüwa texe i guxũ i Acáyaanewa choxna tanayaxu i ngema taãxè. ¹¹ ¿Rü tacücèx yĩxũ i ngēmaãcü chidexaxũ? ¿Éxna pexcèx rü tama pexũ changechaũxũcèx yĩxũ i ngēmaãcü chidexaxũ? Dücèx, pemaã nüxũ chixu rü Tupana nüxũ nacuèx na ñuxãcü aixcüma pexũ changechaũxũ. ¹² Natürü ngēma na ngetanüãcüma pemaã nüxũ chixuxũ i ngēma ore, rü ngēmaãcü tá chanaxüecha na taxucürüwa chixri chauchiga yadexagũxũcèx i ngēma togü i orearü uruũgüneta i nügü ixuxũ na toxrũ naxügüãxũ i Tupanaãrü puracü. ¹³ Nümagü rü aixcüma orearü uruũgüneta nixigü, rü duũxügũxũ nawomüxẽegü. Rü nümagü rü togu nügü nicuxgü, rü nügü nixugü na Cristu yamugũxũ. ¹⁴ Rü ngēma rü taxucèxma namaã pebaixãchiãegü. Erü woo i Chataná rü ta rü Tupanaãrü orearü ngeruũgü i daxũcũãx i yauracüxürüüãcü nügü nangoxèe. ¹⁵ Rü ngēmacèx woetama ngēmaãcü nixigü i ngēma duũxügü i Chatanáãxũ puracüexũ. Rü nümagü rü duũxügü i mexũ ügüxügu nügü nicuxgü. Natürü ngēma ngēmaãcü ixigũxũ, rü Tupana tá nanapoxcue naxcèx i ngēma chixexũ i naxügũxũ.

Pauru rü yema puracü ga Ngechuchu nawa namuxũwa ngüxũ ninge

¹⁶ Rü wena pemaã nüxũ chixu rü tama chanaxwèxe i nagu perüxĩnüẽ na wüxi i ããxũ chiĩxũ. Natürü ngëxguma chi ngēmaãcü chomaã nagu perüxĩnüẽgu, rü tama chanaxwèxe i choxna penachuxu na ñoma wüxi i ããxürüü chaugüétüwa chidexaxũ, na ngēmaãcü choma rü ta írarüwa chaugütama chicuèxüxũcèx. ¹⁷ Rü ñuxma na chaugüétüwa chidexaxũ rü

ngēma rü tama tórü Coriarü mu nixĩ. Natürü ñoma wüxi i ãũãẽxũ nügü icuèxüüxürüü nixĩ i chidexaxũ. ¹⁸ Rü ñuxma na nangẽxmaxũ i muxũchixũ i duũxügü i ñoma i nañewa nügü icuèxüügüxũ, rü choma rü tá ta írarüwa chaugü chicuèxüü. ¹⁹ Pema rü nagu perüxĩnüë rü nüxũ cuèxüchigüxũ pixĩgü. Natürü taãẽcũma yaxna namaã pexĩnüë i ngēma duũxügü i tama naãẽxũ icuáxũ. ²⁰ Rü yaxna namaã pexĩnüë i ngēma duũxügü i nügüxũ pexũ puracüexẽẽxũ, rü ngēma ngetanüãcũma pexũ puracüexẽẽmarexũ, rü ngēma pexũ womüxẽẽgüxũ, rü ngēma chixri pexũ yaxugüxũ, rü ngēma pemaã guxchigagüxũ. ²¹ Rü woo wüxi i ãnexũchi nixĩ na pemaã nüxũ chixuxũ, natürü chauxcèx rü tama aixcũma pexũ nüxũ tadauxẽẽ ga torü pora ga yexguma petanüwa tayexmagügu. Natürü ñuxma na tama namuũẽxũ na nügü yacuèxüügüxũ i ngēma togü i duũxügü, rü choma rü ta taxucèxma chamuũ na chaugüëtüwa chidexaxũ woo pexcèx rü taxuwama namexgu i ngēma nüxũ chixuxũ. ²² Nümagü rü nügü yaxugügu rü Yudíugü nixĩgü. Natürü choma rü ta Yudíu chixĩ. Rü nümagü nügü yaxugügu rü Iraétanüxügü nixĩgü. Natürü choma rü ta rü Iraétanüxũ chixĩ. Rü nümagü rü nügü yaxugügu rü Abráütanüxũ nixĩgü. Natürü choma rü ta Abráütanüxũ chixĩ. ²³ Nümagü rü nügü yaxugügu rü Cristuaxũ napuracü. Natürü choma rü norü yexera Cristuaxũ chapuracü. Rü ngēma ñachagürü pexũ woo pema nagu perüxĩnüëgu na ñoma wüxi i ãũãẽxürüü chidexaxũ. Rü ngēma duũxügüarü yexera poraãcü Tupanaãxũ chapuracü. Rü norü yexera chapoxcu, rü norü yexera choxũ naçuaixgü ga duũxügü. Rü muẽxpüxcüna rü ãücũmaxũchixüwa chayexma rü wixguxüchi taèx choxũ nimèxgü. ²⁴ Rü 5 èxpüxcüna nixĩ ga 39 ga çuaximaã choxũ napoxcu-güxũ ga chautanüxügü ga Yudíugü. ²⁵ Rü tomaèxpüxcüna nixĩ ga naĩmaã choxũ naçuaixgüxũ, rü wüxicana ga nutamaã choxũ inamuxũchigüxũ. Rü tomaèxpüxcüna nixĩ ga guma wapuru ga nagu chixüxũne rü chomaã inanguxũ. Rü wüxicana ga yexguma chomaã inanguxgu ga wapuru rü wüxi ga chütaxũ rü wüxi ga ngunexũ chinge na taxũ ga taxtúarü ngãxütügu mürapewaétügu chatunagüãcũma chiwèxèxũ. ²⁶ Rü poraãcü nu ne chanaxũ, rü poraãcü ãücũmaxüwa chayexma yerü natügü ga ãücũmaxügu chixügü, rü ngítèèxgüxũ rü chixexũ chomaã naxügüchaũ. Rü woo chautanüxügü ga Yudíugütanüwa, rü woo yema duũxügü ga tama Yudíugü ixíngüxütanüwa, rü woo ñanegüwa, rü woo namagüwa, rü woo taxtũ i taxüwa rü ãücũmaxüwa chayexma. Rü yema duũxügü ga chomüçügünetaxü ixíngüxütanüwa rü ta ãücũmaxüwa chayexma. ²⁷ Rü poraãcü chataarü puracüãx, rü muxũchixũ ga guxchaxügü choxũ nangupetü. Rü muẽxpüxcüna rü tama chape, rü chataiya, rü chitawa. Rü muẽxpüxcüna rü tama chachibü, rü choxũ nanadeyu, rü choxũ nataxu ga chauxchiru. ²⁸ Rü naetüwa i guxüma i ngēma, rü guxũ i ngunexügu rü chaxoegaãẽ naxcèx i guxüma i ngēma yaxõgüxũ i guxũ i ñañewa ngẽxmagüxũ. ²⁹ Rü ngẽxguma chi texé tama poragu, rü choxũ rü ta nangux. Rü ngẽxguma chi wüxie texéxũ pepadugu nguxẽẽgu, rü chauãẽwa nangux i ngēma. ³⁰ Natürü ngẽxguma chi chaugü chicuèxüüchaũgu, rü tá chaugü chicuèxüü naxcèx na duũxügü choxũ dauxũ na taxuwama chamexũ. ³¹ Rü Tupana ya tórü Cori ya Ngechuchu ya Cristunatü ya mecü na guxüguma nüxũ icuèxüügüxũ, rü nüxũ nacuèx na aixcũma yĩxũ i ngēma nüxũ chixuxũ. ³² Rü yexguma Damacuwa chayexmagu, rü guma ñañearü ãẽxgacü ga Aretaarü ngüxẽẽruũ, rü norü churaragüxũ namu na nüxna nadaugüxüçèx ga guma ñañearü poxeguxüãrü ñãxgü na choxũ yayauxgüxüçèx ga yexguma chi yema íchaxüüxgu. ³³ Natürü yema ñañearü poxeguxüãrü ñãxãcüwa rü wüxi ga pexchigu choxũ ínarüçhüxüetaũgü ga chomüçügü. Rü yemaãcü chiña naxchaxwa ga yema ãẽxgacü.

12

Tórü Cori rü Pauruxŭ nangoxetüxēē rü nüxŭ nüxŭ nacuèxēē ga tacü ga êxŭguxŭ

¹ Taxuwama name na texé tŭgŭ icuèxüüxŭ. Natürü tá pemaã nüxŭ chixuama na ñuxãcü tórü Cori choxŭ nangoxetüxēēxŭ rü ñuxãcü choxŭ nüxŭ na nacuèxēēxŭ ga tacü ga êxŭguxŭ. ² Rü 14 ga taunecü marü nangupetü ga na Tupana daxŭguxŭ ga naãnewa ga nüma ínayexmaxŭwa choxŭ nagaxŭ. Natürü tama nüxŭ chacuèx rü chauãēwaxicatama nixŭ ga yéma choxŭ nagaxŭ, rü êxna guxŭ ga chaxunemaã yŭxŭ ga yéma choxŭ nagaxŭ. Rü Tupanaxŭcatama nüxŭ nacuèx i ngēma. ³⁻⁴ Rü aixcŭma meãma nüxŭ chacuèx na daxŭguxŭ ga naãnewa choxŭ nagaxŭ ga Tupana, natürü tama nüxŭ chacuèx rü guxŭ ga chaxunemaã yéma choxŭ naga rü êxna tama. Rü Tupanaxŭcatama nixŭ ya nüxŭ cuácü i ngēma. Rü yéma nüxŭ chaxŭnŭ ga ore ga êxŭguxŭ i guxŭma i duŭxŭgŭna chuxuxŭ na nüxŭ yaxugŭxŭ. ⁵ Rü choma rü chi name na chaugŭ naxcèx chicuèxüüxŭ i ngēma, natürü tãütáma ngēmaãcü chanaxŭ. Erü ngēma ngúxŭ na chingexŭmaãxŭcatama tá nixŭ i chaugŭ chicuèxüüxŭ. ⁶ Natürü ngēxguma chi chaugŭ chicuèxüüchaŭgu, rü tãu chima wŭxi i ngēãmare nixŭ i ngēma, erü aixcŭma nixŭ i ngēma ore i nüxŭ chixuxŭ i chauchiga. Natürü tama chaugŭ chicuèxüü na taxúema nagu rŭxŭnŭxŭcèx na ngēma chowa nüxŭ naxŭnŭxŭ rü nüxŭ nadaugŭxŭãrŭ yexera chiŭxŭ. ⁷ Natürü tórü Cori rü tama nanaxwèxe i poraãcŭxŭchima chaugŭ namaã chicuèxüüxŭ ga yema êxŭguxŭ ga mexêchixŭ ga choxŭ nüxŭ nacuèxēēxŭ. Rü yemacèx chaxunewa nananguxēē ga wŭxi ga choxŭ ngúxŭ ñoma wŭxi ya tuxu chaxunewa ingaxixŭrŭü. Rü yema rü ñoma wŭxi ga Chatanáãrŭ orearŭ ngeruŭrŭü chauxŭtawa nangu na choxŭ nachixewexŭcèx na tama chaugŭ chicuèxüüxŭcèx. ⁸ Rü tomaêxpŭxcŭna tórü Corina chaca na choxŭ iyanaxoxēēãxŭcèx ga yema choxŭ ngúxŭ. ⁹ Natürü nüma ya tórü Cori rü ñanagŭrŭ choxŭ:

“Rü cuma nüxŭ cucuèx na guxŭguma cuxŭ changechaŭ, rü ngēxŭcatama nixŭ i cunaxwèxexŭ. Rü ngēma duŭxŭgŭ i tama poraexŭwa nixŭ i aixcŭma chanangoxēēxŭ i ñuxãcü na chaporaxŭ”, ñanagŭrŭ choxŭ. Rü ngēmacèx chataãē ega tama chaporagu. Erü ngēxguma tama chaporagu rü ngēxguma nixŭ i chowa inawéãxŭ i norü pora ya Cristu. ¹⁰ Rü ngēma na Cristuxŭ na changechaŭxŭgagu nixŭ i yaxna namaã chaxŭnŭxŭ ega woo chaturagu rü woo tacü chomaã yaxugŭegu i duŭxŭgŭ. Rü woo choxŭ natauxgu i chorü ngēmaxŭgŭ, rü woo duŭxŭgŭ rü chowe yangêxŭtanŭgu, rü woo guxchaxŭgŭ choxŭ ngēxmagu rü Cristucèx rü yaxna namaã chaxŭnŭ i guxŭma i ngēma. Erü ngēxguma chaturagu, rü ngēxguma nixŭ i yexeraãcü Cristu choxŭ poraxēēxŭ.

Pauru rü naxcèx naxoegaãē ga yema yaxôgŭxŭ ga Corŭtiuwa yexmagŭxŭ

¹¹ Maneca ñoma wŭxi i ãũãêxŭrŭü chidexa, erü ngēmaãcü chaugŭ chicuèxüü. Natürü pegagutama nixŭ i dŭxwa ngēmaãcü chaugŭétüwa chidexaxŭ, yerü pema chi nixŭ ga choxŭ picuèxüügŭxŭ, rü tama i chomax. Rü woo taxuwama chame i chomax, natürü taxuwama choxŭ narüyexeragŭ i ngēma orearŭ uruŭgŭneta i nawe perŭxŭxŭ. ¹² Rü yexguma petanüwa chayexmagu, rü yaxna pemaã chaxŭnŭãcüma pexŭ nüxŭ chadauxēē na aixcŭma Cristu choxŭ muxŭ na nüxŭ chixuxŭcèx ga norü ore. Rü cuèxruŭgŭmaã pexŭ nüxŭ chacuèxēē ga yema. Rü pexŭ nüxŭ chadauxēē ga taxŭ ga mexŭgŭ ga Tupanaãrŭ poramaã üxŭ. ¹³ Rü yexguma petanüwa chayexmagu rü pemaã chamecŭma yema guxŭma ga togŭ ga yaxôgŭxŭmaã na chamecŭmaxŭrŭütama. Natürü wŭxiwaxicatama nixŭ ga íchatŭxŭ yerü ga petanüwa rü tama ngŭxŭ chayaxu ga dŭeru yema togŭ ga yaxôgŭxŭtanüwa ngŭxŭ chayaxuxŭrŭü. Rü chanaxwèxe i choxŭ nüxŭ pengechaŭ i ngēma.

14 Rū ñuxma rü marü íchamemare na norü tomaēxpüxcüna pexü íchayadauxü. Rü täütáma tacüçex pexna chayaca. Erü tama perü ngēmaxügüçex petanüwa chaxü, natürü pexcèxüchi nixi i ngēma chaxüxü. Pema rü chauxacügü pixigü i Tupanaärü orewa. Rü ngēma papá rü mamáärü puracü nixi na naxácügüna naxãaxü i ngēma nüxü taxuxü. Rü tama naxácügüarü puracü nixi na nanatüna rü naēna naxãgüaxü. 15 Rü choma rü íchamemare na chorü ngúchaümaã pexcèx ichanaxãxü i guxüma i tacü i choxü ngēxmaxü rü woo chaugütama rü ta na ichaxãxü na aixcüma meã peyaxögüxüçex. Natürü chauxcèx rü ngēxguma yexeraäcü pexü changechaügu, rü pema rü yexeraäcü nüxü perüxoetanü na choxü pengechaüxü. 16 Rü nümaxü i duüxügü i petanüwa, rü woo nüxü nacüexgü na taguma tacüçex pexütawa íchaçaxü, natürü nümagü rü nüxü nixugüama na pexü chawomüxëēäcüma perü dïeru ngixü chayaxuxü. 17 ¿Éxna pema nagu perüxĩnüēgu rü yema duüxügü ga petanüwa chamugüxüwa pexü chawomüxëē? 18 Rü Titumaã nüxü chixu na petanüwa íyadauxüçex. Rü namaã yéma chanamu ga yema to ga taeneē. ¿Éxna pema nagu perüxĩnüēgu ga Titu rü pexü yéma nayawomüxëē? ¿Tama éxna aixcüma yixü na chauxrüü meã na namaxüxü rü chauxrüü mexügu naxĩnüxü ga Titux? 19 Bexmana pema tá nagu perüxĩnüē rü ngēmaäcü tidexagü, erü togüétüwatama tachogüchaü. Natürü, Pa Chaueneēgü ya Pexü Tangechaügüex, rü Tupanapëxewa rü Cristuégagu nixi i tidexagüxü na yexeraäcü meã Tupanaãxü peyaxögüxüçex rü yexeraäcü meã na pemaxëxüçex. 20 Erü chaxoegaã rü ngēxguma wena pexü íchayadèuxgu, rü ngürüächi tama choma chanaxwèxexüäcüma ípemaxë, rü ngēmacèx i pema rü täütáma chomaã petaäēgü. Rü chaxoegaã erü ngürüächi tá pexü ichayangau na pegüchi ípexaixü, rü pegüarü ngēmaxüçex pixãüxächigüxü, rü pegümaã penuëxü, rü pegüguxicatama íperüxĩnüëxü, rü pexoregütèëxgüxü, rü toguãxü pixuxü, rü pegü picuëxüügüxü, rü chixexü ípexüexü rü ngēmaäcü chixri ípemaxëxü. 21 Rü chaxoegaã rü ngēxguma wena petanüwa chaxüxgu, rü ngürüächi Tupana rü pegagu tá choxü naxãnexë. Rü ngürüächi ngechaü tá choxna pexã, erü muxéma i petanüwa rü marü ñuxgumama pecadu taxügüecha, rü tama nüxü tarüxoechaü na Tupanapëxewa chixexü taxügüxü rü naĩ i ngemaãmare na tamaxëxü rü guxüma i togü i chixexü na taxügüxü.

13

Pauru nayaxucüxë ga yema yaxögüxü ga Corĩtiucüāx rü ñuxüchi nüxü narümoxë

1 Ñuxma rü norü tomaēxpüxcüna tá nixi na petanüwa chaxüxü. Rü Tupanaärü ore rü tamaã nüxü nixu rü ngēxguma texé chixexü üxgu rü taxre rü éxna tomaēxpüx i duüxügü nüxü daugügu rü nüxü yaxugügu na aixcüma yixü, rü aixcüma tá poxcu tümamaã taxuegu ya yixema chixexü üxe. 2 Rü ngēmacèx i pema i üpamamatama pecadu ügüechaxe rü guxãma i pema ya chixri maxëxë, rü ñuxma na woo pexna chayaxügüxü rü wenaaxärü pexna nüxü chacuëxächixë rü ngēxguma tá ngēma chaxüxgu rü aixcüma tá chanamexë i guxüma i ngēma chixexü i petanüwa ngēxmaxü, rü täütáma chanangupetüxëēmare i ngēma. 3 Rü pema na naxcèx iperüdaunüxü na Cristu chowa idexaxü, rü ngēxguma ngēma chaxüxgu, rü ngēxguma tá nixi i nüxü pedauxü na aixcüma chowa na yadexaxü ya Cristu. Rü nüma ya Cristu rü chowa tá pexü nüxü nadauxë na tama naturaxü natürü aixcüma yanguxëëaxü i norü ore rü tüxü napoxcuexü ya yixema chixexü ügüxe. 4 Rü aixcüma nixi ga Cristu ga ñoma wüxi ga duüxü i turaxürüü nügü yaxixëëxü ga yexguma curuchawa yapotagu. Natürü i ñuxma rü

Tupanaārū poragagu namaxū. Rū ngēxgumarū i toma na norū duūxūgū tixīgūxū, rū taturae i toxonewa. Natūrū ngēma na norū duūxūgū tixīgūxū, rū Tupanaārū poragagu tá tamaxē na pexū tarūngūxēēgūxūcèx. ⁵ Rū name nixī i pegūtama pengugū na nūxū pecuáxūcèx ngoxi aixcūma meā peyaxōgū. Rū name nixī i pegū pengugūarū maxūāx rū ngoxi Tupanapēxewa pime. ¿Tama ēxna nūxna pecuēxāchie na Ngechuchu ya Cristu rū pewa nangēxmaxū ega aixcūma peyaxōgūgu? ⁶ Rū chierūna nūxū pecuēxgu na toma rū tama orearū uruūgūnetamare na tixīgūxū. ⁷ Rū Tupanana naxcèx taca na taxuūma i chixexū na pexūgūxūcèx. Rū tama duūxūgūpēxewa togū ítarūtagūxūcèx nixī na ngēmaācū tayumūxēgūxū. Natūrū Tupanana naxcèx taca i ngēma na aixcūma meā naxcèx pemaxēxūcèx woo duūxūgū nagu rūxīnūēgu na toma rū ítatüemarexū. ⁸ Toma rū taxucūrūwama chixri nachiga tidexagū i Tupanaārū ore i aixcūma ixīxū, erū toma rū naētūwa tachogū i ngēma ore. ⁹ Rū tá tataāēgū ega aixcūma peporaegu i perū maxūwa rū ngēmacèx natauxgu i tacūcèx pemaā na taporagaexū. Rū Tupanana tá naxcèx tacaama na pexū naporaexēēxūcèx i perū maxūwa na dūxwa aixcūma mexū i norū duūxūgū na pixīgūxūcèx. ¹⁰ Rū naxūpa na pexū na íchayadauxū nixī i pexcèx chanaxūmatūxū i ñaā popera, na ngēxguma ngema changuxgu rū nataxuxūcèx i tacūcèx pemaā na chaporagaxū. Erū tórū Cori choxū namu na pexū charūngūxēēxūcèx na yexeraācū meā peyaxōgūxūcèx, rū tama chixexū pemaā na chaxūxūcèx nixī i choxū namuxū. ¹¹ Rū ñuxma na ichayacuēxēēxū i ñaā popera, Pa Chaueneēgūx, rū chanaxwèxe i meā pexū naxūpetū rū naxcèx pedau na ñuxācū aixcūma meā Tupanacèx pemaxēxū. Rū name nixī i pegū petaāēxēēgū rū wūxigu perūxīnūē rū meā yaxna pegūmaā pexīnūē rū aixcūma pegū pengechaūgū. Rū nūma ya Tupana ya tūxū ngechaūcū rū tūxū rūngūxmūēēcū, rū guxūgutáma pemaā inarūxāūx. ¹² Rū chanaxwèxe i wūxichigū i pema rū pegū pengechaūgūācūma pegū perūmoxēgū. ¹³ Rū guxūma i togū i taeneēgū i yaxōgūxū rū pexū narūmoxēgū. ¹⁴ Rū ñuxma rū chanaxwèxe i tórū Cori ya Ngechuchu ya Cristu pexū narūngūxēē, rū Tanatū ya Tupana rū pexū nangechaū, rū Naāē i Üünexū rū guxūguma pemaā inarūxāūx.

Rū nuāma pexna,
Pauru

POPERA GA GÁRATAANEWA YEXMAGÜXÜ GA YAXŌGÜXÜTANÜWA NAMUXÜ GA PAURU

Pauru rü nüxü narümoxē ga yema yaxōgüxü ga Gárataaneärü ĩānegüwa yexmagüxü

¹⁻² Pa Toeneēgü i Yaxōgüxü i Gárataaneärü ĩānegüwa Ngēxmagüxü, choma i Pauru rü namaā i guxüma i taeneēgü i nuā chauxütawa ngēxmagüxü nixi i pexcèx tanaxümatüxü i ñāā popera. Rü choxü nixi ga namugüxü ga Ngechuchu ya Cristu rü Tanatü ya Tupana. Rü aixcüma tama duüxügü nixi ga choxü unetagüxü na chanaxüxcèx i ñāā Tupanaärü puracü. Natürü Tanatü ya Tupana ga Ngechuchuxü írüdaxēcü rü nūmatam ya Ngechuchu ya Cristu nixi ga choxü naxunetagüxü. ³ Rü chanaxwèxe i Tanatü ya Tupana rü tórü Cori ya Ngechuchu ya Cristu poraäcü pexü narüngüxēē rü pexü nataāxēē. ⁴ Rü nüma ga tórü Cori ya Ngechuchu rü nügü inaxā na tórü pecaducèx nayüxcèx na nüxna tüxü ĩnguxüxēēxcèx i guxüma i ñoma i naāneärü chixexü. Rü yemaäcü nanaxü, yerü yema nixi ga Tanatü ya Tupanaärü ngüchaü. ⁵ ¡Namexēchi ya Tupana i guxüguma! Rü ngēmaäcü yī.

Nataxuma i to i ore i tüxü maxēxēxü

⁶ Rü yema na Cristuaxü pengechaütümügüxcèx nixi ga pexna naxuxü ya Tupana na penayaxüxcèx i maxü i taguma gúxü. Rü ñuxma rü poraäcü chaixāchiāē, erü paxaxüchi ipenaxügü na Tupanana pixīgachixü, na nawe perüxcèx i to i ngüxēētae i nagu perüxcèx rü pexü maxēxēxü. ⁷ Natürü tama aixcüma nangēxma i to i ngüxēētae i nawa nayaxuxü i maxü i taguma gúxü. Natürü nangēxma i ñuxre i duüxügü i pexü naguxchaxēēchaüxü, rü nanaxüchicüügüchaü i ngēma ngüxēētae i mexü ga pemaā nüxü chixuxü ga Cristuchiga. ⁸ Rü toma rü marü pexna tanaxā ga yema ngüxēētae i aixcüma ixixü i Ngechuchuchiga. Rü ngēxguma chi texé pexü ngüxēēgü i to i ngüxēētae, rü name nixi i noxtacüma Tupana tüxü napoxcu. Rü woo choma chixīgu, rü ēxna tacü rü Tupanaärü orearü ngeruü i daxücüax yixīgu i pexü ngüxēēxü i to i ngüxēētae, rü name nixi i noxtacüma Tupana tüxü napoxcu. ⁹ Rü ñuxma rü wena pemaā nüxü chixu ga yema noxri pemaā nüxü chixuxü. Rü ngēxguma chi texé pexü ngüxēēgü i wüxi i to i ngüxēētae i tama yema noxri peyaxuxürü ixixü, rü name nixi i noxtacüma Tupana tüxü napoxcu. ¹⁰ Rü tama chomaā na petaāgüxcèx nixi i ngēma ñachaxü. Erü tama naxcèx chadau na duüxügü chomaā taāgüxü, natürü Tupana chomaā taāxüxcèx nixi i chadauxü. Erü ngēxguma chi duüxügüxcicatama chataāxēēchaügu, rü tãu chima Cristuarü puracütanüxü chixi.

Ñuxäcü Pauruxü nayaxu ga Tupana na norü puracüwa namüxüxcèx

¹¹ Natürü, Pa Chaueneēgüx, chanaxwèxe i nüxü pecuèx na ñāā ore i mexü i nüxü chixuxü, rü tama duüxügüāēwa yīxü na ne naxüxü. ¹² Yerü tama wüxi ga duüxütawa naxcèx changux. Natürü Ngechuchu ya Cristutama nixi ga choxü nüxü cuèxēcü. ¹³ Pema rü marü nüxü pexīnūchiga na ñuxäcü chamaxüxü ga ũpa ga yexguma Yudügücmagu chixüxgu. Rü nüxü pexīnūchiga na ñuxäcü poraäcü nawe chingēchigüxü ga guxüma ga Tupanaärü duüxügü ga yaxōgüxü rü ñuxäcü chixri namaā na chaxüpetüxü na yemaäcü nüxü nüxü charüxoxēēxcèx ga yema na Ngechuchuxü yaxōgüxü. ¹⁴ Rü muxüma ga chautanüxügü ga Yudügü ga chorü nayaāxgüraüxüärü yexera nagu chixü ga yema Yudügücmagu. Yerü

norü yexera meãma chayanguxêê ga nacümagü ga nuxcümaügxü ga chorü oxigü nagu íxü. ¹⁵⁻¹⁶ Natürü yexguma tautama chabuxgu, rü woetama Tupana choxü naxuneta na choxü namuxücèx na chanaxüxücèx i norü puracü. Rü nüma rü chauxcèx naca na noxrü chixixücèx yerü poraãcü choxü nangechaü. Rü yexguma Tupana naxwèxegu, rü choxü nüxü nacuèxêê ga Nane ya Cristu. Rü yemaãcü nanaxü na ngêma duüxügü i tama Yudíugü ixígxümaã nüxü chixuxücèx na ñuxãcü Ngechuchugagu tüxü nangëxmaxü i maxü i taguma gúxü. Rü yexguma yemaãcü Tupana choxü nüxü cuèxêêgu ga Nane, rü taxúenama chayaca. ¹⁷ Rü bai ga Yerucharéüwa na chaxüxü na nüxna chayaçaxücèx ga yema togü ga ngúexügü ga nüxíra Tupana imugüxü. Natürü ga choma rü yexgumatama Arábíaanewa chaxü. Rü yemawena, rü Damacuarü ñanecèx chataegu. ¹⁸ Rü tomaëxpüx ga taunecüguwena rü düxwa Yerucharéüwa chaxü na Pedruxü chacuáxücèx. Rü ¹⁵ ga ngunexütama naxütawa chayexma. ¹⁹ Rü yéma nüxü chadau ta ga Chaütiágu ga tórü Cori naëneë. Natürü taxuüma ga togü ga ngúexügü ga tórü Cori imugüxüxü chadau. ²⁰ Rü Tupana choxü nadau na aixcüma yíxü i ngêma ore i ñuxma pexcèx chaxümatüxü. ²¹ Rü yemawena, rü Chíríiaanewa rü Chiríchíiaanewa chaxü. ²² Natürü yema taeneëgü ga Cristuaxü yaxögüxü ga Yudéaanewa yexmagüxü, rü taguma choxüxüchi nadaugü. ²³ Rü yema nüxü naxínüëxü ga chauchiga rü ñaãxícatama nixí:

“Rü ngêma Pauru ga üpa tawe ingèchigüxü, rü ñuxma rü duüxügümaã nüxü nixu i Tupanaãrü ore i mexü, rü namaã nayaxucuxê na Cristuaxü yaxögüãxücèx. Rü ngêmaãcü nanaxü i ñuxma rü woo ga noxri rü inayanax-oxêëchaü ga yema ore”, ñaxü. Rü yexícatama nixí ga chauchiga ga nüxü naxínüëxü. ²⁴ Rü yexguma ga yema duüxügü rü Tupanaxü nicuëxüügü nagagu ga yema Tupana chomaã üxü.

2

Yema togü ga ngúexügü ga Tupana imugüxü rü meã Pauruxü nayauxgü

¹ Rü ¹⁴ ga taunecüwena rü wenaxãrü Yerucharéüwa chaxü namaã ga Bernabé. Rü Titu rü ta íchayaga. ² Rü yéma chaxü yerü Tupana choxü nüxü nacuèxêê ga na nanaxwèxexü na yéma chaxüxü. Rü yéma Yerucharéüwa, rü yema yaxögüxüãrü ãëxgacügümaãxícatama changutaquëxe. Rü meãma namaã nüxü chixu ga nachiga ga yema Tupanaãrü ore i mexü ga nüxna chaxãxü ga yema duüxügü i tama Yudíugü ixígxü. Rü yemaãcü meãma namaã nüxü chixu na ñuxãcü na yíxü ga chorü nguxêëtae, yerü tama chanaxwèxe na yixcüra rü choxü nüxü naxoexü rü ngêmaãcü natücèxmamare na yíxü i ngêma puracü i chaxüxü. ³ Rü yema yaxögüxü, rü nümagü rü ta norü me nixí ga yema chorü nguxêëtae. Rü yemacèx rü woo tama Yudíu na yíxü ga Titu rü taguma na ínawiechèxmüpèxechiraüxü, natürü yema ãëxgacügü rü tama nanamu na ínawiechèxmüpèxechiraüxücèx. ⁴ Natürü aixcüma nixí ga ñuxre ga taeneëgünetá ixígxü ga bexmamare tatanügu nachocuxü. Rü yemagü nixí ga naxwèxegüxü na inawiüchèxmüpèxechiraüxü i ngêma yaxögüxü i tama Yudíugü ixígxü. Rü ñuxma na Ngechuchu ya Cristuarü duüxügü ixígxü, rü yema taeneëgünetá rü bexma tatanügu nachocu na tüxü nangügüxücèx na ñuxãcü Cristu nüxna tüxü ínguxüxêëxü ga yema mugü ga Moíché ümatüxü. Yerü nümagü nanaxwèxegü na wenaxãrü nagu ixíxü ga yema mugü ga guxchaxü ga Moíché ümatüxü. ⁵ Natürü bai ga Írarüwa naga na taxínüëxü ga yema duüxügü. Yerü tama tanaxwèxegü na texé pexü naxüchicüxü i ngêma ore i mexü i aixcüma ixíxü i tamaã nüxü ixuxü i ñuxãcü tüxü na nangëxmaxü i maxü i taguma gúxü ega Cristuaxü yaxögügu.

6 Natürü yexguma yema yaxōgūxūārū āēxgacūgū ga Yerucharēūwa yexmagūxū nūxū ĩnūēgu ga ñuxācū na yīxū ga chorū nguxēētae, rü namaā nataāēgū rü taxuūma ga tacū ga togū ga mugū choxna naxāgū na namaā changúexēētaexūcēx. Natürü tama yema na āēxgacūgū yixīgūxūgu charūxīnū, erū nūxū chacuēx na Tupanapēxewa rü guxāma na wūxiguxū. 7 Natürü nūmagū ga yema āēxgacūgū, rü nūxū nicuēxāchigū na choxū yīxū ga namuxū ga Tupana na yema duūxūgū ga tama Yudíugū ixīgūxūmaā nūxū chixuxūcēx ga norū ore i mexū, yexgumarū ga Pedruxū na namuxūrū ga Tupana na Yudíugūmaā nūxū yaxuxūcēx ga yema ore. 8 Rū gumatama Tupana ga Pedruxū mucū na Yudíugūmaā nūxū na yaxuxū ga ore i mexū, rü gumatama Tupana nixī ga choxū mucū na yema duūxūgū ga tama Yudíugū ixīgūxūmaā nūxū chixuxūcēx ga yema ore. 9 Rū yemacēx ga Chaūtiágu rü Pedru rü Cuáú ga yaxōgūxūārū āēxgacūgū, rü nūxū nicuēxāchigū na choxū naxunetaxū ga Tupana na chanaxūxūcēx i ngēma puracū. Rū yemacēx ga yema āēxgacūgū, rü tomēx niyauxāchigū ga choma rü Bernabé na toxū nūxū nadauxēēgūxūcēx na aixcūma namūcūgū tixīgūxū i ngēma puracūwa. Rū nūmagū rü ta norū me nixī na ngēma duūxūgū i tama Yudíugū ixīgūxūtanūwa na tanaxūxū i Tupanaārū puracū rü nūmagū i Yudíugūtanūwa. 10 Rū toxna naxcēx naca na nūxū tarūngūxēēgūxūcēx ga yema yaxōgūxū ga ngearū dīeruāxgūxū. Rū yexicatama nixī ga toxna nūxū nacuēxāchixēēxū. Rū choma rü ta ngēmatama nixī i guxūguma woetama meāma chaxūxū.

Pauru rü Aūtioquíawa Pedruxū naxucūxē

11 Natürü yixcūra ga yexguma Aūtioquíawa naxūxgu ga Pedru, rü noxtacūma nūxū nūxū chaxīnūxēē, yerū tama aixcūma name ga yema naxūxū namaā ga yema yaxōgūxū ga tama Yudíugū ixīgūxū. 12 Yerū noxri rü yema duūxūgū ga tama Yudíugū ixīgūxūmaā nachibū ga Pedru. Natürü yexguma yēma nangugūgu ga ñuxre ga Yudíugū ga yaxōgūxū ga Chaūtiágu yēma mugūxū, rü Pedru rü marū tama yema duūxūgū ga tama Yudíugū ga yēma ngugūxū ga nagu ĩxū ga yema nacūma na Tupanacēx ĩnawiechēmūpēxechiraūgūxū. 13 Rū yema togū ga Yudíugū ga yaxōgūxū, rü yexguma nūxū nadaugūgu ga yema Pedru ūxū, rü nūmagū rü ta nanaxūgū ga yema chixexū rü naxcēx nawoeguchaū ga yema nuxcūmaūgūxū ga nacūmagū. Rū dūxwa ga Bernabé rü ta natanūgu naxā ga yema chixexū ūgūxū. 14 Natürü yexguma nūxū chadēuxgu na tama Tupanaārū ore i mexū tūxū nguxēēxūācūma na namaxēxū ga yema yatūgū, rü guxū ga yaxōgūxūpēxewa Pedruxū nūxū chaxīnūxēē. Rū ñacharūgū nūxū:

“Rū dūcax i cuma na Yudíuchirēx quiīxū, cuma rü tama aixcūma Yudíugūcūmagu quixū. ¿Rū ñuxācū i ñuxma i cunamuxū na Yudíugūcūmagu naxīxū i ngēma duūxūgū i tama Yudíugū ixīgūxū?” ñacharūgū nūxū.

Yudíugū rü woo ngēma duūxūgū i tama Yudíugū ixīgūxū rü norū ōgagu nixī i nayauxgūāxū i maxū i taguma gūxū

15 Rū pemaā nūxū chixu rü toma rü aixcūma torū bucūmatama Yudíugū tixīgū rü Tupanaxū tacuēxgū. Rū ngēmaācū tama duūxūgū i tama Tupanaxū cuēxgūxū tixīgū. 16 Rū nūxū tacuēxgū rü yema nuxcūmaūgūxū ga mugū ga Moīché ūmatūxū rü tama tūxū nimexēē i Tupanapēxewa, erū taxucūrūwama texé aixcūma naga taxīnūē i ngēma mugū. Natürü i ñuxma rü Tupana tūxū nadau na imexū ega Ngechuchu ya Cristuaxū yaxōgūgu. Rū yemacēx ga toma rü ta Ngechuchu ya Cristuaxū tayaxōgū na torū ōgagu Tupana toxū nadauxū na timexū. Erū nūxū tacuēxgū rü tama ngēma mugūgagu nixī na Tupanapēxewa tamexū ya wūxie, erū taxucūrūwama texé aixcūma

naga taxĩnũ i ngẽma mugũ na ngẽmaãcũ Tupanapẽxewa tamexũcèx. ¹⁷ Rũ ñuxma i yixema rũ Cristuaxũ tayaxõgũ, rũ ngẽmacèx nixĩ i Tupanapẽxewa imexũ. Natürũ ngẽxguma chi wũxi i ngunexũgu rũ yixema nagu rüxĩnũẽgu rũ mugũgu na ixĩxũgagu yixĩgu na Tupanapẽxewa imexũ, rũ maneca tá nagu tarũxĩnũẽ na Cristu tũxũ pecaduãxẽxũ. Natürũ dücax, rũ tama ngẽmaãcũ nixĩ erũ Cristu rũ tagutáma texéxũ napecaduãxẽẽ. ¹⁸ Choma rũ marũ nüxũ charũxo na nagu charũxĩnũxũ na mugũgu chixũxũgagu Tupanapẽxewa chamexũ. Natürũ ngẽxguma chi wenaxãrũ naxcèx chataegugu i ngẽma nuxcũmaũgũxũ i mugũ rũ chi nüxũ charũxoxgu na Cristuaxũ chayaxõxũ, rũ chi aixcũma wũxi i pecaduãxũ chixĩ. ¹⁹ Yerũ yexguma yema mugũwa changuxgu, rũ düxwa nüxũ chicuèxãchi na tama yanguxũ ga yema mugũ na choxũ namexẽxũ Tupanapẽxewa. Yerũ taxucürũwama aixcũma naga chaxĩnũ ga guxũma ga yema mugũ. Rũ ngẽmacèx i ñuxma rũ Cristuaxũ chayaxõ na Tupanapẽxewa chamexũcèx rũ naxcèxicatama chamaxũxũcèx. Rũ Cristu rũ curuchagu nayu na iyanaxoxũcèx ga nuxcũmaũxũ ga chorũ maxũ ga choxũ yexmaxũ ga yexguma yema mugũgu chixũxgu. ²⁰ Rũ ñuxma rũ marũ tama chaugũmaãtama ichacuèx, natürũ Cristu nixĩ ya chomaã icuácũ erũ chowa namaxũ. Rũ ñuxma rũ Tupana Nane ya Cristuaxũ chayaxõcũma nixĩ i chamaxũxũ i ñoma i nañewa. Rũ nüma nixĩ ga choxũ nangechaũxũ, rũ nügũ inaxãxũ na chauxcèx nayuxũcèx. ²¹ Rũ tama nüxũ chaxoxchaũ i ngẽma mexũ ga Tupana taxcèx üxũ ga yexguma nayuxgu ga Cristu. Yerũ yexguma chi yema mugũgu ixĩxũgagu Tupanapẽxewa imexgu, rũ natücèxmamare chi nixĩ ga na nayuxũ ga Cristu.

3

Ñuxma rũ tama ngẽma mugũgu taxĩ erũ marũ Cristuaxũ tayaxõgũ

¹ Pa Chaueneẽgũ i GárataanecũĀx, pema rũ pengẽãẽgũmare. Rũ yexguma petanũwa tayexmagũgu rũ meãma guxãpẽxewa pemaã nüxũ tixu rũ pexcèx tanangoxẽẽ na ñuxãcũ curuchagu taxcèx nayuxũ ga Ngechuchu ya Cristu. ¿Rũ texé pexũ tawomüxẽẽ i ñuxma na tama naga pexĩnũẽxũcèx i ngẽma ore i aixcũma ixĩxũ ga pemaã nüxũ tixuxũ? ² Rũ wũxi i orecèx pexna chaca, rũ ¿ñuxãcũ yĩxũ ga penayaxuxũ ga Tupanaãẽ i Üünexũ? ¿Éxna pexcèx rũ yema mugũ na pinguxẽẽgũxũgagu yĩxũ ga penayaxuxũ, rũ éxna ngẽma ore i mexũ ga nüxũ pexĩnũẽxũ rũ pixõgũxũgagu yĩxũ? ³ Pema rũ pengẽãẽgũmare rũ poraãcũ ípetüe. Noxri rũ Cristuaxũ peyaxõgũ yerũ Tupanaãẽ i Üünexũ pewa napuracũ. ¿Rũ ñuxãcũ i ñuxma i nagu perũxĩnũẽxũ na wenaxarũ naxcèx pewoeguxũ i ngema nuxcũmaxũxũ i mugũ i taguma maxũ pexna ãxũ? ⁴ Pema rũ poraãcũ Tupana pexũ narüngũxẽẽ. Rũ chierũ tama natücèxmamare yixĩgu ga yema, erũ taxucürũwa natücèxmamare nixĩ. ⁵ Rũ yexguma Tupana pexna namuxgu ga Naãẽ i Üünexũ rũ petanũwa naxũãgu ga taxũ ga mexũgũ ga norũ poramaã naxũxũ, rũ ¿tacũgagu nixĩ ga naxũãxũ ga yema? ¿Pexcèx rũ mugũ na pinguxẽẽxũgagu yĩxũ ga Tupana naxũxũ ga yema? Tama yemagagu nixĩ. Tupana rũ petanũwa nanaxũ ga yema taxũ ga mexũgũ yerũ nüxũ peyaxogũ ga norũ ore ga nüxũ pexĩnũẽxũ. ⁶ Rũ dücax, pemaã nüxũ chixu rũ name nixĩ i nuxcũmaũcũ ga torũ oxĩ ga Abráũrũũ pixĩgũ. Yerũ Abráũ rũ Tupanaãxũ nayaxõ, rũ yemacèx Tupana nüxũ nadau ga na namexũ. ⁷ Rũ ngẽmawa nüxũ pedau rũ ngẽma duũxũgũ i Tupanaãxũ yaxõgũxũ nixĩ i aixcũma Abráũtanũxũ ixĩgũxũ i Tupanapẽxewa. ⁸ Rũ Tupanaãrũ ore i ümatũxũwa rũ nüxũ nixu na ñuxãcũ Tupanapẽxewa tá na yamexũ i ngẽma duũxũgũ i yaxõgũxũ i woo tama

Yudíugü ixíngüxü. Rū yemaācū nūxü nixu naxüpa ga na nangupetüxü. Yerü Tupana rū nuxcūmamata Abráūmaā nūxü nixu ga ñaā ore i mexü i ñaxü: “Rū cugagu tá nūxü charüngüxēē i guxūma i nachiūñanecūāx i duūxügü”, ñaxü. Rū yemaācū nūxü tacuèx rū Cristu rū Abráūtaā na yīixü. ⁹ Rū ngēmacèx i ñuxma rū Tupana nanayaxu i guxūma i duūxügü i yaxōgüxü, yexgumarüü ga Abráū ga yaxōcūxü na nayaxuxürü. ¹⁰ Natürü chixexüwa nangēxmagü i guxūma i ngēma duūxügü i nagu rüxīnūēxü na mugü yanguxēēgüxügagu Tupanapēxewa yamexü. Erü Tupanaārü ore i ümatüxüwa rū ñanagürü: “Rū guxūma i duūxügü i tama aixcūma yanguxēēgüxü i guxūma i ngēma mugü i ümatüxü, rū chixexüwa nangēxmagü”, ñanagürü. Erü nūxü tacuèxgü na taxucürüwama aixcūma texé yanguxēēxü i guxūma i ngēma mugü. ¹¹ Rū ngēmaācū meāma nangox na tama ngēma mugü tinguxēēxüçèx yīixü na texé Tupanapēxewa mexü. Erü Tupanaārü ore i ümatüxüwa rū ñanagürü: “Rū yíxema tümaārü ōgagu Tupanapēxewa mexē, rū yíxema tá tixī ya aixcūma tüxü nangēxmaxē i maxü i taguma gúxü”, ñanagürü. ¹² Natürü ngēxguma nagu rüxīnūēgu na mugü inguxēēxüçèx yīixü na Tupanapēxewa imexü, rū taxucèx chima tüxcüü tayaxōgü. Erü Tupanaārü orewa rū ngēmachiga naxümatü, rū ñanagürü: “Rū yíxema aixcūma meāma yanguxēēxē i guxūma i mugü, rū ngēmagagu tá tüxü nangēxma i tümaārü maxü”, ñanagürü. Natürü ngēma mugü rū düxwa chixexüwa tüxü naga erü taxucürüwama texé aixcūma meā tayanguxēē. ¹³ Natürü ga Cristu rū nawa tüxü ínanguxüxēē ga yema mugü ga chixexüwa tüxü yexmagüxēēxü. Rū taxcèx nixī ga chixexüwa nayexmaxü ga yexguma curuchagu nayuxgu. Erü Tupanaārü ore i ümatüxüwa, rū ñanagürü: “Rū guxāma ya yíxema wüxi i naíwa tüxü natuxēēgüācūma yúxe, rū chixexüwa tangēxma”, ñanagürü. ¹⁴ Rū yemaācū curuchagu nayu ga Ngechuchu ya Cristu na nūxü nangüxēēxüçèx i guxūma i ngēma duūxügü i tama Yudíugü ixíngüxü, yema Tupana Abráūmaā ixunetaxürü. Rū taxcèx rū ta nayu ga Cristu na yíxema rū ta nūxü yaxōgüxüçèx rū nayauxgüxüçèx i Tupanaāē i Üünexü i tamaā inaxunetaxü.

Tupanaārü uneta rū ngēma mugüarü yexera name

¹⁵ Pa Chaueneēgüx, ñuxma rū tá pemaā nūxü chixu i wüxi i cuèxruü na ñuxācū duūxügü tacü nügümaā mexēēxü. Rū dücax, ngēxguma chi wüxi ya yatü rū texémaā tacüçèx inaxunetagu rū chi wüxi i poperagu meā naxümatüāgu i ngēma, rū taxucürüwa texé itayanaxoxēē rū ēxna tanaxüchicüü i ngēma norü uneta. ¹⁶ Rū dücax, rū yexgumarüütama nixī ga nangupetüxü ga yexguma Tupana rū Abráūmaā rū Abráūtaamaā inaxunetagu. Rū Tupanaārü ore i ümatüxüwa rū tama “Abráūtaagü” ñanagürü, yerü tama muxūma ga duūxügüchiga nidexa. Natürü yema ore rū “Abráūtaā” ñanagürümare, yerü wüxitama ga duūxüchiga nixī ga yadexaxü. Rū yema rū Cristuchiga nixī. ¹⁷ Rū ngēmaācū pemaā chanangoxēē na Tupana rū Abráūmaā namexēēāxü rū namaā inaxunetaxü na Cristugagu tá yīixü i duūxügüxü nangüxēēxü. Rū ngēmacèx i ñuxma rū yema Moíché ümatüxü ga mugü ga 430 ga taunecü yema unetawena ínguxü, rū taxucürüwama inayanaxoxēē ga yema Tupanaārü uneta ga nūxīra Abráūmaā nūxü yaxuxü. Rū ngēmacèx i ñuxma rū ta napora i ngēma uneta. ¹⁸ Rū ngēxguma chi mugü inguxēēgüxügagu yixīgu na Tupana tüxü rüngüxēēxü, rū natüçèxmamare chi nixī ga yema Tupanaārü uneta ga nūxīra Abráūmaā nūxü yaxuxü.

Natürü aixcūma nixī na ngetanüācūma Abráũxũ nangũxēẽxũ ga Tupana, yerü yemaācū marü namaã inaxuneta. ¹⁹ Rũ ñuxma rü ¿tacüwa namexũ ga yema mugü ga Moĩché ümatũxũ? Rũ dücax, Tupana rü marü Abráũmaã inaxunetaguwena nixī ga duũxũgũna naxããxũ ga yema mugü, na yemaācū duũxũgũxũ nüxũ nadauxēẽxũcèx na ñuxācū poraācū pecadu naxüexũ. Rũ yemaācū nixī ñuxmata ínangu ga guma Abráũtaa ya Cristu. Rũ gumachiga nixī ga Abráũmaã inaxunetaxũ ga Tupana ga noxrix. Rũ yexguma ínanguxgu ga yema mugü, rü Tupana rü daxũcũãx ga norü orearü ngeruũgũmaãxĩra nüxũ nixu. Rũ yemagü nixī ga nüxĩ Moĩchémaã nüxũ ixugũxũ, rü nüma ga Moĩché rü duũxũgũmaã nüxũ nixu. ²⁰ Natürü yexguma Tupana Abráũmaã ixunetagu, rü nümaxũchima ga Tupana nixī ga Abráũmaã nüxũ yaxuxũ ga yema norü uneta. Rũ tama togũmaãxĩra nüxũ nixu na yemagü nüxĩ Abráũmaã nüxũ ixugüexũcèx.

Tacücèx duũxũgũna nanaxã ga Tupana ga yema mugü

²¹ ¿Rũ ñuxũ ñapexũxũ i ñuxmax? ¿Pexcèx éxna rü yema Moĩché ümatũxũ ga mugü rü inayanaxoxēẽ i Tupanaärü unetagu? Rũ dücax, tama ngēmaācū nixī. Yerü yexguma chi naporagu ga yema mugü na tüxna naxããxũ i maxũ i taguma gúxũ, rü chi Tupanapèxewa time i ngèxguma meãma yanguxēẽgu. ²² Natürü tama ngēmaācū nixī. Erü Tupanaärü ore i ümatũxũwa nüxũ tadau na guxũma i duũxũgü rü pecadutüũwa nangèxmagũxũ. Rũ ngēmacèx i ñuxma rü yixema Ngechuchu ya Cristuaxũ yaxõgũxexicatama tixĩ ya nayauxgũxe i ngēma maxũ i aixcūma mexũ i Tupana tamaã ixunetaxũ. ²³ Rũ yexguma tauta ínanguxgu ga Cristu na nüxũ yaxõgũxũcèx, rü mugütüũwa tayexmagü rü tamaã inacuèx. Rũ yemaācū tixĩgü rü ñuxmata Tupana taxcèx nangoxēẽ ga Ngechuchu ya Cristu na nüxũ yaxõgũxũcèx. ²⁴ Rũ yemaācū ga yema mugü rü tamaã inacuèx ñuxmata Cristuxũtawa tüxũ nagagü na nüxũ yaxõgũxũcèx rü ngēmaācū Tupanapèxewa imexũcèx. ²⁵ Natürü i ñuxma na marü nüma nanguxũ ya Cristu na nüxũ yaxõgũxũcèx, rü marü tama ngēma mugütüũwa tangèxmagü. Rũ ñuxma rü marü taxucèxma tüxcüũ tamaã inacuèx i ngēma mugü. ²⁶ Rũ ñuxma na Ngechuchu ya Cristuaxũ peyaxõgũxũ, rü Tupanaxācügü pixĩgü i guxāma i pemax. ²⁷ Rũ ñuxma na Cristuégagu ípebaiũxũ, rü Cristuarü pixĩgü rü nüma rü pemaã inacuèx na naxrüũ pixĩgũxũcèx. ²⁸ Rũ ñuxma rü Tupanapèxewa rü nüetama nixī ega woo Yudíugü pixĩgügu rü éxna tama. Rũ nüetama ega woo wüxi i coriarü duũxũgü pixĩgügu rü éxna taxúxearü duũxũgü pixĩgügu. Rũ nüetama ega woo piyatügu rü éxna pingexgu. Erü ñuxma na Ngechuchu ya Cristuarü duũxũgü na pixĩgũxũ, rü wüxitama i duũxũ pixĩgü i guxāma i pemax. ²⁹ Rũ ñuxma na Cristuarü pixĩgũxũ, rü ngēmacèx waxi nixī na aixcūma Abráũtaagü pixĩgũxũ. Rũ ngēmacèx i pema rü tá ta penayaxu i guxũma ga yema Abráũmaã inaxunetaxũ ga Tupana.

4

¹ Rũ dücax, ngèxguma wüxi i buxũ yunatügu, rü ngēma buxũ rü tama ngèxgumatama nanayaxu i nanatüarü ngēmaxũgü. Rũ woo guxũma i nanatüarü ngēmaxũärü yora yixĩgu, natürü ngèxũrüxũ i nanatüarü puracütanüxũrümare nixī ñuxmata nayèx. ² Rũ ngēmacèx nangèxma i ngēma buxũärü dauruũ i namaã icuáxũ rü nüxũ nüxna dauxũ i ngēma nanatüarü ngēmaxũgü ñuxmata nawa nangu ya yima taunecü ya noxri nanatü nagu unetacü na ngēma buxũ rü nügũmaã inacuáxũcèx. ³ Rũ yexgumarüũ nixī ga tamaã nangupetüxũ ga noxrix. Yerü yexguma tauta Cristuxũ icuèxgu, rü natüũwa tayexmagü ga yema naãègü i chixexũgü i ñoma i naãnemaã

icuèxgüxü. ⁴ Natürü yexguma nawa nanguxgu ga yema ngunexü ga inaxunetaxü ga Tupana, rü núma nanamu ga Nane. Rü duüxügürüü wüxi ga ngewa nabu ga guma Nane. Rü yema Moiché umatüxü ga mugütüüwa nayexma ga yexguma nabuxgu. ⁵ Rü yemaäcü núma nangu ga Tupana Nane na tüxü ínanguxüxëëxüçèx i guxâma i yixema ga noxri mugütüüwa na iyexmagüxü. Rü yemaäcü tüxü narüngüxëë ga núma ga Tupana Nane na Nanatü ya Tupanamaã tüxü yaxuxüçèx na aixcüma naxäcügüxüchi ixîgüxü. ⁶ Rü Tupana pexna nanamu ga Naãe i Üünexü na pexü nüxü nadauxëëxüçèx na aixcüma naxäcügüxüchi pixîgüxü. Rü ngëmacèx i ñuxma rü marü name i “Pa Chaunatüx”, ñaperügü nüxü ya Tupana. ⁷ Rü ngëmacèx i ñuxma rü Tupanaxäcüxüchi quixî, rü tama wüxi i norü duüxümare quixî. Rü ñuxma na naxäcüxüchi quiüxü, rü norü ngúchaü nixî na cuxna naxäãxü i guxüma i tacü i noxrü ixîxü.

Pauru rü yema yaxögüxüçèx naxoegaãe

⁸ Rü üpa ga yexguma tauta Tupanaxü pecuèxgu, rü perü tupanane-tagütüüwa peyexmagü rü nüxü picuèxüügü ga yema tama aixcüma Tupana ixîgüxü. ⁹ Natürü i ñuxma na Tupanaxü pecuáxü rü núma rü na pexü nacuáxü, rü çtüxcüü wena naxçèx pewoeguchaü i ngëma naãëgü i chixexügü i ñoma i naãnemaã icuèxgüxü? ¿Rü tüxcüü penaxwèxe na wena natüüwa pegü pengëxmagüxëëxü i ngëma naãëgü i tama aixcüma poraexü i natüçèxmamare ixîgüxü? ¹⁰ Rü düçax i pemax, rü ñuxma rü ta ngëma nuxcümaügüxü i Yudíugücümüagu pexîãma woo Cristuaxü na peyaxögüxü. Erü penaxaure i ñuxre i ngunexügü rü ñuxre ya tauemacügü rü ñuxre ya taunecügü rü ñuxre i petagü, erü nagu perüxînüë na ngëmaäcü Tupanapëxewa tá pimexü. ¹¹ Rü ngëmacèx poraäcü chaxoegaãe, erü ngürüãchi natüçèxmamare tá nixî ga yema puracü ga petanüwa chaxüxü. ¹² Pa Chaueneëgüx, pexü chacèèxü na chauxrüü nüxü perüxoexü na nagu pexîxü i ngëma Yudíugüarü mugü. Erü ñuxma na Cristuwe charüxüxü rü marü nüxü charüxo na nagu chixüxü ga yema mugü ga üpa tama nagu pexîxü. Rü düçax, yexguma noxri petanüwa chayexmagu rü tama choxü pexo, rü ngëmacèx chanaxwèxe i ñuxma rü ta chauga pexînüë. ¹³ Rü pema rü marü nüxü pecuèx rü yexguma noxri pemaã nüxü chixuxgu ga Tupanaärü ore i mexü, rü yema na chidaawexügü nixî ga petanügu charüxäüxü rü pemaã nüxü chixuxü ga Tupanaärü ore. ¹⁴ Rü yema daawe ga choxü yexmaxü, rü woo pexçèx rü wüxi ga wèxtümüü nixî, natürü tama choxü pexo rü tama choxü ípetèxüchi. Natürü meãma choxü peyaxgü ñoma wüxi ga Tupanaärü orearü ngeruü i daxüçüãx chiüxürüü. Rü ñoma Ngechuchu ya Cristu chiüxürüü, meãma choxü peyaxgü. ¹⁵ ¿Natürü tacü éxna nangupetü namaã ga yema perü taãe ga noxri pexü yexmaxü? Erü pemaã nüxü chixu rü noxri petanüwa chayexmagu rü poraäcü chomaã petaãëgü. Rü yexguma chi pexü natauxchagu, rü pemaã nanguxügu, rü chi pexetü peyaxu na choxna penaxäxüçèx, yerü yemaäcü poraäcü chomaã petaãëgü ga yexguma. ¹⁶ ¿Natürü tacü pexü naxüpetü i ñuxmax? ¿Pexçèx rü éxna perü uwanü chixî yerü pemaã nüxü chixu ga Tupanaärü ore i aixcüma ixîxü? ¹⁷ Rü ngëma duüxügü i pexü ngúexëëxü na Yudíugücümüagu na pexîxüçèx, rü pegu narüxînüënetä, tama aixcüma tacü rü mexüçèx nadaugü. Erü nümagü rü toxna pexü nixîgachixëëchaü na ngëmaäcü naga pexînüëxüçèx. ¹⁸ Rü ngëma togü rü marü name na pegu naxînüëxü, natürü nanaxwèxe na perü mexüçèx nadaugüxü i guxüguma. Rü tama name na petanüwa changëxmaguxicatama perü mexüçèx na nadaugüxü i ngëma togü. ¹⁹ Pa Chauxacügüx, wenaxärü ñoma wüxi i mama ngîxäcümaã nguxnecacürüü poraäcü pexçèx ngúxü chinge na aixcüma meã Cristuaxü peyaxögüxüçèx

rü aixcüma naxcèx na pemaxëxücèx. Rü ngëmaãcü tá chixĩ ñuxmatáta Cristu naxwèxexürüü pixĩgü i perü maxüwa. ²⁰ Rü chierü ñuxmatama pexütawa changëxmagu na pemaã chidexaxüchixücèx, rü tama ñuxmarüü pexcèx chanaxümatümarexücèx. Erü ñuxma rü tama nüxü chacuèx na tacügu pemaã charüxĩnuxü.

Ore i cuèxruü i Abráüxütaxü ga Agáchiga rü namèxüchi ga Charachiga

²¹ Rü pema na ngëma Moïché ümatüxü i mugütüüwa pegü pengëxmagüxëëchaüxü, rü chanaxwèxe i chomaã nüxü pixu ngoxi aixcüma nüxü pecuá na ñuxü ñaxü i ngëma mugü. ²² Erü ngëma mugüwa nüxü tadau rü Abráü rü nüxü nayexma ga taxre ga nane. Rü wüxi ga nane rü naxütaxü ga Agáwa nüxü nayexma, rü naĩ ga nane rü namèxüchi ga Charawa nüxü nayexma. ²³ Rü guma nane ga naxütaxüwa nüxü yexmacü, rü nabu yerü yema nixĩ ga norü ngúchaü ga Abráü. Natürü guma nane ga namèxüchiwa nüxü yexmacü, rü nabu yerü yemaãcü inaxuneta ga Tupana. ²⁴⁻²⁵ Rü pemaã nüxü chixu i ngëma ore erü ngëmawa nangëxma i tacü i aixcüma ixĩxü i pexcèx changoxëëchaüxü. Rü yema taxre ga ngexügü rü taxre i cuèxruügü nixĩgü na ngëmawa nüxü icuáxücèx na ñuxãcü Tupana duüxügüxü rüngüxëëxü na naxütawa nangugüxücèx. Rü yema nüxĩraüxü ga norü ngüxëë nixĩ ga yexguma Chinaĩrü mëxpúnewa Moïchéna naxããgu ga norü mugü na naga naxĩnëxücèx ga duüxügü. Rü yema mugü ga Moïchéna naxãxü ga Chinaĩwa rü Agá iyixĩ ga norü cuèxruü. Rü yema nge ga Agá rü naxütaxü iyixĩ ga Abráü rü yemacèx ga ngĩxãcügü rü ngĩxrüütama togütüüwa nayexmagü rü tama ínanguxü. Rü yemaãcü ga yema nge rü wüxi i cuèxruü iyixĩ nachiga i ngëma Yudiügü i ñuxma maxëxü rü ngëma mugüwe rüxixü. Erü nümagü rü ñuxma rü ta natüüwa nangëxmagü i ngëma mugü ga Moïché yaxuxü ga mëxpüne ga Chinaĩ ya Arábiaanewa ngëxmanewa. Rü ñuxma rü ta ngëma mugügu naxĩ rü tama nüxü narüxoe. ²⁶⁻²⁸ Natürü yema nge ga Abráü namèxüchi rü tama Agárüü iyixĩ. Rü ngĩne ga Ichaá rü nabu yerü Tupanaãxü nayaxõ ga Abráü ga yexguma Tupana namaã nüxü ixuxgu rü tá na nüxü nayexmaxü ga wüxi ga nane. Rü ñuxma Pa Chaueneëgüx, yixema rü ta tayaxõ i ngëma Tupana tamaã ixunetaxü. Rü ngëmacèx i ñuxma rü tama ngëma nuxcümaügüxü i mugütüüwa tangëxmagü. Rü ngëmaãcü Abráü namèxüchixacügürüü tixĩgü. Rü ngëmaãcü nüxü tadau na aixcüma Tupana yanguxëëxü i norü ore ga Abráü namèxüchichiga ümatüxü i ñaxü:

“¡Nataãë, Pa Ngecü i Ngexacücü! ¡Rü curü taãëmaã rüxáixnaxü woo tagu-machiréx na cuxãxãcüxü! Erü tá cuxãxãcü, rü ngëma ngexü i cuxütaxü i cuteaxü äxãcüxüärü yexera tá cuxü nangëxma i cuxacügü”,

ñaxü. ²⁹ Natürü guma Abráü nane ga naxütaxüwa nüxü yexmacü, rü chixri namaxü namaã ga guma Abráü nane ga Tupanaärü unetagagu bucü. Rü ngëxgumarüü ta i ñuxma rü yixema i Tupanaãë i Üünexügagu tüxü na nangëxmaxü i maxü, rü chixri tamaã nachopetü i ngëma Yudiügü i naxwèxegüxü na nagu ixĩxü i ngëma mugü ga Moïché ümatüxü. ³⁰ ¿Natürü ñuxü ñaxü i Tupanaärü ore i ümatüxüwa? Rü dücax, ngëmawa Abráümaã nüxü nixu ga na ngĩxü ínatáxücèx ga naxütaxü ngĩnemaã, yerü taxucürüwama yema ngĩnemaã nayayauxye ga norü yemaxü ga namèxwaxüchixücü ga naneärü tá ixĩxü. ³¹ Rü ngëmaãcü, Pa Chaueneëgüx, rü nüxü tadau rü tama Abráü naxütaxüxãcügürüü tixĩgü, erü tama ngëma mugütüüwa tangëxmagü. Natürü Abráü namèxüchixacügürüü tixĩgü, erü Tupanaärü unetagagu tüxü nangëxma i tórü maxü.

5

Meã pegüna pedaugü na tama wena ngẽma mugütüüwa pengẽxmagüxüçèx

¹ Rû ñuxma ya Cristu rû marü tüxü ínanguxüxëë na tama ngẽma mugütüüwa ingẽxmagüxüçèx. Rû ngẽmacèx name nixĩ i pegüna pedaugü na tama wena natüüwa pegü pengẽxmagüxüçèx i ngẽma mugü. ² ¡Rû choxü iperüxĩnüë! Rû choma i Pauru rû pemaã nüxü chixu, rû ngẽxguma chi nagu pexĩxgu na pegü ípewiechẽxmüpẽxechiraüxü na ngẽmaãcü penayaxuxüçèx i perü maxü, rû ngẽxguma ya Cristu rû chi taxuwama pexü name. ³ Rû wena pemaã nüxü chixu rû ngẽxürüü i yatü i nügü íwiechẽxmüpẽxechiraüchaüxü na ngẽmaãcü Tupanapẽxewa namexüçèx, rû name nixĩ i nüxna nacuèxãchi na taxucürüwa ngẽmaãcü na nayauxãxü i norü maxü ega tama aixcüma naga naxĩnügu i guxüma i togü i mugü. ⁴ Rû guxãma i pema i nagu rüxĩnüëxë na Tupanapẽxewa pimexü ega nagu pexĩxgu i ngẽma mugü, rû pemaã nüxü chixu rû marü Cristuna pixĩgachi i ngẽxgumax. Rû ngẽxgumarüü ta pegü nüxna peyaxüxëë i ngẽma ngechaü ga noxri Tupana namaã pexü ngechaüxü. ⁵ Natürü Tupanaãë i Üünexü nixĩ i tüxü rüngüxëëxü na yaxõgüxüçèx. Rû ngẽmacèx nixĩ i ínanguxëëxü na Cristugagu Tupanapẽxewa imexü. ⁶ Rû ngẽmacèx i ñuxma na Ngechuchu ya Cristuarü duüxügü ixĩgüxü, rû nüetama nixĩ ega woo íwiechẽxmüpẽxechiraügu rû ëxna tama, erü tama ngẽma nixĩ i Tupanapẽxewa tüxü mexëëxü. Rû ngẽma Tupana naxwëxexü i ñuxma nixĩ na aixcüma yaxõgüxü rû ngẽmaãcü yigü na ingechaügüxü. ⁷ Pema rû meãma ipenaxügü na Cristuwe perüixü. ¿Rû texé ëxna pexü nüxü taxoox na tama naga pexĩnüëxüçèx i norü ore i aixcüma ixĩxü? ⁸ Rû pemaã nüxü chixu, rû tama Tupana ga noxri pexcèx çacü nixĩ ya yima pexü nüxü oócü. ⁹ Rû name nixĩ i nüxna pecuèxãchie rû wüxitama i duüxü i chixexü üxü, rû nanachixexëë i guxüma i togü i natanüxügü, ñoma wüxi i íraxü i pãüärü puxëëruü rû wüxi i taxü i pãüchara ipuxëëxürüü nixĩ. ¹⁰ Choma rû chayaxõ na tórü Cori tá pexü rüngüxëëxü na choma nagu charüxĩnüxürüü nagu perüxĩnüëxüçèx. Natürü Tupana tá nanapoxcu i ngẽma duüxü i pexü chixëãëëxü, rû nüetama nixĩ ega woo texé tixĩgu. ¹¹ Rû nümaxü i duüxügü rû chauchiga nidexagü, rû nüxü nixugüe na choma rû duüxügüxü changüexëëxü na nügü ínawüchẽxmüpẽxechiraüxüçèx rû mugü na yanguxëëgüxüçèx na ngẽmaãcü nüxü nangẽxmaxüçèx i maxü i taguma güxü. Natürü, Pa Chaueneëgüx, rû ngẽxguma chi ngẽmaãcü duüxügüxü changüexëëgu, rû tãü chima chowe ningëxütanü i Yudíugü, erü tãü chima naãëwa nangux i ngẽma ore i nüxü chixuxü nachiga ya Cristu ga curuchagu taxcèx yucü. ¹² Natürü ngẽma duüxügü i pexü chixëãëgüxü rû pexü ucuxëgüxü na pegü ípewüchẽxmüpẽxechiraüxüçèx, rû ¿tüxcüü ëxna i nümagü i tãü noxtacüma nügü yacaugüpüxücharexegüxü ta? ¹³ Natürü pemax, Pa Chaueneëgüx, rû Tupana pexcèx naca na ngẽma mugüna ípenguxüxüçèx. Natürü ñuxma na nüxna ípenguxüxü, rû tama name i ngẽmacèx pexeneärü ngüchaü pexügü. Natürü name nixĩ na pegü pengechaügüxü rû ngẽmaãcü pegü perüngüxëëgüxü i wüxichigü. ¹⁴ Erü guxüma i Tupanaärü mugü rû wüxi i muwatama nangox rû ñanagürü: “¡Rû nüxü nangechaü i cumücü na cugütama cungechaüxürüü!” ñanagürü. ¹⁵ Natürü name nixĩ i pexuãëgü erü ngẽxguma chi pegümaã penuëgu rû pegüchi pexaiegu, rû ngürüãchi tá pegü pewoone rû tá ipeyanaxoxëë i Tupanaärü ore i pewa ngẽxmaxü.

Ngẽma taxüneärü ngüchaü rû tama Tupanaãë i Üünexüärü ngüchaümaã nawüxigu

16 Pemaã nüxũ chixu, rü name nixĩ i Tupanaãe i Üünexũ naxwèxexũãcüma pemaxẽ. Rü ngëxguma ngëmaãcü pemaxëgu, rü tãütáma pexeneãrũ ngúchaũ pexügü. 17 Erü ngëma taxüneãrũ ngúchaũ rü tama Tupanaãe i Üünexũãrũ ngúchaũmaã nawüxigu. Rü ngëma Tupanaãxẽ i Üünexũãrũ ngúchaũ rü tama taxüneãrũ ngúchaũmaã nawüxigu. Erü ngëma taxre i ngúchaũgü, rü nügüchi naxaie erü wüxichigü i ngëma rü tamaã inacuáxchaũ. Rü ngëmacèx i pema rü taxucürüwa penaxü i ngëma pematama penaxwèxexũ. 18 Natürü ngëxguma Tupanaãe i Üünexũ pemaã icuèxgux, rü marü tama ngëma nuxcümaũgüxũ i mugütüüwa pengëxmagü. 19 Rü meãma nangox na ñuxãcü namaxëxũ i ngëma duüxügü i naxüneãrũ ngúchaũ ügüxũ, rü naĩ i ngemaã maxëxũ, rü airugürüümare ixügüxũ. Rü tama naxãneẽ na ñacü rü chixexũ naxügüxũ. 20 Rü tupananetachicünèxãgüxũ nicuèxüügü, rü nayuue rü nangõxwèxegü, rü aigu narüxĩnüe, rü nachoxügwèxegü, rü togüchi naxaie norü ngëmaxüügüçèx, rü nanuxwèxegü, rü duüxügüxũ naxucüxëgü na to i ngüxëëtaegu naxĩxüçèx, rü ngëmaãcü nayatoye i duüxügü na tama wüxigu naxĩnüexüçèx. 21 Rü togüarü ngëmaxüügüçèx nixãüxãchigü, rü nangãxewèxegü, rü peta naxügüecha, rü nanaxügü i muxüma i togü i chixexügü i ngëxgumarüü ixixũ. Rü ngëmacèx, wena pemaã nüxũ chixu rü guxüma i ngëma duüxügü i ngëmaãcü maxëxũ, rü nataxütáma i nachica i ngextá Tupanaãëxgacü íyĩxüwa. 22 Natürü ngëxguma Tupanaãe i Üünexũ tamaã icuèxgu, rü nüma nixĩ i tüxũ nangüxëëxũ na yigü ingechaũgüxüçèx, rü itaãëgüxüçèx, rü meã yigümaã imaxëxüçèx, rü yaxna namaã ixĩnüexüçèx i togü, rü togümaã imecümagüxüçèx, rü togüxũ rüngüxëëgüxüçèx, rü aixcüma yangüxëëxüçèx i ngëma nüxũ ixuxũ. 23 Rü ngëxgumarüü ta Naãe i Üünexũ tüxũ narüngüxëë na tama chixexümaã nataegüxëëxüçèx ega togü chixexũ tamaã üxgux. Rü tüxũ narüngüxëë na meãma yigünatama idauxüçèx na tama chixexügu iyixüçèx. Rü nataxuma i mugü i nachuxuxũ na naxüxũ i ngëma mexügü. 24 Rü ngëma duüxügü i aixcüma Ngechuchu ya Cristuarü duüxügü ixügüxũ, rü marü nüxũ narüxoe ga yema nuxcümaũxũ ga norü maxü ga chixexũ, rü yema naxüneãrũ ngúchaũgü ga chixexũ, rü guxüma ga ñacü ga to ga ngúchaũ ga tama mexü. 25 Rü ñuxma na Tupanaãe i Üünexũ tüxna naxãxũ i tórü maxü, rü name nixĩ i nüma tórü maxümaã na inacuáxũ. 26 Rü tama name i yigü ítarüta rü togümaã tanuãe, rü bai na ñacüçèx ixãüxãchixũ.

6

Name nixĩ i guxãma i pema rü pegü perüngüxëëgü i wüxichigü

1 Pa Chaueneëgüx, ngëxguma chi texëxũ pedëuxgu na ñacü rü chixexügu tanguxũ, rü pema na Tupanaãe i Üünexũ naxwèxexũãcüma na pemaxëxũ, rü name nixĩ i tüxũ pengechaũãcüma tüxũ perüngüxëë na itayarüwëxãchixüçèx. ¡Natürü pexuãëgü i wüxichigü, na tama pema rü ta nagu peyixüçèx i ngëma chixexũ! 2 ¡Rü pegü perüngüxëëgü i ngëxguma texé petanüwa guxchaxügü tüxũ ngëxmagu! Erü ngëxguma ngëmaãcü pegü perüngüxëëgu, rü ngëmaãcü tá peyangüxëë i ngëma Cristu pexü muxü. 3 Rü ngëxguma texé nagu rüxĩnügu na wüxi i ñacü tixixũ, rü tügütama tawomüxëë, erü Tupanapëxewa rü taxuümachirëx tixĩ. 4 Rü ngëmacèx i wüxichigü, rü name nixĩ i tügüarü maxütama tangugü. Rü ngëxguma namexgu i tümaãrü maxü, rü tügümaã tátama tataãe, rü taxucèxma tüxcüü togüarü maxüwa tügü tangugüarü maxüãx. 5 Erü tanaxwèxe ya wüxichigü na tümaãrü maxünatama tadauxũ i Tupanapëxewa. 6 Rü yíxema nayaxuxe i ngüxëëtae i Tupanaãrü orewa rü name nixĩ na tümaãrü ngüxëëruümaã tangauxũ i gúxũ i tümaãrü ngëmaxügü.

⁷ ;Rü pexuãëgü na tama ípetüexüçèx i perü maxüwa! Erü taxucürüwa texé Tupanaxü tawomüxëë. Rü yíxema chixexü úxe, rü chixexü tá tayaxu. Rü yíxema mexü úxe, rü mexü tá nixí i tayaxuxü. ⁸ Rü yíxema tümaxüneãrü ngúchaü úxe, rü ngëma tümaxüneãrü ngúchaü rü tá yuwa tüxü naga. Natürü yíxema Tupanaãë i Üünexüãrü ngúchaü úxe, rü ngëma Tupanaãë i Üünexüwa tá tanayaxu i maxü i taguma gúxü. ⁹ Rü ngëmacèx tama name na nüxü rüchauexü na mexü ixüexü. Erü ngëxguma chi tama nüxü rüchauegu, rü düxwa mexü tá tayaxu i Tupanaxütawa. ¹⁰ Rü ngëmacèx ngëxguma tüxü nangëxmagu na tacümaã togüxü rüngüxëëxü, rü name nixí i guxãxüma tarüngüxëë. Natürü yexera tanaxwèxegü na nüxü rüngüxëëgüxü i ngëma taeneëgü rü taeyèxgü i yaxögüxü.

Pauru rü nüxü narümoxë ga yema yaxögüxü, rü nayaxucüxëgü

¹¹ Rü nuã tá ichanaxügü na chomaxüchima choxmëxmaã pexcèx chanaxümatüxü i ñaã popera. ;Rü dücax, nüxü pedèux i ngëma choma chaxümatüxü na ñuxãcü natamatüxü! ¹² Rü ngëma Yudíugü i pexü ngüxëëxü na pegü ípewiechëxmüpëxechiraügüxüçèx, rü ngëmaãcü pexü namu erü nanataãëxëëgüchaü i ngëma togü i Yudíugü na tama naxchi naxaixüçèx nagagu na Ngechuchu ya Cristu ga curuchagu yucüaxü na yaxögüãxü. ¹³ Erü woo i nümagü na ínawiüchëxmüpëxechiraüxü, rü tama nayanguxëë i guxüma i mugü. Natürü nümagü rü nanaxwèxegü na pegü ípewiüchëxmüpëxechiraüxü, na yixcama nügü yacuèxüügüxüçèx rü togü i Yudíugümaã nüxü na yaxuxüçèx na pema rü ta naxrüü nagu pexíxü i ngëma nuxcümaügüxü i mugü. ¹⁴ Natürü i choma rü chaugü chicuèxüü erü nüxü chayaxõ ya tórü Cori ya Ngechuchu ya Cristu ga curuchagu yucü. Rü ngëmacèxicatama nixí i chaugü chicuèxüüxü. Rü ñuxma na Cristu ga curuchagu yucüaxü chayaxõxü, rü marü tama nagu charüxñü i ñoma i naãne rü norü ngëmaxügü. Rü ngëxgumarüü ta i ñoma i naãne rü marü tama choxü nacuáxchaü. ¹⁵ Erü ngëxguma Ngechuchu ya Cristuarü duüxügü ixígügu, rü Tupanapëxewa rü taxuüma nixí i ngëma na íwiechëxmüpëxechiraüxü rü ëxna tama. Natürü ngëma aixcüma napëxewa mexü nixí na naxüchicüüxü i tórü maxü na ngexwacaxüxü i duüxügü ixígüxüçèx. ¹⁶ Rü Tupanana naxcèx chaca na pexü nataãëxëëgüxüçèx rü nüxü pengechaütümüügüxüçèx i guxãma i pema i aixcüma yanguxëëgüxe i ngëma pemaã nüxü chixuxü, rü guxãma ya yíxema aixcüma Tupanaãrü duüxügü ixígüxe. ¹⁷ Rü ñuxmawena rü tama chanaxwèxe na texé tacü rü guxchaxügü choxna äxü. Erü choma rü aixcüma tórü Cori ya Ngechuchuarü duüxü chixí. Rü ngëma chorü oxrigüchica i chowa ngëxmagüxüwa nüxü pecuèx na aixcüma yíxü i ngëma. ¹⁸ Pa Chaueneëgüx, chanaxwèxe i tórü Cori ya Ngechuchu ya Cristu pexü narüngüxëë i guxãma i pemax. Rü ngëmaãcü yíi.

Rü nuãma pexna,
Pauru

POPERA GA EPÉCHIUWA YEXMAGÜXŪ GA YAXŌGÜXŪTANÜWA NAMUXŪ GA PAURU

Pauru rü nüxŭ narümoxē ga yema yaxōgüxŭ ga Epéchiuarü ĩānewa yexmagüxŭ

¹ Pa Chaueneēgŭ ya Epéchiuwa Ngēxmagŭxe, choma i Pauru nixŭ i pexcèx chanaxŭmatŭxŭ i ñāñ popera. Rü choma i Pauru chixŭ i Tupana choxŭ yaxuxŭ na Ngechuchu ya Cristu choxŭ muxŭcèx na duŭxŭgŭmaã nüxŭ chixuxŭcèx i norŭ ore. Rü pexcèx chanaxŭmatŭ i guxāma i pema ya Epéchiuarü ĩānewa ngēxmagŭxe rü Tupanaärŭ duŭxŭgŭ ixŭgŭxe rü Ngechuchu ya Cristuaxŭ yaxōgŭxe. ² Rü chanaxwèxe i pexŭ narüngŭxēē rü pexŭ nataāēxēē ya Tanatŭ ya Tupana rü tórŭ Cori ya Ngechuchu ya Cristu.

Tupana rü poraäcŭ tŭxŭ narüngŭxēē erŭ Cristuarŭ duŭxŭgŭ tixŭgŭ

³ Rü name nixŭ i nüxŭ ticuèxŭgŭ ya Tanatŭ ya Tupana ya tórŭ Cori ya Ngechuchu ya Cristunatŭ ixŭcŭ. Erŭ nüma ya Tupana rü Cristugagu tŭxna nanaxā i naguxŭraŭxŭ i ngŭxēēgŭ i ũünexŭ i dauxŭguxŭ i naanewa taxcèx ne namugŭxŭ. ⁴⁻⁵ Rü tautama naāne ũxgu, rü Cristugagu Tupana tŭxŭ nade na napēxewa ixŭünegŭxŭcèx rü na nataxuxŭcèx i tórŭ chixexŭ i napēxewa. Rü Tupana rü poraäcŭ tŭxŭ nangechaŭ. Rü yemacèx nuxcŭmamatama tŭxŭ naxuneta na naxäcŭgŭxŭ tŭxŭ nadexŭcèx Ngechuchugagu. Rü yemaäcŭ nanaxŭ yerŭ yema nixŭ ga norŭ ngúchaŭ. ⁶ Rü ngēmacèx name nixŭ i guxŭguma nüxŭ ticuèxŭgŭ ya Tupana. Erŭ nüma rü poraäcŭxŭchima tamaã namecŭma rü poraäcŭ tŭxŭ narüngŭxēē ga yexguma taxcèx núma namuāxgu ga Nane ya nüxŭ nangechaŭxŭchicŭ. ⁷ Rü Tupana rü poraäcŭ tŭxŭ nangechaŭ, rü yemacèx nanamu ga Nane na taxcèx nayuxŭ rü nagŭ inabaxŭ na yemaäcŭ tŭxŭ ĩnanguxŭxēēŭcèx rü tŭxŭ nüxŭ nangechaŭxŭcèx ga tórŭ pecadugŭ. ⁸ Rü Tupana tŭxŭ nüxŭ nadauxēē na ñuxäcŭ poraäcŭ tŭxŭ nangechaŭxŭ ga yexguma tŭxna naxāāxgu ga guxŭma ga tórŭ cuèx na taāēxŭ icuáxŭcèx rü tŭxŭ natauxchaxŭcèx i norŭ ore. ⁹ Rü tŭxŭ nüxŭ nacuèxēē ga norŭ ngúchaŭ ga noxri nüxŭcatama nüxŭ nacuáxŭ. Rü yema norŭ ngúchaŭ ga nuxcŭmaxŭchima Cristumaã nagu naxŭnŭxŭ ga Tupana, rü yema nixŭ ga ñoma ga naānewa na namuāxŭ na tŭxŭ yamaxēēxŭcèx. ¹⁰ Rü yema nagu naxŭnŭxŭ nixŭ na Cristumēxēwa nangēxmaxēēãxŭ i guxŭma i daxŭguxŭ i naānewa ngēxmaxŭ rü guxŭma i ñoma i naānewa ngēxmaxŭ. Rü ngēmaäcŭ tá nanaxŭ ya Tupana i ngēxguma nawa nanguxgu na yanguxēēãxŭ. ¹¹ Yerŭ naxŭpa ga ñoma ga naane naxŭxŭ ga Tupana, rü woetama tomaã nanaxuegu na Cristugagu tanayauxgŭxŭcèx i ngēma maxŭ i taguma gŭxŭ i nüma toxna naxŭxchaŭxŭ na aixcŭma naxcèx tamaxēxŭcèx. Rü aixcŭma yemaäcŭ nanaxŭ yerŭ yema nixŭ ga norŭ ngúchaŭ ga Tupana ya guxŭma ũcŭ, ngēma nüma nagu naxŭnŭxŭäcŭma. ¹² Rü yemaäcŭ Tupana tomaã nanaxuegu na toma i toxira Cristuaxŭ yaxōgŭxe naxcèx tamaxēxŭcèx rü nüxŭ ticuèxŭgŭxŭcèx naxcèx i norŭ pora i ũünexŭ. ¹³ Rü yexgumarŭ ta ga pema i Epéchiucŭāxgŭ, rü yexguma nüxŭ pexŭnŭēgu ga yema ore i aixcŭma ixŭxŭ i tŭxŭ maxēēxŭ, rü yexguma Cristuaxŭ peyaxōgŭgu, rü namŭcŭgŭ pixŭgŭ. Rü Tupana ga tamaã ixunetacŭ na tŭxna namuāxŭcèx i Naāē i ũünexŭ, rü marŭ pexna nanamu i ngēma Naāē na nüxŭ pecuáxŭcèx na aixcŭma norŭ duŭxŭgŭ pixŭgŭxŭ. ¹⁴ Rü ngema Naāē i ũünexŭ ga Tupana tŭxna muxŭ, rü ngemaawa nixŭ i nüxŭ icuáxŭ na aixcŭma Tupana tá tŭxna naxŭxŭ i guxŭma i ngema tamaã inaxunetaxŭ. Rü ngēxguma wena núma naxŭxgu ya Cristu na nügŭxŭtawa

tūxū nagagūxūcèx rü aïxcüma tá tanayaxu i guxūma i ngema Tupana tomaã nūxū ixuxū. Rü ngēmacèx name nixī na nūxū icuèxūūgūxū ya Tanatū ya Tupana ya üxūnecü.

Pauru rü yaxōgūxūcèx nayumixē.

¹⁵⁻¹⁶ Rü ngēmacèx, ñuxma na nūxū chacuáxū na aïxcüma tórü Cori ya Ngechuchuaxū peyaxōgūxū rü na aïxcüma nūxū pengechaūgūxū i guxūma i ngēma togū i Tupanaārū ixīgūxū, rü ngēmacèx taguma nūxū charūchau na pexcèx moxē nūxna chaxāxū rü pexna chacuèxāchixū i chorū yumūxēwa. ¹⁷ Rü ngēxguma namaã chideaxgu ya Tanatū ya Tupana ya mexēchicü ya Nanatū ya tórü Cori ya Ngechuchu ya Cristu, rü naxcèx nūxna chaca na pexna naxāxūcèx i ngēma cuèx i Naãē i Üünexūwa ne ūxū. Rü ngēma Naãē i Üünexū tá nixī i pexcèx nangoxēēxū i Tupanaārū ore i mexū na yexeraācü nūxū pecuáxūcèx ya Tupana. ¹⁸ Rü Tupanana naxcèx chaca na nūmatama pexū yangoxnaãēxēxūcèx, na nūxū pecuáxūcèx na tacü yīxū i ngēma ípenanguxēēxū i naxcèx pexū nadexū. Rü nūxna naxcèx chaca na pexū nūxū nacuèxēēxūcèx na ñuxācü namexēchixū i ngēma maxū i taguma gūxū i nūma norū duūxūgūcèx namexēēxū i daxūguxū i naãnewa. ¹⁹⁻²⁰ Rü ngēxgumarūū ta rü nūxna naxcèx chaca na pexū nūxū nacuèxēēxūcèx na ñuxācü nataxūchixū i norū pora i tawa ngēxmaxū rü namaã tūxū nangūxēēxū i yixema na yaxōgūxū. Rü ngēmatama pora i taxūmaã nixī ga napuracūxū ga Tupana ga yexguma yuwa Cristuxū ínadxēēgu rü daxūguxū ga naãnewa nagaãxgu rü nūgūarū tūgūnecūwawa yanatoxēēāgu na guxāārū āēxgacü yīxūcèx. ²¹ Rü yemaācü guxūetūwa nanayexmaxēē. Rü ngēmacèx i ñuxma rü Cristumēxēwa nangēxmagü i guxūma i daxūguxū i naãnecūāx i āēxgacügü rü guxūma i ñoma i naãnecūāx i āēxgacügü. Rü ngēmaācü naxmēxwa nangēxmagü i guxūma i pora i ñuxma ngēxmagūxū rü guxūma i pora i tá ngēxmagūxū. Rü ngēmaācü i nūma rü guxū i āēxgacügūarū āēxgacü tá nixī i guxūguma. ²² Rü yemaācü ga Tupana rü marū Cristumēxēwa nanayexmagūxēē ga guxūma. Rü yexgumarūū ta Cristuxū ningucuchixēē na guxūma i yaxōgūxūēru na yīxūcèx. ²³ Rü ñuxma rü guxūma i yaxōgūxū rü wūxigu Cristuarū nixīgü. Rü nūma nixī i tawa nangēxmaxū i guxāma i yixema i nūxū na yaxōgūxū. Rü ngēxgumarūū ta nūma nixī i nangēxmaxēēāxū i guxūma i tacü i ngēxmaxū i guxūwama.

2

Tamaxē erü Tupana tūxū nangechaū

¹ Rü ūpa ga pema rü perü pecadugagu rü perü chixexūgagu ñoma peyuxūrūū pixīgü. ² Yerü ga pema rü nagu pexī ga yema chixexū i ñoma i naãnecūāx i duūxūgü nagu íxū. Rü pema rü naga pexīnūē ga Chataná i ngoxogūarū āēxgacü ixīxū. Rü nūma nixī i nūxū nangúchaūxēēāxū na chixexū naxūgūxūcèx i guxūma i ngēma duūxūgü i tama Tupanaga ínūēxū. ³ Rü guxāma ga yixema rü yemaācü chixri tamaxē ga ūpa. Rü tanaxū ga tóxrütama ngúchaū, rü nagu taxī ga yema taxūne naxwèxexū rü yema taãē naxwèxexū. Rü yemagagu yema togū ga duūxūgü ga chixexū ügūxūrūū nawa taxūgü i ngēma poxcu i āücūmaxūchixū i Tupana mexēēxū. ⁴ Natürü ga Tupana rü poraācü nūxū tangechaūtümūgü rü poraācü tūxū nangechaū. ⁵ Rü yemacèx, woo tórü pecadugagu ñoma iyuxūrūū tixīgü, natürü ga Tupana rü tūxna nanaxā ga maxū ga yexguma Cristuxū ínadxēēgu. Rü ñuxma rü pexū nangēxma i maxū i taguma gūxū, erü Tupana pemaã namecūma. ⁶ Rü yema na Ngechuchu ya Cristuxū wena namaxēēxūrūū rü tūxū rü ta

namaxēxēē ga Tupana. Rū yemaācū nanaxū na yixema rū ta Cristumūcūgū ixīgūxūcēx, rū namaā āēxgacūgū ixīgūxūcēx i daxūguxū i naānewa. ⁷ Rū yemaācū nanaxū ga Tupana na guxūgutāma duūxūgūxū nawéaxūcēx na űuxācū Cristugagu porācū tūxū nangechaūxū rū tamaā namecūmaxū. ⁸ Rū yemaācū pemaā namecūma ga Tupana. Rū yemacēx penayaxu ga maxū i taguma gūxū yerū peyaxōgū. Rū ngēma maxū rū taxucūrwama pegūnatama penaxā, natūrū Tupana nixī ga pexna naxāmarecū ga yema. ⁹ Rū tama űacū i mexū i pexūxūgagu nixī i pexū nangēxmaxū i ngēma maxū, natūrū Tupana nixī ya pexna naxāmarecū na ngēmaācū taxūema tūgū icuēxūxūcēx. ¹⁰ Rū Tupana nixī ga tūxū maxēxēēcū. Rū űuxma rū tūxū nangēxma i ngēma maxū yerū Ngechuchu ya Cristu tōrū pecaducēx nayu. Rū Tupana tūxna nanaxā i ngēma maxū na meā imaxēxūcēx rū mexū ixūgūxūcēx. Rū yemaācū tūxū narūngūxēē ga Tupana yerū woetama nuxcūmaxūchima marū yemagu narūxīnū.

Cristu nixī ya yigūmaā tūxū rūngūxmūēxēēcū

¹¹⁻¹² Rū ngēmacēx i pema na tama Yudūgū pixīgūxū, rū name nixī i nūxna pecuēxāchie na tama toxrūū na pixīgūxū ga noxri rū tama Tupanaxū na pecuēxgūxū. Rū yema na tama toxrūū pixīgūxū rū yemacēx ga toma ga Yudūgū i togū na ítawiechēxmūpēxechiraūgūxū, rū nūxū tixugūe na pema rū tama Tupanapēxewa na pimexū yerū tama toxrūū pegū ípewiechēxmūpēxechiraūgū. Rū yexguma ga pema rū tama Cristuxū pecuēxgū, yerū tama Tupanaārū duūxūgū i Yudūgūtanūxū pixīgū. Rū tama nūxū pecuēxgū ga Tupana nūma na namuxū ga Nane na duūxūgūarū pecaducēx nayuxūcēx na nūxna naxāāxūcēx i maxū i taguma gūxū. Rū woo ga yema mexūgū ga Yudūgūmaā inaxunetaxū ga Tupana, rū taxucūrwama penayaxu. Yerū űoma ga naānewa rū pemaxēmare, rū tama nūxū pecuēx ga űacū chi pexū na űpetūxū ga yexguma chi peyuegu yerū tama Tupanaxū pecuēx. ¹³ Natūrū woo ga noxri rū tama Tupanaxū na pecuāxū, natūrū i űuxma rū nūgūxūtawa pexū nagagū. Rū Ngechuchu ya Cristuarū duūxūgū pixīgū yerū pexcēx nayu rū nagū inanaba. ¹⁴⁻¹⁵ Rū űuxma rū Cristu nixī ya tūxū rūngūxmūēxēēcū. Rū noxri ga toma ga Yudūgū rū pexchi taxaie yerū tama toxrūū Yudūgū pixīgū. Natūrū i űuxma rū Cristu marū yigūmaā tūxū narūngūxmūēxēē. Rū yemaācū wūxitama i duūxūgūxū tūxū nixīgūxēē rū inayanaxoxēē na yigūarū uwanū ixīgūxū. Rū yexguma nayuxgu ga Cristu rū tūxū ínangūxūxēē na tama natūūwa iyexmagūxūcēx ga yema nuxcūmaūgūxū ga mugū ga toma ga Yudūgū nagu taxīxū. Rū wūxitama i duūxūgū i ngexwacaxūxū tūxū nixīgūxēē i toma i Yudūgū na tixīgūxū rū pema i tama Yudūgū na pixīgūxū. Rū yemaācū nanaxū na guxāma i yixema rū norū duūxūgū na ixīgūxūcēx. Rū yemaācū yigūmaā tūxū inarūngūxmūēxēē. ¹⁶ Rū yexguma curuchagu nayuxgu ga Cristu, rū inayanaxoxēē ga yigūchi na ixaie xū. Rū yemaācū ga Cristu rū Tupanamaā tūxū inarūngūx-mūēxēē, rū wūxitama i duūxūgūxū tūxū nixīgūxēē. ¹⁷ Rū yexguma Cristu nūma űxgu, rū taxcēx nūma nanange ga ore ga mexū ga marū yigūmaā rū Tupanamaā na rūngūxmūēxū. Rū yema ore rū toxcēx nixī i toma i Yudūgū ga toxira Tupanaxū na tacuāxū. Rū yema ore rū pexcēx rū ta nixī ga woo tama Tupanaxū na pecuēxgūxū ga noxrix. ¹⁸ Rū űuxma rū guxāma i yixema rū Cristugagu tūxū natauxcha na Tanatū ya Tupanana ingaicamagūxū. Rū ngēmatama Naāē i Ūūnexū nixī i tūxū rūngūxēēxū na nūxna ingaicamagūxūcēx ya Tanatū ya Tupana. ¹⁹ Rū ngēmacēx i pema rū woo tama Tupanaxū pecuēxgū ga noxrix, rū woo tama norū duūxūgū pixīgū ga yexguma, natūrū tama ngēmaācū pixīgū i űuxmax. Erū űuxma rū natanūxū pixīgū i guxūma i ngēma duūxūgū i Tupanaārū

ixīgūxū. Rū aixcūma Tupanaxācūgūxūchi pixīgū i ñuxmax. ²⁰⁻²² Guxāma i pema rū wūxi ya ĩpata ya mexūne ya Tupana nawa maxūne pixīgū. Rū ngēma cementu i ladriyu naetūgu nugūxū, rū ngēma rū Tupanaārū ngúexūgū ga imugūxū rū norū orearū uruūgū nixī. Rū yima ladriyu ya nūxirama cementuētūwa ixūcuchicū rū Cristu nixī. Rū ngēma inanaxūgū na naxūāxū ya guxūnema ya yima ĩ. Rū dūxwa ningu na wūxi ya tupauca ya taxūne ya Cristugagu ūūnene na yīxū. Rū ngēmaācū i pema na Cristuarū pixīgūxū rū wūxigu tomaā peyanguxēē ya wūxi ya tupauca ya taxūne i ngextá Tupanaāē i Ūūnexū ĩmaxūxūwa.

3

Tupana rū Pauruxū namu na ore i mexūxū yaxuxū namaā ga yema duūxūgū ga tama Yudūgū ixīgūxū

¹ Rū ñuxma na yemaācū Tupana pexū rūngūxēēxū, rū choma i Pauru rū pexcèx chayumūxē. Rū pemaā nūxū chixu rū nūma poxcupataūwa changēxma erū Ngechuchu ya Cristuarū duūxū chixī. Rū nuxma chapoxcu erū guxūwama nūxū chixuchiga na pema rū ta pexū nangēxmaxū i pechica i Tupanaxūtawa woo na tama Yudūgū pixīgūxū. ² Rū maneca marū nūxū pecuāchiga na ñuxācū Tupana choxū nangechaūācūma choxū muxū na pexū charūngūxēēxūcèx rū pemaā nūxū chixuxūcèx i norū ore i mexū. ³ Rū Tupana chomaā nanangoxēē rū choxū nūxū nacuèxēē ga yema ore ga pechiga ga noxri nūxīcatama nūxū nacuáxū. Rū yemachiga nixī ga írarūwa marū pexcèx chanaxūmatūxū ga noxrix. ⁴ Rū yexguma pexcèx chanaxūmatūgu rū pemaā nūxū chixu ga yema noxri ēxūguxū ga ore i ñuxācū Tupana rū Cristugagu duūxūgūxū namaxēxēēxū. Rū ngēxguma meā nawa pengúegu i ngēma popera rū tá nūxū pecuèx na aixcūma yīxū ga yema ore ga noxri ēxūguxū ga nachiga pexcèx chaxūmatūxū. ⁵ Rū yema nixī ga ore ga ēxūguxū ga Tupana taxúexūma meā nūxū nacuèxēēxū ga noxrix. Natūrū i ñuxma rū ngēma Naāē i Ūūnexū rū marū nanangoxēē i ngēma ore naxcèx i Tupanaārū duūxūgū i ūūnexū i yamugūxū rū norū orearū uruūgū. ⁶ Rū ñuxma rū tá pemaā nūxū chixu i ñuxācū na yīxū i ngēma ore ga noxri ēxūguxū. Rū dūcax, woo tama Yudūgū pixīgū natūrū i ñuxma rū pexcèx rū ta nixī i ngēma maxū i taguma gúxū ga noxri Tupana tomaā ixunetaxū. Rū ñuxma i pema rū ta norū duūxūgū pixīgū. Rū pexcèx nixī i guxūma i ngēma Tupanaārū unetagū ga noxri tomaā nūxū yaxuxū. Rū ngēmaācū i ñuxma rū Ngechuchu ya Cristugagu pexū nangēxma i guxūma i ngēma mexūgū erū peyaxōgū i norū ore i tūxū maxēxēēxū. ⁷ Rū woo taxuwama chame na chanaxūxūcèx i norū puracū, natūrū ya Tupana rū choxū namuāma rū choxū naporaxēē na nūxū chixuxūcèx i ngēma norū ore i mexū. ⁸ Rū chaugūcèx i Tupanapēxewa rū choma nixī i guxū i norū duūxūgūarū ñaxtūwaama chaxūxū. Rū woo ngēmaācū chixī, natūrū Tupana choxū nangechaū rū choxna nanaxā i ngēma puracū i mexū na ngēma tama Yudūgū ixīgūxūmaā nūxū na chixuxūcèx i norū ore i mexū na ñuxācū namexēchixū rū taguma iyagúxū ga yema taxcèx naxūxū ga Cristu. ⁹ Rū nūma ga Tupana ya guxūārū ūruū ixīcū, rū choxū namu na guxū i duūxūgūxū nūxū chacuèxēēxūcèx na ñuxācū yīxū i ngēma norū ngúchaū ga nuxcūma ēxūguxū ga noxri nūxīcatama nūxū nacuáxū. Rū ngēma norū ngúchaū nixī i Cristugagu tūxū na namaxēxēēxū. ¹⁰ Rū yemaācū choxū namu ga Tupana na ngēma duūxūgū i tama Yudūgū ixīgūxūmaā nūxū chixuxūcèx i ore i mexū na yaxōgūāxūcèx. Rū nūma ya Tupana nanaxwèxe na yaxōgūāxū na ngēmaācū guxūma i āēxgacūgū i daxūcūāx nūxū nadaugūxūcèx na ñuxācū nūxū nacuèxūchixū ga Tupana ga

yexguma duūxūgūaxū natauxchaxēēāgu na naxūtawa nangugūxūcèx. ¹¹ Rū yemaācū nūxū nanatauxchaxēē ga Tupana yerū woetama nuxcūmaxūchima guxūguma nagu narūxīnū na tórū Cori ya Ngechuchu ya Cristugagu tá na namaxēxēēāxū i duūxūgū. Rū yemaācū nayanguxēē. ¹² Rū ñuxma na Cristuarū duūxūgū ixīgūxū rū nūxū na yaxōgūxū, rū tūxū natauxcha na Tupanana ingaicamagūxū rū taxucèxma nūxū na imuūēxū. ¹³ Rū ngēmacèx i ñuxma na pexcèx ngúxū chingexū rū pexū chacèèxū na tama chauxcèx pexoegaāēgūxūcèx. Erū ngēma ngúxū na chingexū i ñuxma rū perū meruū nixī i ngēma.

Cristu rū poraācū tūxū nangechaū

¹⁴ Rū ngēmacèx, ngēxguma nagu charūxīnūgu na ñuxācū Tanatū ya Tupana taxcèx namexēēxū na naxācūgū ixīgūxūcèx, rū napēxegu chacaxāpūxū na nūxū chicuèxūūxūcèx. ¹⁵ Rū nūma nixī i Nanatū yīxū i guxūma i norū duūxūgū i ñoma i naānewa rū daxūguxū i naānewa ngēxmagūxū. ¹⁶ Rū Tanatū ya guxūguma poraācū tamaā mecūmacūna chaca na Naāē i Ūūnexūārū ngūxēēmaā pexū naporaexēēxūcèx na aixcūma peporaexūcèx i perū maxūwa. ¹⁷⁻¹⁸ Rū ngēxgumarūū ta nūxna naxcèx chaca na perū ōgagu pewa namaxūxūcèx ya Cristu. Rū ngēxguma ngēmaācū perū maxūwa peporaegu rū pexū nangēxmagu i ngēma ngechaū i aixcūma ixīxū, rū tá wūxigu guxūma i yaxōgūxūmaā nūxū pecuèx na ñuxācū nataxūchixū i norū ngechaū i namaā tūxū nangechaūxū ya Cristu. ¹⁹ Rū woo tama yanguxgu i tórū cuèx na nūxū icuāxūcèx na nañuxraūxū i ngēma ngechaū i namaā Cristu tūxū ngechaūxū, natūrū Tupanana naxcèx chaca na pexcèx nangoxēēāxūcèx na ñuxācū na yīxū i ngēma ngechaū na aixcūma pewa nangēxmaxū i guxūma i Tupanacūmagū. ²⁰ Rū ñuxma rū name nixī i guxāma i yixema rū nūxū ticuèxūūgū ya Tupana. Erū nūma rū nūxū nangēxma i pora na naxūāxū i guxūma i ngēma naxcèx íçaxū rū ēxna nagu rūxīnūēxūārū yexeraxūchi. Rū ngēma norū pora i tawa ngēxmaxūmaā nixī i naxūāxū i guxūma i ngēma. ²¹ Rū ñuxma rū name nixī i guxūma i norū duūxūgū i yaxōgūxū rū guxūgutāma Tupanaxū nicuèxūūgū naxcèx i ngēma Ngechuchu ya Cristu ūxū. Rū ngēmaācū yī.

4

Tupanaāē i Ūūnexū rū wūxigutama tūxū narūxīnūēxēē

¹ Rū ñuxma na ngēmaācū Tupana tūxū rūngūxēēxū, rū choma i Cristugagu na chapoxcuxū, rū pexū chacèèxū na Tupana naxwèxexūācūma meā pemaxēxū. Rū name nixī i ngēmaācū pemaxē erū pexū nixī ga nadexū ga Tupana, rū norū duūxūgū pixīgū i ñuxmax. ² Rū tama name i pegū picuèxūxūgū. Rū name nixī i guxūguma pemecūmagū rū yaxna namaā pexīnūē i togū rū nūxū pengechaūgū. ³ Rū chanaxwae i wūxigu perūxīnūē rū ñoma wūxitama i duūxūrūū pixīgū erū pewa nangēxma i Tupanaāē i Ūūnexū. Rū name nixī i naxcèx pedau na guxūguma pegū pengechaūgūxū rū ngēmaācū taguma țacūcèx pegū pitoyexū. ⁴ Erū yixema na Cristuarū duūxūgū ixīgūxū, rū ñoma wūxitama i duūxūrūū tixīgū. Rū ngēxgumarūū ta wūxitama nixī i Naāē i Ūūnexū i guxāwama maxūxū. Rū ngēxgumarūū ta Tupana pexū nade na guxāma ípenanguxēēgūxūcèx i wūxitama i maxū i taguma gúxū. ⁵ Rū wūxitama nixī ya tórū Cori, rū wūxiaxūtama nixī i yaxōgūxū rū wūxicèxicatama nixī ga íbaiūxū ga guxāma. ⁶ Rū wūxitama nixī ya Tupana ya guxānatū ixīcū. Rū nūma rū guxāetūwama nangēxma rū guxāwama namaxū. Rū nūma rū guxāxū narūngūxēē na tanaxūxūcèx i norū puracū. ⁷ Natūrū wūxichigū i yixema

rü tanayaxu i ngēma nacüma rü ngēma cuèx i Cristu tūxna āmarechaūxū na naxūgūxūcèx i norü puracü. ⁸ Rü ngēmacèx i Tupanaärü ore i ümatūxūwa rü ñanagürü:

“Rü yexguma daxūguxū ga nañewa naxūxgu, rü yéma tūxū nagagü ga guxema marü tūxū ínanguxūxēē nawa ga tūmaarü chixexū. Rü norü duūxūgūna nanaxā ga cuèx na ngemamaā Tupanaarü puracü naxūgūxūcèx”, ñanagürü i ngēma ore. ⁹ Rü ñuxma Pa Chaueneēgūx, rü pexna chaca, rü ꞗtacūchiga nixī i ngēma ore i ñaxū, “Daxūwa naxū”, ñaxū? Rü dücax, ngēmawa nüxū tacuèx ga noxri rü ñoma ga nañegu na ínaxīxū ga nümax. ¹⁰ Rü gumatama Cristu ga ñoma ga nañegu írūxīcū, rü gumatama nixī ga daxūguxū i naāne i Tupana íngēxmaxūwa ūxcü na guxāetūwa nangēxmaxūcèx rü guxūwama nangēxmaxūcèx. ¹¹ Rü nümatama nixī ga guxema norü duūxēgūna naxāāxū ga tūmaärü cuèx rü tūmaärü puracü. Rü tūxū naxuneta ga ñuxre na toxnamana norü orexū tayarūxugūxūcèx. Rü toguegü rü tūxna nanaxā ga cuèx na duūxūgūmaā nüxū tixuxūcèx i ngema norü ore i tūxū nüxū nacuèxēēxū. Rü toguegü rü tūxna nanaxā ga cuèx na duūxūgūaxū tanangūchaūxēēxū i Tupanaarü ore na yaxōgūāxūcèx. Rü toguegü rü tūxna nanaxā ga cuèx na ngema yaxōgūxūarü dauruxūgü tixīgūxūcèx. Rü toguegü rü tūxna nanaxā ga cuèx na norü oremaā tangūxēētaegūxūcèx. ¹² Rü yemaācü norü duūxēgūna nanaxā ga tūmaärü puracü rü tūmamaā inanan-guxūxēē na ngēma yaxōgūxūxū tarūngūxēēgūxūcèx na ngēmaācü guxūma i ngēma yaxōgūxū rü yexeraācü nüxū yacuáetanūxūcèx i norü ore. ¹³ Rü Cristu nanaxwèxe na ngēma norü orewa iyaetanūxū i guxāma i yixema ñuxmatáta wūxigu aixcūma meā yaxōgü rü meā nüxū icuèxgü ya Tupana Nane. Rü ngēmaācü tá düxwa nawa tangugü na aixcūma Tupana naxwèxexūācūma ixīgūxū, rü tá tiyaetanü i norü orewa ñuxmatáta ñoma Cristu ya aixcūma mexēchicürüū ixīgü. ¹⁴ Rü tāūtáma ñoma buxūgürüū tixīgü i tórü maxūwa. Erü ngēma buxūgü rü tauxchaācü toguama narūxīnūē. Rü ngēxguma ꞗacü rü to i nguxēētaexū naxīnūēgu rü ngēmawe narūxī ñuxmata naga naxīnūē i ngēma duūxūgü i chixexū i norü doramaā nawomūxēēgūxū rü nachix-exēēgūchaūxū. Natürü i yixema rü tama name na ngēxgumarüū ixīgūxū. ¹⁵ Rü name nixī i yigü ingechaūgūācūma nagu taxī i ngēma ore i aixcūma ixīxū, na ngēmaācü yexeraācü naxrūū ixīgūxūcèx ya Cristu ya guxūma i yaxōgūxūārü āēxgacü ixīcū. ¹⁶ Rü taeru ya Cristuwa nixī i ne naxūxū i tórü pora na naxcèx imaxēxūcèx. Rü guxāma i yixema rü wūxigu naxmēxwa tangēxmagü. Rü ngēxguma Cristugagu meā wūxigu ipuracüegu rü yigü rüngūxēēgu rü guxūma meāma inixū. Rü ngēmaācü yigü ingechaūgūācūma norü orewa tiyaetanü na düxwa nüma nanaxwèxexūācūma ixīgūxūcèx.

Maxū i ngexwacaxūxū i Cristugagu tūxū ngēxmaxū

¹⁷ Rü ñuxma rü Cristuégagu pexū chaxucuxē na tama nagu pexīxū i ngēma chixexū ga noxri nagu pexīxū ga yexguma tauta Cristuaxū peyaxōgūgu. Rü tama name i nagu pexī i nacūmagü i ngēma duūxūgü i tama Tupanaxū cuèxgūxū i naēchitamare maxēxū. ¹⁸ Erü Chataná rü nanatoōēgü i ngēma duūxūgü, rü ngēmacèx chixexūguxicatama narūxīnūē. Rü nagagugütama nüxū nataxuma i maxū i taguma gūxū i Tupanawa ne ūxū, erü tama nüxū nacuèxgūchaū. ¹⁹ Rü tama naxāneē na ꞗacü rü chixexū na naxūgūxū, rü ngēmacèx nagu naxī rü nüxū namepua i guxūraūxū i chixexūgü na naxūgūxū. ²⁰ Natürü i pema rü tama ngēmaācü na pemaxēxūcèx nixī i Cristuaxū peyaxōgūxū. ²¹ Yerü pema rü marü meā nüxū pexīnūē ga Cristuchiga. Rü toxūtawa naxcèx pengúe, rü nüxū pecuèx i norü ore i aixcūma ixīxū na ñuxācü Ngechuchu naxwèxexūācūma na pemaxēxū. ²² Rü ngēmacèx name

nixĩ i nüxũ perüxoe i ngẽma nuxcũmaũxũ i pecũmagũ ga ũpa nagu pexĩxũ. Yerũ yema nuxcũmaũxũ ga perũ maxũ rũ nachixexũchi. Rũ pexũ napora rũ pexũ nawomũxẽẽgũ na nagu pexĩxũcẽx ga yema pexeneãrũ ngũchaũgũ i tama mexũ. Natürũ i ñuxma rũ name nixĩ i nüxũ perüxoe i guxũma i ngẽma. ²³ Rũ ngẽmacẽx i ñuxma na Cristuarũ duũxũgũ pixĩgũxũ rũ name nixĩ na Tupanaguxicatama perũxĩnüẽxũ. Rũ name nixĩ i Tupanana pegũ pexãgũ na Naãe i Ūünexũ pewa puracũxũcẽx rũ na nangexwacaxũxẽẽãxũcẽx i peãe. ²⁴ Rũ name nixĩ i penayaxu i ngexwacaxũxũ i pecũma i Tupana norũ ngũchaũmaã pexcẽx mexẽẽxũ. Rũ ngẽma nacũma i ngexwacaxũxũ rũ perũ maxũ i mexũwa tá nangox i ngẽxguma nagu pexĩxgu i ngẽma ore i aixcũma ixĩxũ rũ tama nawe perũxĩxgu i pexeneãrũ ngũchaũ. ²⁵ Rũ ngẽmacẽx i ñuxma na Cristuarũ pixĩgũxũ rũ tama name na pidoratẽẽxgũxũ. Natürũ name nixĩ i wũxichigũ rũ tümamũcũmaã aixcũmaxũ tixu. Erũ guxãma i yixema rũ yigũtanũxũ i yaxõgũxũ tixĩgũ. ²⁶ Rũ ngẽxguma texé tacũ peãewa ngũxẽẽgu rũ ipegũna pedaugũ na tama pecadu pexũxũcẽx! Rũ tama name i nagu perũxĩnüẽẽcha natürũ name nixĩ i paxa ngẽmatama i ngunexũgu nüxũ ipeyarũngũma i ngẽma naxũpa na yanaxũcuxũ ya üexcũ. ²⁷ Rũ pegũna pedaugũ na tama penaxũchicaxũcẽx i Chataná na ngẽmaãcũ nayoxniẽxũcẽx rũ pemaã inacuãxũcẽx. ²⁸ Rũ ngẽxguma texé petanũwa ngĩtẽẽxgu ga ũpa, rũ name nixĩ i nüxũ tarũxo i ngẽma. Rũ name nixĩ i tümamẽxẽmaã meã tapuracũ na ngẽmaãcũ tüxũ nangẽxmaxũcẽx i tümããrũ ngẽmaxũ na toguãx ya tüxũ nataxũemaã tangauxũcẽx. ²⁹ Rũ tama name i chixexũ i oremaã pidexagũ. Rũ name nixĩ i ore i mexũmaã pidexagũ na ngẽmaãcũ ngẽma duũxũgũ i pexũ ñnüẽxũxũ perũngũxẽẽgũxũcẽx na yexeraãcũ Tupanaga naxĩnüẽxũcẽx rũ nataãegũxũcẽx. ³⁰ ¡Rũ pexuãegũ na tama penangechaũxẽẽxũcẽx i Tupanaãe i Ūünexũ! Erũ ngẽma Naãe i Ūünexũ nixĩ i Tupana pexna muxũ na nüxũ pecuãxũcẽx na aixcũma norũ duũxũgũ pixĩgũxũ ñuxmatáta ngẽma ngunexũ i nagu pexcẽx núma naxũxũ ya Cristu. ³¹ ¡Rũ nüxũ perüxoe na nagu perũxĩnüẽẽchaxũ ega texé tacũ rũ chixexũ pemaã üxgux! Rũ ngẽxgumarũũ ta name nixĩ na nüxũ perüxoexũ na aigu perũxĩnüẽxũ, rũ õxna penuẽxũ, rũ õxna pegũ na pengaexũ, rũ õxna peguxchigawẽxegũxũ. Rũ ngẽmaãcũ name nixĩ na nüxũ perüxoexũ i guxũma i ngẽma chixexũ i dexagũ. ³² Rũ name nixĩ i pegũ perũngũxẽẽgũ rũ pegũmaã pemecũmagũ, rũ pegũxũ pengechaũtũmũũgũ i wũxichigũ. Rũ ngẽxguma petanũwa texé tacũ rũ chixexũ pemaã üxgux, rũ name nixĩ i pegũxũ nüxũ pengechaũgũ i wũxichigũ yema na Cristugagu Tupana pexũ nüxũ nangechaũxũrũũ.

5

Name nixĩ i meã namaxẽ i Tupanaxãcũgũ

¹ Rũ ñuxma rũ Tupanaxãcũgũ ya pexũ nangechaũgũxe pixĩgũ. Rũ ngẽmacẽx name nixĩ i naxcẽx pedau na naxrũũ meã pemaxẽxũ rũ naxrũũ pimexũ. ² Rũ name nixĩ i pegũ pengechaũgũ yema Cristu tüxũ na ngechaũxũrũũ. Rũ nüma rũ taxcẽx nügũ inaxã rũ taxcẽx nayu. Rũ yemaãcũ Tupanaxũ nataãẽxẽẽ yerũ yemaãcũ tüxũ namaxẽxẽẽ. ³ Rũ ñuxma rũ Tupanaãrũ duũxũgũ pixĩgũ. Rũ ngẽmacẽx tama name i naĩ i ngemaã rũ õxna naĩ ya yatũmaã na ipepexũ. Rũ tama name na pexeneãrũ ngũchaũwe perũxĩxũ rũ õxna pegũna penanugũchaũxũ i tacũ i ngẽmaxũgũ. Rũ ngẽmacẽx name nixĩ i nüxũ perüxoe i guxũma i ngẽma chixexũgũ, rũ bai i nachiga na pidexagũmarexũ. ⁴ Rũ tama name i tacũ rũ ore i ãũãchixũxũ pixu, rũ bai i tacũ rũ ngeãẽxũmare pixu, rũ bai i texéxũ pecugũcũraxũ. Erũ ngẽma ore i chixexũgũ rũ taxuwama name. Rũ narũmemaẽ nixĩ i Tupanana moxẽ pexãgũ. ⁵ Rũ aixcũma pemaã

nüxŭ chixu rŭ ngëxguma texé naĩ i ngemaã rŭ ěxna naĩ ya yatŭmaã ipexgu, rŭ ěxna tŭmaxŭneãrŭ ngúchaŭ taxŭxgu, rŭ taxucŭrŭwama taxãchica i ngextá tórŭ Cori ya Cristu rŭ Tanatŭ ya Tupana ãëxgacŭ íxŭxŭwa. Rŭ ngëxgumarŭŭ ta taxucŭrŭwama texé ngema taxãchica ega tŭgŭna tananugŭchaŭxgu i tacŭ rŭ ngëmaxŭgŭ. Erŭ yíxema ngëma nacŭma tŭxŭ ngëxmaxë rŭ dŭxwa namaã tatupanaãx i ngëma nacŭma i chixexŭ. ⁶ ;Rŭ tama naga pexĩnŭë ega texé tacŭ rŭ ore i ngëãëmarexŭmaã pexŭ womŭxëëchaŭgu na penaxŭxŭcèx i ngëma chixexŭgŭ! Erŭ ngëma chixexŭgŭgagu nixĩ i Tupana tá poraãcŭ napoxcuexŭ i ngëma duŭxŭgŭ i tama naga ĩnŭëxŭ. ⁷ Rŭ ngëmacèx tama name i ngëma duŭxŭgŭmaã pexãmŭcŭgŭ na pema rŭ ta tama penaxŭxŭcèx i ngëma chixexŭgŭ. ⁸ Rŭ ũpa ga pema rŭ ãnëxŭwa peyexmagŭ, yerŭ tama Tupanaxŭ pecuèx rŭ chixri pemaxë. Natŭrŭ i ñuxma na Tupanaxŭ pecuáxŭ rŭ tórŭ Coriarŭ duŭxŭgŭ na pixŭgŭxŭ, rŭ ngóonëxŭwa pengëxmagŭ. Rŭ ngëmacèx name nixĩ i duŭxŭgŭ i ngóonëxŭwa ngëxmagŭxŭrŭŭ meã na pemaxëxŭ. ⁹ Erŭ ngëxguma ngóonëxŭwa ingëxmagu, rŭ mexŭ taxŭgŭ, rŭ nagu taxĩ i ore i aixcŭma ixŭxŭ, rŭ meã tamaxë. ¹⁰ Rŭ ngëmacèx name nixĩ i naxcèx pedau na nagu pexĩxŭ i ngëma maxŭ i tórŭ Cori namaã taãëxŭ. ¹¹ Rŭ tama name i pema rŭ ta penaxŭ i ngëma chixexŭgŭ i taxuwama mexŭ i ngëma togŭ i duŭxŭgŭ i ãnëxŭwa ngëxmagŭxŭ ŭgŭxŭ. Natŭrŭ narŭmemaë nixĩ i penangoxëë na nachixexŭ i ngëma naxŭgŭxŭ. ¹² Erŭ ngëma chixexŭ i cúãcŭma naxŭgŭxŭ i ngëma yatŭgŭ rŭ ngexŭgŭ, rŭ woo nachiga idexagŭmaregu rŭ wŭxi i ãnëxŭchi nixĩ. ¹³ Natŭrŭ ngëxguma ngóonëxŭ nagu baxigu i tacŭ rŭ chixexŭgŭ rŭ meã tá nangox na ñuxãcŭ nachixexŭ. ¹⁴ Erŭ guxŭma i tacŭ i ngëxmaxŭ, rŭ ngëxguma ngóonëxŭwa nangëxmagu, rŭ meãma nangox na ñuxãcŭ yĩxŭ. Rŭ ngëmacèx i Tupanaãrŭ orewa rŭ ñanagŭrŭ:

“;Nabaixãchi i cuma na cupexŭ! ;Rŭ írŭda i cuma na icuyarŭtaxuxŭ! ;Rŭ nagu rŭxĩnŭ na ñuxãcŭ nachixexŭ i ngëma curŭ pecadugŭ! Rŭ Cristu tá cuxcèx nanangóonëxëë rŭ tá cuxŭ narŭngŭxëë na Tupanaxŭ cucuáxŭcèx”,

ñanagŭrŭ i ngëma ore. ¹⁵ Rŭ ngëmacèx name nixĩ i pexuãëgŭ rŭ meã pemaxë. Rŭ tama name i ngëma duŭxŭgŭ i tama Tupanaãrŭ orexŭ cuëxgŭxŭrŭŭãcŭma na pemaxëxŭ, natŭrŭ name na duŭxŭgŭ i meã Tupanaga ĩnŭëxŭrŭŭ meã na pemaxëxŭ. ¹⁶ Rŭ ñuxma na Tupana pexŭ yatauxchaãchixëëxŭ rŭ ;pepaxaãëgŭ na nüxŭ pepuracŭexŭ rŭ penaxŭxŭ i ngëma nŭma nanaxwèxexŭ! Erŭ ñomaŭcŭŭ i duŭxŭgŭ rŭ poraãcŭ chixexŭ naxŭgŭ. ¹⁷ Rŭ ñuxma na ngëmaãcŭ namaxëxŭ i togŭ i duŭxŭgŭ, rŭ tama name na naxrŭŭ pixŭgŭxŭ. Rŭ tama name i duŭxŭgŭ i ngëãëmarexŭrŭŭ pixŭgŭ. Natŭrŭ name nixĩ i Tupanaãrŭ orewa pengŭe na nüxŭ pecuáxŭcèx i tacŭ na yĩxŭ i tórŭ Cori pexŭ naxwèxexŭ na penaxŭxŭ. ¹⁸ Rŭ tama name i tacŭ rŭ axexŭ i ngúchixáxŭmaã pengãxë, erŭ ngëma rŭ chixexŭ tŭxŭ naxŭxëë i ngëxguma ngëmaãcŭ imaxëgu. Natŭrŭ name nixĩ i Tupanaãë i Üünëxŭna pegŭ pexãgŭ na pewa nangëxmaxŭcèx rŭ pemaã inacuáxŭcèx. ¹⁹ Rŭ name nixĩ i Tupanaãrŭ orchigagu rŭ norŭ wiyaegŭgu pegŭmaã pidexagŭ rŭ pegŭmaã nüxŭ pixu. Rŭ name nixĩ i nagúxŭraŭxŭ i norŭ wiyaegŭgu pewiyaegŭ, na ngëmaãcŭ guxŭne ya perŭ maxŭnemaã tórŭ Corixŭ picuëxŭŭgŭxŭcèx. ²⁰ Rŭ name nixĩ i guxŭguma tórŭ Cori ya Ngechuchu ya Cristuégagu moxë nüxna pexãgŭ ya Tanatŭ ya Tupana naxcèx i guxŭma.

Ñuxãcŭ meã nügŭmaã namaxë i wŭxi ya ĩpatacŭãx i Cristuaxŭ yaxôgŭxŭ

²¹ Rŭ ñuxma na Cristumëxëwa pengëxmagŭxŭ, rŭ name nixĩ i pegŭga pexĩnŭë i wŭxichigŭ, erŭ Cristuxŭ pengechaŭgŭ rŭ naga pexĩnŭë. ²² Rŭ pe-

max, Pa Ngexūgūx, rü ngēma tórü Cori naxwèxexürüü rü name nixī na petega pexīnūxū. ²³ Erü nūma ya yatü rü namèxēru nixī, ngēxgumarüü ya Cristu na guxūma i yaxōgūxūēru na yīxū. Rü nūmagü i yaxōgūxū rü Cristuxūne nixīgü rü nūma ya Cristu nixī i norü maxēxēruü yīxū. ²⁴ Rü ngēxgumarüü na Cristuga naxīnūxū i ngēma yaxōgūxū, rü ngēxgumarüü ta i ngexūgü rü name nixī na guxūguma natega naxīnūxū. ²⁵ Rü name nixī i namèxū nangechaū ya yatü, yema Cristu guxāma ga yaxōgūxexū na nangechaūxürüü. Rü yema na tūxū nangechaūxūcèx nixī ga nayuxū ga Cristu. ²⁶ Rü yemaācū nanaxū ga Cristu na nūgūxū tūxū nadexūcèx rü tūxū yaxūūnexēxūcèx i guxāma i yixema na yaxōgūxū. Rü norü oremaā rü ngēma dexá i nawa íbaiūxūmaā tūxū nimexēē na aixcūma napēxewa imexūcèx. ²⁷ Rü yemaācū tūxū nimexēē na nūgūtama tūxū nawéxūcèx na aixcūma guxūwama imexū rü na nataxuxūma i tacū i tórü chixexū rü bai i írarūwa i ngēxguma napēxewa ingugūgu. Erü tūxū nade na ixūūnegūxūcèx rü guxūwama imexūcèx i napēxewa. ²⁸ Rü yema Cristu tūxū na ngechaūxürüü, rü wūxichigü ya yatü rü nanaxwèxe na namèxū nangechaūxū ñoma nūgūxūnexū na nangechaūxürüütama. Rü yixema tümamèxū ngechaūxē rü tūgūtama nixī i tangechaūxū. ²⁹ Erü tataxuma ya texé ya tümaxūnechitama aixe, natürü tanaxūwemü rü meāma nūxna tadau ngēma Cristu guxūma i yaxōgūxūna dauxürüü. ³⁰ Rü guxāma i yixema na yaxōgūxū rü Cristutanūxū tixīgü rü ngēmaācū wūxigu namūcūgü tixīgü. Rü nūma nixī i tūxna nadauxū. ³¹ Rü ngēmacèx i Tupanaārü ore i ümatūxūwa rü ñanagürü:

“Rü wūxichigü ya yatü rü nanatūna rü naēna tá nixūgachi na namèxmaā inaxāxūcèx. Rü ngēma taxre rü wūxi tátama nixīgü”,

ñanagürü i ngēma ore. ³² Rü ngēma ore i yatūchiga rü namèxchiga rü wūxi i ore i aixcūma mexū nixī. Natürü ñuxma na pemaā nūxū chixuxū i ngēma rü Cristuchiga rü yaxōgūxūchiga nixī i chidexaxū. ³³ Natürü ngēma ore rü pechiga ta nixī. Rü ngēmacèx i wūxichigü i pema i yatügü rü name nixī i pemèxū na pengechaūxū ngēma pegūtama na pengechaūxürüü. Rü ngēxgumarüü ta i pema i ngexūgü rü penaxwèxe i petega pexīnūē.

6

¹ Pa Buxūgūx, ñuxma na Cristuarü pixīgūxū, rü name nixī i penatūga rü peega pexīnūē, erü ngēma nixī i aixcūma mexū. ²⁻³ Yerü yema mugü ga Tupana Moīchéna āxūtanūwa rü yema mu ga nūxīra wūxi ga unetamaā Tupana nūxū ixuxū, rü ñanagürü:

“¡Rü tūxū nangechaū rü tūxū rüngūxēē ya cunatü rü cue na aixcūma cutaāxūcèx rü namáxūcèx i curü maxū i ñoma i naānewa!”

ñanagürü. ⁴ Rü pemax, Pa Papágü rü Pa Mamágūx, rü tama name i penangamare rü penanuēxēē i pexacūgü. Rü name nixī i meā penayaexēē, rü peyaxucuxēgü rü penangúexēē na meā tórü Coriaxū yaxōgūāxūcèx. ⁵ Rü pemagü, Pa Duūxūgü ya Ixāārü Coriāxgüe, rü name nixī i meā naga pexīnūē i perü corigü i ñoma i naānewa. Rü penaxwèxe i nūxū pengechaūgūācūma rü nūxū pemuūēācūma meā naga pexīnūē ñoma Cristuaxū pepuracūexürüü. ⁶ Rü tama name ega perü corigü pexū dauenūguxicatama meā nūxū pepuracūe na ngēmaācū pemaā nataāxūcèx. Natürü ñuxma na Cristuarü duūxūgü pixīgūxū, rü name nixī i guxūma i perü ngúchaūmaā penaxū i ngēma Tupana pexū naxwèxexū. ⁷ Rü ngēma puracü i perü cori pexna āxū, rü name nixī i petaāēācūma penaxū, ñoma tórü Cori ya Ngechuchuaxū pepuracūexürüü. Erü aixcūma nūxū nixī i pepuracūexū rü tama i duūxūgūaxū. ⁸ Rü name nixī i ngēmaācū meā pepuracūe, erü nūxū pecuèx rü wūxichigü i duūxū rü woo wūxi i coriarü duūxū yixīgu rü ēxna taxúxearü yixīgu, natürü tórü Cori

ya Ngechuchu tá nüxŭ nanaxŭtanŭ naxcèx i ngēma mexŭ i naxŭxŭ. ⁹ Rŭ pemax, Pa Corigŭx, rŭ name nixŭ i ngēxgumarŭŭ ta meã namaã pemaxē i perŭ duŭxŭgŭ. Rŭ tama name i tacŭ rŭ chixexŭmaã penaxãŭxŭne. Rŭ nüxna pecuèxãchie na pema rŭ ta perŭ duŭxŭgŭrŭŭ tŭrŭ Cori ya daxŭgucŭmèxèwa na pengèxmagŭxŭ. Rŭ aixcŭma guxãma i yixema rŭ tawŭxigu i napèxewa ya tŭrŭ Cori ya Cristu.

Cristuarŭ duŭxŭgŭlarŭ poxŭruŭ i Tupana nüxna ãxŭ na nügŭ namaã inapoxŭgŭxŭcèx naxchaxwa i Chataná

¹⁰ Rŭ ñuxma na tŭrŭ Corimŭcŭgŭ pixŭgŭxŭ, Pa Chaueneègŭx, rŭ name nixŭ i pegŭ peporaexèe na penayaxuxŭcèx i ngema pora i nawa ne ŭxŭ. Erŭ nŭma rŭ naporaxŭchi. ¹¹ Rŭ pegŭ panaxŭ i guxŭma i ngema poxŭruŭgŭ i Tupana pexna ãxŭ na ngēmamaã pegŭ ípepoxŭxŭcèx i ngēxguma Chataná pexŭ womŭxèèchaŭgu! ¹² Erŭ tama duŭxŭgŭ i taxrŭŭ ãmachixŭ rŭ ãxchinaxãxŭmaã nixŭ i yigŭ idaixŭ. Natŭrŭ ngēma namaã yigŭ idaixŭ nixŭ i Chatanáãrŭ duŭxŭgŭ i ngoxogŭ i chixexŭgŭ i poraexŭ. Rŭ nŭmagŭ rŭ namuxŭchi rŭ tŭxŭ narŭporamaègŭchaŭ. Rŭ tama nüxŭ tadaugŭ erŭ naãègŭ nixŭ, natŭrŭ guxŭwama nangèxmagŭ i ñoma i naãnewa. Rŭ namaã inacuèx i ñoma i naãne i chixexŭ. ¹³ Rŭ ngēmacèx name nixŭ i penayauxgŭ i guxŭma i ngēma poxŭruŭgŭ i Tupana pexna ãxŭ, na ngēmaãcŭ pegŭ ípepoxŭxŭcèx i ngēxguma ngēma naãègŭ pexŭ nachixexeèchaŭgu. Rŭ ngēmaãcŭ tãŭtãma nüxŭ penguxŭ i ngēma naãègŭ i chixexŭ rŭ tá nüxŭ perŭporamaegŭ. ¹⁴ Rŭ ngemacèx name nixŭ i mea pegŭna pedaugŭ na tama perŭ uwanŭmèxègu peyixŭcèx. Rŭ penaxwae na pixaixcŭmagŭxŭ na taxuwama nachixexŭcèx i perŭ maxŭ. ¹⁵ Rŭ name nixŭ i guxŭguma ípememaregŭ na nüxŭ peyarŭxugŭexŭcèx i ngema ore i ngŭxmŭxèeruxŭ. ¹⁶ Rŭ ngema guxŭarŭ yexera ixŭxŭ nixŭ na aixcŭma Cristuaxŭ peyaxŭgŭxŭ na ngēmaãcŭ pegŭ ípepoxŭxŭcèx nüxna i Chatanáne i ãŭcŭmaxŭ i namaã tŭxŭ nachixexeèchaŭxŭ. ¹⁷ Rŭ name nixŭ i penayaxu i ngema maxŭ i taguma gŭxŭ na ngemamaã pegŭ ípepoxŭxŭcèx ñoma wŭxi i churara i napatèxemaã nügŭ ípoxŭxŭrŭxŭ. Rŭ ngema Tupanaarŭ Ore i Naãe i Üünexŭ pexna ãxŭ, rŭ ngema nixŭ i pexne ixŭxŭ. ¹⁸ Rŭ tama name i nüxŭ perŭchaue na peyumŭxègŭxŭ. Natŭrŭ name nixŭ i guxŭguma Tupanaãe i Üünexŭãrŭ ngŭxèèmaã Tupanaxŭ pecèèxŭ. Rŭ penaxwae i pexuãe na taguma nüxŭ perŭxoexŭcèx. Rŭ ngemaãcŭ name nixŭ i naxcèx peyumŭxègŭ i guxŭma i Tupanaarŭ duŭxŭgŭ. ¹⁹ Rŭ ngēxgumarŭŭ ta chanaxwèxe i chauxcèx peyumŭxègŭ na Tupana choxŭ rŭngŭxèèxŭcèx rŭ choxna naxããxŭcèx i ngēma ore i nŭma nanaxwèxexŭ na nüxŭ chixuxŭ. Rŭ chanaxwèxe i Tupanana naxcèx peca na choxŭ naporaxèèxŭcèx na tama chamuŭãcŭma nüxŭ chixuxŭcèx rŭ mea chanangoxèèxŭcèx i ngema norŭ ore i Cristuchiga ga noxri exŭguxŭ i ñuxma maxŭ tŭxna ãxŭ. ²⁰ Rŭ ngēma orexŭ na chixuxŭcèx nixŭ ga Tupana nügŭchicŭŭ choxŭ inamuxŭ. Rŭ ngēmagaŭ nixŭ i chapoxcuxŭ i ñuxmax. Rŭ chanaxwèxe i chauxcèx peyumŭxègŭ na tama chamuŭãcŭma meãma nŭma nanaxwèxexŭãcŭma nüxŭ chixuxŭcèx i ngēma norŭ ore.

Pauru nanaguxèe ga norŭ popera rŭ wenaxãrŭ yema duŭxŭgŭxŭ narŭmoxè

²¹ Rŭ taeneè ya nüxŭ ingechaŭcŭ ya Tíquicu, rŭ chauxrŭŭ aixcŭma meãma napuracŭ i tŭrŭ Coriarŭ puracŭwa. Rŭ nŭma tá pemaã nüxŭ nixu i guxŭma i chauchiga na ñuxãcŭ choxŭ naxŭpetŭxŭ i nuã. ²² Rŭ ngēmacèx nixŭ i pexŭtawa chanamuxŭ, na pemaã nüxŭ yaxuxŭcèx na ñuxãcŭ toxŭ naxŭpetŭxŭ, na ngēmaãcŭ pexŭ nataèxèèxŭcèx. ²³ Pa Toeneègŭ i Yaxŭgŭxŭx, chanaxwèxe i Tanatŭ ya Tupana rŭ tŭrŭ Cori ya Ngechuchu ya Cristu pexŭ narŭ-ngŭxèègŭ i guxãma i pema na meã pegŭmaã pemaxèxŭcèx, rŭ aixcŭma petaãègŭxŭcèx, rŭ

pegü pengechaŭgüxúcèx rü meã peyaxõgüxúcèx. ²⁴ Rü chanaxwèxe i Tanatü ya Tupana nüxü narüngüxëẽ i guxüma i ngẽma duŭxügü i aixcümaxüchi tórü Cori ya Ngechuchu ya Cristuxü ngechaŭgüxü. Rü ngẽmaãcü yĩ.

Rü nuãma pexna,
Pauru

POPERA GA PIRIPUWA YEXMAGŪXŪ GA YAXŌGŪXŪTANŪWA NAMUXŪ GA PAURU

Pauru rü nüxŭ narümoxē ga yema yaxōgūxŭ ga Piripuwa yexmagūxŭ

¹ Pa Toeneēgŭ ya Piripuwa Ngēxmagūxex, choma i Pauru rü namaã i taeneē i Timutéu nixŭ i pexcèx tanaxūmatūxŭ i ñaã popera. Rü toma rü Ngechuchu ya Cristuarü puracütanūxŭ tixŭgŭ. Rü pexcèx tanaxūmatü i pema i yaxōgūxŭârü ãēxgacŭgŭ na pixŭgūxŭ, rü pema i tupaucawa ngŭxēētaeruŭgŭ na pixŭgūxŭ, rü guxāma i pema i Ngechuchu ya Cristuaxŭ yaxōgūxe. ² Rü chanaxwèxe i Tanatü ya Tupana rü tórü Cori ya Ngechuchu ya Cristu poraãcŭ pexŭ narüngŭxēē rü pexŭ nataãēxēē.

Pauru rü yema yaxōgūxŭcèx nayumüxē

³ Rü guxŭguma i ngēxguma pexna chacuèxāchigu rü Tupanana moxē chaxã i pexcèx. ⁴ Rü ngēxguma chayumüxēgux, rü guxŭguma chataãēãcŭma pexcèx chayumüxē i guxāma i pemax. ⁵ Erü pema rü noxritama Tupanaârü orexŭ pexŭnūegumama rü poraãcŭ choxŭ perüngŭxēē na nüxŭ chixuxŭcèx i norü ore i mexŭ. Rü ñuxma rü ta choxŭ perüngŭxēēgüecha. ⁶ Rü Tupana rü marü inanaxŭgŭ i wŭxi i mexŭ i puracŭ i perü maxŭwa. Rü nüxŭ chacuèx rü nŭma rü guxŭgutāma nanaxŭecha i ngēma puracŭ ñuxmatáta yanguxēēã i ngēxguma ínanguxgu ya Ngechuchu ya Cristu. ⁷ Rü aixcŭma name na ngēmaãcŭ pemaã nagu charŭxŭnŭxŭ, erü poraãcŭ pexŭ changechaŭ rü aixcŭma Tupana wŭxigu tŭxŭ narüngŭxēē i guxāma i yixema. Rü woo ñuxma na chapoxcuxŭ rü éxna ega ãēxgacŭgŭpéxewa choxŭ nagagŭgu, rü Tupana choxŭ narüngŭxēē i ngēxguma norü ore i mexŭetüwa chideaxgu rü namaã nüxŭ chixuxgu i ãēxgacŭgŭ na aixcŭma yŭxŭ i ngēma orewa nüxŭ iyarüngaŭxŭ i tórü maxŭ i taguma gúxŭ. Rü nüxŭ chacuèx rü ngēma choxŭ nangŭxēēxŭãcŭma, rü pexŭ rü ta narüngŭxēē. ⁸ Rü Tupana nüxŭ nacuèx na ñuxãcŭ poraãcŭ pexŭ chadauxchaŭxŭ rü pexŭ na changechaŭxŭ i guxāma i pemax, ngēma Ngechuchu ya Cristu pexŭ na ngechaŭxŭrŭ. ⁹ Rü chorü yumüxēwa naxcèx íchaca na yexeraãcŭ pegŭ pengechaŭgŭxŭcèx rü Tupanaxŭ pengechaŭgŭxŭcèx. Rü naxcèx íchaca na yexeraãcŭ nüxŭ pecuáxŭcèx i guxŭma i Tupanachiga rü yexeraãcŭ nüxŭ pecuáxŭcèx na ñuxãcŭ nanaxwèxexŭ na naxcèx pemaxēxŭ. ¹⁰ Rü ngēmaãcŭ pexcèx chayumüxē erü chanaxwèxe na meã penangugŭxŭ i tacŭ nixŭ i aixcŭma mexŭ i Tupanapéxewa na penaxŭxŭcèx i ngēma. Rü chanaxwèxe na aixcŭma namexŭ i perü maxŭ na taxucèxma tacŭcèx Tupana pexna çaxŭcèx i ngēxguma ínanguxgu ya Cristu. ¹¹ Rü naxcèx íchaca na Ngechuchu ya Cristu pexŭ narüngŭxēēxŭ na aixcŭma namexŭcèx i perü maxŭ rü aixcŭma penaxŭxŭcèx i ngēma Tupanapéxewa mexŭ na ngēmaãcŭ meã pemaxēãcŭma Tupanaxŭ picuèxŭgŭxŭcèx.

Chauxcèx rü Cristuarü ngŭchaŭ na chaxŭxŭcèx nixŭ i chamaxŭxŭ

¹² Pa Chaueneēgŭx, rü chanaxwèxe i nüxŭ pecuèx rü guxŭma i ngēma choxŭ üpetŭxŭ, rü aixcŭma ngēmaãcŭ choxŭ naxüpetü na yexeraãcŭ nat-achigaxŭcèx i Tupanaârü ore i mexŭ. ¹³ Rü ñuxma i núma rü guxŭma i churaragŭ i ãēxgacŭpataarü dauruŭgŭ rü guxŭma i togŭ rü ta nüxŭ nacuèxgŭ na chapoxcuxŭ naxcèx na Cristuarü duŭxŭ chiŭxŭ. ¹⁴ Rü ñuxma na chapoxcuxŭ rü muxŭma i taeneēgŭ i yaxōgūxŭ rü tama namuēēãcŭma

nūxŭ nangúchaŭ na nūxŭ yaxugüexŭ i Tupanaârü ore i mexŭ. Rŭ yexeraâcü tórü Coriaxŭ nayaxögŭ. ¹⁵ Rŭ aixcüma nixŭ i ñuxre i duŭxŭgŭ rŭ togŭxŭ na yaxãũxãchixẽẽxŭcèxm̄are nūxŭ nixugüexŭ i Cristuchiga, erŭ togŭxŭ narŭyexerachaŭ. Natürŭ nangẽxma i togŭ i duŭxŭgŭ i aixcüma mexŭgu naxĩnũeâcüma meã nūxŭ ixugüexŭ i ngẽma ore. ¹⁶ Rŭ ñuxre i duŭxŭgŭ rŭ Cristuchigaxŭ nixugüe erŭ choxŭ nangechaŭgŭ rŭ nūxŭ nacuèxgŭ na Tupana nuxma choxŭ muxŭ na íchanapoxŭxŭcèx i norŭ ore i mexŭ. ¹⁷ Natürŭ nangẽxma i togŭ i noxrütama ngúchaŭcèx daugŭxŭ rŭ ngẽmacèx nūxŭ ixugüexŭ i ngẽma ore. Rŭ nŭmagŭ rŭ tama mexŭgu narŭxĩnũe, natürŭ naxcèx nadaugŭ na yexeraâcü choxŭ naguxchaxẽẽgŭãxŭ i ñuxma na chapoxcuxŭ. ¹⁸⁻¹⁹ Natürŭ nũetama nixŭ ega woo ngẽmaâcü yixŭgu. Erŭ woo mexŭ i norŭ ngúchaŭmaã yixŭgu rŭ êxna tama, natürŭ Cristuchigaxŭ nixugüe. Rŭ ngẽma rŭ wŭxi i taãe nixŭ i chauxcèx. Rŭ guxŭgutáma chataãẽẽcha erŭ nūxŭ chacuèx rŭ guxŭma i ngẽma rŭ chorŭ mexŭcèx tá nixŭ erŭ chauxcèx peyumüxègŭ rŭ choxŭ narŭngŭxẽẽ i Tupanaãe i Üünexŭ i Ngechuchu ya Cristuxŭ rŭngŭxẽẽxŭ. ²⁰ Rŭ ngẽma poraâcü chanaxwèxexŭ nixŭ na taguma tacŭ rŭ chixexŭ chaxŭxŭ na taxucèxma chaugŭcèx chaxãnexŭcèx. Rŭ chanaxwèxe i guxŭguma íchamemare na guxãpèxewa tama chamuŭãcüma Cristuchigaxŭ chixuxŭ. Rŭ ñuxma na chamaxŭxŭ rŭ woo chayuxgu rŭ chanaxwæe i guxŭguma aixrŭgumarŭtama chaugagu Cristuxŭ nicuèxŭŭgŭ i duŭxŭgŭ. ²¹ Erŭ chauxcèx rŭ Cristuarŭ ngúchaŭ na chaxŭxŭcèx nixŭ i na chamaxŭxŭ. Natürŭ ngẽxguma chayuxgux rŭ ngẽma rŭ ta name, erŭ Cristuxŭtawa tá changẽxma i ngẽxguma. ²² Natürŭ tama nūxŭ chacuèx i tacŭ nixŭ i rŭmemaèxŭ i chauxcèx, ngẽma na chayuxŭ rŭ êxna na chamaxŭxŭ. Erŭ ñuxma na chamaxŭxŭ rŭ choxŭ natauxcha na chanaxŭxŭ i tórü Coriarŭ puracŭ. ²³ Rŭ ngẽmacèx tama nūxŭ chacuèx na tacŭ yŭixŭ i chauxcèx rŭmemaèxŭ i ngẽma taxrewa. Erŭ ñuxguacŭ rŭ chanaxwèxe na chayuxŭ na Cristuxŭtawa changẽxmaxŭcèx. Rŭ ngẽma nixŭ i aixcüma yexera rŭmemaèxŭ i chauxcèx. ²⁴ Natürŭ i pexcèx rŭ nagu charŭxĩnŭ rŭ narŭmemaè nixŭ na ñoma i chaxunemaãtama na chamaxŭxŭ na ngẽmaâcü pexŭ charŭngŭxẽẽxŭcèx. ²⁵ Rŭ ñuxma na aixcüma meã nūxŭ chacuáxŭ na pechoxwèxexŭ, rŭ ngẽmawa nūxŭ chacuèx na tãtãtama paxa chayuxŭ. Rŭ ngẽmaâcü tá chamaxãma na pexŭ charŭngŭxẽẽxŭcèx na yexeraâcü Cristucèx pemaxèxŭcèx rŭ yexeraâcü taãẽãcüma nūxŭ peyaxögŭxŭcèx. ²⁶ Rŭ ngẽmaâcü wena táxarŭ petanüwa changẽxma. Rŭ ngẽxguma wena choxŭ pedaugŭgu rŭ aixcüma tá petaãègŭ erŭ tá pexŭ nangẽxma na tacŭcèx Ngechuchu ya Cristuxŭ picuèxŭŭgŭxŭ. ²⁷ Rŭ ngẽma guxŭârŭ yexera rŭmemaèxŭ nixŭ na naxcèx pedauxŭ na meã pemaxèxŭ, ngẽma Cristuarŭ ore pemaã nūxŭ ixuxŭrŭŭ. Rŭ ngẽxguma petanüwa chaxŭxgu rŭ êxna woo tama ngema chaxŭxgu, natürŭ nūxŭ chaxĩnũchaŭ na guxãma wŭxigu pegŭ peporaexẽẽxŭ na taguma nūxŭ perŭchauxŭcèx na aixcüma peyaxögŭxŭ, rŭ ngẽmaâcü Tupanaãxŭ pepuracŭexŭ na yexeraâcü yaxŭchigŭxŭcèx i norŭ ore i mexŭ. ²⁸ Rŭ ngẽmacèx penaxwèxe i tama texèxŭ pemuŭẽãcüma nūxŭ pixugüama i ngẽma ore. Rŭ ngẽma na tama nūxŭ pemuŭèxŭ rŭ ngẽma rŭ wŭxi i cuèxruŭ tá nixŭ nūxŭ i perŭ uwanŭgŭ. Rŭ ngẽmawa tá nūxŭ nacuèxgŭ na poxcuwa tá naxŭxŭ i nŭmagŭ natürŭ pema rŭ tá maxŭwa na pexŭxŭ. Rŭ Tupana tá nixŭ ya pexŭ rŭngŭxẽẽcŭ na tama nūxŭ pemuŭèxŭcèx i ngẽma perŭ uwanŭgŭ. ²⁹ Rŭ Tupanaga nixŭ na Cristuaxŭ peyaxögŭxŭ. Rŭ ngẽxgumarŭŭ ta naga nixŭ na Cristucèx ngúxŭ pingegŭxŭ. Rŭ ngẽma rŭ wŭxi i ngŭxẽẽ nixŭ i pexna naxãxŭ ya Tupana. ³⁰ Pema rŭ choma rŭ wŭxigu Tupanaârŭ puracŭwa tangẽxmagŭ, rŭ tanaxüama i ngẽma puracŭ ega woo texé tŭxŭ naguxchaxẽẽgux. Rŭ ũpa rŭ marŭ choxŭ pedau na ñuxãcü

meã chanaxüxü i ngẽma puracü, rü ñuxma rü ta nüxü picuáchiga na ñuxãcü chanaxüamaxü woo namu i chorü guxchaxügü.

2

Cristu rü ñoma taxuüma yixüürüü nügü nixixẽ rü yemacèx ga Tupana rü guxüärü ãëxgacüxü nayaxixẽ

¹ Rü dücax, Pa Chaueneëgüx, rü ñuxma na Cristuarü duüxügü pixigüxü, ¿rü aixcüma yixü i nüma pexü nataãëxëxü? ¿Rü aixcüma yixü i petaãëgüxü erü nüma pexü nangechaü? ¿Rü aixcüma yixü i Tupanaãe i Üünexü pexütawa ngëxmaxü? ¿Rü aixcüma yixü i pegü pengechaügüxü rü pegüxü pengechaütümüügüxü? ² Rü ngëxguma chi ngẽmaãcü yixigu, rü chanaxwèxe i guxãma wüxigu perüxñüë, rü aixcüma guxãma pegü pengechaügü, rü aixcüma guxãma ñoma wüxitama piixüürüü na yixü i peãe, rü guxãma wüxitama i ngúchaüçèx pedau. Rü ngëxguma ngẽmaãcü pemaxëgu rü wüxi i chorü taãe tá nixi. ³ Rü tama name na togüarü yexera pegü pixigüxëxü rü pegü picuèxüügüxü. Natürü narümemae nixi i nagu perüxñüëxü na ngema togü rü perü yexera nüxü nacuègüxü. ⁴ ¿Rü tama pegüguxicatama perüxñüë, natürü pegü peporaexëe na togüxü perüngüxëëgüxüçèx! ⁵ Rü name nixi ga yema Ngechuchu ya Cristu nagu rüxñüxügu na perüxñüëxü i pemax. ⁶ Yerü nüma rü woo ga Tupanaxüchi na yixü, natürü tama nügü nicuèxüxü na Tupana yixixü. ⁷⁻⁸ Rü yemacèx yéma nanatèx ga norü mexügu ga daxüguxü ga naãnewa. Rü wüxi i duüxü i togüaxü puracüxüürüü nügü nixixëe. Rü ñoma wüxi i duüxüürüü ñoma ga naãnegu nabu. Rü yexguma marü duüxü yixigu ga nümax, rü ñoma taxuüma yixüürüü nügü nixixëe. Rü Tupanaga naxñü, rü yemaãcü curuchagu nayu woo wüxi ga añexüchi na yixü ga yema. ⁹ Rü yemacèx ga Tupana rü guxüétüwa nanangexmaxëe rü nayangucuchixëe na guxüma i ãëxgacügüétüwa nangëxmaxüçèx. ¹⁰ Rü yemaãcü nanaxü ga Tupana na Ngechuchupëxegu tacaxápüxügüxüçèx rü nüxü ticuèxüügüxüçèx ya guxãma ya texé ya daxüguxü i naãnewa ngëxmagüxe, rü guxãma i ñoma i naãnewa ngëxmagüxe, rü guxãma ya texé ya marü yuexe. ¹¹ Rü yemaãcü Tupana ãëxgacüxü nayaxixëe na guxãma nüxü ixuxüçèx na tórü Cori yixü ya Ngechuchu ya Cristu rü ngẽmaãcü nüxü icuèxüügüxüçèx ya Tanatü ya Tupana.

Cristuarü duüxügü rü ñoma omügürüü nixigü i natanüwa i ngẽma duüxügü i tama yaxögüxü

¹² Rü ñuxma na nüxü pecuáxü na ñuxãcü Nanatüga naxñüxü ga Cristu, rü chanaxwèxe i chauga pexñüë, Pa Chaueneëgü ya Pexü Changechaügüxe. Rü yéma petanüwa chayexmagu chauga na pexñüëxüärü yexera chanaxwèxe i chauga pexñüë i ñuxma na tama petanüwa changëxmaxü. Rü chanaxwèxe i Tupanaxü pemuñëãcüma naxçèx pedaugüama i perü maxü i taguma gúxü. ¹³ Erü Tupana nixi ya perü maxüwa puracücü na mexügu perüxñüëxüçèx. Rü nüma nixi i pexü nangüxëëxü na naga pexñüëxüçèx rü peyanguxëëxüçèx i ngema norü ngúchaxü. ¹⁴ ¿Rü guxüma i ngema Tupanacèx pexüxüwa rü tama name i oöcü penaxü rü pegü naxçèx pechoxügagü! ¹⁵⁻¹⁶ Rü name i ngẽmaãcü meã pemaxë na taxüema tacü rü chixexüxü pewa iyangauxüçèx. Rü penaxwèxe i mexü i Tupanaxäcügü pixigü i natanüwa i ngẽma duüxügü i chixexü rü chixëãëgümarexü. Rü ngëxguma ngẽma duüxügümaã nüxü pixügüyane i ngẽma ore i mexü i tüxü maxëxëëxü, rü yoxni natanüwa rü ñoma woramacurigü ya ëñexüwa ibáixgücürüü tá pixigü. Rü ngẽmaãcü i ngëxguma wena núma naxüxgu ya Cristu rü poraãcü tá pemaã chataãe erü tá nüxü chadau na tama natüçèxmamare yixü ga yema puracü ga petanüwa

chaxüxü. ¹⁷ Rü ngēma ñuxma na meã peyaxōgüxü, rü ngēma nixī i perü ãmare i Tupanana pexãxü. Rü ngēma na meã yanguxüçèx i ngēma perü ãmare i Tupanapēxewa, rü choma rü íchamemare na Tupanacèx ichanaxãxü i chorü maxü rü chayuxü. Rü ngēmacèx woo chayuxgu rü wüxi i taãe tá nixī i chauxcèx. Rü chanaxwèxe i pemagü rü ta ngēmacèx wüxigu chomaã petaãëgü. ¹⁸ Rü ngēmacèx ega ngēma ore i mexüçèx chayuxgux, rü tama name na pengechaügüxü natürü chanaxwèxe na wüxigu chomaã petaãëgüxü.

Timutéu rü Epaporu- dítuchiga

¹⁹ Rü ngëxguma tórü Cori ya Ngechuchu naxwèxegu rü paxa petanüwa chanamuëga ya taeneë ya Timutéu na pexü na íyadauxüçèx rü chataãëxüçèx i ngëxguma núma nangeãgu i pechiga. ²⁰ Rü aixcüma nataxuma i to i chorü ngüxëëruü i choma nagu charüxñüxügu rüxñüxü, rü Timutéuxicatama nixī. Rü nataxuma i to i naxrüü aixcüma pegu rüxñüxü rü pexü rüngüxëëchaüxü. ²¹ Erü guxüma i togü rü naxcèx nadaugü i noxrütama ngúchaügü, rü tama aixcüma nagu narüxñüë i ngēma Ngechuchu ya Cristuarü ngúchaü. ²² Natürü i pema rü marü nüxü pecuèx na ñuxãcü meã namaxüxü i Timutéu, rü ñuxãcü choxü nangüxëëxü i Tupanaärü orearü uchigawa, ñoma wüxi i buxü i nanatüxü rüngüxëëxürüü. ²³ Rü ngēmacèx i ngëxguma nüxü chacuèxgu na ñuxãcü tá choxü na naxüpetüxü i núma, rü ñuxüchi ngema petanüwa chanamuxchaü i Timutéu na pexü íyadauxüçèx. ²⁴ Rü ngëxgumarüü ta nagu charüxñü rü tórü Cori rü aixcüma tá choxü narüngüxëë na chomatama ngema petanüwa íchayadauxüçèx. ²⁵ Rü ngëxgumarüü ta chauxcèx name nixī i ngema petanüwa chanamuxü i taeneë i Epaporudítu. Rü nüma nixī ga pematama chauxcèx núma penamuxü na choxü nangüxëëxüçèx. Rü nüma rü chomücü nixī i Tupanaärü puracüwa, rü poraãcü choxü narüngüxëë i Tupanaärü orearü uwa. ²⁶ Rü poraãcü nüxü nangúchaü na pexü íyadauxü i guxãma i pemax. Rü poraãcü naxoegaãe, yerü pema rü nüxü pecuáchiga ga na yaðaawexü ga númax. ²⁷ Rü aixcüma nixī ga na yaðaawexü, rü wixguxüchi taèx nayu. Natürü Tupanaãxü nangechaütümüü rü choma rü ta nüxü changechaütümüü, rü yemacèx naxcèx nayataanexëë na tama yexeraãcü changechaüxüçèx. ²⁸ Rü ngēmacèx rü yexeraãcü chanaxwèxe na paxa petanüwa chanamuxü i Epaporudítu, na pema rü petaãëgüxüçèx i ngëxguma wena nüxü pedaugügu. Rü ngëxguma i choma rü tá ta chataãe i ngëxguma nüxü chacuèxgu na petanüwa nangëxmaxü na pexü nangüxëëxüçèx. ²⁹ Rü chanaxwèxe i tórü Coriégagu petaãëgüãcüma meã penayaxu erü peeneë nixī. Rü name nixī i nüxü pengechaügü i guxüma i ngēma duüxügü i Epaporudíturüü ixīgüxü. ³⁰ Yerü nüma ga Epaporudítu rü yema na poraãcü nawa napuracüxü ga Cristuarü puracü, rü yemacèx wixguxüchi taèx nayu. Rü äücümaxüwa nügü nayexmaxëë na pechicüü choxü nangüxëëxüçèx.

3

Ngēma na Cristuxü icuáxü rü ngēma nixī i guxüärü yexera rümemaëxü

¹ Rü ñuxma Pa Chaueneëgüx, rü chanaxwèxe i petaãëgü erü tórü Coriarü duüxügü pixīgü. Rü yema ore ga noxri pexcèx chaxümatüxü rü tama choxü nawèxtümüü na wena pexcèx chanaxümatüxü erü aixcüma pexü name i ngēma ore. ² ¡Rü pegüna pedèux nüxna i ngēma duüxügü i chixri maxëxü rü chixexümaã pexü ixucuxëgüxü! Rü nümagü nixī i nüxü yaxugüexü rü ngëxguma tama yigü íwiechëxmüpëxechiraügu, rü taxucürüwama Tupanapēxewa time. ³ Natürü yíxema aixcüma Tupanapēxewa imexë, rü yixema tixīgü. Rü Tupanaxü ticuèxüügü i Naãe i Üünexüärü

ngũxēēmaã. Rũ tataãēgũ erũ Ngechuchu ya Cristuarũ duũxũgũ tixĩgũ. Rũ tama tayaxõgũ na ngẽma yigũ íwiewchẽxmũpẽxechiraũxũcèx Tupanapẽxewa imexũ. ⁴ Rũ choma chi waxi nixĩ i guxũ i togũarũ yexera chayaxõxũ i ngẽma wiechẽxmũpẽxechiraũchiga. Rũ tataxu chima ya togue ya texé chauxrũũ yaxõxē i ngẽmachiga. ⁵ Yerũ yexguma 8 ga ngunexũ chauétũ yixĩgu ga na chabuxũ, rũ choxũ ínawiewchẽxmũpẽxechiraũgũ, erũ Yudíu chixĩ. Rũ Beyamítanũxũ chixĩ. Rũ chaunatũ rũ chaué rũ Yudíugũ tixĩgũ, rũ ngẽmacèx i choma rũ Yudíuxũchi chixĩ. Rũ choma rũ Parichéuchirẽx chixĩ, rũ pema nũxũ pecuèx rũ ngẽma Parichéugũ rũ meãma nanaxaure i Tupanaãrũ mugũ ga Moĩché ũmatũxũ. ⁶ Rũ yema na meã chayanguxẽẽchaũxũcèx ga yema mugũ ga Moĩché ũmatũxũ, rũ yemacèx nawe chingẽchigũ ga yema duũxũgũ ga Ngechuchuaxũ yaxõgũxũ. Rũ yema na aixcũma meã chanaxaurexũcèx ga yema mugũ ga Moĩché ũmatũxũ, rũ yemacèx taxucürũwama texé chauchigaxũ tixu ga tama na chaxaurexũ. ⁷ Natürũ guxũma ga yema ũpa chauxcèx mexũ, rũ ñuxma rũ taxuwama choxũ name erũ marũ íchanatèx na Cristuaxũĩcatama chayaxõxũcèx. ⁸ Rũ ñuxma na Ngechuchu ya Cristu ya chorũ Corixũ na chacuáxũ, rũ chauxcèx rũ guxũma ga yema ũpa nagu chixũxũ rũ taxuwama name, erũ ngẽma na Cristuxũ na chacuáxũ rũ guxũarũ yexera narũmemaẽ. Rũ guxũma ga yema mugũ ga noxri nagu chixũxũ rũ marũ nũxũ charũxo na Cristuwe charũxũxũcèx. Rũ chauxcèx rũ ñoma guxchirerũ nixĩ ga yema ũpa nagu chixũxũ ega Cristumaã nũgũ chananguxgu. ⁹ Rũ yemaãcũ nũxũ charũxo ga guxũma nagagu ga yema na Cristuarũ duũxũ na chiĩxũcèx. Rũ ñuxma rũ Tupanapẽxewa chame erũ Cristuaxũ chayaxõ. Rũ tama ngẽma na chamecũmaxũcèx rũ ěxna mugũ chaxaurexũcèx nixĩ na chamexũ i napẽxewa. Natürũ ngẽma na Cristuaxũ chayaxõxũcèx nixĩ i nũgũcèx choxũ namexẽẽxũ ya Tupana. ¹⁰⁻¹¹ Rũ ngẽma ñuxma chanaxwèxexũ nixĩ na aixcũma Cristuxũ chacuáxũ rũ chowa na nangẽxmaxũ i ngẽma pora ga wena Cristuxũ írũdaxẽẽxũ i ñuxma nũxũ ngẽxmaxũ. Rũ yema ngũxũ na yangexũ ga nũma rũ na nayuxũ rũ ngẽxgumarũũtama chanaxwèxe i íchamemare na naxcèx ngũxũ chingexũ rũ naxcèx chayuxũ na yixcama choma rũ ta yuwa ícharũdaxũcèx.

Pauru naxcèx nadau na Cristucèx namaxũxũ ñuxmatáta Tupanax- ũtawa nangu

¹² Rũ ñuxma na ngẽma ñachaxũ pemaã rũ tama chanaxwèxe i nagu perũxĩnũe na guxũxũ chacuáxũ i Cristuchiga, rũ ěxna guxũwama na chamexũ. Natürũ guxũ i ngunexũgu rũ naxcèx chadauama na Ngechuchu ya Cristuarũ ngũchaũ na chaxũxũcèx, yerũ yemacèx nixĩ ga nũma ga chauxcèx nadauxũ ga noxrix. ¹³ Pa Chaueneẽgũx, pemaã nũxũ chixu rũ chomatama meãma nũxũ chacuèx rũ ñuxma rũ ta tautama nawa changu i ngẽma naxcèx chadauxũ. Natürũ i ñuxma rũ marũ nũxũ icharũngũma i guxũma ga yema noxri nagu chixũxũ. Rũ ñuxma rũ chaugũ chaporaxẽẽ na aixcũma Cristucèx na chamaxũxũ na nawa changuxũcèx i ngẽma maxũ i chopẽxewaama ngẽxmaxũ. ¹⁴ Rũ ngẽmacèx i ñuxma rũ naxcèx chadau na aixcũma Cristucèx chamaxũxũ ñuxmatáta Tupanaxũtawa changu. Erũ chanayauxchaũ i ngẽma ãmare i nũma daxũguxũ i naãnewa naxcèx taxcèx nangemaxũ i yixema na Ngechuchu ya Cristuarũ duũxũgũ ixĩgũxũ. ¹⁵ Rũ guxãma i yixema na aixcũma Cristuaxũ yaxõgũxũ, rũ name nixĩ i ngẽmaãcũ nagu tarũxĩnũe. Natürũ ngẽxguma chi texé i petanũwa toguama tarũxĩnũgu, rũ Tupana tá tũxũ nũxũ nacuèxẽẽ i ngẽma nũma nanaxwèxexũ na nũxũ tacuáxũ. ¹⁶ Rũ ngẽma inaxwèxexũ nixĩ na aixcũma naga ixĩnũeẽchaxũ rũ meãma nagu ixĩxũ i ngẽma ore i marũ nũxũ icuáxũ. ¹⁷ Pa Chaueneẽgũx, chanaxwèxe i chauxrũũ nagu pexĩ i ngẽma pexũ nũxũ chadauxẽẽxũ na namexũ. ;Rũ penangugũ na ñuxãcũ

meã namaxẽxũ i ngẽma togũ i duũxũgũ i toma tamaxẽxũãcũma maxẽxũ! ¹⁸ Rũ marũ muẽxpũxcũna pemaã nũxũ chixu, rũ ñuxma rũ changechaũãcũma rũ chaxauxãcũma wena pemaã nũxũ chixu rũ nangẽxma i muxũma i duũxũgũ i Cristuarũ uwanũrũũãcũma maxẽxũ. Rũ nũmagũ rũ tama nũxũ nacuẽxgũchaũ na Cristu curuchagu naxcẽx yuxũ. ¹⁹ Natũrũ ngẽma duũxũgũ rũ tá dũxwa Tupana nanapoxcue. Rũ ngẽma naxũneãrũ ngũchaũ nixĩ i namaã natupanaãxũ. Rũ woo nũxũ nacuẽxchirẽx na wũxi i ãne na yĩxũ i ngẽma chixexũ natũrũ namaã nataãẽgũama. Rũ ñoma i naãneãrũ ngẽmaxũguxicatama narũxĩnũẽ. ²⁰ Natũrũ i yixema rũ daxũguxũ i naãnewa tũxũ nangẽxma i tachica. Rũ ítananguxẽẽ na daxũguxũ i naãnewa taxcẽx ne naxũxũ ya tórũ Cori ya Ngechuchu ya Cristu ya tórũ Maxẽxẽẽruũ. ²¹ Rũ ñãã taxũne i yuxwẽxexũ rũ nũma ya Cristu tá nanaxũchicũũ na naxũne i mexẽchixũrũũ yĩxũcẽx. Rũ ngẽma norũ pora i namaã guxũetũwa nangẽxmaxũ, rũ ngẽmamaãtama tá nanaxũchicũũ i taxũne na noxrũrũũ yĩxũcẽx.

4

Ñuxma na tórũ Coriarũ ixĩgũxũ rũ name nixĩ na guxũguma namaã itaãẽgũxũ

¹ Pa Chaueneẽgũx, rũ pexũ changechaxũ rũ poraãcũ pexũ íchayadauxchaxũ. Rũ ngẽma pemaã nũxũ chixuxũrũũ chanaxwẽxe i meã tórũ Coricẽx pemaxẽ erũ pema nixĩ i chorũ taãẽ rũ chorũ ãmare i Tupana choxna ãxũ pixĩgũxũ. ² Rũ nũxũ chacẽxũ i taeyẽxgũ i Ebódia rũ Chitique na nũgũmaã nangũxmũẽxũcẽx, erũ nũmagũ rũ tórũ Corixacũgũ nixĩgũ. ³ Rũ cumax, Pa Chomũcũ ya Mecũ i Wũxigu Tupanaãrũ Puracũwa Chomaã Puracũcũx, rũ cuxna naxcẽx chaca na nũxũ curũngũxẽẽxũcẽx i ngẽma taxre i taeyẽxgũ, erũ nũmagũ rũ wũxigu chomaã rũ Cremetemaã rũ ngẽma togũ i chomũcũgũ i Tupanaãrũ poperawa marũ ngoxégagũxũmaã napuracũe i Tupanaãrũ orearũ uwa. ⁴ Rũ ñuxma na tórũ Coriarũ pixĩgũxũ, Pa Chaueneẽgũx, rũ name nixĩ i guxũguma namaã petaãẽgũ. Rũ wena pemaã nũxũ chixu, rũ ¡petaãẽgũ! ⁵ Rũ chanaxwẽxe i meã pemaxẽ na guxũma i duũxũgũ pexũ nacuẽxgũxũcẽx na aixcũma mexũ i duũxũgũ na pixĩgũxũ. ¡Rũ nũxna pecuẽxãchie na tórũ Cori rũ paxa tá nataeguxũ na núma naxũxũ! ⁶ ¡Rũ taxucẽxma penaxĩxãchiãẽgũ! ¡Rũ Tupana-maã nũxũ pixu i perũ yumũxẽwa i guxũma i tacũ i pexũ ngupetũxũ! ¡Rũ naxcẽx ípeca rũ moxẽ nũxna pexã! ⁷ Rũ ngẽmaãcũ i nũma ya Tupana rũ tá pexũ nataãẽxẽẽ namaã i wũxi i taãẽ i mexẽchixũ i guxũma i taãẽ i nũxũ icuáxũãrũ yexera mexẽchixũ. Rũ ñuxma na Ngechuchu ya Cristuarũ duũxũgũ pixĩgũxũ, rũ ngẽma taãẽ i Tupana pexna ãxũ rũ tá nũxna pexũ ínapoxũ i ngẽma chixexũ i nagu perũxĩnũẽchaxũ.

Name nixĩ i nagu tarũxĩnũẽ i guxũma i tacũ i aixcũma mexũ ixĩxũ

⁸ Rũ ñuxma Pa Chaueneẽgũx, rũ name nixĩ i nagu perũxĩnũẽ i guxũma i ngẽma ore i aixcũma ixĩxũ, rũ guxũma i ngẽma nacũma i taxucũrũwama texẽ chixri nachiga idexaxũ. Rũ name nixĩ i nagu perũxĩnũẽ i guxũma i ngẽma ore i aixcũma meã iwéxũ rũ guxũma i ngẽma Tupanapẽxewa mexũ, rũ guxũma i ngẽma mexũ i duũxũgũ namaã taãẽxũ, rũ guxũma i ngẽma mexũ i Tupanaxũ naxcẽx icuẽxũxũgũxũ. Rũ name nixĩ i ngẽmagu perũxĩnũẽ. ⁹ Rũ chanaxwẽxe i aixcũma penaxũ i ngẽma pexũ changũexẽẽxũ, rũ ngẽma pexũ namaã chixucuxẽgũxũ, rũ ngẽma chauxũtawa nũxũ pexĩnũẽxũ, rũ ngẽma chauxũtawa nũxũ pedauxũ na chanaxũxũ. Rũ ngẽxguma ngẽmaãcũ pemaxẽgu rũ pemaã tá inarũxãũx ya Tupana ya tamaã irũngũxmũcũ rũ tũxũ taãẽxẽẽcũ.

Yema PiripucũĀx ga yaxõgũxũ rũ dĩẽrumaã Pauruxũ narũngũxẽẽgũ

10 Rū ñuxma na chorü Coriarü chiixũ, rü poraãcü chataãẽ erü wenaxãrũ choxna pecuèxãchie rü choxũ perüngũxẽẽ. Rũ choma nũxũ chacuèx rü pema rü guxũguma choxũ perüngũxẽẽchaũ, natürü taguma pexũ natauxcha ga na penaxũxũ ga yema. 11 Rũ tama ngẽma na tacü choxũ taxuxũcèx nixĩ i pemaã nũxũ chixuxũ i ngẽmachiga. Erü choma rü marü chomaã nixü na namaã chataãẽxũ i ngẽma choxũ ngẽxmaxũ. 12 Rũ nũxũ chacuèx na ñuxãcü na yĩxũ ega guxũ choxũ tauygux, rü nũxũ chacuèx na ñuxãcü na yĩxũ ega choxũ namuxũchixgu. Rũ marü chomaã nixü na namaã chataãẽxũ i ngẽma choxũ ngẽxmaxũ woo changaxpütüwegu, rü êxna woo chataiyaxgu, rü êxna woo choxũ namuxũchixgu rü êxna woo choxũ natauyguma. 13 Rũ Cristu nixĩ ya choxũ poraxẽcũ, rü ngẽmacèx chomaã nanguxũ na chanaxũxũ i guxũma i ngẽma Tupana naxwèxexũ na chanaxũxũ. 14 Natürü ga pema rü wüxi ga mexũ choxũ pexügü ga yexguma guxchaxũwa chayexmagu rü choxũ perüngũxẽẽ. 15 Rũ pema, Pa Yaxögũxũ i PiripucũĀx, rü meãma nũxũ pecuèx rü yexguma noxri Machedóniããnewa nũxũ chixuxgu ga Tupanaãrũ ore, rü yexguma yéma íchaxũxũgu, rü pexicatama nixĩ ga ãmare choxna pexãxũ naxcèx ga yema ngũxẽẽ ga chauxütawa peyaxuxũ. 16 Rũ yexguma Techarónicaarü iãnewa chayexmayane, rü pema rü yéma chauxcèx penamugü ga perü ãmare na choxũ perüngũxẽẽgũxũcèx. Rũ tama nixĩ ga yexgumarĩca choxũ perüngũxẽẽxũ. 17 Rũ woo perü ãmaremaã chataãẽ, natürü yexeraãcü chataãẽ erü ngẽma choxũ na perüngũxẽẽgũxũcèx rü Tupana tá ãmare pexna naxã. 18 Rũ ñuxma rü marü choxũ nangẽxma i guxũma i tacü i chanaxwèxexũ, rü aixcũma ngẽmaãrũ yexera choxũ nangẽxma. Rũ ñuxma na Epaporudítu núma nangexũ i perü ãmare, rü taxuũma choxũ nataxu. Rũ ngẽma perü ãmare i chauxcèx núma pemuxũ, rü Tupanapẽxewa rü ñoma wüxi i pumara i yixixũrũxũ nixĩ, rü núma rü poraãcü namaã nataãẽ. 19 Rũ ngẽmacèx ya chorü Tupana rü norü ngẽmaxũgü i mexèchixũwa tá pexna nanaxã i guxũma i tacü i pexũ taxuxũ. Rũ ngẽmaãcü tá nanaxü erü Ngechuchu ya Cristuarü duũxũgü pixĩgü. 20 Rũ name nixĩ i guxũguma nũxũ ticuèxũgü ya Tanatü ya Tupana. Rũ ngẽmaãcü yĩ.

Pauru nanaguxẽẽ ga norü popera rü wenaxãrũ yema duũxũgũxũ narümoxẽ

21 Rũ chanaxwèxe i chauégagu nũxũ perümoxègü i guxũma i taeneègü i Ngechuchu ya Cristuaxũ yaxögũxũ. Rũ ngẽxgumarũũ ta pexũ narümoxègü i ngẽma taeneègü i chauxütawa ngẽxmagũxũ. 22 Rũ ngẽxgumarũũ ta pexũ narümoxègü i guxũma i taeneègü i núma Dumawa ngẽxmagũxũ. Rũ ngẽma yexera pexũ rümoxègũxũ rü ngẽma nixĩ i taeneègü i Dumaãrũ ãẽxgacü ya tacũxũ-tawa puracũxũ. 23 Rũ chanaxwèxe i tórü Cori ya Ngechuchu ya Cristu pexũ narüngũxẽẽ i guxãma i pemax. Rũ ngẽmaãcü yĩ.

Rü nuãma pexna,
Pauru

POPERA GA COROCHAWA YEXMAGŪXŪ GA YAXŌGŪXŪTANŪWA NAMUXŪ GA PAURU

Pauru rü nüxŭ narümoxē ga yema yaxōgŭxŭ ga Corochawa yexmagŭxŭ

1-2 Pa Chaueneēgŭ ya Corochaarŭ Īānewa Ngēxmagŭxex, choma i Pauru rü wŭxigu namaā i taeneē i Timutéu nixŭ i pexcèx tanaxŭmatŭxŭ i ñaā popera. Rü choxŭ nixŭ ga Tupana ga inamuāchixŭ na guxŭwama nüxŭ chixuchigŭxŭcèx i Ngechuchu ya Cristuarŭ ore. Rü pexcèx chanaxŭmatŭ i guxāma i pema ya chaueneēgŭ ya aixcŭma Tupanaārŭ duŭxŭgŭ ixŭgŭxe ya Cristuaxŭ yaxōgŭxe. Rü chanaxwèxe i Tanatŭ ya Tupana pexŭ narŭngŭxē na meā pegŭmaā pemaxèxŭcèx rü petaāegŭxŭcèx.

Pauru rü yema yaxōgŭxŭcèx nayumŭxē

3 Rü guxŭguma i ngēxguma pexcèx tayumŭxēgŭgu, rü moxē nüxna taxā ya Tupana ya Nanatŭ ya tŕrŭ Cori ya Ngechuchu ya Cristu. 4 Rü ngēmaācŭ tanaxŭ erŭ marŭ nüxŭ tacuāchiga na ñuxācŭ aixcŭma meā Ngechuchu ya Cristuaxŭ peyaxōgŭxŭ, rü aixcŭma nüxŭ pengechaŭgŭxŭ i guxŭma i ngēma duŭxŭgŭ i Tupanaārŭ ixŭgŭxŭ. 5 Rü nüxŭ tacuèxgŭ na ngēmaācŭ meā Tupanapēxewa pemaxèxŭ erŭ penayauxgŭchaŭ i ngēma mexŭgŭ i Tupana pexŭ namaā nguxŭxŭ i daxŭguxŭ i naānewa. Rü ñuxma rü meā ĩpenanguxē na penayauxgŭxŭcèx i ngēma mexŭgŭ yerŭ marŭ nüxŭ pexŭnŭe ga Tupanaārŭ ore i mexŭ i aixcŭma ixŭxŭ. 6 Rü ngēmatama ore i mexŭ ga pexŭtawa nguxŭ, rü guxŭwama nangu i ñuxmax. Rü guxŭwama ningŭchigŭ rü duŭxŭgŭarŭ maxŭxŭ naxŭchicŭŭ, yema perŭ maxŭxŭ na naxŭchicŭŭxŭrŭŭ ga yexguma nüxŭ pexŭnŭeŭgu rü nüxŭ pecuèxgŭgu na ñuxācŭ Tupana aixcŭma pexŭ na ngechaŭxŭ rü pexŭ rŭngŭxēchaŭxŭ. 7 Rü ngēma ore i mexŭ nixŭ ga pexŭ nangŭexēxŭ ga Epáparu ya tomŭcŭ ya nüxŭ tangechaŭgŭcŭ ya wŭxigu tomaā Tupanaārŭ orewa puracŭcŭ. Nŭma rü Cristuarŭ puracŭtanŭxŭ ya mecŭ nixŭ, rü nŭma nixŭ i tochicŭŭ pexŭ nangŭxēxŭ. 8 Rü nŭma ya Epáparu nixŭ i tomaā nüxŭ yaxuxŭ i pechiga na ñuxācŭ Tupanaāe i Ūnŭxŭārŭ ngŭxēmaā choxŭ pengechaŭgŭxŭ. 9 Rü ngēmacèx i toma ga noxritama pexŭ tacuāchigagu, rü taguma nüxŭ itayarŭngŭmaē na pexcèx tayumŭxēgŭxŭ. Rü guxŭguma Tupanana naxcèx tacagŭ na meā pexŭ nüxŭ nacuèxēxŭcèx i ngēma nŭma nanaxwèxexŭ na penaxŭxŭ. Rü nüxna naxcèx tacagŭ na pexna naxāxŭcèx i nagŭxŭraŭxŭ i cuèx i Naāe i Ūnŭxŭwa ne ŭxŭ. 10 Rü nüxna naxcèx tacagŭ na meā tŕrŭ Cori naxwèxexŭācŭma na pemaxèxŭcèx rü guxŭguma penaxŭxŭcèx i ngēma nŭma nanaxwèxexŭ. Rü nüxna naxcèx tacagŭ na pexŭ natauxchaxēēxŭcèx na togŭxŭ perŭngŭxēegŭxŭcèx rü guxŭ i ngunexŭgu yexeraācŭ Tupanaxŭ pecuāxŭcèx. 11 Rü nüxna naxcèx tacagŭ na norŭ pora i mexēchixŭmaā pexŭ naporaexēxŭcèx, na namaā peporaexŭcèx i guxŭma i guxchaxŭgŭ rü yaxna namaā pexŭnŭeŭxŭcèx. 12 Rü ñuxŭchi tanaxwèxe i taāēācŭma Tanatŭ ya Tupanana moxē pexā, erŭ nŭma pexŭ nimexēegŭ na pema rü ta penayauxgŭxŭcèx i ngēma mexŭgŭ i naxŭtawa ngēxmagŭxŭ i nŭma tá nüxna naxāxŭ i ngēma duŭxŭgŭ i noxrŭ ixŭgŭxŭ. 13 Yerŭ nŭma ga Tupana rü marŭ Chatanamēxēwa tŭxŭ ĩnanguxŭxē rü Nane ya nüxŭ nangechaŭcŭmēxēwa tŭxŭ nangēxmagŭxē. 14 Rü guma Nanegagu nixŭ ga tŭxŭ namaxēxēxŭ rü tŭxŭ nüxŭ nangechaŭxŭ ga tŕrŭ pepadugŭ.

Rü yexguma pecaducèx nayuxgu ga Cristu rü Tupana nügümaã nanangüxmüëxëë ga duïxügü

¹⁵ Taguma texé Tupanaxü tadau, natürü nüma rü núma nanamu ga Nane na duïxügü nüxü daugüxücèx rü nüxü nacuèxgüxücèx na ñuxácü na yïxü i nüma ya Tupana. Rü naxüpa ga guxüma ga tacü i ñuxma ngëxmaxü, rü nüxïra marü nayexma ga Tupana Nane. ¹⁶ Rü Nanexü nixï ga namuxü ga Tupana na naxüãxücèx ga guxüma i tacü i ñuxma ngëxmaxü i daxüguxü i naãnewa rü ñoma i naãnewa, rü guxüma i ngëma nüxü idauxü rü ngëma tama nüxü idauxü. Rü yemaácü nanaxü ga guxüma ga norü orearü ngeruügü i daxüçüãxârü ãëxgacügü rü guxüma ga ngoxogüarü ãëxgacügü. Rü yemaácü nanaxü ga guxüma na nüxü yacuèxüügüxücèx. ¹⁷ Rü naxüpa i guxüma i tacü i ñuxma ngëxmaxü, rü Cristu rü marü nüxïra nayexma. Rü nagagu nixï i meã inanuxü i guxüma erü nüma nixï i namaã inacuáxü. ¹⁸ Rü nüma ya Cristu rü naëru nixï i guxüma i ngëma yaxögüxü. Rü nüma nixï ga naxüãxü rü nüxna naxããxü ga maxü. Rü nüma nixï ga nüxïra yuwa ínadxü na guxüarü ãëxgacü yïxücèx. ¹⁹ Rü Cristu rü Tupanaxüchi nixï, yerü yemaácü nanaxwèxe ga Tupana. ²⁰ Rü Tupana rü ñoma ga naãnewa nanamu ga Cristu na curuchagu pecaducèx nayuxücèx. Rü yemaácü nixï ga Tupana nügümaã nangüxmüëxëëxü ga guxüma i ñoma i naãnewa ngëxmaxü rü guxüma i daxüguxü i naãnewa ngëxmaxü. Rü yemaácü nanaxü ga Tupana yerü yemaácü nanaxwèxe. ²¹ Rü pema ga üpa rü tama Tupanamücügü pixïgü yerü naxchi pexaie nagagu ga perü chixexü ga nagu perüxïnüexü rü pexüxü. ²² Natürü i ñuxma ya Tupana rü nügümaã pexü narüngüxmüëxëë na namücügü i mexü pixïgüxücèx. Rü yemaácü nanaxü ga Tupana ga yexguma Cristu duïxüxü ixïxgu rü curuchawa ngúxü yangexgu rü yexma nayuxgu. Rü yemaácü nayu ga Cristu na nügüxütawa pexü nagagüxücèx rü napëxewa pimexücèx rü nataxuxücèx i perü chixexü. ²³ Natürü ngema na pengugüxücèx, rü penaxwèxe na guxüguma mea peyaxögüxü rü meã naga pexïnüexü rü taguma nüxü perüxoexü i ngëma norü ore i mexü ga marü nüxü pexïnüexü. Rü ngematama ore nixï i ñuxma nüxü yaxugüexü i gúxü i naanewa.

Tupana rü Pauruxü namu na guxüma ga yaxögüxüxü nangüxëëxücèx

²⁴ Rü ñuxma na woo pexcèx ngúxü chingexü rü chataãë erü nüxü chacuèx rü ñaã chaxunemaã choma rü ta chayanguxëë ga yema ngúxü ga Cristu ingexü naxcèx i norü duïxügü i yaxögüxü. ²⁵ Rü ñuxma ya Tupana rü choxü namu na nüxü charüngüxëëxücèx i guxüma i ngëma norü duïxügü i yaxögüxü. Rü perü mexücèx nixï i choxü namuxü na guxüwama meã nüxü chixuxücèx i norü ore. ²⁶⁻²⁷ Rü ngëma Tupanaärü ore rü ñanagürü: “Rü Cristu rü pewa nangëxma i ñuxmax, rü nagaguxicatama nixï i pexü nangëxmaxü i pechica i daxüguxü i naãnewa i ngextá ínamexëchixüwa”, ñanagürü. Rü yema nuxcümaügüxü ga duïxügü rü tama nüxü nacuèxgü ga yemachiga, natürü ñuxma ya Tupana rü norü duïxügüxü nüxü nacuèxëë. Erü nüma ya Tupana rü norü duïxügüxü nüxü nadauxëëchaü na ñuxácü poraácü pexü nangechaüxü rü pexü nangüxëëxü i guxäma i pema i tama Yudíugü ixïgüxe. Rü ñuxma i pema na woo tama Yudíugü pixïgüxü, natürü pema rü ta pexü nangëxma i pechica i daxüguxü i naãnewa erü Cristuaxü peyaxögü. ²⁸ Rü ñuxma i toma rü Cristuchigaxü nixï i tixuxü. Rü ngema ore i Tupanaärü cuèx nawa ngexmaxümaã nixï i guxüma i duïxügüxü tixucuxëgüxü rü tanangüxëëxü na ngemaácü ngearü chixexüãxü Cristuxütawa tagagüxü. ²⁹ Rü ngëmatama puracü nixï i nawa poraãcüxüchima chapuracüamaxü woo tacü rü guxchaxü chauxcèx ínguxgu. Rü

guxŭma i ngēma pora i Cristu choxna āxŭ i chowa ngēxmaxŭ nixī i choxŭ poraxēēxŭ na chanaxŭamaxŭcèx i ngēma puracŭ.

2

¹ Pa Chaueneēgŭx, chanaxwèxe i nŭxŭ pecuèx na ñuxācŭ poraācŭ pexcèx chapuracŭxŭ. Rŭ ngēxgumarŭŭ ta chanaxwèxe i nŭxŭ pecuèx na ñuxācŭ poraācŭ chapuracŭxŭ naxcèx i ngēma taeneēgŭ i Laodichéaarŭ ĩānewa ngēxmagŭxŭ rŭ guxŭma i petanŭxŭgŭ i taguma choxŭ daugŭxŭ. ² Rŭ ngēmaācŭ poraācŭxŭchima chapuracŭ na nŭxŭ rŭ ta chanangŭchaŭxēēxŭcèx. Erŭ chanaxwèxe i guxŭma aixcŭma nŭgŭ nangechaŭgŭ rŭ nŭxŭ nangēxma i ngēma mexŭ i cuèx i aixcŭma ixīxŭ. Rŭ ngēmaācŭ tá meāma nŭxŭ nacuèxgŭ ga yema noxri Tupanaxīcatama nŭxŭ cuáxŭ. Rŭ yima rŭ Cristutama nixī. ³ Rŭ nŭma nixī i nŭxŭ nangēxmaxŭ i guxŭma i cuèx i aixcŭma mexŭ. Rŭ nŭma nixī i taxcèx nangoxēēāxŭ i Tupanachiga. ⁴ Rŭ pemaā nŭxŭ chixu i ngēma ore erŭ tama chanaxwèxe na texé pexŭ womŭxēēgŭxŭ namaā i ŭacŭ rŭ ore i chixexŭwa pexŭ gagŭxŭ. ⁵ Rŭ woo na tama ngēma petanŭwa changēxmaxŭ, natŭrŭ chauāēwa rŭ poraācŭ pegu charŭxīnŭ. Rŭ wŭxi i chorŭ taāē nixī na nŭxŭ chacuáxŭ na ñuxācŭ meā pegŭ ipinuxŭ na meā pegŭmaā ipecuáxŭcèx rŭ ñuxācŭ tama nŭxŭ perŭxoexŭ na Cristuaxŭ peyaxŭgŭxŭ.

Ñuxma na Cristuarŭ ixīgŭxŭ rŭ ngexwacaxŭxŭ i maxŭ tŭxŭ nangēxma

⁶ Rŭ pema ga noxri rŭ meāma tŕrŭ Cori ya Ngechuchu ya Cristuxŭ peyaxŭgŭ. Rŭ ñuxma rŭ yema noxri meāma na penayauxgŭxŭrŭrŭ rŭ name nixī i guxŭguma nŭxna penaxā i perŭ maxŭ na nŭma pexŭ namaā inacuáxŭcèx. ⁷ Rŭ wŭxi i nanetŭ nanaxwèxe i ñaxchŭmèxā na nataixŭcèx rŭ na namaxŭxŭcèx. Rŭ ngēxgumarŭŭ ta i pema rŭ penaxwèxe na meā Cristuna peyaxŭxŭgŭxŭ na meā nawa piyaetanŭxŭcèx rŭ meā naxcèx pemaxēxŭcèx rŭ meā nŭxŭ peyaxŭgŭamaxŭcèx yema noxri Epáparu pexŭ ngúexēēgurŭŭ. Rŭ name nixī i guxŭguma Tupanana moxē pexā. ⁸⁻⁹ Rŭ naxcèx pexuāēgŭ i ngēma duŭxŭgŭ i pexŭ womŭxēēgŭchaŭxŭ! Rŭ tama name i nŭxŭ iperŭxīnŭē i ngēma norŭ ore i tama aixcŭma ixīxŭ rŭ taxuwama mexŭ. Erŭ ngēma duŭxŭgŭ rŭ pexŭ nangúexēēchaŭ na nagu pexīxŭcèx i ngēma nacŭmagŭ ga nuxcŭmaŭgŭxŭ ga duŭxŭgŭ nagu ĩxŭ. Rŭ ñoma i naāneārŭ nguxēētaegŭ nixī i inaxīnŭēxŭ. Rŭ tama aixcŭma Cristuchiga nixī i ngēma pexŭ nangúexēēxŭ. Rŭ name nixī i nŭxna pixīgachi i guxŭma i ngēma nguxēētaerŭgŭ i chixexŭgŭ rŭ Cristuwe perŭxī. Erŭ Cristu rŭ Tupanaxŭchi nixī rŭ guxŭma i Tupanaārŭ pora rŭ Cristuwa nangēxma. ¹⁰ Rŭ ñuxmax, rŭ Tupanaārŭ maxŭ rŭ norŭ pora rŭ aixcŭma pewa nangēxma erŭ namēxwa pengēxmagŭ ya Cristu ya namaā icuácŭ i guxŭma i daxŭcŭāxārŭ āēxgacŭgŭ rŭ guxŭma i ngoxogŭarŭ āēxgacŭgŭ. ¹¹ Rŭ ngēma Yudíugŭ rŭ nŭgŭ ínawiechèxmŭpēxechiraŭgŭ na Tupanapēxewa yamexŭcèx. Natŭrŭ ngēxguma Cristuaxŭ yaxŭgŭgŭ rŭ tama ngēmaācŭ tamaā nanaxŭ ya Cristu na imexŭcèx. Erŭ nŭma ya Cristu rŭ tŕrŭ maxŭwa napuracŭ rŭ tŭxŭ ĩnanguxŭxēē nawa i taxŭneārŭ ngúchaŭgŭ. Rŭ ngēmaācŭ nixī i tŭxŭ yamexēēxŭ na Tupanapēxewa imexŭcèx. ¹² Rŭ yexguma ípebaiŭgŭ, rŭ Cristu na itáxŭrŭŭ yexma natèx ga yema nuxcŭmaŭxŭ ga perŭ maxŭ. Rŭ yema Cristu na írŭdaxŭrŭŭ rŭ pema rŭ ta penayaxu i maxŭ i ngexwacaxŭxŭ, yerŭ peyaxŭgŭ na Tupana norŭ poramaā Cristuxŭ írŭdaxēēxŭ. ¹³ Rŭ ŭpa ga pema rŭ tama aixcŭma pexŭ nayexma ga maxŭ i taguma gŭxŭ yerŭ pepecaduāxgŭ rŭ pexeneārŭ ngúchaŭ pexŭgŭ. Natŭrŭ i ñuxma rŭ Cristuxŭ namaxēēxŭrŭŭ pexŭ namaxēēē ya Tupana erŭ Cristuarŭ duŭxŭgŭ pixīgŭ. Rŭ Tupana rŭ marŭ Cristugagu tŭxŭ nŭxŭ nangechaŭ ga guxŭma ga tŕrŭ pepadugŭ. ¹⁴ Rŭ noxri rŭ tachixe yerŭ tama aixcŭma

naga taxīnūē ga yema mugū ga Moīché tūxna āxū, rü tórü pecadugū rü yuwa tūxū nagagū. Natürü ga Cristu rü curuchagu tórü pecaducèx nayu, rü yemaãcū Tupana tūxū nayangutanūxēē ga yema tórü pecadugū. ¹⁵ Rū yexguma curuchagu nayuxgu ga Cristu, rü yexguma nixī ga Chatanáxū naporamaēxū ga Tupana. Rū yexguma nixī ga guxū ga duūxūgūpēxewa Chatanáxū naxānexēēxū ñoma wūxi i churaragüarü āēxgacū i norü uwanü i nüxū naporamaēxūxū naxānexēēxürüü.

Name nixī i naxcèx tadaugū i ngēma mexūgū i daxūguxū i nañnewa ngēxmagūxū

¹⁶ Rū ñuxma rü taxucèxma tūxcūü pexū nixu i ngēma Yudíugū ega woo tama naxrūü penaxūxgux. Nūmagū rü ñuxre i ònagūxicatama nangōxgū, rü ñuxre i axeūxīcatama nixaxgū, rü ñuxre i petaarü ngunexūgū naxauregū na ngēmaãcū Tupanaxū yacuèxūügūxūcèx. Rū nangēxma i norü peta i gucū ya taunecūgu Tupanacèx naxauregūxū rü togū i petagū i gucū ya tauemacūgu naxauregūxū. Rū nüxū nangēxma i nacūmagū na ñuxācū ngūxchigaarü ngunexūgū naxauregūxū. ¹⁷ Rū aixcūma yema nuxcūmaūgūxū ga Yudíugū rü nanaxauregū ga yema nacūmagū yerü ga Cristu rü tauta ínangu ga yexguma. Natürü i ñuxma rü marü ínangu ya Cristu rü tórü pecaducèx nayu. Rū ñuxma rü name nixī na naga ixīnūēxū rü tama nagu ixīxū i ngēma nuxcūmaūgūxū i nacūmagū. ¹⁸ ;Rü tāūtáma naga pexīnūē i ngēma duūxūgū i nüxū ixugūxū na ipeyarütauxexū ega tama daxūcūāx i orearü ngeruūgūxū picuèxūügūgu! Nūmagū rü tama nūgū nicuèxūügūneta rü nūgū nixugū na yangoxetūgūxū. Rū noxrütama cuèxmaāmare nūgū nicuèxūügū. ¹⁹ Natürü i nūmagū rü tama aixcūma naga naxīnūē ya yima taeru ixīcū ya Cristu ya tūxū poraexēēcū rü tūxū iyaetanūxēēcū i tórü òwa i guxāma i yixema i norü duūxūgū ixīgūxe. Rū nūma ya Cristu nixī i wūxigu tūxū naxīnūēxēēxū i wūxichigū i yixema ngēma Tupana naxwèxexürüü. ²⁰ Rū yexguma nayuxgu ga Cristu rü yexma nayu ga nuxcūmaūxū ga perü maxū, rü yexma nayarūxo ga guxūma ga nuxcūmaūgūxū ga pecūmagū i ñoma i nañnecūāx i duūxūgū nagu rüxīnūēxū. Rū ngēmacèx i ñuxmax ;rü tūxcūü nixī i ñoma i nañnecūāx maxēxürüü nagu pemaxēxū i pemax, rü tūxcūü nixī i ngēma Yudíugūcūmagu pexīxū? ²¹ Rū nūmagū i Yudíugū rü nüxū nixugūe rü ñanagürügū:

“Tama name i nüxū quingōgū i ngēã, rü tama name i cunangōx i yea, rü tama name i cunayaxu i ngēma”, ñanagürügū. ²² Natürü guxūma i ngēma nacūmagū rü paxa tá inayarūxo erü duūxūgūarü nixīgū. Rū ngēma pexū namuxū rü duūxūgūarü mugūmare nixī. Rū ngēma pexū nangúexēēxū rü duūxūgūarü nguxēētaemare nixī. ²³ Rū guxūma i ngēma pexū namuxū rü pexcèx namexcüraxū erü pexū naxucuxēgū na tacū pexauregūxūcèx, rü tama pegū picuèxūügūxūcèx, rü meã pexenemaã ipecuèxgūxūcèx. Natürü guxūma i ngēma mugū rü tama aixcūma pexū narūngūxēē na nüxū perūxoexūcèx i pexeneärü ngúchaūgū.

3

¹ Rū ñuxma i pemax, rü Cristu wena maxūxürüü rü pexū nangēxma i maxū i ngexwacaxūxū. Rū ngēmacèx name nixī i naxcèx pedau i ngēma mexūgū i daxūguxū i nañnewa ngēxmaxū i ngextá Cristu rü Tupanaärü tūgūnecūwawa írütowūwa rü namaã āēxgacū íyīxūwa. ² Rū name nixī i guxūguma nagu perūxīnūē i ngēma daxūguxū i nañnewa ngēxmaxū i ngemaxūgū rü tama i ngēma ñoma i nañnewa ngēxmaxū. ³ Yerü yexguma nayuxgu ga Cristu rü yexma nayu ta ga nuxcūmaūxū ga perü maxū. Rū ñuxma rü pexū nangēxma i perü maxū i ngexwacaxūxū erü Cristutanūxū pixīgū rü Tupanamēxēwa

pengēxmagü. ⁴ Rū nūmatama ya Cristu nixī i pexū namaxēxēēxū. Rū ngēxguma wena nūma nangoxgu, rū namaã tá pengóe, rū naxrūū tá pimexēchi.

Marü nüxū tarüxo i nuxcūmaïxū i tacüma i chixexüğü rü tanayaxu i ngexwacaxüxü i tórü maxü

⁵ Rū ñuxma rü name nixī i nüxū perüxoe i guxūma i ñoma i naãneärü chixexü i pewa ngēxmaxü. Rū tama name i pemēxna naī i ngemaã pemaxē, rū tama name i petena naī ya yatümaã pemaxē. Rū tama name i penaxü i pexeneärü ngúchaü rü bai i nagu perüxīnūēmare. Rū tama name i pexü nangúchaü i tacü rü to i chixexüğü. Rū tama name i pegünaxīcatama penanuxuchigüchaü i guxūma i ngēmaxüğü, erü yixema ngēma nacüma tuxü ngēxmaxē rü düxwa namaã tatupanaãx. ⁶ Rū guxūma i ngēma chixexügücèx tá nixī i Tupana napoxcuexü i ngēma duüxüğü i ngēmaãcü maxēxü rü tama naga ñnüēchaüxü. ⁷ Rū pema ga üpa rü penaxü ga yema chixexüğü, rü yemaãcü pemaxē. ⁸ Natürü i ñuxma rü name nixī i nüxū perüxoe i guxūma i ngēma na pegüchi pexaïexü, rü pegümaã penuēxü, rü chixri pemaxēxü, rü pegümaã peguxchigagüxü, rü guxūma i ngēma chixexü i dexa i nüxü pixuxü. ⁹ Rū tama name i pegümaã pidorae, erü marü ipenatèx ga nuxcūmaïxü ga pecüma rü guxūma ga yema chixexüğü ga üpa pexüğüxü. ¹⁰ Rū ñuxma rü marü penayaxu i ngexwacaxüxü i perü maxü rü ngexwacaxüxü i duüxüğü pixüğü. Rū guxü i ngunexügu rü Tupana pexü ningexwacaxüxēēchigü na yexeraãcü pimexüçèx naxrūū rü yexeraãcü nüxü na pecuèxgüxüçèx ya Tanatü ya Tupana ya maxü tuxna ãcü. ¹¹ Rū ñuxma rü Tupanacèx rü nüetama nixī ega Yudü quixügu rü ēxna tama. Rū nüetama nixī ega ícuwiechèx-müpèxechiraügu rü ēxna tama. Rū nüetama nixī ega tacü rü nachüñanecüãx i duüxü quixügu, rü ēxna tacü rü duüxü quixügu. Rū nüetama nixī ega wüxi i coriarü duüxü quixügu, rü ēxna taxúxearüma duüxü quixügu. Erü ñuxma rü ngēma guxüärü yexera aixcüma tuxü mexü nixī na Cristu rü guxüärü ãëxgacü yüxü rü guxāwama nangēxmaxü. ¹² Rū ñuxma ya Tupana rü pexü nangechaü i pema rü pexü nadei na noxrü pixüğüxüçèx. Rū ngēmacèx name nixī i guxüguma pexü nangechaütümüüğü i togü, rü namaã pemecümagü, rü tauxchaãcüma nüxna penaxã, rü taguma napèxewa pegü picuèxüxüğü. Rū ngēxguma woo tacü pemaã naxüxgux rü name nixī i yaxna namaã pexīnüē. ¹³ Rū name nixī i wüxichigü i pema na pegümaã yaxna pexīnüēxü. Rū ngēxguma chi texé tacü pemaã üxgux, rü name nixī i pegüxü nüxü pengechaüğü i ngēma. Rū yexgumarüü ga tórü Cori na pexü nüxü ngechaüxürrüü, rü name nixī i togüaxü nüxü pengechaüğü. ¹⁴ Rū guxüärü yexera mexü nixī na pegü pengechaüğüxü. Erü ngēxguma aixcüma pegü pengechaüğügu rü aixcüma wüxigu tá perüxīnüē, rü meã pegümaã tá pemaxē. ¹⁵ Rū name nixī na pemaã inacuáxü i ngēma taãe i Cristu pexna äxü na ngēmaãcü aixcüma pegü pengechaüğüxüçèx. Yerü yemacèx nixī ga Tupana pexü dexü na wüxitama i duüxüğü pixüğüxüçèx rü meã wüxigu perüxīnüēxüçèx. Rū name nixī i moxē nüxna pexägü ya Tupana. ¹⁶ Rū name nixī i guxüguma peãewa nangēxma i Cristuarü ore rü taãeãcüma naga pexīnüē. Rū name nixī i meã peãxü pecuããcüma namaã pegü pengüxèē rü pegü pixucüxègü na ngēmaãcü pegüaxü penangúchaüxèēxüçèx. Rū name nixī i aixcüma Tupanana moxē pexägüãcüma nagu pewiyaegü i nagüxüraüxü i norü wiyaegü. ¹⁷ Rū guxūma i ngēma pexüxü rü nüxü pixuxü rü name nixī i tórü Cori ya Ngechuchuégagu penaxü. Rū name nixī i ngēmaãcü Ngechuchuégagu Tanatü ya Tupanana moxē pexägü.

Tupana nanaxwèxe na meã namaxēxü i duüxüğü i Cristuaxü yaxögüxü

18 Pa Ngexŭgŭ i Ātegŭxŭx, rŭ name nixŭ i petega pexŭnŭē. Erŭ woetama ngēma nixŭ i mexŭ na penaxŭxŭ erŭ tŏrŭ Cori ya Cristuarŭ duŭxŭgŭ pixŭgŭ. 19 Pa Yatŭgŭ i Āmaxgŭxŭx, rŭ name nixŭ i ngŭxŭ pengechaŭgŭ i pemèxgŭ. Rŭ tama name na ngŭmaā pechixecŭmagŭxŭ. 20 Pa Buxŭgŭx, rŭ name nixŭ i guxŭwama penatŭ rŭ peega pexŭnŭē, erŭ ngēma nixŭ i namaā nataāēxŭ ya tŏrŭ Cori. 21 Pa Papágŭx, rŭ tama name i penanuēxēē i pexacŭgŭ. Erŭ ngēxguma ngēmaācŭ penaxŭxgux rŭ ngŭrŭāchi tá nŭxŭ nawèxtŭmŭŭ i ngēma namaā nŭxŭ pixuxŭ. 22 Pa Duŭxŭgŭx i Ixāārŭ Coriāxgŭxŭx, rŭ name nixŭ i guxŭwama naga pexŭnŭē i perŭ corigŭ i ñoma i naānewa pemaā icuèxgŭxŭ. Rŭ tama name i pexŭ nadaugŭguxicatama meā pepuracŭe na ngēmaācŭ penataāēxēxŭcèx. Natŭrŭ name nixŭ i mexŭ i perŭ ngŭchaŭmaā guxŭguma meā pepuracŭe erŭ tŏrŭ Corixŭ pemuŭē. 23 Rŭ guxŭma i ngēma perŭ puracŭ i pexŭxŭwa rŭ name nixŭ i perŭ ngŭchaŭmaā penaxŭ ñoma tŏrŭ Cori ya Cristuaxŭ pepuracŭexŭrŭŭ rŭ tama i duŭxŭgŭaxŭ. 24 Rŭ marŭ nŭxŭ pecuèx rŭ daxŭguxŭ i naānewa rŭ tŏrŭ Cori ya Cristu tá pexna nanaxā i perŭ āmare i maxŭ i taguma gŭxŭ. Erŭ yima Cristu ya aixcŭma perŭ Cori ixŭcŭaxŭ nixŭ i pepuracŭexŭ. 25 Natŭrŭ yŭxema chixexŭ ŭxe rŭ tá ta tanayaxu i tŭmaārŭ natanŭ naxcèx i ngēma chixexŭ i taxŭxŭ, rŭ aixcŭma Tupana tá tŭxŭ napoxcu. Erŭ Tupanapēxewa rŭ guxŭma i duŭxŭgŭ rŭ nawŭxigu, rŭ taxucŭrŭwama texé Tupanachèxwa tiña ega chixexŭ taxŭxgux.

4

1 Rŭ pemax, Pa Corigŭx, rŭ name nixŭ i perŭ duŭxŭgŭmaā pemecŭmagŭxŭ, rŭ tama penawomŭxēēxŭ. ¡Rŭ nŭxna pecuèxāchie na pema rŭ ta pexŭ nangēxmaxŭ ya perŭ Cori ya daxŭgucŭ! 2 ¡Rŭ guxŭguma peyumŭxègŭ, rŭ pexuāègŭ na tama chixexŭgu peyixŭcèx! ¡Rŭ Tupanana moxè pexāgŭ! 3 ¡Rŭ toxçèx rŭ ta peyumŭxègŭ na Tupana toxŭ natauxchaxèxŭcèx na nŭxŭ tixuxŭcèx i norŭ ore i mexŭ, rŭ meāma duŭxŭgŭmaā nŭxŭ tixuxŭcèx i ngēma ore ga noxri tama nŭxŭ nacuèxgŭxŭ i Cristuchiga! Rŭ ngēma orecèx nixŭ i ñuxma ichapoxcuxŭ. 4 Rŭ chanaxwèxe i chauxcèx peyumŭxègŭ na meā duŭxŭgŭcèx chanangoxèēxŭ i ngēma ore, erŭ ngēma nixŭ i mexŭ na chanaxŭxŭ. 5 ¡Rŭ meā pemaxè napēxewa i ngēma duŭxŭgŭ i tama yaxŭgŭxŭ! ¡Rŭ ñuxma na pexŭ natauxchaxŭ, rŭ yoxni paxa penaxŭx i Tupanaārŭ puracŭ! ¡Rŭ taxŭ i perŭchomarexŭ! 6 Rŭ ngexguma togŭ i duŭxŭgŭmaā pidexagŭgu, rŭ name nixŭ i penataāēxēē namaā i ngema dexa i namaā nŭxŭ pixuxŭ. ¡Rŭ ngemaācŭ mea penangaxŭ i ngema pexna cèxŭ nachiga i perŭ ō!.

Pauru nanaguxēē ga norŭ popera rŭ wenaxārŭ yema duŭxŭgŭxŭ narŭmoxē

7 Rŭ nŭma ya taeneē ya Tíquicu ya nŭxŭ ingechaŭgŭcŭ rŭ aixcŭma choxŭ narŭngŭxēē rŭ wŭxigu chomaā Cori ya Tupanacèx napuracŭ. Rŭ nŭma tá pemaā nŭxŭ nixu i chauchiga. 8 Rŭ ñuxma rŭ petanŭwa chanamu na pexŭ nataāēxēēxŭcèx rŭ pemaā nŭxŭ yaxuxŭcèx na ñuxācŭ toxŭ nangupetŭxŭ i tomax. 9 Rŭ Tíquicumaā petanŭwa chanamu i Onéchimu ya taeneē ya nŭxŭ ingechaŭgŭcŭ ya aixcŭma meā Tupanaārŭ puracŭ ŭcŭ. Rŭ nŭma rŭ petanŭxŭ nixŭ. Rŭ nŭmagŭ tá nixŭ i pemaā nŭxŭ yaxugŭxŭ na tacŭ ngupetŭxŭ i nŭma. 10 Rŭ pexŭ narŭmoxē i Aritácŭ i wŭxigu chomaā poxcuxŭ. Rŭ ngēxgumarŭŭ ta pexŭ narŭmoxē i Marcu i Bernabéeneē ixŭxŭ. Rŭ marŭ pemaā nŭxŭ chixu i Marcuchiga na meā penayauxgŭxŭcèx i ngēxguma petanŭwa nanguxgu. 11 Rŭ ngēxgumarŭŭ ta pexŭ narŭmoxē ya taeneē ya Ngechuchu ya Ixaixcŭmacŭgu āegacŭ. Rŭ ngēma tomaēxpŭx i yatŭgŭ rŭ ngēxŭcatama nixŭ i Yudŭgŭ i yaxŭgŭxŭ i wŭxigu chomaā puracŭexŭ i Tupanaārŭ puracŭwa. Rŭ nŭmagŭ rŭ poraācŭ choxŭ nataāēxēēgŭ. 12 Rŭ ngēxgumarŭŭ ta pexŭ narŭmoxē i Epáparu.

Rü nüma rü petanüxŭ nixĩ, rü aixcūma nanaxü i Cristuarü puracü. Rü nüma rü norü yumüxēwa rü guxŭguma Tupanaxŭ nacèxŭ pexcèx na aixcūma meã pemaxēxŭcèx rü peyaxōgüamaxŭcèx rü aixcūma penaxüxŭcèx i ngēma Tupana naxwèxexŭ. ¹³ Rü choma rü marü nüxŭ chadau rü pemaã nüxŭ chixu i ñuxâcü Epáparu poraãcü pexcèx napuracü rü naxcèx napuracü i ngēma taeneëgü i Laodichéaarü ñānewa rü Iráporiarü ñānewa ngēxmagüxŭ. ¹⁴ Rü Luca ya duturu ixīcü ya nüxŭ ingechaŭgücü, rü pexŭ narümoxē. Rü ngēxgumarüŭ ta pexŭ narümoxē i Dema. ¹⁵ ¡Rü chauégagu nüxŭ perümoxēgü i taeneëgü i Laodichéawa ngēxmagüxŭ! ¡Rü ngēxgumarüŭ ta nüxŭ perümoxēgü i Nifa rü guxŭma i taeneëgü i yaxōgüxŭ i napatawa ngutaquēxegüxŭ! ¹⁶ Rü ngēxguma marü nüxŭ pedaumatüguwena i ñāã popera, rü chanaxwèxe i Laodichéawa penamu na ngemacŭĀx i taeneëgü rü ta nüxŭ nadaumatügüxŭcèx. Rü ngēxgumarüŭ ta i ngēma popera i Laodichéawa chamuxŭ, rü ngēxguma pexŭtawana nanguxgu rü chanaxwèxe i nüxŭ pedaumatügü. ¹⁷ Rü chanaxwèxe i Ariqueípumaã nüxŭ pixu, rü ñapegügü nüxŭ:

“¡Rü meã napuracü rü yanguxēē i ngēma puracü i tórü Cori cuxna āxŭ!” ñapegügü nüxŭ. ¹⁸ Choma i Pauru rü choxmēxmaãtama pexcèx chanaxümatü i ñāã chorü moxē. ¡Rü nüxna pecuèxāchie na chapoxcuxŭ! Rü chanaxwèxe i Tupana pexŭ narüngŭxēē.

Rü nuãma pexna,
Pauru

NÜXĪRAÜXÜ GA POPERA GA TECHARÓNICAWA YEXMAGÜXÜ GA YAXŌGÜXÜTANÜWA NAMUXÜ GA PAURU

Pauru rü nüxü narümoxē ga yema yaxōgüxü ga Techarónicawa yexmagüxü

¹ Pa Toeneēgü i Techarónicawa Ngēxmagüxü i Tanatü ya Tupana rü Tórü Cori ya Ngechuchu ya Cristuarü Duüxügü Ixīgüxüx, choma i Pauru rü namaã i taeneē i Chiribánu rü Timutéu nixī i pexcèx tanaxümatüxü i ñaã popera. Rü tanaxwèxe i Tanatü ya Tupana rü tórü Cori ya Ngechuchu ya Cristu pexü narüngüxēē rü pexü nataãēxēē.

Meãma nayaxōgü ga yema Techarónicawa yexmagüxü rü yemaãcü wüxi ga cuèxruü ga mexü nixīgü

² Rü torü yumüxēwa rü guxüguma pexna tacuèxächigü, rü pexcèx Tupanana moxē taxã. ³ Rü guxüguma i ngēxguma Tanatü ya Tupanamaã tidexagügu, rü taguma nüxü itayarüngümaē na ñuxäcü meã peyaxōgüãcüma penaxüxü i Tupanaärü puracü, rü ñuxäcü nüxü pengechaügüãcüma togüxü perüngüxēēxü. Rü taguma nüxü itayarüngümaē na ñuxäcü aixcüma meã ípenangüxēēxü ya tórü Cori ya Ngechuchu ya Cristu rü ngēmacèx yaxna namaã pexīnüē i ngēma ngüxü i ñuxma pingexü. ⁴ Pa Chaueneēgüx, Tupana pexü nangechaü, rü nüxü tacuèx rü nümatama nixī ga pexü nadexü. ⁵ Rü yexguma pemaã nüxü tixuxgu ga Tupanaärü ore i tüxü maxēxēēxü, rü tama toechama tidexagümare, yerü Tupanaãē i Üünexü toxü narüngüxēē na norü poramaã pemaã nüxü tixuxü. Rü meã nüxü tacuãcüma pemaã nüxü tixu ga yema ore yerü toðewatama nüxü tacuèx na aixcüma yiixü. Rü pematama nüxü pecuèx ga ñuxäcü meã pepèxewa na tamaxēxü ga yexguma na yemaãcü pexü tarüngüxēēgüxücèx. ⁶ Rü pema rü meãma penaxügü ga yema pexü tangüxēēxü rü yema tüxü nangüxēēxü ga tórü Cori ya Ngechuchu. Rü Tupanaãē i Üünexü pexü taãēxēēãcüma penayauxgü ga yema ore ga woo yemacèx poraãcü ngüxü na pingegüxü. ⁷ Rü yemaãcü ga pema rü wüxi ga cuèxruü ga mexü pixīgü naxcèx ga guxüma ga yema yaxōgüxü ga Machedóniãñewa rü Acayaanewa yexmagüxü. ⁸ Rü yema na peyaxōgüxügagu rü tórü Cori ya Ngechuchuarü ore rü guxüwama ninguchigü. Rü ngēmacèx i ñuxma rü Machedóniãñewa rü Acayaanewa rü guxüwama nüxü nacuèxgü na ñuxäcü meã Tupanaãxü peyaxōgüxü. Rü ngēmacèx marü taxucèxma tüxcüü i toma rü namaã nüxü tixu i ngēma ore i mexü i pechiga. ⁹ Erü nümagütama i ngēma duüxügü rü marü nüxü nixugügü ga ñuxäcü ga pema rü meã toxü na peyauxgüxü ga yexguma petanüwa taxixgu. Rü nüxü nixugügü ta ga ñuxäcü nüxü na perüxoexü ga perü tupananetachicünèxägü na Tupanaxüchi ya maxücü rü ixaixcümacüwe perüixüçèx rü nüxü pepuracüexüçèx. ¹⁰ Rü nüxü nixugügü ta na ñuxäcü aixcüma ípenangüxēēxü na wenaxärü daxüwa ne naxüxü ya Ngechuchu ya Tupana Nane ga yuwa ínadaxēēãcü. Rü yima Ngechuchu nixī ya tüxü íngüxüxēēcü nüxna i ngēma poxcu i äücümaxü tá íngüxü.

2

Pauruarü puracü ga Techarónicawa

¹ Pa Chaueneēgūx, rü pematama nüxū pecuèx rü tama natüçèxmamare nixī na pexūtawa taxīxū. ² Rü pema nüxū pecuèx rü naxūpa ga pexūtawa na tangugūxū rü chixri tomaã nachopetü ga Pirípucūāxgū rü tomaã naguxchigagū. Natürü Tupana toxū narüngūxēē na pemaã nüxū tixuxūcèx ga norü ore i tüxū maxēxēēxū. Rü yemacèx tama tamuñēācūma pemaã nüxū tixu ga yema ore woo ga torü uwanügü rü poraācū toxū na naguxchaxēēgūāxū. ³ Rü yexguma pemaã nüxū tixuxgu ga yema ore, rü tama ítatüēācūma pemaã nüxū tixu. Rü tama chixexū pemaã taxügüchañācūma rü tama pexū tawomüxēēgüchañācūma pemaã nüxū tixu ga yema ore. ⁴ Yerü Tupana nixī ga toxū unetacü rü toxū mucü na pemaã nüxū tixuxūcèx ga norü ore i mexū i tüxū maxēxēēxū. Rü yemacèx Tupana naxwèxexñācūma pemaã nüxū tixu ga yema ore. Rü tama duñxügüxūmare na tataāxēēgüxūcèx pemaã nüxū tixu, natürü nüxū tixu na Tupanaxū tataāxēēgüxūcèx. Rü nūma ya Tupana nixī i tüxū nacuáxū rü tüxū nadauxū rü nangugūāxū i ngēma nagu rüxñüēxū. ⁵ Rü pema nüxū pecuèx rü taguma pepēxewa pexū tixuēxūügü na toga pexñüēxūcèx, rü taguma pexū tawomüxēēgü na ngīxū tayauxgüxūcèx ga perü dīeru. Rü Tupana nixī ya toxū daucü na taguma yemaācū na tanaxūxū. ⁶ Rü taguma naxcèx tadaugü na duñxügü toxū icuèxüügüxūcèx, rü woo i pema rü bai i togü i duñxügü. ⁷ Rü woo Cristutama toxū namu na yaxōgüxūārü āēxgacügü na tixīgüxū natürü tama ñoma wūxi ga āēxgacürüū pepewa tixīgü. Natürü meāmāre pemaã itacuèx, ñoma wūxi i mamá i ngīxācügüna meā dèuxcürüū pemaã tixīgü. ⁸ Rü poraācū pexū tangechañ, rü yemacèx pemaã nüxū tixu ga Tupanaārü ore. Rü tama yemaxicatama pexna taxāxchañ ga yexguma. Natürü marü ítamemare ta ga pexcèx na tayuexū, yerü poraācū pexū tangechaügü. ⁹ Pa Chaueneēgūx, pema nüxū pecuèx ga ñuxācū poraācū na tapuracüexū na torü ñnacèx tataxegüxūcèx. Rü nguncü rü woo chütacü tapuracüe na taxúeaxūma wūxi ga guxchaxū tixīgüxūcèx ga yexguma petanūwa tayexmagügu rü pemaã nüxū tixuxgu ga Tupanaārü ore. ¹⁰ Pa Duñxügü i Tupanaāxū Yaxōgüxū, pema nixī ga toxū pedaugüxū rü Tupana rü ta toxū nadau ga ñuxācū meā na tamaxēxū ga petanūwa, rü ñuxācū taxuūma ga chixexū na taxūxū ga yexguma. ¹¹ Rü pema nüxū pecuèx ta ga ñuxācū pexū na tanangüchañxēēxū. Rü yexguma pengechañgügu, rü pexū tataāxēēgü ñoma wūxi i papá i naxācügüxū taāxēēgüxūrūū. ¹² Rü ñuxma na Tupanaārü pixīgüxū, rü pexū taxucuxēgü na meā naxcèx pemaxēxū. Rü nūma nixī i pexcèx nangemaxū na ngextá āēxgacü íyīxūwa pengugüxūcèx na ngēma mexūwa pengēxmagüxūcèx. ¹³ Rü ngēmacèx guxüguma pexcèx Tupanana moxē taxā, yerü yexguma noxri nüxū pexñüēgu ga yema norü ore ga pemaã nüxū tixuxū, rü meā penayauxgü, yerü nüxū pecuèxgü rü aixcūma Tupanaārü ore nixī rü tama duñxügüārü oremare nixī. Rü yema ore nixī ga naxüchicüxū ga perü maxū ga yexguma peyaxōgügu. ¹⁴ Pa Chaueneēgūx, nüxū tacuèx na ñuxācū ngúxū pingegüxū yerü petanüxügütama pexchi naxaie rü chixri pemaã nachopetü. Natürü yemaācütama nüxū nangupetü ga Tupanaārü duñxügü ga Ngechuchu ya Cristuaxū yaxōgüxū ga Yudéanewa yexmagüxū. Yerü natanüxügütama ga Yudígü rü chixri namaã nachopetü. ¹⁵ Rü yema Yudígü nixī ga tórü Cori ga Ngechuchuxū imèxgüxū, yexgumarüū ga norü oxigü rü nuxcūmañgüxū ga Tupanaārü orearü uruügüxū na nadèixürüū. Rü yema Yudígü nixī ga towe ingèxütanüxū. Rü Tupanamaã rü guxū i duñxügümaã narüxuanügü. ¹⁶ Rü ngēxguma ngēma duñxügü i tama Yudígü ixīgüxūmaã nüxū tixuxchañgu i Tupanaārü ore na nūmagü rü ta nüxū nangēxmagüxūcèx i maxū, rü ngēma Yudígü rü toxna nanachuxu. Rü ngēmaācū i ngēma Yudígü rü poraācūxūchima chixexū naxügü. Rü

ngēmacèx i ñuxma rü düxwa marü nüxna nangu i ngēma Tupanaärü poxcu i äücümäxüchixü.

Pauru rü nüxü nangüchaü na wenaxärü natanüwa naxüxü ga yema yaxögüxü ga Techarónicawa

yexmagüxü

¹⁷ Pa Chaueneëgüx, yexguma pexna ítxixguwena, rü woo tama pexütawa na tayexmagüechaxü, natürü guxüguma pegu tarüxñüë, rü poraäcü toxü nangüchaü na pexütawa taxixü na wenaxärü pexü ítayadaugüxcèx. ¹⁸ Rü aixcüma ngēma taxixchaü. Rü chomatama i muëxpüxcüna rü chanaxwèxe na ngēma pexütawa taèx chaxüüxüegaxü natürü ngoxo i Chataná rü guxüguma toxü nanaguxchaxëë na tama ngēma taxixüxcèx. ¹⁹ Natürü pexü ítayadaugüchaüama erü ngëxguma wenaxärü núma naxüxgu ya tórü Cori ya Ngechuchu ya Cristu rü ¿tècücèx tá nixi i Tupanapëxewa tataäëgüxü i tomäx? Rü aixcüma pewa tá nixi i ítanangüxëëxü na tomaä nataäëxü ya Tupana. Rü pema tá nixi i torü taäë pixigüxü. Rü pegagu tá nixi i aixcüma togümaätama tataäëgüxü i napëxewa. ²⁰ Rü ngēmaäcü pegagu nixi i togümaätama tataäëgüxü, rü pema nixi i torü taäë pixigüxü.

3

¹ Rü yema na taxuacüma ñuxäcü wenaxärü petanüwa na chaxüxü, rü düxwa nagu charüxñü na Atenagutama na charüxäxü. ²⁻³ Rü pexütawa chanamu ga taeneë ga Timutéu na pexü íyadauxüxcèx. Erü núma nixi i Tupanaärü puracütanüxü i wüxigu namaä tapuracüexü na tanaxunagüxüxcèx i ngēma ore i mexü i Cristuchiga. Rü ngēma petanüwa chanamu na pexü nangüxëëxüxcèx na yexeraäcü peyaxögüxüxcèx rü aixcüma petaäëgüxüxcèx rü ngēmaäcü taguma texé i petanüwa nüxü rüxoxüxcèx ega tacü rü guxchaxü pexü ngëxmagu. Erü pematama marü nüxü pecuèx na guxäma i yixema na yaxögüxü rü ngüxü tá tingegü. ⁴ Rü yexguma petanüwa tayexmagügu rü marü pemaä nüxü tixu na ngüxü tá pexü üpetüxü. Rü pema marü nüxü pecuèx na aixcüma yemaäcü pexü nangupetüxü. ⁵ Rü yemacèx ga yexguma marü tama namaä chaporagu ga yema tama paxa pechigaxü na chacuáxü, rü yemacèx düxwa Timutéuxü yéma petanüwa chamu na pexna yaxaxüxcèx ngoxi meä ípeyaxögüama i Tupanaärü ore. Yerü chaxoegaäë rü bexmana ngoxo i Chataná rü chixexügu pexü nayixëë, rü chi ngēmaäcü yixigu, rü natüxcëmamare chi nixi ga pemaä nüxü tixuxü ga Tupanaärü ore. ⁶ Natürü ñuxma na ínanguxü i Timutéu na petanüwa ne naxüxü, rü mexü i ore i pechiga ngēma ne nange. Rü tomaä nüxü nixu na ñuxäcü meä peyaxögüxü, rü ñuxäcü guxäma meä pegü pengechaügüxü. Rü tomaä nüxü nixu ta na ñuxäcü guxüguma toxü pengechaügüäcüma togu perüxñüëxü, rü ñuxäcü poraäcü wena toxü pedaugüchaüxü rü ngëxgumarüxü ta i toma rü toxü nangüchaü na wena pexü tadaugüchaüxü. ⁷ Rü ngēmacèx, Pa Chaueneëgüx, rü woo guxchaxü toxü na ngëxmaxü rü ngüxü na tingegüxü, rü poraäcü toxü nataäëxëë i ngēma pexü na tacuáchigaxü na meä ípemaxëxü rü meä peyaxögüamaxü. ⁸ Rü ñuxma na nüxü tacuáchigaxü na aixcüma meä tórü Coriaxü peyaxögüamaxü, rü poraäcü tataäëgü. ⁹ ¿Rü ñuxäcü tá Tupanana moxë taxä naxcèx i ngēma taäë i taxü i toxna pexäxü? Erü aixcüma pegagu nixi i toxü nangëxmaxü i wüxi i taäë i taxü i napëxewa. ¹⁰ Rü ngunecü rü chütacü rü tayumüxëgü, rü Tupanana naxcèx tacagü na petanüwa toxü nawoeguxëëxüxcèx na wena pexü tadaugüxüxcèx rü pexü tarüngüxëëgüxüxcèx na yexeraäcü nüxü peyaxögüxüxcèx. ¹¹ Rü poraäcü tanaxwèxegü na Tanatü ya Tupana rü tórü Cori ya Ngechuchu ya Cristu toxü natauxchaxëëxü

na wena petanüwa itayadaugüxcèx. ¹² Rü tanaxwèxegü na tórü Cori ya Ngechuchu pexü rüngüxêxü na yexeraãcü pegü pengechaügüxcèx rü guxü i duüxügüxü na pengechaügüxcèx, ngëxgumarüü i toma rü poraãcü pexü na tangechaügüxü. ¹³ Rü tanaxwèxegü na tórü Cori ya Ngechuchu pexü rüngüxêxü na peãewa rü aixcüma meã peyaxögüxcèx rü norü duüxügü i aixcüma mexügü na pixīgüxcèx rü na nataxuxüxcèx i perü pecadugü i napëxewa ya Tanatü ya Tupana i ngëxguma wena núma naxüxgu ya tórü Cori ya Ngechuchu ya Cristu namaã i guxüma i norü duüxügü. Rü tanaxwèxe na ngëmaãcü yïxü.

4

Maxü i Tupanaxü taãxêxüchiga

¹ Rü ñuxma Pa Chaueneëgüx, rü tórü Cori ya Ngechuchuégagu pexü tacèxü rü pexü tamu na guxüguma Tupanacèx meã pemaxëxü yema pexü tangüxêxüxü rü ñuxma marü penaxüxü. ² Pema rü marü nüxü pecuèx ga yema torü ucuxëgü ga tórü Cori ya Ngechuchu toxü muxü na pexü tangüxêxüxcèx. ³ Rü Tupana nanaxwèxe na aixcüma namexü i perü maxü rü naxcèxicatama na pemaxëxü. Rü tama name i chixri pemaxë i napëxewa rü to i ngexügümaã pengëãëgümare. ⁴ Rü wüxichigü tanaxwèxe na aixcüma tümamèxü tangechaüxü, rü ngïmaãxïcatama na tamaxüxü. ⁵ Rü tama name i ngïxü na pecuáxchaümarexüxcèx ngïmaã pexãmèx i wüxi i nge erü ngëmaãcü namaxë i ngëma duüxügü i tama Tupanaãxü yaxögüxü. ⁶ Rü tama name i texé ngïmaã tamaxü i naxmèx ya tümaëneë. Erü yexgumarüü ga marü pemaã nüxü tixuxüxü, rü Tupana tá poraãcü tüxü napoxcu ya guxãma ya yïxema ngëmaãcü maxëxë. ⁷ Erü Tupana tüxü nade na meã imaxëxüxcèx rü tama chixexü ixügüxcèx. ⁸ Rü ngëmacèx ega texé tama naga ñügu i ñãã nguxêëtaegü, rü pemaã nüxü chixu rü tama wüxi i duüxüga nixï i ngëma nüxü taxoxü, natürü Tupanagatama nixï i nüxü taxoxü. Rü guma nixï ga pexna namucü ga Naã i Üünexü. ⁹ Rü ngëma na pegü pengechaügüxüchiga, rü taxucèxma pexcèx chanaxümatü i poperawa. Yerü Tupanatama marü pexü nangüxêë i ngëma na ñuxãcü aixcüma pegü pengechaügüxü. ¹⁰ Rü aixcüma nixï i guxüguma meã nüxü pengechaügüxü i guxüma i taeneëgü i Machedóniãñewa ngëxmagüxü. Natürü, Pa Toeneëgüx, pexü tacèxügü na yexeraãcü meã nüxü pengechaügüxcèx. ¹¹ ¡Rü meã pegü pengechaügü, rü pexrütama maxügu perüxïnüë, rü tama i togüarü maxügu! ¡Rü pematama naxcèx pepuracüe i perü ngëmaxügü yema marü pemaã nüxü tixuxüxü! ¹² Rü ngëxguma ngëmaãcü pemaxëgu, rü ngëma duüxügü i tama yaxögüxü rü tá pexü nangechaügü, rü taxuütáma pexü nataxu.

Ñuxãcü tá nixï i ngëxguma nataegugu ya tórü Cori

¹³ Pa Chaueneëgüx, rü ñuxma rü tá pexü nüxü chacuèxêë i ngexta tá naxïxü i ngema yaxögüxü i yuexü na ngemaãcü tama pengechaügüxcèx naxrüxü i ngema tama nüxü cuèxgüxü na wena tá namaxëxü i ngema yuexü. ¹⁴ Erü yixema na yaxögüxü na nayuxü rü wena namaxüxü ga Ngechuchu, rü ngëxgumarüü ta tayaxögü na Tupana tá ñadagüxêxü i guxüma i ngëma Ngechuchuaxü yaxögüãcüma yuexü. ¹⁵ Rü ngëmacèx pemaã nüxü tixu i ngëma ore ga tórü Cori ya Ngechuchu namaã nguxêëtaexü. Rü ngëxguma wena núma naxüxgu ya tórü Cori ya Ngechuchu rü yixema na imaxëxü i ñoma i nañewa rü täütáma yixira napëxe taxï i ngëma yuexü. ¹⁶ Erü nümatama ya Cori ya Ngechuchu rü daxüwa tá ñarüxï, rü tá nangëxma i wüxi i naga i taxü i daxüwa inaxüxü i tüxü muxü, rü tá nüxü taxïnüë i Tupanaãrü

orearü ngeruügüarü ãëxgacü i tagaãcü daxüwa icagüxü, rü tá yacuegüxü ya Tupanaärü corneta. Rü ngëxguma i ngëma yuexü i Cristuaxü yaxögüxü rü tá ínarüdagü. ¹⁷ Rü ngëmawena i yixema na imaxëxü rü Tupana tá wüxigu caixanexügu tüxü nigagü namaã i ngëma duüxügü i yuwa írüdagüxü. Rü ngëmaãcü tá daxügu tórü Cori ya Ngechuchuxü tayangaugü na guxügutáma naxütawa ingëxmagüxücèx. ¹⁸ Rü ngëmacèx chanaxwèxe i ñãã oremaã pegü petaãëxëëgü.

5

¹ Natürü, Pa Chaueneëgüx, rü ngëma norü ngunexü rü taunecü i tá nagu nangupetüxü i ngëma pemaã nüxü chixuxü, rü taxucèxma pexcèx chanaxümatü i ngëmachiga. ² Erü pematama meã nüxü pecuèx rü ngëma ngunexü i taxúema nagu ínanguxëëxügu tá nixí i ínanguxü ya tórü Cori ya Ngechuchu. Rü ñoma wüxi i ngítèxáxü i ngürüãchi chütacü ínguxürüü tá nixí. ³ Rü ngëxguma duüxügü nagu íruxínüëgu na guxüma na mexü rü taxuüma na nüxü úpetüxü, rü ngëma ngunexügu rü tá ngürüãchi nagux i guxüma. Rü ñoma wüxi i ngecü i áxácücü rü ngürüãchi ngíxácümaã nguxnecacürüü tá nixí na taxúema naxchaxwa íñaxü i ngëma. ⁴ Natürü pemax, Pa Chaueneëgüx, rü marü meãma nüxü pecuèx i Cristuarü nguchiga. Rü ngëmacèx taxucèxma ngürüãchi pexü ínayabaixgü ya Cori ya Ngechuchu ñoma wüxi i ngítèxáxü tüxü íbaixgüxürüü. ⁵ Erü guxáma i pema rü Tupanaärü duüxügü pixígü, rü ngëmacèx ngóonexüwa pengëxmagü rü meãma nüxü pecuèx na ñuxácü meã pemaxëxü. Rü yixema rü tama Chatanáärü duüxügü tixígü, rü ngëmacèx tama ëänexüwa tangëxmagü rü tama tanaxü i ngëma chixexü i ëänexüwa üxü. ⁶ Rü ngëmacèx tama name i taechita tamaxëmare naxrüü i ngëma duüxügü i tama yaxögüxü. Rü name nixí i taxuãëgü, rü meã taãëgu tarüxínüë. ⁷ Erü ngëma duüxügü i naëchitamare maxëxü rü ñoma duüxügü i chütacü peexürüü nixígü. Rü ngëma duüxügü i axegüxü rü chütacü nixí i nügü nangãxëëëxü. ⁸ Natürü i yixema rü ngóonexüwa tangëxmagü, rü ngëmacèx tanaxwèxe i guxüguma taxuãëgü. Rü name nixí i aixcüma meã Tupanaãxü tayaxögü, rü yigü tangechaügü, rü meã ítananguxëë na Tupana tüxna naxãxücèx i ngëma maxü i taguma gúxü. Rü ngëxguma ngëmaãcü imaxëgu, rü ngëmaãcü tá yigü ítapoxü i ngëxguma Chataná chixexügu tüxü yixëëchaügu. ⁹ Erü Tupana rü tama tüxü nade na tüxü napoxcuexücèx, natürü tüxü nade na tórü Cori ya Ngechuchu ya Cristugagu nayauxgüxücèx i maxü i taguma gúxü. ¹⁰ Rü Ngechuchu ya Cristu rü taxcèx nayu na wüxigu namaã imaxëxücèx i daxügüxü i nañewa. Rü nüetama ega woo marü iyuyane ínanguxgu rü éxna imaxëyane ínanguxgu, erü daxügüxü i nañewa rü wüxiwa tá namaã tamaxë. ¹¹ Rü ngëmacèx, Pa Chaueneëgüx, rü name nixí i wüxichigü pegü petaãëxëëgü rü pegü peporaexëë i perü õwa ngëxgumarüü i ñuxma na marü ípenaxügüxü.

Pauru rü nayaxucuxëgü ga yema yaxögüxü

¹² Pa Chaueneëgüx, pexü tacèxügü na nüxü pengechaügüxücèx i ngëma taeneëgü i petanüwa puracüexü rü pemaã icuèxgüxü rü pexü ngúexëëxü i Cori ya Ngechucharü ore. ¹³ Rü name nixí i namaã petaãëgü rü aixcüma meã nüxü pengechaügü i ngëma taeneëgü, erü nümagü nixí i pexü nangüxëëgüxü. Rü name nixí i pegü pengechaügüãcüma pemaxë. ¹⁴ Rü pemaã nüxü tixu ta na penaxucuxëgüxü i ngëma duüxügü i oexü i tama pura-cüechaüxü. ¡Rü nüxü penangüchaüxëëgü i ngëma duüxügü i marü nüxü rüxoechaüxü na yaxögüãxü! ¡Rü nüxü perüngüxëëgü i ngëma duüxügü i turaexü i norü õwa! ¡Rü name nixí i yaxna namaã pexínüë i guxüma i ngëma taeneëgü! ¹⁵ Rü ngëxguma texé chixexü pemaã üxgu, rü tama name i chixexümaã

penataeguxēē. ¡Natürü name nixĩ i naxcèx pedau na guxũguma mexũ pexũgũxũ i pegũtanũwa rü ngema togũtanũwa rü ta! ¹⁶ Rũ name nixĩ i guxũguma petaãēgũ. ¹⁷ ¡Rũ guxũguma peyumũxēgũ! ¹⁸ ¡Rũ woo tacũ pexũ ngupetũgu, rü Tupanana moxē pexãgũ! Erũ ngēmaãcũ nanaxwèxe ya Tupana na pemaxēxũ i pema i Ngechuchu ya Cristuarũ duũxũgũ na pixĩgũxũ. ¹⁹ Rũ tama name i nüxũ pexoe i Tupanaãē i Üünexũ. ²⁰ Rũ tama name i nüxũ pexoe i Tupanaãrũ ore ega texéwa pemaã yadeaxgu ya Tupana. ²¹ Natürü name nixĩ i meãma penangugũ i guxũma i oregũ na nüxũ pecuáxũcèx rü ngoxi aixcũma yĩxũ i ngēma ore rü ěxna tama. ¡Rũ ngēma ore i aixcũma mexũxĩcatama pixõgũ! ²² ¡Rũ nüxna pixĩgachi i nagúxũraũxũ i chixexũgũ! ²³ Rũ chanaxwèxe i nümatama ya Tupana ya tüxũ taãēxēēcũ pexũ imexēē na aixcũma napēxewa pimexũcèx. Rũ chanaxwèxe i guxũwama pexna nadau i peãēwa rü pexenewa na nataxuxũcèx i tacũ i perũ chixexũ i ngēxguma wenaxãrũ núma naxũxgu ya tórũ Cori ya Ngechuchu ya Cristu. ²⁴ Rũ núma ya Tupana ya pexũ decũ rü nixaixcũma na yanguxēēãxũ i guxũma i ngēma tamaã inaxunetaxũ.

Pauru rü wenaxãrũ yema duũxũgũxũ narümoxē rü naxcèx ínaca na Cori ya Ngechuchu ya Cristu meã nüxũ rüngũxēēxũ ga

yema yaxõgũxũ

²⁵ Pa Chaueneēgũx, ¡Toxcèx peyumũxēgũ! ²⁶ Rũ chanaxwèxe i chauégagu nüxũ perümoxēgũ i guxũma i taeneēgũ. ²⁷ Rũ Cori ya Ngechuchuégagu pexũ chamu na guxũ i taeneēgũpēxewa na nüxũ pedaumatũxũ i ñaã popera i pexcèx ngema chamuxũ. ²⁸ Rũ chanaxwèxe i tórũ Cori ya Ngechuchu ya Cristu pexũ narüngũxēē i guxãma i pemax.

Rũ nuãma pexna,
Pauru

NORŪ TAXRE GA POPERA GA TECHARÓNICAWA YEXMAGŪXŪ GA YAXŌGŪXŪTANŪWA NAMUXŪ GA PAURU

Pauru rü nüxŭ narümoxē ga yema yaxōgŭxŭ ga Techarónicawa yexmagŭxŭ

¹ Pa Techarónicawa Ngēxmagŭxŭ i Toeneēgŭ i Yaxōgŭxŭ i Tanatŭ ya Tupana rü tórŭ Cori ya Ngechuchu ya Cristuarŭ Duŭxŭgŭ Ixŭgŭxŭ, choma i Pauru rü taeneē i Chiribánu rü Timutéu nixŭ i pexcèx tanaxŭmatŭxŭ i ñaã popera. ² Rü tanaxwèxe i Tanatŭ ya Tupana rü tórŭ Cori ya Ngechuchu ya Cristu pexŭ narüngŭxēē rü pexŭ nataãēxēē.

Ngēma chixexŭ ŭgŭxŭ rü Tupana tá nanapoxcue i ngēxguma wenaxārŭ núma naxŭxgu ya Cristu

³ Pa Toeneēgŭx, rü guxŭguma pexcèx Tupanana moxē taxã, erŭ name nixŭ na ngēmaãcŭ tanaxŭxŭ. Erŭ guxŭguma yexeraãcŭ peyaxōgŭetanŭ rü yexeraãcŭ pegŭ pingechaŭgŭetanŭ. ⁴ Rü ngēmacèx tomatama taãēãcŭma pechigaxŭ tixu natanŭwachigŭ i ngēma duŭxŭgŭ i Tupanaãxŭ yaxōgŭxŭ. Rü namaã nüxŭ tixu na ñuxãcŭ meã peyaxōgŭxŭ, rü ñuxãcŭ namaã peporaexŭ i guxŭma i ngēma guxchaxŭgŭ rü ngŭxŭgŭ i pexŭ ngupetŭxŭ. ⁵ Rü ngēma guxchaxŭgŭ i pexŭ ngupetŭxŭwa nüxŭ tacuèx na aixcŭmacŭ yŭxŭ ya Tupana, erŭ pexŭ nangugŭ na aixcŭma pimexŭ na pichocuxŭcèx i ngextá nüma ãēxgacŭ íyŭxŭwa. Rü ngēma na pichocuxŭcèx nixŭ i ngŭxŭ pingegŭxŭ i ñuxmax. ⁶ Rü aixcŭma name nixŭ na Tupana napoxcuexŭ i ngēma duŭxŭgŭ i ngŭxŭ pexŭ ingegŭxēēxŭ. ⁷ Natŭrŭ i pema i ñuxma ngŭxŭ ingegŭxe rü name nixŭ i wŭxigu tomaã pexŭ inarüngŭxēē ya Tupana. Rü ngēma rü tá nanaxŭ ya Tupana i ngēxguma ŭxŭemagu daxŭwa ne naxŭxgu ya tórŭ Cori ya Ngechuchu ya Cristu wŭxigu namaã i norŭ orearŭ ngeruŭgŭ i poraexŭ. ⁸ Rü aixcŭma núma tá naxŭ i nüma ya tórŭ Cori ya Ngechuchu na napoxcueãxŭcèx i ngēma duŭxŭgŭ i tama Tupanaxŭ cuáxchaŭgŭxŭ rü tama naga ñnŭxŭ i ngēma ore i mexŭ i tórŭ Cori ya Ngechuchu ya Cristuchiga. ⁹ Rü ngēma duŭxŭgŭ rü wŭxi i poxcu i taguma gŭxŭgu tá napoxcue erŭ tórŭ Cori ya Ngechuchuarŭ yaxŭwa tá nawogŭ. Rü ngēma rü tagutáma nüxŭ nadaugŭ na ñuxãcŭ namexēchixŭ rü naporaxŭ ya tórŭ Cori ya Ngechuchu. ¹⁰ Rü ngēmaãcŭ tá ngēma duŭxŭgŭmaã nangupetŭ i ngēxguma tórŭ Cori ya Ngechuchu núma ŭxgu. Rü núma tá nangu na nórŭ duŭxŭgŭ nüxŭ icuèxŭgŭxŭcèx, rü tá nabaixãchiãēgŭ rü nataãēgŭ erŭ tá nüxŭ nadaugŭ na ñuxãcŭ namexēchixŭ i nümax. Rü pema rü tá ta wŭxigu namaã pengēxmagŭ, yerŭ peyaxōgŭ ga yema Tupanaärŭ ore ga pemaã nüxŭ tixuxŭ. ¹¹ Rü ngēmacèx guxŭguma pexcèx tayumŭxēgŭ. Rü Tupanana taca na nüma pexŭ nadauxŭ na aixcŭma mexŭ i norŭ duŭxŭgŭ pixŭgŭxŭ i ñuxma na pexŭ nadexŭ. Rü ngēxgumarŭŭ ta nüxna taca na nümatama norŭ poramaã yanguxēãxŭcèx i guxŭma i ngēma mexŭ i peãēwa nagu perŭxŭnŭxŭ rü guxŭma i ngēma puracŭgŭ i mexŭ i perŭ ōgagu pexŭxŭ. ¹² Rü ngēxguma Tupana ngēmaãcŭ pexŭ rüngŭxēēgu, rü perŭ maxŭ i mexŭgagu rü guxŭma i duŭxŭgŭ tá nüxŭ nicuèxŭgŭ ya tórŭ Cori ya Ngechuchu ya Cristu. Rü nümatama ya tórŭ Cori rü tá pemaã nataãē erŭ nüma rü wŭxigu Tanatŭ ya Tupanamaã pexŭ nangechaŭgŭ.

2

Pauru rü nanangoxēē i ñuxācü tá na yīixü i ngēxguma ínanguxgu ya Cori ya Ngechuchu

¹⁻² Rū ñuxma Pa Chaueneēgüx, rü pemaã nüxü chixuxchaü i nachiga na ñuxācü tá na yīixü i ngēxguma tórü Cori ya Ngechuchu ya Cristu wena núma üxgu rü tüxü nangutaquēxexēēgügu na wüxiwa namaã ingēxmagüxüçèx. Rū pemaã nüxü tixu na tama ngürüāchi togumare perüxñüēxü rü paxa peyaxōgüxü i tacü rü ore i tama toma pemaã nüxü tixuxü. Erü tama tanaxwēxe na pebaixāchiāēgüxü ega texé pemaã idoraegu rü pemaã nüxü ixuxgu na marü ínanguxü ya tórü Cori ya Ngechuchu. Rū ngēxguma texé pemaã nüxü ixuxgu na nagu taxānegüxü na Cristu rü marü ínanguxü, rü tama name i tümaga pexñüē. Rū woo pemaã nüxü tixugügügu na tanayauxgüxü i wüxi i torü popera i nüxü ixuxü na marü ínanguxü ya tórü Cori ya Ngechuchu, ¡rü tãütáma tüxü peyaxōgü! ³ ¡Rü tãütáma naga pexñüē i ngēma duüxügü i ngēmaācü pexü womüxēēgüchaüxü! Erü naxüpa na Ngechuchu núma üxü rü tá ínangu i ngēma yatü i Tupanaärü uwanü ixixü, rü tá nananuēxēē i muxüma i duüxügü i yaxōgüchiréxü. Natürü ngēma yatü rü Tupana marü namaã nanaxuegu rü tá napoxcu. ⁴ Rū ngēma Tupanaärü uwanü rü tá Tupanamaã rü guxüma i ngēma Tupanaärü ixixümaã narüxuanü. Rü tá naxchi naxai i guxüma i tacü i mexü i duüxügü Tupanaxü namaã icuèxüügüxü. Rü Tupanaärü tupauca ya taxünewa tá nayarüto ñoma Tupana yīixürüü. Rü tá nügü nixu na Tupana yīixü. ⁵ ¿Tama ēxna nüxna pecuēxāchie ga yexguma petanüwa chayexmagu rü marü meãma pemaã nüxü chixu nachiga ga yema? ⁶ Rū pema marü nüxü pecuēx na tüxcüü yīixü i tauta núma naxüxü i ngēma Tupanaärü uwanü. Tauta núma naxü, erü tauta nawa nangu i ngema ngunexü i nagu nua naxüxü. ⁷ Rū ngēma chixexü i Tupanaärü uwanü üxü, rü marü cúācü inaxügü. Natürü nümatama i Tupanaärü uwanü rü tãütáma nangox ñuxmatáta ngēma norü chogürüü nüxü ingé. ⁸ Rū ngēxguma tá nixi i ínanguxü i ngēma Tupanaärü uwanü. Natürü nüma ya tórü Cori ya Ngechuchu rü wüxi i “cue” ñaxümaã tá nayamèx. Rū ngēxguma ínanguxgu ya tórü Cori ya Ngechuchu rü ngēma norü yaxracüüxümaã tá inayanaxoxēē i ngēma norü uwanü. ⁹ Rū ngēma Tupanamaã rüxuanüāxü, rü ngēxguma ínanguxgu rü tá nüxü nangēxma i Chatanáärü pora rü ngēmacèx tá naporaxüchi. Rü tá nanaxü i nagüxüraüxü i cuèxruügü i Chatanáärü poramaã naxüxü i namaã duüxügüxü nawomüxēēxü. ¹⁰ Rū nagüxüraüxü i chixexü tá naxü na nawomüxēēāxüçèx i ngēma duüxügü i Tupana tá poxcuexü. Rū ngēmaācü tá nüxü naxüpetü i ngēma duüxügü, yerü tama nanayauxgüchaü rü tama nüxü nangechaü i ngēma Tupanaärü ore i aixcüma ixixü i tüxü maxēxēēxü. ¹¹ Rū ngēmacèx ya Tupana rü nanangexrü i ngēma duüxügü na poraācü ínatüexüçèx rü yaxōgüāxüçèx i ngēma ore i doramare ixixü. ¹² Rū ngēmacèx düxwa Tupana tá namaã nanaxuegu na napoxcuexü i guxüma i ngema duüxügü i tama yaxōgüchaüxü i norü ore rü namaã taāēgüxü i ngēma chixexü na naxügüxü.

Tupana tüxü nade na tüxü nangēxmaxüçèx i maxü i taguma gúxü

¹³ Natürü, Pa Chaueneēgüx i Tórü Cori ya Ngechuchu Pexü Ngechaügüxex, rü guxügüma Tupanana moxē pexcèx taxā yerü nüma ga Tupana rü noxri-tama naãne ixügügumama pexü nade na pexira penayauxgüxüçèx i maxü i taguma gúxü ga yexguma pexü nangüxēēgu ga Naãē i pexü üünexēēxü rü peyaxōgügu ga yema ore i aixcüma ixixü. ¹⁴ Rū yemacèx Tupana pexcèx naca ga yexguma pemaã nüxü tixuxgu ga norü ore i mexü i tüxü maxēxēēxü. Erü

nüma nanaxwèxe na pexũ nangẽxmaxũcèx i pechica i tórü Cori ya Ngechuchu ya Cristuxõtawa i ngextá ínamexẽchixũwa. ¹⁵ Rũ ngẽmacèx, Pa Chaueneẽgũx, rü chanaxwèxe i meã peyaxõgüama rü tama nüxũ ipeyarüngümaẽ ga yema ore ga tomatama pexũ tangúexẽxũ rü yema ore ga poperagu pexcèx taxümatũxũ. ¹⁶⁻¹⁷ Rũ chanaxwèxe i tórü Cori ya Ngechuchu ya Cristu rü Tanatü ya Tupana pexũ nataãẽxẽgü rü pexũ narüngũxẽẽ na guxüguma mexũ i oremaã pidexagũxũcèx rü mexũ pexügũxũcèx. Rũ yima Tanatü ya Tupana nixĩ ya tamaã namecümaãcüma tũxũ ngechaũcü rü guxüguma tũxũ taãẽxẽcü rü tamaã ixunetacü na wüxi i ngunexũ tá naxõtawa ingẽxmagũxũ.

3

Pauru naxcèx ínaca na naxcèx nayumũxẽgũxũ

¹ Rũ ñuxma Pa Chaueneẽgũx, rü chanaxwèxe na toxcèx peyumũxẽgũxũ na paxa guxũwama nangũxũcèx i tórü Cori ya Ngechuchuarü ore i mexũ, rü duũxũgü norü ngúchaũmaã na nayauxgũxũcèx ga yema pema na penayauxgũxũrũ. ² Rũ toxcèx peyumũxẽgü ta na tama ñacü rü chixexũ tomaã naxügũxũcèx i ngẽma duũxũgü i chixexũgü! Erü tama guxũma i duũxũgü nayaxõgü. ³ Natürü tórü Cori ya Ngechuchu rü aixcüma nayanguxẽẽ i ngẽma tamaã inaxunetaxũ. Rũ nüma tá pexũ naporaexẽẽ rü pexna nadau na tama chixexũgu peyixũcèx. ⁴ Rũ tórü Cori ya Ngechuchu toxũ nüxũ nacuxẽẽ na aixcüma penaxũxũ i ngẽma pexũ tamuxũ rü tagutáma nüxũ perüxoexũ na ngẽmaãcü penaxũxũ. ⁵ Rũ tanaxwèxe i tórü Cori ya Ngechuchu pexũ narüngũxẽẽ na aixcüma pegü pengechaũgũxũcèx, ngẽma Tupana tũxũ ngechaũxũrũ. Rũ naxcèx ítaca na pexũ naporaexẽẽxũcèx na Cristurũ namaã peporaexũcèx i ngẽma ngúxũgü i ngẽxguma pexcèx ínanguxgu.

Name nixĩ na ipuracüexũ i wüxichigü

⁶ Pa Chaueneẽgũx, tórü Cori ya Ngechuchu ya Cristuégagu pexũ tamu na tama namaã pixãmücügũxũcèx i ñacü i taeneẽ i tama puracüchaũxũ rü tama ngẽma pexũ tangúexẽẽãcüma maxũxũ. ⁷ Erü pema rü marü nüxũ pecuèx na ñuxãcü tá pemaxẽxũ na toxrũ penaxũxũcèx. Yerü toma ga yexguma petanüwa tayexmagügu rü torü õnacèx tapuracüe, rü tama yexma tarüchomare. ⁸ Rũ toma rü taguma texéarü õna ngetanüãcüma tangõx. Natürü ngunecü rü chütacü rü torü õnacèx tapuracüe na tama wüxi ga guxchaxũ pexũ tixĩgũxũcèx. ⁹ Rũ wochirẽx Tupanapẽxewa rü name nixĩ ga perü ngũxẽcèx na ítaçaxũ, natürü tama yemaãcü tanaxü. Rũ torü õnacèx tapuracüe yerü pexũ nüxũ tadauxẽẽchaũ na ñuxãcü meã imaxũxũ. ¹⁰ Yerü yexguma petanüwa tayexmagügu, rü pemaã nüxũ tixu rü yíxema tama puracüchaũxẽ, rü noxtacüma ngexrüma nixĩ na tachibũxũ. ¹¹ Rũ pexcèx tanaxümatü i ngẽmachiga, erü marü nüxũ taxĩnüẽ na petanüwa nangẽxmaxũ i ñuxre i duũxũgü i oexũ rü tama puracüechaũxũ rü toguechigagumare rüxĩnüẽxũ. ¹² Rũ tórü Cori ya Ngechuchu ya Cristuégagu tanamu na meãmare ínapuracüexũcèx i ngẽma duũxũgü na nümatama norü õnacèx nataxegũxũcèx. ¹³ Pa Chaueneẽgũx, ñtama nüxũ perüchau na mexũ pexũexũ! ¹⁴ Rũ ngẽxguma texé tama naga ñnügu i ññaã ore i poperawa pemaã nüxũ tixuxũ ñrũ marü tũxũ pecuèx na texé tíxũ! Rũ tama name i tümamaã pexãmücü na taxãnexũcèx i tümax. ¹⁵ Natürü tãütáma namaã perüxuwãnu! Rũ name nixĩ i ñoma peeneẽxũ pexucũxẽxũãcüma meã tũxũ pexucũxẽmare.

Pauru rü naxcèx ínaca na Cori ya Ngechuchu nüxũ rüngũxẽẽxũ ga yema yaxõgũxũ

¹⁶Rü chanaxwèxe i nūmatama ya tórü Cori ya taãearü yora pexũ narüngũxêê na guxũguma i guxũwama petaãẽgũxũcèx. Rü chanaxwèxe na nūma rü petanüwa na nangẽxmaxũ i guxãama i pemax. ¹⁷Choma i Pauru rü choxmẽxmaãtama pexcèx chanaxūmatü i ñaã chorü moxê. Rü ngẽmaãcü nixĩ i chaugü nagu chawüégaxũ i guxũma i chorü popera. Rü ngẽmaãcü nixĩ i chanaxūmatũxũ. ¹⁸¡Rü nūma ya tórü Cori ya Ngechuchu ya Cristu rü pexna naxãã i ngema norü ngechaxũ i guxãama i pemax!

Rü nuãma pexna,
Pauru

NÜXĨRAÜXÜ GA POPERA GA TIMUTÉUCA_X NAXÜMATÜXÜ GA PAURU

Timutéuxü narümoxë ga Pauru

¹⁻² Pa Timutéux, choma i Pauru nixĩ i cuxcèx chanaxümatüxü i ñãã popera. Rü choxü nixĩ ga yamuxü ga Ngechuchu ya Cristu na norü puracü chaxüxcèx, yerü yemaâcü nanaxwèxe ga Tupana ya tüxü maxëxëecü rü tórü Cori ya Ngechuchu ya Cristu ya ínanguxëëgücü. Rü cuma Pa Timutéux, rü chaune quixĩ i Tupanaârü orewa yerü chauxütawa nixĩ ga cunayaxuxü ga Tupanaârü ore ga noxrix. Rü chanaxwèxe ya Tanatü ya Tupana rü tórü Cori ya Ngechuchu ya Cristu rü cuxna nanaxã i norü ngechaxü rü norü mecüma rü norü taãë.

Timutéuxü naxucuxë ga Pauru nachiga ga yema nguxëëtaegü ga tama aixcüma ixüü

³ Yexguma cuxna ichaxüächigu na Machedóniããnewa na chaxüxcèx rü cumaã nüxü chixu na Epéchiuarü ñãnegu na curüxãüxü na ícuyachaxächigüxëëxücèx i ngema duüxügü i doramaãmare ngëma nguxëëtaegüxü. ⁴ Rü chanaxwèxe i ngëma duüxügümaã nüxü quixu na nüxü naxoexücèx na namaã nangúexëëãxü i ngëma nacümagü ga nuxcümaügüxü ga duüxügü nagu íxü. Erü guxüma i ngëma oregü rü doramare nixĩ, rü ngëmagagu düxwa nügümaã nanuë i duüxügü. Rü ngëma oregü rü tama aixcüma nüxü narüngüxëë i duüxügü na meã Tupanaãxü yaxögüãxücèx. ⁵ Natürü Tupana nanaxwèxe i tórü maxünewa na ingearü pecaduãxgüxü, rü na mexügu rüxñüëxü, rü aixcüma meã na yaxögüxü. Rü nüma tüxü namu na ngëmaâcü imaxëãcüma yigü na ingechaügüxü. ⁶ Natürü ñuxre i duüxügü rü marü nüxna nixĩgachi i Tupanaârü ore na nawe naxĩxücèx i ngëma ore i taxuwama mexü i nuëwa nagagümarexü. ⁷ Erü nümagü tüxü nangúexëëchaü i ngëma mugü ga Moíché tüxna äxü, natürü tama nüxü nacüxëgü i tacüchiga na yĩxü i ngëma tamaã nüxü yaxugüexü rü tüxü nangúexëëxü woo nüma nagu naxñüëgu rü meãma nüxü nacüxëgü. ⁸ Rü nüxü tacüx rü ngëma mugü ga Moíché tüxna äxü rü tüxü name ega Tupana naxwèxexüãcüma naga ixñüëgu. ⁹⁻¹⁰ Natürü nüxü tacüxëgü rü guxüma i ngema mugü rü duüxügü i chixexü ügüxcèx nixĩ. Rü ngëma nixĩ i ngëma duüxügü i tama irüxñüëchaüxü, rü ngëma tama norü äëxgacüga ññüëxü, rü ngëma chixexü ügüxü, rü ngëma pecaduãxgüxü, rü ngëma tama Tupanaga ññüëxü, rü ngëma nanatüxü rü naëxü imëxgüxü, rü guxüma i ngëma máëtagüxü, rü ngëma naxüneârü ngúchaüwe rüxixü, rü ngëma yatügü rü ngexügü i naxrüü yatüxü rü ngexümaã ngëãëgüxü, rü ngëma duüxëgümaã taxegüxü, rü ngëma idoratëëxgüxü, rü ngëma äëxgacügümaã idoragüxü, rü guxüma i ngëma naxügüxü i tacü rü chixexü i yatoxyepexü i ngema nguxëëtae i mexü. ¹¹ Rü ngëma nguxëëtae i mexü rü Tupanaârü orewa nangexma, rü ngemagu nixĩ i nüxü iyarüngauxü i ngema maxü i taguma gúxü. Rü ngemaarü uruxü nixĩ ya Tupana ya mecümaxüchicü i choxü namuxü.

Pauru rü Tupanana moxë naxã yerü nüxü nüxü nangechaü ga norü chixexügü

¹² Rü moxë nüxna chaxã ya Ngechuchu ya Cristu ya tórü Cori erü nüma choxü naporaxëë rü choxü nangugü na wüxi i mexü i norü duüxü chixixü. Rü ngëmacèx choxü naxuneta na nüxü chapuracüxü. ¹³ Üpa ga choma rü

chixri nachiga chidexa ga Cristu, rü naxchi chaxai ga yema duüxügü ga nüxü yaxögüxü. Rü nawe chingechigü rü namaã chixexü chixugü. Natürü woo yemaãcü na chamaxüxü, rü Tupanaãxü changechaütümüxü yerü tama aixcüma nüxü chacuèx ga tacü na chaxüxü, yerü tauta Cristuaxü chayaxõ. ¹⁴ Rü yemaãcü ga tórü Cori ya Ngechuchu rü poraãcüxüchima chomaã namecüma yerü choxü narüngüxëe na nüxü chayaxõxüçèx rü nagagu nüxü changechaüxüçèx i guxüma i duüxügü. ¹⁵ Rü pemaã nüxü chixuxchaü i wüxi i ore i aixcümaxüchi ixixü i inaxwèxegüxü na guxãma nüxü cuáxü. Rü Ngechuchu ya Cristu rü ñoma ga naãnewa nangu na namaxëxëãxüçèx i pecaduãxgüxü. Rü natanüwa rü choma nixi ga guxüärü yexera na chixexü chaxüxü. ¹⁶ Natürü Tupana choxü nüxü nangechaü ga yema chorü chixexü na chowa duüxügüxü nüxü nadauxëxüçèx ga ñuxãcü nüma ga Ngechuchu ya Cristu yaxna chomaã na naxinüxü ga woo guxü ga pecaduãxgüxüärü yexera chixecü na chiixü. Rü ngëmaãcü wüxi i cuèxruü chixi naxcèx i guxüma i duüxügü na nümagü rü ta nüxü nangëxmaxüçèx i maxü i taguma gúxü. ¹⁷ Rü ñuxma tanaxwèxe i guxügutáma nüxü ticuèxüügü rü tanataxëëgü ya yima nüxicatama Tupana ixicü. Rü woo tama nüxü tadaugü i ñuxma natürü guxüguma tórü ãëxgacü nixi rü tagutáma nayu. Rü ngëmaãcü yi. ¹⁸⁻¹⁹ Pa Chaune, Pa Timutéux, ñaã nixi i chorü ore i cumaã nüxü chixuxü. Rü üpa ga yexguma Tupana yadexaxëëgu ga ñuxre ga taeneëgü, rü nüxü nixugügü na cuma rü tá mexü i Tupanaärü orearü uruü quiixü. Rü ñuxma chanaxwèxe i yemagü nüxü ixuxürüü meã cuyanguxëe i ngëma puracü i mexü i Tupana nawa cuxü muxü. Rü chanaxwèxe na aixcüma cuyaxõxü rü cuãëwa cumatama nüxü cucuáxü na aixcüma namexü i ngëma puracü i ícuxüxü. Ñuxre i duüxügü rü nüxü nacuèxgüchirëx i tacü nixi i mexü na naxügüãxü, natürü chixexüãma naxügü. Rü ngëmacèx düxwa nüxü narüxoe na Cristuaxü yaxögüãxü. ²⁰ Rü yemaãcü nüxü naxüpetü ga Imenéü rü Areyáüdrü. Rü düxwa choma Chatanána chanawogü ga yema taxre na Chataná ngüxü nüxü ingexëëgüxüçèx na ngëmawa nüxü nacuèxgüxüçèx na tama namexü na chixri Tupanachiga yadexagüxü.

2

Name nixi i guxüma i duüxügüçèx tayumüxëgü

¹ Rü ñuxma rü tá pemaã nüxü chixu na ñuxãcü namexü na peyumüxëgüxü. Rü pexü chamu na guxüma i duüxügüçèxira peyumüxëgüxü. ¡Rü Tupanana naxcèx peca na nüxü nangüxëxüçèx rü nüxü nüxü nangechaüxüçèx i norü pecadugü! ¡Rü moxë nüxna pexã ya Tupana naxcèx i guxüma i norü ngüxëe i guxü i duüxügüna naxãxü! ² Rü ngëxgumarüü ta name nixi i naxcèx peyumüxë i guxüma i nachiüãnegüarü ãëxgacügü i tacügü rü guxüma i ngëmatüüwa ngëxmagüxü i ãëxgacügü na ngëmaãcü itaãëgüxüçèx rü tüxü nangëxmaxüçèx i wüxi i maxü i mexü i Tupanapëxewa rü guxü i duüxügüpëxewa. ³ Rü ngëma nixi i namaã nataãëxü ya yima Tupana ya tüxü maxëxëecü. ⁴ Erü nüma nanaxwèxe na guxãma tüxü nangëxmaxü i maxü i taguma gúxü rü guxãma nüxü cuáxü i ngëma ore i aixcüma ixixü. ⁵ Rü nüma ya Tupana rü wüxitama nixi. Rü ngëxgumarüü ta wüxitama nixi i taétüwa chogüxü na Tupanaxütawa tüxü nangugüxüçèx. Rü nüma nixi ya Ngechuchu ya Cristu ya Tupana Nane ga duüxüxü ixicü. ⁶ Rü nüma ga Ngechuchu rü nügü inaxã rü nayu na guxü i duüxügüaxü naxütanüãxüçèx na Tupanaxütawa nangugüxüçèx. Rü yexguma Ngechuchu yuxgu nixi ga Tupana yanguxëëxü ga yema üpaacü duüxügümaã nüxü yaxuxü na ñuxãcü tá namaxëxëãxü. ⁷ Rü Tupana choxü naxuneta na

norü orearü ngeruü chiixücèx. Rü choxü namu na chanangüexëexücèx i ngëma duuxügü i tama Yudügü ixigüxü na nümagü rü ta yaxögüaxücèx rü nüxü nacuèxgüxücèx i ngëma ore i aixcüma ixixü. Rü ngëma pemaã nüxü chixuxü, rü aixcüma nixi, rü tama chidora. ⁸ Rü ñuxma chanaxwèxe i guxüwama nayumüxëgü i yatügü. Rü chanaxwèxe i ngearü pecaduaxücüma naxugümëxë rü ngëmaacü tama texëmaã nanuëacüma rü tama tacüchiga nügü nachoxügagüacüma nayumüxëgü. ⁹ Rü chanaxwèxe i ngexügü rü meamare üxü i naxchirugu nicuxgü, rü meamare nügü namexëëyaegü, rü tama poraacü nügü nangëxãëgü uirumaã rü meruxügümaã rü naxchiru i tatanüxümaã. ¹⁰ Natürü narümemaë nixi i meãmare Tupanacèx namaxë, rü mexü i puracü naxügü, erü ngëmaacü nanaxwèxegü na namaxëxü i ngëma ngexügü i aixcüma Tupanaaxü yaxögüxü. ¹¹ Rü chanaxwèxe i ngexügü rü meã inaxñüë i ucuxëgü. Rü tama name na nachoxügawèxegüxü. ¹² Erü ngexügüna rü chanachuxu na yatügüxü nangüexëexü, rü yatüarü ãëxgacü na yixü. Rü name nixi i inarüxñüëmare i perü ngutaquëxegüwa. ¹³ Yerü Tupana rü Adáxüxüira naxü rü yixcama ga Ebaxü. ¹⁴ Rü Chataná rü tama Adáxüxü nawomüxëë, natürü yema ngecuxü nixi ga nawomüxëexü. Rü yemaacü pecadugu ingu ga yema ngecü. ¹⁵ Rü yemacèx Tupana nüxü nixu rü tá poraacü nüxü nangux i ngëma ngexügü i ngëxguma naxíraxacügügu. Natürü ngïma i ngecü rü tá inayaxu i maxü i taguma gúxü ega meã ngíxácügümaã inacuèxgu, rü mexügu naxñüacüma yaxõõgu, rü guxügüma duuxügüxü nangechaügu rü meã Tupanapëxewa namaxëgu.

3

Yaxögüxüãrü ãëxgacügüchiga

¹ Rü pemaã nüxü chixuxchaü i wüxi i ore i aixcüma ixixü. Rü ngëxguma chi texé naxwèxegu na yaxögüxüãrü ãëxgacü tiixü, rü mexü i puracü nixi i naxcèx tadauxü. ² Rü yixema yaxögüxüãrü ãëxgacü rü tanaxwèxe na aixcüma mecü tiixü na taxúema tümachiga chixri idexaxücèx. Rü tanaxwèxe i wüxixicatama tixi ya tümamëx, rü aixcüma meã tamaxü rü mexüguxicatama tarüxñü na guxü i duuxügü tüxü ngechaügüxücèx. Rü tanaxwèxe i guxügüma meã duuxügüxü tayaxu i tümapatawa, rü mexü i ngüexëëruü tixi. ³ Rü tama name i wüxi i ngãxwèxexü rü nuwèxexü tiixü, rü tama name i tümããrü dïeruguama rüxñüxë tiixü. Natürü name nixi i guxü i duuxügümaã yaxna taxñü rü namaã tamecüma. ⁴ Rü tanaxwèxe i meãma tümachiümaã itacuèx, rü tümãxácügü rü meã tümaga naxñüë, rü tüxü nangechaügü. ⁵ Erü ngëxguma chi tama tümachiümaã meã itacuèxgu rü ¿ñuxacü i guxüma i Tupanaãxü yaxögüxümaã meã itacuáxü? ⁶ Rü yixema ngema yaxögüxümaã icuáixë rü tama name na ngexwacèx yaxõxë tiixü, erü ngürüãchi tá tügü ticuèxüü. Rü ngëmagagu düxwa nagu tangu i ngëma poxcu i Chatanáxü namaã napoxcuxü ya Tupana. ⁷ Rü tanaxwèxe i woo i ngëma duuxügü i tama yaxögüxü rü tüxü nangechaügü na taxúema chixri tümachiga idexagüxücèx rü tama Chataná chixexügu tüxü na nguxëexücèx.

Yatügü i diácunugü i tupaucawa ngüxëëtaegüxüchiga

⁸ Rü ngëxgumarü ta i ngëma yatügü i tupaucawa ngüxëëtaegüxü ixigüxü rü nanaxwèxe i mexüguxicatama rüxñüëxü nixigü. Rü nanaxwèxe i aixcüma nayanguxëëgü i ngëma nüxü yaxugüexü. Rü tama nanaxwèxe i ngãxëëchagüxü nixigü rü ëxna norü dïeruguama rüxñüëxü nixigü. ⁹ Rü name nixi i meãma nüxü nacuèxgü i guxüma i Tupanaãrü ore, na nüxü nacuèxgüxücèx na tacücèx na yaxögüaxü. Rü nanaxwèxe i nügüãëwatama nüxü nacuèxgü na norü maxü rü aixcüma yamexü i Tupanapëxewa. ¹⁰ Rü

tanaxwèxe i to i puracüwa nüxü taxügüxira i noxrix. Rü ngëxguma marü taguma chixexü naxügügu, rü marü name i tupaucawaarü ngüxëëruü tayaxigüxëë. ¹¹ Rü ngëma yatügu i tupaucawa ngüxëëtaegüxü ixigüxü rü tanaxwèxe i naxmëxgü rü ta mexügüxicatama narüxñüë. Rü tama name i oregütèëxgüxü nixigü, natürü tanaxwèxe i meã namaxë rü aixcüma nayangüxëëgü i ngëma nüxü yaxugüxü. ¹² Rü ngëma yatügu i tupaucawa ngüxëëtaegüxü ixigüxü rü tanaxwèxe i wüxixicatama tixi ya naxmëx. Rü tanaxwèxe i meãma napatacüãxgümaã inacuèx, rü naxãcügü rü meã naga naxñüë. ¹³ Rü ngëma yatügu i tupaucawa ngüxëëtaegüxü, rü ngëxguma meãma naxügüãgu i norü puracü i tupaucawa rü guxüma i duüxügü tá nüxü nangechaügü. Rü ñuxüchi i nümagütama i ngëma yatügu rü tá yexeraãcü nüxü natauxcha na nüxü yaxugüexü i ñuxãcü Tupana nanaxwëxexü i Ngechuchu ya Cristuaxü na yaxögüãxü i duüxügü.

Aixcüma nixi i ngëma ore i Tupana tüxü nüxü cuëxëëxü i Cristuchiga

¹⁴⁻¹⁵ Rü choma chanaxwèxe i paxa ngëma chaxü na cuxü íchayadauxüçèx. Natürü ngürüãchi tama paxa ngëma chaxü, rü ngëmacèx cuxcèx chanaxümatü i ñaã popera na nüxü cucuáxüçèx i ñuxãcü tá cügümaã icucuáxü napewa i ngëma duüxgü i Tupanaxü yaxögüxü. Erü nümagü nixi i Tupana ya maxücüarü duüxügü yixigüxü rü nüxü yaxugüxü rü ínapoxügüaxü i norü ore i aixcüma ixixü. ¹⁶ Rü yixema nüxü tacuèx rü aixcüma namexëchi i ngëma ore ga noxri ëxügüxü i ñuxma Tupana tüxü nüxü cuëxëëxü i Cristuchiga. Rü nüma ga Cristu rü duüxügüxü nügü nawëx ga yexguma ñoma ga naãnewa nayexmagu. Rü Naã i Üünexü nüxü nixu na mecü yixü. Rü Tupanaärü orearü ngeruügü i daxücüãx nüxü nadaugü. Rü guxü i nachüãnegüwa rü duüxügü nüxü nixugüe i nachiga, rü guxüwama duüxügü nüxü nayaxögü. Rü Nanatü rü wenaxärü daxügüxü i naãnewa nanaga i ngextá ínamexëchixüwa.

4

Duüxügü i nüxü rüxoexü na yaxögüãxüchiga

¹ Tupanaãe i Üünexü rü nüxü nixu rü ngëxguma yangaicagu na nagüxchaüxü i naãne rü nümaxü i duüxügü rü tá nüxü narüxoe na yaxögüãxü i Tupanaärü ore i mexü. Rü tá nawe narüxi i duüxügü i doramare i orexü ixügüxü i Chatanáärü ngüxëëtae nangüxëëxü. ² Rü ngëma yaxögüxü rü tá nüxü inarüxñüë i ngëma duüxügü i meã maxënetaxü rü idoratèëxgüxü. Rü ngëma duüxügü rü yeüçürü nanaxügü i ngëma chixexü rü düxwa namaã nixü na chixexügüxicatama naxñüëxü. ³ Rü ngëma duüxügü rü nanachuxu na iyangigüxü i duüxügü. Rü nanachuxu na duüxügü nangögüxü i ñuxre i õnagü rü wochirëx Tupana nanaxü i guxüma i õnagü na moxë naxcèx inaxägüãcüma nangögüãxüçèx i norü duüxügü i yaxögüxü rü nüxü cuëxgüxü i norü ore i aixcüma ixixü. ⁴⁻⁵ Natürü guxüma i Tupana üxü rü name. Rü taxuacüma nüxü taxo ega Tupanana moxë naxcèx íxãxiraãcüma nayauxgu. Erü Tupanaärü ore rü ngëma yumüxë rü nanaxüünexëë i ngëma õna i Tupanapëxewa, rü ngëmacèx name nixi na nangögüxü.

Wüxi i mexü i Ngechuchu ya Cristuarü ngüxëëruü rü mexümaã nangüxëëtae

⁶ Rü ngëxguma ngëma cumaã nüxü chixuxü i oremaã cunangüxëëgu i taeneë i yaxögüxü, rü ngëxguma nawa cungüechagu i ngëma ore i marü quixögüxü, rü ngëxguma nagu quixüëchagu i ngëma mexü i ngüxëëtae i marü nagu quixüxü, rü ngëxguma tá nixi i wüxi i mexü i Ngechuchu ya Cristuarü ngüxëëruü quiixü. ⁷ Rü tama name na naga cuxñüxü i ñoma i naãnecüãxärü

dexagümare i tama aixcüma ixixü. Natürü name nixi i guxüguma cugü cuporaxëe na yexeraäcü Tupanaxü cungechaüxücèx rü nawe curüxüxücèx rü naxcèx cumaxüxücèx. ⁸ Rü wüxi i mexü nixi na naporaxëexü rü yaxiãxcüxëexü i taxüne na aixcüma naporaxücèx. Natürü ngëmaärü yexera narümemaë nixi na yigü iporaxëexü na Tupanaxü ingechaüxücèx erü ngëma rü guxüwama tüxü name i ñoma i naãnewa rü daxüguxü i naãnewa rü ta. ⁹ Rü aixcüma nixi i ngëma ore i cumaã nüxü chixuxü, rü name nixi i guxäma tayaxögü. ¹⁰ Rü ngëmacèx nixi i ipuracüexü rü yigü iporaexëexü na nüxü ixuxücèx i ngëma ore i mexü, erü nüxü tayaxögü ya tórü Tupana ya maxücü ya guxäärü maxëxëeruü ixicü. Erü nüma nixi i namaxëxëëaxü i ngëma duüxügü i nüxü yaxögüxü. ¹¹ Rü chanaxwëxe i cunangüexëe i ngëma ore rü duüxügüxü cumu na naga naxinüexücèx. ¹² ¡Meã cugüna nadau na taxüema cuxü naxoxücèx naxcèx i ngëma na cunangüxüxü! Rü name nixi i wüxi i mexü i cuèxruü quixi naxcèx i guxüma i ngëma yaxögüxü. Rü ngëmacèx cunaxwëxe i mexü i oremaã quidexa, rü meã duüxügüpëxewa cumaxü, rü aixcüma nüxü cungechaü i guxüma i duüxügü, rü meã Tupanaãxü cuyaxö, rü napëxewa meã cumaxü. ¹³ Rü chanaxwëxe i ngutaquëxewa rü guxü i duüxügüpëxewa nüxü cudadamatü i Tupanaärü ore, rü duüxügümaã nüxü quixu na ñuxü ñaxüchiga yixü. Rü chanaxwëxe i ngëmaäcü cunangüexëe rü nüxü cunangüchaüxëe i ngëma taeneëgü ñuxmatáta ngëma changu i chomax. ¹⁴ Rü ngëmacèx name nixi i aixcüma namaã cupuracü i ngëma cuèx ga Tupana cuxna äxü ga yexguma norü puracücèx cuxü naxunetagu rü yema yaxögüxüärü äëxgacügü cuxü yangögüäcüma cumaã nüxü yaxuxgu na cuxna naxãaxü ga yema cuèx. ¹⁵ ¡Meã naxü i guxüma i ngëma cumaã nüxü chixuxü, na ngëmaäcü guxü i duüxügü nüxü daugüxücèx na ñuxäcü guxü i ngunexügu yexeraäcü meã Tupanacèx na cumaxüxü! ¹⁶ ¡Inaxuãe na ñuxäcü meã cugüna cudadaxü rü ñuxäcü meã cunangüexëexü i ngëma togü! Erü ngëxguma meã cunaxüxgu i guxüma, rü tá cunayaxu i maxü i taguma gúxü rü ngëma togü i cuxü irüxünüexü rü tá ta nüxü curüngüxëe na nümagü rü ta nayauxgüãxücèx i ngëma maxü.

5

Ñuxäcü nixi i namexü na nüxü ingechaüxü i ngëma yaxögüxü

¹ Taguma name i cunanga i wüxi i yatü i cuxü rüyamaëxü. Rü narümemaë nixi i meãma cunaxucuxë ñoma cunatürü. Rü ngëma ngextüxücügü rü name nixi i meãma namaã quidexa ñoma cueneëgüxüchirü. ² Rü yixema yaguãxgü ya ngexegü rü name nixi i meãma tümamaã quidexa cuexüchirü. Rü ngëxgumarü ta i paxügü rü name nixi i meãma namaã quidexamare wüxi i cueyëxüchirü, rü tama name i chixexügu namaã curüxünü. ³ ¡Tüxü rüngüxëe ya yixema yutegüxe ega aixcüma tacü tüxü taxügu! ⁴ Natürü ngëxguma chi wüxi i yutecü ngixü nangëxmagu i ngixäcügü rü ëxna ngitaagü, rü name nixi i nümagü ngixü narüngüxëëgü rü ngixna nanaxã i tacü i ngixü taxuxü. Erü Tupana nanaxwëxe na ngitanüxüira ngixna daugüxü na ngëmaäcü yangutanüxëëgüãxücèx ga yema naë na nayaexëexü. ⁵ Natürü yixema yutexe ya tüxica irüxãxüxë rü tüxü nataxüxe i tümatanüxü, rü Tupanaxütawaxicatama itananguxëe i tümäärü ngüxëe rü guxüguma woo chütacü rü ngunecü rü tayumüxë na tüxü nangüxëexücèx ya Tupana. ⁶ Natürü yixema yutexe ya tümäärü ngüchaüguxicatama rüxünüxë, rü Tupanapëxewa rü ñoma tayuxürü tixi. ⁷ Rü ngëma nixi i ore i tá cunangüexëexü i ngëma yaxögüxü na nügüna nadaugüxücèx na taxüma i chixexü naxügüxücèx rü taxüema nachiga chixri idexagüxücèx. ⁸ Erü ngëxguma chi wüxie rü tama meã nüxna

tadèuxgu i tümapatacũãxgü rü tümaẽ rü tümanatü, rü maneca tama aixcüma meã Tupanaãxũ tayaxõ. Rü wüxi i tama yaxõxũãrũ yexera chixecü tixĩ. ⁹ Rü ngëxguma chi wüxi i ngexũ i yutexũ naxcèx ícaxgu na ngẽma yaxõgũxũ ngĩxũ rüngũxẽẽgũxũcèx rü tanaxwèxe i 60 ya taunecüarũ yexera ngĩxũ nangëxma rü wüxitama nixĩ ga ngĩte ga ngĩxũ yexmacü ga noxrix. ¹⁰ Rü tanaxwèxe i guxũma i duũxũgü ngĩxũ nacuèxgü na wüxi i mexũ üxcü na yĩxũ. Rü name i meã ngĩxãcũxũ yaexẽecü iyixĩ, rü meã ngĩpatawa duũxũgũxũ yaxucü iyixĩ, rü yaxõgũxũãrũ ngũxẽẽruũ iyixĩ, rü daaweexũãrũ ngũxẽẽruũ iyixĩ. Rü ngẽmaãcü tanaxwèxe i guxũraũxũ i mexũ na naxũxũ. ¹¹ Natürü tama tanaxwèxe i yaxõgũxũãrũ puracü nixĩ i ngĩxna na nadaugũxũ i wüxi i yutecü ega tama 60 wa nanguxgu ya ngĩrũ taunecü. Erü wüxi i yutecü i pacü, rü ngëxguma ngĩrũ ngúchaũ Cristuna ngĩxũ ixũgachixẽẽgu, rü tá inaxwèxe na wena naxãtexũ. ¹² Rü duũxũgü tá chixri ngĩchiga nidexagü, erü tama aixcüma iyanguxẽẽ ga yema Cristumaã inaxunetaxũ ga noxrix. ¹³ Rü ngĩma rü düxwa ngextá iyaxáuchigümare, rü náí ya í rü nagu iyarũxãũx, rü düxwa tama ipuracüchaũ. Rü tama ngẽmaxĩcatama ixü, natürü düxwa ixoregütèex, rü iyangëxmachigü nawa i ngẽma dexa i tama mexũ i togüchiga, rü guxũwama nüxũ iyaxu i ngẽma ore i tama mexũ. ¹⁴ Rü ngẽmacèx chanaxwèxe i ngẽma yutegũxũ i paxũgü na wenaxãrũ naxãtegũxũ, rü naxãxãcügũxũ, rü mexũ i napataarũ dauruũgü na yixĩgũxũ. Rü ngẽmaãcü i ngẽma duũxũgü i ngĩxchi aixũ, rü taxucürüwa chixri ngĩchiga nidexagü. ¹⁵ Cumaã nüxũ chixu i ñaã ore, erü ñuxre i yutecü rü marü nüxũ irüxoe i ore i mexũ rü Chatanáwe irüxĩ. ¹⁶ Rü ngëxguma chi wüxi i ngecü i yaxõxcü rü ngĩxũ nangëxmagu i ngĩtanũxũ i yutecü, rü name nixĩ i ngĩxũ irüngũxẽẽ. Rü ngẽmaãcü tãütáma togü i yaxõgũxũãrũ puracü tá nixĩ na ngĩxna na nadaugũxũ. Rü ngëxguma tá nüxũ natauxcha i ngẽma togü i yaxõgũxũ na ngĩxũ nangũxẽẽgũxũ i ngẽma yutecü i aixcüma ngĩxũ natauxcüma i ngĩtanũxũgü i ngĩxũ rüngũxẽẽgũxũ. ¹⁷ Rü ngẽma yaxõgũxũãrũ ãẽxgacügü i aixcüma meãma ngema yaxõgũxũmaã icuáxũ, rü name nixĩ i ngẽma yaxõgũxũ aixcüma nüxũ nangechaũgü rü namaã nataãẽgü. Rü guxũãrũ yexera tanaxwèxe i nüxũ nangechaũgü rü nüxũ narüngũxẽẽgü i ngema Tupanaarũ orexũ ixugũxũ rü nangüxẽẽxũ. ¹⁸ Erü Tupanaãrũ orewa rü ñanagürü:

“Tama name i nüxna taxaü i ngẽma taxũna i puracũxũ”,
ñanagürü. Rü ñanagürü ta:

“Wüxi i puracütanũxũ rü tanaxwèxe i nüxũ na naxütanũxũ i norü puracü”,
ñanagürü i ngẽma Tupanaãrũ orewa. ¹⁹ Rü ngëxguma chi texé nüxũ ixuxgu na chixexũ naxũxũ i wüxi i yaxõgũxũãrũ ãẽxgacü, rü tãütáma tũxũ icuxĩnü ega natauxguma i taxre rü èxna tomaẽxpũx i togü i duũxũgü i nüxũ daugũxũ na aixcüma chixexũ naxũxũ. ²⁰ Natürü ngẽma yaxõgũxũãrũ ãẽxgacügü i aixcüma pecadugu maxẽxũ, rü name nixĩ i guxũ i yaxõgũxũpẽxewa cunaxucuxẽ, na guxũma i ngẽma togü i yaxõgũxũãrũ ãẽxgacügü rü ta namuũẽxũcèx na naxũgüãxũ i tacü rü chixexũ. ²¹ Rü ñuxma Tupanapẽxewa rü tórü Cori ya Ngechuchu ya Cristupẽxewa rü ngẽma daxũcũãx i orearü ngeruũgü i Tupana nüxũ ngechaũgũxũpẽxewa, rü cuxũ chamu na naga cuxĩnüxũ i ñaã ore i cumaã nüxũ chixuxũ. Rü chanaxwèxe i ngẽma cumaã nüxũ chixuxürüü meã cunaxucuxẽ i guxũma i ngẽma yaxõgũxũ rü nüetama ega woo texé tixĩgu. ²² Rü ngëxguma texexũ quingucuchixẽẽchaũgu na ngema yaxõgũxũãrũ ãẽxgacü tixĩxũcèx, ;rü taxũ i cuñuxãẽxũ na namaã cuyumũẽxũ i wüxi i duũxũ i tama nüxũ cucuáxũ i norü maxũ! Natürü name nixĩ i noxri rü meã nagu curũxĩnü i ngẽma erü ngürüãchi tá wüxi i duũxũ i pecadu üechaxũ quingucuchixẽẽ, rü cugagu tá nixĩ erü tama icuxuãẽ. ;Rü meã cugüna nadau

na tama pecadugu cunguxúcèx! ²³ Rù ngēma na cunguxnecaũxũ i ñuxguacũ, rù name nixĩ i írarüwa binune cuyaxaxũ, rù tama i dexáxicatama. ²⁴ Rù nangēxma i duũxügüarũ pecadugũ i noxtacüma ngóxũ naxüpa na Tupana nüxna çaxũ. Natürü nangēxma i to i pecadugũ i duũxügüarũ rù tãütáma nangox ñuxmatáta naãneärü guxwa nanguxgu rù Tupana tüxna icagügu. ²⁵ Rù ngēxgumarũ ta nangēxma i duũxügüarũ puracügũ i mexũ i Tupanacèx naxügüxũ i ñuxma marü nüxũ idauxũ. Rù nangēxma ta i puracügũ i mexũ i ñuxma tama nüxũ idauxũ natürü yixcúra tá nüxũ idaugüamaxũ.

6

¹ Guxãma ya yíxema yaxõgüxe rù ixãärü coriãxē, rù tanaxwèxe i tümaärü corixũ tangechaũ na ngēmaãcü taxucürüwa texé Tupanachiga rù tórü nguxēētaechiga chixri idexaxúcèx. ² Rù ngēxguma chi wüxi ya duũxē ya Tupanaãxũ yaxõxē rù wüxi i cori i tümarũ yaxõxümaã tacoriãxgu, rù tama tanaxwèxe i ngēma na tümaēneē yĩxúcèx nüxũ tarüxo na nüxũ tangechaũxũ i tümaärü cori. Natürü tanaxwèxe i yexeraãcü meã nüxũ tapuracü erü tümaärü cori i nüxũ tarüngüxēxũ i tümarũ yaxõxũ nixĩ rù tümaēneē i Tupana nüxũ ngechaũxũ nixĩ. Pa Timutéux, chanaxwèxe i meãma cunangüxēē i ngēma ore i cumaã nüxũ chixuxũ, rù guxüma i yaxõgüxüpèxewa nüxũ quixu.

Tupanaärü ore rù aixcüma tüxũ name

³ Rù cumaã nüxũ chixu rù nangēxma i duũxügü i namaã nguxēētaegüxũ i ngēma nguxēētae i tama namaã wüxiguxũ i tórü nguxēētae, rù tama namaã wüxiguxũ i tórü Cori ya Ngechuchu ya Cristuarü nguxēētae i mexũ, rù tama namaã wüxiguxũ i ngēma nguxēētae i Tupanaärü orewa ngóxũ. ⁴ Rù cumaã nüxũ chixu rù yíxema ngēmaãcü nguxēētaexe rù tügü ticuèxüũ rù taxuüma tacuèx. Rù ngēmacèx ngēxürüxümare i dexa rù naxcèx tachoxügawèxe, rù tama texéga taxĩnüchaũ, rù düxwa ñoma tídaawexürüũ tixĩ namaã i ngēma tümacüma. Rù ngēmagagu rù taxãuxãchiwèxe, rù tanuxwèxe, rù togümaã taguxchiga, rù taxúxeaxüma tayaxõ. ⁵ Rù ngēmaãcü i ngēma duũxügü i chixēãégüxũ, rù nügümaã nanuēēcha, rù tama nüxũ nacuèxgü i ngēma ore i aixcüma ixĩxũ, rù nagu narüxĩnüē rù Tupanaärü orewa nixĩ i dĩeru ngĩxũ nayauxgüxũ. ⁶ Rù aixcüma nixĩ i Tupanaärü orewa nüxũ iyarüngauxũ i taxüma i mexũ, natürü ngēma mexũ rù tümacèxicatama nixĩ ya yíxema namaã taãégüxe i ngēma marü tüxũ ngēxmaxũ. ⁷ Rù yixema rù yexguma noxri ixíraegu, rù ngearü yemaxüãxēmaã tabue i ñoma i naãnewa. Rù ngēxguma iyuxgu rù taxucürüwa tayange i tórü ngēmaxügü. ⁸ Natürü ngēxguma tüxũ nangēxmagu i taxchiru rù tórü õna rù name nixĩ i ngēmamaãtama tataãégü. ⁹ Natürü ngēma duũxügü i dĩeruãxgüchaũxũ, rù tama yaxna namaã naxĩnüē i ngēxguma ngēma dĩeruarü ngúchaũ nüxũ poragu. Rù ngēmacèx nagu nayi i muxüma i ngúchaũgü i taxuwama mexũ i chixexüwa nagagüxũ, rù ngēmacèx düxwa i ngēma duũxügü rù poraãcü nachixe rù norü guxümaãma inayarütauxe. ¹⁰ Erü ngēma na dĩeruguama rüxĩnüxũ rù ngēma nixĩ i guxüma i chixexügüarü ügü. Rù nangēxma i ñuxre i duũxügü i dĩeruguama rüxĩnüxũ rù ngēmacèx Tupanana nixĩgachi. Rù ngēmaãcü nügünatama guxchaxũ naxãgü rù nügüxütama ngechaũ nanguxēégü.

Tupanaãxũ yaxõgüamaxüchiga

¹¹ Natürü cumax, Pa Timutéux, rù wüxi ya yatü ya Tupanaxũ yaxõcü quixĩ. ¡Rù ngēmacèx nüxna ixügachi i guxüma i ngēma chixexũ! ¡Rù meã Tupanapèxewa namaxũ, rù norü ngúchaũ naxü, rù meã nüxũ yaxõ, rù nüxũ nangechaũ i duũxügü, rù yaxna namaã naxĩnü! Rù tama name

i cugü quicuèxüxü. ¹² ¡Cugü naporaxêê na meã cuyaxõõmaxüçèx rü cunaxüamaxüçèx i Tupanaârü puracü ega woo tacü rü guxchaxü cuxü üpetügux! ¡Rü cugüna nadau na ngemaãcü taguma cuxna iyanaxoxüçèx i ngema maxü i taguma gúxü! Yerü yema maxüçèx nixi ga noxri Tupana cuxü yaxuxü ga yexguma muxüma ga duüxügüpêxewa nüxü quixuxgu na ñuxâcü Ngechuchu ya Cristuaxü na cuyaxõxü. ¹³⁻¹⁴ Rü ñuxma Pa Timutéux, rü napêxewa ya Tupana ya guxâxüma maxêxêêcü, rü napêxewa ya Ngechuchu ya Cristu ga âêxgacü ga Piratumaã nüxü ixücü ga ñuxâcü Nanatü ya Tupanaãxü na yaxõõxü, rü cuxü chamu na naga cuxinüxü i ngêma ore i cumaã nüxü chixuxü. Rü tama chanaxwêxe i cunaxüchicüü i ngêma ore, na taxúema texé tacüçèx cuxü oregüxüçèx rü chixri cuchiga idexaxüçèx. Rü chanaxwêxe i ngêmaãcü meã cunaxü ñuxmatáta ínangu ya tórü Cori ya Ngechuchu ya Cristu. ¹⁵ Erü ngêma ngunexü i Tupana nagu naxwêxexügu rü tá Cristuxü nangoxêê. Erü nüxicatama Tupana nixi, rü nüma nixi i aixcüma mecü yiixü rü guxüetüwama nangêxmaxü. Rü guxü i âêxgacügüarü Æêxgacü yiixü, rü guxü i corigüarü Cori yiixü. ¹⁶ Rü nüxicatama nixi na taguma nayuxü. Rü nüma rü poraãcü íngáonexüwa namaxü, rü taxucürüwa texé ngêma ngóonexüna tangaicama. Taguma wüxi i duüxü nüxü nadau, rü taxuacüma texé nüxü tadau. Nüma rü guxüguma naporaxüchi rü taguma inayarüxo na Æêxgacü yiixü. Rü ngêmacèx tanaxwêxe i guxâma nüxü ticuèxüügüecha. Rü ngêmaãcü yi. ¹⁷ Rü yixema muarü dîeruáxe i ñoma i naãnewa, ¡rü tümamaã nüxü pixu na tama ngêmamaã tügü ticuèxüügüxüçèx rü tama nagu tarüxînüèxüçèx na ngêma tümäärü dîeruwa nüxü itayangaugüxü i tümäärü maxü! Erü ngêma dîeru rü paxa tá nagux. Natürü narümemaê nixi i Tupanaga taxinü, erü yimawa nixi i nüxü itayangaugüxü i tümäärü maxü. Rü nüma nixi i poraãcü tuxna naxããxü i guxüma i tacü i inaxwêxexü na itaãégüxüçèx. ¹⁸ ¡Rü namaã nüxü ixu i ngêma muarü dîeruãxgüxü, rü name na ngêmamaã mexü naxügüxü rü togü i duüxügüxü nangüxêégüxü! Rü ngêmaãcü tá namu i ngema mexügü i naxügüxü i Tupanapêxewa. Rü tanaxwêxe i nümagü i muarü dîeruãxgüxü rü na ínamemaregüxü na togüna naxããxü rü namaã nangauxü i ngêma norü ngêmaxügü. ¹⁹ Rü ngêmaãcü tá nüxü nangêxma i norü mexügü i daxüguxü i naãnewa, rü tá nanayauxgü i ngêma maxü i aixcüma ixixü.

Pauru rü Timutéuxü namu, rü yemaãcü inayacuèxêê ga norü popera

²⁰ Pa Timutéux, ¡meã namaã nangüexêêtae i guxüma i ngêma ore i cuxü chamuxü! Rü tama name na icurüxînüxü i ñoma i naãnecüãxârü dexagümare i taxuwama mexü rü ngêma ore i doramare ixixü i duüxügü nüxü ixügügünetaxü na ore i nawa nüxü icuáxü yiixü. ²¹ Erü ñuxre i nümagü i ngêma noxrütama cuèxgu íxü, rü düxwa ngêmagagu Tupanana nixigachi. Rü chanaxwêxe i Tupana meã pexü narüngüxêê.

Rü nuãma pexna,
Pauru

NORÜ TAXRE GA POPERA GA TIMUTÉUCA_X NAXÜMATÜXÜ GA PAURU

Timutéuxü narümoxe ga Pauru

¹ Pa Timutéux, choma i Pauru nixi i cuxcex chanaxümatüxü i ñaã popera. Rü choxü nixi ga namuxü ga Ngechuchu ya Cristu, yerü yemaäcü nanaxwexe ga Tupana. Rü nüma choxü namu na nüxü chixuxüçex na ñuxäcü tüxü nangëxmaxü i maxü i taguma gúxü, ega aixcüma Ngechuchu ya Cristuaxü yaxögügu. ² Cuxü changechaü, Pa Chaune, Pa Timutéux. Rü chanaxwexe ya Tanatü ya Tupana rü Ngechuchu ya Cristu ya tórü Cori na cuxü nangüxëëgüxü rü nüxü cungechaütümüügüxü rü cuxü nataäexëëgüxü.

Tama name i taxãne na Cristuchigaxü ixuxü

³ Guxüguma i chütacü rü ngunecü rü cuxna chacuëxächixü i chorü yumüxëwa, rü poraäcü cuxcex moxë Tupanana chaxã. Rü nüxü nixi i chapuracüxü i mexü i chauãemaã, yexgumarüü ga nuxcümaügüxü ga chorü oxigü naxügüxürüü. ⁴ Choma rü nüxna chacuëxächi na ñuxäcü poraäcü chauxcex cungechaüxü rü chauxcex cuxaxuxü ga yexguma cuxna íchixüxgu. Rü wenaxärü cuxü chadauxchaü na aixcüma chataäexüçex. ⁵ Erü nüxna chacuëxächi na ñuxäcü aixcüma Tupanaãxü cuyaxõxü. Rü curü noxë ga Loída rü cue ga Euníchia rü tüma rü woetama tüxira Tupanaãxü tayaxögü rü nüxü chacuëx i ñuxma rü cuma rü ta aixcüma cuyaxõxü. ⁶ Rü ngëmacèx cumaã nüxü chixu na cugü cuporaxëëxü na yexeraäcü cunaxüamaxüçex i ngëma Tupanaärü puracü ga naxcèx cuxna naxããxü ga cuëx ga yexguma noxri cuxü chingögüäcüma cumaã chayumüxëgu. ⁷ Yerü Tupana rü tama tüxna nanamu ga naãe i tüxü muñëëxü. Natürü tüxna nanamu ga Naãe i Üünexü na tüxü naporaxëëxüçex na aixcüma duüxügüxü ingechaügüxüçex rü meã yigümaã icuáxüçex. ⁸ Rü tama chanaxwexe na cuxänexü na nüxü quixuxü i nachiga ya tórü Cori. Rü ngëxgumarüü ta tama chanaxwexe i chauxcex cuxãne i ngëma na chapoxcuxü naxcèx i Tupanaärü ore. Rü name nixi i yaxna namaã cuxinü i ngëma ngúxü i cuxcex ínguxü nagagu i ngëma ore i mexü i nüxü quixuxü. Rü Tupana tá cuxü naporaxëë. ⁹⁻¹⁰ Rü Tupana tüxü namaxëxëë rü tüxü nade na naxcëxicatama imaxëxüçex. Natürü tama tacü rü mexü na ixüxügagu nixi ga yemaäcü tamaã namecümaxü ga Tupana. Natürü yemaäcü tüxü narüngüxëë yerü woetama yema nixi ga nanaxwëxexü yerü Ngechuchu ya Cristugagu tüxü nangechaü. Rü nüma ya Tupana ga tautama naãne üxgumama tüxü ngechaüçü, rü yexguma ínanguxgu ga tórü maxëëëruü ga Ngechuchu ya Cristu, rü yexguma nixi ga Tupana tüxü nüxü dauxëëxü na ñuxäcü poraäcü tüxü nangechaüxü. Rü nüma ga Cristu nixi ga iyanaxoxëëãxü na iyuxuchixü yerü nüma rü yuwa ínarüda rü wena namaxü. Rü norü orewa tüxü nüxü nacuëxëë na yixema rü ta tüxü nangëxmaxü i ngëma maxü i taguma gúxü ega nüxü yaxõxgu. ¹¹ Rü Tupana choxü ningucuchixëë na nüxü chixuxüçex i ngëma norü ore i mexü. Rü choxü namu na ngëma oremaã chanangüexëëxüçex i duüxügü i guxüwama. ¹² Rü ngëmacèx nixi i poraäcü ngúxü chingexü rü chapoxcuxü i ñuxmax. Natürü tama naxcèx chaxãne i ngëma, erü choma nüxü chacuëx na texéaxü chayaxõxü. Rü nüxü chacuëx na naporaxü i nüma na nüxna nadauxüçex i ngëma puracü i choxna naxãxü rü namaã inacuáxüçex i chauãe i guxügutáma ñuxmatáta ngëma ngunexü i nagu wena núma naxüxü. ¹³ Rü chanaxwexe i meãma nagu quixü

i ngēma nguxēētae i mexū ga chauxūtawa naxcèx cungúxū. Rū name nixī i meā nūxū cuyaxōōma ya Ngechuchu ya Cristu rū meā nūxū cungechaū i guxūma i duūxūgū, erū Cristuarū duūxū quixī. ¹⁴ Rū name nixī i Tupanaāē i Ūūnexū i tawa maxūxūārū ngūxēēmaā ícunapoxū i ngēma nguxēētae i mexū i Tupana cuxna āxū. ¹⁵ Cuma marū nūxū cucuèx rū guxūma ga yema yaxōgūxū ga Áchiaarū naānewa ne íxū rū marū choxna naxīgū. Rū yematanūwa nayexma ga Figueru rū Ermóquene. ¹⁶ Onesíferu rū muēxpūxcūna choxū nataāēxēē, rū tama chauxcèx naxāne i ngēma na chapoxcuxū. Rū ngēmacèx chanaxwèxe i tórū Coriaxū nangechaūtümüügū i guxūma i natanūxūgū. ¹⁷ Rū yexguma noxritama Dumawa nanguxgu ga nūmax, rū chauxcèx nadauecha rū ñuxmata choxū iyangau. ¹⁸ Cuma meāma nūxū cucuèx ga ñuxācū tūxū na nangūxēēxū ga Onesíferu ga Epéchiuarū íānewa. Rū ngēmacèx chorū yumūxēwa naxcèx íchaca na Tupanaāxū nangechaūtümüūxūcèx i ngēxguma wena ñoma i naānewa naxūxgu ya tórū Cori ya Ngechuchu.

2

Ngechuchu ya Cristuarū puraciūtanūxū i mexūchiga

¹ Rū ñuxma, Pa Chaune, Pa Timutéux, ¡rū cugū naporaxēē namaā i ngēma pora i Ngechuchu ya Cristu cuxna āxū! ² Yema ore ga chauxūtawa nūxū cuxīnūxū ga yexguma muxūma ga duūxūgūpēxewa nūxū chixuxgu, rū chanaxwèxe i ñuxma cuxi ngēma oremaā cunangúexēē i togū i yatūgū i meā naāēxū cuèxgūxū na nūxī togūxū nangúexēēxūcèx namaā i ngēma ore. ³ Rū tama name i naxcèx cumuū na Ngechuchu ya Cristuarū ore-gagu ngúxū quingexū. Natürü name i namaā cupora ñoma wūxi i mexū i norū churararū. ⁴ Rū wūxi i duūxū i churarawa ngēxmaxū, rū taxucürüwama to i puracū i tama churaraarū ixīxūgu narūxīnū. Natürü ngēma norū āēxgacū nagu namuxū i puracūgu nixī i naxīnūxū na ngēmaācū norū āēxgacūxū nataāēxēēxūcèx. ⁵ Rū ngēxgumarū ta wūxi i duūxū i wūxi i ínūcawa nūgū ingucuchixēēxū, rū taxuacūma nanayaxu i norū āmare ega chixri naxīnūcèxwèxegu rū tama ngēma ínūcaarū āēxgacūga naxīnūgu. ⁶ Rū texé ya naānewa puracūxe rū name nixī i tūxira tanayaxu i tūmanetūarū o. ⁷ ¡Rū guxūguma nagu rūxīnū i ñāā ore i cumaā nūxū chixuxū! Rū nūma ya Cori ya Ngechuchu tá cumaā inananguxūxēē i guxūma na nūma nanaxwèxexūācūma cunaxūxūcèx i ngēma puracū. ⁸ ¡Rū nūxna nacuèxāchi ya Ngechuchu ya Cristu ya Dabítanūxū ga guma yuwa írūdacū! Rū yimachiga nixī i ngēma ore i mexū i duūxūgūmaā nūxū chixuxū. ⁹ Rū ngēma oregagu nixī i ngúxū na chingexū rū ñoma wūxi i máētaxūrū nūma poxcupataūwa cadenamaā chichotaxū. Natürü Tupanaārū ore i mexū, rū guxūwama nanguama rū taxucürüwama texé tayachota. ¹⁰ Rū ngēmacèx yaxna namaā chaxīnū i ngēma ngúxū i chingexū naxcèx i ngēma duūxūgū i Tupana dexū. Erū chanaxwèxe i nūmagū rū ta Ngechuchu ya Cristuaxū nayaxōgū, rū ngēmaācū na nayauxgūāxūcèx i maxū i mexū i taguma gúxū. ¹¹ Rū pemaā nūxū chixuxchaū i wūxi i ore i aixcūma ixīxū. Rū ngēxguma Cristu yuxūrū norū orecèx iyuegu, rū naxrū tá ta wena tamaxē na nūma ínangēxmaxūwa ingēxmagūxūcèx. ¹² Rū ngēxguma ñoma i naānewa yaxna namaā ixīnūēgu ega ngúxū ingexgu, rū daxūguxū i naānewa rū wūxigu namaā āēxgacū tá tixīgū. Rū ngēxguma tama Cristuxū icuáxchaūgu i ñoma i naānewa, rū nūma rū tāūtáma tūxū nacuáxchaū i daxūguxū i naānewa. ¹³ Natürü woo ñuxguacū i yixema rū tama aixcūma naxūxgu i ngēma Tupanamaā ixunetaxū, natürü nūma ya Tupana rū guxūguma nayanguxēē i ngēma tamaā inaxunetaxū, erū taxuacūma nūgūtama nawomūxēē.

Wüxi i mexü i puracütanüxü i Tupana namaã taãxüchiga

¹⁴ Rü ngēma yaxōgüxü i cuxütawa ngēxmagüxü, rü name nixi i Tupanaegagu nüxna nüxü cucuèxãchixēē na tama nuxcūmaügüxü i ore i taxuwama mexüçex nügūmaã na yaporagatanüçüxüçex. Erü ngēma rü wüxi i chixexü nixi, rü nanachixēãxēē i ngēma duüxügü i nüxü ñnüëxü. ¹⁵ ;Rü cugü naporaxēē na meã cunaxüxü i Tupanaärü puracü na cumaã nataãxüçex i ngēxguma napēxewa cunguxgux rü ngemaãcü taxucèxma cuxãnexüçex i ngēxguma nüma cuxna nacaxgu naxcèx i curü puracüchiga! ;Rü ngēmacèx name i aixcūma meã namaã cungüxēētae i ngēma ore i mexü i aixcūma ixixü! ¹⁶ ;Rü nüxü rüxo i ñoma i naãnecüãxärü dexagümare i taxuwama mexü! Erü ngēma duüxügü i ngēma dexagümaregu ñxü, rü guxüguma yexeraãcü chixexügu nayi. ¹⁷ Rü ngēma norü ngüxēētae i ngēma duüxügü, rü ñoma wüxi i ðaaweane i tüxü íyimachixēēxürü nixi. Rü yema nixi ga nüxü ngupetüxü ga Imenéu rü Firetu. ¹⁸ Yerü nidoragümare ga nüxü na yaxugüexü rü marü na nangupetüxü i yuetaarü dachiga. Rü yemaãcü nanawomüxēēgü ga ñuxre ga duüxügü na tama noxrirü yaxōgüãxüçex i Tupanaärü ore. ¹⁹ Natürü Tupanaärü ore rü taguma inayarüxo rü taguma naxüchicüü. Rü ngēma norü orewa rü ñanagürü:

“Törü Cori ya Tupana nüxü nacuèx i texé tixi ya norü duüxügü ixigüxe. Rü guxãma ya yixema nüxü ixuxe na Ngechuchu ya Cristu rü tümaärü Cori yixü, rü name nixi i nüxna tixigachi i guxüma i chixexü”, ñanagürü i ngēma norü orewa. ²⁰ Wüxi i duüxü i dñeruãxüchixü rü napatawa nangēxma i poratu i uirunaxcèx rü dñerumünaxcèx. Rü nangēxma ta i poratu i nañnaxcèx rü waixümünaxcèx. Rü ngēma poratu i uirunaxcèx rü dñerumünaxcèx rü mexü i norü õnacèx nixi. Natürü ngēma poratu i nañnaxcèx rü waixümünaxcèx rü guxchirechixü nixi. ²¹ Rü ngēxguma wüxi i yaxōxü naxwèxegu na aixcūma mexü i Tupanaärü puracütanüxü na yixü, rü name nixi i nüxna nixügachi i guxüma i chixexü. Rü ngēxguma tá nixi i Tupanapēxewa aixcūma naxüünexü na naxüãxüçex i nagüxüraüxü i puracü i Tupana namaã nüxü ixuxü. ²² ;Nüxü rüxo i guxüma i ngēma chixexü i ngextüxüçügü nagu rüxñnüëxü! ;Rü meã Tupanapēxewa namaxü rü aixcūma nüxü yaxō! ;Rü nüxü nangechaü i guxüma i duüxügü, rü tãxü i namaã cunuxü! ;Rü ngēmaãcü namaxü wüxigu namaã i guxüma i ngēma duüxügü i aixcūma Tupanacèx maxēxü rü ngemaãcü yumüxēgüxü! ²³ Rü tama name i naxcèx icurüxñnü i ngēma dexagü i taxuwama mexü. Erü ngēma dexagügagu rü düxwa nügüchi naxaie i duüxügü. ²⁴ Rü wüxi i Tupanaärü puracütanüxü rü tama name na texemaã núcèx nadauxü. Rü narümemaie nixi na guxãma namecūmaxü.. Rü nanaxwèxe i yaxna namaã naxñnüãcüma meã duüxügüxü nangüxēē i Tupanaärü ore. ²⁵⁻²⁶ Rü wüxi i Tupanaärü puracütanüxü rü name na yaxna namaã naxñnüãcüma meã nayaxucuxēgüãxü i ngēma duüxügü i tama irüxñnüëchaüxü. Rü name i ngēmaãcü ñnanangüxēē na Tupana nüxü rüngüxēëxü i ngēma duüxügü na nüxü naxoexüçex i norü chixexü rü nüxü nacuèxgüxüçex i ngēma ore i aixcūma ixixü. Erü Tupana nanaxwèxe na naxuãgüxü i ngēma duüxügü rü nawa ñnangüxüxü i ngēma chixexü i ngoxo i Chataná nagu nayixēëxü na noxrütama ngüchaü namaã naxüçex.

3

Nuxãcü tá nixi i duüxügüçüma i ngēxguma nagüxchaügu i naãne

¹ Rü chanaxwèxe i nüxü cucuèx rü ngēxguma nagüxchaügu i naãne rü tá nangēxma i ãcūmaxügü rü guxchaxügü naxcèx i duüxügü. ² Rü duüxügü rü tá nügügüxicatama narüxñnüë, rü norü dñerugama tá narüxñnüë. Rü

tá nügü nicuèxügü, rü ngēmaäcü tãütáma nüxü nacuèxgüchaü i togü i duüxügü i tama naxrüü taarü dïeruãxgüxü. Rü chixri Tupanachiga tá nidexagü, rü tãütáma nanatüga rü naēga naxñüēchaü. Rü tãütáma moxē inaxã i ngēxguma Tupana nüxü rüngüxēēgu, rü ngēmaäcü tãütáma nüxü nacuèxgüchaü i Tupanaârü ore. ³ Rü tãütáma nagu narüxñüē i togü i duüxügüxü na nangechaügüxü, rü tãütáma nüxü nangechaütümügü. Rü tá naxoregütèèxgü, rü tãütáma nügü naporaexēē na yaxna namaã naxñüēxücèx i naxüneârü ngüchaügü. Rü tá nichixecüma, rü tá naxchi naxaie i guxüma i ngema mexü. ⁴ Rü duüxügüechitawèxegüxü tá nixīgü, rü nuēwèxexü tá nixīgü, rü nügü icuèxüügüxü tá nixīgü. Rü tá norü ngüchaüçèxama nadaugü, rü tãütáma Tupanaxü nacuèxgüchaü. ⁵ Rü tá nügü nayaxögüxüchinetaxēē natürü ngēma norü chixexü i naxügüxüwa tá nangoxoma na tama aixcüma yaxögüãxü i ngēma ore i mexü. Rü ngēma duüxügü i ngēmaäcü maxēxü, rü tama name na namaã cuxãmücüxü rü natanügu cuxãxü. ⁶⁻⁷ Erü ngēma duüxügütanüwa nangēxmagü i nümaxü i İpatagu ichocuetanüxü. Rü norü ngüxēētaemaã nayawomüxēēgü i ngēma ngexügü i ngema ngēxmagüxü i tama naãēxü icuáxü rü chixri maxēxü. Rü ngēma ngexügü, rü norü ngüchaügütama chixexüwa nanagagü, rü ngēmacèx woo guxüguma nangúe natürü taguma aixcüma nüxü nacuèxgü i ngēma ore i aixcüma ixixü. ⁸ Rü ngēma duüxügü i chixexümaã ngüxēētaegüxü, rü chixexüguxicatama narüxñüē, rü tama aixcüma nayaxögü i Tupanaârü ore. Rü naxchi naxaie i ngēma ore i aixcüma ixixü, naxrüü ga yema yuüxügü ga Yane rü Yáübre ga tama Moïchéga İñüēchaüxü. ⁹ Natürü tãütáma muxü i duüxügü nüxü nayaxögü. Erü guxüwama i duüxügü rü tá nüxü nicuèxächitanü na wüxi i duüxügü i chixexügu rüxñüexü rü ngeãēmarexü yixīgüxü naxrüxü ga yema taxre ga tama Moïchéga İñüēchaüxü.

Ucuxēmaã inyacuèxēē ga Pauru na Timutéumaã yadexaxü

¹⁰⁻¹¹ Natürü cumax, Pa Timutéux, marü nüxü cucuèx ga ñuxãcü meã na chanangüxēēxü ga duüxügü, rü ñuxãcü meã chamaxüxü, rü ñuxãcü nagu charüxñüxü rü meã chayaxõxü, rü ñuxãcü yaxna namaã chaxñüxü ga duüxügü rü nüxü changechaüxü. Rü cuma nüxü cucuèx ga ñuxãcü na chaugü chaporaxēēxü na yaxna namaã chaxñüxü i guxchaxügü. Yerü ga duüxügü rü chowe ningexütanü na choxü yamèxgüxücèx. Rü cuma rü nüxü cucuèx ga tacü choxü na üpetüxü ga Aütioquáwa rü Icúniüwa rü Listrawa, rü ñuxãcü chowe na yangexütanüxü rü poraãcü ngüxü chingexü. Natürü tórü Cori ya Tupana choxü İnapoxü na tama choxü yamèxgüxücèx. ¹² Rü aixcüma cumaã nüxü chixu rü guxãma ya yixema naxwèxegüe na Ngechuchu ya Cristucèx tamaxēxü, rü togü tá tümachi naxaie rü chixri tá tümamaã nachopetü. ¹³ Natürü ngēma duüxügü i chixecümagüxü rü ngēma duüxügü i idoratèèxgüxü rü yexeraxü i chixexügu tá nayi. Erü Chataná marü nayawomüxēēgü, rü ngēmacèx nüxü togüxü nawomüxēēgü. ¹⁴ Natürü i cuma rü name nixi i guxüguma meã nagu quixü i guxüma i ngēma ore i marü cungüxü. Erü cumatama rü nüxü cucuèx na aixcüma yixü i ngēma ore, rü nüxü cucuèx na texégü tixīgüxü ga guxema namaã cuxü ngüxēēgüxe. ¹⁵ Rü cuma nüxü cucuèx rü cubuxgumamatama nawa cungüx i ngēma Tupanaârü ore i üünexü. Rü ngēmawa cunayaxu i cuèx na nüxü cucuáxücèx i ñuxãcü tüxü na nangēxmaxü i maxü i taguma gúxü ega Ngechuchu ya Cristuaxü yaxögügu. ¹⁶ Rü guxüma i Tupanaârü ore i ümatüxü rü nügüãēwatama nanayaxu ga Tupana. Rü ngēma ore rü name na duüxügüxü namaã ingüxēēxü, rü namaã yaxucuxēgüxü rü namaã iyanawèxächixēēgüxü, rü namaã nangüxēēxü na meã Tupanapèxewa namaxēxücèx. ¹⁷ Rü ngēmaäcü i ngēma ore rü tüxü

narüngüxêe ya yixema Tupanaârü ixixê, na meã nüxü tacuáxücèx i ngêma Tupana naxwèxexü rü ítamemarexü na tanaxüxü i nagúxüraüxü i puracü i Tupana tümamaã nüxü ixuxü.

4

1-2 Rü nüma ya Ngechuchu ya Cristu ya núma tá ücü na nüxü yacagüxücèx i ngêma duüxügü i maxèxü rü ngêma marü yuechiréxü, rü yimapéxewa rü Tupanapéxewa cuxü chamu na nüxü quixuxücèx i ngêma ore i mexü. Rü ngëxguma cuxü yatauxchaächigu rü woo cuxü naguxchagu, rü chanaxwèxe i nüxü quixuama i ngêma ore. Rü ngêmaäcü chanaxwèxe na icuyanawëxächixëëgüxü rü meã cuyaxucüxëgüxü rü nüxü cunangüchaüxëëxü i duüxügü. Rü name nixi i yaxna namaã cuxinüácüma meã cunangüxëë. ³ Erü yixcüra i duüxügü rü täütáma nüxü naxinüéchaü i ngêma ngüxëëtae i mexü. Erü ngêma duüxügü rü nichixecüma. Rü ngêmacèx naxcèx nadaugü i norü ngüxëëruügü i nüma nanaxwèxegüxüácüma nangüxëëxü. ⁴ Rü täütáma nüxü naxinüéchaü i Tupanaârü ore i aixcüma ixixü. Erü ngêma ore i doramare ixixüguama tá narüxïnüë. ⁵ ¡Natürü cuma rü meã cügüna nadau, rü ínaxuãë, rü namaã naporá ega ngüxü cuxü üpetügu! ¡Rü nüxü ixuama i ore i mexü i tüxü maxëxëëxü, rü meã yangüxëë i ngêma puracü i Tupana cuxna äxü! ⁶ Täütáma muxü i ngunexü ñoma i naãnewa changëxma erü marü choxü ningaica na Tupanaârü puracü chaxüxügagu chayuxü rü choxü na yamëxgüxü i duüxügü. ⁷ Rü choma rü marü chayangüxëë i ngema puracü i Tupana choxna äxü. Rü ñuxma na nagüxü i ngema puracü rü taguma nüxü charüxo na chayaxöxü. ⁸ Rü ñuxma rü marü Tupana choxü namaã nangüxü i ngêma ämare i mexëchixü ya tórü Cori ya Ngechuchu ya äëxgacü ya mecü tá choxna äxü i ngëxguma wenaxârü ñoma i naãnewa naxüxgu. Rü täütáma chaxica choxna nanaxã i ngêma ämare, natürü tá tüxna nanaxã ya guxãma ya yixema tümamaârü ngüchaümaã ínangüxëëgüxe na wenaxârü núma naxüxü.

Timutéuxü naxucüxë ga Pauru

⁹ Cumaã nüxü chixu rü chanaxwèxe i paxa nuã cuxü, rü choxü ícuyadau. ¹⁰ Dema rü ñoma i naãneârü ngëmaxügu naxinüxügagu choxna nixü rü ñãne ga Techarónicawa naxü. Rü Crechéüte rü Gárataanewa naxü, rü Titu i Darumáchiaanewa. ¹¹ Rü Lucaxicatama nixi i ñuxma chauxütawa ngëxmaxü. Rü chanaxwèxe i naxcèx cudau i Marcu na nuã cunagaxücèx. Erü nüma rü chauxcèx name na choxü na nangüxëëxü i ñãã puracüwa. ¹² Rü Tíquicu rü ñãne ya Epéchiuwa chanamu. ¹³ ¡Ngëxguma nuã cuxüxgu rü nuã nange i chorü gáuxüchiru ga ñãne i Tróawa ngëxmaxü ga Carpupatawa chatáxü! Rü chanaxwèxe i nuã cunana i chorü poperagü. Rü guxüârü yexera chanaxwèxe na nua cunanaxü i chorü poperagü i idixgüpütaxü. ¹⁴ Areyáüdrü i cobrenaxcèx i buetarearü üwa puracüxü rü poraäcü chixri chomaã naxüpetü. Natürü Tupana nüxü nacüex i ñuxäcü tá na napoxcuäxü naxcèx ga yema chixexü ga chomaã naxüxü. ¹⁵ ¡Meã cügüna nadau na tama chixexü cumaã naxüxücèx! Erü poraäcüxüchima naxchi naxai i Tupanaârü ore i mexü. ¹⁶ Yexguma noxrixüchima äëxgacügüpëxewa chaugüétüwa chideaxgu rü taxüema choxü tarüngüxëë. Guxüma choxna nibuxmü. Natürü tama chanaxwèxe ya Tupana rü nagu narüxïnü i ngêma. ¹⁷ Natürü tórü Cori choxü naporaxëë rü choxü narüngüxëë na choxü natauxchaxücèx na nüxü chixuxücèx ga norü ore i mexü i tüxü maxëxëëxü. Rü yemaäcü guxüma ga yema duüxügü ga tama yaxögüxü ga yéma yexmagüxü rü nüxü naxinüë ga yema ore. Rü yemaäcü tórü Cori ya Ngechuchu choxü ínangüxuchixëë ga

yexguma taxũ ga ãũcũmaxũwa chayexmagu. ¹⁸ Rũ nũma ya tórũ Cori tá choxũ ínguxuchixẽẽ nawa i guxũma i chixexũgũ. Rũ tá choxna nadau na ngextá ãẽxgacũ íyĩxũwa choxũ nagaxũcèx. Rũ name i guxũguma nũxũ ticuèxũgũ. Rũ ngẽmaãcũ yĩ.

Pauru rũ wenaxãrũ Timutéuxũ narũmoxẽ rũ naxcèx ínaca na Cori ya Ngechuchu ya Cristu nũxũ rüngũxẽẽxũ

¹⁹ Chanaxwèxe i chauégagu nũxũ curũmoxẽ i Prisila, rũ Aquiru, rũ Onechéperutanũxũgũ. ²⁰ Eratu rũ ããne i Corĩtiugu narũxãũx. Rũ Turuquínu rũ idaawexũma ããne i Miretuwa chandatèx. ²¹ Rũ naxũpa i gáuanexũ rũ chanaxwèxe i nuãcuxũ. Rũcuxũ narũmoxẽgũ i Eubúru, rũ Prudẽte, rũ Linu, rũ Cáudia, rũ guxũma i taeneẽgũ i yaxõgũxũ. ²² Rũ chanaxwèxe i tórũ Cori ya Ngechuchu ya Cristu cumaã nangẽxma, rũ Tupana pexũ narũngũxẽẽ ya guxãma i pemax.

Rũ nuãma pexna,
Pauru

POPERA GA TITUCAX NAXÜMATÜXÜ GA PAÜRÜ

Tituxü narümoxë ga Pauru

¹⁻² Pa Titux, choma i Pauru i Tupanaärü puracütanüxü nixi i cuxcèx chanaxümatüxü i ñaã popera. Rü Ngechuchu ya Cristu nixi ga choxü mucü na ngëma duüxügü i Tupana dexümaã nüxü chixuxüçèx i norü ore na Tupanaãxü yaxögüãxüçèx rü nüxü nacüexgüxüçèx i ngëma norü ore i aixcüma ixixü i tüxü rüngüxëxü na naxcèx imaxëxüçèx. Rü ngëmaãcü Tupanaãxü tayaxögü rü naxcèx tamaxëchaü erü tanayauxgüchaü i ngëma maxü i taguma gúxü. Rü ngëma maxü i taguma gúxü nixi ga nuxcümaxüchima ga yexguma tauta naãne üxgu Tupana ya taguma idoracü nüxü ixuxü. ³ Rü ñuxma rü marü nawa nangu na Tupana tüxü nüxü cuèxëxü i ngëma norü ore i mexü i tüxü maxëxëxü. Rü ngëmacèx nümatama ya Tupana ya törü maxëxëruü choxü namu na nüxü chixuxüçèx i ngëma norü ore. ⁴ Pa Titux, cuma rü chaune quixi i Tupanaärü orewa yerü chauxütawa cunayaxu ga Tupanaärü ore ga noxri rü ñuxma rü chauxrü cuyaxõ. Rü chanaxwëxe i cuxü narüngüxëgü rü cuxü nataãxëgü ya Tanatü ya Tupana rü Ngechuchu ya Cristu ya törü maxëxëruü.

Tituarü puracü ga yexguma Crétawa nayexmagu

⁵ Rü yexguma Crétaarü capaxügu cuxü chamuxgux, rü cumaã nüxü chixu na yema yaxögüxütanüwa cunaxüxü ga yema puracü ga tama chinguxëxü ga yexguma cuxna yéma chataegugu. Rü yemacèx cumaã nüxü chixu na wüxichigü ya ñãnewa rü nüxü cuxunetaxü i tupaucaarü ãëxgacügü na ngema yaxögüxümaã inacuèxgüxüçèx, yema cuxü chamuxürüü. ⁶ Rü wüxi i ãëxgacü i yaxögüxüärü, rü name i meã namaxü na taxúema chixri nachiga idexagüxüçèx. Rü name i wüxitama tixi ya namèx. Rü naxácügü rü name na yaxögüãxü rü meã namaxëxü na taxúema nüxü ixuxüçèx na chixri namaxëxü rü tama nanatüga naxinüxü. ⁷ Erü yixema yaxögüxüärü ãëxgacü ixixë, rü Tupanaärü puracü nixi i taxüxü. Rü ngëmacèx tanaxwëxe i aixcüma meã tamaxü. Rü tama name i wüxi i yatü i chixecümaxü tixi rü chixexügu rüxñüxü tixi. Rü tama name na tangãxüxü, rü nucèx tadauxü, rü togü i duüxügüxü tawomüxëxü norü dñerucèx. ⁸ Natürü narümemae na guxüguma meã duüxügüxü tayaxuxü i tümapatawa, rü aixcüma nüxü tangechaü i ngëma duüxügü i meã maxëxü. Rü tanaxwëxe i wüxi i yatü i aixcüma tümãxëxü cuáxe tixi, rü guxüguma duüxügümaã mecümaxë tixi, rü aixcüma Tupanacèx maxüxë tixi, rü guxüguma meã tügümaã icuáxe tixi. ⁹ Rü yixema yaxögüxüärü ãëxgacü ixixë rü name i nagu tixü i ngëma ore i aixcüma ixixü ga tümamaã nüxü ixuxü na tümã rü ta togüxü tangüexëxüçèx i ngëma ore i mexü, na ngëmaãcü nüxü tanangüchaüxëxüçèx rü nüxü tayaxögüxëxüçèx i ngëma duüxügü i noxri tama yaxögüchaüxü. ¹⁰ Erü nangëxma i muxüma i yaxögüchiréxü i tama aixcüma irüxñüchaüxü. Rü ngëma guxüärü yexera tama irüxñüchaüxü nixi i ngëma Yudiugü i yaxögüchiréxü i ñuxma naxwëxegüxü na nuxcümaügüxü i nacümawe naxixü i ngëma yaxögüxü. Rü nümagü rü ore i taxuwama mexüxü nixugügü, rü ngëmaãcü duüxügüxü nawomüxëgü. ¹¹ Natürü ngëma duüxügü i ngëmaãcü chixri nguxëtaegüxü, rü chanaxwëxe i noxtacüma icuyanangeëxgüxë. Erü muxüma i duüxügüxü nachixexëgü rü ñuxmata ñuxre ya ñpatawachigü rü nanachixexë i guxüma

i duïxügü na tama aixcüma Tupanaãxü yaxögüãxüçèx. Rù ngëma ore i taxuwama mexümaã duïxügüxü nangúexëë na ngëmaãcü tüxü nawomüxëëgüãcüma ngïxü nayauxgüxüçèx i diëru. ¹² Rù wüxi ga yematama capaxüçüãx ga norü tupanaãrü orearü uruü nixï ga natanüxügüxütama ixuxü rü ñaxü:

“Rü ñaã Cretacüãx i duïxügü rü guxüguma doratèëxgüxü nixïgü, rü ñoma naëxügürüü nidürae, rü nitaanü, rü nioxochi”, ñaxü. ¹³⁻¹⁴ Rù aixcüma nixï ga yema ore ga nüxü yaxuxü ga yema yatü. Rù ngëmacèx chanaxwëxe i poraãcü cuyaxucüxëgü i ngëma yaxögüxü na aixcüma meã yaxögüãxüçèx, rü tama nagu naxïxüçèx i ngëma Yudiügücüma. Rù chanaxwëxe i namaã nüxü quixu na tama naga naxïnüëxüçèx ega tacü namuãxgu i ngëma duïxügü i tama nüxü cuëxgüchaüxü i ore i aixcüma ixïxü. ¹⁵ Rù yïxema aixcüma Tupanapëxewa mexë rü guxüwama tame. Natürü yïxema tama aixcüma Tupanapëxewa mexë, rü taxucürüwa tacü rü nacüma i nagu tixüxümaã tügü tamexëë. Rù woo tümaãëwa nagu tarüxïnüxüwa rü tachixe erü ngëma nacüma i nagu tixüxümaã Tupanapëxewa tügü tamexëëchaü. ¹⁶ Rù ngëma duïxügü i ngëmagu rüxïnüëxü rü nügü yaxugügügu rü Tupanaxü nacüex, natürü ngëma nümagü naxügüxüwa nüxü tacüex na tama aixcüma yïxü na Tupanaxü nacüëxgüxü. Rù nümagü rü Tupanapëxewa nichixe, rü tama naga naxïnüë, rü taxuwama nime na tacü rü mexü naxügüxü.

2

Ngüxëëtae i aixcüma mexü

¹ Natürü i cuma, Pa Titux, rü name i guxügutáma ngëma mexü i ngüxëëtaemaã cunangúexëë rü taguma nüxna quixügachi. ² ¡Rü meã yaxucüxëgü i ngëma yatügü i yaguãxgü na aixcüma meã naãëxü nacuaãcüma namaxëxüçèx, rü taguma nadauxcüraxüwëxegüxüçèx, rü guxüguma meã nagu na naxïnüëxüçèx! ¡Rü nangúexëë na aixcüma meã Tupanaãxü yaxögüãxüçèx, rü guxü i duïxügüxü nangechaügüxüçèx, rü yaxna namaã naxïnüëxüçèx ega woo tacü rü guxchaxü nüxü üpetügux! ³ Rù ngëxgumarüü ta chanaxwëxe i meã cuyaxucüxëgü i ngëma ngexügü i yaguãxgü na meã Tupanapëxewa namaxëxüçèx. Rù tama name na yaxoregütèëxgüxü, rü nangãxëwëxegüxü. Rù name nixï i guxü i duïxügüpëxewa rü meã namaxë. ⁴⁻⁵ Rù ngëma ngexügü i yaguãxgü rü name nixï i meã na nangúexëëãxü i ngëma ngexügü i paxügü na aixcüma natexü rü naxãcügüxü nangechaügüxüçèx, rü meã naãëxü nacüëxgüxüçèx, rü mexügüxicatama na naxïnüëxüçèx, rü meã napatana nadaugüxüçèx, rü guxü i duïxügümaã namecümagüxüçèx, rü aixcüma natega naxïnüëxüçèx na taxúema chixri Tupanaãrü orchiga idexagüxüçèx. ⁶ ¡Rü ngëxgumarüü ta meãma yaxucüxëgü i ngëma ngextüxücügü na aixcüma meã naãëxü nacuaãcüma namaxëxüçèx rü tama nadauxcüraxüwëxegüxüçèx! ⁷ ¡Rü cumatama rü name nixï i meã napëxewa cumaxü i guxüwama na ngëmaãcü wüxi i norü cuëxruü i mexü quiïxüçèx! Rù ngëxguma cunangúexëëgu, rü cunaxwëxe i mexügu curüxïnüãcüma cunangúexëë rü tama ñnücaãcüma namaã nüxü quixu i ngëma ore. ⁸ Rù ngëxguma ngëmaãcü meã cunangúexëëgu i ngëma ore i mexü, rü taxúetáma texé chixri nachiga tidexa. Rù ngëmaãcü ya yïxema chixri tachiga idexagüchaüxë rü tá taxãneë erü taxucürüwa tacü rü chixexüxü tixugü i tachiga. ⁹ ¡Rü meãma yaxucüxëgü i ngëma duïxügü i coriãxgüxü! ¡Rü namaã nüxü ixu na guxüguma meã norü coriga naxïnüëxüçèx, rü norü corimaã namecümagüxüçèx, rü taguma norü corixü nachoxügagüxüçèx! ¹⁰ Rù tama name i norü coriaxü nangïxgü, natürü nanaxwëxe i aixcüma meãma norü corimaã namaxë rü taguma nanawomüxëëgü. Rù ngëxguma

ngēmaācū namaxēgu, rü guxūma i togü i duūxūgü tá nüxū nadaugü na ñuxācū aixcūma namexēchixū i ngēma ore i duūxūgūxū namaā ingúexēēxū nachiga ya Tupana ya tórü maxēēruū. ¹¹ Tupana rü poraācūxūchima tamaā namecūma, rü yemacèx núma nanamu ga Nane na guxūma i duūxūgūaxū nangēxmaxūcèx i maxū i taguma gúxū ega nüxū yaxōgūāgu. ¹² Rü ngēma na Tupana tamaā mecūmaxūwa nüxū tacuèx na namexū na nüxū rüxoexū i ñoma i naānecūāxārü ngúchaūgü rü guxūma i to i chixexūgü i napēxewa ixūxū. Rü ngēma Tupana taxcèx üxū tüxū nanguxēē na meā yigūmaā icuèxgūācūma togü i duūxūgūpēxewa rü Tupanapēxewa meā imaxēxū i ñoma i naānewa. ¹³ Rü tüxū nanguxēē ta na guxūguma meā ínanguxēēgūxūcèx na nataeguxū ya Ngechuchu ya Cristu ya tórü maxēēruū ya tórü Tupana ya tacü ixīcū. Erü Tanatü ya Tupana rü tamaā inaxuneta na wena tá nataeguxū ya Ngechuchu, rü wüxi i taāē tá nixī i ngēxguma ínanguxgu. ¹⁴ Rü nüma ga Ngechuchu rü taxcèx nayu na tüxū ínanguxūxēēxūcèx nawa i guxūma i chixexū, rü tüxū yamexēēgūxūcèx na aixcūma norü duūxūgü i mexū ixīgūxūcèx rü aixcūma naxcèx idaugūxūcèx na guxūguma mexū ixīgūxūcèx. ¹⁵ Rü ngēma ore tá nixī i duūxūgūxū namaā cungúexēēxū rü nüxū cunangúchaūxēēxū na Tupanacèx namaxēxūcèx. Rü ngēma oremaā tá aixcūma cuyaxucuxēgü i duūxūgü erü Tupanatama nixī ya cuxū mucü na ngēmaācū cunaxūxū. Rü tama name na texé cuxū oxū.

3

Ñuxācū name na namaxēxū i ngēma yaxōgūxū

¹ Rü ngēma yaxōgūxū i duūxūgü, ¡rü namaā nüxū ixu na nachixūānearü āēxgacügüga naxīnūēxū rü guxūma i ngema togü i āēxgacügüga naxīnūēxūcèx! ¡Rü yaxucuxēgü na ínamemaregūxūcèx na naxūgūāxūcèx i guxūma i mexū i puracügü i āēxgacügü unagūxū! ² Rü tama name i texéchiga chixri nidexagü rü texémaā nanuē. Natürü name nixī i guxū i duūxūgūmaā namecūmagü rü aixcūma guxū i duūxūgūxū nangechaūgü rü tama nügü nicuèxūxūgü. ³ Rü name nixī i yaxna namaā taxīnūē i ngēma tama yaxōgūxū, yerü yixema rü ta ga ũpa rü chixri tamaxē, rü tama Tupanaga taxīnūē. Rü itayarütaxe rü tórü ngúchaū tüxū napora. Rü chixexūgu rüxīnūēācūma tamaxē rü taxāūxāchiwèxegü. Rü naxchi taxaie ga togü, rü nüma rü ta taxchi naxaie. ⁴ Natürü yexguma Tupana ya tórü maxēēruū tüxū nüxū dauxēēgu i norü ngechaxū naxcèx i guxūma i duūxūgü, rü nüma rü tüxū namaxēxēē. ⁵ Rü yema na tüxū namaxēxēēxū rü tama tacü rü mexū na ixīgūxūgagu nixī, natürü tüxū namaxēxēē yerü nüxū tangechaütümüügü. Rü Naāē i Üünexū i tüxū ngexwacaxūxēēxūārü poramaā Tupana tüxū inayanaxoxēē ga tórü pecadu na ngexwacaxūxū i duūxūgü ixīgūxūcèx. ⁶ Rü Ngechuchu ya Cristu ya tórü Maxēēruūgagu nixī ga Tupana ga guxūma ga norü ngúchaūmaā tüxna namuāxū ga Naāē i Üünexū. ⁷ Rü yemaācū tamaā namecūma rü tüxū narüngūxēē ga Tupana na aixcūma imexūcèx i napēxewa, rü na nayauxgūxūcèx i ngēma írünguxēēgūxū i maxū i taguma gúxū. ⁸ Rü guxūma i ngēma marü cumaā nüxū chixuxū rü aixcūma nixī. Rü ngēmacèx chanaxwèxe i guxūguma nüxū quixu i ngēma ore na aixcūma mexū naxūgūxūcèx i ngēma duūxūgü i Tupanaāxū yaxōgūxū. Erü ngēma ore rü guxūwama name i guxācèx. ⁹ ¡Natürü nüxna ixūgachi i ngēma dexagü i taxuwama mexū i duūxūgü nawa nügü choxūgagūxū rü ngēma oregü i nuxcūmaūgūxū i duūxūgūchigamare ixīgūxū! ¡Rü nüxna ixūgachi i ngēma nügü ngaexū! ¡Rü tama name na natanūgu cuxāxū i ngēma duūxūgü i nügūmaā nüxū rünuētanūcūxū nachiga i ngēma mugü ga Moīché

umatüxü! Erü guxüma i ngēma na nüxü rünuētanücüxü rü taxuwama name, rü natüçèxmamare nixĩ. ¹⁰ Rü ngēxguma chi wüxie i petanüwa rü chixexü i ngüxēētaemaã ngēma yaxōgüxüxü titoyegu, rü name nixĩ i tümamaã nüxü quixu na tama ngexü tawagüxüçèx. Rü ngēxguma tanaxüamagu, rü name nixĩ na wena tümamaã nüxü quixuxü. Rü ngēxguma tama cuga taxĩnüchaügu rü tanaxüamagu i ngēma chixexü rü name nixĩ i noxtacüma tüxü ícumuxüchi natanüwa i ngēma yaxōgüxü. ¹¹ Erü ngēma chixri na tamaxüxüwa rü tá nangox na tachixeãxü ya yixema duüxē rü tümäärü pecadugagu tá nixĩ na tapoxcuxü.

Tituxü naxucüxē ga Pauru

¹² Rü ngēxguma cuxütawa chanamuxgu i Artema rü ēxna Tíquicu, rü chanaxwèxe i paxa Nicaporíchiuwa cuxü na choxü ícuyadauxüçèx. Erü ngēma tá nixĩ i chanangupetüxēxü ya yima tauemacügü ya nagu nagáuanecü. ¹³ Rü guxüma i cuxü tauxchaxümaã chanaxwèxe i nüxü curüngüxēē i āēxgacü i Chena i Dumacüāxgüarü mugüxü cuáxü rü Aporu na paxa núma naxĩxüçèx. Rü chanaxwèxe i nüxna cunaxã i ngēma nanaxwèxexü i norü namawaü na taxuüma nüxü taxuxüçèx. ¹⁴ Rü ngēma taeneēgü i yaxōgüxü, rü name nixĩ i naxcèx nangúe na mexü naxügüxü rü togüxü nangüxēēgüxü ega tacü nüxü tauxgux. Rü ngēmaãcü i ngēma togü rü tá nayaxōgü.

Pauru rü wenaxãrü Tituxü narümoxē rü naxcèx ínaca na Tupana nüxü rüngüxēxüçèx

¹⁵ Rü guxüma i taeneēgü i nuã chauxütawa ngēxmagüxü rü cuxü narümoxēgü. Rü ngēxgumarüü ta i choma rü chanaxwèxe i nüxü curümoxē i taeneēgü i yaxōgüxü i cuxütawa ngēxmagüxü. Rü chanaxwèxe i Tupana pexü narüngüxēē i guxãma i pemax.

Rü nuãma cuxna,
Pauru

POPERA GA FILEMÚŨCAX NAXŪMATŪXŪ GA PAURŪ

Pauru rü nüxŭ narümoxê ga Filemúŭ

¹ Pa Toeneê i Filemúŭ i Toxrüxŭ Tupanaarü Puracüwa Puracüxex, choma i Pauru rü taeneê i Timutéumaã cuxcèx tanaxümatü i ñaã popera. Rü choma rü nuxa chapoxcu nagagu na nüxŭ chixuxŭ i Ngechuchu ya Cristuarü ore. ² Rü ñaã popera i cuxcèx taxümatüxŭ, rü naxcèx ta nixŭ i ngêma taeneêgü i cupatawa ngutaquëxegüxŭ rü ngixcèx ta nixŭ i taeyèx i Ápia rü naxcèx ta nixŭ i taeneê i Ariquípu i taxrüxŭ Tupanaarü puracüwa puracüxŭ. ³ Rü chanaxwèxe i Tanatü ya Tupana rü tórü Cori ya Ngechuchu ya Cristu pexŭ narüngüxêê rü pexŭ nataãêxêê.

Filemúŭ rü aixcüma Ngechuchuaxŭ nayaxô rü yema yaxôgüxŭxŭ nangechaŭ

⁴ Rü guxüguma i ngëxguma cuxna chacuëxächigu i chorü yumüxêwa, rü Tupanana moxê chaxã cuxcèx. ⁵ Erü nüxŭ chacuáchiga na ñuxácü nüxŭ cuyaxôxŭ ya tórü Cori ya Ngechuchu rü ñuxácü nüxŭ na cungechaŭxŭ i guxüma i duüxügü i Tupanaarü ixŭgüxŭ. ⁶ Rü Tupanana naxcèx chaca na cuxŭ nangüxêëxŭcèx na duüxügümaã nüxŭ quixuxŭcèx na ñuxácü Cristuaxŭ yaxôgüxŭ i yixemax, erü chanaxwèxe na meã nüxŭ cucuáxŭ na ñuxácü Ngechuchu ya Cristugagu poraãcü tüxŭ nangüxêëxŭ ya Tupana. ⁷ Rü choma rü poraãcü chataãëxŭchi na ñuxácü nüxŭ cungechaŭxŭ i ngêma yaxôgüxŭ. Erü cugagu nixŭ, Pa Chaueneêx, na nataãêgüxŭ i ngêma togü i yaxôgüxŭ.

Pauru rü Filemúŭna naca na mea Onéchimüxŭ nayaxuxŭcèx

⁸⁻⁹ Rü ngëmacèx nangëxma i wüxi i ngüxêê i cuxütawa naxcèx íchacaxchaŭxŭ. Rü dücax, Cristu nixŭ ya choxŭ mucü rü ngëmacèx choxŭ nangëxma i pora na cuxŭ chamuxŭ na cunaxüxŭcèx i ngêma ngüxêê i mexŭ i tá cumaã nüxŭ chixuxŭ. Natürü tama ngêmaãcü cuxŭ chamuxchaŭ erü cuxŭ changechaŭ, rü ngëmacèx chauxcèx narümemã nixŭ na cuxŭ chacèëxümarexŭ naxcèx i ngêma. Rü choma i Pauru rü marü chaya rü ñuxma rü chapoxcu Ngechuchu ya Cristucèx. ¹⁰ Rü ngëmacèx cuxna naxcèx chacaxchaŭ i wüxi i ngüxêê naxcèx i Onéchimu i nuã poxcupataŭwa chauxütawa Cristuxŭ yaxuxŭ. Rü ngëmacèx i ñuxma rü Tupanaarü orewa rü chaune nixŭ. ¹¹ Rü ũpa ga Onéchimu rü wüxi ga curü duüxŭ ga taxuwama cuxŭ mexŭ nixŭ. Natürü i ñuxma rü cuxŭ rü choxŭ rü ta name. ¹² Rü ñuxma rü cuxcèx chanataegüxêê i nüma i Onéchimu. Rü chanaxwèxe i meã cunayaxu, ñoma choxŭ cuyaxuxŭrüü. ¹³ Chierü chanaxwèxe na nuxma chauxŭtagu naxãüxŭ, rü na cuchicüü choxŭ nangüxêëxŭcèx i ñuxma na chapoxcuxŭ naxcèx i Tupanaarü ore i mexŭ. ¹⁴ Natürü tama chanaxüxchaŭ i tacü i tauta “Ngü” ñacuxŭ choxŭ. Erü ngêma ngüxêê i cuxna naxcèx chaçaxŭ, rü chanaxwèxe na curü ngüchaŭtama yŭxŭ i ngêma rü tama i chorü mugagu na yŭxŭ. ¹⁵ Rü bexmana Tupana nanaxwèxe na paxaãchi cuxna yaxüxŭ ga Onéchimu na yŭxcama rü wenaxarü cuxcèx nataegüxŭcèx rü ngêmaãcü guxügutáma cuxütawa nangëxmaxŭcèx. ¹⁶ Natürü i ñuxma rü tama ngëxŭrüüxŭmare i curü duüxŭrüü nixŭ, erü wüxi i curü duüxŭarü yexera nixŭ i ñuxmax, erü taeneê i nüxŭ ingechaŭxŭ nixŭ. Rü aixcüma poraãcü nüxŭ changechaŭ i chomax, natürü chanawae i cuma rü yexeraãcü nüxŭ cungechaŭ. Erü ñuxma rü tama wüxi i curü düxŭmare nixŭ, natürü wüxi i cueneê i tórü Coriaxŭ yaxôxŭ nixŭ i ñuxmax. ¹⁷ Rü ngëmacèx, rü ngëxguma choxŭ cudèuxgu na

aixcūma cueneē chiixŭ, rŭ chanaxwèxe i meã cunayaxu i Onéchimú, ñoma choxŭ cuyaxuxŭrŭŭ. ¹⁸ Rŭ ngēxguma tacŭ rŭ chixexŭ cumaã naxŭxgu rŭ ěxna tacŭ cuxŭ nangetanŭgu, rŭ chanaxwèxe i chomaã nŭxŭ quixu na ñuxre yŭixŭ, na cuxŭ chanaxŭtanŭxŭcèx. ¹⁹ Rŭ chomatama i Pauru rŭ choxmēxmaãxŭchi chanaxŭmatŭ i ñaã popera. Rŭ aixcūma chomatama tá cuxŭ chanaxŭtanŭ. Rŭ tãŭtáma cuxna nŭxŭ chacuèxãchixēē na ñuxãcŭ choxŭ cunangetanŭxŭ i curŭ maxŭ i taguma gŭxŭ i chaugagu Tupanaxŭtawa cuyaxuxŭ. ²⁰ Rŭ ngēmaãcŭ, Pa Chaueneēx, rŭ chanaxwèxe i tórŭ Corigagu chauxcèx cunaxŭ i ngēma ngŭxēē. Rŭ chanaxwèxe i choxŭ cutaãxēē, erŭ chaueneē i Cristuaxŭ yaxŭxŭ quixŭ. ²¹ Rŭ cuxcèx chanaxŭmatŭ i ñaã popera erŭ nŭxŭ chacuèx na aixcūma chauga cuxŭnŭxŭ rŭ tá cunaxŭxŭ i ngēma cuxna naxcèx chaçaxŭãrŭ yexera. ²² Rŭ ngēxgumarŭŭ ta chanaxwèxe na chauxcèx cunamexēēxŭ i wŭxi i nachica i ngextá tá nawa changuxŭ. Erŭ íchananguxēē na Tupana tá nangãxŭxŭ i perŭ yumŭxēgŭ, rŭ tá choxŭ nangŭxēēxŭ na pexŭ íchayadauxŭcèx.

Pauru rŭ wenaxãrŭ Filemúŭxŭ narŭmoxē rŭ naxcèx ínaca na Cori ya Ngechuchu ya Cristu nŭxŭ rŭngŭxēēxŭ

²³ Rŭ moxē cuxcèx ngēma namu i Epáparu. Rŭ nŭma rŭ wŭxigu chomaã napoxcu naxcèx ya Ngechuchu ya Cristu. ²⁴ Rŭ ngēxgumarŭŭ ta moxē cuxcèx ngēma namugŭ i Marcú, rŭ Aritárcu, rŭ Dema rŭ Luca. Rŭ nŭmagŭ rŭ chomŭcŭgŭ nixŭgŭ i Tupanaãrŭ puracŭwa. ²⁵ Rŭ chanaxwèxe i tórŭ Cori ya Ngechuchu ya Cristu pexŭ narŭngŭxēē i guxãma i pemax.

Rŭ nuãma cuxna,
Pauru

POPERA GA YUDÍUGÜ GA YAXÕGÜXÜCA_X ÜMATÜXÜ

Tupana rü Nanewa tamaã nidexa

¹ Nuxcüma ga Tupana rü muëxpüxcüna rü nagúxüraüxüãcüma norü orearü uruügüwa tórü oxigümaã nidexa, rü namaã nüxü nixu ga tacü nüxü na nanaxwëxexü. ² Natürü i ñomaücüü ya Tupana rü Nanewatama nixi i tamaã yadexaxü rü tüxü nüxü nacuëxëxü na ñuxácü tüxü nangüxëëchaüxü. Rü gumaxü nixi ga namuxü na naxüãxüçèx ga ñoma ga naãne rü daxüguxü ga naãne rü üèxcü rü tauemacü rü woramacurigü rü èxtagü. Rü ñuxüchi guma Nanena nanana ga guxüma ga yema na noxrü yixüçèx. ³ Rü Nanewa nixi i nüxü idauxü na ñuxácü namexëchixü i nüma ya Tupana. Rü nüma ya Nane rü Nanatü ya Tupanarüütama nixi. Rü ñuxma na guxüärü äëxgacü yixü ya Nane, rü guxümaãma inacüèx rü norü ore i poraxümaã nanamu i guxüma na nüma nanaxwëxexüãcüma na yixüçèx. Rü nüma ya Nane nixi ga taxcèx nayuxü na nüxü rüxoexüçèx ga tórü pecadugü. Rü yemawena rü Nanatüxütawa naxü i daxüguxü i naãnewa. Rü yéma Nanatüärü tügüncüwawa nayarüto erü guxüärü äëxgacü nixi i ñuxmax.

Tupana Nane rü guxüma i orearü ngeruügü i daxü- cüãxétüwa nangëxma

⁴ Rü ñuxma i nüma ya Nane rü guxüma i Tupanaärü orearü ngeruügü i daxüçüãxärü yexera nixi rü naëtüwa nangëxma yerü yemaãcü nanaxuegu ga Nanatü. ⁵ Rü ngëmaãcü nixi i ñuxma yerü ga Tupana rü taguma wüxi ga norü orearü ngeruüxü ñanagürü:

“Cuma nixi i Chaune. Rü ñuxma chanangoxëë na aixcüma Chaune quiixü”, ñanagürü. Rü taguma wüxi ga norü orearü ngeruüchiga ñanagürü:

“Choma nixi i Nanatü chiixü rü nüma rü Chaune nixi”,

ñanagürü. ⁶ Natürü yexguma ñoma ga naãnewa namuãgu ga Nane ya guxüëtüwa ngëxmacü, rü ñanagürü ga Tupana:

“Chanaxwëxe i guxüma i chorü orearü ngeruügü i daxüçüãx rü nüxü nicuëxüügü ya Chaune”,

ñanagürü. ⁷ Rü yexguma norü orearü ngeruügü ga daxüçüãxchiga yadeaxgu ga Tupana, rü ñanagürü:

“Choma chanaxwëxexüãcüma chanamu i ngëma chorü orearü ngeruügü i chorü ngüxëëruügü ixigüxü. Rü ngëxguma chanaxwëxegu rü ñoma buanecü rü ñoma üxüemarüü chayaxigüxëë, rü chanaporaexëë na naxügüãxüçèx i chorü ngúchaü”,

ñanagürü. ⁸ Natürü yexguma Nanechiga yadeaxgu ga Tupana rü ñanagürü:

“Cuma rü chauxrüü Tupana quixi. Rü guxügutáma äëxgacü quixi. Rü aixcüma meã guxümaã icucuèx erü aixcümacü quixi. ⁹ Rü nüxü cungechaü i guxüma i ngëma nacüma i mexü natürü naxchi cuxai i guxüma i ngëma nacüma i chixexü. Rü ngëmacèx i choma na Cunatü ya Tupana chiixü rü guxüëtüwa cuxü changëxmaxëë rü guxüärü yexera cuxü chataãëxëë”,

ñanagürü. ¹⁰ Rü yexgumarüü ta Nanexü ñanagürü ga Tupana:

“Cuma rü guxüärü Cori quixi. Rü noxriarü ügügumama ga yexguma natauxgutama ga ñoma ga naãne, rü cuma nixi ga cunaxüxü. Rü cumatama nixi ga cunaxüxü ga üèxcü rü tauemacü rü guxüma ga èxtagü. ¹¹ Rü guxüma i ngëma rü tá nagux, natürü i cuma

rü guxügutáma cungēxmaēcha. Rü guxūma i ngēma rü ñoma naxchirurüü tá nangaue. ¹² Rü ñoma wūxi i naxchiru i ngauxū i ngema itèxmarexūrūü tá ícunawogü i ñoma i naāne rü guxūma i daxūwa nüxū idauxū. Rü to i ngexwacaxūxūmaā tá cunaxūchicüü, ñoma wūxi i naxchiru i ngauxū i ngexwacaxūxūmaā ixūchicüüxūrūü. Natürü i cuma rü tá cunaxèixrügumaraxūēcha rü tagutáma cuyu”, ñanagürü ga Tupana. ¹³ Rü Tupana rü ñanagürü nüxū: “¡Nuā chauxütawa rüto ñuxmatáta nüxū cuxū charüporamaēxēē i guxūma i curü uwanügü!” ñanagürü. Natürü ga Tupana rü taguma yema ñanagürü nüxū ga ngēxūrūüxū ga norü orearü ngeruügü ga daxūcūāx. ¹⁴ Rü guxūma i Tupanaārü orearü ngeruügü i daxūcūāx rü naāēgü i Tupanaāxū puracüexū nixīgü. Rü nüma ya Tupana rü núma nanamugü na nüxū yanangūxēēgüxūcèx i guxūma i ngēma duūxügü i Tupana naxwèxexū na nayauxgüāxū i maxū i taguma gúxū.

2

Tama name i nüxū taxoe i ngēma maxū i Tupana tüxna uaxūxū

¹ Rü ñuxma na nüxū icuáxū na guxūma i Tupanaārü orearü ngeruügü i daxūcūāxārü yexera yīxū ya Nane, rü ngēmacèx name na yexeraācū meā naga ixīnūxū i ngēma ore i nachiga ixīxū. Erü tama tanaxwèxe na nüxū rüxoexū na yaxōgūxū. ² Rü yexguma tauta Nane ya Cristuxū núma namuxgu ga Tupana, rü norü orearü ngeruügü ga daxūcūāxgüwa duūxügümaā nüxū nixu ga norü mugü na naga naxīnūxūcèx. Rü yema mugü rü aixcūma naporayērü guxūma ga yema duūxügü ga tama naga īnūxū, rü yema mugü nüxū ixuxūācūma Tupana nanapoxcue. ³ Rü yexguma yemaācū napoxcueāgu ga yema duūxügü ga tama naga īnūxū, ¿rū ñuxūcürüwa i yixema i naxchaxwa ibuxmūxū na tama tüxū napoxcuexūcèx ega nüxū ixoegu i ngēma maxū i mexēchixū i ñuxma Cristugagu tüxna naxuaxūxū? Rü dūcax, nūmatama ya tórü Cori nixī ga nüxīra naxunagūāxū ga yema maxū, rü ñuxūchi yixcama nixī ga yema nüxū īnūxū ga nüxī meā tüxū nüxū nacuèxēēxū na aixcūma yīxū i tüxū nangēxmaxū i ngēma maxū ega nüxū yaxōgūgu ya Cristu. ⁴ Rü nūmatama ga Tupana rü ta taxcèx nanangoxēē na aixcūma yīxū i Cristugagu tüxū nangēxmaxū i ngēma maxū. Yerü nüma ga Tupana rü Naāē i Üünexūwa tüxū nanawēx ga naguxūraxūxū ga taxū ga mexūgü rü cuèxruxūgü ga norü poramaā naxūxū yema nüma nanaxwèxexūācūma. Rü yemaācū nixī ga wenaxārü tüxū nüxū nadauxēēxū na aixcūma yīxū na Cristugagu tüxū nangēxmaxū i ngēma maxū.

Tupana rü ñoma ga naānewa nanamu ga Ngechuchu ya Cristu na taxrūü duūxūxū yīxūcèx

⁵ Rü ñuxma rü guxūma i ngēma mexūgü i Cristugagu tüxū ngēxmaxū i pemaā nüxū tixuchigaxū, rü Tupana rü taguma daxūcūāx ga norü orearü ngeruügüna naxāga na namaā inacuèxgūxūcèx. Natürü duūxügūxū nixī ga namuxū na namaā inacuèxgūxūcèx ga guxūma ga yema mexūgü. ⁶ Erü Tupanaārü ore i ümatūxūwa rü ñanagürü:

“Pa Tupanax, ¿rū tacū nixī i duūxügü rü ngēmacèx nagu curūxīnūxū? ¿Rū tacūwa name rü ngēmacèx nüxū cungechaūxū? ⁷ Rü paxaāchi curü orearü ngeruū ga daxūcūāxgütūūwa cunayexmagūxēē ga duūxügü, natürü i ñuxma rü aixcūma namaā cutaāē rü nüxū quicuèxūxū. ⁸ Rü naxmēxwa cunangēxmaxūēē i guxūma ga yema cuxūxū”, ñanagürü i ngēma orewa. Rü yemaācū nixī ga Tupana ga duūxügümēxēwa nayexmagūxēēāxū i guxūma i ñoma i naānewa ngēxmaxū. Rü nataxuma

i tacü i ñoma i nañewa i tama naxmëxwa nangëxmaxëëxü. Natürü woo na ngëmaäcü yiixü, rü ñuxma rü ta tauta nüxü tadau na duixügümëxëwa nangëxmaxü i guxüma i ñoma i nañewa ngëxmaxü. ⁹ Natürü nüxü tadau ya Ngechuchu ya aixcüma guxümaäma icuäcü. Rü yexguma Tupana ñoma ga nañewa namuxgu rü paxaächi norü orearü ngeruü ga daxücüäxgüarü ñaxtüwaama nanaxüxëë. Natürü i ñuxma ya Tupana rü poraäcü Ngechuchuxü nataxëë rü äëxgacü ya tacü nayaxixëë yerü ngúxü ninge rü guxüma ga duixügücëx nayu yerü yemaäcü nanaxwëxe ga Tupana yerü tüxü nangechaü rü tüxü narüngüxëëchaü. ¹⁰ Yerü ga Tupana rü nanaxwëxe na guxüma i naxäcügü nüxü nangëxmaxücëx i nachica i mexü i naxütawa. Rü yemacëx ñoma ga nañewa nanamu ga Ngechuchu ya Cristu na ngúxü yangexücëx rü taxcëx nayuxücëx na aixcümaxüchi tüxü nangëxmaxücëx i maxü i taguma gúxü. Rü name nixi na yemaäcü naxüäxü ga Tupana yerü nümatama nixi ga naxüäxü ga guxüma rü namëxwa nangëxma na nüma nanaxwëxexüäcüma namaä inacuäxücëx. ¹¹ Rü Ngechuchu nixi ya tüxü imexëëgücü na Tupanapëxewa ixüünegüxücëx. Rü ñuxma i nüma ya Ngechuchu ya tüxü imexëëgücü rü guxäma i yixema na tüxü yaxüünexëëgüxü rü wüxitama nixi ya Tanatü. Rü ngëmacëx nixi i nüma ya Ngechuchu ya Tupana Nane, rü tama taxcëx naxänexü na naëneëgümaä tüxü naxuxü. ¹² Erü Tupanaärü ore i ümatüxüwa rü ñanagürü ga Nane:

“Rü chaueneëgüxü tá nüxü chacuëxëë i cuchiga, Pa Chaunatüx. Rü norü ngutaquëxegüwa rü tá cuxcëx chawiyae na ngëmaäcü cuxü chicuëxüxücëx”,

ñanagürü. ¹³ Rü toxnamana i Tupanaärü ore i ümatüxüwa rü ñanagürü ta ga Nane:

“Cuxü chayaxō, Pa Chaunatüx, erü nüxü chacuëx rü tá choxü curüngüxëë”,

ñanagürü. Rü ñanagürü ta:

“Rü daxe chixi, Pa Chaunatüx, namaä i cuxacügü i chaueneëgü i choxna cumugüxü”,

ñanagürü. ¹⁴ Rü nüma ga Ngechuchu rü woo Tupana na yixixü natürü duixürüxüäcü ñoma ga naanewa naxü na taxrüxü naxämachixücëx rü naxägüxücëx na tachicüü nayuxücëx rü yemaäcü yanaxoxëëäxücëx ga Chatanáarü pora ga namaä tüxü iyanatauxëëxchaüxü. ¹⁵ Rü yemaäcü nanaxü ga Ngechuchu na Chatanámejëwa tüxü íanguxüxëëxücëx ya guxäma ya yixema noxri naxcëx muñëxë ga na tayuexü. ¹⁶ Rü yemacëx ñoma ga nañewa nangu ga Ngechuchu na taxcëx nayuxücëx i guxäma i yixema na Abräürüü yaxögüxü. Rü tama daxücüäx i orearü ngeruügücëx nayu, natürü taxcëx nixi ga numa naxüxü rü nayuxü. ¹⁷ Rü nüma ga Ngechuchu rü nanaxwëxe na yixema i naëneëgü ixigüxürüütama nügü na yaxixëëxü na yemaäcü aixcüma mecümacü ya nüxü ingechaütümüügücü ya tórü chogürüü yiixücëx i Tupanapëxewa. Rü yemacëx nixi ga nügü inaxäxü rü nayuxü na yemaäcü Tupana duixügüaxü nüxü ngechaüxücëx i norü pecadugü. ¹⁸ Rü yema nümatama ngúxü na yangexü ga yexguma Chataná nüxna ñnugu, rü ngëmacëx i ñuxma rü nüxü natauxcha na tüxü nangüxëëxü ya yixema Chataná tüxna ñnuxë.

3

Ngechuchu rü Moïchéxü narüyexera

¹ Rü ñuxma Pa Chaueneëgü ya Tupanapëxewa Üünegüxe, rü pexü nixi ya Tupana inadexü na norü duixügü pixigüxücëx. Rü ngëmacëx name nixi i aixcüma meä nagu perüxñnüë ya Ngechuchu ya Cristu ya Tupana núma namucü. Rü nüma ya Ngechuchu nixi i tórü chogürüü i Tupanapëxewa

tüxü ixüünexëécü. Rü yimaãxü nixi i yaxögüxü. ² Rü Tupana rü marü Ngechuchuxü naxuneta na naxüãxücèx ga yema puracü ga Tupana nüxna äxü. Rü nüma ga Ngechuchu rü aixcüma Nanatüga naxinü rü nayanguxëë ga yema puracü yexgumarüü ga Moïché meãma na naxüxü ga yema puracü ga Tupana nüxna äxü na nüxna nadauxücèx ga Tupanaärü duüxügü ga Yudíugü. ³ Rü woo ga noxri rü Moïchéxü nitaégacüüxëë ga Tupana, natürü i ñuxma rü Moïchéarü yexera Ngechuchuxü nixi i yataégacüüxëëxü. Rü wüxi ya ĩpata ya ngexwacèx ixüxünerüü nixi, erü woo ngëma ĩpatamaã tataãë, natürü ngëma yexeraäcü nüxü icuèxüüxü nixi i ngëma ĩpataarü üruü. ⁴ Rü guxünema ya ĩ rü nüxü nangëxma i norü üruü. Natürü guxüma i tacü i ngëxmaxü, rü Tupana nixi ya naxücü. ⁵ Rü Moïché rü wüxi ga Tupanaärü duüxü ga aixcüma mexü nixi yerü meã nüxna nadau ga Tupanaärü duüxügü ga Yudíugü, yema Tupana namaã nüxü ixuxürüü. Rü nüma ga Moïché nixi ga yema duüxügümaã nüxü yaxuxü ga ñuxäcü Tupana tá yixcüra nüxü na rüngüxëëxü. ⁶ Natürü nüma ya Ngechuchu rü Moïchéarü yexera nixi erü Tupana Nanexüchi nixi. Rü nüma nixi i nüxna nadauxü i guxüma i ngëma Tupanaärü duüxügü ixígüxü. Rü yixema rü ta Tupanaärü duüxügü tixígü ega aixcüma Ngechuchuaxü yaxögügu rü taguma nüxü rüxoegu. Rü Tupana nanaxwèxe na guxügüma Ngechuchumaã itaãëgüxü erü nüxü tacuèx na wüxi i ngunexü rü tá taxcèx nataeguxü na wüxiwa namaã ingëxmagüxücèx.

Tupanaärü duüxügü rü tá inarüngüë

⁷⁻⁸ Rü ngëmacèx i Tupanaärü ore i ümatüxüwa rü ñanagürü i Naãë i Üünexü: “Rü ñuxma na nüxü pexinüëxü i ngëma Tupana pemaã nüxü ixuxü, rü tama name na nüxü pexoexü, yexgumarüü ga na naxügüãxü ga yema duüxügü ga Tupanaxü ügüxü rü tama naga ĩnüëxü ga yexguma Moïchéwe naxixgu ga yema naãne ga ngextá taxüema íxãpataxüwa”.

⁹ Rü yemacèx ga Tupana rü ñanagürü:

“Rü yéma nixi ga chixexü naxügüxü ga nuxcümaügüxü ga perü oxigü yerü choxü naxügü yerü tama choxü nayaxögüchaü. Rü yemaäcü nanaxügü woo 40 ga taunecügu nüxü na nadaugüxü ga yema mexügü ga üünexü ga napëxewa chaxüxü. ¹⁰ Rü yemacèx namaã chanu ga yema duüxügü, rü ñacharügü nüxü: ‘Pema rü guxügüma chixexüguxicatama perüxünüëëcha, rü taguma penaxüxchaü i ngëma chanaxwèxexü na penaxüxü’, ñacharügü nüxü. ¹¹ Rü yemacèx nixi ga namaã chanuxü ga yema duüxügü, rü aixcümaxüchi namaã nüxü chixu na täütáma yema naãne ga noxri namaã ichaxunetaxüwa nangugüxü na ngëxma nangüëxücèx”,

ñanagürü ga Tupana. ¹² Rü ñuxma Pa Chaueneëgüx, rü name nixi i pegüna pedaugü na tama ngürüächi pechixearü maxüãxücèx, rü ngëmagagu na nüxü perüxoexü na Tupana ya maxücüaxü na peyaxögüxü. ¹³ Natürü ñuxma pexü natauxchagu, rü name nixi na wüxichigü pegüaxü penangüchaüxëëxü i guxü i ngunexügu na taxüema i petanüwa Tupanaxü taxoxücèx nagagu i ngëma pecadu i pexü womüxëëchaüxü. ¹⁴ Rü ngema na Cristuxütawa nayauxgüxücèx i maxü i taguma gúxü, rü tanaxwæe na guxügüma aixcüma yaxögüechaxü. Rü ngëxguma noxrirüütama guxügüma meã nüxü yaxögüechagu rü tama nüxü rüxoegu, rü tá namaã tüxü nangëxma i tachica i daxügüxü i naãnewa. ¹⁵ Natürü ñuxma nixi i namexü na meãma yaxögüxü. Rü ngëmacèx i Tupanaärü ore i ümatüxüwa rü ñanagürü:

“Rü ñuxma na nüxü pexinüëxü i ngëma Tupana pemaã nüxü ixuxü, rü tama name na nüxü pexoexü, yexgumarüü ga yema duüxügü ga tama

Tupanaga ñnũxũ ga yexguma Moĩchéwe naxĩxgu ga yema naãne ga ngextá taxúema íxãpataxũwa”, ñanagürü. ¹⁶ ¿Rü texégü tixĩ ga guxema nüxũ ñnũxũ ga yema Tupana tümamaã nüxũ ixuxũ, rü ñuxũchi tama Tupanaga ñnũxũ? Rü pemaã nüxũ chixu rü yemagü nixĩ ga yema duũxũgü ga Moĩché Equituanewa ínguxũxẽxũ. ¹⁷ ¿Rü texémaã nixĩ ga nanuxũ ga Tupana ga 40 ga taunecügu? Rü pemaã nüxũ chixu rü namaã nanu ga yema duũxũgü ga chixexũ ügũxũ. Rü yemacèx yema nachica ga ngextá taxúema íxãpataxũgu nayue. ¹⁸ ¿Rü texégümaã nixĩ ga aixcũmaxũchi inaxunetaxũ ga Tupana na tãütáma yema naãnewa nangugũxũ na yexma nangũxũcèx? Rü pemaã nüxũ chixu, rü yemagü nixĩ ga yema duũxũgü ga tama naga ñnũxũ. ¹⁹ Rü ngẽmawa nüxũ tacuèx na taxucürüwama yema naãne ga noxri Tupana namaã ixunetaxũwa nangugũxũ ga yema duũxũgü, yerü tama nüxũ nayaxõgü.

4

¹ Rü ngẽmacèx i ñuxma na Tupana tamaã ixunetaxũ na nügũxũtawa tá tũxũ yachocuxẽxũ na ngẽxma rüngũxũcèx, rü tanaxwèxe i taxuãgü, na tama ngürüãchi wüxie i tatanüwa tama ngẽxma taxücuxũ. ² Erü ñuxma i yixema rü marü nüxũ taxĩnũe i Tupanaãrü ore i mexũ, yexgumarüü ga yema nuxcũmaũgũxũ ga duũxũgü nüxũ na naxĩnũxũ. Natürü nümagü ga yema duũxũgü rü taxuwama nüxũ name ga nüxũ na naxĩnũxũ ga yema ore yerü tama yema naga ñnũxũrüü aixcũma nüxũ nayaxõgü. ³⁻⁴ Natürü i yixema na yaxõgũxũ, rü tá aixcũma Tupanaxũtawa tichocu na ngẽxma rüngũxũcèx. Rü wüxiwa i Tupanaãrü ore i ümatũxũwa rü ngũxchigaarü ngunexũchigaxũ nixu, rü ñanagürü:

“Rü 6 ga ngunexũgu nixĩ ga naguxẽẽxũ ga norü puracü ga Tupana. Rü yexguma norü 7 ga ngunexũwa nanguxgu rü guxũma ga norü puracüna narüngü”,

ñanagürü. Rü nuxcũma ga Tupana rü nanaxwèxe na nangũxũ ta ga yema nuxcũmaũgũxũ ga tórü oxigü ga Moĩchéwe rüxĩxũ. Natürü ga nümagü rü tama nüxũ nayaxõgüchaũ rü tama naga naxĩnũe. Rü yemacèx ga Tupana rü norü ore i ümatũxũwa rü ñanagürü:

“Yema duũxũgü rü tama choxũ nayaxõgü rü yemacèx namaã chanu rü aixcũmaxũchi namaã nüxũ chixu na tãütáma yema naãne ga namaã ichaxunetaxũwa nangugũxũ na ngẽxma nangũxũcèx”,

ñanagürü. ⁵⁻⁶ Rü yemaãcü ga yema duũxũgü ga nüxĩra nüxũ ñnũxũ ga Tupanaãrü ore i mexũ, rü tama nawa nichocu ga yema nachica ga Tupana namaã nüxũ ixuxũ, yerü tama naga naxĩnũe. Rü ngẽmacèx nixĩ i Tupanaãrü ore i ümatũxũwa i ñaxũ:

“Ngẽma duũxũgü i tama chauga ñnũxũ rü tãütáma ngẽma nachica i namaã ichaxunetaxũwa nichocu na ngẽxma nangũxũcèx”,

ñaxũ. Natürü ñuxma rü ta nangẽxma i nachica i tümacèx ya yixema ngẽxma Tupanaxũtagu chocuchaũxẽ na ngẽxma tarüngũxũcèx. ⁷⁻⁸ Rü ngẽma nachica i ngextá nagu nangũxũ i duũxũgü rü tama yema naãne ga nuxcũmaũgũxũ ga tórü oxigũxacügü tümããrü ãẽxgacü ga Yochuémaã tayauxgũxũ nixĩ. Yerü yexguma chi yema naãne yixĩgu, rü Tupana rü tãü chima wenaxãrü nüxũ naxuneta ga to ga ngunexũ na nagu naxũtawa yachocuxũcèx na ngẽxma nangũxũcèx i duũxũgü. Rü yemacèx ga Tupana rü wenaxãrü nüxũ naxuneta i wüxi i to i ngunexũ na naxũtawa yachocuxũcèx i duũxũgü na ngẽxma nangũxũcèx. Rü ngẽma ngunexũ rü ñuxma nixĩ. Rü yemacèx ga Tupana rü mucũma ga taunecü ga Moĩchéwena rü Dabímaã nüxũ nixu ga yema norü ore ga ümatũxũ i ñaxũ:

“Rü ñuxma na nüxũ pexĩnüexũ i ngẽma Tupana pemaã nüxũ ixuxũ, rü tama name na nüxũ pexoexũ”, ñaxũ. Rü yematama nixĩ ga ore ga marüchirẽx pemaã nüxũ chixuxũ. ⁹ Rü ngẽmacèx i ñuxma rü ta nangẽxma i wüxi i nachica i üünexũ i nagu tá aixcüma nangüẽxũ i ngẽma Tupanaãrũ duũxũgũ ixĩgũxũ. ¹⁰ Rü yixema Tupanaxütawa ichocuxe na ngẽxma tarüngüẽxüçèx, rü nüxna tarüngüẽ i guxũma i tümaãrũ puracügũ yexgumarũũ ga Tupana rü nüxna na nangũxũ ga norũ puracügũ ga yexguma naãne naxüxguwena. ¹¹ Rü ngẽmacèx name na meã yaxõgũxũ rü naga ixĩnüexũ na ichocuxüçèx i ngextá Tupana tüxũ írüngüẽxẽxũwa. Erü tama tanaxwèxe na texé ngürüãchi yema nuxcümaũgũxũ ga duũxũgũ ga tama Tupanaga ñnüexürũũ norũ orexũ na taxoxũ. ¹² Erü Tupanaãrũ ore rü namaxũ rü naporaxüchi. Rü wüxi i tara i guxüçüwawa meã waixmaguxũãrũ yexera nixĩ na natéxũ. Erü ngẽma ore rü tawa nixücu ñuxmata taãẽwa nangu, rü ñuxmata nawa nangu i ngẽma wüxichigü nagu rüxĩnüxũ. Rü ngẽmaãcü meãma nanangoxẽẽãma i guxũma i ngẽma yixicatama nagu rüxĩnüxũ rü tüxũ ngüchaũxũ. ¹³ Rü nataxütáma i tacü i Tupana üxũ i tá naxchaxwa nügũ icúxũ erü napẽxewa rü guxũma meã nangox. Rü guxũxũ nadau rü guxũxũ nacuèx ga yima tá tüxna çacü na namaã nüxũ ixuxüçèx i tórü maxüchiga.

Ngechuchu rü mecüxüchi ya tórü ngüxẽẽruũ nixĩ i Tupanapẽxewa

¹⁴ Ngechuchu ya Tupana Nane rü mecüxüchi ya tórü ngüxẽẽruũ nixĩ i Nanatüpẽxewa. Rü ñuxma rü daxüguxũ i naãnewa i Nanatüxütawa nangẽxma na ngẽma taétüwa nachogüxüçèx. Rü ngẽmacèx tanaxwèxe i guxüguma nüxũ tayaxõgüecha rü taguma nüxũ tarüxoe. ¹⁵ Rü nüma ya Ngechuchu rü aixcüma nüxũ nacuèx na tüxũ nangüxẽẽxũ erü nüxũ nacuèx na ñuxãcü tüxũ naguxchaxũ i ngẽxguma Chataná tüxna ñnügu rü pecadugu tüxũ nanguxẽẽchaũgu, yerü nüxna rü ta naxĩnü ga Chataná, ngẽma tüxna na naxĩnüxürũũ. Natürü nüma ga Ngechuchu rü taguma chixexũ naxü. ¹⁶ Rü ñuxma na tüxũ nangẽxmaxũ ya tórü ngüxẽẽruũ ya Ngechuchu, rü name nixĩ i tama imuẽẽãcüma nüxna tangaicamagü ya tórü ãẽxgacü ya Tupana ya tüxũ ngechaũcü. Rü tanaxwèxe na ngẽmaãcü nüxna ingaicamagüxũ na nüxũ ingechaütümügüxüçèx rü tüxũ nangechaũãcüma tüxũ nangüxẽẽxüçèx i ngẽxguma guxchaxũgũ tüxna ngaicamagu.

5

¹ Nuxcüma ga Tupana rü Moichémaã nüxũ nixu na Arãũ yĩxüçèx ga Yudíugüarũ paigüeru ixĩcü na guma duũxũgüétüwa chogüxüçèx ga Tupanapẽxewa. Rü guxũma ga yema Arãũwena ügüxũ ga paigüeru rü duũxũgütanüwa nüxũ naxunetagu na yema duũxũgüarũ ngüxẽẽruũ yĩxüçèx ga Tupanapẽxewa rü Tupanana naxããxüçèx ga ãmaregü rü Tupanacèx nadaiãxüçèx ga naxünagü na yemaãcü nüxũ nüxũ nangechaũxüçèx ga norũ pecadugü. ² Natürü ngẽma paigüeru rü guxũma i duũxũgürüütama nixĩ na pecadugu nanguxũ. Rü ngẽmacèx nüxũ nacuèx na ñuxãcü yaxna namaã naxĩnüxũ i duũxũgü i ngẽxguma naẽchitamare pecadu naxüegu rü tama aixcüma Tupanawe naxĩxgu. ³ Rü ngẽma paigüeru rü tama ngẽma duũxũgüarũ pecaducèxicatama nixĩ i nadaiãxũ i naxünagü, natürü nanaxwèxe i noxrütama pecaducèx rü ta na nadaiãxũ i naxünagü na ngẽmaãcü Tupana nüxũ nüxũ nangechaũxüçèx i ngẽma pecadugü. ⁴ Rü taxúema tügütama tingucuchixẽẽ na paigüeru tiixüçèx. Natürü Tupana nixĩ ya tüxũ unetacü rü tüxna naxãcü i ngẽma puracü na paigüarũ ãẽxgacü tiixüçèx, yexgumarũũ ga Tupana rü Arãũxũ na yangucuchixẽẽxürũũ na paigüeru yĩxüçèx. ⁵ Rü yexgumarũũ ga Ngechuchu rü tama nügütama ningucuchixẽẽ na Tupanapẽxewa tórü

ngüxëëruü i paigüeru yïxüçèx. Natürü Tupana nixĩ ga yangucuchixëëcü. Yerü Tupanatama nixĩ ga nüxü ñacü:

“Cuma nixĩ i Chaune. Rü ñuxma chanangoxëë na Chaune quiixü”, ñacü. ⁶ Rü toxnamana i Tupanaärü ore i ümatüxüwa rü ñanagürü ta:

“Cuma nixĩ i guxügutáma duüxügüarü ngüxëëruü i paigüeru quiixü, guma pai ga Melquisederüü”,

ñanagürü. ⁷ Rü yexguma Cristu ñoma ga nañewa maüxgu, rü poraãcü nayumüxë rü tagaãcü rü naxauxãcü Tupanana naca na nüxü nangüxëëxüçèx na naga naxĩnüxüçèx. Rü yemaãcü nanaxü ga Cristu, yerü Tupana rü naporá na nüxü nangüxëëxüçèx na tama yuxü namuüxüçèx. Rü Tupana rü Cristuxü naxĩnü yerü nüma ga Cristu rü aixcüma Tupanaga naxĩnü. ⁸ Rü nüma ga Cristu rü woo Tupana Nane na yïxü, natürü ngüxü ninge naxçèx na Tupanaga naxĩnüxü. ⁹ Rü yemaãcü nügü inaxã rü curuchagu nayu na tumaärü maxëëëruü yïxüçèx ya guxãma ya yixema naga ñnüëxë. ¹⁰ Rü Nanexü nixĩ ga naxunetaxü ga Tupana na guxügutáma nügüpëxewa tórü ngüxëëruü i paigüeru yïxüçèx yexgumarüü ga pai ga Melquisedé ga norü yumüxëwa nuxcümaücü ga tórü oxí ga Abráüçèx Tupanana çacü na guma Abráüxü nangüxëëxüçèx ga Tupana.

Wüxi i äücümaxüchixü nixĩ na nüxü rüxoexü na yaxögüxü

¹¹ Rü ñuxma rü toxü nangëxma i muxüchixüma i ore i Cristuchiga ixixü i pemaã nüxü tixuxchaüxü. Natürü naguxchaxüchi na meãma pemaã tanangoxëëxü i ngëma, erü pema rü tama pexü natauxcha na nüxü pecuáxü.

¹² Rü marü ñuxgumama nüxü na pecuáxü i Tupanaärü orchiga, rü pema rü chi marü namaã pengüexëëtae. Natürü i pema rü ñuxma rü ta penaxwëxe na wena pemaã tanangoxëëxü i ngëma Tupanaärü ore i tauxchaxü i nawa inaxügüxü na Tupanachigaxü icuáxü. Rü ngëmaãcü i pema, rü ñoma õxchana i naëgünenixüwa maixürüütama pixigü.. Erü tama nüxü pecuëxgüéga i guxüma i ngëma Tupanaärü ore i yexeraãcü tamaã nüxü ixuxü i Cristuchiga na ñuxãcü Tupana naxwëxexü na naga pexĩnüëxü. ¹³ Rü yixema yaxõxë ya tama nüxü cuëxégaxe na ñuxãcü Tupanacèx tamaxüxü, rü wüxi i õxchana i maixürüü tixĩ. Rü ngëmaãcü pixigü i pemax. ¹⁴ Natürü yixema yaxõxë ya tümamaã yaxüxe na tanangugüxü na tacü yïxü i nguxëëtae i mexü rü ëxna chixexü, rü aixcüma nüxü tacuèx na ñuxãcü Tupanacèx tamaxüxü. Rü yixema rü ñoma wüxi i duüxü i yaxü i namachimaã äwemüxürüü tixĩ. Natürü i pema rü tama ngëmaãcü pixigü.

6

¹ Rü ngëmacèx name nixĩ i yexeraãcü tingúeetanü na aixcüma meã nüxü icuáxüçèx i Cristuchiga. Rü tanaxwëxe na nüxü ichopetüxü ga yema ore ga nawa inaxügüxü na Cristuchigaxü icuáxü. Rü täütáma yeüçürü yema ore ga nawa inaxügüxüchiga tidexagüecha. Rü taxucèxma tüxcüü wena pemaã nüxü tixu na nüxü perüxoexüçèx na nagu pexixü i ngëma mugü ga Moïché ümatüxü i tama tüxü maxëëëxü. Rü ngëxgumarüü ta taxucèxma tüxcüü wena pemaã nüxü tixu i nachiga na ñuxãcü Tupanaãxü yaxögüxü.

² Rü ngëxgumarüü ta taxucèxma tüxcüü wena pexü tangüexëë na ñuxãcü Tupanacèx íbaiüxü rü ñuxãcü duüxügüxü ingögüãcüma namaã iyumüxexü. Rü ngëxgumarüü ta taxucèxma tüxcüü wena pexü tangüexëë na ñuxãcü tá wena namaxëxü i duüxügü i yuexü rü ñuxãcü naãneärü guxgu rü Tupana tá wüxichigü i duüxügüna çaxü na ñuxãcü namaxëxü i ñoma i nañewa. ³ Rü ngëmacèx i ñuxma rü ngëxguma Tupana tama tüxna nachuxgu rü tanaxwëxe i yexeraãcü tingúeetanü na aixcüma guxüma i Cristuchigaxü icuáxüçèx rü

nüxü na icuáxüçèx na aixcüma ngëma nüma nanaxwèxexüãcüma meã naxcèx na imaxèxü. ⁴⁻⁵ Natürü ngëxguma chi wüxie Cristuxü yaxu, rü chi meãma Tupanaxü tacuèxgu, rü chi Naãe i Ünexüxü tayaxu, rü chi nüxü tacuèxgu na ñuxäcü namexü i Tupanaärü ore rü ñuxäcü na namexü i daxüguxü i naãne, rü name nixi i taxuãe. ⁶ Erü ngëxguma chi ngëmaãcü meã tayaxõxgu i noxrix rü ñuxüchi Cristuxü itatèxüchixgu, rü marü taxucürüwama texé wenaxärü Tupanacèx tüxü tataeguxëe. Erü ngëxguma ngëmaãcü itanatèxüchixgu ya Tupana Nane, rü ñoma wena curuchawa tayapotaxürüü tayaxixëe, erü guxü i duüxügüpèxewa ãne nüxü tingexëe. ⁷ Rü dücax, wüxi i naãne i pucü nagu nguxü rü meãma nanetü nawa nayae tümacèx ya yixema nagu üanexë, rü Tupanaarü ngüxëegagu nixi i ngema. ⁸ Natürü ngëxguma ngëma naãne rü tuxu rü natüanegü i chixexü nawa yaegu, rü Tupana rü tá chixexü namaã naxuegu rü üxüwa tá nigu i guxüma i nawa yaexü. Rü ngëxgumarüü tá tixi ya yixema Cristuxü itaxe.

Ítananguxëe na nayauxgüxü i maxü i taguma gúxü rü ngëmacèx tama nüxü tarüxoe na yaxõgüxü

⁹ Natürü, Pa Chaueneëgü ya Pexü Tangechaügüxe, rü woo ngëmaãcü pemaã tidexagügu, natürü aixcüma nüxü tacuèx na tama ngëma duüxügü i nüxü rüxoexürüü pixigüxü. Erü pema rü pexü nangëxma i maxü i taguma gúxü, rü Tupana rü tá aixcüma poraãcü pexü narüngüxëe na naxcèx pemaxèxüçèx. ¹⁰ Erü nüma ya Tupana rü aixcümacü nixi. Rü nüma rü tãütama nüxü inayarüngüma ga yema mexü ga pexüxü rü ñuxäcü taeneëgü i yaxõgüxüxü na pengechaügüxü ga yexguma nüxü perüngüxëegügu, ngëma ñuxma ípenaxüxürütama. ¹¹ Rü ñuxma rü tanaxwèxe i wüxichigü i pema rü ngëmaãcü noxrirüü mexü i perü ngüchaümaã nüxü perüngüxëegüecha i taeneëgü ñuxmatáta wena núma naxü ya Cristu. Rü tanaxwèxe na ngëmaãcü pemaxèxü na düxwa aixcüma Cristuxütawa pengugüxü ngëma ípenanguxëexürüü. ¹² Rü tama tanaxwèxe na nüxü perüxoetanücüxü na Cristuwe perüxixü. Natürü tanaxwèxe i naxrüü pixigü i ngëma duüxügü i guxüguma meã yaxõgüãcüma Cristuwe rüxiamaxü rü nayauxgüxü i guxüma i ngëma mexügü ga Tupana namaã ixunetaxü. ¹³ Rü dücax, yexguma tórü oxü ga Abráümaã inaxunetagu ga Tupana rü nügüégagutama inaxuneta, yerü tataxuma ga texé ga norü yexera ixixë na tümægagu inaxunetaxüçèx. ¹⁴ Rü yemacèx ga Tupana rü Abráüxü ñanagürü:

“Rü aixcümaxüchi tá poraãcü cuxü charüngüxëe. Rü tá cuxü nangëxma i muxüchixütama i cutaagü”,

ñanagürü. ¹⁵ Rü Abráü rü meãma ínananguxëe ga guma nane ga Tupana namaã ixunetacü. Rü yemacèx nabu ga guma nane ga Ichaá ga Tupana namaã nüxü ixücü. ¹⁶ Rü ngëxguma duüxügü tacüçèx ixunetagügu, rü to i norü yexera ixixüegagu inaxunetagü. Rü wüxicana tacüçèx ngëmaãcü inaxunetagügu, rü nüxü tacuèx rü aixcüma tá nanaxügü i ngëma naxcèx inaxunetagüxü, rü marü taxucürüwama yeücürü nachiga nidexagüecha. ¹⁷ Rü yemacèx ga Tupana rü yexguma inaxunetagu namaã ga yema duüxügü ga nayauxgüxü tá ga yema ngüxëe ga Tupana nüxna äxchaüxü, rü nügüégagutama inaxuneta, yerü nanaxwèxe na meãma nüxü nacuèxgüxü na aixcüma tá yanguxëeãxü rü tagutáma naxüchicüüãxü ga yema namaã inaxunetaxü. ¹⁸ Rü nüxü tacuèx rü ngëxguma tacüçèx nügüégagu inaxunetagu ya Tupana, rü taxucürüwama tüxü nawomüxëe rü nanaxüchicüü i ngëma. Rü ñuxma i guxäma i yixema na Tupanacèx ibuxmüxü na tüxü nangüxëexüçèx rü tüxü namaxëxëxüçèx, rü nüma ya Tupana rü nügüégagu tamaã inaxuneta na ngëmaãcü tá tüxü nangüxëexü. Rü ngëmaãcü tüxü nanangüchaüxëe rü tüxü narüngüxëe na

nüxü icuáxücèx na aixcüma tá nayauxgüxü i ngēma maxü i taguma gúxü i tamaã inaxunetaxü. ¹⁹ Rü ñuxma na ínguxēēxü na aixcüma tá nayaxuxü i ngēma maxü i taguma gúxü, rü taxucèxma taxoegaãēgü, erü nüxü tacuèx na aixcüma daxüguxü i nañewa i Tupana íngēxmaxüwa tá ingugüxü. ²⁰ Rü ngēma nangēxma ya Ngechuchu i ñuxma yerü nüxüra yexma naxücu na Tupanapēxewa taétüwa nachogüxücèx. Rü ngēmaäcü guxüguma tórü ngüxēēruü i paigüeru nixi, guma Melquisedé ga Tupanapēxewa Abráüetüwa chogücürüü.

7

Ngechuchu rü guma nuxcümaücü ga pai ga Melquisederüütama nixi

¹ Rü guma Melquisedé rü ñane ga Charéüarü äëxgacü nixi ga yexguma namaüxgu ga Abráü. Rü nüma ga Melquisedé, rü duüxügüarü pai nixi ga Tupanapēxewa. Rü yexguma Abráü rü to ga nachiüñaneärü äëxgacügümaã nügü nadaixgu rü nüxü nayexeragu, rü Melquisedé rü namawa Abráüpēxegu nayangu ga yexguma Abráü napatacèx taegugu. Rü nüma ga Melquisedé rü Tupanaégagu Abráümaã mexü naxuegu. ² Rü Abráü rü nüxü nayexma ga guxüma ga yemaxügü ga yema äëxgacügü ga namaã nügü nadèixüna napuxüxü. Rü yemawa ínanaxüxüchi ga yema Tupanana üxü, rü Melquisedéna nanaxã. Rü ngēma naega i Melquisedé rü Äëxgacü ya Ixaixcümacü ñaxüchiga nixi. Rü norü ñane ga Charéü rü Taäëxēēruü ñaxüchiga nixi. Rü ngēmacèx i naega i Melquisedé rü Äëxgacü ya Taäëxēēruü ñaxüchiga ta nixi. ³ Rü Tupanaärü ore ga nuxcüma ümatüxüwa rü tama nüxü nixu na texé tiixü ga nanatü rü naë rü norü oxigü ga Melquisedé. Rü ngëxgumarüü ta tama nüxü nixu i norü buxchiga rü norü yuxchiga. Rü ngēmacèx Tupana Nanerüü guxüguma duüxügüarü ngüxēēruü ya pai nixi i Tupanapēxewa. ⁴ Rü ñuxma rü name nixi i nagu perüxüñüë na ñuxäcü aixcüma äëxgacü ya tacü yiixü ga Melquisedé. Yerü nuxcümaücü ga tórü oxi ga Abráü rü Melquisedéna nanaxã ga yema Tupanana üxü ga natanüwa ga yema yemaxügü ga togü ga äëxgacügüna napuxüxü. Rü ngēmawa nüxü tacuèx na Tupanapēxewa tórü oxi ga Abráüarü yexeracü yiixü ga Melquisedé. ⁵ Rü ñuxma i Yudíugü, rü guxüma i norü ngēmaxüwa ínanaxüxüchigü i ngēma Tupanana üxü, rü ñuxüchi norü paigüna nanaxã yerü yemaäcü nixi ga namuãxü ga yema mugü ga Moíché ümatüxü. Natürü guxüma i ngēma paigü rü Lebítaagü nixígü. Rü nüma ga Lebí rü guxüma i Yudíugürüü Abráütaa nixi. Rü ngēmaäcü i ngēma Yudíugü rü norü paigüna nanaxã i ngēma Tupanana üxü, woo natanüxügü i Yudíugü na yiixü i ngēma paigü. ⁶ Natürü ga Melquisedé rü woo tama Lebítaa nixi, natürü Abráümēxēwa nanayaxu ga yema Tupanana üxü. Rü nüxü tacuèx na Abráü yiixü ga noxri nayaxucü ga Tupanaärü uneta. Rü Melquisedé rü Tupanana naca na Abráümaã mexü naxueguxücèx. ⁷ Rü guxüma meãma nüxü tacuèx rü ngëxguma texé toguècèx Tupanana caxgu na tüxü nangüxēēxücèx, rü Tupanapēxewa rü yixema nüxna çaxe rü ngēma togü i naxcèx itaçaxüarü yexera tixi. Rü ngēmaäcü nüxü tacuèx na Abráüarü yexera yiixü ga Melquisedé i Tupanapēxewa. ⁸ Rü ñuxma i nuã tatanüwa rü ngēma paigü i ngixü yauxgüxü i ngēma dñeru i Tupanana ücü, rü duüxügümare nixígü rü tá nayue. Natürü ngëxguma Melquisedéchiga yadexagu i Tupanaärü ore, rü ñoma namaxüxürüü nixi i nachiga yadexaxü. Rü ngēmawa nüxü tacuèx na Cristu ya guxüguma maxücürüü na yiixü ga Melquisedé. ⁹⁻¹⁰ Rü Abráütaa ga Lebí, rü guxüma i paigü i Lebítaagü ixígüxü i ñuxma ngixü yauxgüxü i ngēma dñeru i Tupanana ücü, rü nümagü rü ta Abráümaã Melquisedéna nanaxãgü ga yema Tupanana üxü. Yerü nüma ga Lebí rü guxüma ga nataagü

i ñuxma Yudiügüarü paigü ixīgüxü, rü woo ga na tauta nabuexü ga yexguma, natürü marü Abráüxünewa nayexmagü ga yexguma Melquisedé namawa Abráüpëxegu yanguxgu. Rü ngēmawa nüxü tacuèx na guxüma i ngēma paigüarü yexera yīxü ya Melquisedé. ¹¹ Rü nuxcümaügüxü ga tórü oxigü ga Yudiügü, rü Lebítaagü ga paigümëxëwa nixi ga nayauxgüâxü ga Tupanaârü mugü. Natürü pemaã nüxü chixu rü yexguma chi yema paigü aixcüma yema Yudiügüxü imexëëgügu ga Tupanapëxewa, rü taxucèx chima Tupana nüxü naxuneta ga naï ga pai ga Melquisederüü ixïcü ga tama Lebítaa ga Arãürüü ixïcü. Rü yemacèx ga Tupana rü nüxü naxuneta ga Nane ga Ngechuchu na tórü chogüruü ya pai yīxüçèx. ¹² Rü yemacèx ga Tupana rü yema Yudiügüarü paigüchicüüxü nayangucuchixëë ga Cristu. Rü nüma nixi i ñuxma i aixcüma Tupanapëxewa tüxü yamexëëgüxü. Rü guxüma ga Lebítaa rü paigü nixigü yerü yemaãcü nixi ga naxueguxü nawa ga yema mugü ga Moïché ümatüxü. Natürü nüma ga Cristu rü marü nanaxüchicüü ga guxüma ga yema. ¹³⁻¹⁴ Erü meãma nüxü tacuèx rü nüma ya tórü Cori ya Ngechuchu ya yima nachiga idexagücü rü tama Lebítaa nixi erü nüma rü Yudátaa nixi. Rü nüxü tacuèx rü taxuüma ga Yudátaa rü pai nixi, yerü ga Moïché rü yexguma yema paigüchiga yadeaxgu rü taxuüma ga Yudátaaxü naxuneta na pai yīxüçèx. ¹⁵ Rü ngēmaãcü meã nangox na Tupana iyanaxoxëëxü ga guxüma ga yema mugü ga Moïché ümatüxü ga paigüchiga. Yerü nüma ga Tupana rü nüxü naxuneta ga wüxi ga pai ga yexwacaxücü ga tama Lebítaa ixïcü. Rü nüma nixi i tórü Cori yīxü ya Melquisederüü ixïcü, erü guxüma i ngēma togü i paigüarü yexera nixi. ¹⁶ Rü guxüma ga yema togü ga paigü rü nangucu yerü Lebítaa nixigü. Natürü nüma ga Cristu rü paixü ningucuchi yerü poramaã yuwa ínarüda rü guxüguma namaxëcha na tüxü nangüxëëxüçèx. ¹⁷ Rü ngēmacèx i Tupanaârü ore i ümatüxüwa rü tórü Corichiga ñanagürü:

“Cuma rü guxügutáma duüxügüarü ngüxëëruü ya pai quixi Melquisederüü”, ñanagürü. ¹⁸⁻¹⁹ Rü yemacèx ga Tupana rü ñoma ga naãnewa nanamu ga Nane, yerü yema mugü ga paigüchiga naxümatüxü ga Moïché rü tama poraãcü tüxü narüngüxëë yerü tama aixcüma tüxü nimexëëgü ga Tupanapëxewa. Rü yemacèx Nanexü namu ga Tupana na tórü pecaducèx nayuxüçèx na ngēmaãcü tüxü nangëxmaxüçèx i maxü i taguma gúxü rü aixcüma Tupanamücügü ixīgüxüçèx. ²⁰⁻²¹ Rü yexguma Tupana yema togü ga paigüxü ngucuxëëgu, rü nanangucuxëëmare. Natürü yexguma Cristuxü yangucuchixëëgu na tórü ngüxëëruü ya pai yīxüçèx, rü nügüégagutama inaxuneta. Rü yemacèx ga yexguma Cristuxü yangucuchixëëgu rü ñanagürü:

“Choma i Cori ya Tupana rü marü cuxü chaxuneta na guxügutáma duüxügüarü ngüxëëruü ya pai quiixüçèx. Rü ngēma rü tagutáma chanaxüchicüü erü chaugüégagu ichaxuneta”,

ñanagürü. ²² Rü ñuxma na yemaãcü nügüégagutama inaxunetaxü ga Tupana, rü nüxü tacuèx na aixcümaxüchima yema paigüarü yexera na yīxü ya Cristu erü guxügutáma Tupanapëxewa tüxü narüngüxëë. ²³ Rü yema togü ga paigü rü namuxüchi, yerü niyuetanü. Rü yemacèx taxucürüwama guxüguma paigü nixigü. ²⁴ Natürü ñuxma na tórü ngüxëëruü ya paixü yangucuchixü ya Ngechuchu, rü ngēmacèx marü taxucèxma texé ya togue tingucuchi, erü nüma ya Ngechuchu rü tagutáma nayu. ²⁵ Rü ngēmacèx nixi i ñuxma i nüxü natauxchaxü na aixcüma tüxü namaxëxëëxü ya guxâma ya yixema norü ngüxëëmaã Tupanaxütawa ngugüxe. Erü nüma ya Ngechuchu rü guxüguma namaxëcha na tümaëtüwa nachogüxüçèx. ²⁶ Rü ngēmaãcü ya Ngechuchu, rü nüxicatama nixi i pai ya tórü ngüxëëruü yīxü i Tupanapëxewa. Erü nüma rü aixcüma naxüüne, rü nataxuma i chixexü i nawa, rü nangearü pecaduãx yerü

taguma taxrüü pecadu naxü. Rü ñuxma rü guxüetüwa nangëxma i daxüguxü i naãnewa i Tupana íngëxmaxüwa. ²⁷ Rü Ngechuchu rü tama ngëma togü i paigüerurüü nixí. Erü nümagü rü nanaxwëxe na guxü i ngunexügu Tupanacèx naxünagü nadèixü na ngëmaãcü Tupana nüxü nüxü ngechaüxücèx i noxrütama pecadugü rü guxü i duüxügüarü pecadugü ta. Natürü nüma ga Ngechuchu rü yexguma nügü inaxãxgu, rü wüxicanatama pecaducèx nayu. Rü ngëma rü guxügutama name i Tupanapëxewa. ²⁸ Rü yema mugü ga Moïché ümatüxü, rü duüxügümarexü naxuneta na paigüerugü yixüguxücèx. Natürü nümagü rü ta nipecaduãxgü. Natürü yemawena ga Tupana rü nügüégagu Nanexü naxuneta na tórü ngüxëëruü yixüçèx. Rü yima Nane rü guxüguma mecüxüchi ya tórü Maxëxëëruü nixí. Rü nüma rü guxüguma tüxü narüngüxëë i Tupanapëxewa.

8

Ngechuchu nixí ya tórü ngüxëëruü i Tupanapëxewa

¹ Rü ngëma pemaã nüxü tixuxchaüxü i ñuxma nixí na tüxü nangëxmaxü ya tórü ngüxëëruü ya mexëchicü i Tupanaxütawa. Rü nüma rü Tupana Nane ya Cristu nixí. Rü daxüguxü i naãnewa i Tupanaärü tügünecüwawa narüto erü guxüärü ãëxgacü nixí. ² Rü ngëma daxüguxü i naãnewa i ngëma nachica i üünexü ga Tupana üxüwa nixí i taxcèx ínaçaxü. Rü tama ngëma Yudíugüarü paigürüü wüxi ya ípata ya duüxügü üxünewa Tupanana taxcèx ínaca. ³ Rü guxüma i ngëma Yudíugüarü paigüeru rü nangucu na Tupanana naxägüãxücèx i ãmaregü rü naxcèx nadaíãxücèx i naxünagü na Tupana nüxü nüxü ngechaüxücèx i duüxügüarü pecadugü. Rü yemacèx ga Ngechuchu rü Tupanana nügü naxãmare na duüxügüarü pecaducèx nayuxücèx. ⁴ Rü ñuxma i nüma ya Ngechuchu rü daxüguxü i naãnewa nangëxma na ngëma tórü ngüxëëruü ya pai yixüçèx i Tupanapëxewa. Rü ngëmacèx tama ñoma i naãnewa nixí i pai yixü. Natürü ngëxguma chi ñoma i naãnewa nangëxmagu rü tãu chima pai nixí erü ñoma i naãnewa nangëxmagü i ngëma Yudíugüarü paigü i Tupanana ãmare ägüxü yema Moïchéarü mugü nüxü ixuxürüü. ⁵ Natürü ngëma puracü i ñoma i naãnewa naxügüxü i ngëma Yudíugüarü paigü, rü naxcèx nadauxütaegümare i ngëma Ngechuchu daxüguxü i naãnewa üxü. Rü ngëma nachica i nawa Tupanacèx napuracüexü i ngëma paigü, rü nanaxüchicünèxägümare i ngëma nachica i Ngechuchu nawa ngëxmaxü. Rü meãma nüxü tacuèx i ngëma, yerü yexguma Moïché naxüxchaügu ga Tupanapata, rü Tupana rü ñanagürü nüxü:

“¡Dücèx, meã nangugü i ngëma cuèxruü ga cuxü chawéxü ga mèxpüne ga Chinaíwa! Rü chanaxwëxe i ngëmaãcü na cunaxüxü”,

ñanagürü. ⁶ Natürü nüma ya tórü ngüxëëruü ya Cristu rü daxüguxü i naãnewa nangëxma, rü ngëma aixcümaxüchi Tupanapëxewa taétüwa nachogü. Rü ngëma Yudíugüarü paigü rü nagu naxíãma ga yema nuxcümaüxü ga uneta ga Moïché ümatüxü. Natürü nüma ya Tupana rü marü tüxna nanaxã i wüxi i ngexwacaxüxü i uneta erü tamaã nüxü nixu na Cristu yixü ya aixcüma tórü ngüxëëruü ixücü. Rü nüma rü nayu na Tupanapëxewa tüxü yamexëëxücèx, rü ngëma Tupanaxütawa nangëxma i ñuxma na taétüwa nachogüxücèx. Rü ngëmaãcü nüxü tatau na Tupanaärü uneta i ngexwacaxüxü rü yema nuxcümaüxü ga unetaarü yexera yixü na namexü. ⁷ Yerü yexguma chi yema nüxíraüxü ga uneta ga Moïché ümatüxü rü aixcüma namexgu na duüxügüxü namaxëëxücèx, rü marü taxucèx chima tanaxwëxe i to i ngexwacaxüxü i Tupanaärü uneta. ⁸ Natürü nüma ga Tupana rü nüxü natau na tama aixcüma

napēxewa duūxūgūxū yamexēēxū ga yema nūxīraūxū ga uneta ga Moīchéna naxāxū. Rū yemacèx ga Tupana rü ñanagürü:

“Wūxi i ngunexū rü wena táxarū guxūma i chorū duūxūgūmaā ichaxuneta.

⁹ Natürü ngēma chorū uneta i ngexwacaxūxū, rü tāūtāma namaā nawūxigu ga yema nūxīraūxū ga chorū uneta ga nuxcūmaūgūxū ga perū oxigūmaā nūxū chixuxū ga yexguma nūxū charūngūxēēgu na ínachoxūxūcèx ga Equituarū naānewa. Yerū nūmagū ga yema duūxūgū rü tama chauga naxīnūē rü tama nayanguxēē ga yema nūxīraūxū ga chorū uneta, rü yemacèx íchanawogū. ¹⁰ Natürü ngēxguma nawa nanguxgu na wena namaā ichaxunetaxū, rü ñāācū tá nixī i guxūma i Yudīgūmaā ichaxunetaxū: ‘Rü tá meāma ngēma duūxūgūxū nūxū chacuèxēē i chorū mugū na aixcūma naāēwa nangēxmagūxūcèx. Rū choma rü tá norū Tupana chixī, rü nūmagū rü tá chorū duūxūgū nixīgū’. ¹¹ Rū guxūma i ngēma duūxūgū i choxū yaxōgūxū, rü aixcūma tá choxū nacuèxgū. Rū ngēmacèx taxucèxtāma tūxcūū nūgūmaā nūxū nixugūgū i chauchiga na ngēmaācū choxū nacuèxgūxūcèx. Erū guxūma i chorū duūxūgū rü aixcūma tá meā choxū nacuèxgū woo buxū rü ēxna yaxū. ¹² Rū tá nūxū nūxū changechaū i norū chixexūgū, rü tá nūxū ichayarūngūmaxūchi i norū pecadugū”,

ñanagürü ga Tupana. ¹³ Rū dücax, ñuxma na Tupana ngexwacaxūxū i unetachiga idexaxū, rü ngēmawa nūxū tacuèx na yema nūxīraūxū ga uneta rü marū nangupetūchaūxū. Rū nūxū tacuèx rü guxūma i ngēma marū ngupetūchaūxū, rü paxa tá inayarūxo. Rū ngēmaācū i ngēma Yudīgūarū paigū, rü marū inayarūxoxchaū na Tupanapēxewa duūxūgūxū nangūxēēxū. Erū nūma ya Tupana rü marū Cristuxū ningucuchixēē na tōrū ngūxēēruū yīxūcèx i napēxewa.

9

Tupanapata ga duūxūgū üxūnechiga rü Tupanapata ya daxūguxū i naānewa ngēxmanechiga

¹ Rū yexguma nuxcūma Moīchémaā yadeaxgu rü nūxna naxāāgu ga yema nūxīraūxū ga uneta, rü Tupana namaā nūxū nixu na ñuxācū nanaxwèxexū na nūxū yacuèxūūgūxū. Rū yexgumarūū ta namaā nūxū nixu na ñuxācū nanaxwèxexū na naxcèx naxūāxū ga wūxi ga ĩpata ga naxchirunaxcèx na yēma nūxū yacuèxūūgūxūcèx ga paigū. ² Rū guma ĩpata ga naxchirunaxcèx rü nitüyemachīā. Rū yema naxmachīā ga nūxīra nawa ixūcuxū, rü “Nachica i Üünexū” nixī ga naēga. Rū yēma nayexma ga werachica rü mecha ga pāū ga üünexū nagu nuxū. ³ Rū yema to ga naxmachīā ga yema tūyemachīāxūcèxwena üxū rü “Nachica i Üünexūchixū” nixī ga naēga. ⁴ Rū yēma nayexma ga yema mecha ga uirunaxcèx ga ngextā nawa yagugūāxū ga pumara ga yixixū ga yexguma yaguxgu. Rū yēma nayexma ta ga yema baú ga Tupanaārū mugū nagu namaā nanguxūgūxū. Rū yema baú rü guxūwama uirumaā natūxūne. Rū yematama baúarū aixepewa nayexma ga wūxi ga tūxūācū ga uirunaxcèx ga yema pāū ga daxūwa rüyixūmaā āācuxū. Rū yexgumarūū ta yema baúarū aixepewa nayexma ga Arāūārū caxūruū ga ruxūxūne, rü guma nutagū ga Tupanaārū mugū nagu umatūgūcū. ⁵ Rū yema baúétūwa nayexmagū ga yema taxre ga daxūcūāxchicūnèxāgū ga ixāxpèxatūxū. Rū naxpèxatūgūmaā nayadūxétūgū ga yema baúātaū. Rū yema daxūcūāxchicūnèxāgūarū ngāxūwa nixī ga nūgū nangoxēēxūxū ga Tupana. Natürü taxucèxma tūxcūū yexeraācū nūxū tixu i ngēmachiga. ⁶ Rū wūxicana yemaācū na namexēēgūāxū ga guxūma ga yema, rü ñuxūchi ga

paigü rü guxüguma yema nüxĩraũxũ ga naxmachĩãgu nachocuxũ na yéma Tupana namaã nüxũ ixuxũãcũma nüxũ yacuèxüügüxcèx. ⁷ Natürü yema to ga naxmachĩãwa rü yema paigüarü ãëxgacüxicatama nixĩ ga yexma ücuxũ. Rü tama guxüguma yexma naxücu, natürü wüxicanatama yexma naxücu ga wüxichigü ga taunecügu. Rü yexguma yexma naxücuxgu rü yéma nanange ga naxünagü rü guma nagümaã yema baũxũ namaxcuétü. Rü yemaãcü ga yema paigüarü ãëxgacü rü inanaxã ga guma nagü na noxrütama pecadu rü guxüma ga duũxügüarü pecaduxũ iyanangümaxüçèx ga Tupana. ⁸ Natürü yema paigüarü ãëxgacüxicatama nixĩ ga yema Nachica ga Üünexüchixügu ücuxũ ga Tupana íyexmaxüwa. Rü ngẽmaãcü Tupanaãë i Üünexü tüxũ nüxũ nacuèxëë na taxucürüwama yexma Tupana íyexmaxügu nachocuxũ ga guxüma ga duũxügü yerü yexguma nagu naxĩxgu ga yema mugü ga Moĩché ümatüxũ rü nachuxu ga yema. ⁹ Rü guxüma i ngẽma pemaã nüxũ chixuchigaxũ, rü wüxi i cuèxruũ nixĩ i taxcèx i yixema na ñuxma imaxèxũ. Rü ngẽmawa nüxũ tadau rü yema ãmaregü ga Tupanana naxãgüxũ rü yema naxünagü ga Tupanacèx nadèixũ rü taxucürüwama yema duũxügüxũ nimexëë na aixcüma Tupanapëxewa yamexüçèx. ¹⁰ Rü yema nuxcümaügüxũ ga mugü ga õnagüchiga rü axeügüchiga rü nacümagüchiga ixĩxũ, rü yema duũxügüarü düxétüxüncèxicatama nixĩgü. Rü yemacèx tama yema duũxügüxũ nimexëë na aixcüma Tupanapëxewa yamexüçèx. Rü woo napora ga yema mugü ga noxrix, natürü yexguma ínanguxgu ga Cristu rü marü yexma nayacuèx na duũxügümaã naporaxũ. ¹¹ Natürü i ñuxma rü marü ínangu ya Cristu. Rü nüma nixĩ i aixcüma tórü ngüxëëruũ yĩxũ i Tupanapëxewa, rü nagagu nixĩ i nangëxmaxũ i maxũ i taguma gúxũ. Rü ngẽma nachica i ngextá taétüwa ínachogüxüwa rü aixcüma naxüüne erü tama guma ípata ga naxchirunaxcèx ga duũxügümare üxünerü nixĩ erü daxügüxũ i naãnewa nangëxma. ¹² Rü Cristu rü marü daxügüxũ i naãnegu naxücu i ngextá Tupana íngëxmaxüwa. Rü taxucèxma tüxcüũ wüxichigü ya taunecügu ngëxma naxücu, erü marü guxüguma ngema nangëxmaëcha. Rü yexguma yexma naxücuxgu, rü tama yéma nanange ga chibugügü rü wocaxacügügü na Tupanana naxããxüçèx. Natürü nüma ga Cristu rü nagütama inaxã na yemaãcü naxütanüãxüçèx ga tórü pecadugü rü tüxũ nangëxmaxüçèx i maxũ i taguma gúxũ. ¹³ Rü yema mugü ga Moĩché ümatüxũ rü ñanagürü:

“Ngëxguma texé yuetaxũ ingögügu, rü taxucürüwama Tupanapata ya naxchirunaxcèxgu taxücu”,

ñanagürü. Rü yemacèx ga yema Yudíugü, rü yexguma wüxi ga yuetaxũ yangögügügu rü nanaxwèxegü ga na norü paixütawa nagaãxũ ga wüxi ga woca na yema pai Tupanacèx yamáxüçèx rü na yaguãxüçèx na yemaãcü ga guma tanimaca rü dexágu nagüãxüçèx na yema duũxügüxũ namaã namaxcuxüçèx na yemaãcü nüxna ínayixüçèx ga norü chixexũ. Natürü yema rü duũxügüarü düxétüxünewaxicatama nanamexëë rü tama norü maxüxũ namexëë. ¹⁴ Natürü nagü ya Cristu rü yema naxünagügüarü yexera name erü tórü maxũ namexëë na aixcüma Tupanapëxewa imexüçèx. Rü Cristu rü woo Tupana Nane na yĩxũ rü na nataxuxũ ga norü chixexũ, natürü Tupanana nügü naxã rü tórü pecaducèx nayu yerü Naãë i Üünexü nanaporaxëë. Rü yemaãcü curuchagu nanabaxëë ga nagü. Rü ñuxma ya yima nagü rü ningu na tüxũ namexëëxüçèx i Tupanapëxewa. Rü ngẽmacèx taxucèxma tanaxwèxe na nagu ixĩxũ ga yema mugü ga Moĩché ümatüxũ ga tama tüxna naxãxũ i maxũ i taguma gúxũ. Rü ñuxma na Cristugagu Tupanapëxewa imexũ, rü nüma ya Cristu rü tüxũ narüngüxëë na naxüxüçèx i ngẽma Tupana ya maxüçü tüxũ naxwèxexũ. ¹⁵ Rü ñuxma na tórü pecaducèx nayuxũ ga Ngechuchu ya Cristu,

rü nüma nixĩ i tórü ngüxēēruũ i Tupanapēxewa, ngēma Tupanaārü uneta i ngexwacaxüxü nüxü ixuxürüũ. Rü ñuxma i yixema na Tupana tüxü dexü, rü tüxü nangēxma i maxü i taguma gúxü ega yima Naneãxü yaxōgügu. Rü ngēxgumarüũ ta i guxüma i Tupanaārü duüxügü ga nuxcüma yaxōgüxü, rü nüxü nangēxma i maxü i taguma gúxü yerü Cristu nayu na norü pecaduna ínguxüxēēãxüçèx. ¹⁶ Rü ngēxguma nayuxchaügu i wüxi i duüxü, rü wüxi i poperagu nanaxümatü na texé tá nayaxuxü i norü ngēmaxügü. Natürü ngēxguma namaüxgu i ngēma duüxü, rü taxucürüwama texé tanayaxu i norü ngēmaxügü. ¹⁷ Rü ngēmacèx i ngēma popera rü tama naporã i ngēxguma namaüxgu i ngēma duüxü. Rü ngēxguma nayuxguxicatama nixĩ i naporaxü. ¹⁸ Rü nüma ga Cristu rü norü yumaã nixĩ ga Tupanapēxewa tüxü yamexēēgüxü. Yerü ga Moïché rü nüxü nixu rü yexguma texé pecaduãxgu rü tanaxwèxe na tümaārü paixütawa tanagaxü ga wüxi ga naxüna na tümaegagu nayuxēēãxüçèx rü inabaãxüçèx ga nagü na Tupana tüxü nüxü ngechaüxüçèx ga tümaārü pecadu. ¹⁹ Rü Moïché rü guxüma ga duüxügüpēxewa nüxü nixu ga guxüma ga Tupanaārü mugü. Rü yemawena nanayaxu ga wocaxacügü rü chibuxacügü, rü dexámaã nanaxüéü. Rü ñuxüchi nanayaxu ga wüxi ga naïxchacüüxacü rü ñuxre ga tüèxmü ga dauxüne, rü yema naïxchacüügu nanabagümü. Rü yemamaã guma nagüwa nanacúe rü ñuxüchi nanamaxcúetü ga yema popera ga Tupanaārü mugü nawa yexmaxü. Rü yexgumarüũ ta nayamaxcutanü ga guxüma ga duüxügü. ²⁰ Rü ñuxüchi ga Moïché rü ñanagürü nüxü ga duüxügü:

“Tupana rü marü inaxuneta na pexü tá nangüxēēxü. Rü daa nagümaã pexü chimaxcutanü i ñuxma erü ngēmaãcü nixĩ i choxü namuxü na ngēmawa nüxü pecuáxüçèx na aixcüma tá pexü nangüxēēxü”, ñanagürü. ²¹ Rü ñuxüchi ga Moïché rü guma nagümaã nanamaxcúetü ga guma ípata ga naxchirunaxcèx ga nawa Tupanaxü yacuèxüügüne. Rü yexgumarüũ ta nayamaxcutanü ga guxüma ga yemaxügü ga namaã Tupanaxü yacuèxüügüxü ga guma ípataarü aixepewa yexmagüxü. ²² Rü nüxü tacuèx rü yema duüxügü ga yexguma pecadu naxügügu rü Tupanapēxewa nügü yamexēēgüchaügu, rü norü paigüxütawa nanaga ga wüxi ga naxüna na nüxü yamáãxüçèx rü inabagüxēēãxüçèx na Tupana tama napoxcuexüçèx. Natürü ñuxma ya Tupana rü tüxü nüxü nangechaü i tórü chixexü yerü tórü pecaducèx nayu ga Ngechuchu rü nagü inanaba. Rü yexguma chi tãü chima nayuxgu rü nagü inabaãgu, rü taxucürüwa chima Tupana tüxü nüxü nangechaü i tórü pecadugü.

Cristu rü nayu na iyanaxoxēēãxüçèx i pecadu

²³ Rü yemacèx ga Tupana rü nuxcümaxüchima Moïchémaã nüxü nixu na paigü duüxügüarü pecaducèx nadèixü ga naxümagü rü inabaãxü ga nagü na yemaãcü Tupana tama napoxcuexüçèx ga duüxügü. Natürü i ñuxma i yixema na Tupana tüxü dexü, rü tüxü nangēxma i tachica i daxügüxü i naãnewa yerü Nane ya Cristutama tórü pecaducèx nayu rü inanaba ga nagü. Rü yima nagü rü Tupanapēxewa rü poraãcü ngēma naxümagüarü yexera narüporamaē. ²⁴ Rü ngēmacèx i ñuxma rü taxucèxma tüxcüũ guma ípata ga naxchirunaxcèx ga duüxügü üxünegu naxücu ya Cristu na ngēma taétüwa nachogüxüçèx. Erü nüma ya Cristu rü marü Tupanaxütawaxüchi nangu i daxügüxü i naãnewa. Rü ngēma Nanatüpēxewa nangēxma i ñuxma na ngēma taétüwa nachogüxüçèx. ²⁵ Rü ngēmacèx i ñuxma rü taxucèxma tüxcüũ guxüguma Nanatüna nügü naxãècha na ngēmaãcü taxcèx nayuu-xüçèx. Rü yema Yudíugüarü paigüarü ãëxgacügü rü gúcü ga taunecügügu guma ípata ga üünenegu nachocuxü na yéma Tupanana naxägüãxüçèx ga

guma naxūnagūgü. ²⁶ Natürü ya Cristu, rü taxucèxma tūxcüü gúcü ya taunecūgūgu Tupanana nügü naxāēcha, erü ngēxguma chi ngēmaācū yixīgu rü chi noxri naāne ixūgūgumama rü chi marü muēxpūxcūna taxcèx nayu. Natürü ñomaūcūü ga Cristu rü marü ñoma ga naānewa nangu na wūxicanatama nügü inaxāxūcèx rü pecaducèx nayuxūcèx. ²⁷⁻²⁸ Rü ngēma na wūxicanatama nayuxū i duūxūgü naxūpa na Tupanapēxewa nangugūxū, rü yexgumarūūtama ga Cristu rü wūxicanatama nügü inaxā rü nayu na iyanaxoxēēāxūcèx i muxūma i duūxūgūarü pecadugü. Natürü wena taxarü nūma naxū. Rü ngēxguma wena nūma naxūxgu rü tama pecaduarü oxēēwa tá nūma naxū. Natürü tá nūma naxū na namaxēxēēāxūcèx i guxūma i ngēma duūxūgü i aixcūma ínanguxēēgūxū.

10

¹ Rü yema mugü ga Moīché ūmatūxū rü írarūwatama yema duūxūgūcèx nanangoxēē ga tacü tá na naxūxū ga Cristu. Natürü ga yema mugü rü tama aixcūma Cristurūü napora, yerü taxucürūwama Tupanapēxewa nayamexēē ga yema duūxūgü woo gúcü ga taunecūgūgu Tupanacèx nanadaiixū ga naxūnagü na yemaācū Tupanana nangaicamagūxūcèx. Rü yemaācū ga yema mugü rü taxucürūwama Cristurūü nanamaxēxēē ga yema duūxūgü. ² Rü yexguma chi yema mugü aixcūma yema duūxūgūxū imexēēgu ga Tupanapēxewa, rü tãu chima nagu narūxñnūēēcha na yapecaduāxū, rü chi nūxū narūxoe na naxūnagü Tupanacèx nadèixū. ³ Natürü woo gúcü ga taunecūgūgu Tupanacèx naxūnagü nadèixū ga duūxūgü, rü tama norü pecadu inayarūxoxēē. Rü yema rü norü pecaduarü cuēxāchixēēruūmare nixī. ⁴ Yerü guma nagü ga yema wocagü rü chibugü rü tama napora na iyanaxoxēēāxūcèx ga pecadugü. ⁵ Rü yemacèx ga Cristu ga yexguma ñoma ga naānewa naxūxchaūgu, rü Nanatūxū ñanagürü:

“Tama cunaxwèxe na naxūnagü cuxcèx nadèixū i duūxūgü na naxūtanügüāxūcèx i norü pecadugü. Natürü cunamexēē i ñaā chaxune na ngēmamaā chanaxūtanūxūcèx i pecadu. ⁶ Rü tama namaā cutaāē i ngēma naxūnagü i cuxna naxāmaregūxū rü cuxcèx nadèixū rü yagugūxū na naxūtanügüāxūcèx i norü pecadugü. ⁷ Rü yemacèx rü ñacharūgü: ‘Dücèx, Pa Chaunatūx, daxe chixī, rü nuā cupēxewa changēxma na chanaxūxūcèx i curü ngúchaū rü na chayuxūcèx, ngēma curü orewa chauchiga naxūmatūxūrūü’, ñacharūgü”.

⁸ Rü yemaācū ga Cristu rü nūxū nixu na Tupana rü tama aixcūma namaā nataāēxū ga yema na naxcèx nadaiāxū ga naxūnagü rü naxcèx yagugūāxū na naxūtanügüāxūcèx ga norü pecadugü woo yema mugü ga Moīché ūmatūxūwa rü duūxūgūxū namu na naxūgūāxū ga guxūma ga yema. ⁹ Rü yemawena ga Cristu, rü ñanagürü ta:

“Dücèx, Pa Chaunatūx, daxe chixī, rü nuā cupēxewa changēxma na chanaxūxūcèx i curü ngúchaū rü duūxūgūarü pecaducèx na chayuxūcèx”,

ñanagürü. Rü yemawa nūxū tacuèx na Tupana rü marü iyanaxoxēēāxū na naxūnagü naxcèx nadèixū, yerü Nanexū ningucuchixēē na pecaducèx nayuxū. ¹⁰ Rü ñuxma na Ngechuchu ya Cristu naxūxū ga yema Tupanaārü ngúchaū, rü ngēmacèx nixī i ñuxma i Tupanapēxewa ixūūnexū i yixema. Yerü nūma ga Cristu rü Tupanana nügü naxā na wūxicanatama guxāārü pecaducèx nayuxū. ¹¹ Rü guxūma i Yudíugūarü paigü rü wūxichigü i ngunexūgu rü tupaucawa nangēxmagūxū na Tupanana naxāgūāxūcèx i naxūnagü i naxcèx nadaiixū. Rü guxūguma yemaācū nanaxūgūxū natürü taguma aixcūma

inayarüxo ga norü pecadugü woo yemaãcü na naxügüxüãxü. ¹² Natürü nüma ga Ngechuchu ya Cristu rü wüxicanatama Tupanana nügü naxã na guxãärü pecaducèx nayuxücèx. Rü yemawena rü ñuxüchi daxüwa naxü rü Tupanaärü tügünecüwawa nayarüto, erü guxãärü ãëxgacü nixi i ñuxmax. ¹³ Rü ngema nixi i nangëxmaxü ñuxmatáta ya Tupana rü guxüma i norü uwanügüxü nüxü nayexeraxëë. ¹⁴ Rü nüma ga Ngechuchu ya Cristu rü wüxicanatama Tupanana nügü naxã rü nayu na guxüguma Tupanapëxewa timexücèx ya yixema Tupanacèx tüxü yaxüünexëëgüxe. Rü ngëmacèx i ñuxma rü taxucèxma tüxcüü wena nügü inaxã rü nayu, yerü wüxicanatama guxüma ningutanüxëë. ¹⁵⁻¹⁶ Rü Tupanaãë i Üünexü rü tüxü nüxü nacuèxëë na aixcüma yiixü i ngëma, yerü nüma ga Tupana rü ñanagürü:

“Ngëxguma nawa nanguxgu na wena ngëma Yudíugümaã ichaxunetaxü, rü wüxi i ngexwacaxüxü i uneta tá nüxna chaxã. Rü tá meã ngëma duüxügüxü nüxü chacuèxëë i chorü mugü na aixcüma naãëwa nangëxmagüxücèx rü guxüguma naga naxinüëxücèx. ¹⁷ Rü tá nüxü ichayarüngümaxüchi i ngëma duüxügüarü pecadugü rü ngëma chixexü i naxügüxü. Rü tagutáma wena nüxna chacuèxãchi”, ñanagürü. ¹⁸ Rü ngëmaãcü nüxü tacuèx rü ngëxguma Tupana duüxügüaxü nüxü ngechaügu i norü pecadugü, rü marü taxucèxma tüxcüü nanaxwëxe na wena tacü i naxünagü nüxna naxãgüxü naxcèx i pecadu.

Name nixi i Tupanana tangaicamagü

¹⁹⁻²⁰ Rü ngëmacèx i ñuxma, Pa Chaueneëgü, rü taxucèxma tüxcüü tamuüë na Tupana íngëxmaxüwa ichocuxü na namaãxüchi idexagüxücèx. Rü nuxcümaxüchima rü paigüarü ãëxgacüxicatama yexma naxücu nagu ga guma ípata ga naxchirunaxcèx ga Tupana nawa yexmane. Rü taxucürüwama ngexerüxüxemare yexma taxücu. Natürü nüma ga Ngechuchu ya Cristu rü marü inayanaxoxëë ga guxüma ga yema ga yexguma curuchagu nayuxgu rü nagü inabaãgu na Tupana íngëxmaxüwa tüxü yachocuxëëxücèx rü namaãxüchi idexagüxücèx. Rü woo taxucürüwama Tupanana tangaicamagü ga noxrix, natürü nüma ga Cristu rü nayu na tüxü namaxëxëëxücèx. Rü nagagu nixi i ñuxma i Tupanaxütawa ingugüxü. ²¹ Rü nüma nixi i Tupanapëxewa tüxü nangüxëëxü i guxãma i yixema i Tupanaärü duüxügü ixigüxe. ²² Rü ñuxma na tüxü nangëxmaxü ya tórü ngüxëëruü i Tupanapëxewa, rü tanaxwëxe i ngearü chixexüãcüma Tupanana tangaicamagü na namaãxüchi idexagüxücèx. Rü tanaxwëxe i aixcüma tayaxögü na nüma rü tá meã tüxü nayaxuxü yerü Cristu rü taxcèx nayu na tüxü iyanaxoxëëãxücèx i tórü chixexü rü yemacèx marü naegagu ítabaiü. ²³ Rü tanaxwëxe i aixcüma meã Cristuaxü tayaxögüecha yerü nagümaã tüxü inayanaxoxëë ga tórü chixexü. Rü ngëmacèx ítananguxëë na wena taxarü núma naxüxü na Nanatüxütawa tüxü nagagüxü. Rü taguma tanaxwëxe na nüxü rüxoexü na yaxögüxü, rü bai i írarüwa. Erü Tupana ga tamaã ixunetacü na tüxü nangüxëëxü, rü aixcümaxüchi tá nayanguxëë i guxüma ga yema tamaã nüxü yaxuxü. ²⁴ Rü ñuxma na ngëmaãcü tüxü nangüxëëxü ya Tupana, rü name nixi i guxüguma naxcèx tadaugü na ñuxãcü wüxichigü yigü rüngüxëëgüxü na yexeraãcü yigü ingechaügüxücèx rü mexü ixügüxücèx. ²⁵ Rü name nixi i guxüguma tórü ngutaquëxegüwa na íngugüüxü. Erü nümaxü rü marü nüxü narüxoe na ngutaquëxewa naxixü, rü tama tanaxwëxe na ngëxgumarüü ixigüxü. Rü ngëmacèx name nixi i yigüaxü tanagüchaüxëë na ingutaquëxegüxü. Rü ñuxma na nüxü icuáxü na marü yangaicaxü ya tórü Cori, rü yexeraãcü tanaxwëxe na yigüaxü nangüchaüxëëxü. ²⁶ Natürü ngëxguma chi texé Cristuaxü yaxöchirëxgu ga noxrix rü ñuxüchi noxtacüma nüxü tarüxoxgu, rü marü nataxuma na ñuxãcü

namexëëxü i ngëma tümaârü pecadu i Tupanapëxewa. ²⁷ Erü ngëxguma chi ngëmaäcü noxtacüma Cristuxü tarüxoxgu, rü aixcümaxüchi tá tanayaxu i ngëma poxcu i äücümaxü i Tupana tá tüxü namaã poxcuxü rü yima üxü ya iyaurane ya nawa tá ínaguxüne i ngëma Tupanamaã rüxuwänügüxü. Rü ngëxícatama nixí i tüxü ínaguxëëxü ya yíxema Cristuxü rüxoxe. ²⁸ Rü nüxü tacuèx rü yexguma texé tama Moïchéarü mugüga ínügu rü nayexmagu ga taxre rü éxna tomaëxpüx ga duüxügü ga tüxü daugüxü rü tüxü ixugüexü na aixcüma tama naga taxínüxü, rü äëxgacügü rü noxtacüma tüxü nimèxgü rü tama nüxü tangechaütümügü. ²⁹ Natürü Tupana rü aixcüma yexeraäcü tá nanapoxcue i ngëma duüxügü i tama Nanega ínüëxü rü yima nagü ya pecaduarü piruüxü oexü rü Naã i Üünexü i nüxü ngechaüxümaã guxchigagüxü.

³⁰ Rü meãma nüxü tacuèx rü Tupana rü tama natüçexma ñanagürü:

“Choma tá nixí i namaã nüxü chacuáxü na tacü tá namaã chaxüxü i guxüma i ngëma chixexü ügüxü. Rü aixcüma tá chanapoxcu”,

ñanagürü. Rü yexgumarüü ta ñanagürü:

“Choma tátama nixí i nüxna chaçaxü i wüxichigü i chorü duüxügü i norü maxüchiga”,

ñanagürü. ³¹ Rü dücax, rü aixcüma namaxü ya Tupana, rü ngëmacèx ega tama naga ixínüëgu rü wüxi i äücümaxüchixü nixí na namëxgu inguxü na tüxü napoxcuxüçex. ³² Rü dücax, name nixí i nüxna pecuëxächie ga ñuxäcü na yüxü ga yexguma noxri Cristuxü peyaxgu. Rü yexguma ga pema rü yema na peyaxögüxügagu rü poraäcü guxchaxügü pexü nangupetü, natürü tama Cristuxü perüxoe rü bai ga írarüwa. ³³ Rü ñuxre ga pema rü duüxügü pemaã naguxchigagü rü guxäpëxewa pexü niçuaixgü. Rü toguax ga pema rü pegü ipeyaxägu na yema pemücügürüü ngüxü pingegüxüçex. ³⁴ Rü pema rü pexü nangechaütümügü ga yema petanüxügü ga yaxögüxü ga poxcupataüwa yexmagüxü. Rü taãëäcüma yaxna namaã pexínüë ga yema tama yaxögüxü ga pexna napuxüxü ga perü yemaxügü. Rü tama naxcèx pexoegaãë, yerü meãma nüxü pecuèx rü daxügüxü i naãnewa pexü nangëxma i ngëma perü ngëmaxügüarü yexera ixíxü, erü tagutáma nagux. ³⁵ Rü ngëmacèx i ñuxmax, rü tama name na nüxü perüxoexü na Cristuaxü peyaxögüxü woo tacü pexü üpetügu. Erü marü nüxü pecuèx rü Tupana rü aixcümaxüchi tá pexna nanaxä i perü ämare i maxü i taguma gúxü, erü Cristuaxü peyaxögü. ³⁶ Rü ngëma guxchaxügü i pexü ngupetüxü, rü name nixí i yaxna namaã pexínüë na penaxüxüçex i Tupanaârü ngüchaü rü penayaxuxüçex i ngëma ämare i pemaã inaxunetaxü. ³⁷ Erü Tupanaârü ore i ümatüxüwa rü ñanagürü:

“Paxaxüchi tá wenaxârü núma naxü ya Cristu. Rü aixcüma täütáma nuxcü ínangu. ³⁸ Natürü yíxema tümaârü ôgagu chopëxewa mexë, rü name nixí i guxüguma tayaxöçcüma chaucèx tamaxü. Natürü ngëxguma nüxü tarüxoxgu na tayaxöxü, rü choma rü täütáma tümamaã chataãë”,

ñanagürü. ³⁹ Natürü i yixema rü tama ngëma duüxügü i nüxü rüxoexü i Tupana tá poxcuexürüü tixígü. Erü yixema rü ngëma yaxögüxütanüxü tixígü, rü ngëmacèx tüxü nangëxma i maxü i taguma gúxü.

11

Tórü ôchiga

¹ Rü ñuxma rü tórü ôgagu nixí i nüxü icuáxü na aixcüma tá nayauxgüxü i guxüma i ngëma irünguxëëgüxü ga Tupana tamaã ixunetaxü. Rü ngëma tórü ôgagu nixí i nüxü icuáxü na aixcüma Tupana tá yanguxëëxü i ngëma norü uneta i ñuxma tauta nüxü idauxü. ² Rü ñuxre ga nuxcümaügüxü ga tórü oxigü rü Tupanaãxü nayaxögü, rü yemacèx ga Tupana rü namaã nataãë. ³ Rü

ngēma tórü õgagu nixī i nūxū icuáxū na aixcūma yīixū na Tupana rü norü oremaãmare nangoxēēãxū ga ñoma ga naãne rü üèxcü rü tauemacü rü woramacurigü rü ãxtagü. Rü yemaãcü ga Tupana, rü ngürüwa nanangoxēēmare ga guxūma i ngēma ñuxma nūxū idauxū. ⁴ Rü guma nuxcūmaücü ga Abé rü Tupanaãxū nayaxõ. Rü yemacèx Tupanaga naxīnū rü nūxna nanaxã ga wūxi ga naxūna ga Tupanacèx yamáxū. Natürü ga naēneē ga Caī rü tama Tupanaga naxīnū rü tama nūxna nanaxã ga yema ãmare ga Tupana nūxū naxwèxexū. Rü yemacèx ga Tupana rü woo tama Caīmaã nataãē, natürü Abémaã nataãē rü nūxū nixu na mecü yīixū yerü nayaxõ rü naga naxīnū. Rü ngēmacèx i ñuxmax na woo nayuxū ga Abé, natürü wūxi i tórü cuèxruū nixī. Erü nawa nixī i nūxū icuáxū na Tupana naxwèxexū na yaxõgüxū rü naga ixīnūèxū. ⁵ Rü Enó rü ta Tupanaãxū nayaxõ rü naga naxīnū. Rü yemacèx nixī ga namaxãcütama yagaãxū na tama nayuxücèx. Rü namücügü rü taguma nūxū inayangaugü, yerü Tupana nayaga. Rü Tupanaãrü ore i ümatüxūwa nūxū nixu rü yexguma tauta yagaãgu, ga Enó rü nanaxü ga yema Tupana naxwèxexū. ⁶ Natürü taxuacūma Tupana tamaã nataãē ega tama nūxū yaxõgügu. Rü yíxema namaã ãmücüchaüxē, rü tanaxwèxe na tayaxõxū na aixcūmaxüchi nangēxmaxū i nūma rü aixcūma tüxū nangüxēèxū ya yíxema naxcèx daugüxe rü naga ñnūèxē. ⁷ Rü yexguma Noemaã yadeaxgu ga Tupana, rü nūma ga Noe rü nayaxõ rü naga naxīnū. Rü Tupana rü namaã nūxū nixu rü tá na ínanguxēēãxū ga mucü ga taxüchicü ga taguma duüxügü nūxū daucü rü tá guxüwama inanguanexēècü. Rü namaã nūxū nixu ga na naxüãxücèx ga wūxi ga wapuru ga taxüne na tama nayuxücèx ga nūma rü namèx rü nanegü rü naneãxgü. Rü Tupanaga naxīnū ga Noe, rü nanaxü ga guma wapuru, rü yemaãcü tama nayue ga nūma rü napatacūãx. Rü yemaãcü Tupanaãxū nayaxõ. Natürü yema togü ga duüxügü rü tama nayaxõgü, rü yemacèx Tupana nanapoxcue. Natürü nūma ga Tupana rü Noexū nixu na napèxewa namexū, yerü nūxū nayaxõ. ⁸ Rü guma tórü oxi ga Abráü, rü Tupanaãxū nayaxõ. Rü yemacèx nixī ga naga naxīnūxū rü nūxna yaxūxū ga nanatüchiüãne na nawa naxüxücèx ga yema naãne ga Tupana tá nūxna ãxū na noxrüxüchi yīixücèx. Rü yemaãcü nanaxü ga yexguma Tupana namuxgu. Rü nanatüchiüãnewa inaxüãchi ga Abráü woo tama nūxū na nacuáxū ga ngextá tá na naxūxū. ⁹ Rü yexguma nawa nanguxgu ga yema naãne ga Tupana namaã ixunetaxū, rü ñoma yexma naxüãneãxürüümare ípata ga naxchirunaxcèxmaãmare naxãchiü. Rü yexgumarüütama nixīgü ga nane ga Ichaá rü nataa ga Acobu, yerü yexguma nayaegu rü Abráürüü ñoma yexma naxüãneãxürüümare nixīgü ga yema naãnewa. Rü yemaãcü nixīgü ga guxūma ga nūmagü ga na woo Tupana rü namaã inaxunetaxū ga na noxrüxüchi yīixücèx ga yema naãne. ¹⁰ Rü yemaãcü ga Abráü, rü woo ñoma yexma naxüãneãxürüümare yéma nayexma, natürü Tupanaãxū nayaxõchigüama, yerü nūxū nacuèx na Tupana tá daxüguxū i naãnewa na nagaxū nawa ya yima ñãne ya nūmatama naxüxüne ya tagutáma iyarüxoxüne. ¹¹ Rü yexgumarüütama iyixī ga Abráü namèx ga Chara. Rü woo ga na taguma naxããcüchiréxū yerü marü iyaxüchi, natürü ixããcü yerü iyaxõõma na Tupana rü aixcūma tá yanguxēēãxū ga yema norü uneta ga tá na naxããcüxū. ¹² Rü yemaãcü ga Abráü rü woo marü yaguãxüchi na yīixū, natürü düxwa nūxū nayexma ga wūxi ga nane, rü gumawa ne naxī ga muxūma ga nataagü. Rü ñuxma rü ñoma ãxtagürüü namuxüchi, rü ñoma naxnücü ya taxuacūma yaxugücürüü nixīgü, yerü yemaãcü Abráümaã inaxuneta ga Tupana. ¹³ Natürü nūmagü ga Abráü rü Ichaá rü Acobu rü nayue, rü yemacèx tama nūxū nadaugü ga guxūma ga nataagü i ñuxma ngēxmagüxū, rü tama namaã inacuèxgü ga yema naãne ga noxri Abráümaã

nüxü yaxuxü ga Tupana. Natürü Tupanaãxü nayaxögüama, rü yemacèx nüxü nacuèxgü rü Tupana rü tá aixcüma na yanguxëëãxü ga yema norü uneta ga namaã nüxü yaxuxü. Rü nataãëgü yerü nüxü nacuèxgü na tãütáma guxügüma ñoma ga naãnewa na nayexmagüechaxü, rü yemacèx nüxü nixugüe na to i nachiuãnecüãxrüümare yixigüxü ga ñoma ga naãnewa. ¹⁴ Rü nümagü rü yema oremaã meãma tüxü nüxü nacuèxëe na tama ñoma ga naãneguxicatama naxĩnüëxü natürü ínanguxëëgüãxü i to i nachica i daxügüxü i naãnewa ngëxmaxü. ¹⁵ Rü nümagü rü yexguma chi nanaxwèxegüga ga naxcèx na nawoeguxü ga yema naãne ga noxri nawa ne naxixü, rü tãu chima nüxü naguxcha rü chi naxcèx nawoegu. ¹⁶ Natürü ga nümagü rü nüxü nangüchaügü i ngëma naãne i mexëchixü i daxüwa ngëxmaxü i Tupanaxütawa. Rü yemacèx nixi ga Tupana ga tama naxãnexü na nügü yaxuxü na norü Tupana yixü. Yerü nüma ga Tupana rü naxcèx nanamexëe ga wüxi ga ñãne ya daxügüxü i naãnewa ngëxmane. ¹⁷⁻¹⁸ Rü Tupana ga noxri rü Abráümaã nüxü nixu rü ñanagürü:

“Cune ya Ichaáwa tá cuxü nangëxma i muxüchixütama i cutaagü”, ñanagürü. Rü Abráü rü nayaxö na Tupana rü aixcümáxüchi tá na yanguxëëãxü ga yema namaã inaxunetaxü. Rü yemacèx ga yexguma Tupana nüxü üxgu rü Ichaácèx nüxna nacaxgu na naxcèx yamáãxücèx, rü nüma ga Abráü rü tama nanachuxu. Rü ínamemare na Tupanacèx yamáãxü ga guma nane ga nügümaã wüxicacü. ¹⁹ Yerü nüma ga Abráü rü nayaxö na Tupanaãxü natauxchaxü na wena namaxëëëãxü i yuexü. Rü yemacèx ga Abráü rü ínamemare na Tupanacèx nanexü yamáxü yerü nayaxö na Tupana rü wena tá namaxëëãxü. Rü aixcümáxüchi yemaãcü Abráücèx nanaxü ga Tupana, yerü woo ñoma marü nayuxürüü nixi ga nane, natürü ga Tupana rü maxücü nüxna nanamu. Rü yema rü wüxi ga tórü cuèxruü nixi na ñuxãcü aixcüma yaxöõxü ga Abráü. ²⁰ Rü guma Ichaá rü ta Tupanaãxü nayaxö. Rü yemacèx ga yexguma marü nayëxgu, rü nayumüxë rü Tupanana naca na nanegü ga Acobu rü Echaúxü nangüxëëxücèx. Rü yemaãcü nayumüxë yerü aixcüma nayaxö na Tupana tá yanguxëëxü ga yema nüxna naxcèx naçaxü. ²¹ Rü guma Acobu rü ta Tupanaãxü nayaxö. Rü yemacèx ga yexguma marü nayëxgu rü nayuxchaügu, rü norü caxüxümaã nügü inachixëe rü Tupanaxü nicuèxüü. Rü nayumüxë rü Tupanana naca na nataagü ga Yúche nanegüxü nangüxëëxücèx. Rü yemaãcü nayumüxë yerü aixcüma nayaxö na Tupana tá yanguxëëxü ga yema Abráümaã inaxunetaxü. ²² Rü guma Yúche rü ta Tupanaãxü nayaxö. Rü yemacèx ga yexguma nayuxchaügu, rü natanüxügümaã nüxü nixu rü ñanagürü:

“Tataagü rü yixcüra rü tá ínachoxü i nuã Equituanewa na nawa naxixücèx i ngëma naãne ga Tupana tórü oxí ga Abráümaã nüxü ixuxü. Rü ngëxguma ngëma naxixgu, rü chanaxwèxe ya chauxchinèxägü rü ta ngëma nanana na ngëxma yatëxgüãxücèx”,

ñanagürü. ²³ Rü yemawena rü mucüma ga taunecügü rü nimu ga yema duüxügü ga Equituanewa. Rü yema nachiuãneãrü ãëxgacü, rü tama nanaxwèxe na yexeraãcü yamuëtanüxü, rü yemacèx nanamu na tüxü nadëixücèx ga guxãma ga buxe ga iyatüxe ga yexwacèx ibuetanüxë. Natürü nanatü rü naë ga guma tórü oxí ga Moíché, rü aixcüma Tupanaãxü tayaxögü. Rü yemacèx ga yexguma noxri nabuxgu ga Moíché, rü tomaëxpüx ga tauemacügu itayacuxgü, yerü nüxü tadaugü na namexëchixü rü tama naxcèx tamuüë ga yema Equituaneãrü ãëxgacüarü ore ga woo na naxunagüãxü ga na buxe tüxü nadëixü. ²⁴⁻²⁵ Rü Moíché rü ta Tupanaãxü nayaxö. Rü yemacèx ga yexguma marü nayëxgu rü tama nanaxwèxe na nügü yaxuxü

na Equituaneärü äëxgacüxacü ngïne na yïxü, yerü naxcèx rü narümemaë na natanüxügü ga Yudíugümaã wüxigu ngúxü yangexü. Rü tama nanaxwèxe na tacü ga ñoma ga naãneärü chixexümaã nügü na nataãëxëxü, yerü nüxü nacuèx rü yema taãë rü paxaãchiruümare nixí. ²⁶ Rü yexgumarüü na daxüguxü ga naãnena na yaxüxü ga Cristu na ngúxü yangexüçèx, rü yexgumarüü ta nixí ga Moïché ga äëxgacüpatana na yaxüxü, yerü naxcèx rü narümemaë na natanüxügü ga Yudíugümaã wüxigu ngúxü yangexü. Natürü taxucèxma yema ngúxügu narüxñü, yerü nüxü nacuèx rü tá wüxi i ngunexügu Tupanaxütawa na nayauxãxü i norü natanü. ²⁷⁻²⁸ Rü yema na yaxõõxüçèx nixí ga Tupanaga naxñüxü ga Moïché. Rü yemacèx ga yexguma Tupana namuxgu ga na naxüãxü ga üpetüchiga, rü nayanguxëë ga yema Tupana namuxü. Rü nüma ga Moïché rü guxüma ga natanüxügü ga Yudíugüxü namu na wüxichigü ga Ìpatawa yamáãxüçèx ga wüxi ga carnerux-acü na yemagümaã namaxcuãxüçèx ga naãxpatagü. Rü ñanagürü nüxü:

“Ñoma i chütaxügu rü tá Tupana núma Equituanewa nanamu i wüxi i norü orearü ngerüü i daxüçüãx rü tá nanadai ya yima nüxira bucü ya Equituanecüãxgü nane i wüxichigü ya Ìpatawa. Natürü ngëxguma yima nagümaã penamaxcuxgu i perü Ìaxpata, rü täütáma pechiügu naxücu”, ñanagürü. Rü yemaãcü ga Moïché rü Tupanaga naxñü yerü nüxü nayaxõ. Rü yemacèx ga yema orearü ngerüü ga daxüçüãx rü taxuüma ga Yudíugünexü nimèx. Rü yema na yaxõõxüçèx nixí ga Ìnaxüxüxü ga Equituarü naãnena, rü tama naxcèx namuüxü na guma Equituaneärü äëxgacü tá namaã nanuxü. Rü taguma nüxü narüxo ga Tupanawe na naxüxü, yerü Tupana ya ëxügucüarü ngúchañ naxü. ²⁹ Rü yema duüxügü ga Moïchéwe rüxixü rü ta nayaxõgü. Rü yemacèx ga yexguma yema Taxtü ga Dauchiüxüwa nangugügu, rü yema dexá rü nügüna nixígachi, rü nipaaneãchi, rü yéma nichoñ. Natürü yexguma yema Equituanecüãx ga churaragü ga nawe ngëgüxü nawe ichoñgu, rü yexma nayiama, yerü wenaxärü nügüna naxí ga yema dexá. ³⁰ Rü yexguma guma Ìane ga Yericúwa nangugügu ga yema duüxügü, rü taxucürüwama nichocu, yerü guxüwama naxãxtapüx. Natürü Tupanaãxü nayaxõgü, rü yemacèx Tupanaga naxñüë rü 7 ga ngunexü nüxü Ìnichoeguãchitanücüü, yema Tupana namaã nüxü ixuxürüü. Natürü yexguma norü 7 ga ngunexüwa nanguxgu, rü nüëchama niwëxgütapüx, rü yemaãcü nichocu. ³¹ Natürü yema nge ga Yericúcüãx ga Raá, rü woo chixri imaxü ga noxrix, natürü yexguma yéma nangugügu ga yema taxre ga Yudíugü ga bexma ngugütaewa yéma Ìxü, rü ngíma iyixí ga nüxü nangüxëëxü. Rü yemacèx tama yema togü ga Yericúcüãx ga tama Tupanaga Ìnüëxürüü iyu, yerü Tupanaãxü iyaxõ. ³² ¿Rü ñuxma rü tacü i togü i duüxügüchigaxü tá pemaã chixuxü? Rü changechica na pemaã nüxü chixuxüçèx i nachiga ga yema nuxcümaügüxü ga äëxgacügü ga Yedeñ rü Bará rü Chañchóñ rü Yeté rü Dabí rü Chamue, rü guxüma ga nuxcümaügüxü ga Tupanaärü orearü uruügü. ³³ Rü yema na yaxõgüãxüçèx nixí ga Tupana nüxü rüngüxëëxü. Rü yemaãcü to ga nachiüãnegüarü äëxgacügüxü narüporamaëgü, rü meãma norü duüxügümaã inacuèxgü rü aixcüma nanayauxgü ga yema Tupana namaã ixunetaxü. Rü yemacèx ga yexguma woo aitanügu yatëxcuchigüãgu, rü taxuüma namaã naxü ga aigü yerü Tupana nüxna nadau. ³⁴ Rü yexguma norü uwanügü üxüxetüwa yawocuxgu, rü taxuüma nüxü naxüpetü rü tama nixae, yerü Tupanaãxü nayaxõgü rü nüma rü nüxna nadau. Rü yexguma togü taramaã nadaixchaügu, rü Tupana nüxü narüngüxëë na taxuüma nüxü üpetüxüçèx. Rü yexguma naturaegu rü norü uwanügü nadaixchaügu, rü Tupana nanaporaexëë. Rü yexguma to ga nachiüãneärü churaragümaã

nügü nadaixgu, rü yema togü ga churaragüxü narüyexeragü. ³⁵ Rü nayexma ga ngexüğü ga yuexacüxü, natürü yema naxácüğü rü wenaxärü inarüdagü yerü Tupanaaxü nayaxögü. Natürü nayexma ga togü ga poraäcü ngúxü ingegüxü yerü norü uwanüğü yemaäcü namaä nachopetü na Tupanaxü inatëxgüxcèx. Natürü ga nümagü rü tama Tupanaxü inatëxgü rü yemacèx nayue, yerü naxcèx rü narümemaë nixi na wena namaxëxü rü nayauxgüaxü i ngëma maxü i taguma gúxü. ³⁶ Rü nayexma ta ga ñuxre ga togü ga yaxögüxü ga duüxüğü nüxü cugüexü, rü yaçuaixgüxü, rü cadenamaä yanëixgüxü, rü poxcupataüğü nawocuxü. ³⁷ Rü ñuxre ga nümagü rü nutamaä inanamuxüchigü rü yemaäcü nanadai. Rü togü rü nayawäixyegü rü nayue. Rü ñuxre ga togü rü ngúxü nüxü ningexëëgü na Tupanaxü inatëxgüxcèx. Rü togü rü taramaä nanadai. Rü ñuxre ga nümagü rü nu ne nanaxïmare rü carneruchëxmüü rü chibuchëxmüümaämare nixäxchiru. Rü taxuüma nüxü nayexma, rü nanaxïxächiaëgü yerü norü uwanüğü rü chixri namaä nachopetü. ³⁸ Rü ñoma ga naänecüäx rü naxchi naxaie, natürü Tupana rü nüxü nangechaü. Rü ñoma ga naänewa rü norü uwanügüchaxwa nu ne nanaxïmare ga taxúema íxäpataxüwa. Rü ngürüanegu nipexütanümare yerü nangepatagü. ³⁹ Rü guxüma ga yema nuxcümaüğüxü ga duüxüğü woo norü ögagu Tupana namaä na taäëxü, natürü taxuüma ga yema duüxüğü rü nüxü nadau ga yema mexüğü ga Tupana namaä nüxü ixuxü. ⁴⁰ Rü yemaäcü namaä nangupetü ga yema duüxüğü, yerü ga Tupana rü tagu narüxïnü rü tama nanaxwëxe na nüxïra nüxïca yamexëëgüaxü, natürü nanaxwëxe na tamaä wüxigu yamexëëgüaxü. Rü ñuxma i yixema na yaxögüxü, rü yema nuxcümaüğüxü ga duüxügürüü Tupanaärü duüxüğü tixïgü, yerü Nane ya Ngechuchu rü guxäcèxma nayu. Rü wüxi i ngunexü rü tá taxcèx núma naxü na nügüxütawa tüxü nagagüxcèx na ngëma ingëxmagüechaxüxcèx.

12

Name nixi i Ngechuchucümagu taxï

¹ Rü ñuxma na nüxü icuáxü na ñuxäcü aixcüma Tupanaaxü yaxögüaxü ga guxüma ga yema nuxcümaüğüxü ga duüxüğü, rü ngëma rü wüxi i törü cuëxruü nixi na ñuxäcü Tupana naxwëxexü na naxcèx imaxëxü. Rü ngëmacèx i ñuxmax, rü ngïxä nüxü tarüxoe i guxüma i ngëma pecadu i tüxü itüexëëxü rü tüxü naguxchaxëëxü na meä yaxögüxü! ;Rü ngïxä paxa naxcèx tadaugü na meä Tupanacèx imaxëxü rü guxüguma aixcüma naxüxü i ngëma tüxü nanaxwëxexü! ² Rü name nixi i tanangugü na ñuxäcü namaxüxü ga Ngechuchu rü nagu taxï i nacüma. Yerü núma nixi ga nuxcüma nagu naxïnüxü na ñuxäcü törü ögagu tá tüxü namaxëëxü rü núma nixi i tüxü nangüxëëxü na aixcüma meä yaxögüechaxüxcèx na ngëmaäcü naxütawa ingugüxcèx. Rü núma rü tama nügü nachuxu na curuchawa ngúxü yangexü, rü tama nagu narüxïnü ga yema äne na yangexü, natürü nataäëxüchi yerü nüxü nacuèx na yemawena rü tá muxüma i duüxüğü nayauxgüxü i maxü i taguma gúxü. Rü ñuxma rü Tupanaärü tügünecüwawa narüto na ngëma guxäärü äëxgacü yïxüxcèx. ³ Rü name nixi i penangugü rü nagu perüxïnüë na ñuxäcü ga Ngechuchu rü yaxna namaä naxïnüxü ga yema ngúxü ga nüxü yangexëëgüxü ga yema duüxüğü ga pecaduäxgüxü. Rü núma ga Ngechuchu rü yemaäcü yema ngúxümaä yaxna naxïnü na pema rü tama nüxü perüçauxüxcèx rü tama nüxü perüxoexüxcèx na nüxü peyaxögüxü. ⁴ Rü ñuxma i pema na peyaxögüxü, rü ngúxü pingegü erü pecaduxü perüxoe. Natürü taxúema ga petanüwa rü yemacèx Cristurüü yuwa tangu. ⁵ Rü name nixi i nüxna

pecuèxâchie i norü ore ya Tupana i namaã pexũ yaxucuxëgũxũ i ñuxma na naxãcũgũ pixĩgũxũ. Erü ngëma norü ore i ümatũxũwa rü ñanagürü:

“Pa Chaunex, ¡tãxũ i nüxũ cuxoxũ i ngëxguma cuxũ icharüwëxãchixëëgu!
¡Rü tãxũ i cuyarümaxãchixũ i ngëxguma cuxũ chaxucuxëgu! ⁶ Erü nüma ya Cori ya Tupana rü tüxũ inayarüwëxãchixëë ya yixema tüxũ nangechaũxë. Rü tüxna nanaçuaixca ya yixema naxãcũxũ tüxũ nayaxúxe, na ngëmaãcü tüxũ nanguxëëxüçèx na ñuxãcü nanaxwëxexũ na naxcèx tamaxũxũ”,

ñanagürü. ⁷ Rü ngëmacèx i pemax, rü name nixĩ na yaxna namaã pexĩnüëxũ i ngëxguma Tupana pexna naçuaixcagu. Erü ngëxguma ngëmaãcü pemaã yixĩgu, rü pexũ nüxũ nacüxëë na aixcüma naxãcũgũ pixĩgũxũ. Erü guxũma i papá rü inayanawëxãchixëë i ngëma aixcüma naxãcũgũ ixĩgũxũ. ⁸ Natürü ngëxguma chí Tupana tama pexũ iyarüwëxãchixëëgu, naxãcũgũxũ iyanawëxãchixëëxürü, rü ngëmawa tá nüxũ pecuèx na tama aixcüma naxãcũgũ pixĩgũxũ, rü ngenatũxũ pixĩgũxũ. ⁹ Rü wüxichigü i yixema ga yexguma ibuegu, rü tanatügü rü tüxũ taxucuxëgü, rü yixema rü tümaga taxĩnüë rü tüxũ tangechaũgü. Rü ngëmacèx i ñuxma rü yexeraãcü tanaxwëxe na naga ixĩnüëxũ ya Tanatü ya daxügücü na ngëmaãcü nayaxuxüçèx i maxũ i taguma gúxũ. ¹⁰ Rü tanatügü rü wüxi i paxaãchicèxmare tüxũ taxucuxëgü na tümaga tanaxwëxegũxũãcüma imaxëxüçèx. Natürü ya Tupana rü aixcüma tórü mexüçèx nixĩ i tüxũ iyanawëxãchixëëxũ na naxrüü ixüünegüxüçèx. ¹¹ Rü aixcüma tama tataãëgü i ngëxguma Tupana tüxũ iyarüwëxãchixëëgu, erü tüxũ nangux. Natürü ngëmawena i ngëxguma naga ixĩnüëgu rü yanguxëëgu i ngëma tamaã nüxũ yaxuxũ, rü aixcüma tataãëgü.

Naxãcüma na tama Tupanaga ixĩnüëxũ

¹² Rü ngëmacèx i ñuxma na ngúxũ pingegũxũ rü pipaexũ na Tupanawe perüxĩxũ, rü name nixĩ i pegü peporaexëëãma na noxrürüütama meã peyaxögüxüçèx. ¹³ Rü name nixĩ i naxcèx pedaugü na Tupana pexũ naxwëxexũãcüma aixcüma meã pemaxëxũ, na yixema ñuxma tama meã yaxögüxe rü meã tayaxögüxüçèx. ¹⁴ ¡Rü naxcèx pedèux na guxũ i duüxügümaã pemecümaxũ! Rü ngëxgumarüü ta name nixĩ i naxcèx pedau na Tupanapëxewa naxüünexũ i perü maxũ. Erü yixema tama Tupanapëxewa üünexë rü tãütáma tórü Corixũ tadau. ¹⁵ ¡Rü pegüna pedaugü na taxúema nüxũ oxüçèx i ngëma ngüxëë i Tupana tüxũ nangechaũãcüma tüxna ãxũ! Erü tama tanaxwëxe na texé petanüwa Cristuchi aixũ rü ngëmaãcü togüxũ chixexümaã taxucuxëxũ na Cristuna tixügachixüçèx. ¹⁶ Rü tama name i texé i petanüwa rü naĩ i ngemaã na itapexũ. Rü tama name na texé tümäärü ngëmaxüçèx Tupanaxũ na oxũ. Rü yemaãcü nanaxü ga guma nuxcümaücü ga Acobueneë ga Echaú. Yerü yexguma natayagu rü wüxi ga õnacèx nüxũ naxo ga guxũma ga yema nüxna üxũ ga nanatü chí nüxna ãxũ. ¹⁷ Rü pema nüxũ pecuèx rü yemawena ga yexguma nayauxchaũãgu ga yema noxri nüxna üxũ, rü marü taxucürüwama nanayaxu, yerü marü naëneë ga rübumaëcüna tanaxã ga nanatü. Rü nüma ga Echaú rü woo poraãcü naxaxu, natürü marü taxucürüwama ñuxãcü nanayaxu. Rü ngëmawa nüxũ tacüx na ñuxãcü naxãcümaxũ na tórü ngëmaxüçèx Tupanaxũ ixoxũ. ¹⁸⁻²¹ Rü nuxcüma ga tórü oxigü ga Moíchéwe rüxĩxũ, rü nüxũ naxĩnüë ga Tupanaga ga yexguma nüxũ yangaicagüga ga guma mëxpüne ga Chinaĩgu ãegane. Rü nüxũ nadaugü ga na yayauraxũ ga guma mëxpüne rü poraãcü naxëänexũ rü poraãcü buanecü ixüxũ rü yabèxbëxanexũ rü yaduruanexũ. Rü poraãcü namuë ga yema duüxügü, yerü nüxũ naxĩnüë ga wüxi ga corneta ga tagane rü Tupana ga tagaãcü yéma ñacü:

“Ngëxguma chi wüxie i petanüwa daa mëxpúnewa ùxgu jrü noxtacüma nutamaã tüxü ípemuxüchiãcüma tüxü pimá! Rû woo wüxi i pexüna yixïgu jrü ngëxgumarüü ta ípenamuxüchiãcüma peyamá!”

ñanagürü. Rû yexguma yadeaxgu ga Tupana, rû poraãcü namuñë ga yema duüxügü. Rû norü muümaã Tupanaxü nacëexügü na íyachaxãchixüçex ga namaã na yadexaxü. Rû yema na poraãcü naxãücümamaxüchixü ga yema nüxü nadaugüxü, rû yemacèx nixï ga nümatama ga Moïché ga ñaxü:

“Chorü muümaã chidurux i ñuxmax”,

ñaxü. Rû yemaãcü nixï ga namaã nangupetüxü ga yema duüxügü ga Moïchémaã nayauxgüxü ga yema nüxïraüxü ga Tupanaärü mugü. Natürü i pemax, Pa Chaueneëgüx, rû tama yemaãcü pexü naxüpetü ga yexguma penayauxgügu ga Tupanaärü ore i ngexwacaxüxü i Cristuchiga ixïxü. ²² Rû ñuxma i pema rû taxucèxma pemuñë, yerü ga Cristu rû taxcèx nayu na Tupana ya guxüguma maxücüxütawa tüxü nagagüxüçex, na guxüguma norü ñane ya daxügune ya Yerucharéügu äeganewa ingëxmagüxüçex. Rû ngema tá tangutaquëxegü namaã i ngëma muxüchixüma i norü orearü ngeruügü i daxücüãx na wüxigu namaã Tupanaxü icuèxüügüxüçex. ²³ Rû ñuxma i pemax, rû marü natanüxügü pixïgü i guxüma i ngëma togü i duüxügü i Tupanaärü poperawa ngoxégagüxü. Rû marü naxcèx pexï ya Tupana ya yima guxãnatáma cacü. Rû marü natanüwaama pexügü i guxüma ga yema duüxügü ga mecümagüxü ga yuexü ga Tupana imexëëgüxü. ²⁴ Rû marü naxcèx pexï ya Ngechuchu ga taxcèx yucü na tüxü namaxëxëxüçex, ngëma Tupanaärü uneta i ngexwacaxüxü tamaã nüxü ixuxürüü. Rû nagümaã pexü iyanaxoxëë ga perü chixexügü na aixcüma Tupanapëxewa pimexüçex. Rû yexguma nüxcümaxücü ga Abëgü inabaxëë ga naeneë rû Tupana rû poxcu naxuegu. Natürü yexguma Cristugü ibaxgu rû Tupana rû duüxügümaã nanaxuegu i maxü i taguma gúxü. ²⁵ Rû ngëmacèx name nixï i pexuãëgü na tama nüxü pexoexüçex ya yima Tupana ya ñuxma tamaã idexacü. Rû dücax yema nuxcümaügüxü ga tórü oxigü ga Moïchéwe rüxïxü rû taxucürüwa Tupanachaxwa nibuxmü na tama napoxcueãxüçex ga yexguma Tupanaxü naxoegu rû tama naga naxïnüëgu ga yexguma Moïchéwa Tupana yaxucuxëgügu. Rû yema na taxucürüwa Tupanachaxwa yabuxmüxü ga nümagü, rû yexeraãcü tüxü naguxcha i yixema na naxchaxwa ibuxmüxü ega tama naga ixïnüëgu i ñuxma na Cristuwa tüxü yaxucuxëgüxü i nüma ya Tupana i daxügüxü i naãnewa ngëxmacü. ²⁶ Rû yexguma Moïchéwe naxïxgu ga tórü oxigü, rû Tupana rû nagamaã nayaduruxanexëë. Natürü i ñuxma rû ñanagürü:

“Wena táxarü chayaduruxanexëë. Natürü ngëxguma ngëmaãcü chanaxüxgu rû tãütáma ñoma i naãnexïca chiduruxëë, natürü üèxcü rû woramacurigü rû èhtagü rû tá ta chayaduruxgüxëë”,

ñanagürü. ²⁷ Rû yema na:

“Wena táxarü chayaduruxanexëë”, ñaxü, rû ngëmawa nüxü tacuèx rû guxüma ga yema naxüxü i tama guxügucèx ixïxü, rû Tupana tá inayanaxoxëë na ngëma guxügucèx ixïxüicatama na íyaxügüxüçex. ²⁸ Rû ngëma na tórü äëxgacü na yïxü ya Tupana, rû guxügucèx nixï, rû tagutáma inayarüxo na noxrü ixïgüxü. Rû ngëmacèx name nixï na Tupanana moxë ixägüxü, rû nüxü ingechaügüãcüma rû nüxü imuñëãcüma nüxü icuèxüügüxü, ngëma nüma nanaxwëxëxü. ²⁹ Erü tórü Tupana, rû ñoma wüxi ya üxürüü aixcüma inayanaxoxëë i guxüma i tórü chixexü.

Ñuxãcü Tupanaxü tataãxêẽ

¹ Rû ñuxma rû tama name na nüxü perüçhauexü na wüxichigü pegü pengechaügüxü ñoma peeneëxü pengechaüxürüü. ² Tama name na nüxü ipeyarüngümaëxü na meãma penayaxuxü i ngẽma duüxügü i pepatawa ngugüxü. Erü nüxü tacuèx rû nümaxü ga yemaãcü naxügüxü rû ñuxguacü rû tama nüxü nacuáãcüma bexma Tupanaãrü orearü ngeruügü i daxüçüãxü meã nayauxgü. ³ Rû name nixĩ i nüxna pecuèxãchie i ngẽma duüxügü i poxcuexü, ñoma pema rû ta naxrüü pepoxcuexürüü. Rû ngëxgumarüü ta name nixĩ nüxna pecuèxãchie i ngẽma duüxügü i togü ngúxü nüxü ingexëëgüxü, erü ngürüãchi tá ta ngẽmaãcü pexü nangupetü. ⁴ Rû ngẽma yatügü i ãmaxü rû name nixĩ i meã naxmèxmaã namaxê rû tüxü nangechaügü. Rû ngëxgumarüü ta i ngexügü, rû name nixĩ i meã natemaã namaxê rû nüxü nangechaügü. Erü Tupana rû aixcüma tá nüxna naca rû tá nanapoxcue i ngẽma duüxügü i naĩ i ngemaã rû êxna naĩ ya yatümaã ipexü. Rû ngëxgumarüü tá ta tüxü napoxcue ya guxãma ya yixema ngemèxãcüma rû ngeteãcüma tügümaã maxëmarexe. ⁵ Rû tama name na dïeruguama perüxĩnüëxü. Rû name nixĩ i namaã petaãëgü i ngẽma marü pexü ngëxmaxü. Yerü Tupana rû ñanagürü:

“Tagutáma cuxna chixü, rû tagutáma cuxü íchatèx”,

ñanagürü. ⁶ Rû ñuxma na nüxü icuáxü na ngẽmaãcü tamaã inaxãüxü, rû ngëmacèx tama taxãne na ñagüxü:

“Nüma ya Cori nixĩ ya choxü rüngüxëëcü. Rû ngëmacèx taxucèxma chamuü.

Erü taxucürüwama texé tacü rû chixexü chomaã taxü”,

ñagüxü. ⁷ Rû name nixĩ i nüxna pecuèxãchie ga yema perü dauruügü ga noxri pemaã icuáxü rû pemaã nüxü ixugüxü ga Tupanaãrü ore. Rû name nixĩ i nagu perüxĩnüë ga na ñuxãcü meã namaxëxü pepëxewa rû ñuxãcü meã yaxögüãcüma nayuexü. Rû name nixĩ ga nüma yaxögüãxürüü meã peyaxögü i pemax. ⁸ Rû nüma ya Ngechuchu ya Cristu rû guxüguma nayanguxëë i ngẽma tamaã nüxü yaxuxü. Rû nuxcüma rû nayanguxëë ga norü ore, rû ñuxma rû ta nayanguxëë. Rû guxügutáma ngẽmaãcü nixĩ.

Rû ngëmacèx tanaxwèxe na aixcüma nüxü yaxögüxü. ⁹ Rû tama name i peyaxögü i ngẽma nguxëëtaegü i tama toma pexü namaã tangüexëëxü i tama Tupanaãrü ixügüxü. Rû nuxcüma rû nagu taxĩ ga yema mugü ga Moïché ümatüxü ga tüxna nachuxuxü na tacü ixüxü rû tacü ingõxü. Natürü yema mugü rû taguma tüxü naporaexëë ga na Tupanacèx imaxëxü. Rû ngëmacèx tanaxwèxe na Tupana ya tüxü ngechaücüwa nayaxuxü i tórü pora na aixcüma naxcèx imaxëxüçèx. ¹⁰ Rû ngẽma duüxügü i Moïchéarü mugügu íxü, rû Tupanacèx naxüna nadai na tama napoxcueãxüçèx naxcèx i norü pecadu. Natürü tama nüxü nayaxögü ya Cristu ga tórü pecaducèx yucü. Rû ngëmacèx taxucürüwama taxrüü nanayauxgü i ngẽma ngüxëë i Cristu nüxna uaxüxü.

¹¹ Rû ngẽma duüxügüarü paigüarü ãëxgacü, rû tupaucawa nanange ya nagü i naxümagü na Tupanana naxããxüçèx na tama Tupana napoxcuexüçèx i ngẽma duüxügü. Natürü naxünegü i ngẽma naxümagü, rû ñãneãrü ñxpemawa nayanagugü. ¹² Rû yexgumarüü ta ga Ngechuchu rû ñãneãrü ñxpemawa ngúxü ninge rû nayu na nagümaãtama Tupanacèx yaxüünegüxëëãxüçèx i duüxügü. ¹³ Rû ngëmacèx i yixema, rû name nixĩ i nüxna tixígachi i ngẽma mugü ga Moïché ümatüxü, rû name nixĩ i Ngechuchucèx taxĩ. Rû woo duüxügü tüxü cugüegu, yema Ngechuchuxü na nacugüexürüü, rû name nixĩ i naxrüü yaxna namaã taxĩnüë. ¹⁴ Erü yixema na yaxögüxü, rû tãütáma ñoma i naãne i paxa tá gúxüwa tangëxmagüecha. Erü daxügüxü i naãnewa tüxü nangëxma i tachica. Rû ngema tá nixĩ i ingugüxü na guxügutáma Tupanamaã ingëxmagüechaxüçèx. ¹⁵ Rû ngëmacèx tanaxwèxe i Ngechuchu ya

Cristuégagu guxüguma Tupanaxü ticuèxüügü. Rü ngēma na taèxmaã nüxü icuèxüügüxü, rü ngēma nixĩ i ãmare i mexü i nüxna ixãxü. ¹⁶ ;Rü tãxü i nüxü ipeyarüngümaëxü na togüxü perüngüxëëxü rü namaã pengauxü i perü ngēmaxügü! Erü ngēma nixĩ i ãmare i Tupanana pexãxü i aixcüma namaã nataãëxü. ¹⁷ ;Rü naga pexĩnüë i ngēma perü dauruügü i pemaã icuèxgüxü, rü penaxüx i ngēma pemaã nüxü yaxuxü! Erü nümagü rü Tupanapëxewa pexna nadaugü na meã pemaxëxüçèx erü nüxü nacuèxgü na Tupana tá nüxna çaxü i nachiga na ñuxãcü pexna nadaugüxü. Rü name nixĩ i meã namaã pemaxë i ngēma perü dauruügü na wüxi i taãë na yĩxüçèx i ngēma norü puracü rü tama wüxi i norü guxchaxü na yĩxüçèx. Erü ngëxguma chi wüxi i norü guxchaxü yixĩgu i ngēma norü puracü na pexna nadauxü, rü pema rü chi taxuüma i mexü nawa peyaxu i ngēma norü puracü. ¹⁸ Rü name i toxçèx peyumüxëgü. Erü toðëwa nüxü tacuèx na aixcüma meã tayanguxëëxü i ngēma puracü i Tupana toxna ãxü rü tanaxwèxe na guxüguma ngēmaãcü tanaxüxü. ¹⁹ Rü ngēma guxüärü yexera pexna naxçèx chaçaxü nixĩ na peyumüxëgüxü na Tupana paxa pexçèx choxü taeguxëëxüçèx.

Yema duüxügüxü narümoxë rü naxçèx ínaca na Tupana nüxü rüngüxëëxü

²⁰⁻²¹ Rü ñuxma chanaxwèxe i poraãcü pexü narüngüxëë ya Tupana ya tórü taãëxëëruü rü tórü ngüxmüëxëëruü ixĩcü. Rü nüma nixĩ ga yuwa ínadaxëëãxü ga tórü Cori ya Ngechuchu ya Cristu ya guxüma i yaxögüxüärü dauruü ya guxãärü yexera ixĩcü. Rü ñuxma na curuchagu taxçèx nabaãxü ga guma nagü ga tüxü nüxü cuèxëëcü na ñuxãcü guxüguma tüxü nangechaüxü ya Tupana, rü chanaxwèxe na nüma ya Tupana pexü yamexëëgüxü rü pexü nangüxëëxü na aixcüma guxüma i perü maxüwa pimexüçèx. Rü ngëxgumarüü ta chanaxwèxe na Ngechuchu ya Cristuwa tüxü nangüxëëxüçèx ya Tupana na nüma nanaxwèxexüãcüma ixĩgüxüçèx. Rü ñuxma tanaxwèxe i guxüguma yima Cristuxü ticuèxüügü. Rü ngēmaãcü yĩ. ²² Pa Chaueneëgüx, pexü chacèxü na yaxna namaã pexĩnüëxü i ñaã noxretama i ore i pexü namaã chataãëxëëxü rü pexü namaã chaxucuxëxü. ²³ Rü chanaxwèxe na nüxü pecuáxü rü taeneë ya Timutéu rü marü ínanguxuchi ga na napoxcuxü. Rü ngëxguma paxa nuã chauxütawa nanguxgu, rü tá ngēma petanüwa chanaga i ngëxguma pexü íchayadèuxgu. ²⁴ ;Rü nüxü perümoxëgü i guxüma i ngēma perü dauruügü i pemaã icuáxü! ;Rü ngëxgumarüü ta nüxü perümoxëgü i guxüma i togü i taeneëgü i yaxögüxü! Rü taeneëgü i Itáriaanewa ngëxmagüxü rü ta pexü narümoxëgü. ²⁵ ;Rü Tupana poraãcü pexü rüngüxëëx i guxãma i pemax! Rü ngēmaãcü yĩ.

Rü nuãma pexna.

TUPANAARŬ ORE GA CHAŬTIÁGU ÜMATŬXŬ

Chaŭtiágu nüxŭ narümoxë ga natanüxŭgü ga Yudügu ga yaxögüxŭ

¹ Pa Chautanüxŭgü i Yudügu i Ngechuchuaxŭ Yaxögüxŭ i Guxŭ i Naãnewa Ngëxmagüxŭ, choma i Chaŭtiágu pexŭ charümoxë. Rü choma nixŭ i Tanatü ya Tupana rü törü Cori ya Ngechuchu ya Cristuaxŭ chapuracüxŭ.

Ngëma cuèx i aixcüma Tupanawa ne üxŭchiga

² Pa Chaueneëgü i Yaxögüxŭ, name nixŭ na petaãëgüxŭ i ngëxguma nagüxüraüxŭ i guxchaxŭgü pexcèx ínguxgu. ³ Erü pema nüxŭ pecuèx rü ngëxguma meã peyaxögüamagu ega woo tacü rü guxchaxŭ pexŭ üpetügu rü wüxi i mexŭ nixŭ i ngëma. Erü ngëmaãcü nixŭ ya Tupana i pexŭ naporaexëëxŭ na yexeraãcü meã nüxŭ peyaxögüxŭcèx. ⁴ Rü name nixŭ na peporaexŭ na aixcüma Tupanapëxewa pimexüçèx, rü naxcèxicatama pemaxëxüçèx, rü taxuwama nachixexüçèx i perü maxŭ. ⁵ Ngëxguma chi wüxie i petanüwa tama meã nüxŭ cuèxgu na tacü tüxŭ nanaxwèxexŭ ya Tupana, rü name nixŭ i nüxna naxcèx taca i cuèx, rü nüma tá guxŭma i norü ngúchaŭmaã tüxna nanaxã. Erü Tupana meãma guxŭ i duüxŭgüna nanaxã i cuèx, rü tama nayanuxŭ, rü taxüexŭma nanga. ⁶ Natürü ngëxguma naxcèx ítacaxgu rü tanaxwèxe na aixcüma tayaxöxŭ rü tá na tanayaxuxŭ i ngëma naxcèx ítaçaxŭ. Rü tama name na nagu tarüxŭnüxŭ rü täütama tanayaxuxŭ. Erü yíxema tama meã yaxöxë, rü ñoma taxtüarü yuape i buanecümaã guxŭwama cuexürü tixŭ i tümaärü maxüwa. ⁷⁻⁸ Rü yíxema duüxë ya ñuxma meã yaxöxë rü moxŭ rü tama meã yaxöxë, rü taxucürüwama nagu tarüxŭnü na tacü Tupanaxütawa tayaxuxŭ. Erü yíxema duüxë ya ngëmaãcü yaxöxë, rü tümaärü maxüwa rü tama aixcüma wüxigutama tarüxŭnü. ⁹ Rü yíxema yaxöxë ya tama muärü dïëruãxë, rü name nixŭ i tataãë erü Tupanaxãcü tixŭ rü tümamaã nataãë. ¹⁰ Rü yíxema yaxöxë ya muärü dïëruãxë rü name nixŭ i tataãëãma ega woo wüxi i ngunexŭ tüxŭ natauxgu i tümaärü dïëru. Erü ngëma dïëruãxŭ i duüxŭgü, rü ñoma putürachacurü tama natai. ¹¹ Rü ngëxguma nangunagügu ya üexcü rü poraãcü nanguxetügu, rü narüñexë i ngëma putüra rü narüngu i nachacu, rü ngëxma nagux na namexŭ. Rü ngëxgumarüü tá ta nayu i ngëma dïëruãxŭchixŭ rü ngëxma tá nayarüxo i norü guxŭma.

Tupana tüxŭ naxü, natürü tama chixexŭgu tüxŭ nanguxëëxüçèx

¹² Rü nataãë ya yima yatü ya meãma yaxöomacü i ngëxguma Tupana nüxŭ üxgu. Erü ngëxguma ngëmaãcü yaxna namaã naxŭnüãmagu, rü Tupana tá namaã nataãë rü tá nüxna nanaxã i norü ãmare i mexŭ i taguma güxŭ. Rü ngëma nixŭ i ãmare i Tupana tümamaã ixunetaxŭ ya yíxema nüxŭ ngechaügüxe. ¹³ Natürü ngëxguma texe ñnü i chixexŭ tümacèx ínguxgu na chixexŭ taxüxüçèx rü tama name i nagu narüxŭnü na Tupana tümaãëwa ínanguxëëxŭ i ngema ñnü i chixexŭ. Erü ya Tupana rü taguma naãëwa nangu na chixexŭ naxüxŭ, rü ngëxgumarüxŭ ta taguma chixexŭ i ñnü texeãëwa nanguxëë na chixexŭ taxüxüçèx. ¹⁴ Natürü ngëma chixexŭ i tümataama nagu tarüxŭnüxŭ nixŭ i chixexŭgu tüxŭ nguxëëxŭ. ¹⁵ Rü ngëma chixexŭ i tümataama nagu tarüxŭnüxŭ nixŭ i tüxŭ pecaduãxëëxŭ. Rü ngëma pecadugagu tá nixŭ i düxwa itayarütaxuxŭ. ¹⁶ Pa Chaueneëgü ya Pexŭ Changechaügüxex, tama name i pegütama pewomüxëëgü. ¹⁷ Erü guxŭma i ngëma aixcüma mexŭ i tüxŭ ngëxmaxŭ, rü naxütawa ne naxü ya Tupana ya daxügücü ga naxücü ga üexcü rü tauemacü rü woramacurigü rü ëtagü. Rü nüma rü guxŭguma nanaxëixrügumaraxŭ rü

taguma naxüchicüü. ¹⁸ Rū nūma nixī ga tūxna naxāāxū ga norü ore i aixcüma ixīxū na ngēmaācü tūxū nangēxmaxüçèx i maxū i taguma gúxū. Rū yemaācü nanaxü yerü nanaxwèxe na yixira nūxū na yaxōgūxū, rü yixcama i togü.

Ñuxācü aixcüma Tupanaāxū tayaxō

¹⁹ Pa Chaueneēgü ya Pexū Changechaūgūxex, rü ngēxguma texé pemaā nūxū ixuxgu i Tupanaārü ore, rü name nixī i meā iperüxīnūē. Rū tama name i tūxū pechoxūgagü. ²⁰ Erü ngēxguma nanuxgu i wūxi i duūxū, rü tama Tupanaārü ngūchaū naxü. ²¹ Rū ngēmacèx name nixī i nūxū perüxoe i guxūma i ngēma chixexūgü i guxūwama ngēxmagūxū. ¿Rū meā penayaxu i ngēma ore i Tupana pexna āxū! Erü ngēmawa pexū nangēxma i maxū i taguma gúxū. ²² Rū tama name i iperüxīnūēmare i ngēma ore, natürü name nixī i penaxü i ngēma pemaā nūxū yaxuxū. Erü ngēxguma iperüxīnūēmaregu rü tama penaxūxgu, rü pegütama pewomüxēgūmare. ²³ Erü yixema irüxīnūmarexe i Tupanaārü ore natürü tama naxūxe i ngēma nūxū yaxuxū, rü wūxi i yatü i daucüwa nügü dauchametüxürü tixī. ²⁴ Erü nügü nadauchametü, natürü ngēxguma yaxūgachigu rü marü nūxū inayarüngüma na nañuxchametüraūxū i noxrix. ²⁵ Natürü yixema guxūguma meā nūxū daumatüxe rü naga īnūxē i ngēma ore i aixcüma ixīxū i pecaduwa tūxū īnguxuchixēēxū, rü Tupana rü tá aixcüma guxūwama tūxū narüngūxēē. Erü tama ngēma orexū taxīnūmare, natürü tanaxü i ngēma tūmamaā nūxū yaxuxū. ²⁶ Rū ngēxguma chi wūxie nagu rüxīnūgu na meāma Tupanaxū tacuáxū natürü tama nūxna tadèuxgu ya tūmaārü conü i tūmaārü orewa, rü tūgütama tawomüxēē, rü tama aixcüma Tupanaāxū tayaxō. ²⁷ Natürü ngēma nacüma i Tanatü ya Tupanapēxewa aixcüma ünexū, rü ngēma nixī na nūxū tarüngūxēēxū i tacutagü rü yutegūxū rü tūgüna tadauxū na tama ñoma i naāneārü chixexūgu taxücuxū.

2

Name nixī i guxū i duūxūgūxū tangechaū

¹ Pa Chaueneēgüx, pema rü nūxū peyaxōgü ya tórü Cori ya Ngechuchu ya Cristu ya mexēchicü. Rū ngēmacèx tama name na chixriācü penayaxuxū i ñuxre i duūxūgü rü meā penayaxuxū i togü. ² Rū ngēxguma chi perü ngutaquēxegu naxücuxgu i wūxi i yatü i uirumaā aneraāxū rü mexchiruxū, rü ngēxgumarü chi ta ngēxma naxücuxgu i wūxi i yatü i ngearü dīeruāxū rü wexachiruxū, rü name nixī i guxūxūma wūxigu meā peyaxu. ³ Natürü tama name ega meā penayauxgu i ngēma mexchiruxū rü:

“¡Nuā mexū i naxmèxwēxewa rüto!” ñapegūxū nūxū, natürü ngēma wexachiruxūxū rü:

“¡Cuma rü ngēxmatama nachi, rü ēxna yea ñatüanewa rüto!” ñapegūxū nūxū. ⁴ Rū ngēxguma tama wūxigu meā penayauxgu i ngēma taxre, rü pewatama nangox na tama aixcüma guxāxū pengechaūgūxū rü chixexū i duūxūgü pixīgūxū ega ngēmaācü chixri penayauxgu i duūxūgü. ⁵ Pa Chaueneēgü ya Pexū Changechaūgūxex, ¡iperüxīnūē i ñāā ore! Tupana tūxū nade ya yixema ngearü dīeruāxgūxe i ñoma i naānewa na meā nūxū tayaxōgūxüçèx. Erü nanaxwèxe i tanayauxgü i ngēma maxū i taguma gúxū i tūmamaā inaxunetaxū ya yixema nūxū ngechaūgūxe. ⁶ Natürü pema rü chixri penayaxu i ngēma duūxūgü i ngearü dīeruāxgūxū rü meā penayaxu i ngēma duūxūgü i dīeruāxgūxū. ¿Taux ēxna ngēma dīeruāxgūxū yīxū i ngēma chixri pemaā maxēxū rü āēxgacügūxütawa pexū íyaxuaxūgūxū? ⁷ Rū ngēma dīeruāxgūxū nixī i chixexū namaā ixugüexū ya Cristu ya perü Cori

ya mexêchicü. ⁸ Tupanaârü orewa nangêxma i norü mu i guxü i mugüarü yexeraxü i ñaxü:

“¡Nüxü nangechaü i cumücü ngêma na cugütama cungechaüxürü!”

ñaxü. Rü ngêxguma aixcüma naga pexînüêgu i ngêma mu, rü mexü nixî i pexüxü. ⁹ Natürü ngêxguma meã penayauxgu i wüxi i yatü i mexchiruxü rü chixri penayauxgu i ngêma wexachiruxü, rü pecadu pexü. Rü Tupanapêxewa pechixexügu erü tama naga pexînüê i ngêma pexü namuxü.

¹⁰ Erü ngêxguma chi texé naga ñnügu i guxüma i Tupanaârü mugü natürü chi wüxiwatama ítatüxgu na tama naga taxînüxü, rü chi ñoma guxüma i Tupanaârü mugüga tama taxînüxürü tachixexügu. ¹¹ Erü nümatama ya Tupana ga ñacü:

“¡Tãütáma naí i nge i âtecümaã cungeãê!” ñacü,

rü ñanagürü ta:

“¡Tãütáma cumáêta!”

ñanagürü. Rü ngêxguma chi tama naí i nge i âtecümaã cungeãêxgu, natürü cumáêtagu, rü tama aixcüma meã naga cuxînü i ngêma Tupana tüxü muxü.

¹² Rü ngêmacèx name nixî na meã pidexagüxü rü meã pemaxêxü. Erü Tupana tá pexna naca i perü maxüchiga ngoxi Cristu pexü muxüãcüma pemaxê rü êxna tama. Rü ngêma Cristu tüxü muxü nixî na yigü ingechaügüxü. ¹³ Erü

guxãma ya yíxema tama tümamücügü tüxü ngechaütümüügüxe, rü Tupana rü tãütáma nüxü tangechaütümüügüãcüma tüxna naca i tümãârü maxüchiga. Natürü yíxema tümamücügü tüxü ngechaütümüügüxe, rü tãütáma tamuê i ngêxguma Tupana tüxna caxgu, erü nüxü tangechaütümüügüãcüma tá tüxna naca.

Ega aixcüma yaxõgügu, rü tanaxwèxe i mexü taxügü rü nüxü tarüngüxêê i togü

¹⁴ Pa Chaueneêgüx, ¿Tacüwa namexü ega wüxie:

“Choma rü Tupanaãxü chayaxõ”, ñagügu, natürü tama mexü taxüxgu? ¿Pexcèx rü Tupana tá tüxü maxêêxü ega ngêmaãcü tayaxõxgux? ¹⁵⁻¹⁶ Rü ngêxguma chi wüxi i taeneê rü êxna taeyèx i yaxõxü rü nangexchirugu rü nangewemügu, rü chi wüxie i pema rü ñapegügu:

“¡Mexü cuxü üpetü, rü icuxcuchi na tama cuxü nadeyuxücèx, rü meã nachibü!” ñapegügu, rü ¿tacüwa name i ngêma ega tama nüxna penaxãxgu i ngêma nüxü taxuxü? ¹⁷ Rü ngêxguma yaxõmaregu natürü tama mexü ixüxgu, rü tama togüxü rüngüxêêgu, rü ¿tacüwa namexü i ngêmaãcü na yaxõxü? ¹⁸ Erü ngêxguma cuyaxõmaregu natürü tama mexü cuxüxgu, rü ngürüãchi tá wüxie ñatarügü cuxü:

“Cuma rü cuyaxõmare natürü taxuxüma i mexü cuxü Natürü choma rü chayxõ rü naétü mexü chaxü. ¿Rü ñuxãcü tá nüxü chacuáxü na cuyaxõxü ega tama mexü cuxüxgu? Natürü choma rü chorü ü i mexümaã tá cuxü chanawê na aixcüma chayaxõxü”, ñatarügü tá cuxü. ¹⁹ Cuma cuyaxõ na nangêxmaxü ya wüxitama ya Tupana. Marü name. Natürü ngoxogü rü ta ngêmaãcü nayaxõgü, rü porãcü niduxruxe erü Tupanaxü namuê. ²⁰ Pa Yatü ya tama Meã Nagu Ruxînücx, cuma rü tama nüxü cucuèx i ngêxguma cuyaxõmaregu rü tama mexü cuxüxgu, rü taxuwama name i ngêmaãcü na cuyaxõxü. ²¹ Tupana nüxü ixuxgu rü nuxcümaãcü ga tórü oxî ga Abráü rü wüxi ga yatü ga mecü nixî. Yerü mexü naxü rü Tupanaga naxînü ga yexguma namaã nüxü yaxuxgu na naxcèx yamáãxücèx ga nane ga Ichaá. ²² Rü ngêmawa nüxü tacuèx rü tama nayaxõmare ga Abráü, natürü mexü naxü ta. Rü yema naxüxüwa tüxü nüxü nacuèxêê na aixcüma Tupanaãxü yaxõxü. ²³ Rü yemaãcü ningu ga yema ore ga ümatüxü ga ñaxü:

“Abraú rü Tupanaãxü nayaxõ rü yemacèx Tupana nüxü nixu na mecü yïxü yerü nüxü nayaxõ. Rü nüxü nixu ta na namücü yïxü ga Abraú”.

²⁴ Rü ngēmawa nüxü tatau na Tupana namaã taãxü ya yima yatü ya mexü ücü rü tama yaxõmarecü. ²⁵ Rü yemaãcü ta ngĩmaã nangupetü ga nuxcüma ga Raá. Rü Tupana ngĩmaã nataãe yerü mexü ixü ga yexguma meã nayauxãgu ga ngĩpatawa ga yema orearü ngeruügü ga Yudíugü. Rü ngĩgagu namaxë ga yema orearü ngeruügü yerü to ga namagu iyamugü ga yexguma norü uwanügü nadaixchaügu. Rü woo ga ngĩma rü chixri na namaxüxü ga noxrix, natürü mexü ixü yerü iyaxõ, rü yemacèx Tupana ngĩmaã nataãe. ²⁶ Rü wüxi i naxüne rü taxuwama name rü nayumare ega natauxguma i naãe. Rü ngëxgumarüü ta nixi na taxuwama namexü na yaxõmarexü ega taxuüma i mexü ixüxgux.

3

Tórü conüchiga

¹ Pa Chaueneëgüx, tama name i muxëma i pema rü nguxëëtaexügü pegü pixíngüxëëchaü. Erü pema nüxü pecuèx na yixema i nguxëëtaexügü na ixíngüxü, rü guxü i duüxügüarü yexera tá tüxna naca ya Tupana tórü maxüchiga rü tórü puracüchiga. ² Guxãma i yixema rü muëxpüxcüna chixexü taxüe. Yima yatü ya taguma chixexüxü ixücü rü aixcüma mecü nixi, erü nüxü nacuèx na ñuxãcü guxüwama nügüna nadauxü na tama chixexü naxüxücèx. ³ Rü ngëma na taga naxíñuxücèx i wüxi i cowaru, rü tanaxwèxe na naxütüxünáguxü na ngëmaãcü yixema inaxwèxexüãcüma meã iyaxüxücèx. ⁴ ¡Dücèx nagu perüxíñüe ya wapurugü ya buanecüarü poramaã ixüxüne! Rü woo nitaxüchi rü buanecü ya taxüchicümaã inicuegü, natürü íracü ya quiyamaã nana-toxchinü i norü toxpëxeruü, rü ngextá nüma ínanaxwèxexüwa nanaxüxëe. ⁵⁻⁶ Rü ngëxgumarüü ta nixi ya tórü conü rü woo na naxírachiréxü, natürü namuxüchi i norü ore. Rü wüxitama i üxüarü yauraxü i íraxüwa inaxügü na yaxaxü i taxüma i naãne. Rü tórü conü rü ñoma wüxi ya üxürüü nixi. Rü taxünewa rü wüxi i taxü i chixexü nixi ya yima tórü conü erü nanachixexëe i guxüma i tórü maxü. Rü ngëma Tupana ngoxogüxü ípoxcuexügune ya üxüemawa ne naxü i ngëma chixexü i namaã yadexaxü ya tórü conü. Rü ngëma chixexümaã nanachixexëe i guxüma i tórü maxü. ⁷ Duüxügü rü nüxü nacuèx na íyapuxëëãxü rü nüxna nachogüxü i nagúxüraüxü i naëxügü i idüraexü, rü werigü, rü äxtapegü, rü choxnigü. ⁸ Natürü taxüema nüxü tacuèx na nüxna tachogüxü ya túmaãrü conü. Erü wüxi i chixexü i taxü i taxucürüwama texé iyarüxoxëëxü nixi. Rü ngëma norü dexa rü üürüü tüxü nayuxëe. ⁹ Rü yima tórü conümaã nüxü ticuèxüü ya Tanatü ya Tupana, rü yimamaãtama chixexü namaã tixugüe ta i duüxügü i Tupana nügüãcü üxü. ¹⁰ Rü ngëma taëxmaã, rü meã duüxügüchiga tidexagü, natürü ngëmatama taëxmaã rü namaã taguxchigagü ta. Pa Chaueneëgüx, tama name na ngëmaãcü yïxü. ¹¹ Wüxi i dexáarü chuxchuxüwatama rü taxuacüma ínaxüxü i dexá i mexü rü dexá i chixexü. ¹² Pa Chaueneëgüx, wüxi i iguera rü taxuacüma oríbuarü omaã naxo, rü wüxi i uba rü taxuacüma igueraarü omaã naxo. Rü ngëxgumarüü ta wüxi i dexáarü chuxchuxü i yucürachiüxüwa, rü taxuacüma ínaxüxü i dexá i mexü.

Ngëma cuèx i aixcüma ixíxü

¹³ Ngëxguma chi petanüwa nangëxmagu i wüxi i duüxü i nüxü cuáxü rü meã naãëxü cuáxü, rü name nixi na meã namaxüxü rü mexü na naxüxü rü tama nügü yacuèxüxü na ngëmaãcü pexü nüxü nadauxëëxücèx na aixcüma wüxi i duüxü i nüxü cuáxü yïxü. ¹⁴ Natürü ngëxguma chi pixãüxãchiwèxegügu rü togüchi pexaiegu rü norü yexera pegü pixíxëëchaügu, rü taxuacüma pegügu perüxíñüe na mexügü rü nüxü cuèxgüxü pixíngüxü. Rü wüxi i dora i taxü

nixĩ i ngẽma ega ngẽmaãcũ pixĩgũgũ. ¹⁵ Erũ ngẽma na ixãũxãchiwèxegũxũ rũ duũxũgũchi na ixaiexũ rũ norũ yexera yigũ na ixĩgũxẽẽchaũxũ, rũ tama Tupanawa ne naxũ, natürũ ñoma i naãnecũãxwa rũ ngoxo i Chatanáwa nixĩ i ne naxũxũ. ¹⁶ Erũ ngextá ãũxãchi ítaxũwa rũ duũxũgũ nũgũ írüyexeraxẽẽchaũxũwa, rũ ngema rũ taxuũma meã inixũ rũ nagũxũraũxũ i chixexũ nangẽxma. ¹⁷ Natürũ guxãma ya yixema aixcũma tũxũ nangẽxmaxẽ i ngẽma cuèx i Tupanawa ne ùxũ, rũ aixcũma meã tamaxẽ rũ guxãmaã tamecũmagũ, rũ meã duũxẽxũ tayauxgũ i tümapatawa, rũ meã itarũxĩnũe i tümamũcũarũ ucuxẽ, rũ guxũ i duũxũgũ tũxũ nangechaũtũmũũgũ, rũ guxãmaãma tũgũ tawũxigũxẽẽgũ, rũ tixaixcũmagũ, rũ mexũ taxũgũ. ¹⁸ Rũ yixema naxcèx daugũxe na duũxũgũ nũgũmaã irũngũxmũẽxũ, rũ wũxi i mexũ taxũgũ. Erũ ngẽmawa tá nũxũ tadaugũ na aixcũma meã Tupanacèx namaxẽxũ i ngẽma duũxũgũ.

4

Duũxũgũ i ñoma i naãneãrũ ngũchaũcèx daugũxũchiga

¹ ¿Tũxcũtũ pegũmaã penuẽ rũ pegũ pedai? Pegũmaã penuẽ erũ pexũ nangẽxma i ngẽma perũ ngũchaũgũ i chixexũgũ. ² Pema pexũ nangũchaũ i ngẽma pexũ taxuxũ natürũ taxuacũma pexũ nanguxũ, rũ ngẽmacèx peyamèx i togũ. Rũ norũ ngẽmaxũcèx pixãũxãchie natürũ taxuacũma pexũ nanguxũega, rũ ngẽmacèx pegũmaã penuẽ, rũ pegũ pedai. Rũ tama penayauxgũ i ngẽma penaxwèxexũ erũ tama Tupanana naxcèx peca. ³ Rũ ngẽxguma naxcèx ípecaxgu, rũ tama penayaxu, erũ naxcèx ípeca i ngẽma tama Tupana pexũ naxwèxexũ. Rũ ngẽma pematama penaxwèxexũ nixĩ i naxcèx ípeçaxũ na namaã pegũtama petaãẽxẽemarexũcèx. ⁴ Pa Duũxũgũ i Chixri Maxẽxũx, ¿Tama ãxna nũxũ pecuèx rũ ngẽxguma ñoma i naãnexũ pengechaũgu rũ Tupanamaã perũxuwãxũ? Erũ texé ya ñoma i naãnexũ ngechaũxẽ rũ Tupanamaã tarũxuwãxũ. ⁵ Rũ tama natũcèxma nixĩ i ngẽma Tupanaãrũ ore i ñaxũ:

“Ngẽma Naãe i Üünexũ i Tupana tũxna muxũ rũ tũxũ ninuxũ erũ noxrũ tixĩ rũ tũxũ nangechaũ”,

ñaxũ. ⁶ Natürũ Tupana rũ tũxũ narũngũxẽẽ na namaã iporaexũcèx i guxũma i ñoma i naãneãrũ ngũchaũ i chixexũ. Rũ ngẽmacèx norũ orewa rũ ñanagũrũ:

“Tupana rũ tümamaã nanu ya yixema tũgũ icuèxũxũgũxe, natürũ tũxũ narũngũxẽẽ ya yixema tama tũgũ icuèxũxũgũxe”,

ñanagũrũ. ⁷ Pa Chaueneẽgũx, ¡Meã Tupanaga pexĩnũe! ¡Rũ nũxũ pexoó i ngoxo i Chataná! Rũ nũma rũ tá pexna niña. ⁸ ¡Tupanana pengaicamagũ! Rũ nũma rũ tá ta pexna nangaicama. Rũ pemax, Pa Pecaduãxgũxũx, ¡nũxũ perũxoe i pecũma i chixexũ! Rũ pemax, i Tupanawe rũxĩxchaũxẽ natürũ ñoma i naãnewe rũ ta rũxĩxchaũxẽ, ¡penamexẽẽx i perũ maxũ na Tupanacèxicatama pemaxẽxũcèx! ⁹ ¡Pegũmaã pengechaũgũ rũ pexauxe erũ pipecaduãx! Rũ texé ya ñoma i naãneãrũ taãẽwa cugũxe, rũ name nixĩ i tũgũmaã taxauxe. Rũ texé ya tümacũma i chixexũmaã taãxexẽ, rũ name nixĩ i Tupanapẽxewa tũgũmaã tangechaũ. ¹⁰ Rũ name nixĩ i Cori ya Tupanapẽxegu pecaxãpũxũgũ rũ namaã nũxũ pixu na taxuwama pimexũ. Rũ ngẽxguma i nũma rũ tá pexũ nicuèxũtũ rũ pexũ nataxẽẽ.

Tama name i chixexũgu cueneẽmaã curũxĩnũ

¹¹ Pa Chaueneẽgũx, ¡Tãxũ i chixexũmaã pegũ pixugũxũ! Erũ yixema chixexũmaã tümãneẽchigagu idexáxe rũ ãxna chixexũmaã nũxũ dawenũxẽ, rũ chixe nũxũ tawogũ ta i Tupanaãrũ ore. Rũ ngẽxguma chixexũgu Tupanaãrũ oremaã curũxĩnũgu, rũ Tupanaãrũ orearũ yexera cugũ quixĩxẽẽchaũ erũ

tama aixcūma naga cuxīnū. ¹² Tupanaxīcatama nixī ya tūxna naxācū i norū mugū rü ñuxūchi tá tūxna cacū rü ngoxi naga ixīnūē i ngēma norū ore. Rū nūmatama nixī i nūxū nangēxmaxū i pora na tūxū namaxēxēxū rü ēxna tūxū nayuexēxū. ¿Natürü texé quiixū i cumax rü ngēmacèx cunangugūxū na ñuxācū namaxūxū i cumūcū?

Taxúema nūxū tacuèx na tacū tá tūxū ngupetūxū i moxūārū ngunexūgu

¹³ ¡Choxū iperūxīnūē i pema na ñapegūgūxū:

“Ñuxma rü ēxna moxū tá nái ya ñānewa taxī, rü wūxi ya taunecū tá ngēxma tayayaxu, rü tá ngēma tataxegū na mucū i dīeru ngīxū iyaxuxūcèx”, ñaperūgūgū! ¹⁴ Pema rü tama nūxū pecuèx na tacū tá pexū ūpetūxū i moxū. ¿Tacū nixī i perū maxū? Perū maxū rü ñoma wūxi i cherena i paxaāchi nūxū idauxū rü ngēxgumatama ngupetūxūrū tá inayarūxo. ¹⁵ Rū narūmemaē nixī na ñapegūxū:

“Ngēxguma chi nanaxwèxegu ya Cori ya Tupana na imaxēxū, rü chi tanaxū i ñā puracū i nagu rüxīnūēxū”, ñapegūxū. ¹⁶ Natürü i pema rü pegū picuèxūgūchaū. Rū guxūma i ngēma rü tama name. ¹⁷ Yíxema nūxū cuáxe na ñuxācū Tupanapēxewa meā tamaxūxū, natürü tama naxúxe, rü pecadu taxū.

5

Ucuxē i dīeruāxgūxūcèx

¹ Pa Duūxūgū i Dīeruāxgūxūx, ¡Iperūxīnūē i ñā ore! ¡Pexauxe rü aita pexūe erū chixexū tá pexū naxūpetū! ² Perū ngēmaxūgū rü marū nangaue, rü ngēma pexchiru i mexēchixū rü nawe nanangōmū. ³ Perū uiru rü perū dīeru rü ngēxma naxāūtanū rü ngēxma nangaue. Rū ngēma norū āūtanū rü wūxi i perū cuèxruū tá nixī na pema rü tá ta ipeyarūtauxexū ñoma tacū ūxūwa ixaxūrū. Tupana ngīxū nadau i perū dīeru i ngīmaā penguūxcū, rü ngēmacèx tá pexū napoxcu i naāneārū guxgu. ⁴ Rū yema perū puracūtanūxū ga tama meā nūxū penaxūtanūxū, rü ñuxma rü ngīxcèx nidexagū ga yema dīeru ga tama nūxna ngīxū pexācū. Rū Tupana ya guxāārū Cori rü ngēma duūxūgūxū naxīnū na ngīxcèx yadexagūxū ga yema dīeru ga nūxū ngīxū pengetanūcū ga peanewa na napuracūexūcèx. ⁵ Rū ñoma i naānewa rü pegū pengēxāēgū rü pemepata rü pemuārū ngēmaxūāxgū rü petaāēgū rü meā pechibūe. Natürü nawa tá nangu na ngēmacèx Tupana tá pexū poxcuexū. ⁶ Rū pema penapoxcue rü penadai i ngēma duūxūgū i taxuūma i chixexū pemaā ūchiréxū. Rū nūmagū rü pexū narūturamaēgū, rü taxuacūma nūgū ínapoxūgū.

Tanaxwèxe i tayumūxē rü meā ítananguxēē ya Cori ya Tupana

⁷ Rū ñuxma Pa Chaueneēgūx, rü name nixī i meā ípenanguxēē ñuxmatata ínangu ya Cori ya Tupana. Rū dūcax, yíxema naānewa puracūxe rü meā ítananguxēē ya pucū na naxūgūxūcèx i tūmanetū. Rū ñuxūchi ñuxre ya tauemacū ítananguxēē na nayaxū i tūmanetūarū o, rü ngēxguma rü tá tayabuxgū. ⁸ Rū pema rü ta penaxwèxe na meā ípenanguxēēxū na ínanguxū ya Cori ya Tupana. ¡Rū petaāēgū, rü tāxū i nūxū perūchāuexū na ípenanguxēēxū! Erū marū ningaica na ínanguxū ya tórū Cori. ⁹ Pa Chaueneēgūx, name nixī i nūxū perūxoe na pegūchigaxū pixuechaū na tama ngēmacèx pexna naçaxūcèx ya Tupana. Erū marū ningaica na ínanguxū na duūxūgūxū yacagūxūcèx i norū maxūchiga. ¹⁰ Pa Chaueneēgūx, name nixī i nūxna pecuèxāchie ga yema nuxcūmaūgūxū ga Tupanaārū orearū uruūgū ga na ñuxācū yaxna namaā naxīnūēxū ga yexguma ngūxū yangegūgu. Rū name nixī i pema rü ta ngēxgumarūū yaxna namaā pexīnūēāma rü Tupanacèx pemaxēāma

ega ngúxũ pingegũgu. ¹¹ Rũ yixema nũxũ tacuèx na nataãëgũxũ ga yema duũxũgũ ga meã Tupanacèx maxëãmaxũ ga yexguma ngúxũ nũxũ üpetũgu. Rũ pema nũxũ pecuèx ga ñuxãcü meã namaxama ga guma Yox ga yexguma ngúxũ nũxũ üpetũgu. Rũ nũxũ pecuèx ga yixcama ga na ñuxãcü tórũ Cori ya Tupana poraãcü nũxũ rüngũxëxũ. Erũ nüma ya tórũ Cori ya Tupana rü namecũmaxũchi rü poraãcü nũxũ tangechaũtũmũgũ. ¹² Rũ guxũãrũ yexera, Pa Chaueneëgũx, rü ngëxguma tacüçèx ipexunetagu, rü tama name i Tupanaegagu ipexuneta, rü êxna ñoma i naãneegagu ipexuneta, rü êxna tacü i to i naegagu ipexuneta. Natürũ ngëxguma aixcüma yixĩgu i wüxi i ore jrũ noxtacüma: “Ngũ” ñapegũ! Rũ ngëxguma tama aixcüma yixĩgu i wüxi i ore jrũ noxtacüma: “Tama” ñapegũ! Rũ ngëxguma ya Tupana rü tãütãma pexũ napoxcue naxcèx i ngëma perũ uneta. ¹³ Rũ ngëxguma wüxie i petanũwa naxixãchiãëgu, rü name nixĩ na tayumũxëxũ. Rũ ngëxguma wüxie taãëgu, rü name nixĩ na tawiyaexũ rü Tupanaxũ ticuèxũxũ. ¹⁴ Rũ ngëxguma wüxie i petanũwa idaawexgu, rü name nixĩ i naxcèx peyaca i yaxõgũxũãrũ ãëxgacũgũ na tũmacèx nayumũxëgũxüçèx rü Cori ya Tupanaegagu chixũmaã tüxũ yangõgũgũxüçèx. ¹⁵ Rũ ngëxguma aixcüma Tupanaãxũ yaxõgũãcüma nayumũxëgũgu, rü tá tũmacèx nitaane, rü nüma ya Cori ya Tupana tá tüxũ ínãrudaxëë nawa i tũmaãrũ daawe. Rũ ngëxguma chi tacü rü pecadu taxũxgu, rü Tupana tá tüxũ nũxũ nangechaũ. ¹⁶ Rũ ngëmacèx name nixĩ i pegũmaã nũxũ pixu i perũ pecadugũ rü pegüçèx peyumũxëgũ i wüxiechigũ na pexcèx yataanegũxüçèx. Rũ yima mecü ya yatũarũ yumũxë rü aixcüma napora erũ Tupana nanangãxũ. ¹⁷ Tupanaãrũ orearũ uruũ ga Ería nixĩ ga wüxi ga yatũ ga taxrũũ ixĩcü. Natürũ yexguma nüma guxũ ga norũ ngúchaũmaã nayumũxëgu na tama napuxüçèx, rü tomaëxpũx ga taunecũarũ ngãxũgu rü tama napu ga yema naãnewa. ¹⁸ Natürũ yemawena rü wenaxãrũ nayumũxë ga Ería rü pucüçèx ínaca. Rũ wenaxãrũ napu. Rũ narũxũ ga guxũma ga nanetũgũ. ¹⁹ Pa Chaueneëgũx, ngëxguma chi texé petanũwa Tupanana ixũgachigu, rü tangëxmagu ya wüxie ya tüxũ taeguxëxë na wenaxãrũ Tupanawe tarũxũxüçèx, rü mexũ taxü. ²⁰ Erũ ngëxguma texé Tupanacèx nataeguxëëgu i wüxi i duũxũ nüxna i norũ chixexũ, rü tũmagagu Tupana tá nanamaxëë i ngëma duũxũ, rü tá nũxũ nũxũ nangechaũ i norũ pecadugũ.

Rũ nuãma pexna,
Chaũtiágu

NÜXĨRAÜXÜ GA POPERA GA PEDRU ÜMATÜXÜ

Pedru nüxü narümoxë ga yema yaxögüxü ga to ga nachiuãnegu woonexü

¹ Pa Chaueneëgüx, choma i Pedru nixi i pexcèx chanaxümatüxü i ñaã popera. Rü choma nixi i Ngechuchu ya Cristu choxü muxü na duüxügümaã nüxü chixuxücèx i norü ore. Rü pexcèx chanaxümatü i pema na perü naãnena to i nachiuãnegügu penawoonexü i Pötuanewa rü Gárataanewa rü Capadochiaanewa rü Áchiaanewa rü Bitíniãanewa ngëxmagüxe. ² Rü pexü nixi ga nadexü ga Tanatü ya Tupana, yerü woetama yema nixi ga nuxcümaxüchima nagu naxĩnüxü. Rü nanamu ga Naãe i Üünexü na pexü yamexëëgüxücèx na aixcüma napëxewa pixüünegüxücèx rü Ngechuchu ya Cristuga na pexĩnüxücèx rü nagümaã na piyaxgüxücèx na nataxuxücèx i perü chixexügü. Rü chanaxwèxe i Tanatü ya Tupana poraãcü pexü narüngüxëë rü pexü nataãëxëë.

Ítananguxëë na wena tá imaxëxü

³ Rü ngixã nüxü ticuèxüügü ya Tupana ya tórü Cori ya Ngechuchu ya Cristu Nanatü! Yerü yexguma Ngechuchu ya Cristuxü wena namaxëëgu, rü tuxna nanaxã ga maxü ga yexwacaxüxü, yerü poraãcü nüxü tangechaütümügü. Rü ngëmacèx i ñuxma i yixema rü ta ítananguxëë na wena tá imaxëxü. ⁴ Rü pema rü wüxi i ngunexügu rü aixcüma tá penayauxgü i guxüma i ngëma mexügü i Tupana tá pexna äxü i ñuxma daxügüxü i naãnegu pexü namaã nanguxüxü. Rü ngëma tá pexna naxãxü rü tagutáma inayarüxo, rü tagutáma naxãüächi, rü tagutáma nangau. ⁵ Rü ñuxma na Tupanaãxü peyaxögüxü rü nüma rü norü poramaã tá pexna nadau ñuxmatáta aixcüma penayauxgü i ngëma maxü i taguma gúxü i tá pexna naxãxü i ngëxguma naguxgu i naãne. ⁶ Rü ngëmacèx name nixi i poraãcü petaãëgü, rü nüetama nixi ega woo ñuxma ñaã perü maxüwa rü paxaxächi muxüma i guxchaxügü pexü üpetügu. ⁷ Erü ngëmaãcü nixi i pexü naxüxü ya Tupana na nüxü nacuáxücèx rü ngoxi aixcüma peyaxögü rü ëxna tama. Rü ngëxguma peyaxögüamagu ega woo guxchaxügü pexcèx ínguxgu, rü ngëma perü õ rü wüxi i uiruarü yexera nixi na namexü erü ngëma uiru rü woo namexëchi natürü düxwa nangau. Rü ngëma uiru rü üxümaã nüxü taxü na nüxü icuáxücèx rü ngoxi aixcüma uiruxüchi yixü. Rü ngëxgumarü ta nixi i perü õ na guxchaxügümaã Tupana nüxü üxü na nüxü nacuáxücèx rü ngoxi aixcüma nüxü peyaxögü na yixcama pexü yacuèxüxücèx rü mexü i pechica pexna naxãxücèx rü pemaã nataãëxücèx i ngëxguma wena núma naxüxgu ya Ngechuchu ya Cristu. ⁸⁻⁹ Pema rü Ngechuchu ya Cristuxü pengechaügü woo taguma nüxü na pedaugüxü. Rü ñuxma rü ta woo tama nüxü pedaugü, natürü nüxü peyaxögü, rü poraãcü petaãëgü. Rü ngëma perü taãëmaã rü taxuacüma nüxü pixuéga na ñuxãcü petaãëgüxüchixü, erü marü penayauxgü i perü maxü i taguma gúxü. Rü ngëmacèx nixi i nüxü peyaxögüxü. ¹⁰ Rü nuxcümaxüchima ga Tupanaãrü orearü uruügü, rü nüxü nixugüe ga na ñuxãcü tá Tupana pexü narüngüxëëxü. Rü nümagü rü poraãcü nangüe rü naxcèx nadaugü i ngëma maxü i taguma gúxü. ¹¹ Rü nümagü ga yema orearü uruügü rü Tupanaãrü poperawa nangüe na nüxü nacuèxgüxücèx na ñuxãcü tá na yixü rü ñuxguacü tá na nangóxü ga guma Maxëxëëruü ga Cristu. Rü Cristuãe i Üünexü ga yema orearü uruügüwa yexmaxü, rü nüxü nüxü nacuèxëë ga na Cristu rü tá ngüxü yangexü rü tá nayuxü rü yixcama rü wena tá na namaxüxü rü ñuxüchi daxügüxü i

nañnewa tá na naxũxũ na guxũârũ ãëxgacũ yĩxũcèx. ¹² Natürũ Tupana rü yema nuxcũmaũgũxũ ga orearũ uruũgũxũ nüxũ nacuèxëẽ na tãütáma nũmagũ nüxũ nadaugũxũ ga guma Maxëxëẽruũ ga naxcèx nadaugũcũ, natürũ pema tá yĩxũ na nüxũ pedaugũxũ. Rü dücax, Pa Chaueneëgũx, gumatama Maxëxëẽruũchiga nixĩ ga perũ orearũ uruũgũ pemaã nüxũ ixugũgũxũ ga yexguma Tupanaãẽ i Üünexũ ga daxũwa ne muxũ yadexagũxëẽgu. Rü guxũma i ngẽma ore i yima Maxëxëẽruũchiga, rü woo Tupanaãrũ orearũ ngeruũgũ i daxũcũãx rü nüxũ nangũchaũgũ na yexeraãcũ nüxũ nacuèxgũxũ.

Tupana rü taxcèx naca na napëxewa naxüünexũcèx i tórũ maxũ

¹³ Rü ñuxma na Cristuarũ duũxũgũ pixĩgũxũ, rü penaxwèxe na pexuãëgũxũ rü ípenanguxëẽ na penaxũxũ i norũ ngũchaũ. Rü name nixĩ i aixcũma meã ípenanguxëẽ i guxũma i ngẽma mexũgũ i Tupana tá pexna ãxũ i ngëxguma Ngechuchu ya Cristu núma ũxgu. ¹⁴ Rü ñuxma na Tupanaxãcũgũ pixĩgũxũ, rü penaxwèxe na aixcũma naga pexĩnũxũ. Rü tama name i nagu pexĩ ga yema nuxcũmaũxũ ga perũ ngũchaũ ga ũpa nagu pexĩxũ ga yexguma tauta Tupanaxũ pecuèxgu. ¹⁵ Natürũ penaxwèxe i aixcũma meã pemaxë na Tupanapëxewa naxüünexũcèx i perũ maxũ. Erũ nüma ya Tupana ya pexũ decũ, rü naxüüne. ¹⁶ Rü norũ ore i ümatũxũwa rü ñanagürũ:

“Chanaxwèxe i chauxrũũ pixüüne, erũ choma rü chaxüüne”, ñanagürũ. ¹⁷ Rü pema na “Pa Tonatũx” ñapegũxũ nüxũ ya Tupana, rü ñuxma na ñoma i nañnewa pemaxëxũ rü name nixĩ i guxũguma nüxũ pemuũë. Erũ nüma rü aixcũmaxũchi nanangugũ i wũxichigũ i duũxũgũarũ maxũ na ñuxãcũ yĩxũ. Rü tũxũ napoxcu ya guxãma ya texé ya chixexũ ũgũxe, rü nüetama nixĩ ega woo texé tixĩgu, erũ napëxewa rü nawũxigumare i guxũma i duũxũgũ. ¹⁸⁻¹⁹ Rü Tupana rü marũ pexũ ínanguxũxëẽ nawa ga yema nuxcũmaũxũ ga perũ maxũ ga taxuwama mexũ ga perũ oxigũxũtawá peyaxuxũ. Rü yema na nawa pexũ ínanguxũxëẽxũcèx rü pexna naxããxũcèx i maxũ i ngexwacaxũxũ, rü poraãcũ nüxũ naxãtanũ. Yerũ tama uiru rü ëxna dïëru i ngauxwèxexũmaã nanaxũtanũ, natürũ Cristugũ ya mexëchicũmaã nixĩ ga naxũtanũãxũ. Yerũ nüma ga Cristu rü ñoma wũxi i carneru i taxuwama nañuxraũxũ i Tupanacèx imáxürũũ pexcèx nayu na pexũ naxũtanũxũcèx. ²⁰ Rü nüma ga Tupana rü woetama nuxcũmaxũchima tauta naãne ixũgũgu, rü marũ Cristuxũ naxuneta na pexcèx nayuxũcèx. Natürũ ñomaũcũũ nixĩ ga nangóxũ ga guma Cristu na pexũ nangũxëẽxũcèx. ²¹ Rü ñuxma rü Cristugagu nixĩ i nüxũ peyaxõgũxũ ya Tupana ga yuwa Cristuxũ írudaxëëcũ rü daxũwa nagacũ. Rü ngëmacèx nixĩ i ñuxma i Tupanaãxũ peyaxõgũxũ rü ípenanguxëẽgũxũ na daxũwa pexũ nagagũxũcèx. ²² Rü ñuxma na naga pexĩnũxũ i Tupanaãrũ ore i aixcũma ixĩxũ rü pexũ natauxcha na pegũ pengechaũgũxũ erũ Tupana rü marũ pexũ inayanaxoxëẽ i perũ chixexũgũ. Rü ngëmacèx penaxwèxe i aixcũma guxũ i perũ ngũchaũmaã pegũ pengechaũgũ. ²³ Rü ñuxma i pema rü marũ penayauxgũ i ngexwacaxũxũ i perũ maxũ. Rü ngëmacèx ñoma ngexwacèx pebuexürũũ pixĩgũ. Natürũ ngẽma maxũ rü tama penatũ rü pee ya yuwèxéxewa nixĩ i penayaxuxũ. Natürũ Tupanaãrũ ore i maxũxũ i taguma iyarũxoxũwa nixĩ i penayaxuxũ. ²⁴ Erũ Tupanaãrũ ore i ümatũxũwa rü ñanagürũ:

“Guxũma i duũxũgũ rü ñoma wũxi i natüanerũũmare nixĩ. Rü guxũma i norũ mexũ, rü wũxi i nanetũchacurũũmare nixĩ. Rü ngẽma natüane rü nayu, rü nachacu rü narũngu. Rü ngëxgumarũũ ta nixĩ i duũxũgũ na tama nataixũ i norũ maxũ i ñoma i nañnewa. ²⁵ Natürũ tórũ Coriarũ ore rü taguma inayarũxo”,

ñanagürü i Tupanaärü orewa. Rü ngēma Tupanaärü ore i mexü nixĩ ga pemaã nüxü yaxugüxü.

2

¹ Rü ngēmacèx name nixĩ i nüxü perüxoe i guxüma i chixexügü, rü ngēma na pidoratèxgüxü, rü ngēma na togüpèxewa meã na pemaxēnetaxü rü ngēma na pixãüxãchiwèxegüxü, rü ngēma na pexoregütèèxgüxü. ²⁻³ Rü ngēxguma chi aixcüma nüxü picuèxãchitanügu na ñuxãcü namecümaxüchixü ya tórü Cori, rü ñoma wüxi i õxchana i ngexwacèx buxü i naëgünenixü nüxü ngúchaüxürüü penaxwèxe i poraãcü pexü nangúchaü i norü ore na ngēmawa peporaexüçèx rü meã peyaexüçèx i perü õwa na ngēmaãcü guxüwama namexüçèx i perü maxü i taguma gúxü.

Cristu nixĩ ya nuta ya maxücü

⁴ Rü ñuxma rü name nixĩ i tórü Corina pengaicamagü. Erü nüma ya tórü Cori nixĩ ya yima nuta ya maxücü ya Tupana nayaxucü na namaã inaxügüãxüçèx ya napata. Rü woo duüxügü nüxü oexü, natürü yima nixĩ ya Tupana nayaxucü erü naxcèx rü namexèchi. ⁵ Rü ngēxgumarüü ta i pemax, rü Tupana pexü nade na napataarü nutagü ya maxècü pixĩgüxüçèx. Rü pema nixĩ i Tupanaärü ngüxèëruügü i üünexü i Ngechuchu ya Cristuégagu Tupanana ãmare pexãgüxü. Rü ngēma ãmare i nüxna pexãgüxü i namaã nataãèxü rü ngēma nixĩ i perü maxü i mexü i napèxewa. ⁶ Rü Tupana rü norü ore i ümatüxüwa rü Cristuchigaxü nixu rü ñanagürü:

“Ñuxma na ichanaxügüxü ya chopata, rü yima nuta ya nüxĩra chayaxüchicü, rü yima nixĩ ya nuta ya mexèchicü ya chomatama chanayaxucü na chopata namaã ichaxügüxüçèx. Rü yima nuta rü chaunchiga nixĩ. Rü yixema nüxü yaxõxè, rü aixcüma tá tanayaxu i ngēma maxü i taguma gúxü i tümamaã ichaxunetaxü”,

ñanagürü. ⁷ Rü pema na nüxü peyaxõgüxü, rü Cristu rü pexcèx rü guxüwama name rü naporaxüchi. Natürü ngēma tama yaxõgüxüçèx, rü taxuwama name. Rü ngēmacèx ya Tupana rü norü ore i ümatüxüwa rü ñanagürü:

“Yima nuta ya ñpataarü üruügü nüxü ocü, rü chauxcèx rü gucü ya nutaarü yexera namexèchi. Rü ngēmacèx yimaetüwa nixĩ ichanaxügüxü ya chopata”,

ñanagürü. ⁸ Rü Tupanaärü ore rü ñanagürü ta:

“Guxüma i ngēma tama yaxõgüxü rü tama irüxĩnüèchaüxü rü yima nutagu tá nayarüpucutügü”,

ñanagürü. Rü ngēmaãcü i guxüma i ngēma tama yaxõgüxü rü tá chixexügu nayi erü tama Tupanaga naxĩnüèchaü rü tama Cristuaxü nayaxõgüchaü. Rü ngēmacèx Tupana tá nanapoxcue yema nüma nüxü yaxuxürüü. ⁹ Natürü pema nixĩ i duüxügü i tórü ãëxgacü ya Tupana pexü dexü na norü ngüxèëruügü pixĩgüxüçèx. Rü pema nixĩ i duüxügü i napèxewa ixüünexü erü nümatama ya Tupana rü norü duüxügüxü pexü nixĩgüxèë na nüxü pixuxüçèx i norü ore i aixcüma mexèchixü. Rü nümatama ya Tupana nixĩ ga chixexüwa pexü ñanguxüxèëxü na norü ngóonexü i mexèchixügu pechocuxüçèx. ¹⁰ Rü üpa ga pema rü tama Tupanaärü duüxügü pixĩgü, natürü i ñuxma rü aixcüma norü duüxügü pixĩgü. Rü üpa rü taxúeaxüma pengechaütümüügü, natürü i ñuxma rü Tupanaãxü pengechaütümüügü.

Ñuxma na Tupanaärü duüxügü pixĩgüxü, rü name nixĩ i meã naxcèx pemaxè

¹¹ Pa Chaueneëgü ya Pexü Changechaügüxex, rü ñuxma na Tupanaärü duüxügü pixĩgüxü, rü tama ñoma i nañecüãx pixĩgü. Rü ngēmacèx pexü

chacèxũ na nüxũ perüxoexüçèx i guxũma i ngẽma ngúchaũgũ i chixexũ i ñoma i naãnecũãx nagu ìxũ. Erü ngẽma ngúchaũgũ i chixexũ rü taãèxũ chixexũgu nanguxẽèchaũ. ¹² Rü name nixĩ i meã pemaxẽ napëxewa i ngẽma duũxũgũ i tama Tupanaxũ cuèxgũxũ. Rü ngëxguma woo poraãcü chixri pechiga yadexagũgu i nümagũ, rü tá nüxũ nadaugũ na ñuxãcü mexũ pexũgũxũ, rü tá Tupanaxũ nicuèxũũgũ i ngëxguma Cristu wena núma üxgu. ¹³ Rü name nixĩ na tórü Cori ya Ngechuchugagu tümaga pexĩnüèxũ ya guxãma ya yíxema perü ãëxgacũgũ ixĩgũxe. Rü ngẽmaãcü name nixĩ i meã naga pexĩnüè ya ãëxgacũ ya tacũ ya Dumawa ngëxmacũ, erü nüma nixĩ i guxũ i togũ i ãëxgacũgũétüwa nangëxmaxũ. ¹⁴ Rü ngëxgumarũũ ta name nixĩ i naga pexĩnüè i ngẽma togũ i ãëxgacũgũ i petanüwa namugũxũ ya yima ãëxgacũ ya tacũ na napoxcueãxüçèx i ngẽma chixexũ ügũxũ rü namaã nataãëgũxüçèx i ngẽma mexũ ügũxũ. ¹⁵ Erü Tupana nanaxwèxe na mexũ pexũgũxũ na ngẽmaãcü ipeyanangeèxgũxẽèxüçèx i ngẽma duũxũgũ i tama Tupanaãrũ orexũ cuáxchaũgũxũ rü chixri ngẽma orechiga idexagũxũ. ¹⁶ Rü ñuxma na Cristu pexũ ínguxũxèèxũ, rü name nixĩ i duũxũgũ i aixcüma ínguxũxürũãcü meã pemaxẽ. Natürü ñuxma na ípenguxũxũ rü tama name na ngẽmamaã pegũ ípepoxũxũ na tacũ rü chixexũ pexũgũxüçèx. Erü ñuxma na Tupanaãrũ duũxũgũ pixĩgũxũ, rü name nixĩ i norü ngúchaũxĩcatama pexũgũ. ¹⁷ Rü name nixĩ i meã penayauxgũ i guxũma i duũxũgũ. ¡Rü nüxũ pengechaũ i taeneègũ i yaxõgũxũ! ¡Rü nüxũ pemuũè ya Tupana! ¡Rü naga pexĩnüè ya ãëxgacũ ya tacũ ya Dumacũãx!

Tanaxwèxe i Cristurũũ yaxna namaã taxĩnüè i ngëxguma ngúxũ ingegũgu

¹⁸ Pa Duũxũgũ i Coriãxgũxũx, ¡rü nüxũ pengechaũgũ rü naga pexĩnüè i perü corigũ! Rü tama name i ngẽma perü corigũ i pemaã mecũmaxũxũxĩcatama pengechaũgũ, natürü name nixĩ i nüxũ pengechaũgũ ta i ngẽma perü corigũ i chixecũmaxũ. ¹⁹ Erü Tupana rü pemaã nataãè ega nüxũ na pengechaũgũxüçèx yaxna namaã pexĩnüègu i ngëxguma texé natüçèxmamare chixexũ pemaã üxgu rü ngúxũ pexũ tingexèègu. ²⁰ Natürü çtacüwa pexũ namexũ ega yaxna namaã pexĩnüègu i ngëxguma wüxi i perü chixexüçèx pepoxcuegu? Natürü ngëxguma tacũ rü mexũ i pexũxũgagu ngúxũ pingegũgu rü yaxna namaã pexĩnüègu, rü ngẽma waxi nixĩ i Tupanapëxewa mexũ. ²¹ Rü ngẽma na mexũ pexũxũgagu ngúxũ pingegũxüçèx nixĩ i Tupana pexũ dexũ. Yerü ga Cristu rü ta pexcèx ngúxũ ninge. Rü yemaãcü pexũ nüxũ nadauxèè na ñuxãcü nüma nanaxwèxexũ na naxrũũ yaxna namaã pexĩnüèxũ i ngẽma ngúxũ. ²² Nüma ga Cristu rü taguma pecadu naxü, rü taguma texéxũ nawomüxèè. ²³ Rü yexguma duũxũgũ chixexũ namaã ixugüegu, rü nüma rü taxuũma ga chixexũmaã nanangãxũ. Rü yexguma ngúxũ nüxũ yangexèègũgu, rü nüma rü tama tacũ rü chixexũmaã nanaxãuxũne. Natürü Tupanamaã nüxũ nixu na nüma namaã namexèèãxüçèx ga yema duũxũgũ ga chixri namaã chopetũxũ. Yerü nüxũ nacüèx rü Tupana rü aixcüma meã nanangugũ i guxũma i duũxũgũarũ maxũ. ²⁴ Rü nümatama ga Cristu rü nügũxũnegu nayange ga tórü pecadugũ ga yexguma curuchagu nayuxgu. Rü yemaãcü nanaxü na nüxũ rüxoexüçèx i tórü chixexũ na naxcèxicatama imaxèxüçèx. Nüma rü pexcèx nanapix na yemaãcü pexũ nameèxèèxüçèx. ²⁵ Rü pema ga ũpa rü ñoma carnerugũ i nu ne naxĩmarexũrũũ pixĩgũ. Natürü i ñuxma rü marü Cristucèx pewoegu. Rü nüma nixĩ i perü dauruũ yĩxũ, rü nüma nixĩ i pexna nadauxũ.

3

Ñuxãcü Tupana nanaxwèxe na namaxëxü i ngëma ixãmaxü rü ixãtexü

1-2 Rü pemax, Pa Ngexügüx, rü name nixĩ i petega pexĩnüë na ngëma pete i tama yaxõxü nüxü dauxücèx i perü maxü i mexü i Tupanapëxewa rü duüxügüpëxewa rü ngëmacèx na yaxõõxücèx woo taxuüma i Tupanaãrü orexü namaã pixugu. ³ Rü ngëma na aixcüma pimexücèx, rü tama name i nagu perüxĩnüë na ñuxãcü pegü pemexëëyaexüchixü, rü ëxna uirunaxcèx i ngëxãëruümaã pengëxãëgüxü, rü ëxna tatanüxüchixü i naxchirugu na picuxgüxü. ⁴ Natürü name nixĩ i perü maxüwa pegü pimexëëgü rü guxüma i duüxügümaã pimecümagü rü taguma texémaã penuãëgü, erü ngëma nixĩ i perü mexü i taguma iyarüxoxü i aixcüma mexü i Tupanapëxewa. ⁵ Rü yemaãcü norü maxü i mexümaã nixĩ ga nügü yangëxãëgüxü ga yema nuxcümaügüxü ga ngexügü ga Tupanapëxewa ixüünexü. Rü nümagü rü Tupanaãxü nayaxõgü rü natega naxĩnüë. ⁶ Rü yemaãcü ta iyixĩ ga Chara ga ngĩte ga Abráüga na naxĩnüxü, rü ngĩrü corimaã naxuaxü. Rü pemagü rü tá ta ngĩrüü pixĩgü ega mexü pexügügu. Rü ñuxüchi taxucèxtáma tüxcüü petecèx pemuë. ⁷ Rü ngëxgumarüü ta i pemax, Pa Yatügüx, rü name nixĩ i meã pemëxü pengechaügü rü aixcüma yaxna ngĩmaã pexĩnüë, erü ngĩma rü irüturamaë. Rü name nixĩ i ngĩmaã petaãëgü erü Tupana rü pexna naxããxürüü ngĩxna nanaxã i ngëma maxü i taguma gúxü. Rü name nixĩ i ngëmaãcü meã ngĩmaã pemaxë na Tupana nüxü ñnüxücèx i perü yumüxëgü.

Yíxema mexü ügüxe ya ngúxü ingegüxechiga

⁸ Rü ngëmaãcü chanaxwèxe i guxãma i pema rü pegüxü pengechaütümüügü rü wüxigu perüxĩnüë, rü aixcüma nüxü pengechaügü i guxüma i taeneëgü i yaxõgüxü. Rü chanaxwèxe i aixcüma pemecümagü rü guxãmaã pegü pewüxiguxëë. ⁹ Rü ngëxguma texé chixexü pemaã üxgu, rü tama name i pema rü ta chixexü tümamaã pexü. Rü ngëxguma texé pemaã guxchigagu, rü tama name i pema rü ta tümamaã peguxchiga. Natürü narümemaë nixĩ i mexü i oremaã tüxü pengãxüga rü tüxü perüngüxëë, erü Tupana pexü nadei na pexü nangüxëëxücèx. ¹⁰ Erü Tupanaãrü ore i ümatüxüwa rü ñanagürü:

“Ngëxguma texé taãëãcüma maxchaügu, rü name nixĩ i nüxna tadau ya tümããrü conü na tama chixexü i oremaã yadeaxücèx. Rü ngëxgumarüü ta name nixĩ i nüxna tadau i tümããx na tama doraxü yaxuxücèx. ¹¹ Rü name nixĩ i nüxna tayaxü i guxüma i chixexügü, rü mexü taxü. Rü ngëxgumarüü ta name nixĩ i guxüguma naxcèx tadau na togümaã tataãëxü. ¹² Erü tórü Cori rü tüxna nadau ya yíxema aixcüma ímexë, rü nüxü naxĩnü i tümããrü yumüxë. Natürü tümamaã nanu ya yíxema chixexü ügüxe”,

ñanagürü i ngëma Tupanaãrü ore. ¹³ ;Rü texé tá chixexü pemaã üxü ega pema rü aixcüma guxüguma mexü pexügügu? ¹⁴ Natürü ngëxguma chi ngëma mexü na pexügüxücèx ngúxü pingegügu, rü name nixĩ i petaãëgü. ;Rü taxucèxma texëxü pemuë, rü taxucèxma tacücèx pexoegaãëgü! ¹⁵ Rü name nixĩ i perü Corixü peyaxĩxëë ya Cristu rü aixcüma naga pexĩnüë, rü guxüguma ípememare na meã penangãxüxücèx i guxüma i duüxügü i pexna çaxü na tüxcüü Cristu-axü peyaxõgüxü. ¹⁶ Natürü name nixĩ i nüxü pengechaüãcüma penangãxü rü tama pegügu perüxĩnüëãcüma na norü yexera pixĩgüxü. Rü name nixĩ i meã pemaxë na taxucèxma pexoegaãëxücèx. Rü ngëxguma ngëmaãcü pemaxëgu rü tá naxãneë i ngëma duüxügü i chixri pechiga idexagüxü na ñuxãcü Cristucèx pemaxëxü. ¹⁷ Yixema rü ngúxü tingegü ega chixexü ixügügu. Natürü

narümemaë nixĩ na mexũ ixügũxũcèx ngúxũ na ingegũxũ, ega ngẽmaãcü Tupana naxwèxegu. ¹⁸ Yerũ nũmatama ga Cristu rü ngúxũ ninge, rü wüxicanatama guxããrũ pecaducèx nayu. Rũ woo na mecü yĩxũ rü taxcèx nayu i yixema i chixexũ i duũxũgũ ixĩgũxũ. Rũ yemaãcü nanaxũ na Tupanaxũtawa tũxũ nagagũxũcèx. Rũ woo nayu ga naxũne, natürũ ga naãe rü tama nayu. ¹⁹ Rũ yexguma naxũne yuxgu rü naãe rü natanũwa naxũ ga yema naãegũ ga Tupana poxcuexũ, rü orexũ namaã nayarũxu. ²⁰ Rũ yema naãegũ ga yexma poxcuexũ, rü yema nixĩ ga naãegũ ga yema duũxũgũ ga Noe maxũgu tama ixĩnũchaũxũ woo Tupana yaxna namaã naxĩnũ ga yexguma Noe naxũyane ga guma wapuru. Rũ 8 ga duũxũgũxĩcatama nixĩ ga guma wapurugu ichoũxũ, rü yema nixĩ ga guma mucü ga taxüchicüarũ dexáétüwa maxèxũ. ²¹ Rũ yema dexá rü wüxi ga cuèxruũ nixĩ. Erũ ngëxguma dexáwa íbaiegu, rü duũxũgũxũ nüxũ tacuèxèẽ na Ngechuchu ya Cristu wena maxũxũgagu yĩxũ i tũxũ nangëxmaxũ i maxũ i taguma gúxũ. Rũ tama taxüneãrũ düxétüwa na imexũcèx nixĩ i íbaieũ, natürũ ítabaie yerũ marũ Tupanana naxcèx taca na tũxũ iyanaxoxèẽãxũcèx ga tórũ pecadugũ na aixcũma napëxewa imexũcèx rü aixcũma mexũgu rüxĩnũèxũcèx. ²² Rũ nüma ga Ngechuchu ya Cristu, rü daxũguxũ i naãnewa naxũ, rü ñuxma rü Tupanaãrũ tũgüncüwawa nangëxma. Rũ ñuxma rü namëxwa nangëxmagũ i guxũma i Tupanaãrũ orearũ ngeruũgũ i daxũcũãx rü guxũma i ãëxgacũgũ i daxũcũãx.

4

Tanaxwèxe i ngẽma cuèx i Tupana tũxna ãxũmaã nüxũ tarüngũxèẽ i taeneëgũ

¹⁻² Rũ ngẽmacèx name nixĩ na ípememarexũ na ngúxũ pingegũxũ yexgumarũ ga Cristu na ngúxũ yangexũ. Erũ yixema ngúxũ ingexe rü marũ nüxũ tarũxo i tũmaãrũ pecadu na guxũguma meã Tupana naxwèxexũãcũma tamaxũxũcèx, rü tama i tũmaxũne naxwèxexũãcũma na tamaxũxũcèx. ³ Ūpa ga pemax, rü mucũma ga taunecü penaxüecha i ngẽma chixexũ i ñuxma i ngẽma duũxũgũ i tama Tupanaxũ cuèxgũxũ ügũxũ. Rũ yexguma ga pema rü pecadu pexũgũãcũma pemaxè, rü penaxũ ga pexeneãrũ ngúchaũ, rü pengãxè, rü peta ga nawa pexãũgatanũxũ pexũgũ, rü tacü i nguchiëxgũxũ poraãcü pixaxcugũ, rü tupananetachicünèxãgũxũ picuèxũgũ i woo Tupana na pexna nachuxuxũ i ngẽma. ⁴ Rũ yema duũxũgũ ga namaã pexãmücũgũxũ ga yexguma chixri pemaxëgu, rü ñuxma rü poraãcü nagu narũxĩnũe na tacücèx tama natanũgu pexãgũxũ rü tama nawe perũxĩxũ i ngëxguma norũ chixexũ naxũgũgu. Rũ ngẽmacèx nixĩ i ñuxma i chixri pechiga yadexagũxũ. ⁵ Natürũ nümagũ rü tá ta Cristupëxewa nangugũ na namaã nüxũ yaxugũxũcèx na ñuxãcü namaxèxũ. Rũ nüma ya Cristu rü ínamemare na nüxna yacachigũxũcèx i guxũma i duũxũgũ i maxèxũ rü yuexũ. ⁶ Rũ ngẽmacèx ya Tupana rü naxũpa na nayuexũ i duũxũgũ rü marũ nüxna nanaxuaxũ i maxũ i taguma gúxũ. Erũ nanaxwèxe na naxrũũ guxũguma mexũwa namaxèèchaxũ ega woo ñoma i naãnewa nayuegu i naxũnegũ. ⁷ Rũ marũ ningaica na nagúxũ i ñoma i naãne rü guxũma i tacü i nawa ngëxmaxũ. Rũ ngẽmacèx name nixĩ na ípexuãèxũ rü meã peãe ta ipexũgũxũ rü guxũguma peyumüxègũxũ. ⁸ Rũ guxũãrũ yexera i ngẽma pexũ chanaxwèxexũ nixĩ na aixcũma pegü pengechaũgũxũ i wüxichigũ. Erũ ngëxguma aixcũma yigũ ingechaũgũgu rü ngẽmaãcü inayarũxo i muxũma i pecadugũ. ⁹ ¡Rũ meã pegü peyauxgũ i wüxichigũ i pechiũwa! Rũ tama name i tũmamaã penuãèãcũma tũxũ peyaxu. ¹⁰ Rũ wüxichigũ i pemax, rü Tupana pexna nanaxã i perü cuèx. Rũ ngẽma perü cuèxmaã rü name nixĩ i wüxichigũ pegü perüngũxèègũ, na aixcũma Tupanaãrũ ngũxèèruũ i mexũ na pixĩgũxũcèx rü meã namaã pepuracüexũcèx i guxũma i ngẽma cuèx i

Tupana pexna ãxũ. ¹¹ Rũ ngẽxguma texé nũxũ ixuxgu i ore, rũ name nixĩ i aixcũma Tupanaãrũ orexũ tixu. Rũ ngẽxguma texé togũxũ rüngũxẽẽgu, rũ name nixĩ i Tupana tũxna ãxũ i poramaã tanaxũ. Rũ guxũma i ngẽma pexũxũ rũ name nixĩ i meãma penaxũ na ngẽmaãcü Ngechuchu ya Cristugagu Tupanaxũ picuèxũũgũxũcèx. Erũ nüma ya Tupana rũ guxũguma namexèchi rũ naporaxũchi. Rũ ngẽmaãcü yĩĩ.

Ngẽxguma Cristuaxũ yaxõxgu rũ ngũxũ tinge

¹² Pa Chaueneẽgũ ya Pexũ Changechaũgũxex, ñũxma na taxũ i guxchaxũgũ i perũ nguxẽẽruũ pexcèx ínguxũ, ¿rũ tãxũ i pebaixãchiãẽgũxũ, ñoma tacũ i taguma nũxũ pedauxũ ngupetũxũrũ! ¹³ Natürũ narümemaẽ nixĩ na petaãẽgũamaxũ, yerũ yema Cristu ngũxũ na ingexũrũ nixĩ i ngũxũ na pingegũxũ i ñũxmax na petaãẽgũxũcèx i ngẽxguma wena núma naxũxgu i nümax. ¹⁴ Rũ ngẽxguma Cristuaxũ na peyaxõgũxũgagu texé pemaã guxchigagu, rũ wũxi i perũ taãẽ nixĩ i ngẽma. Erũ ngẽmaãcü nũxũ pecuèx na Tupanaãẽ i Üünexũ rũ pewa na nangẽxmaxũ. ¹⁵ Rũ ngẽxguma chi ngũxũ pingegũgu, rũ name nixĩ na wũxi i mexũ na pexũgũxũgagu na yĩĩxũ rũ tama wũxi i chixexũgagu na yĩĩxũ, ngẽxgumarũ i máeta rũ éxna ngítèèx rũ éxna togũarũ guxchaxũwa na pegũ pengẽxmagũxẽẽxũ. ¹⁶ Natürũ ngẽxguma texé Cristuaxũ tayaxõxũgagu ngũxũ tingexgu, rũ taxucèxma tũxcũũ ngẽmacèx taxãne. Rũ name i ngẽmacèx Tupanaxũ ticuèxũ. ¹⁷ Rũ ñũxma rũ marũ nawa nangu na Tupana ngũxũ tũxũ ingexẽẽxũ na ngẽmaãcü tũxũ iyanawẽxãchixẽẽxũcèx i yixema na naxãcũgũ ixĩgũxũ. Rũ ngẽxguma ngẽmaãcü tamaã inaxũgũãgu, rũ ¿ñũxãcü tá nũxũ naxũpetũ i ngẽma duũxũgũ i tama Tupanaãrũ ore i mexũga ñnũẽchaũxũ? ¹⁸ Erũ Tupanaãrũ ore i ümatũxũwa rũ ñanagũrũ:

“Ngẽma duũxũgũ i mexũ ügũxũ rũ guxchaãcüma nanayauxgũ i maxũ i taguma gũxũ. Rũ ñũxma na ngẽmaãcü yĩĩxũ, ¿rũ ñũxãcü tá nũxũ nangupetũxũ i ngẽma duũxũgũ i chixexũ ügũxũ rũ pecaduãxgũxũ?” ñanagũrũ. ¹⁹ Rũ ngẽmacèx ya yixema Tupana naxwèxexũãcüma ngũxũ ingegũxe, rũ name nixĩ na mexũ taxũgũechaxũ rũ Tupana ya tũxũ ücũmẽxẽgu na tanaxũxũ i tũmaãẽ na nũxna tũxũ nadauxũcèx. Erũ nüma ya Tupana rũ mecũ nixĩ rũ taguma texéxũ nawomũxẽẽ.

5

Ucuxẽgũ naxcèx i ngẽma yaxõgũxũ

¹ Rũ ñũxmax, Pa Yaxõgũxũãrũ Æẽxgacũgũx, rũ pexna chanaxãxchaũ i wũxi i ucuxẽ i mexũ, erũ choma rũ ta pexrũũ yaxõgũxũãrũ ãẽxgacũ chixĩ. Rũ chomaxũchima nixĩ ga nũxũ chadauxũ ga ñũxãcü ngũxũ na yangexũ ga Cristu. Rũ choma rũ tá ta pexrũũ choxũ nangẽxma i chauchica i mexũ i ngẽxguma wena núma naxũxgu. ² Rũ chanaxwèxe i nũxna pedau rũ nũxũ perũngũxẽẽ i guxũma i Tupanaãrũ duũxũgũ i pemẽxwa ngẽxmagũxũ. Rũ name i mexũ i perũ ngũchaũmaã Tupana naxwèxexũãcüma penaxũ i ngẽma puracũ, rũ tama texé pexũ muxguxica penaxũ rũ éxna díerucèx penaxũ. ³ Rũ tama name i namaã penuẽãcüma rũ penangaãcüma penamu i ngẽma duũxũgũ. Natürũ chanaxwèxe i mexũ i perũ maxũ nũxũ pewẽx na ñũxãcü Tupana naxwèxexũ na namaxẽxũ. ⁴ Rũ ngẽxguma wena núma naxũxgu ya tórũ Daurũxũchi ya Cristu, rũ pema rũ tá penayauxgũ i wũxi i perũ ãmare i ngèxcuerũ i mexẽchixũ i taguma ngauxũ. ⁵ Rũ ngẽxgumarũ ta i pemax, Pa Ngextũxũcũgũx, rũ name nixĩ i naga pexĩnüẽ i ngẽma perũ ãẽxgacũgũ i Tupanaãrũ puracũwa puracũexũ. Rũ guxãma i pema i yaxõgũxũ, rũ name nixĩ

i wüxichigü pegü perüngüxëë rü taguma pegügu perüxĩnüë na pemücügüarü yexera pixĩgüxü. Erü Tupanaärü ore i ümatüxüwa rü ñanagürü:

“Tupana rü tama norü me nixĩ i ngëma duüxügü i nügü icuèxüxügüxü.

Natürü nüxü narüngüxëë rü namaã namecüma i ngëma duüxügü i tama nügü icuèxüxügüxü”,

ñanagürü i ngëma ore. ⁶ Rü ngëmacèx tama name i pegü picuèxüxü. Rü narümemaë i Tupanamëxë ya poranetüxüwa pegü pengëxmagüxëë na nüma pexü yacuèxüxügüxücèx i ngëxguma nawa nanguxgu na ngëmaãcü pemaã naxüãxü. ⁷ Rü name nixĩ i Tupanamëxëgu penaxü i guxüma i perü oegaãëgü, erü nüma ya Tupana rü guxüguma pegu narüxĩnü rü aixcüma pexna nadau. ⁸ Rü name nixĩ i guxüguma pegüna pedaugü rü ipexuãëgü, erü perü uwanü i Chataná rü doma wüxi ya ai ya idüraxüchicürüü nanañaãne rü tümacèx nadau na texéxü tá nachixexëëxü. ⁹ ¡Rü peporaeamèx rü peyaxögüamèx i ngëxguma tacü rü chixexü pemaã naxüxchaügu! Erü nüxü pecuèx rü guxüma i taeneëgü i guxüwama ngëxmagüxü rü pexrüü ngëmatama ngüxü ningegü. ¹⁰ Natürü ngëxguma paxaxãchi ñoma i naãnewa ngüxü pingegüguwena, rü Tupana rü tá pexü nimexëë na aixcüma napëxewa pimexücèx, rü tá pexü narüngüxëë na taguma nüxü perüxoexücèx, rü tá pexü naporaexëë na aixcüma perü maxüwa peporaexücèx. Rü daatama Tupana nixĩ ya tüxna naxãcü i guxüma i mexü i tüxü ngëxmaxü, rü tüxü deicü na naxütawa tüxü nangëxmaxücèx i tachica i mexü i taguma gúxü, erü Ngechuchu ya Cristuarü duüxügü tixĩgü. ¹¹ Rü name nixĩ i guxüguma nüxü ticuèxüügü ya Tupana, erü nüma nixĩ i guxüärü äëxgacü yĩxü i guxüguma. Rü ngëmaãcü yĩ.

Pedru rü yema yaxögüxüxü narümoxë

¹² Taeneë ya Chiribánu ya meã yaxöcümaã petanüwa chanamu i ñaã nuxmarexü i popera na pexü chixucüxëgüxücèx rü pemaã nüxü chixuxücèx na ngëma pexü nangechaüxügü yĩxü ya Tupana i aixcüma pexü nangüxëëxü. Rü ñuxma na ngëmaãcü pexü nangechaüxü, rü name nixĩ i guxüguma naxcèx pemaxë. ¹³ Rü pexü narümoxëgü i guxüma i taeneëgü i yaxögüxü i pexrüü Tupana dexü i núma Dumawa ngëxmagüxü. Rü ngëxgumarüü ta pexü narümoxë i chorü ngüxëëruü i Marcu ya chaunerüü ixĩcü. ¹⁴ Rü chanaxwëxe i wüxichigü i pema rü pegü pengechaügüãcüma pegü perümoxëgü. Rü ngëxgumarüü ta chanaxwëxe na aixcüma petaãëgüxü i guxãma i pema na Ngechuchu ya Cristuarü duüxügü pixĩgüxü. Rü ngëmaãcü yĩ.

Rü nuãma pexna,
Pedru

NORÜ TAXRE GA POPERA GA PEDRU ÜMATÜXÜ

Pedru nüxü narümoxë ga yema yaxögüxü

¹ Pa Chaueneëgüx, choma i Chimáü i Pedru nixi i pexcëx chanaxümatüxü i ñaã popera. Rü choma rü Ngechuchu ya Cristuarü ngüxëëruü chixi, rü nüma nixi ga choxü namuxü na nüxü chixuxüçëx i norü ore. Rü pexcëx chanaxümatü i pema na toxrüü aixcüma peyaxögüxü, erü törü Tupana rü törü Maxëxëëruü ya Ngechuchu ya Cristu rü aixcüma nimexëchi. ² Rü ñuxma na Tanatü ya Tupanaxü pecuáxü rü törü Cori ya Ngechuchuxü pecuáxü, rü chanaxwëxe i nümagü aixcüma pemaã namecüma rü aixcüma pexü nataãëxëë.

Yaxögüxüçümagüchiga

³ Rü Tupana rü noxrütama poramaã marü tüxna nanaxã ga guxüma i ngëma nacüma i mexü i inaxwëxexü na aixcüma meã naxcëx imaxëxüçëx. Rü yemaãcü nanaxü ga yexguma tüxü nüxü nacuëxëëgu ga guma törü Cori ya mexëchicü ga norü poramaã tüxü decü. ⁴ Rü yematama norü poramaã tüxna nanaxã ga guxüma ga norü ngüxëë i mexëchixü ga inaxunetaxü na naxrüü pimexüçëx rü nüxna pixigachixüçëx i guxüma i chixexügü i duüxügüarü ngúchaü i chixexügagu ñoma i naãnewa ngëxmaxü. ⁵ Rü ngëmacëx penaxwëxegü na pegü peporaexëëxü na yexeracü peyaxögüxü rü meã togüpëxewa pemaxëxü. Rü ñuxuchi name na meãma nüxü pecuáxü na tacü yixü i Tupana pexü naxwëxexü. ⁶ Rü ngëxgumarüü ta penaxwëxegü na meã pegümaã ipecuáxü na tama chixexügu peyixüçëx. Rü ñuxüchi name na yaxna pegümaã pexinüëxü. Rü ngëxgumarüü ta name na aixcüma Tupanaxü pengechaügüxü. ⁷ Rü ñuxüchi penaxwëxegü na pegü pengechaügüxü ya guxãma i pemax. Rü ngëxgumarüü ta name na guxüma i duüxügüxü pengechaügüxü. ⁸ Rü ngëxguma aixcüma ngëma pexü chaxucuxëxüãcüma pemaxëgu, rü täütáma natüçëxma nixi i perü maxü, rü täütáma natüçëxma nixi na nüxü pecuáxü ya törü Cori ya Ngechuchu ya Cristu. ⁹ Natürü yixema tama ngëma pexü chaxucuxëxüãcüma maxüxë, rü ñoma tangexetüxürüü tixi. Rü ñoma wüxi i duüxü i tama nagu rüxünüxü i ngëma yixcüra tá nüxü ngupetüxürüü tixi, erü nüxü itayarüngüma na ñuxãcü Tupana tüxü nüxü ngechaüxü ga tümaãrü pecadugü. ¹⁰ Rü ngëmacëx, Pa Chaueneëgüx, name nixi na yexeraãcü meã Tupanacëx pemaxëxü na ngëmaãcü ipenawëxüçëx na aixcüma Tupanaãrü duüxügü ya pexcëx naçaxe rü pexü dexe na pixigüxü. Rü ngëxguma ngëmaãcü pemaxëgu rü tagutáma chixexügu peyi rü tagutáma Tupanaxü ípetëx. ¹¹ Rü ngëmaãcü ya Tupana, rü tá meã pexcëx nayawãxna i iãx na tauxchaãcü pichocuxüçëx i ngextá guxügutáma ãëxgacü iyixüwa ya törü Cori ya Ngechuchu ya Cristu ya törü Maxëxëëruü. ¹² Rü ngëmacëx woo marü nüxü na pecuáxü rü nagu na pexixü i ngëma ore i aixcüma ixixü, natürü guxügutáma pexna nüxü chacuëxãchixëëëcha ga yema pexü namaã chaxucuxëxü. ¹³ Erü ñuxma na chamaxüxü i chomax, rü nagu charüxünü na namexü na pexna nüxü chacuëxãchixëëxü i ngëma ore i namaã pexü chixucuxëgüxü, na ngëmaãcü pexü changüxchaüxëëxüçëx na meã Tupanacëx pemaxëxü. ¹⁴ Rü pemaã nüxü chixu i ngëma, erü törü Cori ya Ngechuchu ya Cristu choxü nüxü nacuëxëë na paxa tá chayuxü. ¹⁵ Rü ñoma rü ta na chamaxüxü, rü meã pexü chixucuxëgü na ngëxguma chayuxguwena rü guxüguma nüxna pecuëxãchiexüçëx i ngëma chorü ucuxëgü na ñuxãcü Tupana naxwëxexü na pemaxëxü.

Pedru rü namücügü rü aixcüma Cristuxü nadaugü ga na ñuxãcü namexëchixü

¹⁶ Rü yexguma pexü tangüexëëgu na ñuxãcü naporaxü ya tórü Cori ya Ngechuchu ya Cristu rü ñuxãcü tá wena na nataeguxü, rü tama tomatama togüãëwa tayaxuxü i ore nixi. Yerü tomatama toxetümaã nüxü tadau na ñuxãcü namexëchixü i nüma ya tórü Cori. ¹⁷ Rü nüxü tadau ga yexguma Tanatü ya Tupana nüxü icuëxüügu. Rü nüxü taxĩnüë ga yexguma gumatama Tanatü ya Tupana ya Mexëchicü ñaxgu:

“Daa nixi ya Chaune ya nüxü changechaüxüchicü. Rü choma rü poraãcü namaã chataãëxüchi”,

ñaxgu. ¹⁸ Rü aixcüma tomaxüchima nüxü taxĩnüë ga yema Tupanaga ga daxüguxü ga naãnewa inaxüxü, yerü tomatama rü tórü Corimaã tayexmagü nawa ga guma mëxpüne ga üünene ga yexguma yema ngupetügu. ¹⁹ Rü yemaãcü nüxü tadau na aixcüma yĩxü ga yema ore ga nuxcümaügüxü ga Tupanaãrü orearü uruügu nüxü ixugügüxü. Yerü yema nüxü yaxugügüxürütama nixi ga nüxü tadauxü. Rü name nixi i pema rü ta aixcüma meã nagu perüxĩnüë i ngëma ore, erü wüxi i omü i íraxetüxü i eãnexüwa ibaxixürü nixi. Rü ngëma ore rü tá pexü nüxü nacuëxëë i Tupanachiga ñuxmatáta ínangu ya tórü Cori ya Ngechuchu ya Cristu ya yima woramacuri ya ngunetüxü ngócürüü ixicü. Rü ngëxguma ínanguxgu i nüma rü aixcüma tá meã pexü nüxü nacuëxëë i guxüma i nachiga. ²⁰ Natürü chanaxwëxe na guxüãrü yexera nüxü pecuáxü i ñaã ore i tá pemaã nüxü chixuxü. Rü dücax, taxüema tüechamatama nüxü tacuëx i tacüchiga na yĩxü i Tupanaãrü ore i ümatüxü, ega Tupanaãë i Üünexü tama tüxü rüngüxëëgu. ²¹ Yerü taxuüma ga Tupanaãrü orearü uruü rü nüechamatama nügüãëwa nanayaxu ga yema ore ga nüxü yaxugügüxü. Natürü yexguma yema orexü yaxugügügu, rü Naãë i Üünexü nixi ga yadexagüxëëxü.

2

Doramaã duüxügüxü ngüexëëxüchiga

¹ Natürü nuxcüma rü nayexma ta ga Tupanaãrü orearü uruügüneta ixigüxü ga Yudiügütanüwa. Rü ngëxgumarüü tá ta petanüwa nangëxma i duüxügü i ngüxëëruügüneta ixigüxü. Rü nümagü rü tá doramaã nanaxüchicüü i Tupanaãrü ore, rü ngëmaãcü tá pexü nangüexëë i ore i dora ixixü na pexü nawomüxëëgüxücëx. Rü nümagü rü täütáma naga naxĩnüëchaü ya yima tórü Cori ya Ngechuchu ya Cristu ya norü Maxëxëëruüchirëx ixicü. Rü ngëmagagu ya Tupana rü ngürüãchi tá nanapoxcue i ngëma duüxügü i ngëmaãcü maxëxü, rü tá inayanaxoxëë. ² Rü nümagü rü tá nüxü nixugü na tama wüxi i chixexü yĩxü ega woo taxüneãrü ngüchaü ixüxgu. Rü muxüma i togü i duüxügü rü tá nawe narüxi i ngëma chixexü i naxügüxüwa. Rü ngëma chixri pexü ngüexëëxügagu rü muxüma i togü i duüxügü rü tá chixri nachiga nidexagü i Tupanaãrü ore i mexü i aixcüma ixixü. ³ Rü nümagü i ngëma duüxügü i chixexü rü tá nügüna nananugüchaü i guxüma. Rü ngëmacëx tá pemaã nüxü nixu i ore i chixexü ixixü na ngëmaãcü pexü nawomüxëëgüxücëx rü pexü ngixü nayauxgüxücëx i perü díëru. Natürü tá napoxcue i ngëma duüxügü, rü täütáma nibuxmü. Erü Tupana rü woetama nuxcümama nanamexëë i ngëma poxcu. ⁴ Yerü ga Tupana rü tama nüxü nüxü nangechaü ga norü orearü ngeruügü ga daxüçüãx ga pecadu ügüxü. Rü yemacëx ínaxëãnexüwa i ngoxogüxü ínapoxcuexüwa nanawogü. Rü cadenamaã nayanëixgü na ngëma nangëxmagüxücëx ñuxmatáta nawa nangu i ngëma ngunexü i nagu Tupana nüxna çaxü i guxüma i duüxügü. ⁵ Rü yexgumarüü ta ga Tupana rü tama nüxü nüxü nangechaü ga yema nuxcümaügüxü ga duüxügü ga chixexü

ügüxü. Rü yemacèx mucü ga taxüchicü naxcèx yéma nanamu na gumamaã nadaiãxücèx ga yema duüxügü ga chixexü ügüxü. Natürü ga Tupana rü Noexü nadau ga na meãma duüxügüxü yaxucuxëgüxü na nüxü naxoexücèx ga norü chixexügü. Rü yemacèx ga Tupana rü Noexü namaxëë namaã ga 7 ga natanüxügü. Natürü nanadai ga guxüma ga yema togü ga duüxügü. ⁶ Rü Tupana rü yexgumarüü ta inayanaxoxëë ga guma ãnegü ga Chodoma rü Gomora ga poraãcü chixri duüxügü nawa maxëne. Rü ínanagu ga guma ãnegü ñuxmata norü tanimacaxicatama íyaxü. Rü yemaãcü nanaxü na guma ãnegü rü wüxi ga cuèxruü na yíxücèx nüxü ga yema duüxügü ga chixexü ga yemawena maxëxü. ⁷ Natürü ga Chodomawa rü Tupana nanamaxëë ga Lox ga wüxi ga yatü ga mecü íxcü ga poraãcü ngechaücü ga yexguma nüxü nadèuxgu ga ñuxãcü chixri na namaxëxü ga yema duüxügü ga natanüwa nayexmaxü. ⁸ Rü guxü ga ngunexügu rü nüma ga Lox ga meã maxücü rü poraãcü naãëwa nangux ga yexguma nüxü nadèuxgu rü nüxü naxínügu ga yema chixexügü ga naxügüxü ga yema duüxügü ga natanüwa nayexmaxü. ⁹ Rü yema Loxü na namaxëëxürüü ga Tupana, rü nüxü natauxcha na tüxü ínanguxüxëëxü i ngëxguma Chataná tüxna ínügu ya yíxema meã maxëxë. Rü ngëxgumarüü ta ya yíxema chixexü ügüxe, rü nüxü natauxcha na poxcuwa tüxü nangëxmagüxëëxü ñuxmatáta nawa nangu i ngëma ngunexü i nagu guxüma i duüxügüxü yacagüxü. ¹⁰⁻¹¹ Rü Tupana rü aixcüma tá nanapoxcue i ngëma duüxügü i naxüneärü ngúchaügu íxü i tama naga ínüechaüxü ya tórü Cori. Rü ngëma duüxügü rü taxúegama naxínüechaü, rü nadauxcüraxüwëxegü rü nügüguxicatama narüxínüë. Rü tama namuüë na namaã naguxchigagüxü i ngëma ãëxgacügü i daxüçüãx i Tupanatüüwa ngëxmagüxü. Rü ngëmaãcü namaxë i ngëma duüxügü. Natürü woo Tupanaärü orearü ngeruügü i daxüçüãx i ngëma duüxügüxü rüyexeraxüchichiréxü, rü namuüë na ngëmaãcü namaã naguxchigagüxü i ngëma ãëxgacügü i daxüçüãx i Tupanatüüwa ngëxmagüxü. ¹²⁻¹³ Rü ngëma nguxëëruügüneta, rü ñoma naëxügürüü nixígü, rü naëxügürüü taxuüma nacuèxgü. Rü ngëma naxünegü naxwëxexü nixí i naxügüxü. Rü nabue na ñoma naëxügü i yayauxgüxü rü nadèixürüü yixígüxücèx. Rü chixri nachiga nidexagü i ngëma tama nüxü nacuèxgüxü. Natürü ngëma chixexü i naxügüxügagu tá inayarütauxe, rü ngëmaãcü ngúxü tá ningegü nagagu i ngëma ngúxü i toguãxü yangexëëgüxü. Rü nümagü rü namaã nataãëgü i ngëma chixexü i ngunecütama naxügüxü. Rü ngëxguma pemaã nachibüegu, rü wüxi i chixexüchixü rü ãnexüchi nixígü erü ngema rü ta nanaxügü i norü chixexügü i namaã pexü nawomüxëëgüchaüxü. ¹⁴ Rü ngëma duüxügü rü taxuacüma wüxi ya ngeãxü nadaugümare, erü naãëwa rü nagu narüxínüë na nüxü tangüchaüxü. Rü tama nüxü ninguéga na pecadu naxügüechaxü. Rü naxcèx nadaugü na ñuxãcü chixexügu tüxü nayixëëxü ya yíxema duüxëgü ya turaearü maxüãxgüxe. Rü nüxü nicuèxüchi na ñuxãcü tacü nügüna nanugüexü. Natürü Tupana rü marü namaã nanaxuegu na napoxcueãxü. ¹⁵ Rü ngëma duüxügü rü tama nagu naxí i ngëma Tupana nüxü naxwëxexü, rü ngëmacèx inayarütauxe. Rü nagu naxí ga yema chixexü ga nagu yaxüxü ga nuxcümaüxü ga Tupanaärü orearü uruü ga Baráü ga Beú nane ga chixexü üxü na yemaãcü díëru ngíxü nayaxuxücèx. ¹⁶ Rü noxrütama buru ga woo taguma idexachiréxcü, rü wüxi ga duüxürüü namaã iyadexa rü inanga naxcèx ga yema chixexü ga naxüxchaüxü. Rü yemaãcü Baráxü íyachaxãchixëë na tama naxüãxücèx ga yema chixexü ga naxüxchaüxü. ¹⁷ Rü ngëma duüxügü rü taxuwama nime ñoma wüxi i puchu i ngearü dexáãxürüü. Rü ñoma wüxi i caixanexü i buanecü ícuexürüümare nixí na taxuwama yamexü. Natürü Tupana rü marü nanamexëë i wüxi i nachica i ëanexüchixü

i ngextá guxügutáma ínapoxcueãxüwa i ngẽma duüxügü. ¹⁸ Rü ngẽmaãcü tá nanapoxcue i ngẽma duüxügü, erü nügü yacuèxüügüãcüma chixri nidexagü i ore i taxuwama mexümaã. Rü tüxü nixucuxëgü na tümaxüneärü ngúchaügu na taxüxcèx ya yíxema marü ngexwacèx ngẽmaxü rüxochiréxe. ¹⁹ Rü tümamaã nüxü nixu rü ngëxguma nawe tarüxíxgu rü tá tüxü ínganguxüxë na taxuümëxëwa tangëxmagüxcèx rü tüma tanaxwëxëüãcüma tamaxëxcèx. Natürü ngẽma duüxügü i ngẽmaãcü chixri idexagüxü, rü nümagütama rü norü chixexütüüwa nangëxmagü. Erü guxüma i duüxügü, rü ngẽma nüxü rüyexeramaëxütüüwa nügü nangëxmagüxë. ²⁰ Rü guxãma ya yíxema marü tórü Cori ya Ngechuchu ya Cristu ya tórü Maxëxëruüxü cuëxgüxe, rü marü nawa ítanguxü i ñoma i naãneärü chixexügü. Natürü ngëxguma chi wenaxärü naxcèx tawoegugu i ngẽma chixexü i nawa ítanguxüchiréxü, rü tümaärü me yixígu na wena ngẽma chixexütüüwa tangëxmagüxü, rü aixcüma noxriarü yexera tichixe. ²¹ Erü ngëxguma chi nüxü tacuëxgüguwena nüxü tarüxoegu i ngẽma ore i mexü ga noxri tayauxgüxü, rü narümemaë chi nixí ga noxtacüma tãü chima nüxü na tacuëxgüxü i ngẽma maxü i aixcüma mexü. ²² Tupanaärü ore i umatüxüwa rü ñanagürü:

“Ngẽma airu i nügü oxgüxü, rü wenaxärü naxcèx nataegu i norü oxü na yaweaxüxcèx. Rü ngẽma cuchi i norü yora meãma aiyachiréxü, rü ngëxgumatama wenaxärü norü aiyanecèx nataegu”, ñanagürü i ngẽma orewa. Rü ngëxgumarüü nixí i ngẽma duüxügü i marü Tupanaärü orexü cuëxgüchiréxü rü ñuxüchi wenaxärü naxcèx woeguxü i norü chixexügü ga noxri nawa ínganguxüchiréxü.

3

Tórü Coriarü taeguchiga

¹ Pa Chaueneëgü ya Pexü Changechaügüxex, ñaã nixí i ngẽma norü taxre i popera i pexcèx chaxümatüxü. Rü yema nüxíraüxü ga poperawa pemaã nüxü chixuxürüü, rü wena pexü chixucuxëgü rü pexna nüxü chacuëxãchixë na aixcüma meã Tupanaärü oregu perüxínüëxcèx. ² Rü chanaxwëxe i nüxna pecuëxãchie i ngẽma ore ga nuxcümaügüxü ga Tupanaärü orearü uruügü ga ixüünexü nüxü ixugügüxü. Rü ngëxgumarüü ta chanaxwëxe i nüxna pecuëxãchie i ngẽma tórü Cori ya Ngechuchu ya tórü Maxëxëruüãrü mugü ga pexü nangúexëxü ga norü orearü uruügü ga nüma pexütawa namugüxü. ³⁻⁴ Natürü chanaxwëxe i guxüärü yexera nagu perüxínüë i ñaã ore i pemaã tá nüxü chixuxü. Rü dücax, rü ngëxguma nagúxchaügu i ñoma i naãne, rü tá íngangü i duüxügü i chixexü i nagu íxü i naxüneärü ngúchaügu. Rü nümagü rü tá nacugüëãcüma ñanagürügü:

“Düxcèx, Cristu inaxuneta na wena núma naxüegaxü. ¿Rü tacü namaã nangupetü i ñuxma na tama ínganguxü? Rü marü düxwa nayue ga tórü oxigü ga yaxögüxü, natürü noxri naãne üxgumama rü nanangëxgumaraüëchatama i guxüma”, ñanagürügü tá. ⁵⁻⁶ Natürü ngẽma duüxügü i ngẽmaãcü idexagüxü rü tama nüxü nacuëxgüchaü ga yema ngupetüxü ga yexguma Tupana ñoma ga naãnewa namuãgu ga guma mucü ga tacü ga iyanaxoxëcü ga guxüma ga tacü ga ñoma ga naãnewa yexmaxü. Rü nuxcümaxüchima naxüpa ga guma mucü rü woetama nayexma ga ñoma ga naãne rü guxüma i daxüwa nüxü idauxü ga Tupana ngoxëxü ga yexguma namuãgu na nangóxcèx. Rü yemaãcü dexáchiüwa nangox ga ñoma ga naãne rü dexáarü ngãxütüchiüwa nayexma, yerü yemaãcü nanamu ga Tupana. ⁷ Natürü ngẽma ñuxma ngëxmaxü i daxüwa nüxü idauxü rü ñoma i naãne rü Tupana namaã nanguxü na yixcama üxüwa yaxaxüxcèx, yerü yemaãcü namaã nanaxuegu. Rü ngẽma ñoma i naãne

rü ngēma daxūwa nüxū idauxū, rü yima üxü ya Tupana nüxū ixuxūnewa tá nixī i aixcūma ínaguāxū i ngēma ngunexū i nagu naxunetaxūgu na napoxcueāxū rü chixexūwa nawogüāxū i ngēma duūxūgü i tama naga ñnüēchaūxū. ⁸ Rü ñuxmax, Pa Chaueneēgü ya Pexū Changechaūgüxex, tama chanaxwèxe i nüxū ipeyarüngümaē na wüxitama i ngunexū rü tórü Coricèx rü 1000 ya taunecürüü yīxū. Rü ngēxgumarüü ta, 1000 ya taunecü rü tórü Coricèx rü wüxitama i ngunexürüü yīxū. ⁹ Rü ñuxre i duūxūgü rü nagu narüxīnūē na tāūtáma paxa ínanguxū ya tórü Cori yema tamaā inaxunetaxürüü. Natürü nüma ya tórü Cori rü tama nanuxcüāē na yanguxēēāxū i ngēma norü uneta, natürü nüma rü tamaā yaxna naxīnūmare. Erü nüma rü tama nanaxwèxe na texé iyarütaxuxū, natürü nanaxwèxe na guxāma nüxū rüxoexū i tümacūma i chixexū. ¹⁰ Natürü ngēma ngunexū i tórü Cori nagu ínguxū, rü taxúema nagu ínanguxēēxūgu tá nixī. Erü ngürüāchimare tá ínangu ñoma wüxi i ngītèxáxū ínguxürüü. Rü ñuxūchi guxūma i tacü i daxūguxū i naānewa ngēxmagūxū rü tá tagaācü niwāixgü rü ngēmaācü tá inayarütauxe. Rü yima üèxcü rü tauemacü rü woramacurigü rü ētagü rü tá nixae rü ngēxma tá nayarüxogü. Rü ngēxgumarüü tá ta i ñoma i naāne rü tá nixa namaā i guxūma i tacü i nawa ngēxmagūxū. ¹¹ Rü ñuxma na ngēmaācü tá namaā nangupetūxū i guxūma i tacü i ngēxmaxū, rü yexeraācü penaxwèxe na aixcūma Tupanapēxewa pīxūünexū rü nüma nanaxwèxexūācüma na pemaxēxū. ¹² Rü name nixī i meā ípenanguxēē i ngēma ngunexū i nagu tá ínanguxū ya tórü Cori ya Tupana. ¡Rü paxa guxūwama nüxū pixu i norü ore rü aixcūma naxcèx pemaxē na ngēmaācü ípenanguxēēxúcèx! Rü ngēma ngunexūgu rü guxūma i daxūwa nüxū idauxū rü tá nixa rü tá inachaxichigü. Rü ñoma i naāne rü üèxcü rü tauemacü rü ētagü rü yima üxūmaā tá inachaxichigü. ¹³ Natürü yixema na yaxōgūxū rü ítananguxēē i ngēma ngexwacaxūxū i daxūguxū i naāne rü ngexwacaxūxū i ñoma i naāne ga Tupana tamaā ixunetaxū. Rü ngēma rü guxūtáma name, rü yixema rü tá ta aixcūma time. ¹⁴ Rü ngēmacèx, Pa Chaueneēgü ya Pexū Changechaūgüxex, rü ñuxma na ípenanguxēēxū i ngēma, rü name nixī i aixcūma meā pemaxē rü aixcūma pegü pengechaūgü na taxuwama nachixexúcèx i perü maxū rü aixcūma petaāēgūxúcèx i ngēxguma wena núma naxūxgu. ¹⁵ Rü name nixī i nüxna pecuèxāchie na yaxna tamaā naxīnūxū ya tórü Cori, erü nanaxwèxe na tüxū nangēxmaxū i tórü maxū i taguma gúxū. Rü ngēmatama pexcèx chanaxūmatūxürüü ta nixī ga pexcèx naxūmatūāxū ga taeneē ya nüxū ingechaūgücü ya Pauru ga yexguma Tupana naporaxēēācüma pexcèx naxūmatūāgu. ¹⁶ Rü guxūma ga norü poperawa rü ñaā pexcèx chaxūmatūxūchiga nanaxūmatü ga Pauru. Natürü yema pexcèx naxūmatūxūwa rü nangēxma i ñuxre i ore i guxchaxū na nüxū icuáxū na tacüchiga yīxū. Rü ngēma duūxūgü i tama aixcūma Tupanaxū cuèxgūxū rü tama aixcūma yaxōgūxū, rü nanaxūchicüügü i ngēma ore ngēxgumarüü na guxūma i Tupanaārü ore i umatūxū naxūchicüügūxürüü. Natürü ngēma chixexū na naxūgūxūgagu rü nügü tátama inayarütauxexē. ¹⁷ Rü ngēmacèx, Pa Chaueneēgü ya Pexū Changechaūgüxex, rü ñuxma na nüxū pecuáxū i tacü tá na ngupetūxū, rü name nixī i pexuāēgü na tama pexū nawomüxēēgūxúcèx i ngēma chixexū i duūxūgü rü tama nüxū perüxoexúcèx na meā peyaxōgūxū. ¹⁸ Rü ngēmacèx, Pa Chaueneēgüx, penaxwèxe na pegü peporaexēēxū na wüxichigü i ngunexū yexeraācü tórü Cori ya Ngechuchu ya Cristu ya tórü Maxēēeruūxū pecuáxúcèx rü yexeraācü nüxū picuáetanūxúcèx na ñuxācü aixcūma pexū nangechaūxū. ¡Rü ngēmacèx rü guxūgutáma rü ngīxā nüxū ticuèxūügu! Rü ngēmaācü yī.

Rü nuāma pexna,

Pedru

NÜXĨRAÜXÜ GA POPERA GA CUÁÛ ÜMATÜXÜ

Ore i tüxü maxëëxüchiga

¹ Pexcëx tanaxümatü nachiga ya Tupana Nane ya Cristu ya yima woetama marü nüxıra yexmacü ga yexguma noxritama tauta naãne üxgu. Rü nüma rü Ore i Maxëëëruü nixĩ i naega erü nüma nixĩ i tamaã nüxü yaxuxü i Tupanachiga rü tüxü namaxëëëxü. Rü toma ga norü ngúexügü na tixígüxü, rü nüxü taxĩnüë rü toxtëümaã nüxü tadaugü rü tomëxmaã nüxü tingögügü. ² Rü yima Maxëëëruü ya Cristu rü toxü nügü nawëx. Rü nüxü tadaugü rü duüxügümaã nüxü tixu na ñuxäcü yixü. Rü ñuxma rü pemaã rü ta nüxü tixuchiga ya yima Cristu ya tüxna naxäcü i maxü i taguma gúxü. Rü noxri rü Nanatüxütawa nayexma, natürü ñoma ga naãnewa nangu rü toxcëx nangox. ³ Rü yema toma nüxü tadaugüxü rü nüxü taxĩnüëxü rü pemaã nüxü tixu na tomücügü pixígüxüçèx, ngëxgumarüü i toma na Tanatü ya Tupana rü Nane ya Ngechuchu ya Cristumücügü tixígüxürüü. ⁴ Rü ngëmacëx pexcëx tanaxümatü i ñaã ore na wüxigu aixcümaxüchi itaãëgüxüçèx.

Ñoma ngóonexürüü name ya Tupana

⁵ Rü ñaã nixĩ ga ore ga tomaã nüxü yaxuxü ga Ngechuchu ya Cristu. Rü pemaã nüxü tixu na ñoma ngóonexürüü namexü ya Tupana, rü nawa rü nataxuma i chixexü i ñoma ëänexürüü ixixü, rü bai i íraxü. ⁶ Rü ngëxguma chi: “Tanatü ya Tupanamücügü tixígü”, ñagügu, natürü chixri imaxëgu, rü tidoraemare erü tama aixcüma meã tamaxë. ⁷ Rü ngëxguma chi Tupanarüü ngóonexüwa imaxëgu, rü yigümücügü tixígü i yixema, rü Tupana Nane ya Ngechuchu rü nagümaã tüxü inayanatauxëë i guxüma i tórü chixexü. ⁸ Ngëxguma chi nüxü ixuxgu rü: “Changearü pecaduãx”, ñagügu, rü yigütama tawomüxëë, rü tidoraemare. ⁹ Natürü ngëxguma chi Tupanamaã nüxü ixuxgu i tórü pecadugü, rü nüma tüxü nüxü nangechaü rü tüxü inayanatauxëë i guxüma i tórü chixexü, erü nüma rü mecü nixĩ rü taguma tüxü nawomüxëë. ¹⁰ Natürü ngëxguma chi: “Tangearü pecaduãxgü”, ñagügu, rü doratëx nüxü tawogü ya Tupana rü tama aixcüma tawa nangëxma i norü ore.

2

Cristu rü tórü chogürüü nixĩ

¹ Pa Chauxacügüx, pexcëx chanaxümatü i ñaã ore na tama chixexü pexügüxüçèx. Natürü ngëxguma chi wüxie chixexü üxgu, rü nangëxma ya tümaëtüwa chogücü nüxna ya Tanatü ya Tupana na tama tüxü napoxcuxüçèx. Rü yima nixĩ ya Ngechuchu ya Cristu ya aixcüma mecü ixicü. ² Rü guma Ngechuchu ya Cristu rü nügü inaxã rü nayu na naxütanüãxüçèx ga tórü pecadugü. Rü tama tórü pecadugüxicatama naxütanü, natürü guxüma i duüxügüarü pecadugü ta naxütanü. ³ Rü ngëxguma chi naga ixĩnüëgu i ngëma tüxü namuxü ya Tupana, rü nüxü tacuèx na aixcüma nüxü icuáxü. ⁴ Rü ngëxguma chi wüxie: “Choma rü Tupanaxü chacuèx”, ñagügu, natürü tama naga taxĩnügu i ngëma tüxü namuxü ya Tupana, rü wüxi i doratëxáxü tixĩ. ⁵ Natürü yixema naga ñnüxë i ngëma tüxü namuxü ya Tupana, rü aixcümaxüchi Tupanaxü tangechaü. Rü ngëmawa nüxü tacuèxgü na aixcüma Tupanaärü duüxügü ixígüxü. ⁶ Rü yixema:

“Tupanaârü duũxũ chixĩ”, ñagũxe, rü name nixĩ na meã tamaxũxũ yema Ngechuchu ya Cristu meã maxũxũrũ.

Tupanaârü mu i ngexwacaxũxũchiga

⁷ Pa Chaueneëgũx, tama wüxi i ngexwacaxũxũ i Tupanaârü mu nixĩ i pexcèx chaxümatũxũ. Natürü ñaãtama noxriarü ügügumama pexũ yexmaxũ ga mu nixĩ. Rü ñaãtama nixĩ i Tupanaârü mu ga nuxcũmaũxũ ga marü nüxũ pexĩnüëxũ. ⁸ Natürü ñaã Tupanaârü mu i pexcèx chaxümatũxũ rü guxüguma nangexwacaxũ. Rü ngëxguma naga pexĩnüëgu i ñaã Tupanaârü mu na pegü pengechaũgũxũ, rü tama ëãnexũwatama pemaxë, natürü Cristurũ ngëma ngóonexũ i aixcũma ixĩxũwa pengëxmagü. ⁹ Rü ngëxguma chi wüxie:

“Choma rü ngëma ngóonexũwa changëxma”, ñagũgu, natürü tũmaëneëchi taxaixgu, rü ëãnexũwatama tangëxma. ¹⁰ Yixema tũmaëneëxũ ngechaũxë rü ngóonexũwa tamaxũ, rü taxucèxma tũxcüũ pecadu taxü. ¹¹ Natürü yixema tũmaëneëchi aixe, rü ëãnexũwatama tamaxũ, rü ëãnexũgu tixü. Rü tama nüxũ tacuèx na ngextá taxũxũ, erü tũmacèx naxëãne. ¹² Pa Chauxacügũx, pexcèx chanaxümatü erü Cristugagu Tupana marü pexũ nüxũ nangechaũ i perü pecadugü. ¹³ Pa Papágũx, pexcèx chanaxümatü i ñaã ore erü nüxũ pecuëxgü ya Tanatü ya Tupana ga noxriarü ügügumama yexmacü. Pa Ngextüxcügũx, pexcèx chanaxümatü erü marü nüxũ perüyexera i ngëma ngoxo i Chataná i chixexũârü üruũ. ¹⁴ Pa Buxügũx, pexcèx chanaxümatü erü marü nüxũ pecuëxgü ya Tanatü ya Tupana. Pa Papágũx, pexcèx chanaxümatü erü marü nüxũ pecuëxgü ya Tanatü ya Tupana ga noxriarü ügügumama yexmacü. Pa Ngextüxcügũx, pexcèx chanaxümatü erü peporae, rü guxüguma peãewa nangëxma i Tupanaârü ore, rü marü nüxũ perüyexera i ngëma ngoxo i Chataná i chixexũârü üruũ. ¹⁵ ¡Tãxũ i pexũ nangúchaũxũ i ñoma i naãne rü norü ngëmaxügü! Ngëxguma chi texéaxũ nangúchaũgu i ñoma i naãne rü tama Tanatü ya Tupanaxũ tangechaũ. ¹⁶ Erü guxũma i ngúchaũgü i ñoma i naãnewa ngëxmaxũ rü ñoma i naãneãrütama nixĩ rü tama Tupanaârü nixĩ. Rü ngëma ngúchaũgü rü ngëma nixĩ i taxüneãrü ngúchaũgü, rü taxetüarü ngúchaũgü, rü yigü na icuëxũgũxũ tórü ngëmaxügümaã. ¹⁷ Natürü ñoma i naãne rü guxũma i ngúchaũgü i nawa ngëxmaxũ rü tá nagux. Natürü yixema Tupanaga ñnüxë rü guxũgutáma tamaxũ.

Ore i aixcũma ixĩxũchiga rü ore i dora ixĩxũchiga

¹⁸ Pa Chauxacügũx, paxa tá nagux i ñoma i naãne. Pema rü marü nüxũ pexĩnüchiga rü tá ñangu i wüxi i Cristuarü uwanü, natürü marü ñangugü i muxüma. Rü ngëmawa nüxũ tacuèx na marü nagúxchaũxũ i ñoma i naãne. ¹⁹ Rü ngëma Cristuarü uwanügü rü tatanüwatama nangëxmagüchirëx, natürü tama aixcũma tatanüxũ nixĩgü, erü ngëxguma chi tatanüxũ yixĩgügu rü tatanügu chitama narücho. Natürü marü tatanüwa ñachoxũ na meãma nüxũ icuáxücèx na tama aixcũma tatanüxũ yixĩgũxũ. ²⁰ Natürü pema rü Cristu marü pexna nanamu i Naãe i Üünexũ, rü ngëmacèx meãma nüxũ pecuèx i Tupanaârü ore. ²¹ Rü ñuxma rü tama nixĩ na tama nüxũ pecuáxücèx na pexcèx chaxümatũxũ. Natürü pexcèx chanaxümatü erü marü meãma nüxũ pecuèx i ngëma ore i aixcũma ixĩxũ. Rü nüxũ pecuèx rü ngëma ore i aixcũma ixĩxũwa rü nataxuma i dora. ²² ¿Texé tiixũ ya yixema idoratëxáxe? Yixema:

“Ngechuchu rü tama aixcũma Cristu ya Tupana Nane nixĩ”, ñagũxe, tixĩ ya idoratëxáxe. Yixema tixĩ ya Cristuarü uwanü, erü tama nüxũ tacuáxchaũ ya Tanatü ya Tupana rü Nane ya Ngechuchu. ²³ Guxãma ya yixema tama nüxũ cuáxchaũxë ya Tupana Nane ya Ngechuchu, rü tama nüxũ tacuáxchaũ ta ya Tanatü ya Tupana. Natürü yixema Ngechuchuaxũ yaxõxë, rü Tanatü

ya Tupanaãxũ rü ta tayaxõ. ²⁴ Rü ngẽmacèx name nixĩ i peyaxõgüama i ngẽma ore ga noxri nüxũ pexĩnüëxũ. Rü ngẽxguma peyaxõgüamagu i ngẽma ore ga noxri nüxũ pexĩnüëxũ, rü aixcüma norü duũxũgü pixĩgü ya Tanatü ya Tupana rü Nane ya Ngechuchu. ²⁵ Rü nümatama ya Ngechuchu ya Cristu nixĩ i tamaã inaxunetaxũ na tüxna naxããxüçèx i maxũ i taguma gúxũ. ²⁶ Nangẽxma i duũxũgü i chixexüwa pexũ gagüchaũxũ. Rü ngẽmachiga nixĩ i pexcèx chanaxümatüxũ i ñãã ore. ²⁷ Natürü pema rü marü Cristu pexna nanamu i Naã i Üünexũ, rü guxũguma pewa nangẽxma. Rü ngẽmacèx tama penaxwèxe i to i perü ngúexẽëxũ erü nümatama i Naã i Üünexũ rü pexũ nangúexẽë i guxũma. Rü norü nguxẽëtae rü aixcüma nixĩ rü tama dora nixĩ. Rü ngẽmacèx name nixĩ na guxũguma Cristuaxũ peyaxõgüxũ, ngẽma Naã i Üünexũ pexũ ngúexẽëxũãcüma. ²⁸ Rü ñuxmax, Pa Chauxacügüx, rü name nixĩ na meãma Cristuaxũ peyaxõgüxũ na tama nüxũ imuũëxüçèx, rü tama ixãneëxüçèx napëxewa i ngẽxguma wena nuã naxũxgu. ²⁹ Pema nüxũ pecuèx na Cristu rü aixcüma mecü yĩxũ. Rü ngẽxgumarüü ta name nixĩ na nüxũ pecuáxũ na guxũma i duũxũgü i mexũ ügüxũ rü Tupanaxãcügü na yixĩgüxũ.

3

Tupanaxãcügüchiga

¹ ¡Dücèx, Pa Chaueneëgüx, ñuxãcü poraãcü tüxũ nangechaũ ya Tanatü ya Tupana! Rü ngẽmacèx nixĩ i naxãcügümaã tüxũ naxuxũ i nümax. Rü aixcüma naxãcügü tixĩgü. Rü ngẽmacèx ñoma i naãnecüãx i duũxũgü rü tama tüxũ nacuáxchaũ erü Tupanaxũ rü ta tama nacuáxchaũgü. ² Pa Chaueneëgü ya Pexũ Changechaũgüxe, ñuxma rü marü Tupanaxãcügü tixĩgü woo tama tüxũ nüxũ nacuèxëë na ñuxãcü tá ixĩgüxũ i yixcüra. Natürü nüxũ tacuèxgü na Ngechuchurüü tá ixĩgüxũ i ngẽxguma nangoxgu, erü tá nüxũ tadaugü na ñuxãcü yĩxũ i nümax. ³ Rü guxãma ya yíxema yaxõxè na Ngechuchurüü tá tiixũ, rü tügüna tadau na Ngechuchu ya Cristurüü aixcüma Tupanapëxewa tamexũ. ⁴ Natürü guxãma ya yíxema pecadu üxe, rü Tupanamaã chixexũ taxü. Erü ngẽxguma tama Tupanaga taxĩnügu, rü tapecaduãx. ⁵ Pema nüxũ pecuèx rü Ngechuchu ya Cristu rü ñoma ga naãnewa naxũ na iyanaxoxëëãxüçèx i tórü pecadugü. Rü nüma rü taguma pecadu naxü. ⁶ Rü ngẽmacèx guxãma ya yíxema aixcüma nüxũ yaxõgüxe, rü tama pecadu taxügüecha. Natürü guxãma ya yíxema pecadu üechaxe, rü ngẽmaãcü tamaxè erü taguma Cristuxũ tadau, rü taguma nüxũ tacuèx. ⁷ Pa Chauxacügüx, ¡täxũ i naga pexĩnüëxũ i ngẽma duũxũgü i pexũ iyarütauxexëëchaũxũ! Yíxema mexũ úxe rü aixcüma mecü tixĩ, ngẽxgumarüü ya Cristu na aixcüma mecü yĩxürüü. ⁸ Natürü yíxema pecadu üechaxe rü ngẽmawa tüxũ tacuèx na Chatanáãrü duũxũ tiixũ, erü nüma i Chataná rü noxriarü ügügumama pecadu naxüecha. Rü yemacèx ga Tupana Nane rü ñoma ga naãnewa naxũ na iyanaxoxëëãxüçèx ga yema Chataná üxũ. ⁹ Rü yíxema Tupanaxãcü ixĩxè rü tama pecadu taxüecha, erü naxãcüxüchi tixĩ. Rü taxuacüma pecadu taxüecha erü Tupana nixĩ ya tümanatü. ¹⁰ Yíxema chixexũ úxe rü tümaëneëchi aixe, rü tama Tupanaxãcü tixĩ. Rü ngẽmawa nüxũ tacuèx na texé tixĩgüxũ ya Tupanaxãcügü rü texé tixĩgüxũ ya Chatanáãcügü.

Name nixĩ na yigü ingechaũgüxũ

¹¹ Rü yexguma noxritama pexũ tangúexëëgu, rü pemaã nüxũ tixu na guxãma yigü ingechaxũgüxũ. ¹² Rü tama tanaxwèxe na Caĩrüü ngoxo i Chatanáãcü ixĩgüxũ. Yerü nüma rü naëneëxũ nimèx. ¿Rü tacüçèx nixĩ ga yamáãxũ? Nayamèx yerü yema nüma naxüxũ rü tama name, rü yema naëneë üxũ rü name. ¹³ Pa Chaueneëgüx, ¡täxũ i pebaixãchiãëgüxũ ega

pexchi naxaiegu i ñoma i naãnecũãx i duũxũgũ! ¹⁴ Yixema rü marü nüxna itanguxũ i ngẽma yu rü ñuxma rü marü maxũwaama tangẽxmagũ. Nũxũ tacuèxgũ i ngẽma erü nüxũ tangechaũgũ i taeneẽgũ. Yixema tama tũmaẽneẽxũ ngechaũxẽ rü yuwatama tangẽxma. ¹⁵ Rũ yixema tũmaẽneẽchi aixe rü wüxi i máetaxũrü tixĩ. Rũ pema nüxũ pecuèxgũ i wüxi i máetaxũ rü nüxũ nataxuma i norü maxũ i taguma gúxũ. ¹⁶ Rũ Ngechuchu ya Cristu rü tórü pecaducèx nayu, rü yemaãcü tüxũ nüxũ nadauxẽ i ngẽma ngechaũ i aixcũma ixĩxũ. Rũ ngẽxgumarũ ta i yixema, rü tanaxwèxe na ímemarexũ na nüxũ rüngũxẽẽxũ i taeneẽgũ woo ngemagu iyuxgu. ¹⁷ Natürü ngẽxguma chi wüxi i yatũãxũ nangẽxmagu i muxũma i norü ngẽmaxũgũ, rü chi nüxũ nadèuxgu i namücü na nüxũ nataxuxũ, rü taxuacũma:

“Choma rü Tupanaxũ changechaũ”, ñanagürü, ega tama nüxũ nangũxẽẽgu i namücü. ¹⁸ Pa Chauxacügũx, tama name i taèxmaã rü tórü oremaãxĩcatama nüxũ tangechaũ i taeneẽ. Natürü tanaxwèxe i tórü maxũmaã rü tórü ü i mexũmaã nüxũ tangechaũ.

Tama taxãneẽ na Tupanana ingaicamagũxũ

¹⁹⁻²⁰ Rũ ngẽxguma aixcũma yigü ingechaũgũgu, rü nüxũ tacuèx na aixcũma naga ixĩnũxũ i ngẽma ore i aixcũma ixĩxũ, rü Tupanapẽxewa rü aixcũma naxãcügũ ixĩgũxũ, woo ngẽxguma taãewa nagu rüxĩnũgu rü:

“Tama Tupanaxãcü chixĩ”, ñagügu. Erü nüxũ tacuèx rü Tupana nixĩ i taããrũ yexera, rü nüma nüxũ nacuèx i guxũma. ²¹ Pa Chaueneẽgũ ya Pexũ Changechaũgũxex, ngẽxguma taãewa nüxũ icuèxgu na Tupanaxãcũxũchi ixĩgũxũ, rü tama taxãneẽ na nüxna ingaicamagũxũ ya Tanatü ya Tupana. ²² Rũ nüma tá tüxna nanaxã i guxũma i tacü i naxcèx ícaxũ erü naga taxĩnũ i ngẽma tüxũ namuxũ rü tanaxü i ngẽma nüma namaã nataãxũ. ²³ Rũ nüma tüxũ namu na Nane ya Ngechuchu ya Cristuaxũ yaxõgũxũ rü yigü ingechaũgũxũ, yema nüma tüxũ namuxũãcü. ²⁴ Rũ yixema naga ñnũxẽ i ngẽma Tupana tüxũ muxũ, rü aixcũma Tupanaãrũ duũxũgũ tixĩgũ rü nüma ya Tupana rü aixcũma tũmawa namaxũ. Rũ ñuxma rü nüxũ tacuèx na aixcũma Tupanaãrũ duũxũgũ ixĩgũxũ rü tawa namaxũxũ, erü Naãe i Üünexũ ga tüxna namuxũ tüxũ nüxũ nacuèxẽ.

4

Yixema tüxũ nangẽxmaxẽ i Tupanaãe i Üünexũ rü yixema tüxũ nangẽxmaxẽ i Cristuarü uwanüãe

¹ Pa Chaueneẽgũ ya Pexũ Changechaũgũxex, jTãxũ i nüxũ peyaxõgũxũ i guxũma i orearü uruũgũ i nügü ixugũgũxũ na aixcũma Tupanaãrũ orearü uruũgũ yixĩgũxũ! Natürü name nixĩ i penangugü i norü ore na nüxũ pecuáxũcèx ngoxita aixcũma Tupanaãe yĩxũ i nawa idexaxũ rü èxna tama. Erü ñoma i naãnewa rü guxũwama nangẽxma i muxũma i idorateèxgũxũ i nügü ixugũxũ na Tupanaãrũ orearü uruũgũ yixĩgũxũ. ² Rũ tá pemaã nüxũ chixu na ñuxãcü tá nüxũ pecuáxũ na texé tĩxũ ya yixema aixcũma Tupanaãe tũmawa ngẽxmaxẽ. Rũ dúcax, guxũma i orearü uruũgũ i nüxũ ixugũxũ na Tupana duũxũxũ yaxĩxẽẽxũ ya Ngechuchu ya Cristu, rü ngẽma nixĩ i aixcũma Tupanaãe nawa idexaxũ. ³ Natürü guxũma i ngẽma orearü uruũgũ i tama nüxũ ixugũxũ na Tupana duũxũxũ yaxĩxẽẽxũ ga Ngechuchu, rü ngẽma rü tama nüxũ nangẽxma i Tupanaãe i Üünexũ. Natürü Cristuarü uwanüãe nixĩ i nawa ngẽxmaxũ. Marü nüxũ pexĩnũe na ínanguxchaũxũ i Cristuarü uwanü, natürü ñuxma rü marü ñoma i naãnewa nangẽxma. ⁴ Pa Chauxacügũx, pema rü Tupanaxãcügũ pixĩgũ. Rũ marü nüxũ perüyexera i ngẽma tama aixcũma Tupanaãrũ orearü uruũgũ ixĩgũxũ. Erü ngẽma Tupanaãe i Üünexũ

i peãewa ngẽmaxũ rü nüxũ narüyexera i ngẽma Cristuarü uwanüãẽ i ñoma i naãnecũãxgüwa ngẽmaxũ. ⁵ Rü nüma i Cristuarü uwanüãrũ duũxũgü rü ñoma i naãnecũãxgü nixĩ. Rü ngẽmacèx ñoma i naãnechigagu nidexagü. Rü ñoma i naãnecũãx i duũxũgü rü nüxũ inarüxĩnũ. ⁶ Natürü i yixema rü Tupanaxãcügü tixĩgü. Rü yixema Tupanaxũ cuáxe rü tüxũ itarüxĩnũ. Natürü yixema tama Tupanaxũ cuáxe rü tama tüxũ itarüxĩnũ. Rü ngẽmawa nüxũ tacuèxgü na texé tixĩgüxũ ya aixcüma Tupanaãrũ duũxũgü ixĩgüxe rü texé tixĩgüxũ ya Cristuarü uwanüãrũ duũxũgü ixĩgüxe.

Tupana tüxũ nangechaũ

⁷ Pa Chaueneëgü ya Pexũ Changechaũgüxex, name nixĩ na yigü ingechaũgüxũ, erü Tupana nixĩ ya tüxũ ngúexëcũ na yigü ingechaũgüxũ. Rü guxãma ya yixema tümaëneëxũ ngechaũxẽ rü Tupanaxãcũ tixĩgü rü Tupanaxũ tacuèx. ⁸ Yixema tama tümaëneëxũ ngechaũxẽ rü tama Tupanaxũ tacuèx, erü Tupana nixĩ ya tüxũ ngúexëcũ na yigü ingechaũgüxũ. ⁹ Tupana rü ñoma ga naãnewa nanamu ga Nane ya nügümaã wüxicacü na yimagagu tüxũ nangẽmaxüçèx i maxũ i taguma gúxũ. Rü yemawa Tupana tüxũ nüxũ nadauxëẽ na ñuxãcũ tüxũ nangechaũxũ. ¹⁰ Rü woo Tupanaxũ tangechaũgü, natürü ngẽma ngechaũ i guxũãrũ yexera ixĩxũ nixĩ na nüma tüxũ nangechaũxũ rü ñoma ga naãnewa na namuãxũ ga Nane na taxcèx nayuxüçèx rü naxütanüãxüçèx ga tórü pecadugü. ¹¹ Pa Chaueneëgü ya Pexũ Changechaũgüxex, yexguma yemaãcũ tüxũ nangechaũgu ga Tupana, rü ngẽmacèx name nixĩ i yixema rü ta yigü tangechaũgü. ¹² Taguma texé Tupanaxũ tadau. Natürü ngẽxguma aixcüma yigü ingechaũgügu, rü Tupana rü tawa namaxũ rü norü ngechaũ rü aixcümaxũchi tórü maxũwa nangox. ¹³ Rü nüma rü marü tüxna nanamu ga Naãẽ i Üünexũ. Rü ngẽmawa nüxũ tacuèx na aixcüma norü duũxũgü ixĩgüxũ rü nüma rü tawa na namaxũxũ. ¹⁴ Rü tomatama nüxũ tadaugü rü nüxũ tixuchigagü na Tanatü ya Tupana núma namuxũ ga Nane na guxũma i duũxũgüxũ namaxëxëxüçèx. ¹⁵ Rü yixema yaxõxë rü nüxũ ixuchigaxe na Tupana Nane yĩxũ ya Ngechuchu, rü aixcüma Tupanaãrũ duũxũ tixĩ, rü Tupana rü tümawa namaxũ. ¹⁶ Rü yixema nüxũ tacuèxgü rü tayaxõgü na Tupana rü poraãcũ tüxũ nangechaũxũ, erü nüma nixĩ i aixcüma guxãxũ nangechaũxũ. Rü yixema aixcüma tümaëneëxũ ngechaũxẽ, rü Tupanaãrũ duũxũ tixĩ, rü nüma ya Tupana rü aixcüma tümawa namaxũ. ¹⁷ Rü ngẽxguma aixcüma Tupanaxũ ingechaũgügu, rü tórü maxũwa nangox i ngẽma, rü täütáma nüxũ tamuüẽ i ngẽma ngunexũ i nagu tüxũ yacagüxügu naxcèx i tórü maxũ. Erü woo ñoma i naãnewa tangẽxmagü, natürü napëxewa rü Cristurüũ tixĩgü. ¹⁸ Rü ngẽxguma aixcüma Tupanaxũ ingechaũgügu, rü nüxũ tacuèx na täütáma tüxũ napoxcuexũ, rü ngẽmacèx taxucèxma nüxũ tamuüẽ. Natürü ngẽxguma chi nüxũ imuüëgu, rü nüxũ tacuèx na tama aixcüma nüxũ ingechaũgüxũ. ¹⁹ Rü yixema rü Tupanaxũ tangechaũgü, yerü nüxĩra tüxũ nangechaũ ga nümax. ²⁰ Ngẽxguma chí texé:

“Choma rü Tupanaxũ changechaũ”, ñagügu, natürü tümaëneëchi taxaixgu, rü tidora. Erü ngẽxguma tama nüxũ tangechaũgu i tümaëneë i nüxũ tadauxũ çrü ñuxücürüwa tá nüxũ tangechaũ ya Tupana ya tama nüxũ tadaucü? ²¹ Rü Ngechuchu ya Cristu tüxũ namu rü ñanagürü:

“Yixema Tupanaxũ ngechaũxẽ, rü name nixĩ na tümaëneëxũ rü ta tangechaũxũ”, ñanagürü.

5

Nüxü tarüyexera i ñoma i naãneãrü ngúchaũgü

¹ Ngechuchu rü Tupana Nane ya Cristu nixĩ. Rü guxãma ya yixema nüxü yaxõxê, rü Tupanaxãcü tixĩgü. Rü yixema Tanatü ya Tupanaxü ngechaũxê, rü nüxü tangechaũ ta i guxüma i naxãcügü. ² Rü ngëxguma Tupanaxü ingechaũgügu rü naxüxgu i ngëma nüma tüxü namuxü, rü nüxü tacuèx na aixcüma nüxü ingechaũgüxü i ngëma naxãcügü ixĩgüxü. ³ Rü ngëxguma aixcüma Tupanaxü ingechaũgügu rü naga taxĩnüê i ngëma tüxü namuxü. Rü ngëma tüxü namuxü rü tama naguxcha na naga ixĩnüêxü. ⁴ Erü guxãma ya aixcüma Tupanaxãcü ixixê, rü tama ñoma i naãneãrü ngúchaũ i chixexügu tarüxĩnü. Rü yixema rü tayaxõgü, rü ngëmacèx tama name i ñoma i naãneãrü ngúchaũ i chixexügu tarüxĩnüê. ⁵ Rü yixema yaxõxê na Tupana Nane yĩxü ya Ngechuchu, rü yixema tixĩ ya tama ñoma i naãneãrü ngúchaũ i chixexügu rüxĩnüê.

Ore i Tupana Nanechiga

⁶ Rü nüxü tacuèx na aixcüma Tupana Nane yĩxü ya Ngechuchu. Yerü yexguma ñoma ga naãnewa nayexmagu rü dexáwa íbabaiegu, rü nümatama ga Tupana nüxü nixu na Nanexüchi yĩxü. Rü yexguma curuchagu nayüxgu rü nagü inabaãgu ga Ngechuchu, rü Tupana rü wenaxãrü inanawèx na aixcüma Nane na yĩxü. Rü ngëxgumarüü ta i ngëma Naãê i Üünexü i taguma idoraxü, rü tüxü nüxü nacuèxêê na aixcümaxüchi Tupana Nane na yĩxü. ⁷ Rü ngëmaãcü tüxü nangëxma i tomaëxpüx i cuèxruũgü i tüxü nüxü cuèxêêxü na aixcüma Tupana Nane yĩxü ya Ngechuchu. ⁸ Rü ngëma norü wüxi nixĩ i Naãê i Üünexü, rü ngëma norü taxre nixĩ ga yema Tupanaga ga yexguma Ngechuchu dexáwa íbabaiegu, rü ngëma norü tomaëxpüx nixĩ ga yema Tupana üxü ga yexguma curuchagu nagü inabaãgu ga Ngechuchu. Rü guxüma i ngëma tomaëxpüx, rü wüxigu nüxü nixu na aixcüma Tupana Nane yĩxü ya Ngechuchu. ⁹ Nüxü tayaxõgü i duüxügu ega tacüxü tamaã yaxugügu. Natürü Tupanaãrü ore nixĩ i yexeraãcü aixcümaxüchi ixixü. Rü Tupana nixĩ ya tamaã nüxü ixucü na Ngechuchu rü Nane yĩxü. ¹⁰ Rü yixema nüxü yaxõxê ya Tupana Nane rü nüxü tacuèx na aixcüma yĩxü i ngëma ore i Tupana nüxü ixuxü i Nanechiga. Natürü yixema tama Tupanaãxü yaxõxê rü doratèèx nüxü tawogü ya Tupana erü tama tayaxõ i ngëma ore i Tupana nüxü ixuxü i Nanechiga. ¹¹ Rü ñaã nixĩ i norü ore ya Tupana i tamaã nüxü yaxuxü, rü ñanagürü:

“Chomatama marü pexna chanaxã i maxü i taguma gúxü. Rü ñaã maxü rü Chaunegagu pexü nangëxma”,
ñanagürü. ¹² Yixema nüxü yaxõxê ya Tupana Nane rü tüxü nangëxma i ngëma maxü i taguma gúxü. Natürü yixema tama nüxü yaxõxê ya yima Tupana Nane rü tama tüxü nangëxma i ngëma maxü.

Cuáũ rü ñuxre ga norü ucuxëmaã inayacuèxêê ga norü popera

¹³ Pa Chaueneëgüx ya Tupana Naneãxü Yaxõgüxex, pexcèx chanaxümatü i ñaã ore na nüxü pecuáxücèx na pexü nangëxmaxü i ngëma maxü i taguma gúxü. ¹⁴ Rü ngëmacèx tama taxãneê na nüxna ingaicamagüxü ya Tupana. Rü nüxü tacuèxgü ega tacücèx nüxna icaxgu, rü nüma tüxü naxĩnü i ngëxguma norü ngúchaũ yixĩgu i ngëma naxcèx nüxna icaxü. ¹⁵ Rü ngëxguma nüxü icuèxgu na nüma tüxü naxĩnüxü i ngëxguma tacücèx nüxna icaxgu, rü nüxü tacuèx ta na tüxna naxããxü i ngëma naxcèx nüxna icaxü. ¹⁶ Rü ngëxguma chi texé nüxü dèuxgu i tümaëneê na pecadu naxüxü, rü name nixĩ na naxcèx tayumüxexü ega tama pecadu i iyanatauxêêxü yixĩgu. Rü Tupana tá nana-maxêê i ngëma tümaëneê ega tama pecadu i iyanatauxêêxü yixĩgu. Nangëxma

i pecadu i tũxũ iyarũtauxẽẽxũ. Rũ ngẽxguma ngẽma pecaduwe naxũãmagu i wũxi i peeneẽ, rũ tama pemaã nũxũ chixu na naxcèx peyumũxẽgũxũ. ¹⁷ Guxũma i chixexũ i ixũxũ, rũ pecadu nixĩ. Natũrũ nangẽxma i pecadu i tama tũxũ iyarũtauxẽẽxũ. ¹⁸ Rũ nũxũ tacuèx, rũ yĩxema Tupanaxãcũ ixĩxẽ, rũ tama pecadu taxũecha, erũ nũma ya Tupana Nane rũ tũxna nadau. Rũ taxuacũma tũxna nangaicama i ngoxo i Chataná i tũxũ pecaduãxẽẽchaũxũ. ¹⁹ Nũxũ tacuèxgũ na Tupanaxãcũgũ ixĩgũxũ, natũrũ guxũma i ñoma i naãnecũãx rũ ngoxo i Chatanámeẽxẽwa nangẽxmagũ. ²⁰ Rũ nũxũ tacuèx ta na ñoma ga naãnewa nanguxũ ga Tupana Nane, rũ tũxna nanaxã ga cuèx na nũxũ icuèxgũxũcèx ya yima aixcũmaxũchi Tupana ixĩcũ. Rũ norũ duũxũgũ tixĩgũ ya yima aixcũmaxũchi Tupana ixĩcũ, erũ Nane ya Ngechuchu ya Cristuarũ duũxũgũ tixĩgũ. Rũ nũma ya Tupana Nane nixĩ i aixcũmaxũchi Tupana yĩxũ rũ tũxna naxããxũ i maxũ i taguma gũxũ. ²¹ Pa Chauxacũgũx, ¡Pegũna pedaugũ na tama nũxũ peyaxõgũxũcèx i tupanachicũgũ! Rũ ngẽxĩcatama nixĩ i chorũ ore i pemaã nũxũ chixuxũ.

Rũ nuãma pexna,
Cuáũ

NORÛ TAXRE GA POPERA GA CUÁÛ ÜMATÛXÛ

CuáÛãrũ moxẽ

¹ Pa Chaueneëgũ i Yaxõgũxe ya Tupana Pexũ Dexex, pexcèx chanaxümatũ i choma i CuáÛ i yaxõgũxũãrũ ãëxgacũ na chiĩxũ. Choma rü aixcũma pexũ changechaũ. Rü tama i chaxica, natürũ guxũma i ngẽma nüxũ cuèxgũxũ i Tupanaãrũ ore i aixcũma ixĩxũ, rü ngẽxgumarũ ta pexũ nangechaũgũ. ² Pexũ tangechaũ erũ toxrũ nüxũ pecuèxgũ i ngẽma ore i aixcũma ixĩxũ i guxũgutáma tawa ngẽxmaxũ. ³ Rü nüma ya Tanatũ ya Tupana rü Nane ya Ngechuchu ya Cristu rü poraãcũ tá pexũ narüngũxẽëgũ rü nüxũ pengechaũtümũgũ rü pexũ nataãëxẽëgũ, erũ nüxũ pecuèx i ngẽma ore i aixcũma ixĩxũ rü pegũ pengechaũgũ. ⁴ Rü poraãcũ chataãë ga yexguma nüxũ chadèuxgu na ñuxãcũ ñuxre i petanũxũgũ rü aixcũma meã naga na naxĩnũëxũ i ngẽma ore i aixcũma ixĩxũ, yema Tanatũ ya Tupana tũxũ muxürũ. ⁵ Rü ñuxmax, Pa Chaueneëgũ ya Pexũ Changechaũgũxex, rü pexna nüxũ chacuèxãchixẽë na namexũ na yigũ ingechaũgũxũ. Rü ngẽma rü tama wüxi i ngexwacaxũxũ i Tupanaãrũ mu nixĩ. Natürũ yematama nixĩ ga mu ga noxriarũ ügũgumama Tupana tũxna ãxũ. ⁶ Ngẽxguma Tupanaxũ ingechaũgũgu, rü tanaxũ i guxũma i ngẽma tũxũ namuxũ. Erũ nüma rü noxriarũ ügũgumama tamaã nüxũ nixu na yigũ ingechaũgũxũcèx i wüxichigũ.

Orearũ uruũgũ i womüxẽëruũchiga

⁷ Guxũwama i ñoma i naãnewa rü nanaxĩãne i muxũma i womüxẽëruũgũ ixĩgũxũ. Rü nüxũ nixuchigagũ na tama Tupana duũxũxũ yaxĩxẽëxũ ga Ngechuchu ya Cristu. Rü ngẽma ngẽmaãcũ idexaxũ, rü wüxi i womüxẽëruũ nixĩ, rü Cristuarũ uwanũ nixĩ. ⁸ ¡Ipxeuãëgũ na taxúema pexũ womüxẽëgũxũcèx rü na tama natücèxma yĩxũcèx i tórũ puracũ! ¡Natürũ meã peyaxõgũama na aixcũma penayaxuxũcèx i guxũma i ngẽma Tupana pexna ãxchaũxũ! ⁹ Rü yixema nangupetüxẽëxẽ ga yema Cristu tũxũ ngúexẽëxũ, rü tama aixcũma Tupanaxũ tacuèx. Natürũ yixema tama nüxna íchõxũxẽ ga yema Cristu tũxũ ngúexẽëxũ, rü aixcũma nüxũ tacuèx ya Tanatũ ya Tupana rü Nane ya Ngechuchu. ¹⁰ Rü ngẽxguma chi wüxi i duũxũ petanüwa nguxgu rü tama yema Cristu tũxũ ngúexẽëxũmaã pexũ nangúexẽëgu, rü ¡tãütáma penayaxu i pechiũwa rü bai i nüxũ perümoxëgũ! ¹¹ Erũ ngẽxguma wüxie tümachiũwa nayauxgu, rü tananaãëraxũ rü natanũxũ tũgũ tixĩxẽë nawa i ngẽma norũ chixexũ.

CuáÛãrũ ore ga nawa iyacuáxũ

¹² Choxũ nangëxma i muxũma i to i ore i pemaã nüxũ chixuxchaũxũ. Natürũ tama chanaxwèxe na ñaã poperawa pemaã nüxũ chixuxũ, erũ paxa tá petanüwa íchayadauxchaũ na chomatama pemaãxũchi nüxũ chixuxũcèx na ngẽmaãcũ wüxigu aixcũma itaãëgũxũcèx. ¹³ Rü ngẽma nuã natanüwa changëxmaxũ i yaxõgũxũ i peeneëgũ ixĩgũxũ i Tupana dexũ, rü pexũ narümoxëgũ. Rü ngẽxĩcatama nixĩ i chorũ ore i pemaã nüxũ chixuxũ.

Rü nuãma pexna,
CuáÛ

NORŨ TOMAËXPŨX GA POPERA GA CUÁŨ ŨMATŨXŨ

CuáŨ rŭ Gayumaã nataã

¹ Pa Chaueneẽ, Pa Gayu i Aixcũma Cuxũ Changechaũxẽx, rŭ cuxcèx chanaxũmatũ i choma i CuáŨ i yaxõgũxũãrũ ãẽxgacũ na chiixũ. ² Pa Chaueneẽx, Tupanana chaca na meã cuxna nadauxũcèx i curũ maxũwa rŭ cuxunewa, ngẽma curũ õwa cuxna na nadauxũrũ. ³ Rŭ poraãcũ chataãe ga yexguma núma naxĩxgu ga ñuxre ga taeneẽgũ, rŭ chomaã nũxũ yaxugũgu ga cuchiga na ñuxãcũ meã cuyaxõxũ i Tupanaãrũ ore i aixcũma ixĩxũ, rŭ guxũguma meã naga na cuxĩnũxũ. ⁴ Rŭ guxũguma chataãẽxũchi i ngẽxguma nũxũ chaxĩnũgu na ñuxãcũ Tupanaãrũ ore nũxũ ixuxũãcũma meã namaxẽxũ i chauxacũgũ. Rŭ aixcũma nataxuma i to i taãe i ngẽmaãrũ yexera ixĩxũ. ⁵ Pa Chaueneẽ i Cuxũ Changechaũxẽx, mexũ cuxũ erũ nũxũ curũngũxẽe i ngẽma togũ i taeneẽgũ i toxnamana ne ìxũ i cuxũtawa ngugũxũ. ⁶ Rŭ nũmagũ rŭ nuã nangugũ, rŭ torũ ngutaquẽxepataũwa nũxũ nixugũe na ñuxãcũ nũxũ cungechaũxũ rŭ namaã cumecũmaxũ. Rŭ chanaxwèxe i nũxũ curũngũxẽe i ngẽma taeneẽgũ i ngẽxguma wena cuxũtawa nangugũgu. Rŭ ngẽxguma cuxna íyaxĩxgu rŭ ñnũxna naxã i tacũ i nũxũ taxuxũ i norũ namawaũ! Erũ Tupanaãrũ me nixĩ na ngẽmaãcũ nũxũ rũngũxẽẽxũ i norũ orearũ uruũgũ. ⁷⁻⁸ Rŭ nũmagũ, rŭ Ngechuchu ya Cristuarũ puracũ nixĩ i naxũgũxũ, rŭ ngẽmacèx norũ oremaã nanaxĩãne. Natũrũ tama nanayauxgũ i ngẽma tama yaxõgũxũãrũ ngũxẽe, rŭ ngẽmacèx name nixĩ i yixema na nũxũ rũngũxẽẽgũxũ na ngẽmaãcũ yixema rŭ ta wũxigu namaã naxũgũxũcèx i Tupanaãrũ puracũ.

Diótepe rŭ chixexũ naxũ natũrũ Demétriu rŭ mexũ naxũ

⁹ Choma rŭ marũ chanaxũmatũ i wũxi i popera naxcèx i ngẽma tupaucatanũxũgũ i curũ ããnewa ngẽxmagũxũ. Natũrũ nũma i Diótepe rŭ tama naga naxĩnũchaũ i ngẽma nũxũ tixuxũ, erũ nanaxwèxe na nũmatama namuãxũ i ngẽma tupaucatanũxũ. ¹⁰ Rŭ ngẽxguma ngẽma chaxũxgu rŭ tá nũxũ chaxoregũ erũ tochiga i chixexũmaã inayarũdexanexũ. Rŭ woo tomaã na ngexũ nawagũxũ, rŭ naetũwa to i chixexũ naxũ, erũ tama nanayauxchaũ i ngẽma taeneẽgũ i ngẽma ngugũxũ. Rŭ nanachuxu na texé nayaxuxũ i ngẽma taeneẽgũ. Rŭ yixema nayauxchaũxẽ, rŭ ngutaquẽxepataũwa tũxũ ínawoxũ. ¹¹ Pa Chaueneẽ i Cuxũ Changechaũxẽx, ¡Tãxũ i nũxũ cuyadauxũxũ i ngẽma togũ i chixexũ ũgũxũ! Natũrũ name nixĩ i nũxũ cuyadauxũ i ngẽma mexũ ũgũxũ. Erũ yixema guxũguma mexũ úxe rŭ Tupanaxãcũ tixĩ. Natũrũ yixema chixexũ uechaxe rŭ tama Tupanaxũ tacuèx. ¹² Guxũma i duũxũgũ nũxũ ixuxgu i Demétriu rŭ wũxi ya mecũ nixĩ. Rŭ toma rŭ ta nũxũ tacuèx na meã naga naxĩnũxũ i Tupanaãrũ ore i aixcũma ixĩxũ. Rŭ ngẽmacèx toma rŭ ta nũxũ tixu na aixcũma mecũ yĩxũ. Rŭ cuma nũxũ cucuèx na aixcũma na yĩxũ i ngẽma nũxũ tixuxũ.

CuáŨãrũ ore ga nawa iyacuáxũ

¹³ Choma choxũ nangẽxmachirẽx i muxũma i chorũ ore i cumaã nũxũ chixuxchaũxũ, natũrũ tama ñãã poperagu cuxcèx chanaxũmatũchaũ. ¹⁴ Erũ choma rŭ paxa ngẽma chaxũxchaũ, rŭ ngẽxguma rŭ meã tá yigũmaã tidexagũ. ¹⁵ ¡Meã cuxũ naxũpetũ rŭ tãxũ i cuxoegaãẽxũ! Tamũcũgũ i númacũãx rŭ moxẽ cuxcèx ngẽma namugũ. Rŭ chanaxwèxe i nũxũ curũmoxẽ i wũxichigũ i

tamüçügü i ngema ngẽxmagüxũ. Rũ ngẽxĩcatama nixĩ i chorü ore i cumaã nüxũ
chixuxũ.

Rũ nuãma cuxna,
Cuáũ

POPERA GA YUDA ÜMATÜXÜ

Yema yaxõgüxüxü narümoxë ga Yuda

¹ Pa Yaxõgüxü i Guxüwama Ngëxmagüxüx, choma i Yuda nixi i pexcèx chanaxümatüxü i ñaã popera. Rü choma nixi i Chaütiágueneë chiixü, rü Ngechuchu ya Cristuarü duixü chixi. Rü pexcèx chanaxümatü i pema na Tanatü ya Tupana pexü dexü rü pexü ngechaüxü rü Ngechuchu ya Cristu pexna dauxü. ² Rü pexcèx chayumüxë na guxüguma Tupanaãxü pengechaütümügüxücèx, rü pexü nataãxëëgüxücèx, rü pexü nangechaüxücèx.

Duixügü i doramaã ngüxëëtaegüxüchiga

³ Pa Chaueneëgü ya Pexü Changechaügüxex, noxri rü poraãcü choxü nangüchaü na pexcèx chanaxümatüxü nachiga i ngëma maxü i taguma gúxü i tüxü ngëxmaxü. Natürü ñuxma na petanügu nachocuxü i ñuxre i duixügü i íyatoxëëgüchaüxü i Tupanaãrü ore, rü ngëmacèx chanaxwëxe na pexcèx chanaxümatüxü na pexü chaxucüxëxücèx rü ípenapoxüxücèx i ngëma ore i aixcüma ixixü ga nuxcüma wüxicanatama Tupana norü duixügüna äxü. ⁴ Rü ngëma duixügü i pexü nawomüxëëcüma petanügu chocuxü nixi i pexü ngüxëëxü rü ñaxü:

“Tupana rü namecümaxüchi rü ngëmacèx täütáma pexü napoxcue ega woo chixri pemaxëgu”, ñaxü. Rü ngëxgumarüü ta tama nüxü nacüxgüchaü ya tórü Cori ya Ngechuchu ya Cristu ya tórü yora ixicü. Natürü ngëma duixügü i ngëmaãcü maxëxü, rü woetama nuxcü mama Tupanaãrü ore i ümatüxüwa rü marü nüxü nixu na Tupana tá napoxcuxü. ⁵ Rü woo na marü nüxü pecuáxü natürü pexna nüxü chacuëxächixëëchaü na ñuxãcü namaã nangupetüxü ga yema nuxcümaügüxü ga Yudíugü ga Moíchéwe rüxixü. Rü tórü Cori ya Tupana rü poraãcü nüxü narüngüxëë na Equituanewa ínangüxüxücèx, natürü yixcama rü nanadai ga yema tama naga ñnüëchaüxü. ⁶ Rü ngëxgumarüü ta pexna nüxü chacuëxächixëë na ñuxãcü namaã nangupetüxü ga yema daxücüãx ga orearü ngeruügü ga noxri ixüünechiréxü natürü yixcama nagagutama pecadu ügüxü. Rü yemacèx ga Tupana rü ëänexüwa nanawogü, rü ngëxma nanapoxcue ñuxmatáta nawa nangu i ngëma ngunexü i nagu tüxü yacagüxü. ⁷ Rü yexgumarüü ta nüxü nangupetü ga guma ñänegü ga Chodoma rü Gomora rü guma ñänegü ga norü ngaicamagugüne. Yerü guma ñänecüãxgü, rü poraãcü chixri nügümaã namaxë, rü yemacèx ga Tupana rü üxümaã ínanagu. Rü yemaãcü inayanaxoxëë ga guma ñänegü na yemawa tüxü nüxü nacüxëëxücèx na nangëxmaxü i wüxi i poxcu naxcèx i guxüma i ngëma chixexü ügüxü. ⁸ Natürü woo ngëmaxü na nacüxgüxü i ngëma idoraexü i petanügu chocuxü, natürü norü chixexügu narüxñnüëãma. Rü poraãcü chixri nügümaã namaxë, rü tama tórü Cori ya Tupanaga naxñnüëchaü, rü chixri Tupanaãrü orearü ngeruügü i daxücüãxchigagu nidexagü. ⁹ Rü ngëma duixügü rü naëchitamare nidexagü rü tama Tupanaãrü orearü ngeruü ga Miguéererü nügüna nadau i norü orewa. Rü guma Miguére rü woo guxü i Tupanaãrü orearü ngeruügü i daxücüãxãrü äëxgacü na yíixü, natürü tama ngoxo ga Chatanámaã naguxchiga ga yexguma Moíchéxñnecèx yema nügümaã yaporagatanücüxgu, na nüxü nacüxgüxücèx na texéarü tá yíixü ga Moíchéxñne. Natürü nüma ga Miguére rü ñanagürümare: “Cori ya Tupana tá cuxü nanga”,

ñanagürümare. ¹⁰ Natürü ngēma duūxügü i doramaã i petanügu chocuxü, rü tama Tupanaxü nacuèxgüäcüma chixri nachiga nidexagü, rü chixri norü orearü ngeruügü i daxüçüâxchiga nidexagü. Rü ñoma naëxügürüü naxüneärü ngúchaüwemare narüxí, rü ngēmaäcü namaxē. Natürü ngēma chixexü i naxügüxüçèx, rü Tupana tá nanapoxcue. ¹¹ Rü wüxi i ngechaüxüchi nixí naxcèx i ngēma duūxügü erü ngēmaäcü namaxē. Rü Caí ga naēneëxü imáxürüü nixígü. Rü äëxgacü ga Baráürüü dīerucèx chixexü naxügü. Rü Corérüü tama Tupanaga naxīnūēchaü, rü ngēmacèx Tupana tá nanapoxcue. ¹² Rü ngēxguma tupaucawa tórü Coriarü ònacèx pengutaquëxegügu, rü wüxi i ñnexüchi nixígü. Erü narücutanüxü, rü poraäcü nachibüe rü naxaxegü, rü nügüguxicatama narüxīnūē. Rü ñoma caixanexü i ngearü pucüäxü i paanexüëtüwa üpetüxü natürü tama nanetüxü ixaiyagüxürüü taxuwama nime. Rü ngēma nanetügü i ngēxguma norü owa nanguxgu rü tama ixoxürüü nixígü. Rü ñoma naígü i guxüma i naxchúmèxãmaã napuxü rü yuxuchixürüü taxuwama nime i ngēma duūxügü. ¹³ Rü ñoma yuape i taxü i norü chixixü i äüächixü naxānacüwa yataxürüü nixígü, erü poraäcü chixexü naxügü. Rü ñoma woramacurígü ya nu ne naxīmarecürüü nixígü. Natürü Tupana rü marü namaã nanaxuegu na ngēma waanexüchixüwa guxügutáma nawogüäxü. ¹⁴⁻¹⁵ Rü nuxcümaücü ga Enó ga Adáútaa ixícü rü ngēma duūxügüchiga nidexa ga yexguma Tupana yadexaxēëgu, rü ñanagürü:

“Rü nüxü chadau ya Cori ya Tupana na muxüchixü i norü orearü ngeruügü i daxüçüâxmaã núma ücü na duūxügüna naçaxüçèx i norü maxüchiga rü napoxcueäxüçèx i guxüma i ngēma duūxügü i chixexü ügüxü rü namaã guxchigagüxü”,
ñanagürü. ¹⁶ Rü ngēma duūxügü rü tacüçèx idexagüwèxexüchixü nixígü, rü toguäxü ixuxwèxegüxüchixü nixígü. Rü noxrütama ngúchaüçèx daugüxü nixígü. Rü nügü icuèxüügüxü nixígü. Rü nümaxü meã tümachiga nidexagünetata ya duūxégü, na tümaxütawa tacü na nayauxgüxüçèxmare.

Yuda nayaxucüxëgü ga yema yaxögüxü

¹⁷ Pa Chaueneëgü ya Pexü Changechaügüxex, ¡nüxna pecuèxächie ga yema ore ga pemaã nüxü yaxugügüxü ga tórü Cori ya Ngechuchu ya Cristuarü ngúexügü ga imugüxü! ¹⁸ Rü nümagü rü ñanagürügü pexü:
“Ngēxguma nagúxchaügu i naäne rü tá nangëxma i duūxügü i tá nüxü cügüexü i Tupanaärü ore rü noxrütama ngúchaü i chixexügumare maxëxü”,
ñanagürügü pexü. ¹⁹ Rü ngēma duūxügü nixí i pexü itoyexü na tama wüxigu perüxīnūëxüçèx rü tama meã peyaxögüxüçèx. Rü nümagü rü naxüneärü ngúchaüwe narüxí, rü tama nawa nangëxma i Tupanaãe i Üünexü. ²⁰ Natürü pemax, Pa Chaueneëgü ya Pexü Changechaügüxex, ¡rü pegü perüngüxëëx na guxüguma yexeraäcü nagu pexixü rü peyaxögüxü i ngēma ore i üünexü i marü peyauxgüxü! ¡Rü guxüguma Tupanaãe i Üünexüärü ngüxëëmaã peyumüxëgü! ²¹ ¡Rü guxüguma nagu pexí i ngēma Tupanaärü ngechaxü! ¡Rü meã ípenangüxëëx i ngēma ngunexü i nagu tá núma naxüxü ya tórü Cori ya Ngechuchu ya Cristu na nüxü ingechaütümüügüäcüma tüxna naxāxüçèx i maxü i taguma gúxü! ²² ¡Rü pexü nangechaütümüügü i ngēma tama aixcüma yaxögüxü, rü nüxü perüngüxëëgü na meã yaxögüäxüçèx! ²³ Rü togü, ¡rü paxa norü pecaduwa ípenayaxuchi na namaxëxüçèx rü tama yima üxü ya Tupana mexënegu yanatauxexüçèx! Rü woo ngēma tama yaxögüchaüxü, ¡rü pexü nangechaütümüügü! ¡Natürü pegüna pedaugü na tama norü chixexügu peyixüçèx! Rü ngēma norü chixexü i pexcèx mexcüraxüxü, ¡rü nüxü pexo!

Tupanaxü yacuèxüüäcüma inayacuèxëë ga norü popera

24-25 Rū yima wūxitama ya Tupana ya tórū Maxēxēēruŭ ixīcū, rū nūxŭ nangēxma i pora na pexna nadauxŭcèx na tama pecadugu peyixŭcèx. Rū nūxŭ nangēxma i pora na iyanaxoxēēxŭcèx i guxŭma i perū chixexŭgū na petaāēgūācūma nūgūpēxewa pexŭ nagagūxŭcèx i ngextá āēxgacū íyīxŭwa. Rū ngēmacèx tanaxwèxe i tórū Cori ya Ngechuchu ya Cristuégagu Tupanaxŭ ticuèxŭgū, erū nūma rū guxŭārū yexera name rū naporā, rū guxŭetūwa nangēxma, rū guxŭmaā inacuèx. Rū yemaācū nixī ga nuxcūmaxŭchima, rū ngēmaācū nixī i ñxmax, rū guxŭgutáma ngēmaācū yī.

Rū nuāma pexna,
Yuda

YEMA CUÁÛ NÜXÛ DAUXÛ I YIXCÛRA TÁ NGUPETÛXÛCHIGA

Ore ga CuáÛxÛ nüxÛ nacuèxêxÛ ga Ngechuchu ga Cristu

¹ Ñã nixĩ i ngẽma ore ga Tupana Ngechuchu ya CristuxÛ nüxÛ cuèxêxÛ na nüxĩ norü duÛxÛgÛxÛ nüxÛ nacuèxêxÛcèx i ngẽma paxa tá ngupetÛxÛ. Rü nüma ga Ngechuchu ya Cristu nixĩ ga norü orearü ngerü ga daxÛcÛãxÛ namuxÛ na norü duÛcÛ ga CuáÛmaã nüxÛ na yaxuÛcèx. ² Rü choma i CuáÛ chixĩ ga aixcÛma meãma nüxÛ chadauxÛ rü chanaxümatÛxÛ ga guxÛma ga yema TupanaãrÛ ore ga Ngechuchu chauxcèx ngoxêxÛ. ³ Rü tataãe ya yixema duÛxÛgÛpèxewa nawa ngúxe i ñã TupanaãrÛ ore, rü ngèxgumarÛ ta tataãegü ya yixema nüxÛ ñnüèxè rü naga ñnüèxè i ñã ore i ümatÛxÛ, erü paxa tá ningu i ngẽma nüxÛ yaxuÛ.

CuáÛ nanaxümatü naxcèx ga yema 7 tücumü ga yaxögüxÛ ga Áchiaanewa yexmagüxÛ

⁴ Rü choma i CuáÛ rü chanaxümatü i ñã ore pexcèx i yaxögüxe ya yima 7 ya ñãne ya Áchiaarü naãnewa ngèxmagünewa ngèxmagüxe. Rü chanaxwèxe i pexÛ narüngÛxèè rü pexÛ nataãèxèè ya yima Tupana ya woetama ngèxmaèchacü. Rü ngèxgumarÛ ta chanaxwèxe i pexÛ narüngÛxèè rü pexÛ nataãèxèè i ngẽma Naãe i ÜünexÛ i naxütawa ne üxÛ i perü dauruÛ ixixÛ i pema i yaxögüxe ya yima 7 ya ñãnewa na pengèxmagüxÛ. ⁵ Rü ngèxgumarÛ ta chanaxwèxe na pexÛ nangüxèèxÛ rü pexÛ nataãèxèèxÛ ya Ngechuchu ya Cristu ga aixcÛma meãma nüxÛ ixucü ga TupanaãrÛ ore ga ñoma ga naãnewa. Rü nüma nixĩ ga nüxĩra yuwa ínadauxÛ. Rü nüma rü guxÛma i ñoma i naãnewa ngèxmagüxÛ i nachiüãneãrÛ ãëxgacügüarü ãëxgacü nixĩ. Rü nüma rü tüxÛ nangechaÛ, rü nagümaã tüxÛ inayanaxoxèè i tórü pecadugü. ⁶ Rü ñuxma na guxÛãrÛ ãëxgacü yíixÛ i nümax, rü tüxÛ naxüchica i ngextá nüma ãëxgacü íyíixÛwa. Rü paigüxÛ tüxÛ nixĩgüxèè na Nanatü ya TupanaãxÛ ipuracüexÛcèx rü nüxÛ icuèxÛgÛxÛcèx. Rü name nixĩ i guxÛgutáma CristuxÛ ticuèxÛgü, erü nüma rü guxÛgutáma guxÛãrÛ ãëxgacü nixĩ. Rü ngẽmaãcü yí. ⁷ Rü dücax, marü ningaica na caixanexügu ínanguxÛ ya Cristu! Rü guxÛtáma i duÛxÛgü nüxÛ nadau, rü woo ga yema nacanapacütüügüxÛ rü tá ta nüxÛ nadaugü. Rü guxÛ i duÛxÛgü i guxÛ i nachiüãnecüãx i tama yaxögüxÛ rü norü muümaã rü norü ngechaümaã tá naxauxe i ngèxguma ínanguxgu i nümax. Rü aixcÛma ngẽmaãcü tá nixĩ. ⁸ Rü nüma ya tórü Cori ya Tupana ya guxÛãrÛ ãëxgacü ixĩcü ya woetama ngèxmaèchacü, rü ñanagürü:

“Chowa nixĩ ga inaxügüxÛ ga guxÛma, rü nataxuma i tacü i chorü yexera ngèxmaèchaxÛ”, ñanagürü.

CuáÛcèx nangox ga Cristu ya mexèchicü

⁹ Rü choma i CuáÛ na pexcèx chanaxümatÛxÛ i ñã popera, rü peeneè chixĩ. Rü ngẽma na Ngechuchuna na chaxüxÛ rü chaxãchica i ngextá nüma ãëxgacü íyíixÛwa. Rü Ngechuchucèx pexrÛ ngúxÛ chinge, natürü nüma pexÛ naporaexèèxÛrÛ choxÛ naporaxèè na yaxna namaã chaxĩnüxÛcèx i guxÛma i ngẽma ngúxÛ i choxÛ üpetÛxÛ. Rü choma rü capaxÛ ga Pátmugu chapoxcu naxcèx na nüxÛ chixuxÛ ga TupanaãrÛ ore ga Ngechuchuchiga. ¹⁰⁻¹¹ Rü wüxi ga yüxüarü ngunexügu rü Tupanaãe i ÜünexÛ chomaã inacuèx,

rü changoxetü rü choweama nüxü chaxĩnü ga wüxi ga naga ga tagaxü ga ñoma cornetagarüü ixixü ga ñaxü choxü:

“Chowa nixĩ ga inaxügüxü ga guxüma, rü nataxuma i tacü i chorü yexera ngëxmaëchaxü. Rü ñuxma chanaxwëxe na wüxi i poperagu cunaxümatüxü i ngëma nüxü cudauxü. Rü ñuxüchi chanaxwëxe i ngëma yaxögüxü ya yima 7 ya ñãne ya Áchiaarü naãnewa ngëxmagünewa ngëxmagüxütanüwa cunamu. Rü yima 7 ya ñãne nixĩ ya Epéchiu rü Esmira rü Pérgamu, rü Tiatíra rü Chardi rü Firadérfia rü Laodichéa”, ñanagürü. ¹² Rü chaugü íchidau na nüxü chacuáxcèx na tacü yixü ga yema chomaã idexaxü. Rü yexguma chaugü íchidèuxgu rü nüxü chadau ga 7 ga weraarü üruügü ga uirunaxcèx ixigüxü. ¹³ Rü yema 7 ga weraarü üruügüarü ngäxütanüwa nüxü chadau ga wüxi ga duüxü ga chauxcèx nangechuchu ga duüxüxü ixícüraüxü. Rü wüxi ga naxchiru ga máxümaã naxáxchiru. Rü wüxi ga goyexü ga uirunaxcèxmaã nigoyeremü. ¹⁴ Rü nayae rü nachoxochi ñoma tacü i choxochixürüü. Rü naxëtü rü ñoma üxüemarüü niyauracüü. ¹⁵ Rü nacutü rü ta niyauracüü ñoma cobrexüchi i meãma ípixürüü. Rü yexguma yadexagu rü natagaxüchi ñoma taxü i dexá i chuxchuxü ägaxürüü. ¹⁶ Rü norü tügünemëxëwa nüxü nayexma ga 7 ga woramacurigü. Rü naãxwa nayexma ga wüxi ga tara ga guxücüwawa téxü. Rü nachiwe rü ñoma üexcü poraãcü nguxetügurüü nixĩ. ¹⁷ Rü yexguma nüxü chadèuxgu, rü napëxegu chayangu ñoma chayuxürüü. Natürü ga nüma rü norü tügünemëxëmaã choxü ningögü, rü ñanagürü choxü:

“¡Tãxü i cumuüxü! Choma nixĩ i chaxira chayexmaxü rü guxügutáma changëxmaëchaxü. ¹⁸ Rü choma nixĩ i yuwa ícharüdaxü rü ñuxma rü chamaxü. Rü üpa rü chayü, natürü i ñuxma rü marü guxügutáma chamaxëcha. Rü choxmëxwa nangëxma na ñuxgu tá nayuxü i wüxichigü i duüxü. Rü ngëxgumarüü ta choma nixĩ i namaã ichacuáxcèx i ngëma nachica i ngextá ínangëxmagüxüwa i guxüma i duüxügü i yuexü. ¹⁹ Rü ñuxma rü chanaxwëxe i cunaxümatü i ngëma nüxü cudauxü. Rü ngëma nixĩ i ñuxma ngëma yaxögüxümaã ngupetüxü, rü ngëma yixcüra tá ngupetüxü. ²⁰ Rü ñuxma rü tá cuxcèx chanangoxëë i ngëma ëxügüxü i ngëma 7 i woramacurigü i chorü tügünemëxëwa nüxü cudauxüchiga rü ngëma 7 i weraarü üruügü i uirunaxcèxchiga. Rü ngëma 7 i woramacurigü i nüxü cudauxü, rü ngëma äëxgacügü i ngëma 7 tucümü i yaxögüxüetüwa ngëxmagüxüchiga nixĩ. Rü ngëma 7 i weraarü üruügü rü ngëma 7 tucümü i yaxögüxü i yima 7 ya ñãnewa ngëxmagüxüchiga nixĩ”.

2

Ore ga yema 7 tucümü ga yaxögüxüçèx ümatüxü Ore ga yema yaxögüxü ga Epéchiuarü ñãnewa yexmagüxüçèx ümatüxü

¹ “Rü ñuxma chanaxwëxe i ngëma Epéchiuwa ngëxmagüxü i yaxögüxüärü äëxgacüçèx cunaxümatü, rü ñacurügü nüxü: ‘Ñã nixĩ i norü ore ya yima ngëma yaxögüxütanügu yarüxüüçü rü norü tügünemëxëmaã nüxna daucü i ngëma yaxögüxüärü äëxgacügü’. ² Rü ñanagürü i nümax:

‘Choma nüxü chacuèx i guxüma i ngëma cuxüxü. Rü nüxü chacuèx na ñuxäcü poraãcü choxü cupuracüxü rü ñuxäcü cunaxüamaxü i ngëma puracü woo ngëmacèx muxüma i guxchaxügü cuxcèx ínguxgu. Rü nüxü chacuèx na tama curü me yixü i ngëma duüxügü i chixexü ügüxü. Rü ngëxgumarüü ta nüxü chacuèx na meã cunangugüarü maxüãxü i ngëma duüxügü i nügü ixügüxü na Tupana imügüxü yixigüxü natürü tama aixcüma ixigüxü na Tupana yamügüxü. Rü cuma rü nüxü cucuèxama na idoratèexmaregüxü yixigüxü. ³ Rü woo naguxcha i ngëma puracü i chauxcèx cuxüxü, natürü

cunaxüama. Rü woo chaugagu poraãcü ngúxü na quingexü, natürü yaxna namaã cuxĩnü, rü tama nüxü curüchau. ⁴ Natürü nangëxma i wüxi i cuxüxü i tama chorü me ixixü. Rü ngëma nixĩ na tama noxrirüü choxü cungechaüxü i ñuxmax. ⁵ Rü ngëmacèx i ñuxma na ngëma chixexügu cunguxü, rü name nixĩ i nüxna cucuèxãchi na ñuxãcü choxü cungechaüxü ga noxrix. Rü name nixĩ i nüxü curüxo i curü chixexü rü noxrirüü choxü cungechaüãcüma mexü cuxü. Natürü ngëxguma chi tama nüxü curüxoogu i curü chixexü, rü paxa tá cuxü íchayadau, rü tá cuxü chaxo na tama ngëma togü i yaxögüxütanüwa cuxãchicaxüçèx. ⁶ Natürü nangëxma i wüxi i cuxüxü i chorü me ixixü. Rü ngëma nixĩ na naxchi cuxaixü i ngëma chixexü i naxügüxü i ngëma Nicoraítägü. Rü choma rü ta naxchi chaxai i ngëma chixexü i naxügüxü'. ⁷ Rü yíxema ãchixexë rü name nixĩ i naga taxĩnü i ngëma Tupanaãe i Üünexü nüxü ixuxü namaã i ngëma yaxögüxütücumügü". Rü ñanagürü:

"Yíxema nüxü rüporamaëxë i chixexü rü tá tüxü nüxü chamuxnetaxëe i norü o i ngëma orix i tüxü maxëxëxü i Tupanaärü orixnecüwa ngëxmaxü", ñanagürü i Naãe i Üünexü.

Ore ga yema yaxögüxü ga Esmiraarü ñanewa yexmagüxüçèx ümatüxü

⁸ Rü yema chomaã idexaxü rü ñanagürü ta:

"Chanaxwëxe i Esmirawa ngëxmagüxü i yaxögüxüärü ãëxgacüçèx cunaxümatü, rü ñacurügü tá: 'Ñaa nixĩ i norü ore ya yima nüxĩra yexmacü rü guxüguma ngëxmaëchacü ga paxaãchi yucü rü wenaxarü maxüçü'. ⁹ Rü ñanagürü i nümax:

'Choma nüxü chacuèx i guxüma i ngëma cuxüxü. Rü nüxü chacuèx na ñuxãcü ngúxü quingexü. Rü nüxü chacuèx na cungearü díeruãxü i ñoma i naãnewa, natürü daxügüxü i naãnewa cuxü nangëxma i ngëma taguma gúxü. Rü nüxü chacuèx na ñuxãcü chixri cuchiga yadexagüxü i ngëma duüxügü i nügü ixugüxü na Yudíugü yixígüxü. Natürü i nümagü rü aixcüma Chatanáärü duüxügümare nixígü. ¹⁰ ¡Rü tãxü i cumuüxü naxcèx i ngëma ngúxü i tá quingexü! Rü ngoxo i Chataná rü tá norü duüxügüxü namu na poxcupataügu pexü napoxcuexüçèx i ñuxre i pema na ngëmaãcü pexü naxüçèx. Rü ñuxre i ngunexü tá ngúxü pingegü. Natürü woo ngëmaãcü ngúxü pingegügu rü chanaxwëxe i choxü cuyaxõõma ñuxmatáta cuyux. Rü choma rü tá cuxna chanaxã i curü ãmare i maxü i taguma gúxü'. ¹¹ Rü yíxema ãchixexë rü name nixĩ i naga taxĩnü i ngëma Tupanaãe i Üünexü nüxü ixuxü namaã i ngëma yaxögüxütücumügü". Rü ñanagürü:

"Yíxema ñoma i naãnewa nüxü rüporamaëxë i chixexü, rü tãütáma Tupana ngoxogüxü ípoxcuexüwa tüxü nawogü", ñanagürü i Naãe i Üünexü.

Ore ga yema yaxögüxü ga Pérgamuärü ñanewa yexmagüxüçèx ümatüxü

¹² Rü yema chomaã idexaxü rü ñanagürü ta:

"Chanaxwëxe i Pérgamuwa ngëxmagüxü i yaxögüxüärü ãëxgacüçèx cunaxümatü, rü ñacurügü tá: 'Ñaa nixĩ i norü ore ya yima nüxü nangëxmacü i ngëma tara i guxüçüwawa téxü'. ¹³ Rü ñanagürü i nümax:

'Choma nüxü chacuèx na yima ñane ya Chataná poraãcü namaã ícuáxünewa na cumaxüxü. Natürü woo ngëxma na cuxãchiüxü, rü tama choxü ícutèx. Rü woo yexguma chorü orearü uruü ga mecü ga Atípaxü yamëxgügu nagu ga guma ñane ga nawa Chataná duüxügümaã ícuáxüne, rü tama nüxü curüxo na choxü cuyaxõõmaxü. ¹⁴ Natürü nangëxma i ñuxre i tacü i cuxüxü i tama chorü me ixixü. Rü ngëma nixĩ na cugüxütawa cunangëxmagüxëxü i ñuxre i curü duüxügü i tama nüxü rüxoechaüxü i ngëma nguxëëtae ga nuxcüma Baráü Yudíugüarü ãëxgacü ga Baráxü namaã

ucuxēxū na chixexūgu Yudíugūxū nayixēēxūcèx. Rū yema Yudíugū rü yema ucuxēgagu nawa naxī ga yema petagū ga togū ügūxū naxcèx ga norü tupanetachicünèxāgū. Rū yexgumarūü ta yema ucuxēgagu nixī ga naī ga ngemaā namaxēxū ga Yudíugū. Rū ñuxma i ñuxre i curü duūxūgū i Pérgamuwa ngēxmagūxū rü nagu naxī ga yema nuxcūmaūxū ga nguxēētae ga chixexū, rü tama nüxū narüxoechaū. ¹⁵ Rū ngēxgumarūü ta ngema cunangēxmagūxēē i ñuxre i duūxūgū i tama nüxū rüxoechaūxū i ngēma Nicoraítagarü nguxēētae i Baráūārü nguxēētaeruū chixexū. ¹⁶ Rū ngēmacèx chanaxwèxe i nüxū curüxo i ngēma chixexū. Rū ngēxguma chi tama nüxū curüxoxgu, rü paxa tá ngema cuxūtawa chaxū rü ngēma tara i chauèxwa ngēxmaūmaā tá ngēma duūxūgūxū chadai'. ¹⁷ Rū yíxema āchixexē rü name nixī i naga taxīnū i ngēma Tupanaāē i Üünexū nüxū ixuxū namaā i ngēma yaxōgūxūtūcumügū". Rū ñanagürü:

“Yíxema nüxū rüporamaēxē i chixexū rü tá tüxna chanaxā i pāü i daxūcūāx. Rū tá tüxna chanaxā ya wüxi ya nuta ya chócü i wüxi i naega i ngexwacaxūxū nagu ümatüxū. Rū yíxema nayaxuxexicatama tixí ya nüxū cuáxe i ngema naéga”, ñanagürü i Naāē i Üünexū.

Ore ga yema yaxōgūxū ga Tiatírarü iānewa yexmagūxūcèx ümatüxū

¹⁸ Rū yema chomaā idexaxū rü ñanagürü ta:

“Chanaxwèxe i Tiatírawa ngēxmagūxū i yaxōgūxūārü āēxgacücèx cunaxümatü, rü ñacurügü tá: ‘Naā nixī i norü ore ya yima Tupana Nane ya ñoma üxüemarüü iyaauraxetücüü rü nacutügü rü ñoma cobre i meāma ípixürüü ixīxüne’. ¹⁹ Rū ñanagürü i nümax:

‘Choma nüxū chacuèx i guxūma i ngēma mexū i cuxūxū. Rū nüxū chacuèx na ñuxācü cumücügūxū cungechaūxū, rü ñuxācü meāma choxū na cuyaxōxū, rü ñuxācü nüxū na curüngūxēēxū i ngēma togū i yaxōgūxū, rü ñuxācü yaxna namaā cuxīnūxū i guxchaxūgū. Rū nüxū chacuèx i ñuxma na noxriarü yexera cunaxūxū i ngēma cuxū chanaxwèxexū. ²⁰ Natürü nangēxma i wüxi i cuxūxū i tama chorü me ixīxū. Rū ngēma nixī na ngema cunangēxmaxēēchaxū i ngēma ngexū i Yechabé i nügü ixuxū na Tupanaārü orearü uruū na yīxū, natürü norü nguxēētaemaā chorü duūxūgūxū ngema womūxēēxū na chixri namaxēxūcèx, rü naī i ngemaā inapegūxūcèx, rü nangōxgūāxūcèx i ngēma õnagü i togū norü tupanetachicünèxāgūcèx dèixū na ngēmamaā nüxū yacuèxüügūxūcèx. ²¹ Rū choma rü marü ngīxū íchananguxēē rü yaxna ngīmaā chaxīnū na nüxū naxoxūcèx i ngēma ngīcūma i chixexū, natürü tama inaxwèxe na nüxū naxoxū rü ínatāāxū i ngēma ngīrū chixexū i naxūxū. ²² Rū ñuxma i ngēma nge rü tá ngīxū chidaawexēē na ngīrū ngürücarewa ngúxū yangexūcèx, rü ngēma duūxūgū i ngīmaā ipexū i ngēma nge rü nümagü rü tá ta ngúxū na yangegūxūcèx ega tama nüxū naxoegu i ngēma chixexū i ngīmaā naxūgūxū. ²³ Rū tá chanadai i ngīxācügü i ngēma nge. Rū ngēmawa tá nüxū nacuèxgü i guxūma i yaxōgūxū na aixcūma nüxū chacuáxū i ngēma naāēwa nagu naxīnūxū i wüxichigü i duūxū. Rū wüxichigü i pemax rü tá pexū chanaxütanü ngēma na ñuxācü pemaxēxūācūma rü ñuxācü penaxūxūācūma. ²⁴⁻²⁵ Natürü pemagü i Tiatíracūāx i tama nagu íxē i ngēma ngexūārü nguxēētae i chixexū rü taguma nawa ngúexe i ngēma ore i togū naxugūgu rü Chatanáārü ore i ēxūguxū ixīxū, rü pemaā nüxū chixu rü ngēma pexū chanaxwèxexū nixī na meā namaā penguxūgūxū rü naga pexīnūxū i ngēma chorü ore ñuxmatáta íchangu i chomax. Rū ngēxīcatama nixī i pexū chanaxwèxexū. ²⁶ Rū yíxema nüxū rüporamaēgūxe i ngēma chixexū rü naxügüamaxē i ngēma tüxū chanaxwèxexū ñuxmatáta tayuemare,

rü tá chaugüxütawa tüxü chaxüchica na wüxigu chomaã guxüärü ãëxgacü tixüxüçèx. ²⁷ Rü yema Chaunatü ãëxgacüxü choxü na ixüxëxürüü tá tüxna chanaxã i pora na guxü i nachüãnegümaã taporaexüçèx. Rü ngëxguma ñoma i naãnecüãx i duüxügü tama tümaga ñnügü rü ñoma wüxi i tüxü ngüxü ipuxëxürüü tá namaã tixügü rü poraãcü tá tanapoxcue. ²⁸ Rü tá tüxna chanaxã ya yima woramacuri ya pëxmama nüxü idaucü'. ²⁹ Rü yíxema ãchixexë rü name nixü i naga taxüñü i ngëma Tupanaã i Üünexü nüxü ixuxü namaã i ngëma yaxögüxütücumügü" ñanagürü.

3

Ore ga yema yaxögüxü ga Chardiarü ñanewa yexmagüxüçèx ümatüxü

¹ Rü yema chomaã idexaxü rü ñanagürü ta:

"Chanaxwëxe i Chardiwa ngëxmagüxü i yaxögüxüärü ãëxgacüçèx cunaxümatü, rü ñacurügü tá: 'Ñã nixü i norü ore ya Tupana Nane ya Naã i Üünexü nawa ngëxmacü ya yima 7 ya woramacuri nüxü ngëxmacü'. Rü ñanagürü i nümax: 'Choma nüxü chacuèx i guxüma i ngëma cuxüxü. Rü nüxü chacuèx ta rü woo guxüwama duüxügü nüxü ixügü na Tupanacèx namaxëxü i ngëma yaxögüxü i cuxütawa ngëxmagüxü natürü tama aixcüma nixü i ngëma, erü ngëma yaxögüxü rü tama aixcüma choxü nayaxögü rü tama aixcüma chauxcèx namaxë. ² Rü name nixü i cubaixãchi rü cügü íquicuèx rü cuyangüxëe i ngëma íraxü i mexü i cuxü íyaxüxü i marü iyarüxoxchaüxü. Erü nüxü chadau rü ngëma cuxüxü rü tama Tupanapëxewa name. ³ ;Rü nüxna nacüxãchi ga yema nguxëetae ga mexü ga noxri nüxü cuxüñüxü rü cuyaxuxü, rü nagu ixü! ;Rü nüxü rüxo i ngëma chixexü i cuxüxü! Natürü ngëxguma tama nüxü curüxoxgu i curü chixexü, rü ñoma wüxi i ngütëxáxü i ngürüãchi ínguxürüü tá cuxütawa chaxü. Rü täütáma nüxü cucuèx na ñuxguacü yüxü. ⁴ Natürü ngëma Chardiwa cuxü nangëxma i ñuxre i duüxügü i mexü i tama ñoma i naãneärü chixexümaã nügü ãüãchiarü maxüãxgüxü. Rü nümagü rü tá cómüxümaã nixãxchiru rü ngëmaãcü tá chomaã inaxü, erü nümagü rü duüxügü i mexü i chauxcèx maxëxü nixügü. ⁵ Rü yíxema nüxü rüporamaëgüxe i chixexü, rü tá cómüxümaã tixãxchiru. Rü täütáma nawa tüxü íchapiéga i ngëma chorü popera i nagu chayawügüxü i ngëma duüxügü i nüxü nangëxmaxü i maxü i taguma gúxü. Rü Chaunatüpëxewa rü guxüma i norü orearü ngerügü i daxüçüãxgüpëxewa tá tüxü chixu na chorü duüxügü tixüxüçèx'. ⁶ Rü yíxema ãchixexë rü name nixü i naga taxüñü i ngëma Tupanaã i Üünexü nüxü ixuxü namaã i ngëma yaxögüxütücumügü".

Ore ga yema yaxögüxü ga Firedérfiarü ñanewa yexmagüxüçèx ümatüxü

⁷ Rü yema chomaã idexaxü rü ñanagürü ta:

"Chanaxwëxe i Firedérfiawa ngëxmagüxü i yaxögüxüärü ãëxgacüçèx cunaxümatü rü ñacurügü tá: 'Ñã nixü i norü ore ya yima Üünecü ya aixcüma Cristu ixüçü ya Dabürüü ãëxgacü ya tacü ixüçü ya nüxü nangëxmacü i pora na yawãxnaãxüçèx rü nawãxnaãxüçèx i daxügüxü i naãne. Rü ngëxguma texéçèx yawãxnaãgu, rü taxucürüwama texé tümachëxwa tanawãxta. Rü ngëxguma texéchëxwa nawãxnaãgu, rü taxucürüwa texé tümacèx tayawãxna'. ⁸ Rü ñanagürü i nümax:

'Choma nüxü chacuèx i guxüma i ngëma cuxüxü. Rü dücax, cuxü chanatauxchaxëe na togümaã nüxü quixuxüçèx i chorü ore, rü taxucürüwa texé cuxna tanachüxu na cunaxüxüçèx i ngëma puracü. Rü choma nüxü chacuèx na tama aixcüma cuporaxüchixü, erü noxretama nixü i ngëma yaxögüxü i cuxütawa ngëxmagüxü. Natürü cuma rü naga cuxüñü i chorü ore,

rü tama icuyacux na chorü duüxü quiixü. ⁹ Rü ngëmacèx i ngëma duüxügü i Chatanárü ixīgüxü i nügü ixugüxü na chorü duüxügü yixīgüxü natürü tama aixcüma choxrü ixīgüxü, rü tá chanamu na cupëxegu nacaxãpüxügüxücèx na nüxü nacuèxgüxücèx na aixcüma cuxü changechaüxü. ¹⁰ Cuma rü meãma cuyanguxëe i ngëma cuxü chamuxü na aixcüma cuyaxõdmaxü naetüwa i ngëma guxchaxügü i cuxü ngupetüxü. Rü ngëmacèx tá cuxü íchapoxü na tama cuxna nanguxücèx i ngëma guxchaxü i taxü i ñoma i naãnewa tá ínguxü na guxüma i ñoma i naãnecüãx i duüxügüxü naxüxücèx. ¹¹ Rü paxa tá ngema cuxütawa chaxü. Rü chanaxwëxe i ñuxma meã cumaxüxürüü meã cumaxecha, na taxüema cuxna napuxücèx i ngëma curü ãmare. ¹² Rü yíxema nüxü rüporamaëgüxe i guxüma i chixexü, rü Chaunatü ya Tupanaxütawa tá tüxü changëxmagüxëe na tagutáma ngema ítachoxüxücèx. Rü tümagu tá chanaxümatü i naëga ya Chaunatü ya Tupana. Rü ngëxgumarüü tá ta tümagu chanaxümatü i naëga ya Tupanaãrü ñãne ya Yerucharéü ya ngexwacaxüne ya Tupanaxütawa i daxüguxü i naãnewa íruxixüne. Rü ngëxgumarüü tá ta tümagu chanaxümatü i chauéga i ngexwacaxüxü. ¹³ Rü yíxema ãchixexë rü name nixí i naga taxñü i ngëma Tupanaãe i Üünexü nüxü ixuxü namaã i ngëma yaxõgüxütücumügü”.

Ore ga yema yaxõgüxü ga Laodichéawa yexmagüxücèx ümatüxü

¹⁴ Rü yema chomaã idexaxü rü ñanagürü ta:

“Chanaxwëxe i Laodichéawa ngëxmagüxü i yaxõgüxüãrü ãëxgacücèx cunaxümatü rü ñacurügü tá: ‘Ñã nixí i norü ore ya yima aixcüma ixícü ya aixcüma yanguxëecü i ngëma nüxü yaxuxü rü ore i aixcüma ixixüxüxüicatama ixucü. Rü nüma nixí ga inaxügüãxü ga guxüma ga yema Tupana üxü’. ¹⁵ Rü ñanagürü i nümax:

‘Choma nüxü chacuèx i guxüma i ngëma cuxüxü. Rü nüxü chacuèx na tama wüxi i duüxü i chauxchi aixü quiixü, natürü tama wüxi i duüxü i aixcüma choxü ngechaüxü quixí. Rü chierü noxtacüma wüxi i duüxü i chauxchi aixü quixígu rü ëxna noxtacüma wüxi i duüxü i aixcüma choxü ngechaüxü quixígu. ¹⁶ Natürü ñuxma na írarüwatama choxü cungechaüxü, rü ngëmacèx tá cuxü íchatèx. Erü tama noxtacüma wüxi i duüxü i chauxchi aixü quixí rü tama noxtacüma wüxi i duüxü i aixcüma choxü ngechaüxü quixí. ¹⁷ Rü cuma cügü quixuxgu rü cumuãrü dñeruãx, rü cumuãrü ngëmaxüãx, rü meãma cuxü naxüpetü, rü taxuüma cuxü nataxu. Natürü i cuma rü tama nüxna cucuèxãchi na chopëxewa rü wüxi i taxuwama mexü quiixü, rü wüxi i ngechaüxüchi quiixü, rü wüxi i taxuüma cuxü ngëxmaxë quiixü, rü ñoma wüxi i ngexetüxürüü quiixü, rü ñoma wüxi i ngexchiruxürüü quiixü. ¹⁸ Rü ñuxma rü cuxü chaxucuxë na chauxütawa naxcèx cutaxexücèx i uiru i marü üxüwa iguxü i nüxícatama ixixü. Rü ngëmaãcü tá aixcüma cuxü nangëxma i curü ngëmaxü. Rü ngëxgumarüü ta cuxü chaxucuxë na chauxütawa naxcèx cutaxexücèx i cuxchiru i cómuxü na ngëmagu quicúxücèx na taxüema cuxü dauxücèx na cunxexchiruxü. Rü ngëxgumarüü ta cuxü chaxucuxë na chauxütawa naxcèx cutaxexücèx i curü mëixëtüxü na curümexëtüxücèx na wena quidauchixücèx. ¹⁹ Choma rü tüxü chaxucuxë rü tüxü ichayarüwëxãchixëe ya guxãma ya yíxema tüxü changechaüxë. Rü ngëmacèx name nixí i nüxü curüxo i cucüma i chixexü, rü aixcüma choxü cungechaü rü cunaxü i ngëma cuxü chanaxwëxexü. ²⁰ Rü dücax, choma rü ñãxwa tümacèx chacagüecha. Rü ngëxguma chi texé choxü ñnügü rü chauxcèx tayawãxnagu, rü tá tümaxütagu chaxücu. Rü tümamaã tá chachibü rü tümã i chomaã. ²¹ Rü yíxema nüxü rüporamaëgüxe i chixexü, rü tá chaugüxütawa tüxü charütogüxëe na chomaã ãëxgacü tixīgüxücèx, yexgumarüü ga choma

rü nüxü na charüporamaëxü ga chixexü, rü ñuxüchi Chaunatüxütawa na chayarütöxürüü na namaã äëxgacü chiïxücèx'. ²² Rü yíxema ächixexë rü name nixí i naga taxínü i ngëma Tupanaãë i Üünexü nüxü ixuxü namaã i ngëma yaxögüxütücümügü", ñanagürü ga yema chomaã idexaxü.

4

Tupanaxü nataxëëgü i daxüguxü i naãnewa

¹ Rü yemawena ga choma ga Cuáü rü nüxü chadau ga wüxi ga ìãx ga iwãxnaxü ga daxüguxü ga naãnewa. Rü yema naga ga nacornetagaraüxü ga noxri nüxü chaxínüxü ga chomaã idexaxü, rü ñanagürü choxü:

"¡Nuxã naxínagü! Rü tá cuxü nüxü chadauxëë i ngëma yixcüra tá ngu-petüxü", ñanagürü. ² Rü yexgumatama ga choma rü Tupanaãë i Üünexü rü chauãëmaã inacuèx, rü daxüwa nanaga. Rü yéma daxüguxü ga naãnewa nüxü chadau ga wüxi ga tochicaxü ga mexëchixü ga yéma Tupana nawa rütöxü. ³ Rü guma yema tochicaxüwa rütocü, rü ñoma nuta ya mexëchicü ya yasperüü nixí na namexü rü ñoma nuta ya cornalínarüü nixí na namexü. Rü yema tochicaxüetüwa nayexma ga wüxi ga chirapa ga ñoma nuta ga es-merádarüü mexëchicü. ⁴ Rü yema tochicaxücüwawa nayexmagü ga 24 ga togü ga tochicaxügü ga nüxü ínumaëguãchixü. Rü yema tochicaxügüwa narütogü ga 24 ga äëxgacügü ga yaxögüxüârü ixígüxü. Rü cómuxümaã nixãxchiru rü uirunaxcèx nixí ga norü ngëxcuerüügü. ⁵ Rü yema nachica ga Tupana írütöxüwa ínaxüxü ga bëixbëxanexü rü duruanexü rü nagagü. Rü yema tochi-caxüpëxewa nayexma ga 7 ga omügü ga yéma naïgüxü. Rü yema omügü nixí ga Tupanaãë i Üünexü ga yema 7 ga yaxögüxütücümümaã icuáxü. ⁶ Rü yema Tupanaärü tochicaxüpëxewa rü ñoma dexáétüwarüü ixíxümaã nachaxu rü nichipetü woruarüü. Rü yema tochicaxüxü ínachomaëguãchi ga ägümücü ga daxücüãx ga maxëxü ga guxüwama äxëtüxü naweama rü napëxewa. ⁷ Rü wüxi ga yema daxücüãx ga maxëxü rü nanaxairaxü. Rü yema to rü nanawocaraxü. Rü yema norü tomaëxpüx rü nanaduüxüchiweraxü. Rü yema norü ägümücü rü nanaxíyü i gonagüxüraxü. ⁸ Rü yema ägümücü ga daxücüãx ga maxëxü, rü wüxichigü nüxü nayexma ga 6 ga naxpëxatügü. Rü guxüwama ga naxpëxatüetüwa rü naxpëxatütüüwa rü namuxëtü. Rü nguncü rü chütacü rü ñanagürügüecha:

"Naxüüne, naxüüne, naxüüne nixí ya tórü Cori ya Tupana ya guxüetüwa ngëxmacü rü woetama ngëxmaëchacü", ñanagürügüecha. ⁹⁻¹⁰ Rü yema daxücüãx ga maxëxü, rü yexguma nüxü yacuëxüügüüxgu ga guma tochi-caxüwa rütocü, rü moxë nüxna naxägügu, rü yema 24 ga äëxgacügü ga yaxögüxüârü rü yima woetama ngëxmaëchacüpëxegu nacaxãpüxügü, rü nüxü nicuëxüügü, rü napëxegu nananu ga norü ngëxcuerüügü. ¹¹ Rü ñanagürügü:

"Pa Torü Cori, Pa Torü Tupanax, cuxü nixí i namexü na ticuëxüügüxü rü cuxü tataxëëgüxü, erü guxüetüwa cungëxma. Yerü cuma cunaxü ga guxüma rü curü ngüchaügüga nixí i nangóxü i ñuxmax", ñanagürügü.

5

Popera ga idixixüchiga rü Tupana Nane ga ñoma wüxi ga carnerurüü imácüchiga

¹ Rü ñuxüchi nüxü chadau ga guma tochicaxüwa rütocü, rü norü tügünemëxëwa nanange ga wüxi ga popera ga idixixü. Rü düxëtüwa rü aixepewa rü naxãmatü ga yema popera. Rü 7 wa niñaxtachipëxe. ² Rü nüxü

chadau ga wüxi ga norü orearü ngeruü ga daxücüâx ga poraxüchixü ga tagaãcü ícaxü rü ñaxü:

“¿Texé tixí ya yíxema mexe na tayagautanüxü i norü ñaxtachipêxexü rü itayadixgüxü i ñaã popera?” ñaxü. ³ Natürü woo ga daxügüxü ga naãnewa rü bai ga ñoma ga naãnewa rü bai ga yuexütanüwa, rü tataxuma ga texé ga mexe na itayadixgüxü rü nüxü tadaumatüxü na ñuxü ñaxü ga yema popera. ⁴ Rü choma rü poraãcü chaxaxu yerü tataxuma ga texé ga mexe na itayadixgüxü rü nüxü tadaumatüxü na ñuxü ñaxü ga yema popera. ⁵ Natürü wüxi ga yema 24 ga âëxgacügü ga yaxögüxüârü, rü ñanagürü choxü:

“¡Tãxü i cuxaxuxü! Erü yima Cristu ya Yudáta ya airüxü poracü ya âëxgacü ya Dabítaa ixícü, rü marü nüxü narüyexera i guxüma i chixexü. Rü ngêmacèx nüma nixí i namexü na yagautanüâxücèx i ngêma 7 i norü ñaxtachipêxexü i ngêma popera rü na íyawêgüâxücèx”. ⁶ Rü ñuxüchi nüxü chadau ga Tupana Nane ga ñoma wüxi ga carneruxacü ga mèxwa írüdaxürüü yexma chicü naxütagu ga guma tochicaxüwa rütocü rü natanügu ga yema âgümücü ga daxücüâx ga maxèxü rü yema 24 ga âëxgacügü. Rü nüxü nayexma ga 7 ga nachatacuxre ga norü poraarü cuèxruü rü 7 ga naxëtü. Rü guma 7 ga naxëtü rü ngêma nixí i Tupanaãe i Üünexü i guxüma i ñoma i naãnewa namuxüârü cuèxruü ixíxü. ⁷ Rü guma pecaduarü ütanücèx yucü rü guma tochicaxüwa rütocücèx nixü, rü nanayaxu ga yema popera ga norü tügünemèxèwa yexmaxü. ⁸ Rü yexguma nayauxägu ga yema popera, rü yema âgümücü ga daxücüâx ga maxèxü rü yema 24 ga âëxgacügü rü inacaxgüâpüxü napêxegu ga guma pecaduarü ütanücèx yucü. Rü wüxichigü ga yema âëxgacügü rü nüxü nayexma ga wüxi ga norü paxetarüü ga arpa. Rü yexgumarüü ta nüxü nayexma ga copa ga uirunaxcèx ga pumaratêxemaã napagüxü. Rü yema pumaratêxe rü nayixichi ga yexguma yaxaxgu. Rü yema pumaragü, rü ngêma nixí i Tupanaârü duüxügüârü yumüxègüârü cuèxruügü. ⁹ Rü nagu nawiyaegü ga wüxi ga wiyae ga yexwacaxüxü ga ñaxü:

“Cuma nixí i cumexü na cunayaxuxü i ngêma popera rü cuyagautanüxü i ngêma norü ñaxtachipêxexü. Yerü cuma rü marü quimèxchirêx, rü cugümaã Tupanaãxü naxcèx cutaxe i nagüxüraüxü i duüxügü i nagüxüraüxü i nachiüânecüâx i nagüxüraüxü i nagawa idexagüxü. ¹⁰ Rü ngêmagüxü cuxüchica i ngextá âëxgacü íquiixüwa, rü Tupanaârü ngüxèëruügüxü cuyaxígüxèë na cumaã wüxigu guxü i naãnemaã inacuèxgüxücèx”,

ñanagürügü. ¹¹ Rü yemawena ichadawenü, rü nüxü chaxínü ga naga ga muxüchixüma ga Tupanaârü orearü ngeruügü ga daxücüâx. Rü norü ngäxüwa nayexma ga yema tochicaxü rü yema âgümücü ga daxücüâx ga maxèxü rü yema 24 ga âëxgacügü. Rü namuxüchima ga yema Tupanaârü orearü ngeruügü ga daxücüâx ga yema yexmagüxü. ¹² Rü tagaãcü ñanagürügü:

“Daa nixí ya yima ñoma wüxi i carneruacürüü imácü ga pecaduarü ütanücèx yucü. Rü nüma nixí i namexü na guxüârü âëxgacü yíixü, rü guxüârü yora yíixü, rü guxü i cuèx nüxü ngèxmaxü, rü guxüârü yexera naporaxü. Rü nüma nixí i namexü na guxãma nüxü ngechaügüxü rü nataxèëgüxü rü nüxü icuèxüügüxü”, ñanagürügü. ¹³ Rü nüxü chaxínü ta ga naga ga guxüma ga yema Tupana üxü i daxügüxü i naãnewa rü ñoma i naãnewa rü naãnetüüwa rü taxtü i taxüwa ngèxmagüxü ga ñagüxü:

“Name nixí na guxügutáma guxãma nüxü icuèxüügüxü rü nüxü ngechaügüxü rü nataxèëgüxü ya yima pecaduarü ütanücèx yucü rü yima ngêma tochicaxüwa rütocü, erü nümagü nixí i guxüguma âëxgacügü

yixīgüxü”, ñanagürügü. ¹⁴ Rü yema ägümücü ga daxüçüâx ga maxëxü rü ñanagürügü:

“Ngëmaäcü yî”, ñanagürügü. Rü yema 24 ga äëxgacügü rü inacaxgüäpüxü rü nüxü nicuëxüügü.

6

Yema 7 ga ñaxtachipëxe- ruüchiga

¹ Rü ñuxüchi nüxü chadau ga yexguma guma pecaduarü ütanüçex yucü yagauyegu ga yema nüxïraüxü ga norü ñaxtachipëxexü ga yema popera. Rü nüxü chaxïnü ga wüxi ga yema daxüçüâx ga maxüxü ga tagaäcü ñoma duruanexürü ñaxü choxü:

“¡Nuã naxü!” ñaxü. ² Rü ichadawenü rü nüxü chadau ga wüxi ga cowaru ga cómuxü. Rü yema naetüwa rütoxü rü nüxü nayexma ga wüxi ga norü würa. Rü wüxi ga ngëxcuerü nüxna naxã. Rü poraëëcuma norü cowarumaã inaxüãchi na duüxügüxü nayexeraxüçex. ³ Rü yexguma guma pecaduarü ütanüçex yucü yagauyegu ga yema norü taxre ga yema poperaarü ñaxtachipëxexü, rü nüxü chaxïnü ga yema norü taxre ga yema daxüçüâx ga maxüxü ga ñaxü choxü:

“¡Nuã naxü!” ñaxü. ⁴ Rü yéma naxü ga wüxi ga cowaru ga dauxü. Rü yema naetüwa rütoxü rü wüxi ga tara ga taxü nüxna naxã. Rü yexgumarüü ta pora nayaxu na iyanaxoxëëaxüçex na nügü nangechaügüxü ga duüxügü. Rü yemaäcü nanaxü na nügü nadëixüçex ga duüxügü. ⁵ Rü yexguma guma pecaduarü ütanüçex yucü yagauyegu ga yema norü tomaëxpüx ga yema poperaarü ñaxtachipëxexü, rü nüxü chaxïnü ga yema norü tomaëxpüx ga yema daxüçüâx ga maxüxü ga ñaxü choxü:

“¡Nuã naxü!” ñaxü. Rü ichadawenü rü nüxü chadau ga wüxi ga cowaru ga waxüxü. Rü yema naetüwa rütoxü rü naxmëxwa nüxü nayexma ga wüxi ga tacüarü yaruü ga balanza. ⁶ Rü nüxü chaxïnü ga wüxi ga naga ga yema daxüçüâx ga maxëxüârü ngäxütanüwa inaxüxü ga ñaxü:

“Wüxi i ngunexüârü puracütanü rü naxätanü i wüxi i kilo i trigu. Rü wüxi i ngunexüârü puracütanü naxätanü i tomaëxpüx i kilo i chebada. ¡Natürü täxü i cuyanatauxëëxü i ngëma chixü rü yima binu!” ñanagürü. ⁷ Rü yexguma guma pecaduarü ütanüçex yucü yagauyegu ga yema norü ägümücü ga yema poperaarü ñaxtachipëxexü, rü nüxü chaxïnü ga yema norü ägümücü ga yema daxüçüâx ga maxëxü ga ñaxü choxü:

“¡Nuã naxü!” ñaxü. ⁸ Rü ichadawenü rü nüxü chadau ga wüxi ga cowaru ga dexexü. Rü yema naetüwa rütoxü rü Yu nixï ga naëga. Rü yema naweama ne üxü, rü Yuexüchica nixï ga naëga. Rü yema taxre nanayauxgü ga pora na ñoma ga naãnewa rü wüxi ga yema norü ägümücütücumü ga duüxügümaã inacüxgüxüçex na daimaã rü taiyamaã rü daaweanemaã rü ngoxo idüraexümaã nayuexëëaxüçex. ⁹ Rü yexguma guma pecaduarü ütanüçex yucü yagauyegu ga yema norü wüximëëxpüx ga yema poperaarü ñaxtachipëxexü, rü nüxü chadau ga wüxi ga nachica ga ngextá Tupanacëx naxünagü nawa yagugüxü na nüxna naxägüâxüçex. Rü yema nachicatüüwa nüxü chadau ga naãëgü ga yema duüxügü ga Tupanaârü orexü na yaxugüxüçex nadëixü. ¹⁰ Rü yema naãëgü rü tagaäcü ñanagürügü:

“Pa Torü Cori ya Guxüetüwa Ngëxmacü rü Üünecü rü Ixaixcümäcux, ¿ñuxgura tá ta i nüxna cucaxü rü cunapoxcuexü i ngëma duüxügü i chixexü ga toxü dëixü?” ñanagürügü. ¹¹ Rü ñuxüchi ga Tupana rü wüxichigü ga yema duüxügüna nanaxã ga naxchiru ga máxü rü cómuxü. Rü yema duüxügüäëgüxü ñanagürü:

“¡Paxaãchi iperüngüë ñuxmatáta yangu i peeneëgü i Cristuaxü puracüexü i pexrüü tá dèixü!” ñanagürü. ¹² Rü yexguma guma pecaduarü ütanücèx yucü yagauyegu ga yema norü 6 ga yema poperaarü ñaxtachipèxexü, rü nüxü chadau ga poraãcü na naxiãxãchianexü. Rü üèxcü rü wüxi ga naxchiru ga waxcharaxürüü nixĩ. Rü tauemacü rü guxüwama nagürüü naduema. ¹³ Rü woramacurigü rü èxtagü rü daxüwa narüyi rü ñoma ga naãnegu nayi. Rü ñoma orix i doxüxüma buanecü ya tacü rüyixèëxürüü nixĩ. ¹⁴ Rü guxüma i daxüwa nüxü idauxü rü inayarütaxu. Rü ñoma wüxi i popera i dixcumüãchixü rü iiyarütaxuxürüü nixĩ. Rü guxüma ga mèxpünegü rü capaxügü rü nixĩgachi ga nachicawa. ¹⁵ Rü ñoma ga naãnewa yexmagüxü ga nachiüãnegüarü äëxgacügü, rü mèxpünemagu rü mèxpüneärü nutatanügu nicuxgü. Rü wüxigu yexma namaã nicuxgü ga yema togü ga äëxgacügü ga taxügü ga ñoma ga naãnemaã icuèxgüxü, rü churaragüarü äëxgacügü ga taxügü, rü yema duüxügü ga muärü dīeruãxgüxü, rü yema duüxügü ga ñoma ga naãnewa poraexü, rü guxüma ga duüxügü ga coriãxgüxü, rü guxüma ga duüxügü ga ngearü coriãxgüxü. ¹⁶ Rü guxüma ga nümagü, rü guma mèxpünexü rü guma nutagüxü ñanagürügü:

“¡Toétügu peyi na toxü ipicuxgüxüçèx naxchaxwa ya yima ngëma tochi-caxüwa rütocü, rü naxchaxwa ya yima pecaduarü ütanücèx yucü erü tama tanaxwèxe na toxü napoxcuexü! ¹⁷ Erü marü ínangu i ngëma ngunexü i äücümaxü i nagu napoxcuexü i ngëma duüxügü i tama Tupanaärü ixĩgüxü. ¿Rü texé tá namaã tabora i ngëma?” ñanagürügü.

7

Yema Yudügu ga nacatüwa cuèxruüãxgüxüchiga

¹ Rü yemawena rü nüxü chadau ga ägümücü ga Tupanaärü orearü ngeruügü ga daxüçüãx ga ñoma ga naãneärü ägümücüpèxegu chigüxü. Rü ínanapoxügü ga gucüma ga buanecügü na tama waixüümüãneëtügu naxüxüçèx, rü tama taxü i taxtüétügu naxüxüçèx, rü bai i tacü rü naítügu naxüxüçèx.

² Rü yexgumarüü ta nüxü chadau ga wüxi ga Tupanaärü orearü ngeruü ga daxüçüãx ga üèxcü íyarügoxüwaama ne üxü. Rü nüxü nayexma ga Tupana ya Maxüçüarü tacüarü üégarü. Rü nüma rü tagaãcü nüxna nacagü ga yema togü ga ägümücü ga Tupanaärü orearü ngeruügü ga nayauxgüxü ga pora na nachixexèëgüãxüçèx ga guxüma ga waixüümü rü guxüma ga taxü ga taxtü.

³ Rü ñanagürü nüxü:

“¡Tãxü i yatacüma penachixexèëxü i waixüümü rü taxtü i taxü rü naĩgü, ñuxmatáta nacatüwa tayaxüarü cuèxruüãxgü i ngëma Tupanaärü duüxügü ixĩgüxü!” ñanagürü. ⁴ Rü nüxü chaxínü ga ñuxre na yĩxü ga yema cuèxruüãxgüxü. Rü guxüma ga Yudügütanüwa rü 144,000 nixĩ. ⁵⁻⁸ Rü yema cuèxruüãxgüxü ga Yudügu, rü ñaã nixĩ:

Yudátaagü - 12,000

Rubéütaagü - 12,000

Gadutaagü - 12,000

Achetaagü - 12,000

Netarítaagü - 12,000

Manachétaagü - 12,000

Chimeütaagü - 12,000

Lebítaagü - 12,000

Ichacátaagü - 12,000

Chaburãütaagü - 12,000

Yúchetaagü - 12,000

Beyamítaagü - 12,000

⁹ Rû yemawena ichadawenü, rû nüxü chadau ga muxüchixüma ga nagüxüraüxü ga duüxügü ga nagüxüraüxü ga nagawa idexagüxü ga guxüma ga nachiuñanewa ne ixü. Rû yema tochicaxüpëxegu rû guma pecaduarü ütanüçex yucüpëxegu nachigü. Rû yema na namuxüchixü rû taxucürüwa texé tayaxugü na ñuxre yüxü. Rû naxchiru ga icómüxü rû imáxümaã nixäxchiru. Rû naxmëxwa nanangegü ga wairaátügü. ¹⁰ Rû guxüma ga nümagü rû tagaãcü ñanagürügü:

“Yima tórü Tupana ya tochicaxüwa rütocü rû yima pecaduarü ütanüçex yucü nixi ya tüxü maxëxëgücü”, ñanagürügü. ¹¹ Rû guxüma ga Tupanaärü orearü ngeruügü ga daxüçüãx rû nüxü inachimaëguãchi ga yema tochicaxü rû yema 24 ga äëxgacügü rû yema ägümücü ga daxüçüãx ga maxëxü. Rû yema tochicaxüpëxegu nanangücuchitanü ga yema orearü ngeruügü, rû Tupanaxü nicuëxüügü. ¹² Rû ñanagürügü:

“Rû ngëmaãcü yï. Rû nüma nixi i namexü na guxüguma guxãma nüxü icuëxüügüxü, rû nataxëëgüxü, rû moxë nüxna ixägüxü, rû nüxü ingechaügüxü, erü guxü i cuëx nüxü nangëxma, rû guxüetüwa nangëxma, rû guxüärü yexera napora. Rû ngëmaãcü yï”, ñanagürügü. ¹³ Rû ñuxüchi wüxi ga yema 24 ga äëxgacügü rû choxna naca, rû ñanagürü:

“¿Texëgü tixigü ya yixema cómüchirugüxe, rû ngextá ne taxí?” ñanagürü. ¹⁴ Rû choma chanangãxü, rû ñacharügü:

“Pa Corix, cuma nixi i nüxü cucuáxü na texëgü tixigüxü”, ñacharügü. Rû yexguma ga nüma rû ñanagürü:

“Yixemagü tixigü ga nawa ngupetütanüxë ga yema ngüxü ga taxü rû marü tügü iyauxgüchiruxe nagüwa ga guma pecaduarü ütanüçex yucü. Rû ngëmacëx nixi i ticómüchiruxü. ¹⁵ Rû ngëmacëx nixi i Tupanaärü tochicaxüpëxewa tangëxmagüechaxü rû ngunecü rû chütacü rû Tupana íngëxmaxüwa nüxü tapuracüxü. Rû nümatama ya Tupana ya tochicaxüwa rütocü rû tüxna nadau. ¹⁶ Rû marü tagutáma wenaxärü taiya tüxü nangux, rû tagutáma titawae. Rû marü tagutáma üëxcü tüxü nigu, rû tagutáma üëxcüarü naianexü tüxü nangux. ¹⁷ Erü yima pecaduarü ütanüçex yucü i ngëma tochicaxüxütawa ngëxmacü, rû tá aixcüma meã tüxna nadau ñoma carnerugüna idauxürüü. Rû nawa tá tüxü nagagü i ngëma dexáarü chuxchuxügü i maxëëruü. Rû Tupana tá tüxü ínanapi i guxüma i tümagüüxëtü”, ñanagürü.

8

Yema norü 7 ga ñaxtachipëxeruüchiga rû yema buetare ga uirunaxcëxchiga

¹ Rû yexguma guma pecaduarü ütanüçex yucü yagauyegu ga yema norü 7 ga yema poperaarü ñaxtachipëxexü, rû ngãxü ga ora nachipetüanemare ga daxügüxü ga nañewa. ² Rû ñuxüchi nüxü chadau ga yema 7 ga Tupanaärü orearü ngeruügü ga daxüçüãx ga yexma Tupanapëxegu chigüxü. Rû wüxichigü nanayaxu ga norü corneta ga nüxna naxãxüne. ³ Rû yemawena ínangu ga wüxi ga to ga Tupanaärü orearü ngeruü ga daxüçüãx. Rû yema nanange ga wüxi ga norü buetare ga uirunaxcëx ga pumaraarü gutëxeruü. Rû yema uirunaxcëx ga pumaraarü gutëxeruütaxmüpëxegu nachi. Rû nanayauxtëxe ga taxü ga pumara ga nüxna naxãxü na yema tochicaxüpëxewa yexmaxü ga pumaraarü gutëxeruütaxmüwa yaguãxüçex, na yemaãcü Tupanana naxãxüçex ga yema pumaratëxe na yema pumaraema rû wüxigu Tupanaärü duüxügüarü yumüxëmaã Tupanaxütawa nanguxüçex. ⁴ Rû yema pumaratëxe ga yema orearü ngeruüãxü yexmaxü rû daxü naxüëma wüxigu namaã ga Tupanaärü duüxügüarü yumüxëgü ñuxmata Tupanaxütawa

nangu. ⁵ Rū ñuxũchi ga yema orearũ ngeruũ rũ nanayaxu ga yema buetare ga pumaraarũ gutẽxeruũ. Rũ yema pumaraarũ gutẽxeruũtaxmũwa nanayaxu ga ãwe ga naĩcũ, rũ gumamaã nanaxũãcu ga guma buetare. Rũ ñuxũchi ñoma ga naãneetũgu nanaña. Rũ yexgumatama poraãcũ naduruãchiane, rũ poraãcũ nicuxcuane rũ nibèixbèxane rũ naxĩãxãchiane.

Tupanaãrũ orearũ ngeruũgũ ga daxũcũãxãrũ cornetachiga

⁶ Rũ yexguma ga yema ⁷ ga Tupanaãrũ orearũ ngeruũgũ ga daxũcũãx ga icornetaãxũ, rũ nũgũ ínamexẽegũ na nagu yacuegũxũcèx. ⁷ Rũ wũxi ga yema Tupanaãrũ orearũ ngeruũ rũ nũxĩra nayacue ga norũ corneta. Rũ yexgumatama ñoma ga naãneetũgu narũyi ga gáuxũ rũ ùxũema ga nagũmaã ãeũxũ. Rũ wũxi ga yema norũ tomaẽxpũxarũ ùye ga ñoma ga naãne rũ nixa. Rũ yexgumarũũ ta wũxi ga yema norũ tomaẽxpũxarũ ùye ga naĩxnecũ rũ nixa. Rũ guxũma ga natũane rũ nixae. ⁸ Rũ yema norũ taxre ga Tupanaãrũ orearũ ngeruũ rũ nayacue ga norũ corneta. Rũ ñuxũchi wũxi ga tacũ ga taxũchixũ ga namèxpũneraũxũ ga iyauxraxũ, rũ yexma taxtũ ga taxũgu nanaña. Rũ wũxi ga yema norũ tomaẽxpũxarũ ùye ga taxtũ rũ nagũxũ nananguxuchi. ⁹ Rũ wũxi ga yema norũ tomaẽxpũxarũ ùyetũcumũ ga yema taxtũwa maxẽxũ, rũ nayue. Rũ yexgumarũũ ta wũxi ga yema norũ tomaẽxpũxarũ ùyetũcumũ ga wapurugũ, rũ inayi. ¹⁰ Rũ yema norũ tomaẽxpũx ga Tupanaãrũ orearũ ngeruũ, rũ nayacue ga norũ corneta. Rũ ñuxũchi wũxi ga taxũchicũ ga woramacuri ga taemaxũchicũ rũ daxũwa narũngu. Rũ wũxi ga omũ ga ixaxũrũũ nixĩ. Rũ nagu nangu ga wũxi ga yema norũ tomaẽxpũxarũ ùye ga natũgũ rũ natũxacũgũ. ¹¹ Rũ guma woramacuri rũ ùxũxũ nixĩ ga naega. Rũ wũxi ga yema norũ tomaẽxpũxarũ ùye ga guxũma ga dexá rũ naxũxchiũ. Rũ muxũma ga duũxũgũ rũ yema dexáwa nayue yerũ naxũxchiũ. ¹² Rũ yema norũ ãgũmũcũ ga Tupanaãrũ orearũ ngeruũ rũ nayacue ga norũ corneta. Rũ wũxi ga yema norũ tomaẽxpũxarũ ùye ga ùèxcũ rũ nixo. Rũ yexgumarũũ ta wũxi ga yema norũ tomaẽxpũxarũ ùye ga tauemacũ rũ woramacurigũ rũ èxtagũ rũ nixo. Rũ yemaãcũ wũxi ga yema norũ tomaẽxpũxarũ ùye ga guxũma ga yema rũ naxẽãne. Rũ ga ngunecũ rũ ãgũmũcũ ga ora naxẽãne. Rũ ga chũtacũ rũ ãgũmũcũ ga ora nataxuma ga tauemacũ rũ bai ga woramacurigũ rũ bai ga èxtagũ. ¹³ Rũ yemawena ichadawenũ rũ nũxũ chaxĩnũ ga wũxi ga ìyũ ga daxũgu íxexeũxũ ga tagaãcũ ñaxũ:

“Nangechaũtũmũũgũ i ngẽma duũxũgũ i yea pecaduãxũ i naãnewa maxẽxũ i ngẽxguma yacuegũãgu tá ya norũ cornetagũ i ngẽma togũ i tomaẽxpũx i Tupanaãrũ orearũ ngeruũgũ”, ñaxũ.

9

¹ Rũ yema norũ wũximẽẽxpũx ga Tupanaãrũ orearũ ngeruũ, rũ nayacue ga norũ corneta. Rũ nũxũ chadau ga wũxi ga woramacuri ga daxũwa rũngucũ ga ñoma ga naãnegu ngucũ. Rũ guma woramacuri nanayaxu ga yema ãxmaxũ ga taguma iyacuáxũãrũ chawi. ² Rũ nayawãxna ga yema ãxmaxũ ga taguma iyacuáxũ. Rũ yema inayagoema ga caxixũ ñoma wũxi i taxũ i ùxearũ caxixũrũũ. Rũ yema caxixũ rũ nanaxẽẽmaxẽẽ ga ùèxcũ. ³ Rũ yema caxixũwa ínachoxũ ga munũgũ ga naãneetũgu yixũ. Rũ yema munũgũ rũ nanayauxgũ ga pora ga nũxna naxãxũ na ñoma tuxchinawerũũ duũxũgũxũ nachixũcèx. ⁴ Rũ yema munũmaã nũxũ nixu na tama natũanexũ nachixexẽẽxũcèx rũ bai i tacũ rũ nanetũgũ rũ bai i tacũ rũ naĩgũ. Natũrũ nanamu na nachixexẽẽgũãxũcèx ga yema duũxũgũ ga tama Tupanaãrũ cuèxruũ nacatũwa yexmaxũ. ⁵ Natũrũ tama nanamu na yema duũxũgũxũ nadèixũcèx. Natũrũ nanamu na ngũxũ

nüxü yangexêemaregüxcèx ga wüximêxpüx ga tauemacü. Rü yema ngúxü ga nüxü yangexêégüxü, rü ñoma tuxchinawe duüxügüxü chixürüü nixí. ⁶ Rü ngêma ngunexügügu rü duüxügü tá naxcèx nadaugü na nayuexü, natürü täütáma nayue. ⁷ Rü yema munügü rü ñoma cowaru i guerawa íxürüü nixígü. Rü naêruwa nüxü nayexma ga tacü ga ñoma ngèxcuerüü ga uirunaxcèxrüü ixígüxü. Rü nachiwe rü nanaduüxüchiweraxügü. ⁸ Rü nayaegü rü ñoma ngeãxyaerüü nixígü. Rü napütägü rü ñoma aipütägürüü nixígü. ⁹ Rü naxünewa nayexma ga norü poxüruü ga fierunaxcèx. Rü naxpèxatügüga rü ñoma muxüchine ya caru ya guerawa cowaru tügünegarüü ixixü. ¹⁰ Rü nareexügü rü ñoma tuxchinawerüü naxãnegu. Rü yema naneguwa rü naxãguchata na wüximêxpüx ya tauemacü duüxügüxü ngúxü yangexêégüxcèx. ¹¹ Rü yema munügüarü ãëxgacü, rü yema ãxmaxü ga taguma iyacuáxüärü dauruü nixí. Rü Yudiügügawa ga yema munügüarü ãëxgacü, rü Abadóü nixí. Rü Griégügügawa rü Apolióü nixí. Rü ngêma rü: “Chixexêëruü”, ñaxüchiga nixí. ¹² Rü yexma nayacuèx ga yema nüxíraüxü ga chixexü ga taxü, natürü ínayaxüama ga to ga taxre. ¹³ Rü yema norü 6 ga Tupanaärü orearü ngeruü rü nayacue ga norü corneta. Rü nüxü chaxínü ga wüxi ga naga ga yema Tupanapèxewa yexmaxü ga uirunaxcèx ga pumaraarü gutèxeruütaxmüwa inaxüxü. ¹⁴ Rü yema naga rü nanamu ga yema orearü ngeruü ga cornetaãxü, rü ñanagürü nüxü:

“¡Yawêgüxü i ngêma ägümücü i orearü ngeruügü i Chatanáärü ixígüxü i taxtü i Eufrátegu ngãxügüxü!” ñanagürü. ¹⁵ Rü yemaäcü niwêgüxü ga yema ägümücü ga orearü ngeruügü na nadaiãxüxcèx ga wüxi ga yema norü tomaèxpüxarü üyetücumü ga duüxügü. Yerü ga yema orearü ngeruügü rü woetama yemacèx ínamemaregü na yema ora rü yema ngunexü rü guma tauemacü rü guma taunecü nadaiãxüxcèx ga yema duüxügü. ¹⁶ Rü nüxü chaxínü na ñuxre na yíixü ga yema orearü ngeruügüarü churaragü ga cowaruétügu íxü. Rü 200 miyónegü nixígü. ¹⁷ Rü yemaäcü nixí ga nüxü chadauxü ga yema cowarugü ga yexguma changoxetügu. Rü yema churaragü ga yema cowaruétügu íxü rü nüxü nayexma ga norü ngèxcuxünexü ga poxüruü ixixü ga ñoma üxüxetürüü iyauraxü. Rü yema poxüruü rü nixãmatü rü nidaumatü rü niyèuxmatü rü nidexmatü. Rü yema cowaruerugü rü ñoma aierurüü nixígü. Rü naãxgüwa ínaxüxü ga üxüema rü caxixü rü azufre. ¹⁸ Rü wüxi ga norü tomaèxpüxarü üyetücumü ga duüxügü rü nayue namaã ga yema tomaèxpüx ga chixexêëruü ga üxüema rü caxixü rü azufre ga yema cowarugüèxwa íchoxüxü. ¹⁹ Yerü ga yema cowarugü rü naãxwa rü nareexüwa nixí ga nüxü nayexmaxü ga norü pora na duüxügüxü nadèixüxcèx. Yerü ga nareexügü rü ñoma äxtaperüü nixígü, rü yemamaã nanangõx ga duüxügü rü ngúxü nüxü ningexêë rü nanadai. ²⁰ Natürü ga yema togü ga duüxügü ga tama yema poxcuruügümaã yuexü, rü tama nüxü narüxoe ga yema chixexügü ga naxügüxü. Rü tama nüxü narüxoe na nüxü yacuèxüügüxü ga ngoxogü rü norü tupanenetachicünèxãgü ga uirunaxcèx rü dīerumünaxcèx rü cobrenaxcèx rü nutagünaxcèx rü nañnaxcèx. Rü yemaäcü nüxü nicuèxüügüama ga yema norü tupanenetachicünèxãgü ga ngearü maxüãxü rü tama nüxü dauxü rü tama nüxü ínüxü rü tama ixixü. ²¹ Rü tama nüxü narüxoe na namáëtagüxü, rü yayuüexü, rü nangèãëgüxü rü nangítèëxgüxü.

10

Orearü ngeruü ga nüxü yexmaxü ga popera ga idixixüchiga

¹ Rû nüxü chadau ga wüxi ga to ga Tupanaärü orearü ngeruü ga daxüguxü ga nañewa íruxixü. Rû wüxi ga caixanexüärü ngäxüwa nayexma, rû wüxi ga chirapa naétügu nabo. Rû nachiwe rû ñoma üexcürüü niyauracüü. Rû naparagü rû ta ñoma üxüemarüü niyauracüü. ² Rû naxmëxwa nüxü nayexma ga wüxi ga poperaxacü ga íwëgüxü. Rû norü tügünepara rû taxtü i taxüetügu nachicutü. Rû norü toxwepara rû waixüümüänegu nachicutü. ³ Rû ñuxüchi ga nüma rû tagaäcü aita naxü ñoma wüxi ya ai ya tagaäcü aita ücürüü. Rû yexguma aita naxüxgu rû 7 êxpüxcüna naduruächiane. ⁴ Rû yexguma yema 7 êxpüxcüna na naduruächianexüguwena rû chanaxümatüchaü. Natürü nüxü chaxînü ga wüxi ga naga ga daxüguxü ga nañewa inaxüxü ga ñaxü choxü:

“¡Täxü i cunangoxëëxü i ngëma 7 i duruanexü nüxü ixuxü! ¡Rû ngexrüma na cunaxümatüxü!” ñaxü choxü. ⁵ Rû ñuxüchi ga yema Tupanaärü orearü ngeruü ga nüxü chadauxü na taxtü ga taxüetügu rû waixüümüetügu nachicutüxü, rû daxü naxunagü ga norü tügünechacüü. ⁶ Rû inaxuneta naegagu ga Tupana ya yima guxüguma maxücü ya yima naxücü i daxüguxü i nañe rû ñoma i nañe rû taxtü i taxü rû guxüma i tacü nawa ngëxmagüxü. Rû ñanagürü ga yema orearü ngeruü:

“Ñuxma rû marü täütáma nuxcü ningü i ngëma Tupana nüxü ixuxü. ⁷ Erü ngëxguma nawa nanguxgu na ngëma norü 7 i Tupanaärü orearü ngeruü inaxügüxü na yacueäxü ya norü corneta, rû ngëxguma tá nixi i yanguxü ga yema noxri êxügüxü ga Tupanaärü uneta, yema nuxcümaügüxü ga norü orearü uruügümaã nüxü yaxuxü”, ñanagürü. ⁸ Rû yema naga ga noxri nüxü chaxînüxü ga daxügüxü ga nañewa inaxüxü, rû wenaxärü chomaã nidexa. Rû ñanagürü choxü:

“¡Naxütawa naxü i ngëma Tupanaärü orearü ngeruü i taxtü i taxüetügu rû waixüümüäneetügu chicutüxü! ¡Rû nüxna nayaxu i ngëma poperaxacü i marü íwëgüxü i naxmëxwa ngëxmaxü!” ñanagürü. ⁹ Rû naxütawa chaxü ga yema orearü ngeruü, rû nüxna naxcèx chaca ga yema poperaxacü na choxna naxäxüçèx. Rû nüma rû ñanagürü choxü:

“Ñañ nixi. ¡Rû nayaxu rû nangõx! Rû cuèxwa rû berurerüü tá namaicura. Natürü cuanüwa rû tá nanaxüxächi”, ñanagürü choxü. ¹⁰ Rû yema orearü ngeruümëxëwa chanayaxu ga yema poperaxacü, rû chanangõx. Rû chauèxwa rû berurerüü namaixcura. Natürü yexguma chanangõxguwena rû chauanüwa rû nanaxüxächi rû changuxneca. ¹¹ Rû ñuxüchi chomaã nüxü nixu, rû ñanagürü choxü:

“Name nixi na wenaxärü Tupanaärü orexü quixuxü namaã i muxüma i nagüxüraüxü i duüxügü, rû muxüma i nachiuñanecüäxgü i duüxügü, rû muxüma i duüxügü i to i nagawa idexagüxü, rû muxüma i nachiuñanegüarü äëxgacügü”, ñanagürü choxü.

11

Taxre ga orearü uruüchiga

¹ Rû yemawena chanayaxu ga wüxi ga dexnemenëxã ga ngugürüü ixixüne ga choxna naxäxüne. Rû guma choxna naxäcü rû ñanagürü choxü:

“¡Inachi rû nangugü ya yima Tupanapata rû ngëma pumaraarü gutëxeruütaxmü! ¡Rû yaxugü rû ñuxre yixü i ngëma duüxügü i ngëma Tupanaxü icuëxüügüxü! ² ¡Natürü ngëma naäxtü ya Tupanapata, rû täütáma cunangugü! Erü ngëma duüxügü i tama Tupanaäxü yaxögüxüna marü nanaxã. Rû nümagü rû tomaëxpüx ya taunecüarü ngäxü tá chixexü namaã naxügü ya yima ñane ya üünene ya Yerucharéü. ³ Rû choma rû tá chanamu i taxre i chorü orearü uruügü na 1,260 i ngunexü duüxügümaã nüxü

yaxugüxcèx i chorü ore. Rü nümagü i ngēma taxre rü tá niwēxchiru na ngēmawa duūxügü nüxü cuèxgüxcèx na ngechaü nüxü nguxgüxü”, ñanagürü choxü. ⁴ Rü ngēma taxre i orearü uruügü nixi i norü cuèxruü i ngēma taxre i nanetü i oribu rü ngēma taxre i weraarü üruügü i tórü Cori ya ñoma i naâneärü yora ixícüpēxewa ngēxmagüxü. ⁵ Rü ngēxguma texé chixexü namaã ügüchaügu i ngēma taxre i orearü uruügü, rü nümagü rü üxüema ya naāxwa ínacuexechinemaã tüxü tá ínagu. Rü ngēmaäcü tá inayanaxoxēē i norü uwanügü. Rü ngēmaäcü tá tüxü nadai ya yixema chixexü namaã ügüchaüxē. ⁶ Rü ngēma taxre i orearü uruügü rü nüxü nangēxma i pora na íyachaxächixüxcèx ya pucü na tama napuxüxcèx i guxüma i ngēma 1,260 i ngunexügü i nagu Tupanaärü orexü yaxugüxü. Rü ngēxgumarüü ta nüxü nangēxma i pora na nagüxü yaxixēēgüāxüxcèx i dexá. Rü ngēxgumarüü ta nüxü nangēxma i pora na ñoma i naānewa namugüāxüxcèx i nagüxüraüxü i poxcuruügü na ngēmaäcü ngüxü duūxügüxü yangexēēgüxcèx i ngēxguma ngēma taxre naxwèxegügu. ⁷ Natürü ngēxguma ngēma taxre i orearü uruügü naguxēēgügu na nüxü yaxugüxü i Tupanaärü ore, rü ngēma ngoxo i ngēma āxmaxü i taguma iyacuāxüwa íxüxüxü, rü tá ngēma taxrena nayuxu. Rü tá nüxü narüyexera, rü tá nanadai. ⁸ Rü ngēma naxünegü i ngēma taxre rü tá yima ñāne ga tórü Cori nawa curuchawa ipotane ya Yerucharéüärü ítamügüwa nawogü. Rü yima ñāne rü nachixe rü ngēmacèx Chodomaärü ñānemaã rü Equituanemaã nanaxugü. ⁹ Rü tomaēxpüx i ngunexüärü ngāxü rü muxüma i nagüxüraüxü i duūxügü rü muxüma i guxü i nachiüānecüāx i duūxügü rü muxüma i duūxügü i to i nagawa idexagüchigüxü, rü tá nüxü nadaugü i naxünegü. Rü täütáma nanaxwèxegü na texé inatèxgüxü. ¹⁰ Rü ngēma duūxügü i ñoma i naānewa maxēxü rü tá nataāēgü na marü nayuexü i ngēma taxre. Rü ngēma na poraäcü nataāēgüxüchixü rü tá nügüna āmare naxāgü, yerü yema taxre ga orearü uruügü rü poraäcü nanachixewe rü naāēwa nananguxēēgü. ¹¹ Natürü yema tomaēxpüx ga ngunexüärü ngāxüguwena, rü Tupana wenaxärü nanamaxēxēē ga yema taxre. Rü wenaxärü ínarüdagü. Rü guxüma ga yema duūxügü ga nüxü daugüxü rü poraäcüxüchi namuñē. ¹² Rü ñuxüchi ga yema taxre ga orearü uruügü, rü nüxü naxinüē ga wüxi ga naga ga tagaäcü daxügüxü ga naānewa inaxüxü ga ñaxü:

“¡Nuā daxüwa pexi!” ñaxü. Rü yemaäcü ga nümagü rü wüxi ga caixanexügu daxügüxü ga naānewa naxi. Rü norü uwanügü rü yéma nüxü narüdaunü.

¹³ Rü yexgumatama poraäcü naxiāxāchiane. Rü wüxi ga yema norü 10 arü üye ga guma ñāne, rü niwèxgü. Rü 7,000 ga duūxügü nayue namaã ga yema ñāxāchiane. Rü yema togü ga duūxügü ga maxēxü rü poraäcüxüchi namuñē. Rü Tupana ya daxügüxü i naānewa ngēxmacüxü nicuèxüügü. ¹⁴ Rü yexma nayacuèx ga yema norü taxre ga chixexü. Natürü paxa tá ínangu i ngēma norü tomaēxpüx ixixü.

Guma norü 7 ga cornetachiga

¹⁵ Rü yema norü 7 ga Tupanaärü orearü ngerüü, rü nayacue ga norü corneta. Rü nayexma ga nagagü ga tagaäcü daxügüxü ga naānewa inaxügüxü ga ñagüxü:

“Ñuxma rü yima mecü na namaã inacuèxgüxü i ñoma i naāne, rü nüma nixi ya tórü Cori ya Tupana rü Nane ya Cristu. Rü nüma rü guxügutáma namaã inacuèxgü”, ñagüxü. ¹⁶ Rü nümagü ga yema 24 ga āēxgacügü ga norü tochicaxügüwa rütogüxü ga Tupanapēxewa, rü yexma nanangücuchitanü, rü Tupanaxü nicuèxüügü. ¹⁷ Rü ñanagürügü:

“Pa Torü Cori ya Tupana ya Guxüärü Yexera Poracüx, cuma rü woetama cuyexmaēcha, rü ñuxma rü ta cungēxmaēcha. Rü moxē cuxna taxāgü, erü

marü cugümëxëwa cunangëxmaxëë i guxüma, rü marü icunaxügü na namaã icucuáxü. ¹⁸ Rü ngëma duüxügü i tama cuxrü ixígüxü rü poraãcuxüchi nanuë, natürü nawa nangu i ngëma ngunexü i nagu tá cunapoxcuexü. Rü ngëxgumarüü ta marü nawa nangu na nüxü quicagüxü i guxüma i duüxügü i yuexü. Rü marü nawa nangu na nüxü cunaxütanüxü i ngëma curü duüxügü i curü orearü uruügü, rü ngëma duüxügü i cupëxewa imexü, rü guxüma i ngëma duüxügü i cuxü muüëxü i yaexü rü buexü. Rü marü nawa nangu na icuyanaxoxëëxü i ngëma duüxügü i nachixexëëxü i ñoma i naãne”, ñanagürügü. ¹⁹ Rü ñuxüchi Tupanapata ga daxügüxü ga naãnewa yexmane, rü niwãxna. Rü yéma norü aixepewa nüxü chadau ga yema baú ga Tupanaärü uneta ga nutagu ümatüxü. Rü nibëixbëxane, rü poraãcü nicuxcuane, rü naxiãxãchiane rü poraãcü gáuxü narüyi.

12

Wüxi ga nge rü wüxi ga coya ga taxü

¹ Rü ñuxüchi daxüwa nangox ga wüxi ga cuëxruü ga taxü. Rü iyexma ga wüxi ga nge ga üëxcürüü iyaaurachirucücü. Rü ngütüücutüwa nayexma ga tauemacü. Rü yema ngürü ngëxcuerüü ga ngïëruwa yexmaxü, rü 12 ga woramacurigü nixígü. ² Rü yema nge rü itacharaü. Rü poraãcü aita ixü yerü ixíraxacüchaü rü poraãcü ingüxnecaxüchi. ³ Rü yemawena daxüwa nangox ga to ga cuëxruü. Rü yéma nayexma ga wüxi ga coya ga taxüchixü ga dauxü ga 7 ga naëru nüxü yexmaxü rü 10 ga naxchatacuxre. Rü wüxichigü ga naëruwa rü nüxü nayexma ga norü ngëxcuerüü. ⁴ Rü nareexümaã inayatüchigü ga wüxitücumü ga norü tomaëxpüxarü üye ga woramacurigü, rü ñoma ga naãneëtügu nanawogü. Rü yema coya rü ngïpëxegu nayachi ga yema nge ga íraxacüchaücü, yerü tüxü nangöxchaü ga guxema ngixácüxe ga yexguma tabuxgu. ⁵ Rü yema nge rü ixíraxacü, rü nayatü. Rü nüma rü tá guxü i nachiüãneärü äëxgacü nixi, rü tá namaã inacuëx. Natürü ga guma ngïne rü Tupana ngixna nanayaxu rü yema ínatoxüwa nanaga. ⁶ Rü yema nge rü wüxi ga nachica ga ngextá taxüema íxãpataxüwa iña. Rü yéma Tupana ngixcëx nanamexëë ga wüxi ga ngichica na yéma ngixna nadauxücëx rü ngixü naxüwemüxücëx ga 1,260 ga ngunexü. ⁷ Rü yemawena ga daxüwa rü nügü nadai. Rü Miguere ga Tupanaärü orearü ngeruügüarü äëxgacü ixicü rü guxüma ga natanüxü ga orearü ngeruügü, rü nügü nadai namaã ga yema coya ga taxüchixü rü norü orearü ngeruügü. Rü yema coya rü ñuxüchi norü orearü ngeruügü i chixexü rü poraãcü Tupanaärü orearü ngeruügümaã nügü nadai. ⁸ Natürü ga yema coya rü norü orearü ngeruügü rü tama Tupanaärü orearü ngeruügüxü narüporamaëgü. Rü ñuxüchi ga yema coya rü norü orearü ngeruügü rü nangechica ga daxügüxü ga naãnewa. ⁹ Rü yemaãcü ínatëxüchi ga daxügüxü ga naãnewa ga yema coya ga yema nuxcümaüxü ga äxtape. Rü nüma rü ngoxogu rü Chatanágu naxãega. Rü nüma nixi i guxüma i ñoma i naãneçüãx i duüxügüxü nawomüxëëxü. Rü nüma rü norü orearü ngeruügümaã ñoma ga naãnegu narüwoü. ¹⁰ Rü ñuxüchi nüxü chaxínü ga wüxi ga naga ga daxügüxü ga naãnewa tagaãcü ñaxü:

“Ñuxma rü marü nawa nangu na tórü Tupana rü norü duüxügüxü namaxëxëëxü. Rü ñuxma rü nüma tüxü nüxü nadauxëë na guxüärü yexera naporaxü rü guxüärü äëxgacü yixü. Rü Nane ya Cristu rü marü tüxü nüxü nadauxëë na guxümaã inacuáxü. Yerü marü daxügüxü ga naãnewa ínatëxüchi ga Chataná ga ngunecü rü chütacü tórü Tupanapëxewa taeneëgüxü yeücürü ixuechaxü. ¹¹ Rü nümagü ga yema taeneëgü, rü marü Chatanáxü narüyexeragü nagügagu ga guma pecaduarü ütanücëx yücü rü

nagagu ga Tupanaärü ore ga nüxü yaxugüxü. Yerü ga nümagü rü tama nayanuxügü ga norü maxü, rü ínamemaregü na Tupanacèx nayuexü. ¹² ¡Rü ngëmacèx petaãëgü i guxãma i pema i daxüguxü i naãnewa ngëxmagüxe! ¡Natürü pengechaütümüügü i pema i yea naãne i pecaduãxüwa ngëxmagüxe rü taxtü i taxüwa ngëxmagüxe! Erü ngëma ngoxo i Chataná rü marü petanügu narütáe. Rü poraãcü nanu i nüma erü marü noxretama i ngunexü nüxü ínayaxü na chixexü naxüxü, erü paxa tá napoxcu”, ñanagürü ga yema naga. ¹³ Rü yema coya ga taxüchixü ga Chataná nagu icüxü rü yexguma nügü yacuèxãchigu ga ñoma ga naãnegu na nataéxü, rü ngíwe ningëchigü ga yema nge ga íraxacücü. ¹⁴ Natürü ga Tupana rü ngxü naxüxpexatü ga yema nge. Rü nanaxíyüpexatügüraxü. Rü yemaãcü nachica ga ngextá taxúema íxãpataxüwa ina naxchaxwa ga yema coya ga Chataná nagu icüxü.. Rü yema nachicawa nixí ga Tupana ngíxna dauxü, rü ngíxü üwemüxü ga tomaëxpüx ga taunecüarü ngãxü. ¹⁵ Rü yema coya ga Chataná rü dexá nügüèxwa ínaxüxüxëe na wüxi ga natü naxüxüçèx, rü yema natümaã ngíxü yachaxëèxüçèx ga yema nge. ¹⁶ Natürü ga waixümü rü ningëx na iyachexëèãxüçèx ga yema dexá ga coya nügüèxwa íxüxüxëèxü. ¹⁷ Rü ñuxüchi ga yema coya ga Chataná, rü poraãcüxüchima ngímaã nanu ga yema nge. Rü ínixü na nügü namaã yadëixüçèx ga yema togü ga ngíxãcügü ga yema nge. Rü ngëma ngíxãcügü i ngëma coyamaã nügü dëixü, rü ngëma nixí i ngëma duüxügü i meã Tupanaärü orega ínüèxü rü meã yaxögüechaxü i Ngechuchu ya Cristuarü ore i aixcüma ixíxü. Rü ñuxüchi ga yema coya rü norü numaã taxtü ga taxüãnacügu nayarüñu.

13

Taxre ga ngoxogüchiga

¹ Rü nüxü chadau ga wüxi ga ngoxo ga taxü ga taxtügu íñuãchixü ga 7 eruxü rü 10 chatacuxrexü. Rü wüxichigü ga naxchatacuxrewa rü nüxü nayexma ga norü ngëxcuerü. Rü naërugügu naxümatü ga ñuxre ga naegagü ga Tupanamaã guxchigagüxü. ² Rü yema ngoxo ga nüxü chadauxü, rü wüxi ga airü nixí. Rü naxmëxgü rü chatü ga taxümëxëgürü nixí. Rü naãx rü wüxi ga aiëxrü nixí. Rü yema coya ga Chataná rü yema ngoxoxü naporaxëe na naxrü naporaxüçèx rü naxrü ãëxgacü yíxüçèx na ñoma ga naãnemaã inacuáxüçèx. ³ Rü wüxi ga naëruwa ga yema ngoxo, rü nüxü nayexma ga wüxi ga taxü ga norü oxri ga namaã nayuxchaüxü. Natürü ga yema norü oxri rü nüxü nixë, rü naxcèx nitaane. Rü guxüma ga ñoma ga naãnecüãx ga duüxügü rü poraãcü yema ngoxomaã nabaixãchie, rü nawe narüxí. ⁴ Rü ga duüxügü rü yema coya ga Chatanáxü nicuèxüügü yerü yema ngoxoxü naporaxëe na ãëxgacü yíxüçèx. Rü yexgumarü ta yema ngoxoxü nicuèxüügü, rü ñanagürügü:

“¿Texé tangëxma ya ñaã ngoxorü poraxe? ¿Rü texé tapora na namaã tügü tadëixü?” ñanagürügü. ⁵ Natürü ga Tupana rü tama yema ngoxona nanachüxu na nügü yacuèxüxüçèx rü tacü Tupanamaã yaxugüxüçèx rü ãëxgacü na yíxüçèx ga 42 ga tauemacü. ⁶ Rü yemaãcü chixexü naxü ga yema ngoxo. Rü poraãcü tacü Tupanamaã nixügü. Rü Tupanamaã naguxchiga, rü napatamaã rü ta naguxchiga, rü tümamaã naguxchiga ya guxãma ya yíxema daxüguxü i naãnewa ngëxmagüxe. ⁷ Rü yema coya ga Chataná rü yema ngoxoxü naporaxëe na Tupanaärü duüxügümaã nügü nadëixüçèx ñuxmatáta tüxü nayexera. Rü ãëxgacüxü nayaxíxëe na namaã inacuáxüçèx ga nagúxüraüxü ga duüxügü ga guxüma ga nachíuãnecüãx ga nagúxüraüxü ga nagawa idexagüxü. ⁸ Rü tá ngëma ngoxoxü nicuèxüügü

i guxüma i duüxüğü i ñoma i nañewa maxëxü i noxritama nañe üxgu ngeégagüxü nawa i norü popera ya yima pecaduarü ütanüçex yucü i nagu yawüğüãxü i ngëma duüxüğü i marü Tupana nüxna naxãxü i maxü i taguma gúxü. ⁹⁻¹⁰ Rü ngëxguma texé ãxchixëgu, rü name nixi i naga taxĩnü i ñãã tá pemaã nüxü chixuxü. Rü ngëxguma texé tümamaã naxuegugu na tüxü yayauxgüxü, rü noxtacüma tá tiyaxu. Rü ngëxguma texé tümamaã naxuegugu na tüxü yamëxgüxü, rü noxtacüma tá tüxü nimëxgü. Rü ngëmacëx ya yixema Tupanaãrü duüxüğü ixĩgüxe, rü woo tacü rü guxchaxü tüxü ngupetügu, rü tanaxwëxe na yaxna namaã taxĩnüëxü rü tayaxögüamaxü. ¹¹ Rü yemawena nüxü chadau ga wüxi ga to ga ngoxo ga taxrechatacuxrexü ga waixümüãnewa ixüxüxü. Rü yema naxchatacuxre rü ñoma carneruchatacuxrerüü nixi. Natürü ga naga rü wüxi ga coya ga taxüchixügarüü nixi. ¹² Rü yexguma yema nüxĩraüxü ga ngoxopëxewa nayexmagu, rü naxrüütama napora. Rü ñoma ga nañemaã inacuëx, rü nanamu ga ñoma ga nañewa maxëxü ga duüxüğü na yema nüxĩraüxü ga ngoxo ga ixëãrü oxriãxüxü na yacuëxüügüxüçex. ¹³ Rü yema ngoxo nanaxü ga taxü ga cuëxruüğü ga duüxüğü tama nüxü cuáxü na naxüğüãxü. Rü daxüwa nanayixëë ga üxü, rü ñoma ga nañegu nayi napëxewa ga duüxüğü. ¹⁴ Natürü ga Tupana rü tama yema ngoxona nanachuxu na ñoma ga nañewa maxëxü ga duüxüğüxü nawomüxëëxü namaã ga yema cuëxruüğü ga yema nüxĩraüxü ga ngoxopëxewa naxüxü. Rü yemaãcü ga yema ngoxo rü duüxüğüxü namu na naxüğüãxüçex ga naxchicünëxã ga yema nüxĩraüxü ga ngoxo ga taramaã chexexü rü poraãcü rüxóxü rü tama yuxü. ¹⁵ Rü Tupana rü tama yema to ga ngoxona nanachuxu na namaxëëãxüçex ga yema nüxĩraüxü ga ngoxochicünëxã. Rü yemaãcü ga yema ngoxo rü nanamaxëë ga yema naxchicünëxã na yadexaxüçex rü na nadaiãxüçex ga guxüma ga yema duüxüğü ga tama nüxü icuëxüügüxü. ¹⁶ Rü yexgumarüü ta guxüma ga duüxüğüxü namu na norü tügünemëxëwa rü ëxna nacadüwa nüxü na nayexmaxüçex ga wüxi ga cuëxruü ga yema ngoxoëga ixixü. Rü yemaãcü nanamu ga guxüma ga duüxüğü rü woo buxü rü ëxna yaxü, rü woo duüxüğü i muãrü díeruãxgüxü rü ëxna ngearü díerüãxgüxü, rü woo duüxüğü i ngearü coriãxgüxü rü ëxna duüxüğü i ixããrü coriãxgüxü. ¹⁷ Rü taxucürüwa texé tümããrü tacüçex tataxe rü ëxna tümããrü tacümaã tataxe ga yexguma tümããrü tügünemëxëwa rü ëxna tümacatüwa tüxü natauxgu ga yema ngoxoëga rü ëxna yema ngoxoëgaarü cuëxruü ga número. ¹⁸ Rü ñãã orexü na icuãxüçex, rü tanaxwëxe na tüxü nangëxmaxü i tóru cuëx. Rü yixema tüxü nangëxmaxë i tümããrü cuëx, rü name nixi i tanangugü i ngëma número i ngëma ngoxoëga ixixü. Erü ngëma número rü wüxi i yatüégachirëx nixi. Rü ngëma número rü 666 nixi.

14

Yema 144,000 ga duüxüğüarü wiyae

¹ Rü yemawena ichadawenü, rü nüxü chadau ga guma pecaduarü ütanüçex yucü ga guma mëxpüne ga Siõügu äeganeetügu chicü. Rü naxütawa nayexma ga 144,000 ga duüxüğü ga nacadüwa ixãegaxü namaã ga guma pecaduarü ütanüçex yucüëga rü Nanatü ya Tupanaëga. ² Rü ñuxüchi nüxü chaxĩnü ga wüxi ga naga ga tagaxü ga daxügüxü ga nañewa inaxüxü ga ñoma taxü i cotüna i chuxchuxügarüü ixixü rü ñoma poraãcü yaduruanexürüü ixixü rü ñoma muxüchixü i duüxüğü i arpawa ípaxetaxüürüü ixixü. ³ Rü yema 144,000 ga duüxüğü rü nagu nawiyaëgü ga wüxi ga yexwacaxüxü ga wiyae napëxewa ga Tupanaãrü tochicaxü rü napëxewa ga yema ägümücü

ga daxũcũãx ga maxẽxũ rü napẽxewa ga yema 24 ga ãẽxgacũgũ. Rũ taxucürüwama texé ga togue nüxũ tacuèxéga ga yema wiyae. Rũ yema 144,000 ga duũxũgũxicatama nixĩ ga nüxũ cuèxgũxũ. Rũ yema nixĩ ga Tupana ñoma ga naãnewa deixũ na namaxẽxẽãxũcèx. ⁴ Rũ yema nixĩ ga duũxũgũ ga tama ñoma ga naãneãrũ ngúchaũ i chixexũmaã nügũ ãũãchiarũ maxũãxgũxũ rü tama nüxũ rüxoexũ na Tupanaãxũ yaxõgũãxũ. Rũ nümagũ rü yima Tupana Nane ga pecaduarũ ütanüçèx yucüwe narüxĩ i ngextá ínaxũxũwa. Rũ yemagũ nixĩ ga ñoma ga naãnecũãxtanüwa nüxira Tupana naxcèx taxexũ na noxrü rü Naneãrũ duũxũgũ i üünexũ yixĩgũxũcèx. ⁵ Rũ yematanüwa rü taguma texé nüxũ taxĩnü na doraxũ yaxugũxũ, erü Tupanapẽxewa rü nataxuma i norü chixexũ.

Orearü ngeruũgũ ga daxũcũãxãrũ orechiga

⁶ Rũ ñuxũchi nüxũ chadau ga wüxi ga to ga orearü ngeruũ ga daxũguxũ ga naãnegu íxexeũxũ ga iyangexũ ga Tupanaãrũ ore i guxũgutáma ixĩxũ, na guxũ i nachiũãnecũãxgũmaã rü nagúxũraũxũ i duũxũgũmaã rü guxũma i duũxũgũ i nagúxũraũxũ i nagawa idexagũxũmaã nüxũ yaxuxũcèx. Rũ yemaãcũ inayange ga yema Tupanaãrũ ore na guxũma i ñoma i naãnewa maxẽxũ i duũxũgũmaã nüxũ yaxuxũcèx. ⁷ Rũ tagaãcũ ñanagürü:

“¡Nüxũ pemuũé ya Tupana rü nüxũ picuèxũũgũ! Erü marü nawa nangu na guxũma i duũxũgũna naçaxũ. ¡Rü nüxũ picuèxũũgũ ya yima naxüçü i daxũguxũ i naãne rü ñoma i naãne rü taxtũ i taxũ rü guxũma i natüxacũgũ!” ñanagürü. ⁸ Rũ yemawena nangõx ga to ga orearü ngeruũ ga daxũcũãx, rü ñanagürü:

“Marü nagu nayarüchixe ya yima ñãne ya taxũne ya Babiróniã, rü nagu napogüe rü nayawextaũgũxẽé ya norü ígũ. Yerü yema ñãnecũãx rü nanachixexẽé ga guxũma ga to ga nachiũãnecũãx ga duũxũgũ. Rũ guxũma ga yema duũxũgũxũ namu na naxüçüãxũcèx ga yema chixexũ ga guma ñãnewa naxüçüxũ ga Tupanapẽxewa poraãcũ chixexũ”, ñanagürü. ⁹⁻¹⁰ Rũ yemawena nangõx ga to ga orearü ngeruũ ga tagaãcũ ñaxũ:

“Ngẽxguma chi texé nüxũ icuèxũũgu i ngẽma ngoxo rü naxchicünèxãxũ ticuèxũũgu rü tũgũ itaxãxgu na tũmacatüwa rü êxna tũmamèxèwa ngẽma ngoxoégamaã tacuèxruũãxũ, rü Tupana rü poraãcũxũchi tá tũxũ napoxcu namaã i ngẽma poxcu i guxũãrũ yexera ixĩxũ i nümatama ya Tupana norü numaã namexẽéxũ. Rũ üxũmaã rü azufre i iyauraxũmaã tá ngúxũ tũxũ ningexẽé napẽxewa i norü orearü ngeruũgũ rü napẽxewa ya yima Nane ga pecaduarũ ütanüçèx yucü. ¹¹ Rũ naẽma ya yima üxũ ya nawa Tupana ngúxũ tũxũ ingexèene, rü guxũgutáma ngema nicaixqueecha. Rũ bai i írarüwa tá tũxũ narüna i ngẽma ngúxũ ya yíxema ngẽma ngoxoxũ rü ngẽma ngoxochicünèxãxũ icuèxũũgũxe rü tũgũ ixãxè na ngẽma ngoxoégamaã taxãegaxũ. Rũ bai i ngunecü rü bai i chütacü tá tũxũ narüna i ngẽma ngúxũ”, ñanagürü. ¹² Rũ ngẽmacèx ya yíxema Tupanaãrũ duũxũgũ ixĩgũxe rü norü orega ínüèxè rü Ngechuchuaxũ yaxõgũxe, rü name nixĩ na yaxna namaã taxĩnüèxũ rü tayaxõgũamaxũ ega woo tacü rü guxchaxũ tũxũ ngupetügu. ¹³ Rũ ñuxũchi nüxũ chaxĩnü ga wüxi ga naga ga daxũguxũ ga naãnewa inaxũxũ ga ñaxũ choxũ:

“¡Naxümatü i ñãã ore i tá cumaã nüxũ chixuxũ! Rũ ñuxmaũcũü tá tataãègũ ya yíxema tórü Coriaxũ meã yaxõgũãcũma yuexe. Erü Tupanaãé i Üünexũ rü ñanagürü: ‘Ngũ, ngẽmããcũ tá tataãègũ ya yíxema, erü tá itarüngũé nüxna i tũmaãrũ puracũgũ. Rũ ngẽma mexũ i taxüçüxũ rü tũmamaã wüxigu daxũguxũ i naãnewa tá naxũ’”, ñanagürü.

Ñoma i naãnewa nanade i ngẽma duũxũgũ i Tupanaãrũ ixĩgũxũ

14 Rū ñuxũchi ichadawenü rü nüxũ chadau ga wüxi ga caixanexũ ga cómuxũ. Rū yema caixanexũetüwa narüto ga Tupana Nane ga duũxũxũ ixĩcü. Rū naëruwa nayexma ga wüxi ga norü ngëxcueruũ ga uirunaxcèx. Rū namëxwa nayexma ga wüxi ga cüxchi ga ínapomaguxũ ga tēxechixũ. 15 Rū Tupanapatawa ínaxũxũ ga wüxi ga to ga orearü ngeruũ ga tagaãcü ñaxũ nüxũ ga guma caixanexũetüwa rütocü:

“¡Inaxüğü na cunadexũ i ngēma duũxüğü i cuxrü ixĩgüxũ! Erü marü nawa nangu na cugüxütawa cunagagüxũ, erü ngēma curü duũxüğü i ñoma i naãnewa ngëxmagüxũ rü ínamemare na cunadexũ”, ñanagürü. 16 Rū ñuxũchi ga guma yema caixanexũetüwa rütocü rü ñoma trigu i buxuxürüü naãneetügu ngĩmaã nayabuãchi ga norü cüxchi. Rū nanade ga yema norü duũxüğü ga ñoma ga naãnewa yexmagüxũ. 17 Rū ñuxũchi daxüguxũ i naãnewa ngëxmane ya Tupanapatawa ínaxũxũ ga wüxi ga to ga orearü ngeruũ ga nüxũ nayexmacü ga wüxi ga cüxchi ga ínapomaguxcü ga tēxechixcü. 18 Rū yema pumaraarü gutēxeruütaxmüwa ínaxũxũ ga wüxi ga to ga orearü ngeruũ ga üxümaã icuáxũ. Rū numa rü tagaãcü ñanagürü nüxũ ga yema to ga orearü ngeruũ ga yema cüxchi ga ínapomaguxcü ga tēxechixcü nüxũ yexmaxũ:

“¡Inaxüğü na cunadexũ i ngēma duũxüğü i yéa naãnewa ngëxmagüxũ i tama Tupanaärü ixĩgüxũ! Erü marü nawa nangu na Tupana napoxcuexũ”, ñanagürü. 19 Rū yema orearü ngeruũ rü ñoma ga naãneetügu ngĩmaã nayabuãchi ga norü cüxchi. Rū nayadexechi ga yema duũxüğü ga tama Tupanaärü ixĩgüxũ ga ñoma ga naãnewa yexmagüxũ. Rū wüxi ga taxũ ga nachicagu nanawocu na yexma Tupana norü numaã nadëixücèx, ñoma ubagü imëixtüüxürüü. 20 Rū yema nachica ga ñaneärü íxpemawa yexmaxügu nanadai. Rū guma nagü ga yéa íyaxüchicü, rü 300 ga kilómetru inayarübaichi, rü wüxi ga metruarü ngãxũ nixĩ ga norü mátama ga guma nagü.

15

Tupanaärü orearü ngeruüğü ga nüxũ nayexmaxũ ga 7 ga poxcuruüğü

1 Rū ñuxũchi ga daxüguxũ ga naãnewa rü nüxũ chadau ga wüxi ga to ga taxũ ga cuèxruũ ga namaã íbaixächixũ. Rū nayexma ga 7 ga orearü ngeruüğü ga daxüçüãx ga nüxũ yexmagüxũ ga 7 ga poxcuruü. Rū yema poxcugu nixĩ ga yagüxũ ga norü nú ga Tupana. 2 Rū yexgumarüü ta nüxũ chadau ga ñoma wüxi ga nanaxtaaétüwaraüxũ ga woruarüü iyauraétücüxũ ga üxüema nawa inachixũ. Rū yéa tayexmagü ga guxema nüxũ rüyexeraxe ga yema ngoxo rü yema ngoxochicünëxã rü yema ngoxoéga rü yema número ga yema ngoxoéga ixĩxũ. Rū yema nanaxtaaétüraüxügu tachigü. Rū tüxũ nayexmagü ga tümaärü paxetarüüğü ga arpa ga Tupana tüxna äxũ. 3 Rū nagu tawiyaegü ga Moïché ga Tupanaärü duũxũ ixĩcüarü wiyae. Rū yexgumarüü ta nagu tawiyaegü ga yema wiyae ga guma Tupana Nane ga pecaduarü ütanücèx yucüarü ixĩxũ ga ñaxũ:

“Pa Torü Cori ya Tupana ya Guxüärü Yexera Poracüx, nataxüchi rü namexëchi i guxüma i ngēma cuxüxũ. Rū cuma rü guxügutáma guxüma i nachiüñegüarü äëxgacü quixĩ. Rū cuma rü aixcüma meãma namaã icucuèx rü taguma quidora. 4 ¿Rü texé tãütáma cuxũ tamuü, Pa Corix? ¿Rü texé tãütáma cuxũ ticuèxüü? Erü cuma rü cuxicatama nixĩ i üünecü quiixũ. Rū guxüma i nachiüñecüãx rü nuã tá naxĩ, rü tá cuxũ nicuèxüüğü. Yerü marü nüxũ nadaugü na quixaixcümaxũ i guxüma i ngēma nüxũ quixuxüwa rü aixcüma mea cunangugüxũ i guxüma i ngēma chixexũ ügüxũ rü ngēma mexũ ügüxũ”,

ñanagürü ga yema wiyae. ⁵ Rû yemawena ichadawenü rû nüxü chadau ga daxüguxü ga nañewena yawãxnaxü ga yema nachica ga üünexü ga Tupanapataarü aixepewa yexmaxü ga ngexta namaã ínanguxügxüwa ga guma nuta ga Tupanaärü mugü nagu umatücü. ⁶ Rû guma Tupanapatawa ínachoxü ga yema 7 ga orearü ngeruügü ga daxüçüãx ga nüxü nayexmagüxü ga yema 7 ga poxcuruügü. Rû naxchiru ga mexëchixümaã rû iyauracüxümaã nixãxchiru. Rû yema norü goyeremüügü rû uirunaxcèx nixĩ. ⁷ Rû ñuxüchi wüxi ga yema ägümücü ga daxüçüãx ga maxüxü, rû wüxichigü ga yema 7 ga orearü ngeruügüna nanaxã ga wüxi ga copa ga uirunaxcèx ga Tupana ya guxüguma maxëchacüarü nu i äücümaxümaã ixãacuxü. ⁸ Rû guma Tupanapata rû namaã naxãacu ga yema caixema ga Tupana ya mexëchicü rû poracüwa ne üxü. Rû taxucürüwama texé yexma taxücu ñuxmata nagü ga yema 7 ga poxcuruü ga yema 7 ga orearü ngeruügüaxü yexmaxü.

16

copagü ga Tupanaärü numaã ixãacuxüchiga

¹ Rû ñuxüchi nüxü chaxĩnü ga wüxi ga naga ga tagaäcü guma Tupanapatawa inaxüxü ga ñaxü nüxü ga yema 7 ga orearü ngeruügü:

“¡Ngema pexĩ, rû nañeetüwa peyabagüäcu i ngëma 7 i copagü i Tupanaärü nu i äücümaxümaã ixãacuxü!” ñanagürü. ² Rû yéma naxü ga wüxi ga Tupanaärü orearü ngeruü, rû nañeetügu nayabaäcu ga norü copa. Rû guxüma ga duüxügü ga yema ngoxoégamaã ixãegaxü rû yema ngoxochicünëxãxü icuèxüügüxü, rû nawa inayarüogü ga taixna ga nguxuchixü ga taguma ixëxü. ³ Rû yema norü taxre ga orearü ngeruü, rû taxü ga taxtüétügu nayabaäcu ga norü copa. Rû nagüxü nananguxuchi ga dexá, rû ñoma wüxi i duüxü i texé imáxügürüü nixĩ ga dexá. Rû guxüma ga tacü ga taxtüwa maxëxü rû nayue. ⁴ Rû yema norü tomaëxpüx ga orearü ngeruü rû natügüétügu rû natüxacügüétügu nayabaäcu ga norü copa. Rû guxüma ga yema natügü rû natüxacügü, rû nagüxü nanacèxichi. ⁵ Rû ñuxüchi nüxü chaxĩnü ga yema Tupanaärü orearü ngeruü ga guxüma ga dexámaã icuáxü ga ñaxü:

“Pa Torü Cori ya Tupana ya Üünecü ya Woetama Yexmaëchacü rû Ñuxma Ngëxmaëchacü, cuma rû wüxi i mexü cuxü na ngëmaäcü dexá nagüxü cunacèxichixëxü naxchaxwa i ngëma duüxügü. ⁶ Yerü nümagü rû nanadai ga yema curü duüxügü rû curü orearü uruügü, rû inanaba ga nagü. Rû ñuxma i cuma rû wüxi i mexü nixĩ i cuxüxü na ngëma dexá nagüxü cunacèxichixëxü na nawa naxaxegüxüçèx. Yerü yema nixĩ ga yema nanaxwëxegüxü rû yemacèx nixĩ ga curü duüxügüxü nadejxü”, ñaxü. ⁷ Rû nüxü chaxĩnü ga wüxi ga naga ga yema pumaraarü gutëxeruütaxmüwa inaxüxü ga ñaxü:

“Ngü, Pa Cori ya Tupana ya Guxüärü Yexera Poracüx, aixcüma nixĩ i namexü i ngëma cuxüxü”, ñaxü. ⁸ Rû yema norü ägümücü ga orearü ngeruü rû üexcüétügu nayabaäcu ga norü copa. Rû yemaäcü poraäcü nananaiemaxëë ga üexcü na yema norü nañëmaxümaã ínaguãxüçèx ga duüxügü. ⁹ Rû guxüma ga duüxügü rû poraäcü nüxü nanguxema, natürü tama nüxü narüxoe ga nacüma ga chixexü rû tama Tupanaxü nicuèxüügü. Rû naguxchigagüama namaã ga Tupana ya guxüma i ngëma poxcuruümaã icuäcü. ¹⁰ Rû yema norü wüximëxpüx ga orearü ngeruü, rû yema ngoxoarü tochicaxüétügu nayabaäcu ga norü copa. Rû guxüwama ga ngextá äëxgacü íyixüwa ga yema ngoxo, rû naxëãne. Rû yema na poraäcü nüxü nangüxü ga duüxügü, rû nügü nangöörü conüãxgü. ¹¹ Natürü woo yemaäcü nüxü na nangupetüxü ga duüxügü, rû tama nüxü narüxoechaü ga yema chixexü ga naxügüxü. Natürü yema na poraäcü nüxü nangüxü ga norü taixnagü,

rü naguxchigagüama namaã ga Tupana ya daxügücü. ¹² Rü yema norü 6 ga orearü ngeruü, rü yema taxtü ga Euférateétügu nayabaãcu ga norü copa. Rü inayache ga yema taxtü na wüxi ga nama na yïxücèx naxcèx ga yema nachiuãnegüarü ãëxgacügü ga üèxcü íyarügoxüwa ne íxü. ¹³ Rü nüxü chadau rü yema coyaãxwa, rü yema nüxüraüxü ga ngoxoèxwa, rü yema to ga ngoxo ga yema orearü uruünetaxwa, rü wüxièxwachigü ínaxüxü ga wüxi ga naãe ga chixexü ga ñoma curururüü íxü. ¹⁴ Rü yema ngoxoãëgü nixi ga naxügüxü ga yema taxü ga cuèxruügü ga duüxügü taxucürüwa ügüxü. Rü yema ngoxogü rü ínachoxü na nangutaquëxexëëgüãxücèx i guxüma i ñoma i naãnewa ngëxmagüxü i nachiuãnegüarü ãëxgacügü na Tupana ya Guxüarü Yexera Poracümaã nügü nadaixücèx i ngëxguma nawa nanguxgu i naãneärü gux. ¹⁵ Natürü dücax, rü pexuãëgü erü tórü Cori ya Ngechuchu ya Cristu rü ñanagürü:

“Choma rü ngürüãchi taxúetáma choxü ínanguxëëyane íchangu, ñoma wüxi i ngítèxáxü ínguxürüü. Rü tataãe ya yíxema ímemarexe ñoma wüxi i duüxü i naxchiru ímexëëxürüü na tama tangexchiruxücèx rü taxánexücèx i ngëxguma íchanguxgu”, ñanagürü. ¹⁶ Rü yema ngoxogü, rü nanangutaquëxexëë ga guxüma ga ñoma ga naãnewa yexmagüxü ga nachiuãnecüãxgüarü ãëxgacügü. Rü yema nachica ga nawa nangutaquëxegüxü, rü Armaguedóügu naxãega i Yudíugügawa. ¹⁷ Rü yema norü 7 ga orearü ngeruü, rü buanecügumare nayabaãcu ga norü copa. Rü guma Tupanapata ya daxügüxü i naãnewa ngëxmanewa inanaxü ga wüxi ga naga ga tagaxü ga yema Tupanaärü tochicaxüwa ínaxüxü ga ñaxü:

“Marü ningu”, ñaxü. ¹⁸ Rü nibèixbëxane, rü poraãcü nicuxcuane, rü niduruane. Rü poraãcü naxiãxãchiane. Rü noxri Tupana duüxügüxü üxgumama rü taguma nayexma ga wüxi ga íãxãchiane ga yemarüü poraxü. ¹⁹ Rü guma íãne ga taxüne ga Babiróniã, rü tomaëxpüxgu ningüxyeane. Rü guma íãnegü ga ñoma ga naãnewa yexmagüne rü niwëxtaügü. Rü Tupana rü nüxna nacuaxãchi ga guma íãne ga Babiróniãärü chixexü. Rü yemacèx norü numaã poraãcü nanapoxcu ga guma íãne, yerü poraãcüxüchi namaã nanu. ²⁰ Rü guxüma ga capaxügü rü guxünema ga mëxpünegü, rü inayarüxogü. ²¹ Rü daxüwa narüyi ga gáuxü ga itapütaxü, rü duüxügüétügu nayi. Rü wüxipütachigü ga yema gáuxü, rü 40 ga kilogu nixi ga nayaxü. Rü ga duüxügü rü Tupanamaã naguxchigagü nagagu ga yema poxcuruü ga gáuxü, yerü poraãcü nüxü nangux ga yema poxcu ga Tupana namaã napoxcuxü.

17

Íãne ga Babiróniã ga wüxi ga nge ga ngëãëxü- chicügu íxuxüne

¹ Rü yema 7 ga orearü ngeruügü ga nüxü yexmagüxü ga 7 ga copagü, rü yematanüwa rü wüxi ga orearü ngeruü, rü chauxcèx nixü, rü ñanagürü choxü: “¡Nuã naxü! Rü tá cuxü nüxü chadauxëë i tacü tá nixi i ngürü poxcu i ngëma nge i ngeãëxüchicü i taxü i dexágüétüwa rütoxcü. ² Rü ñoma i naãnewa ngëxmagüxü i nachiuãnegüarü ãëxgacügü, rü ngímaã namaxë, rü yemaãcü poraãcü chixexü naxügü. Rü guxüma i ñoma i naãnecüãx, rü ngürü chixexü nüxna naxüe”, ñanagürü. ³ Rü yexguma Tupanaãe i Üünexü yemaãcü choxü ngoxetüxëëgu, rü yema orearü ngeruü rü wüxi ga nachica ga ngextá taxúema íxãpataxüwa choxü naga. Rü yema ngíxü chadau ga wüxi ga nge ga wüxi ga ngoxo ga dauxüetüwa rütoxcü. Rü yema ngoxo rü guxüwama naxãegaxüne, rü yema naegagü rü Tupanamaã naguxchiga. Rü 7 nixi ga naëru rü 10 ga naxchatacuxre. ⁴ Rü yema nge rü wüxi ga naxchiru ga dauxracharaxü rü dauxümaã íxãxchiru. Rü uirumaã rü nutagü ga mexëchicümaã íngãxãe.

Rü ngĩxmẽxwa ngĩxũ nayexma ga wũxi ga copa ga uirunaxcèx. Rü yema copa rü namaã naxããcu ga nagúxúraũxũ ga yema Tupanapêxewa chixexũ rü nagúxúraũxũ ga chixexũgü ga yema nge üxũ. ⁵ Rü ngĩcatügu naxümatü ga wũxi ga naega ga taxúema nüxũ cuáxũ na ñuxũ ñaxũchiga yĩxũ. Rü yema naega rü ñanagürü:

“Rü yima Babiróniã rü guxũma i ngema duũxũgü i chixexũ ügũxũ i ñoma i naãnewa maxẽxũarü mamá nixĩ”, ñanagürü. ⁶ Rü ngĩxũ chadau ga yema nge ga na nangãxũxũ namaã ga guma nagü ga yema duũxũgü ga Tupanaãrü ixĩgũxũ rü yema duũxũgü ga Ngechuchuarü orexũ na yaxugũxũcèx dèixũ. Rü yexguma yemaxũ chadèuxgu, rü chabaixãchi. ⁷ Rü yexguma ga yema orearü ngeruũ rü ñanagürü choxũ:

“¿Tacüçèx cubaixãchi? Düçèx, tá cumaã nüxũ chixu na tacüchiga yĩxũ i ngẽma nge, rü tacüchiga yĩxũ i ngẽma ngoxo i 7 eruxũ rü 10 chatacuxrexũ i naetüwa natoxũ. ⁸ Rü ngẽma ngoxo i nüxũ cudauxũ, rü yema nixĩ ga nuxcũmaxũchi maxchiréxũ natürü ñuxma rü marü yuxũ rü ngẽma ãxmaxũ i taxuguma iyacuáxũwa ngẽxmaxũ. Natürü paxa tá ngẽma íxũxũxũ, rü ñuxũchi ngẽma nachica i guxũgutáma nagu napoxcuxũwa tá üxũ. Rü ngẽma ngoxoma ã tá nabaixãchiãgü i ngẽma duũxũgü i ñoma i naãnewa maxẽxũ i tama nawa ngoxégagũxũ i ngẽma Tupanaãrü popera i noxritama naãne ixüğügu Tupana nagu yawüğüxũ i ngẽma duũxũgü i nüxũ nangẽxmaxũ i maxũ i taguma gúxũ. Rü nümagü i ngẽma duũxũgü rü aixcũma tá namaã nabaixãchiãgü i ngẽxguma nüxũ nadaugügu i ngẽma ngoxo ga nuxcũmaxũchi maxchiréxũ rü yuxũ natürü wena táxaru ínguxũ. ⁹ Rü ñaã nixĩ i wũxi i ore naxcèx i ngẽma duũxũgü i nüxũ natauxchaxũ na nüxũ nacüèxgũxũ. Rü ngẽma 7 i naeru i ngẽma ngoxo, rü yima nixĩ ya 7 ya mèxpũnechiga. Rü yima 7 ya mèxpũneetüwa nixĩ i natoxũ i ngẽma nge. Rü ngẽxgumarũ ta i ngẽma naerugü, rü 7 i nachiuãnegüaru ãëxgacüğüchiga nixĩ. ¹⁰ Rü wüximèxpũx i ngẽma ãëxgacüğü rü marü togü nüxũ narüyexeragü, rü ñuxma rü marü tama ãëxgacüğü nixĩgü. Rü ngẽma norü 6 i ngẽma ãëxgacüğü, rü nüma rü ñuxma rü ãëxgacü nixĩ. Rü ngẽma norü 7 tá nixĩ i yixcũra ínguxũ. Natürü ngẽxguma ínanguxgu i ngẽma norü 7 i nawa iyacuáxũ i ngẽma ãëxgacüğü, rü paxaãchimare tá nixĩ i ãëxgacü yĩxũ. ¹¹ Rü ngẽma ngoxo ga nuxcũmaxũchi maxchiréxũ rü ñuxma rü marü yuxũ, rü ngẽma nixĩ i norü 8 i ngẽma ãëxgacüğü. Rü nüma rü ngẽma 7 tanüxũ nixĩ. Natürü i nüma rü ngẽma nachica i guxũgutáma nagu napoxcuxũwa naxũ. ¹² Rü ngẽma 10 i naxchatacuxre i nüxũ cudauxũ, rü 10 i nachiuãnegüaru ãëxgacüğüchiga nixĩ. Natürü i nümagü rü tauta inanaxüğüe na duũxũgümaã inacüèxgũxũ. Natürü yixcũra tá nanayauxgü i pora na wüxitátama i ora ngẽma ngoxomaã wüxigu ãëxgacüğü yixĩgũxũcèx. ¹³ Rü ngẽma 10 i ãëxgacüğü rü wüxigu nagu narüxĩnüe na ngẽma ngoxona naxãgüãxũcèx i norü pora, na ngẽma ngoxo namaã icuáxũcèx. ¹⁴ Rü ñuxũchi i ngẽma ãëxgacüğü rü ngẽma ngoxo rü tá nügü nadai namaã ya yima Tupana Nane ga pecaduarü ütãnücèx yucü. Natürü ya yima Tupana Nane rü tá nüxũ narüyexera, erü nüma rü guxũ i corigüaru Cori nixĩ, rü guxũ i nachiuãnegüaru ãëxgacüğüaru ãëxgacü nixĩ. Rü yixema namücüğü ixĩgũxe, rü yixemagü tixĩgü ya Tupana tüxũ dexe rü tümacèx naçaxe. Rü tümagü rü aixcũma naga taxĩnüe”, ñanagürü choxũ. ¹⁵ Rü yema orearü ngeruũ rü ñanagürü ta choxũ:

“Ngẽma taxũ i dexá i nüxũ cudauxũ i naetüwa natoxũ i ngẽma nge i ngẽãxũchicü, rü nagúxúraũxũ i duũxũgüchiga nixĩ, rü guxũma i duũxũgü i to i nagawa idexagũxũchiga nixĩ, rü guxũma i nachiuãnecũãxgü i duũxũgüchiga nixĩ. ¹⁶ Rü ngẽma 10 i naxchatacuxre i nüxũ cudauxũ i nüxũ ngẽxmaxũ i ngẽma ngoxo, rü tá ngẽma nge i ngẽãxũchicüchi naxaie. Rü tá ngẽma ngena

nanapuxü i guxüma i tacü i ngixü ngëxmaxü, rü ngëmaäcü ngexchiruäcüma tá ngëxma irüxãüx. Rü tá ngixü nangõxgü, rü üxüwa tá ngixü nigugü. ¹⁷ Yerü ga Tupana rü yema 10 ga äëxgacügüxü nagu narüxîñüëxëë na naxügüãxüçèx i ngëma nanaxwëxexü i nüma ya Tupana. Rü ngëmacèx i ngëma äëxgacügü, rü tá wüxigu nagu narüxîñüë na ngëma ngoxoxü naporaxëëgüxü na norü äëxgacü yîxüçèx ñuxmatáta Tupana yanguxëë i ngëma nüxü yaxuxü. ¹⁸ Rü ngëma nge i ngixü cudèüxcü, rü yima nixî ya yima ñãne ya taxüne ya guxüma i nachiuñanegüarü äëxgacügümaã icuáxüne”, ñanagürü.

18

Nagu nayarüchixe ga ñãne ga Babiróniã

¹ Rü yemawena nüxü chadau ga wüxi ga to ga orearü ngeruü ga daxüguxü ga naãnewa íruxixü ga taxü ga äëxgacü ixixü. Rü yema orearü ngeruüarü yauracüüxümaã nangóone ga ñoma ga naãne. ² Rü tagaäcü ñanagürü:

“Marü nagu nayarüchixe ya yima ñãne ya Babiróniã ya itaégacüxüne. Rü ñuxma rü ngoxogüchiü nixî rü nagúxüraüxü i naãe i chixexügüchiü nixî. Rü ñuxma rü ngëxma naxãchiü i nagúxüraüxü i ngurucugü rü werigü i chixexü i duüxügü naxchi aixü. ³ Yerü guxüma ga nachiuñanecüãxgü, rü guma ñãneärü chixexü nüxna naxüe. Rü norü äëxgacügü, rü yéma poraäcü chixri namaxë. Rü guxüma ga ñoma ga nachiuñanecüãxgü ga taxetanüxügü, rü nügü namuärü dïeruãxëëgü namaã ga yema ñãneärü yemaxügü ga tama Tupanapëxewa mexü”, ñanagürü. ⁴ Rü ñuxüchi nüxü chaxîñü ga to ga naga ga daxüguxü ga naãnewa inaxüxü ga ñaxü:

“¡Düçèx i guxãma i pema ya chorü duüxügü ixîgüxe, rü ípechoxü nawa ya yima ñãne na tama ngëma ñãnecüãxrüü pipecaduãxgüxüçèx rü tama nagu peyixüçèx i ngëma poxcu i tá yima ñãnewa nguxü! ⁵ Erü ngëma ñãnecüãxärü pecadugü, rü nügüétüwa narünucue, rü düxwa marü daxüguxü i naãnewa nangu. Rü ñuxma ya Tupana rü nüxna nacüxãchi i ngëma chixexü i naxügüxü, rü ngëmacèx tá yima ñãnexü napoxcu. ⁶ Rü ngëma poraäcü chixexü na naxügüxürüü, rü ngëxgumarüü tá ta nixî na chixexümaã nüxü penaxütanüxü i pemax. ¡Rü ñuxma na ngëma ñãnecüãx togümaã chixexü naxügüxü, rü taxreëxpüxcüna tá penachixexëë i pemax! ¡Rü ngëma chixexü ga yema ñãnecüãx togüçèx mexëëgüxü, rü pema rü taxreëxpüxcüna tá ngëmaäcü naxçèx penamexëë! ⁷ ¡Rü ngëma na nügü yacuèxüügüxü rü mexëchixüwa na namaxëxü, rü ngëxgumarüü tá ta nixî na ngúxü nüxü pingexëëgüxü rü ngechaü nüxü pingexëëgüxü! Erü ñuxma i ngëma ñãnecüãx rü nügüãëwa ñanagürügü: ‘Yixema rü ñoma wüxi i äëxgacürüü mexëchixüwa tangëxmagü. Rü tagutáma wüxi i yutexürüü tangechaügü’, ñanagürügü nügüãëwa i ngëma ñãnecüãx. ⁸ Rü ngëmacèx tá nixî i wüxítátama i ngunexügu ínanguxü i ngëma ñãneärü poxcuruü. Rü ngëma ñãnecüãx rü ngúanemaã tá nayue, rü poraäcü tá nangechaügü, rü poraäcü taiya tá nüxü nangux, rü norü ñãne rü üxümaã tá nigu. Erü naporaxüchi ya yima Tupana ya guxüarü Cori ixîcü i ngëma ñãnexü poxcucü”, ñanagürü ga yema naga. ⁹ Rü ngëma nachiuñanegüarü äëxgacügü ga yema ñãnewa poraäcü chixri maxëxü rü mexëchixüwa yexmagüxü, rü tá poraäcü norü ngechaümaã yima ñãnecèx naxauxe i ngëxguma nüxü nadaugügu i ngëma üxüema i namaã yaxaxü. ¹⁰ Natürü ngëma äëxgacügü rü ngëma poxcuxü na namuñëxüchëxwa rü tá yaxüwa nüxü narüdaunü, rü ñanagürügü tá:

“Cungechaütümüü, Pa Itaégacüxüne ya ñãne ya Babirónia ya Guxü i Nachiuñanegümaã Porachirénex. Erü wüxítama i oragu cuxçèx ínangu i curü poxcu”, ñanagürügü tá. ¹¹ Rü guxüma i ñoma i naãnecüãx i taxetanüxü, rü

tá poraãcü norü ngechaũmaã naxcèx naxauxe ya yima ããne. Erü marü taxúetáma naxcèx nüxũ tataxe i norü ngẽmaxũgü i ngema nangegüxũ. ¹² Rü marü taxúetáma naxcèx nüxũ tataxe i norü uiru, rü norü dñerümü, rü norü nutagü i mexẽchixũ, rü naxpügü i mexẽchixũ i dauxracharaxũ rü idauxcharaũ i ngema nangegüxũ. Rü ngẽxgumarüũ ta taxúetáma naxcèx nüxũ tataxe i nagúxũraũxũ i norü naĩxchipanügü i yixixũ, rü norü ngẽmaxũgü i marfílnaxcèx rü mürapewa i mexẽchixũnaxcèx rü cobrenaxcèx rü fierunaxcèx rü nutanaxcèx i ngema nangegüxũ. ¹³ Rü taxúetáma naxcèx nüxũ tataxe i norü canela rü togü i norü üexũwemüxũgü i yixixũ, rü pumaratẽxe i guruũ ixĩxũ, rü togü i pumaragü i yixixũ, rü binugü rü chixũgü, rü arina i mexẽchixũ, rü trigu i ngema nangegüxũ. Rü ngẽxgumarüũ ta ngema nana-gagü i wocagü, rü carnerugü, rü cowarugü, rü autugü i cowaru itúchigüxũ, rü duũxũgü i puracüruügü. Rü ngẽmaãcü woo duũxẽgü rü ngema tüxũ nagagü na tümamaã nataxegüxũcèx. ¹⁴ Rü ngẽma taxetanüxũ, rü ñanagürügü tá nüxũ ya yima ããne:

“Cuwa rü marü nataxuma i ngẽma orix i curü duũxũgüarü me ixĩxũ. Rü marü nataxuma i guxũma i ngẽma meruügü ga noxri cuxũ yexmaxũ, rü tagutáma wenaxãrü cuxũ nangẽxma”, ñanagürügü tá. ¹⁵ Rü ngẽma taxetanüxũ i guxũma i ngẽma orixgümaã rü ngẽma meruügümaã taxegüxũ rü guma ããnegu nügü muãrü dñeruãxẽxũchigüxũ, rü yaxüwa tátama nüxũ narüdaunü ya yima ããne, erü nüxũ namuũe i ngẽma poxcu i yima ããnexũ üpetüxũ. Rü tá poraãcü norü ngechaũmaã naxauxe. ¹⁶ Rü ñanagürügü tá:

“Nangechaũtümüũ ya yima ããne ya itaxégacüxüne. Erü noxri rü ñoma wüxi i nge i mexẽchixũ i naxchiru i dauxracharaxũ rü dauxcharaxũmaã ãxchirucü i uirumaã rü nutagü ya mexẽchicümaã ngẽxãexcürüũ nixĩ. ¹⁷ Natürü ngürüãchi nagux i guxũma i ngẽma ããneãrü meruügü”, ñanagürügü tá. Rü guxüne ya wapurugüarü ãẽxgacügü, rü guxũma i norü duũxũgü ya yima wapuruwa puracüexũ, rü guxũma i duũxũgü ya yima wapurugu ãxũ, rü guxũma i taxetanüxũgü i wapurugu yarüxũũxũ, rü yaxüwa tátama nayachaxgütanüãchi, rü ngema tá nüxũ narüdaunü. ¹⁸ Rü ngẽxguma nüxũ nadaugügu i norü caxixũ na yaxaxũ ya yima ããne, rü tagaãcü tá ñanagürügü:

“Nataxuma ya náĩ ya ããne ya daa ããne ya itaxégacüxünerüũ ixĩxũne”, ñanagürügü. ¹⁹ Rü norü ngechaũmaã nügüétügu tá waixũmü nagünagügü, rü tá poraãcü naxauxe, rü tagaãcü ñanagürügü tá:

“Nangechaũtümüũ ya yima ããne ya itaxégacüxüne. Rü noxri rü norü yemaxũgümaã nügü nimuãrü dñeruãxẽxũgü ga guxüne ga wapurugüarü yoragü. Natürü i ñuxma rü ngürüãchi wüxi i oragutama rü inayarüxo i guxũma i ngẽma. ²⁰ Natürü ñuxma na napoxcuxũ ya yima ããne, rü name nixĩ i petaãegü i pema i daxũguxũ i naãnewa ngẽxmagüe, rü pema i Tupana pexũ imugüe, rü pema i Tupanaãrü orexũ ixugüe, rü guxãma i pema i Tupanaãrü duũxũgü ixĩgüe. Erü ñuxma na napoxcuxũ ya yima ããne, rü ngẽmaãcü Tupana pexũ naxütanü naxcèx ga yema chixexũ ga pemaã naxügüxũ ga guma ããnecũãx”, ñanagürügü. ²¹ Rü ñuxũchi wüxi ga Tupanaãrü orearü ngeruũ ga daxũcũãx rü nanangenagü ga wüxi ga nuta ga taxüchicü ga ñoma ãacüarü caruũrüũ ixĩcü. Rü yema orearü ngeruũ rü taxtü ga taxügu nanaña ga guma nuta ga taxüchicü, rü ñanagürü:

“Ngẽxgumarüũ tá quixĩ na icuyarüxoxũ, Pa ããne ya Itaxégacüxüne ya Babiróniãx, rü tagutáma texé wena cuxũ nadau. ²² Rü tagutáma wena curü ãtamügüwa texé nüxũ taxĩnü i paxetarüügü i arpagü rü quenagü rü cornetagü. Rü ngẽxgumarüũ ta cuwa nataxütáma i puracütanüxũgü i ãacüwa puracüexũ, rü tagutáma texé nüxũ taxĩnü na cuwa inapuracüexũ i çawüarü caruügü.

²³ Rū marū tagutáma texé nüxü tadau i cuwa i omü. Rū marū tagutáma texé nüxü taxĩnü i ngĩgüchigaarü petagüarü cuxcuane. Rū ngēmaäcü tá cumaã nangupetü woo ga noxri rü yema taxetanüxü ga cuwa taxegüxü rü guxüma ga togü ga taxetanüxüärü yexera nixĩgü. Rū ngēmacèx tá poraäcü cupoxcu nagagu ga yema chixexü ga namaã cunawomüxēxü ga guxüma ga togü ga nachĩüānecüāx ga duüxügü”, ñanagürü. ²⁴ Yerü guma ñānecüāx ga duüxügü nixĩ ga nadèixü rü inabaxēēgüxü ga nagü ga Tupanaärü orearü uruügü rü yema duüxügü ga Tupanaärü ixĩgüxü rü guxüma ga duüxügü ga ñoma ga naānegu Tupanaärü oregagu nadèixü.

19

¹ Rū yemawena nüxü chaxĩnü ga muxüma ga duüxügüga ga daxügüxü ga naānewa tagaäcü ñagüxü:

“¡Ngĩxã Tupanaxü ticuèxüügü! Erü nüma nixĩ i tüxü namaxēxēxü. Rū nüma ya tórü Tupana nixĩ i guxüärü yexera namexēchixü rü naporaxüchixü.

² Rū nüma rü aixcüma meãma nanangugü i guxüma i duüxügüarü maxü, rü aixcüma tá nanapoxcu i ngēma chixexü ügüxü. Rū ngēmacèx marü nanapoxcu ya yima ñāne ya itaxégacüxüne ya chixene ya norü chixexümaã nachixexēene i guxüma i ñoma i naānecüāx i duüxügü. Rū ñuxma i nüma ya Tupana rü norü duüxügü ga guma ñānecüāx dèixüxü naxütanü”, ñanagürügü.

³ Rū ñuxüchi wenaxärü ñanagürügü:

“¡Ngĩxã Tupanaxü ticuèxüügü! Erü ngema norü caxixü na yaxaxü ya yima ñāne, rü tagutáma ngēma nayarüxo”, ñanagürügü. ⁴ Rū yema 24 ga äëxgacügü rü yema ägümücü ga daxüçüāx ga maxēxü rü yexma nanangücuchitanü, rü Tupana ya norü tochicaxüwa rütocüxü nicuèxüügü. Rū ñanagürügü:

“Rü ngēmaäcü yĩ. ¡Rü ngĩxã nüxü ticuèxüügü ya tórü Cori!” ñanagürügü.

⁵ Rū ñuxüchi yema tochicaxüütawa inanaxü ga wüxi ga naga ga ñaxü:

“Name nixĩ i tórü Tupanaxü picuèxüügü i guxāma i pemax Pa Buxügü rü Pa Yaxügüx i norü duüxügü na pixĩgüxü rü nüxü na pemuēxü”, ñaxü.

Tupana Nane ga pecaduarü ütanüçèx yucüarü ngĩgüarü petachiga

⁶ Rū ñuxüchi nüxü chaxĩnü ga çacü ga ñoma muxüchixü ga duüxügü idex-agüxürüü ixĩxü ga ñoma taxü i dexá i chuxchuxürüü ixĩxü ga ñoma poraäcü yaduruanexürüü ixĩxü ga ñaxü:

“¡Ngĩxã Tupanaxü ticuèxüügü! Erü nüma ya tórü Cori ya Tupana ya guxüärü yexera poracü, rü marü ningucuchi na guxümaã inacüaxü. ⁷ ¡Rü ngĩxã tataäëgü rü guxü i tórü taāëmaã nüxü ticuèxüügü! Erü marü nawa nangu na iyangĩxü ya yima Tupana Nane ga pecaduarü ütanüçèx yucü. Rū ngēma norü duüxügü i ñoma namèxüü ixĩgüxü rü marü nügü ínimexēēgü.

⁸ Rū yima Tupana Nane rü ngēma nüxü yaxögüxüxü namu na mexēchixü rü cómuxü rü iyauracüxü i naxchirumaã na yaxāxchiruxü. Rū ngēma naxchiru i mexēchixü rü ngēma nixĩ i ngēma duüxügüarü maxü i mexüchiga”, ñanagürügü. ⁹ Rū ñuxüchi ga Tupanaärü orearü ngeruü, rü ñanagürü choxü:

“Chanaxwèxe i cunaxümatü i ñāã ore i cumaã tá nüxü chixuxü: ‘Tataäëgü ya yixema tüxna naxuxe i norü ngĩgüarü petawa ya yima Tupana Nane ga pecaduarü ütanüçèx yucü’”, ñanagürü. Rū ñuxüchi ñanagürü ta:

“Ngēma ore i cumaã nüxü chixuxü, rü Tupanaärü orexüchitama nixĩ”, ñanagürü. ¹⁰ Rū choma rü yema orearü ngeruüpèxegu chacaxäpüxü na nüxü chicuèxüxüçèx. Natürü ga nüma rü ñanagürü choxü:

“¡Tāxü i ngēma cuxüxü! Erü choma rü ta Tupanaärü duüxü chixü, ngëxgumarüü i cuma rü cueneëgü i Ngechucharü ore i aixcüma ixĩxü ixögüechaxürüü ta chixü. Rū name nixĩ i Tupanaxü quicuèxüü”, ñanagürü. Erü

ngēma ore i Ngechuchuchiga ixīxū, rü yematama ore nixī ga Tupanaärü ore-arü uruügü nüxū ixugüexū ga yexguma Tupanaãe i Üünexū nawa ideaxgu.

Guma Tupana Nane ga cowaru ga cómüxūetügu tonagücüchiga

¹¹ Rü ñuxūchi nüxū chadau ga daxūguxū ga naāne na yawāxnaxū. Rü yéma nangox ga wüxi ga cowaru ga cómüxū. Rü guma naetüwa rütocü rü Ixaixcūmacü rü Aixcūma Yanguxēcū nixī i naega. Rü nüma rü aixcūma guxūma i duūxūgüarü maxūxū nacuèx, rü aixcūma tá guxūma i ngēma chixexū ügüxūmaã nügü nadai rü tá nanapoxcue. ¹² Rü naxētügü, rü ñoma üxüemarüü niyauracüü. Rü naēruwa rü namu ga norü ngèxcueruügü. Rü nacetügu naxūmatü ga wüxi ga naega ga nüxīcatama nüxū nacuáxū. ¹³ Rü wüxi ga naxchiru ga ducharaxūgu nicux. Rü naega rü Tupanaärü Ore nixī. ¹⁴ Rü nawe narüxī ga guxūma ga norü churaragü ga daxūcüāx. Rü nümagü rü naxchiru ga imexēchixū rü cómüxūmaã nixāxchiru. Rü cowarugü ga icómüxūetügu naxī. ¹⁵ Rü naāxwa nayexma ga wüxi ga tara ga tēxechixū na yemamaã napíexēãxūcèx i guxūma i ngēma duūxūgü i tama nüxū yaxōgüxū. Rü tá nüma nanaxwèxexūácūma ngēma duūxūgümaã inacuèx. Rü nüma rü tá poraãcü ngēma duūxūgü i tama yaxōgüxūxū napoxcu namaã i ngēma poxcu ya Tupana ya Guxūxū Rūporamaēcü norü numaã mexēexū. Rü ñoma ubagü i norü maixruüwa imèixtüüxürüü tá nixī na napoxcueãxū. ¹⁶ Rü naxchirugu rü naperemagu naxūmatü ga wüxi ga naega ga ñaxū:

“Guxūma i nachiüānegüarü āēxgacügüarü Āēxgacü, rü guxūma i corigüarü Cori ixīcü”, ñaxū. ¹⁷⁻¹⁸ Rü ñuxūchi nüxū chadau ga wüxi ga Tupanaärü orearü ngeruü ga daxūcüāx ga üèxcügu chixū. Rü nüma rü tagaãcü ñanagürü nüxū ga guxūma ga ngurucugü ga yexma ixexexütanüxū:

“¡Nuã pexī rü pengutaquēxegü naxcèx i òna i taxū i Tupana pexcèx mexēexū na penangōxūcèx i nachiüānegüarü āēxgacügümachi, rü churaragüarü āēxgacügümachi, rü yatügü i poraxüchixümach, rü cowarugümachi, rü ngēma cowaruétügu ìxū i duūxūgümachi, rü ngēma duūxūgü i coriāxgüxümachi rü ngēma ngearü coriāxgüxümachi rü ngēma buxügümachi rü ngēma yaxügümachi!” ñanagürü. ¹⁹ Rü ñuxūchi nüxū chadau ga yema nüxīraüxū ga ngoxo rü guxūma ga nachiüānegüarü āēxgacügü ga norü churaragümaã yéma ngutaquēxegüxū na nügü nadèixūcèx namaã ya yima cowaruétügu ìxūcü rü norü churaragü. ²⁰ Rü yema nüxīraüxū ga ngoxo rü niyaxu. Rü wüxigu namaã niyaxu ga yema to ga ngoxo ga orearü uruüneta ixīxū ga yema nüxīraüxū ga ngoxopēxewa naxūxū ga cuèxruügü ga duūxūgü tama nüxū cuáxū na naxügüāxū. Rü yema cuèxruügümaã nixī ga nawomüxēēãxū ga yema duūxūgü ga nüxū icuèxüügüxū ga naxchicünèxã ga yema nüxīraüxū ga ngoxo rü nügü ixāgüxū na yema ngoxoégamaã na yaxüégagüxū. Rü yema nüxīraüxū ga ngoxo rü yema to ga ngoxo ga orearü uruüneta ixīxū, rü wüxigu maxēxūma nawa nawoü ya yima naxtaa ya üxūmaã iyaurachiüne ya azufremaã ixaxüne. ²¹ Rü yema tara ga tēxechixū ga guma cowaruétüwa rütocüèxwa yexmaxūmaã nanadai ga yema ngoxogüarü ngüxēeruügü ga āēxgacügü rü norü churaragü. Rü guxūma ga ngurucugü, rü yemamachimaã nangāxcharaügü.

20

Chataná rü 1,000 ga taunecü ninèix

¹ Rü yemawena nüxū chadau ga wüxi ga Tupanaärü orearü ngeruü ga daxūguxū ga naānewa íruxīxū. Rü naxmēxwa nayexma ga yema āxmaxū i taxuguma iyacuáxūärü chawi rü ñuxūchi wüxi ga cadena. ² Rü yema

Tupanaärü orearü ngeruũ rü yema coyaxũ niyaxu. Rü yematama coya nixĩ ga yema nuxcũmaũxũ ga ãxtape ga ngoxo ga Chataná ixĩxũ. Rü yema orearü ngeruũ rü 1,000 ga taunecũgũcèx nayanèix. ³ Rü yema orearü ngeruũ rü yema ãxmaxũ i taxuguma iyacuáxũgu nayatèxcuchi. Rü ñuxũchi yexma meãma nanawãxtaũ na nüma ga Chataná rü marü taguma wenaxãrũ duũxũgũxũ nawomũxèèxũcèx ñuxmatáta 1,000 ya taunecũ ngèxma yangeã. Rü ngèxguma marü yanguxèèãgu ya yima 1,000 ya taunecũ, rü tá paxaxãchi nayangèx. ⁴ Rü ñuxũchi nüxũ chadau ga ñuxre ga tochicaxũgũ. Rü yema tochicaxũwa tarütogũ ga guxema Tupanaxũtawa nayauxgũxe ga pora na duũxũgũxũ ticagũxũcèx. Rü yexgumarũ ta nüxũ chadau ga naãègũ ga yema duũxũgũ ga Ngechuchuarü orexũ na yaxugũxũcèx nadaũnaãgũxũ. Rü yema nixĩ ga duũxũgũ ga meãma nüxũ ixugũxũ ga Tupanaärü ore rü tama yema ngoxoxũ icuèxũgũxũ rü bai ga yema ngoxochicũnèxãxũ icuèxũgũxũ, rü tama nügũ ixãgũxũ na nacatũwa rü èxna naxmèxwa yema ngoxoégamaã yaxægaxũ. Rü nüxũ chadau ga wena na namaxèxũ, rü 1,000 ga taunecũ Cristumaã wũxigu ãèxgacũ nixĩgũ. ⁵ Rü yemagũ nixĩ ga nüxĩrama írüdagũxũ. Natürü ga yema togũ ga yuexũ rü tãütãma namaxè ñuxmatáta yima 1,000 ya taunecũguwena. ⁶ Rü tataãègũ ya yixema tũxira írüdagũxe erü Tupanaärü duũxũgũ tixĩgũ. Rü ngèma Tupanaärü poxcu rü marü tãütãma tũmacèx nixĩ. Rü tá Tupanaärü rü Cristuarü ngũxèèruũgũ tixĩgũ. Rü 1,000 ya taunecũ tá Cristumaã ãèxgacũgũ tixĩgũ.

ngoxo i Chataná rü marü nagu nayarũchixe

⁷ Rü ngèxguma marü nangupetũgu ya yima 1,000 ya taunecũ, rü Chataná rü tá ningèx i ngèma ínapoxcuxũwa. ⁸ Rü nüma i Chataná rü tá ínaxũxũ na yawomũxèèãxũcèx i guxũma i ñoma i naãnecũãx i duũxũgũ rü Goga rü Magoga na ngèmagũxũ nangutaquèxèèxũcèx na Tupanaärü duũxũgũmaã nügũ nadèixũcèx. Rü ngèma Chatanáärü churaragũ, rü ñoma taxtũ i taxtũärü naxnecũchicutèxerũ tá namuxũchi. ⁹ Rü ngèmaãcũ i Chatanáärü churaragũ rü tá ñoma i naãneärü tagu ninguuchi. Rü tá Tupanaärü duũxũgũxũ rü yima ñãne ya Tupana nüxũ ngechaxũne ya Yerucharéũxũ ínachoeguãchi. Natürü Tupana rü daxũwa tá nanayixèè ya üxũ, rü yimamaã tá nixae i guxũma i ngèma namaã rüxuanũgũxũ. ¹⁰ Rü ngèma ngoxo i ngèma duũxũgũxũ womũxèèxũ, rü nawa tá natãe ya yima naxtaa ya üxũmaã iyaurachiũne ya azufremaã ixaxũne. Rü yima nixĩ ya naxtaa ga marü nawa nawoũne ga yema nüxĩraũxũ ga ngoxo rü yema to ga ngoxo ga orearü uruũneta ixĩxũ. Rü yima naxtaawa tá nixĩ i guxũgutãma ngunecũ rü chütacũ ngũxũ yangegũxũ.

Ngèma taxtũ i tochicaxũ i cómuxũwa rütocũpèxewa nangugũ i duũxũgũ

¹¹ Rü ñuxũchi nüxũ chadau ga wũxi ga taxtũ ga tochicaxũ ga cómuxũ, rü nüxũ chadau ga guma nawa rütocũ. Rü gumachaxwa nibuxmũ ga ñoma ga naãne rü guxũma ga daxũwa nüxũ idauxũ, rü inayarũtauxe. ¹² Rü nüxũ chadau ga yema yuexũ ga yaexũ rü buexũ ga Tupanapèxegu chigũxũ. Rü ningena ga poperagũ. Rü yexgumarũ ta ningena ga yema Tupanaärü popera i nagu yawũgũxũ i ngèma duũxũgũ i nüxũ nangèxmaxũ i maxũ i taguma gũxũ. Rü yema yuexũ rü yexgumarũ ga ñuxãcũ na namaxèxũ ga wũxichigũ rü yexgumarũ ga ñuxãcũ na yema poperawa ínaxũmatũxũrũũãcũma Tupana namaã nüxũ nixu na ngextã tá naxĩxũ. ¹³ Rü yema yuexũ ga taxtũ ga taxtũwa yexmagũxũ rü wenaxãrũ ínarüdagũ. Rü yema yuexũ ga tauquewa yexmagũxũ rü wenaxãrũ ínarüdagũ. Rü yemaãcũ ínarüdagũ ga guxũma ga duũxũgũ ga yuexũ. Rü guxũma ga yema yuexũ rü Tupana nüxna nicachigũ rü yexgumarũ ga ñuxãcũ na namaxèxũ ga wũxichigũ rü namaã nüxũ

nixu na ngextá tá naxĩxũ. ¹⁴ Rũ yemawena rũ guma naxtaa ga ùxũmaã iyaurachiũnewa nawoũ ga yu guxũma ga norũ poramaã. Rũ guma naxtaa ga ùxũmaã iyaurachiũne, rũ ngẽma nixĩ i poxcu i taguma iyacuáxũ i tũmacèx ixĩxũ ya yĩxema tama Tupanaãrũ duũxũgũ ixĩgũxe. ¹⁵ Rũ guma naxtaa ga ùxũmaã iyaurachiũnewa tawoũ ga guxema ingeégaxe nawa i ngẽma Tupanaãrũ popera i nagu tiwũgũxũ ya yĩxema tũxũ nangẽxmaxẽ i maxũ i taguma gũxũ.

21

Ngexwacaxũxũ i ñoma i naãne rũ guxũma i daxũwa ngẽxmaxũ

¹ Rũ yemawena nũxũ chadau na nayexwacaxũxũ ga ñoma ga naãne rũ guxũma ga tacũ ga daxũwa yexmagũxũ. Yerũ yema nũxĩra yexmagũxũ rũ marũ nangupetũ, rũ yema taxũ ga taxtũ rũ marũ nataxuma. ² Rũ nũxũ chadau ga guma ñane ga mexũne ga Yerucharéũ ga yexwacaxũne ga daxũgũxũ ga naãnewa Tupanaxũtawawa írũxĩxũne ga guxũwama mexẽchine ñoma wũxi i pacũ i ngẽxguma iyangĩxgu rũ ngĩtecèx ngĩgũ mexẽxcũrũũ ixĩxũne. ³ Rũ nũxũ chaxĩnũ ga wũxi ga naga ga yema tochicaxũwa inaxũxũ ga tagaãcũ ñaxũ:

“Tupana rũ duũxũgũtanũwa nangexma i ñuxmax. Rũ natanũwa tá namaxẽcha. Rũ nũmagũ rũ norũ duũxũgũ tá nixĩgũ. Rũ nũma ya Tupana rũ natanũwa tá nangẽxmaẽcha, na guxũguma norũ Tupana yĩxũcèx. ⁴ Rũ nũma tá ínanapi i naxgũũètũ i guxũma i ngẽma duũxũgũ. Rũ marũ tãũtãma texé tayu, rũ texé tũmaãrũ ngechaũmaã taxaxu, rũ texé ngũxũ tingegũ. Erũ guxũma i ngẽma ngũxũ rũ marũ inayarũxo”, ñanagũrũ. ⁵ Rũ guma yema tochicaxũwa rũtocũ rũ ñanagũrũ:

“Dũcèx, choma rũ chanangexwacaxũxẽẽ i guxũma i tacũ i ngẽxmaxũ”, ñanagũrũ. Rũ ñuxũchi ñanagũrũ ta:

“¡Naxũmatũ i ñaã ore! Erũ ñaã ore rũ aixcũma nixĩ, rũ ñaã nixĩ i ore i mexũ na yaxõxũ”, ñanagũrũ. ⁶ Rũ yemawena rũ ñanagũrũ choxũ:

“Ñuxma rũ marũ ningu i guxũma. Rũ chowa nixĩ ga inaxũgũxũ ga guxũma, rũ nataxuma i tacũ i chorũ yexera ngẽxmaẽchaxũ. Rũ yĩxema itawaxe, rũ choma rũ tá nangetanũãcũma tũxũ chaxaxẽẽmare nawa i ngẽma dexá i maxẽerũ. ⁷ Rũ yĩxema nũxũ rũporamaẽgũxe i chixexũ, rũ tá tanayauxgũ i guxũma i ngẽma mexũgũ i nũxũ chixuxũ. Rũ choma rũ tá tũmaãrũ Tupana chixĩ, rũ tũma i chauxacũgũ. ⁸ Natũrũ ngẽma muũẽxũ i nũxũ rũxoexũ na chowe naxĩxũ, rũ nawa tá nawoũ ya yima naxtaa ya ùxũmaã iyaurachiũne ya azufremaã ixaxũne. Rũ ngẽxgumarũũ ta i ngẽma tama yaxõgũxũ, rũ ngẽma chixexũ ùgũxũ, rũ ngẽma máẽtagũxũ, rũ ngẽma naĩ i ngemaã ipexũ, rũ ngẽma iyuũxũ rũ ngõxwèxegũxũ, rũ ngẽma tupananetachicũnèxãxũ icuèxũũgũxũ, rũ ngẽma idoratèxegũxũ, rũ nawa tá nawoũ ya yima naxtaa ya ùxũmaã iyaurachiũne ya azufremaã ixaxũne. Rũ ngẽma nixĩ i poxcu i taguma iyacuáxũ i nũxũ inanguxẽẽxũ i ngẽma tama yaxõgũãcũma yuexũ”, ñanagũrũ.

Yexwacaxũne ga Yerucharéũchiga

⁹ Rũ yema 7 ga orearũ ngeruũgũ ga nũxũ yexmagũxũ ga 7 ga copagũ ga yema 7 ga poxcuruũmaã ixããcuxũ, rũ yematanũwa rũ wũxi ga orearũ ngeruũ rũ chauxcèx nixũ, rũ ñanagũrũ choxũ:

“¡Nuã naxũ! Rũ tá cuxũ nũxũ chadauxẽẽ i ngẽma yaxõgũxũ i ñoma namèxũrũ tá ixĩgũxũ ya yima Tupana Nane ga pecaduarũ ùtanũcèx yucũ”, ñanagũrũ. ¹⁰ Rũ yexguma yemaãcũ Tupanaãẽ i Ûnèxũ choxũ ngoxetũxẽẽgu, rũ yema orearũ ngeruũ rũ wũxi ga mèxpũne ga taxũnewa choxũ naga. Rũ choxũ nũxũ nadauxẽẽ ga guma ñane ya ùnène ga Yerucharéũ ga daxũgũxũ

ga naãnewa Tupanaxütawa íruxĩtũne. ¹¹ Rũ guma ããne rũ Tupanaãrũ yauracũxũmaã nangóone. Rũ yema norũ yauracũxũ ga guma ããne rũ ñoma wũxi ya nuta ya mexẽchicũrũũ nixĩ. Rũ ñoma nuta ya yasperũũ nixĩ na yachipetũxũ. ¹² Rũ guma ããne rũ guxũwama ínapoxegu. Rũ nataxũchi rũ namáchanexũchi ga yema norũ poxeguxũ. Rũ yema norũ poxeguxũ rũ nũxũ nayexma ga 12 ga norũ ããx. Rũ wũxichigũ ga yema ããxwa nayexma ga wũxi ga Tupanaãrũ orearũ ngerũũ. Rũ wũxichigũ ga yema ããxwa nangoxéga ga wũxichigũ ga yema 12 ga Acobu nane ga Yudiũgũ nawa ne ãũ. ¹³ Rũ tomaẽxpũx ga norũ ããx rũ napẽxewaama nayexma, rũ yema to ga tomaẽxpũx rũ norũ toxwecũwawa nayexma, rũ yema to ga tomaẽxpũx rũ norũ tũgũnecũwawa nayexma, rũ yema to ga tomaẽxpũx rũ naweama nayexma. ¹⁴ Rũ guma ããneãrũ poxeguxũ, rũ 12 ga nuta ga taxũchicũétũwa inaxũgũ. Rũ wũxichigũ ga guma nutagũwa nangoxéga ga wũxichigũ ga norũ ngũexũgũ ga guma Tupana Nane ga pecaduarũ ũtanũcèx yucũ. ¹⁵ Rũ yema orearũ ngerũũ ga chomaã idexaxũ, rũ nũxũ nayexma ga wũxi ga norũ ngugũxũ ga uirumenèxãnaxcèx na yemamaã nangugũãxũcèx ga guma ããne, rũ norũ ããxgũ, rũ norũ poxeguxũgũ. ¹⁶ Rũ guma ããne rũ nawũxigumare ga guxũcũwawa. Rũ norũ mèx rũ nawũxigumare namaã ga norũ tatachinũ. Rũ yema orearũ ngerũũ rũ yema uirumenèxãmaã nanangugũ ga guma ããne. Rũ 2,200 kilómetru nixĩ ga norũ mèx. Rũ yexgumarũũ ta 2,200 kilómetru nixĩ ga norũ tatachinũ. Rũ 2,200 kilómetru ta nixĩ ga norũ máchane. ¹⁷ Rũ yemawena rũ inanangu ga yema norũ poxeguxũ ga guma ããne. Rũ 65 metru nixĩ ga norũ máchane. Rũ yemaãcũ duũxũgũarũ ngugũxũmaã nanangugũ. ¹⁸ Rũ yema norũ poxeguxũ ga guma ããne, rũ nuta ga mexẽchicũ ga yaspnaxcèx nixĩ. Rũ nũmatama ga guma ããne rũ uirunaxcèx nixĩ. Rũ ñoma woruarũũ niyauracũũ. ¹⁹ Rũ guma nutagũ ga itacũ ga norũ poxeguxũpara ixĩgũcũ, rũ nagũxũraũcũ ga nuta ga imexẽchicũmaã nangèxãẽ. Rũ guma nũxĩraũcũ ga napara rũ nuta ga yaspemaã nangèxãẽ. Rũ guma norũ taxre ga napara rũ nuta ga safirumaã nangèxãẽ. Rũ guma norũ tomaẽxpũx ga napara rũ nuta ga ágatamaã nangèxãẽ. Rũ guma norũ ágũmũcũ ga napara rũ nuta ga esmerádamaã nangèxãẽ. ²⁰ Rũ guma norũ wũximẽxpũx ga napara rũ nuta ga onichemaã nangèxãẽ. Rũ guma norũ 6 ga napara rũ nuta ga cornalínamaã nangèxãẽ. Rũ guma norũ 7 ga napara rũ nuta ga crisólitumaã nangèxãẽ. Rũ guma norũ 8 ga napara rũ nuta ga berilumaã nangèxãẽ. Rũ guma norũ 9 ga napara rũ nuta ga topásiumaã nangèxãẽ. Rũ guma norũ 10 ga napara rũ nuta ga crisoprásamaã nangèxãẽ. Rũ guma norũ 11 ga napara rũ nuta ga yachĩtumaã nangèxãẽ. Rũ guma norũ 12 ga napara rũ nuta ga amatístamaã nangèxãẽ. ²¹ Rũ yema 12 ga norũ ããx ga guma ããneãrũ poxeguxũ rũ perlanaxcèx nixĩ. Rũ wũxichigũ ga yema ããx rũ wũxitama ga perla nixĩ. Rũ yema norũ ítamũ ga guma ããneãrũ ngãxũwa dapetũxũ, rũ uiruxicanaxcèx nixĩ. Rũ ñoma woruarũũ niyauracũũ. ²² Rũ guma ããnewa rũ taxũnema ga ngutaquẽxepataxũ ga ngextá Tupanaxũ nawa yacuèxũtũgũnèxũ chadau, yerũ nũmatama ga Tupana ya poracũ rũ Nane ga pecaduarũ ũtanũcèx yucũ rũ yema nayexma na duũxũgũ nũxũ icuèxũtũgũxũcèx. ²³ Rũ yima ããne rũ taxucèxma uèxcũ rũ tauemacũ nũxũ nabaxi, erũ Tupanaãrũ ngóonexũtama nixĩ i nangóonexẽèxũ. Rũ yima Tupana Nane ga pecaduarũ ũtanũcèx yucũ nixĩ ya norũ omũ ixĩcũ. ²⁴ Rũ ngẽma Tupanaãrũ ngóonexũ i yima ããnèxũ ngóonexẽèxũ tá nixĩ i nangóonexẽèxũ naxcèx i guxũma i ñoma i naãnecũãx i duũxũgũ. Rũ ngẽma tá nangugũ i guxũma i nachĩũãnegũarũ ãẽxgacũgũ i yaxõgũxũ rũ tá Tupanana nayana i norũ mexũgũ. ²⁵ Rũ norũ ããxgũ rũ tagutáma narũwãxtagũ erũ ngẽma rũ guxũguma nangunexecha rũ taguma nachũta. ²⁶ Rũ ngẽma

tá nanana i guxūma i ñoma i naãneãrū mexūgū. ²⁷ Natürū tagutáma ngēxma naxūcu i tacū i Tupanapēxewa chixexū, rü bai ya texé ya chixexū úxe rü éxna idoratèxáxe. Rū yíxema Tupana Nane ga pecaduarū útanücèx yucüarū poperawa ngoxégagūxexicatátama tixīgū ya ngēxma chocuxe.

22

¹ Rū ñuxūchi ga yema orearū ngeruū rü choxū nüxū nadauxēē ga wūxi ga natü ga metacüchiüxū rü ichipetüchiüxū ga dexá ga maxēeruū. Rū yema tochicaxū ga nawa natogüxū ga Tupana rü Nane ga pecaduarū útanücèx yucü, rü nawa nixī ga ne nadaxū ga yema natü. ² Rū guma ñãneãrū ngãxūwa dapetüxū ga ítamūarū ngãxūgu nida ga yema natü. Rū norü guxūcutüwa narüxügü ga naīgü ga maxēeruū. Rū yema naīgü rü wüxicanatama naxo ga wüxichigü ga tauemacügu rü yemaãcü 12 éxpüxcüna naxo ga wüxi ga taunecügu. Rū naätügü ga yema naīgü, rü guxū i nachiüãnecüãx i duüxügü i yaxōgüxūãrū taãxēēruū nixī. ³ Rū ngema rü nataxütáma i tacü i Tupana chixexū namaã naxuxuchixū. Rū yima ñãnewa tá nangēxma i norü tochicaxū ya Tupana rü Nane ga pecaduarū útanücèx yucü. Rū norü duüxügü rü tá nüxū nicuèxüügü. ⁴ Rū ngēma norü duüxügü rü tá nachiwexüchixū nadaugü, rü tá naegamaã nixãegacatü. ⁵ Rū ngema rü tagutáma nachüta. Rū ngēma norü duüxügü, rü taxucèxtáma nanaxwèxe i daparina rü éxna üèxcü na nangónexüçèx. Erü nümatama ya tórü Cori ya Tupana rü tá nüxū nabaxi. Rū nümagü i ngēma duüxügü rü guxūgutáma wüxigu Tupanamaã ãëxgacügü nixīgüecha.

Marü ningaica na wena núma naxūxū ya Ngechuchu ya Cristu

⁶ Rū ñuxūchi ga yema Tupanaãrū orearū ngeruū rü ñanagürü choxū:

“Ñãã ore rü aixcüma ixīxū nixī, rü ñãã nixī i ore i mexū na yaxōxū. Rū nüma ya tórü Cori ya Tupana ga nuxcüma norü orearū uruügümaã nüxū ixucü ga tacü tá na ngupetüxū, rü nümatama nixī i ñuxma inamuãxū i norü orearū ngeruū i daxüçüãx na norü duüxügüxū nüxū nadauxēëxüçèx na tacü tá paxa nangupetüxū”, ñanagürü. ⁷ Rū nüma ya tórü Cori ya Ngechuchu rü ñanagürü:

“Paxa tá íchangu. Rū tataãe ya yíxema naga ñnuxē i ngēma Tupanaãrū ore i ñãã poperagu ümatüxū”, ñanagürü. ⁸ Rū chomatama i Cuáü rü nüxū chaxīnü rü nüxū chadau i guxūma i ngēma nüxū chixuxū. Rū yemaxū chaxīnügüwena rü nüxū chadèuxguwena, rü yema orearū ngeruū ga yemaxū choxū dauxēëxüpēxegu chacaxápüxü na nüxū chicuèxüüxüçèx. ⁹ Natürü ga nüma rü ñanagürü choxū:

“¡Tãxū i ngēma cuxüxū! Erü choma rü ta Tupanaãrū duüxū chixī, ngëxgumarüü i cuma rü cueneëgü i Tupanaãrū orexū ixugüxū rü ngēma duüxügü i naga ñnuxēxū i ngēma ore i ñãã poperagu ümatüxū. Rü name nixī i Tupanaxū quicuèxüü”, ñanagürü. ¹⁰ Rü ñanagürü ta choxū:

“Tama name na icuyacüxū i ngēma Tupanaãrū ore i ñãã poperagu ümatüxū, erü marü ningaica na yanguxū i ngēma ore. ¹¹ Natürü ngēma chixexū ügüxū, rü chixexū tá naxügüecha. Rü ngēma Tupanapēxewa chixri maxēxū, rü chixri tá namaxēēcha. Natürü yíxema mexū ügüxe, rü name nixī na mexū taxügüechaxū. Rü yíxema Tupanapēxewa ixüünexē, rü name nixī na Tupanapēxewa tixüüneëchaxū”, ñanagürü. ¹² Rü ñanagürü ga Ngechuchu:

“Düçèx, paxa tá íchangu namaã i ngēma ãmare i wüxichigüna tá chaxãxū ngëxgumarüü na ñuxãcü tanaxüxū i tümax. ¹³ Choma nixī i norü ügü i guxūma, rü chowa nixī i yacuáxū erü nataxuma i tacü i choweama üxū. ¹⁴ Rü tataãëgü ya guxãma ya yíxema yima pecaduarū útanücèx yucügüwa tügü iyauxgüchiruxe na Tupanapēxewa timexüçèx na yima ñãneãrū ñãxwa tichocuxüçèx rü nüxū

tangõxnetagüxcèx i ngẽma norü o i ngẽma naĩ i maxẽẽruũ. ¹⁵ Natürü tãütáma yima ããnewa nichocu i ngẽma tama yaxõgüxü, rü ngẽma iyuüxü rü ngõxwèxegüxü, rü ngẽma naĩ i ngemaã ipegüxü, rü ngẽma máétagüxü, rü ngẽma tupananetachicünèxãxü icuèxüügüxü. Rü ngëxgumarüü ta i ngẽma idoratèèxgüxü i norü me ixixü na togüxü nawomüxèègüxü, rü tãütáma nawa nichocu ya yima ããne. ¹⁶ Rü choma i Ngechuchu, rü guxãma i pema i yaxõgüxütanüwa chanamu i chorü orearü ngerü na pemaã nüxü yaxuxüxcèx i guxüma i ngẽma chorü ore. Rü choma nixĩ i Dabítaa chiixü. Rü choma nixĩ ya yima woramacuri ya pèxmama poraãcü nangónexèècürüü chiixü”, ñanagürü. ¹⁷ Rü Tupanaãë i Üünexü rü guxüma i yaxõgüxü, rü Ngechuchuxü ñanagürügü:

“¡Nuã naxü!” ñanagürügü. Rü yíxema nüxü ñnuxë i ñaã ore, rü:

“¡Nuã naxü!” ñatagügü. Rü yíxema itawáxe rü tüxü nachixégaxe, rü name nixĩ i nuã taxü rü tüxü nangetanüãcüma nawa taxaxe i ngẽma dexá i maxẽẽruũ. ¹⁸ Rü guxãma ya yíxema irüxñnuxë i ñaã Tupanaãrü ore i ñaã poperagu ümatüxü, rü tümamaã nüxü chixu rü ngëxguma chi texé íyatóxèègu i ngẽma Tupanaãrü ore i ñaã poperagu ümatüxü, rü Tupana rü tá tümacèx nanayexeraxèë i ngẽma poxcuruügü i ñaã poperawa nachiga naxümatüxü. ¹⁹ Rü ngëxguma chi texé nüxü üpetügu i wüxitama i ñaã Tupanaãrü ore i ñaã poperagu ümatüxü, rü Tupana rü tãütáma tüxü nüxü nangõxnetaxèë i ngẽma norü o i ngẽma naĩ i maxẽẽruũ i ñaã poperawa nachiga naxümatüxü. Rü ngëxgumarüü tá ta tãütáma tüxü nimucuchi nawa ya yima ããne ya üünene i ñaã poperawa nachiga naxümatüne. ²⁰ Rü yima nüxü ixucü i ñaã ore, rü ñanagürü:

“Ngẽmaãcü, paxa tá íchangu”, ñanagürü. Rü ngẽmaãcü yĩ. Rü choma i Cuáü rü ñacharügü:

“¡Nuã naxü Pa Cori ya Ngechuchu!” ñacharügü. ²¹ Rü chanaxwèxe i tórü Cori ya Ngechuchu ya Cristu poraãcü pexü narüngüxèë i guxãma i pemax. Rü ngẽmaãcü yĩ.